

Dadibi Bible

The New Testament in
the Dadibi language of
Papua New Guinea

Buk Baibel long tokples
Dadibi long Niugini



Dadibi Bible

The New Testament in the Dadibi language of Papua New Guinea
[mps]

Translation by Wycliffe Bible Translators

© 1987, 2001 Wycliffe Bible Translators, Inc.

Print publication by Bible League International

Web version

2014, Wycliffe Bible Translators, Inc.

www.Wycliffe.org

<http://pngscriptures.org>

www.ScriptureEarth.org



Creative Commons license (Attribution-Noncommercial-No Derivative Works)

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stremi samting i no orait long dispela tok orait, stremi tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long

<http://creativecommons.org/licenses/by-nc-nd/3.0>.

Sapos yu gat askim long dispela, **plis askim mipela**.

Table of Contents

The New Testament

	<i>page</i>
Dwagi Yai Gesi Po Matyugo Aşənî	
Matyu	Mat. 5
Dwagi Yai Gesi Po Makgo Aşənî	
Mak	Mak 103
Dwagi Yai Gesi Po Lukgo Aşənî	
Luk	Luk. 161
Dwagi Yai Gesi Po Jongo Aşənî	
Jon	Jon. 253
Godigo Şeşa Tagala Palai Bidigo Po	
Godigo Şeşa Tagala Palai Bidigo Po	Ap 321
Polgo Po Pas Rom Dabeba Aşənî	
Rom	Rom 413
Polgo Hasia Pas Deli Korin Dabeba Aşənî	
1 Korin	1 Ko 463
Polgo Korin Dabeba Si Wabo Pas Aşənî	
2 Korin	2 Ko 508
Polgo Galesia Dabeba Pas Aşənî	
Galesia	Gal. 538
Polgo Efesus Dabeba Pas Aşənî	
Efesus.	Ef. 558
Polgo Filipai Dabeba Pas Aşənî	
Filipai	Flp 576
Polgo Kolosi Dabeba Pas Aşənî	
Kolosi.	Kol 588
Polgo Hasia Pas Deli Tesalonaika Dabeba Aşənî	
1 Tesalonaika.	1 Te 600
Polgo Si Wali Pas Tesalonaika Dabeba Aşənî	
2 Tesalonaika.	2 Te 610
Polgo Hasia Pas Deli Timotibolo Aşəna Tolai	
1 Timoti	1 Ti. 616
Polgo Si Wali Pas Timotiba Aşənî	
2 Timoti	2 Ti. 630
Polgo Pas Taitusbolo Aşənî	
Taitus.	Tai 640
Polgo Pas Filemonba Aşənî	
Filemon.	Flm. 647
Hibrû Dabeba Tolali Pas	
Hibrû.	Hi 651

Jemsgo Aséani Pas						
Jems						Jem 690
Pitago Hasia Pas Deli Aséani						
1 Pita.						1 Pi. 704
Pitago Si Sogo Aséani Pas						
2 Pita.						2 Pi. 717
Jongo Hasia Deli Sogo Aséani Pas						
1 Jon						1 Jn 725
Jongo Si Sogo Pas Aséani						
2 Jon						2 Jn 736
Jongo Sela Sogo Wabo Aséani Pas						
3 Jon						3 Jn 738
Jutgo Aséani Pas						
Jut						Jut 740
Kraisgo Geme Dualali Sę Pedelabo Po Jonbolo Ola Mani.						Ped. 745

Dwagi Yai Gesi Po Matyugo Aşənî

Hasia nedebô tau sabo po

Te bidi Matyu aga te Juda hani bidi bidai, tama agai homugo te Juda we bidi augwaligo agai aşənî po nedama tama augwaligo hania koneaibao, Jisas da te Godigo te we bidi tau somainu sa muani bidi Krais dao, te Juda dabego Mesaia bidi mu dao. Tama Matyugo homugo me te Juda dabego e me konea somainu yali, Jisas da te moni genuai Tuni Bidi dao. Te Juda bage mebago Jisasde dwagi yai homu eyu aga sali goli, te augwali hauwa umabô bidi augwaligo aga me sabeo. Matyugo dabolo hania ola mobao, te Jisas agai te Godigo te we bidi tonalubo kolesaga tede po hauwa ola mani.

Matyugo aşənî gesi dwagi yai po te buk dabe me si me si elalubo te buku me deli wali e buku da te buku dabego te Jisas e tđde bidibadi pedelali şe dabede po pusali. E bukude te wegi Mariago Jisas ame nani sogo yali şe po pusali, te po pusus pali, te Jisas augwaligo elama, tama te gû pagede ma hodaluali sogoba te po usu nigi palio, tama aga hani dabe tagalama, tama aga dagaluba holai dao.

Te genuai şe me deli te Matyugo ola maiabo homu yali, te e tiwai şe, Jisasde yali şego te Godigo polobadu po dâq weyu, te po aşənî buku dabe nogi Olpela Testamen ma Polobadu Kontrak dabede wali po dabeba mu usu nani. Godigo bomo yai po dâq weyu, te bidi me deli tagala palama, te Israel dabe ma saibao po wali, tama e bukude te ola mayu, te Jisas te bidi tama dao po walio. Te buk Matyu hauwa pedai tomode te pogo ola mayu, te Jisasgo yali şe e tiwai da po ola mani, te po dabe augwaligo te Godigo po pusali bidi profet dabego polobadu pusali po dabeba mu usu nai dao.^a

Te gasa genuai şe mede te buku Matyugo te po wai, te dagalu tomode elalubo genuai bomo ma te Godigo genuai bomo elalubo te tama po wali. Te Jisasgo yali şede naga God te tigidali we bidi dabego king mu pedelabo homu elalubao, tama agai homugo tigidali we bidigo agai homu kolesaga naga wali mu pomainogo homu ebo dao. Te buku Matyu pedai a nagade te Jisasgo pusali bobage po dabe a naga elalubao. Hasia pusali po te Dâj 5-7 tede elalubao, tama Jisas te bulu du me deli daide bidu pusali po dabe te elalubao. Tede wali pogo te God aga we bidi hani dabe mu bidibo we bidi dabego yabo kolesaga po ola mawai. Te si wali

^a Te Dâj 1:22-23; 2:4-6; 2:14-15; 2:23; 4:13-16; 8:16-17; 12:15-21; 13:34-35; 21:2-5; 21:16; 26:24; 26:31; 26:54; 27:6-10, te tama dâj dabede te tiwai po elalubo suo.

bobage po te Daj 10de elalubao. Te wali po te Jisas aga wali bilali sę bidi dabeba mani po da, te augwali pelama, te gasa we bidi hani dabeba te Jisasgo po pusigi pabo side yabo sę dabede po olama wali po dao.

Te selä wali bobage pogo te po wali, te Daj 13de te tiwai po wali, Jisasgo te God agai genuai bomo tomode elalubo kolesagade po begelama, te we bidi dabe augwaliba ola mabo po pusai. Te me si me si wabo bobage po, te Daj 18de te po elalubao. Jisasgo te aga wali mu pelama bidibo we bidi dabego ebo kolesagade po pusali. Te a naga wabo bobage po, te Daj 24-25 tede elalubao. Jisasgo te tama wali, te e tə me dagalu te silabo side yabo sę dabe po wali. Te e bukude digi weyu te mena bidi mugo te e buku aşeanı po wali te me elalubao. Tiali goli e bukugo nogi te tiwai sali, Matyugo aşeanı gesi dwagi yai po dao. Augwaligo homugo e Matyu homude koneani, aga te takis mone sabo sę ebo bidi bidali, te Daj 9:9-13 tede te po elalubo suao.

Jisas Kraisgo nōq wāj hani dabe augwaligo nogi
(Luk 3:23-28)

1 ¹E te Jisas Kraisgo nōq wāj hanigo nogi nedada pabo po e dao. Jisas aga te Devitgo hani, tama Devit aga te Abrahamgo bidi hani dao.

²Te Abraham aga ogwa Aisak. Tama Aisak aga ogwa Jekop. Tama Jekop aga ogwa Juda te aga ama dede dali dao. ³Juda aga ogwa Peres me Sera te si da. Te augwa si ida Tamar dao. Tama Peres aga ogwa Hesron. Tama Hesron aga ogwa Ram. ⁴Tama Ramgo ogwa Aminadap. Tama Aminadapgo ogwa Nason. Tama Nasongo ogwa Salmon. ⁵Tama Salmongo ogwa Boas, tama Boas aga ida te aga Rahap. Tama Boasgo ogwa Obet, tama Obet aga ida te Rut. ⁶Tama Obetgo ogwa Jesi. Tama Jesi aga ogwa te tuni bidi Devit dao.

Tama Devitgo ogwa Solomon, te Solomon aga ida te polobadu te bidi Uriago we dao. ⁷Tama Solomon aga ogwa Rehoboam. Tama Rehoboam aga ogwa Abiya. Tama Abiya aga ogwa Asa. ⁸Tama Asa aga ogwa Jehosafat. Tama Jehosafat aga ogwa Joram. Tama Joram aga ogwa Usia. ⁹Tama Usia aga ogwa Jotam. Tama Jotam aga ogwa Ahas. Tama Ahas aga ogwa Hesekia. ¹⁰Tama Hesekia aga ogwa Manase. Tama Manase aga ogwa Amos. Tama Amos aga ogwa Josaia. ¹¹Tama Josaia aga ogwa Jekonia te aga ama dede dali dao. Te sogo, te augwali bidibadi, te boi bidi dabe augwaligo te Israel dabe aiyaba elaluama, tama augwali te Babilon buluba kalabus sę emainogo sela pali.^b

¹²Te augwali Babilon buluba kalabus egi pai, tialima Jekonia aga ogwa Sealtiel. Tama Sealtiel aga ogwa Serubabel. ¹³Tama Serubabel aga ogwa Abiut. Tama Abiut aga ogwa Eliakim. Tama Eliakim aga ogwa Asor.

¹⁴Tama Asor aga ogwa Sadok. Tama Sadok aga ogwa Akim. Tama Akim

^b 1:11 2 Kin 24:14-15; 2 Sto 36:10; Jer 27:20

aga ogwa Eliut. ¹⁵Tama Eliut aga ogwa Elesar. Tama Elesar aga ogwa Matan. Tama Matan aga ogwa Jekop. ¹⁶Tama Jekop aga ogwa Josep. Tama Josep te we Maria aga bidi dao. Tama Mariago Jisas ame nai, augwaligo aga nogi te Krais da wabo dao. Te aga sa muyu asaiba wali bidi dao.

¹⁷Tama te tiwai nedada pelama, tama Abrahamgo hani tigidalide gagalasa aselama Devitgo haniba sabolali, te nogi si olama saçago badu me si me si hani dao. Tama tigidali Devitgo hanide gagalama asali augwali te Babilon buluba kalabus egi pali sogo, te me te nogi si olama saçago me si me si hani dao. Tama augwali Babilonba kalabus egi pali sogo, te Godigo sa muani bidi Krais pedalabo sogo me, te hani tigidali me te nogi si olama saçago me si me si hani bidi dao.

Mariago Jisas Krais ame nani

(Luk 2:1-7)

¹⁸Te Jisas Krais aga ame nani po, e tiwai dao. Aga ida Maria augwaligo Josepbolo noma po wai. Tiali goli augwali si taluama bidisiqbadi digi, tama Mariago suali aga te Godigo Tedali Mobo Bidigo se yalima haliga yai elaluai. ¹⁹Maria aga bidi Josep, aga te doloba pai bidi da, tama agai Maria haliga elalubo po odobaso, tama agai Mariabolo hale mabo hagela homu yai. Tama agai dua digi naga tama aga tagalai homu yai. ²⁰Tama Josepgo te homu idubadi, tama nadé Genuai Bidigo ensel mobo bidi me deli agaba pedelai. Ensel bidigo te po wali, “Josep, Devitgo ogwa, nago naga we Maria sabo wi egio. Odao. Te wai aga haligade sali, te Godigo Tedali Mobo Bidigo aga mawai dao. ²¹Te agai te wai ogwa ame naibao, tama nago aga nogi Jisas poao. Magi baso meni, agai te we bidi augwaligo seğe elalubo sela şanama tama augwali ma saibao,” te po wali.

²²Te tigidali pedelali se te tiwai te po me deli te Genuai Bidigo te agai po pusubo profet bidigo pedauwalidu wali po usu nanio. Te po pusubo profet bidigo te polobadu mu pusai po e tiwai wai,

²³ “Odao, wegi me deli te bidi dali me pisawai, te wegi aga haliga elama, te wai ogwa ame naibao.
Tama augwaligo te wai nogi Emanuel nogi yaibao,” te po wai.

Tama te nogi page e tiwai dao, God aga da dali bidibao.^c

²⁴Te Josep godege pilama hodaluama, tama agai te Genuai Bidigo ensel mobo bidigo aga dali wali po gilama te tiwai se yai. Agai aga we sai. ²⁵Tiali goli te wai ame nisiqbadi agai aga te we dali me pibe, tama aga te wego wai ogwa ame nabo te sogo pedelai. Tama agai te wai aga nogi Jisas poai.

^c 1:23 Ais 7:14

Po page koneai bidi dabe augwali aselama, Jisas suagasai

2 ¹Te Mariago Jisas te Betlehem bulude ame nani, te Judia tqde. Tama te sogo te moni gavman tuni bidi nogi Herot aga bidali. Tama Mariago te wai Jisas ame nai digi, tama nosali te sia ge pedalobo badu bidali po page koneai bidi dabe augwali meba te Jerusalem moni hanuba sabolali. Tama augwali te dagalu hqde haniani po page mu koneai dao. Tama augwali Jerusalem hanuba sabolama, tama augwaligo te po wai, ²“Wai me deli aga te Juda dabego tuni bidi pedalainogo ame nani, aga menade bidibowe? Da te sia ge pedalobo badude bidibadi dago aga hq pedalobo sulama, tama agade kidu sugunama dago agade lotu po wainogo digibulu asai dao,” te po wai. ³Tama te gavman tuni bidi Herotgo te po wabo odama, tama aga noma siyu moni homu mu yai. Tama tigidali Jerusalem we bidi augwali me noma siyu moni homu yai. ⁴Tama Herot agai te pris tuni bidi dabe me, te Israel dabego bomai po page koneai bidi dabe dali deliba sisinama, tama agai augwalibolo hanalu wali, “Te Godigo sa muani nosali asaibao wali bidi Krais aga mena bulude ame naibawe?” ⁵Herotgo te po wai. Augwaligo agabolo te po wali, “Te Betlehem bulude, te Judia tqde dao. Te Godigo po pusubo profet bidigo po polobadu asęyu te po wai,

⁶ ‘Te Betlehem hanu, te Juda tq tomode, te Juda
bagego tuni bidi dabego gedude nago nogi te
dwasianunu elalugobeo. Te mu menio. Te nagede
genuai tuni bidi me deli pedelaibao, tama agai eno
hani Israel tonaluabo bidi dao,’ te po asęani,”
augwaligo te po Herotbolo wai.^d

⁷Tama te po odolama, tama Herotgo geme te sia ge pedalobo badu asali te po page koneani bidi dabe augwali i wai. Tama augwali aga pageba aselama, tama dua dua eyu agai augwalibolo “Te dagego suali hq te mena sogo pedalaliwe?” te po hanalu wali. Tama augwaligo agabolo te hq pedalali sogo pusali. ⁸Tama tilama, agai augwali te Betlehem buluba tagala paliyu, tama te po wali, “Dage pelama, tama bomo elama te wai gegao. Tama dagego gegelama subaso da, teda dagego po enaba ma selasaao. Tama ena me pelama, agade kidu sugunama, eno agade lotu po wagi paibao,” Herotgo te po wai.

⁹Te augwaligo te tuni bidigo po odama, tama augwali pai. Tama pobadi, te hq polobadu augwali te sia ge pedalubo badude bidibadi suali hq, te hq augwali asobodu polasa pelama, tama te wai bidibo be pedu ugwidu dolo dolaluai. ¹⁰Tama augwaligo te hq sulama, tama augwali wiegi yai homu genuai pemene mu yai. ¹¹Tama augwali te be tomoba

^d 2:6 Mai 5:2

pelama, tama augwaligo te wai aga ida Maria dali suai. Tama augwali tobolu basi gulama, tama kidu sugunama, te waiba lotu po wai. Tama augwaligo augwa wa dabe dalama, tama augwaligo te waibolo wiegi yai nai meba olo mawai, te kapa nogi gol me, te wiegi yai denami ebo pauda nai me, te tigide wiegi yai denami ilibo nai, te tama nai te wai olo mawai.

¹² Tama tilama, tama Godigo nade augwalibolo te po pusali, tama augwa te moni gavman tuni bidi Herot bidibo digi ma pigio te po wai. Tama augwali gasa tudu peyu, augwa buluba ma pai.

Josep aga we dali wai bɔq̄ augwali Isip buluba pai

¹³ Te Jisas suagasali po page koneai bidi dabe pela silai digi, tama Genuai Bidigo ensel mobo bidi Josepba nade pedalai. Ensel mobo bidigo te po wai, “Nage hodaluama te wai bɔq̄ aga ida dali selama, tama Isip tq̄ba wi pao. Te genuai gavman tuni bidi Herot agai te wai bɔq̄ te ela muabo homu eyu, aga gegebo tamadi gagalaibao. Tama tibaso, megı wi pao. Tama nage Isip tq̄de bidibadi te eno ma asao obaso nage asao,” te po wai. ¹⁴ Tama Josep hulide digi hodaluama te wai aga ida dali selama, tama aga Isip buluba pabo gagalali. ¹⁵ Tama Josep te Isip tq̄de bidibadi tama te moni gavman tuni bidi Herot isabo sogo tonaluyu bidali.

Te pedalali s̄e te tiwai te po me deli te Genuai Bidigo te agai po pusubo profet bidigo pedauwalidu wali po usu numainogo yai. Agai te po wali, “Eno ogwa aga Isipde bidibadi, tama eno aga tedu asomainogo i wai dao.”^e

Herotgo pode augwaligo wai bɔq̄ dabe hauwa ela muai

¹⁶ Tialima te genuai gavman tuni bidi Herotgo koneama, te giliga pedalobo badu asali po page koneai bidi augwaligo agai wali po tudiba munama, tama gasa tudu geme pai homu yali, tialima aga s̄eb̄e mu yai. Tama agai enesigi bidi dabe tagala paliyu, augwalibolo te po wai, “Dagego te Betlehem bulude me te p̄ade elalubo bulude me tede bidibo ogwa wai dabe te kibu be si yabo tomode augwali tigidali ela muao,” te po wali. Agai te po page koneai bidi augwalibolo te h̄o hasia pedelali sogode hanalu badi, tama augwaligo aga dali te wali po homugo ma koneama, agai kibu be si weyu tama tiwai dao.

¹⁷ Tama te s̄e ebogo te Godigo po polobadu pusali profet bidi Jeremaiago wali po me deli usu nanio. Agai te po wai,

¹⁸ “Augwaligo po me deli te Rama hanude odali.

Augwaligo te genuai gela wabo me te hobede yabo i wabo me odali. Te we Resel aga wai dabe hagede

^e 2:15 Hos 11:1

gela obao, tama te we bidi augwaligo aga homu wiegi yai me ilibo usu ebe. Magi baso meni. Aga wai dabe augwali tigidali isalio.”^f

Josep aga me aga we me te ogwa dali augwali ma asai

¹⁹Te nosali te moni gavman tuni bidi Herot isai. Tialima Isip buluba te Genuai Bidigo ensel mobo bidi Josep bidibo digi nade pedelai. ²⁰Tama agai te po wai, “Nage hogodolama, te wai aga ida dali selama, tama nage te Israel tqba ma pao. Te wai elainogo yali bidi dabe, augwali isai dao,” te po wai. ²¹Tama tibaso Josep hogodolama, tama te ogwa wai aga ida dali oda selama, tama augwali te Israel tqba pai. ²²Tiali goli agai odali, te bidi Arkelausgo te aga aya gavman genuai bidi Herotgo yali sę selama, tama te Judia genuai tqde gavman tuni bidi sę eyu bidibo po wai. Tama aga te po odobaso, aga te Judia genuai tqba bidigi pabo wi yali. Tama nade gasa po me Godigo agabolo olama, tama aga te Galili genuai tqba pai. ²³Tama te tqba sabolama, tama aga te hanu me nogi Nasaret te hanuba bidigi pai. Tama te sę yaligo da te Godigo po pusali profet dabego wali po usu nubao, “Tama augwaligo aga te Nasaret hanu te bulu bidi dao, te po waibao,” te po wali.^g

**Jon te we bidi baptais mabo bidi agai po pusai
(Mak 1:2-8; Luk 3:1-18; Jon 1:19-28)**

3 ¹Te nosali augwali te Nasaret hanude bididubadi te Jon, te baptais mabo bidi aga pedelai. Aga te Judia tq tomode te bidi meni yai bulude bidali, tama agai te po augwalibolo pusali, ²“Dage dwai kolesaga yalide ge neyu, homu geasa peyu bidiao. Magi baso meni. Te dagalude bidibo bidi God agai we bidi tonalubo sę yabo bomo te paba asai dao, dage te bomo dologoba asiao,” te po wali. ³Jon da, te agade Godigo te aga po pusali bidi Aisaia te profetgo pedauwalide wali po usu nani bidi dao. Aisaiago polobadu e po weyu asęani,

“Te bidi meni yai bulude bidi me deligo i weyu,
bomonama te po obao, ‘Genuai Bidigo asabo tų
sisi ilao. Aga tų dabe dодолао,’” te po asęani.^h

⁴Jongo te moni kibu kamel nisigo te augwaligo nigai bobage ugwa munama, tama agai tigide te kugulu gudai. Tama agai te mano tiwai nai me te mege aji te nai si tuyu bidai. ⁵Tama te sogo te Jerusalem moni hanude bidai we bidi dabe me, te Judia genuai tq we bidi me, te Jordan pabo aji pаде bidali we bidi me, te augwali tigidali Jon bidibo digi asai. ⁶Tama augwaligo augwa yali sęge dabe pusuyu, tama Jongo augwali te Jordan aji de baptais mani.

^f 2:18 Jer 31:15 ^g 2:23 Ais 11:1; Mak 1:24; Luk 2:39; Jon 1:45 ^h 3:3 Ais 40:3

⁷Tiali goli Jongo suali, te lotu po wabo bidi hani si te Farisi bage me te Sadyusi bage me te augwali me baptais somainogo asali, tama agai augwalibolo te sesanobo po weyu te po wali, “Dage te dwai hasamani dabego wai dabe, te Godigo te dwai sę yali we bidibolo dene ilabo sogo mu asaibao. Tama tialima mena bidigo dage dali po obaso, tama megı dage wi painogo ebawę? ⁸Tama dagego homu kolesaga begelebaso da, teda dagego dwagi yai kolesaga naga yao. Tama tiyu da, dagego duga homu kolesaga mu begelali te dago hania koneabao. ⁹Dagego eno pode gedı siyu, dagego homude te homu me egimio: ‘Te Abraham da, te dago aya da, tama tibaso da bugagia bidibao, te dago dena homu magi baso begelaibawę,’ te wagio. Eno dagebolo te po obao, God agai da e masigi dabego te Abrahamgo wai pedala wali da te pedalobo usu yaibao.

¹⁰Tama megı te sigi hwą ni pagede muai elalubao, te ni gelemainogo. Tama te nigo wiegi yai nai du walisiąbaso da, te tobage ni tigidali augwaligo gelama siaba s̄awaibao.”

¹¹“Te eno dage olo aijo baptais mabo te dage homu begelai elalubo te dąjı tiwai dao. Tiali goli ena tudi badu nosali asobo bidi, te agai bomogo eno bomo aiyaba elaluabao. Ena da, te wiegi yai bidi meni, tama tiyu eno agai s̄aqę nadoba tolabo te usu egobeo. Agai dage te Godigo Tedali Mobo Bidi me te sia dali si dagebolo mawaibao, te baptais mabo sę tiwai. ¹²Te nai dagalobo bidi tiwai agai aga savol te aga nogode tolalubao, tama agai te tubo nai wit ge dagalobo sę emainogo ebao. Tama agai te wit hogomu te tigidali sela s̄awaibao. Tama agai te wiegi yai wit ge naga aga wit ge muabo beba sisinaibao. Tiali goli agai te dwai wit hogomu te isisabo siaba ulaibao,” Jongo te po wai.

Jongo Jisas baptais mawai (Mak 1:9-11; Luk 3:21-22)

¹³Te Jon agai te we bidi baptais mabo sogo Jisas aga te Galili genuai tą tagalama te Jordan węba pai. Aga Jonba pali, tama aga te Jon nogode baptais sainogo tiwai. ¹⁴Tiali goli Jongo aga te paliaiñogo yali, tama te po wali, “Te ena nago baptais mabo te usu egi dao. Tiali goli nage enaba asalio,” te po wai.

¹⁵Tiali goli Jisasgo agabolo po wei ponoyu te po wali, “Woo, te nago eno wabo po wali peyu, te sę yao. Tama tiyu, te dago doloba pai kolesaga naga usu nama inao,” te po wai. Tama tialima Jongo agai po wali pai.

¹⁶Tama Jisas baptais selama, tama polo aga te wę tagalama te wę sesegeba holai. Tama dagalu tomode buga palima, te Godigo Mobo Bidi te aiyaba dulubo te agai suali, te ba hi tiwai tama aselama, te Jisasgo tigiba bidagasali. ¹⁷Tama pedauwali me delide te dagaludu i weyu, te tiwai po wai, “Te aga eno Ogwa dao. Eno aga godolo mu ebao. Tama eno homu agade te pemene wiegi yai ebo dao,” te po wai.

Satango Jisas usu sai
(Mak 1:12-13; Luk 4:1-13)

4 ¹Te sogo Jisas baptais selama, tama Godigo Mobo Bidigo Jisas te bidi meni yai buluba odasa pali, te Satango aga dwai sé yanama sinawainogo yai.ⁱ ²Tama Jisas nai tusiabadi aga te bidi sese si siade me hulide me bidai. Tama nosali aga nasi yai. ³Tama te usu sabo bidi agaba pedelama, tama aga dwai sé tomoba kegainu agai te po wali, “Nage te Godigo Ogwa da wida, teda nago po obadi e elalubo masigi dabego te begelama, te tubo nai bret pedalomainao, nago tumainogo yao,” te po wai.

⁴ Tiali goli Jisasgo e tiwai wali, “Godigo po bukude te po aşeanı, ‘Te tubo nai bretgo naga te bidi bidabo ula magobeo. Te bidigo bidibo ula te Godigo pedauwalide pedalobo tigidali pode sabo dao.’ ”^j

⁵ Agai te po obaso, tama Satango aga selasa te moni wiegi yai tedali hanuba pali, tama aga te Moni Lotu Be tempel pedu te ugwaba mu dододали. ⁶Tama agai agabolo po weyu te po wali, “Nage Godigo Ogwa da wida, teda nage te Moni Lotu Be pedu tedu aiyaba a тоба samonao. Godigo po bukude te po wai, ‘Agai aga ensel mobo bidi dabebolo nagede po olama, tama nage augwaligo nogo daide ugwaba saibao. Tiyu te nago sagà te masigigo me selidali weyu tama tiaibao,’ te po aşeanı,” Satango te po wai.^k

⁷ Jisasgo agabolo te po wali, “Tiali goli te bukude te po ma wai, ‘Nago Genuai Bidi God olo subigila usu sigio, sinagio. Aga te nago God dao.’ Te po elalubao,” wali.^l

⁸ Te Satango Jisas ma selama, tama te bulu du me ughanu yai me deli teba sela holai. Tama Satango agabolo te тёде genuai ula yai bomo me, te тёде tigidali elalubo wiegi yai nai dabe dali tigidali agabolo ola mani. ⁹Tama agai Jisasbolo te po wali, “Tama nago kidu sugunama tama basi gulama, ena dologoba peyu enabolo lotu po obaso da, teda eno te tigidali nai nagebolo mawaibao,” wali.

¹⁰ Tama Jisasgo aga dali te po wali, “Satan, nage gedao. Godigo po bukude te po wai, ‘Nago naga Genuai Bidi God dali naga lotu po weyu, aga dologode bidao. Tama nago agai sé deli naga дагу olama yao.’ Te po elalubao,” Jisasgo te po wali.^m

¹¹ Tama te Satango Jisas aga taga pali. Tama ensel mobo bidi dabe meba aselama Jisas tau sai.

Jisasgo sé ebo te Galili moni тёде gagalai
(Mak 1:14-15; Luk 4:14-15)

¹² Te Jisasgo te po odali, augwaligo Jon te we bidi baptais mani bidi kalabuside muani po wali, tialima aga Galili moni тё teba pai. ¹³Tama

ⁱ 4:1 Hib 2:18; 4:15 ^j 4:4 Bom 8:3 ^k 4:6 Tib 91:11, 12 ^l 4:7 Bom 6:16 ^m 4:10 Bom 6:13

aga te Nasaret hanude osogo bidama, tama tedu pelama, te Kaperneam buluba pelama bidigi pai. Te Kaperneam hanu te sigi wę sesegede elaluali, te Sebulun bidi hanigo tő me te Naptali bidi hanigo tő me te tő si te badu elalubo dao. ¹⁴Tama tiyu, te po me deli te Godigo po polobadu pusali profet bidi Aisaiago pedauwalide wali po usu nani, tama Aisaiago te po wali,

¹⁵ “Tama te Sebulun hanigo moni tő badu, me te Naptali hanigo moni tő te badu me, te sigi węba pabo tű badu, te Jordan pabo aji badu, te Juda hani isiąwai bidi dabe hauwa bidibo tő nogi Galili, ¹⁶te tő tigidalide bidibo we bidi augwali hulide bidaluali, tama augwaligo te genuai ula nanobo suai dao. Te we bidi augwali te isabo be hulia sai digi bidaluali tama te wiegi yai ula augwaliba pedelai dao.”ⁿ

¹⁷Tama te sogo Jisasgo agai po pusubo sę ebo gagalai. Agai te po oduali, “Dage dwai kolesaga yalide ge neyu, homu geasa piąo. Te Godigo te we bidi tonalubo sę yabo sogo pađe dao.”

Jisasgo bidi me si me si i olama augwali aga wali asa wai
(Mak 1:16-20; Luk 5:1-11)

¹⁸Te me sogo Jisas te Galili sigi wę sesegedu pobadi, tama agai te augwali ama name si suali, te bidi me nogi Pita, me aga ama, Andru, augwali sigo te suğų sabo wa te sigi węba sabo sę yai. Te augwali sigo te suğų selama mone sabo bisnis sę yai dao. ¹⁹Jisas agai augwali sibolo te po wai, “Dage si ena wali asao, tama eno dage si te bidi sabo sę ola mawaibao.” ²⁰Tama polo augwali sigo te suğų sabo wa tagalama, tama Jisas aga wali pai.

²¹Tama Jisas aga ma pobadi, tama agai gasa ama name si me suali, te Jems, te Sebedigo ogwa, te aga ama Jon dali. Te augwali si augwa si aya Sebedi dali te moni gebade bidibadi, tama augwa te suğų sabo wa dodolobo sę iduai. Tama agai augwali si i wai. ²²Tialima tama polo augwali sigo te augwa si aya me te geba me tagalama, tama Jisas wali pai.

Jisasgo po pusulama we bidi hauwa usu ilai
(Luk 6:17-19)

²³Te Jisas aga te moni tő Galili te tigidali sesege badu aga biligi pai. Agai aga ola mabo po te Juda dabego bomo yai po ola mabo be tomode te we bidibolo ola mawai. Tama ola mayu, agai augwalibolo te Godigo we bidi tonalubo sęde te gesi dwagi yai po pusali, tama te tigidali haniani

ⁿ 4:16 Ais 9:1-2

gasi dabe me te tigidali dwai naigo te tigi dolai we bidi augwali tigi usu ma ilai dao. ²⁴Tama augwaligo agai te sę yali po tigidali te Siria genuai tqde bidibo we bidibolo me te po pusai. Tama te po augwaligo odama, tama augwaligo te tigidali dwai gasi haniani eyu, te dwai dene sali bidi dabe me selasa asali, tama te dwai noma bidi elalubo bidi me, te esela pabo bidi dabe me, tama te saga dili bomo isai bidi dabe me, te sela asai. Tama agai augwali wiegi yai ma ilai dao. ²⁵Tama te genuai we bidi hani hauwa, te genuai tq Galilide bidibo we bidigo me, te Dekapolis tqde bidibo we bidigo me, te moni hanu Jerusalem we bidigo me, te Judia genuai tqde bidibo we bidigo me, te Jordan pabo qị te tq u badu bidibo we bidigo me, te tq tigidalide bidibo we bidi mebago naga te aga wali pai.

Jisasgo po te bulu du bageba holama ola mani

5 ¹Te Jisasgo te genuai we bidi hani aga wali asobo suali, tama aga te bulu du me deli bageba holai. Tama aga te bulu dude dulalubadi, tama aga wali bilali bidi dabe augwali aga pageba asali. ²Tama agai po augwalibolo weyu te po ola mani,

- ³ “Te kolesaga koneani we bidi augwali te Godigo gedude augwa digi usu elama aiyaba elaluama bidibo we bidi dabe, te augwali homu wiegi yai pemene ebao. Te Godigo obo tomode augwaligo bidabo madi elalubao. ⁴Tama te gela udubo we bidi dabe, te augwali homu pemene yaibao. Te Godigo augwali umumanama homu wiegi yai pemene ma ilaibao. ⁵Tama te nagamea pai homu eyu augwa dene bugagia tololo we bidi, te augwali homu wiegi yai pemene emainao. Te Godigo tq tigidali augwalibolo mawaibao. ⁶Tama te doloba pai kolesaga sainogo bomo eyu godolo ebo we bidi dabe augwali wiegi yai homu pemene emainao. Te homu tiwai ebo we bidi dabe augwaligo homu kolesaga te Godigo augwali mu usu nama te tiwai pedelaibao. ⁷Te gasa bidi dabe augwali dali homu dene eyu augwali olo mu tau sabo we bidi dabe, te augwali homu pemene wiegi yai emainao. Te Godigo augwalibolo me te homu dene eyu olo mu tau sabo kolesaga yaibao. ⁸Tama te wiegi yai kolesaga eyu, te meda isama doloba pai we bidi dabe augwali, te augwali homu pemene wiegi yai emainao. Te augwaligo augwa gedugo God sueibao.
- ⁹ Tama te wado po wabo me te hwıbo po te isilibo

bidi dabe, te augwali wiegi yai homu pemene emainao. Te tama tebo bidi dabe augwalibolo te augwali Godigo ogwa dabe da wabo nogi waibao.

10 Te bidi dabego te doloba pai kolesaga wali pabode sulama, te kolesagade te dwai sę ebo bidi dabego augwalibolo sege sobaso da, teda augwali homu pemene emainogo inao. Tama te Godigo obo tomode augwaligo augwa bidabo madi elalubao.”^o

11 “Tama dagebolo sege mabo bidi dabe augwaligo suali dagego ena wali pabo subasso da, te augwaligo dage dali dwai posobo po weyu, tama dene mobadi augwaligo te kedu meni yai tibo po haniani weyu ebaso da, teda dage homu pemene wiegi yai yao.^p 12 Tama dage homu bugagia wiegi yai elama, pemene mu eyu bidiqo. Te genuai wiegi yai nai mugoo dage dagalude tonalubao. Te tiwai naga te bidi dabe augwaligo te Godigo po pusali profet bidi dabebolo hasia polobadu dene mawai tiwai dagebolo me tama tibao.”^q

Konealubo po dą̄ wabo bidi aga te tamu dali sole ula tiwai si dao
(Mak 9:50; Luk 14:34-35)

13 “Te dage konealubo po dą̄ wabo we bidi dabe, dage e tqde bidibo we bidi tomode bidiyu, tama dage te tamu aga sę ebo tiwai eyu bidiqo. Te tamu aga pusu te tubo naibolo mabo dao. Tama dagego dwagi yai kolesaga ebogo te gasa we bidi augwaligo ebo kolesaga dwagi yai ilao. Tiali goli, tamu halia peyu pusu ebo tagaliyu da, teda dago magi ilama te tamu aga pusu yali ma saibawe? Menio, te tamugo da, te sę ma egobeo. Te bidi dabego sela sawu naga eyu, tama augwaligo sagago agabo dao.”

14 “Te dage te tigidali tqde ula tiwai dao. Te hanu me deli te bulu du bagede elaluyu, tama be hulide te augwaligo sole lam ula ebadi, tama te hanu aga duala sabo te usu egobeo. 15 Tama te bidi dabe augwaligo te sole lam domonama te baket dologoba me mubo menio. Te meni. Augwaligo te sole ula te tebol saiba munama, tama te sole ulago te bede bidibo we bidi ula mabo dao. 16 Tama te tiwai naga dagego wiegi yai kolesaga ebo te sole ula ebo tiwai dao. Tama tibaso dagego ebo dwagi yai sę te we bidigo sumainao. Tama augwaligo sulama, tama augwaligo duga Aya te dagalude bidibo bidi nogi uwawa saibao.”

Jisas te Godigo bomo yai po usu numainogo asai

17 “Dagego homugo ena asali eno te Godigo bomo yai po me te Godigo po pusali bidi profet dabego ola mani po dali sela sawainogo asali homu egimio. Menio. Te eno te po sela sawainogo asobe, te eno te po mu usu

^o 5:10 1 Pi 3:14 ^p 5:11 1 Pi 4:14 ^q 5:12 2 Sto 36:16; Tpi 7:52

nainogo ena asai dao. ¹⁸ Te eno mu po dagebolo obao. Te dagalu dali to si silisabadi da, tama te asęani bomo yai po dwasianunu me deli munu me siligobeo. Menio. Te po tigidali augwali elaluaibao. Tama elalubadi te bomo yai pogo aga se tigidali silaibao. Tama aga se silibaso da, te sogo naga te bomo yai po me silaibao. ¹⁹Tama tibaso bidi me deligo te bomo yai po dwasianunu me deli tagaliyu, tama agai gasa bidi dabebolo te tiwai kolesaga ola mobaso da, teda te bidi aga nogi me te Godigo we bidi tonalubo sogode, te bidigo nogi dwasianu pedelaibao,. Tiali goli te bomo yai po wali pelama te we bidigo te po wali pomainogo ola mabo bidi, agai nogi da te Godigo we bidi tonalubo sogo genuai pedelaibao. ²⁰Tama tibaso, eno dagebolo obao, te dagego doloba pai kolesaga ebogo te bomo yai po koneani bidi me te Farisi dabe dali augwaligo kolesaga dagego aiyaba me elalusıboso da, teda dage te Godigo we bidi tonalubo obo tomoba pogobeo.”

Jisasgo te gesi usu ni mawai
(Luk 12:57-59)

²¹ Te Jisasgo te po wai, “Te Mosesgo dagego wai dabebolo polobadu ola mani po te po dagego odai dao. Agai te po wai, ‘Te nago bidi me ela mugio. Tama bidi mego bidi me deli ela mubaso da, teda dagego te bidi aga te po tu ebo bidiba odasa pao,’ te po wai.^r ²²Tiali goli megı eno po dagebolo obao: Tama bidi mego aga ama dali sebę eyu da, te bidi aga po tuba odasa paibao, tama dene saibao. Tama bidi mego aga ama dali dwai po obaso da, teda te bidi aga te polalubo kaunsil bidibo digiba pelama, po tu emainogo yao. Tama bidi mego aga ama dali nogi posobo po weyu, nage se isiąbo homu meni yai dwai bidi dao weyu da, teda te bidi aga te dwai madigi sia dabo dene sabo buluba paibao. ²³Tama tibaso, nago Godibolo maiabo nai ofa te Moni Lotu Be tempelba sela aselama, tama te maiabo nai muabo saide bidibadi, tama te sogo polo ma homugo koneani naga amago po me deli elalubo homu nago ebaso da, ²⁴teda nago te Godibolo mawainogo yali nai ofa tede munalubadi taga soao. Tama nage pelama, hasia naga ama dali po bolo dodolao. Te po dodola silama, tama megı da nage pelama, tama Godibolo ofa nai magi pao.”

²⁵ “Tama bidi me deligo nage po tu ilainogo ebaso da, tama te po tu yabo sogo dage si tudu pidubadi, tama polo nago po duga si te po dola sao. Te sogo nago aga dali dodola sisawani da, te po tu yabo bidigo nage te po tu dodolobo bidi jasgo nogoba muaibao, tama jasgo nage enesigi bidigo nogoba munama, tama enesigi bidigo nage kalabusiba muaibao. ²⁶Tama eno mu po dagebolo obao, nago te po tude sali negeli wei tigidali masiabadi, teda nage kalabuside bidibo tagalogobeo,” Jisasgo te po wai.

^r 5:21 Sai 20:13; Bom 5:17

We sabo kolesaga dolobo kolesagade po wai

²⁷Te Jisasgo te po wai, “Te Mosesgo dagego wāj dabebolo polobadu ola mani po te po dagego odai dao. Agai te po wai, ‘Penani egio.’^s ²⁸Tiali goli megi eno po dagebolo obao: Te bidi me deligo agai te we me deli olo naga agai homude godolo ebo homu eyu, tama te we dali penani sē yabo homu eyu tonono eyu da, te bidi agai homude te bomo yai po bolama, tama agai homude te penani sē ebo tiwai yali dao. ²⁹Tama tibaso, nago dolo nogo badu elalubo gedugo nage te dwai segeba kegebaso da, teda nage hagaidlali weyu nago te gedu gudama sayao. Tama nago tigi me badu te tiwai hagabaso, te dwai dao. Tiali goli nago tigi sese bidibadi tama nago dwai sē edubaso da, teda augwaligo nago tigi sese te dwai dene sabo madiba sāwaibao. Te dwai mu dao. ³⁰Tama nago dolo nogogo me nage te dwai sē ilibaso da, teda nago te nogo togolama sayao. Tama nago tigi me badu te tiwai hagabaso, te dwai dao. Tiali goli nago tigi sese bidibadi tama nago dwai sē edubaso da, teda nago tigi tigidali te dwai dene sabo madiba paibao. Te dwai mu dao,” Jisasgo te po wai.

We tagalobo kolesaga (Mat 19:9; Mak 10:11-12; Luk 16:18)

³¹“Po me polobadu augwaligo te po wai dao: ‘Te bidi me deligo aga we tagalobaso da, agai te we tagalobo po page aşenama, tama te pepa te webolo mao.’^t ³²Tiali goli megi eno dagebolo te po obao: bidigo aga sai we tagalalyu, tama te wego dwai penani sē me isəbadi, teda te bidigo te wego te penani sē ilibao, te we gasa bidigo siyu da. Tama te tobage we sabo bidi me agai te penani sē tama ebao.”

Mu po da wabo kolesaga

³³Jisasgo te po wai, “Te Mosesgo dagego wāj dabebolo polobadu ola mani po me te po dagego odai dao, agai te po wai, ‘Nago te Genuai Bidi Godibolo te eno te sē mu yaibao po weyu, tama nago te po dāj olama, tama nosali nago te dāj wali po togogio. Menio. Nago te po dolo wali peyu te sē yao,’ Mosesgo te po wai.^u ³⁴Tiali goli megi eno e po dagebolo obao: dagego te duga nosali yabo sēde po weyu, tama we bidi augwaligo te mu po dao homu emainogo dagego te po dāj wabo po munu me wagio. Mu menio. Dagego po me deli dāj walalyu, dagalu me nogi ilamu. Magi basowe, dagalu da, te God dulalubo sia sai dao. ³⁵Tama dagego te tō nogi elama, te po me deli dāj waligio. Magi basowe, tō te dwasianu sai te Godigo sāqā mubo madigi dao. Tama dagego te moni hanu Jerusalemdē

^s 5:27 Sai 20:14; Bom 5:18 ^t 5:31 Bom 24:1-4; Mat 19:7; Mak 10:4 ^u 5:33 Prs 19:12; Nam 30:2; Bom 23:21

te po me deli däq waliyu te nogi wagio. Magi basowe, te Jerusalem te genuai tuni bidigo moni tedali hanu dao.³⁶ Tama nago naga toboli nogi elama te nago po wabo me deli te me däq waligio. Magi basowe, te nago toboli nisi me te tedela yai me te sisi yai te pedalainogo ilibo te me nage usu egobeo. Te Godigo sę naga dao.³⁷ Tama dagego ‘Awe’ obaso da, teda ‘Awe’ naga waiyäo. Me ma, dagego ‘Menio’ obaso da, teda ‘Menio’ naga waiyäo. Teda usu yaibao. Tiali goli dagego duga wabo po mu däq omainogo te gasa po me obaso da, te po te dwai bidi Satan aga te po page bidi dao,” Jisasgo te po wai.

**Jisasgo te dwai sę wei ponobo kolesagade po wai
(Luk 6:29-30)**

³⁸ “Te Mosesgo dagego wäi dabebolo polobadu ola mani po me te dagego odai dao, te po e dao, ‘Te bidi me deligo nago gedu dolobaso da, teda nago agai gedu me dolao. Tama bidi me deli agai nago kele me deli togobaso da, teda nago aga kele me deli me togwao.’^v ³⁹ Tiali goli megı eno dagebolo obao, te bidi mego dwai sę dagebolo ebaso da, te dagego agabolo te sę ebo wei ponogio. Menio. Te bidi me deligo nage nabo gede me badu nogogo elebaso da, teda nago gasa me badu nabo ge me te begelao, agai tede elemainaao. ⁴⁰ Tama bidi mego nage dali po tü elama, tama nago holobo ugwa sainogo ebaso da, teda nago holobo ugwa te agabolo mao, te nago kedau sogo gudubo kol siot te me mao. ⁴¹ Tama bidi me deligo bomonama nage dali nago agai walu te däj deli te digibulu gana sela pina obaso da, teda nago agai walu te däj deli wali tagalama tama nage aga dali te däj si ugwanu gana mu pao. ⁴² Tama bidi me deligo nage dali te nai me deli po hanalu obaso da, teda nago te nai aga mao. Tama bidi mego nage dali negeli sainogo homu ebaso da, teda nago te bidi aga tudiba munama tama nage gesabi gasaba gegi pigio. Agabolo te nai osogo mao,” Jisasgo te po wai.

**Jisasgo te boi bidi godolo ebo kolesaga po wai
(Luk 6:27-28, 32-36)**

⁴³ Jisasgo te po wai, “Te dagego odai, polobadu augwaligo te po wai dao, ‘Nago naga abagi godolo eyu, tama nago naga boi bidi dali dwai homu yao.’ ⁴⁴ Tiali goli megı eno dagebolo obao, dagego duga boi bidi dali dwagi yai homu eyu tama godolo eyu yao. Tama bidi meba augwaligo dagebolo dene mobaso da, teda dagego gedu haluasa po Godibolo wao, te agai augwali dali dwagi yai sę emainogo. ⁴⁵ Tama tiyu da, dage te duga Aya dagalude bidibo bidigo wai puluba mu bidaibao. Agai te tobage dwagi yai sę naga eyu, tama agai sia nanobo te dwai sę ebo bidi dabeba

^v 5:38 Sai 21:24; Prs 24:20; Bom 19:21

me te dwagi yai sə ebo bidi dabeba dali si te sia nanobo ula ilibo dao. Tama te tulubage tulubo me te doloba pai bidi dabeba me, te doloba pesiąwai bidi dabeba me te tulubage tuluyu ilibo dao.⁴⁶ Tama te bidi dabe augwaligo dage godolo ebo bidi dabe te augwali dali naga dagego dwagi yai homu elama godolo eyu da, te Godigo dagebolo dwagi yai nai magi baso mawaibawe? Te takis mone sabo bidi dabe augwaligo te tiwai sə ebo dao. Tiali goli dagego homu augwali dwai bidi dabe dao.⁴⁷ Tama dagego duga abagi dedebolo naga te siade da po weyu da, teda dagego te səde te gasa bidi augwali aiyaba elaluabawe? Te menio. Te Godigo po odosiąwai we bidi augwaligo me te tiwai kolesaga ebo dao.⁴⁸ Tiali goli dage, te dage wiegi yai kolesaga dali bugagia doloba pai mu bidiqo, te duga dagalude bidibo Aya aga bugagia doloba pai mu bidibo tiwai gilama yao,” Jisasgo te po wai.

Jisasgo te we bidi tau sabo kolesaga te po wai

6 ¹Te bulu du daide bididubadi, Jisasgo te po me wai, “Dage dua dao. Te we bidi dabe augwaligo dagego te wiegi wiegi yai kolesaga ebo sulama, tama augwaligo dagego nogi ugwaba somainogo te bidi dabe augwali gedude te duga wiegi yai kolesaga egimio. Te dagego tama kolesaga eyu da, te duga dagalude bidibo Aya agai te dage mawainogo sisi elama elalubo te wiegi yai nai te dagego me sogobeo.”

²“Tama tibaso, dagego tama tiao. Nago te magi nai meni yai bidi tau siyu, te masigi madu gebo si, te nago polasa te bu wabo nai biugel bu wabo bidi bolo tagala paligio, te ugwadu homugo naga po wabo bidi dabego ebo tiwai egio. Te we bidigo augwali nogi ugwaba somainogo tama augwaligo te we bidi gesabidide te nai meni yai we bidibolo masigi mabo dao, te bomo yai po ola mabo bede me, te pabo tude me te kolesaga augwaligo ebo dao. Eno mu po dagebolo obao, augwaligo te tobage sə elama, tama we bidigo augwaligo nogi ugwaba sai goli, te tama dao, te Godigo te sə ebode augwalibolo wiegi yai nai mu me magobeo. ³Tiali goli nago te magi nai meni yai bidi dabe augwali tau sabo si, teda te sə geme yao, tama nago pobase nogogo te dolo nogogo ebo sə koneabuo. ⁴Tama tiyu da, nago augwalibolo nai mabo sə te geme dulalua. Tama nago Ayago te nago geme dulalubo sə dabe subo dao, tama agai te wiegi yai nai wei nagebolo ponabao,” Jisasgo te po wai.

Gedu haluasa po wabo kolesaga (Luk 11:2-4)

⁵“Tama dagego gedu haluasa po wabo sogo, dagego te ugwadu homugo naga po wabo bidi dabe augwaligo ebo kolesaga tiwai egimio. Augwaligo te bomo yai po ola mabo be tomode dolaluyu, gedu haluasa po wabo godolo eyu, me te genuai pabo tū bagu badu me, te we bidi dabego augwali sulama, tama augwali

nogi ugwaba somainogo tiwai ebo dao. Eno mu po dagebolo obao, augwaligo te tobage sę elama, tama we bidigo augwaligo nogi ugwaba sai goli, te tama dao, te Godigo te sę ebode augwalibolo wiegi yai nai mu me magobeo.⁶ Tiali goli nago gedu haluasa po wainogo da, te naga be tomode dąi togali digi pelama, tama tų paliamma, naga Ayaba gedu haluasa po geme te be tomode nagaduba wao. Tama naga Ayago te nago geme dulalubo sę dabe subo dao, te agai te wiegi yai nai wei nagebolo ponaibao,” wali.

⁷“Tama dagego gedu haluasa po wabo sogo, te olo po hauwa widu geyu, te Godigo po odosiawai bidi dabego wabo po tiwai egio. Augwaligo homu augwaligo po hauwa widu gebasso, te Godigo te po odama, tama agai augwalibolo te hanalu wali nai mawaibao.⁸ Te dagego augwaligo ebo kolesaga wali pigio. Te sogo dagego duga Ayabolo po hanalu wasiąbadi, agai dage te tigidali nai habuge ebo te agai koneai dao.⁹ Tama dagego gedu haluasa po e tama wao,

‘Dago Aya, nage dagalude bidibo bidi, dago homugo
nago nogi wiegi yai tedali mu bideibao.¹⁰ Dago
homugo te nago te we bidi mu tonalubo sogo
daba asomainao. Tama te dagalude bidibo bidi
augwaligo nago homu kolesaga wali pabo tiwai
gilama, tama nago homu kolesaga e tőde bidibo
we bidi augwaligo wali pao.¹¹ Dago homugo
nago megi e sogode usu nama te da tuabo nai mao.

¹² Tama dago homugo nago dago dwai sę yali
sela sayaao. Te bidi dabe augwaligo da dali dwai sę
elama, tama dago augwaligo te dwai sę yali sela
sąbo tiwai yali gilama tama nago dago sęge sela
sayaao.¹³ Te da te dwai sę yanama sinawainogo
ebo sogo daba asidali weyu, nago te habu selao.
Tama te dwai sę page bidi agai da dolidali weyu te
nago da tau sao. [Tama nago te genuai bomo me
ula, te genuai nogi me te nagede sesemane sogo
bidada paibao. Mu dao, te tama tiwai pedalomainao,
te dago homugo dao.]’ Te tiwai eyu, gedu haluasa
po wao,” wali.

¹⁴“Odiao. Te dagego gasa we bidi augwaligo dage dali dwai sę ebo sela
sabaso da, teda duga Aya dagalude bidibo bidi agai te dagego dwai sę ebo
me te sela sowaibao.¹⁵ Tiali goli, dagego te gasa we bidi augwaligo dage
dali dwai sę ebo sela sasiąboso da, teda duga Aya agai me te dagego dwai
sę te sela sagobeo,” Jisasgo te po wai.

Tubo nai osogo gisilibo kolesaga po

¹⁶“Te dagego Godibolo po wainu tama nai osogo gisilidu gebo si, teda
dagego dwai gesabi siyu, te hulia sabo te tiwai te ugwidu homugo naga

po wabo bidi dabego nai osogo gisilama gesabi hulia sabo tiwai egimio. Te menio. Augwaligo gesabi doloyu, hulia sabo te we bidigo augwaligo nai gisilali sulama konemainogo ebo dao. Eno mu po dagebolo obao, augwaligo te tobage sə elama, tama we bidigo augwaligo nogi uwabwa sai goli, te tama dao, te Godigo te sə ebode augwalibolo wiegi yai nai me magobeo. ¹⁷Tiali goli dage da, te dagego God dali po wainu te nai osogo gisilidu gebo si, te dagego gesabi dologio, te dagego duga tobolude wel munama, tama dagego gesabi wə tela yao, ¹⁸te we bidi augwaligo dagego tubo nai gisilibo koneidali weyu tama yao. Te duga Aya te bidigo gedugo susiəbo bidi agai naga dagego ebo sə sueibao. Tama duga Ayago te geme dulalubo nai subo dao, agai dagebolo te wiegi yai nai wei ponaibao,” Jisasgo te po wai.

Wiegi yai doado bage dagalude sisinibo kolesaga po
(Luk 12:33-34)

¹⁹“Dagego duga wiegi yai doado bage e tqde sabogimio. E tqde dwai asibago me te yaba ilibo nai dabego te nai doloyu, me te nai wi sabo bidi dabego te be tomode munalubadi aselama, nai wi sabo dao. Tama tibaso, te nai e tqde sabogimio. ²⁰Te menio. Te dagalude te dwai asiba dabego me te doloyu, te dwai yaba ebogo te nai me dologobeo, tama te nai wi sabo bidi dabego te be aluama te nai wi me sagasogobeo. Tama tibaso, dagego duga wiegi yai doado bage te dagaluba naga saboama muiqo. ²¹Te dagego wiegi yai doado bage elalubo bulu, te bulude naga dagego homu konea palaibao,” Jisasgo te po wai.

Tigigo ula ebo po wai
(Luk 11:34-36)

²²“Gedu da, te tigide lam tiwai dao. Tama nago gedu wiegi yai elalubaso da, teda nago tigi me te tigidali te ula yaibao. ²³Tiali goli nago gedu dwai yaibaso da, teda nago tigi me te tigidali be hulia saibao. Tama nage tomode elalubo ula te be hulia sabo tiwai yaibaso da, teda te hulia sali te genuai mu yaibao,” Jisasgo te po wai.

Bidi deligo te genuai bidi side sə ebo usu egobeo
(Luk 16:13; 12:22-31)

²⁴“Te bidi deligo genuai bidi sigo sə ebo usu egobeo. Agai me deli dali dwai homu eyu, tama me dali te agai wiegi yai homu yaibao. Te agai me deli wali peyu, tama agai gasa bidi me aga homude bo weyu, te tudiba muaibao. Te tiwai dagego te Godigo sə dali te mone sabo sə dali yainogo ebo te usu egobeo. Te dage te mone dali doado bage dali si sabo sə ebo homu dologode bidiyu da, teda dagego duga homu te Godigo sə ebode bugagia mugobeo,” wali.

25 “Tama tibaso, eno e po dagebolo obao, dagego duga bidibo ula tigi tau mabo naide homu hauwa eyu, te po wagimio, ‘Da magi nai tugowe?’ ma ‘Da magi wę tueibawe?’ Tama dagego duga tigi tau siyu gudabo ugwade homu hauwa elama te po olamu, ‘Da magi ugwa gudugowe?’ Te bidabo ula elalubogo te tubo nai aiyaba elalubo dao. Me te tigi elalubogo te gudabo ugwa aiyaba elalubo dao. 26 Dagego te ba dabe suao, te dagalude bola pobao. Augwaligo nai bulusiąma, tama te nai sisinama te nai mubo beba me mubo meni goli, augwali nai te Godigo mabo dao. Tama tiyu, God agai gedude te ba dabe augwali genuai nai meni yai goli, agai augwali bugagia tonalubo dao. Tama dage da, dage agai gedude genuai dao. Tama tibaso, agai dage me bugagia tonaluiba. 27 Mu tama dao, dage tomode niwai bidigo moni homu ebogo te aga digi aga bidabo bubuga bobobage ma ilabo usu yaibawe? Te menio, usu me egobeo.”

28 “Tama magi baso dagego homu hauwa te tigide gudubo ugwade ebawe? Dagego te gide holobo plaua noswai suiqa, te augwali da magi ilama pedalobo dawe? Augwali da te se dene ebeo. Te augwaligo ugwa me nigibo menio. 29 Tiali goli eno dagebolo obao, polobadu te tuni bidi Solomon agai tigidali au dobage muyu, aga wiegi wiegi yai gudubo ugwa guduai goli, agai tigide muani au dobage te noswai plauago augo aga aiyaba elaluai dao.”^w 30 Tama te gide megi elaluali noswai, tama do da te noswai augwaligo togolama, siaba sawaibao. Tama te tiwai olo noswai te Godigo au ilibo dao. Tama dage te konealubo po dwasianu naga dąw wabo we bidi, dagego mu koneiqa. Godigo dage me bugagia tonaluyu, te ugwa dabe dagebolo me mu mawaibao. 31 Tama tibaso, dagego homu hauwa eyu te po wagimio, ‘Te da magi nai tugowe?’ ma ‘Da magi wę tugowe?’ ma ‘Dago gudubo ugwa dabe menade saibawe?’ Te dagego tama moni homu egimio. 32 Menio. Te kolesaga tigidali te Godigo po odisabo we bidigo wali pabo homu kolesaga dao. Tama duga Aya dagalu bidi agai dage te haniani nai habuge ebo si agai koneyu, tama agai dage tau saibao. 33 Tama tibaso, te naide moni homu isiąma, tama dagego hasia bolo te Godigo we bidi tonalubo se dali, me te wiegi yai doloba pai kolesaga sabo se bolo wali piduama sao. Dagego te tama kolesaga ebaso da, te nosali agai gasa nai dabe tigidali me dagebolo mawaibao. 34 Tama tibaso, dagego do yabo seđe homu hauwa mu egio. Te do pedalabo sege te augwa digi do dodololaibao. Te deli sogo ebo sege te sogo naga usu nama yaibao,” Jisasgo te po wai.

We bidi osola subo kolesaga po
(Luk 6:37-38, 41-42)

7 1 “Te Godigo dage osola suidali weyu tama dagego gasa we bidi dabe augwali osola subo kolesaga ebo tagaliqa. 2 Te dagego gasa we

^w 6:29 1 Kin 10:4-7; 2 Sto 9:3-6

bidigo ebo kolesaga osola sulama, tama augwali sege mabo tiwai gilama tama God agai dagego ebo kolesaga me osola sulama, tama dagebolo sege mawaibao. Dagego augwali usu sali usu nigo naga te Godigo dage me usu saibao. ³Tama tibaso, magi baso nago naga amago gedude elalubo dwasianu pobele bage suai, tiali goli nago naga gedude elalubo genuai pobele bage te bo nami tiwai te nago magi baso subo meniwe? ⁴Nago naga gedude te genuai bo nami tiwai elalubo pobele bage sel a sasiabadi, te nago magi baso naga amabolo te po weyu, ‘Ama, nago gedude elalubo pobele bage eno sela sawaio,’ te po obawe? ⁵Nage ugwdadu homugo naga po wabo bidi, hasia bolo nago naga gedude te bo nami tiwai elalubo pobele bage guda sayao. Tama tiyu nosali te nago gedu bugagia wiegi yai eboso, teda naga amago gedude elalubo pobele bage sel a sacyu guda sabode nage usu yaibao,” Jisasgo te po wai.

⁶“Te dagego te wiegi yai tedali nai te yowi dabebolo magimio. Tama dagego duga wiegi wiegi yai au yabo bis tiwai nai dabe te kibu dabeba sagimio. Tiyu augwaligo te nai dabe sagago agalama, tama augwali ma begeleyu, tama dage ma tuidali weyu tama egimio,” Jisasgo te po wai.

Gedu haluasa po bomo ebo se ebo bidi po
(Luk 11:9-13)

⁷“Te dagego gedu haluasa po Godiba hanalu da, teda agai dagego te hanalubo nai te dageba mawaibao. Dagego te nai gegebo se idu da, teda te nai dagego sueibao. Tama dagego be tuba eliyu bebego wedu da, teda Godigo dagebolo te tu dalaibao. ⁸Magi baso meni. Tigidali bidigo gedu haluasa po God dali hanalubo po wabo bidi dabe, augwaligo te nai saibao. Te nai gegebo se ebo bidi, agai te nai sueibao. Tama te be tuba elibo bidi, teda Godigo te bidibolo tu dalobo dao. ⁹Tama dage tomode bidi me deligo waigo aga ayabolo te tubo nai bret mao po obaso da, teda aga ayago te waibolo te masigi me deli sela mawaibawé? Menio. ¹⁰Tama te nasi ebo waigo aga ayabolo te suq mao po obadi da, teda aga ayago te waibolo te dwai hasamani me deli sela mawaibawé? Te me menio. ¹¹Tama dage dwai bidi dabe bidibolo digi, tama dagego te wiegi yai nai duga wai dabeba mabo koneyu da, teda dagego mu koneiqo, te duga Aya dagalude bidibolo bidi agai wiegi yai nai te agabolo gedu haluasa po wabo bidi dabebolo mu mawaibao. Tama agai te dwagi yai nai mabo kolesagago dagego mabo kolesaga aiyaba mu elaluibao,” wali.

¹²“Te dagego homugo te gasa we bidi dabe augwaligo dagebolo yabo dwagi yai kolesaga tiwai gilama tama dagego me augwali dali te tiwai dwagi yai kolesaga naga iyao. Te Mosesgo polobadu aşəani bomo yai po tigidali me, te Godigo po pusali profet bidi dabego pusali po tigidali me, te po tigidali te page deli naga elalubao, te eno megı tama wali po naga dao,” Jisasgo te po wai.

Bidibo ula sabo tų dwasianu dao
(Luk 13:24)

13 “Te da we bidi pabo tų si elalubao. Tama te sunumi me deli te dwasianu dao. Tama gasa sunumi te genuai dao, tama tedu pelama tama te pabo tų da te pobele bage meniama te noma yai dao. We bidi augwali te genuai tüdu pabo te hagela isiąwai tų dao. Tama we bidi umabo te tüdu wali pabo dao. Tiali goli te genuai tų te dwai sia elalubo madigi haga yabo tuba pabo tų dao. Tama tibaso, dage te gasa dwasianu sunumidu pao. 14 Tama te dwasianu sunumi tomodu pelama, tama te dwasianu tüdu peyu, tama te bidibo ula elalubo madigi painogo te sinabo se ebo dao. Tama deli deli we bidigo naga te tų gegelama subo dao,” Jisasgo te po wai.

Dagego te ili po ola mabo bage bugagia suoao
(Luk 6:43-44; 13:25-27)

15 “Te tibo lotu po ola mabo po wabo bage augwali asidali weyu bugagia suoao. Augwali dageba asobo si, te augwali kibu sipsip tiwai asaibao, te augwali dwai se isąbo bage tiwai augwaligo dagede dwai se yabo homu geme dualama, tama augwali dageba asaibao. Tiali goli, augwaligo homude dage mu dolabo homu kolesaga ebo dao, te dwai bulu yowi tiwai dao. 16 Tama augwaligo ebo dwai se te dagego subo si da, te dagego augwaligo ebo homu kolesaga te kuna mu koneaibao. Te sesani yai bono te pusu ebo wain bono du dabe dali gelama waloboe. Me te sesani yai bono elalubo digi te ni kaya du elalubaso te bidi dabego sabo dawe? Menio. 17 Tama te bugagia pua pai holai nigo aga dwagi yai du naga walobo dao. Me ma te ni bugagia holosiąwai haganawai nigo dwai du naga walobo dao. 18 Tama te bugagia pua pai holai nigo te dwai nedu du dabe waloboe, te menio. Me ma, te bugagia holosiąwai haganawai nigo wiegi yai nedu du dabe me walobo menio, usu egobeo. 19 Tama te wiegi yai du walosiąwai ni te augwaligo gelama, tama siaba ulubo dao. 20 Tama tibaso, dagego te tibo lotu po ola mabo po wabo bage te dagego augwaligo ebo se subo si da, te augwali dagego kuna mu koneaibao,” Jisasgo te po wai.

21 Te Jisas agai po me weyu, te po wai, “Te we bidi hauwa augwaligo enade bomonama te po wabo dao, ‘Dago Genuai Bidi, dago Genuai Bidi,’ te po augwaligo enade wabo dao. Tiali goli, augwali tigidali te Godigo we bidi tonalubo madi te dagalu tomoba pogobeo. Tigidali menio, meba we bidi naga tomoba paibao. Eno Aya aga bidibo madi dagalude bidibo dao. Tama niwai bidi agai eno Ayago homu wali pabo bidi, te bidi naga te Godigo we bidi tonalubo madi tomoba bidigi paibao. 22 Tama te genuai sogo asobo si, te we bidi hauwa augwaligo enabolo te po waibao, ‘Genuai

Bidi, Genuai Bidio, dago nago nogi weyu, dago Godigo po te we bidibolo pusai dao. Nago nogigo bomogo dago te dwai haubo te we bidide elaluali sela sawai dao, dago te we bidi noma sabo bomai sə yai dao,’ augwaligo te po waibao. ²³Tama te sogo eno augwalibolo te po hanilama waibao, ‘Eno dage munu me konebeo. Dage dwai sə ebo bage, dage piəo,’ eno te po te sogo waibao,” Jisasgo te po wai.

Be sə ebo kolesaga si po wai
(Luk 6:47-49)

²⁴“Te niwai bidi agai eno e wabo po odama wali pabo bidi, teda te bidi me deli agai homu te wiegi yai tiwai elalubo bidi, tama agai be te masigi daide ugwdadu sə yai dao, te be bugagia dəq̄ omainogo yai. ²⁵Tama tulubage tuluyu, tama wə bomo yai asiyu, tama bomo yai wali pedaliyu, tama te nai dabego te be degelainogo yai dao. Tiali goli te be aga degebeo. Magi basowe, te be dəq̄ mu walali te tq̄ tomode genuai genuai masigiba dəq̄ mu wai dao. ²⁶Tiali goli bidigo eno e po wabo odama wali pisəwani bidi, aga te esela pabo bidi tiwai elama, tama agai be tq̄ dəq̄ wasiąma, te kemi tq̄de naga ugwdadu sə yai dao. ²⁷Tama tulubage tuluyu, te wə bomo yai asiyu, tama bomai wali pedaliyu, tama te nai dabego te be degelama, tama te be degelai dao. Te be dolama mu degai dao,” Jisasgo te po wai.

²⁸Jisasgo wali po silagasu te po wali, tama tibaso te genuai we bidi hani augwaligo te po odama, augwali te pode noma mu siyu bidai dao. ²⁹Magi basowe, agai augwali ola mani po te augwaligo bomo yai po page koneai bidi dabego po wabo tiwai wabeo. Menio. Agai augwali po ola mani te po page bidi, bomo elalubo bidi bidiyu, te po augwalibolo ola mani.

Jisasgo te tigiwalide dwai gasi yai bidi me deli ma wiegi yai ilai
(Mak 1:40-44; Luk 5:12-16)

8 ¹Te Jisas aga te bulu dude bidali tagalama, tama aba dulama, tama we bidi hauwa aga wali asai. ²Tama te tigiwalide dwai gasi yai bidi me deli aga Jisas pəba aselama, tama tq̄ba kidu sugunama, tama agai te po wali, “Nogi elalubo bidi, te nago homugo usu dao wida, teda nago ena wiegi yai ma ilama, tama ena te meda meni yai tiwai ma bidaibao,” te bidigo te po wai.

³Te Jisasgo nogo te bidi tigiba munama, tama aga nogogo tigiba diayu te po wali, “Ao, eno homugo nage gasi usu ilaibao. Tama nage wiegi yai pedalao, te meda meni yai bidi bidao.” Tialima, megı naga tama agai tigiwali dolali gasi silama, tama te bidi aga tigi wiegi yai yai. ⁴Tama Jisasgo te bidi aga dali te po wali, “Bugagia dua dao. Nago bidi me deli dali eno nagede yali sə po me wagio. Menio. Nage dolo

pelama, tama nago tigi te pris bageba waseligi pelama, tama agai nago tigi osola sumainao. Tama tilama, tama polobadu Mosesgo wali po gilama Godibolo nai ofa yao. Tama tiyu te bidi dabego koneyu, te nago gasi silali, nage te meda meni yai bidi tiwai meg i ma bidibao, te homu augwaligo yaibao,” Jisasgo te po wai.

Jisasgo te Rom ami genuai bidigo sę ebo bidi gasi usu ma ilai
(Luk 7:1-10)

⁵⁻⁶ Jisas te Kaperneam hanu tomoba pobadi, tama te ami bidi hauwa 100 tonalubo genuai bidi aselama, agabolo bomo elama hanaluyu te po wali, “Nogi elalubo bidi, eno sę ebo bidi gasi yai bede pila mubao. Agai nogo sag a dili tigidali bomo isai, tama aga dwai mu bidibao,” te po wai.

⁷ Jisasgo te po wai “Te eno aga geseligi paibao,” wali.

⁸ Tiali goli te ami genuai bidigo po wei ponoyu, aga dali te po wali, “Nogi elalubo bidi, ena wiegi yai bidi meni, tama tiyu nage eno be tomoba pogobeo. Nago pogo naga po olama, tama eno sę ebo bidi aga gasi usu ilao. ⁹ Ena me te ena genuai nogi elalubo bidigo tonaluyu bidibo dao. Tama eno digi te ena ami bidi dabe te ena dologode augwali bidibo dao. Tama eno me delibolo te po weyu, ‘Nage pao’ obaso da, teda aga pabo dao. Tama eno gasa bidi me dali te po weyu, ‘Nage asa’ wali da, teda aga asobo dao. Tama eno ena sę ebo bidibolo te po weyu, ‘Nago te sę yao’ obaso, teda agai te sę ebo dao,” te ami genuai bidigo te po wai.

¹⁰ Jisasgo te po odama, tama aga homu noma siyu, tama agai aga wali asobo we bidi dabebolo te po wali, “Eno mu po dagebolo obao, eno te Israel we bidi hanide te tobage konealubo po dą wai bidi tiwai me deli eno subeo. Menio. ¹¹ Eno dagebolo obao, te sia pedalobo badu me, te sia aiyaba dega sigi pabo badu me, te si badu te we bidi hauwa aselama, tama augwali te polobadu e tde bidali bidi te Abraham me Aisak me Jekop te bidi dabe dali deliba dualama, tama dagalude te Godigo we bidi tonalubo madi tomode bidiyu moni nai tueibao. ¹² Tiali goli, Godigo hasia bolo te dwai tigi dene sabo buluba muabo sa muani we bidi augwali da, te augwaligo te bulu badu te be hulia sai dwai madigi sela sawaibao. Tede augwali dwai gela weyu, tama augwa kele ma halua tueibao.”

¹³ Tama Jisasgo te ami genuai bidibolo te po wai, “Naga beba pao. Eno homugo nago konealubo po dą wali pode te sę nageba pedalaibao,” wali. Tama Jisasgo te po wali sogo naga tama te ami genuai bidigo sę ebo bidi gasi usu ma yai dao.

Jisasgo Pitago we aga ida gasi usu ma ilai
(Mak 1:29-31; Luk 4:38-39)

¹⁴ Tama Jisas Pitago be tomoba pobadi, tama Pitago we aga ida gasi eyu pila mubo suai. Aga tigi posolo gasi yai. ¹⁵ Tialima Jisasgo aga

nogogo te wego nogo diayu, tama te gasigo aga tagalali. Tama aga hodaluama, tama Jisasgo nai sisi ebo se ebo gagalali.

Jisasgo gasi yai we bidi hauwa wiegi yai ma ilai
(Mak 1:32-34; Luk 4:40-41)

¹⁶Tama te sogo pio naga augwaligo te dwai haubo augwalide elalubo we bidi hauwa augwali odasa aselama, tama Jisas pageba pedalai. Tama agai pogo naga po obadi tama te dwai haubo nomu bidi dabe sela sawai. Tama agai tigidali gasi yai bidi dabe wiegi yai ilai dao. ¹⁷Tama tiyu, agai te po me deli te Godigo po pusali bidi profet Aisaiago pedauwalidu wali po te usu nanio. Agai te po polobadu wai, “Aga digi dago gasi sai, tama agai dago tigi dolobo sege tolasa pai dao.”^x

Jisas wali painogo ebo bidi
(Luk 9:57-60)

¹⁸Jisasgo te genuai we bidi hanigo aga bagulubo sulama, tama agai te aga wali asobo bidi dabebolo te po wai, “Da te sigi aji u badu sesege badu te gebadu pinao,” te po wai. ¹⁹Tama te Juda dabego bomo yai po ola mabo bidi me deli aselama, aga dali te po wali, “Po ola mabo bidi, ena nage pabo bulu tigidali te nage wali ena paibao,” te po wai.

²⁰Jisasgo te po agabolo wali, “Te uni yowi dabe da, augwali pibo dedage te tqde elalubao, tama te ba dabe da, te augwali me pibo be elalubo dao. Tiali goli Godigo Bidi Mu da, te aga tobolu munama piabo digi te bulu pesage menio,” wali.

²¹Tama Jisas aga wali pabo bidi me deligo agabolo te po wali, “Genuai Bidi, nago usu da po wai wida, teda ena pelama, te eno aya bolo pubuligi paibao, tama nosali ena nage wali ma asaibao,” te po wali.

²²Tiali goli Jisasgo agabolo te po wali, “Nage da, ena wali asao. Te Godigo po odisabo isai bidi tiwai bidi dabe augwa digi te isai bidi dabe pubalomainao,” Jisasgo te po wai.

Jisasgo te genuai wali isilali
(Mak 4:36-41; Luk 8:22-25)

²³Jisas te gebaba holobaso, tama aga wali pabo bidi dabe me augwali aga wali pai dao. ²⁴Tama augwali te gebadu te sigi aji daidu pobadi, te genuai wali mu polo tama hodaluama pedaliyu, tama te moni we dini asobogo te geba haluainogo yai. Tiali goli Jisas aga da te gebade godege pila mudai dao. ²⁵Tama augwaligo aga pila mubadi hodoligi pali, tama augwaligo te po wai, “Genuai Bidi, nago da tau sao. Da megi e gebade dolama isiebao,” wali.

^x 8:17 Ais 53:4

²⁶Tama agai augwalibolo te po wali, “Magi baso dage wi ebawe? Dagego homugo enade konealu po dą̄ wabo te dwasianu naga dao.” Tama aga hodaluama, te wali dali te moni wę dini te sia sao po wai. Tama te wali yali sia siyu, tama te wę memenege dwasianu me ebeo. ²⁷Tama augwali moni noma siyu, tama augwaligo te po wali, “E bidi da, aga te mena tiwai bidi weyu, tama te wali de te wę sigo agai po odali dawe?” augwa hasi te po hanalu wai dao.

Jisasgo bidi side dwai haubo noma bidi sela s̄awai

(Mak 5:1-17; Luk 8:26-39)

²⁸Te Jisas te gebadu pelama, te sigi wę u badu sabolali, te Gadara bidi hanigo t̄oba pedelai. Tama te sigi wę tagalama, tama t̄odu pobadi te dwai haubo bidigo dą̄ wai bidi si te bidi si aga tią̄ba asai. Te bidi si te ḡu page elalubo madide bidama asai. Te bidi si te dwai uni yowi bidibo tiwai ebaso, tama te we bidi augwali te t̄udu bilainogo ebo te usu me yai menio. ²⁹Tialima, te bidi sigo bomonama i weyu, te po wai, “Nage Godigo Ogwa dao, nago magi s̄e da dali megi yainogowe? Te bodolu mani sogo me elalubadi digi, te nage eba asali te nago da dene mawainogo ebawe?” wali.

³⁰Tama tede genuai kibu hani augwali te dwasianu digibulu gana nai tuyu bidaluai. ³¹Tama te bidi si dą̄ wabo te dwai haubo mobo bidi dabego Jisas dali bomonama i weyu, te po wali, “Nago da sela s̄ayu da, teda nago da te kibu dabe tomoba tagala.” Te po wai.

³²Tama agai augwalibolo te po wai, “Dage pao.” Tialima, te bidi si dą̄ olaluali te dwai haubogo te bidi si tagalama, tama augwali te kibu dabe tomoba pai. Tama te kibu hani dabe tigidali augwali bomonama udulama, tama te dwai saoba pai. Tama augwali te sigi węba tulaluama, tama augwali te wę tulama, poma peyu isila pai dao. ³³Tama te kibu tonaluali bidi dabe augwaligo te s̄e ebo sulama augwali wi pai. Augwali pelama, te hanuba sabolama, tama te po dabe tigidali pusai. Tama augwaligo te dwai haubogo dą̄ wali bidi side ebo suali s̄e po pusai dao. ³⁴Tialima te hanude bidali we bidi tigidali palima, Jisas tią̄ba pai. Tama augwaligo aga sulama, tama augwaligo po bomonama aga dali te po hanalu weyu, tama aga te t̄ode bidibo tagalama, tama aga gasa buluba pao, te po wai dao.

Jisasgo te nogo s̄aq̄a dili isai bidi usu ma ilai

(Mak 2:1-12; Luk 5:17-26)

9 ¹Te Jisas te geba me deliba holama, tama te sigi wę e badu ma aselama, tama aga buluba ma pedelai. ²Tama augwaligo gasi bidi me deli aga pageba tolasa asali, te bidigo s̄aq̄a tigi dili tigidali mu isai, tama aga te gologobe wade pila muai. Tama augwaligo konealubo po

agade dą̄ wali sulama, tama agai te gasi bidibolo te po wai, “Ogwa, nago homu ma tegaluama bidao. Eno nago yali dwai sę sege sela səbao,” Jisasgo te po wai.

³Tialima te Juda dabego bomo yai po page koneai bidi meba augwaligo augwa digi homude po weyu, te po wali, “Te bidi agai te Godigo nogide posobo po obao,” te po wai.

⁴Tama Jisasgo augwaligo homude wabo po koneama, tama agai augwalibolo te po wali, “Magi baso dagego dwai homu eyu, te duga homude te dwai dwai po obawe? ⁵Eno po bomo elalubo dagebolo ola mawainu, te eno magi po wagowe? Eno e bidibolo te po naga wabo si, ‘Nago dwai sę dabe sela səbao,’ teda eno pogo bomo elalubo dagego hania kongobeo. Me ma, eno e bidibolo te po wabo si, ‘Nage hodaluama, bilao,’ tama aga hodaluama agai aga pibo somo selama bilibaso da, teda dagego eno pogo bomo elalubao waibao. ⁶Ena da, te Godigo Bidi Mu da. Bidigo dwai sę sege e təde sel a şabo bomo eno elalubo, te dagego suiqa.” Tama weyu, agai te saqə dili tigidali isai bidibolo te po wai, “Nage hodaluama, naga somo selama, tama naga beba pao,” te po wai.

⁷Tama te bidi aga hodaluama, tama aga beba pai dao. ⁸Tama te hanude bidali we bidi augwaligo te tebo bomai sę sulama, tama augwali wi yai. Tama augwaligo Godigo nogi ugwaba sai. Magi baso meni, agai te tobage bomo yai sę yabo bomo te we bidibolo mawai dao.

Jisasgo Matyu i wai (Mak 2:13-17; Luk 5:27-32)

⁹Te Jisas te bulu tagalama, tama aga pobadi agai bidi me deli te nai sel a asobo we bidide takis mone sabo bede dulalubo suali, te bidi nogi Matyu da. Tama Jisasgo agabolo te po wali, “Nage ena wali asao.” Tama aga hodaluama, sisi elama, tama aga wali pai.

¹⁰Tama Jisas te be me delide dulaluyu nai tubadi, tama te we bidide takis mone sabo bidi dabe me, te Juda dabego bomo yai po bugagia wali pesiąwai bidi dabe me, augwali hauwa asai. Tama augwali Jisas me aga wali pabo bidi dabe dali dulaluyu nai hodobo tuai. ¹¹Tama te Farisi hani bidi dabe meba augwaligo sulama, tama augwaligo aga dali wali pabo bidi dabebole te po wali, “Magi baso duga po ola mabo bidi agai te takis sabo bidi dabe dali, me te dwai sege sai bidi dabe dali hodobo nai tubo dawe?” te po wai.

¹²Jisasgo te po wabo odoyu, tama agai te po wali, “Te gasi meni yai bidi dabe augwali te haus sikba dokta bidibo digi pabo menio. Menio. Te gasi yai bidi dabe naga te haus sikba pelama, te doktago munamuna mabo dao. ¹³Tama dage pao, te Godigo po bukude aşəani po me deli nedama, tama te po page bugagia koneia. Te po e dao: ‘Dagego te hasa elama tama enabolo olo mabo kolesaga, te tobage tebo ofa sę eno godolo

menio. Te dagego gasa we bidide homu dene eyu tau sabo kolesaga te eno godolo ebo dao,’ te po asęani. Tama ena asali, eno te we bidi augwa digi augwa homugo da doloba pai we bidi dao wabo we bidi i wainogo asobeo. Menio. Ena asali te eno dwai sege sai bidi dabe i wainogo asai dao,” Jisasgo te po wai.^y

Nai osogo gisilibo kolesaga po
(Mak 2:18-22; Luk 5:33-39)

¹⁴Tama te sogo te we bidi baptais mabo bidi Jon aga wali pabo bidi dabe augwali Jisas bidibo digi aselama, te po wali, “Te da me, te Farisi hani bidi dabe dali dago te nai osogo gisilibo dao. Tiali goli nage wali pabo bidi dabe augwali magi baso nai gisilibo meniwe?” te po hanalu wai.

¹⁵Tama Jisasgo te po digi begelai po me deli augwalibolo weyu te po wai, “Te gesi we tamadi sai bidi te aga abagi dabe dali bidibaso da, teda augwali homu te sogo homu sege elaluaibawe? Menio. Tiali goli nosali te we sai bidi augwaligo selama, gasaba pabo sogo da, tama aga abagi dabe dali me bidigobeo. Tama te sogo augwali homu sege eyu nai osogo gisilaibao,” wali.

¹⁶“Tama te bidi mego te gesi ugwa pedai selama, te poloba gudubo ugwa peda pali te me hobolobo menio. Ma agai tama tiyu da, teda te gudubo ugwa dedage hobolali te ugwa ma peda peyu, tama dedage genuai ma ebo dao. ¹⁷Tama me, te bidi mego te gesi wain aji te poloba kibu meme waligo nigai botol tomoba mubo menio. Ma agai tama tiyu da, teda nosali te wain we du pagana pelama, tama te meme wali botol peda peyu, tama te wain we tøba olo gea peyu, tama te meme wali me doyu hagawaibao. Tama tibasso augwaligo te gesi wain we te gesi meme wali botolde buliyu, tama te si dali si te bugagia munalubo dao,” Jisasgo augwalibolo te po wai.

**Jisasgo te genuai tobolu bidigo wegi ma hodoliyu, te agai ugwa diaq
 yagasali we me usu ilali po**
(Mak 5:21-43; Luk 8:40-56)

¹⁸Te Jisasgo te Jon wali pabo bidi dabebolo te po odubadi yaide, tama te Juda hani genuai tobolu bidi me deli aselama, aga pageba kidu sugunagasus agai te po wai, “Te eno wegi megi tama isalio. Tiali goli nage eno beba aselama, tama nago nogo aga tigiba muagasiyu, tama eno wegi ma bidaibao.” Te Juda hani genuai bidigo te po wai dao.

¹⁹Tama te po obaso, Jisas hodaluama, tama Jisas dali aga wali pabo bidi dabe me aga dali hodobo peyu, te bidi wali pai.

^y 9:13 Hos 6:6; Mat 12:7

20-21 Tama augwali pobadi yaide, we me deli augwali wali asai. Tama te we aga moni kaneme pidubadi, kibu be 12 kibu be bidai. Te we Jisas aga pabo wali asiyu, tama aga homude te wego te po wali, ‘Te eno agai ugwa sabi badu nogogo diayu da, teda ena usu yaibao,’ te wego te homu yai. Tama te homu elama, te we Jisas tudi badu pelama, tama agai ugwa sabi badu nogogo dia yani.

22 Te Jisas begelama, te we suali. Agai te webolo te po wai, “Eno wegi, nago homu te tegaluama bida. Nago konealubo po enade dą̄ waibaso, nago tigi ma usu ilali.” Tama Jisasgo te po obadi yaide, polo tama te we dwagi yai ma yali.

23 Tama Jisas ma pelama, te Juda hani genuai bidigo beba sabolama, tama Jisas te be tomoba pai. Te be tomode agai te diligide ona elebo bagé suali, te we bidi augwaligo moni gela weyu, genuai kiligili wabo agai odali. 24 Tama te sulama, Jisasgo augwalibolo te po wai, “Dage we bidi tigidali buluba pião. Te wegi isibe dao, aga olo pila mubao.” Tama Jisasgo te po obaso, te bede bidali we bidi aga dwai gisugu mawai. 25 Tama te we bidi augwaligo te bedu buluba gudulama, tama te wegi tigi munalubo be dą̄ togali tomoba pelama, tama Jisasgo nogogo te wegigo nogo tubaso, tama te wegi ma hodaluali. 26 Tama Jisasgo te sę yali po polo odada pelama, tama te genuai tőde bidali we bidi tigidali augwaligo te po polo odali.

**Jisasgo te gedu widai bidi si usu iliyu, te pedauwali
pania sai bidi deli me usu ilali po**

27 Te Jisasgo te be tagalama pai. Tama aga pobadi te gedu widai bidi si aga wali asiyu, i olama po weyu, te po wai, “Nage Devitgo Ogwa dao, tama nago da si homu dene eyu tau sao.” Te po wai.

28 Tama aga pelama, be tomoba bidigi pali, tama te gedu widai bidi si agaba asali. Tama Jisasgo augwali sibolo te po wai, “Dage sigo duga homu tigidali enaba munama, tama eno te dage si tau sabo usu ebo te homu dagego ebawe?” Tama te bidi sigo agabolo te po wali, “Awe, Genuai Bidi.” 29 Tama agai te bidi si geduba nogo muyu te po wai, “Dage sigo konealubo po enade dą̄ wai. Tama tialigo da, te tiwai sę megı dage siba pedalomainao, te eno homugo.” 30 Tama te bidi sigo gedu widai elaluali te ma pedai. Tama Jisasgo bomonama te augwali sigo te yali sę po hogwa somainogo te po wai, “Te bidi me deligo te sę yali po koneidali weyu wagimio.” 31 Tiali goli agai te po wali digi te bidi si Jisas bidibo digi tagalama, tama buluba soyu, tama Jisasgo te bomai sę ebo po te genuai tőde bidibo we bidi tigidalibolo pusali.

32 Te bidi si Jisas tagalama painogo ebadi, tama gassa bidi dabe augwaligo bidi me deli te pedauwali pania sai bidi te dwai haubo mobo elalubo bidi sela aselama, tama Jisas pageba sela asai. 33 Tialima,

Jisasgo te bidide elalubo dwai haubo mobo te sela şanama, tama polo te pedauwali pania sai bidi aga po wabo gagalali. Tama te tőde bidali we bidi augwali noma selama, tama te po wai, “Polobadu te tiwai megi yali bomai şe te Israel tőde munu me pedalai menio,” te po wai.

³⁴Tiali goli te Farisi hani dabe augwalo te po wai, “Agai te dwai haubo mobo sela şabo şe ebo te dwai haubo mobo tobolu bidi dabego bomode te dwai haubo mobo te sela şabo dao,” te po wai.

Jisasgo te we bidi augwali homu dene yali po

³⁵Te Jisas te genuai hanuba me te dwasianu buluba me biligi piduai. Agai te we bidi augwali te augwa bomo yai po ola mabo be tomode te agai aga po ola mani. Agai te Godigo we bidi tonalubo şede dwagi yai gesi po pusali, tama agai augwali tigide elalubo haniani gasi tigidali usu ma ilai dao, te tigi bomo meni yai gasi me silama, te we bidi dwagi yai ma ilai dao. ³⁶Tama biliidubadi, agai te genuai we bidi hani augwali sulama, tama agai homu dene augwalide genuai mu yali. Magi basowe, augwalo homu dolo elalusiauwai baso, tama augwalo digi tau sabo usu isiąwai bidibo suali. Augwali dwai mu bidiyu, te kibu sipsip dabe augwa aya meni yai tiwai bidai.^z ³⁷Tama agai aga wali pabo bidi dabebolo te po wali, “Te nai hauwa mu te gide tau yai elalubao, tiali goli te tau yai nai sabo şe ebo bidi hauwa menio. ³⁸Tama tibaso, dagego te gi aga ayabolo gedu haluasa po waiyao, tama agai aga şe bidi tagala palama, te gide elalubo nai sisinigi pomainogo wao,” Jisasgo te po wai.

Jisasgo wali pabo bidi nogi si olama sağago si te agai şeba tagala palali po (Mak 3:13-19; Luk 6:12-16)

10 ¹Te Jisasgo aga wali pabo bidi dabe nogi si olama sağä badu si bidi asa olama i wali, tama agai augwalibolo bomo mani, te dwai haubo mobo bidi dabe sela şamainogo, tama te we bidi tigidali te haniani gasi me, te tigi bomo meni yai gasi me usu ilimainogo yai dao. ²Te 12 bidi nogi te e dao: hasia bidi aga nogi Saimon, te aga gasa nogi Pita, tama me aga ama nogi Andru dali. Tama Jems me aga ama Jon dali, augwali si te Sebedigo ogwa si dao. ³Tama Filip me Bartolomyu dali. Me Tomas, me Matyu, te takis mone polobadu sai bidi. Me Jems, te Alfiusgo ogwa, me Tadius dao. ⁴Tama gasa Saimon te Selot hani bidi, augwalo te Rom gavman bidi dabe sela şabo homu yai bage dao. Tama Judas te Keriot bulu bidi, te Jisas boi bidi augwali nogoba nosali muani bidi dao.

Jisasgo te 12 bidibolo te po sela pabo şe mani po (Mak 6:7-13; Luk 9:1-6)

⁵Te Jisasgo te 12 bidi şeba tagala palali, tama agai po augwalibolo ola mayu, te po wai, “Dage te Israel hani isiąwai bidi dabeba me pelamu.

^z 9:36 Nam 27:17; 1 Kin 22:17; 2 Sto 18:16; Ese 34:5; Sek 10:2; Mak 6:34

Tama dage te Samaria dabego genuai hanu tomoba me pigimio. Menio. ⁶Dage te Israel hani we bidiba naga pao, te augwali te hagawai kibu sipsip tiwai dao. ⁷Dage pelama, te dagego e tiwai po wao, ‘Te dagalude bidibo God agai we bidi tonalubo sə yabo sogo paba yagasai dao, meg i e dao,’ te po waiyao. ⁸Dagego te gasi we bidi dabe augwali usu iligi pao, tama isai bidi dabe ma hodoliyu, tama oyabé gasi sai bidi dabe wiegi yai meda isiąwai ma iliyu, tama dwai haubo mobo sela sayu yao. Tama dage te sə yabo bomo te dagego olo sali, tama monego abelai menio. Tama tibaso, dagego te we bidi te bomogo olo tau sao, tama dagego augwalide mone sigio. ⁹Tama dagego te nai abelabo nai gol me, te mone ge silva me, te kapa mone me te dagego mouwadagede sabiligo. ¹⁰Tama dage bilibo sogo dagego te wa sabiligo, ma te holobo ugwa si me te ságä nadoba olo si me, te bilibo dono olo si me tolasa biligo. Menio. Te dagego tau sabo we bidi augwaligo dagebolo te tobage tigi tau sabo nai momainao.” wali.

¹¹“Tama dage si si te hanu me deliba ma te dwasianu bulu tomoba me pobaso da, teda dagego bugagia sulama koneyu, mena bidi aga te bulude wiegi yai ma te doloba pai bidibo weyu suao. Tama te tiwai bidigo bede dage bidao, tama tede bididubadi te dage te gasa buluba pabo sogode te usu yaibao. ¹²Tama dage te be tomoba pobadi, dagego te bede bidibo we bidi augwalibolo dwagi yai homu eyu te po wao, ‘Te dago homugo te wiegi yai sogo mu dageba asomainao.’ ¹³Tama dagego te po olama, tama te bede bidibo we bidigo dage dali wiegi yai homu eyu usu da po obaso da, teda dagego wiegi yai po augwali dali bidimainao. Ma, augwaligo dagebolo wiegi yai homu me isąbaso da, teda te wiegi yai pogo augwali tau sisıama te po dagebolo ma asaibao. ¹⁴Tama bidi me deligo beba dage me sela pisama, tama dagego po me odisąbaso da, teda te be dali te hanu si tagalama, tama dagego duga ságade pu elalubo pobele bage sela sayao, te augwaligo konemainogo te Godigo me augwali tagalai.yabo te homu emainogo yao.^a ¹⁵Eno mu po dagebolo obao, te tigidali we bidi po tū ebo bodolu muani sogo, te dagego po odobo hagela yai we bidi augwaligo sabo sęge te genuai mu saibao, te sęgęgo te hanu si Sodom me Gomora side polobadu bidali dwai dwai kolesaga yali we bidigo sabo sęge aiyaba elaluabao,” Jisasgo te po wai.^b

Haniani sęgę pedalabo po (Mak 13:9-13; Luk 21:12-17)

¹⁶“Odao, eno dage te sipsip tiwai te uni yowi augwali tomoba tagala palobao. Tama tibaso dagego te hasamanigo ebo kolesaga tiwai wali peyu, tama hasia bolo dagego yabo sə bolo homugo kone palao. Tama dagego te ba higo ebo nagamea pai kolesaga tiwai wali peyu, tama dwai

^a 10:14 Tpi 13:51 ^b 10:15 Gag 19:24-26; Mat 11:24

sé me deli yabo homu kolesaga egimio. ¹⁷Tama dage te dwai kolesaga ebo bidi dabede dua dao. Te augwaligo dage augwa kaunsil bidi dabede po tū ilainogo sela peyu, tama augwaligo dage te bomo yai po ola mabo be tomode te keloago elai bao. ¹⁸Te dagego ena wali pobaso, dage augwaligo te gavman bidi dabebolo me te genuai tuni bidiba me selasa paibao, te po tū tede ilemainogo yaibao. Tama dagego augwali dali me, te Israel hani isawai bidi dabe dali augwalibolo eno gesi wiegi yai po pusao.

¹⁹Tama augwaligo dage po tūba odasa pabode, tama dage wi elama te homu egimio, ‘Dago po mena tama wagowe? Tama dago magi po wei ponogowe?’ te homu egimio. Menio. Te sogo naga digi te Godigo dagego pusabo po ola mawaibao. ²⁰Te duga digi naga te po pusugobeo. Menio. Te duga Ayago Mobo Bidigo, agai te po dagego pedauwalide ola mobaso, dagego te po waibao.” wali.

²¹“Tama bidi megó aga ama te boi bidigo nogoba munama, tama augwaligo aga ela muai bao. Tama ayago aga ogwa dali tama naga tiaibao. Tama ogwa wegi dabe augwaligo augwa aya ida si dali boi bidi homu elama, tama augwali ela mumainogo te gasa bidi dabego nogoba muai bao. ²²Tama tigidali we bidigo dwai homu mu dage dali yaibao. Magi basowe, dage eno hani bidi mu bidibaso tiaibao. Tiali goli, te bodolu muani sogo tonaluyu bomonama bidibo bidi, teda te bidi aga te Godigo ma dobola siyu, tama te dwagi yai madiba muai bao. ²³Tama augwaligo dage te hanu me delide dene mobaso da, teda dage wi peyu, gasa hanuba pao. Eno mu po dagebolo obao, te tigidali Israel hanude te dagego sé ebo silisabadi yaide, tama te Godigo Bidi Mu aga ma asaibao.” wali.

²⁴“Augwaligo ena dali yali dwai kolesaga, te kolesaga naga augwaligo dage dali me yaibao. Te skul ogomani agai aga po ola mabo tisa bidi te aiyaba me elalugobeo, tama te sé ebo bidi te aga ugwidu elaluyu te sé tonalubo bidi aga aiyaba elalugobeo. ²⁵Tama te skul ogomanigo te aga tisago ebo kolesaga tiwai ebo usu eboso da, te usu dao. Tama te sé ebo bidigo aga tonalubo bidigo kolesaga tiwai ebo usu ebo si da, teda te me usu dao. Te augwaligo te nogi posobo po weyu, ‘Nage te dwai haubo bidigo toboli bidi Belsebul dao’ po te hani toboli bidibolo obaso da, teda dago koneao, te augwaligo dwai dwai nogi weyu posobo po wabo te aga dali bede bidibo bagebolo mu waibao,” Jisasgo te po wai.

Bidigo Godide naga wi yao po (Luk 12:2-7)

²⁶“Te bidi dabe augwaligo dage dali te tobage sé nosali yaibao, te dagego konebaso, tama dagego te dwai sé ebo bidi dabe augwalide wi egimio. Te tigidali geme halualuali nai te bulu ulaba hania pedelaibao. Tama tigidali te geme dualaluali po te we bidigo hania koneibao.

²⁷Tama te hulide eno dagebolo ola mabo po, te po dagego te giligade we bidibolo pusao. Tama dagego te olode duadigi odali po, te dagego te be daiba holama, te po augwalibolo pusao. ²⁸Dagego tigi naga ela mubo bidi dabe te dage wi egio. Augwaligo dagego po wabo mobo nomina bida te dali me ela mugobeo. Menio. Te Godigo dagego tigi me nomina bida dali te genuai dene sabo te siade mu dolobo bomo elalubaso, te dage agade naga wi yao. ²⁹Te we bida augwaligo dwasianu bu ba tiwai si te mone ge deligo naga abelebo dao. Te ba dabe augwali dwasianunu olo nai dao. Tiali goli duga Aya God agai te tiwai ba bugagia tonalubo dao. Tama tonalubadi, te tiwai dwasianu ba me deli olo isigobeo, te Godigo bodolu mani isabo sogo naga te isaibao. ³⁰Tama dage da, te Godigo dage bugagia tonaluyu, te dagego tobolude elalubo toboli nisi tigidali deli deli agai neda silai dao. ³¹Tama tibaso, dage wi me egio. Agai gedude te dage te bu ba dabe aiyaba mu elalualigo da, teda agai dage mu tau saibao,” Jisasgo te po wai.

Jisasgo nogi hogwa sabo kolesaga ebo po
(Luk 12:8-9)

³²“Niwai bidigo eno nogi te we bida augwali gedude pusuyu, ‘Te ena Jisas wali pabo bida dao’ wabo bida, te eno te bida agai nogi me te eno Aya dagalude bidibo bida gedude pusaibao. ³³Tiali goli mena bida agai te we bida augwali gedude ena nogi tudiba mubo bida, te eno me eno Aya dagalude bidibo bida gedude aga nogi tudiba muaibao.” Jisasgo te po wai.

Jisas aselama, we bida dagalagasali po
(Luk 12:51-53; 14:26-27)

³⁴“Dagego homugo ena asali te e tqde wabi hwibo tigidali isilainogo asali homu dagego egio. Ena asali eno te hwibo isilainu asobeo. Menio. Eno te bobobage ge hwə selasa asai tiwai dao, te we bida dagalaibao. ³⁵Te deli hani augwa hasi boi bida ebo kolesaga pedelainogo te ena asali. Tama bidigo aga aya dali boi bida eyu, tama wegigo me aga ida dali boi bida yaibao, tama we aga bidigo ida dali me boi bida yaibao. ³⁶Tama bida me deli aga bede bidibo we bida dabe, te aga hani we bida, augwali te bida dali boi bida eyu bidaibao. ³⁷Tama niwai bida agai aga aya me ida naga mu godolo eyu tama ena kuna godolo me isawani da, te bida aga eno abagi bidigobeo, te usu menio. Tama bida megagaga ogwa ma wegi naga godolo eyu, tama ena kuna godolo me isabo bida, te aga eno abagi bidigobeo da. ³⁸Tama bida aga ena wali peyu, tama gasa bida dabe augwaligo agabolo dene me sege dali mayu, tama te aga isilabo ni pedai tiwai dao. Tama agai te ni pedai selama, ena wali asisawani da, teda te bida aga eno abagi bidigobeo. ³⁹Tama niwai bida aga tigi me aga tqde bidibo ula dali naga bugagia tonaluyu bidibo bida, te bida aga nosali wieg

yai mu bidabo ula hagawai bidi pedelaibao. Me ma, bidi aga tigi me aga tqde bidibo ula dali agai eno sëba munama tama aga isiyu da, teda te bidi te nosali wiegi yai bidabo ula mu saibao, te bida paibao,” Jisasgo te po wai.

Bidigo wiegi yai nai sabo po
(Mak 9:41)

40 “Bidigo dagego eno së ebo sulama, tama wiegi yai kolesaga dagebolo eboso da, teda agai te tiwai kolesaga dagebolo naga ebo meni, te ena dali me eba. Tama bidigo wiegi yai kolesaga ena dali ebo bidi, agai te God dali me te wiegi yai kolesaga eba, te agai ena tagala palobaso ena asai dao. 41 Bidi mego te homu eyu, ‘Eno te Godigo po pusubo bidi profet bidi tau sabo’ homu elama, tama te profet bidi sela pelama, aga bede te bidi bugagia nai gesebo dao, te bidi agai te profetgo nosali sabo wiegi yai nai me badu agai buga selama saibao. Tama bidigo homugo ‘Te bidi doloba pai bidi bidibaso, eno aga tau saibao’ homu eyu, tama te doloba pai bidi aga beba sela pelama, nai mayu bugagia gesebaso da, teda te Godigo te doloba pai bidibolo nosali maiabo nai me badu te bidi agai buga selama saibao. 42 Tama bidigo te ena wali pabo olo nogi meni yai bidi me deli aji nogone ebo sulama, tama aga tau siyu. tama te kedau wai wë naga mabo bidi da, teda eno mu po dagebolo obao, Godigo te bidibolo te wiegi yai nai mu mawaibao, te nai te munu me hagagobeo,” wali.

Jongo aga wali pabo bidi Jisas bidibo digi tagala palali po
(Luk 7:18-35)

11 ¹ Te bidi Jisas aga wali pabo bidi nogo si olama saçä badu si bidi dabebolo te së ebo po mawai. Te po silibode teda agai te bulu tagalama, te tq badu elalubo genuai hanu dabebe pelama, tama te we bidi augwalibolo agai po ola mayu, tama Godigo po pusai dao.

² Tama Jon te we bidi baptais mani bidi, te bidi aga te kalabuside bidibadi tama te sa muyu asaiba wali bidi Kraisgo te tigidali së ebo po odai. Tama tibaso, Jongo aga wali pabo bidi dabe meba te Jisas bidiboba tagala palai dao. ³ Tama augwaligo agabolo te po hanalu wagasai, “Nage da, nage te sa muyu asaibao wali te bidi dawe, ma dago gasa bidi asobo tonaluuibawé?” augwaligo te po hanalu wali.

⁴ Te po obaso, Jisasgo augwalibolo te wei ponoyu, te po wai, “Dage pelama, Jonbolo te tigidali së dagego odali po me, te suali së me, te po tigidali agabolo wagi pao. ⁵ Dagego e subao, te gedu widai bidi dabe augwali gedu usu ma iliyu, te saçä dwai bidi dabe augwali bugagia ma bilibo dao. Te oiyabe yai bidi dabe augwali tigi wiegi yai pedaliyu, tama olo degai bidigo po ma odobo dao. Te isai bidi dabe augwali ma hodoliyu, tama te magi nai meni yai bidi dabe augwaligo te Godigo wiegi yai gesi

po odobo dao.^c ⁶Tama bidi enade homu si isiąma tama ena aga tudiba musiabo bidi, te bidi aga wiegi yai homu pemene yao,” Jisasgo te po wai.

⁷Tama Jon wali pabo bidi dabe augwaligo te po odama, tama geasa ma pobadi yaide, tama Jisasgo te we bidi augwalibolo te bidi Jonde po wai, “Polobadu dage te bidi meni yai buluba pali, te bidi Jon dagego sugi pali, te dagego magi nai sugi paliwe? Ma, dagego te awi dili me deli te waligo memenege ilibaso sugi paliwe? Menio. ⁸Dagego magi nai sugi pai dawe? Ma, dagego te bidi me deligo te wiegi wiegi yai ugwa tigide muai yaibaso sugi paliwe? Menio. Te wiegi wiegi yai ugwa muai bidi dabe augwaligo te tuni bidigo wiegi yai bede naga bidibo dao. ⁹Tiali goli, dage magi baso pai dawe? Ma, te Godigo po pusubo profet bidi me deli sugi pai dawe? Awe, eno dagebolo obao, e Godigo po pusubo profet bidigo da, agai te gasa te Godigo po pusali profet bidi dabe te tigidali aiyaba elalualio. ¹⁰Te Jon agade te gasa profet bidigo Godigo wali po polobadu asęai dao,

‘Suao, te eno po pusabo bidi tagala palobaso, tama
aga nage asabo digi polasa paibao. Agai nago tū sisi
iligi paibao.’^d

¹¹Eno mu po dagebolo obao, Jon te we bidi baptais mani bidi agai te tōde pedelali tigidali bidi aiyaba elaluai dao. Tiali goli te Godigo we bidi tonalubo madide bidibo nogi meni yai olo bidi, te bidigo Jon aiyaba elalubao. ¹²Tama te baptais mani bidi Jon agai aga sę ebo gagalali sogo dąj elama, tama aga sę edubadi megi asama, te Godigo we bidi tonalubo sę te bomonama tama pąba yagasaki dao, tama te sesena pai bomai bidi dabe augwali tola sainogo ebo dao. ¹³Tama te Jon aga pedalisiąbadi te Godigo po pusali bidi profet bidi dabe me, te bomo yai po me, te augwali tigidaligo te nosali yabo sę po pusai dao. Tama nosali Jon agai po pusagasali. ¹⁴Tama dagego odai wida, teda te po odao: te polobadu bidali profet bidi dabe augwaligo te genuai profet bidi Elaija ma asaibao po wai dao. Tama Jon da, Jon aga te bidi Elaija dao po wali. ¹⁵Tama te olo elalubo bidigo agai te po odao,” wali.

¹⁶“Te eno te megi bidibo we bidi augwali magi nai tiwai dao wagowe? Augwali te wai puluba tiwai dabe te maket bulu tomode bidaluyu, tama gagali eyu, tama augwaligo te gasa wai puluba dabebolo i bomonama weyu, te po obao, ¹⁷Dago dage ona sulubadi, tiali goli dagego tęabi ebo hagela ebao. Dago homu dene ebo tęabi obadi, tiali goli dagego gela wabo hagela ebo dao.” ¹⁸Tama tiwai, te Jon asali, tama agai te nai osogo gisiliyu, te bomai wain wę me tuai menio. Tama tibaso augwaligo agade te po wai, ‘Te dwai haubo mobo bidi agade bidibao,’ te po wai dao. ¹⁹Me ma, te Godigo Bidi Mu asali, tama agai nai dalı ąj dalı tuyu yai, tama augwaligo agade te po wai, ‘Suao, aga te nai hauwa mu tubo bidi, tama

^c 11:5 Ais 35:5-6; 61:1 ^d 11:10 Mal 3:1

agai te bomai wain wę me hauwa mu tubo dao. Aga te takis mone sabo dwai bidi dabe dali te sege sai bidi dabego kisasa bidibo abagi dao,’ te po wai dao. Tiali goli te God aga mu konebo homu kolesaga ebo po te we bidigo odama, tama te kolesagago yali sę nosali subaso da, teda augwaligo koneabao, te homu kolesaga mu dao,” Jisasgo te po wai.

Te bulu meba bage augwali homu begelebeo
(Luk 10:13-15)

^e 20 Te Galili tqde Jisasgo te hanu mebade te bomai sę hauwa mu yali goli, te hanude bidibo hani augwaligo augwa dwai kolesaga yalide ge neyu, homu begelama dwai kolesaga yali tagalasiąbaso, te Jisasgo augwali sesanobo po weyu te po wali, ^f 21 “Auo, dage Korasin dabe, homu deneo, te dwai dwai sogo dageba pedelaibao. Dage Betsaida hani bage me, homu deneo, te dwai dwai sogo dageba pedelaibao. Tama bidi me deligo bomai sę te hanu si nogi Tair dali Saidon te hanu side te eno dagego e bulude yali sę tiwai egi sogo da, teda te sogo digi polobadu te Tair hanude me Saidon hanu side augwaligo te beg dage te ugwa tiwai gudama, tama augwali te sia nogani kelide dualama, tama te sogo te hani sigo dwai sę yali tagalama, homu begelegi dao.^e 22 Tiali goli, eno dagebolo obao, te we bidi po tų yabo sogo bodolude, te Godigo dagebolo sege genuai mu mawaibao. Te dagego sabo segego te Tair me Saidon hanu sigo sabo sege aiyaba mu elaluibao. ²³ Tama dage Kaperneam hanude bidibo bage, te dagego homu te dagego nogi ugwaba siyu, te sigiba mu, te dagaluba paio, te homu yali. Tiali goli, mu menio. Te dage tigi dene ebo dwai sia dabo dedage pageba sawaibao. Tama bidi me deli agai bomai sę dabe te eno dagego hanude yali bomai sę dabe tiwai te bomai sę te Sodom hanude egi sogo da, teda megı me te Sodom hanu elalugi dao.^f 24 Tiali goli eno dagebolo obao, te we bidi po tų ilabo sogo te Godigo dagebolo sege genuai mu mawaibao. Te dagego sabo segego te Sodom we bidigo sabo sege aiyaba mu elaluibao,” Jisasgo te po wai.

Dage enaba aselama toma tuabo po
(Luk 10:21-22)

^e 25 Tama te sogo Jisasgo Godibolo te po wai, “Ayao, nage te dagalu dali tq dali nigila tonalubo Genuai Bidi dao. Eno nage dali deli homu eyu, nagebolo usu da po obao. Tode homu kolesaga koneai bidi dabe augwaligo koneidali weyu tama nago te eno tamadi pusali po page nago geme dualai dao. Tiali goli te tqde elalubo homu kolesaga konesiąwai we bidi augwalibolo nago te po page ola mawai dao. ²⁶ Awe, Aya, nago

^e 11:21 Ais 23:1-18; Ese 26:1-28:26; Jol 3:4-8; Amo 1:9-10; Sek 9:2-4

^f 11:23 Gag 19:24-28; Ais 14:13-15

te tiwai yaibao homu elama, tama tede dwagi yai homu eyu, nago tama tiwai naga yai dao.” Jisasgo te po aga Ayabolo wali.

27 Te we bidibolo Jisasgo te po wai, “Eno Aya agai tigidali nai eno nogoba muai dao. Tama niwai bidi me deli agai te Ogwa mu konea silai menio. Aya agaduba deligo naga te Ogwa konea silai dao. Tama niwai bidi me deligo agai te Aya me konea silai menio. Ogwago naga konea silai dao, tama te we bidi dabebole te Ogwa aga digi te Aya augwalibolo ola mobaso da, te augwaligo me te Aya konea silaibao,” wali.

28 “Dage we bidi dabe se dene genuai eyu sege yai nai tolobo tiwai we bidi dabe, dage tigidali enaba asao, te eno dage tau siyu, tama dagego toma tueibao. 29 Dage ena dali hodobo wali asiyo. Tama dage ena dali bididubadi eno dagebole po ola mawaibao. Tama dagego kolesaga enade sao. Magi basowe, eno nagamea pai kolesaga te bidi dabe augwali dali eyu, tama ena digi ena aiyaba elalubo dao. Tama dage enaba asobaso da, teda dagego homude te toma tuagameo. 30 Dage ena wali asiyu, tama eno dagebole dene magobeo, te sege yai nai me eno dagebole magobeo,” Jisasgo augwalibolo te po wai.

Te Sabat sogode se habu selebo po
(Mak 2:23-28; Luk 6:1-5)

12 ¹Te po olama nosali me sogo Sabatde Jisas te tubo nai wit gi tomodu pai. Tama aga wali pabo bidi dabe augwali nasi eboso, tama augwaligo te wit ge selama, tama augwaligo tuai.^g ²Tama te Farisi bage augwaligo te kolesaga ebo sulama, tama augwaligo agabolo te po wai, “Suao, te kolesaga nage wali pabo bidi dabe augwaligo ebo, te Sabat sogode habu selai dao,’ wali.’

³⁻⁴ Tama Jisasgo augwalibolo te po wai, “Te dagego te dena noq bidi nogi Devitgo yali se po dagego nedebewe? Me sogo aga me, aga dali bidali bidi dabe me, augwali nai sili bidibadi tama moni nasi eboso, tama Devitgo Godigo lotu be tomoba pelama, te Godigo gesabide muani bret selama tuali. Aga hani dabego me tuali. Tiali goli, te bret te habu selai elaluai, tama te pris dabego naga tubo usu yaibao, te bomo yai pode te po wai. Tiali goli te bret augwaligo me tuali digi Godigo gedude dwai se ebeo. Dagego te aseani po nedebewe?^h ⁵ Ma dagego te bomai po aseani bukude elalubo po me deli nedebewe? Te po e dao, te pris bidi dabe, augwaligo te Moni Lotu Be tempel tomode te Sabat sogo tigidali me augwa se ebo dao. Tama tiyu, augwaligo te Sabat sogo se egio wabo bomo yai po augwaligo bolobo dao. Tiali goli Godigo augwalibolo sege magobeo. Dagego te po nedebewe? ⁶ Eno megi te Moni Lotu Be tempelde po wali. Tialima eno dagebole obao, te ede megi elalubo nai, agai te

^g 12:1 Bom 23:25 ^h 12:3-4 Prs 24:9; 1 Sml 21:1-6

Moni Lotu Be tempel te aiyaba elalubo dao. ⁷Tama bukude Godigo wali po me deli augwaligo aşeanı, ‘Eno te dagego enabolo olo mabo nai ofa te godolo ebo menio. Dagego gasa we bidi dali homu dene eyu tau sabo kolesaga ebo, te eno godolo ebo dao.’ Tama dagego te po page bugagia konegi sogo da, teda dagego te dwai şe meni yai bidi dabebole sege magi menigi dao.

⁸Magi baso meni. Ena da, te Godigo Bidi Mu da. Ena da te Sabat sogode te genuai bidi dao. Tama tibaso, bidigo Sabatde mena şe yagameo wabo po te eno digi waibao,” Jisasgo te po wai.

Te Sabat sogode Jisasgo nogo dili isai bidi usu ilali po
(Mak 3:1-6; Luk 6:6-11)

⁹Te Jisas aga te badu bidali tagalama, tama augwaligo Juda dabego bomo yai po ola mabo be tomoba pai. ¹⁰Tama bidi me deli tede bididuai, te bidi aga nogo dili bomo isai elaluai. Tama bidi meba augwaligo Jisas po tı̄ ilainogo homu elama, tama augwaligo aga hanalu wai, “Ma, dago te Sabat sogode te gasi yai bidi usu ilibaso, te bomo yai po bolaibawe ma meniwe?” te po wai.

¹¹Tama Jisasgo augwalibolo te po wai, “Te dage tomode bidi me deli agai kibu sipsip me deli elaluyu, tama te sipsip te dedageba Sabat sogode tulaluai yaibaso da, te bidigo te sipsip ugaba ma kegelama ma saibawe, ma meniwe? Ao, te Sabat sogo digi te ma saibao. ¹²Tama te bidi da, bidigo da te sipsip aiyaba mu elalubo dao. Tama tialigo da, dago te Sabat sogode we bidi tau sabo dwagi yai şe eyu da, teda tama tiyu dago te bomo yai po bologobeo, te usu dao.” wali.

¹³Tama te po olama agai te nogo dwai bidibolo te po wai, “Nago nogo dodolao.” Tialima agai nogo dodolali, tama nogo wiegi yai ma pedelai, te gasa me nogo tiwai yai. ¹⁴Tiali goli te Farisi dabe augwali te be tagalama, tama augwali deliba sisinama po miyu, tama Jisas elabo po miai dao.

Jisas aga Godigo şe ebo bidi mu dao

¹⁵Tiali goli Jisasgo augwaligo te po wabo koneama, tama agai te bulu tagalama gasaba pai. Tama te we bidi hauwa aga wali pai, tama agai augwali tomode tigidali gasi we bidi usu ma ilai dao. ¹⁶Tama augwali usu ma ilama, tama agai augwalibolo agai nogi me agai ebo bomai şe po te gasa we bidibolo pusidali weyu habu selai dao.

¹⁷Tama tebogo te po me deli te Godigo te agai po pusali profet bidi nogi Aisaiago pedauwalide wali po usu nanio. ¹⁸Te po e dao,

“E bidi da, te eno şe ebo bidi dao, eno aga sa muai dao. Eno aga godolo mu elama, tama eno homu aga dali wiegi yai ebao. Te eno Mobo Bidi te agaba mubaso, tama agai te doloba pai kolesaga ebo te

po te gasa Israel hani isąawai bidi dabe augwalibolo
te po pusaibao.

¹⁹ Tiali goli agai te konila ebo po me te genuai po dagą me wagobeo.
Te augwaligo agai pedauwalidu genuai dagą olama i wabo te genuai tüde
me odogobeo.

²⁰ Te awi dili me deli dwasianu togwa painogo yali, te tigidali me agai
togwa pogobeo. Tama te lamde mubo hobi dwasianu bogoli idubo, te me
agai tigidali te isiligobeo. Menio. Agai te tobage bomo kimi meni yai we
bidi tau sabo sę iduaibao, tama bomonama elama, te doloba pai sęgo te
dwai sę aiyaba elaluibaibao.

²¹ Tama te gasa hani dabe, te Israel hani isąawai we bidi dabe augwaligo
konealubo po agade dąu olama tonalueibao,”

te bidi Aisaiago te po polobadu asęnama, tama Jisasgo te po usu
nanio.ⁱ

Augwaligo te po weyu Jisasgo Belsebul dali sę ebo da wali po
(Mak 3:20-30; Luk 11:14-23)

²² Tama te sogo augwaligo bidi me deli agaba sela asali, tama te bidide
dwai haubo mobo bidi bidai. Aga gedu dali pedauwali dali te si pania
sai. Tama Jisasgo aga usu ma ilali, tama te pedauwali pania sali bidi
po ma weyu gedu ma pedeyu yai dao. ²³ Tama tigidali genuai we bidi
hani augwali noma mu sai, tama augwaligo te po wai, “E bidi da aga te
Devitgo Ogwa yaliwe, ma meniwe?”

²⁴ Tiali goli te Farisi dabe augwaligo te po odolama, tama augwaligo
te po wai, “Woo, te dwai haubo mobo bidi te Belsebulgo bomode naga te
bidigo te dwai haubo sela sębo dao. Te Belsebul aga te dwai haubo mobo
bidi dabego tobolu bidi dao,” te Farisi bagego te po wai.

²⁵ Tama agai augwaligo homude ebo kolesaga koneama, tama agai
augwalibolo te po wai, “Te tuni bidigo bomo tomode bidali bidi dabe
augwali hani si te bugulama, tama augwa hasi wąbi hwı̄yu da, teda te
hani si dolaibao. Tama te hanu me delide bidali bidi dabe, ma te deli
bede bidali hani, te augwali te si bugulama, tama augwa hasi wąbi
hwı̄jani da, te hanu ma te be me elalugobeo, te tulolueibao. ²⁶ Tama
tibaso, Satango te Satan aga ma sela sęyu da, teda aga hani te buga sai
elaluai dao. Tama agai tonalubo hani augwali bomo me elalusı̄baso, te
dolaibao, te tulolueibao. ²⁷ Te mu tama te Belsebulgo ena tau sobaso tama
eno te dwai haubo mobo bidi augwali sela sęgi sogo da, teda dego te dage
wali pabo bidi dabe augwali tau selama, tama augwaligo te dwai haubo
mobo bidi augwali sela sęgowe? Tama tiyu da te duga digi duga hanigo
po tū ilibo dao, te dage geda muani po hania ola mawaibao. ²⁸ Tiali goli,

ⁱ 12:21 Ais 42:1-4

Godigo Mobo Bidigo ena te dwai haubo mobo bidi sela sayabo bomo mabo dao. Tama tibaso dagego koneiqa, te Godigo we bidi tonalubo kolesaga te dageba asai dao. ²⁹Tama te sę e tiwai dao. Te bidi me deli aga te bomai bidigo be tomoba pelama, tama agai bede elalubo doado bage sai hagede, agai te bomai bidi aiyaba elaluama, tama te dila pai bonogo te bidi keyu bolo yao. Agai tama tilama, tama agai te bidigo bede munalubo nai dabe saibao,” wali.

³⁰“Bidigo ena dali abagi me wasiąbo, te bidi aga eno boi bidi dao. Bidigo nai ena dali sisinisąbo bidi, te bidi agai te nai subigila sasą bilibo dao. ³¹Tama tibaso, eno dagebolo obao, te Godigo te we bidi augwaligo dwai sęgę ebo te tigidali me te posobo po me, te sela sębo usu yaibao. Tiali goli bidigo te Godigo Mobo Bidibolo posobo po obaso, te bidigo sęgę te Godigo me sela sęgobeo. ³²Tama bidi mego dwai po me deli te Godigo Bidi Mu dali obaso da, teda Godigo te bidi agai sęgę te sela sębo usu yaibao. Tiali goli bidigo dwai po te Godigo Mobo Bidi dali weyu da, te bidi agai sęgę te megı e tőde bidibo sogo me te nosali me munu me te sęgę me sela sęgobeo. Te sęgę me elalua peyu, bida da paibao,” Jisasgo te po wai.

Ni dwaigo nai dwai walobo po
(Luk 6:43-45)

³³“Te wiegi yai nigo da, te nai me wiegi yai walaibao. Ma, te dwai nigo da, teda te nai me dwai walobo dao. Tama te bidi dabe augwaligo te nai bolo sulama, tama augwaligo koneaibao, te ni wiegi yai yaliwe ma dwai yaliwe naga osola subo dao. ³⁴Dage te dwai bidi dabe, dage te dwai hasamani dabe tiwai dao. Tama tialigo da, magi ilama dagego wiegi yai po waibawe? Tama bidigo pedauwalidu te tiwai po aga homude elalubo po pusubo dao. ³⁵Wiegi yai bidigo homude te wiegi yai po hauwa elalubo dao. Tama agai kolesaga wiegi yai pedalobo dao. Bidi dwaigo agai homude dwai homu kolesaga hauwa elalubo dao. Tama tiyu, agai dwai kolesaga pedalobo dao,’ wali.’

³⁶“Eno dagebolo obao, te genuai po tų pedalobo sogo te Godigo te we bidi dabe augwaligo tigidali subigila wali dwagi yai sę isiąbo po te po tų ebode dagalaibao, tama te pode sęgę mawaibao. ³⁷Tama naga pode digi te Godigo nage doloba pai bidi nogi poaibao, te nago yali kolesagade te sęgę sisawai bidi dao. Tama naga pode naga digi te agai nage dwai bidi nogi poaibao, tama nage sęgę mawaibao,” Jisasgo te po wai.

Meba bidi augwaligo te bomai sę ebo suainogo wali po
(Mak 8:11-12; Luk 11:29-32)

³⁸Tama agai te po obaso, te Juda dabego bomo yai po page ola mabo bidi meba me, te Farisi dabe meba dali augwaligo te po agabolo wai, “Po

ola mabo bidi, dago homugo nago bomai sę me deli ebode, tama dago sumainogo nago te sę yao,” te po wai.

³⁹Tiali goli agai po wei augwalibolo ponoyu bomonama te po wai, “Te God tagalama tama dwai sę ela bilibo megı bidibo we bidi hani dabe, augwaligo te bomai sę ebo suainogo i wabo dao. Tiali goli, eno dagebolo te bomai sę me deli eno ola magobeo. Te polobadu Godigo po pusali bidi profet Jona agade pedelali bomai sę tiwai naga pedelama, tama dagego te sueibao. ⁴⁰Tama polobadu te tiwai yai te bidi Jona sela sogo giligade me sela sogo hulide te genuai süğü haliga tomode bidaι, tama te tiwai yali gilama naga te Godigo Bidi Mu aga me te sela sogo giligade me sela sogo hulide e tq̄ tomode bidaibao, te isai we bidi bidibo madide.^j

⁴¹Tama Godigo we bidi augwali dagalobo sogode te Ninive hanu we bidi dabe augwali te po tüde dolaluyu, tama dage megı bidibo we bidibolo te augwaligo dwai kolesaga yali po pusaibao. Magi baso meni. Polobadu mu Godigo po pusa mani bidi nogi Jona agai te Ninive we bidibolo Godigo po pusa mobadi yaide, augwaligo odama, dwai dwai sę yalide ge neyu, tama tagalama homu begelai dao. Tiali goli Jona aiyaba elalubo bidi me deli pedelama, tama megı dage tomode bidibao.^k ⁴²Tama polobadu bidali te genuai bidi nogi Solomongo wabo wiegi yai kolesaga ebo po odai hagede, digibulu bulude bidiyu genuai bulu tonalubo we asai dao. Tiali goli Solomon aiyaba elalubo bidi me deli pedelama, tama megı dage tomode bidibao. Tama dagego agai po odisabaso, te Godigo te we bidi po tı̄ ebo sogo te digibulu bulude asali genuai wego ‘Dagego te dwai sę yai dao’ po waibao,” Jisasgo te po wai.^l

Dwai haubo noma ma geasa asobo po (Luk 11:24-26)

⁴³Jisasgo te po ma gagaliyu, te po wali, “Te dwai noma haubogo bidi me tagalama, te dwai tulubage meni yai buluba toma nabo pesage gegegi pabo dao. ⁴⁴Tiwai pesage me susiabaso da, aga homugo tama tebao, ‘Ena taga soali beba ma geasa paibao’ homu yaibao. Tama aga pelama, te be sugi pali, augwaligo bugagia dodolama, pobele bage meni yai au ma ilai beba ma pabo qo te bidi pageba, dwai noma ma peyu tebo dao. ⁴⁵Tama aga pelama, gasa dwai noma te a naga olama me si sigi pali. Tama te gasa dwai noma haubo dabego te dwai dwai sę ebo kolesaga tebogo te hasia dwai mobo haubogo ebo dwai kolesaga aiyaba elalubo dao. Tama augwali aga dali aselama, tama augwali tomoba pelama, tama augwali te bede bidibo dao. Polobadu te bidi dwai bidaι, tiali goli megı me te aga dwai mu bidibao. Te tiwai naga megı e sogo dwai sę eyu bidibo we bidi augwalibolo me te tiwai sę pedelaibao,” Jisasgo te po wai.

^j 12:40 Jna 1:17 ^k 12:41 Jna 3:5 ^l 12:42 1 Kin 10:1-10; 2 Sto 9:1-12

Jisasgo ida me Jisasgo ama dede dali po
(Mak 3:31-35; Luk 8:19-21)

⁴⁶ Jisasgo po te we bidi augwalibolo madubadi, tama aga ida ama dede dali augwali aselama, bulu badu dolaluagasaki. Augwaligo aga dali po miainogo asai. ⁴⁷Tama bidi me deligo agabolo te po wai, “Odao, naga ida me naga ama dede augwali bulu badu aselama dolalubao, tama augwaligo nage dali po miai hagede ebao.” wali.

⁴⁸ Tiali goli Jisasgo po wei te bidibolo ponoyu te po wai, “De aga eno ida dawe? De eno ama dawe?” Jisasgo te po wai. ⁴⁹Tama agai aga wali pabo bidi dabe nogo du eyu, te po wali, “Suao, eno ida me eno ama dede dali, te e dao. ⁵⁰Eno Aya dagalude bidibo bidi agai homu wali pabo we bidi da, te eno ama dabe me, abe dabe me ida dabe dao,” Jisasgo te po wai.

Bidigo tubo nai wai gide sasa bilibo po begelama po digi wali po
(Mak 4:1-9; Luk 8:4-8)

13 ¹Tama Jisasgo te po ola silama, tama te sogo naga aga te be tomode bidali tagalama, te bedu buluba soai. Tama aga pelama, te sigi aji sesege badu dulalugi pai. ²Tama we bidi hani hauwa aselama. aga pageba sisinagasobaso tama aga te geba me deli daiba holama duagulali, tama te asali we bidi augwali tigidali te sigi aji sani sesegede bidaluai. ³Tama agai po digi po hauwa begelama augwalibolo wai. Agai te po wali, “Te bidi me deli pelama, te giba nai wai ge telala biligi pai. ⁴Tama agai te nai wai ge telala pobadi, tama te nai wai ge me badu te soabo tude tudulaluali. Tama te tude tudulaluali nai ge te ba dabego tuagasai. ⁵Tama te nai wai ge me badu te tq ili hauwa meni yai digi te masigi elalubo madigi daiba tudulalualio. Te tq aiyanu dulisawai madi tama te tedelaluali nai wai ge polo holali. ⁶Tiali goli giliga pedaliyu posologo te nai wai ge te giligago ulai. Tama te nai wai sele meniamma, tama tigidali sasia pelama, tama isali. ⁷Tama meba te tedelawali nai wai ge te sesane yai bono elalubo madi tomoba tudulaluali. Tama te sesane yai bono elalubo madi tomodu te nai wai ge holali digi, te sesani yai bonogo haluama, tama te nai isilali. ⁸Tiali goli te telala pali nai wai ge me badu te wiegi yai tqba tudulaluali, tama te nai du walali. Meba te 100, tama me badugo te 60 walali, tama me badugo 30 tama waliyu yai,” wali.

“Duga po odobo olo elalubo bidigo da, te po bugagia odiqo,” Jisasgo te po wai.

Magi baso Jisasgo po digi po begelama waliwe?
(Mak 4:10-12; Luk 8:9-10)

¹⁰Te Jisas aga wali pabo bidi dabe aga pageba aselama, te po wai, “Magi baso nago po digi po begelama augwalibolo obawe?”

¹¹ Agai po wei ponoyu te po wai, “Godigo agai we bidi tonalubo sę geme dualaluali po page haninama te agai dagebolo ola mawai dao. Tiali goli e bidi dabebolo te geme dualali po page te haninai menio. ¹² Magi baso menio. Bidi me deligo nai meba elalubaso da, teda Godigo agabolo te nai umabo mayu, tama aga nai hauwa elaluabao. Tama bidi me deligo te dwasianu nai naga elalubaso da, teda Godigo te dwasianu nai dagala sawaibao. ¹³ Tama tebo sęde eno te po digi po begelama augwalibolo obao: augwaligo gedugo da tonono bilibadi, tiali goli augwaligo magi nai me deli subo menio. Augwaligo olo mubadi, tiali goli augwaligo po me odisiąyu tama kolesaga sabeo. ¹⁴ Te tiwai sę ebo we bidi augwalide te po me deli te Godigo po pusali profet bidi Aisaiago wali po te usu nanio. Agai te Godigo wali po asęai dao:

‘Te dagego po odobo sę ebadi, tiali goli dagego te po page konegobeo. Te dagego tonono bilibo sę ebadi, tiali goli dagego magi nai me deli sugobeo.

¹⁵ Magi baso meni. E we bidi hanigo homu kolesaga te puna pai dao. Tama augwaligo ologo po odobo te hagela eyu, tama augwaligo augwa gedu palia sai. Tiyu augwaligo gedugo te magi nai me deli suidali weyu tiali, tama augwaligo ologo po odidali weyu tiali, tama augwaligo homude te po page ma koneama, tama augwali begesa enaba ma aselama, te eno augwali usu ma ilidali weyu augwaligo tama kolesaga yai dao,’^m

Aisaiago Godigo wali po augwalide tama asęai dao. ¹⁶ Tiali goli dage da, te wiegi yai homu pemene yao. Magi baso meni. Dagego gedugo te nai dabe te subo dao, tama dagego ologo po odobo dao. ¹⁷ Eno mu po dagebolo obao, polobadu te Godigo po pusali bidi hauwa dabego me, te doloba pai bidi hauwa augwaligo me te megı dagego te subo sę suainogo godolo yai, tiali goli augwaligo me subeo. Tama augwaligo me megı dagego te odobo po odainogo godolo yai, tiali goli augwaligo te po me odai menio,” Jissago te po wai.”ⁿ

Tubo nai wai gede po digi po page begelama wali po
(Mak 4:13-20; Luk 8:11-15)

¹⁸ “Te megı da dagego te bidigo nai wai ge te giba tededalo bilagasali po digi po page odio, bugagia koneao. ¹⁹ Te Godigo we bidi tonalubo kolesagade po wabo odobo digi te po page koneyu dąq wasiąwai bidi, te bidi te aga da te soabo tuba olo tudulaluali nai wai ge tiwai dao. Tama te Satan agaba aselama, tama polo te po Godigo aga homuba budali po te Satango te dagala sabo dao. ²⁰ Tama te gi page bidigo te telala biligi pali nai wai ge meba te masigi elalubo madigi tudulaluali po wali da, te tiwai te bidigo te po odama tama

^m 13:15 Ais 6:9-10 ⁿ 13:17 Luk 10:23-24

polo selama, tama te pode wiegi yai homu pemene ebo. ²¹Tiali goli aga da te sele meni yai nai tiwai dao. Tama tibaso, aga homu daide naga te odali po te dwasianu sogo naga elaluaibao. Tama nosali bidi mebagu te Godigo po aiyaba elaluabo homu eyu da, teda te bidibolo augwaligo sege menama, tama dwai kolesaga agabolo eyu, tama agai konealubo po däq wali te polo tagalama, tama tulalubo dao. ²²Tama meba te tedela palali nai wai ge te sesani yai bono elalubo madi tomoba tudulaluali, te bidigo po sabo tiwai yali, tiali goli agai homu hauwa te tqde naiba pelama, tama agai mone dabe te doado bage hauwa sabobo homu hauwa yali, tama te homu ebogo te Godigo po mesegelama, tama agai nai ge walobeo. ²³Tiali goli te tedela palali nai wai ge te wiegi yai ili yai elalubo tqba tudulaluali po wali da, te bidigo po odama tama te po page bugagia koneani dao. Te tobage we bidi augwaligo nai ge walaibao, te 100, ma 60, ma 30 tama walobo dao,” Jisasgo te po wai.

Te gide dwai noswai pedalobo po begelama po digi po wali

²⁴Te Jisasgo gasa po digi po begelama, augwalibolo te po wai, “Te Godigo we bidi tonalubo se e tiwai dao. Te bidi me deligo aga wiegi yai nai wit wai ge te aga giba telala bilali. ²⁵Tama elama, tama me sogo hulide we bidi augwali godege piai digi yaide, te bidi aga boi bidi aselama, tama agai te nai wai telawali wit gi tomoba te dwai noswai wai ge sasq bilagaselama, tama aga paialio. ²⁶Tama nosali te wit holama, tama nai ge walainogo ebadi, tama augwaligo te nai wai telawali gide te dwai noswai dali holobo suai. ²⁷Tama te gide se ebo bidi dabe pelama, te gi aga ayabolo wagi peyu, augwaligo te po wai, ‘Genuai bidi, dago homugo nago gide wiegi yai nai wai ge naga tedelalo bilali homu yai dao. Tama magi ilama te tiwai dwai noswai dali pedalaliwe?’ te po wai. ²⁸Tama agai te se ebo bidi dabe augwalibolo te po wai, ‘Te boi bidi me deligo te tiwai se yali dao.’ Tama te se ebo bidi dabego agabolo te po wali, ‘Tama tibaso, nago homugo usu wida, teda da pelama, te dwai noswai gudama, sisinigi pabo te usu yaibawe?’ ²⁹Tiali goli, agai augwalibolo te po wai, ‘Mu menio. Tiyu dagego te dwai noswai gudama sisinibo se eyu, dagego te wit dali gudabuo,’ te po wai. ³⁰‘Dagego te si dali si holomainao, te si holama, tama te nai sabo sogode te usu naibao. Tama te nai sabo sogo eno te nai togwa sabo se ebo bidi augwalibolo te po waibao, ‘Dagego te dwai noswai bolo hasia sisinama, tama dunama, siade ulainogo kënama muao. Tiali goli, dagego te wit da, te te sisinama te eno nai mubo beba muao,’ eno te po waibao,’ te bidigo te po wali,” Jisasgo te po wai.

Te nai wai mastet me, te bret bo dabo nai yis te side po digi po begelama wali po (Mak 4:30-32; Luk 13:18-21)

³¹Te Jisasgo gasa po digi po begelama, augwalibolo te po wai, “Te Godigo we bidi tonalubo se te nai wai me deli tiwai, te nai mastet wai

tiwai dao. Bidi me deligo te nai wai selama, aga gide bulubo dao. ³² Te nai mastet wai ge da, te kemeni ge tiwai sabi si dwasianunu mu dao. Tiali goli nosali te nai ge genuai hola silama, agai te gide holali haniani nai tigidali te aiyaba elalubo dao. Te ni tiwai holama, tama te ni nologoba te ba dabe duayagasobo dao,” wali.

³³ Tama agai gasa po digi po me ma begelama, te po augwalibolo wai, “Te Godigo we bidi tonalubo s̄e te bret bo dabo nai yis tiwai dao. Te we me deligo te dwasianu yis selama, tama te genuai dramde munalubo tubo plaua dali taluama begelaibao. Tama nosali te plaua tigidali te bo dai subo dao,” Jisasgo te po wai.

Jisasgo po begelama naga po digi pogo pusali po
(Mak 4:33-34)

³⁴ Te ola mabo po tigidali tama odubadi, Jisasgo te we bidi augwalibolo te po digi po begelama naga wai. Agai te po me deli haninama augwalibolo me pusubeo. Menio. Agai po digi po begelama naga augwalibolo te po wai dao, ³⁵ te Godigo po pusali bidi profet me deligo pedauwalide pusali po usu numainogo. Te profet bidi agai polobadu te po wai,

“Te eno augwalibolo po weyu, tama eno te po digi po wabo tiwai yaibao. Te eno augwalibolo te polobadu mu geme dualaluali po te megi e sogo me geme dualaluali po te po eno augwalibolo pusaibao,” te po wai.^o

Dwai noswai po digi po page po

³⁶ Te sogo Jisasgo te we bidi augwali tagalama, tama aga te be tomoba pelama bidai. Tama aga wali pabo bidi dabe augwali agaba aselama, te po wai, “Nago te dwai noswai te gide pedalobo po olama po digi po begelama wali po page te dabolo haninama ola mao,” te po wai.

³⁷ Te Jisasgo po wei ponoyu te po wai, “Te wiegi yai nai ge telala pali bidi po wali da, te bidi da te ena dao, Godigo Bidi Mu dao. ³⁸ Tama te nai ge tedelalo pali gi da, te e tq da. Tama te wiegi yai nai ge da, te Godigo obo tomode bidibo we bidi dao. Tama dwai noswai da, te Satango we bidi dabe dao. ³⁹ Te boi bidigo dwai noswai ge tedela bilagasali, te bidi da Satan dao. Te nai sabo sogo bodolu wali, te e tq silabo sogo dao. Te gi nai sabo bidi dabe augwali da, te Godigo s̄e ebo ensel mobo bidi dabe naga dao. ⁴⁰ Te gi s̄e ebo bidi dabe augwaligo dwai noswai sisinama siade ulubo, te tiwai naga augwaligo e tq silibo sogo muani bodolude te tiwai yaibao. ⁴¹ Te Godigo Bidi Mu agai aga s̄e ebo ensel mobo bidi dabe tagala

^o 13:35 Tib 78:2

palama, tama augwaligo te Godigo tonalubo we bidi tomode elalubo dwai dwai sę ilabo kolesaga me, te haniani gasa dwai sę ebo we bidi me, augwali tigidali sisinama⁴² tama augwaligo te we bidi dabe augwali te moni tigi dene ebo siaba sawaibao. Tama te siade te augwali dwai gela mu weyu, tama augwa kele gaugo halua tuyu bidaibao.⁴³ Tama te sogo te doloba pai we bidi augwali augwa Ayago we bidi tonalubo madide bidiyu, tama augwali tigide te giliga ula tiwai eyu bidaibao. Odo elalubo bidi dabego te po bugagia odiqo,” Jisasgo te po wai.

**Bidigo te geme dualali wiegi yai doado bage
gegebo po digi po begelama wali po**

⁴⁴ “Te Godigo obo tomode bidibo kolesaga te wiegi yai mu dao, te gide geme dualaluali dila pai nai mu tiwai dao. Bidi mego te nai subaso, tama agai ma dualali. Agai wiegi yai homu pemene yai, tama aga pelama, aga doado bage tigidali te bidi dabebole menama, mone selama, tama te gi tq abelegi paibao, te aga suali dila pai nai somainogo,” Jisasgo te po wai.

Te wiegi yai bis po begelama wali po digi po

⁴⁵ “Te po me e dao. Te Godigo obo tomode bidibo kolesaga te wiegi yai mu dao, e tiwai dao. Bidi me deligo aga mone sabo bisnis sę eyu, te wiegi yai bis gegi bilibo dao.⁴⁶ Agai te bis wiegi wiegi yai mu me deli subaso, te bis gasa bis tigidali aiyaba elalubaso, teda aga pelama, te aga doado bage tigidalide te mone sigi pelama, tama te wiegi yai bis abelegi paibao,” Jisasgo te po wai.

Te sųgų sabo wade po digi po begelama wali po

⁴⁷ “Ma, te Godigo we bidi tonalubo sę e tiwai dao. Bidi dabe augwaligo te sųgų sainu te genuai sųgų sabo wa te sigi aqba şanama, tama haniani sųgų te wa tomoba pabo te tiwai dao.⁴⁸ Tama te sųgų sabo wa pagą baso, teda augwaligo te wa kegasra te aq̄ saniba tuagasobo dao. Tama augwali dualama, te wiegi yai sųgų naga te genuai pede mebabu sisinaibao. Tiali goli te dwai sųgų dabe da, te augwaligo te sela şabo dao.⁴⁹ Tama e tq de dagalu si silibo sogo te tiwai gilama naga yaibao. Te Godigo sę ebo ensel mobo bidi dabe augwali aselama, te dwai kolesaga yali bidi dabe te doloba pai bidi dabe tomode bidibo te dagalama, sela sawaibao.⁵⁰ Tama augwaligo augwali te genuai tigi dene yabo siaba sawaibao. Tama te siade augwali dwai gela weyu, tama augwa kele gaugo ma halua tueibao,” Jisasgo te po wai.

⁵¹ Te Jisasgo augwalibolo hanalu wali, “Te eno megi pusali po page tigidali dagego koneaniwe?” Tama augwaligo agabolo te po wai, “Awe.”⁵² Agai augwalibolo te po wali, “Awe, te Juda dabego polobadu bomo yai po page koneani bidi aga te Godigo we bidi tonalubo kolesaga tede

te po te skul wai tiwai pedalobaso da, teda agai te Godigo polobadu wali po me, te megi elalubo gesi wiegi yai po dali, te po si aga homude elaluabao. Tama te dwagi yai po hauwago agai gasa we bidi ola mabo usu mu yaibao,” Jisasgo te po wai.

Te Nasaret dabe augwaligo Jisas tudiba muani po
(Mak 6:1-6; Luk 4:16-30)

⁵³ Jisasgo te po digi po wali te po dabe ola silama, tama agai te bulu tagalama pai. ⁵⁴Tama aga page buluba pali, tama Godigo po agai te augwa bomo yai po odobo be tomode ola mawai. Tama augwali noma mu siyu, te po augwa hasi wai, “Te kolesaga koneani, me te bomai se tigidali, te bidi agai magi ilama te tigidali kolesaga saliwe? ⁵⁵Te bidi da te kamda bidigo ogwa naga dao. Aga ida nogi Maria dao. Agai ama dabe te Jems, me Josep, me Saimon, me Judas, te augwali dao. ⁵⁶Agai abe dabe tigidali da dali bidibao. Te kolesaga koneani me te bomai se tigidali agai magi ilama saliwe?” ⁵⁷Augwaligo te po olama, tama augwaligo aga dali dwai homu yai. Tiali goli Jisasgo augwalibolo te po wai, “Te Godigo po pusubo bidi profet agai nogi te tigidali bulude elalubo dao. Tiali goli aga page bulude me, aga bede me, te aga nogi meni yai elalubo dao,” te po wai. ⁵⁸Augwaligo agade konealubo po daq wasiabaso, agai bomai se hauwa te aga page bulude ebeo.

Te we bidi baptais mani bidi Jon isali po
(Mak 6:14-29; Luk 3:19-20; Luk 3:7-9)

14 ¹Te Jisas aga page bulude bidali sogo te Juda hani genuai gavman tuni bidi nogi Herot agai te Jisasgo se ela bilibo po odai. ²Tama agai aga se ebo bidi dabe augwalibolo te po wai, “Te bidi aga te baptais mani bidi Jon dao. Aga te gu page ma hodaluali dao. Tama tibaso, te tobage genuai bomai se te aga nogodu pedalobo dao,” te po wai. ³Te tiwai pedelali. Polobadu te gavman tuni bidi Herotgo bidi dabe tagala palama, tama augwaligo Jon pageba pelama, tama aga bonogo nogo dynama, tama “Aga kalabusiba muao,” po obaso, te aga kalabusiba muani. Te tuni bidi Herot aga ama Filipgo we nogi Herodias, te wego “Aga kalabusiba muao” po obaso, teba muani. ⁴Magi baso meni. Polobadu Jon agai Herotbolo te po widu geai, “Nago te we sali se te dolo menio.” ⁵Tama Jongo te po obaso, Herotgo Jon ela muabo homu yali goli, aga te Juda we bidi augwalide wi yai. Augwaligo homugo te Jon aga da, te Godigo po pusubo bidi profet da te homu yai dao.

⁶Tama me sogode bidi meba augwali te tuni bidi Herot dali aga beba sisinani, te aga idago aga ame nani sogo pedalobo koneama tiwai. Tama te sogo te we Herodiasgo wegi, te gesi we, te aga te augwali tomode tqaibi ela bilai. Tama Herotgo godolo mu eboso, ⁷tama agai po daq weyu, te

gesi webolo te po wai, “Mu tamao, magi nai nago enabolo hanalu obasa da, teda te nai eno nagebolo mawaibao,” te po wai.

⁸ Tama te wegi aga idago agabolo te homu kolesaga mani, tama agai te Herotbolo te po wai, “Nago te we bidi baptais mani bidi Jon elama, aga mage togolama, tama aga toboli te pou me delide munama, tama selama, enabolo eba magasao,” te gesi wego te po wai.

⁹ Agai tama po wai, tama tuni bidigo homu sęęę yai. Tiali goli agai po dąę weyu po mu po da wali te homu elama, tama aga dali dualama nai tuali bidi dabe augwaligo me te po wabo odai. Tama tibaso, agai te po aga sęęę ebo bidi dabeebolo wai, “Te nai agabolo mao,” te po wai. ¹⁰Tama agai bidi me deli te kalabus beba tagala palama, tama Jongo toboli togogi pai. ¹¹Tama augwali aga toboli te pou me delide munama sela asali, tama augwaligo te wegibolo mawai. Tama agai aga ida bidibo digi selasa pai dao. ¹²Tama Jon aga wali pali bidi dabe augwali aselama, aga tigi naga selama pubulai. Augwaligo pubulama, tama augwali pelama, Jisasbolo te po wagi pai dao.

Jisasgo 5,000 bidi dabe mu te nai mani po
(Mak 6:31-44; Luk 9:10-17; Jon 6:1-13)

¹³ Te Jisasgo te Jon isali po wabo odama, tama agai te bulu tagalama, tama geba me deli selama, tama aji daidu peyu, aga te bidi meni yai bulu badu pali, aga wali pabo bidi dabe augwali naga aga dali pali. Tiali goli te we bidi augwaligo aga pali po odobaso, tama augwali te hanude bidali tagalama, tama augwali aga pali wali pai dao. ¹⁴Tama nosali Jisas aga te gebadu pelama, te wę u badu tugi pelama, tama agai genuai we bidi bidalubo suali. Tama agai augwali homu dene mu ebaso, tama agai augwaligo gasi sai bidi dabe usu ma ilali.

¹⁵ Tama pio aga wali pabo bidi dabe augwali agaba aselama, te po wai, “Te ede bidi meni yai madigi dao, tama be pio yilio. Tama nago e we bidi augwali tagala palama, pomainao. Augwa te be nani dabebe tedela pelama, tama augwa nai abela tugi pomainao,” te po wai.

¹⁶ Tiali goli Jisasgo augwalibolo te po wai, “Magi baso augwali pomainogowe? Duga digi augwali nai mao.”

¹⁷ Tama augwaligo agabolo te po wai, “Dago nai hauwa ede munalubeo. Te a naga bret badi, te suęęę si naga munalubao,” te po wali.

¹⁸ Agai te po wai, “Te nai enabolo edaba sela asao.” ¹⁹Tama agai te we bidi augwalibolo po olama, augwali te noswaide duada pao te po wai. Tama agai te a naga bret badi te suęęę si dali selama, tama agai dagaluba uwguba tonaluyu, aga Ayabolo nage usu dao po wai. Tama agai te bret pedama, tama aga wali pabo bidi dabeebolo menama, tama aga wali pabo bidi dabego te we bidi augwalibolo te nai dobaba pai. ²⁰Tama augwali tigidaligo te nai tulama, tama augwali te naigo tabiai. Tama augwaligo

te nai meba munalubaso, tama te Jisas wali pabo bidi dabe augwaligo te munalubo nai sisinama, tama bonou wa 12 pagawai dao. ²¹ Te tiwai te 5,000 bidi dabego te nai tuai. Augwaligo te we me te wai puluba dabe augwaligo te nai tuali goli, augwali nedebao.

Jisas te sigi aq̄ daidu pali po
(Mak 6:45-52; Jon 6:16-21)

²² Tama te nai tula silama da, tama megı da Jisas aga wali pabo bidi dabe augwalibolo te po wali, tama augwali te gebaba holama, te augwali polasa te sigi aq̄ u badu pao wai. Tama agaduba digi te we bidi augwali tagala palainogo yai. ²³ Agai te we bidi augwali tagala pala silama, tama agaduba deli naga te bulu duba holama, Godibolo po wainogo yai. Tama pio agaduba naga te bulude bidai. ²⁴ Aga tede bidibadi, te geba te sigi aq̄ digibulu tomodu pobadi, tama moni bomai wali te geba sabi badu asiyu, tama te aq̄ dini ugwaba holoyu, tama augwaligo aq̄du todogo pabo se dene yali. ²⁵ Tama te be posabo magade Jisas te sigi aq̄ daidu pelama, aga wali pabo bidi dabe augwali bidibo gebaba pedalainogo pai. ²⁶ Tama augwaligo aga te sigi aq̄ daidu asobo sulama, tama augwali moni wi mu yai. Augwaligo te po wali, “Te isi bidi me deli dao.” Augwali wi eyu, tama augwaligo hwa wali. ²⁷ Tialima polo Jisasgo te po augwalibolo wali, “Dagego homu kəna sao. Te ena dao. Dage wi egimio.”

²⁸ Pitago agabolo po wei ponoyu, te po wai dao, “Genuai Bidi, te nage tama da wida, teda nago enabolo olama, tama ena me te wę daidu nage pageba asao wao,” te po wai.

²⁹ Jisasgo te po wai, “Nage asao.” Tama te po obaso, Pitago te geba tagalama, tama te sigi aq̄ daidu te Jisas bidiboba pabo gagalali. ³⁰ Tiali goli agai te wali asobo sulama wi yali, tama aga te aq̄ tomoba tigi dwasianu hoasainogo yai. Tama agai bomonama i weyu, te po wai, “Genuai Bidi, nago ena tau sao,” te po wai.

³¹ Tama polo mu Jisasgo nogo munama, Pita nogogo tola sali, tama agabolo te po wai, “Nago naga homu tigidali enaba mubeo, dwasianu naga mawai. Magi baso nago homu si ebawef?” ³² Tama augwali si te gebaba hola soabo side da, tama te moni wali sia sai dao. ³³ Tama te gebade bidali bidi dabe augwaligo agabolo aga nogi ugwaba sabo po weyu, augwaligo te po wai, “Mu tama, nage te Godigo Ogwa dao,” wali.

Jisasgo gasi yai we bidi hauwa te Genesaretde usu ma ilali po
(Mak 6:53-56)

³⁴ Augwaligo te sigi aq̄ nogolama, tama augwali pelama, te Genesaret te badu tugi pai. ³⁵ Tama te bulude bidibo bage augwaligo koneani, te aga Jisas dao. Tama augwaligo te pade elalubo be nani tigidali dabeba po todolo pela silama, tama augwaligo haniani gasi yai we bidi dabe

tigidali aga pageba selasa asai. ³⁶Tama augwaligo agabolo hanaluyu, te gasi yai we bidi augwaligo nogo naga te agai ugwa sesegeba mumainao wai. Tama te gasi yai we bidi dabe augwaligo te tiwai yali bage tigidali augwaligo gasi usu ma ela silai dao.

**Te Godigo bomai pogo te waj nq̄ dabego po aiyaba
elalumainao po wali**
(Mak 7:1-13)

15 ¹Te Farisi hani bidi meba me, te Juda dabego bomai po page koneani bidi hani bage me, augwaligo te moni hanu Jerusalem tagalama, Jisas agaba aselama, augwaligo te po hanalu wagasai dao, ²“Magi baso nage wali pabo bidi dabe augwaligo te waj nq̄ dabego dabolo mani kolesaga te augwaligo bolobawe? Te augwaligo nai tuainogo ebo sogo, augwaligo te augwa nogo aq̄ me telabo menio, te dena waj dabego nogo aq̄ telabo gasagi yai se ebo augwaligo wali pabo menio.” Te bagego te po hanalu wali.

³Jisasgo po wei ponoyu, augwalibolo bomonama te po wai, “Te dage, dage magi baso duga digi duga kolesaga wali peyu, tama dagego te Godigo bomo yai po bolobo dawe? ⁴Te Godigo te po wai, ‘Nago naga aya de ida sigo nogi ugwbaba siyu, augwali sigo po wali pao’ wali, tama me ‘Te bidigo aga aya de ida si dali dwai po obaso da, teda te bidi aga ela muao,’ Godigo te po si wai.^p ⁵Tiali goli te bomo yai po gedu siyu, dagego te po wabo dao, ‘Te bidi me deli agai aga aya me ida tau sabo mone me doado bage me elaluali digi, agai augwali sibolo “Eno e nai te Godibolo mawainogo sa muai nai dao” weyu da, ⁶te usu da, te agai aga aya ida tau sabo tagalama, agai augwali sigo nogi ugwbaba sabo bomo yai po bolobo se te usu dao,’ te dagego te po ola mabo dao. Te tebo kolesagago dagego te Godigo po aiyaba elaluama, tama duga ebo kolesaga digi te ugwbaba sabo dao, te naga wali pomainogo. ⁷Dage homu ugwidu naga po wabo bidi dabe dao. Te Godigo po pusali profet bidi Aisaia agai dagede polobadu mu wali po te mu po tama dao. Agai dagede te Godigo po tama wai,

- ⁸ ‘Te hani we bidi augwaligo eno nogi te pedauwaligo naga ugwbaba sabo dao, tiali goli augwaligo homu kolesagago augwaligo ena dali abagi homu ebo menio.
- ⁹ Augwaligo te bidi dabego ola mani bomo yai po naga pusuyu te po wabo dao, “E te Godigo po dao.” Tama tibaso augwaligo olo naga enabolo lotu po wabo dao,^q

^p 15:4 Sai 20:12; 21:17; Prs 20:9; Bom 5:16 ^q 15:9 Ais 29:13

Godigo te po wali,” Jisasgo te po wai.

Te bidi meda ilisiąbo nai po
(Mak 7:14-23)

¹⁰ Te Jisasgo te po te tuni bidi dabebole olama, tama te gasa olo we bidi augwali aga pageba asomainogo i olama, tama augwali aselama, tama agai augwalibolo te po wai, “Dagego e po bugagia odama, homude kuna koneao.

¹¹ Te bidi deligo agai aga nogo wę telasiąbadi te agai nai sela tubaso da, te kolesagago te bidi meda me iligobeo, tebogo aga Godigo gedude dwai bidi me iligobeo. Menio. Tiali goli te po bidigo pedauwali tomodu te buluba soabo pogo, tego naga te bidi meda ilibo dao,” Jisasgo te po wai.

¹² Tama te sogo te aga wali pabo bidi dabe augwali aselama, agabolo te po wagasai, “Nago te Farisi dabe augwaligo nago megı tamadi wali po odoyu, tama augwaligo dwai homu ebo koneaniwe?” te po wai.

¹³ Agai po wei ponoyu, te po digi po begelama te po wai, “Eno Aya dagalude bidibao, agai gi tiwai elalubao. Tama tigidali nai dabe te agai digi me bulusawanı nai da, te nai tigidali deli deli agai te sele dabe dali page guda sawaibao. ¹⁴ Dagego te Farisi dabe augwali sula tagalama elaluao. Augwali te gedu widai, tama te gedu widai mego te gasa gedu widai bidi te pabo tų ola mawainogo ebao. Tiali goli, te me gedu widaigo te me gedu widai bidi te tų ola mayu da, teda bidi talua si te aji gamia pageba tulaluaibao,” Jisasgo te po wai.

¹⁵ Pitago te po wai, “Nago te hasia wali po digi po begelama wali po page pusao, tama dago odaio.”

¹⁶ Jisasgo te po bomonama wai, “Dage me te homu kolesaga meni yai bidi dabe dawe? ¹⁷ Te dagego konebo meniwe? Te tigidali nai pedauwali tomodu te tabiba pelama, tama te tabigo nosali te di beba sela sağı pabo dao. ¹⁸ Tiali goli te po pedauwalide bidama tama te buluba asobo, te po te bidigo homu kolesagadu pedalobo dao. Tama te pogo naga te bidi meda ilibo dao, tebogo aga Godigo gedude dwai bidi ilibo dao. ¹⁹ Tama bidigo homu kolesagadu te haniani dwai sę ilabo homu pedalobo dao. Tama te tobage homu eyu, augwaligo po weyu, tama augwaligo te bidi ela mubo kolesaga me, te we sabo sę dolobo kolesaga me, te hale ilibo penani kolesaga dabe me, te nai wi sabo kolesaga me, te po tude tibo po wabo kolesaga me, te bidi nogi posobo po wabo kolesaga me, te tobage dwai dwai sę ebo dao. ²⁰ Tama te tebo kolesaga dabego te bidi Godigo gedude te dwai meda ilibo dao. Tiali goli bidigo duga wąigo ola mani nogo wę telabo kolesaga isiąbadi te nai tubo, tebo kolesagago te bidi meda iligobeo,” Jisasgo te po wai.

Kenan tǫ we agai konealubo po Jisasde dąu mu wali po
(Mak 7:24-30)

²¹ Te Jisasgo te Genesaret tǫ tagalama, tama aga gasa tǫba pai, te hanu si nogi me Tair, me Saidon, te hanu si pąba pai. ²² Tama te Kenan tǫdu

asai we me deli te bulude bidai, te we da te Israel hani isiąwai we dao. Tama te we Jisas pageba asama, tama te po wedu geai, “Genuai bidi, nage te polobadu bidali bidi Devit aga hani bidi, nage ena dali homu dene eyu, tau siyu yao. Eno wegi te dwai haubogo mu dagana sai, tama te dwai haubogo te wegibolo dene mu mabo dao,” te wego te po wedu geai.

²³Tiali goli Jisasgo te wego po wei ponobeo, sagia sai. Tama aga wali pabo bage augwali agaba aselama, tama aga homu begelemainogo te po wai, “Te we aga tagala palao. Aga da wali asiyu, da dali bomonama i weyu ebao,” augwaligo te po wai. ²⁴Tama Jisasgo augwalibolo po wei ponoyu, te po wai, “Te Israel we bidi hani augwali te hagawai kibu sipsip tiwai dao. Tama God agai ena tqba tagala palali, te eno augwali naga tau somainogo asai,” Jisasgo te po wai. ²⁵Tiali goli te wego te po odolama, tama Jisas aga saqade kidu sugunagaselama, tama yalima, te wego te po wai, “Genuai bidi, nago ena tau sao.”

²⁶Tama Jisasgo te wego po wei ponoyu, te po digi po begelama, te po wai, “Te wai pulubago tubo nai te nai dago te dwasianu yowi dabebolo menamuo, te dolo menio,” Jisasgo te po wai.

²⁷“Te po mu dao, genuai bidi,” te wego te po wai. “Tiali goli te yowi dabe me augwaligo te ni nami sai dologoba tulualui tubo nai kagali, te nai te yowi dabego tubo dao, page bidigo bede,” te wego te po wai.

²⁸Tama Jisasgo te wego po wei ponoyu, te po wai, “We, nago naga homu tigidali enaba mani se, enade konealubo se, te se genuai mu dao. Tama tibaso, nago ena dali hanalu wali nai po te pedalaibao,” te po wai. Tama Jisasgo te po wabo side, tama te sogo polo tama te wego wegi gasi sana pelama, bidai.

Jisasgo gasi yai bidi hauwa geselali po

²⁹Te megi da, Jisasgo te hanu si tq tagalama, tama te sigi aq Galili tq paba pai. Tama aga te tqde te bulu du me deliba holama, tama te bulu dude dulaluai. ³⁰Tama we bidi hani hauwa augwali aselama, aga pageba sisinagasai. Tama augwaligo te saqä dwai we bidi dabe me, te gedu widai bage me, te dili gagea pai bage me, te pedauwali pania sai bage me, te gasa gasi yai bidi dabe hauwa me, tama augwaligo te bidi dabe Jisas saqä pageba muagasaki. Tama agai augwali ma usu ilama, gesela silai dao. ³¹Tama te we bidi augwali noma siyu, augwali homu hauwa yai. Magi basowe, augwaligo suali, te pedauwali pania sai we bidi dabe po ma weyu, te dili gagea pali bage te usu ma eyu, tama te saqä dwai bage me te ma biliyu yai, tama te gedu widai bage te gedu pedeliyu yai. Tama tibaso, augwaligo te Israel bage God nogi ugwaba mu sai dao.

Jisasgo te 4,000 bidi dabe nai mani po (Mak 8:1-10)

³²Te Jisasgo aga wali pabo bidi dabe i olama asobode, tama agai te po wai, “Eno e we bidi augwali homu dene ebuo. Augwali sela sogo ena dali

bidali, te augwa sesali nai tula silali. Te eno augwali nasi ebadi pao po weyu tagala palogobeo. Tiyu augwali tude nasigo sidalio,” Jisasgo te po wai. ³³Tama aga wali pabo bidi dabe augwaligo agabolo te po wai, “Te ede te bidi meni yai digi dao. Te dago te tubo nai bret hauwa te menade selama, te e tiwai bidibo genuai we bidi hani hauwa magowe?” te po wai.

³⁴Jisasgo augwalibolo te po wai, “Dagego nisu naga bret elalubawe?” Augwaligo te po wai, “Dago bret nogo a naga me badu nogo si badi, tama dwasianu suqü si sela badi tama dago munalubao,” te po wai.

³⁵Tama Jisasgo te we bidi augwalibolo te po olama, tama augwali te tude duda pai. ³⁶Tama agai te bret a naga olama me badu nogo si badi, te suqü dabe sobadi elama, tama agai Godibolo nage usu da po olama, tama te nai pebedelama, tama aga wali pabo bidi dabebolo madubadi, tama augwaligo te we bidibolo te nai dobaba pai. ³⁷Tama tigidali augwaligo te nai tuali usu ela silai. Tama Jisas aga wali pabo bidi dabe augwaligo te me badu elaluali nai tigidali sisinani, tama te naigo te genuai bonou wa a naga olama me si pagawai. ³⁸Tama te we dabe sibi me te wai puluba me augwaligo te nai me tuali goli, augwali nedebéo, te nai tuali bidi dabe naga nedali e tiwai te bidi sese hauwa 4,000 bidi dao.

³⁹Te augwaligo te nai tula silama, tama Jisasgo te we bidi augwa buluba tagala palama, tama aga te geba holama, tama aga te aq̄ daidu pelama, te Magadan tq̄ badu pai dao.

Augwaligo te bomai sę suainogo hanalu wali po (Mak 8:11-13; Luk 12:54-56)

16 ¹Te Farisi hani dabe mebago me, te Sadyusi hani dabe mebago me, augwali Jisas pageba aselama, tama aga augwaligo usu sainogo yai. Augwaligo agabolo te dagalude bomai sę ebo me deli te augwaligo suainogo te sę yao te po wai. God agai te Jisasde dwagi yai homu egowe ma egobewe, te konemainogo augwaligo te po agabolo wai. ²Tiali goli agai po wei ponoyu, bomonama te po wai, “Te be pio ebode dagego te po wabo dao, ‘Dagalu mama ebao, tama tibaso do te wiegi yai be posaibao,’ te po wabo dao. ³Tama be posobode kigamu dagego te po wabo dao, ‘Te pō sisi elama tama dagalu mama ebao. Tama tibaso megi da, te wali me tulubage tulaeibao,’ te po wabo dao. Awe, dagego te dagalu sulama, tama te magi be nosali pedalabo be te dagego konebo dao, te dagego dagalobo dao. Tiali goli dagego megi e sogo da te bodolu koneama dagalobo menio. ⁴Dage dwai we bidi hani, te aga bidi tagalai we agai penani sę ebo gilama, te dagego God tagaliyu ebo we bidi dabego te bomai sę suainogo i obao. Tiali goli eno bomai sę te dagego sumainogo me egobeo. Menio. Te dagego Jonago polobadu mu yali bomai sę naga suagameo,” wali. Tama Jisasgo augwali tagalama, gasaba pai.

Ola mabo po bugagia suaو po
(Mak 8:14-21)

⁵ Te augwali te sigi ąj nogali, tiali goli te Jisas wali pabo bidi dabe augwaligo te tubo nai bret meba dali sela asainogo yali te homugo kegeda pai. ⁶ Tama Jisasgo augwalibolo te po wai, “Dage dua bugagia dao. Dage te Farisi hani dabe me te Sadyusi hani dabe dali sigo bret bo dabo nai yisde dua dao,” wali.

⁷ Te augwa digi augwa hasi po miyu, te po wai, “Dago te bret sela asisąbaso, agai te po obao.”

⁸ Tama Jisasgo augwaligo wabo po koneama, tama agai te po wai, “Aua, dage da te enaba duga homu dwasianu muani bidi dabe da. Magi baso duga digi te po weyu, ‘Te da bret menio’ te po obawe? ⁹ Ma, dagego me konebo meniwe? Te bidi sese hauwa 5,000 bidigo te a naga bret sela tuali te augwali tabibaso, tama te bonou wa basket nisu naga pagawai dawe? Te tiali șe dagego konesiąma gegeda pai dawe? ¹⁰ Ma, te a naga olama me si tama bret te bidi sese hauwa 4,000 bidi dabebolo menama tuali, te dagego homugo te naigo nisu naga basket wa pagawai, te dagego gegeda pisıamä konealusięyu ebawe? ¹¹ Te eno bret po dagebolo wabe. Magi baso dagego te konebewe? Dage te Farisi hani dabe me te Sadyusi hani dabe dali sigo bret bo dabo nai yisde dua dao,” Jisasgo te po wai.

¹² Tama te po odama, tama augwaligo koneai, agai augwalibolo te bret bo dabo nai yisde te po olama wabeo. Menio. Agai te po wali, te augwali te Farisi dabe me te Sadyusi dabe dali sigo ola mabo pode te bugagia dua dao te po olama wali.

Pitago Jisas aga te Krais da po haninama pusali po
(Mak 8:27-30; Luk 9:18-21)

¹³ Te Jisas te gasa tɔba pali, te tɔde te hanu me deli nogi Sisaria tede elaluali, te gavman bidi nogi Filip agai te bulu tonaluali. Tama te badu pelama, tama te sogo Jisasgo agade digi te aga wali pabo bidi dabe augwalibolo hanaluyu, te po wai, “Te we bidi augwaligo homu te Godigo Bidi Mude aga de dawe, augwaligo magi po agade wabo dawe?” Jisasgo aga digi te po wai.

¹⁴ Tama augwaligo te po wai, “Mebago te po wabo dao, te nage te baptais mani bidi Jon da po wabo dao. Tama mebago nage ma te polobadu bidali profet bidi Elaija da wabo dao. Tama mebago te po weyu, nage te Jeremaia da po weyu, ma gasa te Godigo po polobadu pusali profet bidi da te po wabo dao.”

¹⁵ Tama Jisasgo augwalibolo te po wai, “Tiali goli dagego da, te dagego homugo ma ena de da wabo dawe?”

¹⁶Tama Saimon Pitago po wei ponoyu, te po wai, “Nage da, nage te Godigo te we bidi tau sabo sa muani bidi Krais dao, te nage bidibo ula elalubo Godigo Oggwa dao,” Pitago te po wai.

¹⁷Jisasgo po wei ponoyu, agabolo te po wai, “Saimon, Jongo ogwa, God agai nage dali wiegi yai sə mu yai dao, tama nage wiegi yai homu pemene yao. E təde bidi me deligo te po nagebolo me ola mabeo. Menio. Eno Aya dagalude bidibo bidi agai te po nagebolo ola mani dao. ¹⁸Tama eno nagebolo te po obao, nage Pita dao, te nogi page te masigi dao, tama ena po wali pabo we bidi hani te masigi daide pedalaibao, te be me deli te genuai masigi daide sə ebo tiwai. Tama te we bidi hani augwali te dwai mobo bidi Satango we bidi ela muabo bomogo augwali me aiyaba elalugobeo. ¹⁹Te eno nagebolo te we bidi Godigo augwali tonalubo madi tomoba pabo tū dabo ki, te ki eno nagebolo mawaibao. Tama menama, tama nago te təde ebo niwai kolesaga dąu weyu habu selebaso da, teda Godigo me te aga bidibo madide te kolesaga dąu weyu habu selaibao. Tama nago e təde niwai kolesaga yoga sisama pisigina səbaso da, teda Godigo me te aga bidibo madide te kolesaga yoga sisama pisigina səwaibao,” Jisasgo te po Pitabolo wai. ²⁰Tama te po olama, agai po bomonama aga wali pabo bidi dabebolo wali, augwaligo gasa bidi dabebolo te aga digi te Godigo sa muani Krais bidi da wali po me wagio, hogwa sao, te po wai.

**Jisasgo aga dene selama, isama, ma hodalueibao wali po
(Mak 8:31–9:1; Luk 9:22–27)**

²¹Tama te sogo, te Pitago nage Krais dao po wali sogo, te sogo Jisasgo gagalama, aga wali pabo bidi dabebolo te po haninama ola mawai, “Te mu tama, ena te moni hanu Jerusalemba paibao. Tama pelama, tama tede nosali te Juda dabe genuai bidi dabego me, te pris toboli bidi dabego me, te Juda dabego bomo yai po page ola mabo bidi dabego me, te augwaligo ena dene genuai mu mawaibao. Augwaligo ena isilama, tama nosali te sela sogo wabo side ena ma hodalueibao,” Jisasgo te po wai. ²²Tama Pitago aga te gasaba odasa aselama, tama bomonama yoga sabo po wabo gagalai, “Genuai Bidi, mu menio. Eno homugo God agai nage dali homu dene eyu, tau siyu yao, te sə nageba pedalidali weyu. Te sə nageba me pedalogobe dao, te homu ebao,” Pitago te po wai.

²³Tama Jisas begelama, Pitabolo te po wai, “Satan, nage ena tudi badu soao. Nago eno pabo tūde tū palobo nai tiwai dao. Nago Godigo homu kolesaga wali pabeo. Menio. Nago e təde bidigo homu kolesaga naga wali peyu, enabolo te po wai,” Jisasgo Pita dali te po wai.

²⁴Tama te sogo Jisas aga wali pabo bidi dabe augwalibolo te po wai, “Te ena wali niwai bidi me deli asainu da, aga tobade aga digi aga homu aiyaba elaluama, tama agaba asobo niwai seğe bugagia tolalu ena wali

asao. ²⁵ Magi baso meni. Bidi me aga e tøde bidibo sogo aga tobade aga tigi sese yai da homu eyu da, teda dwaibao, hagawaibao. Me ma, niwai bidi me deli agai homugo ena koneyu, tama ena tobade aga bidibo ula tagaliyu da, teda aga bidabo ula mu saibao. ²⁶ Bidigo e tøde elalubo tigidali nai aga sai goli, tama te nai sobadi aga mu bidabo ula doloyu da, teda te tigidali sali naigo aga tau sabo usu egobeo. Te bidigo te bidibo ula ma abelainu te mena nai mobaso, te usu me egobeo. Te menio. ²⁷ Magi baso meni. Nosali Godigo Bidi Mu te aga Ayago genuai bomo me, ula me dali, te ensel mobo bidi dabe dali hodobo si asaibao. Te sogo te agai tigidali we bidigo yali kolesaga usu nama wei ponaibao. ²⁸ Eno mu po dagebolo obao, dage megì ede bidalubo bidi dabe me badu isisabadi, dagego te Godigo Bidi Mu aga we bidi tonalubo sè yabo bomo dali asobo sueibao,” Jisasgo te po wai.

Jisasgo tigi gasagi yai pedalai

(Mak 9:2-13; Luk 9:28-36)

17 ¹ Te nosali me sela sogo silama, tama Jisasgo Pita badi, te Jems de Jon ama name si badi, te bidi sela naga Jisasgo selama, tama aga polasa peyu, augwali te moni bobage bulu duba holai. Tede augwa naga bidaluai. ² Tama augwali te bulu dude bidibadi, te bidi sela augwaligo gedugo Jisas tonalubadi yaide, tama Jisasgo tigi augwaligo gedude gasagi yai pedalai. Aga gesabidi te giliga ge nanobo tiwai yai. Aga ugwa dabe me te gegemani eyu, tama ba nala nisi tiwai mu pedalai dao. ³ Tama tilama, tama teba gasa bidi me si pedalali, te Jisas wali pabo bidi sela augwaligo te bidi si gedugo suai. Te polo pedalali bidi si me bidi nogi Moses, bidi me aga nogi Elaija, te tøde polobadu mu bidai bidi si dao. Tama augwali si Jisas dali po mibo te bidi selago suali. ⁴ Tama tibaso, Pitago Jisasbolo te po wai, “Genuai Bidi, da ede bidibo te wiegi yai mu dao. Tama nage te homu eyu da, eno te osogo bidabo be sela sè yaibao, me nage bidabo be, me Moses bidabo be, me Elaija bidabo be tama sè yaibao,” Pitago te po wai. ⁵ Tama Pitago te po odubadi yaide, tama ula mu ebo pq me deligo augwali tigidali polo mesega sagasali. Te pqgo augwali mesega sagaselama, tama te pq tomodu po me weyu te po wali, “E bidi da, eno Ogwa dao, te eno aga godolo mu ebo dao, eno aga dali dwagi yai homu mu ebo dao. Agai wabo po dagego mu odiqo,” te po wai.^r ⁶ Tama Jisas wali pabo bidi sela augwaligo te po wabo odobo si, augwali wi genuai mu eyu, augwa tigi tqba basi guluyu, augwa gesabidi tqba mugulama, tama augwali wi mu yai dao. ⁷ Tama Jisas augwali paba asiyu, agai nogogo augwali diayu, augwalibolo te po wai, “Dage hodaluao. Dage wi egimio,” te po wai. ⁸ Tama augwaligo uwawaba tonono holali, te bidi si subeo. Te Jisas agaduba naga dolalubo suali.

^r 17:5 Gag 22:2; Bom 18:15; Tib 2:7; Ais 42:1; Mat 3:17; 12:18; Mak 1:11; Luk 3:22

⁹Te augwali te bulu dude bidali tagalama dulubadi, Jisasgo bomo elama, augwalibolo te po wai, “Dagego megi suali sę po te gasa bidi dabebolo wagio. Dagego te po osogo hogwa sao. Tama nosali te Godigo Bidi Mu aga isama, tama ma hodalobode, tama te sogo dagego megi suali sę po te we bidibolo wagameo,” Jisasgo te po wai.

¹⁰Tama Jisas aga wali pabo bidi dabego agabolo hanalu wali, “Tiali goli, magi baso te da Juda dabego bomo yai po page koneai bidi dabe augwaligo te polobadu e tőde bidali bidi Elaija bolo hasia asaibao po obawe?”^s

¹¹Tama agai po wei ponoyu, te po wai, “Awe, mu dao, Elaija aga ma asama, agai tigidali nai hasia dodolagasaibao. ¹²Tiali goli eno dagebolo obao, Elaija aga asali goli, tama te budi dabe augwaligo aga konebeo. Menio. Augwa digi augwaligo augwa ebo haniani dwai kolesaga wali peyu, aga dali dwai sę yai. Te tiwai kolesagago naga augwaligo te Godigo Bidi Mu dali me dwai sę eyu agabolo dene mayu yaibao,” te po wai.

¹³Jisasgo te po tiwai po obaso, tama aga wali pabo bidi dabe augwaligo koneani, agai augwalibolo te baptais mani bidi Jonde po wai, te Jon aga Elaijago sę yagasai dao.

Jisasgo dwai haubogo touai ogwa me deli usu ilali
(Mak 9:14-29; Luk 9:37-42)

¹⁴Te Jisas dali, aga wali pabo bidi me sela hodobo augwali te bulu du dulama, tama te genuai we budi hani bidalubo madi sabolali. Tama augwali teba sabalobadi, tama budi me deli Jisas pąba kidu sugunagaselama, ¹⁵tama te budi agai te po wai, “Genuai bidi, nago eno ogwade homu dene eyu tau sao. Aga te esela pelama, tama aga tigi dwai mu bidibao. Awe, hauwa sogo aga te siaba tulaluyu, tama hauwa sogo me aga te ąiba tulaluyu ebo dao. ¹⁶Tama naga wali bilibo bidi dabego te aga usu ilimainogo eno aga augwali pageba sesai dao. Tiali goli augwaligo aga geselainogo yali usu isąbaso tagalai dao,” te po wai.

¹⁷Te Jisasgo te po wei ponoyu, bomonama te po wai, “Dagego homu enaba begi pisławai we budi hani, tama dagego homu gagea pidubao. Ena dage dali nisu naga sogo me bidigowe? Nisu naga sogo eno dagego sege tologowe? Dagego te ogwa eba sesao,” wali. ¹⁸Tama te ogwa sesama, tama Jisasgo te dwai haubo noma bidibolo wado ilibo po obaso, tama agai te ogwa dali bidali tagalama pabo si da, tama megi naga tama te ogwago gasi sia sai dao.

¹⁹Te nosali te Jisas aga wali bilibo bidi dabe naga agaba aselama, te po wai, “Magi baso dago te dwai haubo sela s̄awainogo ebo te usu ebewe?” ²⁰Tama agai te po augwalibolo wai, “Dagego homu Godiba dwasianu naga begi

^s 17:10 Mal 4:5

pobaso, dagego te sę yainogo ebo te usu meni dao. Awe, eno mu po dagebolo obe dao, te dagego Godiba duga homu begi pabo kolesaga te dwasianunu, te kemeni ge tiwai usu elalubaso da, teda dagego e bulu dubolo te po weyu da, ‘Nage hodaluama tama u badu pao’ wabo si da, tama aga teba paibao. Tama dagego te tiwai bomai sę tigidali ebo te usu yaibao. ²¹ [Tiali goli dagego te gedu haluasa po wabo me, te osogo nai gisilibo sę me, te sę si isiąbaso da, teda dagego te tobage gasa dwai haubo noma bidi sela s̄awainogo ebo te usu egobeo. Menio.]” Jisasgo te po wai.

Jisasgo aga isama ma hodaloabo po ma wai

(Mak 9:30-32; Luk 9:43-45)

²² Augwali hodobo te Galili tqde deliba sisinama, tama Jisas aga wali pabo bidi dabebolo te po wai, “Augwaligo ena te Godigo Bidi Mu e tqde bidigo nogoba mawaibao. ²³ Tama augwaligo aga ela muaibao. Tama sela sogo wabode te Godigo bomogo aga ma hodolobaso, te aga ma hodalueibao,” Jisasgo te po wai. Tama aga wali pabo bidi dabe augwali homu sęgę mu te pode yai dao.

Jisasgo te Moni Lotu Be tempel beba takis mone muani po

²⁴ Te nosali te sogo augwali te Kaperneam hanuba sabolama, tama te Moni Lotu Be tempel tau sabo takis mone sabo bidi augwali te Pita pageba aselama, agabolo te po wai, “Te dagego po ola mabo bidi agai te Moni Lotu Be tempelba te takis mone mubo dawe?” te po wai. ²⁵ Tama Pitago te po wai, “Awe, magiai, te mabo dao.” Tama aga te po olama, tama aga beba palima, te be tomoba pelama, tama agai po wasiąbadi hasia bolo Jisasgo agabolo hanalu wai, “Saimon, nago magi homu ebawe? Te e tqde tuni bidi augwaligo te mone sabo haniani takis sę niwai bidide sabo dawe? Augwaligo augwa hani we bidi dali siyu, ma gasa hani we bidide sogowe?”

²⁶ Tama Pitago te po wai, “Te gasa we bidi hanide sabo dao.” Tama Jisasgo agabolo te po wai, “Awe, tama tibaso te tuni bidi aga hani bidi augwaligo te takis mone magobeo,” agai te po wai. ²⁷ Aga homu agai te takis mone masiąbaso da, te usu da, te homu eyu tama agai Pitabolo po me wai, “Tiali goli, e takis sabo bage augwaligo da si dali dwai homu idali weyu, tama nage te sigi ąjba pelama, te sugų sabo huk te ąjba sağı pao. Tama nago hasia sabo sugų, te nago selama penane pedegao, tama nago te sugų tomode te mone ge me deli sueibao. Te mone ge nago selama, augwalibolo mao, te dadi si talua sigo takis mone usu nama muaibao,” Jisasgo te po wai.

De te Godigo we bidi tonalubo madide genuai bidi dawe?

(Mak 9:33-37; Luk 9:46-48)

18 ¹ Tama te takis mabo po wali sogo aga wali pabo bidi dabe augwali Jisas pageba pelama, te po wai, “De mu te Godigo we bidi tonalubo madi genuai bidi mu dawe?”

²Tama Jisas agai te wai boq̄ me deli i olama asobo si, te wai boq̄ agai augwali tomoba sela aselama dodelali. ³Tama agai te po wai, “Eno mu po dagebolo obao, te dage e wai boq̄ tiwai pedelama hasegelesiabaso da, ta dage te Godigo we bidi tonalubo bomo tomoba munu me pogobeo. ⁴Te mena bidi aga digi te aga ebo kolesaga dabe dalí aga aiyaba elaluama aga nagamea homu eyu, e wai boq̄ tiwai gagawali da, te tiwai kolesaga ebo bidi agai te gasa Godigo tonalubo we bidi dabe augwaligo yali kolesaga aiyaba elaluuibao. ⁵Tama mena bidigo enade homu beagasu wiegi yai homu eyu, tama e tiwai wai boq̄ me tau sobaso da, teda agai te wai boq̄ naga tau siyu ebeo. Te ena agai tau siyu ebao. ⁶Tiali goli bidi mego e tiwai wai pulubago enaba homu begagaselama, te konealubo po dāu wali te aga dwai s̄e ebo tomoba kegeyu tulaluyu da, tebo bidigo dwai sege mu saibao. Tama aga te dwai s̄e idali weyu, te bidi dabe augwaligo aga magede moni sege yai masigi te bonogo kənاما, te bidi te tamu aq̄ moni ge tomoba sela sayu aga tede w̄e tuyu poma peyu elama isigi sogo da, teda te usugi dao. Te s̄e agaba pedaligi sogo da, aga te moni dene sigi menigi da.”

⁷“Magi baso meni. Te tqđe bidi dabe augwaligo te bidi meba te dwai s̄e ebo kolesaga tomoba kegelama, te bidi meba tulalubo dao. Te augwali kegali bidi dabego moni dene mu saibao. Mu dao, te tobage haniani dwai kolesaga pedaluibao. Tiali goli te dwai s̄e ebo kolesaga tomoba gasa bidi kegebo bage, augwalide hobede mu yao, augwaligo moni dene mu saibao. ⁸Me ma, te naga nogo ma sagago te nage dwai s̄e eboba kegeyu tama nage te kolesagaba tulaluainogo idali weyu, tama nago te nogo ma saḡa te togwa sayao. Tama tiyu te nago nogo me deli naga elaluyu, ma nago saḡa me te me deli naga elaluyu, tama nago te sesemane sogo bidada pabo ula sabo te usu dao. Tiali goli nago nogo si ma te nago saḡa si me elaludu da tama augwaligo dwai s̄e eyu, nage te genuai dene mu siyu bidada pabo te isisabo sia dabo madi teba peyu da, te dwai mu dao. ⁹Tama me ma, naga gedu mego nage te dwai s̄e eboba kegeyu, tama nage tulaluainogo ebaso da, teda nago te gedu guda sayao. Tama nago gedu deli naga elaluyu, te naga sesemane sogo bidada pabo ula sabo, te usu dao. Tiali goli nago gedu si elaluyu, tama augwaligo nage te dedage page sia dabo madiba sayu da, te dwai mu dao. ¹⁰Dage dua bugagia dao. Tiyu dagego te homu eyu, e dwasianu we bidi tomode me deli te olo nai tiwai da wagimio, augwalide tagala wagimio. Menio. Eno dagebolo te po obao, te Godigo bidibo madide bidibo ensel te mobo bidi dabe augwaligo sesemane sogo te eno Aya dagalude bidibo subo dao. Tama tiyu, te ensel mobo bidi dabego e tiwai dwasianu we bidi hani tonalubo dao. ¹¹[Magi baso meni. Te Godigo Bidi Mu agai te hagawai we bidi dabe augwali ma sagasu asai dao.]” Jisasgo te po wai.

Te po digi po begelama, te kibu sipsip hagawali po wai
(Luk 15:3-7)

¹² Jisasgo te po wai, “Dagego magi homu ebowe? Ma, te bidi me deligo kibu sipsip te 100 sipsip elaluai baso da, tama te sipsip me deli hagabaso

da, teda te bidigo magi yaibawe? Te agai te 99 sipsip te bulu dude nai tuyu bidibadi tagalama, tama agai te hagawali sipsip me deli gegebo sé gagalaibawe? ¹³Awe, eno mu po dagebolo obao, te agai gegali sipsip subaso da, teda agai te hagasiwani bidibo sipsip dali wiegi yai homu yai goli, agai te hagawai sipsip ma sali te sipsip delide wiegi yai homu pemene mu yaibao. ¹⁴Tama te tiwai naga duga Aya dagalude bidibo bidi agai e dwasianu wai puluba me deli hagaidali homu ebo dao,” Jisasgo te po wai.

Amago ebo dwai kolesaga dodolobo po

¹⁵“Te nago ama agai dwai kolesaga nage dali eboso da, teda nage pelama dugaduba si digi bidiyu, tama nago aga dwai sé yali kolesaga te agabolo haninama ola mao. Tama agai nago po odobaso da, teda naga ama te dwai séba kegali te nago aga ma oda sabo tiwai ebo dao, te dage si deli homu naga yaibao. ¹⁶Me ma, agai nago po wabo odobo hagela eboso da, teda nago te gasa bidi deli ma bidi si selama, tama agaba ma pao. Magi baso meni. Te Mosesgo aséani bomo yai pogo te tama po wabo da, ‘Te dwai kolesaga dodolobo po te bidi si selago odião, augwaligo “Te mu po dao” nosali omainogo te tama yao.’^t ¹⁷Tiali goli agai augwaligo po odobo me hagela eboso da, teda dagego te Godigo po odobo we bidi hanibolo te po pusao. Tama agai te Godigo po odobo we bidigo po me odisaboso da, teda dagego homugo aga te Godigo po odisabo bidi, ma te takis mone sabo sé ebo dwai bidi tiwai da homu eyu, aga sula tagalao,” Jisasgo te po wai.

¹⁸“Eno mu po dagebolo obao, dagego e tqde däq weyu habu selali nai te nai tigidali te Godigo me te aga we bidi tonalubo madide me däq weyu habu selaibao. Ma, dagego e tqde pisigma sábo nai te nai tigidali te Godigo me te aga we bidi tonalubo madide me pisigma sáwaibao. ¹⁹Tama eno po me dagebolo obao, e tqde dage tomode bidi me sigo deli homu kolesaga eyu, tama nai me deli sainogo augwali sigo gedu haluasa po obaso da, teda eno Aya dagalude bidibo bidi agai te nai te bidi sibolo mawaibao. ²⁰Awe, te bidi si ma selago eno nogide bulu me deliba sisinaboso da, teda ena augwali tomode bidaibao,” Jisasgo te po wai.

Te po digi po begelama bidi mego gasa bidigo negeli sela sásiaabo po wai

²¹Tama te sogo Pita Jisas pageba asama tama aga dali te po wai, “Genuai Bidi, nisu naga sogo ena amago dwai sé enabolo emainogo yai, tama agai enabolo dwai sé yali te sege eno nisu naga sogo sela ságowe? Ma a naga olama me badu nogo si tama sogo te sege sela sábo usu

^t 18:16 Bom 19:15

egowe?" Pitago Jisas dali te po hanalu wai. ²²Tama Jisasgo Pita dali te po wai, "Eno nagebolo te a naga me badu nogo si tama sogo te po wabeo. Menio. Eno te po obao, nago naga amago dwai sə yali te nago sesemane sogo agai te dwai səgə sela sayaو, eno te po nage dali obao. ²³Magi baso meni. Te God agai we bidi tonalubo sə e tiwai dao, te təde gavman tuni bidi me deligo aga sə tonalubo bidi dabego negeli sali nai dodolainogo yai. ²⁴Tama agai te nai negeli sali dodolobo sə ebo gagalama, tama augwaligo bidi me deli aga pageba sela asai, tama te sela asali bidigo negeli sali mone te genuai mu tama te mone nogi hauwa mu dao. ²⁵Tiali goli te bidi agai te negeli sali mone wei ponabo mone usu mu menio. Tama tibaso, te gavman tuni bidigo augwalibolo te po olama, 'Te bidi me aga we wai dabe dali tama aga doado bage dali tigidali munama, tama gasa bidigo abelama, tama te negeli sali me badu ponabo mone sao. Aga gasa bidigo masigi sasiqbo sə ebo bidi bidaibao,' te po wai. ²⁶Tama te sə tonalubo bidi aga te tuni bidigo səqə pagede təba kidu sugunama, tama te tuni bidigo homu bedegau iliyu, gonobo po weyu, te po widu geai, 'Nago ena hobede elama, ena tonaluao. Tama eno nage dali negeli sali tigidali nagebolo wei ponaibao,' wali. ²⁷Tama genuai bidigo te sə tonalubo bidi aga hobede ebaso tagalai, tama agai te olo negeli sali mone me tagalai."

²⁸"Tama te sə tonalubo bidi buluba solama, tama aga te gasa sə tonalubo bidi me deli aga abagi me suali, tama agai te bidibolo negeli polobadu mane pololai masigi nogo si elaluai. Tama agai aga abagi te bidi dogoniba kəq̄ sigi pelama, tama bomo eyu, te bidi poma peyu, tama agai agabolo te po wai, 'Nago negeli sali mone tigidali wei enabolo ponao.' ²⁹Tama aga abagi te bidi təba kidu sugunama, tama agabolo homu bedegau ilib̄ po weyu te po wai, 'Nago ena hobede elama tonaluao. Eno nago mone negeli sali wei ponaibao,' wali. ³⁰Tiali goli te bidi aga hagela yai. Tama agai aga abagi te bidi kalabusiba mugi pai, tama te bidi tede bidibadi agai negeli sali wei usu numainogo tiwaibao."

³¹"Tama te tuni bidigo sə ebo bidi meba augwaligo te kolesaga ebo sulama, tama augwali dwai homu mu yai. Tama augwali pelama, augwa genuai bidibolo te po tigidali pusigi pai. ³²Tama tibaso, te genuai bidigo te bidi i olama, tama aga dali te po wai, 'Nage dwai kolesaga ebo sə tonalubo bidi dao. Hasia nage ena dali gela obaso, tama nago te negeli sali nai tigidali eno olo mu tagalao po wai dao,' te genuai bidigo te sə bidi dali te po wai. ³³'Tama te sogo eno nage hobede yai dao. Tama magi baso nago me naga abagi te gasa sə tonalubo bidi hobede yai meniwe?' wali. ³⁴Tama genuai bidigo aga te dene maiabo bidi dabego nogode muai, te kalabuside, tama te bidi tede bidibadi agai nai negeli sali tigidali usu numainogo tiwaibao. ³⁵Te tiwai me, dagego homu mu esiayu, dagego duga ama dabego dage dali yali dwai sə sela səsiq̄wani da, teda eno Aya

dagalude bidibo bidi agai me te dagego dwai sę ebo te aga sela sęgobeo,” Jisasgo te po wai.

Jisasgo te bidigo aga sai we sela sębo kolesaga ebo po wai
(Mak 10:1-12; Luk 16:18)

19 ¹Te Jisasgo te sę tonalubo bidi dabede po digi po begelai po wali silama, tama agai te Galili tőde bidali tagalama, tama te moni pabo aji Jordan bolama, te Judia tő badu pai. ²Tama we bidi hauwa augwali aga wali asai. Tama tede agai augwaligo gasi dabe usu ma ilai.

³Tama te Farisi hani dabe meba agaba aselama, tama augwaligo agai geda mubo po wagowe te homu eyu, tama augwaligo aga usu sagasai. Augwaligo te po wai, “Nago magi homu ebewe? Ma, dago bomo yai pode te bidigo aga homu naga wali peyu, tama aga we te tigidali magi sęde sela sębo te usu egowe?” te po wai.

⁴Jisasgo po wei ponoyu, te po wai, “Te dagego polobadu te aşeani po me nedai meniwe? Agai te po wai dao, ‘Polobadu mu Godigo tigidali nai nigali sogo agai te bidi me we augwali nigliama pedelai dao.’” ⁵Tama agai te po me wai, ‘Tama tiyu, bidigo aga aya ida tagalama, tama aga we dalu mu kę̄ pelama, tama augwa si te deli tigi tiwai mu pedeliyu bidaibao,’ te po wai.” ⁶Tama tibaso, augwa si hasia tedali tedali bidali tiwai egobeo. Menio. Augwa si te dedeli tigi tiwai mu yaibao. Tama Godigo te dą̄ olama kę̄nani nai te bidigo me togolamuo,” Jisasgo te po wai.

⁷Tama te Farisi dabe augwaligo agabolo te po wai, “Tama tiyu da, te magi baso Mosesgo polobadu te bomai po mayu, te bidigo we sela sębo po te pasde aşenama te webolo menama, tama aga sela sęyao po magi baso wai dawe?”^w

⁸Te Jisasgo augwalibolo te po wai, “Dage te masigi homu tomoba sęwai elalubo bidama dobaso, tama tiyu Mosesgo suali dagego te tiwai kolesaga ebaso, agai dagego wą̄i dabebolo te we sela sębo po wai dao. Tiali goli te Godigo tigidali nai nigali sogo te tiwai kolesaga meni yai dao. ⁹Eno, eno e tiwai po dagebolo obao, te bidi megó wego te dwai penani sę me isą̄badi, tama bidigo te we aga sela sęnama gasa we sobaso da, teda te bidi aga digi te dwai penani sę ebo kolesagaba kekebo sę tiwai ebo dao,” Jisasgo te po wai.

¹⁰Tama aga wali bilibo bidi dabego agabolo te po wai, “Te bidi aga we dalu bidibo kolesaga te tiwai ebaso da, teda te bidigo we sabo sę te tagalabo digi dao, aga olo bidao,” te po wai.

¹¹Tiali goli agai augwalibolo te po wai, “Te bidi tigidaligo te we sisębo po me sabo usu egobeo. Menio. Godigo te bidi mebabolo naga te po mabo

^u 19:4 Gag 1:27; 5:2 ^v 19:5 Gag 2:24 ^w 19:7 Bom 24:1-4; Mat 5:31

dao. ¹² Magi baso meni. Te haniani bidi augwali te we me sogobeo, te usu egobeo. Augwali meba bidi te augwa idago ame nani sogo te augwali tama tiwai naga ame nai, aga tigi dwali. Tama meba ma te gasa bidi dabego augwaligo domo ge dinama, tama augwaligo we me sogobeo. Tama mebago te Godigo we bidi tonalubo sə asomainogo tiyu, te we sabo sə habu selebo dao. Bidigo te po agai sainogo usu ebo bidi da, teda agai te po somainao,” Jisasgo te po wai.

Jisasgo te wai puluba bugagia bidabo po mobo mani po

(Mak 10:13-16; Luk 18:15-17)

¹³ Te sogo te we bidi augwaligo te dwasianu wai puluba meba te Jisas agaba odasa asai. Augwaligo agabolo te po wainogo te nago nogo te e wai puluba tobolude munama, bugagia bidimainogo gedu haluasa po wao. Tiali goli te Jisas wali pabo bagego te bidi dabego te po wainogo asobo sulama, tama te we bidibolo wado po weyu, te sə ebo tagalao te po wai. ¹⁴ Tiali goli Jisasgo te po wai, “Dagego te wai puluba augwali ena pageba asomainao,” po wali. “Dagego augwali dąq me wagimio. Menio. Te e wai pulubago ebo homu kolesaga tiwai ebo we bidi te augwali Godigo we bidi tonalubo madigi tomoba asagameo,” wali.

¹⁵ Tama agai nogo augwali tobolude munama, bugagia bidabo mobo mabo po wai. Tama nosali aga te bulude bidali tagalama, gasaba pai.

Gesi bidigo doado bage hauwa elalubo po

(Mak 10:17-31; Luk 18:18-30)

¹⁶ Te me sogo bidi me deli Jisas pageba sabolama, te po wai, “Po ola mabo bidi, eno mena tiwai wiegi yai kolesaga elama, tama ena te bugagia sesemane sogo bidada peyu, bidada pabo ula sogowe?” Te bidigo te po wai.

¹⁷ Tama Jisasgo agabolo te po wai, “Te enabolo magi baso nago te wiegi yai səde hanalu obawe? Te me deli digi naga te aga wiegi yai dao, te God dao. Tama nage te wiegi yai bidabo ula sabo homu ebo wida, teda nago te Godigo bomo yai po wali pao.”

¹⁸ Tama te bidigo agabolo te po wai, “Mena bomai po dabewe?” Tama Jisasgo te po wai, “Te e po dabe dao: ‘Nago bidi ela mugio. Nago te penani sə egio. Nago nai wi sigio. Nago gasa bidide tibo po ola magio.’^x ¹⁹ Nago naga aya idago po wali pao. Tama nago gasa bidi dabe dali dwagi yai homu eyu godolo yao, te nago naga digi naga dwagi yai homu eyu godolo ebo tiwai kolesaga te gasa bidi dabe dali me tama naga tiao,” wali.^y

²⁰ Te gesi bidigo agabolo te po wai, “Te tigidali bomai po eno wali pela silai dao. Eno magi sə me deli yabo te habuge elalubowe?”

^x 19:18 Sai 20:13-16; Bom 5:17-20 ^y 19:19 Sai 20:12; Prs 19:18; Bom 5:16

²¹ Tama Jisasgo agabolo te po wali, “Te nage doloba pai mu pedalabo homu ebaso da, teda nage pelama, nago doado bage tigidali te bidi dabego abelemainogo munama, tama nago te sali mone te magi nai meni yai we bidi augwalibolo te mone mao. Teda nago nosali sabo wiegi yai nai hauwa mu te Godigo bidibo madide sisi ilai elaluabao. Tama tilama, nage ena wali asao,” Jisasgo te po wai. ²² Te gesi bidigo te po wali odolama, tama aga homu sęgę mu yali, tama aga beba ma pai. Magi basowe, te agai doado bage hauwa mu elaluai.

²³ Tama Jisasgo aga wali pabo bidi dabebole te po wai, “Eno mu po dagebolo obe dao, te mone hauwa munalubo bidi aga te Godigo we bidi tonalubo kolesaga te tomoba painogo te sinabo sę mu yaibao. ²⁴ Eno dagebolo te po ma obe dao, te moni kibu kamel te ugwa hobolo medabu dedage tomoba painogo te sinabo sę yaibawe? Awe, tiali goli te mone hauwa elalubo bidi te Godigo we bidi tonalubo kolesaga tomoba painogo sinabo sę genuai mu yaibao,” te po wai.

²⁵ Te aga wali bilibo bidi dabe augwaligo te po wabo odama, augwali te pode noma mu sali. Tama augwaligo te po wai, “Tama te tiwai ebaso da, teda de Godigo aga ma selama, tama aga te bugagia sesemane sogo bidada pogowe?”

²⁶ Tama Jisasgo augwali dolo mu ponama tonalu, tama te po augwalibolo wali, “Te e tqde bidi dabe augwaligo te sę ebo te usu me egobeo. Tiali goli God da, te tigidali sę ebo usu yaibao,” wali.

²⁷ Jisas agai te po olama, tama Pitago agabolo po wei ponoyu, te po wai, “Da suao, te dago tigidali nai dabe tagalama, nage wali asobao. Te dago magi nai saibawe?”

²⁸ Tama Jisasgo augwali dali te po wali, “Eno mu po dagebolo obao, te tigidali nai gesi noma ma pedalobo sogo, te Godigo Bidi Mu aga genuai nogi me bomo dali te sogo te tuni bidi duabo sia saide dulaluyu, te sogo te dage, dage ena wali asali bidi dabe me, dage tuni bidi dabe bidiyu, tama te 12 wali te duabo sia saide dualama, tama te 12 te Israel hani augwali tonalubo sę yagameo. ²⁹ Tama tigidali we bidigo eno nogiba homu tia sagaselama, tama augwaligo augwa be dabe me, augwa ama dede me, abe dede me, te augwa ida aya me, augwa wai puluba me, gi dabe me tagalama, tama ena wali asali we bidi da, te augwaligo te tagalali nai wei genuai mu ma saibao. Augwaligo nosali sabo naigo te polobadu tagalali nai edelaibao. Tama te sesemane sogo bugagia bidada pabo wiegi yai ula me saibao.

³⁰ Tiali goli, te megi polasa pali bidi dabe hauwa augwali nosali badu ma igisulama, te nosali badu asali we bidi dabe hauwa te pologi soaibao,” Jisasgo te po wai.

20 ¹“Magi baso menio. Te Godigo we bidi tonalubo kolesaga te bidi me deligo tq hauwa elalubo bidigo yali kolesaga tiwai dao.

Te kigamu digi mu te bidigo aga du walobo bono gide sę yabo bidi sesa biligi pai. ² Te augwaligo te mone ge nogo si sabo usu da olama, te mone ge nogo si te sogode saiba po usu da obaso, tama agai wain bono du giba sę egi pomainogo augwali tagala palai. ³ Tama te giliga nanobode aga asiyu suali, te bidi meba olo te bidi sisinama bidibo digi dodolalubo suai. ⁴ Agai augwalibolo te po wai, ‘Dage me pelama, te wain giba sę egi piąo, tama te sę ebogo sabo mone tiwai usu nama, te eno dagebolo mawaibao,’ wali. ⁵ Tama po obaso, augwali pai. Tama te giliga tomode me te be pio ebode me aga ma peyu, tama naga tiwai. ⁶ Tama be pio giliga dega sabode aga ma pelama suali, te bidi dabe meba olo dodolalubo suai. Tama agai augwalibolo te po wai, ‘Magi baso dage moni e giligade olo mu dolaludubadi geaniwe?’ te po wai. ⁷ Tama augwaligo po wei ponoyu, te po wai, ‘Te dabolo sę maiabo bidi me menio.’ Tama agai augwalibolo te po wai, ‘Dage me te wain giba pelama, sę egi piąo.’ ⁸ Tama te be pio yai digi, tama te wain bono du gi page bidigo te aga sę ebo bidi dabe tonalubo bidibolo te tiwai po wai, ‘Nago te sę egi pali bidi dabe augwali i olama, mone mao. Nago te nosali badu mu sę yagasali bidi dabe gagalasa, tama nago augwali mone mena mena pelama usu nigibu, tama te polasa kigamu sę egi pali bidi dabe mone simaniyu augwali mone nosali mao,’ te po wai. ⁹ Tama i olama, tama te giliga dega sigi pabode sę gagalama yali bidi dabe, augwali pedalama, tama augwali deli deligo te mone ge nogo si, nogo si mone ge sai. ¹⁰ Tama te sę kigamu digi polasa pelama sę gagaligi pali bidi dabe, te augwali aselama, te augwaligo homugo te augwali mone hauwa saibao homu yai. Tiali goli menio. Augwaligo me te mone ge nogo si, nogo si, mone ge naga sesa palio. ¹¹ Augwaligo te mone selama, tama augwaligo te gi page bidi dali dwai homu eyu, po wabo gagalali. ¹² Augwaligo dwai homu eyu, te po wai, ‘Te nosali mu aselama sę yagasali bidi dabe, augwaligo sę te hauwa sogo ebeo. Tiali goli dago kigamu mu sę egi pali te megi e sogoba usu nagasobao, tama giligago da tigide ulali dene yalio. Tama tiali digi nago augwalibolo mani mone te dabolo megi e mani mone tiwai si manio,’ wali. ¹³ Te gi page bidigo augwali tomode bidi me delibolo po wei ponai. Agai te po wai, ‘Abagio, eno nage dali dwai sę ilibeo. Te dadi sigo te mone ge nogo si sabo po dodolama, usu da po wai meniwe? ¹⁴ Nago naga mone selama, tama nage pao. Eno homugo te eno nagebolo mani mone, tiwai naga eno te nosali sę yagasali bidi agabolo mawainogo ebao. ¹⁵ Te mone te eno sę ebo nai dao. Ma, eno te ena monede digi te tiwai homu egobewe? Eno wiegi yai kolesaga aga dali ebaso, nago homu dwai ebawé?’ gi page bidigo te po wali,’ Jisasgo te po wai.

¹⁶ Te Jisasgo te po silagasu wabo po weyu, te po wai, “Awe, tama tiwai te nosali mu yali bidi dabe augwali te pologi soaibao. Tama te polali bidi dabe augwali nosali badu ilaibao,” te po wai.

Jisasgo aga isabo sogode sela sogo po wali
(Mak 10:32-34; Luk 18:31-33)

17 Te Jisas te moni hanu Jerusalemba pobadi, te aga wali pabo bidi dabe nogo si olama sagago si bidi dabe augwali naga agai selama, tama olo we bidi tagalama tedali pai. Te tüdu pelayu, Jisasgo augwali dali po weyu, te po wai, 18 “Odião, te megí da te moni hanu Jerusalemba holobao. Tama tede augwaligo te Godigo Bidi Mu te pris toboli bidi dabebolo badi, te bomo yai po page koneai bidi dabe dali, augwaligo bomoba aga mawaibao. Tama augwaligo aga po tü ilama, tama aga ela muabo po mia saibao. 19 Tama augwaligo aga te Juda hani isawai bidi dabe augwaliba mawaibao, te bagego agabolo te dwai usubo se eyu, te posobo po weyu, tama aga bigo eliyu elama, tama aga ni pedaiba daganama, te neligo enama isaibao. Tama bidama, te sela wali sogode te aga ma hodaluiba.” Jisasgo te po agade tiaibao olama te po wai.

Jems de Jon dali si genuai bidi bidaiba wali po
(Mak 10:35-45)

20 Tama te sogo te bidi Sebedi aga ogwa sigo ida, te we aga ogwa si dali te Jisas pageba asai. Tama te we aga te töba kidu sugunama, tama agabolo te nai me deli sainu te po agabolo te po hanalu wagasai. 21 Tama Jisasgo agabolo te po wai, “Nago magi nai godolo ebewe?” wali. Tama agai Jisasbolo te po wai, “Nago po obaso da, teda eno e ogwa si te nago we bidi tonalubo madigi nage päde dulalumainogo, te me nago dolo nogo badu bidiyu, te me nago pobase nogo badu bidiyu emainao.” Te bidi sigo idago te po wai.

22 Agai te tiwai po obaso, tama Jisasgo te po wei ponoyu, te po wai, “Dage sigo te nai po page bugagia konesiama dagego te hanalu obao. Dage sigo eno te aq tuainogo ebo kapde te aq dage sigo me tubo usubo gilama, te eno sabo dene tiwai gilama te dage sigo sabo usu egowe?” Tama augwali sigo agabolo te po wali, “Te da sigo tubo usu yaibao.”

23 Tama Jisasgo augwali sibolo te po wai, “Mu dao, te dage si eno kapde aq tueibao. Tiali goli de mu te eno dolo nogode me pobase nogode me dua yabo, te se eno egobeo. Menio. Te tobage bidi dabe bidabo bulu dabe te eno Ayago naga augwali dua yabo digi sisi yai elalubao,” Jisasgo te po wai.

24 Tama te nogo si bage augwaligo te po wabo odolama, tama augwaligo te ama name si dali dwai homu eyu, wado po weyu yai.

25 Tiali goli Jisasgo augwali i olama, tama aga pageba asobo si, tama agai te po wai, “Dagego koneani, te Israel hani isawai bagego tuni bidi dabe augwaligo bomonama augwa hani we bidi dabeba sege muyu, tama naga tiyu augwali tonalubo dao. Tama me te genuai bidi dabe augwaligo bomo

mu elama, te we bidigo augwaligo po wali pomainogo ebo dao. ²⁶Tiali goli te tobage s̄e ebo kolesaga dage tomode me elalugobeo. Menio. Te bidi megó aga te genuai bidi te dage tomode bidainogo da, aga te dagego s̄e ebo bidi bidao. ²⁷Tama bidi me aga te dagego genuai polalubo bidi bidainogo da, aga te dagego masigi sisabo s̄e ebo bidi tiwai bidao. ²⁸Te tiwai naga gilama te Godigo Bidi Mu aga te bidi megó tau somainogo me asobeo. Menio. Aga asali te augwali digi tau somainogo asali, tama agai bidibó ulago te we bidi hauwa mu ma abelemainogo asai dao,” Jisasgo te po wai.

Jisasgo te gedu widai bidi si geselai
(Mak 10:46-52; Luk 18:35-43)

²⁹Te augwaligo te Jeriko hanu tagalama, te Jerusalem hanuba pabo ma gagalali. Tama we bidi hani genuai mu augwaligo Jisas wali aselawai. ³⁰Tama gedu widai bidi si te t̄u pâde dulalulai. Tama te bidi sigo Jisas asobo po odama, tama te bidi sigo bomonama i weyu te po wai, “Genuai bidi, nage te polobadu bidali bidi Devitgo hani bidi dao, nago dadi si dali homu dene eyu, da tau siyu yao,” wali. ³¹Tama te we bidi augwaligo te bidi si hagea siyu, po bomonama penane pania sao po wai. Tiali goli te bidi sigo po daḡ geninama mu weyu, bomonama te po wai, “Genuai bidio, nage te polobadu bidali bidi Devitgo hani bidi, nago dadi si homu dene elama tau sao.” ³²Tama Jisas pelama, sagia sigi pelama dolaluali, te bidi si i weyu te po wai, “Dage sigo homugo eno magi s̄e dage sibolo emainogowe?” ³³Tama te gedu widai bidi sigo agabolo te po wai, “Genuai bidio, da sigo homugo nago da si gedu ma pedalao,” wali. ³⁴Tama Jisasgo augwali si homu dene yali, tama agai nogo te bidi si geduba muani, tama megi naga tama te bidi sigo gedu pedama wiegi yai ma yai. Tama augwali sigo Jisas aga wali pai.

Jisas te Jerusalem hanu tomoba tuni bidi tiwai pai
(Mak 11:1-11; Luk 19:28-40; Jon 12:12-19)

21 ¹Te augwali Jerusalem pâba sabolama, te dwasianu hanu nogi Betfage teba sabolali, te Oliv bulu du pâde elaluai. Tama Jisas aga wali pabo bidi si tagala paliyu, tama augwali sibolo te po wai, ²“Dage sigo te pâde elalubo dwasianu bulu tomoba pelama, suo. Tama polo dage sigo te kibu donki me deli augwaligo te bonogo gebelai dolalubo sueibao, tama te donki aga wai dali dao. Tama dage sigo te gebelali bono pisiginama, te kibu donki si ena pageba selasa asao. ³Tama dage sigo te donki si sela sobadi, bidi me deligo dage si dali po me obaso da, te bidi dali dage sigo te po wao, ‘Woo, Genuai Bidigo s̄e e donki side elalubo’ po wao. Tama te po olama, tama polo agai te kibu donki si dage sigo sela pião te po waibao,” Jisasgo te po wai. ⁴⁻⁵Te s̄e pedalobo

si te Godigo sé nosali pedalabo po pusali bidigo polobadu wali po usu numainogo yai. Agai te po wali,

“Te Saion bulu we bidi dali te po wao, ‘Suao, dagego tuni bidi duga pageba asobao. Agai nagame yai kolesaga dali, te aga kibu donki daide naga dualasa asobao. Tama aga te walu sabilibo donkigo wai tede dualasa asobao,’ te po wao,”^z

profet bidi me deligo te po polobadu wai.

⁶Tama aga te wali pabo bidi sigo te Jisasgo augwali si dali wali po wali pelama tama tiwai. ⁷Tama tega sigo te donki aga ida dali te wai dali me sela asai, tama augwa si gudubo ugwa te donki si tudiba muai. Tama Jisas aga te donki wai tudide dualasa pabo gagalai. ⁸Tama aga pobadi we bidi hauwa augwaligo augwa gudubo bobobage ugwa dabe te tude wawa sili pelama, muna muna pai. Tama bidi meba augwaligo yabe elalubo ni nologo togolama, tude muna muna pai. Genuai bidi asobao homu eyu tama tiwai. ⁹Tama te bidi Jisas tomoba ilama peyu, tama we bidi meba augwali polasa pabo bage dali, nosali asobo we bidi dali augwaligo bomo elama i weyu, te Jisasgo nogi ugwaba siyu, te po wai,

“Dago nage dali dwagi yai homu pemene ebao, te nage Devitgo hani bidi dao. Godigo nage dali dwagi yai sé yao, te nage te Genuai Bidigo nogide asali bidi dao. Dagalude bidibo bage me augwaligo aga nogi ugwaba sao.”^a

¹⁰Te aga te Jerusalem hanu tomoba pali, tama te hanu tomode bidali we bidi augwali noma mu selama, tama te po wai, “Te bidi aga te de dawe?” te po wai. ¹¹Tama aga dali asali we bidi augwaligo te po wai, “Aga te Jisas dao, te Godigo po pusubo profet bidi, te Nasaret hanudu te Galili tqdu asai dao,” augwaligo te po wai.

Jisasgo te Moni Lotu Be tempelde bisnis sé yali bidi dabe sela sawani (Mak 11:15-19; Luk 19:45-48; Jon 2:13-22)

¹²Te Jisas aga te Jerusalem hanu tomoba pelama, tama aga te Moni Lotu Be tempel tomoba peyu suali, te nai muani bage dali me, te nai abelebo bage dali me sulama, tama agai augwali tigidali buluba sela sawai. Tama agai te Godibolo ofa mabo gasagi yai masigi ge dobu si ebo bagego tebol sai dali mone ge dali gelali. Bidi meba augwaligo ba hi dabe te be tomode muagasaki, te olo we bidi augwaligo te ba hi abelama, te Godibolo ofa olo mawainogo te ba dabe muani. Tama agai te bagego duabo sai dabe gea palali. ¹³Tama tilama, agai te po augwalibolo wai, “Bukude Godigo e po asęai dao, ‘Eno be da, te we bidigo gedu haluasa po

^z 21:4-5 Sek 9:9 ^a 21:9 Tib 118:25, 26

wabo be dao,’ te po elalubao. Tiali goli dagego te be te nai wi sabo bidigo be tiwai te ilibao,” Jisasgo te po wai.^b

¹⁴Tama aga te Moni Lotu Be tempel tomode bidibadi, tama te gedu widai we bidi dabe me, te saq̄a dwai bidi dabe me augwali aga bidibo p̄aba asali, tama agai augwali wiegi yai ma ilali. ¹⁵Tiali goli te genuai pris bidi dabe me, te bomo yai po page koneai bidi dabe me augwaligo agai te bomai s̄e ebo sulama, tama odali te wai puluba augwaligo te Moni Lotu Be tempel be tomode bomonama i weyu te po wai, “Te Devitgo hani bidi dali wiegi yai homu pemene yao,” te wai puluba augwaligo te po wai. ¹⁶Tama tibaso, te genuai bage augwaligo homu dwai eyu, agabolo te po wai, “Te nago augwaligo te wabo po nago odaliwe?” Tama Jisasgo augwalibolo te po wai, “Ao, eno odalio. Tiali goli dagego te bidi me deligo te Godide polobadu asçani po me deli nedebewe? Te po e dao, ‘Nago te gilama, tama te dwasianu wai puluba augwaligo nago nogi ugwaba sabo wiegi yai po wai dao.’ Dagego te po nedebewe?”

¹⁷Tama agai augwali tagalama, tama aga te moni hanu buluba pelama, tama te dwasianu hanu Betani te badu hulide bidigi pai.

Jisasgo pode te ni kaya sasia pai
(Mak 11:12-14, 20-24)

¹⁸Te sogo kigamu digi mu aga te moni hanu tomoba ma pobadi tama aga nasi yai. ¹⁹Tama aga pelama, te tū sesegede elaluali ni kaya sulama, tama te ni p̄aba pali, aga du sela tuainogo yai. Tiali goli tede nai me deli walai elalubo subeo. Menio. Yabe naga elaluai. Tama agai te ni kayabolo te tiwai po wali, “Nago nai ma walogobeo. Mu menio.” Tama polo mu te ni kaya aga sasia pai dao.

²⁰Te aga wali pabo bidi dabe augwaligo te s̄e ebo sulama, tama augwali noma mu sai. Augwaligo te po wai, “Magi baso e ni kaya te polo sasia paliwei?” ²¹Tama Jisasgo po wei ponoyu, augwalibolo te po wai, “Eno mu po dagebolo obao, dagego te Godide konealubo po mu dāq̄ olama, tama dagego homu si me isābaso da, teda dagego eno e ni kayade yali tiwai s̄e dagego me ebo te usu yaibao. Tama dagego te s̄e naga egobeo. Menio. Te dagego e elalubo bulu dubolo te po weyu, ‘Nage hodaluama, nage te tamu ąjba samonao’ po obaso da, teda agai te tiwai yaibao. ²²Tama dagego konealubo po dāq̄ olama gedu haluasa po weyu da, teda te nai dagego sainogo gedu haluasa po wabo, te nai dagego saibao,” Jisasgo te po wai dao.

Augwaligo Jisasbolo hanalu wali dego te s̄e aga nogoba mani po wai
(Mak 11:27-33; Luk 20:1-8)

²³Te Jisas te Juda dabego Moni Lotu Be tempel tomoba pelama, te wiegi yai po te we bidibolo ola maduai. Tama te genuai pris bidi dabe

^b 21:13 Ais 56:7; Jer 7:11

dali, te Juda bagego tobolu bidi dabe augwali dali agaba aselama, tama te po wai, “Nago magi bomo elaluyu, nago naga ebo sę ebawe? Tama dego te bomo nagebolo mayu te sę yao weyu yaliwe?”²⁴ Tama Jisasgo po wei ponoyu, augwalibolo te po wai, “Eno me eno magi nai po me deli naga dagebolo hanalu waibao. Tama dagego eno po wei ponebaso da, teda eno me eno dagebolo te eno magi bomo elaluyu, eno e sę ebo te po dagebolo waibao.”²⁵ Tama agai te po wali, “Te Jongo we bidi baptais mani sę te menade pedalaliwe? Te Godigo te sę agabolo maniwe, ma bidi dabego mani sę nagawe?” wali.

Augwaligo te po wabo odolama, tama augwa digi augwa hasi po miyu te po wai, “Ma, dago e tobage po wabo si, ‘Te Godigo te sę agabolo mani’ po obaso da, teda agai dabolo e tiwai tobage po waibao, ‘Teda magi baso agai wali poba dagego duga homu muyu dą̄ wabewe?’ Te po da dali waibao.²⁶ Tama te po obaso, dago te po waibao, ‘Bidi dabego naga te sę Jonbolo mani’ obaso da, teda da te e bidalubo we bidi wi yaibao. Magi baso meni, tigidali bage augwaligo te Jon aga te Godigo po pusali bidi profet da te homu naga ebo dao,” te po wai.²⁷ Tama tibaso, augwaligo te po wei ponoyu, Jisasbolo te po wai, “Dago konebeo.” Tama Jisasgo augwalibolo te po wai, “Eno me eno dagebolo te eno magi bomo elaluyu, eno e sę ebo po te dagebolo me wagobeo,” Jisasgo te po te Juda bage genuai bidi dabe dali wai dao.

Bidi deligo ogwa side po digi po begelama wai

²⁸ “Tiali ma, dagego magi homu ebowe? Bidi deligo ogwa si bidai. Aga te me ogwa pageba pelama, agabolo te po wai, ‘Ogwao, te megi e sogode nage pelama, te wain bono du giba sę egi pao,’ te po wai.²⁹ Tama aga ogwago te po wai, ‘Ena hagela palio.’ Tiali goli nosali aga homu ma hasegelama, tama aga te sę egi pai.³⁰ Tama te bidi aga gasa ogwa pageba pelama, te wali po tiwai naga agabolo wai. Tama agai te po wai, ‘Awe, aya.’ Tiali digi aga pabeo.³¹ Tama tilama, te ogwa sigo te mena ogwago mu te aga ayago homu kolesaga wali paliwe?” Jisasgo te po hanalu wai. Tama augwaligo te po wai, “Te aga hasia ogwago agai po wali pali.” Tama Jisasgo te Juda bage genuai bidi dabebolo te po wai, “Eno mu po dagebolo obe dao, te takis mone sabo dwai bidi dabe augwali badi, te penani yali we dabe dali, augwaligo ge neyu homu ma hasegelama, tama augwali dage aiyaba elaluama tama polasa te Godigo we bidi tonalubo kolesaga tomoba peyu, tama dage nosaliba ilalio.³² Magi baso meni, Jon dageba pedalama, tama agai te doloba pai kolesaga ebo te po dagebolo ola mani, tama dagego aga wali poba homu dą̄ wabeo. Tiali goli te takis mone sabo dwai bidi dabe badi, te penani yali we dabe augwaligo homu te poba dą̄ wai. Tama te tama tebo dagego suali goli dagego ge neyu, homu hasegelama, agai wali poba homu dą̄ wabo kolesaga munu me ebeo,” Jisasgo te po augwali dali wai.

**Te po digi po begelama te dwai bidi dabego te wain bono du gi
tonaluali wali**
(Mak 12:1-12; Luk 20:9-19)

³³“Dagego te gasa po digi po begelama wali po me odao. Bidi me deligo genuai to elalubo bidigo agai te bono du wain gi bulama, tama obo bagulali. Tama te gi tomode agai te wain bono du agayabo te tank nai nigelili, tama te gi tonalubo bidigo bobobage be me me deli s̄e yani. Tama agai te gi te s̄e yabo bidi meba augwaligo nogoba muani, te augwaligo te gi tonalubo s̄e eyu, te gi nai meba naga somainogo yai. Tama te gi page bidi aga digibulu bulu me deli teba pai. ³⁴Nosali, te wain bono wai sisinabo sogo bodolu p̄aba yagasali, tama agai te s̄e bidi dabe augwali tagala palama, augwali te wain bono giba pelama, te gi page bidigo nai sigi pomainogo yai. ³⁵Tama te gide s̄e yali bidi dabego te tagala palali s̄e bidi dabe selama, tama augwaligo me deli ela tagaliyu, tama gasa s̄e bidi me te mu ela muani, tama gasa s̄e bidi mebolo te masigigo naga elainu te masigi sayani. ³⁶Tama te gi page bidigo te s̄e bidi meba ma tagala palali. Agai s̄e bidi hauwanu gana tagala palali, te polobadu yali tiwai ebeo. Tama te gide s̄e ebo bidi dabego te hasia yali kolesaga tiwai naga augwali dali yai. ³⁷Tama nosali agai aga ogwa mu te augwalibolo tagala palai. Ayago e tiwai po wai, ‘Te augwaligo eno ogwago po mu odaibao,’ te homu yai. ³⁸Tiali goli te gide s̄e ebo bidi dabe augwaligo te ogwa asobo sulama, tama augwa hasi po miyu te po wai, ‘Te aga aya isibo si, e bidigo te aga ayago nai tigidali saibao. Asao, te dago aga ela muiqo, tama dago agai sabo gi saibao,’ te gide s̄e ebo bidi dabe augwaligo te po wai. ³⁹Tama augwaligo aga selama, tama aga augwaligo te gidu te buluba ma sela sayani, tama augwaligo aga ela muai dao. ⁴⁰Tama tibaso, nosali te wain bono du gi page bidi asiyu, tama mena tiwai kolesaga te gide s̄e yali bidi dabe augwali dali egowe? Dagego magi homu ebawe?” Jisasgo te po wai.

⁴¹Te augwaligo agabolo te po wai, “Teda augwali te dwai s̄e yali bidi dabe bidibaso, agai augwali dwagila mu dolaibao. Tama agai te wain gi gasa hanigo te gi s̄e tonalumai hagede mawaibao, tama te gide nai sabo sogo augwaligo aya agabolo nai mawaibao,” augwaligo te po wai.

⁴²Te Jisasgo augwalibolo te po wali, “Te bukude polobadu aşeani te po te dagego nedebewe? E tiwai dao,

‘Te masigi be s̄e yabo masigi me deli te s̄e bidi
dabego sela sayani masigi, megi da polalubo masigi
pedalamu, te be d̄aq walali elalubao. Genuai Bidigo
agai te tiwai s̄e elama pedalali, tama dago suali te
wiegi yai mu dao.’^c

^c 21:42 Tib 118:22-23

⁴³Tama tibaso eno e po dagebolo obao, te Godigo we bidi tonalubo sę dagede elaluali dagalama, tama te Godigo we bidi tonalubo sęde doloba pai kolesaga ebo we bidi augwaliba eno te nai mawaibao. ⁴⁴[Tama bidi te masigi daiba ugwidu tulalubo bidi da, teda te bidi aga te dwasianu dwasianunu mu pebeda paibao. Ma, te masigi te bidi deli daiba ugwidu tulalu baso da, teda agai aga mu dolama, tama pobele bage naga tiwai pedalaibao.]

⁴⁵Te genuai pris bidi dabe badi, te Farisi dabe dali, augwaligo Jisasgo te po digi po begelama wabo po odama, tama augwaligo koneani, agai te po augwalide wai. ⁴⁶Tama augwaligo aga dąu wabo tų kegali, tiali goli augwali te we bidi augwalide wi yali. Te we bidi augwaligo homugo Jisas aga te Godigo po pusubo bidi dao te homu yalio.

We sabode genuai nai da tubo pode po digi po begelama wai
(Luk 14:15-24)

22 ¹Te Jisasgo po digi po begelama augwalibolo te po ma weyu te po wai, ²“Te Godigo we bidi tonalubo kolesaga te tuni bidi me deligo yali kolesaga tiwai dao. Te aga ogwa we sainogo ebaso, tama tuni bidigo te genuai nai da sisi elama muai dao. ³E me te tiwai yainogo tama hasia bolo agai te bidi meba te we sabode nai tuagasaninogo i wai. Tama te nai tubo sogode te aga sę ebo bidi dabe tagala palama, te nai tuagasiyu asomainogo i wagi pali. Tiali goli augwali asobo hagela elama me asobeo. ⁴Tama agai gasa sę ebo bidi meba ma tagala paliyu, augwalibolo te po wai, ‘Dage eno te asomainu i wali bidi dabe augwali bidiboba pao, tama dagego augwalibolo e tiwai po wao, “Odiqo, te we sabo bidide eno te nai sisi yai elalubao. Te omai bulmakau dabe badi, te eno wiegi yai nisai bulmakau wai dabe me, dago elalio. Tama tigidali nai sisi yai elalubao. Dage te we sabode da tubo naiba asiaqo,” te po wao,’ te tuni bidigo te po wai. ⁵Te sę ebo bidi dabego te po augwalibolo wagi pai, tiali goli augwaligo te po odobo hagela yali, tama augwali gasaba tedela pai. Me deli te aga giba pali, tama me te aga mone sabo sę egi pali. ⁶Te bidi dabe mebago te tuni bidigo tagala palali sę bidi pageabi elama, dene menama elama, tama augwali ela muai dao. ⁷Tama te tuni bidi sębę elama, tama aga te enesigi bidi me te ami bidi dabe tagala palama, augwali pelama, te sę ebo bidi dabe elali bidi dabe augwali tigidali mu ela siligi pai. Tama be me bulu dabe tigidali sia tulama ula silai. ⁸Tama te tuni bidigo aga sę bidi dabe augwalibolo te po wai, ‘Te we sabode tuabo nai sisi yai elalubadi, tiali goli eno te i wali bidi dabe, augwali te asobo usu menio, te dwai bage dao. ⁹Tama tibaso, dage te tigidali tų tunu magi siba pao, tama dagego te suali we bidi dabe tigidali, dagego augwali i olama, te we sabo sogode te nai megi tuagasaq, te po wao.’ ¹⁰Agai tama tiwai po wai, tama te sę bidi dabe augwali te tigidali tų tunu magiba

tedela pelama, tama te suali we bidi dabe tigidali augwali sisinao, te dwai bidi dabe me te wiegi yai bidi dabe augwali dali sisinagasaki. Tama augwali te we sabo madi aselama, mu pagana sagasaki.”

¹¹ “Te we bidi augwali duada pai digi, tama te tuni bidigo augwali suainogo te be tomoba pai. Tama agai suali, bidi me deli te we sabo digi asainogo wiegi yai ugwa gudama asisawai suali. ¹² Tama te tuni bidigo agabolo te po wali, ‘Abagio, magi ilama nago e we sabo sogode asainu nago ugwa wiegi yai gudama eba asai meniwe?’ Tiali goli agai sagia sai, po me wabeo. ¹³ Tama te tuni bidigo aga se ebo bidi dabe augwalibolo te po wai, ‘Dagego aga nogo sagu dunama, te bedu buluba sanama, tama te be hulia side digibulu bidimainao. Te be hulia side aga dwai gela weyu, tama aga kele ma halua tumainu yaibao,’ te tuni bidigo te po wali,” Jisasgo te po wai.

¹⁴ “Awe, te tama tiwai Godigo te we bidi hauwa i wabo dao, tiali goli agai bidi deli deli naga sa munama, tama aga te we bidi tonalubo kolesaga tomoba asomainogo tebo dao,” Jisasgo te po wai.

Augwaligo Jisasbolo te Sisarbolo takis mabo kolesaga po hanalu wai (Mak 12:13-17; Luk 20:20-26)

¹⁵ Te Farisi hani dabe augwali Jisas taga pelama, po migi peyu te po wai, “Dago magi ilama te aga wabo pode aga daq omaintogo eyu aga usu sogowe?” te po miani. ¹⁶ Tama augwaligo ugwa wali pabo bidi dabe augwali dali, te genuai gavman bidi Herotgo bidi dabe me tagala palama, tama augwaligo Jisas pageba pedalama, te po wai, “Po ola mabo bidi, dago koneani, nage te doloba pai bidi mu dao. Tama nago mu pode naga te we bidi augwalibolo te Godigo te yao wali wiegi yai kolesaga po ola mabo dao. Bidi me deli aga genuai nogi elaluyu da, te nage aga wi menio, nago deli po tiwai naga te tigidali bidibolo wabo dao. ¹⁷ Tama tibaso, nago po dabolo wao. Nago magi homu ebawé? Dago te Rom gavman tuni bidi Sisar agabolo takis mone mobaso da, teda tama tiyu dago te Mosesgo mani bomo yai po dago bolaibawé, ma meniwe?” augwaligo te po Jisasbolo hanalu wai.

¹⁸ Tialima, Jisasgo augwaligo dwai tibo homu ebo konea pelama, tama agai te po wai, “Dage tibo po wabo bidi dabe dao, magi baso dagego ena daq omaintogo eyu usu sobawé? ¹⁹ Dagego te takis Sisarbolo mabo mone ge me deli enabolo waselao.” Tama augwaligo mone me deli sela aselama, agabolo ola mani. ²⁰ Tama agai augwalibolo hanalu wali, “Te e masigi daide elalubo gesabidi noma me, e ASEANI nogi me, te dego dawé?” ²¹ Tama augwaligo te po wali, “Te Sisargo dao.” Tama agai augwalibolo te po wai, “Tama tibaso, te Sisargo nai, te dagego te Sisar agabolo wei ponoyu mao. Tama Godigo nai da, te dagego Godibolo mao,” wali.

²² Augwaligo te po wabo odolama, tama augwali noma mu sai. Tama augwali aga tagalama, pai dao.

Augwaligo Jisasbolo te bidi isama ma hodalobo po hanalu wai
(Mak 12:18-27; Luk 20:27-40)

²³Tama te sogo naga te Sadyusi bidi meba te Jisas pageba sabolai. Te bidi hanigo homugo te isai bidi augwali ma hodalogobeo te po wabo dao. Te Sadyusi bage augwali Jisas pageba sabolama hanalu wai, ²⁴“Tisa, po ola mabo bidi, te polobadu mu bidali bidi Mosesgo te po wai, ‘Te bidi me deli aga we selama, wai meni ebadi isibaso da, teda aga amago te we selama, tama aga ama tau selama, te wai ame nao.’ Mosesgo te po wai.^d ²⁵Tama polobadu te ama solo te nogo a naga me si te da tomode bidai. Tama gomunai bidi aga we selama, bidama, isai, tiali goli agai wai meni yai. Tama aga ama mego te ama isiyu taga pali we sai. ²⁶Tama tomo bidigo me te tiwai naga yali, tama te tomo bidi tudi badu bidigo me tiali, tama naga tede pelama, te a naga olama me badu nogo si wali bidiba usu nigi pai dao. ²⁷Tama te bidi dabe tigidaligo wai meni badi isila silali, tama nosali mu te we me isai. ²⁸Tialima, nago po wao. Te isali bidi dabe ma hodalobo sogo, te we dego we mu te bidi a naga olama me badu nogo si augwalide bidigowe? Nago koneani, tigidaligo te we naga sai dao,” Sadyusi bagego te po wai.

²⁹Tiali goli Jisasgo augwalibolo po wei ponoyu, te po wai, “Dagego te Godigo bukude wali po konebeo. Tama dagego te Godigo bomo me konebeo. Tama tibaso, dagego geda muyu, te po obao. ³⁰Magi baso meni. Te isali bidi dabe augwali ma hodalobo sogo, te bidi dabego te we sabo *sę* me egobeo. Menio. Te augwali olo te dagalude bidibo mobo bidi ensel bidibo gilama tiwai bidaluabao. ³¹Tiali goli, te isai bidi dabe ma hodaluabao wali po, te pode eno dagebolo ma hanalu obao, ma Godigo te dagebolo wali po te dagego me nedebewe? Agai te po wai dao, ³²‘Ena da, te Abrahamgo God me, ena te Aisakgo God me, ena te Jekopgo God me bidalubo dao,’ Godigo te po wai. Tama te po page e dao, God aga te isila silali bidi dabego God menio. Aga te ula dali megi bidibo bidi dabego God dao,” Jisasgo te po wai.^e

³³Tede sisinagasali we bidi hauwa augwaligo te po wabo odolama, tama augwali agai te wali pode noma mu salio.

Godigo polalubo bomo yai po
(Mak 12:28-31; Luk 10:25-28)

³⁴Jisasgo te wali pogo te Sadyusi bagego pedauwali paniai. Tama te Farisi dabego te po odama, tama augwali aga pageba sisinagasali.

³⁵Tama augwali tomode te bomo yai po page koneai bidi me deli bidali. Agai Jisas usu siyu hanalu wainogo yali, ³⁶“Tisa, po ola mabo bidi, te

^d 22:24 Bom 25:5 ^e 22:32 Sai 3:6

Godigo bomai po tigidali tomode mena pogo te tigidali gasa bomai po te aiyaba elaluama, tama te genuai mu dawe?”

³⁷Tama Jisasgo agabolo te po wai, “‘Genuai Bidi da aga nago God dao. Te nago aga godolo ebo te nago homu tigidali me, te nago nom a tigidaligo me, te nago homu kolesaga tigidali agaba munama, tama aga nago godolo mu yao.’^f ³⁸Te bomai po aga te genuai elalubo, tama aga te polalubo mu dao. ³⁹Tama te bomai poba daganalubo po aga te tiwai dao. Te e dao, ‘Nago naga digi godolo ebo te kolesaga tiwaigo te nago bidi hasi dabe augwali dali wiegi yai homu elama godolo yao.’^g ⁴⁰Te bomo yai po side te tigidali bomo yai po page me, te Godigo po pusali bidi profet dabego po page me, te po side naga elalubo dao,” Jisasgo te po wai.

Jisasgo te Farisi dabebolo te Krais po hanalu wai
(Mak 12:35-37; Luk 20:41-44)

⁴¹ Te Farisi dabe augwali Jisas pageba sisinama bidalubadi, tama agai augwalibolo hanalu wai, “Dagego magi homu te Godigo sa muani bidi Kraisde ebawe? ⁴²Aga te dego hani bidi dawe?” Tama augwaligo agabolo te po wai, “Te Devitgo hani bidi dao.” ⁴³Tama agai augwalibolo te po wai, “Tialima magi baso Godigo Mobo Bidigo Devitbolo e homu kolesaga menama, tama Devitgo aga Genuai Bidi da nogi waliwe? Agai e po wai,

⁴⁴ ‘Genuai God agai eno Genuai Bidibolo weyu,
 te po wai, “Nage eno dolo nogo badu duayao, tama
 te eno nago boi bidi dabe nageba munama, tama
 nago dologoba mubo sogo pedelabo tonaluao.”^h

⁴⁵Dagego suao. Devit aga digi aga Genuai Bidi da nogi waligo da, teda magi baso dagego aga te Devitgo hani bidi naga da po waliwe?”

⁴⁶Tama niwai bidi me deligo Jisasgo te po wei ponabo te usu menio. Tama te side augwali agade wi ebo gagalali, tama nosali augwaligo agabolo te magi nai po me hanalubo menio.

**Te bomai po page ola mabo bidi dabe dali, te Farisi dabe
 dali sigo ebo kolesaga**
(Mak 12:38-39; Luk 11:43, 46; 20:45-46)

23 ¹Te Jisas agai te Farisi dabego po aiyaba elaluama, tama te sogo tama agai po te we bidi dabe dali, aga wali bilibo bidi dali, augwalibolo te pusali. ²Agai e tiwai po wai, “Te bomai po page ola mabo bidi dabe dali, te Farisi dabe dali, augwaligo dagebolo te bomo yai po ola mabo dao, te Mosesgo yali gilama ebo dao. ³Tama tibaso, te tigidali po augwaligo dagebolo ola mabo po te dagego odama, wali pao. Tiali goli augwaligo ebo kolesaga, te kolesaga dagego wali pigimio.

^f 22:37 Bom 6:5 ^g 22:39 Prs 19:18 ^h 22:44 Tib 110:1

Menio. Augwaligo po hauwa obadi, tiali goli augwa digi augwaligo te po me wali pabo menio.⁴ Tama tiyu, augwaligo te mesegaluai sege te bidi dabe augwali nageba uwadu muaibao, tiali goli augwa digi augwaligo dwasianunu me nogo danigo naga me te tola selama, te sege tololo bidi dabe augwali tau me sogobeo.⁵ Augwaligo ebo kolesaga tigidali te we bidi dabego augwali genuai nogi yai bidi da olama sumainogo tibo dao. Awe, te bomo yai po wali peyu, augwaligo te Godigo po asęani nogi mo dali, te wiani dali, augwa tigide mubo dao. Tama augwa gudali ugwa sesegede te sesemo elalubo dao. Tiali goli te we bidigo augwali sumainogo augwaligo te nogo mo me te wiani me te sesemo me, augwaligo te nai genuai mu nigliama mubo dao.ⁱ ⁶ Augwaligo te genuai nai da tubo side te polalubo ni namide duabo godolo elama, te nai hasia sabo homu ebo dao, tama te bomai po ola mabo bede me te polalubo wiegi yai ni namide naga duabo dao.⁷ Augwaligo te we bidi dabego augwali te bidi sisinama bidibo madi tomode te augwalibolo te we bidigo siade da wabo godolo elama, tama augwaligo augwalibolo nogi weyu, te po ola mabo bidi eno tisa da po wabo godolo ebo dao.”

⁸ “Tiali goli, te bidi dabe augwaligo dage nogi eyu, ‘Tisa, po ola mabo bidi da’ olamuo. Menio. Te bidi me deli naga te aga dagego te po ola mabo bidi dao, tama dage tigidali te ama dede ama dede naga bidibo dao.⁹ Tama e tqde te bidi me delibolo te dagego aya da po me wagio. Te bidi me deli naga te dagego Aya dao, te aga dagalude bidibo dao.¹⁰ Tama augwaligo dagebolo nogi nogi eyu ‘Tobolu bidi’ po me olamuo. Dagego tobolu bidi deli bidibao, aga te sa muani bidi Krais dao.¹¹ Dage tomode dagego genuai bidi aga te dagego se bidi bidao.¹² Magi baso meni, bidi mego aga digi aga nogi uwababa sabo bidi, te bidi Godigo aiyaba muaibao. Tama bidigo aga digi aga nogi aiyaba elalubo bidi, te aga genuai nogi Godigo agabolo mawaibao,” Jisasgo te po wai.

**Jisasgo te bomai po page ola mabo bidi dabego dwai kolesaga ebo
po augwalibolo wali**
(Mak 12:40; Luk 11:39-42, 44, 52; 20:47)

¹³ “Dage te bomai po page ola mabo bidi dabe me, dage Farisi dabe me, hobede ya. Dageba te dwai sogo mu pedelaibao, dage tibo po wabo bage. Te Godigo we bidi tonalubo kolesaga tomoba pabo tu te dagego te we bidi augwaligo gesabidiba te tu palibo dao. Duga digi te tomoba me pabo meni, tama te we bidi augwali te tomoba painogo ebadi, te dagego augwali pabo tu palibo dao.¹⁴ [Dage bomai po page ola mabo bidi me, dage Farisi dabe dali, hobede ya. Dageba te dwai sogo mu te pedelaibao, dage tibo po wabo bage. Dage te augwa bidi isai we dabe pageba pelama,

ⁱ 23:5 Nam 15:38; Bom 6:8; Mat 6:1

tama dagego te ugwdalu homugo naga po augwali dali olama, tama augwaligo be me doado bage wi sabo dao. Tama dagego gedu haluasa po bobobage weyu, duga te dwai sę yali po geme dualiyu tebo dao. Tama tibaso, te dwai sę wei ponabo sogode te dageba asabo sęge te dwasianu menio.]” Jisasgo te po wai.

15 “Dage bomai po page ola mabo bidi dabe me, dage Farisi dabe dali, hobede ya. Dageba te dwai sogo mu pedelaibao, dage tibo po wabo bage. Dage te tamu ajde badi, te tode dali bilibao, te bidi me deli gegelama, tama te bidi me deli aga dage dali bilabo bidi sainogo dagego bomonama gegebo dao. Aga te dage dali bilibo bidi pedalama, tama dagego aga te moni sia dabo buluba pomainogo ilibo dao, te duga tiwai ilibao. Dagego aga te dwai sę ebo tomoba kegelama, tama agai ebo dwai sego dagego ebo dwai sę aiyaba mu elalubo dao,” wali.

16 “Dage gedu widai bagego te bidi dabe augwali tü ola mawainogo ebao, hobede ya. Dageba te dwai sogo mu pedalaibao. Dagego e tiwai po te bidi dabebolo ola mabo dao, ‘Te nago po dąq omainogo eyu da, te Moni Lotu Be tempel nogi olama, tama mu po dao wao. Tiali goli nosali nago te dąq wali po togoyu da, te usu dao, te sęge menio. Tialima, nago te Moni Lotu Be tempel tomode elalubo wiegi yai kapa gol nogi ilama, tama mu po da wabo si da, teda nago te po wali sę tiwai yao, togolamuo.’ Dagego augwalibolo te po ola mabo dao. 17 Dage esela pelama gedu widalio. Magi nai da te polalubo nai dawe? Ma, te gol da, te polalubawe? Ma, te Moni Lotu Be tempelgo te gol wiegi yai ilali, ma te da te polalubo nai dawe? Te be tempel polalubo dao. 18 Tama dagego te po me augwalibolo ola mabo dao, ‘Te bidigo aga po dąq omainogo eyu da, te Godibolo olo mabo ofa ebo sai nogi ilama, mu po dao wao. Tiali goli nosali agai te dąq wali po togoyu da, te usu dao, te sęge menio. Tiali ma, agai te ofa saide muani olo mabo nai nogi ilama, tama mu po da obaso da, teda agai te dąq wali po wali sę tiwai yao, togolamuo.’ Dagego te tobage po augwalibolo ola mabo dao. 19 Dage gedu widalio. Magi nai te polalubo naiwe? Ma, ofa polalubawe? Ma, te ofa ebo sai yaligo te ofa wiegi yai ilaligo, te polalubo naiwe? Te ofa ebo sai te polalubo nai mu dao. 20 Tama tibaso, bidigo aga po dąq omainogo eyu, tama te Godibolo olo mabo ofa ebo sai nogi ilama, mu po dao obaso da, teda agai aga po te ofa ebo sai nogi dali, te saide muani nai tigidali dali side agai po olama dąq walali. 21 Tama bidigo te Moni Lotu Be tempel nogi ilama, mu po da obaso da, teda aga po me te tempel be dali, te tempel bede bidibo bidi God dali, te side te po dąq walobao. 22 Tama bidi mego dagalu nogi ilama, mu po da wali da, teda agai te po badi, te Godigo duabo sia sai dali, te sia saide dulalubo bidi dali, te side te wali po dąq walobo dao.” Jisasgo te po wai.

23 “Dage bomai po page ola mabo bidi me, dage Farisi dabe dali, hobede ya. Dageba te dwai sogo mu pedelaibao, dage tibo po wabo bage.

Dage te dwasianu bomai po wali peyu, te tigidali gide elalubo dwasianu nai te kaya dabe dagego nogo si bugulama, deli te Godibolo menama, tama nogo a naga olama me badu nogo me si me si dagego sabo dao. Ao, te usu dao. Tiali goli dagego te bomo yai po genuai tigidali me badu sula tagalali, te bidi dagalobo doloba pai kolesaga me, te bidi homu dene eyu tau sabo kolesaga me, te bidi dabe dali dolo sę naga ebo kolesaga me dao. Te Godibolo nogo si nai bugulama deli mabo bomai po badi, te po dagego tagaligio, tiali goli e tobage te genuai bomai po te sę dagego mu iyqo.^j ²⁴Dage gedu widai bagego te bidi dabe augwali tų ola mawainu ebao. Dagego te aji te dwasianu dinai dali tuidali weyu, dagego te aji osola suainogo te nami uwabawa gelebo dao. Tiali goli te kibu kamel dagego sese dalobo dao,” wali.

²⁵“Dage bomai po page ola mabo bidi me, dage Farisi dabe dali, hobede ya. Dageba te dwai sogo mu pedelaibao. Te daide dage te dwagi yai bidi dabe tiwai dao. Tiali goli dagego homu kolesaga tomode te nai wi sabo kolesaga me te tigigo ebo kolesaga paganama, te kolesaga wali pabo dao. Dage da, te aji tubo kap me plet pou te bulu badu naga penebo bidi tiwai dao. ²⁶Nage Farisi, nage gedu widai. Hasia bolo nago te kap tomode elalubo pobele bage penao, tama te kap bulu badu me te hogomu meniamu usu elaluabao.”

²⁷“Dage bomai po page ola mabo bidi me, dage Farisi dabe dali, hobede ya. Dageba te dwai sogo mu pedelaibao. Dage te gę page ola be augwaligo te tedela yai pengo pilali tiwai dao. Bulu badu da, te bidigo subo dwagi yai ilali, tiali goli tomode da, te isai bidi dabego dili dabe me te tigidali dwai meda yai mobia pai nai te paganalubo dao. ²⁸Dagego me te tiwai naga elalubao. Te bidi dabego dage tigi subo da, augwaligo da dage doloba pai bidi dabe da te homu ebao. Tiali goli tomode da, dagego te tibo po wabo kolesaga me te bomai po selo sabo kolesaga paganalubo dao,” Jisasgo te po augwali dali wai.

**Jisasgo te bomai po page ola mabo bidi dabe augwali dwai
dene sabo po wali**
(Luk 11:47-51)

²⁹Po ma weyu, agai te po wai,” Dage bomai po page ola mabo bidi me, dage Farisi dabe dali, hobede ya. Dageba te dwai sogo mu pedelaibao. Dagego te polobadu po pusali bidi profet dabe gę pagede masigi be şenama, tama te polobadu bidali doloba pai bidi dabe muani gę page au ilibo dao. ³⁰Tama tiyu, dagego e tobage po obao, ‘Da te polobadu wąi dabe bidali sogo da bidigi sogo da, teda dago te Godigo po pusali bidi profet dabe augwali elibo me tau sigi menio.’ ³¹Dagego te pogo ola mani,

^j 23:23 Prs 27:30

dage da te polobadu po pusali bidi dabe elali te bidi dabego wai dabe te dage megi e bidalubao. ³²Tama tibaso, megi da dage pelama, duga waj dabego yali dwai kolesaga usu nigi pao. ³³Dage dwai hasamani dabe dao. Dage dwai hasamanigo wai puluba dao. Godigo dage po tu ilibaso, tama dage te dwai sia dabo madi pageba paibao. Mena tama dage menadu wi paibawe? Menio. ³⁴Tama tibaso, eno te Godigo po pusabo bidi meba badi, tama te wiegi yai homu konea palobo bidi me, te Godigo po ola mabo bidi augwali dageba tagala palaibao. Tama te bidi dabe meba dagego ela muyu, tama meba te ni pedaide eliyu, tama meba dagego bomo yai po ola mabo be tomode bigo eleyu, dene mawaibao. Tama dagego augwali te hanu me delide ela gudulama, tama gasa hanu meba dagego augwali pobasa pabo se yaibao. ³⁵Tama tibaso, te doloba pai bidi dabe augwali e tqde bidaluali, tama te bidi dabego augwali ela sililio, te sege dugade naga elaluabao. Augwaligo te doloba pai bidi dabe ela silali, te wiegi yai bidi Abel gagalasa pelama, te Sekaraia teba usu nigi palio, te Berekiago ogwa, aga dagego te Moni Lotu Be tempel tomode ela muani, te dwasianu be daj togali me te ofa muabo sai te si tomode dagego Sekaraia ela muani. ³⁶Eno mu po dagebolo obe dao, te dwai se yali sege tigidali te megi e tqde bidalubo we bidi haniba mu pedelaibao,” Jisasgo te po wai.

**Jisasgo te Jerusalem hanude gela walali
(Luk 13:34-35)**

³⁷“Jerusalem, Jerusalem, nago te Godigo tagala palali bidi profet dabe augwali ela munama, tama nago te Godigo nageba tagala palali se bidi masigi sanama, augwali me ela muanio. Hauwa sogo mu eno nago we bidi sisinainogo ebadi, te so ba kakarukgo te aga wai dabe augwali te bogo dologoba sisinibo tiwai, tiali goli dagego hagela yai dao. ³⁸Dagego odao, megi da, dagego bulu da te olo elaluabao, tagalai dao. ³⁹Awe, eno dagebolo obao, te dagego ena ma sugobeo, tama bidama nosali sogo usu nigi pelama, tama te sogo dagego te po enade waibao, ‘Dago homugo te Godigo te Genuai Bidigo nogide asali bidi dali wiegi yai se yao,’ dagego te po waibao,” Jisasgo te po wai.

**Jisasgo te Moni Lotu Be tempel dolaibao po wali
(Mak 13:1-2; Luk 21:5-6)**

24 ¹Jisasgo te Moni Lotu Be tempel tagalama pobadi, tama aga wali pabo bidi dabe augwali aga pageba asai. Augwaligo te tempel bego haniani be dabe agabolo ola mawainu yai. ²Tiali goli agai po augwalibolo wei ponoyu, te po wai, “Awe, dagego te haniani be dabe tigidali suo. Eno mu po dagebolo obao, augwaligo e gasa masigi daide ugwdudu manama elalubo masigi dabe, te me gogolama me sula tagalogobeo. Te tigidali augwali pebedelama, te toba aiyaba sasawaibao.” Jisasgo te po wai.

Jisasgo sègè hauwa pedalabo po wai.*(Mak 13:3-13; Luk 21:7-19)*

³ Te aga pelama, tama te dwasianu bulu du Oliv teba sabolama, aga tede dualaluyu, tama aga wali bilibo bidi dabe naga augwali aga pageba aselama, augwaligo te po wai, “Nago dabolo wao, nisu sogo te Moni Lotu Be tempel dolobo sè pedelaibawe? Magi sè bolo hasia pedelama, dago koneai elalubadi, nage ma asiyu e tq siligowe?”

⁴ Te Jisasgo augwaligo po wei ponoyu, bomonama te po wai, “Bidigo dagebolo tibo po olama, tama dagego te mu po dao homu idali weyu, dage dua dao. ⁵ Magi baso meni. Bidi hauwa aselama, augwaligo eno nogi nogi ilama, tama augwaligo te po waibao, ‘Ena digi ena te Godigo sa muani budi Krais dao.’ Tama augwaligo te we bidi hauwa ili po ola mawaibao, te augwali gasa tuþa paibao. ⁶ Tama dagego te moni wabi hwibø kulukulu dali te wabi hwibø po sabilibø po odaibao. Dagego odama, dage midigi polo selama nom sigio. Te sè bolo pedelaibao, tiali goli te tq de dagalu si silabo sogo me elalubao. Te nosali mu pedelaibao. ⁷ Awe, tama genuai hwiyu, bidi hani me deligo te wabi te gasa genuai bidi hani dali hwj yaibao. Tama me tuni bidigo bidi hani te gasa tuni bidigo bidi hani dali wabi hwiyu hwj yaibao. Tama haniani bulu habu badu genuai nai nasi ela ela paibao, tama tq me mali ela ela paibao. ⁸ Te tigidali sè te wego wai ame nainogo hasia dene ebo te tiwai pedalaibao,” wali.

⁹ “Te tebo sogo augwaligo dage selama, dene ilama, sègè mobadi yaibao, tama augwaligo dage ela muaibao. Tama tigidali we bidi hani augwaligo dwai homu mu dagebolo yaibao. Magi baso meni, eno nogi dagede elalubaso augwaligo dage dali tama tiaibao. ¹⁰ Tama tebo sogo te we bidi hauwa augwaligo enade konealubo po dñ wali tagalama, tama augwaligo augwa ama dabe boi bidigo nogoba munama, tama augwa me augwa digi augwa ama dabe dali boi bidi yaibao. ¹¹ Tama te tibo po pusubo bidi profet dabe hauwa pedelama, tama we bidi hauwa tibo po ola mawaibao, augwali gasa tuðu kegasa pomainogo yaibao. ¹² Tama te dwai kolesaga ebo hauwa mu pedeliyu, tama te bidi hauwago gasa we bidi dali dwagi yai homu eyu godolo ebo kolesaga kedauwa saibao. ¹³ Tiali goli, mena bidi aga te tq dagalu silibo side bomonama bidali bidi da, teda Godigo aga ma dobola saibao. ¹⁴ Tama augwaligo te Godigo we bidi tonalubo kolesaga po, te wiegi yai po te tigidali tq habu badu pusaibao, te po tigidali tqde bidibo we bidi augwaligo odomainogo, tama nosali gana digi te tq, de dagalu si silabo sogo te pedelaibao,” Jisasgo te po wai.

Dwai nai mu pedelaibao*(Mak 13:14-23; Luk 21:20-24)*

¹⁵ Jisasgo te po me wai, “Te polobadu bidali bidi Daniel agai Godigo po pusuyu, te dolobo gasa dwai naide po pusali, polobadu. Tama dagego te

dwai nai te magi dwai sə isəawai wiegi yai bulude bidibo sueibao. (Bidigo te po nedebaso da, agai homugo bugagia koneao.)^k ¹⁶Tama te sə pedelabo sogo te Judia təde bidibo we bidi augwali te bulu duba wi pao. ¹⁷Tama te be daide ugwardu bidibo bidi te aga be aiya dulama, te doado bage me sigilugobeo, aga wi naga pao. ¹⁸Tama te sogo gide bidibo bidi, te aga tudiba begelama, aga gudubo ugwa bede me sigi pelamuo, olo wi pao. ¹⁹Te haliga yai we dabe me te sogode te we dabego wai ame mobadi te augwali hobede mu dao. ²⁰Dagego gedu haluasa po waiyəo, te dage te kedau ebo sogo ma te Sabat sogode wi pidali weyu tama tiao. ²¹Te sogo da, te səgə genuai mu elaluabao. Te e tə gesi sogo elalubadi te meg i e sogode te usu nagasu, te tiwai səgə te polobadu munu me pedalobeo. Tama nosali me te tiwai səgə munu me ma elalugobeo. Menio. ²²Tama Godigo te genuai səgə elalubo sogo togogi menigi da, teda te tigidali we bidi mu doligi dao. Tiali goli God aga te sa muani we bidi augwalide homu konealua. Tama tiyu, augwali tobade agai te sogo togwaibao” wali.

²³“Te sogode, te bidi me deligo dagebolo e tobage po waibao, ‘Suao, te Godigo sa muani bidi Krais ede bidibao,’ ma ‘Ude bidibao’ obaso da, teda dagego homu te poba me dəq olamu dao. ²⁴Magi baso meni, te bidi meba aselama, tibo po e tiwai waibao, ‘Ena Krais, te sa muani bidi dao,’ ma ‘Ena te Godigo po pusubo profet bidi me deli dao,’ te tobage po waibao. Tama augwaligo bidi noma sabo bomai sə genuai eyu, tama haniani haniani sə yaibao. Augwaligo te we bidi God aga sa muani bage tibo po olama, te dwai sə ebo tomoba kegai hagede tebo dao. Tiali goli, te usu egobeo. ²⁵Odiəo, te sə pedelasiqbadi eno dagebolo te po hasia bolo wai dao. ²⁶Tama tibaso, augwaligo dagebolo te po waibao, ‘Suao, aga u badu te bidi meni yai madi bidibao,’ obaso da, te dage te badu me sugi pelamuo. Ma, augwaligo te po waibao, ‘Suao, aga te be tomode geme dualalubao,’ obaso da, te dagego te poba homu dəq me olamu dao. ²⁷Magi baso meni, te dagalude te be sele ula ebo sogo, te ula te sia ge pedalobo badu pedalama, tama te ula ebogo te sia ge dega saboba me pabo dao. Tama te Godigo Bidi Mu ma asobo sogo te tiwai naga pedelaibao, hania mu pedalaibao,” te po wai.

²⁸“Te isali hasa tigi elalubo madi, te pesageba te tigi mi tubo ba dabe augwali deliba sisinagasaibao,” Jisasgo te po wai.

Godigo Bidi Mu nosali asaibao
(Mak 13:24-27; Luk 21:25-28)

²⁹“Te sogo te genuai səgə yali te silai madi, tama polo te sia ge hulia selama, tama te polua ula me egobeo, tama te hə dabe dagalude tulaluabao. Tama te dagalude bomai nai te tə mali tiwai elama, gəq page

^k 24:15 Dan 9:27; 11:31; 12:11

yaibao.^l ³⁰Te tebo sogo te Godigo Bidi Mugo dąi te dagalude pedelaibao, tama te tqde we bidi hani tigidali augwali augwa nogo pagasa moni gela waibao. Tama augwaligo te Godigo Bidi Mu te dagalu pō daide ugwdatu dualasa asobo sueibao, tama aga genuai bomo me genuai ula dali dulaibao. ³¹Tama aga mobo bidi ensel dabe tagala palama, augwaligo te bu wabo nai biugel bomonama mu bu ola asaibao, tama augwaligo aga te sa muani we bidi dabe sisinaibao. Te augwali te tq bogo me si me si yali badu te we bidi sesa asiyu, tama te dagalu sesege badu mu usu nigi paibao, te we bidi sigi paibao,” Jisasgo te po wai.

Ni kayago te tq de dagalu si sisabo sogo bodolu muani kolesaga yai
(Mak 13:28-31; Luk 21:29-33)

³²“Dagego te ni kayade koneiaqo. Te agai nologode te wę elaluyu, te gesi yabe pedalabo sogo, dagego koneaibao, te sogo te dwagi yai giliga nanobo si pedalainogo eba, te po wabo dao. ³³Te tiwai naga, nosali dagego te eno megi pusali sę tigidali pedalobode subo si, teda dagego koneagameo, te tq dagalu si silabo sogo te pąba yagaselama, te e tqde elalubao po waibao. ³⁴Eno mu po dagebolo obao, te megi e sogode te tqde bidalubo we bidi augwali me isisabadi, tama te sę tigidali pedalibaibao. ³⁵Te dagalu de tq si da, te silaibao, tiali goli eno po da, te munu me sia sogobeo,” Jisasgo te po wai.

Niwai bidi mego te asobo sogo te bodolu me konebeo
(Mak 13:32-37; Luk 17:26-30, 34-36)

³⁶“Tiali goli mena bidi mego te asabo sogo te bodolu munu me konebeo. Te dagalude bidibo mobo bidi ensel dabe augwaligo me konebeo. Owgago me konebeo. Aga Aya deligo naga te bodolu konealubo dao. ³⁷Te polobadu mu bidali bidi Noa aga tqde bidali sogo augwaligo yali kolesaga, te kolesaga tiwai naga te Godigo Bidi Mu ma asobo sogode me augwaligo tama tiaibao.”^m ³⁸Te polobadu te genuai aq̄ asisabadi, we bidi augwali te nai tuyu, te wę dabe tuyu, te we siyu ela bidalubadi yaide, tama Noa te moni geba tomoba pai dao. ³⁹Augwaligo homu kone me isäma, te augwali tama naga bidiba homu yali, tama polo te genuai aq̄ asiyu, te we bidi tigidali dagalasa pela silali. Te yali tiwai naga te Godigo Bidi Mu ma asobo sogo tiaibao, augwaligo te asabo sogo bodolu konesabadi.tama tiaibao”ⁿ ⁴⁰Tama te bidi si gide sę ebadi, tama Godigo me deli naga siyu, tama gasa me da, tede bidibadi tagalaibao. ⁴¹Tama te we sigo te keli gagawai nai plaua nigibadi, tama Godigo me deli naga saibao, tama me da, tede bidibadi tagalaibao. ⁴²Tama tibaso, dagego bugagia tonaluao. Duga Genuai Bidi

^l 24:29 Ais 13:10; 34:4; Ese 32:7; Jol 2:10, 31; 3:15; Ped 6:12, 13 ^m 24:37 Gag 6:5-8

ⁿ 24:39 Gag 7:6-24

ma asobo sogo, te dagego konegobeo. ⁴³ Dagego homugo te sede koneao, te be page bidigo hasia bolo te nisu sogo hulide te nai wi sabo bidi asobo te agai konegi sogo da, teda agai bugagia tonalugi baso, tama te nai wi sabo bidigo agai be aluama, te tomoba soabo si te me gogolama me sula tagaligi menigi da. ⁴⁴ Tama tibaso, dage me sisi elaluao. Te Godigo Bidi Mu te me sogo dagego homugo konesiabo sogo te aga asaibao,” Jisasgo te po wai.

**Wiegi yai sə bidi dali, dwai sə bidi dali side po digi po begelama wai
(Luk 12:42-46)**

Nogo si wegi manide po digi po begelama wai

25 ¹Jisago te po wai, “Te aga ma asobo sogo te Godigo we bidi tonalubo madi tomoba painogo ebo we bidi augwali te wegi mani nogi si tiwai dao. Te bidi me deli megi tama we sabo bidi, aga asaiba wali. Tama te gesi wegi mani augwaligo augwa lam sole selama, tama augwali te gege peyu, te tudu tiaba pelama, tama aga odasa asainogo yai. ²Tama a naga wegi mani homu kolesaga meni yai, tama me a naga wegigo wiegi yai homu kolesaga elaluai. ³Te homu kolesaga meni yai wegi mani augwaligo lam sole sela asali, tiali goli augwaligo te aji manabo wel dali me sela asobeo. ⁴Tiali goli te homu kolesaga elalubo wegi mani augwaligo te aji manobo wel te augwa botolde paganama tama augwaligo te dali sela asai. ⁵Te bidi te we sabo bidi aga polo asobe, tama te wegi mani tigidali gedu sege elama tama augwali godege piai.”

6 “Tama huli tomode mu i me deli ola asai, ‘Te we sabo bidi aga asobao. Dagego aga te tuđu tiaba pelama tama aga odasa asao.’” Tama olama,

tama te wegi mani augwali tigidali hodaluama, tama augwa lam sole sisi elama dodolai. ⁸Tama te homu kolesaga meni yai wegi manigo te wiegi yai homu kolesaga elalubo wegi dabebolo te po wai, ‘Dagego wel aq̄ me badu dabolo mao. Dago sole lam aq̄ sula sainogo ebou.’ ⁹Tiali goli te kolesaga yai wegi manigo po wei augwalibolo ponoyu, te po wai, ‘Te e wel aigo te da me te dage dali usu egowe, egobewe, te dago konebeo. Te duga stua beba pelama, duga tedali abelegi pao,’ wali. ¹⁰Tama augwali pelama, te wel aq̄ abelegi pai digi, tama te we sabo bidi aga asali. Tama te sisi elama bidali wegi mani augwali te be tomoba aga dali te we sabo genuai nai tubo madi pali. Tama bede bidibo bage augwaligo te be tū bugagia paliai.”

¹¹“Nosali te wel aq̄ abelegi pali te gasa a naga wegi ogwa we augwali aselama, tama augwaligo bego bego weyu te po wai, ‘Genuai bidi, genuai bidi, nago da be tū dalao.’ ¹²Tiali goli agai po wei ponoyu, bomonama te po wai, ‘Eno mu po dagebolo obao, eno dage konebeo,’ wali.”

¹³“Tama tibaso, dagego bugagia tonaluao. Dage me, te dagego te aga asobo sogo me te bodolu me konebe dao,” Jisasgo te po wai.

Te po digi pode begelama te s̄e bidi dabego mone sali po wai
(Luk 19:11-27)

¹⁴Te Jisasgo te po me wali, “Te Godigo Bidi Mu aga ma asobo sogo e tiwai yaibao. Te genuai bidi me deli aga te digibulu bulu painogo ebo. Agai aga s̄e ebo bidi dabe i olama, asobo si, tama agai nai dabe augwali nogoba osogo muai, augwaligo bugagia tonalumainogo yai. ¹⁵Agai te s̄e bidi deli deli augwaligo kolesaga me bomo homugo koneama, tama augwalibolo te mone dobawai. Me delibolo agai te bidi sese mone hauwa 5,000 kina mani, tama mebolo agai te bidi sese mone hauwa 2,000 kina mani, tama mebolo agai te bidi sese mone hauwa 1,000 kina mawai. Agai tama tilama, aga pai. ¹⁶Aga pai madi, tama polo te 5,000 kina sali bidigo te monede bisnis s̄e elama, tama gasa mone te 5,000 kina sali, te moneba ugwdadu daganani mone te profit mone dao. ¹⁷Tama te 2,000 kina sali bidigo, agai me te monede bisnis s̄e elama, tama gasa mone 2,000 kina te moneba ugwdadu daganama sai. ¹⁸Tiali goli te bidigo te mone 1,000 kina sali bidi aga pelama, tama agai te tq̄ dedage dogolama, tama aga genuai bidigo mani mone te dedagede geme dualigi pai.”

¹⁹“Bobobage sogo bidada pai madi, tama nosali te s̄e bidi dabe augwa genuai bidi ma asai. Tama agai augwalibolo te mani mone po dodolainogo yai. ²⁰Tama te 5,000 kina sali bidi asali, tama agai te moneba ugwdadu te 5,000 kina daganama sesali, tama te po wai, ‘Genuai bidi, nago mone 5,000 kina eno nogoba osogo muai dao. Suao, eno bisnis s̄e elama, gasa mone 5,000 kina ma sela muai dao,’ wali. ²¹Aga genuai bidigo agabolo te po wai, ‘Nage wiegi yai s̄e bidi dao, nago enade homu

²⁴“Tama te 1,000 kina sali bidi, te bidi me aselama, tama te po wai, ‘Genuai bidi, eno koneani, nago te nai ge bulasiwai goli, nago te nai sabo dao. Tama gasa bidi mego tq badu te nai wai telawai digi, tede nago te nai dabe sabo dao. Nage sesena pai bidi dao. ²⁵Tama ena wi ebaso, nago enabolo te mani mone te 1,000 kina, te eno tq dedageba gem dualai. Te naga mone e dao,’ te se bidigo te po wali,” Jisasgo te po wai.

²⁶ “Tiali goli aga genuai bidigo po agabolo wei ponoyu, te po wai, ‘Nage dwai sę bidi dao. Nage sę hagela ebo bidi. Ma, nago bugagia koneani eno te nai ge bulasiławai goli, te nai siyu, tama gasa bidigo tqde telawai nai sabo te nago konebo dao. ²⁷Tialima, nago magi baso eno mone te benkba muai meniwe? Nago te eno mone te benkba mugi sogo da, teda ena ma asobode te ena nai dali te gasa ugwdadu daganani nai te profit mone dali sigi da. ²⁸Tialima, dagego te mone 1,000 kina te bidi agade selama, te mone 10,000 kina munalubo bidibolo mao. ²⁹Magi baso meni, te nai meba elalubo bidi augwali tigidali, te eno meba ma augwalibolo mawaibao, tama augwaligo nai umabo mu elaluaibao. Tiali goli, te dwasianu nai naga elalubo bidi, te agade eno te dwasianu nai me ma saibao. ³⁰Tama e dwai olo bidi, dagego aga te be hulia si madi buluba sela sayaao. Tama tede augwali dwai gela weyu, tama augwa kele ma halua tueibao,’ te genuai bidigo te po wali,” Jisasgo te po wai.

Te Godigo Bidi Mugo tigidali bidi hani dagalaibao wali

³¹ Te po ma weyu, Jisasgo te po wai, "Nosali te Godigo Bidi Mu te tuni bidi ma asobode, tama tigidali ensel mobo bidi aga dali, te sogo aga te tuni bidigo wiegi yai sia saide dualagasaibao. ³² Tama tigidali tqde bidibo we bidi hani augwali aga gesabidiba sisinaibao. Tama agai augwali dobolama, tama hani si bugulama muaibao, tama te sipsip me meme tonalubo bidigo te sipsip hani tedaliba muyu, te meme hani tedaliba mubo gilama tiwai yaibao. ³³ Agai te sipsip dabe aga dolo nogo badu muyu, te meme dabe pobase nogo badu muyu ebo tiwai yaibao. ³⁴ Tama te tuni bidigo aga dolo nogo badu bidibo bidi dabebole po weyu, te po waibao, 'Dage da, te eno Ayago dage dali wiegi yai se mu yai dao.

Polobadu mu agai te tq nigali sogode agai we bidi tonalubo kolesaga sisi ilama, tama tede dage bidabo madi sisi ilali elalubo. Dage aselama, te bulu tomoba dage asiaqo. ³⁵ Magi baso meni, polobadu ena nasi dali bidibadi, dagego ena nai mawai. Ena aq nogone ebadi, tama dagego ena aq mawai. Ena gasa bulu bidi asobaso, tama dagego duga beba ena odasa pai. ³⁶ Ena ugwa meni badi, tama dagego ugwa ena mani. Ena gasi ebadi dagego ena bugagia tonaluai. Ena kalabuside bidibadi, tama dagego ena suagasai dao,’ te tuni bidi agai te po waibao. ³⁷ Te po obaso, tama te doloba pai we bidi dabego po agabolo wei ponoyu, te po waibao, ‘Genuai Bidi, nisu sogo dago suali, nage nasi elalubadi, tama dago nage nai mawai dawe? Tama nisu sogo nage aq nogone ebadi, dago nage aq maniwe? ³⁸ Nisu sogo dago suali, nage gasa bulu bidi asama, tama dago beba odasa paliwe? Tama nisu sogo nage ugwa meni baso, tama dago ugwa nage mawai dawe? ³⁹ Tama mena sogo dago suali, nage gasi elalubaso, ma nage kalabuside bidibadi, tama dago nage suagasu tau saliwe?’ te doloba pai we bidi augwaligo te po hanalu waibao. ⁴⁰ Tama tuni bidigo po wei ponoyu, augwalibolo te po waibao, ‘Eno mu po dagebolo obao, te tigidali se dagego te eno amanu e tiwai te nogi meni yai bidi dali yali wiegi yai se, te se dabe te dagego ena dali te yali dao.’ Tuni bidigo te po waibao.”

⁴¹ “Tama tuni bidi agai te pobase nogo badu bidibo we bidi augwalibolo e tobage po waibao, ‘Dage haga yabo bidi dabe dao. Dage enade geda selama, tama dage te munu me sula sisabo siaba pao, te sia te Ayago sisi ilali elalubo, te dwai se yali tobolu bidi Satan aga wali bilibo mobo ensel bidi dabe augwali dali mumainogo yai. ⁴² Magi baso meni, polobadu ena nasi idubadi, dagego ena nai mabeo. Ena aq nogone idubadi, tama dagego ena aq mabeo. ⁴³ Ena gasa bulu bidi digi, tama dagego beba ena odasa pabeo. Ena ugwa meni badi, dagego ugwa ena me mabeo. Ena gasi elalubadi, ma ena kalabuside bidibadi, tama dago nage me tau sabewe?’ augwaligo te po waibao.”

⁴⁴ “Tama augwaligo me agai po wei ponoyu, te po waibao, ‘Genuai Bidi, nisu sogo nage nasi ebadi dago suali, ma nage aq nogone ebadi, ma nage gasa bulu bidi, ma nage ugwa meni yai me, ma nage gasi elalubadi, ma nage kalabuside bidibadi, tama dago nage me tau sabewe?’ augwaligo te po waibao.”

⁴⁵ “Tama agai augwaligo po wei ponoyu, te po waibao, ‘Eno mu po dagebolo obao, te dagego eno meg i wali tobage se te e tiwai nogi meni yai bidi aga dagego tau me sabeo, te tobage se dagego enabolo me te ebeo,’ te tuni bidigo te po waibao. ⁴⁶ Tama te bidi hani augwali te dwai dene genuai sigi paibao, te sesemane sogo dene iduabo bulude bidaibao. Tiali goli te doloba pai we bidi dabe augwali da, te sesemane sogo bidadapeyu, bidadapabula selama bidaibao,” Jisasgo te po wai.

Te tobolu bidi dabe augwaligo Jisas elabo po minama dą̄ wai
(Mak 14:1-2; Luk 22:1-2; Jon 11:45-53)

26 ¹Te Jisasgo te po wali tigidali silama, tama te sogo agai aga wali pabo bidi dabebolo te po wali, ²“Dagego koneani, si sogo naga bidilama, tama te bo disawai nai tubo si nogi Pasova te pedelaibao. Tama augwaligo te Godigo Bidi Mu te boi bidi dabego nogoba munama, tama augwaligo aga te ni pedaide walaibao,” wali.^o

³Tama te sogo tama te genuai pris bidi dabe me, te Juda tobolu bidi dabe badi, augwali te pris tobolu bidigo wiegi yai genuai beba sisinani, te aga nogi Kaifas dao. ⁴Tama augwaligo Jisas geme dą̄ olama, tama aga ela muabo po miai dao. ⁵Tiali goli augwaligo e tiwai po wai, “Dago te sę te toma tuyu olo bidibo wiegi yai side me egobeo. Tiyu te we bidi augwaligo wąbi hwı̄bo sę hodolabuo,” te po wai.

Wego te denami ebo nai wel te Jisas toboluba gelali
(Mak 14:3-9; Jon 12:1-8)

⁶Te moni hanu Jerusalem pade te dwasianu hanu nogi Betani elalubao, tama tede te bidi me deli nogi Saimon bidai. Polobadu te oiyabe gasi yai bidi bidama, tama te gasi silai dao. Tama Jisas aga te bidi Saimongo bede bididubadi, ⁷tama we me deli aga pageba asali, tama gasagi yai denami ebo wel wiegi yai mu te wego te botol masigi elalubo sela asai. Te wel abelabo mone te genuai mu da. Tama agai te denami ebo wel te Jisas toboluba gelali, te aga nai tubo saide dulalubo sogo tiai dao. ⁸Tama aga wali pabo bidi dabe augwaligo te tebo sulama, tama augwaligo homu dwai yai. Augwaligo te po wai, “Magi eyu te wiegi yai denami ebo wel olo dali hagawaliwe? ⁹Tama te wiegi yai denami ebo nai wel te bidigo abelemainogo magi sogo da, tama dago genuai mone te naide selama, te magi nai meni yai bidi dabe augwalibolo magi dao.” Augwaligo te po wai.

¹⁰Te Jisasgo augwaligo te po wabo koneama, tama agai augwalibolo te po wai, “Magi baso dagego sege te e webolo mobawe? Agai wiegi yai kolesaga mu enabolo yilio. ¹¹Tama te magi nai meni yai bidi dabe dage dali sesemane sogo bidaibao. Tiali goli ena da, te ena dage dali sesemane sogo me bidigobeo. ¹²Te e wego te wiegi yai denami ebo wel ena tigiba gelali, te agai ena te gę́ pagede muabo sę te meg i e sisi ilali dao. ¹³Eno mu po dagebolo obao, te tigidali tq̄ habu badu te augwaligo Godigo dwagi yai gesi po pusigi pobaso da, tama tede augwaligo te meg i e wego enade yali sę po me augwaligo pusaibao. Tama agai yali sę kegeda pidali weyu, augwaligo teba homu munama koneaibao,” Jisasgo te po wai.

^o 26:2 Sai 12:1-27

Judasgo Jisas te tobolu bidi dabego nogoba maiabo po dąu wai
(Mak 14:10-11; Luk 22:3-6)

¹⁴Te Jisas wali bilibo bage te nogo si olama sąągo si bidi te me deli, aga nogi Judas aga bulu nogi Keriot dao. Tama te wego te wel Jisasgo toboluba gelali sogo te bidi aga te pris tobolu bidi dabe pageba pelama, tama augwalibolo te po wai, ¹⁵“Dagego magi nai enabolo mobaso, tama eno dage nogoba te Jisas mawaibawe?” wali. Tialima augwaligo te mone ge 30 agabolo mawai. Te masigi dabe te wiegi yai kapa nogi silva tego nigai masigi dao. ¹⁶Tama te sogo agai Jisas te boi bidi dabe augwali nogoba mawainogo te deli sogo me sogo gegebo sę gagalama yai.

Jisas aga wali bilibo bidi dabe dali Pasova nai tuali po
(Mak 14:12-21; Luk 22:7-14, 21-23; Jon 13:21-30)

¹⁷Te polali side te bo disławai nai bret tubo sogo olo bidibo side, Jisas aga wali pabo bage augwali aga pageba aselama, tama augwaligo te po wai, “Nago homugo dago nago Pasova tuabo nai menade sisi ilagawe?”

¹⁸Tama agai te po wai, “Dage te moni hanu tomoba pelama, tama dage te bidi me deli bidibo digi pelama, agabolo te po wao, ‘Te po ola mabo bidi agai te po walio, ‘Eno bodolu mani sogo te pąba yagasalio. Nago bede te eno nai Pasova te ena wali pabo bidi dabe dali tuaiba,’ te po walio.’ Te be page bidibolo te po wao,” Jisasgo te po wai.

¹⁹Tialima, aga wali pabo bidi dabego te Jisasgo augwalibolo wali po selama, te tiwai yali, tama augwaligo te Pasova tubo nai sisi ilali.

²⁰Tama be pio ebode aga te aga wali pabo bidi te 12 bidi dabe dali te nai tubo tebol sai pąde dualama bidai. ²¹Augwali nai tuyu bidibadi, tama agai te po wai, “Eno mu po dagebolo obao, dage tomode me deligo ena te boi bidi dabego nogoba mawaibao,” wali.

²²Tama augwali te pode homu sęę mu ebaso, tama deli deli bidibo bage augwaligo agabolo hanaluyu, te po wai, “Genuai Bidi, ma ena dawe?”

²³Tiali goli agai po wei ponoyu, te po wai, “Te ena dali tubo nai sainu e pouba aiya nogo mubo bidi, agai ena te boi bidi dabego nogoba mawaibao. ²⁴Te Godigo Bidi Mu aga pabo tų po augwaligo te bukude polobadu asęani, tama te tądu aga peyu, tama isaibao. Tiali goli te Godigo Bidi Mu te boi bidi nogoba muabo bidi da, hobede mu ebaso. Te aga idago te bidi aga me ame negi sogo da, te usugi da,” Jisasgo te po wai.

²⁵Judas aga te boi bidi nogoba mani bidi, agai po wei ponoyu, te po wai, “Po ola mabo bidi, ma ena dawe?” Jisasgo agabolo te po wai, “Awe, nago te tiwai po obao.” Jisasgo te po wai.

Jisasgo bret me wain aji aga wali bilibo bidi dabebolo mani
(Mak 14:22-26; Luk 22:15-20; 1 Ko 11:23-25)

²⁶ Augwali nai tudubadi, tama Jisasgo te bret selama, tama Godibolo nage usu da po olama, tama nogogo pebedelama, tama aga wali bilibo bidi dabebolo mani. Tama agai te po wai, “Dagego selama tuao. Te eno tigi dao.”

²⁷ Tama agai te wain aji munalubo kap me deli selama, tama Godibolo nage usu da po olama, tama augwalibolo mani, tama te po wai, “Dage tigidaligo te aji naga tuao. ²⁸ Magi baso meni, te eno kaneme dao. Augwaligo ena ela muyu, tama eno kaneme gelebogo te Godigo te we bidi ma dobola sabo gesi po te bomo menama mu daju walaibao. Eno te kaneme gelebogo te hauwa we bidigo dwai se ebo te tagaliyu dagala sawaibao.^p ²⁹ Eno dagebolo obao, eno te wain aji munu me ma tugobeo, te sogo eno te gesi wain aji dage dali te eno Ayago we bidi tonalubo madi tomode bidibo sogoba usu nagasaibao,” Jisasgo te po wai.

³⁰ Jisasgo te po silibo si, tama augwaligo Godigo nogi uwababa sabo təabi po ola silama, tama augwali te bedu buluba solama, tama augwali te Oliv bulu duba pai.

Jisasgo te Pitago aga tudiba muaibao po wali
(Mak 14:27-31; Luk 22:31-34; Jon 13:36-38)

³¹ Te augwali te Oliv bulu duba sabolama, tama Jisasgo augwalibolo te po wai, “Megi e sogo hulide dage da, te dage tigidali te enaba duga homu tigidali mubo se tagalama tuloluiba. Magi baso meni. Te Godigo polobadu wali po augwaligo te bukude aseani, te po tama wai, ‘Eno te sipsip tonalubo bidi elibaso, tama te sipsip hani dabe augwali tedali tedela wi paibao.’ Te aseani po elalubao.^q ³² Tiali goli ena isama tama ma hodaluama, tama ena dage asabo madi polasa te Galili tqba paibao,” Jisasgo te po wai.

³³ Pitago po wei ponoyu, bomonama agabolo te po wai, “E bage augwali tigidaligo te nageba augwa homu mubo kolesaga tagalama tolalueibao nago te tama po wabo digi, te ena da, ena tama me tegobeo,” Pitago te po wai dao.

³⁴ Jisasgo agabolo te po wali, “Eno mu po nagebolo obe dao, e sogo meg i hulide, te ba kakaruk po wasiabadi tama sela sogo nago po weyu, nago ena konebeo te po waibao.”

³⁵ Pitago agabolo te po wai, “Bidi dabe augwaligo ena me nage dali ela muyu da, teda te usu dao. Tiali goli, eno nage konebeo po munu me wagobeo. Mu menio,” Pitago te po wai. Tama tigidali aga wali pabo bidi dabego te tiwai po naga wai.

^p 26:28 Sai 24:8; Jer 31:31-34 ^q 26:31 Sek 13:7

Jisasgo gedu haluasa po te Getsemani gide wali
(Mak 14:32-42; Luk 22:39-46)

³⁶ Tialima, Jisas augwali dali gasa badu te augwaligo nogi yali te Getsemani teba pai. Tama aga wali pabo bidi dabebolo te po wai, “Dage ede dualama bidaluao, tama ena u badu pelama, gedu haluasa po wagi pobao,” te po wai. ³⁷Tama agai Pita dali te Sebedigo ogwa si selama, augwali hodobo pai. Tama megi da, aga homu sègè elama, tama aga homu dene dwai mu yario. ³⁸Agai augwalibolo te po wali, “Eno homu sègè mu ebaso, pàde ena isainogo ebao. Dage ede bidiyu, tama ena dali tonaluyu, godege pigimio.” ³⁹Tama aga dwasianu gana obaba pelama, tama aga pabo gesabidiba degasa dulama, tama gedu haluasa po weyu, bomonama te po wai, “Eno Aya, te usu da wida, teda nago enade te elalubo kap dagala sayao. Tiali goli nago eno homu kolesaga wali me pelamuo. Menio. Nago naga homu kolesaga naga wali pao,” wali.

⁴⁰ Tama aga wali pabo bidi dabe bidiboba aga pelama, tama suali, augwali godege pila muai. Tama agai augwali hodolama, tama Pitabolo agai te po wai, “Magi yaliwe, dagego ena dali te dwasianu sogo tonalugobewe? ⁴¹Dagego tonaluyu, gedu haluasa po wao. Tiyu dage usu sabo dwai kolesagago te dage aiyaba elalugobeo. Mu tama, dagego homugo te wiegi yai sè naga yaibao. Tiali goli, te dagego bomo usu egobeo,” wali.

⁴² Aga si sogo ma pelama, gedu haluasa po te aga dene sabode te tiwai po wai, “Eno Ayao, tama te kapgo ena ela soabo usu me egobe da homu elama, tama eno te kap selama, te aji tumai da wida, teda nago naga homu kolesaga wali naga pao.,” te po wai. ⁴³ Tama aga ma aselama suali, augwali pila mubo suai. Augwali gedu sègè yario. ⁴⁴ Tama agai augwali ma tagalama, tama aga pelama, gedu haluasa po sela sogo wagi pai. Te gedu haluasa po aga hasia wali tiwai, te naga agai ma walio. ⁴⁵ Nosali aga wali pabo bidi dabe pageba aselama, augwalibolo te po wai, “Dage me pila mudu toma tudubawé? E dao odião, te sogo megi pedalalio, te augwaligo Godigo Bidi Mu te dwai sègè sai bidi dabego nogoba mawainogo ebao. ⁴⁶ Dage hodaluao, tama da augwali tiàba pinao. Suao, ena augwaligo nogoba maiabo bidi aga te pàba megi yagasobao,” Jisasgo te po wai.

Judasgo Jisas te boi bidi dabego nogoba mawai
(Mak 14:43-50; Luk 22:47-53; Jon 18:3-12)

⁴⁷ Te Jisasgo po udubadi yaide, tama Judas, te aga wali pabo bidi te 12 wali bidi me deli, aga asali. Tama genuai bidi hani aga dali asali, tama augwaligo te bobobage hwà ge me wàbi me nogode tulama asai. Te genuai pris toboli bidi dabe dali, te Juda dabe toboli bidi hani dabego

augwali tagala palobaso asalio. ⁴⁸Tama aga te augwali nogoba maiabo bidigo, agai e tiwai po me deli augwalibolo usu selama mani, “Te eno bidi me deli aga dali ena kisa sigi paibao. Te bidi aga Jisas dao. Dagego aga naga dą̄ olama, pageabi yao.” Te po wai. ⁴⁹Tama aga polo Jisas pageba dolo aselama, tama te po wali, “Hulide dao, po ola mabo bidio.” Tama agai aga dali gesabi sebedi usu sagasai.

⁵⁰Jisasgo agabolo te po wai, “Abagio, te nago aselama yainogo yali sę̄, te sę̄ nago polo tama yao,” wali. Megi da augwali aselama, nogo Jisasba munama, tama aga pageabi elama dą̄ wai. ⁵¹Tialima, Jisas dali bidali bidi me deligo agai aga bobobage hwą̄ ge kega sai. Tama agai te hwą̄go te pris toboli bidigo sę̄ bidigo olo togwa sə̄nama, tqba tulaluai. ⁵²Tiali goli Jisasgo agabolo te po wai, “Te nago hwą̄ ge aga muani madi ma bulao. Tigidali bidi te bobobage hwą̄ gego hwı̄bo kolesaga ebo bidi dabe, augwali te gasa bidi dabego moni hwą̄ gego ela muaibao. ⁵³Nago eno bomo konebeo. Eno ena Ayabolo hanaluyu da, teda agai te ensel mobo bidi hani umabo mu tagala palama, tama augwali dulama, ena tau sagasaibao. ⁵⁴Tiali goli, eno te tiwai eboso da, teda te megi enade pedelabo sę̄ pedalogobeo. Polobadu Godigo po aşəani bukude te enade megi pedelabo sę̄ po aşəai dao. Pedalomainao,” wali.

⁵⁵Tama te sogo naga Jisasgo te aga sagasai bidi hanibolo te po wai, “Dagego ena sagasiyu, tama dagego te bobobage hwą̄ ge me wą̄bi dabe tolasa asali, te dage te nai wi sabo bidi sainogo asobo tiwai yali. Magi baso te tiwai yaliwe? Tigidali sogo ena te Moni Lotu Be tempel tomode bidiyu, tama eno po te we bidi augwalibolo ola madu geai goli, te dagego te sogo tama dagego ena me nogo dą̄ me wabeo. ⁵⁶Tiali goli te sę̄ tigidali enade megi pedalobo te polobadu Godigo po pusali bidi profet dabego bukude aşəani po usu nainogo ebao,” Jisasgo te po wai. Tama aga wali pali bidi dabe augwaligo Jisas taga peyu, tama augwali wi pela silai.

Augwaligo Jisas po tų̄ ela mani

(Mak 14:53-65; Luk 22:54-55, 63-71; Jon 18:13-14, 19-24)

⁵⁷Te bomai po page koneai bidi dabe dali, te Juda dabe toboli bidi dabe dali, augwali te bidi Kaiafasgo beba sisinama bidaluai. Te Kaiafas aga te pris bage tuni bidi mu dao. Tama te Jisas nogo tulama dą̄ wali bidi dabe augwaligo aga te Kaiafasgo beba odasa palio. ⁵⁸Tama Pita Jisas aga wali pai, tiali goli aga digibulu gana dwasianu bidai. Aga te tuni bidi Kaiafasgo obo tomoba pelama, tama te enesigi bidi dabe dali te be mesalode dulaluai. Agai te magi sę̄ Jisasde pedalobo te agai sula sainogo yali. ⁵⁹Te pris toboli bidi dabe dali, te tigidali kaunsil dabe dali, augwaligo te Jisasde tibo po omainogo yabo bidi dabe gegebo sę̄ yali, tama augwaligo aga ela muabo po dą̄ wabo tų̄ gegemainogo yalio. ⁶⁰Tama bidi hauwa pedelama, tama tibo po dabe agaba walio. Tiali goli

augwaligo aga elabo te dwai sə yali te po gegali te usu me ebeo. Tiali goli nosali bidi me si aselama sabolali.⁶¹ Tama te bidi sigo te po wali, “Te bidigo te po wai dao, ‘Eno te Godigo Moni Lotu Be tempel aluama degebode, tama sela sogo eno ma sə ebo usu yaibao,’ agai te po wai dao,” augwali sigo te po wai.⁶² Tama te pris tuni bidi doligulama Jisasbolo te po wai, “Nago te po me deli wei ponosiqma ebawe? Magi yaide augwaligo te po dabe nagebolo togolobaw?” wali.⁶³ Tiali goli Jisasgo po me wabeo. Tama te pris tuni bidigo agabolo te po wai, “Te nago dabolo mu po naga omainogo eno nagebolo te bidibo ula elalubo Godigo nogide te po hanalu obao, nage te Godigo sa muani bidi Krais, te Godigo Ogwa dawe, ma meniwe?”

⁶⁴ Jisasgo agabolo te po wali, “Awe, nago po wali ena te tiwai dao. Tiali goli eno dagebolo obao, nosali dagego te Godigo Bidi Mu te Tigidali Bomo Elalubo Godigo dolo nogo badude dualalubo sueibao. Tama aga te ugwdatu daide elalubo pəde bidama asobo, te me dagego sueibao,” wali.^r

⁶⁵ Jisasgo te tiwai po wali, tama te pris tuni bidigo te po odama, tama dwai homu mu eyu, tama aga gudali bobage ugwa pisilama, te po wali, “Agai Godibolo posobo po walio. Tama te bidi meba bolo agai e bidide po pusumainogo i wabo tagalao. Agai Godibolo posobo po walio. Megi tama te po wali dagego odali dao.⁶⁶ Dagego magi homu ebowe?” Tama augwaligo po wei ponoyu te po wali, “Agai dwai sə yalio, tama aga isimainao,” wali.

⁶⁷ Tama megi da augwaligo pesa Jisas gesabiba səwani, tama augwaligo nogo sugunama aga elali, tama mebagu nogo kalago aga elama,^s ⁶⁸ tama augwaligo te po wai, “Nage Krais, te Godigo sa muani bidi, nage te Godigo po pusubo bidi profet da wida, meg i wao. Dego nage elaliwe, te nogi nogi ya,” augwaligo te Jisas dali wai.

Pitago te po wali, “Eno Jisas me konebeo”

(Mak 14:66-72; Luk 22:56-62; Jon 18:15-18, 25-27)

⁶⁹ Te augwaligo te sə Jisas dali ebadi, tama Pita te be mesalode dulaluai. Tama tede sə ebo we me deli aga pəba aselama, tama te po wai, “Nage me te Galili tq bulu bidi Jisas dali bidai dao,” wali.

⁷⁰ Tiali goli Pitago po weyu, menio po te tigidali bidigo gedude bomonama, te po wai, “Eno nago te wabo po page konebeo.” ⁷¹ Tama aga solama, te be bagulali obo mabo pəde bidai. Tama gasa sə we mego aga sulama, tama te pəde bidalubo we bidi augwalibolo te po wai, “Te e bidi da, te Nasaret bulu bidi Jisas dali bidali bidi dao.” Te po wai.

⁷² Tama Pitago po geme ma dualiyu, bomonama te po wai, “Mu tamao, eno te bidi me konebeo.” ⁷³ Nosali gana dwasianu, tama te dolaluali bidi

^r 26:64 Dan 7:13 ^s 26:67 Ais 50:6

meba augwali aselama, Pitabolo te po wali, "Mu tama, nage augwali hani bidi dao. Naga pogo nage haninani dao, nago po te Galili bidigo po wabo tiwai wabo dao," wali.

⁷⁴Tialima megı da Pitago po bomo mu elama weyu, agai tibo po obaso da, teda Godigo aga ela mumainogo eyu te po wai, "Mu tamao, eno te bidi munu me konebeo. Mu menio." Agai te po ola silai madi, tama polo te ba kakaruk po walio. ⁷⁵Tama megı da Pitago Jisasgo aga dali wali po homugo ma koneanio, "Te ba kakaruk po wasiabantu, tama nago po sela sogo olama, te nago ena konebeo waibao." Tama Pita aga te bedu buluba solama, gela geninama mu wai dao.

Augwaligo Jisas te Pailat bidibo madi odasa pai

(Mak 15:1; Luk 23:1-2; Jon 18:28-32)

27 ¹Te be posa pabode, tama te tigidali Godibolo nai ula mabo pris genuai bidi dabe badi, te Juda hani toboli bidi dabe dali, augwaligo po minama, Jisas elabo po olama, tama deli homu elama te po dą̄ wai. ²Augwaligo aga te aligabo bonogo kę̄nama, tama augwaligo aga selama, te polalubo genuai gavman bidi Pontius Pailat bidibolo magi pai.

Judas isalio

(Tpi 1:18-19)

³Megı da Judas, te Jisas boi bidi dabego nogoba mani bidi, agai Jisas augwaligo po tı̄ ebode aiyaba elaluama tama aga ela muabo homu ebo suai. Tama aga ge neyu, tama homu hasegeleyu yai, tama te sali mone ge bidi sese olama nogo si silva mone te pris genuai bidi dabe dali te Juda dabe toboli bidi dabe augwalibolo te mone sela pelama, ma magi palio. ⁴Tama agai augwalibolo te po wai, "Eno dwai sę̄ elama, seğę̄ salio. Eno te magi dwai sę̄ me isawai bidi te boi bidi dabego nogoba manigo, tama aga isaibao," wali. Tiali goli augwaligo te po wai, "Te dago sę̄ menio. Te naga sę̄ tali dao." ⁵Tama Judasgo te silva mone ge dabe te Moni Lotu Be tempel tomode sə̄nama, tama aga pelama, aga digi te ba bonoba waligi pelama isai.

⁶Te genuai pris bidi dabe augwaligo te Judasgo sə̄wanı mone ge selama, tama augwaligo augwa hasi te po wai, "Te e monede da, te bidi elai mone dao. Tama tibaso, dago te mone ge te Moni Lotu Be tempel mone dali muyu da, teda dago te bomai po bolaibao. Te dali me mugobeo," wali. ⁷Tama tibaso, augwaligo po me dedeli minama dą̄ wali, tama nosali augwaligo te monego te bidi dabego te sene nigabo mama tı̄ sabo madi te tı̄ abelali. Augwaligo te homu yali, te digibulu bulu bidi dabe ede isiyu da, teda te tı̄ augwali muabo gę̄ page nigelama elalumainogo homu yali. ⁸Tama augwaligo te tı̄ te bidi elai monego abelebaso, te we bidi augwaligo te tı̄ nogi poali, te Kaneme Tı̄ nogi wai. Tama megı tama me,

te nogi me elalubo dao. ⁹Tama augwaligo te tq tama abeleyu, tama po me deli polobadu Godigo aga po pusali bidi profet Jeremaiago pedauwalide wali po te megii mu usu nanio. Agai te po polobadu wai,

“Te Israel dabe meba augwaligo te bidi me deli
abelabo mone ge noma dodolama tama te silva
mone ge bidi sese olama nogo si te tama po dą
wali. ¹⁰Tama augwaligo te mone ge selama,
tama augwaligo te sene nigabo mama tq sabo tq
abelali, te Genuai Bidigo enabolo wali po tiwai dao.”^t

“Nage te Juda dabego tuni bidi dawe?”

(Mak 15:2-5; Luk 23:3-5; Jon 18:33-38)

¹¹Te bidi Jisas te gavman polalubo bidi gedude te be tomode dodolai. Tama genuai polalubo gavman bidigo agabolo hanalu wali, “Nage Juda dabego tuni bidi dawe?” Tama Jisasgo te po wali, “Naga digi naga te po obao.” ¹²Tama te genuai pris bidi dabe badi, te Juda bage toboli bidi dabe dali, augwaligo aga po tq ilibo se yali. Tiali goli agai po me deli wei me ponebeo. ¹³Tama te gavman genuai bidi Pailatgo agabolo te po wali, “Ma, nago te tigidali po augwaligo nage po tq ilibo po te nago odobewe?” ¹⁴Tiali goli Jisasgo po me deli te gavman bidi Pailatbolo wei me ponebeo. Tama tibaso, te polalubo gavman bidi aga homu hauwa eyu noma sali.

Pontius Pailatgo Jisas ni pedaide elabo po wai

(Mak 15:6-15; Luk 23:13-25; Jon 18:39-19:16)

¹⁵Te tigidali kibu bede te Pasova side bodolu munama olo bidali sogo, te polalubo gavman bidigo te kalabus bidi me deli olo tagala palobo dao. Te we bidi augwa digi te bidi me deli tagala palomainogo aga nogi obaso, teda te tuni bidi Pailatgo augwaligo homu wali peyu, te bidi me deli te augwaliba tagala palobo dao. ¹⁶Tama te sogo agai dwai se yai dwai bidi mu me deli te kalabuside bidai, te aga nogi Jisas Barabas dao. ¹⁷⁻¹⁸Tama megii da Pailat aga te be tagalama, buluba pelama, tama we bidi augwali sisinagasali. Agai koneani, te toboli bidi dabe augwaligo Jisas dali naga dwai homu elama, tama augwaligo Jisas aga gesabidide po tq ilainogo eyu, odasa asai dao. Tama tibaso, Pailat agai te we bidibolo te po wai, “Dagego homugo eno de dageba tagala palagawe? Ma, eno te Jisas Barabas, ma eno te Jisas, augwaligo te Krais nogi ebo bidi te dageba tagala palagawe?” ¹⁹Tama me, te bidi Pailat aga te po tq odobo bidi jas dugabo siade aga dualalubadi, tama aga wego po agabolo toliyu te po wai, “Nago magi se me deli te doloba pai bidi dali me elamuo. Te eno hulide nade aga sulama, tama eno genuai homu elalubao.” Te po wai.

^t 27:10 Jer 19:1-13; Sek 11:12-13

²⁰ Te genuai pris bidi dabe badi, te Juda dabe tobolu bidi hani dali, augwaligo te we bidi homu hodolama, augwaligo te Pailatbolo i weyu, te bidi Barabas tagalama, te Jisas ela muao, te po omainogo yai. ²¹ Tama te genuai gavman bidigo po augwalibolo ma naga wali, “Dagego homugo eno te e bidi sigo te mena bidi dageba tagala palomainogo homu ebawe?” Augwaligo te po wai, “Barabas.” ²² Pailat agai augwalibolo te po wai, “Eno tama tiyu da, teda e bidi da Jisas, augwaligo Krais nogi ebo bidi, agabolo eno magi se yagawe?” Tama augwali tigidaligo te po wai, “Aga ni pedaide elao.” ²³ Tama Pailatgo te po wali, “Magi basowe? Agai magi dwai se yaliwe?” Tiali goli augwaligo bomonama ma i wali, “Ni pedaide aga elao,” wali.

²⁴ Tama megı da Pailatgo koneani, agai po usu ebeo. Menio. Tama wabi genuai hwıainogo yai. Tama agai augwali ola momainogo agai we te poude meba selama, tama aga nogo te we bidigo gedude we telawai. Tama nogo we teladubadi agai te po wai, “Te e bidi elibo da, te eno sege menio. Te duga se naga dao.” ²⁵ Tama tigidali we bidi augwaligo po wei ponoyu, te po wai, “Te aga elebo sege te daba me te dena wai dabeba asomainao,” wali. ²⁶ Tama te sogo Pailatgo te bidi Barabas augwaliba olo tagala palali. Tama agai po olama, tama gasa bidigo Jisas te dwai bigo elidu gelama, tama te ami bidi dabe nogoba mani, te augwaligo aga te ni pedaide elmainogo yalio.

Ami bidi dabe augwaligo Jisasbolo posobo po wai

(Mak 15:16-20; Jon 19:2-3)

²⁷ Tama megı da, te ami bidi dabego Jisas te gavman tuni bidigo be tomoba odasa pali, tama augwali tigidali aga pageba sisinagasaki. ²⁸ Tama augwaligo agai gudali ugwa pedela munama, tama augwaligo bobobage mama ugwa me deli aga tigiba muanio, te genuai polalubo bidigo ugwa tiwai dao. ²⁹ Tama augwaligo sesani yai bonogo madi me deli nigilama, tama augwaligo Jisas toboluba muai. Tama elama, tama augwaligo te awi dili me deli agai dolo nogode muai. Tama augwaligo agaba kidu sugunama, tama augwaligo posobo po agabolo e tiwai wai, “Siade dao, Juda dabego tuni bidi dao.” ³⁰ Tama olama, tama augwaligo agabolo pesa sayani, tama augwaligo te awi dili ma dobola selama, aga toboluba elidu geai. ³¹ Augwaligo te dwai posobo po dabe agabolo ola silibo si, megı da agai te gudali mama ugwa te augwaligo peda sali, tama augwaligo aga ugwa ma tigiba muai. Tama augwaligo aga te ni pedaide elainogo sela palio.

Augwaligo Jisas ni pedaide daganama enani

(Mak 15:21-32; Luk 23:26-43; Jon 19:17-27)

³² Augwali te moni hanu buluba pobadi, tama augwaligo te Sairini bulu bidi me deli suali, aga nogi Saimon. Tama augwaligo bomonama agai te

Jisasgo tolali ni pedai tolao wali, tama agai tolali. ³³ Augwali pelama, dwasianu bulu du me deliba sabolali, aga nogi Golgota. Te bulu nogi page e tiwai dao, toboli dili tiwai bulu du da wai. ³⁴ Tama augwaligo te wain aq̄ meba te ha ebo dwai marasin dali gelama, Jisasgo tumainu manio. Tama agai tula suali, tiali goli agai tubeo.

³⁵ Augwaligo Jisas aga te ni pedaide elama daganai madi, tama agai gudali ugwa dabe augwa dobola sainogo augwa hasi satu gagali bolo yalio.^u ³⁶ Tama elama, tama augwali te bulude dualama, tama augwaligo aga tonaluyu bidalio. ³⁷ Te aga tobolude ugxadu augwaligo aga te po tū ilali po aşeai. Augwaligo e tiwai po aşeanio: ‘Te e bidi Jisas, te Juda dabego tuni bidi dao.’ ³⁸ Te Jisas pade augwaligo te nai wi sai bidi me si te ni pedaide walali, me deli te dolo nogo badu waliyu, me te pobase nogo badu waliyu yalio.

³⁹ Tama te we bidi augwali iba soyu, oba soyu eyu, augwaligo dwai posobo po agabolo walio. Tama augwaligo augwa toboli bebegeliyu,^v ⁴⁰ tama te po wai, “Nago te Moni Lotu Be tempel aluama, tama sela sogo naga ma sę yaiba po wali bidi, megı da, te naga digi naga tau sao. Tama nage te Godigo Ogwa da wida, teda nage te ni pedaide daganalubo tagalama, tama nage te tqba aiya dulao,” augwaligo te tiwai posobo po wai.

⁴¹ Te genuai pris bidi dabego me, te bomo yai po page ola mabo bidi dabe dali, te Juda dabe toboli bidi dabe badi, augwaligo me dwai posobo po weyu, bomonama te po augwa hasi wai, ⁴² “Agai gasa bidi dabe augwali naga tau sali, tiali goli aga digi aga tau sainogo ebo usu egobeo. Ma, aga da te da Israel bagego tuni bidi da wida, teda aga te nide daganani tagalama, aiyaba dulubaso, teda dago bomo yai homu agaba munama dąq̄ waibao. ⁴³ Agai homu Godiba tinama te po wali, ‘Ena Godigo Ogwa dao’ wai. Tialima, Godigo aga godolo eba wida, agai aga megı tau somainao.” Augwaligo te po wai. ⁴⁴ Te nai wi sai bidi me si augwaligo te Jisas walali ni pedaide pade ela daganai, te bidi sigo me te tiwai dwai posobo po naga agabolo walio.

Jisas isalio

(Mak 15:33-41; Luk 23:44-49; Jon 19:28-30)

⁴⁵ Tama te sia ge tomode mu, te tigidali tq̄ badu te be hulia sabo tiwai elama, te be hulia si mu elama, tama telalubadi te be pio yabo magaba usu nanio. ⁴⁶ Tama be pio ebo pade Jisasgo i bomonama weyu, te po wai, “Eli, eli, lama sabaktaniwe?” Te po page e tiwai dao: “Eno God, eno God, magi baso nago ena tagaluwe?”

⁴⁷ Tialima meba te pade dolaluali bidi, augwaligo te wabo po odama, tama augwaligo te po wai, “Te bidi agai te polobadu bidali bidi Elaija

^u 27:35 Tib 22:18 ^v 27:39 Tib 22:18

te i obao,” te po wai. ⁴⁸Tama polo te bidi dabe augwali me deli udada pelama, te tamu ąjide elalubo wawi yai nai me deli sigi pali, tama te nai te wain ąj dali taluama, tama te nai awi dili donode kęnama, tama te nai Jisasgo tumainogo manio. ⁴⁹Tiali goli gasa bidi dabe meba augwaligo te po wai, “Meo, dago bolo sueibao. Ma, te bidi Elaija aselama, aga tau sagasobowe, ma menigowe?” te po wai.

⁵⁰Te Jisasgo i bomonama ma olama, tama aga noma bidi mobo tagala paladio, te aga mu isalio.

⁵¹Tama te sogo naga te Moni Lotu Be tempel tomode walaluali genuai bobage dąj ilali nami ugwa te ugwdadu gagalasa aiyaba mu pedasa dulama, tama pedai si pedalali. Tama tq malí ebadi, tama genuai masigi dabe me pebeda palio.^w ⁵²Tama gų page palialuali tu dala pelama, tama Godigo we bidi hauwa, polobadu augwali isali, megı augwali tigi elalubadi tama ma hodaluilio. ⁵³Augwaligo te gų page tagalali, tama nosali Jisas ma hodaloai madı, augwali te Godibolo hogea salı moni hanu tomoba palio. Tama bidi hauwago te sogo augwali suai dao.

⁵⁴Tama te enesigi bidi dabego tobolu bidi aga ami bidi dabe aga dali te Jisas tonaluali bage, augwaligo te tq malí ebo me te sę dabe pedalobo sulama, tama augwali moni wi mu yalio. Augwaligo te po wai, “Mu tamao, te bidi aga te Godigo Ogwa mu dao,” te po wai.

⁵⁵Tama we hauwa bidali, augwali te Galili tqdu Jisas tau sainogo aga wali asai. Te we dabe augwali te dwasianu digibulu gana dolalu tononaluai. ⁵⁶Te we me deli augwali dali tomode bidali we te Maria aga bulu Makdaladu asai. Tama we me te aga Maria, te bidi si Jemsde Josep sigo ida. Tama we me deli te bidi Sebedigo we, te aga ogwa sigo ida dao.

Augwaligo Jisasgo tigi te masigi ola be dedageba muai
(Mak 15:42-47; Luk 23:50-56; Jon 19:38-42)

⁵⁷Te pio te Arimatea bulu bidi me deli te masigi hauwa elalubo bidi, aga nogi Josep, aga asai. Aga me te Jisas wali pali bidi dao. ⁵⁸Tama aga te gavman polalubo bidi Pailat pageba sabolama, te Jisasgo tigi sabo po hanalu wai. Tama te Pailatgo te ami bidi dabebolo olama, tama augwaligo te tigi Josepbolo sela mawai. ⁵⁹Tama Josepgo te Jisas tigi selama, tama aga te meda meni yai tedela yai gesi nami ug Wade bebe pelama mesegelai. ⁶⁰Tama agai te Jisas tigi te aga digi nigai gų pageba mugı palio. Agai te genuai masigi tomode te ola be me deli tamadi nigai. Tama agai te tigi te ola be tomoba munama, tama agai te genuai masigi me deli hogogo bele pelama, te tigi muani gų page ola be sunumi te masigi mego paniani. Agai tama tilama, tama aga palio. ⁶¹Maria te Makdala bulu we badi, te gasa we Maria dali, augwali si tede bidali.

^w 27:51 Sai 26:31-33

Augwali si te ḡu page dolo si p̄ade dualaluali, tama augwali sigo te ḡu pageba tononaluyu bidalio.

Te ami bidi dabe augwaligo te ḡu pagede tonaluai

⁶²Tama nosali sogode, te Sabatde nai sisi ebo sogo te silai madi, tama te genuai pris bidi dabe badi, te Farisi dabe dali, augwali te genuai gavman bidi Pailat pageba pelama, sisinigi palio. ⁶³Augwaligo te po wali, “Genuai bidi, dago po me deli te tibo po wali bidi aga bidali sogo wali po me deli megi ma koneani. Agai te po wai, ‘Nosali te sela sogo wabode te ena ma hodaluibao’ wai dao. ⁶⁴Tama tibaso, nago po olama, tama augwaligo te ḡu page sela sogo bugagia tonalumainao. Tiyu yaide aga wali pali bidi dabego aga tigi geme wi sagaselama, gasaba mugi pidali weyu te bugagia tonaluao po wao. U bagego aga tigi selama, tama augwaligo tibo po te we bidi augwalibolo weyu, ‘Aga te ḡu pagede ma hodalualio’ waibao. Tama tiyu da, te nosali wabo tibo pogo te polobadu wali tibo po aiyaba elaluaibao,” augwaligo te po wai. ⁶⁵Tama Pailat agai augwalibolo te po wai, “Dagego te tonalubo bidi dabe meba elalubao. Tama dage pelama, te ḡu page bomonama tonaluao, te duga ebo tiwai gilama yao.” ⁶⁶Tama te po obaso, augwali pelama, te ḡu page panialugi pai. Augwaligo te ḡu page sunumi paniani masigi daide te habu selebo dąi me deli ilama, tama augwaligo ami bidi dabe mebago te ḡu page tonalumainogo muanio.

Jisas ma hodaloai

(Mak 16:1-10; Luk 24:1-12; Jon 20:1-10)

28 ¹Te Sabat side silai madi, te Sarere hasia polali sogo te giliga pade pedelainogo ebadi, tama te Makdala bulu we nogi Maria badi, te gasa we Maria dali, augwali si te ḡu page suagasainogo asai. ²Tama polo mu genuai tq malí pedalai. Magi baso meni. Te Genuai Bidigo mobo bidi ensel te dagalu tagalama, tama e tqba aiya dulali, tama agai te ola be ḡu page sunumi paniani masigi hogogo bele pelama, tama aga te masigi daide ugwidu dulalualio. ³Aga gesabi ula te be sele ula tiwai yali, tama aga gudali ugwa te tedela yai te dagalu pq ula tiwai yalio. ⁴Tama te ḡu page tonaluali ami bidi dabe augwaligo te tebo sulama, tama augwali agade wi elama, tama augwali tigi didibili eyu, tama augwali te isai bidi tiwai gagawalio, te tqba tulalio.

⁵Tiali goli te mobo bidi enselgo te we sibolo te po wai, “Dage si wi tagalao. Eno koneani, dage sigo Jisas gegagasu asali, te bidi augwaligo te ni pedaide walali bidi dao. ⁶Aga ede me bidibeo. Aga ma hodalualui, te tiwai po polobadu agai wali. Dage sigo aga munualuali madi suagasao. ⁷Tama sulama, tama dage si polo pelama, aga wali pali bidi dabebole te po wao, aga ḡu pagede ma hodalualio. Odiqo. Aga dage asabo

madi polasa te Galili tō teba paibao, tama dagego aga tede sueibao, augwalibolo te po wao. Te eno po tama dao,” te ensel bidigo te po wai.

⁸Tama te we si wi homu dali elaluyu, tama wiegi yai homu pemene dali te geninama mu eyu, tama polo augwali sigo te gū page ola be tagalama, tama te ensel bidigo wali po te aga wali pali bidi dabebolo wagi painogo udulama polo palio. ⁹Tama polo Jisasgo augwali si te tūde pobadi tiāba asai, tama te po wai, “Kigamu mu dao.” Tama te we si pāba pelama, tama aga sāgā page tola selama, te we sigo agabolo lotu po walio. ¹⁰Jisasgo po weyu te we sibolo te po wai, “Dage si wi elamu. Dage sigo eno ama dede augwalibolo wagi pelama, tama augwali te Galili buluba pao wao. Tama augwaligo ena tede sumainogo yaibao,” Jisasgo te we sibolo te po wai.

Ami bidi dabego wali po

¹¹Te we si te tūdu pidubadi yaide, tama te gū page tonaluali ami bidi meba augwali te Jerusalem hanu tomoba pelama, tama augwaligo te po te genuai pris bidi dabe augwalibolo te tigidali sē pedalali po walio.

¹²Tama te genuai bidi dabe augwali te Juda dabe tobolu bidi dabe dali sisinama, tama augwaligo po me deli mianio, tama augwaligo yabo sē po dāq wali. Augwaligo genuai mone te ami bidi dabebolo menama, tama augwaligo te po wai, ¹³“Dagego e tiwai po wao, ‘Da hulide godege piai digi, tama aga wali pali bidi dabe augwali gême aselama, tama augwaligo aga tigi wi sela pai yilio,’ dagego we bidibolo te po wao.

¹⁴Tama polalubo genuai gavman tuni bidigo te pedalali sē po odobo si, teda dago po meba agabolo weyu, tama dagego magi dwai sē yali homu me elalugobeo.” Te Juda dabe tobolu bidi dabego te po wai. ¹⁵Tama te ami bidi dabe augwaligo te moni mone selama, tama augwaligo te wali po augwaligo wali palio. Tama te po te Juda we bidiba pelama odali, tama augwaligo te po naga ola pali te megi tama me augwaligo te po me wabo dao.

Jisasgo misin sē aga wali pali bidi dabebolo manio (Mak 16:14-18; Luk 24:36-49; Jon 20:19-23)

¹⁶Te aga wali pali bidi dabe nogo si olama sāgā badu deli augwali te Galili buluba pali, tama augwali te bulu duba sabolali, te Jisasgo augwali te polobadu bodolu mani bulu duba. ¹⁷Tama augwaligo tede Jisas sulama, tama augwaligo agabolo lotu po wai. Tiali goli mebagó homu si elaluama te homu yali, te aga mu ma hodalualiwe? ¹⁸Tama Jisas pāba aselama, augwalibolo e tiwai po wali, “Godigo enabolo te tigidali dagalude me tōde elalubo nai tonaluabo bomo mawai dao. ¹⁹Tama tibaso, dage pelama, tigidali we bidi hani ena wali asobo we bidi pedelao. Tama dagego augwali te Aya me Ogwa me Mobo Bidigo nogide baptais mao.

²⁰Tama dagego eno dagebolo te mani po tigidali augwaligo wali pomai hagede ola mao. Odiqo. Ena dage dali tigidali sogo bidaibao, tama te dagalu de tq si silibo sogoba usu naibao,” Jisasgo te po wai.

Dwagi Yai Gesi Po Makgo Aşəani

Hasia nedebō tau sabo po

pi Te bidi Mak aga te Juda hani bidi da, tama agai te Jisas Kraisde po aşenama, tama te Juda hani isiąwai Grik po wabo we bidi dabebolo mani. Jisasgo agade digi te nogi poai, “Ena Godigo Bidi Mu dao,” te po wai, tama agai te we bidigo yali dwai sę sege sela şamainogo asali. Agai te we bidide elaluali dwai haubo noma sela şabo bomode me, te agai ola mani pode me, te we bidigo sali sege sela şabode me, tede dago Jisasgo bomo hania konea sabo dao. Makgo te Jisasgo yali sęde po hauwa pusali, tiali goli agai te Jisasgo te we bidi dabe aga po ola mani sęde po hauwa me wabeo. Te hasia bolo Makgo te baptais mani bidi Jongo po pusali, tama te Jisas aga baptais selama pobadi te Satango aga usu sali po me pusali. Nosali dago suali, te haniani sege dabe tolali we bidi dabe augwalide Jisasgo olo mu homu dene eyu tau sabo sę eyu, tama agai augwali po ola mani. Te hasia bolo aga wali pali bidi dabego Jisasgo yali sę page kuna konesiabaso, te dua dua augwaligo agade konea sabo sę yai dao. Te bidi dabego me te Jisasde boi bidi pedalubo sę eyu, tama augwaligo agaba sege hauwa mani. Tama te silagasu agai aşəani buku pedaide, te Makgo te po weyu, te Jisas isilama, ma hodualui po walio.

Te we bidi baptais mani bidi Jongo po pusali
(*Mat 3:1-12; Luk 3:1-9, 15-17; Jon 1:19-28*)

1 ¹E po da te Jisasde gesi dwagi yai po dao. Jisas da, te Godigo te we bidi tau sainu dajı ilai bidi Krais da, te God aga ogwa dao. ²Te gesi dwagi yai po pusubo sę e tiwai hasia bolo pedelai elaluali. Godigo agai Kraisde wali po te Godigo po pusa mabo profet bidi Aisaiabolo polobadu mu pusali. Tama Godigo agabolo po olama, tama te profet bidi Aisaiago Godigo po te bukude aşəai. Te bukude aşəani po tomode Godigo aga ogwabolo te po wai, “Edao. Eno po sela pabo bidi tagala palama, tama aga nage pabo badu poligi soaibao. Agai te nago pabo tų sisi yaibao,” te po wai.^a ³Godigo te polasa pabo bidide te po me wai, “Bidi

^a **1:2** Mal 3:1

meni yai bulude aga i bomonama weyu, te po waibao, ‘Te dago Genuai Bidi aga pabo tū sisi eiyao, te agai dage tonalubo sé yabo sunumi bugagia dodolao,’ te polasa pabo bidigo te po waibao,” Godigo te po olama, tama bidi me deligo te po bukude aséani.^b

⁴ Te po polobadu obaso, te gesi dwagi yai po pusubo sé te tiwai nosali gagalali, te we bidi baptais mabo bidi Jon diq holali side. Tama te bidi meni yai bulude pedelama bididu, tama Jongo e po te agaba asali we bidibolo pupusu pai, “Te dagego duga yali dwai séde ge neyuu tama homu begeleqo, te Godigo dagego dwai séde sali sége wei ponogobeo, sela sáwaibao, te eno dage węgo baptais mawaibao,” Jongo te po wai. ⁵Tama te Judia tq pedai provinsde bidali we bidi dabe umabo mu Jon pageba sisinigi pai, te Jerusalem moni hanu we bidi dabe umabo me agaba asali. Tama augwali deli deligo augwa dwai sé yali sége hania hanilama, tama te po wai, “Eno dwai sé dabe yai dao.” Tama tibadi Jongo augwali te Jordan pabo qide baptais mani. ⁶Tama Jongo gudubo ugwa te moni kibu kamel nisigo nigai dao, tama aga tabide te kibu wali kukulu gudai. Tama aga te bulu tomode bidibo kuli mano me hanamu dali si tuyu bidai dao. ⁷Tama agai po bomo elama pusuyu, te po wai, “Te ena tudi badu asobo bidi me deligo, tama agai bomogo te eno bomo aiyaba elaluaibao. Ena wiegi yai bidi weyu, tama ena aga sé ebo bidi bidiyu, ena duagulama te eno agai saqā nadoba bono me pisagagobeo. ⁸Eno dage węgo naga baptais mani dao. Tiali goli agai dagebolo Godigo Tedali Mobo Bidi dobawaibao, dage dali bidimainu tama tiaibao,” Jongo te we bidi dabebolo te po wai.

Jongo Jisas baptais mani
(Mat 3:13-17; Luk 3:21-22)

⁹Te side Jisas te Nasaret dwasianu hanu te Galili tqde bidali taga soyu asali. Tama Jongo aga te Jordan pabo qid tomode baptais mani. ¹⁰Tama polo aga te we tagasu, te bulu wę sesegeba doligulubadi, tama agai te dagalu dala pabo suali, tama te Godigo Tedali Mobo Bidi te ba hi tiwai gagalasa agaba dulali. ¹¹Tama te dagalude pedauwali me delidu bomonama i weyu, te po wai, “Nage eno Ogwa dao. Eno nage godolo mu ebao. Eno homu nagede wiegi yai ebo dao,” te po wai.^c

Satango Jisas usu sali
(Mat 4:1-11; Luk 4:1-13)

¹²Tama te po ola silama, tama polo te Godigo Tedali Mobo Bidigo bomonama te Jisas bidi meni yai buluba polo tagala palai. ¹³Tama aga te bidi meni yai bulude bididubadi, te bidi sese si sogo bidali, tama te usu

^b 1:3 Ais 40:3 ^c 1:11 Gag 22:2; Tib 2:7; Ais 42:1; Mat 3:17; 12:18; Mak 9:7; Luk 3:22

sabo dwai mobo bidi Satan asama, tama sesemane sogo aga usu sagasali, Jisasgo dwai sę emainogo tama usu sali. Tama Jisas te bulu hasa dabe dali bidali. Tama Godigo dagalude sę ebo ensel mobo bidi dabego aga tau sali.

Jisasgo sę ebo te Galili tqde gagalali
(Mat 4:12-17; Luk 4:14-15)

¹⁴ Te Jongo te gavman bidi Herotbolo “Dwai sę egio” po obaso, te Herot sębę eyu, tama agai Jon kalabusiba muani. Tama te sogo Jisas te Galili moni tő pedai tomoba pelama, tama Galili tqde biliyu, agai Godigo gesi dwagi yai po pusa mena mena bilai, te po wai, ¹⁵ “Te megi da, te bodolu sogo mu pedalubao. Te Godigo te we bidi mu tonalubo sogo pąba yagasalio. Tama tibaso, dagego duga yali dwai sęde ge neyu, tama homu begelama, tama duga homu te gesi dwagi yai poba begi pao,” Jisasgo te we bidi dabebolo te po pususu bilai dao.

Jisasgo bidi me si me si aga wali asięo wali
(Mat 4:18-22; Luk 5:1-11)

¹⁶ Te Jisas te Galili sigi aji sane sesegedu pobadi, tama agai te Saimon aga ama Andru dali si suali. Augwali si te sigi węba te suę hagani togobo wa sębo sę iduai. Augwali sigo te suę sabo sęde te mone sabo bisnis sę eyu bidai. ¹⁷ Tama Jisasgo augwali sibolo te po wai, “Dage si ena wali asięo, tama eno dage sibolo te bidi sabo sę ola mawaibao, te sali bidi dabe ena wali asomainogo yaibao,” te po wai. ¹⁸ Tama polo te augwa si te suę hagani togobo wa tagalama, tama Jisas aga wali pai. ¹⁹ Aga dwasianu ma pelama gana, tama agai Jems suali, te bidi Sebedigo ogwa, te aga ama Jon dali bidibo suai. Augwali si me te augwa gebade bididu, te suę sabo hagani togobo wa dodolobo sę idubadi suali. ²⁰ Tama agai augwali si polo i olama, tama augwali sigo te augwa si aya Sebedi te gebade te aga sę bidi dabe dali bidibadi taga peyu, tama augwali si te Jisas wali pali.

Jisasgo te dwai haubo noma bidi te bidi me delide sela sawani
(Luk 4:31-37)

²¹ Te Jisas dali, aga bidi me si me si dali, augwali te Kaperneam hanuba pelama, tama teba sabolali. Tama te Sabat sogo dwasianu Sarere Jisas te Juda dabego bomo yai po ola mabo be tomoba polo pelama, tama agai po te we bidi augwalibolo ola mani. ²² Tama augwaligo agai po odama, tama augwali moni noma siyu, tama midigi sai. Magi baso meni. Agai augwali te Juda dabego bomai po koneani bidi dabego kolesaga ola mabo tiwai gilama me ebeo. Menio. Agai augwali te nogi dali bomo dali si elalubo bidigo kolesaga ola mabo tiwai mu yai.

²³ Te sogo bidi me deli te augwaligo bomai po odobo lotu be tomode bididuali, tama agade te dwai haubo noma bidi elaluali. Agai bomonama i weyu, te po wali, ²⁴“Te Nasaret hanu bidi Jisas, nago da dwai mobo dabebole mena sę yainogo asaliwe? Te nago da dolainogo homu eyu, asai dawe? Eno nage koneani, nage te Godigo gasagi yai tedali wiegi yai bidi dao,” te po wai.

²⁵ Tiali goli Jisasgo te dwai mobobolo te po wai, “Nago pedauwali pania selama, tama te bidi nago taga soayu, buluba soao,” te po wai.

²⁶ Tama te dwai mobogo te bidigo tigi omagia mu didibili ilai, tama i wabogo po dagą genuai mu olama, tama te bidi taga palio.

²⁷ Tama tigidali we bidi augwali noma siyu, tama augwa hasi tomode digi po miani, “Te e da mena sę dawe? Te gasagi yai gesi ola mabo po dao,” te po wai. “Te bidigo bomo elalubaso, tama agai te dwai haubo noma bidi dabebea po pusubaso, tama augwaligo agai po odali,” te po wai. ²⁸ Tama agai yali sę po Galili tō pedaiba polo pelama, te we bidi tigidaligo odali.

Jisasgo te Pitago wego ida usu ilali

(Mat 8:14-15; Luk 4:38-39)

²⁹ Te bidi Jisasgo te dwai mobo bidi sela sənana, tama te Juda dabego bomai po odobo lotu be taga pelama, tama te Saimon dali Andru dali sigo be tomoba pali. Tama Jems me Jon augwali si me hodobo pali.

³⁰ Tama Saimon aga au te be tomode te pibo be saide pila muai, te tigi posolo gasi elaluali. Tama te we gasi elalubo po augwaligo te Jisasbolo polo wali. ³¹ Te po olama, tama Jisas agaba pelama, tama aga nogo tola sigi pelama, hodolali. Tama te tigi posolo gasi agade elaluali tagalama, tama te wego augwali nai sisi ilibo sę yai.

Jisasgo te we bidi hauwa usu ilali

(Mat 8:16-17; Luk 4:40-41)

³² Te be pio eyu, giliga dega sigilubode, te we bidi augwaligo te gasi yai we bidi dabe me, te dwai haubo noma bidi elalubo we bidi dabe te augwaligo agaba selasa asai. ³³ Tama te hanude bidaluali we bidi tigidali augwali te be sunumi pąba sisinani. ³⁴ Tama agai te gasi haniani elaluali we bidi hauwa usu ma ilili pali. Tama agai te dwai haubo noma bidi hauwa elaluali te sela səwani. Tama te sę ebadi, te dwai haubo noma bagego aga Godigo Ogwa da konebaso, augwaligo tede po waidali weyu, agai augwalibolo habu selibo po bomonama wai.

Jisas te Galili Provins tōde sę ela bilali

(Luk 4:42-44)

³⁵ Te sogo kigamu digi mu aga hodaluama, tama agaduba buluba diaq solama, tama te bidi meni yai madiba me pelama, aga Godibolo po

wainogo yai.³⁶ Tama nosali, Jisasgo Godibolo po me odubadi, tama Saimon dali aga abagi solo me augwaligo Jisas gege pai.³⁷ Augwaligo aga gegela sulama, tama augwaligo te po wali, “Te tigidali we bidi augwaligo nage gegainogo ebo dao,” te po wai.³⁸ Tama agai augwaliba te po wali, “Te tagalama, te da meba te gasa pade elalubo buluba pinao. Eno po augwaliba me pusainogo. Te sede naga ena asai dao,” te po wai.³⁹ Tama olama, aga te Galili tq pedai tigidaliba pelama, tama agai te wiegi yai po te augwaligo bomai po odobo lotu be dabe tomode pusuyu, tama agai te dwai haubo noma bidi dabe sela səyai.

Jisasgo te oyabə gasi yai bidi me deli wiegi yai ilali
(Mat 8:1-4; Luk 5:12-16)

⁴⁰ Te oyabə gasi yai bidi me deli agaba asama, bomonama hanalu wagasali. Aga kidu sugunagasama, tama Jisasbolo te po wai, “Te nago homugo usu dao wida, teda nago ena wiegi yai ma ilama, tama ena te meda meni yai tiwai ma bidaibao,” te bidigo te po wai.⁴¹ Tama Jisasgo aga homu dene mu ebaso, tama agaba nogo munama diayu, tama agabolo te po wai, “Awe, eno homugo nage gasi usu ilaibao. Tama nage wiegi yai pedalao, te meda meni yai bidi bidaao,” te po wai.⁴² Tama megi naga tama te oyabə gasigo agade elaluali taga palio, tama aga wiegi yai pedelali.⁴³ Tama Jisasgo te bidi tagala palobadi agabolo po bomonama weyu, te po wai,⁴⁴ “Bugagia dua dao. Nago bidi me deli dali eno nagede yali se po me wagio. Menio. Nage dolo pelama, tama nago tigi te pris bageba waseligi pelama, tama agai nago tigi osola sumainao. Tama tilama, tama polobadu Mosesgo wali po gilama Godibolo nai ofa yao. Tama tiyu, te bidi dabego koneyu, te nago gasi silali, nage te meda meni yai bidi tiwai megi ma bidibao, te homu augwaligo yaibao,” Jisasgo te po wai.^d

⁴⁵ Tiali goli te bidigo Jisasgo agaba wali po wali pisəma, agai te se yali po tigidali we bidi dabeeba subigila pususu bilali, te tigidali hanuba pususu bila silali. Tama tibaso, te we bidi umabo augwali agaba asidali weyu, Jisas aga te hanu dabe tomoba hania pabo usu ebeo. Menio. Aga te hanu bulu badu naga bidali, te bidi meni yai madi naga bidai. Tama te tq pedai tigidali habu badu we bidi dabe te aga bidibo madi naga asiyu yai.

Jisasgo te nogo saqə dwai bidi me deli usu ma ilali
(Mat 9:1-8; Luk 5:17-26)

2 ¹ Te meba sogo hododolama bidali silama da, tama aga te Kaperneam hanuba ma pai. Tama Kaperneam hanuba sabolama, tama te we bidi augwaligo aga te bede bidibo po odali.² Tama we bidi hauwa sisinama, tama te be pagana salio. Tama bulu badu te be

^d 1:44 Prs 14:1-32

sunumi pade te agebele olo me elalubeo. Tama agai te gesi dwagi yai po augwaliba pusubo se yali. ³Tama pusubadi, augwaligo gasi yai bidi me deli agaba selasa asai. Te bidigo nogo saqä dili me te tigidali mu penelai. Tama bidi me si me si augwaligo te gasi yai bidi tolasa asai. ⁴Te we bidigo te be tomode bidabo pesage mu pagana selama, mu pena sai baso, tama augwaligo te gasi yai bidi aga te Jisas paba sela asabo usu isawai. Tama augwali te be ugwaldu daiba holama, tama augwaligo te Jisas bidibo madi badu te be daj dawali. Augwaligo te dalama, tama augwaligo te gasi yai bidi pila mubo bono wa dali selama, te aiyaba tagaluama mugulali. ⁵Tama Jisasgo augwali sulama koneani, augwaligo agaba augwa homu tigidali muyu, tama agaba homugo tialubo bidi dabe dao, te agai koneani. Tama tibaso, agai te gasi yai bidibolo te po wai, “Eno ogwa, eno nago yali dwai se sela sawanio,” wali.

⁶Te Juda dabego bomo yai po page koneai bidi dabe meba augwali tede dulalu bidaluali, tama augwa homude augwaligo te tiwai homu yai, ⁷‘Magi baso te bidigo agai te tiwai po wabowe? Agai te Godiba posobo po obao. Te mena bidi me deligo te bidigo dwai sege me sela sagobeo. Te God agaduba se naga dao,’ augwaligo te homu yali.

⁸Te Jisas aga homude polo koneani, augwaligo te homu augwa homude elaluali. Tama agai te po augwaliba wali, “Magi baso dagego te tobage homu te duga homude elalubawe? ⁹Te eno pogo bomo elalubo te dagego hania konemainogo eyu, eno mena po waibawe? Eno e bidibolo te po wabo si, ‘Nago dwai se eno sela sawani,’ teda eno po bomo elalubo dagego hania kongebobeo. Tiali goli eno e bidibolo po olama, tama aga hodaluama, agai aga pibo somo selama bilabaso da, teda eno pogo bomo elalubo te dagego mu koneiba. ¹⁰Ena da, te Godigo Bidi Mu da, tama eno homugo dagego konemainogo, eno e tqde bomo elalubao, te we bidi dabego dwai sege sela sawabo usu yabo elalubo. Dagego suiqa, te po wai. Tama begelama, agai te nogo saqä dili isai bidibolo te po wali, ¹¹“Eno nagebolo obao, nage doligulama, tama naga pibo somo selama, tama naga beba pao,” te po wali. ¹²Tama te bidi hodaluama, tama te tigidali we bidi gedude aga pibo somo polo selama, tama palio. Tama tibaso tigidali we bidi augwali noma mu siyu, midigi sai. Tama augwaligo God nogi uwabala siyu, tama augwaligo te po wali, “Polobadu dago te tobage tiwai se ebo me susiawai dao,” te po wai.

Jisasgo Livai i wali (Mat 9:9-13; Luk 5:27-32)

¹³Te Jisas te Galili sigi we saniba ma biligi pai. Tama genuai hani we bidi agaba asobaso, tama agai te Godigo wiegi yai po augwaliba pusa mawai. ¹⁴Tama aga pobadi, tama te bidi nogi Livai suali, te Alfiusgo ogwa, aga te maket takis mone sabo bede dulalubadi. Tama Jisasgo

agabolo te po wali, “Nage ena wali asao,” wali. Tama aga hogodama, aga wali palio.

¹⁵ Tama nosali Jisas me, aga wali pabo bidi dabe me, augwali te Livaigo beba duagi pelama, nai tuali. Tama te takis mone sabo bidi hauwa me te dwai sęgę sai bidi hauwa augwali Jisas dali me aga wali pabo bidi dabe dali hodobo dugulama nai tuali. Te tobage tiwai bidi hauwa augwali sesemane sogo te Jisas wali bilaluai. ¹⁶ Te Juda bidi dabe tomode te hani me deli nogi Farisi hani elaluali. Tama Farisi bage meba augwali te Mosesgo bomo yai po page koneai bidi dabe, augwaligo suali, te Jisasgo te dwai sęgę sai bidi dabe dali, me te takis mone sabo bidi dabe dali, nai tubo suali. Tama augwaligo aga wali pabo bidi dabebolo wali, “Magi baso agai te takis mone sabo bidi dabe dali, me te dwai sęgę sai bidi dabe dali nai tubawe?” te po wai. ¹⁷ Jisasgo te po wabo odobaso, tama agai te po te Farisi dabebolo wali, “Te gasi meni yai bidi dabe augwali te munamuna mabo bidi pageba pogobeo. Menio. Te gasi yai bidi naga te munamuna mabo bidiba paibao. Ena asali, eno te doloba pai bidi dabe i wainogo me asobeo. Ena asali te eno dwai sęgę sai bidi dabe i wainogo te ena asai dao,” Jisasgo te po wai.

Tubo nai osogo gisilibo kolesaga po
(Mat 9:14-17; Luk 5:33-39)

¹⁸ Te we bidi baptais mani bidi Jon wali pali bidi dabego me te Farisi dabe augwaligo me te tubo nai osogo gisilibo kolesaga wali pali. Tama bidi meba aselama, Jisasba wagasiyu, te po wali, “Te Jon wali pabo bidi dabego me, te Farisi wali pabo bidi dabego badi, te nai osogo gisilibo kolesaga ebo dao. Magi baso te nage wali bilibo bidi dabe augwaligo me te nai osogo gisilibo meniwe?” wali. ¹⁹ Tama Jisasgo po digi po begeleyu, tama te po augwalibolo wali, “Te we kębo bidi me deligo abagi dabe te we sainogo ebadi tama te bidi augwali dali bidibadi te nai osogo gisilibo usu egowe? Menio. Te we sabo bidi augwali dali bidibadi, te sogo te augwaligo te nai osogo gisilibo te usu me egobeo. ²⁰ Tiali goli nosali gasa bidi dabego te we kębo bidi bomonama odasa pabo si, teda te sogo aga abagi augwali homu dene eyu, tama augwaligo osogo te nai habu selaibao. Tama ena e tőde bididubadi eno bidi dabe augwaligo nai osogo gisiligebeo,” Jisasgo te po wai.

Polobadu sę dali gesi sę dali deliba talua palamu po wali

²¹ Te sogo Jisasgo gasa po digi po me begeleyu, te po wai, “Bidigo te gesi ugwa pedai selama, te poloba badi ugwa pedai dali me hobologobeo. Te agai te tiwai ebo si da, teda te dedage hobolali ugwa pedaigo te badi ugwa ma dedage ilaibao. Te gesigo te poloba badi ugwa pisilama, tama dedage genuai ma pedalaibao. ²² Tama me, te bidi mego te gesi wain aji te

poloba badia pai kibu meme waligo nigai botol teba tabigobeo. Ma agai tama tiyu da, teda nosali te wain wę genuai bo delama, tama te meme wali botol peda peyu, tama te wain wę ṭoba olo gea peyu, tama te meme wali me doyu hagawaibao. Tama tibaso, augwaligo te gesi wain aji te gesi meme wali botolba tabibo dao, tama te si dali si te bugagia munalubo dao,” Jisasgo augwalibolo te po wai.

Te Sabat sogode sę ebo habu selebo po
(Mat 12:1-8; Luk 6:1-5)

²³ Te Juda dabego Sabat sogo me delide Jisas te wit gi tomodu soai. Tama aga wali pabo bidi dabe aga dali soali, tama augwali nasi baso, tama augwaligo te nai wit meba selama, tama te ge tuali.^e ²⁴ Tama Farisi dabe meba tede bidali. Augwaligo te tebo sę sulama, tama Jisasbolo te po wali, “Suao. Magi baso augwaligo te Sabat side habu selali sę bolaliwe?” ²⁵ Tama Jisasgo augwalibolo te po wali, “Te dagego te dena noq̄ bidi nogi Devitgo yali sę po dagego nedebewe? Me sogo aga me, aga dali bidali bidi dabe me, augwali nai sili bidibadi tama moni nasi eyu bidali. ²⁶ Te sogo te bidi nogi Abiatar te genuai tobolu pris bidi bidibadi, tama Devitgo Godigo lotu be tomoba pelama, te Godigo gesabide muani bret selama tuali. Aga hani dabego me tuali. Tiali goli, te bret te habu selai elaluai, tama te pris dabego naga tubo usu yaibao wai, te bomo yai pode. Tiali goli te bret augwaligo me tuali digi Godigo gedude dwai sę ebeo. Dagego te aséani po nedebewe?”^f ²⁷ Tama Jisasgo te po augwalibolo wai, “Godigo te bidi muani te Sabat sogo tau somainogo me mubeo. Menio. Agai te Sabat sogo muani te bidi tau somainogo muai dao. ²⁸ Ena da, te Godigo Bidi Mu da. Ena da, te Sabat sogode te genuai bidi dao. Tama tibaso, bidigo Sabatde mena sę yagameo, te eno waibao,” Jisasgo te po wai.

Te Sabat sogode Jisasgo te nogo penelai bidi usu ma ilali
(Mat 12:9-14; Luk 6:6-11)

3 ¹ Te me sogo Sabatde Jisas te bomai po odobo lotu be tomoba ma pali. Tama bidi me deli bididuali, te aga nogo me deli dwai elaluai. Te aga nogo penelama, te wa pai tiwai elaluai. ² Tama augwaligo Jisasba tonaluali. Augwaligo koneainogo, agai te bidi te Sabatde te wiegi yai ilibowe, ma meni ebowe naga sueinogo yai. Augwaligo te Jisasgo te sę ebode te po tų ilainogo homu yali. ³ Tama Jisasgo te nogo penelali bidibolo te po wai, “Nage eba asao, te we bidi gesabidide dolaluagasa.” ⁴ Aga pąba asama, tama Jisasgo augwalibolo te po wai, “Te eno dagebolo hanalu obao, te dago te Sabat sogo te wiegi yai kolesaga yabo homu yaibawe, ma dago dwai kolesaga yaibawe? Dago te Sabat sogo te bidi

^e 2:23 Bom 23:25 ^f 2:26 1 Sml 21:1-6

dabe bugagia bidimainu tau sabo sę yaibawe, ma dago te bidi ela mumainogo eyu yaibawe? Dago bomo yai pogo tede magi po elalubawe?” Tiali goli augwali sagia siyu, po me wabeo. ⁵Tama agai augwaliba tonono bilama, tama augwaligo te nogo dwai bidi homu dene esiąbaso, aga sębę yali. Tama agai augwaligo tabi dagana sabo sulama, tama aga tede homu sege yali. Tama agai po te bidibolo wali, “Nage nogo debelao.” Tibaso, aga nogo debelali, tama nogo wiegi yai ma pedalali. ⁶Tama te Farisi dabego te tebo sulama, tama polo te augwali hogodosa pelama, tama augwali te Herodion hani dali deliba sisinigi pali. Augwali tigidaligo po miyu, tama Jisas elabo po miani.

We bidi hani hauwa mu augwali te sigi aji sane paba sisinani

⁷Te Jisas dali aga wali pabo bidi dabe augwali te bidali bulu tagalama, tama augwali te Galili sigi aji saneba pali. Tama te genuai hani we bidi augwali aga wali asali. Augwali te Galili tq we bidi me, te Judia tq me, ⁸te Jerusalem moni hanu me, te Idumea tq we bidi dabe me, te Jordan pabo aji pedai u badu bidibo we bidi me, te moni hanu si Tair dali Saidon side bidibo we bidi, te genuai hani we bidi dabe augwaligo te Jisasgo ebo sę po odama, tama augwali agaba asali. ⁹Tama Jisasgo aga wali pabo bidi dabebolo te po wai, “Te genuai we bidi hani mu bidalubao. Tiyu augwaligo ena gea sidali, dagego te moni geba me deli dodolama muao. Ena teba holama, tama bugagia bidaibao,” agai te po wali. ¹⁰Magi baso meni. Agai te gasi yai we bidi hauwa wiegi yai ma ilali, tama tibaso te gasa gasi yai we bidi dabego agaba bomonama kę̄ sai elaluai. Augwaligo agaba nogo muainogo homu yai. ¹¹Te dwai haubo noma bidi elaluai bidi dabego aga subaso da, teda augwaligo agaba kidu sugunama, tama augwali i bomonama weyu te po wali, “Nage Godigo Ogwa dao,” wali. ¹²Tiali goli agai po bomonama augwaliba wali, augwaligo te aga nogi hanilama munu me wagio wai.

Jisasgo aga po sela pabo bidi nogo si olama sągago si bidi sa muani (Mat 10:1-4; Luk 6:12-16)

¹³Jisas te bulu du daiba holai. Agai te bidi meba sa muainogo yai. Tama agai te bidi dabe i olama, tama augwali agaba asali. ¹⁴Tama agai nogo si olama sągago si bidi sa munama, te augwali aga dali bidimainu yai. Agai augwali te wiegi yai po pusigi pomainogo tagala palabo homu elama, ¹⁵tama agai augwalibolo te dwai haubo noma bidi sela sębo bomo mawainogo yai. ¹⁶Agai te nogo si olama sągago si sa muani bidi dabego nogi e dao: te me Saimon, Jisasgo agabolo gasa nogi Pita mawai. ¹⁷Tama Jems, te Sebedigo ogwa, te aga ama Jon dali, te agai gasa nogi Boanerges mani. Te nogigo page te e tama tiwai dao: te be kulukulu wabo dagalugo ogwa dao wali. ¹⁸Tama gasa sa muani bidi dabego nogi Andru, me Filip,

me Bartolomyu, me Matyu, me Tomas, me Jems te Alfiusgo ogwa, me Tadius, me Saimon te Kenan tō bidi, ¹⁹tama Judas te Keriot bulu bidi, te bidigo nosali te Jisas dali boi ebo bidi dabego nogoba muai dao.

Augwaligo Jisasbolo tibo po kisilali
(Mat 12:24-32; Luk 11:14-23; 12:10)

²⁰Jisas te beba pai. Tama te genuai we bidi hani augwali ma sisinani, tama te Jisas aga wali pabo bidi dabe dali augwaligo te we bidi tau sabo sē hauwa elalubaso, augwali te nai tuabo sogo meni yani. ²¹Te Jisas aga deli kaneme bage augwaligo te po odama, tama augwaligo aga sagasainogo asai. Magi baso meni, te olo we bidi dabego “Aga te wabo palio” po wabo augwaligo odali.

²²Te Juda dabego bomai po page koneani bidi dabe augwali te Jerusalemdē bidaluali tama meba edaba dulama, tama augwaligo Jisasde te po wai, “Te dwai haubo nomá bidi dabego tobolu bidi nogi Belsebul, tego Jisasde dagana siyu bididubao. Tama te Belsebulgo agabolo mani bomogo Jisasgo te dwai haubo nomá bidi dabe sela sābo dao,” augwaligo te po wai.

²³Tama te po obaso, Jisasgo augwali aga pāba asomainogo i olama, tama agai te po meba habu sugunama te po begelama wali. Agai te po wai, “Te magi ilama tama te Satango te Satan aga digi te sela sāwainogo ebo usu yaibawe? Woo, te Satango aga digi me sela sagobeo. ²⁴Te genuai tōde bidi me deligo bomo tomode bidibo bidi dabe augwa hasi te hani si bugulama tama hwībaso da, teda te bomo elaluali te usu me elalugobeo, te moni hani tulaluiabao. ²⁵Tama te deli bede bidaluali bidi hani te augwa hasi bugulama, tama augwali hwībaso da, teda te bede bidali bage te bomo elama me bidigobeo, te pebeda paibao. ²⁶Tama te tiwai me, te Satan agaba digi boi bidi elama, tama aga hani te peda siyu da, teda aga bomo elama bidabo te usu me elalugobeo. Menio. Te aga sia saibao. ²⁷Me ma, te bidi me deli aga olo tama te bomai bidi me deligo beba pelama, tama agai nai selama dobawainogo ebo te usu me egobeo. Menio. Agai te bomai bidibolo hasia te nogo sāgā duaibao. Agai tama tilama, tama agai te bidigo bede elaluali doado bage tigidali dobola selama selasa paibao,” wali.

²⁸Tama Jisasgo te po olama, po me weyu agai te po wai, “Eno mu po dagebolo obao. Te we bidigo magi magi dwai sē ebo, ma augwaligo magi dwai posobo po Godibolo wabo, te tigidali dwai dwai kolesaga te God agai sela sābo bomogo sela sābo usu mu yaibao. ²⁹Tiali goli bidigo dwai posobo po te Godigo Tedali Mobo Bidi dali obaso da, teda Godigo agai te sēgē me sela sāsiama elaludu, te megi me nosali me te munu me sela sagobeo. Menio. Te sēgē agade me tama elalua pidu pidubadi geaibao,” Jisasgo augwalibolo te tama po wai. ³⁰Magi baso meni. Augwaligo aga dali te po wai, “Te agade dwai haubo nomá bidi elalubao,” wali.

Te Jisasgo ida dali te ama dede dabe dalide po
(Mat 12:46-50; Luk 8:19-21)

³¹ Te po wabo silama, tama te sogo te Jisasgo ida me ama dede dabe dali augwali sabolali. Augwali te be bulu badu dodolalu, tama augwaligo po agaba ola tolali. Augwaligo homugo te aga augwaliba asomainu homu yai. ³² Tama genuai we bidi hani duada solama, te aga bagulama tomode bidibaso, tama augwaligo te po agabolo wali, “Odao, te naga ida me ama dede badi, te augwali bulu badu bidaluagaselama, te augwaligo nage i obao,” wali.

³³ Tama agai te po wei augwaliba ponani, “De dede te eno ida me ama me dawe?” ³⁴ Agai te aga bagulama duada pali we bidiba tonono bilama, tama agai te po wai, “Te eno ida dede, ama dede dabe ena dali bidalubo suiəo,” wai. ³⁵ “Te bidigo te Godigo homu kolesaga wali pabo bidi bidibaso da, aga te eno ama abe me ida dao,” Jisasgo te po wai.

Bidigo te giba nai wai tedela palali po
(Mat 13:1-9; Luk 8:4-8)

4 ¹ Te nosali me sogo Jisasgo te we bidi augwali te Galili sigi wę sane pąde po ola mabo sę ebo ma gagalali. Tama genuai we bidi hani mu te augwali agaba sisinagasali. Tama aga te geba me deliba holama, tama tede dulaluai. Tama geba te sigi we tomode elaluali. Tama tigidali we bidi augwali te we sane pąde duada pelama bidaluai. ² Tama agai ola mani po hauwa te po habu sugunama, te begelebo pogo naga augwali dali wali. Agai e tama tiwai po augwaliba mawai. ³ “Dagego odiəo! Te bidi me deli pelama, te giba nai wai tedelalo biligi pai. ⁴ Agai tedelalo palio, tama te nai wai ge meba te sunumide tudulaluali. Tama ba dabe asiyu, te nai wai ge tuali. ⁵ Tama meba nai wai te masigi elalubo badu tudulaluali, tama te tq hauwa meni yai madi. Te tq aiyanu igilusiąwai madi weyu, tama te nai wai polo holai. ⁶ Tiali goli giliga ugwanu naniyu, tama te giligago ulali. Tama te wit nai aga sele meniamma, tama tigidali wa pelama, tama sasia pelama isali. ⁷ Tama meba nai wai te sesani bono elalubo tomoba tudulaluai. Tama te sesani bono me holama te mesegelali, tama agai nai me walobeo. ⁸ Tiali goli te nai wai meba te wiegi yai tq ili yai madiba tudulaluma, tama genuai holama, tama nai du walai. Mebago ge dwasianu te 30 walali, mebago te 60 walali, tama mebago geninama mu tama te 100 walalio.” ⁹ Tama agai te po me augwalibolo wali, “Te olo elalubo bidi agai te po odiəo,” te po wai.

Jisasgo po digi po begelebo sę page po
(Mat 13:10-17; Luk 8:9-10)

¹⁰ Te nosali te we bidi hauwa aga dali menibadi, Jisas agaduba naga bididuali, tama aga wali pabo bidi nogo si olama sąago si badi, te meba

Jisas aga dali bidalubo bidi dabe dali, augwaligo agabolo te begelama wali po pagede hanalu wali.¹¹ Tama agai te po augwalibolo wai, “Godigo dagebolo te agai te we bidi dabe tonalubo sę page geme dualaluali po page te dagebolo ola mawai dao. Tiali goli te Godigo po odisäma bulu badu bidibo bidi dabe augwaligo da, te eno pusubo po te po digi po begelama, tama wabogo naga te po odobo dao. Te po page augwaligo odobo menio.¹² Te Godigo po bukude te gasa we bidide polobadu aséani po, te po page te megi bidalubo we bidide elalubao, te e tiwai dao:

“Te augwaligo tonono bilibadi, tiali goli te augwaligo te subo nai page hania konegobeo. Te augwaligo po odobadi, tiali goli te po page augwaligo me konesiąwani. Tama augwaligo konegi sogo da, teda augwaligo homu begeleyu, tama Godigo augwaligo dwai sę yali sęge sela sağı da,”^g
te po polobadu aséani,” Jisasgo te po wai.

Te nai waide po page begelama wali po
(Mat 13:18-23; Luk 8:11-15)

¹³ Tama Jisasgo augwalibolo te po hanalu wai, “Dagego te eno po digi po begelama wali po page me konebe dawe? Tama tiyu da, teda dagego mena tama te begelama wabo po page tigidali koneibawe?¹⁴ Te bidigo nai wai bulai po wali agai te Godigo po haniani we bidibolo pusuyu te bulali tiwai dao.¹⁵ Te sunumide tudulaluali po wali te Godigo po odali we bidi hani dabe, tama te sogo naga Satan asama, te Godigo augwali homude bulali po dagala sawai.¹⁶ Tama meba we bidi augwali te masigi elaluali tqba tudulaluali nai wai tiwai yai. Augwaligo Godigo po odama, tama polo augwali kolesaga sali, tama augwali tede wiegi yai homu pemene yai.¹⁷ Tiali goli augwaligo sele te dąq me olalubeo. Augwali te dwasianu sogo naga elaluali. Te nosali Godigo po aiyaba elaluainogo ebo bidi mebago te we bidi augwaliba sęge dali dene dali mobaso da, teda augwaligo te po wali pabo kolesaga tagalaibao.¹⁸ Tama meba we bidi augwali te sesani yai bono elalubo tomoba tudulaluali nai wai tiwai yai. Te hani augwaligo te Godigo po odali,¹⁹ tiali goli augwaligo homu hauwa te tqde naide elama, tama augwaligo te mone hauwa sisinabo homu elama, tama haniani doado bagede godola pelama pesa yai. Te doado bage dabede homu ebogo te Godigo po mesegelama, tama tebo we bidi hani augwali te nai du me walisiąwai.²⁰ Tiali goli meba we bidi augwali te wiegi yai tqba tudulaluali nai wai tiwai gilama yai. Te augwaligo Godigo po odama, tama augwaligo selama tama tolaluali, tama augwaligo nai du walali. Mebago te ge dwasianu walu, te mebago hauwa walu, te mebago geninama mu tama waliyu yalio,” Jisasgo te po wai.

^g 4:12 Ais 6:9-10

Te ulade po digi po begelali po
(Luk 8:16-18)

²¹Tama agai te po me augwalibolo wai, “Te bidigo lam sole domonama bogoli ebadi tama sela asama, te baket dologoba ma te pibo sai bet dologoba te mubo dawe? Menio. Agai te tebol sai daiba mubo dao. ²²Te tigidali geme dualaluali nai nosali te hania haninama pedalaibao. Tama bidigo te mesegaluali tigidali nai, nosali te ulaba hanilama pedalaibao. ²³Te olo elalubo bidi agai eno te po odio!”

²⁴Tama agai te po me augwalibolo wai, “Te dagego odali po, tede dagego bugagia kone palao! Te dagego bidi dabebolo te mabo nai usu nama, te usu si naga dageba wei ponaibao. Tama agai meba ma wadolama te dageba mawaibao. ²⁵Te bidi me deligo nai tolalubo bidi, te Godigo agabolo geninama ma mawaibao. Tiali goli, te bidi me deligo dwasianu nai naga me elalubo bidi da, teda agai te elalubo nai, te hagawaibao,” Jisasgo te po augwalibolo wai.

Te nai wai holobo po begelama wali

²⁶Tama agai te po me wai, “Te Godigo we bidi tonalubo s̄e tomoba pabo tū te e tiwai dao, te bidi me deligo te nai wai tōba tedelalo pabo tiwai dao. ²⁷Tama tigidali sogo be hulibo usu nama te bidi godege piduali, tama be posobode aga hogodama bilidu yai. Tama te tedelalo pali nai wai holama, tama mena tama genuai ebo me, te bidi agai me konebeo. ²⁸Te tō aga digi s̄e ebaso tama te nai wai holama, tama nosali te nai wai du walaibao. Hasia bolo te nai honu pedalama, tama nosali te nai tobolu tomode te nai genuai pedalaibao. ²⁹Tama nosali te nai genuai elama te nai inabo si da, teda te bidigo te hwā ge dali s̄e yaibao. Te nai sabo sogo bodolu te pedalali dao,” Jisasgo te po wai.^h

Te mastet nai waide po begelama wali po
(Mat 13:31-32; Luk 13:18-19)

³⁰Tama Jisasgo te po wali, “Dago te Godigo we bidi tonalubo s̄e te mena tama usu saibawe? Tama dago tede mena usu sabo po begelama waibawe? ³¹Te tiwai nai wai me deli te nogi dago te mastet wabo. Te nai mastet wai ge da te e tōde gasa tigidali elalubo nai wai ge tiwai me elalubeo. Menio. Te dwasianunu mu tama. Bidigo te nai wai ge te tōba bulaibao. ³²Bidigo te mastet nai wai ge bulama, tama holama tama genuai igulama, tama te kaya te tobage tigidali ni aiyaba elaluaibao. Te aga nologo genuai igulama, tama te ni nologode te ba dabe te tīwai madi dologoba duayagasu yaibao,” Jisasgo te po wai.

^h 4:29 Jol 3:13

³³ Jisasgo te we bidi augwalibolo te po digi po hauwa begelama, te tama tiwai agai po pusali, te augwaligo homu kolesagaba muabo usu po naga wai dao. ³⁴ Agai te po te we bidi augwalibolo hanilama me pusubeo. Menio. Agai te po begelama naga pusali. Tama aga te wali pabo bidi dabe naga aga dali bidibadi, agai te po page tigidali hanilama augwali dali pusuyu yai dao.

Jisasgo po obaso, tama genuai wali sia sali
(Mat 8:23-27; Luk 8:22-25)

³⁵ Tama te silama te sogo digi te be pio ebode, agai te aga wali pabo bidi dabebolo weyu, te po wai, “Da te sigi aji u badu pedai badu pinao,” po wai. ³⁶ Tama augwaligo te genuai we bidi hani bidaludubadi taga peyu, te augwali Jisas dugulalualu gebaba holama, tama augwaligo aga dali selama pali. Tama gasa bidi dabe augwali meba gasa geba dabe me tedu augwali dali pai. ³⁷ Tama augwali te sigi aji tomodu pobadi, te moni genuai wali me deli hogodama, tama wę dini te geba tomoba asali, tama te geba te węba hoa sigulama, te węgo geba pagana sainogo yai. ³⁸ Tama Jisas te geba dugi badu bidali, tama aga tobolu te geba dugiba munama, godege pila muani. Augwaligo aga hodoligi pelama, tama augwaligo te po wai, “Tisa po ola mabo bidio, te pade da węba hoa selama hagainogo ebao, tama nago homugo te kone palobewe?” ³⁹ Tama Jisas hodasa holama, tama te waliba wado po obadi, tama wębolo po weyu te po wali, “Megi da, usu dao. Nage sia sao! Nage megi tama silama isao!” Tama wali kekasa peyu, tama te wę me dwasianu memenege munu me ebeo. ⁴⁰ Tama agai aga wali pabo bidi dabebolo te po wai, “Magi baso dage te tiwai wi ebawe? Te dagego enade te konealubo po dąu weyu enaba duga homu me tialubo meniwe?” te po wai. ⁴¹ Tiali goli augwali wi dwai mu elama, tama augwa hasi tomode po mia siyu, te po wali, “Te bidi aga niwai bidi, tama te wali de wę dali sigo agai po odaliwe?” te po wai.

(Mat 8:28-34; Luk 8:26-39)

5 ¹ Te Jisas dali aga bidi dabe dali augwali te gebadu pelama, tama te sigi wę u badu pedai badu te Geresa dabego tōba sabolali. ² Agai te geba taga soai madi, tama polo te wabo pabo dwai haubo elalubo bidi me deli te Jisas tiāba asali. Te bidi te gū page hauwa elalubo tōde subigila biliduai bidi tama asali. ³ Aga te gū pagede pilala bilai. Tama te bidi me deligo aga dąu wabo te usu me isawai. Te sengo me usu me ebeo. ⁴ Te hauwa sogo augwaligo te hankapgo me sengo nogo saçä duyu yali. Tiali goli agai te hankap me sen me togwa sawani. Agai te moni bomo mu eyu, tama bidi mego aga tuainu ebo te usu me isawai. ⁵ Te sesemane sogo giligade me hulide me aga te gū pagede me bulu dude bidada biliduai. Tama agai i dwai olama, tama aga tigi te aga digi masigigo tologobo se iduai.

⁶Te agai Jisas te digibulu bidibadi digi sulama, tama aga udada asama, tama aga pageba kidu sugunagasali. ⁷Agai bomo elama mu i weyu, te po wai, “Jisas, nage ug Wade bidibo Godigo ogwa mu, nago magi sę enade yainogo ebawe? Eno te Godigo nogide nagebole hanalu obao, nago te dene enabolo me magio,” te po wai. ⁸Magi baso meni, te Jisasgo agabolo wali, “Nage dwai haubo noma bidi, nago te bidide bidibo taga pao,” wali.

⁹Tama Jisasgo agabolo hanalu wali, “Nago nogi dewe?” Tama agai te po wai, “Ena nogi Ami dao. Magi baso meni, da hani genuai hauwa dao.” ¹⁰Tama agai Jisasbolo i bomo elama weyu, Jisasgo te dwai haubo noma bidi dabe te moni tqde munu me sela sagio po widu geai. ¹¹Te genuai kibu hani sibi dabe augwali te dwasianu bulu du pade nai tuduladu bidaludai. ¹²Tama te dwai haubo noma bidi dabe augwaligo te bomonama i weyu, Jisasbolo te po wali, “Nago da te kibu dabe tomoba tagala palao,” te po wai. ¹³Tama Jisasgo augwali teba pao olama usu da wai. Tama te dwai haubo noma bidi dabe augwaligo te bidi taga peyu, tama augwali te kibu dabe tomoba bula sigi pali. Tama te kibu hani dabe bomonama mu udada pelama, tama te dwai bulu sau pado me deliba samonani. Te tigidali kibu umabo mu te bidi sese hauwa 2,000 dao. Tama augwali te sigi aqiba tulaluama, tama augwali te wę tulama poma peyu isila silai dao.

¹⁴Te kibu tononaluali bidi wi pelama, tama augwaligo po te hanuba me tede elalubo bulu dabeba sel a pali. Tama te we bidi augwali te sę ebo suagasaki.

¹⁵Augwali te Jisas bidiboba sabolama, tama augwaligo suali, te dwai haubo noma bidi hauwa polobadu agade bidali bidi, te bidi Jisas dali bidibo augwaligo suali. Megi da, aga ugwa gudama, tama aga homu kolesaga peda pelama, tama aga bugagia dualaludali. Tama te we bidi augwaligo te sulama, tama augwali wi yai. ¹⁶Tama te bidi dabe te Jisasgo yali sę suali bage, augwaligo te hanudu tamadi asali we bidibolo te bidide pedalali sę po pususu pali, polobadu te dwai haubo noma bidi agade bidai. Tama augwaligo te kibu dabede yali sę po me pusali. ¹⁷Tama tibaso, te we bidigo bomonama weyu, te Jisas augwaligo bulude bidibo tagalama, te gasaba pao wai.

¹⁸Tialima, Jisas te gebaba holobadi, tama polobadu te dwai haubo noma bidi sela sawani bidi, agai te tiwai po Jisasba hanalu wali, “Ena nage dali paio,” wali. ¹⁹Tiali goli Jisasgo hagela homu yali. Agai agabolo te po wali, “Nage naga beba me naga deli hani bidibo madiba pao. Tama nago te tigidali sę Genuai Bidigo nagede yali sę po pusugi peyu, tama agai nage homu dene eyu tau sali po me pusao,” Jisasgo te po wai. ²⁰Tama tibaso te bidi pelama, tama agai te sę yali po te hanu nogo si elalubo tq pedai badu te Jisasgo agade yali sę po tigidali pususu bilali. Tama tigidali we bidi augwali homu hauwa eyu noma sali.

Te isali wegi dali gasi yai we dali side po
(Mat 9:18-26; Luk 8:40-56)

²¹Te Jisas te gebabu peyu, te sigi aqma nogeali. Aga te wę u badu pedai badu tugi pali, tama genuai we bidi hani augwali aselama agaba

sisinagasali. Tama Jisas aga te sigi aji sane pade bidali. ²²Te Juda dabego bomai po odobo lotu be tonalubo tobolu bidi me deli asali, aga nogi te Jairus. Agai te Jisas sulama, tama aga saqqa paba basi gulama kidu sugunagasali. ²³Tama agai bomonama agabolo te tiwai po hanalu wali, “Te eno dwasianu wegi te pade isabo homu yai. Nago agaba nogo muagaselama, tama aga usu ma igulama bidimainogo obao,” te bidi Jairusgo te po wai.

²⁴Tama Jisas aga dali hodobo pali. Tama genuai we bidi hani augwali aga wali pali, tama aga pabo madi te augwali mu pena sali. ²⁵Tama we me deli bididuali, tama aga tigide kaneme sesemane sogo idubadi, tama te kibu be nogo si olama saqago si bidai. ²⁶Te hauwa dokta bidigo te hauwa sogo agaba dene madubo se iduali, tama te wego aga mone tigidali te augwaliba mena silali. Tiali goli agai gasi te dwasianu usu me ebeo. Menio. ²⁷Te wego te Jisasgo ebo se po odai. Tama aga aselama, tama aga te genuai we bidi hauwa bidalubo tomode bididuai. Aga te Jisas pabo wali nosali asidu, tama agai ugwa sabi badu diaña asiduai. ²⁸Agai te tiwai homu eyu te po wali, ‘Te eno nogo agai ugwa sabi badu naga diañbaso da, te ena usu ma yaibao,’ agai te homu yai. ²⁹Tama te deli sogo naga, te aga kaneme yali te togwa siyu tama wa sali, tama aga tigide te gasi pela silali homu yai.

³⁰Tama polo Jisasgo koneani, te meba bomo agade taga pabo koneani. Tama tibaso aga begelama, te we bidi dabebolo te po wali, “Dego eno uwawa nogogo diañyaniwe?”

³¹Tama aga wali pabo bidi dabego agabolo te po wali, “Nago suao, te genuai we bidi hani te nage pade pena sali dao. Tama magi baso nago te po weyu, ‘Dego eno uwawa nogogo diaño’ po obawe?”

³²Tama dego te tialiwe nama, Jisasgo te we bidi tomode tonono bilali.

³³Tama te wego te se agade pedelali koneama, tama aga wi eyu didibili dali yali. Tama tiyu aga asama, Jisas paba kidu sugunagasama, tama te tigidali se agade yali po te hanilama pusali. ³⁴Tama Jisasgo agabolo te po wai, “Eno wegi, te naga enade konealubo po daq weyu, enaba homu tialubo kolesaga ebogo te nage usu ma ilali dao. Nage pao, tama naga homu nagame wiegi yai elaluao. Nago gasi silimainogo yai,” te po wai.

³⁵Jisasgo te po odubadi, tama te bomai po odobo lotu be tonalubo tobolu bidigo bede bidibo bidi dabe meba aselawali. Augwaligo te po wali, “Te nago wegi isalio. Magi baso nago te se dene yabo po te po ola mabo tisa bidibolo obawe?”

³⁶Tiali goli Jisasgo augwaligo te wabo poba olo me musiama, odola tagalali. Agai te bidi Jairusbolo te po wali, “Nage wi egio. Nago enade konealubo po naga daq weyu naga homu enaba tialuama bidaó,” te po wai. ³⁷Tama agai te we bidi dabe augwali habu selama, te augwali aga dali me pelamuo wali. Pita me Jems me Jon, te Jems aga ama, te augwali sela naga aga dali pali. ³⁸Augwali te

tobolu bidi Jairus aga beba sabolama, tama Jisasgo suali, augwaligo te genuai po kulukulu wabo suali. Augwali te homu dene eboso dwai gela mu oladuali. ³⁹Tama aga te be tomoba pelama, tama augwalibolo te po wali, “Magi baso dagego te genuai po kulukulu weyu, te gela weyu ebawe? Te wai te aga mu isibeo. Aga te godege naga piali dao,” agai te po wai.

⁴⁰Tiali goli augwaligo aga gisugu mani. Tama tibaso agai te be tomode bidali tigidali we bidi buluba gudula silali. Tama agai te wai aga aya de ida dali si naga selama, tama aga wali pabo bidi sela sobadi elama, tama augwali te isali wai munalubo madi te be habu tomoba pali. ⁴¹Tama agai te weg i nogo tolalu, tama agabolo weyu, te po wali, “Talita kumi.” Te po begelama tama dena pogo te po page e tiwai dao, “Dwasianu wegi, eno nagebolo obao, nage hodaluao,” wali.

⁴²Tama polo te dwasianu wegi hodaluama tama soali. Agai kibu be 12 elaluai. Tama augwaligo te se ebo sulama, tama midigi siyu noma mu salio. ⁴³Tama Jisasgo po bomonama augwalibolo weyu, te po wai, “Dagego te se ebo suali po te bidi me delibolo munu me olamuo.” Tama agai augwalibolo weyu, te nai meba selama te dwasianu wegibolo maiqo po wai.

Te Nasaret dabe augwaligo te Jisas tudiba muani
(Mat 13:53-58; Luk 4:16-30)

6 ¹Te silama tama Jisas te bulude bidali tagalama, te aga page bulu Nasaret hanu teba pali. Tama aga wali pabo bidi dabe augwali aga wali pai. ²Te Sabat sogo aga te bomai po odobo lotu be tomoba pelama, tama te we bidi augwalibolo te Godigo po pusa mani. Tama augwali hauwago agai po odolama, tama augwali dwai noma siyu midigi sali. Augwaligo te po wali, “Te bidigo te ola mani po menade saliwe? Te agade koneani elalubo kolesaga, te menagiai kolesaga dawe? Mena tama tilama agai te bomai se ebowe? ³Te bidi aga te be se ebo kamda bidi naga dao, te dago koneani. Aga te we Mariago ogwa, tama aga ama dede da te Jems, me Josep, me Judas, me Saimon, te tama bagego ama gomunai bidi dao. Te aga abe dabe da dali ede bidibao.” Augwaligo te tiwai po olama, tama augwaligo aga dali dwai homu ela mani.

⁴Tama Jisasgo augwalibolo te po wali, “Te Godigo po pusubo profet bidigo nogi tigidali bulude elalubao. Tiali goli te aga page bulude me, te aga deli kaneme hanide me, te aga be mude me, te aga nogi meni yaibao,” te po wai. ⁵Tama agai te bomai se me deli te bulude me egobeo. Agai nogo te gasi bidi si selaba naga munama tama augwali wiegi yai ma ilali. ⁶Tama te we bidi augwaligo agade konealubo po däq wasiąyu, tama augwa homu agaba tialusiąbaso, te aga noma siyu midigi sali.

Jisasgo aga bidi dabebolo se mani
(Mat 10:5-15; Luk 9:1-6)

Te Jisasgo te Nasaret hanu tagalama, tama aga te bulu pedai dabeba biligi pelama, tama agai te Godigo po te we bidi dabe augwalibolo ola

mena mena bilai dao. ⁷Tama agai te aga wali pabo bidi nogo si olama sagago si bidi dabe i olama asali, tama agai augwali bidi si si tagala palali. Agai te dwai haubo noma bidi sela sayabo bomo te augwalibolo mawai. ⁸Tama agai te po augwalibolo wai, te bilibo dono augwaligo tolasa bilao wali, tiali goli augwali te biligi pabo sogo gasa doado bage dari me sabiligio wali. Augwaligo te bret me sabiligio wali. Te wa brasbel me augwaligo me sigio po wali, tama augwaligo gudali ugwa agebelede te mone bulama me sela pelamuo. Menio. ⁹Augwaligo te sagå nadoba mumainogo yao wali, tiali goli augwaligo te holobo ugwa si munamuo wali. ¹⁰Tama agai augwalibolo te po me wali, “Te dage bulu me deliba sabolama tama te be me deli tomoba pobaso da, teda dage te be tomode naga bidiao, te gasa gasa beba pigimio. Tama nosali dagego te be tagalama te dage pião. ¹¹Tama te meba bulude te augwaligo dage te augwa beba dage sela pisåma, tama augwaligo dagego po odisayu ebaso da, teda dagego te bulu taga peyu, tama te dagego sagade elalubo pobele bage sela sayao. Tama tiyu augwaligo te augwa dage dari yali dwai kolesaga homugo kone palomainao,” agai te po wai.

¹²Tama tibaso te po sela pabo se bidi dabe si si pelama, tama augwaligo te tiwai po te we bidi dabebolo haniani bulude pusali, “Dagego duga dwai se tagalao, tede ge neyu duga homu kolesaga begeleao,” te tobage po wali. ¹³Tama me augwaligo te dwai haubo noma bidi hauwa sela sanama, tama augwaligo te hauwa gasi yai bidi tigide wel munama tama augwali usu ma iliyu yai dao.

Te we bidi baptais mani bidi Jon isali po
(Mat 14:1-12; 9:7-9)

¹⁴Tama megi da, te gavman tuni bidi Herot agai te se ebo po dabe odali, magi baso meni, te tigidali to pedaide te Jisasgo nogi usu elalualio. Te meba we bidi augwaligo te po Jisasde wali, “Te we bidi baptais mani bidi Jon aga te gu pagede ma hodualio, te aga Jisas dao. Tama tibaso te genuai bomo aga nogode pedalubao,” te po wai. ¹⁵Tama meba augwaligo te po wali, “Woo, te meni. Jisas da, te aga te polobadu bidali profet bidi Elaija dao.” Tama mebago te po wali, “Aga te profet dao, te polobadu Godigo po pusubo se ela bilali profet dabe tiwai dao.”

¹⁶Tama te gavman tuni bidi Herotgo te wabo po odama, tama agai te po wai, “Polobadu eno bidi me tagala palama, tama agai Jon dogoni togolama tama aga isai dao. Tiali goli megi da, aga ma hodualali dao,” te po wali. ¹⁷⁻¹⁹Polobadu Herot aga ama Filip me bidibadi, te Herotgo Filipgo we nogi Herodias dagala sai. Tama tibaso Jongo hauwa sogo te Herotbolo te po wai, “Nago te naga amago we sali, te dolo me ebeo,” wali. Tama te we Herodias agai homu dwai mu te Jon dari elama, tama aga ela muabo homu yali, tiali goli agai te tiabo se usu ebeo. Herotgo te

bidi meba tagala palama, tama augwaligo te Jon pageabi elama, tama te kalabus bede aga te sengo kęani. Tiali goli agai Jon ela mubeo.²⁰ Magi baso meni, Herot aga te Jonde wi yai. Agai koneani, Jon aga te wiegi yai tama doloba pai bidi bidali. Tama agai te aga bugagia tonaluali. Agai te Jongo pusubo po odama, tama aga homu hauwa elama, tama aga homu sege iduali. Tiali goli agai te agai po odobo te godolo mu yai.

²¹ Nosali te we Herodiasgo te tiwai sunumi elalubo pedalali. Herot aga idago aga ame nani side pedalubaso, te agai genuai nai ulaiba wali. Agai te nai da tueinu ebo te aga dali gavman sede tau sabo bidi dabe dali tueinogo yali, tama te polalubo ami tuni bidi me, te Galili tqde bidalubo genuai bidi dabe dali te nai da tueinogo yai.²² Tama te we Herodias aga wegi aga te nai tubo madi tomoba aselama, tęabi yagasali. Tama Herot dali te aga dali nai tuali bidi dabe me, augwali godolo mu yali. Tama Herotgo te gesi wegibolo weyu, te po wai, “Nago magi nai saiwe? Nago enabolo po obaso, te eno nagebolo mu mawaibao,” te po wai.²³ Tama Herotgo agai po dąu wabo po bomonama weyu, agai agabolo te po wai, “Mu tama dao, nago mena nai po enabolo hanalu wali, te eno nage mawaibao. Te nago eno te we bidi tonalubo te bomo tomode togolama, te nage mao po obaso da, teda eno nage mawaibao,” agai te gesi wegibolo te po wali.

²⁴ Tama te wegi buluba solama, tama aga idabolo hanalugi soali, “Te eno mena nai sai po wagawe?” Tama aga idago te po wai, “Nago te we bidi baptais mani bidi Jongo toboli sabo po wao,” te po wali.

²⁵ Tialima, te gesi wegi polo ma te tuni bidi pageba ma asama, tama te po agabolo wali, “Megi naga tama eno homugo nago te baptais mani bidi Jongo toboli te pou me delide munama, tama nago enabolo mao,” wai.

²⁶ Agai te tama po obaso, tama te tuni bidigo homu sege mu yilio. Tiali goli agai homude te agai mu po da dąu wali te aga dali hodobo te duada pelama nai tudu pabo bidi dabe gesabidide wali po, te pode homugo kone palali. Tama agai te wegigo po sela sagobeo homu yilio.²⁷ Tialima, polo tama te tuni bidi Herot agai te ami bidi me deli tagala palama, te Jongo toboli togogi pelama sela asomainogo yali. Te ami bidi te kalabus beba pelama, tama Jongo toboli mage togwai.²⁸ Tama agai te Jongo toboli togwali te pou me delide munama, tama selasa aselama, tama te gesi wegibolo magasali. Tama te wegigo aga idabolo mawai.²⁹ Te Jon aga wali pabo bidi dabego te wabo po odama, tama augwaligo aga tigi sagaselama, tama augwaligo te gę pageba pubaligi pai.

Jisasgo bidi dabe umabo 5,000 bidi nai mani
(Mat 14:13-21; Luk 9:10-17; Jon 6:1-13)

³⁰ Te Jisasgo tagala palali po sela pali sę bidi dabe augwaligo sę silama, tama ma begasa aselama, tama augwali Jisas dali deliba sisinani. Tama

augwaligo te egi pali sę po miani, tama tigidali po augwaligo te we bidibolo ola mani po wai. ³¹ Te we bidi hauwa eda asiyu, ugwa soyu yali, tama Jisas dali aga wali pabo bidi dabe dali augwaligo te we bidi tau sabo sę ebaso, augwali nai tuyu toma nabo sogo meni yani. Tama tibaso Jisas aga wali pabo bidi dabebole te po wali, “Ae, tegobao, dena naga te bidi meni yaiba me deli pelama, tama dage toma dwasianu tuiagameo,” te po wai. ³² Tama augwali te geba selama, tama augwali te sigi ąi daidu te bidi meni yai habu me deli badu pali. Augwa naga palio.

³³ Tiali goli te we bidi hauwago augwali pabo suali, tama augwaligo te augwali koneani. Tama tigidali hanu we bidi augwali teba pedai badu tqdu udada pelama, tama augwali te Jisas pali sunumi te badu polasa pedaligi palio. ³⁴ Tama Jisas te gebadu pelama, te wę pedai badu tugi pelama, tama agai te we bidi hauwa bidalubo suali. Tama agai augwali homu dene genuai mu yali. Augwali te sipsip kibu tonalubo bidi meni yai tiwai bidaluali. Tama tibaso agai gagalama, te wiegi yai po hauwa augwaliba ola mawai.ⁱ ³⁵ Te giliga dega sigulainogo yali, tama te Jisas aga wali pabo bidi dabe te agaba aselama, tama augwaligo te po wai, “Te ede da, te bidi meni yai madi tama te giliga dega sigulainogo ebao. ³⁶ Nago te we bidi augwali tagala palao. Augwali peyu, te be nani dabebe pomainao, tama augwa tuabo nai abelegi pomainogo tagala palao,” te po wali.

³⁷ Jisasgo augwaliba te po wei ponani, “Duga digi te augwali nai maiqo.” Tama augwaligo agabolo te po wali, “Te nago homugo dago te bidi sese a naga 200 kina monego dago te bret abelegi pomainogo eyu obawe?” ³⁸ Tama agai augwalibolo te po wali, “Dagego nisu naga bret munalubowe? Dage pelama sugi piqo.” Augwaligo sula selama, tama augwaligo te po wai, “Dago te bret a naga, me te suqü si te tama elalubao.” ³⁹ Tama agai augwalibolo te po wali, “Tigidali augwali te wiegi yai nosaide wasisi pelama, duada piqo wao,” te po wali. ⁴⁰ Tama te we bidi tigidali augwali duada pali, tama te wasisi pelama, duada pali hani me badu te bidi sese a naga 100 bidi duada pobadi, te meba duada pali hanide te bidi si olama nogo si 50 bidi bidada pali. ⁴¹ Tama agai te a naga bret dali te suqü si me sali. Tama agai te dagaluba tonaludama, tama puba hwi po Godibolo walio. Tama agai te bret pebedama, tama te aga wali pabo bidi dabebole menama, tama augwaligo te we bidiba dobaba pali. Tama te suqü si me tologolama, tama te tigidali we bidiba dobaba palio. ⁴² Tama tigidali augwali te nai tudu pali te usu mu yalio. ⁴³ Tama te bret me suqü te me badu tigidali munalua pali, te augwaligo sisinama, tama te bonou wa basket te nogo si olama saqago si pagawani. ⁴⁴ Te bret me suqü tuali bidi dabe, augwali te bidi sese umabo te 5,000 bidi dao.

ⁱ 6:34 Nam 27:17; 1 Kin 22:17; 2 Sto 18:16; Ese 34:5; Sek 10:2; Mat 9:36

Jisas te sigi aji daidu pali
(Mat 14:22-33; Jon 6:16-21)

⁴⁵ Te nai mabo sę silama, tama Jisasgo aga wali pabo bidi dabe augwali te asesa pião olama, te augwali polo te gebaba holomainogo elama, tama augwali te aga asabo badu te sigi aji pedai badu polasa te Betsaida buluba pião wali. Agaduba digi te we bidi dabe augwa beba tagala palu pomainogo yai. ⁴⁶ Agai te we bidi augwali tagala palama, tama aga te bulu du bageba ugwa holai. Aga tede agaduba bididubadi te Godibolo po wainogo tiali. ⁴⁷ Te be pio ebode te geba te sigi aji tomode elaluali, tama Jisas agaduba te tqde me bididuai. ⁴⁸ Tama agai suali, te waligo augwali degelainogo ebaso, tama augwali te wę togobo sę dene mu yai. Te be posabo pade, teda Jisas te sigi aji daidu augwali bidiboba pali. Agai te augwali ela soainogo yai. ⁴⁹ Tiali goli te aga wali pabo bidi dabe augwaligo aga te sigi aji daidu asobo sulama, tama augwaligo homugo aga te isi bidi me deli da te homu yai. Tama augwali homu dwai noma sabo i dali walio. ⁵⁰ Magi baso meni, tigidali augwaligo aga sulama, tama augwali wi mu yai.

Tama polo Jisasgo augwalibolo weyu te po wai, “Dage homu tegaluiqo, bomo elama bidia. Te ena tama dao. Dage wi egimio,” te po wai. ⁵¹ Tama aga te gebaba holama, tama augwali dali bidibo si, tama te moni wali asali sia salio. Tama augwali midigi eyu noma mu selama, tama augwaligo homu hauwa yalio. ⁵² Magi baso meni. Te Jisasgo te we bidi hauwa tebolo bret dabe dobawali sę page tede augwaligo bugagia homu kone me palobeo. Menio. Augwa homu me hulialuama tama usu ebe.

Jisasgo te Genesaretde gasi bidi hauwa wiegi yai ma ilali
(Mat 14:34-36)

⁵³ Te silama, tama augwali te sigi aji nogolama, tama augwali te Genesaret pedai badu tugi pali, tama augwaligo te geba tede gebelali. ⁵⁴ Augwaligo te geba taga sobadi, tama polo te we bidi dabe augwaligo te Jisas sulama, tama aga konea palio. ⁵⁵ Tama te bidi dabe udada pelama, te pade elalubo tigidali bulu dabeba tedela pali. Tama tigidali bagego te Jisas bidibo po odama, augwaligo te gasi yai bidi dabe te gologobe Wade munama, tama augwaligo te augwali tolama tama aga pageba tolasa pelawali. ⁵⁶ Tama tigidali bulude me te tigidali hanude me te tigidali tq pedaide te Jisas sabaligi pabo digi, augwaligo te gasi yai we bidi dabe sela asama, te maket ebo pesage tomoba muagasiyu yai. Te augwaligo i bomo elama Jisasbolo weyu, tama te gasi yai we bidi dabego te agai ugwaba nogogo diqmainogo gogoliyu sula tagala wali. Tama tigidali gasi bidi dabego te agai ugwaba nogo munama, te augwali tigidali wiegi yai elama, usu ma ela pai dao.

Bidi mebago Godigo kolesaga tudiba muani
(Mat 15:1-9)

7 ¹Te meba Farisi hani bage meba dali, te Juda dabego bomai po page koneai bidi dabe meba dali, augwaligo te mone hanu Jerusalem taga soyu, te augwali Jisas bidibo madiba sisinagasaki. ²Tama augwaligo te aga wali pabo bidi dabe mebago nai tubo suali, te augwaligo nogo bolo hasia węgo te nogo habuba mu tugulama telasiąma te nai sela tuali. ³Te Farisi dabego me te tigidali Juda dabe augwaligo te augwa wąj noq̄ dabego polobadu yali kolesaga wali pelama, tama augwali te nogo aq̄ hasia nogo habuba usu nama telasiąbadi da, te augwaligo nai tusiąwai dao. ⁴Te augwali te Juda hani isawai bagego maket elaluboba pelama ma asiyu, tama augwaligo nogo wę telasiąbadi da, te augwaligo nai me tuai menio. Tama augwaligo te wąj noq̄de sali gasa kolesaga hauwa me wali peyu yai. Augwaligo te wę tubo kap me, sene me, genuai pou me, te pibo bet sai me wę telayu yai dao.

⁵Tama tibaso te Farisi dabe me te Juda dabego bomai po page koneai bidi dabe augwaligo te Jisasbolo hanalu wali, “Magi baso te nage wali pabo bidi dabe augwaligo te dago wąj noq̄ dabe augwaligo kolesaga wali pabo meniwe? Te augwaligo dago nogo wę telabo kolesaga isąma, tama nogo meda elalubadi nai tubo dao,” te po wai.

⁶Tama Jisasgo augwalibolo te po wai, “Te polobadu bidali profet bidi Aisaia agai dagede te po meba dolo mu weyu, tama te dage ili po wabo bidi dabe da wai. Agai te e tama tiwai po polobadu aséani,

‘Godigo te po wai, “Te hani bidi augwaligo eno
 nogi te pedauwaligo ugwaba sabo dao, tiali goli
 augwaligo homu te enade digibulu elalubo dao.

⁷Augwaligo enade olo dali lotu po weyu ebo
 dao. Magi baso meni, augwaligo te bidigo nigali
 bomai po naga ola mayu te po wali, ‘Te e da Godigo
 po dao’ wai,’^j

Aisaiago te po aséani.”^j

⁸“Tama dagego te Godigo bomai po tagalama, tama dagego te bidi dabego ola mabo po naga dąq̄ olama tolalubo dao,” Jisasgo te Farisi bage dali te Juda dabego bomai po page koneani bage me augwalibolo wai.

⁹Tama agai augwalibolo te po me wali, “Dagego te Godigo bomai po tagalabo bugagia koneama, tama duga digi ebo kolesaga wali pabo dao.

¹⁰E tiwai dao. Polobadu Mosesgo te bomo yai po pusali, ‘Nago te naga aya idago po wali pao,’ wai, tama me po wali, ‘Bidigo dwai po te aga aya idabolo wabo bidi te aga isimainao,’ te po si Mosesgo ola mani.^k ¹¹Tiali

^j 7:7 Ais 29:13 ^k 7:10 Sai 20:12; 21:17; Prs 20:9; Bom 5:16

goli dagego te po si tagalama, dagego e tiwai po dabolo ola mabo da, te bidi me deligo aga aya ma ida tau sabo mone ma doado bage elalubadi, tiali goli agai te po augwali sibolo waibao, ‘Te e mone da, te eno Godiba mawainogo sa muani elalubao’ po obaso da,¹² teda agai te aga ida bugagia wiegi yai ilibo se te tama tagaliyu da, te usu dao, dagego te tobage po ola mabo dao.¹³ Tama naga tiyu, tama dagego te duga wai noude sali kolesaga wali pelama, tama dagego te Godigo po dolobo aq ebo dao. Tama dagego te tobage tiwai kolesaga hauwa ebao,” Jisasgo te po wai.

Te bidi meda ilibo naide po wai

(Mat 15:10-20)

¹⁴Tama Jisasgo te we bidi augwali i ma olama, tama agai te po augwalibolo wali, “Dage tigidaligo eno po odama tama homugo konea sao! ¹⁵Te bidi me delide te nai bulu badu elaluali tama te nai aga tomoba pelama, tama te naigo te bidi meda ilibo te usu me egobeo. Menio. Te bidi tomode elaluali nai dabe te buluba soyu, tama tego naga te bidi dwai meda ilaibao. ¹⁶[Te olo elalubo bidigo agai te po odioa.”]

¹⁷Agai te we bidi bidalubadi taga peyu, te aga beba pai. Tama aga wali pabo bidi dabego agabolo te begelama wali po digi po page hanalu wali.

¹⁸Tama agai te po augwalibolo wali, “Dage me te homu kolesaga meni eyu, obawe? Te dagego konebewe? Te tigidali bulu badu elaluali nai te bidi tomoba pelama, tego te bidi dwai meda ilibo usu egobeo. ¹⁹Magi baso meni, te tiwai naigo te bidi homu tomoba mu pogobeo. Menio. Te haliga tomoba peyu, tama te di tabo sunumidu naga pelama, tama nosali te di beba paibao,” agai te po wai. Te pode Jisasgo te tigidali haniani tubo nai te wiegi yai da, te habu selebo menio, te po wai.

²⁰Tama agai te po me wai, “Te dwai nai te bidi tomode elaluama tama buluba asobo, tego te bidi meda ilibo dao. ²¹Te bidi tomode, te homu kolesaga tomode pedalubo nai dabe te e tiwai: te dwai homu kolesaga dabe, te penani ebo kolesaga, me te nai wi sabo kolesaga me, te bidi ela mubo kolesaga me, ²²te we sabo dolobo kolesaga me, te mena nai sainu homu hogodama pesa dalobo kolesaga me, te haniani dwai dwai kolesaga me, te tibo po weyu te hagoma ebo kolesaga, me te bidi nogi posobo po wabo kolesaga ebo, me te hagoma homu elama te esela pabo bidigo kolesaga tiwai eyu ebo dao. ²³Te tobage tigidali dwai kolesaga te bidi tomode elaluali te buluba asiyu, tama te bidi meda ilibo dao,” Jisasgo te we bidi dabebolo te po wai.

Te Fonisia hani wede po

(Mat 15:21-28)

²⁴Te Jisas hogodama tama aga te bidali bulu taga soali, tama te Tair hanu pedaiba pai. Aga te be me deli tomoba pali, tama aga tede bidibo te

bidi me deligo aga koneidali homu yali. Tiali goli aga geme duala sainogo ebo te usu me egobeo.²⁵ Menio. Te we me deligo aga bidibo po odali. Te we aga wegi elaluali, tama te dwai haubo noma bidi te wegide bidai. Tama te we aga polo tama asama, te Jisas ságą pąba kidu sugunagasali.²⁶ Te we aga te Juda hani isławai we da, aga te Fonisia hani we, te Siria moni tqde elalubo bulu da. Agai te Jisasba i weyu, te agai wegide elalubo dwai haubo noma bidi sela sáyao wai.²⁷ Tiali goli Jisasgo agabolo po wei ponoyu, te Juda hani dali te Juda hani isławai bage me te side po digi po begelama tama te po wai, “Dago te wai dabebolo te hasia nai mao. Tiyu dago te wai dabego nai sela tuyu tama te yowi dabeba te nai sáyabuo,” te po wai.

²⁸ Tiali goli te wego agabolo po wei ponoyu, te po wali, “Genuai Bidi, nago te mu po obao. Tiali goli te yowi dabego te wai dabego nai kagali te tebol sai dologoba tulalubo nai sela tubo dao,” te wego te po wai.

²⁹ Tama Jisasgo agabolo te po wali, “Nago te tiwai po obaso da, teda nage ma geasa pagameo. Te dwai haubogo nago wegi dąu elaluali te taga palio,” te po wai.³⁰ Tama te we aga beba ma geasa pelama, tama aga wai te bet saide pila mubo suali, tama mu tama, te dwai haubogo dąu elaluali te taga pai sualio.

Jisasgo te olo degai bidi wiegi yai ma ilali

³¹ Te silama, megi da Jisas ma hogodama, tama te Tair tq pedaide bidali tagalama, tama te Saidon bulu tomodu pai. Tama aga te hanu nogo si elalubo genuai tq tedu pelama gana, tama te sigi ą Galili pąba sabolali.³² Tama augwaligo bidi me deli agaba selasa asali, te aga olo degebadi te hamena begelebadi yai elaluai. Tama augwaligo Jisasba hanalu te bidiba nogo diąyao po wai.³³ Tama tibaso, Jisasgo aga selasa pelama, tama te we bidi taga soali, tama augwaduba si naga bidigi pali. Tama Jisasgo nogo dani te bidigo oloba munama, tama pesa sánama, tama te pesa nogo daniba muyu, te bidigo hamenaba muanio.³⁴ Tama agai te dagaluba tonaludu, tama mobo bomonama ponani, te aga homude gela wabo tiwai elama, tama agai agabolo weyu te po wai, “Efata!” po wai. Te tiwai wali, “Nago olo dala pao,” wai.³⁵ Tama te bidigo olo degai elaluali te dala pali, tama aga te hamena panialuali nai te polo taga pali, tama aga po bugagia wai.³⁶ Tama Jisasgo augwaliba habu seleyu, bomonama wali, augwaligo te sę yali po te bidi me delibolo munu me wagio po wai. Agai bomonama augwali habu selali, tiali goli menio, augwaligo bomo mu elama, te po pususu palio.³⁷ Tama te sę yali po odali we bidi tigidali augwali midigi siyu, tama noma mu sali, tama augwaligo te po wai, “Tigidali sę agai ebo, te agai wiegi yai sę naga ebo dao. Agai te olo degai bidi me, te bidigo po odomainogo iliyu, tama te pedauwali pania sai bidigo po ma omainogo eyu yai dao,” te we bidi dabego te po wai.

Jisasgo te we bidi hauwa umabo 4,000 nai mani
(Mat 15:32-39)

8 ¹Te silama, tama nosali me sogo te genuai we bidi hani ma sisinani, tama augwali tuabo nai tula silama tama nai meni yai. Tama tibaso, Jisasgo aga wali pabo bidi dabe i olama asobo si, tama agai augwalibolo te po wali, ²“Eno te e bidalubo we bidi augwalide homu dene ebao. Augwali ena dali sela sogo bidalio, tama megis augwali nai meni yai dao. ³Tama augwali nai sili bidai elalubadi te eno augwali te augwa beba pomainu tagala palali da, teda augwali tomode pobadi te gedu te gęq page elama, te augwali sunumiba tulaluabao. Meba augwali te digibulu asiyu asalio,” te po wai.

⁴Tama aga wali pabo bidi dabego agabolo te po wei ponoyu, te po wai, “Te ede da, te bidi meni yai madi bidibao. Tama dago menade te bret tubo nai selama, te we bidi augwali mawaibawe?” Te po wai.

⁵Jisasgo augwaliba hanalu wali, “Dagego nisu naga bret munalubowe?” Tama augwaligo te po wali, “Te a naga olama me badu si munalubo,” wai. ⁶Tama agai te we bidi augwalibolo olama, tama augwali te tqba duada pao wali. Tama agai te a naga olama me badu si bret selama, tama agai Godiba puba hwi olama, tama te nai pebedama, tama aga te wali pabo bidi dabebolo menama, te augwaligo dobaba pomainogo yali. Tama augwaligo te we bidiba dobaba palio. ⁷Tama augwaligo te dwasianu sugų si sela me elaluali. Tama agai te me selama, te Godiba puba hwi olama, tama aga wali pabo bidi dabebolo te me dobaya po wai, tama augwaligo te me dobaba pali. ⁸Nosali te we bidi augwali te nai tula silama usu ebaso, tama aga wali pabo bidi augwaligo te elalubo nai meba dwasianu delage sisinama, tama te bonou wa basket te nogo a naga me si tede bulama pagawani. ⁹Te nai tuali we bidi augwali bidi sese hauwa umabo 4,000 bidi usu tama. Tama Jisasgo augwali pomainu tagala palilio. ¹⁰Tama elama, polo aga te aga wali pabo bidi dabe dali te gebaba holama, tama augwali te Dalmanuta te badu pedaiba pai.

Te Farisi meba augwaligo te bomai sę ebo suainogo yai
(Mat 16:1-4)

¹¹Te Farisi dabe meba augwali aselama, tama augwaligo te Jisas dali te wado po tiwai weyu konila po wai. Augwaligo te Jisasbolo bomai sę me deli yao po wali. Augwaligo aga te usu sabo sę senayu naga yai. ¹²Jisasgo aga homu noma bidide sęgę ebo aq̄ ebaso, tama agai te po wai, “Magi baso te we bidi hanigo e sogode te bomai sę yao obawe? Eno mu po dagebolo obe dao, te e sogode te bidalubo bidi dabego suabo bomai sę me deli eno me egobeo. Mu menio!” wali. ¹³Tama agai te Farisi bidi dabe augwali tede bidaludubadi taga peyu, tama aga te gebaba ma holama, tama te sigi aq̄ pedai u badu pabo gagalali.

Jisasgo te nai yisde po digi po begelama wai
(Mat 16:5-12)

¹⁴Tama te Jisas wali pabo bidi dabe augwaligo te homu gegeda peyu, tama augwaligo te tubo nai bret meba dali sel a sisawai. Augwaligo te bret deli digi naga te gebade augwaligo munaluai. ¹⁵Tama Jisasgo po bomo elama augwaliba weyu, te po wai, “Dage bugagia tonaluiq! Dage te Farisi dabego yisde me te gavman tuni bidi Herotgo yisde te dage dua dao!” te po wai.

¹⁶Tama augwa digi augwa hasi po mia siyu, te po wai, “Dago te bret meni baso, tama agai te po da dali obao,” te po wali. ¹⁷Jisasgo koneama, tama agai augwalibolo te po wali, “Magi baso dagego te tiwai po duga hasi mibawe, ‘Dago te bret menio,’ te magi baso obawe? Te dagego homude kone palai elalubo meniwe? Te dage homu kolesaga meni yai elalubawe? Te dagego homu puna paliwe? ¹⁸Dagego gedu elalubo, tama dagego te nai subo meni da, agawe? Dagego olo elalubao, tama dagego te po odobo meni da, agawe? Dagego homugo te bretde gegeda palai dawe?”¹ ¹⁹Eno te a naga bret te bidi sese hauwa umabo 5,000 bidi te nai pebedama mani sogo, dagego te nisu naga bonou wa basket te me badu munaluai bretgo pagawai dawe?” Tama augwaligo te po wai, “Te nogo si olama sagago si da,” wali. ²⁰“Tama eno te bidi sese hauwa umabo te 4,000 bidi te nai bret te bidi meni yai bulude pebedama mani sogo, dagego te nisu naga bonou wa basket te me badu munaluai naigo paganai dawe?” Tama augwaligo te po wai, “Te a naga olama me badu si dao,” te po wai. ²¹Tama agai augwalibolo te po wai, “Tama dagego me konesiama ebawe?”

Jisasgo te gedu widai bidi wiegi yai ilali

²²Tama augwali te Betsaida hanu teba sabolali. Tama te we bidi augwaligo bidi me deli te agaba selasa asali, te aga gedu widai. Tama augwaligo Jisasbolo weyu, te bidiba nogo muao po walio. ²³Tialima, Jisasgo te gedu widai bidigo nogo tola selama, tama agai aga te buluba odasa soali. Tama agai te bidi geduba pesa sanama, tama aga geduba te nogo ugwidu munama, tama agabolo hanalu wali, “Nago te nai me deli subowe, ma meniwe?” ²⁴Tama te bidigo tonono bilama, tama agai te po wai, “Awe, eno te bidi meba suali. Eno augwali te ni tiwai suali, tama augwali bilaluali,” te po wai. ²⁵Tama Jisasgo nogo aga geduba ma muai. Tama te bidigo bomo elama tonono bilali, tama agai gedu wiegi yai pedelama, tama aga tigidali nai hania sula silai. ²⁶Tama Jisasgo te bidi aga te aga beba tagala palu, tama te po wai, “Nage te bidi dabe bidibo be nani tomoba ma pigio, naga beba dolo pao,” te po wai.

¹ 8:18 Jer 5:21; Ese 12:2; Mak 4:12

Pitago Jisas aga te Krais da po haninani po
(Mat 16:13-20; Luk 9:18-21)

²⁷Te Jisas aga te aga wali pabo bidi dabe dari hogodama, tama augwali te tq pedai Sisaria Filipai teba pali. Tama te sunumidu peladu te agai aga wali pabo bidi dabe augwaliba hanalu, te po wali, “Te we bidi dabe augwaligo ena de nogi ebo dawe?”

²⁸Tama augwaligo agabolo te po wai, “Te meba augwaligo nage te we bidi baptais mani bidi Jon nogi ebao. Tama mebagu nage te polobadu bidali bidi Elaija nogi ebao. Tama mebagu te po weyu, nage te Godigo po pusali polobadu bidali profet bidi me deli da po obao.” ²⁹Tama Jisasgo te augwalibolo hanalu wali, “Duga digi te ena de nogi ebo dawe?” Tama Pitago agabolo po wei ponoyu, te po wai, “Nage Krais dao, e we bidi tau somainu Godigo nage sa muyu asaiba wali bidi dao,” te po wai. ³⁰Tama agai augwali habu seleyu, te augwaligo bidi me delibolo olamu da po wai.

Jisasgo te aga isama ma hodaluibao po wali
(Mat 16:21-28; Luk 9:22-27)

³¹Te Jisas agai te aga wali pabo bidi dabe augwalibolo te tiwai po ola mabo gagalali, “Te Godigo Bidi Mu te aga dene hauwa tolomainu yaibao, tama te Juda dabego tobolu bidi dabe, me te genuai pris bidi dabe, me te Juda dabego bomai po page koneai bidi dabe augwaligo te aga tudiba munama, tama aga ela muaibao. Te nosali sela sogo bidama te aga ma hodaluibao,” te po wai. ³²Agai te po augwalibolo hania haninama wai. Tama tibaso, Pitago Jisas te sesege badu odasa solama, tama aga dari te tobage po wagio po wali. ³³Tiali goli Jisasgo begelama, tama aga wali pabo bidi dabeba tononalu, tama agai Pitabolo wado iliyu, te po wai, “Satan, nage ena tudi badu soao! Nago te Godigo homu kolesaga wali me pabo menio. Te meni. Nago te tqde bidigo ebo homu kolesaga naga te wali pobao,” te po wai.

³⁴Tama agai te we bidi agaba asomainu i weyu, te aga dari wali pabo bidi dabe me asomainu yai. Tama aselama, tama agai augwalibolo te po wai, “Te bidi me deligo ena wali asainogo da, te aga digi aga aiyaba elaluama, tama agai e homu yao, aga ena wali pobadi aga dene sobaso da, teda te usu da, te homu ebo bidigo agai aga ni pedai tolasa pabo tiwai eyu, aga ena wali asao. ³⁵Magi baso meni, te bidi me deligo aga digi aga bidabo ula bugagia tonalubo homu eboso da, te aga bidabo ula te hagawaibao. Tiali goli te bidigo enade te Godigo wiegi yai gesi pode te homu kone palama, tama aga bidabo ula tagalu da, te aga bidabo ula mu saibao. ³⁶Te bidigo te tigidali tqde doado bage siyu, te aga digi aga bidibo ula tagaluyu da, teda te bidigo genuai wiegi yai nai tama saliwe?

Te meni. ³⁷Te bidigo mena mone mayu, te aga bidabo ula dobola siyu ma abelaibawe? Te menio. ³⁸Tama te megi e sogo tōde bidibo we bidi dabe augwali da, te aga bidi taga soayu penani ebo we tiwai da, augwaligo Godigo po taga soali, tama haniani dwai sē ebo dao. Te bidi augwali bidalubo tomode bidiyu, tama agai enade me te eno ola mabo pode me hale eyu eboso da, teda nosali ena te Godigo Bidi Mu, ena me te bidide hale eyu aga nogi gema dualaluaibao, te eno ena Ayago genuai bomo yai ula dali, te wiegi yai tedali ensel mobo bidi dabe dali e tōba ma asobo sogo tama tiaibao,” Jisasgo te po wai.

9 ¹Te po silama, tama agai augwalibolo te po wai, “Eno mu po dagebolo obao, te ede dolalubo bidi dabe meba te augwali me isisābadi, tama te Godigo te we bidi tonalubo sē te aga bomo dali pedalubo augwaligo sueibao,” agai te po wai.

Jisasgo tigi te gasagi yai hasegelali
(Mat 17:1-13; Luk 9:28-36)

²Nosali te Sarere deli bidai madi, Jisasgo Pita me Jems me Jon selama, tama agai augwali te ugwanu holai bulu du me deli te bageba odasa holali. Tama augwa naga tede bidaluali. Tama augwali gedude Jisasgo tigi hasegelama, tama aga gasagi yai pedalai. ³Tama agai ug Wade te dula gegemani ebo tiwai pedalali, tama te nala nisi tedela tiwai mu yai. Te tōde bidi me deligo ugwa te tiwai gilama pedalubo usu me egobeo. ⁴Tama te polobadu bidali bidi si Elaija dali Moses dali si pedalam, tama augwali sigo te Jisas dali po mibo te augwaligo suali. ⁵Pitago te sulama, tama agai Jisasbolo weyu, te po wai, “Tisa, po ola mabo bidi, da ede bidibo, te wiegi yai ebao. Dago te bola yano be sela sē yainogo, te me deli nago, te me deli Mosesgo, te me deli Elaijago dao,” Pitago te po wai. ⁶Magi baso meni, te augwali wi mu eboso, te agai mena po wagawé weyu, te Pitago konesiāma te homu yai.

⁷Tama te dagalu pō me deli pedelama, te augwali mesega sagasali. Tama te pō tomodu te pedauwali me delidu te po waida wai, “E bidi da, te eno Ogwa da, eno aga godolo mu ebao. Dagego agai po odiāo,” wai. ⁸Tama polo tama, te augwaligo tonono bilali, tama augwaligo te gasa bidi me si te subeo, polo pali. Te Jisas agaduba deli naga te augwali dali bidibo suali.

⁹Augwali te bulu dude bidali tagalama tama aiyaba dudulayu, tama Jisasgo augwali habu seleyu, te tiwai po wai, “Te dagego suali sē, te dagego bidi me delibolo munu me wasiāma, te ena Godigo Bidi Mu te gū page tagalama ma hodalobo sogoba usu naibao,” wali.

¹⁰Tama tibaso te po augwa homuba dāq̄ ola selama, tama augwa hasi digi te e tama po miani, “Te gū page tagalama ma hodaluaiba po wali, te mena sē dawe?” te po miani. ¹¹Tama augwaligo agabolo hanalu wali,

“Magi baso te bomai po page koneani bidi dabe augwaligo te po weyu, te hasia bolo te Elaija asaibao, tama nosali naga te Godigo tagala palabo bidi assaibao, te po magi baso wabo dawe?” augwaligo te po hanalu wali.^m 12-13 Tama Jisasgo augwalibolo te po wali, “Awe, mu tama, te Elaija bolo hasia asama, tama te Godigo tagala palabo bidi asobode te tigidali nai ma dodolagasomainu yaibao. Awe, eno dagebolo obao, Elaija te asalio. Tama te bidi dabe augwa homugo digi wali peyu, augwaligo dwai sə aga dali yali, te Godigo po bukude polobadu aşənī po tiwai gilama yai dao. Tiali goli te Godigo po bukude te ena Godigo Bidi Mude magi po tede elalubawe? Te po e tiwai dao, ena te dene hauwa toloyu, tama te bidi dabego ena tudiba muaibao,” Jisasgo te po wai.

**Te ogwa esela pabo sə ilibo dwai haubo noma bidide po wali
(Mat 17:14-21; Luk 9:37-43)**

14 Augwali pelama, tama te bulu du pageba dulama, te wali pabo bidi dabe meba bidalubo madi sabalubadi, tama te genuai we bidi hani te augwaliba sisinai elalubo suai. Tama te Juda dabego bomai po page koneani bidi dabe meba augwaligo te wado po konila po augwali dali oduai. 15 Te po odobo we bidi tigidali augwaligo te Jisas asobo sulama, tama polo te augwali midigi siyu te noma sali. Augwali te aga pageba udada pelama, tama augwaligo siade da po aga dali wali. 16 Tama agai te aga wali pabo bidi dabebolo hanalu wali, “Dagego te konila po wabo te bomai po page koneani bage dali te mena pode obawe?” te po wai.

17 Tama te we bidi hani tomode bidali bidi me deli agai te po Jisasbolo wei ponoyu, te po wai, “Tisa, po ola mabo bidi, te eno ogwade te pedauwali panialubo dwai haubo noma bidi me deli elalubaso, tama eno aga te nageba odasa asai. 18 Te hauwa sogo te dwai haubogo aga dą̄ olaluyu, tama agai aga te tqba sədubao. Tama aga pedauwalide te pesa dini pedaliyu, tama aga kele penane dagana selama, tama aga tigi te tigidali boma peyu didila pai. Tama eno te nage wali pabo bidi dabebolo te dwai haubo sela sayaō po hanalu wali, tiali goli te augwaligo usu ebeo.” Te bidigo te po wai.

19 Jisasgo te po odama, tama agai te we bidi augwalibolo wai, “Te dage hani we bidigo enade konealubo po dą̄ olama, duga homu enaba tialubo menio! Nisu naga sogo ena dage dari me bididuaibawe? Nisu naga sogo te eno dagego sege tolomainogo ebawe? Dagego te ogwa enaba odasa asao,” wali. 20 Tama augwaligo te ogwa agaba odasa pali. Te dwai haubogo Jisas sulama, tama polo te ogwa degelainu mu yali, tama te wai te tqba degasa dulama, tama hogogo bele pelama, tama te dini pesa me deli te aga pedauwalidu pedalali. 21 Tama Jisasgo aga ayabolo hanalu wali,

^m 9:11 Mal 4:5; Mat 11:14

“Nisu naga sogo aga te tiwai elaluai dawe?” Tama agai te po wai, “Te aga dwasianu elalubadi te tama tiai elaluai dao. ²²Tama hauwa sogo te dwai haubogo aga te siaba sāyu, te wēba sāyu yai, tama aga ela muabo homu yai. Tiali goli te nago usu ilabo homu yaiba wida, teda nago da homu dene elama, tama da tau sao!” wali.

²³Jisasgo agabolo te po wali, “Awe, mu da, te nago enade te po wali, ‘Nago usu yaiba wida,’ nago te po wali. Tiali goli te tiwai meni. Te nago enade konealubo po dāu olama, tama nago homu enaba tialubo usu elalu da, te nago tigidali nai sabo te usu yaibao.” ²⁴Tama polo te ogwa aga ayago i weyu, te po wai, “Eno nagede konealubo po dāu wali, tiali goli tede ena te habuge tiwai yai! Nago ena tau sao!” ²⁵Jisasgo te genuai we bidi hani augwali sisinagasobo suali. Tama tibaso agai te dwai haubo bidiba wado iliyu, te po wali, “Nage te pedauwali pania sai, me nage te olo degai haubo bidi, eno nagebolo obe dao, nago te ogwa taga pao! Tama nage aga tomode munu ma bidilamu dao,” te po wai. ²⁶Tama te dwai haubogo te dwai i weyu, tama agai te ogwa degelai sedu genama, tama te dwai haubogo te aga taga peyu tama palio. Tama te ogwa te isai bidi tiwai munualuali. Tama bidi hauwa augwaligo te po weyu, “Aga te isali dao,” wai. ²⁷Tiali goli Jisasgo aga nogo tola selama, tama aga hodolobaso, tama aga doligulalio.

²⁸Nosali Jisas te be tomoba pelama, tama te aga wali pabo bidi dabe naga bidalubadi tama augwaligo agabolo hanalu wali, “Magi baso dago te dwai haubo sela sāwainu yali te usu meni yaniwe?” ²⁹Tama agai te po augwalibolo wai, “Te Godibolo gedu haluasa po wabogo naga te tobage dwai haubo noma bage sela sābo te usu yaibao. Te gasa sē ebogo da, te usu me egobeo,” te po wai.

Jisasgo te aga isāma ma hodaluiba po te si sogo wali

(Mat 17:22-23; Luk 9:43-45)

³⁰Augwaligo te bidali bulu taga peyu, tama augwali te Galili tō tomoba pali. Tama Jisasgo te aga menade bidibo, te we bidi augwaligo aga koneidali homu yai. ³¹Magi baso meni, agai te aga wali pabo bidi dabe ola mabo sē yainogo yai. Tama agai augwalibolo te po wai, “Te augwaligo ena Godigo Bidi Mu te bidi dabego nogoba muaibao. Tama augwaligo ena ela muaibao. Augwaligo ena ela munama, tialima sela sogo bidama nosali te ena ma hodaluiba,” te po wai. ³²Tiali goli augwaligo te po page konesiāwai. Tama augwaligo agabolo hanalu wabo wi yalio.

De aga genuai bidi bidigowe po

(Mat 18:1-5; Luk 9:46-48)

³³Tialima, augwali te Kaperneam hanuba sabolali. Augwali te be tomoba pela siali madi, tama Jisasgo aga wali pabo bidi dabeba

hanaluyu, te po wai, “Te da asobadi, te sunumide dagego duga hasi mena po miai dawe?”³⁴ Tiali goli augwaligo po me wabeo. Magi baso meni, te sunumide augwaligo te augwali tomode de polalubo bidi bidaibawé te po miai.³⁵ Tama aga duagulama, tama te wali pabo bidi nogo si olama saqago si bidi i wai. Tama agai augwalibolo te po wai, “Te bidi me deli aga te polalubo bidi bidabo homu ebaso da, teda aga te nosali sabi badu mu bidama, te tigidali bidi tau sabo s̄e ebo bidi tiwai bidaoo,” wai.³⁶ Te po olama, tama agai te dwasianu wai me deli selama, tama aga te augwali tomode dolalumainogo ilali. Tama agai aga nogo tolasa, tama augwalibolo te po wai,³⁷ “Te bidigo eno nogide homu kone palama, tama te tiwai dwasianu ogwa wai me deli tau sobaso da, te agai ena tau sobao. Tama ena tau sabo bidi, agai te ena naga tau me siyu me ebeo. Menio. Agai te eno Aya me tau sobao, agai ena tagala palobaso te ena asai dao,” Jisasgo te po wai.

Te da dali boi bidi isiabo bidi, te aga dago abagi da
(Luk 9:49-50)

³⁸ Te aga wali pabo bidi me deli, aga nogi Jon, tego agabolo weyu, te po wai, “Tisa, po ola mabo bidi, te bidi me deligo nago nogide te dwai haubo noma bidi sela s̄abo s̄e ebo dago suali. Tiali goli aga te da wali me asobeo. Tama tibaso, dago aga habu selali,” te po wai.³⁹ Jisasgo agabolo te po wai, “Dagego te aga habu me selamuo. Te bidi me deli agai eno nogide te bomai s̄e me ebaso da, teda agai polo tama te eno nogi posobo po me wainogo me egobeo.⁴⁰ Te dade boi bidi homu me isiabo bidi da, aga te dago abagi dao.⁴¹ Te bidi me deligo dage sulama, tama agai te homu elama, ‘Eno te Kraisgo bidi dabe tau saiba’ homu elama, tama agai te kapde w̄e dage mobaso da, teda eno mu po dagebolo obao, te bidigo nosali sabo wiegi yai nai da, te me hagagobeo,” Jisasgo te po wai.

Te dwai s̄e tomoba gegebo kolesaga po
(Mat 18:6-9; Luk 17:1-2)

⁴² Te Jisasgo po me weyu, te ola mabo po wai, “Te bidi me deligo e tiwai wai pulubago enaba homu begagaselama, te konealubo po d̄aq olalubadi, te aga dwai s̄eba tulalumainu iligi sogo da, teda te tebo bidigo dwai s̄eḡe mu sigi da. Tama aga te tiwai dwai s̄e te wai dali idali weyu, te bidi dabe augwaligo te bidigo magede moni s̄eḡe yai masigi te bonogo k̄enama, tama aga te tamu āj̄ moni ge tomoba sela s̄ayao aga tede isigi sogo da, teda te usigi dao. Te s̄e agaba pedaligi sogo da, aga te wai dali dwai s̄e isiâma tama moni dene sigi menigi da.⁴³ Tama tibaso, dage deli delide e tiwai dao. Te nago nogogo te nage dwai s̄eba tulalumainu ilibaso da, te nago te nogo aga togolama sela s̄ayao. Teda nago nogo deli naga elaluyu, tama nago te dwai s̄e isiabo te sesemane sogo bidada pabo ula

sabo, te usu dao. Tiali goli nago nogo si me elaludu da, tama augwaligo dwai sę eyu, nage te genuai dene mu siyu bidada pabo te isisąbo sia dabo madi teba peyu da, te dwai mu dao.⁴⁴ [Te bulude te dwasianu isisąbo kigi dabe te augwa tigide elalubao, tama te sia dabo munu me sula sogobeo.]⁴⁵ Tama naga sagago te nage dwai sęba tulalumainu ilibaso da, nago te sagą aga togwama sela sayao. Teda nago sagą te deli badu naga elaluyu, tama nago te dwai sę isisąbo te nago te bidabo ula mu saibao, te usu dao. Tiali goli nago sagą te si elaludu da, tama augwaligo dwai sę eyu nage te genuai dene mu siyu bidada pabo te isisąbo sia dabo madi teba peyu da, te dwai mu dao.⁴⁶ [Te bulude te dwasianu isisąbo kigi dabe te augwa tigide elalubao, tama te sia dabo munu me sula sogobeo.]⁴⁷ Ma, nago gedugo nage te dwai sęba tulalumainu ilibaso da, te nago aga gudama sayao. Teda nago gedu deli naga elaluyu, tama nago te dwai sę isisąbo te sesemane sogo bidada pabo ula sabo, te usu dao. Tiali goli nago gedu si me elaludu da, tama augwaligo nage dwai sęba tulalumainu iliyu da, augwaligo nage te dwai isisąbo sia dabo madi saoba sawaibao, te dwai mu dao.⁴⁸ Te bulude te dwasianu kigi dabe te augwali tigide bidalu te augwali me isisąma, tama te sia dabo te me sula sogobeo,” Jisasgo te po wai.”ⁿ

⁴⁹ Te agai po me weyu, te po wai, “Te bidi megó tamu aga tubo naide mubo tiwai gilama, Godigo te we bidi dabeba te dabo sia mawaibao.⁵⁰ Tamu te wiegi yai nai dao. Tiali goli, te tamu te halia pobaso da, teda dagego mena tiwai ilama tama te tama ha ma elalugowe? Te usu egobeo. Te tamude elalubo tubo nai te pusu tiwai gilama, tama dage bugagia bidiqo, duga hasi nagamea homu eyu tama bugagia bidiqo,” Jisasgo te po wali.

Jisasgo te we sabo sę togobo kolesagade po wai
(Mat 19:1-12; Luk 16:18)

10 ¹ Te Jisas hogodama, te bidali bulu taga peyu, tama aga te Judia provins tő pedai badu te pabo aji Jordan pedai u badu pai. Tama we bidi hauwa agaba ma sisinagasali. Tama agai te aga ebo kolesaga wali peyu, tama Godigo po te augwalibolo ola mawai. ² Tama te po ola mobadi, te Farisi dabe meba agaba aselama, tama augwaligo usu sinayani. Augwaligo te po wali, “Te da Juda dabego bomai pode te bidigo aga we sela səbode, te usu da wali elalubowe, ma meniwe?” ³ Jisasgo augwaliba po wei ponoyu, te po wai, “Mosesgo mena bomai po dagebolo mawai dawe?” ⁴ Augwaligo te po wali, “Moses agai te po wai, bidigo we sabo togobo nogi pepa aşenama, tama te we sela səwainu eyu da, te usu da po wai dao.”^o

ⁿ 9:48 Ais 66:24 ^o 10:4 Bom 24:1-4; Mat 5:31

⁵Tiali goli Jisasgo augwalibolo te po wai, “Te dagego hagoma ebaso, tama Mosesgo te tobage bomai po dagebolo polobadu aşçai dao. ⁶Tiali goli polobadu mu, hasia bolo te Godigo tigidali nai nigali sogo, agai te bidi me we augwali si nigai dao.^p ⁷Tama tibaso, megı bidigo te aga aya de ida si tagalama, tama aga we dalı kęq pelama bidaibao. ⁸Tama tiyu, augwali si tigi te deli mu naga pedelaibao. Tama tibaso, augwali si te tedali bidu tedali bidu yali tiwai gilama ma elalugobeo. Menio. Augwali si tigi te dedeli mu tiwai naga bidaibao. ⁹Tama tibaso, te Godigo tama kęnani nai, te bidigo me togolamu dao,” Jisasgo te po wai.

¹⁰Te po olama, nosali augwali te be tomoba ma geasa pelama, tama aga wali pabo bidi dabego agabolo te wali pode hanalu wali. ¹¹Agai te po augwalibolo wali, “Te bidi me deligo aga we tagalu, tama gasa we sobaso da, te bidigo aga hasia sali we doloyu tama penani ebo kolesaga yai dao. ¹²Te tiwai me, te we me deligo aga bidi tagalu, tama gasa bidi dali pobaso da, te we agai te penani ebo kolesaga yai dao,” Jisasgo te po wai.^q

Jisasgo te dwasianu wai puluba augwali te wiegi yai po mani
(Mat 19:13-15; Luk 18:15-17)

¹³Te we bidi meba augwaligo te augwa dwasianu wai puluba meba te agaba odasa asali. Augwaligo homugo te agai nogo augwaliba muyu, te augwaliba dwagi yai sę pedalabo po omainu homu yai. Tiali goli te aga wali pabo bidi dabego augwaliba wado ilali. ¹⁴Jisasgo te tebo sulama, tama agai homu dwai yai. Agai augwalibolo te po wai, “Dagego te dwasianu wai puluba augwali enaba asomainu emaina. Dagego augwali panigimio. Te Godigo bomo dologoba peyu tede bidabo we bidi, augwaligo homu kolesaga te e wai pulubago homu kolesaga tiwai si dao. ¹⁵Eno mu po dagebolo obe dao, te bidi me deli aga te dwasianu wai puluba tiwai gagayu, te God bidibo madi tomoba pabo homu me isiąwani bidi, aga te tomoba painu ebo usu me egobeo. Mu menio,” te po wai. ¹⁶Tama olama, tama agai nogogo te wai puluba tolalu, tama augwali deli deliba nogo ugwdatu munama, tama augwaliba te wiegi yai mobo mawai.

Doado bage hauwa elalubo bidide po
(Mat 19:16-30; Luk 18:18-30)

¹⁷Te Jisas hogodama tama ma pobadi, tama bidi me deli udada asama, tama agaba kidu sugunagaselama, tama agabolo hanalu, “Te po ola mabo wiegi yai tisa bidio, te eno magi ilama tama eno te bidabo ula selama, bugagia sesemane sogo bidadu peyu bidadu pogowe?” Te po wai. ¹⁸Jisasgo agabolo te po wai, “Magi baso nago ena wiegi yai da nogi obawe? God agaduba deli naga te wiegi yai dao. ¹⁹Nago te bomai po

^p 10:6 Gag 1:27; 5:2 ^q 10:12 Mat 5:32; 1 Ko 7:10-11

koneanio: 'Nago te bidi ela mugio. Nago te penani sę egio. Nago nai wi sigio. Nago gasa bidibolo tibo po me olamuo. Nago tibo pode gasa bidigo doado bage anoma elama sigio. Nago te naga aya de ida sigo po wali pao,' te bomai po dabe nago koneanio, te wali pao," Jisasgo te po wai.^r

²⁰Tama te bidigo Jisasbolo weyu, te po wai, "Tisa, po ola mabo bidi, te ena wai boqde digi gagalasa megı e sogoba usu nagasali, eno te bomai po tigidali wali pai dao." ²¹Jisasgo agaba tonaludama, tama aga dali dwagi yai homu eyu godolo mu yai. Agai agabolo te po wai, "Nage te nai me deli digi habuge yai elalubao. Nage pelama, te nago doado bage tigidali munama, tama nago tede mone selama, tama te magi nai meni yai bidi dabebe dobayao. Tama tiyu da, te nago wiegi yai nai mu te Godigo bidibo madide elaluabao. Tama nage ena wali asao," te po wali. ²²Te bidigo te po odama, tama aga gesabidi hulia selama, tama aga homu sęgę ebaso, tama aga pai. Magi baso meni, te agai doado bage hauwa elalubaso te homu yai.

²³Te bidi taga pelama, tama Jisasgo aga wali pabo bidiba tonono bilama tama te po wai, "Te doado bage hauwa elalubo bidi dabe augwali te God bidibo madi tomoba pabo te sinabo sę yaibao," te po wai. ²⁴Tama aga wali pabo bidi dabe te pode midigi siyu noma sai. Tiali goli Jisasgo po wei augwalibolo ma ponoyu, te po wai, "Te eno ogomani dabe, te God bidibo madi tomoba painu ebo bidi, aga te sinabo sę dene yaibao. ²⁵Te moni kibu kamel te ugwa hobolobo medabu agebele tomodu dula painu da, aga te sinabo sę dene me isiąma te doado bage hauwa elalubo bidi te Godigo bidibo digi tomoba painu sinabo sę ebo tiwai gilama me egobeo," te po wai. ²⁶Tiali goli te aga wali pabo bidi dabe augwali te pode homu midigi mu selama, tama augwa hasi po mia siyu te po wali, "Te tiwai elalubaso da, teda de te Godigo aga ma dobola somainogo usu yaibawé?" ²⁷Tama Jisasgo augwaliba dolo ponama tonalu, te po wai, "Te we bidi dabe augwa digi tede augwali usu egobe, tiali goli God agai da, te usu yaibao. Godigo te tigidali sę yainu ebo usu dao."

²⁸Tama Pitago po me deli Jisasbolo weyu, te po wai, "Suao, da nage wali pabo bidi dabe, dago te tigidali doado bage tagalama, tama da nage wali bilabao," te po wai.

²⁹Jisasgo te po wai, "Eno mu po dagebolo obao, tigidali bidigo enade homu kone palu, tama te Godigo wiegi yai gesi pode me koneama, tama te be, ma ama, me abe, me ida, me aya, me wai, me gi, te tigidali nai taga peyu da, ³⁰teda Godigo augwaliba te tobage nai te 100 nedama tama wei ponaibao. Tama augwali te tőde bidalubo sogo teda augwaligó be hauwa siyu, te ama me hauwa siyu, te abe me hauwa sobadi, te ida me hauwa sobadi, te wai puluba me hauwa siyu, te gi me hauwa sobadi

^r 10:19 Sai 20:12-16; Bom 5:16-20

yaibao. Tama te bidi mebago te dwai kolesaga hauwa augwaliba yaibao. Tama te nosali bidabo sogo augwali te sesemane bugagia bidada peyu, bidada pabo ula me saibao. ³¹Tiali goli te sogo te megis polali bidi dabe hauwa mu augwali nosali tudi badu yaibao. Tama te megis tudi badu yali bidi dabe hauwa augwali poligi soaibao,” Jisasgo te po wai.

Sela sogo wali Jisasgo aga isibode po wali
(Mat 20:17-19; Luk 18:31-34)

³²Augwali te sunumidu pelayu, tama augwali te Jerusalem moni hanuba pabo homu yai. Te Jisas poligi pelama pali. Tama aga wali pabo bidi dabe augwali homu hauwa yai. Tama augwali wali asali we bidi, augwali wi yali. Jisasgo aga wali pabo bidi te nogo si olama sagago si te augwali tedali ma selama, tama agaba pedelabo sę po te po augwaliba wabo gagalali. ³³Agai te po wali, “Odiqo, megis da te Jerusalem hanuba paibao. Tama da teba sabolama, tama bidi me deligo ena Godigo Bidi Mu te genuai pris bidibolo me, te Juda dabego bomai po page koneai bidi dabe augwaligo nogoba muaibao. Tama augwaligo ena po tü ilibo sę elama, tama ena ela muabo po minama dą̄ waibao. Tama augwaligo ena te Juda hani isławai bidi dabebe mawaibao. ³⁴Tama te bage augwaligo posobo po enaba weyu, tama enaba pesa savy, te ena subigila eliyu elama, tama ena ela muaibao. Tama sela sogo ena te gü pagede bidama, tama nosali ena Godigo Bidi Mu ena ma hodaluibao,” Jisasgo te po wai.

Jems de Jon augwali si te genuai bidi bidabo homu yali
(Mat 20:20-28)

³⁵Te bidi Sebedigo ogwa si, Jems me Jon, augwali si te Jisasba aselama, te po agabolo wai, “Tisa bidi, da sigo te magi nai po deli nagebolo hanalu waibao, tama da sigo homugo nago te sę da sibolo emainu homu ebao.” ³⁶Tama agai augwali sibolo te po wai, “Dage sigo homugo eno mena sę dage sibolo emainogowe?” ³⁷Augwali sigo agabolo te po wali, “Nosali te nage genuai tuni bidi pedalubo side, da sigo homugo te da si me deli te nago dolo nogo badu dugayu, te me nago pobase nogo badu dugayu emainu te homu yai dao,” te po wai. ³⁸Tiali goli Jisasgo te aga tamadi tama dene sabode me, te aga isibo side yabo sę po, te side agai po digi po begelama, weyu, tama augwali sibolo te po wali, “Dage sigo te enabolo hanalubo naide po te dage sigo bugagia konesiąma te obao. Te dage sigo eno tamadi e aji tuainu ebo kap tede te dage sigo homugo tuabo te usu dawe? Ma, te dage sigo eno megis sainu ebo baptais te dage sigo me te sabo homu usu dawe?”

³⁹Tama augwali sigo agabolo te po wai, “Te da si usu yaibao,” wai. Jisasgo augwali sibolo te po wai, “Mu dao, te megis eno aji tubo kapde te dage sigo me tueibao. Te megis eno baptais sabo, te dage sigo me saibao.

⁴⁰Tiali goli de te eno dolo nogode ma pobase nogode duayabo sę, te sę eno me egobeo. Menio. Godigo digi te duabo sia sai te bidi mebabolo mawainu agai sisi ilai elalubao,” Jisasgo te po wali.

⁴¹Te wali pabo bidi dabe nogo si bage augwaligo te tiali po odama, tama augwaligo te Jems de Jon si dali dwai homu mu yai dao. ⁴²Tiali goli Jisasgo augwali i olama asobo si, tama agai augwalibolo te po wai, “Dagego koneani, te Juda hani isławai we bidi hani tomode te augwa toboli bidi dabego augwali aiyaba elaluabo bomo hauwa elalubao, tama augwa genuai bidi dabego te augwali bomo elama mu tonalubo dao.

⁴³Tiali goli te kolesaga dage tomode munu me elalugobeo. Menio. Te bidi aga te dage tomode genuai bidi bidabo homu eyu da, te aga dagego sę ebo bidi tiwai bida. ⁴⁴Tama bidi te polalubo bidi bidabo homu eyu da, teda aga te tigidali bidigo sę ebo nogi meni yai bidi tiwai bida. ⁴⁵Magi baso meni, te ena Godigo Bidi Mu tama, tama ena me te bidigo ena tau sabo sę emainu me asobeo. Menio. Ena asali, te eno augwali tau sabo sę yainu asai, tama eno bidibo ulago digi te hauwa we bidi ma abelagasaki dao,” Jisasgo te po wali.

Te Jeriko hanu gedu widai bidi po
(Mat 20:29-34; Luk 18:35-43)

⁴⁶Te Jisas dali, aga wali pabo bidi dabe dali, augwali te Jerusalemba pabo tjudu pobadi, tama augwali te Jeriko hanuba sabolali. Tama agai te Jeriko tagalama pali. Tama aga wali pabo bidi dabe, te genuai we bidi hani dali, augwali aga dali pali. Tama bidi me nogi Bartimeus, te Timeus aga ogwa, aga te sunumi bogo sese badu dulaludai. Aga te gedu widai, tama te sunumidu soabo we bidi dabe augwalibolo te mone ge me doado bage momainu i udubo sę iduai. ⁴⁷Agai te Nasaret bidi Jisas asobo po odama, tama agai i wabo gagalama bomonama wai, “Jisas, nage te Devitgo Ogwa dao, nago ena homu dene eyu tau sao!” te po wali. ⁴⁸Te bidi hauwa augwaligo aga wado iliyu, te po wali, “Nago pedauwali pania sao,” wai. Tiali goli agai po dagu genuai olama i wali, “Devitgo Ogwa, nago ena homu dene eyu tau sao!”

⁴⁹Tama Jisas dolagaselama, tama te po wali, “Te aga i olama asomainao.” Tama augwaligo te gedu widai bidi i olama, tama augwaligo agabolo te po wali, “Nago haliga bomo emainao. Nage hodaluao. Agai nage i obao.” ⁵⁰Tialima, aga genuai holobo ugwa peda şanama, tama polo doligulama, tama Jisas bidiboba pali. ⁵¹Tama Jisasgo agabolo te po wali, “Nago homugo te eno magi sę nagebolo emainuwe?” Tama te gedu widai bidigo agabolo te po wali, “Tisa bidi, te ena gedu ma pedelimainu elama, bulu ula ma suainogo yai.” ⁵²Tama Jisasgo agabolo te po wali, “Nage pidua. Te naga enade konealubo po dagu olama, naga homu enaba tialubo kolesaga ebogo te nage wiegi yai ma ilibao.” Te tama polo te aga

gedu usu elama, tama aga bulu ula ma suali. Tama agai te Jisas dali te sunumidu wali pai.

Jisas te Jerusalem tomoba tuni bidi tiwai pedalama pali
(Mat 21:1-11; Luk 19:28-40; Jon 12:12-19)

11 ¹Augwali te Jerusalem moni hanu paba sabolama, tama augwali te Betfage me Betani te be nani siba sabolali, te oliv ni sili elalubo bulu du nogi Oliv te pade elaluai. Tama sabolama, tama Jisasgo aga wali pabo bidi si tagala palu, ²tama augwali sibolo te po wai, “Dage si te e pade elalubo te be naniba piəo. Dage si te be nani tomoba pabode, tama polo dage sigo te meg i tama holobo gesi kibu donki me deli augwaligo te haliga bonogo gebelai elalubo sueibao. Te bidi me deli tede dualasa bilisiawai elaluabao. Te aga gebelali haliga bono pedalama, sela asao. ³Tama bidi me deligo dage sibolo te po weyu, ‘Magi baso dage sigo te se ebawe?’ obaso da, teda dage sigo te po waiyəo, ‘Te Genuai Bidigo agade te se elalubo, tama agai te aga polo ma tagala palaibao’ po waiyəo,” Jisasgo augwali sibolo te po wai.

⁴Te po obaso, augwali pai, tama augwali sigo te gesi ogwa bidi donki me deli suali, augwaligo te be me deli te sunumi pade bulu badu gebelama elaluai. Tama augwali pelama, te haliga gebelai elalubo bono pedali. ⁵Tama te pade dolaluali bidi meba augwaligo te po augwali sibolo wai, “Dage sigo magi baso te ogwa bidi donki kibu haliga pedebawe?” ⁶Tama augwali sigo te Jisasgo wali po tiwai gilama augwalibolo wali. Tama augwali sibolo te donki sela pao olama, augwaligo usu da po wai. ⁷Tialima, augwali sigo te ogwa bidi donki Jisasba sela asali. Tama augwali sigo te augwa bulubo ugwa te donki tudi daiba pasugulama, tama te daide Jisas duayali. ⁸Tama bidi hauwa augwaligo te augwa holobo ugwa dabe te sunumide wawa sili pai. Tama meba augwali te giba pelama, tama te yabe hauwa elalubo ni nologo togolama, tama te sunumiba muna muna pali, aga soabo sunumi au iliyu tama yali. ⁹Tama te polasa pabo we bidi augwaligo me, te nosali asobo we bidi augwaligo me, te augwaligo bomo elama i wali, “Te Godigo nogi ugwaba mu sinao! Godigo te Genuai Bidigo nogide asali bidi te wiegi yai bugagia ilao!”¹⁰ Godigo meg i te asobo bomo te wiegi yai ilao, te dago wai noq te Devitgo bomo dao. Te Ugwade Mu Bidibo Godigo nogi ugwaba sao!” augwaligo te po bomo elama weyu bilali.

¹¹Tama te tiwai eyu, Jisas te Jerusalem tomoba sabolama, tama te Moni Lotu Be tempel tomoba pelama, tama tede elalubo tigidali nai tonono bila sililio. Tiali goli te giliga dega sigulai. Tama tibaso, aga wali pabo bidi nogi si olama sagago si bidi dabe dali augwali te Betani be naniba pigi pai.

^s 11:9 Tib 118:25, 26

**Jisasgo te Moni Lotu Be tempel bede te bisnis sę iduali
bidi dabe ela gudulali
(Mat 21:18-19)**

¹² Te nosali sogode augwaligo te bulu Betani tagalama, tama Jerusalemba ma asobadi, tama Jisas aga nasi yali. ¹³ Agai te ni kaya me deli te dwasianu digibulu gana dolalu, tama yabe te hauwa elalubo suali. Aga te ni paba pelama, te du meba walai elalubowe naga gegainu yai. Tama aga te ni pageba sabolali, tiali goli tede te nai du walai elalubo me deli subeo. Menio. Te yabe naga elaluali. Magi baso meni, te ni fikgo du walobo sogo pedalubeo. ¹⁴ Tama Jisasgo te niba te po wai, “Nago te du munu me walamuo. Mu menio,” te po wai. Tama aga wali pabo bidi dabe augwaligo te po wabo odai.

¹⁵ Augwali ma pelama, te Jerusalemba ma sabolali. Tama Jisas te Moni Lotu Be tempel be tomoba pelama, tama te be tomode bisnis sę ebo bidi dabe sela sayu, ela gudulubo sę gagalali. Agai te mone ge dobu si ebo bidi dabego tebol sai gea palobadi, te ba dabe dobu si ebo bidi dabego duabo sai dali gelibadi yai. ¹⁶ Tama augwalibolo agai te tobage nai dabe tolasa biliyu, te tempel Be tomodu bilibo po te augwaliba habu selali. ¹⁷ Tama agai augwalibolo te po ola mani, “Te Godigo po bukude te aseani pode e tiwai po Godigo wai po elalubao, ‘Eno be da, te tigidali we bidi hanigo te enabolo gedu haluasa po omainu ebo be da’ po wai. Tiali goli dagego te geme nai wi sabo bagego be pedalubo tiwai gilama ilibao,” Jisasgo te po wai.^t

¹⁸ Te genuai pris dabe dali, te Juda dabego bomai po page koneai bidi dabe dali, augwaligo te sę ebo po odama, tama augwaligo aga ela muabo sunumi gegebo sę gagalali. Augwali agade wi yali. Magi baso meni, te tigidali we bidi augwali te agai ola mani pode te midigi eyu noma mu sai. ¹⁹ Tama te be pio ebode Jisas dali, te aga wali pabo bidi dabe badi, te augwaligo te Jerusalem tagalama palio.

**Te kaya nide konea sali po
(Mat 21:20-22)**

²⁰ Te nosali sogode te kigamu mu augwali Jerusalemba ma pobadi, tama augwaligo te ni kaya sasia pai suali. Te yabe me te ni pedali dali tigidali te sasia pali. ²¹ Pitago tede homugo ma kone palama, tama agai te po wai, “Tisa bidi, suo. Te do sogode nago te ni kaya dolaiba po wai. Megi te aga sasia pali dao,” Pitago te po wai.

²² Tama Jisasgo augwaliba po wei ponoyu, te po wai, “Te dagego Godiba konealubo po dą̄ olama, tama duga homu agaba tialubaso da, ²³ teda dagego

^t 11:17 Ais 56:7; Jer 7:11

te bulu dubolo po weyu, ‘Nage hogodama, tama nage te tamu aῆba samonao,’ te po wagameo. Tama homu si me isayu, tama duga homude Godide konealubo po dāu naga olama, te po weyu, ‘Eno te wali po te mu po pedalaibao,’ te homu mu eyu da, teda dagego te bulu dude wali po gilama te sē mu pedalaibao.

²⁴Tama tibaso, eno dagebolo obe dao, dagego te nai me deli sainogo te Godibolo po weyu, te naide hanalu wabo po wabo side, tama dagego homude te Godide konealubo po dāu olama tama te homu eyu da, ‘Awe, mu da, dago te nai saibao,’ te sē te dagego wali po tiwai gilama pedalaibao. ²⁵Tama dage doliculama gedu haluasa po wabo sogo, tama te duga Aya dagalude bidibo bidi agai te dagego dwai sē yali sela sāwainogo eyu, tama dagego te bidi me deligo te dagebolo dwai sē ilali te homu kone palobaso da, teda dagego te bidigo dwai sē yali te sela sāyao. ²⁶[Tiali goli te dagego gasa bidigo dwai sē sela sasiabaso da, teda duga Aya dagalude bidibo bidi agai te dagego dwai sē te me sela sagobeo.”] Jisasgo augwalibolo te po wai.

Jisasgo aga sē yabo bomo menade saliwe?

(Mat 21:23-27; Luk 20:1-8)

²⁷Tama augwali te Jerusalemba ma sabolai. Jisas te Moni Lotu Be tempel tomode bilibadi, tama te genuai pris bidi dabe dali, te Juda dabego bomai po page koneai bidi dabe dali, te toboli bidi dabe me, augwali te agaba asali. ²⁸Augwaligo agabolo te po wai, “Nago magi bomo elalu, tama nago te sē dabe ebawe? Tama dego te bomo nageba menama, tama nagebolo weyu, te sē yao po waliwe?” ²⁹Jisasgo augwalibolo te po wali, “Eno me te eno magi nai po me deli te dagebolo hanalu wabo homu ebao. Tama dagego eno po wei ponobaso da, teda eno me te eno magi bomo elalu, eno te sē dabe ebo po dagebolo waibao. ³⁰Te Jongo te we bidi baptais mani sē, dagego homugo te dagalude nai da homu ebowe, ma te bidigo sē naga te homu ebawe? Dagego te po enabolo wei ponao.”

³¹Tama te toboli bidi dabe augwa digi augwa hasi po miani, “Dago te mena pogo agai po wei ponaibawe? Dago te po weyu, ‘Te dagalude nai da’ po obaso da, teda agai te po waibao, ‘Magi baso dagego homu aga poba begi pabewe?’ te po waibao. ³²Tama dago te po obadi, ‘Te bidigo nai naga da’ po obaso da, teda te po usu meni yaibao,” wali. Magi baso meni, augwali te we bidide wi yai. Tigidali we bidigo homugo te Jon da, te Godigo po pusubo profet bidi da, te homu yai. ³³Tama tibaso, te toboli bage augwaligo Jisasba po wei ponoyu, te po wai, “Dago konebeo.” Tama Jisasgo augwalibolo te po wai, “Eno me te eno magi bomo elalu, te eno te sē dabe ebo po te dagebolo eno me wagobeo,” wali.

Te bono du gi tonalubo bagede po digi po begelama wali po

(Mat 21:33-46; Luk 20:9-19)

12

¹Tama Jisasgo te po meba begelama, te Juda dabego genuai bagebolo wai. Agai te po wali, “Te bidi me deli agai te bono du wain gi bulama,

tama obogo bagulali. Tama agai te wain bono du aji sabo agabo madi nigliama, tama te gi tonaluabo bidigo bobage sigi be me deli se yani. Tama agai te gi te bisnis se yainogo ebo bidi dabe mebagi nogoba muai. Tama aga digi te aga digibulu bulu habuba palio. ²Te nosali aga te bodolu sogo pedalubaso, teda agai te se bidi me deli te wain gide se ebo bidi dabe bidalubo madiba tagala palai. Agai horugo te gide nai meba te agaba momainu yai. ³Tama augwaligo te se bidi pageabi elama, tama aga dodolagia elama, tama aga olo ma tagala palilio. ⁴Tama te gi page bidi agai gasa se bidi me te augwaliba tagala palali. Tama augwaligo aga tobolude gagai ilama, tama agaba dwai se ilali. ⁵Tama agai se bidi me dedeli ma tagala palai. Tama augwaligo te bidi aga ela muai. Tama agai se bidi hauwa mu ma tagala palai. Tama augwaligo meba olo eliyu, tama meba te augwaligo ela muyu yali. ⁶Tama agai bidi deli mu ma elalualio. Te aga ogwa, agai godolo mu yai. Nosali mu agai te ogwa te wain gi se ebo bidi dabe bidalubo digi ma tagala palali. Agai te tiwai homu yai, ‘Te augwaligo eno ogwago po odaiba’ homu yai. ⁷Tiali goli te gide se yali bidi dabego augwa hasi tomode po mia siyu, augwaligo te po wai, ‘Te e bidigo te aga ayago doado bage tigidali nosali saibao. Te bageo, dago te aga ela muinao. Tama dena digi te gi tolaluabao,’ te po wai. ⁸Tama olama, te augwaligo aga selama, ela muai. Tama augwaligo aga tigi te gi sesege bulu badu sawani.’”

⁹“Tialima, te wain gi page bidi agai magi yaibawe? Te aga aselama, tama te gide se yali bidi dabe te augwali ela muaibao. Tama agai te gi te gasa bidi meba augwaligo nogoba mawaibao. ¹⁰Dagego te Godigo po bukude aṣeansi po me deli dagego nedebewe? Agai e tiwai po wali dao:

Te se bidi dabego sela sawani masigi, meg i da aga
te be polalubo kele ni tiwai daq elalubo masigi
pedalai elalubao. ¹¹Genuai Bidigo digi te se
pedalumainu ilali, tama dago sulama, te wiegi yai
mu yai.”^u

Dagego te po polobadu nedebewe?” Jisasgo te po wali.

¹² Te Juda dabego toboli bidi dabe augwaligo Jisas pageabi elama tuainu yali, tiali goli augwali te we bidide wi yai. Augwaligo koneani, Jisasgo te po digi po begelama, te augwali toboli bagede wai. Tama augwaligo aga taga peyu, tama augwali palio.

Te gavmanibolo takis mabo sede po
(Mat 22:15-22; Luk 20:20-26)

¹³ Tama nosali te Juda dabego toboli bidi dabe augwaligo te Farisi meba dali, te Herot wali pali bidi meba me augwali tagala palama,

^u 12:11 Tib 118:22-23

te augwali Jisas bidiboba pali. Augwaligo te Jisas usu sabo po meba wainogo yai.¹⁴ Augwali aselama, tama augwaligo agabolo te po wai, “Tisa, po ola mabo bidi, dago koneani, nage mu po wabo bidi dao. Tama nago homugo te bidi delide homu naga me egobeo. Nago te nogi yai bidi dali gasa po me tedali weyu, te nogi meni yani bidi dali gasa po me tedali weyu me egobeo. Menio. Nago te mu pode naga te Godigo kolesaga te we bidi augwali ola mayu ebao. Nago mena homu ebawe? Te dago takis te Rom gavman tuni bidi mu Sisar agabolo mobaso, tebogo dago te Godigo bomai po bolobowe, ma meniwe? Dago mawaibawe, ma dago magobewe?” Augwaligo te po wai.

¹⁵ Tiali goli Jisasgo augwaligo te tibo po wabo te agai koneama, tama agai augwalibolo te po wai, “Magi baso dagego ena usu sobawe? Te mone ge me deli sela aselama, eno sueibao,” te po wai. ¹⁶ Tama augwaligo te mone ge me deli sela asali. Tama agai augwalibolo hanalu wali, “Te e mone gede elalubo noma me te aşəani nogi te dego dawe?” Tama augwaligo te po wai, “Te gavman tuni bidi Sisargo dao.” ¹⁷ Tama Jisasgo augwalibolo te po wei ponani, “Te Sisar gavmanigo nai, te dagego Sisarbolo maiqo. Tama Godigo nai, te dagego Godibolo maiqo,” wali. Tama augwali te pode noma mu sali.

Te bidi isəma ma hodalobo po
(Mat 22:23-33; Luk 20:27-40)

¹⁸ Megi da te Sadyusi hani bidi meba augwali te Jisasba asali. Te hani augwaligo te homu yai, te isali bidi ma hodalogobeo wai. Tama augwaligo agabolo hanalu wagasali. ¹⁹ “Tisa, po ola mabo bidi, Mosesgo te po me deli aseyu, dabolo te tiwai bomo yai po wai: te bidi me deli isəma, tama agai wai meni yani, tiali goli aga we te bididubaso da, teda te bidi aga amago te we selama, tama aga isali ama tau siyu, te wai ame nomainogo yao, te Mosesgo dabolo te bomai po mawai dao. ²⁰ Tialima, te ama a naga olama me badu si bidai. Te gomunai bidigo we sali, tama nosali aga isali, tama wai me ame nisiauwai. ²¹ Tialima, tomo bidigo te we sali, tama aga me isai, tama wai me ame nisiauwai. Tama te tudi badu bidigo me tiwai yai. ²² Te tiwai naga ela pidubadi, tama te a naga olama me badu si ama dabe tigidaligo te we sesa pali goli, te wai me ame nisəma, tama augwali isila pai. Tama nosali mu, te we me isali. ²³ Tialima nosali te isai we bidi dabe ma hodalobode, te sogo te we aga te dego we mu bidigowe? Nago koneani, te bidi a naga olama me badu si bidi dabego te we te augwaligo selama bidai,” te Sadyusi bagego te po wai.

²⁴ Tama Jisasgo augwalibolo te po wai, “Dagego te Godigo po bukude elalubo po page me konebeo. Tama te Godigo bomo me dagego konebeo. Tama tibaso, dagego te we bidi ma hodalobode wabo po geda muyu obao. ²⁵ Te isai bidi dabe te ḡu page tagalama ma hodalobo sogode, te

isai we bidi augwali te bidigo we ma siyu me egobeo. Menio. Te augwali te dagalude bidalubo ensel mobo bidi dabe bidalubo tiwai gilama bidaluaibao.²⁶ Tiali goli te isai bidi dabe ma hodaluiba po wabo, te dagego te Mosesgo aṣeansi bukude te dwasianu nide sia dali po wali te po nedebo meniwe? Te wali pode Godigo te po Mosesbolo te polobadu isali bidi dabede wai, ‘Ena te Abrahamgo God, me Aisakgo God, me Jekopgo God te dao,’ te po wai.²⁷ Tama te po page e dao, ma te bidi dabe selago mobo noma isigi sogo da, teda God da augwaligo God me menigi da. Tiali goli te tiwai elalubeo. Menio. Aga da, te bidibo ula elalu bidalubo bidi dabego God dao. Te dagego po te mu geda muanio,” Jisasgo te Sadyusi bidi dabebolo te po wai.

Godigo hasia polalubo bomai po
(Mat 22:34-40; Luk 10:25-28)

²⁸ Te Juda dabego bomai po page ola mabo bidi me deli aga asama, tama agai te augwa hasi konila po wabo odali. Tama agai odobadi, te Jisasgo wiegi yai po augwaliba wei ponobo po odali. Tama agai Jisasbolo hanalu wali, “Mena bomai po agai te tigidali bomai po aiyaba elaluama, tama te polalubo dawe?”

²⁹ Jisasgo po wei ponoyu, agabolo te po wai, “Te polalubo bomai po te e dao:

‘Dage Israel hani we bidi, dagego odio! Genuai
 Bidi, dago God, aga deli digi naga te dago Genuai
 Bidi dao.³⁰ Tama nago te Genuai Bidi godolo
 mu yao, te nago God dao, te nago homu tigidaligo
 me, te nago noma bidi tigidaligo me, te nago homu
 kolesaga tigidaligo me, te nago bomo tigidaligo me
 te aga godolo mu yao.’^v

³¹ Tama te si wabo bomai po te e dao:

‘Nago gasa bidi godolo eyu, te nago naga godolo
 ebo tiwai gilama yao.’

Te gasa bomai po te genuai elama, tama te bomai po si te aiyaba me elaluai me elalubeo,” Jisasgo te po wai.

³² Tama te bomai po page ola mabo bidi agai te tiwai po Jisasbolo wai, “Tisa, po ola mabo bidi, nago po te wiegi yai. Mu dao, God agaduba deli naga te Genuai Bidi, tama gasa bidi me bidibeo. ³³ Dago aga godolo mu ebo, te tigidali homugo me, te tigidali kolesagago me, te tigidali dago bomogo tama tiao. Tama dago gasa bidi godolo yainu te denade godolo ebo tiwai gilama yao. Dago te bomai po si wali pali da, teda te kolesagago te dago te Godibolo siaba tigidali te hasa ulubo ofa ilibo te

^v 12:30 Bom 6:4-5

tigidali aiyaba elaluama, tama te gasa ebo ofa tigidali me te aiyaba elalua silaibao,” te bidigo te po wai.^w

³⁴ Jisasgo te bidigo po wei ponobo po odali, te wiegi yai kolesaga koneai bidigo po wabo tiwai gilama yali, tama Jisasgo agabolo te po wali, “Nage te God dologoba pabo te nagede digibulu me elalubeo,” te po wai.

Te sogo gagalama tama tigidali bidi dabe augwaligo usu sabo po meba te Jisasbolo hanalu wabo te augwali wi yai dao.

Jisasgo te Krais po augwaliba hanalu wali

(Mat 22:41-46; Luk 20:41-44)

³⁵ Jisas te Moni Lotu Be tempel tomoba pelama bidiyu, tama te we bidi dabe augwaliba po ola mabo sę yai. Tama ebadi, agai te po hanalu wali, “Magi baso te Juda dabego bomai po page ola mabo bidi dabego te po wabo, te Krais, Godigo te we bidi tau somainu dąj ilali bidi, te aga te Devitgo ogwa da po magi baso wabo dawe? ³⁶ Te polobadu Godigo Tedali Mobo Bidigo te Devitbolo te homu kolesaga mobaso, tama Devitgo digi te po wai,

‘Genuai Bidi agai te eno Genuai Bidibolo te tiwai po wai dao: “Nage eno dolo nogo badu duayagasao, te nosali te eno nago boi bidi dabe aiyaba elaluama, tama augwali nago dologoba muabo sogo usu nagasaibao,” te po wai.’

³⁷ Devitgo digi aga te Genuai Bidi nogi yali. Tama tibaso, te mena tama te Genuai Bidi aga te Devitgo bulai wai pedalaibawe?” Jisasgo te po wai.

Te bomai po koneai tisa dabego kolesagade dua dao po wai

(Mat 23:1-36; Luk 20:45-47)

Te genuai we bidi hani augwaligo te Jisasgo ola mani po odoyu, wiegi yai homu pemene yai. ³⁸ Tama Jisasgo augwali ola mayu, tama agai te po wai, “Dage te bomai po page koneai bidi dabe dua dao. Augwali te bobage gudubo ugwa belama pabo homu godolo ebo dao. Te we bidi sisinibo pesagede te we bidi augwalibolo te siade da wabo te augwaligo godolo naga ebo dao. ³⁹ Augwali te bomai po ola mabo lotu bede te we bidi gesabidi badu te polalubo ni namide duayabo godolo ebo dao, tama te genuai nai da tubo sogode te augwali te polalubo ni namide duayabo homu godolo ebo dao. ⁴⁰ Augwaligo te augwa bidi isai we dabe tibo po weyu, tama augwaligo be dabe wi siyu ebo dao. Tama te ebo kolesaga mesegelainogo eyu, tama augwaligo tibo gedu haluasa po bobage weyu ebo dao. Te Godigo po tu ebo sogode te bidi dabe augwaligo genuai sęge mu saibao,” Jisasgo te po wai.

^w 12:33 Hos 6:6

Doado bage meni yai wilawe we agai Godiba ofa mani
(Luk 21:1-4)

⁴¹Jisas te Moni Lotu Be tempel tomode bidiyu, tama aga te Godibolo ofa maiabo mone ge mubo halobage pade dulaluai. Tama agai te we bidi dabego te halobageba mone ge tulagasobo suali. Tama doado bage hauwa elalubo bidi dabego masigi hauwa tulagasu yai. ⁴²Tama aga bidi isai wilawe we, te doado bage meni yai we me deli, aga aselama, tama te dwasianu nogeai mone ge si te halobage tomoba bulagasaki, te mama yai dwasianunu masigi si naga dao. ⁴³Tama Jisasgo aga wali pabo bidi asomainu i olama, tama augwalibolo agai te po wai, “Eno mu po dagebolo obao, te aga bidi isai wilawe we, te doado bage meni yai wego, agai te mone ge muani, te tialigo te tigidali we bidigo te halobageba mone muani mone te aiyaba elalualio. ⁴⁴Magi baso meni, te tigidali we bidi augwaligo te mone ge hauwa elalu, tama augwaligo meba naga te halobageba muani. Tiali goli te we aga te mu menia sai digi, tama agai aga mone tigidali te halobageba muani, tama aga nai me badu abela tuabo te mu meni dao,” Jisasgo te po wai.

Te tigidali nai silabo sogo asobo po
(Mat 24:1-2; Luk 21:5-6)

13 ¹Jisasgo te Moni Lotu Be tempel tagalama sobadi, tama aga wali pabo bidi me deligo agabolo te po wali, “Tisa, po ola mabo bidi, te e Moni Lotu Be tempelde elalubo genuai genuai masigi me te masigigo nigali wiegi wiegi yai be dabe elalubao suao,” te po wali. ²Tama Jisasgo agabolo te tiwai po wei ponani, “Nago te elalubo genuai be dabe suyu, obe dawe? Te nosali augwaligo te masigi me daide te gasa masigi manalubo te gogoloyu me sula tagalogobeo. Menio. Te augwali tigidali pebedama, aiyaba sasqwaibao,” te po wai.

³Tama nosali Jisas te Oliv bulu dude dualalu, tama te Moni Lotu be tempel u badu pedaide elalubo suali. Tama Pita, me Jems, me Jon, me Andru, te augwali naga agaba aselawali. Tama augwaligo agabolo hanalu wali, ⁴“Nago dabolo wao, nisu sogo te sege te Moni Lotu Be tempelba pedalugowe? Mena daj bolo hasia pedalubo si, tama dago koneai elalubadi, megi da te se dabe te pade pedalaiba homu elalugowe?”

⁵Tama Jisasgo po augwaliba pusa mayu, te po wai, “Dage dua dao. Tiyu te bidi me deligo dage ili po ola mayabuo. ⁶Te bidi dabe hauwa augwali aselayu, tama ena nogi ilama, tama augwaligo te po waibao, ‘Ena digi ena te bidi dao.’ Tama augwaligo te we bidi hauwa tibo po ola mawaibao. ⁷Tama me, nosali dagego te boi hwjabo kulukulu wabo po me, te boi hwjabo po sabilibo po me odobaso da, teda dage asesa polo tama noma siyu, midigi munu me elamu. Te se dabe pedaliyu da yaibao, tiali

goli te dagalu de tō si silabo sogo bodolu te me elaluiaibao. ⁸ Te bidi hani me deligo te gasa bidi hani me dali wābi hwiaibao. Tama me tuni bidi hani me deligo te gasa tuni bidi mego hani bidi dali te wābi hwiaibao. Te me badu pedai badu te tō mali eyu, tama augwali nasi genuai elaluiaibao. Te sē ebo te wego hasia wai ame nainu dene pedalubo tiwai gilama te hasia pedalaibao.”

⁹ “Duga digi te bugagia tonaluiqo. Te augwaligo dage te augwa kaunsilba po tū ela mawaibao. Tama augwaligo dage te Juda dabego bomai po odobo lotu be tomode elaiabao. Te augwaligo ena nogi aiyaba elaluabo homu elama, tama augwaligo dage te gavmaniba me te tuni bidi gesabidiba dodolaibao. Tama tebode te dagego te Godigo gesi wiegi yai po te augwaliba pusa mao. ¹⁰ Te tigidali tōde bidibo hani bidigo te Godigo gesi wiegi yai po pusubo bidigo po hasia odoyu bolo yaibao. ¹¹ Tama augwaligo dage nogo tulama, tama dage te po tūba odasa pabo sogo, dage wi eyu te homu me elamu, ‘Te dago te po tūde mena po wagowe?’ Menio. Tigidali po Godigo dagebolo te sogode digi menama, te dagego pusumainu yaibao. Magi baso meni, te duga digi te po me pusugobeo. Menio. Te Godigo Tedali Mobo bidi agai te po pusaibao. ¹² Tama tobage sē pedalubo sogo te bidi dabego augwa ama dabe te boi bidi dabego nogoba munama, te augwali ela mumainu yaibao. Tama te aya dabego me te ogomani augwali te boi bidi nogoba muyu, te tama tiaibao. Tama te ogwa me wegi me augwaligo me te augwa aya ida dabe te boi bidi nogoba munama, tama augwali ela mumainu yaibao. ¹³ Tama tigidali bidi dabe augwaligo dage dali dwai homu mu yaibao. Eno nogi dagede elalubaso, tama augwaligo te tiwai kolesaga yaibao. Tiali goli te mena bidigo bomo elama dolaludubadi te dagalu de tō dali si siligi pabo sogoba usu nagasali bidi, te aga da, Godigo ma dobola saibao,” Jisasgo te po wai.

¹⁴ “Tama te bulu dolabo dwai dwai nai mu dagego sueibao. Aga da, te habu selai elalubo bulu te badu doligi soaibao.” (Te po nedebi bidi agai homude bugagia kone palao.) “Tama te sē ebo sogode te Judia tō pedai badu bidibo we bidi augwali te bulu duba wi pelawaibao.” ¹⁵ Tama te aga be daide ugwidu bidibo bidi aga te aiyaba dulama, te be tomoba doado bage sigulainu ebo te usu munu me egobeo, aga olo naga wi pao. ¹⁶ Tama te sogo aga gide bidibo bidi, aga begasa pelama, te kedaude gudubo ugwa me beba sigi pelamuo, te aga olo naga wi pao. ¹⁷ Te haliga elalubo we dabe, me te sogo wai ame mabo we dabe, te augwali hobede mu dao! ¹⁸ Tama dagego te Godibolo gedu haluasa po waiyqo, te sē dabe te moni kedau sogode pedelabuo. ¹⁹ Magi baso meni, te sogode te genuai sēgē mu elaluiaibao. Te Godigo tigidali nai nigali sogo gagalasa, te megi e sogoba usu nagasu, te tiwai sēgē te polobadu me pedalisiqawai. Tama nosali me te

^x 13:14 Dan 9:27; 11:31; 12:11

tiwai sege meni yaibao.^y ²⁰Tama Genuai Bidigo te sogo bodolu te hagana selama, pewadage iligi menigi da, teda te tigidali we bidi hagagi dao. Tiali goli agai te sa muyu dajilalili we bidi augwalide homu kone palama elaluali. Tama tibaso agai te bodolu sogo pewadage sogo ilama elalubo dao.”

²¹“Te sogode, te bidi me deligo dagebolo weyu, ‘Sua, te Krais ede bidibao,’ ma ‘Sua, aga ude bidibao,’ te po obaso da, dagego te pode homu dajum me olamuo. ²²Magi baso meni, te bidi meba te sogo aselama, tama tibo po weyu, te tiwai po waibao, ‘Ena Krais da,’ ma ‘Ena te Godigo po pusubo profet bidi me deli dao,’ tama augwaligo te bidigo susiawai bomai se eyu, tama gasagi gasagi yai se dabe yaibao. Mu tama, te augwali usu yali homu ebogo da, teda augwaligo te Godigo augwali sa muyu dajilalili we bidi tibo po ola menama, tama augwali tulalumainu yaibao. ²³Tama tiyu dage dua dao. Te se me pedalisiabadi eno te tigidali se yabo po te dagebolo wai dao,” Jisasgo te po wai.

Nosali te Godigo Bidi Mu asaibao (Mat 24:29-31; Luk 21:25-28)

²⁴Jisasgo po me weyu, te po wai, “Tiali goli te genuai sege hasia bolo ela silama, tama te sogode te giliga ge hulia selama, tama te polua me ula isiqma,^z ²⁵tama te dagaludu ho dabe tudulaluiba. Te dagalude elalubo bomai nai tigidali te mumunu yaibao. ²⁶Tama te tebo sogode teda augwaligo te Godigo Bidi Mu te dagalu tomodu te po me deli daide ugwidu dualasa asobo sueibao, te aga genuai bomo me genuai wiegi yai ula elalubadi te asaibao.^a ²⁷Tama te sogo te aga ensel mobo bidi dabe augwali tagala palama, tama augwaligo te aga sainu sa muani we bidi augwali sisinigiluaiba. Te agai te tigidali tq pedai badu sesa biligiluama, te dagalu de tq dali si ununani te sesege tigidali habuba mu usu nama augwali sisinaiba,” Jisasgo te po wai.

²⁸Tama agai po me weyu, te po wai, “Dagego te ni kayade kolesaga konea sao. Te ni aga nologo aq elalu, tama te gesi yabe hogonu pedalubo sogo, dagego koneani, te poi pibo sogo wiegi yai giliga nanobo sogo pedelainu ebo, te homu ebo dao. ²⁹Te tiwai gilama naga, nosali dagego te suali te se pedalubaso, teda dagego koneiba, te ena ma asobo sogo te paiba yagaselama, tama te sunumide elalubao. ³⁰Eno mu po dagebolo obe dao: te meg i sogode bidalubo we bidi dabe augwali me isisabadi, tama te se tigidali pedalubo sueibao. ³¹Te dagalu de tq dali si da, te mu sia saibao, tiali goli eno po da, te munu me hagayu, te sia siyu me egobeo. Te me elalua paibao,” agai te po wai.

^y 13:19 Dan 12:1; Ped 7:14 ^z 13:24 Ais 13:10; Ese 32:7; Jol 2:10, 31; 3:15; Ped 6:12

^a 13:26 Dan 7:13; Ped 1:7

Te bidi me deligo Krais asabo sogode te bodolu me konebeo
(Mat 24:36-44)

³² Te Jisasgo po ma weyu, te po wai, “Tiali goli te bidi me deligo te asabo sogode te bodolu me konegobeo. Te dagalude ensel mobo bidi dabe augwaligo me te me konebeo. Te Godigo Owgago me agai me konebeo. God Ayago naga agai te asabo sogo bodolu koneai elalubao. ³³ Dage dua dao. Dagego tonalu bidiqo. Te nisu sogo pedalabu te dagego me konebe dao. ³⁴ E tiwai elaluabao. Te bidi me deligo te aga be tagalama, te gasaba pelama biligi pali. Hasia bolo agai te se ebo bidi dabebolo te agai doado bage tolaluabu po wali, tama agai te se bidi deli deli augwalibolo te se dobayali. Tama agai te be sunumi tonaluabu bidibolo te po wali, agai te sunumi bugagia tonaluao po wai. ³⁵ Tama te dagego me te tiwai gilama bugagia tonaluiqo. Te be page bidi aga nisu sogo asabo te dagego konebe. Te aga pio asogowe, ma huli tomode asabo me, ma te be posainuba po obadi me, ma te kigamu asabo me, te dagego konebe dao. ³⁶ Tiyu aga te deli sogo naga mu polo tama asiyu, te dage pila mubadi aga asidali weyu, tama dage tonaluyu bidiqo. ³⁷ Eno dagebolo te mabo po, te po eno tigidali we bidibolo obao, dage tigidaligo te bugagia tonaluao!” Jisasgo aga wali pabo bidi me si me si augwalibolo te po wai.

Te tobolu bidi dabe augwaligo te Jisas ela muabu po wai
(Mat 26:1-5; Luk 22:1-2; Jon 11:45-53)

14 ¹ Te sogo te Juda dabego olo bidiyu, te bo disawai bret nai tuabo sogo nogi Pasova, te tuabo side te pedelabu bodolu si elaluali. Tama te genuai pris dabego me te bomai po page koneai bidi dabe augwaligo te po wai, “Mena tama tilama, te dago Jisas gema pageabi elama, tama aga ela muaibawe?”^b ² Augwaligo te po miyu, tama te po me wai, “Dago te tiwai se te olo bidibo Pasova side me egobeo. Tiyu te we bidi augwaligo wabi hwjabo se hodolabu,” te po wai.

Wego Jisas toboluba te denami ebo nai sanda gelali
(Mat 26:6-13; Jon 12:1-8)

³ Te Jisas hogodama, te Betani be nani teba te oiyabe gasi sai bidi nogi Saimongo beba pali. Aga te tebol saide duagi pelama, tama nai tuyu bidibadi, tama we me deli asali, tama agai te gasa sawi yai botol masigide te wiegi yai denami ebo nai sanda elaluali, te nai abelabu mone te genuai mu dao. Tama agai te botol dalama, tama te denami yai sanda te Jisas toboluba gelali. ⁴ Tiali goli meba te bidaluali bidi, augwaligo homu dwai yali. Augwa hasi po mia siyu, te tiwai po wai, “Magi baso te

^b 14:1 Sai 12:1-27

wiegi yai denami ebo sanda olo dali hagamainu ebewe? ⁵Dago te nai te budi dabego abeemainogo egi sogo da, teda dago te mone te 300 kina sigi sogo da, tama te doado bage meni yai we budi dabe augwaliba magi dao.” Tama te homu elama, augwaligo te webolo wado po wali.

⁶Tiali goli Jisasgo te po wai, “Dagego te we sęgę mabo tagalao. Magi baso dagego agabolo seę mobawe? Te agai wiegi yai kolesaga enabolo ebao. ⁷Sesemane sogo te doado bage meni yai budi dabe te augwali dage dali bididuaibao. Tigidali sogo dagego augwali tau siduabo homu idubaso da, teda tü elaluibaibao. Tiali goli te ena da, te dage dali sesemane sogo me bidigobeo. ⁸Te wego yabo homu yali sę, te agai te sę yalio. Agai ena tigiba te denami wel muani te ena gų pageba mumainogo sisi iliyu yai. ⁹Eno mu po dagebolo obao, te tigidali tō pedaide augwaligo te Godigo gesi wiegi yai po pusubo sę ela pabode, te augwaligo e wego te yali sęde po mimi peyu, tama augwali tede homu kone palaibao,” Jisasgo te po wai.

Judasgo Jisas te boi budi dabego nogoba maiabo po dą̄ wai

(Mat 26:14-16; Luk 22:3-6)

¹⁰Te wego te sanda nai Jisasgo toboluba gelali sogo, te sogo te 12 wali pabo budi me deli, te Judas te Keriot bulu budi, aga te genuai pris dabe augwali bidibo digi pai. Agai te Jisas augwali nogoba mawainu yai. ¹¹Augwaligo te wabo po odama, te augwali wiegi yai homu pemene yai. Tama augwaligo agabolo te masigi meba maiabo po dą̄ wai. Tama Judasgo te me sogo te Jisas augwali nogoba muabo sunumi me deli gegebo sę ebo te sogo gagalali.

Jisas aga wali pabo budi dabe augwali dali te Pasova nai tuali

(Mat 26:17-25; Luk 22:7-14, 21-23; Jon 13:21-30)

¹²Te Juda dabego te yis meni yai bo disawai bret nai tuabo si pedalali. Tama te polasa gagalobo sogode augwaligo te Pasova nai tuabo sipsip kibu wai eliyu ebo dao. Tama Jisas aga wali pabo budi dabego Jisasbolo po weyu, te po wai, “Nago homugo dago te tubo nai menaba sisi iligi pelama, tama nago te Pasova nai tuaibawe?” ¹³Tialima, Jisasgo te augwali si naga tagala palu, tama augwali sibolo te po wai, “Dage si te Jerusalem hanu tomoba piąo. Tama te sene wę tulama sela asobo budi me deligo dage si te sunumide sueibao. Dage sigo aga wali piąo. ¹⁴Aga te be me deli tomoba pabo si da, teda dage sigo te be page budi agabolo te tiwai po waiyao, ‘Te Tisa, po ola mabo bidi, agai te po wali, “Te eno ena wali pabo budi dabe dali te Pasova nai tuabo madi te be habu nigelili te menade elalubowe?” te po wao. ¹⁵Tama agai dage sibolo te ugwdatu sigide elalubo te be habu ola mawaibao, tede te tebol sai me, duabo sai me te sisi ilai elaluibaibao. Dage sigo da tuabo nai te be habude sisi ilao,” Jisasgo te po wai.

¹⁶Tialima, te wali pabo bidi si palio. Augwali si te hanuba sabolama, tama augwali sigo te Jisasgo augwali sibolo wali po tiwai gilama yai. Tama augwali sigo te tuabo nai Pasova sisi ilali. ¹⁷Te sogo be pio ebode Jisas aga wali pabo bidi dabe dali aselawai. ¹⁸Augwali te tebol saide dudulaluyu tama nai tutuladu, tama Jisasgo te po wai, “Eno mu po dagebolo obao, te dage tomode bidi me deli agai ena te ena dali boi bidi ebo bidi dabe augwaligo nogoba mawaibao. Te ena dali megi nai tubo bidi me deligo tama tiaibao,” te po wai.

¹⁹Te wali pabo bidi dabe augwali homu sęę̄ elama, tama augwali deli deligo aga hanalua pabo gagalali, “Te enawe?” te po wai. ²⁰Jisasgo augwalibolo te po wai, “Te dage nogo si olama saęago si bage te me dedeli tomode dao. Te ena dali te nogo talua te pou tomoba muyu, tubo nai sabo bidi te dao. ²¹Awe, mu tama, te Godigo Bidi Mu aga isaibao, te agade te tiwai po te Godigo po bukude aşęani po tiwai isaibao. Tiali goli te Godigo Bidi Mu te boi bidi dabe nogoba muani bidi da, te aga hobedagia mu ebao! Te bidi aga idago aga me ame nagi menigi da, te usu egi da, aga bugagia bidigi da,” Jisasgo te po wai.

Jisasgo te komunion nai augwalibolo mani
(Mat 26:26-30; Luk 22:14-20; 1 Ko 11:23-25)

²²Augwali te Pasova nai tutuladubadi, tama Jisasgo te bret me deli selama, tama Godiba puba hwi olama, tama pebedama, tama augwalibolo mani. Tama agai te po wai, “Dagego sela tuao. Te eno tigi dao.” ²³Tama agai te wain wę tabiali kap me deli selama, tama Godiba puba hwi olama, tama augwalibolo mani. Tama augwali tigidaligo tede wain aq̄ tudu pela silali. ²⁴Tama agai augwalibolo te po wai, “Te da, te eno kaneme dao, tama te kanemego te Godigo aga we bidi tau somainogo eyu mani po te dą̄ walobao. Eno te kaneme gelebogo te we bidi hauwa umabo mu tau saibao.^c ²⁵Eno mu po dagebolo obao, eno te wain du kaneme aq̄ munu ma tusiąbadi te eno gesi aq̄ te Godigo we bidi tonalubo madide tubo sogoba usu nigi paibao,” Jisasgo te po wai.

²⁶Tama augwaligo te Godigo nogi ugwbaba sabo tęabi po me deli olama, tama augwali te be tagaluyu, tama Jerusalem hanu bulu badu pelama, tama te Oliv bulu duba pelawai.

Jisasgo te Pitago aga tudiba muaibao po wai
(Mat 26:31-35; Luk 22:31-34; Jon 13:36-38)

²⁷Te Jisasgo augwalibolo te po wai, “Te dage tigidaligo ena taga peyu, tama wi paibao. Magi baso meni. Te Godigo po bukude elalubo po me deli tiwai dao, te Godigo wali po e dao, ‘Eno te kibu sipsip tonaluali bidi

^c 14:24 Sai 24:8; Jer 31:31-34

elibaso, tama te sipsip dabe wi tedela paibao,’ te po wai dao.^d ²⁸Tiali goli ena te gu pagede ma hodaluama, tama dage asomainu ena polasa te Galili tq pedai teba paibao,” Jisasgo te po wai.

²⁹Pitago agabolo te po wai, “Te e bidi tigidali augwaligo nage taga peyu wi pobaso da, tagalao, magigo meni, te eno nage taga pogobeo,” te po wai. ³⁰Tama Jisasgo agabolo te po wai, “Eno mu po nagebolo obao, megi e sogo hulide, te ba kakaruk po si sogo wasiąbadi, tama nago ena konebeo po te sela sogo waibao.” wali. ³¹Tiali goli Pitago po bomo elama mu weyu, “Tagalao, te ena nage dali isibaso, te usu dao. Tiali goli eno te nage konebeo po munu me wagobeo. Mu menio!” Tama Jisas wali pabo bidi dabe tigidali augwaligo me te tiwai po naga ola pai.

Jisasgo te Getsemani gide Godibolo gedu haluasa po wai
(Mat 26:36-46; Luk 22:39-46)

³²Te augwali peyu, tama te gi me deliba sabolali, te gi bulu nogi Getsemani. Tama Jisasgo aga wali pabo bidi dabe augwalibolo te po wai, “Dage ede bidaluiqo. Ena God dali po wagi painu homu ebao.” ³³Tama agai te Pita, me Jems, me Jon, te bage sela selama, tama augwali aga dali pali. Megi da, te aga homu moni sege eyu, tama aga kone palu te aga dwai homu mu yai. ³⁴Tama agai augwalibolo te po wai, “Te eno homu sege mu eyu, te pade ena isabo homu ebao. Dage ede bidaludu tama bugagia tonaluao,” wali.

³⁵Tama aga dwasianu pelama gana, tama tqba basi gulama, tama agai gedu haluasa po wai. Te Godigo usu da wida, te dwai denego aga te sogo ela somainu homu yai. ³⁶Agai te po wali, “Aya, nago te tigidali se ebo usu dao. Eno homugo nago enaba megi te pedalainu ebo te dene dagala samainu homu ebao. Tiali goli nago te eno homu wali me pelamuo. Menio. Nago te naga homu wali naga pao,” Jisasgo te po wai.

³⁷Tama aga ma geasa pelama, tama te wali pabo bidi dabe pila mubo suali. Tama agai Pitabolo te po wai, “Saimon, nage pila mudubawe? Nago te bodolu pade yagasobo te tonaluabo te usu esiayu egobe dawe?” ³⁸Tama agai te augwali selabolo te po wai, “Dagego bugagia tonaludu, gedu haluasa po waiyao. Tiyu te dage usu sabo naigo te dage gege asabuo. Mu tama, duga noma bidi dabe te dwagi yai se yabo homu ebo dao. Tiali goli duga tigigo bomo sq pobao,” agai te po wai.

³⁹Tama aga ma pelama, gedu haluasa po wagi pai. Te aga hasia gedu haluasa po wali tiwai ma wali, te gedu haluasa po tiwai naga Godibolo ma weyu yai dao. ⁴⁰Tama aga ma aselama suali, te aga wali pabo bidi dabe augwali godege pila mubo suai. Te augwaligo gedu sege mu elaluai. Tama augwaligo agabolo te mena po agabolo wainogo yabo te augwaligo me konebeo.

^d 14:27 Sek 13:7

⁴¹ Jisasgo te sela sogo aga Ayabolo po wagi peyu yali silama, ma aselama, tama agai augwalibolo te po wai, “Dage pila mudu tama toma nedu edubawe? Tama dao! Suao, megi da bidi me deligo te ena Godigo Bidi Mu te dwai sege sai bidi dabego nogoba muaibao. ⁴² Dage hodaluama, tama da pinao. Suiqo, te boi bidigo nogoba ena mawainogo ebo bidi te augwali aga dali asai dao,” Jisasgo te po wai.

Augwaligo Jisas nogo tuali

(Mat 26:47-56; Luk 22:47-53; Jon 18:3-12)

⁴³ Jisasgo po odubadi, tama polo te Judas, te wali pabo bidi 12 te augwali me deli, aga asai. Te genuai bidi hani aga dali asai, tama augwaligo te poa pai hwə bobage hwə ge bainat me sesemone wəbi me te tolasa asai. Te genuai pris dabego me, te Juda dabego bomai po page koneai bidi dabego me, te Juda dabe toboli bidi dabe badi, te augwaligo te tagala palobaso te augwali Judas dali asai. ⁴⁴ Tama te Jisas augwali nogoba maiabo bidi agai te daj me deli augwali mawaibao po weyu, te po wai, “Te eno bidi me deliba kisa sigi pelama nono naibao. Te bidi aga te Jisas dao. Dagego aga pageabi elama tulama, tama aga bugagia amua elama, tama aga selasa piəo,” wai.

⁴⁵ Tialima, Judas aga sabolama, tama Jisasba polo pelama, tama te po wai, “Tisa, po ola mabo bidi,” te po wai. Tama agai Jisasba kisa sagaselama, nono nai. ⁴⁶ Tama tibaso, augwaligo nogo Jisasba munama, tama aga pageabi yai. ⁴⁷ Tiali goli te Jisas wali pabo bidi dabe pəde te dolalualu bidi me deli, agai te aga elalualu bobage ge hwə kega selama, tama te toboli pris bidigo sə ebo bidi elama, tama aga olo togolama, tama tqəba tulaluali. ⁴⁸ Tama Jisasgo te asali bidi dabebolo te po wai, “Dagego ena sagasu, tama dagego te poa pai bobage hwə me sesemone wəbi me tolasa asali, te dagego nai wi sai bidi me deli sagasobo tiwai gilama yainu te yali da, agawe? Magi basowe? ⁴⁹ Tigidali sogode te ena dage dali te Moni Lotu Be tempel tomode dulalu, tama eno te Godigo po dagebolo ola mawai, tama dagego ena nogo tulama pageabi me ebeo. Tiali goli dagego enade megi ebo sə ebogo te Godigo po bukude elalubo po meba te mu pedalumainu ebao,” Jisasgo te po wai.

⁵⁰ Tama aga wali pabo bidi dabe tigidali augwaligo aga taga peyu, tama augwali wi pelawai. ⁵¹ Tama gesi bidi me deli te Jisas wali asudai, tama agai tigide te tedela yai nami ugwa naga gudasa asiduai. Tama augwaligo aga pageabi elama tuali. ⁵² Tiali goli aga te tedela nami ugwa taga peyu, tama aga tigi olo naga elalubadi te aga wi pai.

Augwaligo Jisas te kaunsilgo gedude po tu ilali

(Mat 26:57-68; Luk 22:54-55, 63-71; Jon 18:13-14, 19-24)

⁵³ Tama augwaligo Jisas te toboli bidi prisgo beba odasa pai. Tama tigidali genuai pris me te Juda dabego toboli bidi dabe me te augwa

bomai po page koneai bidi dabe, te augwali aselama, te beba sisinagasali.

⁵⁴Tama Pita te Jisas pabo wali pali, tiali goli aga te dwasianu digibulu gana bidai. Aga te tobolu pris bidigo be bagulali obo tomoba pai. Tama aga te enesigi bidi dabe dali dualalu, te augwaligo kedau nainu nogani siade te aga tigi kedau nedualu. ⁵⁵Tama te genuai pris dabego me te tigidali kaunsil dabe augwali te bidi dabe meba i olama asobo side, te augwaligo te Jisasgo yali kolesaga po pusumainu yai. Augwaligo te aga ela muabo homu ebaso, tama te dwai s̄e yali sunumi me deli te gegali. Tiali goli te augwaligo agai dwai s̄e yali te me gegebeo. ⁵⁶Te bidi dabe hauwa augwaligo agade te tibo po kisilali, tiali goli augwaligo po te tiwai si me ebeo. ⁵⁷Tama te bidi meba augwali doligulama, tama tibo po te Jisasba kisilama weyu, te po wai,

⁵⁸“Dago odali, agai te tiwai po wai, ‘Te eno digi eno te bidi dabego nogogo s̄e yani te Moni Lotu Be tempel te aluaibao. Tama nosali te be eno te sela sogode gasa dodolama s̄e yaibao, tiali goli te be te nogogo me s̄e egobeo,’ agai te po wabo dago odalio,” augwaligo te po wai. ⁵⁹Tiali goli augwaligo te wali po te me geda muyu, tama te po tiwai si me ebeo. Bidi mego pusali po te gasagi yai tedali dwasianu yai, tama gasa bidigo po me tedali gasagi yai po wai, te tiwai si meni. Te usu ebeo.

⁶⁰Tama te tuni bidi pris mu te tomode dolaluyu, tama Jisasbolo hanalu wali, “Nago te po deli me wei begelesia ma ebawe? Te nageba kisilama wabo pode te nago magi ebawe?” ⁶¹Tiali goli Jisas aga pedauwali panialu, tama te agabolo po me deli wei me ponobeo. Te tuni bidi pris bidigo agaba ma hanalu wali, “Nage Krais, te magi dwai s̄e deli me isiąwai te Godigo Ogwa dawe, ma meniwe?” ⁶²Tama Jisasgo te po wai, “Te ena tama dao. Tama nosali dagego te Godigo Bidi Mu te Tigidali Bomo Elalubo Godigo dolo nogode dualama asobo dagego sueibao. Tama aga te dagalu tomodu te po me deli daidu dualasa asaibao,” wali.

⁶³Tama Jisasgo te po wabode te tuni bidi pris bidi s̄eb̄ eyu, tama aga gudalualu ugwa pisila s̄ayu, tama te po wai, “Dago te gasa bidigo e bidigo yali s̄ede po wabo me odogobeo. Te tagalao. ⁶⁴Dagego odalio, agai te Godiba posobo po wai. Dagego mena homu ebawe?” Tama augwali tigidaligo te tiwai po Jisasde wai, “Agai dwai s̄e yai elalubaso, tama aga isimainao.” ⁶⁵Megi da augwali mebagi gagalama, te aga pesa s̄ayu yai. Tama augwaligo te nami ugwa pedaigo te aga gedu paniama, tama augwaligo aga elama, tama augwaligo te po wai, “Nago te haniani s̄ede koneai profet bidi tiwai eyu tama po wao. Dego nage elaliwe?” Tama te ami bidi dabego aga selama, tama aga subigila dodolama elali.

Pitago te po wali, “Eno Jisas konebeo,” wai
(Mat 26:69-75; Luk 22:56-62; Jon 18:15-18, 25-27)

⁶⁶Pita te aiyadu bidali, te be bagulali obo tomode bididuai. Tama te tuni bidi pris bidigo s̄e ebo we me deli asali. ⁶⁷Tama te we agai te Pita

aga te siade tigi kedau nedubo suali. Tama te se ebo wego te aga dolo ponama tonalu, tama te po wai, “Nage me, nage te Nasaret bulu bidi Jisas dali bidai dao.”⁶⁸ Tiali goli Pitago po weyu, menio te tiwai po wai, “Eno nago te wabo po eno me konebeo.” Tama aga te be obo sunumi paq̄ badu buluba doligi soali. Tama ba kakaruk po me deli wai.

⁶⁹ Tama tede me te se ebo wego aga ma sulama, tama agai te paqe dodolalubo bidi dabe dali po ma weyu, te po wai, “Te e bidi da, aga te Jisas wali pabo bidi me deli dao.”⁷⁰ Tiali goli Pitago po ma weyu, “Menio,” wali. Nosali dwasianu bidama gana, te aga paqe dodolaluali bidi dabe augwaligo te po ma Pitabolo wai, “Mu tamao, nage te augwali hani bidi dao. Nage te Galili bulu bidi naga dao,” te po wai.⁷¹ Tialima, megi da Pitago po bomonama weyu, te po wai, “Te eno megi te mu po naga wasiayu da, teda Godigo ena elimainao. Eno dagego te po wabo bidi me konebeo.”⁷² Tama polo te ba kakaruk hwa si sogo wai. Tama Pitago te Jisasgo agabolo wali po te homugo ma kone palali, “Te ba kakaruk po si sogo wasiabadi, tama nago po sela sogo wagi soyu, nago ena konebeo po waibao,” wai. Tama Pita aga dwai gela mu wai.

Te Rom gavman tuni bidi Pailat agai Jisas osola suali
(Mat 27:1-2, 11-14; Luk 23:1-5; Jon 18:28-38)

15 ¹Te kigamu mu te genuai pris dabe dali, te tobolu bidi dabe me, te bomai po page koneai bidi dabe me, te tigidali kaunsil dabe badi, te augwaligo po me deli miani. Tama augwaligo Jisas te bonogo nogi si dunama, tama augwaligo aga selama, tama aga te Rom gavman polalubo tuni bidi Pailat agabolo mawai dao. ²Tama Pailatgo agabolo hanalu wali, “Nage te Juda dabego tuni bidi da, agawe?” Jisasgo po wei ponani, “Naga digi nago te tiwai po obao.” ³Tama te genuai pris bidi dabe augwaligo agaba te po hauwa kisilama wali. ⁴Tama tibaso, Pailatgo agaba ma hanalu wali, “Nago te po me deli wei me ponosiq̄ma, ebawe? Odao, augwaligo te po hauwa nageba kisilama obao,” te po wai. ⁵Tiali goli Jisasgo te po deli wei me ponobeo. Tama tibaso, te Pailat aga noma mu sali.

⁶ Te tigidali kibu bede te Juda dabego te Pasova olo bidiyu toma nabo side, te gavman bidi Pailat agai te kalabus bidi me deli te olo tagala palu yai. Te Juda we bidi augwa digi te bidi me deli nogi nogi ilama tagala palumainu i obaso da, teda Pailatgo te bidi augwaliba tagala palu yai. ⁷Tama te sogo te bidi me deli te kalabuside bidai, te aga nogi Barabas. Aga te gavman bidi dabe dali wabi hw̄ai bidi dabe augwali dali kalabus yai bidai. Te hani augwaligo te wabi hw̄inama, tama augwaligo te bidi meba ela muai. ⁸Tialima, te we bidi augwali sabalu, tama augwaligo te Pailatba i waliyu, te agai polobadu te augwalibolo ebo tiwai te emainu i wai. ⁹Tama Pailatgo po wei augwalibolo ponoyu, te po wai, “Te dagego

homugo eno te dage Juda dabego tuni bidi Jisas te dageba tagala palumainu homu ebawe?"¹⁰ Magi baso meni. Agai koneani, te genuai pris bidi dabego te homu dwai Jisas dali naga elama, tama augwaligo aga te po tuþa odasa asai.

¹¹ Tiali goli te genuai pris bidi dabego te we bidi dabe augwaligo homu hodoloyu, te augwaligo Pailatba i waliyu, te Barabas augwaliba tagala palao po wai. ¹² Tama Pailatgo po augwaliba ma wali, "Tama dage te Juda dabego tuni bidi nogi ebo, eno te bidi aga magi yaibawe?" ¹³ Augwaligo te i ma wai, "Aga te ni pedaide elao!" ¹⁴ Tama Pailatgo augwalibolo te po wai, "Magi basowe? Agai magi dwai së yaliwe?" Tiali goli te we bidi augwaligo po dagå weyu i bomonama wai, "Te aga ni pedaide elao," wali. ¹⁵ Tama Pailatgo homugo te we bidi augwaligo aga dali dwagi yai homu emainao homu yali. Tama tibaso agai te kalabus bidi Barabas te augwaliba tagala palali. Tama agai Jisas te ami bidi dabe augwali nogoba menama, te augwaligo aga dene mayu, dwai bigo eliyu elama, tama aga te ni pedaide elimainu yai.

**Te Rom ami bidi dabe augwaligo Jisasba te dwai posobo po wai
(Mat 27:27-31; Jon 19:2-3)**

¹⁶ Te Rom ami bidi dabe augwaligo Jisas te gavman bidi Pailatgo be obo bagulali tomoba odasa pelama, tama te be mesalode augwaligo te tigidali ami bidi dabe asomainu i wai. ¹⁷ Augwaligo te mama yai nami ugwa me deli selama, te Jisasba gudulali. Tama augwaligo te sesani yai bono me deligo te madi nigliama, tama augwaligo te Jisas toboluba muai. ¹⁸ Tama augwali hodalu, doligulama, tama agaba nogo dodoloyu, te po wai, "Giligade dao, te Juda dabego tuni bidi dao!" ¹⁹ Tama augwaligo aga toboluba te wawi yai sigi dili me deligo elali. Tama augwaligo agaba pesa sàawai. Tama augwaligo kidu sugunu gulama, tama augwaligo tibo po naga weyu, te aga genuai bidibolo ebo kolesaga tiwai yali. ²⁰ Augwaligo te gisugu mabo së me te dwai posobo po dabe aga dali ola silibo si da, teda augwaligo agaba te gudulali mama ugwa te augwa peda selama, tama augwaligo aga ugwa te agaba ma gudulali. Tama augwaligo aga te ni pedaiba walainu selasa palio.

**Augwaligo Jisas te ni pedaide walali
(Mat 27:32-44; Luk 23:26-43; Jon 19:17-27)**

²¹ Bidi me deli, Saimon te Sairini bulu bidi, te Aleksander me Rufus sigo aya, aga aselama, tama te Jerusalem hanu tomoba painu soali. Tama te ami bidi dabe augwaligo agade bomo eyu, agai te Jisas elabo ni pedai te agai tolao wai. Tama agai te ni pedai tolasa pabo gagalali. ²² Tama peyu, augwaligo Jisas te bulu du me deli teba sela pali, te aga nogi Golgota. Te nogi page te e tiwai dao, te tobolu dili tiwai bulu du dao.

²³ Augwaligo te Jisasbolo te wain əj̄ dali taluali marasin əj̄ mawainu yai, te aga tigi dene silabo marasin tiwai elalubao. Tiali goli agai me tubeo.
²⁴ Tialima, augwaligo aga te ni pedaide ela daganama, tama te ami bidi dabe augwaligo te agai gudali ugwa tigidali te augwa dobola sai. Augwaligo te satu gagali elama, dego te mena ugwa te daj̄ elama sainu tiali. ²⁵ Te giliga ula daj̄ ebo kigamu tama, te augwaligo aga te ni pedaide daganama walali. ²⁶ Tama te ni pedaide ugwdadu te augwaligo aga po tu ilali po asəai. Augwaligo e tiwai po asəai dao, “Te Juda dabego tuni bidi dao,” te po asənama te ni pedaide elaluali. ²⁷ Te Jisas walali ni pedai pəde augwaligo te nai wi sai te dwai sə yai bidi augwali si te gasa ni pedai side walali. Augwaligo te bidi me aga te dolo nogo badu waliyu, tama me agai pobase nogo badu waliyu yai. ²⁸ [Tama tialima te Godigo po bukude asəani po me deli te mu pedalai. Te e tiwai po wai dao, “Augwaligo aga dali te dwai bidi dabe dali nedali.”]

²⁹ Tama te augwali eda soyu, ugwa peyu ebo we bidi augwaligo dwai posobo po agabolo weyu yai. Augwaligo tobolu pemeyu, tama po wai, “Ia, nago te Moni Lotu Be tempel aluama tama te sela sogo naga ma sə yaiba wali bidi dao. Behede!” ³⁰ Megi da, naga digi naga tau sao. Nage te ni pedaide daganalubo tagalama, tama nage aiyaba dulao,” te po wali. ³¹ Te genuai pris bidi dabe dali te Juda dabego bomai po page koneai bidi dabe, augwaligo me te dwai posobo po wai. Augwaligo te augwa hasi tomode digi te tiwai po wai, “Agai te gasa we bidi dabe tau sali, tiali goli aga digi aga tau sabo usu ebe. ³² Te bidi Krais wabo, te da Israel dabego tuni bidi, aga te ni pedaide daganalubo tagalama tama te tq̄ba aiya dulubaso, tama dago sulama, tama dago agade konealubo po daj̄ waibao,” genuai bage augwaligo te po wai. Te bidi si augwaligo te Jisas pəde te ni pedaide walali, te bidi me deligo me te dwai posobo po agabolo wai.

Jisas isalio

(Mat 27:45-56; Luk 23:44-49; Jon 19:28-30)

³³ Te nai tubo belo wabo giliga tomode, te tigidali tq̄ badu be huli si ela selama, te giliga dega sigi painu ebo teba usu nani. ³⁴ Tama te giliga dega sainu ebode te Jisasgo po daḡa bomonama weyu, te po wai, “Eloi, Eloi, lama sabaktani?” E tiwai po wai, “Eno God, eno God, magi baso nago ena tagalubawe?” ³⁵ Tama te pəde dodolaluali bidi meba augwaligo te po odama, tama augwaligo te po wali, “Odiq̄o, agai te Elaija i obao.” ³⁶ Tama bidi me deli udada pelama, tama te wawi yai bola tiwai nai selama, tama te nai te olo wain əj̄ te naiba gelama, tama te sigi dili me delide munama, tama Jisas agabolo te tumainu ugwaba mawai. Tama te bidigo te po wai,

^e 15:29 Tib 22:7; 109:25; Mak 14:58; Jon 2:19

“Meo, dago suyu bolo yaibao. Te bidi Elaija asama, aga te tøba aiya sela dulaiba homu egowe, ma meni egowe?” te po wai.

³⁷Tama Jisasgo po dagø bomonama mu olama, tama aga isalio.

³⁸Te sogo naga tama te Moni Lotu Be tempel tomode døi tiwai walalobo genuai nami ugwa, te ugwa te ugadu pedasa dulali te aiyaba sabolali, tama te moni nami ugwa pedai si pedelai. ³⁹Tama te ami bidi dabe augwa genuai bidi aga te Jisas pøde dolalubadi aga te tiwai elama isibo suali.

Tama agai te po wai, “Mu tama, te bidi aga te Godigo Ogwa dao.”

⁴⁰Te we dabe meba me te digibulu gana dwasianu dodolalu, tama augwaligo me tononaluali. Te augwali tomode bidali we me deli te Makdala moni tq we Maria dao. Tama we me deli te Maria, te nogi sabi si wali, te bidi Jems me Joses tega sigo ida. Te bidi Jems aga nogi me Gesi Bidi dao. Tama we me deli aga te Salome dao. ⁴¹Polobadu Jisas te Galili tqøde bidibadi, tama te we dabe augwali aga wali biliyu, tama aga tau sai. Tama te gasa we dabe hauwa me bidali, augwali te moni hanu Jerusalemba Jisas dali asai dao.

Augwaligo Jisas pubulali

(Mat 27:57-61; Luk 23:50-56; Jon 19:38-42)

⁴²Te be pio ebode te Arimatea tq bidi nogi Josep aga asali. Aga te Juda dabego genuai kaunsil hani bidi me deli, tama agai nogi wiegi yai elaluali. Agai me te Godigo we bidi tonaluabo sogo asobo tonaluyu bidali. ⁴³Do tama da wabo side te Sabat sogo pedelabo elalubaso, tama megi pio te haniani nai sisi ebo sogo elaluali. Tama tibaso Josep aga te Pailat bidibo be tomoba pelama, te aga gesabidiba doligi pelama, tama aga wi me ebeo. Menio. Agai te Jisasgo tigi sabo po agabolo hanalu wali. ⁴⁴Te pode Pailat aga noma sali, tama te po wai, “Aga polo isai dawe?” Tama agai te ami polalubo bidi kepten i olama asobo side, tama agabolo hanalu wali, “Te Jisas isaliwe, ma meniwe?” ⁴⁵Agai te ami tuni bidi keptengo po odama, teda agai Josepbolo te po wai, agai te tigi somainao. ⁴⁶Tama Josepgo te tedela moni nami ugwa abelama, tama agai Jisas tigi te ni pedaide daganaluali te aiyaba sela dulai. Tama agai aga te tedela ugwago bebe pelama, tama aga te gø page me deli tomoba muai. Augwaligo te gø page te genuai ola be masigi tomode nigai. Tama Josepgo te moni masigi me deli hogogo bele pelama, tama te ola be gø page dedage elalubo te paniai. ⁴⁷Te Maria Makdala tq we me te gasa we Maria dali, te Josesgo ida, augwali sigo tononaluali, tama augwaligo te Jisas mubo pesage augwali sigo suali.

Jisas ma hodaluali

(Mat 28:1-8; Luk 24:1-12; Jon 20:1-10)

16 ¹Sabat sogo bidama silai madi, tama Maria te Makdala tq we, te gasa Maria dali, aga da te bidi Jems aga ida, tama te gasa we

nogi Salome, te we sela augwaligo te wel me te gasa wiegi yai denami ebo nai me abelai. Augwaligo te Jisas tigiba piligi pabo homu yai, aga tigi polo daumua pidali weyu tama yai. ²Te kigamu mu te wik polasa gagalobo sogo augwali te ḡu pageba pai. ³⁻⁴Tama pobadi augwa hasi po mia siyu, te po wai, “Dego da tau selama, tama te ḡu page paniani masigi hogogo bele pogowe?” Magi baso meni, te masigi te genuai bage mu dao. Tama p̄aba sabolama, tama augwaligo tonono pobadi, tama augwaligo suali, te ḡu page paniani masigi te me elalubeo. Menio. Bidi me deligo te masigi hogogo bele pai. ⁵Augwali te ḡu page tomoba pobadi, tama augwaligo te gesi ogwa bidi me deli te dolo nogo badu dualalubo suai. Aga te bobage tedela ugwa gudai elaluai. Tama augwali noma siyu midigi siyu wi yali. ⁶Tama agai augwalibolo te po wai, “Dage midigi siyu noma me selamuo. Eno koneani, dage asali te Nasaret bidi Jisas gegagasali, aga augwaligo te ni pedaide walali. Aga hodalualio! Aga te ede me bidibeo! Te augwaligo aga muani pesage te elalubo suiqa. ⁷Tiali goli dagego te aga wali pali bidi dabebolo wagı piqa, tama Pitabolo wao, ‘Jisas aga te dage asabo madi te Galili tq̄ba polasa pobao. Te agai polobadu wali po tiwai gilama, te dagego aga te Galili tq̄de sueibao,’ ” agai te po wai.

⁸Tama te we dabe augwali te ḡu page tomoba pali te buluba solama, tama augwaligo te ḡu page tagalama wi soai. Augwali didibili elama, tama augwali homu te midigi siyu dwai noma sali. Tama augwaligo te bidi me deli dali te po deli me wabe, magi baso meni, te augwali wi yai.

Maria te Makdala t̄o we agai Jisas suali

(Mat 28:9-10; Jon 20:11-18)

⁹[Jisas te kigamu mu te s̄e polasa gagalobo sogo tede hodaluali. Tama aga hasia te Makdala bulu we Mariaba pedelai. Te we polobadu Jisasgo te dwai haubo noma bidi te nogo a naga olama me badu si elalubadi sela s̄awani te we dao. ¹⁰Te we Maria agai Jisas sulama, tama aga pelama, te Jisas dali wali bilali bidi dabebolo te aga suali po wagı pai. Te bidi dabe augwali homu s̄eqe elama, tama augwali gela weyu bidaludai. ¹¹Maria agai te po augwalibolo wai, “Jisas aga te bidibo ula elalu bidibo tama eno sualio.” Tama augwaligo te po odama, tama augwaligo homu te poba d̄aq me wabeo.

Te wali pali bidi sigo Jisas te sunumide suali

(Luk 24:13-35)

¹²Tama nosali te wali pali bidi sigo te moni hanu Jerusalem tagalama, tama te sunumidu pai. Tama Jisas te gasagi yai hasegelama, tama augwali siba pedaligi pai. ¹³Tama augwali sigo aga sula koneama, tama augwaligo te po te gasa wali pali bidi dabeba pusugi pai. Tiali goli augwaligo te augwali sigo wali poba homu d̄aq me wabeo.

Jisasgo augwalibolo te Godigo po pusugi pabo sę mani
(Mat 28:16-20; Luk 24:36-49; Jon 20:19-23)

¹⁴Nosali badu te wali pali bidi dabe nogo si olama sągągo deli te augwali dugulama nai tubadi, tama Jisas te augwaliba pedalai. Te augwaligo agai wali poba augwa homu dąu me wasiąbaso, tama agai augwaliba wado ilali. Magi baso meni, augwaligo olo te palialu, tama te we bidi augwaligo suali, aga te ma hodaloai yali po wabo te augwaligo homu teba dąu me wabeo. ¹⁵Tama agai po augwaliba weyu, te po wai, “Dage te tigidali tő habu pedaiba pelama, tama te enade gesi wiegi yai po te tigidali we bidiba pusa mao. ¹⁶Te enade konealubo po dąu olama, tama aga homu enaba tialuyu tama te baptais sabo bidi, aga te Godigo ma dobola selama, tama aga bidi da waibao. Tiali goli te enade te konealubo po dąu me wasiąwani bidi, aga te po tų ebo sogode hagawaibao.

¹⁷Godigo te bomai sę meba te enade homu dąu wabo bidi dabego nogode pedalumainu ilaibao. Te eno nogide augwaligo te dwai haubo noma bidi dabe sela səbo sę yaibao, tama augwaligo te bidi dabego odisawai gesi noma po te pusuyu yaibao. ¹⁸Te augwaligo augwa nogo te bidi gąu kelebo dwai hasamaniba mubaso, ma te konesiąbadi augwaligo te bidi isibo nai tubaso da, teda te hasamanigo me te isibo naigo me augwali dologobeo. Tama augwaligo nogo te gasi sai we bidiba mubo si da, tama te gasi sai bidi dabe usu ma yaibao,” Jisasgo te po wai.

Godigo Jisas selama te dagaluba pai
(Luk 24:50-53; Tpi 1:9-11)

¹⁹Genuai Bidi Jisas agai po augwaliba pusa silama, tama Godigo aga selasa te dagaluba holai. Tama meḡi da, aga te Godigo dolo nogo badude dualalu bidibao.^f ²⁰Tama te wali pabo bidi dabe augwali pelama, tama augwaliba te ola mani po te tigidali tő pedai badu pelama, te po pususu biligi pai dao. Tama Genuai Bidi te augwali dali sę eyu, tama te augwaligo nogode te haniani bomai sę ebogo agai hania hanilali, te augwaligo ola mabo po te mu po naga dao.]

^f 16:19 Tpi 1:9-11

Dwagi Yai Gesi Po Lukgo Aşənai

Hasia nedebō tau sabo po

Te Jisasde po aşənai bidi nogi Luk aga te Israel hani isławai bidi bidiyu, tama agai Grik po wali. Agai te munamuna mabo sə yali, te dokta bidi bidai. Tama me sogo aga Pol dali te haniani tqba pali. Agai e bukude elalubo po te Grik bidi me delibolo aşəna tolali. Lukgo te Jisasgo te haniani seğe dali dene tolobo olo we bidi dali homu dene eyu godolo eyu, tama agai augwali tau sali sə te Lukgo dabolo waselebo dao.

Lukgo Jisasde aşənai po meba te gasa bidi dabe Matyu me Mak me Jon augwali selago aşəbeo, te Luk agaduba naga te po aşənai. Te Jisas aga ame nane sogode pedelali sə po me, te aga ogwade bidali po me, te agai pusali po digi po begelali po meba me, te tobage po te Lukgo naga aşənai. Te bidi Lukgo po te bukude naga aşənama silibeo. Menio. Luk agai naga dago te nogi ebo "Godigo səba tagala palai bidigo po" nogi wabo buku te me Lukgo aşənai

Lukgo Tiofilusbolo aşənama mawai po

1 ¹Genuai bidi Tiofilus, polobadu te bidi hauwa augwaligo te Godigo polobadu da tomode yali sə po aşəbo homu eyu bugagia sina wai dao.

²Augwaligo te sə gagalobo te gedugo suali bidi dabego po siyu wali pai dao. Te gedugo suali bidi dabe augwaligo te po pupusu bilai dao. ³Tama tibaso, eno me te po naga aşənama, nagebolo tolainu te ebao. Hauwa sogo mu te sə pagede eno te sə gedugo suali bidi dabebolo hanalu wai dao. Megi eno bugagia dodolama, te aşeyu te ebao. Tialima, deli po naga tama dao. ⁴Tama nago polobadu augwaligo nagebolo ola mani po mu yai daba homu emainu, eno te po ma te aşəna tolobao.

Enselgo Sekaraiabolo Jon ame naibao wali

⁵Te bidi nogi Herot te Juda bagego gavman tobulu bidi bidibadi, polobadu Israel hani augwa pris bidi me nogi Sekaraiabolo. Agai hani sibi nogi Abiya sibi da, te hanide pris bidai bidi dao. Te Sekaraiabolo

Aron hani sibi we nogi Elisabet sai. Te Aron hani sibi me te pris sę ebo hani bidi bidai.^a ⁶Te bidi Sekaraia dali aga we dali si te God gedude dolasa bidiyu, te God tonaludubadi, te augwali sigo dwai sę me ebeo. Augwa si Godigo bomo yai po tigidali wali pidu digi, te Genuai Bidigo po dabe me tigidali wali palio, tama augwali sigo dwai sę me ebeo. ⁷Tiali goli augwali si wai menio. Te we Elisabet aga haliga dą̄ wai. Te Elisabet dali Sekaraia dali augwali si monu dabe mosi dabe eyu, wai ame nabo usu meni yai.

⁸⁻¹⁰ Te Sekaraia aga dali deli sę ebo bage sęba asaialio, te Moni Lotu Beba, te Sekaraia aga pą̄q wali bodolude, te sęde dagalali. Tama tibaso, Sekaraia agai aga pris sę eyu, tama aga te denami yai nai siago ulubo sę egi palio, Godigo gesabidide. Te ebo sę page da, te Godibolo gedu haluasa po pusubo tiwai. Tama tibaso, aga te Moni Lotu Be tempel tomoba pelama, tama te denami yai nai siago uludubadi, we bidi te bulu badu tonaludu, augwaligo Godibolo gedu haluasa po weyu bidali.

¹¹ Tebadi yaide, Godigo ensel bidi me deli dulama, te denami yai hano holobo pesage doloba polo badu dolalubo suali. ¹² Tama Sekaraiago Godigo ensel bidi dolalubo sulama, moni noma sali, wi yali. ¹³ Tiali goli, te enselgo agabolo te po wali, “Sekaraia, nage wi tagalao. Te Godigo nago agabolo hanalu wali po odalio. Naga we Elisabetgo nago ogwa me deli ame naibao. ¹⁴ Nago te ogwa nogi Jon poao. Aga ame nabo si, dage si me gasa we bidi hauwa me bugai homu naga yaibao. Magi baso meni. ¹⁵ Godigo gesabidide agai nogi genuai elaluaibao. Agai diluai wę dabe tulamuo. Te Jon aga ame nabo sogo gagalama, Godigo Dwagi Yai Mobo Bidi aga dali bidaibao.^b ¹⁶ Te Jon agai te Israel we bidi dabe hauwa te God augwa Genuai Bidiba ma begasa asao po wabo bidi dao. ¹⁷ Agai te Godigo po polobadu pusa mawai bidi Elajago yali sę me, bomo me tigidali selama, Genuai Bidi nosali asaibao obaso, te Jon aga polasa paibao. Agai te aya dabego homu hasegelama, wai boq hobede emai yaibao. Me agai te po sela səbo bidi dabego homu hasegelama, augwali doloba pai bidigo homu somai yaibao. Agai bidi hauwa sisi elama elaludu, Genuai Bidi asabo tonalu mai yaibao. Tama tibaso, te we bidi augwaligo te Jonde bugai homu mu yaibao,” te ensel bidigo te po wali.^c

¹⁸ Te po olama, Sekaraiago te ensel bidibolo hanalu te po walio, “Te eno we me, ena me, te da si mosi dabe monu dabe yai dao. Mena tama ma nago te po eno mu dao wagowe?” ¹⁹ Tama ensel bidigo te po wei ponoyu te po wai, “Ena nogi Gebriel dao. Ena God gesabidide dolalubo dao. God aga digi ena tagala palama, nagebole dwagi yai po pusigi pa tobo obaso, nagebole te po pusagasiyu te obao.^d ²⁰ Nago odao. Nago eno wali po mu dao homu isəbaso da, nago pedauwali dagana saibao. Dagana

^a 1:5 1 Sto 24:10 ^b 1:15 Nam 6:3 ^c 1:17 Mal 4:5-6 ^d 1:19 Dan 8:16; 9:21

selama, nago po me wasiabantu, eno po tū sisu pabo bodolude nage doloa paibao. Te eno po tū sisu pao wali bodolude te sē yaibao,” ensel bidigo te po wali.

²¹ Te gasagi yai nai pedalobaso, Sekaraiago u be tomode tonalubadi, te we bidigo aga magi yaliwe homu yali, aga magi baso gesegebawé homu yali. ²² Tama nosali aga buluba asama, po wabo usu ebeo. Agai nogogo naga bagi ela bilali. Tama augwaligo te tama tebo sulama, “U be tomode magi nai sualiwe namao,” wali.

²³ Te Sekaraia aga sē silabo bodoluba yagasobaso, aga buluba soali. ²⁴ Tama nosali aga we Elisabet haliga yali. Aga bede dualalubadi, polua a naga palio. ²⁵ Elisabet agai te po wai, “Te Genuai Bidigo ena olo dali tau selama, isabo magade eno wai saibao. Tama tialigo we bidi gesabidide ena hale yai goli, megi agai te hale sela s̄awai dao,” Elisabet agai te po wali.

Ensel bidigo Mariabolo Jisas ame naibao po walio

²⁶ Te we Elisabet haliga elama, polua a naga olama, me badu nogo deli wagisu, tama Godigo te ensel bidi nogi Gebriel te bulu me nogi Nasaretba pao walio. ²⁷ Gesi wegi me te bidi Josepbolo noma po wai, te wegi nogi Maria dao, “Te wegi pageba po pusigi pao,” te Godigo te enselbolo te tama po wali. ²⁸ Te bidi Josep te Devitgo hani bidi dao. Tama te ensel bidi Gebriel te Maria pageba pelama, “Giligade dao,” te po wali. “Genuai Bidigo nage megi hobede yali, nage bugai homu yabo sē yali. Aga nage dali bidibao,” wali.

²⁹ Te wegi Mariago te po odobo si, aga homu tū palio. Agai homugo e bidigo magi po nama wabowe, te homu yali. ³⁰ Tama te ensel bidigo Mariabolo “Nage wi egio,” te po wali. “Godigo nage dali dwagi yai homu eba. ³¹ Edao! Nage haliga yaibao. Nage haliga elama, ogwa tega paibao. Te ogwa nogi nago Jisas poao. Aga genuai bidi bidaibao. ³² Tama Godigo te po waibao, ‘Aga nogi Genuai Godigo Ogwa dao,’ waibao. Godigo aga genuai bidi nigilaibao, aga nōq Devitgo yali gilama.^e ³³ Te tigidali sogo Jekopgo hanigo genuai bidi bidaibao. Aga te we bidi sesemane sogo tonaluaibao,” te enselgo te po wali. ³⁴ Tama Mariago enselbolo te po hanalu wali, “Ena bidigo we menio. Tama magi ilama, tama tiwaibawé?” ³⁵ Tama te ensel mobo bidigo po wei ponoyu, te po walio, “Te Godigo Mobo Bidi asama, tama agai bomogo nage mesegalueibao. Tama tibaso, nago tega pabo wai nogi Godigo nogi poaibao, ‘Dwai sē isābo ogwa dao,’ waibao, ‘Te Godigo Ogwa dao,’ waibao. ³⁶ Edao. Naga be bidi we Elisabet mosi dabe mu bidai goli, agai ogwa haliga elalubao. Polobadu augwaligo te wego wai ame nogobeo wai dao. Tiali goli, megi aga haliga elalubadi,

^e 1:32 2 Sml 7:12, 13, 16; Ais 9:7

polua a naga olama, me badu nogo deli polo pai dao. ³⁷Godigo me isiąwai
sę me menio,” te ensel bidigo te po wali.^f ³⁸Tama Mariago te po wali,
enselbolo, “E. Ena Genuai Bidi agai sę ebo we dao. Eno homugo nago
enabolo wali po tū sisu pomai yaiba,” te po wali. Tama te enselgo Maria
taga palio.

Mariago Elisabet sugi pali

³⁹Te tamadi ganama, ensel dali po miani elalubadi, Maria aga Judia
hanude bulu du meba palio. ⁴⁰Teba sabolama, aga Sekaraigo beba
sabolama, Elisabetbolo “Giligade dao” wali. ⁴¹Tama Mariago “Giligade
dao” wali po obadi, Elisabetgo haligade elaluali wai mobodo yilio. Te
Godigo Dwagi Yai Mobogo Elisabet beasagasalio. ⁴²Tama Elisabetgo
midigi sali, Mariabolo dagą olama, te po wai, “Te Godigo nage dali dwagi
yai homu mu ebe yabao, gasa we dabe aiyaba elalualio. Nago uda haliga
elalubo ogwago me tama naga te waibao, olo bidi dabe aiyaba elaluabao.
⁴³Godigo ena te moni dwagi yai sę magi baso maniwe, te eno Genuai Bidi
aga idago ena suagasali. Te ena genuai we menio. ⁴⁴Edao! Nago enabolo
'Giligade dao' wabo odama, eno haligade elalubo waigo dwagi yai homu
eyu, mobodo yilio. ⁴⁵Genuai Bidigo nagebolo wali poba nago homu begi
pai yabao. Tama teyu, nage bugai homu mu te ebao. Nosali Genuai Bidigo
yaibao wali sę tū sisu paibao,” Elisabetgo te po wali.

Mariago wali tęabi po

⁴⁶Te Mariago te po wali, “Eno homugo da Genuai Bidigo nogi ugwaba
sobao. ⁴⁷Tama eno nomago ena tau sabo Godibolo bugai homu mu ebao.
Te ena agai sę ebo we da. ⁴⁸Tiali ena da, olo bage da. Tama agai ena
kegeda pabo menio. Te megı me, nosali me bidibo we bidigo Godigo
enabolo bugai homu mani po naga ola paibao. Magi baso meni. ⁴⁹Moni
Bomai Godigo enabolo te genuai sę yali pode te obe dao. Agai nogi gasagi
yai mu tedali dao. ⁵⁰Te God agai po tū sisu pabo we bidibolo agai olo tau
sabo sę me, te iba bidada pabo bidigo ogwago ogwa dabego me, agai po
tū sisu pidubaso da, agai tama tede piduabo tolai dao. Agai nogogo bomai
sę yai dao. ⁵¹Po sela səy় augwaligo augwa nogi kegenanu ebo bage
agai augwali besela səwai dao. ⁵²Agai gavman tobolu bidi dabe aiyaba
elaluama, te nogi meni yai bidi nogi ugwaba sabo dao. ⁵³Agai te nasi ebo
bidi dwagi yai naigo tabi pagalobo dao. Agai te sibage hauwa mubo bidi
olo dali gudula palobo dao. ⁵⁴Polobadu mu Godigo dago nq̄ dabebolo
bodolu mawani. Tama megı agai bodolu tū sisu pobao. Da Israel dabe
agai sę ebo we bidi dabe dao, tama megı agai da tau magasalio. ⁵⁵God
agai dago nq̄ dabebolo te po wali, ‘Te eno Abraham hobede eyu, te aga

^f 1:37 Gag 18:14

hani me, ibaba ame nabo ogwa me, tama naga tede paibao.' Tama te wali po agai kegeda pabeo," Mariago te po wali.^g

⁵⁶Te Maria Elisabet dali bidibadi, polua sela bidama da, tama nosali aga buluba ma pali.

Elisabetgo Jon tega pali

⁵⁷Te Elisabet agai wai tega pabo bodolu asobaso, te agai ogwa tega pai dao. ⁵⁸Aga hani dabe me, te deli bulu bage me tigidaligo Godigo Elisabet aga olo dali tau sali po odama, tigidali Elisabet dali bugai homu ela silai dao.

⁵⁹Te Sarere deli silama, tama augwaligo te ogwa tigiwali togwagasali, te tebo Juda dabego polobadu tama tolai sę dao. Tama augwaligo homugo "Agai aya nogi Sekaraia ma poaibao," te po wali. ⁶⁰Tiali goli te ogwa aga idago po weyu," Te egobeo. Dago e wai nogi Jon poaibao," te po wali. ⁶¹Tama augwaligo te po weyu," Te naga deli hani bagede te tiwai nogi nago awa dabede me, hai dabede me tiwai nogi elalubo menio," te po wali. ⁶²Augwaligo nogogo bagi eyu, Sekaraiabolo "E wai nogi de poaibawe?" te po wali.

⁶³Tama Sekaraia agai nogogo bagi eyu, "Te buku asebo nai me sesao," olama, tama agai e tama aseanio, "Agai nogi Jon dao." ⁶⁴Tama augwaligo homu tų̄ palio. Polo tama Sekaraia agai po wabo ma usu yilio. Tama agai hamena ma usu yali. ⁶⁵Te po weyu, agai Godigo nogi ugwaba sali. Tama augwa deli bulu bidi dabe me wi kisu dali. Augwali tigidaligo te po ola silama, pomo mu yilio, te Judia dabego bulu bageba me bulu agebele me. ⁶⁶Augwaligo te po odobo si, monu pomo mu eboso, augwaligo te po wali, "Te wai nosali mena tama tiwai wai bidigowe?" wali. Genuai Bidigo bomo aga dali bidibo augwaligo koneanio.

Sekaraiago wali tę̄abi po

⁶⁷Godigo Tedali Mobo Bidigo Sekaraia feasagaso baso, te Godigo po pusuyu, te po walio, ⁶⁸"Dena Genuai Bidi Israel dabego God nogi kegenaninao. Agai aga we bidi da tau sagasalio. ⁶⁹Tilama, agai da ma abelai dao. Polobadu aga sę yali bidi Devitgo eda dadalo asali hanide bomai bidi me deli pedelama, te bidi Godigo da ma sabo bidi nigelai dao. ⁷⁰Polobadu agai po pusa mani bidi dabego waligia te yaliao. ⁷¹God agai polobadu agai da boi bidigo nogode ma saibao wali po te sabao, te da dali dwai homu ebo bidigo nogode me agai da sali. ⁷²Agai dago wą̄j dabe moni hobede eyu, tau saibao wali bidi te asalio. Tama agai polobadu bodolu mani aga me konealubao. ⁷³Agai dago wą̄j Abrahambolo bomai bodolu mu mawai dao. Tama megı agai polobadu yaibao waligia yainu

^g 1:55 Gag 17:7; 1 Sml 2:1-10

te ebao. Boi bidigo nogode agai da ma sainu ebao wai.⁷⁴ Tama agai
sę dago dąu olama, tulama, wi egobeo.⁷⁵ Da e tőde bidibo sogo dago
dwai sę isąma, dolo tüyü pelama, agai sę inao. Tama aga gesabidide da
dolasa bilinao,” Sekaraiago te po wali.⁷⁶ Agai te po me Jonde wali, “Eno
ogwa, ‘Nage nosali Moni Godigo po pusa mabo bidi mu dao,’ Godigo te
po waibao. Nage bolo polasa paidigi Genuai Bidi nosali asaibao. Nage
polasa pelama, aga asobo tü sisi ela muaibao.^h ⁷⁷Agai we bidibolo nago
po ola menama, konealueibao. Agai augwaligo dwai sę dabe sela şanama,
augwali ma sai hagede ebao homu yaibao.⁷⁸ Dago God da dali hobede
mu elama, agai e tama tiwaibao. Te dagalu be posobo ula elalubo e tőba
dabolo tagala palaibao.⁷⁹ Tama te hulide bidalubo bageba ula ilimainu,
me isabo pąde elalubo bage me, te bage tau somainu tiwaibao. Agai da te
dwagi yai homude bilibo tüyü pabo po agai dabolo mobo ola mawaibao,”
Sekaraiago te po wali.ⁱ

⁸⁰Nosali e wai Jon genuai elama, te aga noma bidi me bomo yai
pedalumainu ilali. Tama aga te we bidi meni yai bulude bidali. Tama
nosali aga te Israel we bidigo gesabidiba hanilagaselama, bidali.

Mariago Jisas ame nani

(Mat 1:18-25)

2 ¹Te sogo gavman tobolu bidi Sisar Ogastus bidibo sogo, te tigidali
we bidi nogi sabo sogo bodolu muani. ²Te sogo hasia mu augwaligo
nogi sabo gagalali. Te Siria tőgo gavman tobolu bidi nogi Sairinias te
sogo bidai dao. ³Tama tibaso, tigidali we bidi augwa page buluba nogi
sai hagede pela sililio. ⁴Tama te bidi Josep me aga bidali odogo bulu te
Galili tő pedaide elaluali bulu Nasaret taga pelama, te aga wąj Devitgo
te Judia tőde nigali hanu nogi Betlehem hanuba holalio. ⁵Josep dali aga
daganasa bidibo we Maria dali augwali si me nogi sai hagede holalio.
⁶Tama Mariago haliga elalualio. Augwali si Betlehem tede bidibadi
yaide, Mariago wai tega pabo bodolu maga yalio. ⁷Tama Maria agai hasia
ogwa ame nani. Tama pedai ugwa nanamenu dabego belama, tama kibu
bulmakaugo nai tubo halobageba te ogwa wai pilagalama elalualio. Magi
baso menio. We bidi osogo pibo be pąqana saide.

Ensel dabego kibu sipsip tonalubo bagebolo po pusali

⁸ Te bulu bogu badu kibu sipsip tonalubo bage me badu bidaluai, tama
augwaligo hulide me kibu sipsip tonalubo dao. ⁹Genuai Bidigo ensel
bidi aga augwali pageba aselama, te Genuai Bidigo ula augwaligo tigide
te moni ula yali. Tama augwali moni wi mu yali. ¹⁰Tiali goli “Wi ego,”
enselgo te po wali. “Ena dage pageba dwagi yai po sela sobao, te we

^h 1:76 Mal 3:1 ⁱ 1:79 Ais 9:2

bidigo te po odama, bugai homu mu emainu eba. ¹¹ Megi pio hulide Devitgo hanude wai me tega pai dao, te agai dage ma dobola saibao, aga te we bidi tau somainu sa muani Genuai Bidi dao. ¹² Dagego gegegi peyu da, te wai boq me ugwa nanamenu dabego mesega galama, tama bulmakaugo nai tubo halobage tomode pilai elalubo sueibao. Telalubo sulama, dagego te po mu daba homu yaibao,” te enselgo te po wai.

¹³ Te enselgo te po obadi, polo tama dagalu badu ensel hauwa mu dulama, te ensel dali dololalubo sualio. Augwaligo Godigo nogi ugwaba siyu, tama walio, ¹⁴“God agai nogi ugwanu mu kegenanao. Tode bidibo we bidi homu tegaluama, bidoq. Augwalibolo Godigo dwagi yai homu eba,” te ensel dabego te po wali.

Kibu sipsip tonalubo bagego Jisas sugi pali

¹⁵ Te ensel dabe dagaluba ma pebelawaide, te sipsip tonalubo bagego te po wali, “Da Betlehembä pelama, megı Genuai Bidigo dabolo wali po page sugi pebelawaibao,” wali. ¹⁶ Tama augwali polo pali. Gege pelama, Maria me Josep dali augwali si suali, te wai boq me bulmakaugo tubo nai halobage tomode pila mubo suali. ¹⁷ Sulama da, te waide augwaligo odali po dabe te bidi Josep dali Maria dali augwali sibolo te po dabe pusa mani. ¹⁸ Tigidali we bidigo te sipsip tonalubo bidi dabego wali pode nomu mu salio. ¹⁹ Tama Mariago te po odobo si, agai te po page me, agai gedugo suali se me, mena tama yaliwe te homu idu konealudu geani. ²⁰ Tama te sipsip tonalubo bage te sipsip tonalubo seba ma geasa peyu, Godigo nogi kegene nalani. Te augwaligo gedugo suali se dabe me, te augwaligo odali po dabe me, tu sisu pela silali. Tama tibaso, augwaligo bugai homu elama, augwaligo Godigo nogi ugwaba kegenanalni.

Jisas nogi poali

²¹ Te Sarere deli bidama, nosali augwaligo te wai tigiwali togolama, aga nogi Jisas polali. Te wai aga idago tabide menibadi, hasia te enselgo te nogi ola mawai.

Augwaligo Jisas te Moni Lotu Be tempel teba magasali

²² Te wai dali aga ida dali si habu selali bodolu ela soaide, Mosesgo waligia, tama aga ida dali aya sigo Jerusalemba Genuai Bidibolo mawainu sela pali. ²³ Genuai Bidigo bomo yai pode aşənî yaligia, “Wego hasia ogwa ebaso da, Genuai Bidigo nogoba muiqo,” tama po aşənî, te augwali sigo te po wali pali.^j ²⁴ Tama augwali sigo te Godibolo maiabo ba hi si ma ba ni sasi si sela pelama, te Godiba maiabo pogo me asai dao. Te Genuai Bidigo bomo yai pode wali yaligia tialio.

^j 2:23 Sai 13:2, 12

²⁵ Te sogo bidi me nogi Simeon Jerusalemde bidalio. Te aga doloba pai kolesaga eyu, te Godiba lotu wabo bidi bidai dao. Aga te Israel dabe tau sabo bidi asobo tonaludu gesege yai dao. Godigo Tedali Mobo Bidi aga dali bidibaso, tama Godigo Mobo Bidigo agabolo weyu, te aga polo isigobeo po wai dao.

²⁶ “Te Genuai Bidigo we bidi tau somainu sa muani bidi Krais sulama, nage isaibao,” te po wali. ²⁷Tama Godigo Mobo Bidigo Simeon hodolama, tama Moni Lotu Be tempel tomoba pali. Godigo bomo yai pode wali po yaligia emainu, te aga ida de aya sigo Jisas te be tomoba sela pali. ²⁸Simeongo nogogo te wai dobola selama, tama agai Godigo nogi ugwaba siyu, e tama te po wali,

²⁹“Genuai Bidi, megi nago s̄e ebo bidi pomainao, megi ena homu tegaluama, bidaio, polobadu nago wali yaligia. ³⁰Eno gedugo nago da ma sainu yali s̄e eno sualio. ³¹Nago te tigidali tqde bidibo we bidi gesabidide sisi ela muai dao. ³²Sole ula deli dao, tego deli te Israel hani isawai we bidibolo ula ola mawaibao. Tama agai moni nogi te Israel hani we bidi dabebolo mawaibao,” Simeongo Jisasde te po wali.^k

³³ Te ogwa aga aya de ida si Simeongo te ogwabolo wali pode augwali si noma sali. ³⁴Simeongo Godigo bugai homu Jisas dali aga aya de ida si augwalibolo me ilao wali. Agai Jisas aga ida Mariabolo te po wali, “Odiao. E waigo pode Israel we bidi hauwa augwaligo God taga paibao. Tama hauwa bage me augwali God p̄aba asaibao. Te aga daj̄ tiwai me deli nigalueibao, tama bidi hauwago agabolo dwai po waibao. ³⁵Tama tibaso, we bidi hauwago geme dualalualu homu te pebeli diliba pedelaibao. Tiali goli nage da, te bainat hw̄a ge tiwai me deli elalu, te nago hoboludu togwalubo tiwai eboso, te homu dene tiwai yaibao,” Simeongo te po wali.

³⁶⁻³⁷Te Simeon agai wali po silibo si, te mosi dabe we me deli te Godigo po pusa mani profet we tiwai we bididuali, te we aga nogi Ana dao. Aga te Fanuelgo wegi dao, te Aser hani we dao. Te we mosi dabe mu dao. Te mosi we te Moni Lotu Be tempel tomoba asali. Te mosi we gesi tigi elalubadi bidigo selama bidali, te kibu be nogo a naga me badu nogogo si te 7 yia dao. Tama nosali aga bidi isaide, te agaduba naga bidali kibu be 77 bidali. Te aga bidi dali bidali kibu be dali deliba taluyu, te bidi sese me si me si tama me si me si, te 84 yia dao. Te we agai te Moni Lotu Be tempel taga pabo menio. Aga nai habu selama, Godibolo gedu haluasa po hanaludu bidama, Godigo s̄e me ulade eyu, hulide eyu yai dao. ³⁸Te sogo me aga p̄aba aselama, Godibolo “Nage usu dao” wai dao, Godigo te wai mawai baso. Te Godigo Jerusalem bage ma sai hagede tonalubo we bidi dabebolo te ogwa wai bidibo po pusa mani, te mosi we Anago.

Josep Nasaretba ma pali

³⁹Te Josep dali Maria dali sigo Godigo bomo yai pode yao wali s̄e dabe ela silama, augwa te Galili tq pedai tomode elalubo bulu Nasaret

^k 2:32 Ais 42:6; 49:6; 52:10

be naniba ma pali,. ⁴⁰Tama te ogwa gawabulu elama, bomo mu yali. Godigo aga olo mu tau sabo kolesagade olo dali mu tau selama, dwagi yai kolesaga elalualio.

Jisas wabo ogwa Moni Lotu Be tempel tomoba pali

⁴¹ Te Jisas aga aya dali ida si Genuai Bidigo te Juda dabe augwali daj iilalide Godigo enselgo augwali ela soali te kone palu tubo nai tubo sogode tigidali kibu be tomode augwali si Jerusalemba holoduai dao. ⁴² Jisas kibu be nogo si olama, sagago si digi peda sai elalubadi, augwali te nai tubo sogo Jerusalemba holodubogia holali. ⁴³ Tama te nai tubo bodolu ela sobaso, augwa buluba pebelabo gagalali. Tiali goli, te ogwa Jisas Jerusalemdem me biduali. Aga bidibo aga ida dali aga aya sigo konebe. Augwali sigo te homu yai, “Aga te pebelabo bage tomode pabe yaba” homu yali. ⁴⁴ Tama deli sogo augwali palio. Te sogo pio augwali sigo augwa be bidi dabe, augwa abagi dabe tomode Jisas gegali, mu menio. ⁴⁵ Susiabantu, augwali si Jerusalemba geasa ma pali, tede gegali. ⁴⁶ Augwa si gegedubadi, sela sogo hulide usu nama gegalio, nosali augwali sigo aga te Moni Lotu Be tempel tomode suali. Te Juda dabego po ola mabo bidi dabe tomode duguladubo suali. Augwaligo po wabo odalu, agai me ugwaba hanalu idubo suali. ⁴⁷ Agai po odali we bidi dabe tigidali noma sali, “Agai homu poa pelamubao, agai pusali po dwagi yai po dao,” wali. ⁴⁸ Aga ida dali aya sigo sulama, noma sali. Aga idago agabolo te po wali, “Idao, magi baso nago tama te ebawe? Naga aya dali dadi si homu adaladu basso, gegaligo sai dao,” te po wali. ⁴⁹ Tama agai augwali sigo po wei ponoyu, te po wali, “Magi baso dage sigo ena gasa bulude gegeduai dawe? Eno ayago bede bidabo da, dage sigo konebewe?” ⁵⁰ Tiali goli augwali sigo agai te wali po page konebe. ⁵¹ Tama aga ida de aya si dali Nasaretba aiyaba ma dulali. Tama tigidali sogo agai ida dali aya sigo po wali piduali. Tama aga idago tigidali po aga homuba munama, te daj olalualio. ⁵² Tama Jisas genuai elama, agai homu kolesaga dwagi yai mu yali. Godigo me e tqde bidigo me Jisas godolo mu elama, kua pali.

Te we bidi baptais mabo bidi Jon agai Godigo po pusali
(Mat 3:1-12; Mak 1:1-8; Jon 1:19-28)

3 ¹⁻² Te Sekaraigo ogwa Jon te bidi meni yai bulude bidibadi, Godigo agai po agabolo konelali. Tama te sogo tr gavman genuai tobolu bidi me nogi Taiberius, me sogo Sisar wabo da, agai se gagalali kibu be nogo si olama, me saq sese silali. Bidi me nogi Pontias, me sogo Pailat wabo, te Judia bulude aga gavman tobolu bidi bidai dao. Me Herot aga Galili tqde gavman tobolu bidi bidali. Aga ama Filip te bulu me nogi Ituria dali Trakonitis dali si tonaluali. Bidi me nogi Lisania agai te bulu

me nogi Abilene tonaluali. Te sogo te pris bidigo tobolu bage nogi Anas dali Kaiafas dali si bidibadi dao. ³Godigo po Jonbolo ola mobaso, Jon aga te pabo aji nogi Jordan sesege bulu dabeba pali. Agai te bulu we bidi dabebole po pusuyu, tama te po wali, “Dagego dwai se eboba tudi ilama, dage tigidali baptais sao, tama Godigo dagego dwai se yali gegeda palomainu,” tama po pusudu geani. ⁴Jongo yali se te Godigo po pusali profet bidi Aisaiago polobadu bukude aşeanı yaligia te ebao. Aisaiago te polobadu bukude aşeyu, tama te po wai dao, “Te bidi me deligo bidi meni yai bulu tomode i udubao, ‘Genuai Bidi asobo tu geselao. Aga bilabo tu dolo mu nigao. ⁵Tigidali odogo dabe mu paganao. Tigidali bobiabi dabe du dabe kigila palao. Gagila bilai tu dabe me dolo ma dodolao. ⁶Tigidali we bidigo Godigo olo hobede elama, tau sabo kolesaga augwa gedugo sueiba,’ ” te Aisaiago te po polobadu aşeai dao.¹

⁷Tama we bidi hauwa mu Jon agai augwali baptais momainu Jon aga pageba feasagasali. “Dage dwai hasamani dabe,” agai augwalibolo te po wali. “Godigo dage dali yabo sebede dage sana pagameo po tego dagebolo waliwe? ⁸Dagego dwagi yai se ebo sulama, dagego dwai se dabe tudiba sawai yabao po waibao, te gasa bidigo te po waibao. ‘Abraham da dago wai mu da, dago dwai se meni,’ te homu ebo gagali igimio. Eno dagebolo megi mu po tama obe dao. Godigo e elewi dabego Abrahamgo bulai wai hani sibi nigelabo homu eyu da, te agai tegi dao. ⁹Ni gelabo bidigo te ni tigide sae ilama, te sae nide hwu munalubaso da, te ni tamadi tama gelaibao homu yaibao. Ni dabe du gesego walisiawanı ni dabe da, gelama, isiba sawaibao. Dage te tobage sae ilali ni tiwai dao,” Jongo te po wai.

¹⁰Te bagego agabolo hanalu wali, “Dago megi magi se egowe?” ¹¹Jon agai te poba wei ponoyu, te po wali, “Holobo ugwa si munalubo bidigo me deli te holobo ugwa meni yai bidibolo mao. Me tubo nai munalubo bidigo me te meni yai bidibolo dobayao,” Jongo te po wali.

¹²Takis sesa bilibo bidi dabe me badu Jon pageba te baptais sainu asama, hanalu wali, “Po ola mabo bidi, dago magi yagawew?” wali. ¹³“Te takis mone sa wali gilama dolo tama naga weli pelama siyu, te dagego homugo edelama obanu sigi pigimio,” Jongo te po wali.

¹⁴Enesigi bidi dabe me badu Jon pageba asama, hanalu wali, “Da da, magi yaliwe? Dago da magi egowew?” Jongo augwalibolo te po wali, “Dagego gasa bidigo mone bomo elama, sigimio, me tibo po tu elama, sigimio. Duga mabo mone deli naga sabo homu elasa siqo,” wali.

¹⁵Te we bidigo bugai homu mu hodolali. Augwaligo homugo Jon te Godigo we bidi tau somai hagede sa muani bidi Krais yaliwe homu yali.

¹⁶Tama tibaso, Jongo augwali tigidilibolo te po wali, “Eno dage da

¹ 3:6 Ais 40:3-5

ąigo naga baptais mobao. Tiali goli ena ela holai bidi deli nosali asobao. Eno agai sąga nadoba pedabo me usu me egobe. Tama te bidi agai te Godigo Tedali Mobo Bidi dage me badubolo mawaibao, te baptais mabo tiwai. Agai dage me badubolo sia mawaibao, te baptais mabo tiwai.

¹⁷Nai dagalobo bidi aga savol selama, tubo nai wit ge dali sabea dali si dagalaibao. Tilama, aga te nai ge naga aga beba muyu, sabea naga te siaba muaibao. Tama te nosali asobo bidi agai te we bidi dagalu me te hasi yaibao, augwali me badu agai te sula sisąbo siaba mawaibao,” Jongo te po wali.

¹⁸Te hauwa sogo haniani tudu Jongo dwagi yai poba asiaqo nama, te Godigo po pusubo sogo agai mobo maduali, te we bidibolo, dwai ebo kolesaga hasegelemai hagede Jongo tama odualio. ¹⁹Tiali goli, Jongo pogo gavman toboli budi Herot guni pagede mu ela paludali. Te magi baso menio. Aga amago we Herodias aga dagala selama, me hauwa sogo dwai dwai sę mu iduali. ²⁰Tama Herot aga Jon kalabusiba ma muanigo Herot agadi dwai sę tomoba mu togwa pai dao.

Jongo Jisas baptais mani
(Mat 3:13-17; Mak 1:9-11)

²¹Te Jongo tigidali we bidi baptais menama, tama nosali agai Jisas me baptais mani. Tama baptais selama, Godibolo po odubadi yaide, dagalu tomode si buga pali. ²²Tama Godigo Tedali Mobo Bidi dagaludu dulali. Te Godigo Mobo Noma Bidi ba hi tiwai aga toboluba dugayagasali. Dagalu badu i weyu, te po wali, “Nage eno homu kęqlubo Ogwa mu dao. Eno nage dali dwagi yai homu elalubao,” te po wai.

Jisas aga nqugo nogi dabe e dao
(Mat 1:1-17)

²³Te bidi Jisas agai kibu be bidi sese deli olama, me bidigo nogo si wagı sobadi, te 30 yia wabode aga sę ebo gagalalio. Tigidali we bidigo homugo Jisas Josepgo ogwa daba homu yali. Tama Josep aga aya Heli. Heli aga aya Matat, Matat aga aya Livai. ²⁴Livai aga aya Melki, Melki aga aya Janai, Janai aga aya Josep. ²⁵Josep aga aya Matatias, Matatias aga aya Amos. Amos aga aya Nehum, Nehum aga aya Esli, Esli aga aya Nagai. ²⁶Nagai aga aya Mat, Mat aga aya Matatias, Matatias aga aya Semen, Semen aga aya Josek, Josek aga aya Joda. ²⁷Joda aga aya Joanan, Joanan aga aya Resa, Resa aga aya Serubabel, Serubabel aga aya Sealtiel, Sealtiel aga aya Neri. ²⁸Neri aga aya Melki, Melki aga aya Adi, Adi aga aya Kosam, Kosam aga aya Elmadam, Elmadam aga aya Er. ²⁹Er aga aya Josua, Josua aga aya Elieser, Elieser aga aya Jorim, Jorim aga aya Matat, Matat aga aya Livai. ³⁰Livai aga aya Simeon, Simeon aga aya Juda, Juda aga aya Josep, Josep aga aya Jonam, Jonam aga aya Eliakim, ³¹Eliakim

aga aya Melea, Melea aga aya Mena, Mena aga aya Matata, Matata aga aya Natan, Natan aga aya Devit,³² Devit aga aya Jesi, Jesi aga aya Obet, Obet aga aya Boas, Boas aga aya Salmon, Salmon aga aya Nason.³³ Nason aga aya Aminadap, Aminadap aga aya Atmin, Atmin aga aya Arni, Arni aga aya Hesron, Hesron aga aya Peres, Peres aga aya Juda.³⁴ Juda aga aya Jekop, Jekop aga aya Aisak, Aisak aga aya Abraham, Abraham aga aya Tera, Tera aga aya Nahor,³⁵ Nahor aga aya Seruk, Seruk aga aya Reu, Reu aga aya Pelek, Pelek aga aya Eber, Eber aga aya Sela.³⁶ Sela aga aya Kainan, Kainan aga aya Arpaksat, Arpaksat aga aya Siem, Siem aga aya Noa, Noa aga aya Lamek.³⁷ Lamek aga aya Metusela, Metusela aga aya Enok, Enok aga aya Jaret, Jaret aga aya Mahalalel, Mahalalel aga aya Kainan.³⁸ Kainan aga aya Enos, Enos aga aya Set, Set aga aya Adam, Adam aga aya God dao.

Satango Jisasbolo dwai sę yanama, sinayani

(Mat 4:1-11; Mak 1:12-13)

4 ¹Jisas tigide Godigo Tedali Mobo Bidi paganaluali. Tama Jisasgo te Jordan pabo aji taga pelama, ma geasa pali. Tama Godigo Mobogo aga te bidi meni yai buluba odasa pali. ²Jisas te bidi meni yai buluba pelama bidibadi yaide, Sarere a naga olama, a naga sogo, te 40 dei bidai elalubadi, Satango Jisasbolo dwai sę yanama sinayagasali. Te sogo usu nama Jisasgo nai munu me tubeo. Tama te sogo silibo si, Jisas nasi yali. ³Tibaso, Satango agabolo wali, “Nage Godigo Ogwa da wida, teda nago wele elewibolo po olama, tubo nai gagagi sobaso da, nage tuao.” ⁴Tiali goli, Jisasgo agai po wei ponoyu, te po wali, “Woo, Godigo bukude wali po e tiwai po wai dao, ‘Te tubo nai bretgo naga te bidi bidabo ula magobeo.’”^m ⁵Nosali Satango Jisas odasa holama, polo tama tigidali we bidi tqde bidibo ola mani. ⁶Satango te po wali, “Te tigidali we bidi tonalubo bomo me, genuai nogi me, nagebolo naga mawaibao. Te tigidali nai eno tonalubo dao. Eno gasa bidibolo maiabo homu ebaso da, mawaibao. ⁷Nago enabolo kidu tqba polama, enabolo lotu po weyu da, teda te nai dabe naga saibao,” Satango te po wali. ⁸Tibaso, Jisasgo wei ponoyu, te po wali, “Woo, Godigo bukude wali po e tiwai po wai dao, ‘Nago naga Genuai Bidi God dali naga lotu po weyu aga dologode bida. Tama nago agai sę deli naga dąq olama yao,’ te po wai dao,” Jisasgo te po wai.”ⁿ

⁹Nosali Satango Jisas Jerusalem Moni Lotu Be tempel poa pali daiba mu sela holali. Tama Satango te po wali, “Nage Godigo Ogwa da wida, edu aba samanao. ¹⁰Godigo po wali bukude te po wai dao, ‘Godigo aga ensel dabebolo olama, nage saboa sagasaibao,’ te po wai dao.”^o ¹¹Tama

^m 4:4 Bom 8:3 ⁿ 4:8 Bom 6:13 ^o 4:10 Tib 91:11

te bukude me te po wai dao, ‘Augwa nogogo nage tola selama, elewigo nage me saqade me selegobeo,’ wai dao,” te po wali.^p ¹²Tiali goli, Jisasgo wei ponoyu, te po wali, “Te bukude po tama telalubao, ‘Nago Genuai Bidi God olo subigila usu sigio, sinagio. Aga te nago God dao,’ ” te po wali.^q ¹³Satango tama sinana bilali dobaso, Jisas aga taga pali, me sogo ma sinawainu yai.

Jisasgo Galili təde sə ebo gagalali
(Mat 4:12-17; Mak 1:14-15)

¹⁴Te Godigo Tedali Mobo Bidigo bomode Jisas ma pelama, Galili təba sabolali. Aga asali po te bulude mu pagia pali. ¹⁵Hauwa sogo Jisas agai po te Juda dabego bomo yai po ola mabo be dabede te we bidibolo ola madu geani. Tama tibaso, tigidali we bidigo aga nogi uwgaba sali.

Nasaret bagego Jisas tudiba ilali
(Mat 13:53-58; Mak 6:1-6)

¹⁶Te bidi Jisas polobadu aga dwasianu badi bidama, gomunai yali pesage te Nasaret be nani tomoba palio. Te Sabat sogo aga te Juda dabego bomo yai po ola mabo beba pidu bogia. Tama tede aga te Godigo wali po buku po nedai hagede, dolalugulali. ¹⁷Augwaligo agabolo polobadu Godigo po pusa mabo profet bidi nogi Aisaiago asęani po buku nedao olama mawai. Tama agai te buku dagalama, po e tama asęai suali, augwalibolo haninama nedali.

¹⁸“Genuai Bidigo Mobo Bidi ena dali bidibao.

Agai dwagi yai po eno te nai meni yai we bidibolo
ola momainu ena sa muai dao. Agai ena tama po
pupusu bilimainu tagala palai dao, ‘Dage kalabus
yali bage kalabus tagala piəo. Gedu widai bage,
dage duga gedugo ma sueibao.’ Kalabus səgo tabibo
bage augwaligo sə togolomainu agai ena tagala
palai dao. ¹⁹Genuai Bidigo e təde bidibo we
bidi ma sagasabo bodolu magayagasobaso, pupusu
bilimainu ena tagala palali,”^r

te asęani po Jisasgo haninama nedali, aga digi aga homugo tiyai. ²⁰Te Jisasgo te buku ma mesegelama, te buku tonalubo bidibolo menama, aga dugagulali. Tama te be tomode bidali we bidigo aga naga tonono yali.

²¹Tibaso, agai te po wabo gagalali, “Megi tama te eno nedali po dolo tū sisu pabo po duga te odali dao,” te po wali.

²²Te we bidi tigidali augwaligo Jisas nogi uwgaba sali, tama Jisasgo dwagi yai po pusalide augwali tigidali noma sali. Tiali goli, augwaligo te

^p 4:11 Tib 91:12 ^q 4:12 Bom 6:16 ^r 4:19 Ais 61:1-2

po wali, "Mena tamawe, e bidi da, Josepgo ogwa meni yali wenagao," te po wai dao.

²³Te Jisasgo augwalibolo te po wali, "Mu tama, dagego enabolo hasia bolo te po waibao, 'Dokta bidi, naga digi naga ma geseleyu yao. Nago bulu me nogi Kaperneamde yali sę po dago odai dao. Tama naga te yaligia nage e pesagede me ma tama tiao,' dagego enabolo waibao."

²⁴Jisasgo wei ponoyu, te po wali, "Eno dagebolo mu tama te obe dao, Godigo po ola mabo bidigo po aga bulude bidu wabo, aga te bulu bidigo mu tama odobo menio. ²⁵Eno dagebolo mu tama obe dao, Godigo po pusa mabo bidi Elaija bidali sogo, kibu be sela olama, me kibu be tomode togolama, tulubage munu me tulai menio. Tigidalı pesagede nasi ela pai dao. Te sogo Israel hani wilawe we hauwa mu bidai dao.^s ²⁶Tiali goli, Godigo Elaija te Israel hani wilawe we me tau somainu teba pao wai menio. Tiali goli, te Israel hani isławai bage Saidon tőde, Sarefat be nani we wilawe deli bidibo madi naga tau sigi pao wai dao, Godigo. ²⁷Me Godigo po pusa mabo bidi Elaisa bidali sogo, Israel bage oyabé bidi hauwa bidai dao. Tiali goli, augwali me deli ma geselai menio. Me ma, te Israel hani isławai oyabé bidi me deli bidai, te Siria tőde. Agai nogi Naman. Te oyabé bidi deli digi Elaisago ma geselai dao," Jisasgo te po wali.

²⁸Te Juda dabego bomo yai po ola mabo bede bidali bagego te po odoyu, moni sębę yali. ²⁹Augwali hodaluama, Jisas nogo tuluama, aga te be nanidu kegasa pelama, buluba sayani. Te be nani dude sę yai dao. Tama augwaligo te sau mabo dageba Jisas odasa pali, te sauba səawai hagede. ³⁰Tiali goli, Jisas aga te bidi hauwa tomo agebeledu dią sesa palima, aga polo palio.

Jisasgo bidi me tigide dwai haubo sela sayani
(Mak 1:21-28)

³¹Te bidi Jisas Galili bulude be nani me nogi Kaperneamba dulali. Tama te Sabatde we bidi Godigo po ola maduali, te Juda dabego bomo yai po ola mabo be tomode. ³²Tama agai po bomo yai mu wabo odama, te we bidi noma sali. ³³Te be tomode bidi me dwai haubo dagawai bidi bididuali. Agai moni hai olama, te po wali, "Tega Jisas, nage Nasaret bidi da. ³⁴Nage dabolo magi sę yainu asaliwe? Nage da dolainu asaliwe namao. Eno nage koneani. Nage Godigo gasagi yai tedali wiegi yai bidi da," wali. ³⁵Tama Jisasgo agai po tomode togwa sayu, te po wali, "Nage sagiasa peyu, te bidi taga soao," wali. Tama te dwai haubogo te bidi augwali tomode te tōba sayani. Tama te dwai mobogo taga pelama, te bidigo tigi me dolobe. ³⁶Tibaso, tigidali we bidi midigi yali. Augwa hasi

^s 4:25 1 Kin 17:1

ugwa tono, eda tono eyu, te po wali, “E ma, magi po wagawe? Dwai haubobolo bomo elalubo bidigo wabo po gagawai wabo yabao. Te po odama, wabo po selama, te dwai haubogo te bidi taga pobao,” te po wali.
³⁷Jisasgo tama tiali po te bulu tigidali bila similali.

Pitago aga augo gasi Jisasgo pogo silali
(Mat 8:14-15; Mak 1:29-31)

³⁸Te Jisasgo te Juda dabego bomo yai po ola mabo be taga pelama, tama Saimongo be tomoba pali. Saimon aga au tigi moni posolo gasigo mu isai səai pila muani. Te we tau somainu eyu, augwaligo Jisas i wali.
³⁹Te we pageba Jisas aga dolalugi pelama, “Te dwai gasi, nago te we taga pao,” Jisasgo te po wali. Te po obaso, te gasigo te we taga pali. Tama tilama, te we polo tama ma hogoda sanama, be page asali bidi dabe nai ula mabo sə ela bilali.

Jisasgo we bidi hauwa geselali
(Mat 8:16-17; Mak 1:32-34)

⁴⁰Te giliga ge aba degasaide, te gasi yali bidi aga abagi dedego augwali Jisas aga pageba odasa aselawali. Tama agai nogo te gasi we bidi dononama, mumuna bilali. Tama augwali tigidali ma gesa pali. ⁴¹Dwai haubo dabego we bidi hauwa taga pali. Tama te dwai haubo dabego hai olama, te po wali, “Nage Godigo Ogwa dao.” Augwaligo koneani, Jisas te Godigo we bidi tau somainu sa muani bidi Krais da. Tama tibaso, augwaligo te po te we bidibolo waidali weyu, agai augwaligo po tomode togwa sayani.

Jisasgo be nani dabede sə ela bilali
(Mak 1:35-39)

⁴²Te sogo do kigamu hulide mu Jisas hogoda sanama, bidi meni yai buluba mu pali. Nosali te we bidi augwaligo gegali digi sulama, augwali taga pidali weyu, “Jisas, nage ede bidao,” wali. ⁴³Tiali goli, agai wei ponoyu, te po wali, “Godigo eno sə emai hagede, tagala palali sə gasa hanuba me egi pabo elalubo. Godigo we bidi tonaluabo po pupusa memena bilabo sə elalubo,” te po wali.

⁴⁴Tama aga te po Juda dabego bomo yai po ola mabo be dabe tomode ola maduali, te Juda dabego təde.

Jisasgo te bidi dabe me badubolo ena wali asiaq wali
(Mat 4:18-22; Mak 1:16-20)

5 ¹Te me sogo Jisas te Genesaret sigi aji sesegede dolalubadi, Jisas aga pageba Godigo po odainu we bidigo mu odoga sagasalio. ²Tama Jisasgo te geba si sigi aji bogo badu gebeadubo suali. Tiali goli te suğu

sabo bagego geba osogo tagalama, augwa te agane togobo nai umben aji teladualio.³ Jisas aga Saimongo geba meba hola pali. Agai te Saimonbolo “Te geba sigi aji tomoba uwabawa dwanu pogwa palao,” te po wali. Tama aga te geba daide duguladu, te we bidibolo Godigo po pusa mabo dage ma wadolali.

⁴ Agai te po pusa silama, Saimonbolo te po wali, “E geba sigi aji tomoba ugwanu ma nogelama, duga suğu sainu da, te agane togobo wa umben te aji tuliagameo.” ⁵ Saimongo wei ponoyu, te po wali, “Genuai Bidi, moni huli sesabi dago yabo se iduali goli, te suğu deli munu me sai menio. Tiali goli, nago po obaso da, eno agane wa te aji tuluabao,” wali. ⁶ Tama augwaligo te agane togobo wa dabe aji tulama, suğu umabo mu tualigo te agane wa pade togwa pai se yanio. ⁷ Tama tibaso, augwa gasa gebade bidali age dabe me badu ma augwali tau sagasomainu i wali. Tama augwali aselama, te geba si suğugo paganani. Tebadı yaide, te geba si te węba hoa sigulainu se yanio. ⁸ Tama Saimon (me sogo Pita wabo bidi) agai te tebo sulama, Jisasgo saqə pagede aga kidu sugunama, Jisasbolo te po wali, “O Genuai Bidi, nago ena taga pao. Ena da, dwai se ebo bidi dao,” te po wai. ⁹ Agai augwaligo te sali suğu sulama, noma mu sali. Aga dali bidali bidi dabe me noma mu sali. ¹⁰ Bidi me nogi me Sebedigo ogwa si Jems dali Jon dali si me, Saimon aga age solo da. Augwali si me moni noma sali. Tama Jisasgo Saimonbolo te po wai, “Nage wi egio. Nosali nago we bidi siyu tama tiwaabao,” te po wali. ¹¹ Tama te geba si aji saniba ma nogelama, tigidali nai dabe tede tagalama, augwali tigidali Jisas wali pela sialio.

Jisasgo oiyabe bidi me deli geselali
(Mat 8:1-4; Mak 1:40-45)

¹² Me sogo Jisas be nani me delide bidibadi yaide, oiyabe gasi sai bidi aga pageba asali. Te oiyabe gasigo aga tigi sibi tigidali mu usu nai bidi da. Te bidigo Jisas sulama, kidu sugunama, agai Jisasgo bomo gonobo po weyu, te po wali, “Genuai Bidi, nago homugo usu dao wida, teda nago ena wiegi yai ma ilama tama ena te meda meni yai tiwai ma bidaabao,” te bidigo te po wai. ¹³ Tama Jisasgo nogo debelama, te bidi tigiba diayu, te po wali, “Awe, eno homugo nage gasi usu ilaabao. Tama nage wiegi yai pedalao, te meda meni yai bidi bidao,” Tama te sogo polo tama te bidi dwagi yai ma yali. ¹⁴ Tama Jisasgo te bidi aga dali te po wali, “Bugagia dua dao. Nago bidi me deli dali eno nagede yali se po me wagio. Menio. Nage dolo pelama, tama nago tigi te pris bageba waseligi pelama, tama agai nago tigi osola sumainao. Te elama, tama nago te Godibolo te ofa mao, te bidi Mosesgo te kolesaga yao wali po tiwai gilama emainogo yao. Tama tiyu te bidi dabego koneyu, te nago gasi silali, nage te meda meni yai bidi tiwai megı ma bidibao, te homu augwaligo yaabao,” Jisasgo te po

wai.^t ¹⁵Jisasgo agade “Po pusulamu” po wai goli, agai yali sę po pususu paligo ugwa genia palio. Tama umabo we bidi aselama, agai wabo po odagasali, agai augwaligo gasi dabe sela sęmainu yai. ¹⁶Tiali goli, hauwa sogo agai te we bidi dabe bidalubadi pali. Aga te bidi meni yai sesawai digiba pelama, agai Godibolo gedu haluasa po wagi pidu geduai dao.

Jisasgo nogo sąqą isai bidi dwagi yai ma ilali
(Mat 9:1-8; Mak 2:1-12)

¹⁷Me sogo Jisas be me tomode bidai. Agai te we bidibolo aga po pusa mawai. Tama te Farisi hani sibi dabe me, te Godigo bomo yai po konebo bidi dabe me, augwali bidibadi, augwaligo aga tonaluali. Augwali te Galili bulu tq bulu tigidalidu asai, te Judia tqdu me, te Jerusalem be nanidu me asai. Tama Genuai Bidigo te gasi dabe silabo bomo Jisasbolo mani. ¹⁸Bidi mebago te nogo sąqą dili kimi isai bidi te aga gologobe ni wade munama, tolasa asali. Te sela asali, te be tomoba sela pelama, te Jisas pageba muwainu yai. ¹⁹Tiali goli, te we bidi hauwa mu te be tomode pagana sai elaluali. Augwaligo sunumi gegali. Meni baso, be peduba te togobilidu holali. Te be asege be dao. Te be pedu halualni nai dagala munama, tama augwaligo te bidi aga te ni gologobe wa dali te we bidi bidibo tomoba, te Jisas bidibo digi gesabidi badu aiyaba tagalaluama mugulalio.

²⁰Jisas agai suali, te bidi dabe agai pobu homu begi pai bidi dabe da. Sulama, agai te nogo sąqą isai bidibolo te po wali, “Abagi, eno nago yali dwai sę sela sayanio,” te po wali. ²¹Tama Godigo bomo yai po page konebo bidi dabe dali, te Farisi hani sibi dabe dali, augwa hasi ugwa tono, eda tono eyu, te po wali, “E bidi magwai bidi yaliwe? E bidigo Godigo nogi dolobo po olamuo. God deligo naga bidigo dwai sę sela sąbo da.” Te po wai. ²²Tama Jisasgo augwaligo ebo homu koneama, agai augwalibolo po wei ponoyu, te po wali, “Dagego magi baso tama homu ebawe? ²³⁻²⁴Eno po bomo elalubo dagebolo ola mawainu, te eno mena tama wagowe? Eno e bidibolo te po naga wabo si, ‘Nago dwai sę dabe sela sayani,’ teda eno pogo bomo elalubo dagego hania konegobeo. Me ma, eno e bidibolo te po wabo si, ‘Nage hodaluama, bilao,’ tama aga hodaluama agai aga pibo somo selama hogodasa pobaso da, teda dagego eno pogo bomo elalubao waibao. Ena da, Godigo Bidi Mu da. Bidigo dwai sę e tqde sela sąbo bomo elalubo dagego suyaganio,” wali. Tama agai te nogo sąqą isai bidibolo te po wali, “Eno nagebolo obe dao, hodaluama, nago somo selama, beba pao.” ²⁵Polo tama, tigidali we bidigo tonalubadi yaide, te nogo sąqą isai bidi hodaluama, agai odobe wa selama, beba pai. Aga beba peyu, Godigo nogi ugwaba sali. ²⁶Tama tigidali we bidi

^t 5:14 Prs 14:1-32

gegemani mu selama, Godigo nogi ugwaba sali. Augwali wi elama, te po wali, “Megi dago gasagi yai sę mu ebo sualio.”

Jisasgo bidi me nogi Livai i wali
(Mat 9:9-13; Mak 2:13-17)

²⁷Te nosali Jisas te be nani taga pobadi yaide, agai te maket takis sabo bidi me deli suali, aga ofis bede. Te bidi nogi Livai. Tama sulama, Jisasgo agabolo “Nage ena wali asao,” wali. ²⁸Livai hodaluama, agai ebo sę tagalama, Jisas wali pali. ²⁹Tama Jisas moni nogi elalubaso, Livaigo agai bede nai ulubaso, te takis sabo bidi hauwa mu dali, te gasagi yai bidi dabe me, augwali te nai tuagasaki. ³⁰Tama te Farisi hani sibi bidi dabe me, te Godigo bomo yai po konebo bidi dabe me, augwaligo te sulama, Jisas wali pabo bidi dabebolo wado po weyu, te po hanalu wali, “Dage te takis sabo dwai bidi dabe me, te dwai sę ebo dabe me, te augwali dali hodobo magi baso nai tubawe?” ³¹Jisasgo augwalibolo po wei ponai. Dwai dwai sę ebo bidi dabe te gasi bidi dabe aq elalubaso, Jisasgo tama po digi sugunuyu te po wali, “Gasi meni yai bidi te dokta bidi pageba pabo menio. Gasi yai bidi naga te dokta bidi pageba pabo dao. ³²Ena te homu doloba pai bidibolo ‘Nage homu begalao’ po wagasobeo. Te meni. Ena te dwai sę ebo we bidibolo ‘Duga homu begeleq’ po wagasali,” te po wali.

Tubo nai gisilibo sę
(Mat 9:14-17; Mak 2:18-22)

³³Te Farisi hani sibi me, te Godigo bomo yai po konebo hani bage dabe me, augwaligo Jisasbolo te po wali, “Te bidi Jon aga wali pabo bidi dabe augwaligo tubo nai gisilama, Godibolo po wabo dao. Tama te Farisi hani sibi wali pabo bidi dabe me, augwaligo me tebo sę gilalma ebo dao. Tiali goli, nago bidi dabe augwaligo te nai gisilibo sę ebo menio. Augwa nai me wę me tudubo dao,” wali. ³⁴Tama Jisas aga dali aga wali pabo bidi dabe me, tebadi agai te we sabo bidide po begelama, wai. “Te bidi megó we sabo sogode, dagego aga abagi solobolo ‘Nai osogo gisiliq’ po wabo menio. Magi baso meni. Te we sabo bidi augwali dali bidibo sogo augwali bugai homu ebo dao. ³⁵Tama nosali me sogo te boi bidi dabego te we sabo bidi gasa buluba sela pelama, aga age solo homu dene eboso, te sogo nai osogo gisilabo sogo pedelaibao,” Jisasgo te po wali.

³⁶E po begelai po digi po me Jisasgo augwalibolo pusa mayu, te po wali, “Bidi megó me gesi ugwa nami pisalama, pobidi badia pai ugwa nami me hobologobeo. Mego tama teyu da, aga te gesi ugwa pisawaiba, tama gesi ugwa te pobidi ugwa ma gagagobeo. ³⁷Ma megó me te gesi bomai wain wę te poloba sipsip tigiwaliba tabigobeo. Mego te eyu da, te gesi bomai wain węgo te sipsip wali aulua sanama, buluba gea paibao.

Tama te sipsip wali aulua pelama, doaibao. ³⁸Gesi bomai wę te gesi sipsip waligo nigali botolba tabiao. ³⁹Te bidi mego te polobadu muai bomai aji tulama, gesi bomai aji ma tuabo homu ebo menio. ‘Polobadu muani bomai aji da usu da,’ te po wabo da,” Jisasgo te po wali. Te po weyu, agai te Farisi bagebolo te po page waj hagede, te poloba po dali, te gesi po dali te si augwaligo taluamuo.

Sabat side sę ebo po
(Mat 12:1-8; Mak 2:23-28)

6 ¹Me sogo Sabatde te Jisas me aga dali bidali bidi dabe me, augwali te gi tomodu pali. Tama te gide te rais tiwai nai wit holobo gi dao. Tama augwali pobadi, te bidi dabe augwaligo te wit ge togolama, nogogo pelegelama, te sabea wali ma te agau buluba tedela şanama, te ge dabe tubo gagalali. ²Tama Farisi hani sibi dabe me badu tede bidali. Augwaligo te sulama, te po hanalu wali, “Te dena bomo yai pode tama po wabo da, ‘Sabat sogode sę egio.’ Tama te po wai goli, dagego e sę magi baso ebawe?” wali.

³⁻⁴Tama Jisasgo augwalibolo te po wali, “Te dagego te dena noqü bidi nogi Devitgo yali sę po dagego nedebewe? Me sogo aga me, aga dali bidali bidi dabe me, augwali nai sili bidibadi tama moni nasi eyu bidali. Tama tibaso Devitgo Godigo lotu be tomoba pelama, te Godigo gesabide muani bret selama tuali. Aga hani dabego me tuali. Tiali goli, te bret te habu selai elaluai, tama te pris dabego naga tubo usu yaibao wai, te bomo yai pode. Tiali goli te bret augwaligo me tuali digi, Godigo gedude dwai sę ebeo. Dagego te aşənî po nedebewe?”^u ⁵Tama Jisasgo augwalibolo te po wali, “Ena da, te Godigo Bidi Mu da. Ena da, te Sabat sogode te genuai bidi dao. Tama tibaso, bidigo Sabatde mena sę yagameo te eno waibao,” wali.

Nogo penenai bidi Jisasgo Sabatde dodolai po
(Mat 12:9-14; Mak 3:1-6)

⁶Te me sogo Sabatde Jisas te Juda dabego bomo yai po ola mabo be tomoba pelama, we bidibolo po ola mani. Tama tede te dolo nogo penenai bidi me deli bidai. ⁷Tama te Juda dabego bomo yai po konebo bidi dabe me, te Farisi sibi dabe me, augwaligo Jisas gedu diliasa tonalualu. Magi ebewe weyu, te Jisas po tū ela mawai hagede te page gegali. Augwaligo Jisasgo te Sabatde te nogo dwai bidi dodologowe weyu, tonalualu. ⁸Tiali goli, aga digi te bidi dabego ebo homu koneani. Tama agai te nogo penenai bidibolo te po wali, “Nage holaluao, te we bidi bidiboma teba tomoba dolaluagasao,” wali. Tama te bidi hodaluama, we bidi tomode

^u 6:3-4 Prs 24:9; 1 Sml 21:1-6

dolaluagasali. ⁹Tama Jisasgo te tonaluali bagebolo te po wali, “Te eno dagebolo hanalu obao, dago Sabatde dwagi yai se yaibawe? Dago bomo yai po dabego mena po wabo dawe? Dago bidi dolabo se yaibawe, ma dago tau saibawe?” te po hanalu wali. ¹⁰Tama agai te bidi dabe gedu tonono biliama, te nogo penenai bidibolo te po wali, “Nago nogo debelao.” Tama te bidigo tama tilama, agai nogo bugagia ma gesa soali.

¹¹Te bidi Jisasgo te nogo dwai bidi ma dodolobo se ebo tononaluali bidi dabe da, te bomo yai po konea pai bidi dabe me, te Farisi hani me augwaligo te se ebo sulama, moni sebe eyu, guni bula salio. Augwa hasi augwaligo te bidi Jisas mu ela muabo sunumi gegabo po mibo po gagalobo se yalio.

Jisasgo aga tagala palabo bidi dabe sa muani
(Mat 10:1-4; Mak 3:13-19)

¹²Te sogo Jisasgo Godibolo po wainu eyu, tama bulu duba holama, moni huli sesabi Godibolo po udali. ¹³Tama te be posobo si, aga wali pabo we bidi aga pageba i olama, agai te bidi dabe nogo si olama, sagà me badu si dài ilali. Tama nosali agai te bidi dabe “Eno tagala palabo bidi dabe da” wali. ¹⁴Tama te bidi dabe nogi e dao, me Saimon (Jisasgo aga nogi Pita poai), me bidi nogi Andru, te Saimon aga amanu. Me bidi si nogi Jems me Jon. ¹⁵Me bidi si nogi Filip, me Bartolomyu, me bidi si nogi me Matyu, me Tomas. Me bidi nogi Jems, te Alfiusgo ogwa da. Me bidi nogi Saimon, agai nogi me Selot. ¹⁶Bidi me aga nogi Judas, te gasa bidi Jems aga ogwa dao. Gasa bidi aga nogi Judas, aga te Keriot bulu bidi dao. Nosali te bidigo Jisas te boi bidi nogoba muani, Jisas po hwa pabo bidi.

Jisasgo we bidi dabebole agai po pusa mani
(Mat 4:23-25)

¹⁷Te Jisas te bulu dude bidama aiyaba ma dulai, aga tagala palabo bidi dabe dali dulali. Tama dulama, augwali te bulu odogo tq maluba sabolama, te aga hanide po pusali. Tama umabo we bidi aga pageba asali. Augwali me badu te Judia tqdu asai, me badu Jerusalem be nanidu asai, me badu te nabis bulu sidu asai, me nogi Taia, me nogi Saidon, tedu me asali. ¹⁸Augwali Jisasgo ola mabo po odagasai. Te gasi yai bidi dabe bugagia dodolomai hagede asai. Me badu we bidi dwai haubo bidibo we bidi aselama, Jisasgo te dwai haubo sela sayu, “Te dage pao,” wali. ¹⁹Jisas agai bomogo gasi yai we bidi hauwa usu ilibaso, mebago me Jisas agai tigi diqwainu yali, augwali dwagi yai ma emai hagede.

Bugai homu dali hobede dali si
(Mat 5:1-12)

²⁰Te Jisasgo aga hani bidi dabeba tonono bilama, te po wali, “Te dage nai meni yai we bidi, bugai homu iyao. God da dagego toboli bidi dao.

²¹Dage megi nasi ebo bage, dage bugai homu iyao. Dage nosali tabiaibao. Dage megi gela wabo bage, dage bugai homu iyao. Nosali duga gisugu waibao. ²²Megi dagego ena te Godigo Bidi Mu wali pobaso gasa bidigo dage dali sesanobo po weyu, dage buluba gudula palu, dage bidasabo po dwai weyu, dage dwai bidi dao obaso da, teda dage bugai homu pemene yao. ²³Magi baso meni, dage bugai homu elama, gawi iyao. Tama tibaso, dagebolo maiabo nai genuai mu te dagalude elalubo. Dagebolo tama se ebo bage augwa noq̄ dabego me Godigo po ola mabo bidi dabebolo me polobadu tama teduai dao. ²⁴Tiali goli, dage megi nai hauwa munalubuo we bidi dabe dwai side bidaibao. Duga homu tegaluama, bugagia bidali sogo te ela pali dao. ²⁵Te nai dabe megi elalubo bage, dage dwai side bidaibao. Nosali duga nasi yaibao. Te megi gisugu wabo bage, dage dwai bede bidaibao. Nosali dage moni homu dene elama, gela waibao. ²⁶Tama tigidali we bidigo dage kegenano baso da, nosali dwai bede bidaibao. Augwa noq̄o me te tiwai po naga tibo po pusa mabo profet bidibolo tebo po udai dao,” Jisasgo te po wali.

Boi bidi dali bugai homu iyao
(Mat 5:38-48)

²⁷Te Jisasgo te po ma wadolu, te po wali, “Megi dage eno pusubo po odalubo bidi dabe, dagebolo eno megi e po pusubao. Dagego boi bidi dali dwagi yai homu eyu, dage sesalubo bidi dabebolo dwagi yai se eyu iyao. ²⁸Dage i ola mabo bidi dabebolo dwagi yai homu elama, dage dali dwagi yai homu isab̄o bagede Godibolo po olama, dwagi yai homu ilabo po waiyao. ²⁹Bidi mego nago nabogode ele baso da, me badu me elemainao. Bidi mego eda badu gulali holobo ugwa saket bomo elama sobaso da, te ugwdadu tomode gudali holobo ugwa me somainao. ³⁰Mena bidi augwaligo nagebolo magi nai me mao obaso da, te nago mao. Bidi mebago nago nai bomonama sobaso da, te ena ma mao wagio, somainao. ³¹Nagebolo gasa bidigo te dwagi yai se emainao homu ebogia, te nago gasa bidibolo me tama tiyao,” wali.

³²“Dagebolo dwagi yai homu ebo bidi dabebolo naga duga dwagi yai homu eyu da, magi baso Godigo te dagebolo dwagi yai homu yao po waibawe? Dwai dwai se ebo bidigo me augwalibolo dwagi yai homu ebo bidi dali dwagi yai homu ebo dao. ³³Ma, te dagebolo dwagi yai se ebo bidi dabebolo naga duga dwagi yai se eyu da, magi baso Godigo dagebolo dwagi yai homu yao po waibawe? Dwai dwai se ebo bidi dabego me te tama naga te tiwai se ebo dao. ³⁴Dugabolo wei maiabo homu aq̄ ebo bidibolo naga te nai osogo mayu da, te magi baso Godigo dagebolo dwagi yai homu ilao po obawe? Dwai dwai se ebo bidi dabego me te tama naga tebo dao. ³⁵Tegio. Boi bidibolo dwagi yai homu elama, augwalibolo dwagi yai se iyao, nai olo menama, wei ma sigimio. Genuai Godigo te

agabolo nage usu dao wasiąwai bidi dabebolo me, te dwai sę ebo bidi dabebolo me dwagi yai sę ebo da. Tama tibaso, dagego te sę yalide, dage maiabo nai genuai mu nosali elalubo. Tama dage Genuai Godigo ogwa dabe yaibao. ³⁶Duga Ayago we bidi hobede elama, tau sabogia, dagego me we bidi hobede elama, tau siąo,” Jisasgo te po wali.

We bidi dagalabo habu selali po
(Mat 7:1-5)

³⁷Jisasgo po ma wadolama weyu, te po wali, “Dagego gasa bidi dabe dagalama, augwali dwai bidi dabe da po weyu, posobo po wagimio. Tama tiyu da, Godigo dage dagalama posogobeo. Sęge yai po dagego dobagio. God agai dagebolo sęge yai po dobaidali weyu, dagego gasa bidibolo sęge yai po wagimio. Gasa bidigo dagebolo dwai sę yali te sela şanama, kegeda paliqo. Tama tiyu da, teda Godigo dagego dwai sę yali kegeda palaibao. ³⁸Gasa bidibolo nai maiqo. Godigo dagebolo me tiwaibao. Te wei Godigo dagebolo edelama, duga nogoba gelaibao. Duga gasa bidibolo mani tiwai, Godigo dagebolo ma tama mawaibao,” Jisasgo te po wali.

³⁹Jisasgo e po digi po augwalibolo pusali, “Gedu widai bidi mego me gedu widai bidi tū ola magobeo. Tama tiyu da, augwali si dali si te aq̄ gamia soabo dedageba tulalueibao. ⁴⁰Skul wai mego aga tisa ela holai elalubeo. Tiali goli, aga skul silama, sę usu selama, aga tisa dali usu si yaibao. ⁴¹Magi baso nago naga amago gedude elalubo dwasianu pobele bage suai, tiali goli nago naga gedude elalubo genuai pobele bage te b̄q̄ nami tiwai te nago magi baso subo meniwe? ⁴²Nago naga gedude te genuai b̄q̄ nami tiwai elalubo pobele bage sela şasiqbadi, te nago magi baso naga amabolo te po weyu, ‘Ama, nago gedude elalubo pobele bage eno sela şawaio,’ te po obawe? Nage ugwdadu homugo naga po wabo bidi, hasia bolo nago naga gedude te b̄q̄ nami tiwai elalubo pobele bage guda şayao. Tama tiyu nosali te nago gedu bugagia wiegi yai ebaso, teda naga amago gedude elalubo pobele bage sela şayu guda sabode nage usu yaibao,” Jisasgo te po wali.

Ni aga du dwai walobo po
(Mat 7:16-20; 12:33-35)

⁴³Jisasgo te po digi po ma wadolali, “Bugagia pua pai holai nigo du dwai walobo menio. Ma, haganawai nigo du geswai walobo menio.

⁴⁴Ni aga du dagego subaso da, te ni dagego konebo dao. Magi baso menio. Bidigo te sesani yai bono dilibide siga du togobo meni. ⁴⁵Sesani yai bono dilibide me bobo dabe togobo meni. Geswai bidigo aga homude paganalubo dwai sę ebo dao. Bidi aga homude paganaluai po aga pedauwaligo wabo dao,” Jisasgo te po wali.

Be sę ebo bidi si
(Mat 7:24-27)

⁴⁶ Te Jisasgo te po digi po ma wadolu, te po wali, “Te dagego eno yao wali sę isanama, magi baso enabolo ‘Dago Genuai Bidi dao’ po ola obawe? ⁴⁷ Eno wabo po odagasama, wali pabo bidi da, mena tama tiwai yali wenama sumainu, ola mawaibawe? ⁴⁸ Aga be sę eyu, be beli ni aiyanu mu diganama, masigi daiba bululama, sę yani bidi aq, te elalubao. Te be sənاما, nosali te pabo aq asobo si, te be degelebe, te be degebe. Magi baso meni. Te be sę yani bidigo gisiga sę yai eyu, degebe. ⁴⁹ Tiali goli, eno po odama, wali pisabo bidi da, te bidi aga be beli ni bugagia bulisiławai digi, wę asiyu pogolobode polo mu pagesa soali. Tama te be mu dolali,” Jisasgo te po wali.

Jisasgo te Rom genuai bidigo sę ebo bidi tau sali
(Mat 8:5-13)

7 ¹ Te Jisasgo we bidibolo te po pusa silama, nosali Kaperneam be nani tomoba pali. ² Te Rom ami genuai bidigo te 100 ami bidi dabe tonalubo bidigo te aga dali homu kę̄ pelama sę ebo bidi isai hagede seanio. ³ Tama te ami genuai bidigo Jisas te Kaperneam hanude bidibo po odama, te Juda dabe tobolu bidi me badu tagala palali. Jisas asama, aga sę ebo bidi dwagi yai ma ilaimainu, te bidi dabebolo Jisas oda sigi piąo wai. ⁴⁻⁵ Tama te Juda tobolu bidi dabe Jisas pageba sabolama, Jisasbolo hanalua suali. Augwaligo agabolo te po wali, “Te Rom ami genuai bidi dwagi yai bidi da. Agai da Juda dabe dali homu kę̄ pabo da. Agai dago bomo yai po ola mabo be sę ebo agai masigigo da tau sali. Tama tibaso, nago agai dwagi yai sę wei ponao,” augwaligo te po wali. ⁶ Tama Jisas augwali hodobo pali. Jisas te bidigo be pąde asobadi yaide, te bidigo aga abagi dabe tagala palama, Jisasbolo te po wagi pali, “Genuai Bidio, nage eno beba asomaina homu ebo tiwai egobeo. Ena geswai wiegi yai bidi menio. Ena genuai bidi meni yai baso, nage eno beba asobo usu egobeo. ⁷ Tama tibaso, ena me ena digi nage pageba asobo homu ebeo. Tiali goli, nago po naga wao, eno sę ebo bidi dwagi yai eyu gesa paibao. Ena me gasa bidi dabego bomo dologode bidibo bidi dao. ⁸ Ena me te ena genuai nogi elalubo bidigo tonaluyu bidibo dao. Tama eno digi te ena ami bidi dabe te ena dologode augwali bidibo dao. Tama eno me delibolo te po weyu, ‘Nage pao’ obaso da, teda aga pabo dao. Tama eno gasa bidi me dali te po weyu, ‘Nage asa’ wali da, teda aga asobo dao. Tama eno ena sę ebo bidibolo te po weyu, ‘Nago te sę yao’ obaso, teda agai te sę ebo dao,” te Rom ami genuai bidigo te po wai. ⁹ Tama te po wali Jisasgo odama, noma sali. Tudiba begelama, aga wali asali we bidibolo te po wali, “Te Israel bage tomode me Godibolo tama tiwai homu ebo bidi eno me suai

menio. Megi dagebolo te mu po obe dao,” te po wali. ¹⁰Te ami genuai bidi aga po sela asali abagi dabe te ami genuai bidigo beba ma begasa pelama, te sę ebo bidi bugagia ma bidibo suali.

Wilawe wego ogwa Jisasgo hodolali

¹¹ Te bidi tau sali, te sogo do Jisas be nani me nogi Nainba pali. Aga wali pali bidi dabe me, umabo we bidi me aga dali pali. ¹² Te be naniba sabaligi pobadi, te isai bidi me deli te pubaligi peyu tolasa soabo sualio. Te isali bidi wilawe wego ogwa deli digi tama pubaligi su sobaso, aga ida me we bidi me hauwa wali asali. ¹³ Tama Genuai Bidigo te wilawe we sulama, moni hobede mu eyu, “Gela wagio” wali. ¹⁴ Nosali Jisas aga pelama, te isai bidi muani ni gologobe wa diąbadı, te ni gologobe wa tolasa asali bage dolaluali. Tama “Ogwa bidi, hodaluao, eno mu po nagebolo tama obe dao,” Jisasgo te po wali. ¹⁵ Tama te isali bidi hodaluama, po wabo gagalobadi, Jisasgo aga idabolo ma mani. ¹⁶ Tama te tigidali we bidi moni wi elama, augwaligo Godigo nogi ugwaba sali. Augwaligo te po wai, “Moni Godigo po ola mabo bidi da tomode megı e pedaligulai yabao. God aga we bidi tau sagasu, te asai yabao.” ¹⁷ Jisasgo te tiali po tigidali Juda dabego buluba me, te bogo badu elalua pabo buluba me, pela silali.

Baptais mani bidi Jongo Jisasbolo po wagi pabo bidi dabe tagala palali (Mat 11:2-19)

¹⁸ Te Jon aga wali bilibo bidi dabego Jisasgo ebo sę suali po Jonbolo pusa mani. ¹⁹ Tama Jon aga wali bilibo bidi si i wali. Tama te bidi sibolo “Genuai Bidibolo hanalugi pao,” wali, “ ‘Nage Jongo te nosali asaibao wali bidi dawe, ma gasa bidi me asobo dago tonaluabawę?’ ” Jongo tama Jisasbolo wao po wali. ²⁰ Tama tega si Jisas pageba asiyu, “Te we bidi baptais mani bidi Jongo dadi si nage pageba nage te asaibao wali bidi nage tama dawe, ma gasa bidi me tonaluagawe, po omainu dadi si tagala palilio,” te po wali.

²¹ Te sogo naga tama Jisasgo olo gasi me, dwai gasi mu me, te dwai noma bidi elalubo bidi me dwagi yai ma ilali. Tama gedu widai we bidi me gedu ma pedalali. ²² Te po obaso, Jisasgo augwalibolo te wei ponoyu te po wai, “Dage pelama, Jonbolo te tigidali sę dagego odali po me te suali sę me te po tigidali agabolo wagi pao. Dagego e subao, te gedu widai bidi dabe augwali gedu usu ma iliyu, te sąqą dwai bidi dabe augwali bugagia ma bilibo dao. Te oyabę yai bidi dabe augwali tigi wiegi yai pedaliyu, tama olo degai bidigo po ma odobo dao. Te isai bidi dabe augwali ma hodaluyu, tama te magi nai meni yai bidi dabe augwaligo te Godigo wiegi yai gesi po odobo dao. ²³ Tama bidi enade homu si isiąma tama ena aga tudiba musiąbo bidi, te bidi aga wiegi yai homu pemene yao,” Jisasgo te po wai.

²⁴Tama tede bidali we bidibolo Jisasgo te po hanalu wali,” Polobadu dage te bidi meni yai buluba pali, te bidi Jon dagego sugi pali, te dagego magi nai sugi paliwe? Ma, dagego te awi dili me deli, te waligo memenege ilibaso sugi paliwe? Menio. ²⁵Te menio. Magide suainu pai dawe? Wiegi yai ugwa gudali bidi dagego sugi paliwe? Te menio. Te tobage ugwa gudalubo bage, te doado bage umabo munalubo dabe, augwali te genuai gavman tuni bidigo wiegi yai be dabede bidibo dao, te bidi meni yai bulude meni. ²⁶Tiali goli dage magi baso pai dawe? Ma, te Godigo po pusubo profet bidi me deli sugi pai dawe? Awe, eno dagebolo obao, e Godigo po pusubo profet bidigo da, agai te gasa te Godigo po pusali profet bidi dabe te tigidali aiyaba elalualio. ²⁷Te Jon agade te gasa profet bidigo Godigo wali po polobadu asęai dao,

‘Suao, te eno po pusabo bidi tagala palobaso, tama aga nage asabo digi polasa paibao. Agai nago tū sisi iligi paibao.’^v

²⁸Ma wadolu, Jisasgo te po wali, “Eno dagebolo obe dao, e tōde ame nabo we bidi tigidali Jongo aiyaba elalualio. Tiali goli, te Godigo obo tomode bidibo moni nogi meni yai bidi me agai nogigo te Jon aga moni nogi aiyaba elaluaibao,” Jisasgo te po wali. ²⁹Te bidi Jongo baptais mani we bidi dabe me, te baptais sali te takis sabo bidi dabe me, augwaligo Jisasgo wali po odolama te homu yai, Godigo mu po dolo wali da homu yalio. ³⁰Tiali goli, te Godigo augwali tau sainu yali homu Farisi sibi dabe me, Juda dabego bomo yai po ola mabo bidi dabe me, augwaligo te homu sela şanama, “Jongo da baptais mabo hagelabo,” te po wai dao.

³¹Ma wadolu, Jisasgo te po wali, “Dage megı bidalubo bage magideba usu nagawe? Dage magi nai tiwai yagawe? ³²Dage da, te maketde gagali ebo wai puluba aq, te elaluba. Te wai puluba mego hai ulugu weyu, ‘Dago ona sulubadi goli, dagego təqbi ebe. Me ma, dago gela obadi goli, dagego gela wabe.’ Magi baso meni. ³³Te we bidi baptais mabo bidi Jon asama, nai gisilu, bomai wę gisilu yali goli, dagego te agade ‘Aga da, te dwai noma bulalubo bidi dao,’ te po wali. ³⁴Me ma, ena Godigo Bidi Mu asama, nai tuyu, aq tuyu ebadi goli, dagego enabolo ‘Buluba sela səawai bidi dabe, takis sabo bidi dabego abagi dao,’ wai dao. Me dagego enade ‘Bomai aq me nai e tudu gebo dwai bidi dao,’ wai dao. ³⁵Tiali goli, Godigo po wali pabo we bidi dabebolo Godigo kolesaga mu augwalibolo mu ola mabo dao,” Jisasgo te po wali.

Jisas te Farisi sibi bidi nogi Saimongo bede nai tuali

³⁶Te Farisi bidi mego Jisas agai beba nai tuagasomainu eyu, i wali. Tama Jisas agai beba pelama, nai tuainu, ni nami daide dulalu tiąluali,

^v 7:27 Mal 3:1

Juda dabe augwaligo nai tubo sę ebogia. ³⁷Te be nanide dwai dwai sę idubo we me deli bidai. Te wego Jisas te Farisi bidigo bede bidibo po odama, masigigo nigai genagi deli denami yai wel pąqanalubadi, te beba sisali. ³⁸Jisasgo sąqą pagede tudi badu dolaludu, gela weyu, aga gela guago Jisas sąqą sawali nadugwali. Tama te we aga bobobage toboli nisigo Jisasgo sąqą sawali holama, sąqą sawali si nono nenama, te denami wel aga sąqąde pilali. ³⁹Tama Jisas i wali Farisi bidigo aga homude ‘E bidi Godigo po ola mabo bidi tigi sogo da, teda te mena tama bilibo wego ena dia yagasobo we homu egi dao, ma mena tama bidibo we yaliwe wagi dao,’ te Farisi bidigo te homu yali.

⁴⁰Jisasgo te Farisi bidibolo te po wali, “Saimon, nagebolo eno pusabo po me deli elalubao.” “Tisa bidi, enabolo pusao,” Saimongo te po wali. ⁴¹Jisasgo tama gagalali, “Gasa bidigo bidi me sibolo mone negeli mani. Bidi mebolo 100 kina mobadi, mebolo 10 kina mayu yali. ⁴²Tama nosali tega sigo te mone wei ponabo əq isqbaso, agai mone negeli si sela sawanı. Mena bidigo te mone negeli munani bidi dali homu mu kę̄aluibawe?”

⁴³Saimongo te po wali, “Eno homugo mone genuai mu sali bidigo te bidi dali homu mu kę̄aluibao,” wali. “Nago po dolode walao,” Jisasgo te po wali. ⁴⁴Te sogo naga Jisas te we pageba uwaba begegi soyu, Saimonbolo te po wario, “E we nago subawe? Ena nago beba asali goli, nago ena bugagia gesesiawai, eno sąqą aji tela yabo aji me mawai meni. Tiali goli, e wego gela guago eno sąqą sawali aji tedalama, aga bobobage toboli nisigo eno sąqą holali. ⁴⁵Nago beba ena asobadi, dwagi yai homu elama, nago ena nono nabe. Tiali goli, e wego da, ena asobode gagalama eno sąqąde nono nabo togobeo. ⁴⁶Nago wel eno toboluba me mube. Tiali goli, e wego dwagi yai denami welgo eno sąqą sawali usu nani. ⁴⁷Eno nagebolo obe dao, agai enade mu tia pabogo agai dwai dwai sę yali mu sela sawanı nama e ola manią. Mego ena dali homu dwasianu kę̄aluba, ta dwai dwai sę yali dwasianu sela sawanı te ola mobao,” Jisasgo te po wali. ⁴⁸Tama Jisasgo te webolo te po wali, “Nago dwai dwai sę yali polo sela sawanı,” wali. ⁴⁹Me badu ni namide dugulaluali we bidi augwa homugo te po wali, ‘E niwai bidi yaliwe? Agai we bidigo dwai dwai sę yali sela sabo dao,’ augwaligo te po wali. ⁵⁰Tiali goli, Jisasgo te webolo “Nago enaba homu beagasarligo nage sana palali dao. Nage dwagi yai homu dali pao,” wali.

Jisas dali pali we dabe

8 ¹Te tiali magede, Jisasgo Godigo we bidi tonalubo dwagi yai po pupusu biligibu genuai be nani dabe dali, dwasianu be nani dabeba pali. Aga dali bilibo nogo si olama, sąqą si peda sigisu tama bidi dabe aga dali pali. ²Te we dabe, me badu dwai haubogo tuaide Jisasgo sela sayanı we dabe me, me badu gasi ebaso, te gasi sela sayanı we dabe me,

augwali Jisas wali bilali. Te we me nogi Maria, aga bulu nogi Makdala. Polobadu dwai haubo nogo a naga olama, me badu nogo si peda selama, te tama haubo noma bidigo te we tolalubaso, Jisasgo sela sayani.³ We me nogi Joana, Herotgo bede se ebo genuai bidi Kusago we dao. We me nogi Susana. Me badu we dabe hauwago augwa monego Jisas me, Jisas aga dali bilibo bidi dabe me tau sali.

Tubo nai ge sasa bilibo bidiba elasa soali po digi po pusali
(Mat 13:1-9; Mak 4:1-9)

⁴We bidi dabe hauwa moni be nani dabedu aseselama, Jisas pageba moni pesage odogolama bidibadi, Jisasgo te po digi po augwalibolo pusali. ⁵“Me sogo bidi me deligo aga tubo nai wai ge te giba telaligi pai. Tama aga te nai ge tedelalo bilibadi, me badu tude tulaluali. Tama nosali te tude tulaluali nai wai me badu bidigo sagago agayu, me badu ba dabego tuali. ⁶Tama aga te nai ge tededalo bilibadi, me badu elewi elalubo tq daiba tulaluali. Tama nosali te nai ge kulubi holali goli, tq ili meni duama, sasia pelama, isali. ⁷Tama te bidigo nai ge me badu sesani yai bono siliba tedelaluali. Tama nosali holobadi yaide, te sesani yai bono dabe dali talua holama mesegelali, tama te nai isila pali. Tama me badu ge dabe dwagi yai tqba tulaluali. ⁸Te nai dabe holama, du umabo walali. Duga po odabo olo elalubaso da, bugagia odioqo,” Jisasgo te po wali.

Te po digi po dabego se
(Mat 13:10-17; Mak 4:10-12)

⁹Jisas aga dali bilali bidi dabego hanaluyu,” Nago wali po digi po mena po olama, obawe?” wali. ¹⁰Jisasgo wei ponoyu, te po wali, “Godigo te we bidi tonalubo bomo geme dualalubo po page dagebolo da hanilai dao. Tiali goli, gasa we bidi dabeebolo eno te po digi pogo naga ola mobe dao. Augwaligo gegali goli, te susiqmainu eyu, te odali goli, te konesiqmainu tebo dao,” Jisasgo te po wali.^w

Jisasgo te tubo nai wit ge tedelabo bilali bidiba ela sigi soali po digi po page hanilani
(Mat 13:18-23; Mak 4:13-20)

¹¹Jisasgo te po ma wadolu, te po wali, “Te po digi po e tama po weyu, te walio. Te tubo nai ge da, te Godigo po dao. ¹²Te tubo nai ge tude tulaluali da, te bidi dabe augwaligo po odali goli, Satan asama, te poba homu begi pelama, sana pidali weyu, agai sela sayagasali po olama waliao. Satango homugo tiali, teyu te augwaligo homude konealubo po daq obaso da, te Godigo augwali ma saiba homu yali. ¹³Te tubo nai ge elewi elalubo tq daiba tulaluali po wali da,

^w 8:10 Ais 6:9-10

te bidi dabe augwaligo dwagi yai homu elama, te po odali tiwai yali. Tiali goli, augwa homu tomoba te po mu musiąma, olo ugwidu homugo te poba begi pelama elalubadi, te Satango dwai sę yanama sinabo sogo augwali tulalu, te Godiba homu muani tagalobo dao. ¹⁴Te tubo nai ge sesani yai bono sili elalubo tomoba tudulualu po wabo da, te da te bidi dabe augwaligo te Godigo po odali tiwai yali goli, e tőde ebo naide moni homu hauwa eyu, te nai doado bage hauwa elalu, te monede me, e tőde ebo sęde bugai homu pemene eyu, tama te nai doado bagego augwali homu hogodabo mesegelama, te augwaligo Godigo po bugagia me odobeo. Augwali te nai du bugagia walama, te inawai nai tiwai elalube dao. ¹⁵Te tubo nai ge te ili elalubo dwagi yai geswai tőde tudulualu po wali da, te da te bidi dabego po odama, te augwa bugagia wali pelama, te homude dąq ola sali tiwai yali. Te augwa haliga bugagia dolasa elalubadi, te augwa bomo elama bidu, te augwa nai du walobo tiwai te elalualu dao,” Jisasgo te po wali.

Bidi dabe augwaligo lam sole ula te baket dologoba gemi dualigio po wali, te po nogo habu sugunama wali
(Mak 4:21-25)

¹⁶ Jisasgo po ma wadolama weyu, te po wali, “Bidi mego te lam sole domonama bogoli ebadi, tama sela asama, te senego mesegelu, ma pibo bet dologoba mugibu me egobeo. Menio. Te bidi dabe augwaligo te tebol sai daiba ugadu dugulaibao, te be tomoba asobo we bidi dabe augwaligo te ula sumainogo tebo dao. ¹⁷Te tigidali magi magi nai geme dualaluali, te nosali pebeli diliba hanilaibao. Te tigidali magi magi po te bidi dabego geme mesegaluali, te po te hania pebeli diliba pedelama, we bidigo odaibao. ¹⁸Dagego te po odoyu, mu dua dao. Bidi mego nai meba tolalubo bidi yai baso da, teda Godigo agabolo gasa nai me ugadu daganama mawaibao. Tiali goli, bidi mego nai me deli menibadi goli, te dwasianu aga tobade munaluba homu yali nai sela paibao,” Jisasgo te po wali, te bidi dabe augwa homu agaba muani bidi dabeba magi paibao po wali.

De dede te Jisasgo ida me ama dabe dawe?
(Mat 12:46-50; Mak 3:31-35)

¹⁹ Jisas aga ida me ama dabe me aga pageba asainu yali goli, tama we bidi dabego sesela selama, te Jisas suabo aq ebeo. ²⁰Mebago Jisasbolo te po wali, “Naga ida me, naga ama dabego me nage sueo olama, bulu badu e dodoladubao,” wali. ²¹Jisasgo te we bidi augwalibolo te po wali, “Godigo po odama, wali pabo we bidi da, ta eno ida dabe, ama dabe dao,” wali.

Jisasgo moni wali tamunani
(Mat 8:23-27; Mak 4:35-41)

²² Me sogo Jisas me aga dali bilibo bidi dabe me moni geba ugwbawa daiba holama, tomoba dualama, tama agai te po wali, “Da e sigi aq

u badu bogo badu pinao.” Tama augwaligo nogebo gagalali. ²³Tama augwaligo te wę gebadu hąbesegego todogo pidubadi, te Jisas godege piali. Moni bomai wali te sigi ąjde pedelama, te geba tomoba ąj pągela sąwani. Augwali dwai tąba mu degelali. ²⁴Augwaligo Jisas hodolagasu, te po wali, “Genuai Bidi, Genuai Bidi. Da isabo magana pali.” Tama Jisas hodaloama, wali hageyu, te waligo sabilibo ąj hagelama togoliyu yali. Te waligo me, ąjgo me moni te bomo hodali tagalama, ma tamugulali. ²⁵Tama aga wali bilibo bidi dabebolo te po wali, “Magi baso enaba homu beagasobewe?” Tiali goli, augwali noma selama, wi yali. Augwa hasi ugwa tono eda, tono elama, te po wali, “E magwai bidi yaliwe? Agai te wali dabe, ąj dabebolo me hage baso, augwali sigo agai wabo po wali pabo dao,” augwaligo te po wali.

Bidi me delide dwai haubo dabe elalubo Jisasgo sela sąwani
(Mat 8:28-34; Mak 5:1-20)

²⁶Te augwali te moni gebadu pelama, te u badu bogo badu Gerasa dabego buluba sabolali. Te bulu te Galili bulu dolo si dao. ²⁷Tama Jisas te gebadu asobadi yaide, dwai haubogo toai bidi Jisas tıąba asali, te ąj saniba. Polobadu te be nanide bidama, bolu olo te isai bidi mubo ola be dabeba gudasa pelama, bidai. ²⁸Te bidigo Jisas suyu, moni hai gela olama, Jisas sąqą pageba degagaselama, moni i hai olama, te po wali, “Jisas, nage moni genuai Godigo Ogwa dao. Nago enabolo magi sę egowe? Nago ena dene magio,” wali.

²⁹Jisasgo dwai haubo pomainu gudulu baso, te bidigo te po wali. Polobadu hauwa sogo bidi dabego te bidi aligabo bidilama, kalabuside muani. Mubadi goli, dwai nomago tulama, dią paludali. Tama te dwai haubogo te bidi te bidi meni yai bulu tomoba sela piduali. ³⁰Jisasgo agabolo hanalu wali, “Nage nogi de dawe?” te po wali. “Ena nogi Hauwa dao,” te bidigo te po wali. Dwai haubo noma bidi hauwa mu aga tigiba dagawani baso, te nogi “Hauwa” poai. ³¹Tama te dwai haubo dabego Jisasbolo hanalu, te po wali, “Da megi dwai bulu te bidibolo dene mabo madiba mugio,” wali.

³²Te kibu dabe umabo ugwdau sau pado pąde nai tuyu bidaluali. Tama te dwai haubo dabe augwaligo u kibu dabe tigiba dagana sigi pai hagede, Jisasbolo gonai. Tama gonobaso, Jisasgo augwa te emainu tagala palali. ³³Tama tibaso, te bidi tagalama, kibu dabe tomoba pali. Moni te kibu dabe tigidali wi peyu, te sigidu sau padoba samonama, sigi ąjba tulaluama, tama augwali te wę tulama poma peyu isila pai dao.

³⁴Te kibu dabe negeduali bidi dabego te tebo sulama, polo pelama, moni be nani dabeba me, moni gi sę eyu bidalubo bidi dabeba me te sę yali po pupusu bilali. ³⁵Te we bidi dabe augwaligo te tiali sę po odama, sugibu pebelawali. Augwali Jisas pageba aselama, suali, te dwai haubo

dabego tulama wabo pali bidi te dwai haubo bidi sela səbaso, te aga ugwa ma gudama, Jisas saqə pagede dugulalubo suali. Aga polobadu wiegi yai homu dali ma elama, duguladubo suali. ³⁶Tama tibaso, augwali moni wi mu yali. Jisasgo te sə ebo suali bidi dabego te we bidibolo te bidi sana palobo suali po pusali. ³⁷Tama te Gerasa bulu bidi dabe tigidali wi kisu mu dobaso, Jisas pao olama, gudulali. Tama te po obaso, Jisas te geba daiba holama, painu yali. ³⁸Tama te dwai haubo noma bidi dabego taga pali bidigo Jisasbolo po bomo elama mu hanalu wali, “Ena me nage dali paio,” wali. ³⁹Tiali goli, Jisasgo te bidi ma geliyu, te po wali, “Nage ma geasa pelama, Godigo nagebolo yali sə po naga pesageba pupusu biligi pao.” Tama te bidigo te be nanide bidibo we bidi tigidilibolo Jisasgo agade yali sə po pupusu bilama, siminani.

**Jisas aga ugwa dią yagasali we dali, Jairus aga wegi dali side po
(Mat 9:18-26; Mak 5:21-43)**

⁴⁰Jisas te sigi aị me badu pedai bogo badu te moni gebadu ma nogebadi yaide, te we bidi tigidali augwaligo aga asobaso sulama, te augwa dwagi yai homu pemene yali. Magi baso meni. Augwaligo aga asobo tonaluai dao. ⁴¹Tama Juda dabego bomo yai po ola mabo lotu be tonalubo genuai bidi tobolu bidi nogi Jairus sabolali. Aga Jisas saqə pageba degelagaselama, “Nage eno beba asaibawe?” olama, hanalu wali. ⁴²Aga wegi deli digi kibu be nogo si olama, saqago si peda sigi soai te wegi isai sinabaso, te po wali. Jisas tū sisu pobadi yaide, genuai hani we bidigo aga mu beasa pali. ⁴³We me deli bididuai, te wego tigide kaneme pidubadi, kibu be nogo si olama, saqago si peda sigi soali. Aga mone dabe tigidali aga tau somainu dokta bidi dabe abeliyu mone mani goli, augwaligo aga me tau sabo aq ebe. ⁴⁴Te we bidi tomode te we Jisas tudi badu aselama, Jisas agai ugwa sabi badu dią yani. Te sogo naga tama agai tigidu kaneme duludali polo tama togwa salio.

⁴⁵Jisasgo te po hanalu wali, “Ena dego dią yaniwe?” Tigidaligo “Ena menio” ola silali. Tama Pitago te po wali, “Genuai Bidi, we bidi hauwago nage mu bealu, nage pogolobao.” ⁴⁶Tiali goli, Jisasgo te po wali, “Eno bomo dią si da obaso, eno koneanio, bidi mego ena dią yani homu ebao.” ⁴⁷Tama te wego agai yali sə Jisas agai aga sulama konebaso, te we didibili dali eyu, Jisas saqə pageba kidu sugunagasalio. Te we bidi tigidali gesabidide Jisasbolo Jisas aga tigi dią yani po pusali. Tialigo aga ma polo gesa pali po pusali. ⁴⁸Tama Jisasgo te webolo te po wali, “Eno wegi, naga enaba homu konealubo homu bealubogo nage te usu ilaliqo. Dwagi yai homu elasa pao,” wali.

⁴⁹Jisasgo te po odubadi yaide, genuai bidi Jairusgo bedu tolai po wagasobo bidi asali. Te po sesali bidi agai Jairusbolo te po weyu,” Nago wegi isai dao,” wali. “Te po ola mabo bidi aga asao po ma wagio,”

wali.⁵⁰ Tiali goli Jisasgo te po odama, Jairusbolo te po wali, "Wi egio. Enaba naga homu beadua. Nago wegi ma hodaluabao," wali.⁵¹ Tama Jisas te beba sabolama, bidi me asa wabe. Tiali goli, Pita badi, Jems badi, Jon badi, te wegi aga ida de aya si badi elama naga Jisas dali te be tomoba pali.⁵² Te isali wegi diliigi asai we bidi tigidali te wai hagede moni hobede elama, gela wali. Tama Jisasgo augwalibolo "Gela wagimio, e wegi isibe dao. Aga olo pila mubao," te po wali.⁵³ Te wegi isai goli, Jisasgo mu isibe da obaso, augwaligo Jisas gisugu mani.⁵⁴ Tiali goli, Jisasgo nogogo te wegi nogo tulama, bomonama, "E wegi, nage hodaluao," te wali. Aga noma ma bula sagasama, te sogo tama polo hodaluali.⁵⁵ Tama Jisasgo te wegi aga ida ayabolo "Tubo nai me te wegibolo mao," wali.⁵⁶ Te wegi aga ida aya moni noma sali goli, Jisasgo "E tama tiali po gasa we bidibolo pusugio," wali.

Jisasgo te nogo si olama, saqago si bidi dabebe sə mayu, tagala palali
(Mat 10:5-15; Mak 6:7-13)

9 ¹Te Jisasgo te nogo si olama, saqag badu peda sigi soabo bidi si te augwali deliba sisinimainu i olama, tama agai augwaliba te genuai bomo me nogi mayu, te augwaligo te we bidi dabede dwai haubo noma bidi sela səy, tama augwaligo te tobage gasagi yai gasi dabe tigidali sela sənama, usu ma ilabo bomo manio. ²Tama God agai we bidi tonalubo po me, gasi yai we bidi tau siyu me emainu, Jisasgo augwali tagala palali. ³Agai te bidi dabebole te po wali, "Dage pelayu, magi nai me sela pigimio. Dono me, nai gonobo wa me, tuabo nai me, mone ge me, te ugwa si me, te tama nai dabe me sela pigimio, bede taga pao. ⁴Dage mena buluba pobadi, augwaligo dage dali dwagi yai homu eboso da, teda dage te bede naga bida. Te be nani taga soabo bodolude taga soyu, te gasa buluba me peyu yao. ⁵Te dage hanu me deliba pobadi yaide, te hanude bidibo we bidi augwaligo beba dage odasa pisəma, tama dagego wabo pode dwagi yai homu isəbaso da, te hanu bulu taga soao. Te dage soai hagede, te augwa kolesaga geda muani koneama sumai hagede, duga saqade elaluali pu hola sənama, taga soao," Jisasgo te po wali. ⁶Tama augwaligo Jisas taga pelama, tigidali be nani sisu pebelayu, Godigo dwagi yai po pusuyu, gasi bidi tau siyu ela pali.

Gavman bidi Herot homu kone təpə pali
(Mat 14:1-12; Mak 6:14-29)

⁷⁻⁸Te Galili tə tonalubo tobolu bidi Herotgo te Jisasgo yali sə po dabe odali. Tama aga homu kone təpə pali. Magi baso menio. Bidi mebago te baptais mani bidi Jon ma hodaluama, bidibao, wali. Mebago "Te polobadu bidali profet bidi Elaija ma pedelama, bidibao," te po wali. Mebago polobadu Godigo po ola mani bidi ma pedelalio wali. Te po

hauwa obaso, Herot aga homu kone mu tūq pali. ⁹Tama Herotgo te po wali, “Eno pode Jongo holo togwa sāwai goli dao, e ma niwai bidi po eno odobo agawe?” Tibaso, Herot agai ‘Jisas da, te polobadu bidali bidi Jon dawe?’ homu eyu, tama ‘Jisas sueibao’ wai.

Jisasgo bidi umabo mu te 5,000 bidi nai mani
(Mat 14:13-21; Mak 6:30-44; Jon 6:1-13)

¹⁰Jisasgo tagala palali bidi dabe augwali Jisas pageba ma sabolama, te augwaligo yali sē po dabe ma pusagasali. Tama Jisasgo augwali oda selama, pali. Te gasa we bidi dabe bidibadi tagalama, te augwali naga te hanu me deliba pali. Te hanu nogi Betsaida dao. ¹¹Augwaligo te we bidi dabe taga pali. Umabo we bidigo augwali pali po odama, augwali me nosali pali. Aga pageba augwali sabolobaso, Jisasgo dwagi yai homu elama, God agai we bidi tonalubo po pusa mayu, gasi yali we bidi meba tau sali. ¹²Giliga aiyaba osoga sobadi yaide, Jisas aga wali pabo bidi dabe augwali aga pageba aselama, agabolo te po wali, “E bidi meni yai digi dao. E we bidi tagala palama, augwa digi tuabo nai me, piabo be me gegemainao, te dwasianu be nani dabede me, te gi dabede me.” ¹³Tiali goli, Jisasgo augwalibolo te po wali, “Tuabo nai duga digi mao.” Augwaligo wei ponoyu, te po wali, “Dago bret a naga badi, sūgū si badi elama naga, munalubao. Moni we bidi dabego tuabo nai dabe dago abelegi pomainu obawe?” (Tama tede bidibo bidi dabe namba nedebō te umabo mu, te 5,000 dao.) ¹⁴Jisasgo aga bidi dabebolo weyu,” Te we bidi dabe dugayao po wao,” po wali. “Bugulama, te haniani nani elama, duga duga pao, te bidi sese si olama nogo si te 50 50 naga nidigi pelama, dugayao wao,” te po wali.

¹⁵Te Jisas aga dali bidibo bagego agai wali po selama, dugaya baso, duga duga pali. ¹⁶Tama Jisasgo te bret a naga badi, sūgū si badi selama, dagaluba tonalu, Godibolo nage usu dao wali. Nage usu da olama, te nai pebedama, Jisas aga dali bidibo bagebolo menama, te bagego ma te we bidi dabebolo doboba pali. Te tibadi yaide, te tubo nai kua pali. Augwaligo te nai tulama, tabiali. ¹⁷Tama Jisas aga wali pali bagego te we bidigo tulama me badu tagalali nai dabe nedama, bonou wa nogo si olama, sāqā si peda sigisu pagā yani.

Pitago Jisas dolo mu nogi ya mani
(Mat 16:13-19; Mak 8:27-29)

¹⁸Te me sogo Jisas agaduba Godibolo po odubadi yaide, aga wali pali bage aga pageba asali. “We bidi augwaligo ena da de da wabo dawe?” augwalibolo tama hanalu wali. ¹⁹“Mebago nage da te we bidi baptais mani bidi Jon dao wabo dao,” augwaligo te po wali. “Mebago ma nage Elaija dao, te wabo dao. Mebago ma polobadu Godigō po ola mani bidi

ma hodaloai bidi dao wabo dao,” augwaligo te po wali. ²⁰“Dagego homugo ma ena de da wabo dawe?” wali. Pitago te po wei ponoyu, te po wali, “Nage da, Krais da, Godigo da Juda we bidi tau somai hagede tagala palali bidi dao,” Pitago te po wai.

Jisasgo aga dene selama, isabo po wali
(Mat 16:20-28; Mak 8:30-9:1)

²¹ Jisas agai augwaligo te po mebolo waidali weyu, bomona hageali, “Te po mesegeliəo,” wali. ²² Agai te po me wali, “Ena da, Godigo Bidi Mu da. Tama nosali te Juda dabego genuai bidi dabego me, te pris tobolu bidi dabego me, te Juda dabego bomo yai po ola mabo tobolu bidi dabego me, augwaligo ena buluba ela palama, dene genuai mu mawaibao. Augwaligo ena isilama, nosali sela wali sogo ena hodaluiba,” te po wali.

²³ Jisasgo tigidali we bidibolo te po wali, “Te ena wali me niwai bidi asainu da, aga tobade homu konebo gegeda pelama, ena tigide ebo dene tiwai aga bidibo donolama iduabo bidi, ena wali asao. ²⁴ Bidi me aga e tqde bidibo sogo aga tobade aga tigi sese yaida homu eyu da, te doaibao. Me ma, bidi me ena wali asobadi yaide, aga tqde bidibo sogo sia sobaso da, nosali bidibo ula selama, ma bidaibao. ²⁵ Bidi mego e tqde elalubo nai tigidali aga sai goli, aga digi ma dolu ma aga ma aiyaba elalu, te nai dabego aga mena tama tau sabo usu egowe? Te menio. ²⁶ Bidi mego enade hale eyu, eno ola mabo pode hale eyu ebaso da, teda nosali eno te bidide hale yaibao. Nosali Godigo Bidi Mu aga bomo dabe dali, aga ayago bomo dabe, moni ensel dabego bomo dabe dali asobo sogo, te hale yai bidi suyu, ena Godigo Bidi Mu eno me te bidide hale yaibao. ²⁷ Te po koneao. Dage megi e bidalubo bidi dabe me badu isisabadi, Godigo we bidi tonalubo se sueibao,” Jisasgo te po wali.

Jisasgo tigi osogo hasegelali
(Mat 17:1-13; Mak 9:2-13)

²⁸ Te po olama, Sarere deli bidama, Pita badi, Jon badi, Jems badi, tama bage Jisasgo selama, bulu duba Godibolo po wainu holali. ²⁹ Tama agai Godiba gedu haluasa po obadi yaide, aga megi tama elaluali tigi gesabidi tagalama, gasa tigi yai gesabidi hasegelama, aga ugwa dabe me te gasa tedela yai mu gagalama, te ula umagi mu pedelalio. ³⁰ Te sogo naga polo tama bidi si aga dali po udubo suali, te bidi Moses dali Elaija si dao. Te Moses, polobadu mu te bidibolo God agai te bomo yai po Juda dabebolo mani. Te bidi Elaija aga nosali bidiyu, Godigo agabolo ola mani po agai te Juda bagebolo pusali bidi dao. ³¹ Te bidi si asali, te Godigo ula dali pedelama, te dagalude elalubo pq tedela mu tiwai yali. Te bidi sigo Jisas dali po uduali. Godigo polobadu wali po te dolo wali pomai hagede eyu, Jisas Jerusalemde isabo bodolu maga baso, augwali sigo te po aga

dali miduali. ³²Te sogo Pita me, aga abagi si me gedu magane ebaso, godege piai goli, hodaluama, te Jisasde te dagalu pō tedela ula tiwai ula Jisasde elalu, te aga dali dolaluali bidi side me te tiwai ula elalubo suali. ³³Tama te bidi sigo Jisas taga pidali weyu, Pitago Jisasbolo te po wali, “Genuai Bidi, da ede tama bidibo da usu dao. Da selago ugwa be sela senama, me nage osogo bidabo be sē eyu, me Moses osogo bidabo be sē eyu, me Elaija osogo bidabo be sē eyu yaibao,” te po wali. (Pita noma siyu, agai wali po page kuna konesıama tama wali.)

³⁴Pita agai po odubadi yaide, po pedalama, pō tiwaigo augwali mesaga sali. Tama te pōgo augwali mesaga sagasobadi yaide, te Jisas dali bilali bage wi yali. ³⁵Te pō tomode po me dagayu te po wali, “E eno Ogwa dao. Agai eno sē emainu sa muani Ogwa dao. Dagego agai wabo po odao.” ³⁶Te po togwa sobadi yaide, Jisas agaduba bidibo suali. Te pedelali sē dabe augwaligo osogo hogwa selama, tama tiali po te we bidibolo dwasianu me pusube.

Jisasgo dwai nomago toai ogwa usu ilali
(Mat 17:14-21; Mak 9:14-29)

³⁷Te sogo do te Jisas aga wali bilibo bidi dabe dali te bulu bubia bidu aiyaba dulubadi, te we bidi umabo te Jisas tiąba asali. ³⁸Te we bidi tomode bidi me deligo moni hai i olama, te po wali, “Po ola mabo bidi, eno nagebolo hanalube dao, e suo. Eno ogwa deli digi tama dao. ³⁹Dwai noma bidigo tuai digi, moni hai olama, nogo sığa didigi ebo dao. Te aga kele dawede pesę dini pąqana pabo dao, kelelaude. Tama tidiuama, bomonama, dene ilama, taga pabo da. ⁴⁰Naga wali bilibo bidi dabe augwaligo te dwai haubo noma bidi sela şımainu eno hanalu wali goli, augwaligo usu selama, usu meni baso, tagalai,” te po wali.

⁴¹Jisasgo wei ponoyu, te po wali, “Magi baso dagego homu enaba begi pisama, gagega pidubawe? Ena dage dali nisu naga sogo bidigowe? Nisu naga sogo dagego sęgę eno tologowe?” wali. Tama te ogwa aga ayabolo te po wali, “Nago ogwa eba sesao.” ⁴²Te ogwa Jisas pageba asobadi yaide, te dwai haubo noma bidigo elama, tqba degasa pelama, aga nogo sığa didigi yali. Tama Jisasgo te dwai haubo noma bidibolo hagebo po weyu, te haubo bidi sela sęy, te ogwa ma sana palama, aga ayabolo ma mani. ⁴³Godigo moni bomo sulama, tigidali we bidi noma mu sali.

Jisasgo aga isabo po ma pusali
(Mat 17:22-23; Mak 9:30-32)

Te we bidi Jisasgo te yali sē tigidali sulama, noma sali homu me elalubadi yaide, agai aga wali bilibo bidi dabebolo te po wali, ⁴⁴“Megi eno dagebolo wabo po munu me kegeda pigimio. Augwaligo te ena Godigo Bidi Mu e tıde bidigo bomoba mawaibao.” Te po page mena tama waliwe augwaligo konebe.

⁴⁵Te po page augwaligo koneidali weyu, Godigo dualali. Tama te po page Jisasbolo ma hanalu wabo augwali wi yali.

De genuai mu dawe?
(Mat 18:1-5; Mak 9:33-37)

⁴⁶“Da tomode de genuai mu dawe?” te po olama, Jisas wali bilibo bidi augwa hasi konila yali. ⁴⁷Augwaligo te konila ebo homu Jisasgo koneama, dolo po mu oba homu emai hagede, wai boq me deli oda selama, aga panogo badu dualali. ⁴⁸Augwalibolo agai te po wali, “Bidi mego enade homu kone palu te ena tobade e wai boq tiwai dali bugai homu eyu, tau sali da, te agai enade bugai homu eyu, tau siyu tebao. Bidi mego ena asobadi, bugai homu eyu tau sobaso da, teda ena tagala palali bidi dali bugai homu eyu tebao. Magi baso meni, bidi me aga digi nogi elaluama, te dage tigidali tomode aga nogi dwasianu mu elalubo bidi yai baso da, te aga polalubo bidi mu bidaibao,” Jisasgo te po wali.

Bidi mego dage boi bidi isiąma hagebaso da, te dugabagi hasi dao
(Mak 9:38-40)

⁴⁹Te bidi Jongo po dagalama weyu, “Genuai Bidi,” te po wali. “Bidi mego Jisas nago nogide dwai noma haubo bidi dabe sela sasaq bilibo dago sulama, te bidiba dago hagebo po wai dao. Aga nage wali pabo bidi meni baso, dago aga habu seliyu, hageai dao,” wali. ⁵⁰Tiali goli, Jisasgo te po wali, “Dagego te tobage bidi hagegi biligimio. Gasa bidi agai dageba boi bidi ebo se isabaso da, te dugabagi hani bidi dao,” wali.

Samaria tq bidi dabego Jisas asobaso, dwagi yai homu ebe

⁵¹Te Godigo Jisas dagaluba odasa holabo magabadi yaide, Jisasgo koneama, aga te Jerusalemba pabo homu mu elama, pabo gagalali. ⁵²Magi magi nai dabe sisi ela mumainu, po wagi pabo bidi dabe tagala palali. Augwali te Samaria dabego be naniba sabolama, tama augwaligo agai nai me doado bage dodolama, sisi ilainu yilio. ⁵³Tiali goli, Samaria bagego aga Jerusalemba soabo po odama, tama augwali te Jerusalem bage dali boi bidi homu eboso, augwaligo agade bugagia gesabo homu ebe. ⁵⁴Tama Jisas aga wali bilibo bidi si Jems de Jon dali sigo te Samaria bagego te tama tebo kolesaga ebo sulama, augwali sigo Jisasbolo hanalu te po wali, “Genuai Bidi, nago homugo dago dagalu badu isi i olama, te bage isigo domai hagede yaiwe?” ⁵⁵Tama Jisas tudiba begelama, augwali siba wado po weyu, hageali. ⁵⁶Tama tiyu, aga augwali dali gasa be naniba pali.

Jisas wali pabo bidi dabe nigainu yai
(Mat 8:19-22)

⁵⁷Te augwa tq sisu pebelabadi yaide, bidi mego Jisasbolo te po wali, “Nage pabo digi, ena me nage wali paibao.” ⁵⁸Jisasgo te po agabolo wali,

“Te uni yowi dabe da, augwali pibo dedage te töde elalubao, tama te ba dabe da, te augwali me pibo be elalubo dao. Tiali goli Godigo Bidi Mu da, te aga tobolu munama piabo digi te bulu pesage menio,” wali.

⁵⁹Agai gasa bidibolo te po wali, “Ena wali asao.” Tiali goli te bidigo te po wali, “Genuai Bidi, hasia bolo eno aya isibo tonaluabao. Isibaso da, pubulaibao. Nosali ena nage wali asaibao.” ⁶⁰Tama Jisasgo wei ponoyu, te po wali, “Te Godigo po odisabo isai bidi tiwai bidi dabe augwa digi te isai bidi dabe pubalomainao. Nage pelama, Godigo we bidi tonalubo po pupusu biligi pao,” te po wai.

⁶¹Bidi mego agabolo te po wali, “Genuai Bidi, ena nage wali pai hagede digi, te hasia bolo ena pelama, ena ida aya dede dabebolo te augwali tobaliyi pabo po wagi pabo usu egowe,” wali. ⁶²Jisasgo agabolo te po wali, “Bidigo eno sə gagalama, te sə ebadi tagalo baso da, te Godigo we bidi tonalubo pesagede te bidigo sə ebo usu egobeo,” wali.

Jisasgo te aga sə yabo gasa bidi dabe te 72 bidi dabe tagala palali

10 ¹Te nosali Genuai Bidigo bidi sese sela olama, me bidi nogosı olama, saçago si peda sigisu te 72 bidi sa munama, tagala palali. Aga nosali pabo pesage tigidaliba te bidi dabe si si tagala paliyu ela palio. ²Tama agai aga wali pabo bidi dabebolo te po wali, “Te nai hauwa mu te gide tau yai elalubao, tiali goli te tau yai nai sabo sə ebo bidi hauwa menio. Tama tibaso dagego te gi aga ayabolo gedu haluasa po waiyəo, tama agai aga sə bidi tagala palama te gide elalubo nai sisinigi pomainogo wao. ³Te sə polo egi piəo. Eno dage moni dwai uni yowi dabe tomoba te sipsip tagala palobo aq ebo dao. ⁴Te mone ge bubo be me, nai gonobo wa me, saçə nadoba dabe sela pigimio. Tü dilide gasa bidi babe dali po weyu gesego igimio. ⁵Te dage be me deli tomoba pabo sogo, te dagego hasia bolo te po waiyəo, ‘E bede bidibo we bidi bugagia bidiaq.’ Te tiwai homu nagame ilibo po wao. ⁶Homu tegaluama, bugagia bidibo bidi me te bede bidibaso da, nago dwagi yai homu me aga dali elalumainao. Te tobage bidi me meni baso da, nago wali po du walisiqboso da, te po dugaba digi ma asomainao. God agai augwalibolo dwagi yai sə egobeo, te dagego koneaiba. ⁷Te sə ebo bidi aga nai sabo dao. Dage te bede deli bidibadi, te tubo nai maiyu, aq me maiyu ebaso da, te nai tuiqo. Dage te bedu me beba peyu ela biligimio. ⁸Dage mena be naniba pobadi yaide, augwaligo dwagi yai homu elama, dawea sobaso da, te dage tumai hagede muani nai tuiqo. ⁹Dagego suali digi, te dage pali be nanide gasi yai we bidi bidibaso da, te augwali tau siəo. Tede bidibo we bidibolo ‘Godigo we bidi tonalubo sə dage pageba asali dao,’ waiyəo. ¹⁰Tiali goli, gasa be nani meba pobadi yaide, dage dali bugai homu elama, dawea siasəbaso da, te be naniba pabo tü dilide dolalu, te po wao, ¹¹‘Dagego e bulude elalubo te dago saçade dagayane te pobele bage te dago sela səbo

da, te duga konemai hagede eba. Tiali goli, dagego bugagia homu kone palao. Godigo we bidi tonalubo sé ebo bomo dage pageba paba yagasalio,’ te po waiqo.¹² Eno dagebolo megi obe dao, Godigo we bidi po tū ela mabo sogode, te polobadu dwai bulu Sodom we bidi Godigo hobede elama, dwasianu sege mawaibao. Tiali goli, te dagebolo bugai homu isiayu dawea sisayane be nani we bidi dabeba mabo sege te genuagi mu yaibao,” Jisasgo te po wali.

Homu begi pisabo be nani we bidi dabede po

(Mat 11:20-24)

¹³ Te Jisasgo po ma wadolama weyu, te po wali, “Dage te hanu Korasin we bidi dabe, hobede mu yaibao. Betsaida bage, dage me hobede mu eba. Magi baso menio. Te bidi me deli te hanu si Tair me Saidonba pelama, te eno dage tomode yali bidi noma sabo bomai sé tiwai me igi pigi sogo da, teda te polo tama te Tair me Saidon, te hanu side bidali we bidi dabe homu begeligi dao. Tama augwa homu hasegeliyu, augwa dwai dwai sé yalide moni homu eyu, dwai homu dene elama, te homu dene eboso gudubo ugwa dabe gudulama, te augwa tobolude keli pilama dugulalugi dao. Te augwa yali dwai sede homu kone palama tama tigi dao.^x ¹⁴ Tiali goli, te Godigo e tqde we bidi po tū ilabo bodolu muani sogo pedalubo side, te dageba pedalubo sege da, te Taia hanu dali me te Saidon te hanu side bidali we bidi dabeba pedalubo sege aiyaba elalu, te yalawainu yaibao. Tiali goli, dagebolo da, te genuai sege pedelaibao. ¹⁵ Tama dage Kaperneam hanude bidibo bage, te dagego homu te dagego nogi te we bidi augwaligo te sigiba dagaluba ugwanu mu holobao, te homu eba, agawe?. Tiali goli, mu menio. Te dage tigi dene ebo dwai sia dabo dedage pageba s̄awaibao,” Jisasgo te po wali.

¹⁶ Jisasgo aga wali bilibo bidi dabebolo te po wali, “Bidi mego dagego pusubo po odobaso da, te agai eno po odyo tebao. Bidi mego dage buluba ela palobaso da, te agai ena buluba ela palu tebao. Bidi mego ena buluba ela palobaso da, te ena tagala palali bidi me buluba ela palu tebao.” Jisasgo te po olama, te bidi dabe pali.

Te 72 bidi dabe Jisas pageba ma geasa asali

¹⁷ Te nosali Jisasgo te tagala palali bidi dabe dwagi yai homu mu dali Jisas pageba ma asali. Augwaligo te po wali, “Genuai Bidi, dwai noma haubo bidi dabego dago nagi nogi olama, hage baso, dago po wali pali.”

¹⁸ Jisas agai te dwai haubo polalubo bidi nogi Satan agai bomo polobadu dolai dao homu eyu, te po wali, “Satan be sole gagawai dagaludu kegas dulubo eno polobadu suai dao. ¹⁹ Edao. Eno dagebolo bomo mawai dao,

^x 10:13 Ais 23:1-18; Ese 26:1-28:26; Jol 3:4-8; Amo 1:9-10; Sek 9:2-4

dagego te Boi Bidigo bomo mu aiyaba elalumainu. Te hwq dabe me, te bidi gaq kelebo hasamani me, sagago agabaso da, te dage gaq kelebaso da, dene isqawai, te tiwai dagego te Boi Bidi Satan aiyaba elaluibao. Agai bomo tigidali tego dage aiyaba elalugobeo. Augwaligo dagebolo magi se me elama, dene mugobeo. ²⁰Dagego tama te ebo sede dwagi yai homu egimio. Te po tagalu, ma dagego nogi te dagalude te buku mede aseai dao, tede dwagi yai homu iyqo,” Jisasgo te po wali.

Jisasgo dwagi yai homu eyu, God Ayabolo usu da po wali
(Mat 11:25-27; 13:16-17)

²¹Te sogo naga tama Godigo Dwagi Yai Mobogo Jisas dwagi yai homu mu ilali. Tama agai te po wali, “Ayao, nage te dagalu dali tq dali nigila tonalubo Genuai Bidi dao. Eno nage dali deli homu eyu nagebolo usu da po obao. Tqde homu kolesaga koneai bidi dabe augwaligo koneidali weyu tama nago te eno tamadi pusali po page nago geme dualai dao. Tiali goli te tqde elalubo homu kolesaga konesqawai we bidi augwalibolo nago te po page ola mawai dao. Awe, Aya, nago te tiwai yaibao homu elama, tama tede dwagi yai homu eyu nago tama tiwai naga yai dao,” wali.

²²Te we bidibolo Jisasgo te po wai, “Eno Aya agai tigidali nai eno nogoba muai dao. Tama niwai bidi me deli agai te Ogwa mu konea silai menio. Aya agaduba deligo naga te Ogwa konea silai dao. Tama niwai bidi me deli agai te Aya me konea silai menio. Owgago naga konea silai dao, tama te we bidi dabebolo te Ogwa aga digi te Aya augwalibolo ola mobaso da, te augwaligo me te Aya konea silaibao,” wali. ²³Tama aga wali bilibo bidi dabeba ibaba gelama, geme te po wali, “Te dagego megis subo se tiwai te bidi dabe augwaligo me subaso da, te dwagi yai homu pemene iyqo. ²⁴Polobadu Godigo po pusa mabo profet bidi dabe me, te genuai tuni bidi king dabe me, augwaligo te ebo se suainu yai goli me suai menio. Augwaligo dagego odobo po odainu yai goli me odai menio,” wali.

Samaria bidigo dwagi yai kolesaga yali po elasa soyu pusali po

²⁵Te Juda dabego bomo yai po ola mabo bidi me asama, Jisas usu sai hagede, agai po hanalubo po wagasali. Agai te po wali, “Po ola mabo bidi, eno noma te bugagia gamonabo pesageba painu, magi se yagaw?” ²⁶Jisasgo po wei ponoyu, te po wali, “Te Godigo po wabo bukude magi po wali elalubawe? Te wali po dabe nago nedama suali, mena page konebo daw?” ²⁷Te bidigo te po wali, “Te Godigo po wabo bukude te po wabo dao, ‘Nago Genuai Bidi God naga homu sese badi, naga noma sese badi, naga bomo sese badi, naga kolesaga sese badi elama, tigidaligo naga Godibolo homu kqaluao,’ wabo dao. ‘Me ma, naga digi naga homu

godolo mu eyu kęalubogia, te nago te bidi naga abagi hasi me godolo homu eyu me tama nage tiao,’ te po wabo dao,” wali.^y

²⁸ Te Jisasgo po wei ponoyu, agabolo te po wali, “Te usu dao. Nago po dolo obao. Nago tama tiyu da, te naga bidabo noma bidigo ula te gamonabo bulu selama, bidada peyu, bidada paibao,” te po wali. ²⁹ Tiali goli, te Juda dabego bomo yai po ola mabo bidi aga hale idali weyu, Jisas agade doloba pai bidi dao homu emai hagede, agai Jisasbolo ma hanaluyu te po wali, “Eno abagi hasi da, te de dawe?” wali.

³⁰ Jisasgo te po wali, “Bidi me Jerusalemdu te Jeriko be naniba dulubadi yaide, nai wi sabo bidi dabe te gema sunumide dula selama, te bidi asobadi pageabi elama tulama, te bidi aga ugwa dabe pepedama, elama, tama augwaligo aga doado bage tigidali wi sali. Tama te bidi isabo pąde magawai te aga mesena isai tiwai munalubadi, taga palio.

³¹ Tebadi yaide, te pris bidi me deli te tądu naga pali. Tama agai te elali bidi te tama telalubo sulama, te tų bogo badu bogelama ela soyu pali. Te bidi tau sabeo. ³² Tama nosali te tądu naga Livai sibi bidi me deli teba sabolali. Te bidi munalubo sulama, te tų bogo badu me ela solama pali.

³³ Tiali goli, Samaria bidi me te tądu naga asiyu, te bidi suali. Te sulama, tama te boi yai bidi dao, te homu elama, tagalobe, moni homu dene yali. ³⁴ Te bidi pageba pelama, wel dabe, bomai wę dabe keni idaliyu te elali pesageba gelama, te ugwa bogogo kęnama, te bidi ąobo kibu daiba muani. Tama bidi osogo pibo beba sela pelama, tede agai tonalualni. ³⁵ Te sogo do agai mone ge si selama, te osogo pibo be page bidibolo mani. Te bidibolo te po wali, ‘Nago bugagia tonaluao. E mone ge si ususąbaso da, ena ma asobo sogo nago e bidide pali mone eno nagebolo wei ma mawaibao,’ te Samaria bidigo te po wai,” Jisasgo te po wali.

³⁶ Te Jisasgo te po hanalu wali, “Te bidi sela tomode nago homugo mena bidigo te elali bidi te bidi aga abagi da homu yaliwe?” ³⁷ Tama te bomo yai po ola mabo bidigo wei ponoyu, te po wali, “Homu dene elama, tau sali bidi dao,” te bidigo te po wali. Jisasgo ma te po wali, “Te yaligia te nago me tiao.”

Jisas te Marta dali Maria dali sigo beba pai

³⁸ Te Jisas aga wali pabo bidi dabe dali pobadi yaide, be nani me deliba sabolali. Tama tede te we me nogi Martago Jisas asobadi, dwagi yai homu elama, bugagia gesali. ³⁹ Te we aga ama nogi Maria aga te Genuai Bidi sąą pagede dugulalu, agai ola mabo po odaludalio. ⁴⁰ Tama Marta agai te nai ulubo sę dabe sulama, homu tąp pali. Tama tibaso, aga Jisas pageba aselama, te po wali, “Genuai Bidi, eno amago e sę dabe enaduba emainu taga soali nago konebewe? Ena tau sigi pao po wao.” ⁴¹ Genuai

^y 10:27 Prs 19:18; Bom 6:5

Bidigo wei ponoyu, te po wali, "Marta, Marta, nage da te tigidali nai sulama, homu te tūq̄ pobao.⁴² Tiali goli, sege yai nai deli mu te elalubao. Tama Mariago homugo te saiba homu yali te segaq̄ nai te saleao. Mego me dobagobeo," Jisasgo te po wai

**Jisasgo Godibolo gedu haluasa po wabo ola mabo po
(Mat 6:9-15; 7:7-11)**

11 ¹Me sogo Jisas te bulu me deli badu pelama, te Godibolo gedu haluasa po olama, silama, te aga wali bilibo bidi mego agabolo te tama po wai, "Genuai Bidi, te nago dabolo me te Godibolo gedu haluasa po wabo s̄e ola mao. Te bidi Jongo aga wali bilibo bidi dabe ola manigia yao," wali. ²Tama Jisasgo augwalibolo te po wali, "Godibolo po weyu, e tama waiyao,

'Dago Aya, dago homugo nago dwagi yai nogi ugwaba somainao. Dago homugo nago we bidi tonalubo s̄e asomainao. ³Da bidibo dononama dago homugo tubo nai mao. ⁴Gasa bidigo dabolo dwai s̄e ebaso da, dago te sela s̄abo dao. Tama dago homugo nago te dago dwai s̄ede sali sege me sela sayao. Nago da te dwai s̄e emainu bomona sinabo pesageba sela pigio,' te po waiyao," wali.

⁵Te Jisasgo aga wali bilibo bidi dabebolo te po wadolama ma weyu, te po wali," Dage me duga abagigo beba huli tomode pelama, agabolo weyu, 'Abagi, ena te tubo nai bret negeli sela mao. ⁶Eno abagi me eno beba asali goli, eno maiabo nai menio,' waibao. ⁷Te be tomode bidibo bidi naga abagigo po wei ponoyu, te po waibao, 'Ena hodoligio. Be tū polo paiyai dao. Ena me, ena wai me te pibo bedugude ugwa banuama piai dao. Ena hodaluama, nage eno magi nai me magobeo,' te po waibao. Megi da, magi yaliwe? ⁸Eno dagebolo obe dao, aga naga abagi goli, aga homugo eno magobeo homu yali. Tiali goli, aga abagi hale isanama, hauwa sogo hanaludu geyu bidibaso da, te aga ma hodaluama, te tuabo nai mawaibao. Te po page tama telalubo. ⁹Godibolo po weyu tama tiao. Nago mu meni ebo nai sainu da, hanaludu bidama, nosali Godigo nagebolo mawaibao. Hauwa sogo gegedu bidibaso da, Godigo nagebolo ola mawaibao. Be tūba nogogo begobego udu bidibaso da, ta nagebolo dala munaiobao. ¹⁰Magi baso meni. Tigidali bidigo gedu haluasa po God dali hanalu wabo bidi dabe, augwaligo te nai saibao. Te nai gegebo s̄e ebo bidi, agai te nai sueibao. Tama te be tūba elebo bidi, teda Godigo te bidibolo tū dalobo dao," Jisasgo augwalibolo te po wai.

¹¹Te Godibolo po wabode, Jisas agai augwalibolo te po me wali, "Dage meba duga ogwago s̄uḡ tuainu hanalu badi yaide, dwai hasamani mawaibawe? Menio. ¹²Ba ge tuainu hanalu badi yaide, bidi ḡaq̄ kelebo

nai hwə̄ mawaibawe? Menio. ¹³Dage dwai dwai sə ebo bidi dabe goli, duga wai dabebole dwagi yai nai mabo dao. Dagalude bidibo Aya me aga Dwagi Yai Mobo Bidi sainu hanalubo bidibolo mu mawaibao. Tama agai te dwagi yai nai mabo kolesagago dagego mabo kolesaga aiyaba mu elaluabao,” Jisasgo te po wali.

Augwaligo po weyu, Jisasgo te Belsebul dali sə ebo da po wali
(Mat 12:22-30; Mak 3:20-27)

¹⁴Me sogo Jisasgo te po wasiąbo dwai noma haubo bidi sela sądubadi, te dwai noma haubo bidigo te bidi tagala palobadi, te bidigo nosali po ma wabo gagalali. Tama te we bidi dabego te sə ebo sulama, noma mu salio. ¹⁵Tiali goli, mebago ma “Te dwai noma tobolu bidi Belsebulgo bomo menama, te dwai noma te sela səbo dao,” wali.

¹⁶Te bidi mebago Jisas tola sabo bono gaga muyu te aga habela palomainu, te po wali, “Godigo bomo nagebolo mani dago sumainu wida, te nago da noma sabo bomai sə me deli ela suao,” te po wali.

¹⁷Tiali goli, Jisasgo augwaligo ebo homu koneama, te po wali, “Te deli bulu tə̄ kantri pedai bidi hani si ma bugulama, te boi hwı̄baso da, teda polo tama te bulu tə̄ pedai dolaibao. Ma, te deli ayago togwali hani sibi tomode bugulama digi hwı̄baso da, teda te deli hani sibi bidibo page dolaibao. ¹⁸Tama te Satango hani bage si bugulama, hwı̄gi sogo da, teda magi ilama agai te tobage sə ebo bomogo te nai dabe tonalugi dawe? Dagego enabolo dwai noma haubo tobolu bidi Belsebulgo te enabolo bomo mawai digi eno te sə ebao, te po dagego obao. ¹⁹Mu tama ena te Belsebulgo bomo ena dali elalubaso, eno te dwai haubo noma bidi dabe sela səsā bilibao te homu ebaso da, teda dego dage wali pabo hani bage augwali me te tau sabo sə egi dawe? Tiali goli, te duga hani dabego digi te dagebolo te po dolo ola mobaso, te dagego konebao, augwaligo te agai bomogo te sə ebo menio. ²⁰Te sə ebogo te dagego geda muani sə te ola mobao. Dagego geda mubo po obao. Eno e sə ebo te Godigo bomogo naga te dwai haubo noma bidi dabe sela səsā bilibao. Te sə ebogo te Godigo we bidi tonalubo sə dage pageba asai elalubo te ola mobao,” wali.

²¹Jisasgo te po ma wadolali. “Bomai bidi me deligo aga te boi hwı̄bo bainat hwə̄ te nai dabe dali te aga bede sisi elalu, aga be tonalubadi yaide, te bede mubo nai dabe bugagia munalubo da. ²²Tiali goli, te boma pai bidi me deli pedelama, te boi sulama te bidi dali hwı̄nama, te bidigo bomo aiyaba elalubaso da, teda te be page bidi aga tobade tiąduali te boi hwı̄bo nai dabe tigidali te bomai bidigo sela pabo dao. Tama te be page bidigo polobadu wi sali nai te bomai bidigo ma selama, tama dobabo dao. ²³Bidi mebago ena dali homu muisiąbo bidi da, te bidigo ena dali te boi bidi tiwai te ebao. Ena sipsip tonalubo tau sisiąbo bidi da, te agai eno sipsip dabe osalubo bidi tiwai eyu te ebao,” Jisasgo te po wali.

Dwai noma ma geasa asobo po
(Mat 12:43-45)

²⁴ Jisasgo te po wabo ma gagalali, “Te dwai nomago bidi me taga pelama, wa pai buluba toma nabo pesage gegegi pobao. Tiwai pesage me susiabantu da, aga homugo tama te ebao, ‘Ena taga soali beba ma geasa paibao.’ ²⁵ Tama tibaso, bugagia ma dodolama, pobele bage meni yai beba ma pabo aq te bidi pageba peyu te ebo dao. ²⁶ Tama ma pelama, te 7 te tama dwai haubo noma bidi dabe agai odasa asobo da. Tama te gasa dwai noma haubo bidi dabego dwai se ebo kolesaga te ebogo te hasia dwai mobo haubogo ebo dwai kolesaga aiyaba elalubo dao. Augwali asama, aga dali te bidi ma te tuagasobao. Tama tibaso, polobadu yali se tagalama, ugwanu mu te egi pobao,” Jisasgo te po wali.

²⁷ Te Jisasgo te genuai we bidi hani tomode te po dagayu, te po obadi yaide, te we me deli augwali tomode bididuali wego te po dagu olama, te tiwai po wali, “Nage ame nenama negali we da, bugai homu ebadi bogo dao,” te po wali. ²⁸ Tiali goli, Jisasgo wei ponoyu, te po wali, “Te mu dao. Tiali goli, Godigo po odama, wali pabo we bidi augwali dwagi yai homu mu ebadi bogo dao,” wali.

Bidi mebago Jisasbolo bomai se yao po wali
(Mat 12:38-42)

²⁹ Te we bidi umabo Jisas odoga sagasobaso, agai te po wali, “Dage megı e sogo bidalubo hani we bidi dabe da, te dwai mu da. Dagego enabolo te ‘Godigo bomode te bomai se ebao te koneainogo te se ola mao,’ po wabo yabao. Tiali goli, dagego te bomai se yabo daq tiwai ilibo dagego me sugobeo. Menio. Te Godigo te profet bidi Jonabolo polobadu yaligia enabolo me te se ebo dagego sueibao. ³⁰ Polobadu Godigo po ola mabo bidi Jona aga isali tiwai. Tama ma hodolama, agai Godigo po te moni hanu te be nani nogi Ninive tede bidali we bidibolo Godigo po pusigi pali. Tama te tiwai ena te Godigo Bidi Mu te dage megı bidibolo bagebolo pedelaibao. ³¹ Te Godigo te we bidi augwali po tu ilabo daq ilali side, te e to pedai saut badu bidali genuai nogi yai we kwin agai te megı e sogo bidalubo we bidi dabego dwai se yali po hania hanilama pusaibao. Magi baso meni. Te kwin we bogo badu mu bidali goli, te aga polobadu te Juda dabego king bidi nogi Solomongo dwagi yai kolesaga ebo po odai hagede, digibulu buludu genuai bulu tonalubo we asai dao. Tiali goli, eno Solomon aiyaba elalualio. Eno nogigo me agai nogi aiyaba elalualio goli, dagego eno po odobe dao. Tama dagego eno po odisabaso, te Godigo te we bidi po tu ebo sogo te genuai wego ‘Dagego te dwai se te yaliao’ po waibao.^z ³² Polobadu Godigo po pusa mabo bidi nogi Jona agai te Ninive we bidibolo

^z 11:31 1 Kin 10:1-10; 2 Sto 9:1-12

Godigo po pusa mobadi yaide, augwaligo odama, dwai dwai sə tagalai dao. Tama eno Jona aiyaba elaluali goli, dagego eno po odobe dao. Nosali Godigo we bidi po tū ela mabo sogo te Ninive we bidigo dagebolo ‘Dwai sə dagego te yaliao’ po waibao,” Jisasgo te po wali.

Sole poba elasa soali po
(Mat 5:15–6:22-23)

³³ Jisasgo te po ma wadolama weyu te po wali, “Te bidi dabego te lam sole udulama, te be dedageba aiya muyu, ma te baket me deli tomoba dualogobeo. Menio. Te tebol daiba ugadu munama, tama te be tomoba asobo bidi dabego te sole sumainu, sole mubo tebol daiba mubo dao.

³⁴ Naga tigigo sole te naga gedu da. Naga gedugo be ula bugagia suyu, naga homu kolesaga dwagi yai yaibao. Tiali goli, naga gedu doyu da, teda nago homu kolesaga me te be hulia selama dwaibao. ³⁵ Naga tolalubo sole ula sula sidali weyu, bugagia tonalu dua yao. Tiyu nagede te elalubo ula te be hulia sai pedelabuo. ³⁶ Te naga tigide tigidalide te genuai ula usu nai eladu da, te me badu hulia sisāma, te naga tigi tigidalide ula naga usu nai elaluabao, te lam sole ula elalubogia yaibao,” Jisasgo te po wali.

**Jisasgo Farisi sibi dali Juda dabego bomo yai po ola mabo bidi dabe
dali augwaligo dwai sə ebo wali**
(Mat 23:1-36; Mak 12:38-40)

³⁷ Te Jisasgo te po silama, Farisi bidi mego agai beba aga dali nai tuagasao wali. Tama tibaso, Jisas te be tomoba pelama, nai tuainu dugulaluali. ³⁸ Jisas agai te Farisi dabego nogo wę telabo sə wali pisāma, nai polo tubaso, te Farisi bidi noma sai. ³⁹ Tama Genuai Bidigo te po wali, “Dage Farisi dabego te kap dabe me, pou dabe me te eda badu bulu badu meda elalubaso, te bugagia dua digi me te aqide telabo dao. Tiali goli, dagego homude dwai sə yabo konealubao, gasa bidigo nai sulama, eno somainawe homu ebo bage dao. Tama te ebogo homu dwai dao ola mabo dao. ⁴⁰ Dage da, te mu umawai bage te yabao. Te nai dabe bulu badu nigali Godigo te nai dabe tomo badu me nigibe homu eba, agawē? ⁴¹ Tiali goli, te duga munalubo pou dabe, kap dabe tomode munalubo nai dabe te nai meni yai bidi dabebolo menama, dagego te tiwai kolesaga eyu da, te dage magi dwai meda meni yai wiegi yai mu ma yaibao. ⁴² Dage Farisi dabego duga gide ebo yalawai nai dwasianunu selama, Godibolo mabo dao. Te tama sə da dagego ebadi goli, te dagego doloba pai kolesaga ebo tagalu, te səge sai we bidi tau sabo menio, me dagego te God godolo mu ebo kolesaga ebo menio. Te tama tebo sə ebogo dage dene genuai mu saibao,” wali.

⁴³ “Dage Farisi dabe, dage dua dao. Te dage te Juda dabego bomo yai po ola mabo beba pelama, te nogi elalubo bidi duayabo pesageba dugawai homu ebo

dao. Me ma, we bidigo maketde dage sulama, genuai bidi dao omaina homu ebo dao. Tama te ebogo dage dene genuai mu saibao.⁴⁴ Dage dua tama dao. Dage da, te isai bidi te ḡu pagede pubulai madi elalubo te konesiąma, te bidi dabe te daide ugadu bilibo tiwai ebo dao. Te dage bulu badu tonobo te wiegi yai da homu ebao. Tiali goli, tomo badu da, dage mu dwaliao. Tama dagego gasa we bidi meda ilibō se yai dao. Te se ebogo nosali dage dene geswai saibao,” Jisasgo te po wali.

⁴⁵ Te Juda dabego bomo yai po ola mabo bidi mego agabolo te po wali, “Po ola mabo bidi, nago te tama po wabogo te dago nogi me dolobao.” ⁴⁶ Jisasgo wei ponoyu, te po wali, “Dage te bomo yai po ola mabo bidi dabe me nosali dene genuai saibao. Dagego gasa we bidi tudiba sege yai walu mu te abilibo aq te ebao. Tiali goli duga nogo dwasianu debalama, tau sabe dao. ⁴⁷⁻⁴⁸ Polobadu duga noqo God aga po pusa momainu tagala palali profet bidi dabe ela muai dao. Tama dagego te pubulali madigi ḡu page ma aulubao. Tama te ebogo dage nosali genuai dene saibao. ⁴⁹ Tama tibaso, Godigo dwagi yai kolesagago te po polobadu wai dao, ‘Te eno po pusa maiabo profet bidi dabe me, te eno po pusigi pomainu tagala palobo te aposel bidi dabe me, te eno augwalibolo tagala palaibao. Tama telama, augwaligo te bidi dabe me badu elu, me badu olo sesanama, osogo elaiabao,’ te po wai dao. ⁵⁰ Tama tibaso, megi bidalubo bage te tigidali Godigo po pusa mabo bidi dabebolo polobadu bidali we bidigo yali se wei siyu, dene saibao. Te Godigo e tq nigali sogo gagalasa asali, te megi e bidibo sogoba usu nagasu, te yali dwai sege te megi bidalubo we bidi dabede wei ponaibao. ⁵¹ Polobadu augwaligo te Godigo po pusa mani profet dabe ela muani. Te bidi me nogi Abel elali. Te sogode gagalasa elala asali, te siminagasu, te bidi Sekaraia ela muani. Te bidi Sekaraia te Moni Lotu Be tempel tomoba pelama, dolalugi pali. Aga te Godibolo nai ula mabo sia nogobo alta pesage pagede bidali. Te habu mu selali pesage si tomo agebelede bidibadi yaide, augwaligo aga ela muani. Te tiali pode eno mu tama obe dao. Te tiali wei siyu megi bidibo we bidi dabe augwali moni dene mu saibao. ⁵² Dage bomo yai po ola mabo bidi dabego te mu po dualigi menigi sogo da, teda te we bidigo bugagia konegi da. Tiali goli, dagego te po dualali. Dagego te po bugagia odisawai, gasa we bidigo odainu sinabadi yaide, dagego augwali togolaliao,” Jisasgo te po wali.

⁵³ Te Jisas te bulu tagalama pobaso, te bomo yai po ola mabo bage me, te Farisi bage me, augwaligo agade dwai homu eyu, te aga nogi dolobo posobo po wabo gagalali. Augwaligo agabolo te haniani po hauwa bage mu hanalu walio. ⁵⁴ Te augwaligo te bidi Jisasgo wabo po me geda mubo wenaga suai hagede, te hanalubo po hauwa bage unula dogia sawanio.

**Jisasgo dage ugwadu homugo tibo po wabo te Farisi bidi dabe
gagayabuo po wali
(Mat 10:26-27)**

12 ¹ Te se ebadi yaide, te umabo tausen we bidi Jisas pageba mu odogwa sagaselama, augwa hasi ma agaga bilalubo aq yalio.

Tama Jisasgo hasia aga wali bilibo bidi dabebolo te po wali, “Dage te Farisi bage te ugwidu homugo tibo po wabo bidi dabego ebogia yabuo. Dage te tiwai gagaidali weyu, bugagia dilasa bidiqo. Bidi mego bret nigibo sogo, tomoba dwasianu bomonobo nai mubo dao. Tama nosali te bret boma pabo dao. Te Farisi dabego ugwidu homugo po wabo se, te dwai se dage tomoba asiyu da, dage tomodé genia paibao, te bret bo dai tiwai yaibao. ² Magi magi nai tigidali mesegaluali, te daiba hania hanilaibao. Tigidali mesegalubo po me kinea sialibao. Magi po me dagego hulide wali, te po ulade odaibao. ³ Dage mego te bidi meni yai be tomodé bidu, te hulide te oloba pomu po olama dua digi wali po, te bidi mebago te be peduba holama, hai olama waibao,” Jisasgo te po wali.

Bidigo te God delide naga wi yao po wali
(Mat 10:28-31)

⁴Te Jisasgo po ma wadolama weyu te po wali, “Eno abagi dedeo, eno dagebolo te tiwai po obe dao. Te bidi dabe augwaligo dage te olo tigi busi bulu elebasso, wi elamu. Te nosali augwaligo magi se me isiąyu, te dagego noma bidi me isiligobeo. ⁵Te eno po hanilama, dage dali obe dao. Te dagego mena bidide wi yaibawen? Te dagego wi yabo bidi dagebolo eno ola mawaibao. Te God dali dagego wi iyao. Te Godigo bidi elama, te noma bidi dali siaba sabo bomo agai usu yaibao. Eno mu tama dagebolo obe dao. God dali naga wi iyao,” wali.

⁶“Te dagego koneiqo, te dwasianu a naga banu dabe te bidi dabego te nogeai mone ge ² toea sigo te banu sabo meniwe? Tiali goli, Godigo te tiwai dwasianu banu deli me te homu kone me gegeda palogobeo. ⁷Tama te ba dabe diluai bage meni goli, Godigo augwali konealubo dao. Te dage bidi dabe da, te genuai diluai bage dao. Godigo duga tobolu nisi dabe tigidali nedama, kinea silai elalubo dao. Tama tibaso, God agai dage bugagia tonalubaso, dage gasa bidide wi egimio,” Jisasgo te po wali.

Dago bidi sabode Jisasgo nogi wabo hale egio
(Mat 10:32-33; 12:32; 10:19-20)

⁸Jisasgo te po ma wadolali, “Eno dagebolo obe dao. Bidi sabode bidibadi ‘Ao, ena da te Jisas wali pabo bidi dao’ wabo bidi, te bidi Godigo Bidi Mu eno dagalude Godigo ensel dabe sabode eno te po waibao, ‘Ao, te bidi ena wali asobo bidi dao.’ ⁹Tialima, bidi sabode ‘Woo, ena Jisas wali pabo bidi menio’ wabo bidi, te Godigo tagala palai bidi eno me dagalude Godigo ensel dabe sabode eno te bidide ‘Woo, te ena wali asobo bidi menio,’ waibao. ¹⁰Bidi mego Godigo Bidi Mu dali dwai posobo po obaso da, Godigo te bidigo dwai posobo po wali te agai homu kone isiąyu gegeda palu tagalubo usu yaibao. Tialima, bidi mego Godigo Dwagi Yai Mobo Bidide dwai posobo po obaso da, Godigo te dwai po wali selā

sabo usu egobeo. ¹¹ Dagego Godigo po pusubaso, augwaligo dage te Juda dabego bomo yai po ola mabo beba odasa selama, po tū ela mawainu eyu, ma te gavman tobolu bidigo gesabidide me po tū ela mawainu ebaso da, eno mena po obaso, te ena sana pabo po wagowe te homu eyu, te te nago moni homu egimio. Magi baso menio. ¹² Te sogo tama te Godigo Dwagi Yai Mobo Bidigo nago wabo po ola mawaibao, te nage tau sai hagede tiaibao,” Jisasgo te po wali.

**Jisasgo te nai doado bage hauwa munalubo te umawai
bidibolo po digi po elasa soali po wali**

¹³ Te bidi sabode bidi mego te po wali, “Po ola mabo bidi, eno amabolo dena aya isu dabolo taga pali nai duga si te doado bage buga siao po wao.” ¹⁴ Jisasgo wei ponoyu, te po wali, “Bidi mego te nai bugulabo bomo enabolo mabe, te nai bugulabo eno usu egobeo. Te eno sē menio.” ¹⁵ Te we bidi dabebolo agai te po wali, “Dua dao, duga tobage nai yogo idali weyu. Nai hauwa mu mubo te bidi geswai bidibo menio. Nai hauwa mu mubo te bidi te aga bidibo ula sabo te usu menio,” wali.

¹⁶ Te Jisasgo te po digi po pusali, “Nai hauwa mubo bidi mego tqde nai bugagia holama hauwa walobo gi me deli elaluali. ¹⁷ Aga homude te po wabo gagalali, ‘Ena gide holali nai muabo pesage dabe usu egobeo. Eno magi yagawe? ¹⁸ Eno te ebao,’ agai te po weyu, aga homugo tiali, ‘Ena gide ebo nai me, olo dwagi yai nai me muai hagede te eno hasia nai mudali be dabe huginama, genuai be ma sē yaibao,’ te homu yai. ¹⁹ ‘Ena digi enabolo ma te po waibao, “Kisu bidi dao, ena homugo mu tuali, te nai dabe kibu be hauwade sē ela pali nai munalubao. Te tiali ena sē ebo tagalama, nai tuyu, aq̄ tuyu, elama, bugai homu eyu bidao.” Eno te po enabolo ma waibao,’ agai te homu yai. ²⁰ Tiali goli, Godigo te bidibolo te po wali, ‘Nage da, mu umawai bidi dao. Megi hulide tama nage isaibao. Nage isaide, mena bidigo naga tobade yogwaluali nai dabe tigidali saibawe?’” Jisasgo te po wali. ²¹ Jisasgo te po silu, te po wali, “Te da e tqde bidi dabego augwa tobade nai umabo selama, sabobo aq̄ te ebao. Tiali goli, Godigo gedude augwali te magi nai meni yai bidi bidaibao. Te nai dabe agade me elalugobeo,” Jisasgo te po wali.

Godiba homu tialubo kolesaga po wali
(Mat 6:25-34)

²² Jisasgo aga wali bilibo bage dabebolo te po wali, “Tama tibaso, eno dagebolo te tama po obao, dagego te po begelama pusali pode te homu hauwa elama, te tigi tau sabo nai tulama bidabo te naiba homu dogia pigio, ‘Te mena nai tugowe?’ Te dagego tigi tau sabo sēde homu hauwa dogia pelama, te po wagio, ‘Te dago mena ugwa dabe gudugowe?’ te homu me dogia pigio. ²³ Tubo nai da, sege menio. Tialima, bidi bidibo

ula elalubode te sege elalubao. Gudabo ugwa dabede da, sege menio. Tialima, duga bidibo tigi elalubo da, te sege te ebao.²⁴ Te ba dabe suo. Augwaligo nai me bulama, nogogo sabe dao. Augwa tubo nai muabu be me meni dao. Tialima, Godigo augwali gesebo dao. Ba dabe da sege menio. Dage bidi da, sege baso, Godigo tubo nai mawaibao.²⁵ Dage bidi mego moni homu ela pabogo aga isabo bodolu didigili pabo usu egowe? Menio. Dagego te tama homu eyu da bugagia bidada piduaiba te homu ebo usu egobeo.²⁶ Te dagego te tama tiwai dwasianu senu me yabo usu isabaso da, teda magi baso dagego te gasa me me naide moni homu ebawe?²⁷ Te bulu wel noswai duduli walobo dagego suiəo. Augwaligo se dene bomo elama, augwa au ebo menio. Augwaligo te ugwa dabe me nigibeo. Tiali goli, te eno dagebolo obe dao. Te polobadu bidali king bidi nogi Solomongo te nai hauwa mu muani bidi agai aga tigide me te ugwa wiegi wiegi yai au yali goli, te e noswai dabe duduligo yali augo te Solomongo au yali aiyaba elaluali.^a²⁸ Te noswai dabe Godigo aulubo dao. Te noswai dabe megi tama elalubo nago suali goli, te do da sasia pelama, te bidi dabego togolama, isiba ulaibao. Te olo noswai tiwai da, te Godigo aulubo da. Dage we bidi dabego homu dwasianu mu Godiba te begi pobao. God agai dagebolo ugwa maiabogo te noswai aulubo aiyaba elaluaibao.²⁹ Te dagego moni homu elama, te da tuabo mena nai dabe tueibawe, ma dago te mena aji dabe tugowe, te homu ebo dao. Dagego te tama homu elama, te nai gegegimio.³⁰ Te God wali pisabo te töde we bidi hani dabe tigidaligo te tama tebo moni homu elama, tigidali sogo gegebo dao. Dagego homugo tuabo homu ebo nai da, te duga Ayago agai dage maiabo homu konealubao.³¹ Te nai dabe gegegebo tagalama, Godigo we bidi tonalubo se wali bugagia pobaso da, ta nago homugo tubo nai me, ugwa me God agai mawaibao,” Jisasgo te po wali.

³² Jisasgo po ma wadolama, “Te dage ena dali bilibo bidi dabe, dage te dwasianu hani sipsip tiwai dao. Te dage wi egimio. Magi baso meni. Duga Ayago dagebolo po weyu, te aga dagego king bidibao po olama, Godigo dagebolo te we bidi tonalubo se mawainu, dwagi yai homu elalubao.

³³ Duga munalubo nai dabe tigidali gasa bidibolo menama, mone ge selama, nai meni yai we bidibolo maiəo. Dagego tama tiyu da, ta duga wiegi yai nai dabe dagalude muiəo. Tama tede te nai me dologobeo, bidi mego wi sogobeo, mano dabego me tugobeo.³⁴ Duga homu me duga te wiegi yai nai dabe munalubo digi elaluaibao,” Jisasgo te po wali.

Te wiegi yai se ebo bidi dabe dabego sisi elalubo po

³⁵ Jisasgo te po wali, “Magi magi nai asobo tonalu, sisi elalua. Duga ugwa dabe hagana selama, te kukulu dəq walama, te lam sole udulama

^a 12:27 1 Kin 10:4-7; 2 Sto 9:3-6

tolalu, sisi elaluiqo. ³⁶Sę ebo bidi dabego augwa genuai bidi we kębo digi pai asobo tonaluali yaligia iyao. Te genuai bidi sabalu, tuba bego bego wabo si, polo tama tū dawai dao. ³⁷Te genuai bidi asu suagasali, te sę ebo bidi dabe te godege pisąma, te gedu dila pai bomonama bididubadi yaide, augwa genuai bidigo suagasobaso da, teda te sę ebo bidi dabe da dwagi yai homu pemene mu yaibao. Eno dagebolo obe dao, te genuai bidi agai digi te sę ebo bidi dabego sę ebogia, aga ugwa haganama, te kukulu dą walama, ‘Dage dua yao’ olama, tubo nai augwalibolo mawaibao. ³⁸Te genuai bidi huli tomode me, ma be posabو magade te ba gogolo po hasia sogo obadi me, te aga asabo konesiąbaso, te augwali sisi elasa bidibadi yaide, aga te huli tomode me, ma be posabو magade me aga asobo si, te augwali dwagi yai pemene mu yaibao. Tama te po konealu iyao. ³⁹Dagego te sę homu kone palao. Te be page bidigo te nai wi sabo bidi te mena sogo asobo te konegi sogo da, te da tonalubadi, te nai wi sabo bidi aga be aluama, te be tomoba asobo sulama gogolama tagaligi menio. Te tonalubadi ebaso, te nai wi sagasigi menio. ⁴⁰Ena da Godigo Bidi Mu dao. Dagego ena ma asabo bodolu konesąbaso da, dage me olo sisi tama elalu yao,” Jisasgo te po wali.

**Genuai Bidigo homu tialubo wiegi yai sę bidi ma homu tiąłusiąbo dwai
sę bidi te po olama wali**
(Mat 24:45-51)

⁴¹Te Pitago Jisasbolo hanalu te po wali, “Genuai Bidi, nago te wali po digi po dabolo naga obawe, ma tigidali bagego me odomainu waliwe?” te hanalubo po tama Pitago wali. ⁴²Tama Genuai Bidigo wei ponoyu, te po wali, “Te eno te kolesaga elama, dwagi yai sę ebo bidibolo obao. Aga genuai bidigo te bidi te sę tigidali tonaluabo genuai bidi me ma nigilaibao. Te bidi te gasa sę ebo we bidi dabe nai dobayabo sogo dobayabo genuai bidi me nigilaibao. ⁴³Te sę ebo bidigo aga genuai bidigo mani sę idubadi yaide, aga genuai bidigo ma suagasobaso, te sę ebo bidi dwagi yai homu mu yaibao. ⁴⁴Eno dagebolo mu tama obe dao, te genuai bidigo aga te sę bugagia ebo bidi genuai bidi agai nai dabe tonaluabo bidi nigilaibao. ⁴⁵Tialima, te sę ebo bidigo aga homude te tama homu yali, ‘Eno genuai bidi polobadu pai goli, gesege ebo’ olama, agai te gasa sę ebo bidi dabe me, gasa sę ebo we dabe me elu yali, tama agai nai hauwa tubadi, te bomai aji me hauwa tuyu elama, te aga tobolu gęo elama, te esela pai bidi tiwai eyu, te tama sę idubadi da, ⁴⁶me sogo te sę ebo bidi agai gegeda pelama, te agai konesąbo sogo me, te genuai bidi asama, te genuai bidigo te sę ebo bidi hwągo todogolama, denelege milama, muaibao. Tama agai te bidi te po odisąbo bidigo pesageba muaiba.”

⁴⁷“Te sę ebo bidi me aga genuai bidigo sę ya po wai goli, sisi elama, ya wali sę isławai bidi, te genuai bidigo te sę bidi bigo dwaigila mu elaibao.”

⁴⁸ Me ma, gasa sə ebo bidibolo aga genuai bidigo ya wali sə agai bugagia konesənama, aga te bigo elabo homu yabo səba usu nama ebaso da, teda te sə ebo bidi te bigo te yalawagia dua digi elaibao. Te genuai nai mu sali bidigo te genuai nai wei ma ponabo sə yabo te elalubao,” Jisasgo te po wali. “Te we bidi augwaligo nai hauwa te bidi me deli te bidigo nogoba muaebaso da, teda augwaligo te bidibolo te genuai nai mu wei ponabo te genuai te elalubao,” Jisasgo te po wali

We bidi bugulubo bidi Jisas dao

(Mat 10:34-36)

⁴⁹ Te Jisasgo po ma wadolali, “E təba sia nogagasu, ena asai dao. Tiabo homu eno polobadu yai dao. ⁵⁰ Baptais sabode te əjigo eno tigi siminibo tiwai, te nosali dene me eno tigi siminaibao. Eno baptais sabo gilama te ena dene sabo sə elalubao. Te dene siminasəbadi yaide, ena dwai homu mu ebaso. ⁵¹ Dagego homugo eno e təba te tigidali we bidi dwagi yai homu ilagasali waliwe? Dagebolo eno mu po obao, te menio. Eno da te we bidi bugulagasu ena asai dao. ⁵² Tama we bidi bugulama, te tiwai me badu e badu bidaibao, me badu u badu bidaibao. Megi dəj elama, deli bede a naga bidai yabaso da, bugulama, selago te me si dali boi bidi eyu, te me sigo te me sela bage dali boi bidi eyu yaibao. Aya dabego augwa ogwa dali dwai homu eyu yaibao. ⁵³ Ogwa dabego me augwa aya dali dwai homu yaibao. Ida dabego me augwa wegi dali dwai homu yaibao. Ida dabego me augwa ogwago we dali dwai homu yaibao. Tama ogwago we dabego me augwa auwa dali dwai homu yaibao,” Jisasgo te po wali.

Jisasgo te po weyu, te megi pedalubo sə bodolu page koneao po wali

(Mat 16:2-3)

⁵⁴ Jisasgo te we bidi dabebolo te po wali, “Sia ge pabo badu dagalu sisili ela sobaso da, ‘Tulubage tulaibao,’ dagego te po polo wabo da, tama nosali tulubage tulubo dao. ⁵⁵ Tama me badu habu badu wali asobaso da, ‘Teda te giliga nanobo moni posolo yaibao,’ duga tama wabo dao. Tama moni posolo ebo dao. ⁵⁶ Dage ugwidu homugo po wabo mu umawai bage mu dao. Duga təgo me dagalugo me ebo sə sulama, konebo goli dao. Magi baso megi e ebo sə page dagego konebewe?” Jisasgo te po wali.

Nage po tə ilibo bidi dali polo po dodolao wali

(Mat 5:25-26)

⁵⁷ Jisasgo te po ma wadolali, “Magi baso dagego te mena kolesaga te doloba pai te dwagi yai kolesaga dawe, te homu elama dagalobo meniwe? ⁵⁸ Bidi mego nago dwai sə yali olama, nage po tə ebo pesageba odasa pobadi yaide, te bidi dali dage si te sunumidu pobadi yaide te po

tū bugagia dodelao. Meni baso da, nage po tū ebo bidi pageba kekasa pelama, te bidigo nage enesigi bidigo nogoba muaibao. Augwaligo nage kalabuside muaibao.⁵⁹ Eno nagebolo te po dolo mu tama obe dao, te po tū abelisabantu, nage kalabus bede bididubadi yaide, te nageba dajil ilali monego nage te kalabus bede abelama simanisiabantu yaide, nage munu me te bulu dia soagobeo,” Jisasgo te po wali.

13 ¹Te Jisas agai po obadi yaide, hasia asisawai we bidi me pageba asali. Tama augwaligo Jisasbolo te po wali, “Te Galili tq we bidi me badu augwa sipsip kibu ela munama, Godibolo ofa olo mobadi yaide, tama te moni gavman tobolu bidi nogi Pailat agai po olama, gasa bidi dabego te we bidi ela muai. Tama ela munama, agai augwaligo kaneme me, te sipsip kibu kaneme me si taluali, tamadi,” augwaligo te po wali. ²Tama te po odama, Jisasgo augwalibolo te po wei ponani, “Te Galili tq we bidi augwali te tiwai isibaso, tama dagego homu augwaligo yali dwai se te gasa Galili tqde bidibo we bidigo yali dwai se aiyaba elaluali, dagego te homu ebawe? Te tebeo. ³Eno dolo dagebolo obao, duga dwai se ebo kolesaga tagalasiabantu, teda dage me isaibao.”

⁴“Te bulu nogi Siloam, tede moni bobobage sigi be degasa pai. Tama te sigi be degeyu yaide, we bidi hauwa te 18 elalio, augwali mu isali. Te be degali po dagego polo odali. Tama dagego e homu yali bogo, te Jerusalem be nani we bidi me badu augwaligo dwai se dwasianu yali, tialima te sigi be degeyu elali we bidi augwali dwai dwai se mu yali. Dagego te homu yali bogo. Te tebeo. ⁵Eno dagebolo e po obao, duga dwai se ebo kolesaga tagalasiabantu, teda dage me isaibao,” Jisasgo te po wali.

Jisasgo nedu duba po digi po begelama pusali

⁶Te po olama, Jisasgo augwalibolo e po digi po pusali. Agai te po wali, “Bidi mego agai wain gide ni haga elaluali. Tama nosali te bidigo te ni du walaliwe naga suagasali. Tialima, haga du walobeo. ⁷Du walisiabantu, agai te gi se ebo bidibolo te po wali, ‘Edao. Kibu be selade ena e haga du suagasidu geani. Tiali goli, du walobeo. E ni gelao. E nigo te tq ili magi baso olo sabo dawe?’ ⁸Tama olama, te gi se ebo bidigo te po wei ponani, ‘Genuai bidi, meo, e ni haga elalumainao. Kibu be delide elalumainu yaibao. Te kibu be tomode eno e ni haga pagede tq diganama, te tq ili mabo nai munama, tama taga paibao. ⁹Tama nosali, du walobaso, usu da. Tiali goli e ni haga walisiabantu, eno gelaibao,’ te gi se ebo bidigo te po wali,” Jisasgo te po wai.

Te Sabat sogode Jisasgo te tudi basia sali we usu ma ilalio

¹⁰Te Sabat sogode Jisas te Juda dabego bomo yai po ola mabo be tomoba pelama, te we bidi dabebolo Godigo po ola mani. ¹¹Tama agai wabo po odali we bidi bidali tomode te tudi basia sali we bidali. Te dwai kauwa bidi

mego te we dą̄ olama, te dwai gasi te we tigide munama elalubadi, tama te kibu be hauwa 18 te tama kibu bede te we tudi basia selama elaluali, te aga bugagia dolo ma dolalugobeo. ¹²Tama Jisasgo te we sulama, agai te webolo i dwasianu weyu, asao wali. Tama te we asobo si da, Jisasgo te po wali, “We, nagede te elalubo gasi te silali dao, nage olo bidao,” wali. ¹³Te Jisas agai nogo si te tudi basia selama te suga sali wego tigide mubaso, tama polo tama te we tudi debela palu bugagia dolugulualio. Tama te wego Godigo nogi ugaba sali.

¹⁴ Te Juda dabego bomo yai po ola mabo be toboli bidi agai sębę yali, Jisasgo te gasi yai we Sabat sogode dwagi yai ma ilalide. Tama tibaso, te toboli bidigo te we bidibolo te po wali, “Nogo a naga bidama, e badu nogo deli sogo dago sę ebo usu da. Tama te sogode e bidigo pageba asiao, agai dagego gasi sia somainu. Tialima, Sabat sogode asigimio,” wali.

¹⁵ Te Genuai Bidi Jisasgo te toboli bidibolo te po wei ponani, “Dage magi ebo bidi dawe? Dagego po mobo mabo da, tiali goli duga po mobo mabo te dagego tibo po dali weyu, te wabo po wali pabo meni. Te dagego wabo po me te ebo kolesaga me deli tigi tiwai si me elalubeo. Te Sabat sogode, dage tigidaligo te duga kibu hos me, te kau kibu me muani madi pelama, te wę tumainu, te duga augwali muani pesage tagalama, te węba odasa pabo da, te Sabat sogode tiaibao. Tama te sę ebo si, dage moni homu ebo meni dao. ¹⁶ Me ma, e we da, te polobadu genuai bidi Abrahamgo hani we da. Tama e we te dwai kauwa bidi Satango dą̄ wali, kibu be hauwa 18 bidali. Eno e we tau salio, e we bugagia sese bidimainu sana palalio. Dwagi yai sę yalio. Eno dwai sę ebeo. Dagego homugo te eno dwai sę yalio, te homu ebawe? Te menio,” Jisasgo te po wali. ¹⁷Tama Jisasgo wali wei ponani po te boi bidi dabe kone palama, tama augwaligo geda muani po me koneama, augwali hale yali. Tiali goli, te we bidi tigidali augwaligo Jisasgo bomai sę yali sulama, augwaligo dwagi yai homu mu yali.

Tubo nai ge mastet dwasianunu tede te po digi po begelama wali
(Mat 13:31-33; Mak 4:30-32)

¹⁸ Te Jisasgo te we bidibolo e nai mastetde po digi po weyu, te po wali, “Te Godigo we bidi tonalubo sę, te magi sę tiwai dawe? Mena sę agai ebo sę tiwai dawe? ¹⁹Godigo we bidi tonalubo sę te tubo nai nogi mastet ge tiwai dao. Te mastet ge da, te kemeni ge sabi si dao, dwasianunu mu dao. Tama bidi mego te mastet ge selama, agai gide tela yali. Tama te nai wai tedelama, te koliali. Koliama, te genuai holama, te ni tiwai pedelali. Tama te ba dabe augwa be te ni nologode sę yani,” Jisasgo te po wali.

Jisasgo te bret bo dabode po digi po elasa pusali po
(Mat 13:33)

²⁰ Te Jisasgo po wadolama weyu, te po ma hanalu wali, “Te Godigo we bidi tonalubo sę te mena sę tiwai dawe? ²¹Godigo we bidi tonalubo sę te

tubo nai nogi bret bo dabo nai yis tiwai da. We mego te yis selama, tama tubo plaua hauwa selama, te yis dali plaua dali si taluali. Tama taluama, te plaua tigidali bo dalio,” Jisasgo te po wali.

Jisasgo te po weyu, dage te dwasianu sunumi tomoba paibao po wali
(Mat 7:13-14, 21-23)

²² Te Jisas te Jerusalem be naniba pabo ma gagalali. Tama peyu, tomode dwasianu be nani dabebe saboloyu, tama agai te we bidi dabebole Godigo po ola mani. ²³ Tama ebadi yaide, bidi mego aga hanalu wali, “Genuai Bidi, te Godigo ma sabo we bidi nisu nagawé? Hauwa ma sogowé? Deli deli ma sogowé?” wali. ²⁴ Te Jisasgo te we bidibolo te po wali, “Te be tü dwasianu goli, dage bomo elama, te sunumi tomoba pião. Magi baso meni. Eno dagebolo obao. We bidi hauwa Godigo we bidi tonalubo madigi tomoba pai hagede, ebadi, tiali goli te augwali usu egobeo. ²⁵ Tama te be page bidi hodaluama, te be sunumi palia sai madigi, tama dage te be mesalode bulu badu dolalueibao. Tama dolalubadi, dagego te be sunumiba bego bego wabo gagalama eyu, te po waibao, ‘Genuai Bidi, tü dayao, da tomoba asaio.’ Tiali goli, agai dagebolo te po wei ponaibao, ‘Dage menadu asaiwe, eno konebeo. Dage eno konebeo.’ ²⁶ Tama te sogo dagego e po wabo gagalaibao, ‘Woo, dago nage dali nai tuyu, wę tuyu yali. Nago dago be nanide da po ola mani,’ waibao. ²⁷ Tiali goli, te be page bidigo dagebolo te po waibao, ‘Eno dagebolo obao, dage menadu asaiwe, eno konebeo. Dage pião, dage tigidali dwai dwai sę ebo bage, dage enade gedao,’ waibao ²⁸ Tama olama, dage tede bidiyu, te polobadu bidali bidi dabe te Abraham me, Aisak me, Jekop me, te Godigo po ola mabo profet bidi dabe me, augwali tigidali Godigo we bidi tonalubo madigi tomode bidibo dagego sueibao. Tiali goli, dage te bulu badu bidaibao. Dage bulu badu bidibaso, dage hwa waibao, duga kele gaçgo ma halua tueibao, te duga sębę ebaso tieibao. ²⁹ Tama we bidi augwali te giliga asobo badu me, te giliga dega sabo badu me, te not bogo badu me, te saut bogo badu me, te tigidali bulu badu we bidi augwali deliba aselama, Godigo we bidi tonalubo madigi tomoba pelama, nai tueibao. ³⁰ Suao. Me badu bidi megi te nosali sabi badu mu bidali bidi dabe da, te polasa pabo bidi yaibao. Me ma, megi me badu polasa pabo bidi goli, nosali te menio, te nosali tudi badu bidibo bage yaibao,” Jisasgo te po wali.

Jisasgo te Jerusalemde bidali we bidi godolo mu yali
(Mat 23:37-39)

³¹ Te Jisasgo te we bidi dabebole te po obadi yaide, te Farisi sibi bidi me badu aga pageba asai. Tama augwaligo agabolo te po wali, “Te genuai gavman bidi nogi Herot agai nage isilai hagede homu ebao. Tama tibaso, nage e bulu taga pelama, pao,” te Farisi bidi dabe augwaligo te po wali.

³²Tama Jisasgo augwalibolo te po wali, “Dage pelama, te bidi muma sabo te dwai uni yowi tiwai bidi Herot pageba pao, agabolo te po wao, ‘Edao, eno te dwai kauwa bidi sela sayu, te gasi yai we bidi dwagi yai ma ilibao, megi me, do me, te se yaibao. Tama duba eno se siminaibao.’ Agabolo te po wao. ³³Tiali goli, eno pabo tu megi me, do me, duba me ena wali paibao. Magi baso meni. Godigo po ola mabo bidi me deli te gasa bulude isibaso da, te dwali. Tede isilamu. Jerusalemde isigi sogo da, teda usu igi da. ³⁴Aua, dage Jerusalem bage dao. God agai po ola mabo bidi dabe dageba tagala palali. Tialima, dagego augwali ela muani, te masigi dabe sayu, eleyu yali. Tama hauwa sogo eno homugo eno dage deliba sisinai hagede, pagia somainu, te ba kakaruk kimi aga gou dabe bogo dologode munama, bogogo bea sabo aq tiwai. Tiali goli dagego hagelabo wali. ³⁵Edao! Megi dagego bidibo be nani Godigo tagalali, olo elalubao. Tama eno dagebolo obao, nosali dagego ena ma sugobeo. Dagego ena susiama bidu, hauwa sogo sia saibao. Tama sia selama, nosali me dagego ‘Dago te Godigo nogide asobo bidigo nogi ugwaba sao’ wabo si, teda dagego ena ma sueibao,” Jisasgo te po wali.

Jisasgo te tigi bo dabo gasi yai bidi dwagi yai ma ilali

14 ¹Me sogo Sabat Jisas pelama, te Farisi dabe augwa genuai toboli bidigo beba nai tugi pai. Tama te bidi aga te Farisi sibigo genuai toboli bidi bidibo dao. Agai bede me te Juda dabego bomo yai po mu koneai bidi dabe me, Farisi sibi dabe me, augwali bidiyu, augwaligo Jisas agai magi se ebo weyu, tonaluali. ²Tama te bede me, nogo sagu tigi bo dae bidi me te Jisas pagede bidali. ³Jisasgo te bidi sulama, te Juda bagego bomo yai po mu koneai bidi dabe me, te Farisi sibi dabe me, te hanibolo te po hanalu wali, “Te Sabat sogode dago te gasi yai bidi dabe usu ma iliyu dodolobo se ebaso da, usu yaibawe?” ⁴Tiali goli, augwaligo po wei ponebe. Tama Jisasgo te nogo sagu tigi bo dae bidi selama, dodolama, tagala palali. ⁵Te bidi dodolama, tagala palama, Jisasgo te tonalubo bidi dabebolo te po wali, “Te dage tomode bidi mego ogwa me, kau kibu me we geba te Sabat sogode tulalueibaso, te bidi me agai sulama, te aga ogwa isidali weyu, polo peyu, saibawe, ma te meniwe? Te kibu kau me, te we geba tulalubaso, page bidigo sulama, te aga pelama, te Sabat sogode agai saibawe?. ⁶Ma, te sogobewe?” wali. Tiali goli, augwaligo agai wali po wei ponogobeo. Augwaligo po me wabeo.

⁷Te be page bidigo gasa bidi dabebolo nai tuagasiqo wai dao. Tama te bidi dabe augwali te be tomoba aselama, augwaligo te nogi elalubo bidi duga yabo madigiba polo pelama, tede bidali. Tama Jisasgo augwaligo te kolesaga ebo sulama, augwalibolo e po digi po wali. Agai te po wali, ⁸⁻⁹“Bidi mego we sabo side, tama augwali nage nai tuagasao wabo side, nage pelama, te nogi elalubo bidi duga yabo madigiba dugwagi pigio.

Magi basowe? Nage te nogi elalubo bidi duga yabo madigiba dugwagi pigi sogo da, te be page bidigo te genuai nogi yai bidi i olama, te bidi aselama, be page bidigo nagebolo e duga yabo madigi tagalao, e bidi ede dugwamainao, nage gasa be badu bidigi pao wagi da. Tama agai nagebolo te po wagi sogo da, nage hale eyu, te olo bidi duga yabo madigiba pigi da.¹⁰ Te tiwai egimio. Augwaligo nage i wabo si, olo bidi duga yabo madigiba dugwagi pao. Tama tilama, te be page bidi aselama, sulama, agai nagebolo te po waibao, ‘Abagi, nage te nogi elalubo bidi bidibo madigiba asao, tede duga yao.’ Te wabo si yaide, te nai tuagasali we bidi tigidaligo gedude nago nogi ugwbaba saibao. E po peni e dao.¹¹ Niwai bidi aga nogi ugwbaba sobaso da, teda Godigo te bidi nogi aiyaba elaluabao. Ma, aga nogi ugwbaba sisama bidali bidi, Godigo te bidigo nogi ugwa saibao,” Jisasgo te po wali.

¹² Te Jisasgo te aga i wali bidibolo te po wali, “Naga nai hauwa te giligade uluyu, ma te piode uluyu elama, te naga abagi dede, ama dede, naga hani bidi me, kisalubo bidi dabe me, augwaligo nai hauwa elalubo bage, te tobage bidi dabe i wagio. Augwaligo nage nosali i olama, wei ponodali weyu, nago augwali i wagio.¹³ Tiali goli, naga nai hauwa nogeainu ebaso, te nai meni yai bidi me, te nogo dwai bidi me, saga dwai bidi me, gedu widai bidi me, te tobage we bidi i wao.¹⁴ Te tobage we bidi nago i wabo si, Godigo nagebolo dwagi yai se yaibao. Magi baso meni. Augwaligo nage ma wei mabo usu egobeo. Tama te doloba pai we bidi te gu pagede ma hodolobo sogode, Godigo nage ma wei ponaibao,” Jisasgo te po wali.

Tubo nai hauwa nogeai po digi po (Mat 22:1-10)

¹⁵ Te nai tuabo saide duga yali bidi megoo Jisasgo ola mani po odama, te bidigo Jisasbolo te po wali, “Te bidi me Godigo we bidi tonalubo madi tomoba pelama, tede nai tubaso da, teda dwagi yai homu pemene elama, tama bugagia bidada peyu, bidada paibao,” wali. ¹⁶ Bidi megoo te po wali. Tialima, Jisasgo agabolo te po wali, “Te bidi megoo tubo nai hauwa selama, nogeaiyu, we bidi hauwabolo agai po ola tolali, ‘Eno nai sisi ebo si, dage tuagasiqo,’ te po ola tolali.¹⁷ Tama nosali te tubo nai sisi elama, te bidigo aga se ebo bidi tagala palali, te polobadu i wali we bidibolo e po omainu, ‘Megi asiqo. Te tubo nai sisi ela munama, tue hagede, megi dage asiqo wali.’¹⁸ Tiali goli, augwali deli deligo ena hagelabo homu eyu, ili po wali. Bidi megoo te se ebo bidibolo te po wali, ‘Megi tama eno gi tq abelali. Tama te tq megii eno sugi paibao. Nago genuai bidibolo te po wao.’¹⁹ Bidi megoo te po wali, ‘Eno se ebo kibu kau nogo si megii tama abelali. Tama eno te kibu dabe bomo elama, se bugagia ebewe weyu, sugi pobao. Nage pelama, nago genuai bidibolo te po pusao. Megi ena

asogobeo.' ²⁰Tama bidi meg e po wali, 'Eno we tamadi kewae dao. Tibaso, ena asogobeo,' wali.

²¹Tama tibaso, te s̄e ebo bidi aga genuai bidi pageba ma pelama, augwaligo wali po pusigi pali. Tama te genuai bidi s̄eb̄e elama, dwai homu yali, te i wali bidi augwalibolo. Aga s̄e ebo bidibolo te po wali, 'Polo pao. E moni taun genuai pabo t̄ude me, dwasianu pabo t̄ude me, tede bidibo nai meni yai we bidi oda sigi pelama, asao. Te tigi dwai we bidi me, gedu widai we bidi me, s̄aq̄a dwai we bidi me, tigidali oda sigi pelama, eba asao,' te po wali. ²²Tama te s̄e ebo bidi pelama, aga genuai bidigo yao wali s̄e elama, genuai bidi pageba ma aselama, te po wali, 'Genuai bidi, nago enabolo wali s̄e eno yalio. Tialima, be paḡabeo, habuge yali,' wali. ²³Te po odama, te genuai bidigo te po wali, 'Moni taun taga pelama, te moni pabo t̄ude bidibo we bidi me, te dwasianu pabo t̄ude bidibo we bidi me gegegi pelama, eno beba asiəpo po bomo elama wao, eno be paḡamainu, eno sisi yali nai augwaligo tumainu yao. ²⁴Eno nagebolo e po obao, eno hasia i wali bidi tigidali augwaligo eno sisi yali nai tugobeo,' te po wali," Jisasgo te po wai.

Bidi te Genuai Bidi Jisas wali peyu da, te bomo yai s̄e elalubao
(Mat 10:37-38)

²⁵Te bidi Jisas te Farisi hani bidigo be taga pelama, Jerusalem be naniba pabo ma gagalali. We bidi me hauwa aga dali wali pai. Tama Jisas hobolu begelama, augwalibolo po pusali, te po wai, ²⁶"Niwai bidi ena wali pai hagede homu ebaso da, te ena godolo mu tama eyu, ena wali pai hageda, te usu da. Tama agai aga ida aya dali, aga we wai puluba dali, aga ama dede, abe dede godolo mu eyu, tama agai ena dwasianu godolo homu eyu da, tea te tobage bidi ena wali pogobeo. Tama te agai aga digi aiyaba munama, agai ena ugwbaba muyu, aga ena wali pabo, te usu dao. ²⁷Niwai bidi ena isibo hagelabo weyu tama aga ena wali pabo meni, te tobage bidi te eno hani bidi menio. Te ena wali pabo s̄e e tiwai dao. ²⁸Bidi meg o s̄ig be s̄e yainu da, hasia aga digi aga homude homu kone palobo, 'E be s̄e ebo ena usu egowe, usu egobewe? En mone ge usu egowe, usu egobewe?' ²⁹Tama te bidi te homu hasia kone palisiqbadi, te s̄ig be ni bulali da, tama agai te be s̄e ebo s̄e eboso, te be s̄e siligobeo. Tama gasa bidi dabego te s̄e yali sulama, te agade posobo po weyu, te bo wabo po gagalama, ³⁰te po waibao, 'Te bidigo e s̄ig be s̄e ebo gagalali. Tiali goli, agai e s̄ig be s̄e yani simanobeo.' Augwaligo te tobage po waidali weyu, agai hasia te be s̄e ebo bugagia koneama, usu baso, te be s̄e yao," Jisasgo te po wali.

³¹Jisasgo e po me wali, aga wali pabo s̄ede, "Te gasa bulude bidibo boi hw̄ibo genuai tuni bidi dali agai enesigi bidi dabe dali, augwali hw̄i yagasobo si, teda ede bidibo hw̄ibo tuni bidi hw̄igi paibao, aga enesigi

bidi dabe hodobo paibao. Tiali goli, hasia aga homude te po mobo waibao, ‘Te asobo boi bidi aga hwijbo bidi hauwa mu 20,000 elalubao. Tama eno hwijbo bidi hauwa mu menio, 10,000 naga elalubao. Sabi si menio. Te bidi eno aiyaba elalugowe, elalugobewe, te eno konebe,’ waibao.³² Tama agai homude ena usu egobe wabo si, teda aga boi bidi digibulu bidibadi, agai po digi bidi tolaibao, boi pimainu yaibao.³³ Eno tamadi wali po deliba taluyu, tama te tiwai yaibao. Bidi mego aga doado bage tigidali tagalabo hagela baso, teda te bidi eno hani bidi menio,’ Jisasgo te po wai.

Halea pali tamu po
(Mat 5:13; Mak 9:50)

³⁴ Te Jisasgo te po wali, “Te tamu da, pusu ebo wiegi yai nai dao. Tialima, te tamu pusu ebo te mu halea pobaso da, mena tama ma pusu yaibawe? ³⁵ Te mu halea pali tamu te olo nai tiwai dao, se menio. Aga ili te tqba magobeo. Te gide holobo nai tau sabo se me egobeo. Te kibu bulmakau di dali taluama, te gide muainu ebaso, usu me egobeo. Te bidi dabe augwaligo te tobage tamu olo sela sabo dao. Eno wabo po konebo bidi, agai eno po bugagia odao,” Jisasgo te po wali.

Kibu sipsip me deli hagawai po
(Mat 18:12-14)

15 ¹ Te takis sabo bidi dabe dede, dwai kolesaga ebo bage me, augwali hauwa Jisas pageba asali, agai ola mabo po odainu hagede yali. ² Tama te Farisi bidi hani dabe me, te Juda dabego bomo yai po koneani bidi dabe me, augwaligo hagelabo po weyu, te po wai, “E bidigo te dwai se ebo we bidi pagebo dao, augwali hodobo beba pelama, nai tugi pabo dao,” wali. ³ Augwaligo te po obaso, tama Jisasgo augwalibolo e po begelama pusuyu, te po wai, ⁴ “Dage tomode bidi mego te kibu sipsip bidi sese nogo a naga te 100 elalubadi, tama te sipsip me deli hagabaso, te bidigo mena se yaibawe? Te kibu sipsip page bidi agai te bidalubo sipsip te tubo nai sabo madide osogo taga pelama, tama te hagawai sipsip gegegi paibao, nono ebo menio, bugagia gegebo. ⁵ Gegegi pelama, subaso, teda dwagi yai homu eyu, te kibu sipsip nagede auwasa paibao. ⁶ Tama pelama, aga beba sabolama, aga hani bidi dabe me, abagi dabe me i olama, deliba sisinama, augwalibolo te po waibao, ‘Ena dali dwagi yai homu yao. Eno kibu sipsip hagawai. Te eno gezelama, eno salio. Dagego ena dali dwagi yai homu yao,’ te sipsip page bidigo te po waibao. ⁷ Eno dagebolo obao, te tiwai te doloba pai we bidi hauwa olo bidibadi, teda dagalude te ensel dabe dwagi yai homu ebo dao. Tialima, dwai se ebo bidi me deli aga homu begelama, te aga dwai se yali tudiba mubaso da, teda te dagalude ensel dabego te moni dwagi yai homu pemene mu yaibao,” Jisasgo te po wali.

Mone ge hagawai po

⁸Jisasgo te po me wali, “Me ma, we megó mone ge nogo si elalubadi, te mone ge me deli te be tomode hagabaso, tama te wego magi sę yaibawe? Te wego sole domonama, te hagawai masigi te be tomode gegebo gagalaibao. Tama agai te be hogomu poalama, te pobele bage dabe deliba sisiniyu, gegaibao, nono ebo menio, bugagia gegebo. ⁹Gegelama, subaso, teda dwagi yai homu eyu, aga hani dabe me, abagi dede me i olama, deliba sisinama, augwalibolo te po waibao, ‘Ena dali dwagi yai homu yao. Ena hagawai masigi ma sali,’ te wego te po waibao. ¹⁰Eno dagebolo obao, dwai sę ebo bidi me deli aga homu begelama, dwai sę tudiba səbaso da, teda Godigo ensel bidi dabe augwali dwagi yai homu mu ebo dao, te wego te hagawai masigi ge gegelama ma sali gilama tiwai,” Jisasgo te po wali.

Gesi bidi hagayali po

¹¹Te Jisasgo te we bidi dabebolo po me weyu, te po wai, “Te bidi megó ogwa si bidali. ¹²Tama te i badu bidigo aga ayabolo te po wali, ‘Aya, nago doado bage dobayao. Eno nosali saibao homu yali doado bage enabolo megi tama mao,’ te nosali sabo hagela ebo homu elama, te po wali. Te i badu bidigo te po olama, aga ayago aga doado bage tigidali aga ogwa sibolo dobolama, mani.”

¹³“Te dwasianu bidama, i badu bidigo aga sali doado bage munama, tama gasa bidigo abelama, te i badu bidibolo masigi dabe mani. Tama te i badu bidi aga doado bagede sai mone tigidali selama, gasa digibulu tɔba mu pelama, bidigi pai. Tede bidibadi, aga dwai dwai haniani sę eyu, hagoma homu ebo kolesaga elama, aga mone tigidali besela sənamana dolama tagalalio. ¹⁴Tama aga mone tigidali sia sali. Masigi sia selama, tama te sogo te tɔde moni nasi yali. Tama te gesi bidi nai meni yai bidi bidali. ¹⁵Nai meni baso, aga tede bidali tɔ page bidi me deli pageba pali, tubo nai sabo sę emainu yai. Tama te tɔ page bidigo te gesi bidi aga giba tagala palali, te aga kibu tonalubo sę emainu yai. ¹⁶Tama te gesi bidi moni nasi baso, agai te homu yali, ‘Eno te kibu dabego tubo ni du dabe tugi sogo da, teda usu igi da,’ wali. Tialima, bidi megó agabolo tubo nai mabe.”

¹⁷“Te aga homu kolesaga ma hasegelama, aga tedali homu ma yali. Aga te homu yali, ‘Eno aya aga sę ebo bage augwaligo tubo nai hauwa mu munalubadi goli, ede ena nasigo tama isaibao. ¹⁸Ena edu taga pelama, eno aya pageba paibao. Teba pelama, eno agabolo te po waibao, ‘Aya, eno Godigo gedude dwai sę yali, nago gabidide me eno dwai sę yalio. ¹⁹Hasia ena nago ogwa bidali goli, ma eno dwai kolesaga yali. Te megí nago enabolo ogwa olamu. Enawe nago sę ebo bidi bidagawe?’’ te gesi bidigo te homu yali.”

²⁰ “Te homu elama, te bulu taga pelama, tama pelama, aga aya pageba painu yai. Tialima, digibulu aga tomode asodubadi, aga ayago aga asobo suali. Tama ayago agabolo homu dene eyu, aya aga ogwanu pageba udulama pali, te nogogo pageali, te gesabide nono nani. ²¹ Tama te gesi bidigo aga ayabolo te po wali, ‘Aya, eno Godigo gedude dwai sę yali, nago gabidide me eno dwai sę yalio. Ena gesuai bidi menio, dwai bidi dao. Tama tibaso, nago enabolo te ogwa da po olamu dao,’ te po wali. ²² Tiali goli, aga ayago aga wabo po togwali, te sę ebo bagebolo te po wali, ‘Polo pao, te dwagi yai bobobage ugwa sela asao, aga tigide bulao. Dwagi yai nogo mou sela asao, aga nogode holoyu yao, sąqą nadoba me aga sąqąde buluyu yao. ²³ Te sa muani kibu kau wai selama, elao. Da dwagi yai homu eyu, genuai nai tuinao,’ wali. ²⁴ ‘Magi baso meni. E bidi eno ogwanu isigi pai tiwai yai goli, tama megi ma bidibao. Aga hagawai, tama megi eno ogwanu ma sualio,’ ayago te po wali. Tama olama, augwali genuai dwagi yai homu ebo gagalali.”

²⁵ “Te bidigo gomunai ogwa gide bidali, te i badu bidi beba asali sogode. Tama te gomunai bidi aga be pąba asiyu, te tęabi eyu habidi elebo odali. ²⁶ Te tęabi ebo po odama, agai te sę ebo bidi me deli i olama, agabolo hanaluyu, te po wai, ‘Te dagego e tęabi magi baso ebawe?’ te gomunai bidigo te tama po hanalu wali. ²⁷ Tama te sę ebo bidigo agabolo te po wei ponani, ‘Te nago amanu ma asali. Nago aya aga ogwanu sese ma asobaso, agai te sa muani tuabo kibu kau wai elao tuinao wali, dabolo,’ te sę ebo bidigo te po wali. ²⁸ Tama te po odama, te gomunai bidi sębę yali. Be tomoba pabo aga hagela yali. Aga aya te be bulu badu asai, aga homu dene baso, ‘Nage be tomoba asao’ wedu gebadi. ²⁹ Aga ayago ‘Nage asao’ wali goli, te gomunai bidigo aga ayabolo te po wei ponani, ‘Nage eno wabo po homugo suaو. Kibu be hauwade eno nago sę yalio. Nago enabolo wali po eno sela sębe, odalio. Ena tama tiali goli, ena dali, eno abagi dede da moni nai tumainu, nago kibu meme wai naga ena munu me mabe. ³⁰ Tiwai goli, u bidi nago ogwanu, agai nago mani doado bage te penani sęde bilibo we dabede olo silama, bidali. Aga te dwai sę yali goli, aga eba ma asobo si, naga sa muani tuabo kibu kau wai ela mani, tumainu, nage dwagi yai homu ebaso,’ te gomunai bidigo te po wali.”

³¹ “Tama aga ayago te gomunai bidibolo te po wei ponai, ‘Eno ogwa, tigidali sogo nage ena dali bidibo dao. Eno doado bage tigidali nago nogode mawai dao. ³² Megi da dwagi yai homu eyu, tęabi yabo si dao. Magi baso menio. E bidi nago amanu aga isigi pai tiwai yai yali, tama megi ma bidibao. Aga hagawai, tama megi eno ma suali,’ te ayago te po wali,” Jisasgo te po wai.

**Sę ebo bidi tonalubo bidigo aga genuai bidigo negeli
elalubo bidide wei ponabo po begelama pusali**

16

¹ Te Jisasgo aga wali asobo we bidi dabeebolo e po begelai po pusa mayu, te po wai, “Te sibage siyu, genuai bidi me deli bidali.

Tama aga doado bage genuai mu elalubaso, aga doado bage tonalubo bidi nigelai dao. Tama nosali gasa bidigo te genuai bidibolo te po wali, ‘Nago doado bage tonalubo bidi agai sə bugagia esiəbadı, nago nai dabe olo sela səbo dao,’ wali. ²Tama te po odama, te genuai bidigo te doado bage tonalubo bidi i olama, agabolo te po wali, ‘Te nago səde bugagia ebo menio po eno odalio. Nago te bidigo wei ponabo po asəani buku tigidali dodolama, ena mao, eno sueio. Nago te sə ma egobeo, eno nage sela səwaibao,’ te po wali.”

³“Te aga genuai bidigo wali po odama, te doado bage tonalubo bidigo e homu yali, ‘Te genuai bidigo ena te səde sela səwanego da, eno magi masigi sabo sə yagawe? Gi sə yabo eno bomo usu egobeo. Te ena we bidibolo masigi gonobadi, ena hale yaibao. Magi sə yagawe? ⁴E, eno konebao. Te genuai bidide negeli mani bage eno tau saibao. Tama nosali te genuai bidigo ena e səde sela sənama, tama te negeli mani bage augwaligo enade dwagi yai homu eyu, ena te sese sana bidaibao,’ agai homude te po wali. ⁵Tama te homu elama, agai te genuai bidide negeli mani bage deli deli i wali. Tama te hasia asali bidibolo agai te po hanalu wali, ‘Te eno genuai bidide te negeli mani nai nisu naga maniwe?’ ⁶Te negeli mani bidigo te po wai, ‘Te eno nago genuai bidibolo te 100 dram wel eno negeli sali elalubao. Te eno denama hauwa wei ponaibao, te moni genagi nogo si olama, səqə sese, me badu səqə deli, denama pagənama, wei ponaibao,’ te po wali. Tama te doado bage tonalubo bidi agai te po wali, ‘E bukude e pepa yabe da, nago negeli wei ponabo po asəani pepa yabe dao. Tama nago e pepa yabede asəani namba po sela səyao, te denama genagi a naga olama, me badu nogo sela asəao, nago mani negeli te tiwai togwao,’ wali.”

⁷“Te negeli mani bidigo te tiwai elama, tama te doado bage tonalubo bidi agai te genuai bidide negeli mani bidi mebolo te po hanalu wali, ‘Nage me, eno genuai bidibolo te negeli mani nai nisu naga maniwe?’ Te negeli mani bidigo te po wei ponani, ‘Te moni kobi wa hauwa mu 1,000 selama, tubo nai nogi wit ge te wa dabe pagənama, tama eno te genuai bidibolo mayu, wei ponaibao,’ te po wali. Tama te doado bage tonalubo bidigo agabolo te po wali, ‘E bukude e pepa yabe da, nago negeli wei ponabo po asəani pepa yabe dao. Tama nago e pepa yabede asəani namba po sela səyao, te gasa namba asəao, hauwa mu meni, hauwa naga 800. Te tiwai nago polobadu mani negeli togwao,’ wali.”

⁸“Te genuai bidi agai aga doado bage tonalubo bidigo yali sə po odama, te nai tonalubo bidi nogi ugwaba siyu, te po wali, ‘U bidi aga homu tedali yali, te negeli mane bage wi idali weyu, aga digi aga tigi bugagia tau sali,’ wali. Te peni e dao. Te augwa homu wali pabo we bidi augwali homu bugagia mu eyu, augwa hasi tau siyu, augwa tigi tau sabo dao. Tialima, te ulade bidibo we bidi augwali homu eyu, augwa tigi bugagia tau sabo menio,” Jisasgo te po wali.

⁹Te po olama, Jisasgo po me maneyu, te po wali, “Te eno dagebolo e po obao, te sibage me doado bage me, me sogo te naigo we bidi te dwai kolesaga tomoba kekebo dao. Tiali goli, duga doado bagego we bidi bugagia tau siyu, abagi hauwa nigiliyu, bidao. Tama te tiwai elama, tama nosali te doado bage sia sobaso da, Godigo dage pageyu, ‘Eno bidibo madi tomoba asia,’ waibao. ¹⁰Bidi mego dwasianunu nai bugagia tonalubaso da, teda te bidi da, genuai nai me bugagia tonalubo bidi dao. Ma, bidi mego dwasianunu nai tonaluyu, tama tibo po obaso da, teda te bidi da genuai naide me tibo po wabo bidi dao. ¹¹Tama tibaso, nage e tqde bidibo doado bage bugagia tonalusabaso da, teda bidi mego nage te doado bage mu me magomeo. ¹²Tama, gasa bidigo doado bage nago nogode munama, tama nage te nai bugagia tonalusabaso da, teda bidi mego nago nai nage me magomeo. ¹³Nage te genuai bidi sigo tedali se egomeo. Te menio. Nage te genuai bidi me godolo mu eyu, aga wabo po odaibao. Tiali goli, nage te i badu genuai bidide dwai homu eyu, agai wabo po nago odogobeo. Nago homu Godide mubaso da, teda naga homu te doado bagede me mugomeo. Ma, naga homu te doado bagede mubaso da, teda naga homu Godide mugobeo. Nago homugo me deli sabo aq baso da, deli sao,” Jisasgo te we bidibolo te po wali.

¹⁴Te Farisi bidi hani dabe augwaligo Jisasgo wali po odali. Augwali te mone dali pesa ebo bage bidali. Tama tibaso, Jisasgo agai po obadi yaide, augwaligo bo weyu bidali. ¹⁵Tialima, Jisasgo augwalibolo te po wai, “Dagego homugo we bidi augwaligo dagede e homu yaibao, dage doloba pai bage dao. Tiali goli, God agai dagego homu kolesaga mu konebo dao. Tama we bidigo gedude wiegi yai nai dabe, te nai dabe Godigo gedude meda yai nai naga dao,” Jisasgo te po wali.

¹⁶Te Jisasgo te po me wali, “Te polobadu bidali bidi Moses agai Godigo bomo yai po bukude aṣeansi. Tama Godigo wali po pusa mani bage augwaligo agai wali po me bukude aṣeansi. Tama bidaluama, te po kibu be hauwa bidabo po mu dao. Tama te pogo dage ola mani. Tiali goli, te bidi nogi Jon ame nenama, genuai elama, tama agai Godigo po pusa mabo gagalali. Agai te we bidibolo gesi po dwagi yai po ola mayu, God agai we bidi tonaluyu, augwali aga bomode bidaibao, wali. Tama Jongo te po pusa mabo gagalama, hauwa we bidi Godigo be tomoba pai hagede bomo elama, tomoba pabo dao. ¹⁷Eno te wali goli, te dagalu me, te dagalude bidibo nai dabe me, e tq me, augwali tigidali olo hagawaibao. Tiali goli, Godigo bomo yai po me dwasianunu te munu me olo hagagobeo.”

¹⁸“Niwai bidi aga we sela sənاما, gasa we sobaso da, teda te bidigo penani ebo dao. Me ma, niwai bidi agai te gasa bidigo sela səwai we sobaso da, teda te bidi mego penani ebo dao,” Jisasgo te po wali.

Aga masigi daide bidali bidi me, te nai meni yai bidi me, te bidi side po
(Mat 5:31-32; Mak 10:11-12)

¹⁹Te Jisasgo augwalibolo te po wali, “Polodi te aga masigi daide bidali bidi bidali. Aga ugwa dabede wiegi yai daide bidai. Aga be dwagi yai

bede bidu, te pusu nai me dwagi yai tuyu bidali, tigidali sogo. ²⁰Tama te nai meni yai bidi me bidali, aga nogi Lasarus, te hobedagia bidai bidi. Aga tigide moni hai yai bidi. Te nai meni yai bidi nogi Lasarus gasa bidigo aga pagasa selama, te masigi daide bidali bidigo moni be tu mabo badu te sesegeba dualagasali. ²¹Tede bididubadi, te genuai bidigo tubo nai sesemo dabe, te kagali dabe aga tuyu bidali. Te haego elae gasi bidi bididubadi, te yowi dabe aselama, te keni bole te hamenago awela tudu bidali, tigidali sogo. ²²Tama te tiwai bidama, tama te nai meni yai bidi isali. Te bidi isama, Godigo ensel bidi dabe augwaligo te isai bidi dagaluba tolasa pali, te polobadu bidali genuai bidi Abraham bogo badu bidigi pali, moni da tumainu yali. Te nosali aga masigi daide bidali bidi me te isali. Isama, aga hani bidigo aga pubulali. ²³Aga noma te dene ebo buluba bidigi pali. Tede dene dwasianu meni, moni dene mu eyu bidali. Tama te tiwai bidu, aga gedu ugwaba tonama, Abraham digibulu bidibo suali, te nai meni yai bidi Lasarus aga bogo badu bidibo me suali. ²⁴Tama sulama, agai i weyu, te po wali, ‘Eno aya Abraham, nago ena homu dene eyu, tau mao. Te bidi Lasarus nago tagala palama, agai nogo daniba wę mumainu, te eno hamenaba me yalawai wę muao, eno tigi kedau emainu. Magi baso meni. E siade eno tigi dene genuai mu ebuo,’ te po wali.”

²⁵“Tiali goli, Abrahamgo te po wei ponani, ‘Woo. Eno ogwa, polobadu bidali te kone palao. Nage tqde bidali sogode naga te dwagi yai nai dabe tigidali siyu, e bidi Lasarus aga te dwai nai dabe naga sali. Tiali goli, megi aga ede bugagia bidibao. Nage tede dene mu siyu bidibao. ²⁶Peni me elalubao. Dage bidibo madi me, da si ede bidibo madi me, te si tomode te moni genuai sau pado elalubao. Te moni genuai sau elalubaso, niwai bidi aga edu peyu, nage bidibo madiba sabolabo usu egomeo. Me ma, nago bidibo madide bidibo bidi te da bidibo madi asabo me usu egomeo, te moni sau tomode elalubao,’ wali.”

²⁷“Abrahamgo te po olama, tama te masigi daide bidali bidi agai gela weyu, te po wali, ‘Eno ma bomo elama, nagebolo hanalu obao, te bidi Lasarus eno ayago beba tagala palao. ²⁸Tede eno ama a naga bidibao. Tama te bidi teba pelama, po mobo momainao, augwali e dene sabo buluba asidali,’ wali.”

²⁹“Tiali goli, Abrahamgo po wei ponoyu, te po wali, ‘Woo, te menio. Polobadu Mosesgo bukude aşeani po augwaligo elalubao. Te polobadu bidali bidi dabe me badu, augwaligo Godigo wali po we bidibolo ola mayu, te po bukude aşeani. Te aşeani po me nago ama dedego elalubao, konealubao. Te aşeani po si augwaligo odoyu, bidimainao,’ Abrahamgo te po wali. ³⁰Te aga masigi daide bidali bidi agai te po wali, ‘Eno aya Abraham, te menio, usu egobeo. Tiali goli, te bidi Lasarus te isi bidi bidibo madidu hodaloyu, eno ama dedeba pabo si, teda augwa homu begelama, dwai se tudiba mawaibao,’ te po wali. ³¹Abrahamgo agabolo

po wei ponoyu, e po wali, ‘Mosesgo aşəani po me, te Godigo po ola mani profet bidi dabego polobadu aşəani po me, te po si nago ama dedego odisəbaso da, teda bidi me gụ pagedu hodaloyu, augwaliba pedaluyu, tama ebo si, te usu egobeo, homu begelegobeo,’ Abrahamgo te tama po wali,” Jisasgo wali.

(Mat 18:6-7, 21-22; Mak 9:42)

17 ¹Te Jisasgo aga wali asobo bagebolo te po wali, “Te haniani dwai sę ebo kolesaga mu elalubo. Tiali goli, dwai sę ebo sunumi dayabo bidi nosali moni dene mu saibao. ²Aga te tobage sę eidali weyu, augwaligo aga magede moni masigi bonogo keyu, te bidi te tamu ąi tomoba sayu, aga tede isigi sogo da, teda te usu igi dao. Aga te tiwai isibaso, tama dwasianu dene saibao. Me ma, te bidi bidiyu, agai e nogi meni yai we bidi me deli te dwai sę ebo kolesaga tomoba gegeyu egi sogo da, teda agai te dwai sę mu egi dao. Te dwai sę eyu da, tama nosali Godigo agabolo moni dene mu mawaibao. Duga digi tobade te koneama, tonaluiqo, dwai sę edugio menio, bugagia bidiqo,” wali.

³“Te kisalubo bidi agai nagede dwai sę eboso da, teda nago agabolo ‘Te dwai sę igio’ wao. Tama olama, te dwai sę yali bidi aga homu begelebaso, agai yali dwai sę nago sela sayao. ⁴Tama agai nagede dwai sę elama, tama nosali ‘Te ena nagede dwai sę yalide, te ena hobede ebao’ nageba wagasu da, teda nago aga yali dwai sę sela sayao. Te bidi deli sogode te tiwai sę me badu nogo a naga olama, me badu nogo si eboso da, teda nago aga yali dwai sę tigidali sela sayao, wei ponogio,” Jisasgo te po wali.

⁵Te po sela pabo bidi augwaligo Genuai Bidi Jisasbolo te po wali, “Dena homu kolesaga nageba muani digi, da usube. Da tau sao, dena homu kolesaga tigidali nageba mumainu. Te tiwai munama, te usu yaibao,” te po wali. ⁶Tama te Genuai Bidi Jisas agai augwalibolo te po wali, “Edao. Dagego kolesaga enaba mu dąw wabo sę te dwasianunu kemeni ge tiwai dwasianu elalugi sogo da, teda e gasa nigo dagego wabo po odigi da. Dagego e gasa niба ‘Nage naga pedali dabe tqdu gudama, tama te tamu ąiba pelama, naga digi teba buligi pao’ obaso da, teda te nigo te po odaibao, teba buligi paibao,” wali.

⁷Jisasgo te po me wali, “Dage tomode bidi me deli agai sę ebo bidi elaluyu, tama te sę ebo bidi agai te gi tq elebo sę ebo da, ma te kibu sipsip tonalubo dao. Tama te sę ebo bidi te sę silama, tama beba asobo si, nago agabolo ‘Naga nai polo tuao’ wabo dawey? Menio. ⁸Me ma, nago agabolo te po waibao, ‘Eno tubo nai nogeao. Nai nogeama, tama tubo nai mabo ugwa gulama, tama eno nai ena magasu, tau siyu, tiao. Tama nosali naga nai tuagameo,’ te po waibao. ⁹Te sę ebo bidi agai genuai bidigo nage te sę yao wabo po odoyu, te sę eboso da, te genuai bidi agai

nage usu da wabowe? Meni. ¹⁰Te dage dali yaligama, ‘Te sə yao’ po olama, tama te sə dagego silibo si, te po wao, ‘Da da, sə ebo bage naga dao. Dabolo dage usu da po olamu. Dago nogode muani sə naga dago yalio,’ te po wao,” Jisasgo te po wali.

Jisasgo oyabé gasi sai bidi nogo si sese ma ilali

¹¹Te Jisas te moni taun Jerusalemba pabo ma gagalama, te Samaria tq me, Galili tq me te bulu si tomo te dąjba pali. ¹²Tama aga dwasianu be nani tomoba pai hagede, te oyabé gasi sai bidi nogo sigo aga sunumide suali. Tama te oyabé gasi sai bage digibulu gana dolaluali. ¹³Tede dolalubadi, augwaligo i wali, “Jisas, Genuai Bidi, nago da homu dene eyu, da tau mao,” wali. ¹⁴Tama Jisasgo augwali sulama, tama agai augwalibolo te po wali, “Dage piəo, te pris bidi dabe pageba piəo. Te bageba pelama, duga tigi augwalibolo waseligi piəo,” te po wali. Tama odama, te oyabé gasi sai bidi dabe pabo gagalali. Augwali pebelayu subadi, augwa tigi sese ma yali suali, tomode. ¹⁵Tama augwa tigi sese ma yali sulama, tama bidi me deli aga geasa pelama, i bomona wali, aga Godigo nogi ugwaba siyu, Jisas pageba ma asali. ¹⁶Tama Jisasgo saq pagede aga kidu pogulama, nage usu da weyu, “Nage dwagi yai bidi mu dao,” wali. Te gasi meni yani, sese ma yali bidi da, te Samaria bulu bidi dao, Juda hani isəwai bidi.

¹⁷Te Jisas agai te we bidi dabebolo te po hanalu wali, “Eno te oyabé gasi sai bage nogo si sese ma ilali. Tama te bidi me badu menadewe? ¹⁸E Juda hani isəwai bidi naga agaduba geasa aselama, Godibolo nage usu dao wagasali. Te eno sese ma ilali Juda dabe augwali magi baso nage usu da wagasobewe?” ¹⁹Tama Jisasgo te nage usu dao wagasali bidibolo te po wali, “Nago naga homu kolesaga tigidali enaba mubaso, teda nago tigi sese ma yali dao. Tama tibaso, hodaloyu, naga beba pao,” wali.

Godigo we bidi tonalubo sogo asaibao

(Mat 24:23-28, 37-41)

²⁰Te Farisi hani bidi me badu augwaligo Jisas hanalu weyu, te po wali, “Te Godigo we bidi tonalubo sogo nisu asogowe?” wali. Tama Jisasgo te po wei ponani, “Te Godigo we bidi tonalubo sogo asobo sunumi te bidigo polo konegobeo, bidigo gedugo susiəbo nai dao. ²¹Godigo we bidi tonalubo sə dage tomode pedalubo te gagalai dao. Tama bidi dabe augwaligo ‘Ede pedelali’ ma ‘Ude pedelali’ po wagomeo,” Jisasgo te po wali.

²²Te Jisasgo aga wali asobo bidi dabebolo te po wai, “Ena da Godigo Bidi Mu da. Te nosali sogode dagego ena deli sogo ma sue hagede, tiali goli dagego ena sugobeo. ²³Tama bidi dabe augwaligo geda muyu, dagebolo ‘Aga ede bidibao’ ma ‘Aga ude bidibao’ po augwaligo waibao. Tama dage

augwali wali pigimio, sugi pigimio. Augwaligo wabo po odogimio. Dage kone dao.²⁴ Te be sele eyu, te dagalude moni ula eyu ebo dao. Tama te tiwai Godigo Bidi Mu ma asobo sogo hania te tiwai yaibao,” wali.

²⁵ “Tiali goli, hasia ena e tōde bidibadi, te megi bidibo we bidi augwaligo enabolo dene hauwa menama, ena sela sāwaibao, tudiba muaibao.²⁶ Ena da Godigo Bidi Mu dao. Tama ena pelama, tama ma asobo sogode, te tōde bidibido we bidi augwali te polobadu bidali bidi Noa aga tōde bidali sogo bidali we bidigo yali sē tiwai yaibao.^b ²⁷ We bidi dabe augwaligo te sogo God homu isayu, nai tuyu, wē ma tuyu, bidali. Augwa we keyu, we ma mayu, bidali. Tama augwali te tiwai bidibadi yaide, te bidi Noa te moni geba tomoba peyu, tama te moni aji polo asiyu, te wēgo te we bidi tigidali eleyu yali.^c ²⁸ Ena e tōba ma asobo si, te polobadu bidali bidi me aga nogi Lot, aga tōde bidali sogo me tiwai yaibao. We bidi augwaligo God homu isayu, nai tuyu, wē dabe tuyu, bidali. Augwaligo haniani nai dobuyu, gide haniani nai buluyu, be dabe sē eyu, bidali. Augwaligo God tama homu isayu, bidali.²⁹ Tiali goli, te bidi Lot aga te be nani nogi Sodom taga pabo sogode, te moni sia dabe me, bogoli ebo posolo masigi dabe me, dagaludu tulali, te Sodom bulu we bidi tigidali ela muani.^d ³⁰ Te tiwai pedelaibao, nosali, ena e tōba ma asobo sogode.^e ³¹ Tama te sogode niwai bidi aga be pedude bidiyu, agai doado bage be tomodé munalubaso, tama aga sai hagede aba tōba dulama, be tomoba pelamuo. Me ma, aga gide bidibo bidi me, aga bede muani doado bage sai hagede ma geasa pelamuo.³² Te polobadu bidali bidi Lot aga we, tede koneao, te yaligia yabuo. Te we aga beba ma tonaluyu, isali.”

³³ “Niwai bidi aga e tōde bidibido sogo aga tobade aga digi sese yai da homu eyu da, teda dowaiabao. Me ma, niwai bidi ena tobade aga tōde bidibido sogo sia sobaso da, teda nosali ma bidaibao.³⁴ Eno dagebolo obao, te Godigo tagala palai bidi ma asobo sogo hulide te bidi si be saide pila mubadi yaide, me naga oda siyu, me naga tagalaibao, te ensel dabe augwaligo.³⁵ Te sogo ulade me, we si tubo nai sisilubadi yaide, me naga oda siyu, me tagalaibao,” Jisasgo te po wali.³⁶ [“Bidi si gide bididubadi yaide, me naga oda siyu, me tagalaibao,” Jisasgo te po wali.] ³⁷ Tama Jisasgo aga wali po simanama, aga wali asobo bagego aga hanalu wali, “Genuai Bidi, te sē yaibao wali menade yaibawe?” wali. Jisasgo augwalibolo te po begelai po weyu, te po wali, “Te ba kemodage dabe augwali te isali tigi munalubo madiba sisinaibao,” wali.

**Te wilawe we dali, po tū dodolobo bidi dali
po begelama wali po Jisasgo pusali**

18 ¹ Te Jisasgo aga wali asobo we bidibolo po begelai po me pusali.
“Dagego sesemane sogo Godibolo gedu haluasa po weyu, nono

^b 17:26 Gag 6:5-8 ^c 17:27 Gag 7:6-24 ^d 17:29 Gag 18:20-19:25 ^e 17:30 Ena da Godigo Bidi Mu dao.

meniamā, tagalidali weyu, eno e po begelai po dagebolo pusubao,” wali.

²Jisasgo te po wali, “Te be nani mede te po tū dodolobo bidi me deli bidali. Te bidigo Godide wi isayu, we bidide me wi isayu bidali. ³Tama te be nanide te bidi isai wilawe we me deli bidali. Tama te wilawe we te po tū dodolobo bidi pageba asidu geali. Asiyu, ‘Nago eno po tū odao, eno boi bidigo po aiyaba elaluaibao,’ te po wagasidu geali. ⁴Tama te po tū dodolobo bidi hauwa sogo te wilawe wego wali pode ‘Menio’ wedu gebadi yali. Tiali goli, nosali aga homu begeleyu, aga homugo koneama, te po wali, ‘Eno God me, bidi me wi isabadi goli, ⁵e we hauwa sogo asidu gebaso, eno aga po tū odama, tau mawaibao. Eno aga tau magi menigi sogo da, teda aga sesemane sogo asiyu, eno bomo sia sagi dao,’ te homu yali,” Jisasgo te po wali.

⁶Tama Genuai Bidi Jisasgo te po wali, “Dagego te gagea pai po tū dodolobo bidigo wali po odioq. ⁷Te God aga sa muani we bidi augwaligo ulade me, hulide me aga hanalu wabo si, te God agai augwali tau magowe, ma magobewe? Agai bobenu bidama, tau sogowe? ⁸Eno dagebolo obao, menio, augwaligo hanalu wabo po agai odoyu, tama te tau sabo bodolu asobo si, agai tau mawaibao. Tiali goli, ena Godigo Bidi Mu ena e tōba ma asobo si, enaba homu kolesaga mani we bidi eno sugowe?” Jisasgo te po wali.

**Te Farisi hani bidi dali, takis sabo bidi dali
sigo po Jisasgo begelama pusali,**

⁹Te Jisas agai po begelai po me pusali. Te we bidi me badu augwaligo te tiwai homu yali, ‘Da naga doloba pai we bidi mu dao. Tiali goli, gasa we bidi tigidali te dwai we bidi dao,’ augwaligo te homu yali. Tama te homu yali we bidibolo Jisasgo e po begelai po pusali. ¹⁰Agai te po wali, “Te bidi si te Moni Lotu Be tempel be tomoba pali, Godibolo augwa po omainu yai. Te bidi me te Farisi hani bidi da. Bidi me, te gavman takis sabo bidi dao. ¹¹Tama te Farisi hani bidi doligulama, aga homu tomode te po wali, ‘O God, ena da te gasa bidi dabe tiwai meni baso, eno nagebolo nage usu dao obao. Gasa bage augwaligo doado bage pesa ebo dao. Augwaligo te gavmanigo bomo yai po sela səbø dao. Augwaligo penani ebo dao. Ena da u takis sabo bidi tiwai meni baso, eno nagebolo nage usu dao obao. ¹²Te Sarere deli tomode si sogo ena tubo nai gisilibo dao. Tama eno doado bage nogo si selama, te me deli nagebolo mabo dao, me badu nogo a olama, me badu nogo me si me si ena sabo dac,’ te Farisi hani bidigo te po wali.”

¹³“Tiali goli, te gavman takis sabo bidi digibulu uba doligi pelama, tama aga gedugo dagaluba ogwaba tonalubeo. Ena dwai dwai sə yalio te homu eyu, homu dene eyu, aga hagawiaba nogogo eledu bidali. Agai te po wali, ‘God, enade homu dene eyu, tau mao. Ena dwai dwai sə ebo

bidi dao,’ te po wali. ¹⁴Eno dagebolo obao, e bidi aga beba ma peyu, Godigo aga yali dwai sə sel a səwai bidi dao. U Farisi hani bidi te tiwai menio. Mena bidigo te aga nogi me ugwaba sobaso, Godigo te bidi aiyaba elaluabao. Ma, mena bidi imilasa bidibaso, teda Godigo te bidigo nogi ugwaba saibao,” Jisasgo te po wali.

Jisasgo te wai pulubabolo bugagia bidabo po te wali dao
(Mat 19:13-15; Mak 10:13-16)

¹⁵Te we bidi augwa wai puluba Jisas pageba magasali. Augwaligo agabolo te po wai hagede, ‘Nago nogo e wai puluba tobolude munama, bugagia bidabo po wao.’ Tiali goli, te Jisas wali pabo bagego te wai puluba dabe sel a asobo sulama, tama te we bidibolo “Te sə ebo tagalao” po wali. ¹⁶Tiali goli, Jisasgo te wai puluba aga pageba i wali, te aga wali pabo bidi dabebolo te po wai, “Te wai puluba enaba asomainao. Tagala wagio. Eno wabo po e wai pulubago odalio. Te baso augwaligo ena tia sali. Tama te tobage homu ebo we bidi augwali Godigo we bidi tonalubo madigi tomoba asagameo. Konealua. ¹⁷Ogwa dali wegi dali augwaligo Godigo wabo po odama, tia sali. Tama te tobage homu isawai we bidi augwali Godigo we bidi tonalubo madigi tomoba pogobeo,” Jisasgo te po wai.

Masigi daide bidibo bidide po
(Mat 19:16-30; Mak 10:17-31)

¹⁸Te Juda dabe tomode bidai nogi yai bidi me Jisas pageba asali. Agai Jisas hanalu wali, “Po ola mabo dwagi yai bidi, eno mena sə eboso, ena tigidali sogo bidibo ula selama bidaibawe, ma gamonabo ula selama, bidda paibawe?” wali. ¹⁹Tama Jisasgo te bidigo po wei ponoyu, te po hanalu wali, “Enabolo magi baso dwagi yai bidi waliwe? Te dwagi yai bidi me menio. Te God deli naga te dwagi yai bidi dao. ²⁰Nago te Godigo mani bomo yai po koneani. Te bomo yai po te da, penani sə egio, bidi ela mugio, bidi nai wi sigio, tibo po wagio, naga aya ida nogi ugwaba sao,” Jisasgo te po wali.^f ²¹Tama te nogi yai bidigo te po wei ponani, “Ao, ena gesi ogwade bidibadi, te bomo yai po te eno wali pabo gagalali. Tama wali pelama, meg i tama te pode me bidibao,” wali. ²²Te Jisasgo te bidigo wali po odama, tama agabolo te po wali, “Magi nai me deli elalubuo, te sə nago ebeo. Nago beba pelama, naga doado bage tigidali selama, maketba munama, tama gasa bidi dabego abelaibao. Tama te doado bagede sali mone sobaso, te nai meni yai we bidi dobayao. Nago te sə eboso, Godigo bidibo madide nago doado bage hauwa mu elaluabao, nosali. Tama nago te sə elama, nage ena wali asao,” Jisasgo te po wali. ²³Tiali goli, te nogi

^f 18:20 Sai 20:12-16; Bom 5:16-20

yai bidi agai Jisasgo wali po odama, aga homu sęge mu yali. Magi baso meni. Agai sibage me, doado bage me, kisu delalubo, te nai tagalogobeo.

²⁴Tama Jisasgo te bidi aga homu sęge mu ebo suyu, te po wali, “Te walu hauwa munalubo we bidi, sibage hauwa munalubo bidi, augwali Godigo bomo tomoba pai hagede, te moni sinabo sę mu yaibao, tabiaibao. ²⁵Te moni kibu kamel te ugwa hobolobo medabu agabele tomodu dula pabo si, teda sinabo sę eyu, tabigobeo, te masigi hauwa kisu munalubo bidi Godigo bomo tomo dologoba dula pai hagede, moni sę mu yaibao, tabiaibao,” Jisasgo te po wali.

²⁶Jisasgo wali po odali we bidi noma siyu, augwaligo aga hanalu, te po wali, “Tama tibaso, Godigo mena we bidi ma dobola somainogo usu yaibawe?” ²⁷Jisasgo te po wei ponani, “Te sę ebo, bidigo te sę yabo usu egobeo, te Godigo te sę ebo usu yaibao.” ²⁸Tama te bidi nogi Pita agai Jisasbolo te po wali, “Suao. Dago be dabe tagalama, nage wali asobao,” wali. ²⁹“Ao,” Jisasgo wali, “tama eno dagebolo e po obao, bidi mego aga be dabe, aga we, aga ama dede, aga ida aya, aga wai puluba tagalama, Godigo we bidi tonalubo sę tobade, ³⁰tama te bidigo te tagalali nai genuai mu ma saibao, e tqde bidibo sogode. Agai nosali sabo nai te polobadu tagalali nai te edelaibao. Tama nosali aga bida bida paibao, gamonaibao,” Jisasgo te po wali.

Jisasgo aga isabo sogo po sela sogo wali
(Mat 20:17-19; Mak 10:32-34)

³¹Te Jisasgo aga wali asobo bidi nogo si olama, saçq me badu si selama, augwali te we bidi tagalama, augwa tedali bidali. Agai augwalibolo te po wali, “Edao. Da Jerusalem be naniba pobao. Tama da tede bidibadi, te polobadu bidai bidi dabego enade aşənai po mu po pedelaibao. Ena da Godigo Bidi Mu dao. Augwaligo te Godigo enade wali po aşənai, te po mu po pedelaibao, Jerusalem be nanide. ³²Te Juda dabe augwaligo ena te Juda hani isławai bagego nogoba mawaibao. Tama menama, te Juda hani isławai bagego enabolo usu saibao, dwai po weyu, ena tigiba pesa səwaibao. ³³Augwaligo kibu wali bigo ena tudi badu elaibao. Tama augwaligo ena ela muaibao. Tiali goli, giliga sela sogo elama, ena ma hodaluibaibao, bidaibao,” Jisasgo te po wali.

³⁴Jisasgo te po olama, aga wali asobo bidi augwaligo te po page gisiga konebeo. Te po page geme dualali, tama Jisasgo magi naibolo waliwe augwaligo konebe.

Jisasgo gedu widai bidi gedu pedelama usu ma ilali
(Mat 20:29-34; Mak 10:46-52)

³⁵Te Jisas tıdu pobadi yaide, te dwasianu taun nogi Jeriko te pąba sabolama, te gedu widai bidi deli te tı sesegede dulaluyu, masigi gonodu

bidali. ³⁶Tama te gedu widai bidi agai te we bidi hauwa ela soabo u wabo odama, te po hanalu wali, “Magi ebawe?” wali. ³⁷Tama augwaligo agabolo wali, “Te Nasaret bulu bidi nogi Jisas ela sobao,” wali. ³⁸Te gedu widai bidigo i wali, “Jisas, te polobadu nogi yai bidi Devitgo Ogwa. Nage enade homu dene eyu, tau mao,” wali. ³⁹Te polalubo bidi dabe augwaligo agabolo “Te po tagalao, sagia sao,” wali. Tiali goli, agai bomonama ma i wali, “Devitgo Ogwa, enade homu dene eyu, tau mao.” ⁴⁰Tama tibaso, Jisas bilibo tagalali. “Te gedu widai bidi nogo tolasa asao,” wali. Tama te gedu widai bidi Jisas paba asama, tama Jisasgo hanalu wali, “Nage eno magi se emainuwe?” ⁴¹Te gedu widai bidigo po wei ponani, “Genuai Bidi, nago eno gedu ma dodolobaso, te eno gedu ma bulu ula bolo ma sueibao,” wali. ⁴²Tama Jisasgo te po wali, “Suao. Nago enade tia sobaso, nago gedu dwagi yai ma ilai dao,” wali. ⁴³Polo te bidigo gedu si dwagi yai ma pedelalio. Agai Godigo nogi ogwaba siyu, Jisas wali pabo gagalali. Tama te we bidi augwaligo Jisasgo agade yali se sulama, tama augwaligo me Godigo nogi ogwaba sali.

Te Jisas dali, Sakius dali si po

19 ¹Te Jisas te be nani nogi Jerikoba sabolama, tama tomoba pai, te be nani ela pomainu yali. ²Te be nanide bidali bidi me agai nogi Sakius. Agai mone sabo se te Rom gavman takis sabo se yai. Tama aga te takis sabo bagego polalubo bidi dao, agai mone me doado bage me kisu delalubo. ³Tama te bidi Sakius te Jisas asobo po odama, agai homu Jisas eno sueibao. Tiali goli te bidi Sakius te pewadage bidi yai elalubaso, Jisas te agai subeo. Magi basowe? Te we bidi hauwa ugwanu polasa dolalubaso, te sesela salio, tama Sakius agai Jisas subo usube. ⁴Tama tibaso, Sakius polo udalama, pelama, polo te ni me deliba pai. Agai homu, ena e ni holama, te Jisas e ni paba asobaso, eno aga sueibao. ⁵Tama Jisas te ni paba sabolama, ni sigiba ogwa tonali, Sakius suali. Jisasgo te po wali, “Sakius, nage polo dulao. Megi da si nago beba pinao, tede bidaibao,” wali. ⁶Tama te po baso, Sakius polo dulali. Dwagi yai homu mu eyu, te Jisas agai beba odasa peyu, geseyu yai.

⁷Te we bidi augwaligo te sulama, tama hagelabo po weyu, te po wali, “Jisas te dwai se ebo bidigo beba nai tugi pali.” ⁸Tama Sakius doligulama, agai te Genuai Bidi Jisasbolo te po wai, “Genuai Bidi, suao. Eno masigi dabe, doado bage tigidali si bugwaibao. Si bugulama, nai meni yai we bidi dobawaibao. Tama bidi mebolo eno ili po olama, agai nai wi sali da, tama megis te nai eno me si me si elama, wei ponaibao,” wali.

⁹Te Jisasgo te bidi Sakiusgo wali po odama, tama Jisasgo te po wali, “Megi tama Godigo e bede bidibo we bidi tau mayu, ma sali. Magi baso meni. E bidi da te polobadu bidali nogi yai bidi Abrahamgo ogwa mu

dao. Polobadu Abrahamgo Godigo wali po odama, agai mu koneani, tia sali. Megi me, eno wali po odama, nago mu konealualio, tia sali.¹⁰ Ena Godigo Bidi Mu da, tama Godigo ena tagala palobaso, ena asali. Te olo hagawai we bidi eno gegi asai, te eno augwali tau mayu, ma somainu ebao,” Jisasgo te po wai.

Nogo si sę ebo bidi dabebolo mone ge dobayali po digi po
(Mat 25:14-30)

¹¹ Te we bidi augwaligo Jisasgo wabo po odobadi, agai gasa po me augwalibolo pusali, te po digi po. Tama Jisas te be nani nogi Jerusalem pąba sabalobaso, tama augwaligo geda muyu, te homu yali, Jisas te Jerusalem be naniba sabalobo si, Godigo we bidi tonalubo sę tamadi tama gagalaibao, augwaligo te homu yali. ¹² Tama tibaso, Jisasgo augwalibolo e po digi po pusali, agai te po wai, “Te nogi yai bidi me deli digibulu gasa buluba osogo pai hagede. Tama tede bidibadi, te gavman genuai polalubo bidigo aga te aga bulu genuai gavman bidi nigilaibao. Tama nigilama, aga page buluba ma bidagasaibao. ¹³ Tama te bidi aga pisəbadi, agai sę ebo bage nogo si i olama, augwali deli delibolo mone ni yabe nogo si mawai. Agai augwalibolo te po wai, “Te ena gasa digibulu bulude bidibadi, dagego te mone sabo sę yao, eno mawai masigigo tama tiao, tama nosali eno masigi hauwa ma saibao,’ te po wai. ¹⁴ Tama te po olama, tama te digibulu gasa buluba pabo gagalali. Tiali goli, te genuai bidi dologode bidaibao wabo bagego bidi me badu tagala palu, te po wai, ‘Dagego te gavman genuai polalubo bidibolo te po wao, “E bidi dago buludu asai bidi, da tonalubo bidi nigibo hagelabo” wao,’ te po wali.”

¹⁵ “Tiali goli, te bidi digibulu buluba sabolama, te genuai polalubo bidigo aga genuai gavman bidi nigali. Tama agai gavman sę ebo bomo selama, aga buluba ma pali. Teba sabolama, agai polobadu masigi menama sę yali bidi dabe i wali, augwaligo gasa masigi nisu naga sali te suai hagede. ¹⁶ Te hasia asai bidi aga pageba asama, te po wai, ‘Genuai bidi, nago enabolo mani ni yabego te eno sę ma elama, te 200 kina ma ugwadu daganabo profet mone salio,’ te po wali. ¹⁷ Tama te genuai bidigo agabolo te po wei ponani, ‘Nage dwagi yai sę ebo bidi dao. Nago te sę bugagia yalio. Eno nago nogode te dwasianu mone menama, tama nago te dwasianu naigo bugagia tonalubo sę ebo bidi mu dao, te eno koneanio. Tama tibaso, megı te be nani nogo si tonalubo bomo eno nagebolo mobao,’ te po wai. ¹⁸ Tama i badu sę ebo bidi aselama, te po wai, ‘Genuai bidi, nago enabolo mani monego te sę ma elama, te eno mone te 100 kina sai dao,’ wali. ¹⁹ Tama te genuai bidigo agabolo te po wai, ‘Nago me te be nani a naga te nago tonaluao.’”

²⁰ “Te nosali bidi asiyu, te po wai, ‘Genuai bidi, nago enabolo mani mone e dao. E masigi eno ugwade tomogolama, bugagia muani. Magi

baso meni. ²¹ Eno nagede wi yalio. Nage da, homu sesena pabo bidi dao. Te gasa bidi dabego munalubo nai, te nago sabo dao. Naga gide nai bulisäma, te gasa bidigo gide bulali nai sabo bidi dao,’ wali. ²² Te genuai bidigo agabolo po wei ponoyu, te po wai, ‘Nage dwai s̄e ebo bidi, nago megi wali pogo eno nage aiyaba elaluabao. Ena da homu sesena pabo bidi dao, nago koneani. Gide nai bulisäma, eno te tubo nai naga sabo bidi dao, te me nago koneani. Gide nai bulisäma, ena tubo nai sabo bidi dao, te me nago koneani. ²³ Nago koneani, ena te tiwai bidi yaibaso, te nago eno masigi te benkde magi baso mubewe? Nage eno masigi te benkde mugi sogo da, teda ena ma asali sogode ena gasa masigi me badu ma sigi da,’ wali.’

²⁴ “Tama te genuai bidigo tede dolalubo bagebolo te po wai, ‘Te ni yabe nogo si masigi selama, te u bidi mao, te masigi bidi sese a naga 200 kina sali bidibolo mao,’ wali ²⁵ Tama tede dolalubo bagego te po wai, ‘Genuai bidi, te bidi agai bidi sese nogo a naga 200 kina polo sai dao,’ wai. ²⁶ Te genuai bidigo te po wali, ‘Eno dagebolo obao, te nai elalubo bidi agai nai me saibao. Tiali goli, te dwasianu nai elalubo bidigo nai gasa bidigo saibao. ²⁷ Tama eno boi bidi odasa asao. Augwali ena dologode bidibo hagelabo wali. Tama te bage odasa asao, eno gabidide hwägo ela muao,’ te genuai bidigo te po wali,” Jisasgo te po wai dao.

Jisas te Jerusalem be nani tomoba pali
(Mat 21:1-11; Mak 11:1-11; Jon 12:12-19)

²⁸ Te Jisas agai po ola mena silama, tama agai te Jeriko be nani tagalali. Te aga te we bidi polasa peyu, Jerusalem moni taunba pabo ma gagalali, ogwaba. ²⁹ Tama pelama, tama te dwasianu be nani si p̄aba sabolali. Be nani me nogi Betfage, te be nani me nogi Betani, te si p̄aba sabolali. Tama sabolama, augwali te bulu du nogi Oliv te bulu duba sabolali. Teba sabolama, tama Jisasgo bidi si i wali, augwali si tagala palama pomainu yali. ³⁰ Augwali sibolo te po wali, “U be naniba pao. Tama te be nani tomoba pelama, tede dage sigo kibu donki wai sueibao, page bidigo haliga gebelalio. Te gesi donki wai te bidi munu me duasiäwai donki dao. Te donki wai gebelalii haliga pisigina sayao, ena pageba sesao. ³¹ Bidi mego dage sibolo dage te donki wai magi baso bono pisigawaniwe te po obaso, agabolo te po wei ponao, ‘Te Genuai Bidigo te donki waide s̄e elalubo,’ te po wao,” Jisasgo te po wai.

³² Tama tibaso, te tagala palai bidi si u be naniba pelama, Jisasgo wali po mu salio, augwali sigo te donki wai suali. ³³ Tama te bidi sigo aga gebelalii haliga pisigabadi, te donki wai page bidi dabego hanalu wali, “Dage sigo te hos wai magi baso pisigabawé?” ³⁴ Tama augwali sigo te po wei ponani, “Te Genuai Bidigo te donkide s̄e elalubuo,” wali. ³⁵ Tama augwali sigo te kibu donki wai Jisas magasali. Augwa holobo ugwa dabe

dilama, donki wai tudide pasugulali. Tama munama, augwaligo Jisas tau selama, te tudide dualai. ³⁶Tama Jisas te tiwai pobadi, te we bidi aga soabo sunumi au iliyu, augwa holobo ugwa dabe te pabo gesabi badu tude dodolama, muani. Magi basowe? Genuai bidi asobaso tama muani.

³⁷Te Jisas te Jerusalem be nani paba sabolali, te bulu du nogi Oliv a odogoba pabo gagalali. Tama teba pobadi, aga wali asobo we bidi hauwa mu tigidali augwali dwagi yai homu mu eyu, bomonama i weyu, Godigo nogi ugwaba siyu yali. Augwaligo Jisasgo polobadu yali bomai se subaso, Godigo nogi ugwaba sali. ³⁸Augwali e tobage po wali, “Dago te genuai bidigo nogi ugwaba mu sobao. Aga te Godigo nogide asali bidi dao. Dago homugo dagalude boi pibo sogo asomainao. Dago Godigo nogi ugwaba mu sinao,” augwaligo te tobage po wali.

³⁹Te we bidi tomode te Farisi bidi dabe me badu bidali. Tama augwaligo Jisasbolo te po wali, “Po ola mabo bidi, te nage wali asobo bidi dabebolo ‘Te po tagalama, sagia sao’ wao,” wali. ⁴⁰Jisasgo te po wei ponani, “Eno dagebolo obao, e we bidigo sagia sobaso, teda e masigi dabego te tobage po wabo gagalaibao, Godigo nogi ugwaba saibao,” wali.

⁴¹Te Jisas te Jerusalem moni be nani paba asiyu, te be nani suyu, agai te be nanide bidibo we bidide homu dene eyu, gela wali. ⁴²Agai te po wali, “Ena wali asobo we bidi dabe augwaligo te boi pibo sunumi konebao. Megi eno homugo boi pibo te page Jerusalem bage dagego megikoneaibao. Tiali goli, te page God agai geme dualali, dagego sube. ⁴³Nosali te dwai bidibadi te asaibao. Boi bidi dabe augwaligo e be nani bobegelaibao, dage wi pidali weyu. Augwaligo te be nani moni obode te tq hauwa diganama, te tq hobolu badu dagana saibao. Tigidali badu bobegelaibao. ⁴⁴Augwaligo dage Jerusalem dabe ela silaibao, te be dabe tigidali augwaligo mu hugiaibao. Be nigali masigi me deli ugwdau me munalugobeo, tigidali pepedelama, aba sawaibao, meba me tedali, tedali, besala paibao. Magi baso te se yaibawe? Woo, te Godigo dage suagasau tau sabo sogo asali side te dagego konebeo,” Jisasgo te po wai.

Jisas te Moni Lotu Be tempelba pai
(Mat 21:12-17; Mak 11:15-19; Jon 2:13-22)

⁴⁵Te Jerusalem be nani tomoba pelama, Jisas te Moni Lotu Be tempel teba pali. Teba sabolama, te lotu be tomoba peyu, te maket tiwai nai dabe te tempel be tomode mudualu bidi dabe agai buluba ela gudulu sela sabo gagalali. ⁴⁶Agai te bidi dabe sela sabadi, te po wali, “Te bukude te Godigo wali po tede noma muanio, te asəani po me deli e dao, ‘Eno be te we bidi enabolo gedu haluasa po wabo be elaluabao,’ te po polobadu asəani. Tiali goli, dagego e be te nai wi sabo bagego geme dualubo ola be tiwai nigilalio,” Jisasgo te po wai.^g

^g 19:46 Ais 56:7; Jer 7:11

⁴⁷Te Jisas agai te s̄e yali. Te deli deli sogo agai te we bidi dabebolo ola mani po wali, te Moni Lotu Be tempel tomode. Tama te pris tuni bidi dabe me, te Godigo polobadu wali po koneani bage me, augwaligo Jisas elabo t̄u gegali. Te Juda dabe tuni bidi dabe me, augwaligo Jisas elabo t̄u gegebo gagalali. ⁴⁸Tiali goli, te Jisas elabo t̄u augwaligo sube. Magi baso meni. Te we bidi tigidaligo bomo mu elama, Jisasgo wabo po odai hagede.

(Mat 21:23-27; Mak 11:27-33)

20 ¹Te me sogo Jisas te Moni Lotu Be tempel tomode bidu, agai te we bidi ola mayu, augwalibolo Godigo dwagi yai po pusadio. Tama agai te po pusabadi, te pris tuni bidi dabe me, te Godigo polobadu wali po page koneani bage me, augwali agaba asali. Te Juda dabe genuai bage me asali. ²Tama aselama, augwaligo agabolo te po hanalu wali, “Nago mena bomogo naga te do yali s̄e yaliwe? Te s̄e dego nago nogode maniwe?” augwaligo te po hanalu wali. ³⁻⁴Tama Jisasgo augwalibolo te po wai, “Ena me dagebolo po me deli hanalu waibao. Te bidi nogi Jon, agai te we bidi baptais mani. Dego te bidi Jon te s̄eba tagala palaliwe, te Godigo tagala palaliwe, ma dego te s̄eba tagala palaliwe? Dagego ena wei ponao,” wali. ⁵Augwa hasi te po miyu, te po wai, “Te dago ‘Godigo Jon te s̄eba tagala palali’ po obaso, teda Jisasgo dabolo te po hanalu waibao, ‘Dage Jongo wali po magi baso gisiga odobewe?’ ⁶Tiali goli, dago ‘Woo, Jon aga homugo te baptais mabo s̄e sali’ obaso, teda e we bidi tigidaligo masigi s̄ayu, da ela muuibao. Augwaligo homu te bidi Jon da Godigo tagala palali bidi mu dao,” augwa hasi augwaligo te po wai. ⁷Tama tibaso, augwaligo Jisasbolo te po wai, “Dego te bidi Jon aga s̄eba tagala palaliwe, te dago konebeo,” wali. ⁸Tama Jisasgo augwalibolo te po wai, “Eno hanalu wali po dagego wei ponosiaboso, teda dagego enabolo hanalu wali po me eno wei ponogobeo. E s̄e eno nogode muani bidi nogi dagebolo eno wagobeo,” Jisasgo te po wali.

Bono du gi po digi po
(Mat 21:33-46; Mak 12:1-12)

⁹Te Jisasgo te Juda dabe tuni bidi dabebolo agai wabo po silama, tama agai te olo we bidi dabebolo te bono du gi po digi po pusali. Agai te po wai, “Bidi mego bono du gi bulali. Tama aga te bono du gi te s̄e ebo dabego nogoba osogo muani, augwaligo te gi tonalumainu, te augwaligo masigi sabo s̄e dao. Tama elama, aga te gasa digibulu buluba bidigi pali, tede hauwa sogo bidai hagede. ¹⁰Tama nosali, te bono du dabe tau ebo sogode, te gi page bidigo aga s̄e ebo bidi deli i wali, tagala pomainu. Agai te bidibolo te po wali, ‘Nage pao, te eno bono du gi tonalubo bagebolo te po wao, “Te bono dude sai masigi me badu mao, ena te gi page bidibolo

magi paibao." Te po wao.' Tama te sę ebo bidi pelama, te giba sabolama, te gi page bidigo wali po pusali. Tiali goli, te gi tonalubo bidi dabe augwaligo masigi mabe. Augwaligo aga wąbigo elama, buluba sela sęy yali."

¹¹ "Te nosali te gi page bidi agai sę ebo bidi me deli tagala palali, te digibulu giba. Te bidi me te gi tonalubo bagego wąbigo elali. Augwaligo te bidi hale yabo po weyu, buluba sela sęy yali, masigi mabe. ¹² Tama nosali sela sogo weyu, aga sę ebo bidi tagala palali. Te bidi augwaligo elali, elali digi du yai. Tama te bidi me augwaligo buluba sela sęwai.

¹³ Te sę yali po odama, te gi page bidigo te homu yali, 'Ena mena sę yaibawe? E, ena eno dwagi yai homu ebo ogwa mu te tagala palaibao. Te gi tonalubo bagego agai po sela sęgobeo, bugagia odaibao,' te homu yali. ¹⁴ Tiali goli, meni. Te ogwa te digibulu giba sabolama, tama te gi tonalubo bagego aga sulama, augwa hasi te po wali, 'Aga aya isibo si, e bidigo te gi mu saibao. Tama tibaso, dago aga ela muinao. Nosali aga aya isibaso, teda dago te gi mu saibao,' te po wali. ¹⁵ Tama olama, augwaligo te gi page bidigo ogwa bono du gi bulu badu sęwai, tede ela muani.

Tama, dagego homu te gi page bidigo te bagebolo mena sę egowe? ¹⁶ Aga te giba asiyu, te gi tonalubo bage agai ela muyu, te gi te gasa bidi dabego nogoba muaibao, "Jisasgo te po wali. Tama agai wali po odali we bidigo te po wai, "Daba te sęgę maiabuo." ¹⁷ Tiali goli, Jisasgo augwali gedu bomonama tonaluyu, te po wali, "Godigo wali po bukude e po wabo da,

'Te be sę ebo bagego polobadu sela sęwani masigi, te
masigi nosali te be tolalubo masigi nigali.'

¹⁸ Te po page da, te ena te masigi dao. Tama eno dagebolo obao, niwai bidi te masigiba tulolubaso, aga tigi dwasianu gagawaibao. Me ma, te masigi bidiba tulolubaso, aga tigi mia paibao," Jisasgo te po wali.

¹⁹ Te Godigo polobadu wali po page koneani bidi dabe me, te pris toboli bidi dabe me, augwaligo suali, Jisas agai po digi po augwalibolo bomo yai naga walio, augwali aiyaba elalumainu. Tama tibaso, augwaligo te homu yai, "Megi tama dago e bidi Jisas nogo si duwaibao." Tiali goli, tuni bidi augwaligo te we bidide wi baso, augwaligo aga nogo si dube.

Takis mabo po

(Mat 22:15-22; Mak 12:13-17)

²⁰ Te genuai tuni bidi pris hani bage, me te bomai po page koneai bidi dabe augwaligo Jisas nogo si duşıabaso, augwaligo aga te moni gavman toboli bidigo nogode muai hagede, te gavman bidi bomo hauwa mu elalubo bidi dao, we bidi tigidali tonalubo bidi dao. Te Jisas te bidigo nogode maiabo tų augwaligo gegali. Te sę eyu, augwaligo sa pabo bidi dabe Jisasba tagala palali. Tama Jisasba aselama, augwaligo agabolo tibo

muma sabo abagi po weyu, agai wabo po odai hagede asobo bidi tiwai asali. Jisas agai pode geda mubaso, augwaligo aga nogo si dñwaibao. ²¹Tama augwaligo agabolo tibo po weyu, te po wali, “Po ola mabo bidi, te nago naga ola mabo po dolo yai po mu naga wabo dao. Nago homude tigidali we bidi usu si dao. Nago homude bidi me ugwaba me diq holobo menio, bidi me aiyaba me elalugobe, tigidali we bidigo kolesaga te deli tama dao. Godigo bomo yai po nago te we bidibolo dolo mu ola mabo dao. ²²Te moni Rom gavman toboli budi Sisar, dago te bidibolo te takis moni mabo s̄e, te s̄e dwagi yai s̄e dawe, ma dwai s̄e dawe?” te po augwaligo hanalu wali.

²³Tiali goli, Jisasgo augwaligo tibo po nigibo s̄e ebo homu agai polo koneani. ²⁴Agai augwalibolo te po wai, “Te takis abelabo masigi enabolo waselao, eno sueio. Te masigide dego noma elalubowe? Mena bidigo po tede aṣeansiwe?” te po hanalu wali. Tama te sa pabo dabego te po wali, “Te gavman toboli budi Sisar agai noma te takis abelabo masigi daide elalubo, agai wali po tede aṣeansi.” ²⁵Tama Jisasgo augwalibolo te po wali, “Ao. Tama tibaso, te takis mabo s̄ede, te budi Sisarbolo agai nai dabe mao, tama te lotude me te Godibolo maiabo nai yai baso da, te God agai nai dabe da agabolo dolo mao,” wali. ²⁶Tama augwaligo agai pode tugobeo, te we bidi gesabidide. Te sa pabo bagego noma siyu, sagia sai.

Augwaligo Jisasbolo hanalu wali, isai budi ma hodaluibawe?

(Mat 22:23-33; Mak 12:18-27)

²⁷Te Sadyusi budi hani augwaligo homugo isai budi ma hodalogobe. Sadyusi dabe me badu Jisas pageba asali. Tama augwaligo agade muma sabo homu eyu, te po wali, ²⁸“Po ola mabo budi, te polobadu budi Mosesgo e bomo yai po me deli dabolo aṣeansi. Tibaso, gomunai budi me deligo we selama, tama agai sali wego wai ame nis̄awai, tama te budi isibaso, teda aga amago te we ma sao. Te we selama, tama wai ame nobaso da, isai bidigo wai dao wao. Te s̄e yao, Mosesgo te bomo yai po aṣeansi. Ao.^h ²⁹Me sogo ama a naga me badu si augwali bidai. Gomunai bidigo we sai, agai wai meni, te aga olo isali. ³⁰Tama nosali aga ama tomo bidigo te we ma sali. ³¹Nosali te budi isilama, te tomo budi tudi badu bidigo te we ma sali. Ama dede a naga me badu nogo si te we deli naga salio. Tiali, tigidaligo wai me ame nabe. Tilama, tigidali isalio. ³²Nosali te we me isalio. ³³Te a naga me badu nogo si budi te bage augwaligo te we selama, bidama, isali. Tilama, te isai we budi ma hodalobo sogode te we mena bidigo we dawe?” augwaligo te po wali.

³⁴Te Jisasgo te po wei ponani, “Dage we budi e sogo meg i we sabo dao. Megi tqde bidigo we dali budi si augwa si sabo dao. ³⁵Tigidali we

^h 20:28 Bom 25:5

bidi megi te tiwai ebo dao. Tiali goli, augwali we bidi Godigo po weyu, augwali hodaluama, te nosali sogode bidibo we bidi, augwali te sogode we sabo sə ma egobeo.³⁶ Augwali ma isigobeo. Augwali mobo bidi ensel tiwai bidaibao. Godigo augwali ḡu pagede hodolali. Tama tibaso, augwali Godigo wai boq̄u bidibo,” Jisasgo te po wai.

³⁷“Te Mosesgo aga po aşənai, te po wai, ‘Isai bidi ḡu pagede ma hodalobo dao.’ Agai mena sə elama, tama agai dabolo te po ola maniwe? Agai aşənai po tomode te po elalubao, me sogo Mosesgo dwasianu ni pagede sia dilubo suali. Moses agai nōq̄ dabe polobadu isali goli, agai Godide te po aşənai, ‘Genuai God te Abraham, Aisak, Jekop te bagego God dao’ wali.ⁱ ³⁸Tama Godigo ‘Ena da te bagego God dao’ obaso, te dago kone dao, te God da, te isai bidigo God menio. Bidibo bidigo God dao. Tama Godigo gedude, bidibo we bidi me, isai bidi dabe me, te bidibao,” Jisasgo te po wai.

³⁹Jisasgo te po te Sadyusi bagebolo olama, augwali aiyaba elaluama, gasa bidi hani dabe, te Juda dabego bomo yai po koneai bage, augwaligo Jisasbolo te po wai, “Po ola mabo bidi, nago augwalibolo wei ponani po usu dao,” wali. ⁴⁰Te Sadyusi dabe augwali agade wi baso, po me deli ma hanalu wabeo.

Jisasgo augwali te Godigo sa muani bidide hanalu wali

(Mat 22:41-46; Mak 12:35-37)

⁴¹Te Jisasgo augwalibolo te po hanalu wali, “Dagego te po wabo dao, ‘Te nosali asabo bidi Krais da, te polobadu bidi nogi Devit aga ogwa da.’ Dagego te po magi baso wabo dawe?⁴² Buku me nogi Sam, te lotu təqbi po wabo buku tomode te bidi Devitgo te po aşənai,

‘God agai eno Genuai Bidibolo te po wai, “Nage eno
dolo nogo badude duayao. ⁴³Nage tede duabadi,
eno nago boi bidi dabe nago səq̄a dologoba muaibao,
nago səq̄a augwali tobolude agawaibao,”’

Devitgo te po aşənai. ⁴⁴Tama te po tomode Devit aga digi aga te Krais, te nosali asabo bidi, te bidide ‘Eno Genuai Bidi’ wali. Tama tibaso, Krais te Devitgo ogwa naga te menio, te agai genuai bidi mu dao,” Jisasgo te po wai.

Te bomo yai po ola mabo bidi dabego yali sə po

(Mat 23:1-36; Mak 12:38-40)

⁴⁵Te we bidi tigidali augwali tede bidibadi, Jisasgo wali po odali.
⁴⁶Tama Jisasgo aga po sabo bidibolo weyu, te po wai, “Dage dua dao, te bomo yai po koneai bidi dabede. Augwali godola pela bobobage ugwa

ⁱ 20:37 Sai 3:6

gudama, bilama pabo dao, nogi yai bidi tiwai. Augwali godola pela te we bidigo bidi sisinibo pesagede augwalibolo siade dao omainogo, genuai bidi tiwai. Augwali mu godola pela lotu be tomode bidi gesabidide naga dualubo, genuai bidi tiwai. Augwali godola pela genuai nai tubo side augwali polalubo ni namide naga duawainogo ebo dao. ⁴⁷Augwaligo te wilawe we dabego doado bage gisigiliba dao. Tiali goli, augwaligo tibo gedu haluasa po bobobage wabo dao. Tama nosali Godigo tigidali we bidide po tu ebo si, te tobage bidi dabe, te bomo yai po koneai dabe, augwaligo moni sege mu saibao, te gasa we bidigo dwasianu sege saibao,” Jisasgo te po wai.

**Magi nai meni yai wilawe wego aga mone ge dwasianunu
Godibolo mani
(Mak 12:41-44)**

21 ¹Te Jisas te Moni Lotu Be tempel tomode tonolo bilibadi, agai suali, te mone hauwa munalubo bidi dabego augwaligo Godibolo masigi te halobage tomoba mubo agai suali. ²Tama Jisasgo suali, te magi nai meni yai wilawe wego dwasianunu nogeai mone ge si te halobage tomoba muani. ³Tama sulama, Jisasgo tede bidibo we bidi dali te po wai, “Eno mu po dage dali obao, e magi nai meni yai wilawe wego mani masigigo te tigidali we bidigo mani masigi aiyaba elaluali. ⁴Te tigidali we bidi augwaligo masigi hauwa me badu munalubo. Augwaligo me badu naga Godibolo manio. Tiali goli, e we da masigi aga mu mina salio. Te we agai masigi tigidali Godibolo manio. Te we aga nai abela tuabo masigi mu mina salio,” Jisasgo te po wai.

**Jisasgo te Moni Lotu Be tempel nosali dolaibao po wai
(Mat 24:1-2; Mak 13:1-2)**

⁵Te bidi dabe me badugo te Moni Lotu Be tempel tede po wai, “Augwaligo te be dwagi yai masigigo auluai, te we bidigo Godibolo mani nai dabe me sisinama, te se yai dao,” te po wali. Tialima, Jisasgo te po wali, ⁶“E tqde elalubo nai dabe megi dagego subo, te sogo pedalobo side te dage dali boi bidi dabe augwaligo me gogologobeo masigi ugwaldu munalubo masigi duluda aiyadu masigi agasi halo olama, tigidali pebedama, aiyaba sawaibao,” Jisasgo te po wai.

⁷Te augwaligo Jisas hanaluyu, te po wali, “Po ola mabo bidi, te se nisu pedalainaibawe? E be dolabo maganubo side, te mena tiwai se hasia pedalubo sulama, dago koneaibawe?” ⁸Tama Jisasgo po weyu, te po wali, “Bidi hauwa asiyu, Jisas ena nogi waibao, Jisas asaibao wali, ena te Jisas ena e asalise, te po waibao, dage dali. Dage dua dao. Augwaligo dage ili po ola mawaibao. Tama augwaligo te po me waibao, ‘Asobo si te paba maga yagasobao.’ Tiali goli, dagego te po wabo bidi wali pigio. ⁹Dagego

odoyu da moni wąbi hwıbo po odobo si, teda dage didibili egio. Ma, bidi dabe augwaligo te gavman sela sawai hagede wąbi hwıbo po odobo si, te dage didibili egio. Te sę polo hasia pedaliyu polo yaibao. Tiali goli, te si polo siligobeo, tigidali nai silabo si polo asogobeo,” Jisasgo te po wai.

¹⁰ Jisasgo augwalibolo te po me wai, “Me bidi hanigo me bidi hani dali wąbi hwıaibao. Te genuai bulude bidibo bidi hani mego te gasa genuai bulude bidibo bidi hani me dali hwıaibao. ¹¹ Genuai genuai gęo e tqde pedalaibao. Me badu habu badu genuai nasi dali genuai gasi dali yaibao. Te dagalude te we bidi wi yabo moni haniani sę pedalaibao. ¹² Tiali goli, te tigidali sę pedalisiqbadi, bidi dabe augwaligo dage tulama, dwai sę dage dali yaibao. Augwaligo dage te bomo yai po ola mabo be tomoba odasa pelama, po tų ela menama, tama augwaligo dage kalabus be tomoba muaibao. Eno nogi tobade dage sę ebadi, augwaligo dage te moni gavman tuni bidi gesabide odasa paibao. ¹³ Te dagego Godigo po wabo tų nigli te eba. ¹⁴ Tama augwaligo dage dali te sę esiqbadi, dagego te homu yao, te po tų ebo sogode duga digi tau sabo po dagego homude hasia dodola sigio. ¹⁵ Ena digi ena koneai bidigo po dage pedauwaliba muaibao. Te baso, dagego boi bidi dabego te po sela sənama aiyaba elalugobeo. ¹⁶ Dagego aya ida me, ama me, deli sibi dabe me, abagi me, augwaligo dage te gavman bidi dabego nogoba muaibao. Augwaligo dage me badu ela muaibao. ¹⁷ Tigidali we bidi augwaligo dage dali moni sębę mu yaibao. Magi basowe? Eno nogi dage dali bidibaso augwaligo tama tiaibao. ¹⁸ Tiali goli, dage bugagia mu bidaibao, dagego tobolude tobolu nisi me deli hagagobeo. Tama tibaso, wi egimio. ¹⁹ Dage bomo elama, bida. Nono esisaboso, dagego mu bidabo sogo nosali saibao,” Jisasgo te po wai.

Jerusalem hanu augwaligo dolaibao po Jisasgo wai

(Mat 24:15-21; Mak 13:14-19)

²⁰ Te Jisasgo te po me wai, “Te nosali dagego te ami bidi dabego Jerusalem be nani bagulibo maga dagego subaso, teda te Jerusalem hanu dolabo sogo pąba yagasali, te dagego koneibao. ²¹ Tama te sogode te Judia tqde bidibo bage augwali te bulu duba wi pao. Tama te Jerusalem hanu tomode bidibo we bidi me, augwali te hanu taga peyu, gasa madiba wi piąo. Te bidi dabe hanu sesege badu bidibo bidi, augwali te hanu tomoba pelamuo. ²² Te sogode te Godigo te Juda we bidigo yali dwai sę wei ponabo sogo dao. Tama te side te Godigo bukude aşeani po tigidali te nai igibilama walaibao. ²³ Tama te haliga yai we dabe dali, wai bęq ame megı tama mabo we me, te tobage webolo hobede yao. Genuai seqe mu e tqde pedalaibao, te Godigo sębę yai we bidi te sogo gegaibao. ²⁴ Tama te boi bidi dabego te Juda dabe me badu moni hwągo ela muaibao, me badu nogo si dylama, kalabus ilama, odasa pelama, tama tigidali gasa tqba

mugi paibao, tede mu bidimainu yaibao. Tama te boi bidi dabe, te Juda bidi hani isławai dabe, augwaligo te Jerusalem hanu mu dola silaibao, te aiyaba elaluabao. Tama nosali te Juda hani isławai dabego Juda dabe aiyaba elaluabo si silaibao,” Jisasgo te po augwalibolo wai.

Nosali Jisas te Godigo Bidi Mu dagaludu asaibao
(Mat 24:29-31; Mak 13:24-29)

²⁵ Te Jisasgo augwalibolo po me weyu, te po wai, “Te giligade me, te poluade me, te hqde me te gasagi yai sę pedelaibao, bidigo konesiąbo sę. Tama tqde tigidali we bidi dwai homu elama, wi eyu, gela weyu, tebo side moni tamu aji dini asainogo u wabo augwaligo odoyu, wi yaibao.^j ²⁶ We bidi augwaligo homugo magi sę e tqde pedalogowe, te po waibao. Tibaso, augwali homude wi eyu, tigi aiyoge eyu, tibo isaibao. Magi basowe? Te dagalude hq dabe augwaligo tu mina sobaso, gegele bilaibao. ²⁷Tama te ebo sogo ena te Godigo Bidi Mu ena gasa dagalu pq medu asaibao, te eno moni bomo dali, moni ula dali asobo augwaligo te sogo sueibao. Te moni ula te giliga sesena pai nanobo tiwai yaibao. ²⁸Hasia te sę gagalama pedalubo side, te ebo sogo dage tobulu ugwanu elama, dolaluao. Te side dage Godigo sabo silabo side pąba yagasabao,” Jisasgo te po wai.

Kaiya solobo side te ebo sogo bodolu mabo po
(Mat 24:32-35; Mak 13:28-31)

²⁹ Te Jisasgo po me begelama, augwali dąj wai. Agai te po wai, “Dagego kaiya dali gasa ni dabe me solobo subo dao. ³⁰Tama dagego suyu, gesi yabe pedalobaso da, te dagego konebo dao, te sogo poi pibo si tamadi pedalaibao. ³¹Te tiwai me, te eno dagebolo megı pusali sege pedalobo dagego subaso da, te dagego koneibao, te Godigo we bidi tonalubo sogo polo pąba asai yabo. ³²Eno mu po dage dali obao, megı e sogo bidibo we bidi augwali me badu bidibadi, te ebo sogo te sęge tigidali pedalaibao. ³³Dagalu dali, tq dali tigidali pela silaibao, tiali goli eno po me munu me sia sogobeo,” Jisasgo te po wai.

Bugagia suao po

³⁴ “Te dage dua dao, bugagia suao. Dagego tigidali sogo bomai we tulama, aiyoge elamu dao. Tiyu dagego tigi tau sabo homu naga egio. Te tiwai kolesagago dage mesegelebaso da, teda te Bidi Mu asobo sogo dage polo asaibao, te enego hasa enebo tiwai yaibao. ³⁵Te ena asobo sogo te tigidali tqde bidibo we bidibolo me te tiwai sę pedalaibao. ³⁶Sesemane sogo dage bugagia suao, dua dao. Te sę eyu, tigidali sogo dage God

^j 21:25 Ais 13:10; Ese 32:7; Jol 2:31; Ped 6:12-13

hanalu wao, agai dagebolo aga bomo momainu yao. Tama tilama, tigidali te se dageba pedelainogo yali da, te dage geda munama ela soeibao. Tiyu da, dage ena gesabide bugagia dolaluaibao, ena da te Godigo Bidi Mu dao,” Jisasgo te po wai.

³⁷Te tigidali sogo Jisasgo po augwali we bidi dali Moni Lotu Be tempel tomode ola mawai. Tilama, te hulide Jisas aga bulu du me nogi Oliv teba pigi pabo dao. ³⁸Tigidali we bidi augwali kigamu mu aselama, te Moni Lotu Be tempel tomoba bulama, Jisasgo po odainogo yai, tigidali sogo.

**Bidi me nogi Judas agai Jisas te tuni bidi dabego nogode
mabo bodolu mani**
(Mat 26:1-5; Mak 14:1-2; Jon 11:45-53)

22 ¹Te olo bidibo sogo me paba yagasaibao. Tama te sogo te Juda dabe augwaligo ‘Te polobadu mu Godigo dago waj noq dabe mu ela soyu, elisawani sogo da’ weyu, augwaligo te sogo bo disawai nai bret tubo dao. Te olo bidibo sogo nogi Pasova dao. ²Tama te pris tuni bidi dabe me, te Juda dabego bomo yai po koneai bidi dabe me, augwaligo te Jisas elabo sunumi gegali. Tama augwali te we bidigo suidali weyu, wi yali. Tama tibaso, te we bidi suidali weyu, augwali te po geme miani.

³Te dwai haubo noma bidi Satan agai te bidi me nogi Judas aga homu tomoba pai. Te Judas aga te Keriot bulu bidi dao. Tama Judas te Jisas wali tigidali sogo pabo bidi nogi si olama, saq me badu si tomode bidali bidi dao. ⁴Tama Satan te bidi Judas aga homu tomoba pelama, tama Judas pelama, te pris tuni bidi dabe me, te Moni Lotu Be tempel tonalubo se ebo tuni enesigi bidi dabe me augwali dali agai po miani. Agai te Jisas augwaligo nogoba mubo sunumi nigabo po wali. ⁵Tibaso, augwali homu dwagi yai yali. Augwaligo po weyu, te po wai, “Nage dago mone ge mawaibao.” ⁶Judasgo te po wali, “Dagego po usu dao.” Tama agai te Jisas augwaligo nogoba mubo sunumi gegebo gagalali. Agai tonaluali, me sogo te we bidi hauwa te Jisasde bidisiabaso, tebo sogo agai Jisas te tuni bidi dabego nogoba muaibao.

Jisas wali pabo bidi sigo te Pasova tubo nai sisi egi pai
(Mat 26:17-25; Mak 14:12-21; Jon 13:21-30)

⁷Te bo disawai tubo nai bret tuabo olo bidibo side, deli sogo silama, te kibu sipsip wai elebo bodolu sogo yagasaki. Sipsip wai eleyu, te Juda dabego ma koneani, ‘Polobadu Godigo dago noq dabe ela soyu, elebe.’

⁸Tama Jisasgo aga bidi Pita dali Jon dali “Dage si pao” augwali sibolo weyu, te po wai, “Dage si pelama, te nai sisi egi pao, te dago Pasova tubo nai,” te po wai. ⁹Tama augwali sigo te po hanalu wai, “Nago homu da sigo te tubo nai menade sisi yaibawe?” ¹⁰Jisasgo augwali sibolo te po wai, “Dage si te moni be nani tomoba pao. Tama tudu pobadi, se ebo

bidi me deligo baketgo aji tulama, tolasa peyu dage si tiąba asaibao. Te bidi wali dage si pao. Tama be tomoba te bidi pobaso da, dage si me te be tomoba pao. ¹¹Dage sigo te be page bidibolo wao, ‘Po ola mabo bidigo nagebolo te po walio, “Nago be tomode te ena dali, eno bidi dabe dali, dago te Pasova nai tuabo be habu menadewe?”’ ¹²Tama te bidigo dage si ugwdadu moni be habu ola mawaibao. Tede te nai tuabo ni nami me dua yabo ni nami me agai se ebo bagego te sisila muai dao. Te be habude dage sigo te tubo nai sisila muao,” Jisasgo te po wai. ¹³Tama te bidi si pelama, Jisasgo wali po gilama, te se pedalali. Tama augwali sigo agai wali po wali pelama, te tubo nai sisila muani.

Jisas aga wali bilali bidi dabebolo diluai nai bret me wain aji manio
(Mat 26:26-30; Mak 14:22-26; 1 Ko 11:23-25)

¹⁴Te Pasova nai tuabo sogo pedalali. Tama Jisas te beba aselama, te aga te nai tuabo ni namide dua yali, te aga po sela pabo bidi dabe te aposel bage augwali me tede dua yali. ¹⁵Jisas augwalibolo te po wai, “Eno homugo godola pelama, te dago wai noq hani te Israel dabe bugagia bidimainu sula tagalu ela soale side ma kone palu tubo nai Pasova dage dali megi tama tueibao. Tilama, nosali ena dene saibao. ¹⁶Eno mu po dagebolo obao, eno e Pasova nai dage dali ma tugobeo. Tama e nai ma tusiabadi, te Godigo we bidi tonalubo sogo gagalama, e nai tuabo se page hania mu pedelaibao. Tama te sogo eno ma tueibao,” Jisasgo te po wai.

¹⁷Te Jisasgo agai te bono du kaneme wain we pagawai kap selama, Godibolo usu da po olama, tama aga bidi dabebolo mayu, te po wai, “Dage te bono du kaneme wain we selama, duga hasi tomode dobola selama, tuao. ¹⁸Eno dagebolo obao, megi tama gagalama, eno bono du wain we ma tugobeo. Tama tusiabadi, te Godigo agai we bidi tonalubo sogo pedalabo sogo eno e nai ma tueibao,” Jisasgo te po wai.

¹⁹Te Jisasgo agai te diluai nai bret me selama, Godibolo nage usu dao olama, tama te nai bret nogogo togolama, aga bidi dabebolo dobawai. Agai te po wai, “E nai eno tigi mi dao. Eno dage tau somainogo mobao. Tuao. Ena isilama, dage nosali tama tuyu, ena konealuu bidaoo,” te po wai.

²⁰Te nosali genuai nai tulama, te Jisasgo agai te diluai nai bret dobayu yali tiwai egi pelama, te bono du kaneme wain we me tama tiali. Agai te po wai, “E bono du kaneme da, te eno kaneme dao. Gesi tu eno kanemego nigaiabao, dage God dali mu kę̄ somainogo, eno kaneme gelebao.^k ²¹Dagego suo. Ena te boi bidigo nogoba muabo bidi ena dali ede bidibao. ²²Ena da te Godigo Bidi Mu da. Ena te Godigo polobadu tu niglii te tudu paibao. Tiali goli, ena te boi bidi nogoba muani bidi tede ena hobede mu ebao,” wali.

^k 22:20 Jer 31:31-34

²³ Te Jisasgo te po obaso, agai bidi dabe augwa hasi hanalua peyu, dego te kolesaga yaibawe, augwa hasi te po wai.

Da tomode de polalubo bidi dawe?

²⁴ Te Jisas wali pabo bidi dabe augwa hasi konila yali. Tama konila po weyu, te po wai, “Da tomode mena bidi te polalubo bidi dawe?” ²⁵ Jisasgo te po augwali dali wai, “Te Juda bidi hani isəawai dabego toboli bidi dabe augwaligo bomo elalu, te we bidi tonalubo dao. Augwali genuai bidi bidibo dao. Augwaligo te we bidigo te tuni bidibolo wiegi yai bidi dao omainogo ebo dao. ²⁶ Tiali goli, te we bidi dabego te wabe. Tiali goli, dagego te tobage sə egio. Menio. Dage polalubo bidi homu ebaso da, teda dage nosali bidi tiwai bida, gesi bidi tiwai. Dagego toboli bidi bidabo homu eyu da, dage sə bidi tau sabo bidi bida. ²⁷ Mena bidi polalubo bidi dawe? Te saide dualama nai tubo bidi dawe? Te sə tau sabo bidi nai poude togola magasobo bidi dawe? Te saide dualama nai tubo bidi naga te polalubo bidi dao. Tiali goli, ena dage tomode bidiyu dage sə tau sabo bidi dao,” Jisasgo te po augwalibolo wai.

²⁸ “Te polobadu te sə pedelama, enaba te haniani səgə asainogo yai digi, dage ena dali bidai dao. Tama dagego ena taga soai menio. ²⁹ Eno Ayago we bidi tonalubo sə enabolo mawai. Tiali gilama, eno te sə dagebolo mobao. ³⁰ Nosali eno tigidali we bidi tonalubo side, dage ena dali hodobo nai tuagameo. Tama dage te toboli bidigo duabo ni namide dualama, tama dagego te Israel bidi hani nogo si olama, səgə badu si te we bidi hani po dodolobo hani bidagameo,” Jisasgo te po aga bidi dabe dali wai.

Jisasgo te po wai, “Pita, nago ena tudiba muaibao”

(Mat 26:31-35; Mak 14:27-31; Jon 13:36-38)

³¹ Te Jisasgo te bidi Saimonbolo weyu, te po wai, “Saimon, Saimon, nage odao. Te dwai haubo noma bidi nogi Satan agai dage dayu, usu sainogo, agai God hanalu wali. Tama Godigo ‘Ao’ wali. ³² Satango te sə yainogo yai digi, eno nage tau sainogo, God hanalu wali, ‘Saimon tau sao. Agai homu kolesaga tigidali nageba mubo sə tagalidali weyu, nago Saimon tau sao.’ Tama Saimon, nosali nage begasa, ma aselama, tama nago naga ama dabe bomo mayu dəq walao,” Jisasgo te po wai. ³³ Pitago Jisasbolo wai, “Genuai Bidi, ena nage dali kalabus paibao. Ena nage dali isabo me sisi yalio,” Pitago te wai, Jisas dali. ³⁴ Jisasgo Pitabolo te po wai, “Pita, eno nagebolo obao, e sogo hulide te ba kakaruk po wasiəbadì, tama nago sela sogo waibao, ‘Eno Jisas nogi konebe.’ Te po nago waibao,” Jisasgo te po wali.

Jisasgo sela po wai, gamugi dage masigi po dali, wa po dali, hwə ge po me

³⁵ Jisasgo te po aga wali bilali bidi dabe augwalibolo wai, “Polobadu eno dage te sə egi pao weyu, duga gamugi dage masigi dali, wa dali,

sąqą nadoba dali sela pigio, te po wai. Tiali sogo, dage nai me deli sqą paidawe?" Jisasgo augwali dali te po wai, tama augwaligo "Menio," te po wai.³⁶ Jisasgo augwali dali te po wai, "Tiali goli, megı te gamugi dage masigi munalubo bidigo te nai sao, te wa munalubo bidi me aga wa sao. Tama hwą ge meni yai bidi da, teda aga ugwa menama, gasa bidigo abelama, te ugwide sai masigigo te moni hwą ge sao," Jisasgo te po wai.³⁷ "Magi basowe? Bukude wali po augwaligo te po wai, 'Augwaligo homude augwaligo aga dali dwai bidi dabe dali sisilai dao,' wali. Tama eno dagebolo obao, tigidali po bukude wali po tiwai ena dali nai gilama walaibao. Ena tqde bidibo sogo tamadi sia saibao," Jisasgo te po aga bidi dabebolo wai.¹

³⁸ Augwaligo te po wai, "Genuai Bidi, nago suoao, dago moni hwą ge si e dao." Jisasgo sulama, augwalibolo te po wai, "Te tama usu dao."

Jisasgo te Getsemani gide Godibolo po wai

(Mat 26:36-46; Mak 14:32-42)

³⁹ Te Jisas te be taga peyu, te bulu du nogi Oliv teba pali, aga polobadu hauwa sogo teba pai dao. Tama aga bidi dabe augwali aga wali pai.

⁴⁰ Tama Jisas te bulu du Olivba sabolama, aga bidi dabebolo te po wai, "Dagego Godibolo hanalu po wao, te Satango dage dwai sę tomoba gegidali weyu."⁴¹ Tama Jisasgo augwali taga peyu, aga dwasianu bobenu gana palio. Agai kidu tqba sugunama, Godibolo po weyu, te po wai,

⁴² "Eno aya, nago homugo usu da wida, te sege enade elalubo dagala sayao. Tialima, nago eno homu wali pelamuo. Naga homu kolesaga naga wali pao," Jisasgo te po wai, aga Aya dali. ⁴³ [Tama Godigo sę ebo mobo ensel bidi me deli dagaludu asiyu, pedelagaselama, te Jisasba bomo mayu tau sali. ⁴⁴ Jisas aga homu sege mu eboso, Godibolo aga hanalubo po bomonama wai. Tama Jisasgo tigide te posolo wę kisu yai, te wę te tqba tuloluai, te kaneme tiwai.]

⁴⁵ Te Jisasgo aga Godibolo wali po silama, tama hodaluama, tama aga bidi dabe pageba ma pali. Tama augwali godege pibo aga suali. Augwali homu sege mu eboso, tama augwali godege piai. ⁴⁶ Tama agai augwalibolo te po wai, "Ya, dage magi baso pibawé? Hodaluiqo. Godibolo hanalubo po wao, te Satango dage dwai sę tomoba gegidali weyu," Jisasgo te po wai.

Judasgo Jisas te boi bidigo nogoba muani

(Mat 26:47-56; Mak 14:43-50; Jon 18:3-11)

⁴⁷ Te Jisasgo aga po obadi yaide, tama genuai bidi hani pąba asali. Te bidi Judas te Jisas wali pabo bidi nogo si olama, sąqą me badu si tomode

¹ 22:37 Ais 53:12

bidali, te bidi polasa asai. Tama aga aselama, Jisas dali pąba kisa sagasai. ⁴⁸Tiali goli, Jisasgo agabolo te po wai, “Judas, ena da te Godigo Bidi Mu dao. Nago kisa sagasu, ena te boi bidi dabego nogoba mubawe?” ⁴⁹Jisasgo bidi dabe augwaligo te sę pedalabo maga ebaso, augwaligo te po wai, “Genuai Bidi, nago usu da wida, dago te boi bidi dabe hwą gego elaiabao,” te po Jisas dali wai. ⁵⁰Tama te tamadi asai bage tomode te pris tuni bidigo sę ebo bidi me deli bidai. Tama Jisas wali pabo bidi mego te bidigo dolo nogo badu olo moni kago hwągo togwa səawai, tama te olo tqba tuloluai. ⁵¹Tiali goli, Jisasgo te sulama, te po wai, “Tagalao. Me menio.” Tama agai nogo te boi bidi oloba muai, tama te olo dwagi yai ma yai.

⁵²Te Jisasgo agai po wai, te pris tuni bidi dabe me, te Moni Lotu Be tempel tonalubo tuni enesigi bidi dabe me, te monu dabe me, augwalibolo agai po wai, augwaligo aga tuainogo asali baso. Agai te po wai, “Dagego moni kago hwą dabe, wąbi dabe sesali da. Te dagego nai wi sai bidi nogo tulama, sela painogo asobo aq yaliwe?” Jisasgo te po boi bidi dali wai. ⁵³“Tigidali sogo dage dali ena te Moni Lotu Be tempel tomode bidai dao. Te sogo dagego ena me sai menio. Tialima, meg i sogo dagego Godigo bodolu muani side dao, dagego duga homu wali piąo. Megi Satango bomogo sę ebo side dao,” Jisasgo te po te boi bidi dabe dali wai.

Pitago te po wai, “Jisas eno konebeo”

(Mat 26:57-58, 69-75; Mak 14:53-54, 66-72; Jon 18:12-18, 25-27)

⁵⁴Te Jisasgo aga po ola silibo si da, augwaligo aga nogo pageabi elama, sela pai. Augwaligo Jisas odasa peyu, te Godibolo te polalubo tuni pris bidigo beba pai. Tama Pita me augwali wali pai. Tiali goli, aga digibulu gana bidai. ⁵⁵Te bage augwaligo sia te be mesalode nogai, sia kedau tuenu. Tama Pita me augwali dali dualama, sia te gogo tueinu dua yali. ⁵⁶Te be tomode sę ebo wego Pita suai, te sia ulade. Te wego aga gedu diliasa tonaluyu, te po wai, “Te bidi me Jisas dali bidibo eno suai dao,” te po wai. ⁵⁷Hogwa siyu, Pitago te po wai, “Ena menio. We, nago wabo po eno te Jisas konebeo,” Pitago te po wai. ⁵⁸Nosali gana gasa bidi mego Pita sulama, te po wai, “Nage me te Jisasgo hani dao.” Tiali goli, Pitago te po wai, “Abagi, ena mu menio.” ⁵⁹Nosali bidama, gesege elama, gasa bidi mego po bomonama, te po wai, “Mu tama dao. Te bidi me Jisas dali bidai dao. Te bidi Galili tq bidi tama dao, Jisas tiwai,” te po wai. ⁶⁰Tiali goli, Pitago te po wai, “Abagi, nago te wabo po eno konebeo.” Agai te po tama obadi, ba kakaruk po wai. ⁶¹Tama te kakaruk po ma wabo si, Jisasgo begelama, Pitaba tonani. Tama Pitago Jisasgo aga dali polobadu gana wali po ma koneama, “Te sogo hulide ba kakaruk po wasiąbadi, tama nago sela sogo te po waibao, ‘Eno Jisas konebeo,’ waibao.” ⁶²Tama Pita agai Jisasgo te wali po ma koneagasu, buluba pelama, moni gela mu wai.

Augwaligo Jisas gisugu maiyu, eleyu yai
(Mak 14:65)

63 Te Jisas tonalubo bidi dabe augwaligo dwai dwai haniani po aga dali weyu, te aga eleyu yai. 64 Augwaligo Jisas ugwago gedu haluama, nogogo elama, agabolo hanalu wali, “Dego nage elaliwe? Te nosali asabo nai konea pai profet bidigo wali po tiwai wao,” te po wai. 65 Tama augwaligo bidi posobo dwai po hauwa Jisas dali wai.

Augwaligo Jisas kaunsil bidigo gedude po tū ela mawai
(Mat 26:59-66; Mak 14:55-64; Jon 18:19-24)

66 Te nosali te giliga pedelai, tama te Israel bidi hani tobolu bidi dabe dali, te pris tobolu bidi dabe me, te Juda dabego bomo yai po page koneani bidi dabe me, augwali tigidali sisinai, tama augwaligo po kaunsil bidigo po wabo gilama, te po wainogo yai. Tama te Jisas tonalubo bage augwaligo Jisas kaunsil geduba odasa pai. Te kaunsil dabe augwaligo te po wai, 67 “Nago dabolo wao, nage Godigo sa muai nosali asaibao wali bidi Krais dawe?” Tama Jisasgo augwalibolo te po wai, “Eno dagebolo weyu da, te dagego te po mu po dao homu egobeo. 68 Tialima, eno dagebolo me dagego homu ena da te Godigo sa muai bidi dawe hanalu da, te dagego eno po wei ponogobeo,” Jisasgo te po wai, augwali dali. 69 “Tiali goli, megi me, tigidali sogo nosali me, te Godigo Bidi Mu te bomo tigidali elalubo Godigo dolo nogo badu bidaibao, polalubo bidi bidabo madide. Ena da te Godigo Bidi Mu dao,” Jisasgo te po wai.

70 Te bidi dabe tigidaligo te po wai, “Tama nage te Godigo Ogwa mu dawe?” Jisasgo te po wai, “Dagego enabolo wali po tiwai, ena tama dao.” 71 Augwaligo te po wai, “Dago magi baso gasa bidi i olama, te bidigo Jisasgo dwai sē yali po pusaibawe? Te Jisas aga digi aga pedauwalidu ena da Godigo ogwa da wali dwai po te dago megi tama odalio,” te Juda bagego te po wai.

Juda dabe augwaligo Jisas augwa kiap tuni bidi gedude dodolama, po tū ela mawai

(Mat 27:1-2, 11-14; Mak 15:1-5; Jon 18:28-38)

23 1 Te genuai bidi dabe augwali tigidali hodalu, te po wai, “Jisas te kiap tuni bidi bidibo madi selasa pao,” wai. Te gavman tuni bidi nogi Pailat dao. 2 Augwaligo gagalama, Jisas tū ela mayu, te bidi Pailat gesabide. Augwaligo te po wai, “E bidigo da hanigo ebo kolesaga dolali. Jisasgo da dabe weyu, dago gavman tuni bidi Sisarbolo takis masigi magio homu ebo dao. Tama Jisasgo dabolo habu selebo po weyu, te po wai, ‘Ena da, Godigo sa muyu asaibao wali bidi Krais dao. Te ena tuni bidi dao,’ Jisasgo te po wai dao,” augwaligo te po wai. 3 Tama tuni bidi

nogi Pailat agai Jisasbolo hanalu, te po wai, “Nage da, te Juda bagego tuni bidi dawe?” Jisasgo te tuni bidibolo po weyu, te po wai, “Naga digi te po obao, ena tama dao,” Jisasgo te po wai. ⁴Tama te tuni bidi Pailat agai te pris tobolu bidi dabe me, te sisinai Juda we bidi me, augwalibolo weyu, te po wai, “E bidi agai dwai sə yali po page eno suali menio.”

⁵Tiali goli, augwaligo po bomonama ma weyu, te po wai, “Agai po te Juda we bidibolo mobaso, tigidali we bidi dwai homu hogodolai. Agai te po Galili bulude gagalama, te sə megı eba me sela asalio,” augwaligo te po Jisasde wai, te bidi Pailatbolo.

Augwaligo Jisas Herot bidibo digi odasa pelama, tū ela mawai

⁶Te kiap tuni bidi Pailatgo augwaligo wali po odama, augwalibolo hanalu wai, “Te bidi Jisas te Galili bulu bidi dawe?” ⁷Augwaligo “Aga te bidi Herotgo tonalubo təde bidibo bidi dao,” wali. Tama te po odama, Pailatgo “Aga Herotba sela pao, agai te po tū odomainogo,” wali. Tama te sogo Herot te Jerusalem be nanide osogo bidibadi dao.

⁸Te bidi Herotgo Jisas sulama, agai homu dwagi yai yali. Agai Jisasgo ebo sə po odai, tama agai Jisas polobadu suainogo yai, hauwa sogo. Agai homugo eno te bidi Jisas agai bomai sə ebo eno sueibao, te homu polobadu yai dao. ⁹Tama tibaso, Herotgo Jisasbolo po hauwa hanalu wai. Tiali goli, Jisasgo agai po me wei ponebeo. ¹⁰Tama te pris tuni bidi dabe dali, te Juda dabego bomo yai po mu koneai bidi dabe me, augwaligo pəba aselama, augwaligo Jisas po tū bomonama mu wai. ¹¹Tama Herot dali, aga enesigi bidi dabe dali, augwaligo Jisas dali dwai dwai haniani po olama, Jisas mu dolai. Augwaligo dwagi yai ugwa selama, Jisasbolo sabili mubo aq yai. Tama te tiwai elama, augwaligo gisugu wai. Tama elama, Herot agai “Jisas te kiap tuni bidi Pailatba ma odasa pao,” te po wai, tama augwaligo aga odasa pai. ¹²Polobadu Herotgo te kiap tuni bidi Pailat dali augwa si wado yai. Tialima, megı augwali si abagi gagawai.

Kiap tuni bidi Pailat agai Jisas te ni agede elao wai

(Mat 27:15-26; Mak 15:6-15; Jon 18:39–19:16)

¹³Te kiap tuni bidi Pailat agai te pris tuni bidi dabe dali, te tobolu bidi dabe dali, te olo we bidi dali i wai, tama augwali sisinai. ¹⁴Tama augwali sisinama, agai augwalibolo te po wai, “Dagego e bidi Jisas ena pageba sela asali dao. Dagego te po wai, ‘Jisasgo dago we bidigo ebo kolesaga dolai,’ te po wai. Eno aga te po hanalu wali, duga gesabide. Tama dagego odao. Eno Jisasgo yali magi səgə agai me ebeo. Dagego aga tū ela mani te agai səgə yali eno me subeo,” Pailatgo te po wai. ¹⁵“Herot agai Jisas dabolı ma tagala palali, dago Jisasde po tū odomainogo. Tama tibaso, dago koneani, Herot me agai Jisas agai səgə yali me subeo. Tama tibaso, dena Rom dabego bomo yai pode, e bidi dago elegobeo,” Pailatgo te po

augwali dali wai. ¹⁶“Tama tibaso da, eno e bidi bigo naga elama, olo tagala palaibao,” te po wai. ¹⁷[Te tigidali sogo te Pasova nai tuabo olo bidibo side te Pailatgo kalabus bidi me deli te we bidibolo olo tagala palobo dao. Pailatgo augwaligo po wali pelama, bidi me augwaligo saibao wabo bidi augwalibolo tagala palobo dao.] ¹⁸Tama tigidali we bidigo moni i mu wai, “Te bidi elao, tama te bidi nogi Barabas dabolo olo tagala palao,” te we bidigo te po wai.

¹⁹Te bidi Barabas agai gavman dali te hanu Jerusalem tomode wabi hwjai, tama agai bidi me ela muai, tama augwaligo te bidi kalabus tomoba muai dao. ²⁰Tama Pailatgo te we bidi dali po ma wai, agai Jisas tagala palainogo yai. ²¹Tialima, augwaligo i weyu, te po wai, “Te bidi ni nami agede elao, te bidi ni nami agade elao,” te po ma weyu, ma weyu yai, te Juda we bidigo. ²²Tama Pailatgo sela sogo te we bidibolo wai, “Magi basowe? Te e bidi Jisasgo mena dwai se yaliwe? Eno agai dwai se yali me subeo. Tama tibaso, dena Rom dabego bomo yai pode, e bidi dago elegobeo. Tama aga eno bigo naga elama, olo tagala palaibao,” Pailatgo te po wai, te we bidi dali. ²³Tiali goli, augwaligo bomo mu yai, augwaligo moni i bomonama mu wai. Te Pailatgo Jisas elamu po augwalibolo omainogo, te augwaligo i wabo elabo pogo Pailatgo po aiyaba elaluai. ²⁴Tama tibaso, Pailatgo po weyu, te po wai, “Te usu dao. ²⁵Eno dagego po naga odaibao.” Te bidi nogi Barabas te gavman dali wabi hwjnama, bidi ela muai. Tama te bidi augwaligo kalabus tomoba muai dao. Te we bidigo te bidi Barabas ma augwaligo sainogo te po wai, tama Pailatgo te bidi augwalibolo tagala palai. Tama te Pailatgo te we bidigo homu wali peyu, tama Jisas augwaligo nogoba muai.

Augwaligo Jisas ni pedaide elai (Mat 27:32-44; Mak 15:21-32; Jon 19:17-27)

²⁶Te enesigi bidi dabe augwaligo Jisasbolo aga elabo ni pedai tola olama, tama aga tolasa pai, te aga elabo pesageba. Tama augwali Jerusalem be nani taga sobadi, tomode te bidi me nogi Saimon augwaligo suali. Te bidi aga page bulu Sairini, tama megı aga Jerusalem tomoba painogo sobadi, tama te enesigi bidi dabego te bidigo Jisas tau selama, te ni pedai tolao wai. Tama geasa pelama, te bidigo te ni agai nagede tolama, Jisas wali pai.

²⁷Te hauwa we bidi augwali Jisas wali pai. Tama te wali pabo we dabe hauwago Jisas hagede augwaligo gela weyu, te hobede ebo didigi weyu yai. ²⁸Tialima, Jisas begelama, te we dabe dali te po wai, “Dage Jerusalem we dabe, dage ena hagede gela wagio. Tiali goli, duga hagede gela weyu, duga wai boq hagede gela weyu yao. ²⁹Odao. Nosali te sogo pedelaibao, tama augwaligo te po waibao,

‘We dabe augwali wai ame nisiqbo we dali, te wai

ame nisiāwai we dali, te we dabe augwali wai ame
masiāwai we dali, te augwali dwagi yai homu mu
yagameo.'

³⁰Tama tebo sogo da, augwaligo te bulu dubolo te po waibao, ‘Te bulu du, dage daba degasa dulao.’ Tama te dwasianu bulu dubolo me te po waibao, ‘Dagego da mesega sao,’ te po waibao.^m ³¹Megi da dwagi yai si digi, augwaligo enabolo dwai s̄e ebao. Tama nosali te dwai si dageba asobo si, augwaligo dagebolo dwai s̄e mu yaibao,” Jisasgo te po wai.

³²Te ami enesigi bidi dabe augwaligo gasa bidi me si te sela asai. Te bidi sigo dwai s̄e yai, augwaligo te bidi si Jisas dali elainogo sela asai.

³³Augwali bulu meba sabolai, te bulu nogi diligō toboli dao. Te bulu dude augwaligo Jisas ni nami pedaide neligo enama, te ni nami pedaide dāq̄ dagana ulai, te ni t̄oba bulai. Augwaligo te dwai s̄e yai bidi si me ni namide neligo enama, te ni pedai si t̄oba bulai. Te bidi me Jisas dolo nogo badu muai, me bidi Jisasgo pobase nogo badu muai.

³⁴Te Jisasgo te po wai, “Aya, nago augwaligo dwai s̄e yali s̄eq̄ sela s̄ayao. Augwaligo enade ebo s̄e s̄eq̄ augwaligo konebeo.” Tama te ami bidi dabe augwaligo satu gagali elama, Jisasgo gudubo ugwa dabe augwa dobola sai. ³⁵Tama te Juda we bidi augwali dololaluyu, tigidali s̄e tonolaluyu bida. Te toboli bidi dabego Jisas dali dwai po haniani wai, “Jisasgo gasa bidi dabe naga tau salio. Aga Godigo mu sa muyu asaiba wali te bidi Krais mu da wida, te Jisas aga digi ma tau sao,” te toboli bidi dabego te po Jisas dali wai. ³⁶Te ami enesigi bidi dabe augwaligo me Jisas dali dwai haniani po wai. Augwaligo p̄aba aselama, Jisas dwai ha ebo aq̄ mawainogo yai. ³⁷Augwaligo po weyu, te po wai, “Mu tama, nage te Juda we bidigo tuni bidi da wida, teda naga digi naga ma tau sao,” augwaligo Jisas dali te po wai.

³⁸Tama te dwasianu ni namide aseyu, te po wai, “Te bidi te Juda we bidi dabego tuni bidi dao,” tama olama aşeai. Tama te dwasianu ni namide augwaligo aşeanı po te ni pedai ugwdadai deide neligo enai.

³⁹Te dwai s̄e yali bidi me si augwaligo ni namide walai me bidi deligo Jisas dali dwai po wai, “Jisas, nage da we bidi tau sai hagede sa muani bidi Krais da wida, naga digi tau siyu, dadi si me tau sao,” Jisas dali ni namide walai bidi mego te po wai. ⁴⁰Tialima, me bidigo te po odama, te bidi dali wado po wai, “Nago God dali wi ebewe? Nago sege Jisasgo sege tiwai sali. ⁴¹Augwaligo da si elali da, te augwaligo doloba pai kolesaga yalio. Da sigo s̄eq̄ sali da, te usu tama da si yali s̄ede tialio. Tiali goli, e bidi Jisas da, agai magi dwai s̄e deli ebeo,” Jisas dali elali bidi mego te po wai. ⁴²Tama te nosali po wali bidigo Jisasbolo te po wai, “Jisas, nosali nage tuni bidi pedelama bidibo side, nago te sogo ena kone palao,” te bidi

^m 23:30 Hos 10:8; Ped 6:16

mego Jisas dali te po wai.⁴³ Tama Jisasgo agabolo weyu, te po wai, “Eno nage dali mu po obao, megi tama nage ena dali bugagia bida bida pabo bulude bidaibao,” Jisas te po te bidi dali wai.

Jisas ni pedaide mu isai
(Mat 27:45-56; Mak 15:33-41; Jon 19:28-30)

⁴⁴ Megi te sia tomode dao, tiali goli te sia ge isai, tama be hulia sabo aq yai. Tigidali tq mu hulia siyu ebo tiwai elalubadi, sia ge pio mu egi pai yali. ⁴⁵ Tama te genuai ugwa te Moni Lotu Be tempel tomode walalualu ugwa te tomode mu togwa pai, tama pedai si nigai.ⁿ ⁴⁶ Tama Jisasgo i bomonama mu wai, “Aya, ena mobo eno naga nogoba mubao,” Jisas te po tama olama, tama aga mu isai. ⁴⁷ Te enesigi bidi dabego tuni bidigo te se suai, tama agai Godigo nogi ugwbaba siyu, agai te po wai, “Mu tamao, te bidi Jisas doloba pai bidi mu dao,” te bidigo te po wai. ⁴⁸ Tama tigidali we bidi sisinama, te bidi sela elai hagede baso, tonaluai. Augwaligo te Jisas isibo suali. Tama homu dene eyu, augwa nogo pagasa, tama augwa beba pai. ⁴⁹ Tiali goli, Jisas aga abagi dabe dali, te we dabe me Jisas wali Galili buludu asai, augwali digibulu gana dolaluai. Tama augwaligo te se tigidali suai, te we bidi dabego.

Augwaligo Jisas tigi selama, masigi dedage tomoba muai
(Mat 27:57-61; Mak 15:42-47; Jon 19:38-42)

⁵⁰ Te bidi me deli bidai, te bidi nogi Josep. Te bidi aga Judia tq hanu bidi dao, te hanu nogi Arimatea. ⁵¹ Aga dwagi yai doloba pai bidi bidai. Agai te Godigo we bidi tonalubo sogo asobo tonaluyu bidali. Tama aga te Juda dabego kaunsil digi, agai te meba kaunsil dabego Jisas elabo homude ao wabeo. ⁵² Te bidi Josep te gavman tuni bidi Pailat bidibo digi pelama, te po wai, “Eno Jisas tigi saio,” wai. ⁵³ Tama Pailatgo “Sao,” wai. Tibaso, Josep pelama, Jisas tigi tqba selu dulai. Tama Jisas wiegi yai tedela yai nami ugwago belai, tama Jisas gu page meba mugi pai. Te gu page augwaligo moni genuai masigi tomode nigai. Tama polobadu augwaligo bidi me musiawai digi, gesi mu dao. ⁵⁴ Te sogo Fraide dao, te Juda dabego Sabatde tuabo nai sisi ebo sogo dao. Tama te Sabat tamadi tama pedalainogo ebao.

⁵⁵ Te we dabe augwali Galili buludu Jisas dali asai, augwali Josep wali pai. Tama augwaligo te gu page suai. Tama Josepgo Jisas tigi mena tama mubo, te me te we dabe augwaligo suai. ⁵⁶ Augwaligo polo suai, tama te we dabe augwali augwa beba ma pai. Tama te we dabe augwaligo wel dabe me, denami yai dwagi yai nai me sisila muai, te Jisas tigide mumainogo, aga tigi daumua pidali weyu.

ⁿ 23:45 Sai 26:31-33

Te Sabat sogo gagalali. Tama tibaso, Godigo bomo yai po wali peyu, augwali olo bidiyu, toma tuali.

Jisas gụ pagede ma hodaloai
(Mat 28:1-10; Mak 16:1-8; Jon 20:1-10)

24 ¹Te Sabat sogode olo bidama, te sogo kigamu Sande kigamu augwali te we dabe gụ pageba ma pai. Augwaligo te dwagi yai denami yai nai me, wel dabe me sela pai, polobadu augwaligo sisila muai. ²Tama augwali te gụ pageba sabolama, te gụ page sunumi dąu wali genuai masigi augwaligo suali, te gụ page sunumide munalubo sube, te masigi augwaligo hogogo bele pelama bogo badude munalubo suai. Tama tibaso, te we dabe augwali te gụ page tomoba pai. ³Tiali tama, augwaligo Genuai Bidi Jisas tigi munalubo subeo, te ola be masigi tomode. ⁴Te we dabe augwaligo te tiwai subaso, tama augwali homu hauwa mu yai. Tama augwali we dabe kolesaga tųq̄ pelama, umula pela muai. Tama augwaligo tonalubadi yaide, bidi si polo pedelama, tede dolaluali. Te bidi sigo ugwa da mu udula pela muai. ⁵Tama te we dabe augwali wi elama, augwa gesabidi tq̄ba tonolaluai. Tialima, te bidi sigo augwalibolo te po wai, “Magi baso dagego te bidibo bidi te isai bidi gụ pagede gegebawé? Te Jisas ede bidibe. Jisas ma hodaloai dao. ⁶⁻⁷Dagego Jisas agai dagebolo mani po ma kone palao, Jisas Galili bulude bidiyu te po wai, ‘Ena da te Godigo Bidi Mu dao. Tama augwaligo ena te dwai sę ebo bidi dabego nogoba mawaibao. Tama augwaligo ena te age sai nide elama, tama sela sogo gụ pagede munaluama, ma hodaluibaō,’ agai te po wai,” te bidi sigo te po wai, te we dabebolo. ⁸Tama te we dabe augwaligo Jisasgo polobadu wali po ma augwaligo koneai.

⁹Te we dabe augwali ma pai, tama augwaligo Jisas wali pabo bidi nogi si olama, saq̄a badu deli bidi dabebolo te augwaligo odali po dali, suali sę dali pusali. Tama augwaligo gasa we bidi dabebolo me te yali sę po wai. ¹⁰Tama te po wagi pali we dabe augwaligo nogi e dao. We me nogi Maria, te Makdala bulu we dao. Te we me aga nogi Joana. Te we me aga nogi Maria, aga ogwa nogi Jems. Te we dabe augwali bidai, augwali te we dabe dali gasa we dabe me bidai, te we dabe augwaligo te po Jisas aga wali pabo bidi dabe dali wai. ¹¹Tiali goli, Jisasgo bidi dabe augwaligo homu te we dabego wali po olo tama me te obao, homu yai. Tama augwaligo te we dabego po homuba dąu olama mube, augwaligo homugo tibo po wabao homu yai.

¹²Tialima, Pita polo pelama, gụ page sugi pai. Tama Pita te gụ pageba sabolama, tudi basia selama, te masigi tomoba suai. Tama agai suali, te wiegi yai telela ugwa dabe naga munalubo suai. Agai Jisasgo tigi sube. Tibaso, Pita beba ma pelama, te pedelali sęde aga homu hauwa mu yai.

Bidi sigo Emeus buluba pabo tüde Jisas suai
(Mak 16:12-13)

¹³ Te sogo digi tamao, bidi me si te dwasianu bulu me nogi Emeus teba painogo augwali si te tüdu pai. Te bidi si Jisas wali pabo bidi si dao. Te tü Jerusalem tagalama, Emeusba pabo tü te pade naga. ¹⁴ Te bidi si te tüdu pai, tama augwali sigo tigidali se Jisas dali pedelama yali se te po mimi pai. ¹⁵ Te bidi si te po ola peyu, augwa hasi hanalua peyu, pai. Tama Jisas aga digi te bidi si pade pedelama, augwali hodobo pai. ¹⁶ Te bidi si augwaligo gedugo Jisas suali, tiali goli augwaligo konebe, e Jisas te yaba, te homu ebe, te bidi sigo. ¹⁷ Te Jisasgo augwali sibolo te po wai, “Dage si magi po ola peyu pobawe?” te bidi si dali Jisasgo te po wai. Tama te bidi si dolaluai, tama augwa si homu sege mu yai. ¹⁸ Tama te bidi me nogi Kliopas, te bidigo Jisasbolo te po wei ponoyu, te po wai, “Gasa bulu bidi dabe hauwa augwali megi Jerusalem bulude bidibao. Tama nage deligo nago te se Jerusalemde pedalobo nago subewe?” te bidigo Jisas dali te po wai. ¹⁹ Te bidi agai tama wai, tama Jisasgo augwali sibolo hanalu wai, “Magi sewe?” Tama te bidi sigo Jisas dali te po wai, “Te se te Nasaret bidi Jisasde pedalai. Te bidi Godigo nosali yabo se po wabo bidi, Godigo po ola mabo bidi. Tama te bidigo agai bomai se dali, bomai po dali Godigo gedude dali, te we bidigo gedude dali te se yai,” te bidi sigo Jisas dali te po wai. ²⁰ “Tama te pris tuni bidi dabe dali, te tobolu bidi dabe augwaligo te bidi te moni gavman tunibolo augwaligo nogoba muai. Tama gavmanigo po weyu, ‘Te bidi elao,’ te po wai. Tama augwaligo te bidi ni pedaide elai. ²¹ Tiali goli, polobadu dago homu tama yai, te bidigo agai da Israel we bidi te Rom gavman nogode bidali tagalama, agai da tonalumai yaibao. Dago te homu polobadu yai dao. Tiali, menio. Tama gasa po me tama telaluai, te se pedelai, tama megis te bidi duba elali, sela sogo bidibao,” te bidi si Jisas dali te po wai.

²² “Te se eyu, gasa se me pedelali, megis. Tama megis da hani we dabe me badu augwaligo da midigi sabo se yai. Kigamu mu te we dabe augwali te bidi muani gu pageba augwali pai,” te po Jisas dali te bidi sigo wai. ²³ “Tama augwaligo Jisasgo tigi subeo. Tama augwali ma asai, tama augwaligo te po wai, ‘Dago Godigo se ebo ensel bidi dabe naga suali,’ tama te ensel bidi dabe augwaligo te po wai, ²⁴ “Te Jisas aga ma bidibao,” wai. Tama da tomode bidi meba augwali pelama, te gu page sugi pai. Tama augwaligo te we dabego wali po tiwai tama suali. Tiali goli, Jisas aga tigi te augwaligo subeo,” te bidi sigo Jisas dali te po wai.

²⁵ Te Jisasgo te tama po augwali sibolo wai, “Ao, dage sigo homu kolesaga meniwe? Dage sigo homu te polobadu Godigo se nosali pedelabo po ola mani bidigo po naga konealuai dawe?” Jisas po augwali si dali wai. ²⁶ “Magi basowe tama tiyu dage sigo koneai meniwe, Godigo sa

muani bidi Krais aga dene bolo selama, isilama, tama nosali aga genuai nogi mu saibao,” Jisasgo te po wai. ²⁷Tama Jisasgo Mosesgo aşeani pode gagalama, tama tigidali Godigo sə nosali pedelabo po ola mani profet bidi dabego po Jisasgo te bidi sibolo ola mawai. Tigidali po buku dabede wali po Jisas aga tigide digi yali sə po wai. Te Jisas aga dali po page mu te bidi si dali ola mawai.

²⁸ Te augwali pelama, te bidi si pabo bulu teba sabolai. Tama Jisas agai mu pabo aq naga yai. ²⁹Tialima, te bidi sigo Jisas “Pigio,” te po wai, “nage dadi si dali bidao,” wai. “Giliga iba dega sainogo ebo, tama pəde digi tama be hulia saibao,” wali. Tama tibaso, Jisas augwali sigo be tomoba pelama, augwali si dali bidai. ³⁰Nosali augwali nai tuainogo, tama Jisas augwali si dali dulaluai. Tama Jisasgo te giguai nai bret selama, Godibolo hanaluyu usu da wai, tama te nai togolama, augwali sibolo mawai, Jisasgo. ³¹Jisas agai tama tiwai tama augwali sigo gedu pedelebo tiwai ilali, tama te bidi sigo Jisas koneai. Tama Jisas polo hagawai, tama te bidi sigo Jisas ma subeo. ³²Tama te bidi si augwa hasi po weyu, te po wai, “Dadi si tədu asai, tama Jisas agai dadi si dali po ola asai, tama Jisas agai bukude po page dadi si dali hania ola mawai, te sogo dadi sigo homu mu hogodaluai,” te bidi sigo te po wai.

³³ Te bidi sigo te po wai, tama te sogo tama te bidi si augwa si Jerusalem buluba ma pai. Tama te bidi sigo te Jisasgo bidi nogo si olama, səqə badu deli bidi augwalibolo te bidi sigo te bage aga abagi dabe dali augwali deliba sisinama, bidalubo suai. ³⁴Tama augwaligo te bidi sibolo te po wai, “Mu tamao, Genuai Bidi ma hodaloai, aga ma pedalobo Saimongo suai,” augwaligo te bidi si dali te po wai. ³⁵Tama augwali sigo te tigidali sə augwali sigo təde suali po augwali dali wai. Tama te bidi sigo te po wai, “Jisas agai te giguai nai bret togolama, da si mawai, tama dadi sigo te sogo megi koneai, te Jisas dao,” augwali sigo te po wai.

Jisasgo bidi dabe augwaligo Jisas suai (Mat 28:16-20; Mak 16:14-18; Jon 20:19-23)

³⁶ Augwaligo te po odubadi, tama Jisas aga te augwali tomoba polo dolagasai. Agai augwalibolo, “Homu tegaluama, bugagia bidiəq,” wai.

³⁷Tialima, augwali gegemani siyu, augwali homu hogodaluai, tama augwali wi yai. Augwali te homu yai, augwaligo Jisas isi bidi subo, tama tiyu augwali wi yai. ³⁸Tama Jisas agai augwalibolo te po wai, “Magi baso dagego homu hogodalualiwe? Magi baso dagego homu si ebawe?” Jisasgo te po wai, aga bidi dabe dali wai. ³⁹“Dagego eno nogo səqə suao. Ena ena digi bidibao. Dagego nogo ena tigiba munama, suao. Isi bidi da, mi meni yai, dili meni yai. Tiali goli, ena da dili dali, mi dali elalubao,” Jisasgo te po aga bidi dabe dali wai. ⁴⁰Jisasgo te po olama, tama aga nogo dali səqə dali augwali bidibolo waselai. ⁴¹Augwaligo Jisasbolo homu munama, te

Jisas dao augwaligo me konebe. Augwali dwagi yai homu mu yai digi, augwali noma sai. Tama Jisas agai augwalibolo te po wai, "Tama dagego tubo nai ede me munalubowe?" Jisasgo augwalibolo hanalu wali.⁴² Tama augwaligo siade ulai suğuş dage te Jisas manio.⁴³ Tama Jisas agai te suğuş selama, tubo tama augwaligo suai, Jisas wali pabo bidi dabego.

⁴⁴ Te Jisasgo augwalibolo te po wai, "Polobadu ena dage dali bidibadi, tama eno dagebolo wai dao, tigidali po te polobadu bidi Moses bidibo side aşəani, te polobadu Godigo po pusa mani bidi dabego aşəani bukude me, te buku nogi Sam tede me aşəani po me, te enade aşəani po tigidali nai igilama mu walaibao wai," Jisasgo te po wai.⁴⁵ Tama Jisasgo augwalibolo homu ula ilai, tama augwaligo Godigo aşəani po page hania konemainogo yai.⁴⁶ Tama Jisasgo augwalibolo te po wai, "Godigo bukude tama te tobage po wai,

'Godigo sa muani bidi Krais dene polo selama,
isilama, tama sela sogo aga gụ pagede bidama,

⁴⁷ tama hodaluama, tama aga nogigo bomogo
aga sę ebo bidi dabe augwaligo agai po tigidali
bidi hanibolo ola mawaibao, te we bidi augwaligo
homu begelemainogo yaibao. Augwaligo homu
begelama, tama Godigo augwaligo yali dwai dwai
sę sela sawaibao. Te Godigo sa muani bidi agai sę
ebo bidi dabego te tobage po tigidali bidi hanibolo
wagi paibao, te sę augwaligo Jerusalem bulude
gagaliba.'

⁴⁸ Te po bukude aşəai dao. Tama dagego eno te yali sę tigidali suali, eno wali po tigidali odali. Tama dagego we bidibolo eno wali po me, yali sę po me, te pusa mawaibao.⁴⁹ Te nai polobadu eno Aya God agai dagebolo mawaiba wali nai, te eno megi dagebolo tagala palaibao. Tialima, dage te Jerusalem hanude bidiqo. Dage bidibadi, tama te dagaludu bomo dageba dulaibao," Jisasgo augwalibolo te po wai.

Godigo Jisas dagaluba sela holai (Mak 16:19-20; Tpi 1:9-12)

⁵⁰ Te Jisasgo agai bidi dabe augwali odasa, bulu me nogi Betani paba sabolai. Tama Jisas agai nogo uwababa selama, tama bugai homu ilabo po augwalibolo wai.⁵¹ Tama agai te bidi dabebolo te po madubadi, tama Jisasgo augwali taga pai, tama Godigo Jisas dagaluba sela holai.⁵² Tama te bidi dabe augwaligo Jisasgo nogi uwababa munama, tama dwagi yai homu mu eyu, Jerusalem buluba ma geasa peyu yai.⁵³ Tama tigidali sogo augwali te Moni Lotu Be tempel te be tomoba pelama, tama augwaligo Godigo nogi uwababa mu sai, Jisasgo sę ebo bidi dabego tama tiwai, God dali.

Dwagi Yai Gesi Po Jongo Aşənai

Hasia nedebə tau sabo po

Te Jongo Jisasde aşənai pogo te dabolo ola mabo dao, te Jisas da, te Godigo Ogwa mu da, te aga te da tqde bidibo we bidi ma dobola sabo bidi dao. Godigo agai po dabolo ola mawainu, tama agai aga Ogwa daba tagala palali. Tama tibaso, Jongo Jisasde te po wai, aga da te Godigo po dao, tama te pogo te bidi tigi siyu tama bidi gagawai pedalali. Tama Jongo homugo te agai Jisasde aşənai po nedebə we bidi augwaligo homu te poba begi peyu, tama augwaligo te bidada peyu, bidada pabo ula siyu bidaibao.

Te we bidi augwaligo te Jisas te Godigo Ogwa da hania konemainogo eyu, tama Jisasgo haniani bomai sə yali po te Jongo aşənai. Tama Jisasgo ola mani po me Jongo aşənai, te bobobage po dao. Aga isabo sogo pəba yagaselama, tama te sogo pio Jisasgo po hauwa aga wali pali bidi dabebole ola mani, te augwali tau somainogo yai.

1 ¹Polobadu polobadu mu, te tigidali nai pedalisiama, meni yai digi,
Po bolo bida. Po God dali bida. Tama te Po aga digi God dao.

²Polobadu polobadu mu, te tigidali nai gagalobo sogode, te Po God dali bida. ³Godigo te Pobolo po weyu, tigidali nai nigao wai. Tama Pogo tigidali nai nigai. Tama gasa nai gasa tədu me pedalobeo. Menio. Tigidali nai pedalali te Po aga digi nigelama, pedalai. ⁴Bidabo bomo Po agade elalubo. Tama agai bidabo bomo te we bidi augwaligo ula dao. ⁵Te ulago hulia sabobolo te ula mabo dao. Tama hulia sabogo te ula me sogo halubeo.

⁶Godigo bidi me deli tagala palai, te bidi nogi Jon. ⁷Jon agai te ula po te we bidibolo pusagasai. Te we bidi tigidali augwaligo te po odoyu, augwa homu tigidali te poba konealumainu eyu, te Jongo te po pusagasai. ⁸Jon aga digi te ula menio. Tiali goli agai te ula po augwalibolo te po wagasai. ⁹Te ula da te ula mu dao. Tama aga te sogo tqba dulai, tigidali we bidi ula mawainogo yali.

¹⁰Te Po e tqde bida. Aga digi e tq nigai. Tiali goli tqde bidibo we bidi augwaligo aga konebeo. ¹¹Aga bulu muba asai. Tiali goli aga hani

augwaligo aga sabeo, gesebeo. ¹²Tialima, aga augwali bidi dabe mego sali, gesalio. Augwaligo augwa homu agaba muani. Tama tibaso, agai augwalide usu da po olama, tama augwali Godigo wai puluba pedalai dao. ¹³Tama augwali Godigo wai puluba gagawainogo, augwali augwa ida ayago kanemego ame nabeo. Te augwali Godigo wai te augwa tigigo homugo me ame nabe. Bidigo homugo menio. God aga digi augwali aga wai puluba pedalali dao.

¹⁴Te Po aga digi bidi pedalai, tama da we bidi tomode aga bidai. Dago agai genuai nogi dali agai moni bomo dali si suai. Te Godigo Ogwa deligo genuai nogi dali bomo dali si dago suai. Agai te we bidi olo tau sabo sę hauwa eyu, te agai mu po naga weyu yai. ¹⁵Te we bidi baptais mabo bidi Jon agai te we bidibolo agai po weyu i tama wai, “Polobadu eno te po wai, ‘Nosali bidi me asobo bidi agai eno nogi aiyaba elaluaibao. Magi basowe? Ena ame nesiąbadi, aga polobadu mu bidai. Tama tibaso, agai nogigo eno nogi aiyaba elalubo dao,’ eno te po wai. Tama megı te bidi e dao, eno dagebolo polobadu wali po gilama,” Jongo te po wai. ¹⁶Aga te olo tau sabo sę hauwa mu ebo dao. Tama dabolo agai ma eyu, ma eyu idu gebo dao. ¹⁷Te bidi nogi Moses agai da Juda dabego wąj mu augwalibolo agai Godigo bomo yai po ola mawai. Tiali goli, Jisas Krais agai genuai olo tau sabo sę dali mu po dali si magasai. ¹⁸Menio. Bidi me deligo God munu me gedugo subeo. Mu menio. Tialima, te Godigo ogwa deli aga aya pąde bidibo, agai Godigo page dabolo ola mawai dao.

We bidi baptais mabo bidi Jon agai po pusali

(Mat 3:1-12; Mak 1:1-8; Luk 3:1-18)

¹⁹Te Juda dabe augwaligo pris bidi dabe dali, Livai bage dali augwaligo bidi dabe te Jerusalemdı te Jon bidibo digiba tagala palali, augwaligo Jon hanalu omainogo yali. Tama augwali Jon pageba sabolama, te po hanalu wai, “Nage dewe?” ²⁰Tama Jon agai hogwa sabeo, po dualobeo, agai po hanilama weyu, te po wai, “Ena Godigo sa muyu asaiba wali bidi Krais menio,” Jongo te po wai. ²¹Tama augwaligo Jonbolo hanalu wai, “Magi yaliwe? Nage te bidi polobadu Godigo po wali bidi nogi Elaija dawe?” Tama Jongo te po wai, “Ena te bidi Elaija menio.” Tama augwaligo te po wai, “Dago te Godigo po wabo bidi asobo tonalubo dao. Nage te bidi dawe?” Tama Jongo te po wei ponoyu, te po wai, “Ena te bidi menio.”^a ²²Tama augwaligo Jonbolo te po wai, “Nage de dawe? Dago te da tagala palai bidi dabebolo po wei ponainogo, dabolo wao. Naga digi nage de da wabo dawe?” ²³Tama Jongo te po wai, “Te polobadu bidai bidi nogi Aisaia, Godigo po polo ola mani profet bidi, agai te tobage po wai, ‘Bidi me deligo bidi meni yai bulu tomode agai bomonama i weyu, te po

^a 1:21 Bom 18:15, 18; Mal 4:5

obao, “Te Genuai Bidigo asabo tū dodolao.” Te po wabo bidi ena dao,” Jongo te po wai.^b ²⁴⁻²⁵Tama te Farisi bidi hani dabego tagala palai bidi dabe augwaligo te po hanalu wai, “Nage Godigo sa muani bidi menio, tama nage te bidi nogi Elaija menio, nage te Godigo po polo ola mani bidi menio. Tama nago magi baso te we bidi baptais mobawé?” te po hanalu wai. ²⁶Tama Jongo augwalibolo po wei ponoyu, te po wai, “Eno augwali olo aigo naga te baptais mabo dao. Tialima, dage tomode bidi me deli te dolalubao. Tama dagego te bidi konebeo. ²⁷Te bidi aga ena tudi badu nosali asaibao. Ena digi ena dwagi yai bidi menio. Teyu, eno agai saga nadoba bono eno pisigaboeo,” Jongo te po augwali dali wai. ²⁸Te po bulu me nogi Betani te badu pedalai, te aji nogi Jordan sesege badu. Te bulude Jongo augwali Juda we bidi baptais mawai.

Jisas Godigo kibu sipsip wai tiwai dao

²⁹Te sogo kigamu Jisas asobo Jongo suai. Tama Jongo te we bidibolo te po wai, “Suao, te bidi da, aga Godigo kibu sipsip wai dao. Agai te tigidali tqde bidibo we bidi augwaligo yali dwai sęgę te sela sawaibao. ³⁰Polobadu eno te po wai, ‘Nosali bidi me asobo bidi agai eno nogi aiyaba elaluabao. Magi basowe? Ena ame nesiabadi, aga polobadu mu bidai. Tama tibaso, agai nogigo eno nogi aiyaba elalubo dao,’ eno te po wai. Tama megı te bidi e dao, eno dagebolo polobadu wali gilama. ³¹Eno digi eno te nosali asobo bidi mena bidi dawe, te eno konebeo. Tiali goli, eno aga te dage Israel we bidi dali ola momainu, eno we bidi baptais magasiyu asai,” Jongo te po wai.

³²Te Jon agai suali sę te po weyu, te po wai, “Eno suali, Godigo Mobo Bidi dagalu tagalama, tqba dulubuo, te ba hi tiwai asobo eno suai. Tama te ba hi Jisasgo tigi dolo dulubo, te eno suai. ³³Eno digi te nosali asobo bidi eno me konebeo. Tialima, Godigo ena tagala palu, we bidi baptais mao weyu, enabolo te po wai, ‘Te eno Mobo Bidi dulama, bidi mede bidibo nago sueibao. Te bidi da, te nosali asaibao wali bidi dao. Tama te bidi agai te we bidibolo te eno Mobo Bidi mawaibao. Agai te Mobo Bidi augwali we bidi baptais mabo tiwai mawaibao,’ Godigo enabolo te po wai. ³⁴Tama ena digi eno sulama, tama eno dagebolo te po obao, te bidi Jisas aga Godigo Ogwa dao,” Jongo po tama wai.

Jisasgo aga wali pabo bidi me si me si i olama sai

³⁵Do tama dao wabo side Jon aga wali pabo bidi si Jon aga dali ma dolalua. ³⁶Tama Jon agai Jisas soabo suali, tama Jongo te po wai, “Suiąo. Te bidi te Godigo kibu sipsip wai tiwai dao,” Jongo aga wali pabo bidi si dali te po wai. ³⁷Te bidi sigo agai wali po odama, tama augwali

^b 1:23 Ais 40:3

si Jon tagalama, Jisas wali pai.³⁸ Jisas begelama suali, te bidi sigo aga wali asai. Tama Jisas agai te bidi sibolo te po wai, “Dage sigo magi nai gegebawe?” Tama te bidi sigo te po wai, “Rabai, nage mena bede bidibawe?” Te po Rabai, te page, po ola mabo bidi te page elalubo dao.³⁹ Tama Jisas agai te bidi sibolo te po wai, “Dage si aselama, suagasao.” Tama te bidi si pelama, Jisas bidibo digi sugi pai. Te tama giliga dega sabo sogo 4 klok augwali si Jisas dali pelama, tama te piode augwali si Jisas dali bidai.

⁴⁰ Te Jongo wali po odali bidi si augwali si Jisas wali pai. Tama bidi me deli aga nogi Andru, te aga ama nogi Saimon Pita.⁴¹ Tama polo agai aga ama Saimon gegegi pai, tama agabolo te po wali, “Dago te Mesaia bidi suali,” Andrugo aga ama Saimonbolo te po wai. (Dago te nogi Mesaia wali begelama, tama te nogi poai Krais dao, Godigo sa muyu asaiba wali bidi dao.)⁴² Tama Andru agai aga ama Saimon odasa, Jisas bidibo madigi pai. Jisas agai Saimon sulama, te po wai, “Nage Saimon, Jongo ogwa dao. Nosali nago nogi Sifas waibao,” Jisasgo te po wai. (Dago te nogi Sifas begelama, tama wai, Pita wali nogi, te nogi page masigi dao.)

Jisasgo Filip dali Nataniel dali ‘Dage si ena wali asao’ wali

⁴³ Do tama da wabo side Jisas aga homugo Galili buluba paibao wai. Tama Jisas agai Filip suai, tama agabolo te po wai, “Nage ena wali asao,” te po wai.⁴⁴ Filip aga te Betsaida be nanide bidai bidi, te bulu te Andru dali Pita dali augwali sigo page bulu.⁴⁵ Filip pelama, Natanielbolo te po wagi pai, “Te bidi polobadu Mosesgo te bomo yai po bukude aşənai po dali, tama Godigo polobadu po ola mani profet bidi dabe me, augwaligo te bidi dali po aşəi, te bidi dago suai. Te bidi Jisas aga Nasaret bulu bidi Josepgo ogwa dao,” Filip agai te po wai.⁴⁶ Tama Nataniel agai te bo weyu, te po agabolo ola mani, “Teyu da, dwagi yai nai me deli te Nasaret bulude pedalaibawe?” Filipgo agabolo te po wali, “Nage aselama, suagasao.” Tama augwali si Jisas pageba pai.

⁴⁷ Jisasgo Nataniel aga pageba asobo suali. Tama Jisasgo te bidi dabebolo tama wali, “Suiqo. Te asobo bidi aga Israel bidi mu dao. Tibo po aga homude me elalubo meni.”⁴⁸ Natanielgo Jisas hanalu weyu, te po wai, “Magi ilama, nago ena koneaniwe?” Jisasgo agabolo po wei ponoyu, te po wai, “Hasia, Filipgo nage i wasiqbadi, te nage ni kaya pagede bidibadi, te sogo nage eno suai dao,” Jisasgp te Nataniel dali te po wai.⁴⁹ Natanielgo Jisasgo po wei begelai, “Po ola mabo bidio, nage Godigo Ogwa dao, nage Israel we bidigo tuni bidi dao.”⁵⁰ Jisasgo po wei ponario, “Eno nagebolo te po wai dao, ‘Nage eno ni kaya pagede suai dao.’ Tama nago te po odobaso, naga homu tigidali enaba muaniwe? Ao, tama nosali nago sueibao, genuai sego eno megı yali te şe aiyaba elaluabao.”⁵¹ Tama Jisasgo agabolo ma naga wai, “Mu tamao, eno mu

po dagebolo obao, nosali dagego dagalu dala pabo sueibao. Tama dagego Godigo dagalude sə ebo ensel mobo bidi augwali ugwbaba holoyu, aiyaba duluyu ebo dagego sueibao. Tama augwali enaba asiyu yaibao, ena da te Godigo Bidi Mu dao,” Jisasgo te po wai.

Bidi me deli Kana bulude we sai

2 ¹Te Jisasgo Nataniel dali te po olama, si sogo biliama, sela sogo wabo side tama bidi me deligo Kana bulude we sai. Te Kana bulu te Galili tə pedai tomode elalubao. Tama Jisas aga ida te we sabo bede bidai. ² Augwaligo Jisas aga bidi dabe dali augwali i wai, Jisas aga bidi dali augwali aselama, te we sabo suagasomainogo, augwaligo te po wai. ³Tama te bomai aq̄ wain silai. Tama Jisas aga idago agabolo te po wai, “Augwaligo bomai aq̄ wain meni, te sia salio,” Jisas dali aga idago te po wai. ⁴Tama Jisasgo aga idabolo te po wai, “Ida, nago enabolo te po magi baso obawe? Eno we bidi augwali tau sabo sogo te pedalobeo,” Jisasgo aga ida dali te po wai. ⁵Jisas aga idago augwali te we sabo be page bidigo sə ebo bagebolo te po wai, “Jisasgo po me deli dage dali obaso da, teda dagego te po wali pao,” te po wai. ⁶Te moni masigi sene a naga olama, me badu nogo deli badu munalubo. Tama te tobage sene deli deli augwaligo aq̄ hauwa paḡawai. Godigo augwalibolo dage usu da omainogo, te Juda dabe augwaligo nai tuainogo eyu, hasia bolo augwa nogi aq̄ polo telawai. ⁷Tama Jisasgo te sə ebo bagebolo te po wai, “Wę sigibao, e moni masigi sene dabe paḡa yao.” Tama augwaligo te masigi sene dabe mu paḡawai. ⁸Tama Jisasgo augwalibolo te po wai, “Te aq̄ me badu dwasianu genagide manama, tama sela pelama, te tubo nai tonalubo bidibolo magibao,” te po wai. Tama tilama, augwaligo te aq̄ sela pai.

⁹Te tubo nai tonalubo bidigo te aq̄ agai polo tula suai, megı tama te bomai aq̄ wain pedalali aq̄ agai polo tula suai. Tama agai konebeo, augwaligo menade sali. Tialima, te sə bidi augwaligo te aq̄ tuali augwaligo koneai. Tialima, te nai tonalubo bidigo te we sali bidi agai i wai. ¹⁰Tama asama, agai te bidibolo te po wali, “Tigidali bidigo da, augwaligo dwagi yai bomo aq̄ wain polo dobabo dao. Tama nosali, augwali bidi dabego te aq̄ hauwa tulama, tama augwaligo dobo aq̄ yali aq̄ te dobabo dao. Tiali goli, nago naga dwagi yai aq̄ wain naga dąq̄ olaluama, tama megı tama nago sela asalio,” agai te po wai.

¹¹Te bomai sə Jisasgo yali bomai sə hasia mu yai. Te Jisas agai te Galili tə pedai badu tomode, te dwasianu be nani nogi Kana, tede te sə yai. Tama Jisas aga bomo augwalibolo ola mawai, tama Jisas aga wali pabo bidi augwa Jisasba homu tigidali muai. ¹²Te sə silama, tama Jisas aga Kaperneam buluba pai. Aga ida me, aga ama dede me, aga wali pabo bidi dabe me, augwali hodobo pai, tama augwali te bulu Kaperneamde osogo bidigi pai, si sela sogo bidai.

**Jisasgo te bidi dabe augwali Moni Lotu Be tempel tomode nai dabe
dobu si ebadi sela sawai**
(Mat 21:12-13; Mak 11:15-17; Luk 19:45-46)

¹³ Te Juda bage augwaligo bo disawai bret tuabo side te pade tama o, te si nogi Pasova dao. Tama Jisas aga te Jerusalem moni be naniba pai. ¹⁴ Tama Jerusalem be nani tomoba sabolama, tama te Moni Lotu Be tempel tomode Jisas agai suali, augwali bidi dabe augwa kibu bulmakau me, kibu sipsip me, ba dabe, tama augwaligo te naide maket ebo se eyu, te Moni Lotu Be tempel tomode yai, we bidi augwaligo te nai si dobu eyu abelama, Godibolo momainogo yai. Tama Jisasgo suali, ma gasa bulu masigi dobu si ebo bidi dabe da augwali ni nami pade dulalubo suali. ¹⁵ Tama Jisasgo te se sulama, tama agai bono dabe selama, bi nigai. Bi nigliama, agai te kibu bulmakau dali kibu sipsip dali tigidali te tempel bede augwali bigo elama, buluba gudulai. Tama Jisas agai te masigi dobu si ebo bidi dabego masigi dali ni nami dali gea palali. ¹⁶ Tama agai ba dabe dobu si ebo bidi dabebolo te po wai, “Te nai sela pao,” wai. “Dagego eno ayago be te nai dobu ebo be tiwai egio,” Jisasgo augwali dali te po wai. ¹⁷ Jisas aga wali pabo bidi dabe augwaligo po me Godigo po bukude wali po me ma koneai. Te bukude te po wai, “Eno homugo nago be tonalubo homu bomo ebo dao. Tama augwaligo enabolo dene mawaibao.”

¹⁸ Te Juda dabe augwaligo te sulama, Jisas dali te po wai, “Mena bidigo nagebolo ‘Te nai sela sayao,’ obaso, tama nago te nai dabe sela sayaniwe? God agai nagebolo te po weyu da, teda nago naga moni bomai se me deli yao. Tama dago nago te se ebo sulama, Godigo nagebolo ‘Te se yao’ wali dago koneabao,” Juda dabe augwaligo Jisasbolo te po wai.

¹⁹ Tama Jisasgo po wei ponoyu, te po wai, “Dagego e lotu be tempel hugibaso, tama sela sogo eno polo te be ma se yaibao,” Jisasgo te po te Juda dabe dali wai. ²⁰ Tama Juda bage augwaligo te po wai, “Te tempel Moni Lotu Be se yani kibu be bidi sese si olama, tama a naga olama, me badu nogi deli badu kibu be te be se yai dao,” te po wai. “Tama dago te be hugilama, tama sela sogo nago te be polo me se yaibawe? Woo, nage usu egobeo,” te po Jisas dali wai. ²¹ Tialima, Jisasgo te tempel lotu be po wali aga tigide po wali, te Moni Lotu Bede meni. ²² Tilama, tama nosali Godigo Jisas gu pagede ma hodolai, te sogo Jisas aga wali pabo bidi dabe augwaligo Jisasgo polobadu te wali po augwaligo ma koneai. Tama augwaligo Godigo bukude muani po dali, Jisasgo wali po dali, te po siba augwa homu muai.

Jisasgo tigidali bidi konea silai

²³ Te bidi Jisas bo disawai nai bret tubo side, te Pasova side, aga Jerusalem bulude bidibadi, tama we bidi hauwa augwaligo agai bomo

yai sə ebo suai. Tama sulama, tama augwaligo augwa homu tigidali Jisasba muai. Augwaligo te homu yai, aga te Godigo sa muyu, asaiba wali bidi dao. ²⁴Tialima, Jisasgo te homu yai, augwaligo konesiabo əq, te homu yai. Tama tibaso, Jisas aga digi augwaligo nogoba mubeo. ²⁵Magi basowe? Jisas aga digi te tigidali we bidigo homu mu konea silai. Gasa bidi mego agabolo te we bidigo homu me ola magobeo.

Jisasgo te bidi Nikodemus dali po miai

3 ¹Bidi me deli bidai, te bidi nogi Nikodemus. Te bidi Farisi bidi hani dao. Tama te bidi Juda bage augwaligo tobolu bidi deli dao. ²Te bidi Jisas bidibo digi hulide aselama, te po wai, “Po ola mabo bidi, dago koneai, Godigo nage e təba po ola mabo bidi nigelama, tagala palai. Tibaso da, Godigo bidi me deli dali bidisiayu da, agai te sə Jisas nago ebo bomai sə tiwai me egobeo,” te bidigo Jisas dali te po wai.

³Jisasgo Nikodemusbolo po wei ponoyu, te po wai, “Mu tama, eno nagebolo obao, bidi me te ma ame nabo tiwai eyu, gesi ma pedalisiayu da, te bidi agai Godigo we bidi tonalubo sə me sugobeo,” Jisasgo te po wai. ⁴Nikodemusgo Jisasbolo te po wai, “Magi ilama, monu dabe yai bidi ma ame nabo tiwai eyu, gesi bidi ma pedalaibawe? Teyu da, aga idago haligaba ma bula selama, tama idago ma ame naibawe?” Nikodemusgo Jisasbolo te po hanalu wai.

⁵Jisasgo te po wei ponoyu, te po wai, “Mu tama eno nagebolo obao, bidi əjde baptais sabo əj̄i dali Godigo Mobo Bidi dali gesi ma gagasiayu da, te bidi God bidibo digi tomoba pogobeo. ⁶Tigigo ame nabo nai, te tigi dao. Tama te nai God agai Mobo Bidigo ame nabo nai da, te mobo bidi dao. ⁷Eno ‘Dage gesi ma pedelao,’ te po wabo pode nage noma sigio. ⁸Te wali asobo da, te aga homu kolesagago te wali gasaba gasaba pabo dao. Nago te wali asobo po naga odobo dao, tialima nago mena badu pedalama, tama ma mena badu ma paliwe, te po wabo dao. Tigidali bidi gesi noma pedalobo augwaligo te tiwai egibi naga ebo dao,” Jisasgo te po wai. ⁹Nikodemusgo Jisasbolo te po wei ponai, “Te nai mena tama pedalaibawe?” te po wai. ¹⁰Jisasgo Nikodemusbolo te po wei ponoyu, te po wai, “Magi yaliwe? Nage te Israel bidi dabe te bomai po page ola mabo bidi dao. Tama magi baso nago te nai konebewe? ¹¹Eno mu po nagebolo obao, dago e wabo po da te dago koneani po obao, tama dago po pusali da, te dago suali sə po dao. Tiali goli dagego dago wali po te dagego tudiba muanio. ¹²Eno dagebolo eno e təde nai po obao, tama dagego me ‘Te mu tama dao’ homu ebeo. Tibaso da, eno dagebolo dagalude nai po obaso da, te dagego mena tama te poba duga homu mugowe? ¹³Gasa bidi me te Godigo bidibo madigiba me holobeo. Ena da Godigo Bidi Mu da, tama ena naga te dagalu tagalama, e təba dulai, enaduba deli digio. ¹⁴Polobadu Mosesgo te kapago nigai tibo hasamani

te bidi meni yai bulude ni donogo ugwaba sai. Te tiwai yali gilama, tama augwaligo te Godigo Bidi Mu ugwaba sela mueibao.^c ¹⁵ Magi basowe? Tigidalii bidi enaba homu mubaso da, augwali tigidaligo dwagi yai bidibo bomo selama, bidada peyu, mu bidada paibao,” Jisasgo te po wai. ¹⁶ God aga Ogwa deli digi mu bidibao. Tialima Godigo e tqde bidibo we bidi godolo mu eyu, tama augwali tau somainogo eyu, God agai Ogwa te e tqba tagala palali. Tama tiali da, tqde we bidi augwa homu agaba mubaso da, augwali hagaidali weyu, augwali dwagi yai bidabo bomo selama, bidada peyu, bidada pomainogo, Godigo te se yai. ¹⁷ Godigo aga Ogwa e tqba tagala palali te e tqde we bidi po tu dodolomainogo me tagala palobeo. Te menio. God aga Ogwa tagala palali da, te da tqde we bidi ma dobola sagasomainogo yai. ¹⁸ Niwai bidigo God aga O gwaba homu mubaso da, teda te bidi da aga po tu menio, Godigo agabolo dene magobeo. Tiali ma, niwai bidi aga Godigo O gwaba homu musiawani bidi da, Godigo te bidibolo po tu dodolama, dene mawaibao. Magi basowe? Te bidi agai God agai ogwa teba homu mubeo. ¹⁹ Tama te po tu yabo page tama telalubo. Ula yali e tqde polo pedalai dao. Tialima, bidi dabe augwaligo homugo hulia sabo augwaligo godola pai. Augwaligo ula te godolo ebeo. Magi basowe? Augwaligo kolesaga te dwalio. ²⁰ Dwai kolesaga ebo bidi agai te ulade boi bidi ebo dao. Agai dwai kolesaga yali hania ugwaba sela muidali weyu, aga te ulaba asobo menio. ²¹ Tialima, te dwagi yai kolesaga mu ebo bidi, te bidi aga da te ulaba pedalobo dao. Tama bidi dabe augwaligo te bidi agai se yali te Godigo bomode te se yai bugagia sumainogo, te bidi ulaba asobo dao.

Jongo Jisas po hanilama wai

²² Te nosali Jisas aga bidi dabe dali augwali hodobo Judia tq pedai teba poloba pai. Jisas augwali dali tede bidiyu, tama augwaligo Judia we bidi baptais mani. ²³ Jongo me te we bidi baptais mani bulu me nogi Ainon, te Salim bulu pade o, tede te we bidi baptais mani. Aji hauwa te mu te bulude elalubo. Tama we bidi augwali Jon bidibo digi aselama, baptais sagasали. ²⁴ Bidi Herot tego Jon te sogo kalabusiba me musiabadio.

²⁵ Te Jon aga wali pabo bidi dali te Juda bidi me deli dali, augwali tomode konila po wai. Te po konila ebo page te we bidi baptais mabo kolesagade po wai. ²⁶ Tama augwali Jon bidibo digi pelama, tama augwaligo Jonbolo te po wai, “Po ola mabo bidio, polobadu nage Jordan pabo aji u badu bidibadi, nago bidi me dali bidiyu, nago te bidide dwagi yai po wai. Tama megii te bidi agai te we bidi baptais mobao. Agai we bidi baptais mobaso, tama tigidali we bidi augwali te bidi bidibo digi pabo dao,” Jon wali pabo bagego Jon dali te po wai. ²⁷ Jongo po wei

^c 3:14 Nam 21:9

ponoyu, te po wai, “Te God agai deli nai deli bidibolo me masiayu da, te bidi agaduba naga me sogobeo. ²⁸Dagego eno polobadu te wali po odai dao, ‘Ena Godigo sa muyu asaibao wali bidi Krais menio, tiali goli Godigo ena “Polasa aselama, te bidigo asobo tü dodelao,” te po Godigo ena dali wai.’ ²⁹Tama tibaso, bidi me deligo we sobaso da, te we te bidigo sali we dao. Tama te bidi aga abagi dolaluyu, aga abagigo po odobao. Tama we sali bidigo po wabode, tama aga abagi megı tama dwagi yai homu ebo dao. Tama te tiwai, Jisas aga sę megı e baso, tama ena dwagi yai homu mu ebao. ³⁰Agai nogi uwgaba dią holoyu, eno nogi da aiyaba elalumainogo yaobao,” Jongo te po wai.

³¹ Bidi ogwadu asobo bidi, te bidi agai tigidali bidi aiyaba elaluai. Tode pedalai bidi da, te bidi agai e tode nai naga po wabo dao. Tialima, dagaludu asobo bidi te agai tigidali bidi aiyaba elaluai dao. ³² Te bidigo agai po wabo da, te nai dabe agai sulama tama agai odolama te po wai. Tialima, bidi me deligo agai te wali po selama, tama dą̄ wabe. ³³ Tialima, niwai bidigo agai te po selama, dą̄ wali da, agai te po usu da waibao, God agai mu po naga wabo dao. ³⁴ Te bidi Godigo tagala palali bidi, te bidi agai Godigo po pusubo dao. Magi basowe? Godigo agai Dwagi Yai Mobo Bidi agabolo habuge me mabeo, sese mu mawai. Tama mobaso, te bidigo Godigo po pusubo dao. ³⁵ Godigo aga Oggwa delide dwagi yai homu yai. Tama God agai tigidali nai aga Oggwago nogoba mawai. ³⁶ Niwai bidi agai homu tigidali te Godigo Oggwaba mubaso, te bidigo bidabo bomo da bidada peyu, bidada paibao. Tialima, niwai bidigo Godigo Oggwago po wali pisabaso da, te bidi aga bidabo bomo me sogobeo. Menio. Godigo sębę te bidide elalua paibao.

Jisasgo Samaria we dali po miai

4 ¹ Te sogo Farisi bage augwaligo po me deli odai, “Jisasgo te we bidi hauwa selama, tama augwali aga wali pobaso, augwaligo baptais sali. Tama Jisas agai te sęde Jon aiyaba elaluai,” te Farisi bage augwaligo te po odai. ²(Tialima, Jisas aga digi agai te we bidi baptais mabeo. Jisas aga wali pabo bidi augwaligo naga te we bidi baptais mawai.) ³ Jisasgo koneai augwali Farisi bagego te po odama, dwai homu yai. Tama tibaso, Jisas aga te Judia tő pedai taga pelama, te Galili tő pedaiba pai. ⁴ Tama Godigo homu wali peyu, te tü Jisas aga pali tü te Samaria tő pedai tomoba pabo tü dao. ⁵ Tama tilama, Jisas pelama, Samaria bagego hanuba sabolai, augwaligo te bulu nogi Sikar wali. Te tő te polobadu mu bidai bidi Jekopgo aga ogwa Josep mani tő te pade tama dao. ^d ⁶ Aji sabo tő dedage polobadu Jekopgo nigai, te bulude elalubuo. Jisas pelama, aga tigi dene baso, te aji sabo tő dedage pade dugulaluai. Te giliga tomo

^d 4:5 Gag 33:19; Jos 24:32

yagasobode. ⁷⁻⁸ Jisas aga wali pabo bidi augwali te be nani nogi Sikarba pelama, nai abelegi pai. Tama Samaria we me deli asama, aji tuagasu asai. Jisasgo te webolo po weyu, te po wai, “Aji ena mao, ena tueio,” te po wai, Jisasgo. ⁹ Te Samaria we noma siyu, agai Jisasbolo te po wai, “Ya, nage Juda bidi dao, te ena Samaria we dao. Magi baso nago te po obawe, ‘Aji ena mao, ena tueio,’ magi basowe?” te Samaria wego te po wai, Jisas dali. (Magi basowe? Juda bidi dabe augwali Samaria bidi dabe dali kisasa gelasa bilibo menio.) ¹⁰ Jisasgo te webolo po wei ponoyu, te po wai, “Nago te God agai te we bidibolo olo mabo nai konegi sogo da, tama ena mena bidigo nagebolo ‘Aji ena mao, ena tueio’ obao konegi sogo da, te si nago konegi sogo da, teda nago ena hanalu olama, eno nagebolo te bidabo bomo elalubo aji mao wagi da,” Jisasgo te po wai. ¹¹ Te wego Jisasbolo te po wai, “Genuai Bidio, nago aji tuabo nai meni. Tama te aji tubo dedage aba mu dao. Tama tiyu da, nago te bidabo bomo elalubo aji menade saibawe?” te wego Jisas dali te po wai. ¹² “Dago wai Jekopgo te aji dedage dabolo polobadu mawai dao. Tama aga dali, aga wai dabe dali, aga kibu bulmakau sipsip dali tamago tuai aji dao. Tialima, nago homu nago Jekop aga aiyaba elalualiwe?” te wego Jisas dali te po wai. ¹³ Jisasgo po wei agabolo ponoyu, te po wai, “Tigidali bidi te aji naga ede tuyu da, augwali aji nogone ma yaibao. ¹⁴ Tialima, bidi me deli eno mabo aji tuyu da, tigidali sogo te bidi aji nogone ma egobeo. Te aji eno mawainogo ebo aji gido da, te tama tiaibao, te aji da bidabo bomo mabo we ulu pedalubo aji te bidi tigi tomode tiwai yaibao. Tama te aji tigidali sogo pedaliyu, te bidi mu bidada peyu, mu bidada paibao,” Jisasgo te po wai. ¹⁵ Tama te wego Jisasbolo te po wai, “Genuai Bidio, nago te aji enabolo mao, tama nosali ena aji nogone ma idalio, tama ena eba aji ma tuagasidialio,” te Jisas dali Samaria wego te po wai.

¹⁶ Jisasgo te webolo te po wai, “Nago bidibolo i wagi bilama, tama dage si eba asiaqo,” wai. ¹⁷ Wego po wei ponoyu, te po wai, “Ena bidi menio.” Jisasgo agabolo te po wai, “Nago ‘Ena bidi meni,’ obawe, te nago mu po wabuo. ¹⁸ Magi basowe? Polobadu nago bidi a naga dao. Tama te bidi megi nage dali bidibo bidi da, te naga bidi menio. Nago po te mu tama dao,” Jisasgo te po te we dali wai. ¹⁹ Wego Jisasbolo te po wai, “Genuai Bidio, megi eno koneanio, nage da te Godigo nosali yabo se po ola mabo profet bidi deli dao. ²⁰ Polobadu da Samaria dabego wai dabe augwali te bulu duba sisinama, tama lotu po wai dao. Tialima, dage Juda dabego te po wabo dao, ‘Te tigidali bidigo lotu po wabo bulu te Jerusalemde, tede naga wao,’ dagego te po wabo dao,” te wego te po wai. ²¹ Jisasgo te webolo te po wai, “Nago eno po mu po dao olama, konealua. Me sogo deli pedaliyu, tama dagego te Ayabolo lotu po te bulu dude wagobeo. Tama dagego Jerusalem tede me lotu po wagobeo. ²² Dagego konesiawai naibolo lotu po wabo dao. Da Juda dabe dago lotu po wabo da, te dago

koneai bidibolo lotu po wabo dao. Magi basowe? Godigo we bidi ma sabo sę page te da Juda dabe tomode pedalaibao.²³ Tialima, te sogo pedaliyu da, megi tama pedalalio, tama tigidali bidigo lotu po mu wabo bidi dabe da augwali lotu po augwa mobo bidigo waibao, augwa dolo ebo kolesagago me lotu po waibao. Tama Aya Godigo te tobage bidi gegebo dao, agabolo lotu po omainogo.²⁴ God da, te mobo bidi dao. Tama bidigo agabolo lotu po weyu da, te bidigo aga mobo bidigo waibao, aga dolo ebo kolesagago me lotu po waibao,” Jisasgo te po wai.

²⁵ Te wego agabolo te po wai, “Eno koneanio, Godigo sa muani bidi asaibao, augwali aga nogi Krais tama wai. Aga asobo sogo da, te agai dabolو tigidali naide po ola mawaibao,” wali. ²⁶ Jisasgo te we agabolo te po wai, “Te ena tama dao, megi nage dali eno te po obao.”

²⁷ Te Jisasgo te po obadi yaide, tama aga wali pabo bidi dabe augwali ma begasa asai. Tama augwali Jisasgo te Samaria we dali po mibo subaso, augwali noma sai. Tialima, bidi me deligo te webolo “Nage magi nai saiwe?” wabeo. Augwaligo Jisasbolo “Nage te we dali magi baso po obawe?” hanalu wabe. ²⁸ Tama te wego te aga aị tubo nai tagalama, tama te we aga hanuba ma pai. Tama te wego te we bidi dabe augwalibolo wagi peyu, te po wai. ²⁹ “Dagego bidi me deli suagasiao. Agai eno polobadu yali sę po tigidali enabolo wai. Te bidi te Godigo sa muani asaibao wali bidi Krais te yaliwe?” te wego te po te we bidi dabe dali wai. ³⁰ Tama te we bidi dabe augwali te hanu tagalama, aselama, Jisas bidibo digi assai.

³¹ Te we bidi dabe augwali asodubadi Jisas wali pabo bidi augwaligo Jisas dali te po wai, “Po ola mabo bidi, nage nai tuao,” wali. ³² Tialima, Jisasgo augwali aga wali pabo bidibolo te po wai, “Eno nai meba elalubo te dagego konebeo.” ³³ Tama tibaso, augwa hasi po wai, “Bidi me deligo aga nai magasaliwe?” Jisas wali pabo bidi augwaligo te po miai. ³⁴ Jisasgo augwalibolo te po wai, “Eno nai da, e tama dao: eno ena tagala palali bidigo homu wali pabo dao. Tama eno agai ena nogoba muani sę polo silaio,” Jisasgo te po wai. ³⁵ Jisas agai giba ela mubo po digi po weyu, te po wai, “Dagego tama wabo dao: ‘Polua me si me si elalubo, tama te nai sabo si te pedalaibao,’ Tialima, eno dagebolo obao, dagego tonono biliyu, tama dagego te gi dabe bugagia suiąo. Nai inawai yabowe naga, dagego suaο. Te asobo we bidi augwali te inawai nai tiwai dao.

³⁶ Nai sabo bidi da, te bidi aga masigi sabo sę eyu, aga masigi sabo dao. Tama elama, nai polobadu bulali bidi dali, te inawai nai sabo bidi dali, augwa talua si dwagi yai homu yaibao. Tama te tiwai, niwai bidigo we bidi eno po ola mayu yali bidi, augwaligo homu enaba muani, te bidi te nai sabo bidi tiwai dao. Godigo te bidibolo dwagi yai nai mawaibao. Tama te we bidibolo eno po polobadu wagi pali bidi me, te bidi te nai bulali bidi tiwai dao. Tama te bidi dali, te we bidi enaba sisinibo bidi

dali, augwali si talua dwagi yai homu mu yaibao. Augwali sigo wali po odali we bidi augwali bidada peyu, bidada pabo bulu selama, bidaibao. ³⁷Te tiwai eyu, tama tqde bidibo we bidigo polobadu wali po mu po tamao, ‘Bidi me deligo gi nai bulai, tama gasa bidi mego agai te nai sai.’ ³⁸Tama te tiwai eno dage tagala palali da, te dage we bidibolo eno po pusugi pomainogo yai. Polobadu dagego te se isiąwai. Tialima, gasa bidigo dene yali sede te nai megı dagego sabao,” Jisasgo te po wai.

³⁹Te hanude bidali Samaria we bidi dabe hauwa augwaligo te wego wabo po odai. Tama te po odobaso, augwaligo augwa homu tigidali Jisasba muani. Te wego te po wai, “Agai enabolo eno polobadu yali se po tigidali mu wai.” ⁴⁰Tama tibaso, Samaria we bidi dabe augwali Jisas bidibo digi aselama, tama augwaligo Jisasbolo hanaluyu, po bomo elama wai, “Nage da dali bidao.” Tama tibaso, Jisas augwali dali si sogo te bulude bidai. ⁴¹Tama aga tede bidibadi yaide, we bidi hauwa augwaligo Jisas aga digi wali po odolama, tama augwa homu tigidali agaba muani. ⁴²Tama augwaligo te webolo te po wai, “Megı dago nago po naga odolama, tama dena homu tigidali te bidiba mubo menio. Dena digi agai po odolama, tama dago homu tigidali agaba mubao. Te bidigo naga agai tigidali tqde we bidi ma dobola sabo bidi dao,” te Samaria bagé augwaligo te po wai.

Jisasgo genuai gavman bidigo ogwa gasi yali geselai

⁴³Te si sogo bidali sililio, tama Jisasgo te Samaria bulu tagalama, tama aga Galili tqba pai. ⁴⁴(Polobadu Jisas aga digi po weyu, te po wai, “Godigo po ola mabo bidi aga page bulude nogi menio,” Jisasgo te po wai dao. Tama te po wali goli, Jisas te Galili tqba pai.) ⁴⁵Tama Jisas pelama, Galili buluba sabolai. Tama Galili bagé augwaligo Jisas asobaso dwagi yai homu yai. Magi basowe? Augwali meba pelama, Jerusalem bulu sabolama, bo disawai nai tubo side tigidali se Jisasgo te sogo yali se augwaligo suai, polobadu. ⁴⁶Jisas te Galili tq tomoba pelama, tama aga te Kana be naniba sabolai. Te bulude polobadu Jisas agai aq mugo te pusu ebo aq wain nigai. Tama te be nani me nogi Kaperneam te digibulu gana. Tama Kaperneam bulude genuai gavman bidi bidai, te bidi aga ogwa gasi yai. ⁴⁷Tama te gasi yai ogwa aga aya agai Jisas Judia tq tagalama, Galili tqba asali po odai. Tama tibaso, te bidi Jisas bidibo digi pelama, tama Jisasbolo hanaluyu, po bomo elama wai, tama Jisas te agai ogwa Jisasgo geselemainogo yai. Aga homu Jisas te Kaperneamba pelama, tama agai ogwa ma geselaibao. Te gasi yai ogwa pade tama isainu elalubo wai. ⁴⁸Tama Jisasgo te gasi ogwa aga ayabolo te po wai, “Dagego te eno haniani bomai se ebo susiawai goli dagego duga homu tigidali enaba muao.” ⁴⁹Te genuai gavman bidigo te po wai, “Genuai Bidi, nage Kaperneam buluba polo dulao. Eno ogwa isidalio,” te po Jisas dali

wai. ⁵⁰Jisasgo agabolo te po wai, “Nage pao. Naga ogwa da, bidibadi paibao.” Te bidi Jisasgo wali po aga homu te poba munama, tama pai. ⁵¹Aga begasa aba pidubadi yaide tama aga s̄e ebo bidi dabego aga tiāba wagasai. Tama augwaligo agabolo te po wai, “Naga ogwa bidibuo,” wai. ⁵²Tama agai augwalibolo hanalu wai, “Nisu te ogwa dwasianu usu yaliwe?” te po wai. Tama augwaligo te po wai, “Do giliga tomo ebo, te sogo tama aga tigi posolo silalio,” te po wai. ⁵³Tibaso, aga ayago koneai, do tama te sogo Jisasgo agabolo “Nago ogwa gasi silama, tama bidibadi paibao” wai dao. Agai te homu yai. Tama te bidi dali aga bede bidibo bage dali, augwaligo augwa homu tigidali Jisasba muani. ⁵⁴Polobadu Jisas Judia t̄ tagalama, tama Galili t̄oba sabolama, tama bomai s̄e eyu, te agai aji mugo pusu ebo aji wain begelama nigai. Tama megî me agai Judia t̄ tagalama, Galili t̄ode bomai s̄e me yai, te gasi yai ogwa hodolai.

Jisasgo bidi me deli Betesda sigi aji de geselai

5 ¹Te nosali te Juda bagego olo bidiyu lotu po wabo si te pedalai. ²Tama tebo side Jisas Jerusalem hanuba holai. ³Tama Jerusalem bagulali obo pâde kibu sipsip dabego genuai soabo tû elalubo madi, tama te tû dolo si te dwasianu sigi aji ge elaluai. Hibrû pogo augwaligo te aji nogi Betesda wai. Te aji sesegede be mabo a naga elaluai. ⁴Te be mabode gasi yai we bidi hauwa bidai, gedu widai bidi dabe dali, saqâ dwai bidi dabe dali, tama nogo saqâ dili isai bidi me, augwali te be mabode bidai. (Augwaligo te aji memenege ebo tonaluyu bidai. ⁵Me sogo deli sogo Godigo dagalude s̄e ebo ensel mobo bidi me deli te aji tomoba dulama, tama te aji te ensel bidigo memenege ilai. Te aji memenege silai digi, tama niwai bidi me deli polasa aji ba dulali bidi da, te bidigo gasi polo silai.) ⁶Bidi me deli te be mabode bidai. Te bidigo gasi elalubadi, kibu be te 38 kibu be te bidi gasi elalubadi tama yai. ⁷Jisasgo te bidi pila mubo suai, tama Jisasgo koneai, te bidi gasi elalubadi, hauwa sogo mu bidai. Tama Jisasgo te bidibolo te po wai, “Nago homu da, naga tigi dwagi yai yabo homu ebewe?” Jisasgo te bidibolo te po hanalu wai. ⁸Gasi yai bidigo Jisasbolo po wei ponoyu, te po wai, “Genuai Bidi, aji memenege ebo side ena aji ba selâ muabo bidi menio,” te bidigo Jisas dali te po wai. “Ena digi tama pobadi digi, gasa bidi dabe polo polasa peyu, ena geanobo dao.” ⁹Jisasgo te bidibolo te po wai, “Nage hodaluama, doligulama, naga pibo somo selama, tama nage soao,” Jisasgo te gasi yai bidibolo te po wai. ¹⁰Tama polo te bidigo tigi dwagi yai ma yai. Tama aga pibo somo selama, tama soai.

Te Juda bagego olo bidibo Sabat sogode Jisas agai te bidi geselai. ¹¹Tama Juda dabe genuai bidi augwaligo te gasi munualuali bidi aga pibo doado bage selama, sobadi yaide, augwaligo agabolo te po wai, “Megî da, te habu olama olo bidibo side dao. Nago pibo somo magi baso selâ

sobawe? Te nago Sabat sogo sə elamuo wali bomo yai po bolobao,” te Juda bagego te bidi dali te po tama wai.¹¹ Tiali digi agai po wei augwali dali ponoyu, te po wai, “Te ena geselali bidi agai enabolo te po wai, ‘Naga pibo somo selama, pao,’ enabolo te po wai,” wali.¹² Augwaligo agabolo hanalu wai, “Mena bidigo nagebolo te po weyu, ‘Naga pibo somo selama, pao’ waliwe?”¹³ Tialima, te sana pali bidi agai Jisasgo nogi konebeo. Magi basowe? Te bulude we bidi hauwa mu elalubao, tama Jisas pai.

¹⁴ Nosali Jisasgo te bidi te Moni Lotu Be tempel tomode ma sulama, te po wai, “Odaliwe? Megi da nage usu yali dao. Nago dwai sə dabe ebo tagalao. Tiyu moni səgə nageba pedalabuo,” Jisasgo te bidibolo te po wai.¹⁵ Tama te bidi pelama, Juda genuai bidi dabebolo wagi pai, “Ena geselai bidi te Jisas yalio,” te bidigo Juda dabego tobolu bidi dabebolo te po wagi pai.¹⁶ Tama tibaso, Juda dabe genuai bidi augwaligo Jisas dali boi bidi homu ebo gagalali. Magi basowe? Jisasgo te bidi geselali te Juda bage augwaligo olo bidibo side te sə yali.¹⁷ Tialima, Jisasgo po wei ponoyu, te po wai, “Eno Aya agai sə polobadu yali sə megi tama te ela asobao. Tama eno me ena sə ebao,” Juda dabe genuai bidi dali Jisasgo te po wai dao.¹⁸ Tama tialima, Juda genuai bidi augwaligo bomo eyu, Jisas mu elabo homu yai. Magi basowe? Augwaligo e homu yali, Jisas agai Juda bagego olo bidibo Sabat sogo bomo yai po te bolobaso naga menio. Jisas agai te po wabo, ‘God da, te ena Aya mu da’ wabo dao. Te wabo po da, Jisas aga digi aga te God tiwai pedalainogo wabuo Tama tibaso me augwaligo aga mu elabo homu yai.

Godigo Ogwa aga sə yabo nogi elalubuo

¹⁹ Te Jisasgo po wei ponoyu, te po wai, “Eno dagebolo mu po tama obao, Godigo Ogwago agaduba homugo magi sə me ebo menio. Agai Ayago ebo sə naga sulama, agai ebo dao. Tigidali sə Ayago ebo, te aga Ogwago tama ebo dao.²⁰ Aya Godigo homugo aga Ogwa mu godola pabo, tama God agai ebo sə tigidali aga Ogwabolo ola mabo dao. Aya agai bomai sə me nosali aga Ogwabolo ola mawaibao. Tama te səgo eno hasia yali sə aiyaba elaluabao. Tama tibaso, dage noma siyu, homu hauwa yaibao.²¹ God Ayago isai bidi ma hodolama, bidabo bomo mabo dao. Tama tibo gilama, Ogwago me aga homugo we bidibolo bidabo bomo mabo dao.²² God agai digi agai bidi me deli agai po tū dodolobo menio. Tigidali po tū ebo sə agai aga Ogwago nogoba mawai dao.²³ Magi baso meni. Tigidali bidigo Godigo Ogwa nogi ugwaba samainogo, te Godigo nogi ugwaba sabo gilamao. God Ayago aga Ogwa e tōba tagala palobaso, tama bidi te Godigo ogwago nogi ugwaba sisəbo bidi da, agai Godigo nogi me ugwaba sisəbo bidi da,” Jisasgo te po wai.

²⁴ “Te eno mu po dagebolo obao, niwai bidigo eno po odama, tama te po wali pelama, tama ena tagala palali bidibolo te bidi agai bomo yai

homu agabolo muyu da, te aga bidada peyu, bidada pabo bomo selama, bidaibao. Te bidi aga po tū aga dali me egobeo. Te agai isibo tagalama, tama megı aga bidabo bomode bidibao. ²⁵Eno mu po dagebolo obao, te sogo pedalibaob, tama te megı polo pedalalio, tama isai bidi augwaligo Godigo ogwago po odaibao. Tama te po odama wali pabo we bidi dabe da, augwali mu bidaibao. ²⁶Eno Aya aga bidabo bomo aga digi elalubo. Tama agai bidabo bomo aga Ogwabolo mawai. Enabolo. Tama te tiwai te bidabo bomo te aga Ogwago me elalubo. ²⁷Aga te Godigo Bidi Mu dao, tigidali we bidi augwaligo abagi hasi bidi dao. Tama tibaso, Ayago agabolo te we bidi po tū yabo sę mawai. ²⁸Dagego noma selama, tama homu hauwa egimio. Nosali me sogo pedalobo side da, gų pagede bidali bidi augwaligo te Godigo Bidi Mugo wabo po odaibao. ²⁹Tama augwaligo te po odobaso, tama augwali gų page tagalama, buluba dią asaibao. Me badu we bidi augwaligo dwagi yai kolesaga yali da, augwali hodaluama, bidabo bomo selama, bidaibao. Me badu we bidi augwaligo dwai kolesaga yali da, augwali hodaluama, tama po tūde sege saibao. ³⁰Eno homugo digi eno te sę ebo usu egobeo. Eno Godigo wali po naga wali pelama, tama eno po tū ebo dao. Tama tibaso, eno po tū ebo sę te dolo mu ebo dao. Magi basowe? Eno sę ena homugo me ebo menio. Te ena tagala palali bidigo homu eno wali pabo dao,” Jisasgo te po wai.

Bidi mebago Jisasgo page po pusubo dao

³¹Te Jisasgo po ma weyu, te po wai, “Enaduba naga ena te Godigo Ogwa da weyu da, te po usu egobeo. ³²Tialima, gasa bidi me bidibo. Tama eno Aya God agai ena tau sabo po te we bidibolo pusubo dao, augwaligo eno wabo po mu po dao konemainogo ebo dao. Tama eno koneai, agai te wali po enade wabo da, te po mu po wabo da. ³³Polobadu dagego te bidi Jonbolo dagego hanalu wali po tagala palai. Tama agai po pusuyu, eno po mu po dao wai. ³⁴Bidi mego eno wabo po tau sabo bidi elaluyu da, te usu da. Me ma, te tobage bidi meni baso da, te me usu da. Tialima, eno homugo Godigo dage ma somainogo. Tama teyu, eno Jon badi dagebolo me eno e po obao. ³⁵Jon da, te sole ula ebo gilama, agai ula we bidi dabebolo mawai dao. Tama dagego pewadage side te ulade dagego dwagi yai homu osogo yai dao. ³⁶Tialima eno wabo po tau sabo nai me elalubao, te moni bage mu dao. Eno Ayago enabolo sę mani, ena te sę tigidali elama, silimainogo ebao. Te sę dabe eno ebo dao. Tama te ebo sego me te we bidi ola menama, augwaligo konebo dao, Ayago ena tagala palobaso, ena asai dao,” Jisasgo te po wai. ³⁷“Tama Aya Godigo ena tagala palobaso ena asai, aga digi eno wabo po tau sabo dao. Dagego agai pedauwalidu wali po me odai menio. Tama dagego agai gesabi me munu me subeo, tama agai po me dagego homude bidibeo. ³⁸Magi basowe? Agai tagala palali bidigo wabo poba duga homu tigidali mubeo,” Jisasgo te po wai.

39 “Dagego te homu ebo dao, Godigo aşənai po tego dagebolo te bidabo bomo menama, tama dage bidada peyu, bidada paibao. Tama te homu eyu, dagego te po tigidali sogo gegeyu, nedebi dao. Tama te aşənai po aga digi enade po page ola mabo dao. 40 Tiali digi dage enaba aselama, bidabo bomo sagasobo hagela homu ebo dao,” te po wai.

41 “Te ena asali, te we bidi augwaligo enabolo genuai nogi momainogo asobeo. 42 Tiali digi eno dage koneanio. Dagego God godolo mu ebo menio, te tiwai homu dagede elalubeo. 43 Ena asali te ena Aya Godigo bomo dali genuai nogi dali selasa asiyu, asai digi, tama dagego eno po sabeo. Tiali goli, bidi me deli aga nogi dali asiyu da, teda dagego te bidigo wabo po saibao. 44 Dagego genuai nogi duga haside sabo dao. Tiali digi, dagego Godigo dagebolo genuai nogi maiabo se te bomo elama, ebo menio. Tama tibaso, dagego eno wabo po mena tama duga homuba mugowe? 45 Dagego te eno Godibolo po tu ela mayao po waibao, te homu egimio. Eno te se egobeo. Dage po tu ela maiabo bidi da Moses dao. Dagego homugo te bidi aga digi dage tau sabo bidi mu dao. Tiali goli agai dage po tu ela maiabo bidi dao. 46 Dagego Mosesgo aşənai poba homu tigidali mu mugi sogo da, teda duga homu tigidali eno wali poba mugi da. Magi basowe? Te bidi Mosesgo enade po polobadu aşənai. 47 Tialima dagego agai aşənai poba duga homu tigidali musiąyu da, tibaso magila dagego eno po me mena tama odama, duga homu teba muaibawe? Dage usu egobeo,” Jisasgo te po Juda bage dali wai.

Jisasgo bidi sese hauwa 5,000 bidi mu agai nai manio

(Mat 14:13-21; Mak 6:30-44; Luk 9:10-17)

6 ¹Te wali po silama, tama nosali me sogo Jisas Galili sigi aji te moni gebadu nogelama, u badu pai. Augwaligo te aji nogi me Taiberius nogi yai. ²Tama genuai we bidi hani hauwa augwaligo Jisasgo te gasi yai bidi hauwa agai dodolobo augwaligo suai. Tama tebo sulama, augwali Jisas wali pai. ³Tama Jisas bulu du meba holama, tama Jisas aga wali pabo bidi dabe dali dulaluai, te bulu dude. ⁴Tama bo disawai nai bret tuabo sogo te pade tama dao, te sogo nogi Pasova, te Juda bagego olo bidibo side wai. ⁵Jisasgo tonono bilibadi, tama agai suali, genuai we bidi hani Jisas agaba asai. Tama Filipbolo agai te po wai, “Dago te we bidi augwali tuabo nai bret menade abelegowe?” Jisasgo te po wai. ⁶Jisasgo Filipbolo te po wai, agai homu magi ebewe naga suainogo eyu, Jisasgo te po wai. Jisas aga digi yabo se da te aga konea selama, te se yaibao. ⁷Filipgo Jisasbolo po wei ponoyu, te po wai, “Tibaso da, dago bret te masigi umabogo abelama, te we bidi mabo da, te augwali usu egobeo. Te augwali deli deligo te nai dwasianu naga siyu da, te me usu egobeo,” Filipgo Jisas dali te po wai.

⁸ Aga bidi me deli Andru, te Saimon Pita aga ama, agai Jisas agabolo te po wai, ⁹“Ogwa me deli ede bidibao, te ogwa agai a naga bret dari

sugū si dali munalubo. Te bret te bali plauago nigai. Tiali digi, te naigo e genuai we bidi hani usu egobeo,” Andrugo te po wai.¹⁰ Jisasgo te po wai, “Te we bidi augwali duayao wao,” te po wali. Noswai hauwa tede elaluai, tama te we bidi augwali duawai, augwali te bidi hani bidi sese hauwa mu 5,000, te we dali wai puluba dali nedebeo.¹¹ Augwali duada pao olama, augwali dualaluai, tama Jisasgo te ogwago bret selama, tama Jisasgo Godibolo nage usu dao wai. Tilama, te we bidi augwalibolo te nai dobaba pai. Te sugū si me agai tama naga tiwai agai augwalibolo mawai, augwa homugo usu yabo te tiwai naga.¹² Augwali nai tuali usu ela silai. Tama Jisas aga wali pabo bidi dabebolo te po wai, “Dagego nai me badu munalubo sisinao,” wai. “Tiyu yaide me badu nai olo tagalobuo,” wai. Jisasgo te po aga bidi dabebolo wai.¹³ Tama tialima, augwaligo te tulama, me badu munalubo nai dabe sisinama, tama augwaligo bonou wa nogo si olama, saqā badu si pąqawai. Te a naga bali bret tego bidi augwali nai tuali usu yalima, tama me badu munaluai, te nai augwaligo te bonou wade ma buai.

¹⁴ Te we bidi augwaligo Jisasgo te bomo yai sę ebo sulama, tama augwaligo te po wai, “Mu tamao, te aga e tōba asaiba wali bidi te aga dao, te Godigo po ola mabo bidi dao,” te we bidi augwa hasi te po wai. ¹⁵ Tialima Jisasgo koneai, augwaligo homugo Jisas aga dą̄ olama, tama Jisas aga augwaligo tuni bidi bidimainogo yaibao, augwali te homu yai Jisas aga dali. Tama tibaso, Jisas agaduba bulu duba ma pai.

Jisas sigi aji ge daidu asai
(Mat 14:22-33; Mak 6:45-52)

¹⁶ Pio tama Jisas aga wali pabo bidi augwali te sigi aji geba dulai. ¹⁷ Megi hulia sai, tama Jisas augwali bidibo digi pedalobeo. Tama tibaso, augwali moni gebaba holama, te ajiu pai. Augwali Kaperneam be naniba painogo yai. ¹⁸ Bomo yai wali dali tama genuai aji gisigi asiyu dali yai. ¹⁹ Augwali te gebadu aji todogo pali, te kilomita a naga ma te a naga olama me badu nogo deli tama dą̄ egi pai. Tama augwaligo suali, Jisas aji daidu asiyu tama te geba pąba sabolainogo asai. Tama augwali moni wi yai. ²⁰ Tialima, Jisasgo augwalibolo te po wai, “Ena Jisas tama asobao,” wai. “Dage wi ebo tagaliao,” te po wai, Jisasgo. ²¹ Tama augwaligo Jisas geba tomoba sela asainogo yai. Tama te geba polo augwali te pabo bulu teba poloba tugi pai.

Te we bidi augwaligo Jisas gegebo sę yai

²² Te do tama wabo side te we bidi augwali te sigi aji sesege badu bidaluai. Augwaligo koneai, te do tama te gasa geba me menio. “Deli digi e munaluali,” wai. Tama Jisas aga wali pabo bidi dali te gebaba holobeo. Menio. Te bidi dabe augwa naga te gebaba holama pai, te we

bidi augwaligo te koneai.²³ Tama augwaligo homu hauwa ebadi yaide, Taiberius bulu du asai geba meba teba poloba tuagasai, te Genuai Bidigo Godibolo nage usu da olama, tama te we bidi hauwa augwaligo nai tuali madigi paba. ²⁴ Te we bidi augwaligo suali, Jisas dali aga bidi dabe dari bidibo subeo. Tialima, augwali te tamadi asai geba dabeba holama, tama augwali Kaperneam buluba Jisas gegegi pai.

Jisas bidabo bomo mabo bret dao wai

²⁵ Te we bidi augwaligo Jisas sigi aji sesege badu gegai. Sulama, tama augwaligo Jisasbolo te po hanalu wai, “Po ola mabo bidi, nage eba nisu asai dawe?” te po wai. ²⁶ Jisasgo po wei ponoyu, te po wai, “Mu tama eno dagebolo obao, dagego eno yali bomo yai se page homugo koneama, ena gegeyu ebeo. Menio. Dage eno te mani bret tulama, tama dage haliga pagawai dao. Te tiali pagede dagego ena gegebo se ebao,” wai. Jisasgo te po Juda bage dari wai. ²⁷ “Dagego te mobia pabo nai naga sabo se tiwai dagego egimio. Te menio. Dagego te bidada peyu bidabo bomo mabo nai sabo se yao. Te tiwai nai Godigo Bidi Mu agai dagebolo mawaibao. Magi basowe? Aga Aya Godigo te bidide dwagi yai homu eyu, sa muai,” Jisasgo te po wai. ²⁸ Tama tibaso, augwaligo Jisasbolo te po wai, “Dago mena tama tilama, tama dago Godigo se yaibawe?” augwaligo Jisas dari te po wai. ²⁹ Jisasgo augwalibolo po wei ponoyu, te po wai, “Godigo se e tama dao: dagego te Godigo tagala palali bidigo wabo poba duga homu tigidali muyu bidao,” Jisasgo augwalibolo te po wai. ³⁰ Tama tibaso, augwaligo Jisasbolo te po wai, “Dena homu tigidali nageba mumainogo, tama nago magi bomo yai se yaibawe? Nago magi se yaibawe?” te Juda bagego Jisas dari te po hanalu wai. ³¹ “Dago waj dabe augwaligo bidi meni yai bulude ili isiqwai nai nogi mana tuai dao. Godigo wali po bukude bidi mego asęani po gilama,

‘Agai dagaludu bret augwalibolo menama, tama
augwaligo tuai dao,’ wai,” augwaligo te po wali.^e

³² Tama tibaso Jisasgo augwalibolo te po wai, “Mu tama eno dagebolo obao. Polobadu Mosesgo dagebolo mani nai te dagalu bret te dage mabeo. Menio. Eno Aya Godigo da te dage dagalu bret mu dage megi mabo dao. ³³ Te bret Godigo mani, te aga dagalu tagalama, e tqba dulama, tama agai tode bidibo we bidi bidada pabo bomo magasobo dao,” Jisasgo te po wai.

³⁴ Tama tibaso, augwaligo Jisasbolo te po wai, “Genuai Bidi, nago te bret dabolo tigidali sogo da mao,” wai. ³⁵ Jisasgo augwalibolo te po wai, “Ena digi ena bidabo bomo mabo bret dao. Bidi agai homu enaba muyu, ena pageba asobaso da, te bidi aga nasi munu me egobeo. Tama bidigo aga homu tigidali enaba mu baso da, te bidi aga aji nogone munu

^e 6:31 Sai 16:4, 15; Tib 78:24

me egobeo,” Jisasgo te po wai. ³⁶“Tialima, eno dagebolo polobadu wali gilama, dagego ena suai dao, tiali digi dagego enabolo bomo yai homu dą̄ wabeo. ³⁷Eno Ayago enabolo mabo we bidi tigidali augwali ena pageba asaibao, ena wali asomainogo. Ena pageba asobo bidi te aga eno me sela sęgobeo, mu menio. ³⁸Magi basowe? Eno dagalu tagalama, e tɔba dulali, te eno homu kolesaga wali painogo asobeo. Menio. Ena e tɔba dulali, te ena tagala palai bidigo homu ena wali pomainogo asai. ³⁹Tama te ena tagala palai bidi agai homugo tama tiwai, agai enabolo mani we bidi eno me deli hagalamuo. Menio. Agai homugo eno augwali te tɔ dali dagalu dali sia sabo sogo augwali tigidali eno ma hodolaibao. ⁴⁰Eno Aya agai homu tama telalubo, aga ogwa osola suyu, agabolo bomo yai homu dą̄ olama muyu yai we bidi tigidali te augwali bidada peyu bidada pabo bomo selama, mu bidaibao. Tama augwali eno te tɔ dali dagalu dali silibo sogode augwali eno digi ma hodolaibao, ma bidimainogo,” Jisasgo te po wai.

⁴¹ Te Jisasgo te po tamadi wai dao, “Ena digi ena te tubo diluai nai bret dagalu tagalama, eba dulai.” Jisas agai te po obaso, Juda bage augwa hasi hagelabo po miani. ⁴²Augwaligo te po wai, “E bidi da, te Josep aga ogwa dao. Dago aga aya ida dali koneai dao. Magi baso agai te po megı wabowe, ‘Ena dagalu tagalama, e tɔba duali dao,’ wabowe? Agai po usubeo,” augwaligo te po wai.

⁴³ Te Jisasgo augwalibolo po wei ponoyu, te po wai, “Dage duga hasi tomode te hagelabo po wabo tagaliqo. ⁴⁴Bidi me deli ena pageba olo me asogobeo. Menio. Ayago ena tagala palobaso, ena asai dao. Tibaso, agai bidi me deli kegali da, tiali da, te bidi ena pageba asagameo. Tama te bidi eno aga nosali tɔ dali dagalu dali silibo side ma hodolaibao, aga ma bidimainogo tama yaibao. ⁴⁵Te Godigo nosali yabo sę po pusa mani profet bidi dabe augwaligo te po aseansi, ‘Godigo tigidali we bidi ola mawaibao.’ Mena bidi me Ayago po odolama, tama koneama, te bidi ena pageba asobo dao.^f ⁴⁶Tiali goli, bidi me deligo Aya me gedugo subeo. Te bidi God dali bidilama, asali, te bidigo naga Aya gedugo suai dao. ⁴⁷Eno mu po dagebolo obao. Bidigo enabolo aga homu dą̄ olama, enaba tialubo bidi, aga bidada peyu, bidada pabo bomo selama, mu bidaibao. ⁴⁸Ena digi ena te mu bidabo bomo elalubo tubo diluai nai bret dao. ⁴⁹Polobadu duga nq̄ dabe augwali te bidi meni yai bulude bididubadi, te ili isiąwai nai nogi mana tuali goli, augwali nosali isali. ⁵⁰Tialima, te dagalu tagalama dulali bret, te tedali gasagi yai. Tama tibaso, bidigo te bret tuali da, te aga te mu bidabo bomo munu me tagalogobeo. ⁵¹Ena digi ena da, te bidabo bomo elalubo bret da, te ena dagalu tagalama, e tɔba dulai dao. E bret bidigo tuyu da, te bidi aga bidada paibao, mu gamonaibao. Tama

^f 6:45 Ais 54:13

eno te bret agabolo mawaibao, te eno tigi dao. E tøde bidibo we bidi augwali mu bidimainogo, eno ena tigi mawaibao,” Jisasgo te po wai.

⁵² Te Jisasgo te wali pode te Juda bage augwa hasi bomo elama, konila yali. Augwali me badugo te po hanalu wali, "Mena tama tibaso, te bidi aga tigi da menama, tama dago tueibawe? Te se ebo usu egobeo," Juda bage augwaligo te po wai. ⁵³Tama Jisasgo augwalibolo te po wai, "Eno mu po dagebolo obao, dagego Godigo Bidi Mu agai tigi tusiawani da, agai kaneme tusiawani da, tiali da, dagego te bidabo bomo elalugobeo. ⁵⁴Bidigo eno tigi tuyu, tama eno kaneme tuali bidi da, aga bidada pabo bomo elalaibao, tama eno aga te tq dali, dagalu dali silibo side aga ma hodolaibao. ⁵⁵Magi basowe? Eno tigi te tubo nai mu dao, tama eno kaneme te mu tubo qj dao," Jisasgo te Juda bage dali wai. ⁵⁶"Bidigo eno tigi dali eno kaneme dali tubo bidi da, aga enade bidiyu, tama ena agade bidiyu, te bidi dadi si mu kqai pai elalueibao. ⁵⁷Bidada pabo bidi Aya agai ena tagala palai. Te tiwai gilama, ena me bidada pabo dao. Te tiwai gilama, mena bidi eno mi tuali bidi da, te bidi mu bidabo bomo te ena bomode saibao. ⁵⁸E bret, eno dagebolo po wabo bret da, te dagalu tagalama e tqba dulai bret dao. Duga noq dabego bret tuali goli, augwali isali. Eno dagebolo wabo bret te tiwai menio. Bidigo e bret tuyu da, te bidi aga mu bidabo bomo selama, bidada peyu, bidada paibao," Jisasgo te po wai.

⁵⁹ Jisasgo augwali te bomo yai po ola mabo be tomode te po ola mawai, te Kaperneam be nanide.

Jisas aga wabo pogo mu bidada pabo bomo mabo dao

⁶⁰Te bidi Jisas agai te bret dagaludu dulali po olama, tama aga wali pabo we bidi hauwa augwaligo te po odolama, augwa hasi tomode te po wai, “Te pogo dabolo sęę mabo, dago te po magi elama, wali pogowe? Mena bidigo te po odolama, wali pabo usu egowe?” augwaligo te po wali.

⁶¹ Bidi mego agabolo te po wasiabantu, Jisas aga digi koneai, aga wali pabo bage hauwa augwa hasi tomode te hagelabo po wai. Tama tibaso, agai augwalibolo te po wai, “Eno wali pode dage sębę elama, dagego ena tagalaibawe? ⁶² Tialima, dagego suali ma te Godigo Bidi Mu aga polobadu bidali buluba hodobo suyu da, magi yaibawe?” Jisasgo te po wai. ⁶³ “Te mu bidabo bomo mabo bidi da, te God agai Mobo Bidi naga dao. Bidigo bomogo dwasianu me tau sogobeo, usu egobeo. Te po eno dagebolo polo wai dao, te pogo dagebolo God agai Mobo Bidi mabo dao, agai dagebolo te mu bidabo bomo momainogo. ⁶⁴ Tiali digi, me badu bidi dage tomode augwaligo enade bomo yai homu dąu olama, mube,” Jisasgo te po wai. Polobadu digi, aga sę ebo gagalali sogode, Jisas aga koneai agade bomo yai homu dąu olama, musiabo bage. Tama aga koneai me, te aga te boi bidigo nogoba sela maiabo bidi, te me agai polobadu koneai. ⁶⁵ Tama

Jisasgo po me wadoloyu, te po wai, “Te pagede eno dagebolo te po wai dao, Ayago bidi mebolo usu dao wasiąyu da, teda te bidi ena pageba asobo usu egobeo,” Jisasgo te po wai.

⁶⁶ Te po silama, tama Jisas aga wali pabo we bidi hauwa augwaligo te po odama, Jisas tagalama, augwa ma geasa pai, tama augwali Jisas dali me bidibeo. ⁶⁷Tama tibaso Jisas aga bidi nogo si olama, sąą badu si bidibolo te po hanalu wai, “Dagego me ena tagalama, paibawe?” te po hanalu wai. ⁶⁸Saimon Pitago Jisasbolo po wei ponoyu, te po wai, “Genuai Bidi, dago nage tagalama, da mena bidi pageba pogowe? Nago po da, te bidata peyu bidata pabo bomo elalubuo. ⁶⁹Tama dago te pode bomo yai homu dąu olama, bidibo dao. Me dago nage koneai, naga digi naga Godigo doloba pai bidi mu dao, Godigo tagala palai bidi dao, te dago konebao,” Pitago Jisas dali te po wai. ⁷⁰Jisasgo te po wei ponoyu, te po wai, “Eno dage nogo si bidi selama, sąą badu si bidi dage eno sai dao. Tialima, dage tomode me deli dwai haubo bidi te bidibao,” Jisasgo te po aga bidi dali wai. ⁷¹Jisas agai te Judasde te po wai, te gasa bidi Saimon tego ogwa, aga bulu nogi Keriot. Te aga nogo si olama sąą badu si bidi te tomode, tialima, nosali te Judas agai Jisas boi bidi nogoba sela muaibao.

**Jisas aga ama dede dabe dali pelama, te Juda bage
olo osogo bidibo bede bidibo sugi pali**

7 ¹Te silama, tama Jisas aga Galili genuai tqba pelama, tede bidiyu, te me me buluba bilalio. Juda bage augwaligo Jisas elainogo yai, tama tibaso Jisas aga te Judia genuai tq te badu me bilibo te hagela yai. ²Tama Juda bage olo bidibo side, te augwaligo nogi te nami ugwa bede bidabo side, te olo bidibo si te pąba yagasai. ³Tama tibaso aga ama dabe augwaligo Jisas agabolo te po wai, “Nage e bulu tagalama, tama nage Judia moni tqba pao, te nago ebo sę te naga wali pabo we bidi augwaligo te sę sumainogo yao. ⁴Bidi me deli agai homu te tigidali we bidigo aga sumainogo, te agai ebo sę me geme dualama ebo menio. Te tiwai, nago te sę eyu da, tiali da, nage tigidali we bidi gedude augwaligo nage sumainogo, waselao,” aga ama dedego te po wai. ⁵Magi basowe? Aga ama dede augwaligo agabolo bomo yai homu dąu olama, mubeo, tama tibaso augwaligo te nage te moni Judia tqba pao po wai.

⁶Jisasgo augwalibolo te po wai, “Eno side te polo pedalobeo. Tialima, tigidali sogo te dagego side dao,” wai. ⁷“Tqde we bidi augwaligo dage dali sębę elama, boi bidi me ebo menio. Tialima, augwaligo ena dali sębę elama, boi bidi mu ebo dao. Magi basowe? Eno augwaligo ebo dwai kolesaga bolo eno augwali dali po wabo dao. ⁸Dage naga ugwaba holią, te Juda bage augwaligo olo bidibo side te dagego sugi pao. Tialima, ena teba pabo me elalubo. Eno bodolu mani si te me elalubo,” Jisasgo te po wai. ⁹Jisasgo agai tama po augwali dali wai, tama aga Galili bulude bidai.

**Jisas pelama, Juda bage augwali ugwa bede
bidabo olo bidibo side sugi pai**

¹⁰Tialima, Jisas aga ama dede augwali Juda bagego olo bidibo side ebo s̄e sugi pai. Sugi pelama, tama nosali Jisas aga me holai. Aga teba hania me holobeo. Jisas aga geme pai. ¹¹Te Juda hani tobolu bidi dabe augwaligo te side aga gegebo s̄e yai. Tama augwaligo te po wai, “Te bidi mena bidibowe?” te po te Juda bagego hanalu wali. ¹²Tama te we bidi augwa hasi pomu po hauwa Jisasde wali. Mebago te po wai, “Te dwagi yai bidi dao,” wai. Tialima, mebago te po wai, “Agai augwali we bidi ili po ola mabo dao,” Jisasde te we bidi augwa hasi te pomu po wai. ¹³Tialima, augwaligo te Juda tobolu bidi dabe suyu, wi yai. Tama bidi deligo Jisasde aga po hanilama me wabeo.

¹⁴Te Juda bagego olo bidibo si tomode mu Jisas te Moni Lotu Be tempel tomoba holama, te we bidi po ola mabo gagalali. ¹⁵Tama te Juda bage tobolu bidi dabe augwaligo agai ola mabo pode noma sali. Augwaligo te po wai, “Te bidi aga te skulba pis̄awai bidi dao. Te tiwai bidama, tama agai mena s̄e ilama, te po page hauwa konebo dawe?” augwa hasi te po wai.

¹⁶Te Jisasgo augwalibolo te po wei ponoyu, te po wai, “Te po eno dagebolo ola mani po da, te eno po menio. Te God agai po dao, agai ena tagala palobaso, ena asai dao. ¹⁷Niwai bidigo Godigo homu kolesaga wali pabo bidi agai eno ola mabo po page koneagameo. Eno te we bidibolo ola mabo po menade saliwe? Te Godigo po dawe? Ma eno homugo naga te po obawe? Niwai bidigo Godigo homu kolesaga wali pabo bidi agai eno ola mabo po page koneagameo. ¹⁸Bidi mego agai homugo digi po wabo bidi da, te bidi aga genuai nogi aga digi sainogo tibo dao. Tialima, bidi homugo tego ena tagala palama, ena asai da olama, agai Godigo nogi ugwaba siyu da, te usu yaibao, te tebo bidi da doloba pai bidi da, agade tibo dwai s̄e me isiawai bidi dao. ¹⁹Polobadu Mosesgo dage te Godigo bomo yai po mawai dao. Tialima, dage tomode bidi mego te bomo yai po wali pabo menio. Magi baso dagego ena elainogo ebawe?” Jisasgo te po hanalu wai.

²⁰Te we bidi augwaligo Jisasbolo po wei ponoyu, te po wai, “Dego nage elainogo ebawe? Woo, noma bidi dwai me deli nagede bidibaso, nago te po wali,” te olo we bidi augwaligo te po wai. ²¹Jisasgo augwalibolo po wei ponoyu, te po wai, “Ena bomai s̄e me deli te Sabat sogode ebaso, dage tigidali noma sali. ²²Moses agai dagebolo te bomo yai po polobadu mawai dao, ogwa ame nenama, a naga bidama me badu nogo sela wabo side, aga tigiwali togwa, daj̄ ilao wali. Duga wāj̄ mu te po me wai dao, tama nosali Moses me agai te bomo yai po aşani. Tama te bomo yai po bolidali weyu, me sogo Sabat sogode dagego ogwa tigiwali togobo s̄e ebo

dao.^g ²³Dagego te tigiwali togobo bomai po wali peyu, te Sabat sogode me sogo te sę eyu da, teda dagego enade magi baso sębę ebawe, ena te gasi yai bidigo tigi eno dodolobo sę yalide. ²⁴Dagego gedugo naga ena olo dali osola sulamuo. Dagego bugagia osola suyu, homu kolesaga dolo mu yao,” Jisasgo te po wai.

Augwaligo te po wai, “Te bidi te sa muyu, asaibao wali bidi dawe?”

²⁵Te Jerusalem we bidi mebago noma dwasianu siyu, te po wai, “E bidi te toboli bidi dabego elai hagede yali bidi dawe? ²⁶Sua. Agai po bidi gabidide te wabao. Tialima, augwaligo Jisas dali po me wabeo. Dago toboli bidi dabe augwaligo me e homu ebawe, ‘Te bidi Jisas da te Krais da, te sa muyu asaiba wali bidi,’ augwaligo te homu ebawe? ²⁷Tiali goli te asaiba wali bidi pedalobo si, te bidi me deligo agai page bulu me konegobeo. Me ma, dago e bidi Jisas agai page bulu te dago kone dao,” te we bidi mebago te po wai.

²⁸Tama Jisas agai te Moni Lotu Be tempel tomode te we bidi agai po ola mobadi, agai i bomo elama weyu, te po wai, “Ao, dagego ena koneai dao, eno page bulu be dagego koneai dao. Tiali digi, ena homugo digi ena me asobeo. Ayago ena tagala palobaso, ena asai dao. Agai kolesaga te mu tama dao. Dagego aga me konebeo. ²⁹Tiali digi eno da God aga koneai dao. Ena da aga dali bidai. Agai ena tagala palai, e tqba. Tama tibaso, eno aga mu koneai dao,” Jisasgo te po wai, te Juda dabe dali.

³⁰Tama tibaso, te Juda bage toboli bidi dabe augwaligo Jisas aga kalabus ilainogo yai. Tiali digi, agai sogo meba elalubuo, aga bodolu mani sogo asobeo, tama tialima bidi me deligo aga nogo me tubeo. Menio. ³¹Me ma, te olo we bidi hauwago Jisasbolo augwa konealubo homu dą̄ olama, elaluali. Augwaligo te Jisasba homu musiąwai bagebolo te po wai, “Te God agai sa muyu, asaiba wali bidi pedalobo si, te bidigo bomai sę hauwa mu eyu da, Jisasgo yali bomai sę aiyaba elaluaiabawe? Menio,” augwaligo te po wai

Augwaligo Jisas kalabus emainogo enesigi bidi dabe tagala palai

³²Te Farisi hani bidi augwaligo te olo we bidigo Jisasde te tobage po pomu po wabo odali. Tama te po odama, te Farisi hani bidi dabe dede, te pris toboli bidi dabe dede, augwaligo enesigi bidi dabe tagala palama, Jisas kalabus yainogo, “Sigi pao,” wai. ³³Tialima, Jisasgo te po wai, “Dwasianu sogo ena dage dali bidaibao. Te silibo si, ena te ena tagala palai bidi pageba ma paibao. ³⁴Tama dagego ena gegebo sę yaibao, tiali digi dagego ena me sugobeo. Magi basowe? Dagego ena bidabo buluba me pogobeo,” Jisasgo te po te Juda dabe dali wai. ³⁵Tama Jisasgo te po

^g 7:22 Gag 17:10; Prs 12:3

obaso, te Juda dabe tobolu bidi augwa hasi po weyu, te po wai, “Te bidi Jisas aga menaba pai digi, dago aga gegelama, sugobewe? Jisas aga te Grik po wabo bidi dabego moni be naniba pogowe? Tede Juda bage me badu bidibo dao. Tama Jisas teba pelama, agai te Juda dabe me, Grik dabe augwalibolo te po ola magi paibawé? ³⁶ Agai dabolo te po wai, ‘Dagego ena gegebo sę yaibao, tiali digi dagego ena sugobeo.’ Agai te po me wai, ‘Dage ena bidabo buluba me pogobeo.’ Jisasgo te wali po page mena tamawe?” te Juda dabe tobolu bidi dabe augwa hasi te po wai.

Jisasgo te bidabo bomo elalubo ağıde po wai

³⁷ Te olo bidibo si silibo side, te genuai side dao, wai. Te tebo side Jisas dolaluyu, bomo olama, i wai, “Bidi me deli ağı nogone eboso da, te bidi ena pageba aselama, ağı tuagasao. ³⁸ Godigo wali po aşəani bukude te po aşəani po gilama, ‘Bidi mego enabolo homu dąu olama, mubaso da, ta, te bidigo homu kolesagade te bidabo bomo elalubo ağı hauwa mu ulu pedalama, bilaibao,’ wai,” Jisasgo te po wai.^h ³⁹ Jisas agai te ağı po te Godigo Mobo Bidide wai. Augwa homu dąu olama, Jisasba mubo we budi teba Godigo Mobo Bidi nosali asaibao. Tiali goli te sogo Jisas aga bomo dali moni nogi dali sisabadi, God agai Mobo Bidi te we bidibolo mabe, te nosali mawaibao.

Te we bidi augwali bidi hani si pedai

⁴⁰ Meba we budi augwaligo Jisasgo wali po odolama, te po wai, “Mu tama, te budi Jisas da te polasa asobo budi, te Krais aga asobo sogo te pąde tama dao.” ⁴¹ Meba bidigo te po wai, “Te aga da, te Godigo sa muyu asaibao wali budi dao.” Tiali digi mebago te po me wai, “Woo, Godigo asaiba wali budi te Galili bulude pedalogobeo. ⁴² Godigo nosali yabo sę po ola mani profet budi mego bukude aşəani po, te po me deli te tiwai dao, Godigo asaibao wali budi te Devitgo hani asali digi tedu asaibao, te be nani nogi Betlehem tedu asaibao, te bulu polobadu Devit aga page bulu dao,” budi mebago te po wai.ⁱ ⁴³ Tama tibaso, te we budi augwali bidi hani si tomode bugwai, te Jisasde. ⁴⁴ Meba budi hani augwaligo homugo Jisas kalabus yabo homu yai. Tiali digi budi me deligo Jisas agaba nogo me mubeo.

Juda bage tobolu bidi dabego Jisasba homu mubeo

⁴⁵ Te geasa pelama, enesigi budi dabe augwali te pris tobolu budi dabe dali, te Farisi budi dabe dali, augwali bidibo digi sabolai. Tama te tobolu bagego te enesigi budi dabe hanalu wai, “Magi yaliwe? Dagego te budi Jisas selas asai meniwe?” ⁴⁶ Te enesigi budi dabego po wei ponoyu, te po

^h 7:38 Ese 47:1; Sek 14:8 ⁱ 7:42 Mai 5:2

wai, "Polobadu bidi mego Jisasgo wabo po tiwai munu me wai menio," te po wai.⁴⁷ Tama tialima, te Farisi bagego dwai homu eyu, augwalibolo po wei ponoyu, te po wai, "Agai dage me ili po ola maniwe?⁴⁸ Da toboli bidi hani dali, Farisi bidi hani dali dago Jisasgo wabo pode homu musiąbaso, te dagego me agabolo duga homu mugio.⁴⁹ Tialima, te olo we bidi hani augwaligo Godigo bomo yai po page konebeo. Tama tibaso, augwali Godigo gedude dola silaibao," Farisi bagego te po wai.

⁵⁰ Nikodemus te bidi polobadu Jisas pageba pai, te bidi te Farisi aga hani toboli bidi me. Tama agai augwalibolo te po wai,⁵¹ "Dago bomo yai po e tiwai dao, te olo bidi me po tū odosiąbadi, dago te bidibolo sęge magobeo. Aga yali sę po dago odama, te aga dwai sę ebaso, teda dago aga po tū elama, sęge mawaibao," Nikodemusgo te po wai.⁵² Augwaligo po wei agabolo ponoyu, te po wai, "Nage me nage Galili bulu bidi dawe? Godigo bukude po bugagia nedao. Nedelama, koneao, Godigo nosali yabo sę po ola mabo profet bidi me deli te Galili buludu munu me pedalogobeo," augwaligo Nikodemusbolo te po wai.

**Te we me deli penani ebo sulama, augwaligo
nogo tulama, Jisas pageba odasa asali**

8 ¹ [We bidi augwaligo Jisasgo wabo po odama, tama augwa beba tedela pai. Tialima, Jisas bulu du me nogi Oliv te bulu duba Jisas pai.² Jisas aga kigamu digi mu te Moni Lotu Be tempel teba ma pai. Tama we bidi hauwa augwali Jisas agaba asai. Tama Jisas aga dualama, te we bidi po ola mabo ma gagalali.³ Tama te Juda dabego bomo yai po mu koneai bage dali, te Farisi hani bidi dabe dali, augwaligo we me deli magasali. Te we penani ebo sulama, augwaligo aga nogo tulama, odasa aselama, tama te we tomode dolaluai, te we bidi gabidide.⁴ Tama augwaligo Jisasbolo po weyu, te po wai, "Po ola mabo bidi, te wego penani ebuo, bidi mego suai," augwaligo te po wai.⁵ Augwaligo te po me wai, "Te Moses agai aşəani bomo yai pode e tiwai wali, 'Tiwai we yai baso da, masigi şanama, isimainogo elao,' te po wai dao. Jisas, nago magi po obaso, dago nago po naga odaibao," augwaligo Jisasbolo hanaluyu, te po wai.^j⁶ Augwaligo tama po obaso Jisas homu magibo yabowe naga suainogo tiwai. Augwaligo homugo Jisasgo wabo pode augwaligo po tū ela maiabo tū me gegainogo, te Jisasgo po weyu, aga geda muyu da, teda augwaligo agade nogo tū ela mumai hagede. Tialima, Jisas tōba basialuyu, aga nogo danigo tōba po aşəduai.⁷ Augwaligo Jisasbolo ma hanaluyu, ma hanaluyu yai. Tialima, Jisas doligulama, agai te po augwali dali wai, "Bidi me dage tomode sęge meni yai bidi aga hasia mu te bidigo te we masigi sayaō," wai, Jisasgo te po augwali dali wai.⁸ Tama Jisas aga tōba basialuyu, tōde

^j 8:5 Prs 20:10; Bom 22:22-24

ma asęduai. ⁹Augwaligo tama po odolama, tama augwali tomode te sege meni yai bidi meni baso, tama augwali tigidali buluba deli deli naga buluba pai. Tobolu bidi polasa pai, tama meba augwali nosali pai, te po tu ebo tagalama, tama augwali Jisas taga pai. Tama Jisas agaduba deli digi bidai, tama te we Jisas aga gesabide dolaluai. ¹⁰Tama Jisas oligulama, te we dali po wai, “Augwali mena bidibawe? Bidi me deligo nage po tu ela maiabo bidi bidibowe?” Jisasgo te we dali te po wai. ¹¹Te wego te po wai, “Genuai Bidi, me deli me bidibeo.” Tama Jisasgo te po wai, “Eno me nage po tu elama, nagebolo sege magobeo. Nage pao. Tama nosali nago dwai se ma egio,” Jisasgo te we dali te po wai.]

Jisas aga e tqde ula dao wai

¹²Te Jisasgo te Farisi hani bidi augwalibolo nosali te po ma wai, “Ena te tqde we bidide ula dao. Bidi ena wali asobo bidi aga te bugagia bidabo ula aga selama, e tqde bidaibao, aga hulide munu me bidigobeo,” wali. ¹³Tama te po obaso, te Farisi hani bidi augwaligo Jisas agabolo te po wai, “Megi nago e pusubo po naga tobade wabo. Gasa bidi meg o nagede te po wabeo. Nago po da, te mu po menio,” augwaligo te po wai. ¹⁴Tama Jisasgo augwalibolo po wei ponoyu, te po wai, “Woo, te mu tamao. Ena digi ena tobade te po wali goli, te po mu dao. Magi basowe? Dagego ena taga soyu asali bulu te dagego konebeo, ena mena buluba pabowe te me dagego konebeo. Tialima, ena hogodama, taga soyu asali bulu, te ena konealubo. Tama ena te buluba ma pabo te me eno konealubo. Tama tibaso, ena digi ena tobade te ena da tqde we bidigo ula dao po wali goli, te mu po dao. ¹⁵Dagego bidi me osola subo si, tama dagego tqde bidibo we bidigo kolesagade osola subo dao. Ena da bidi me osola subo menio. ¹⁶Tialima, eno bidi me osola sugi sogo da, teda eno dolo mu naga te bidi osola sugi da. Magi basowe? Enaduba naga te se ebo menio. Ena tagala palali bidi ena Ayago ena dali te se ebo dao. ¹⁷Dagego bomo yai po me deli e tama telaluboo, bidi sigo gasa bidide wali po deli po tiwai naga weyu da, te po mu po dao. ¹⁸Ao, te tiwai, eno po da te ena digi ena tobade wabo dao, tama Ayago ena tagala palobaso, te ena asai dao, te Ayago agai me ena me da sigo ena tobade po wabo dao. Te ena tobade po wabo bidi si dao, dagego bomo yai po wali tiwai dao,” Jisasgo te po wai. ¹⁹Tama tialima, augwaligo Jisasbolo te po wai, “Nago aya mena bidibowe?” Jisasgo te po wei ponoyu, te po wai, “Dagego ena page kuna konebeo. Tama dagego eno Aya me dagego konebeo. Dagego ena konegi sogo da, teda dagego eno Aya me konegi da,” Jisasgo te po wai.

²⁰Jisas agai te po te masigi ge mubo be habude bidiyu, te po wai. Agai te we bidi te Moni Lotu Be tempel tomode ola mayu, te po wai, te masigi ge mubo be habude. Tama tialima, bidi me deligo aga kalabus me ebeo. Magi basowe? Te Jisas agai bodolu mani si te me elalubuo.

“Dage ena pabo buluba pabo usu egobeo,” Jisasgo te po wai

²¹ Jisas agai augwalibolo po ma wai, “Ena paibao. Dagego ena gegebo sə yaibao. Tialima dagego yali dwai səgo səgə me elalubadi, dage isaibao. Dage ena pabo buluba pabo usu egobeo,” Jisasgo te po wai. ²² Tama Juda bage toboli bidi dabe augwaligo te po augwa hasi wai, “Agai te po wali, da aga pabo buluba pabo usu egobeo, wali. Te po page e tama tiwai elalubowe, Jisas aga digi aga ma elainogo waliwe?” Juda bage augwaligo te po wai.

²³ Jisasgo augwalibolo te po wai, “Dagego page bulu aiyadu dao, eno page bulu ugwidu dao. Dage e təde bidibo bage dao, ena e təde bidi menio. ²⁴ Tama tibaso, eno dagebolo po wai dao, dagego yali dwai səgo səgə te me elalubadi, dage isaibao. Tama dage mu tama te səgede isaibao, dage enade ena te təba dulali bidi dao po dagego te pode ‘Mu po dao’ homu esiąyu da,” Jisasgo te po wai.

²⁵ “Nage dewe?” augwaligo aga hanalu wai. Jisasgo augwalibolo te po wai, “Hasia sogode eno dagebolo wali gilamao. ²⁶ Eno dagede wabo po hauwa elalubao, dagego ebo kolesaga hauwa me eno osola sueibao. Tialima, ena tagala palali bidi te agai homu kolesaga te mu tama dao. Tama tigidali po eno Godide odobo po te po naga eno təde we bidibolo wabo dao,” Jisasgo te po wai.

²⁷ Augwaligo Jisasgo aga Ayade po wabo te augwaligo me konebeo. ²⁸ Tama tibaso, agai augwalibolo te po wai, “Nosali dagego Godigo Bidi Mu ni pedaide daganama, te ugwbaba sel a muaibao. Te tebo sogo da, te dagego koneaibao, ena te ena digi dao. Te sogo me dagego koneaibao, eno haniani sə eyu, eno homu wali pisiąyu te sə yilio. Eno po Ayago ena ola mani po naga wabo dao. ²⁹ Agai ena tagala palobaso, ena asai, agai ena dali bidibao. Agai ena tagalama, enaduba bidibo menio. Magi basowe? Eno ebo sə te God agai godolo yabo sə naga ebo dao,” Jisasgo te po wai. ³⁰ Jisas agai te po obadi, we bidi hauwa agabolo homu dą̄ olama, muai.

³¹ Tama tibaso, Jisas agai te agabolo homu tamadi muai we bidi tebolo te po wai, “Dagego eno ola mabo po wali peyu da, teda dage ena wali pabo we bidi mu dao. ³² Tama dagego te Godigo enade wabo mu po dagego mu koneaibao. Te mu po dagego mu koneama, tama te po mugoo dage tau selama, tama dage nogo dą̄ wali kolesaga tagalama, tama dage olo mu bugagia bidaibao,” Jisasgo te po wai.

³³ Tama augwaligo Jisasbolo te po wai, “Woo, da Abrahamgo hani dao. Te tebo side bidi deligo da hani olo sə ebo bidi te nigilama munu me bidai menio. Magi baso nago te po obawe, ‘Dage te nogo dą̄ wali kolesaga tagalama, tama dage olo mu bugagia bidaibao’ po magi baso obawe?” augwaligo Jisas dali te po wai. ³⁴ Jisasgo augwali dali te po wai, “Eno mu po dagebolo obao, tigidali we bidi augwaligo dwai sə edu da, augwali te

dwai sę segę dologode me bididu ebao, te augwali te nogo dąu wali olo sę ebo bidi dabe gagawai bidibao. ³⁵Te olo sę bidi aga te be page bidigo hanide mu bidigobeo, osogo tama bidaibao. Tialima, te be page bidigo ogwa aga te bidi hanide tigidali sogo mu bidada paibao. ³⁶Ena da God agai Ogwa dao. Tama eno dage bonogo nogo kęaluali pisigma sayu da, teda dage bonogo nogo ma kęalugobeo, olo mu bugagia bidaibao. ³⁷Eno koneanio, dage te polobadu bidai bidi Abrahamgo hani dao. Tialima, dagego eno po sabo homu isiąbaso, dagego bomo elama, ena elabo homu naga ebo dao. ³⁸Eno Aya agai enabolo ola mani sę po naga te tigidali sogo eno wabo dao. Tama tiali goli, dagego da, duga ayago dagebolo ola mani sę selama, te sę ebo dao,” Jisasgo te po wai.

Dagego aya te Satan dao

³⁹Augwaligo Jisasbolo po wei ponoyu, te po wai, “Dago ayago hani page bidi da te Abraham dao,” te po wai. Jisasgo augwalibolo te po wai, “Dage Abrahamgo wai dabe tigi sogo da, teda dage Abrahamgo yali kolesaga gagawai eyu, Godigo po odigi da. ⁴⁰Eno dage dali wabo po te eno Godigo mu po eno odolama, te po naga dagebolo wabo dao. Tialima, dagego ena elainogo ebao. Abraham agai tama tiwai menio. ⁴¹Dagego duga ayago yali kolesaga megı ebao,” Jisasgo te po wai. Augwaligo Jisasbolo te po wai, “Dago idago da penani elama, da ame nai menio. Dago aya deli te God dao,” te Juda bagego te po wai, Jisas dali.

⁴²Te bidi Jisasgo augwalibolo te po wai, “Te God aga dagego aya mu tigi sogo da, teda dagego ena dali godolo mu egi da. Magi basowe? Ena God dali bidilama asai dao. Ena homugo digi ena asobeo. Godigo ena tagala palobaso, asai dao. ⁴³Magi baso dagego eno po homugo bugagia konebewe? Te page tama dao. Dagego bomo elama, dagego eno po sabo homu ebo menio. ⁴⁴Dage da duga ayago wai dabe dao. Dagego aya te Satan dao. Tama dage me bomo elama, duga ayago ebo homu kolesaga wali painogo ebo dao. Polobadu mu, tigidali nai gagalama nigali, te sogo te bidi Satan agai te bidi elebo sę tama ela asiyu, megı tama me te sę ela pabo dao. Tama agai mu po me wali pai menio. Magi basowe? Mu po agade bidibo menio. Tibo po wabo da te agai po mu dao. Satan aga tibo po wabo bidi mu dao. Tama aga tibo po wabo page bidi mu dao. ⁴⁵Tialima, ena da mu po obaso, dagego eno po mu po dao homu esiyu, tama dagego te pode homu mubo menio. ⁴⁶Dage tomode bidi me deligo te enabolo nago dwai sę yali po weyu, tama te dwai sę page agai hania ola mabo usu egobeo. Te po kedu enade meni yai po dao. Tialima, eno mu po obadi, te dagego magi baso homude dąu olama, mubewe? ⁴⁷Godigo wai dabego da augwaligo Godigo po tigidali odobo dao. Tiali digi, dage Godigo wai dabe menio. Tama tibaso, dagego bomo elama dagego Godigo po sabo homu ebo menio,” Jisasgo te po wai.

Abraham pedalisiqbadi, te sogo ena bidai

⁴⁸ Te Juda bagego Jisasgo po wei ponoyu, te nogi posobo po wai, “Dago nagede tama po wai dao, ‘Aga da dwai Samaria hani bidi dao. Tama dwai haubo mobo bidi agade bidibao,’ dago te po nagede wai dao. Dago mu po tamao,” Juda bagego Jisas dali te po wai. ⁴⁹ Jisasgo po wei ponoyu, te po wai, “Enade dwai haubo mobo bidi me bidibe. Eno ena Ayago nogi ugwaba sabo dao. Tiali digi, dagego eno nogi posobo dao. ⁵⁰ Tialima, eno ena nogi ugwaba sabo sę me ebeo. Tialima bidi me deligo eno nogi ugwaba sabo sę ebo dao. Tama te bidi aga te ena dali dage dali tomode te po tų ebo po dodolabo bidi mu dao. ⁵¹ Mu po eno dagebolo obao, eno po wali pabo bidi dabe augwali munu me isigobeo,” Jisasgo te po wai.

⁵² Te Juda bage augwaligo Jisasbolo te po wai, “Megi da dago mu konebao, nagede dwai haubo mobo bidi bidibao. Abraham isai dao. Godigo nosali yabo sę po ola mani profet bidi dabe me augwali isai dao. Te genuai nogi elalubo bage augwali isai digi, nago te po wai, ‘Eno po wali pabo bidi dabe augwali munu me isigobeo.’ ⁵³ Magi yainuwe? Nago dago wąj Abraham aiyaba elaluai hagede, nago te po waliwe? Te isai dao. Godigo nosali yabo sę po ola mani profet bidi dabe augwali me isai dao. Naga digi magi baso naga nogi ugwaba sobawe?” Juda bagego Jisas dali te po hanalu wai.

⁵⁴ Jisasgo po wei ponoyu, te po wai, “Ena digi ena nogi ugwaba sige sogo da, teda eno nogi olo tqde nai tiwai egi dao. Ena Ayago digi eno nogi ugwaba sabo dao. Te bidide dagego te po wabo dao, ‘Te dago God dao.’ ⁵⁵ Tiali goli, dagego aga munu me konebeo. Eno da aga hania konebo dao. Eno God aga konebeo po wagi sogo da, teda ena te dage gilama, tibo po wabo bidi tiwai bidigi dao. Tialima, te menio. Eno aga koneai, tama eno agai po wali pabo dao,” Jisasgo te po wai. ⁵⁶ “Duga wąj mu Abraham agai ena e tqba nosali bidagasaiba, te agai polobadu koneyu tama agai dwagi yai homu yai. Tama agai ena bidagasobo sulama tama agai tede dwagi yai homu mu yai dao,” Jisasgo te po wai.

⁵⁷ Te Juda bage augwaligo Jisasbolo te po wai, “Nago kibu be bidi sese si olama, nogo si ebeo. Nage gesi bidi dao. Tama tialima, nago Abraham suali po obawe?” ⁵⁸ Jisasgo augwalibolo te po wai, “Mu po eno dage dali obao. Polobadu Abraham tede bidu ame nesiqbadi yaide, te sogo ena bidai dao, megı tama me ena bidibo dao,” Jisasgo te po wai. ⁵⁹ Te Juda bage augwaligo Jisasgo te po wabo odobaso, tama augwaligo masigi selama, Jisas aga elainogo yai. Tialima, aga geme duala siyu, ela pelama, tama te Moni Lotu Be tempel taga peyu, aga buluba teda pai.

Gedu widai bidigo po

9 ¹ Te Jisas pobadi yaide, agai gedu widai bidi suai. Aga idago tabide elalubadi, tama aga gedu widai. ² Jisas aga wali pabo bidi augwalig

aga hanalu wai, “Po ola mabo bidi, te bidi dego sęge selama, aga idago gedu widai ame naniwe? Te bidi aga digi sęge saliwe, ma aga aya de ida sigo sęge saliwe?” te po wai. ³Jisasgo te po wei ponoyu, te po wai, “Te bidi aga sęge dali aga aya de ida sigo sęge dali tede menio. Te sę pedalali, te Godigo bomo te bidide hania pedalobo te we bidi dabe augwaligo sumainogo yai. ⁴Megi ulade dao. Tama ulade dago ena tagala palali bidigo sę yao. Hulia sabo magade, hulia sabode, bidi me deligo sę me egobeo. ⁵Ena e tőde bidibo sogo, te ena e tőde we bidigo ula dao,” Jisasgo aga isabo sogode te po wai.

⁶Jisasgo te po olama, tama agai tőba pesa sęawai. Tama pesa dali, tő dali piligai. Tama Jisasgo te tő selama, te bidi geduba pilali. ⁷Tama agai te bidibolo te po wai, “Nage wę ge aji nogi Siloam te aji paugi pao,” wai. (Te wę ge aji nogi Siloam, te nogi begelama, te po wai, bidi tagala palai.) Jisas agai te po obaso, te bidi pelama, aji paugi pai. Tama aga ma asai. Tialima, te bidi aga gedu megi tama mu tonobo usu yalio. ⁸Tama aga deli be bage aga hasi augwali me, te gasa bidi me badugo polobadu aga suai, te sogo agai we bidibolo agai masigi ge gonai, augwaligo augwa hasi te po wai, “Magi yaliwe? Te bidi te gedu widai dulaludu, masigi gonani bidi dawe?” augwaligo te po wai. ⁹Mebago te po wai, “Te bidi tama dao.” Tama mebago te po wai, “Te bidi menio. Te bidi tiwai dao, tiali te gasa bidi dao.” Tama te bidi aga digi te po wai, “Te ena te bidi tama dao,” te po wai. ¹⁰Augwaligo te bidibolo te po wai, “Magi ilama, nago gedu dwagi yai yaliwe?” te bidibolo augwaligo te po wai. ¹¹Te bidigo po wei ponoyu, te po wai, “Te bidi nogi Jisas, agai tő dali, aji dali piligilama, eno gedude pilai. Tama aga enabolo te po wai, ‘Nage Siloam wę ge aji ba pelama, te aji paugi pao,’ wai. Tama ena pelama, te aji paugi pai, tama eno gedu dwagi yai elama, tigidali nai eno subo dao,” te bidigo te po wai. ¹²Augwaligo te bidibolo te po wai, “Te bidi mena bidibowe?” Tama te bidigo te po wai, “Eno konebeo.”

¹³Te bidi polobadu gedu widali bidi augwaligo te Farisi bidi hani bidi dabebolo odasa pai. ¹⁴Te Juda bagego Sabat sogode Jisasgo aiyana pai tő selama, te bidi gedu pedalai. ¹⁵Tama te Farisi hani bage augwaligo te bidibolo ma hanalu wai, “Nago gedu mena tama dwagi yai pedalaliwe?” Te bidigo augwalibolo te po wai, “Te bidi agai aiyana pai tő eno geduba muai, tama ena aji pauwai, tama eno gedu ula yai.” ¹⁶Tama te Farisi bidi hani tomode si bugulama, mebago Jisasde te po wai, “Godigo te bidi tagala palobeo. Agai Sabat sogode bomo yai po wali pabeo.” Tialima meba bidigo te po wai, “Dwai sę ebo bidi mego te tiwai bomai sę me ebo menio. Te bidi dwagi yai bidi dao,” wai. ¹⁷Augwa hasi tama bugulama, tama augwaligo te gedu widai bidibolo ma hanaluyu, te po wai, “Nago gedu geselali bidi, te bidide nago magi homu ebewe?” Agai te po wai, “Aga da, te Godigo nosali yabo sę po ola mabo profet bidi me deli dao, eno te homu ebao,” wali.

¹⁸ Polobadu te bidi agai gedu halua sai, megı agai gedu pedai. Tialima, te Juda bage tobolu bidi dabe augwaligo homugo, te mu menio. Tama augwaligo te gedu widai bidi aga aya de ida si i wai. ¹⁹ Augwaligo te we de bidi sibolo hanalu wai, “E dage sigo ogwa dawe? Aga idago ame neyu, gedu widai ame nai, dage sigo tama po obawe? Tialima, magi ilama, agai gedu mu pedalisi?” te po wai. ²⁰ Te gedu widai bidi aga aya de ida sigo te po wai, “Da sigo koneai, e ogwa te da sigo ogwa dao. Aga idago ame neyu, gedu widai ame nai, tama te me da sigo koneai. ²¹ Tiali, megı agai gedu ula mena tama ilaliwe, te da sigo konebeo. Tama degı agai gedu pedalisi, te me da sigo konebeo. Dagego agabolo hanalu wao. Aga genuai yai dao, aga digi dage dali po wabo usu yaibao,” augwali sigo te po wai. ²² Aga aya de ida si Juda dabe dali wi eyu, te po peda sai. Magi baso meni, te Juda bagego po mia siyu, te po wai, “Bidi mego te Jisas te sa muyu asaiba wali bidi Krais da weyu da, te dago te po wabo bidi te dago bomo yai po ola mabo be tomoba asidali weyu habu selaibao,” te po wai dao. ²³ Tama tibaso, te polobadu gedu widai bidi aga aya ida sigo te po wai, “Aga genuai yai dao. Duga agabolo hanalu wao.” ²⁴ Tama si sogo te gedu widai bidi i wai. Te tobolu bidi dabe augwaligo te po agabolo wai, “Godıgo nogı naga ugwbaba sao, te bidigo nogı ugwbaba sigio. Dago koneai, te nago gedu dwagi yai ilali bidi aga dwai se ebo bidi dao. Tama nago agai nogı ugwbaba sigio,” augwaligo te po wai. ²⁵ Agai po wei ponoyu, te po wai, “Aga dwai se ebo bidi dawe, te eno konebeo. Eno te se deli koneai. Polobadu eno gedu widai. Tiali megı eno gedu ula yai.” ²⁶ Tama augwaligo agabolo te po wai, “Agai nage dali magi se yaliwe, agai nago gedu magila pedalisi?” ²⁷ Agai augwali dali te po wai, “Eno dagebolo wai dao, tialima dagego odobo hagela yai. Magi baso dagego ma odainogo obawe? Dage aga wali pabo bidi mu pedalainogo ebawe?” te bidigo Juda bage dali te po wai. ²⁸ Tama augwaligo aga dali dwai nogı posobo po weyu, te po wai, “Nage da, aga wali pabo bidi dao. Tialima, da te polobadu bidai nogı yai bidi Moses wali pabo bidi dabe dao. ²⁹ Dago koneai, God agai po Mosesbolo mawai. Tialima, u bidi menade pedalisi, te dago konebeo,” augwaligo te po wai.

³⁰ Te gedu widai bidigo te Juda bagego tobolu bidi dabebolo te po wai, “Te bidi noma sabo se yali bidi dao. Aga menadu asaliwe, te dagego konesiqwai goli, agai eno gedu si dwagi yai ilali. ³¹ Dago koneai, Godıgo te dwai se ebo bagego hanalu wabo po odobo menio. Tialima, bidi me deligo agai Godide wi eyu, Godıgo po odoyu, Godıgo homu wali pabo bidi, te bidigo hanalu wabo po Godıgo odobo dao. ³² Tigidali sogo polobadu bidi me deli aga idago gedu widai ame nani po dago odai. Tiali digi bidi me deligo te gedu pedalisi po dago munu me odai menio. Dago wai mu, augwaligo te tobage po odai menio, dago ayago me, tama megı dago me odai menio. ³³ Godıgo te bidi tagala paligi menigi da, teda agai eno gedu dwagi yai iligi menio,” te polobadu gedu widai bidigo te po wai.

³⁴ Augwaligo te gedu widai bidibolo te po wai, “Nage ame neyu, nage dwai sə dali bidai. Nage dwai səgəde bidai bidi mu da, nage. Tama tiali goli, magi baso nago da ola mawainogo ebawe?” augwaligo te po wai. Te po olama, augwaligo te polobadu gedu widai bidi te augwaligo bomo yai po ola mabo be tomoba asidali weyu, habu selali.

Homu kolesaga tomode gedu halua sai

³⁵ Te bidi Jisas agai te Juda bagego te polobadu gedu widai bidi habu selali po odai. Agai te bidi gegelama, sulama, te po wai, “Nago te Godigo Bidi Mude naga homu dəq olama, mubawe?” Jisasgo te po wai.

³⁶ Te bidigo te po wai, “Genuai Bidi, te Godigo Bidi Mu te de dawe? Nago enabolo wao, agabolo eno homu muainogo yaibao.” ³⁷Jisasgo agabolo te po wai, “Nago aga suai. Te megi nage dali po wabo bidi tama dao,” Jisasgo te bidi dali te po wai.

³⁸ Tama te bidigo kidu təba sugunama, Jisasbolo te po wai, “Genuai Bidi, eno nagebolo homu dəq olama, mubao,” te bidigo te po wai.

³⁹ Jisasgo te po wai, “Ena e təba asali, təde bidibo we bidi dagalai hagede asai. Te homu kolesaga tomode gedu halua sai bidi, gedugo ma sumainogo te ena asai. Me ma, we bidi meba augwaligo homu, ‘Ao, dago koneai dao, te da te gedugo subo bage dao,’ augwaligo te homu ebo dao. Tama tibaso, augwaligo Godigo homu koneidali weyu augwali gedu halua somainogo ena asai dao,” Jisasgo te po wai.

⁴⁰ Te Farisi bage me badu augwali Jisas dali tede bidai. Tama augwaligo te po odai. Augwaligo Jisasbolo te po wai, “Da me homu kolesaga tomode gedu halua sai dawe, nago te po obawe?”

⁴¹ Jisasgo po wei ponoyu, te po wai, “Dagego te homu eyu, ‘Ao, da te homu kolesaga tomode gedu halua sai bage dao,’ te dagego te homu eyu, tama dagego eno po sela sagi menigi da, teda dage dwai səgə menigi da. Tialima, dagego duga gedu ula elalubao po waligo da, teda dagego səgə me elalubao,” te po wai.

Kibu sipsip tomogae tomode bidibo po begelama wai

10 ¹Jisasgo te po wai, “Mu po eno dagebolo obao. Bidi kibu sipsip bidibo bagulali obo tomogae tomoba pabo tədu dolo pisəbo bidi da, te tialima agai gasa badu tomogae bolama tomoba pabo bidi yai baso da, teda te tebo bidi aga te nai wi sabo bidi dao, mena nai anomā elama sabo bidi dao. ²Tialima, bidi tədu tomoba pabo bidi, te aga sipsip tonalubo bidi dao,” te po wai. ³“Te sipsip tonalubo bidi asobaso, te sipsip tomogai tə tonalubo bidi agai te tə dalama, tama te sipsip tonalubo bidi tomoba pelama, tama agai aga kibu sipsip nogi deli deli i wabo dao. Sipsip dabe i olama, tama aga polasa pobaso, tama te sipsip dabe augwali aga wali buluba soabo dao, te tubo noswai gegemainogo tebo dao. ⁴Tama

augwali tigidali buluba teda soabode, te sipsip tonalubo bidi aga polasa peyu, augwali aga wali pabo dao. Magi basowe? Augwaligo aga po wabo dogoni odoyu, wali pabo dao. ⁵ Augwali gasa bidi wali me pabo menio. Augwali te bidigo po wabo dogoni odolama, tama konesiąwai dogonigo po obaso, augwali wi pabo dao,” Jisasgo te we bidibolo te po wai. ⁶ Jisasgo te po begelama, augwali dali wai. Tialima, augwaligo Jisasgo te wali po page augwaligo konebeo.

⁷ Te augwaligo Jisasgo wali po digi begelai po page konesiąbaso, agai augwalibolo te po ma wai, “Ena mu po dage dali obao, ena digi ena da kibu sipsipgo tomogai tü palialubo bidi dao,” te po wai. ⁸ “Te ena nosali asobadi, polasa asali te bidi dabe augwali nai wi sabo bage dao, dage meba tiwai dao, te mena nai anoma elama, nai wi sabo bage dao. Tialima, te sipsip dabe augwaligo te bidi dabego wali po odobeo. ⁹ Ena digi ena te tomogai tü tiwai dao. Te kibu sipsip dabe tomogai tomoba pelama, tama bugagia bidiyu, buluba ma soyu, tede nai tuyu elama, bugagia bidibo dao. Te tiwai egilama yaibao, bidi me ena bidibo digi asobaso da, aga Godigo tau selama, ma saibao. Tama te bidi dwagi yai madide bugagia bidaibao, te kibu sipsip bidibo tiwai egilama. ¹⁰ Te tibo po wabo bidi, aga te sipsip wi sabo bidi tiwai dao, te wi sabo bidi agai te homu deli naga elasa asai, agai te sipsip dabe wi siyu, ela munama, doloyu yainogo, te homu naga elasa asai. Tialima ena da, we bidi augwaligo bidabo bomo somainogo ena asai. Tama te bidabo bomo augwalide mu pagana pomainogo, ena asai dao,” Jisasgo te po wai.

Jisas aga dwagi yai kibu sipsip tonalubo bidi dao

¹¹ Jisasgo te po me wai, “Ena te kibu sipsip dabe bugagia tonalubo bidi dao. Te kibu sipsip bugagia tonalubo bidi agai te homu ebo dao, ‘Ena te sipsip tau sabo sę ebadi, tama te sipsip kibu elainogo asali bidigo ena me elebaso da, te usu dao,’ te kibu sipsip bugagia tonalubo bidigo te homu ebo dao. ¹² Tiali digi sipsip tonalubo masigi sabo sę naga ebo bidi, tama agai sipsip tonalubo bidi mu meni, te sipsip kibu aya wasiąwai bidi, aga te uni yowi asobaso, te sipsip dabe taga peyu, wi pabo dao. Tama tibaso, uni yowigo te sipsip kibu dabe ela tuyu, me badu wi pabo dao. ¹³ Magi baso te bidi wi pabo dawe? Te bidigo masigi sabo sę naga yai. Agai te kibu sipsip dabelede homu dene eyu, tau sabo homu isiąwai bidi dao.

¹⁴⁻¹⁵ Ena da, te kibu sipsip dabe bugagia tonalubo bidi da. Eno Ayago ena konebo dao, te eno ena Aya me konebo dao. Tama te tiwai egilama, eno ena kibu sipsip konebo dao, augwaligo me ena konebo dao. Eno te sipsip tau sidubadi, bidi mego ena ela muiyu da, te usu dao. Eno homu ena te sipsip tau saibao. ¹⁶ Eno gasa sipsip me elalubuo. Megi augwali e tomogai tomode bidibo menio. Te me eno sigi pelama, odasa asaibao, e tomogai tomoba muaibao. Tama augwaligo eno po odaibao. Tama deli kibu sipsip hani bidaibao, tama te sipsip dabe tonalubo bidi deli digi yaibao.

¹⁷Ena bidabo bomo te eno kibu sipsip tobade tagalaibao. Tama tibaso, Ayago ena godolo mu ebo dao. Tama nosali eno te bidabo bomo ma somai hagede eno te homu elama, ena bidabo bomo te kibu sipsip tobade tau siyu hasia tagalaibao. ¹⁸Bidi me deligo eno bidabo bomo me sela sagobeo. Magi basowe? Ena digi ena homugo koneama, tama ena bidabo bomo ena kibu sipsip tobade tagalaibao. Tama ena bomogo bidabo bomo tagalama, tama bidabo bomo ena ma sabo elalubuo. Ena Ayago enabolo te sę ya wai dao,” Jisasgo te po wai.

¹⁹Juda bage augwaligo te po odolama, augwali bidi hani si ma bugai. ²⁰Bidi hauwago te po wai, “Dwai haubo noma bidi agade bidiyu, aga polobao. Magi baso dagego agai po odobawe?” Juda bage me badugo Jisasde te po wai. ²¹Meba bidigo te po wai, “Te bidi Jisasde dwai haubo noma bidi bidigi sogo da, teda agai te tobage po wagi menigi da. Dwai noma bidigo gedu widai bidi gedu pedalaibawe?” Juda bage mebago Jisasde te po wai.

Juda bage augwaligo Jisas dali boi bidi homu yai

²²Te kedau side, Jerusalem moni hanude te Juda bagego olo bidibo si pedalali. Te olo bidibo si page e dao. Polobadu boi bidi mego te habu selali bolama, tama te Moni Lotu Be tempel dwai meda ilai, habu selali nai te be tomoba mugi pali. Tama nosali te Juda dabe augwaligo te be ma dwagi yai ilama, tü ma dawai. Nosali tigidali kibu bede te sogo ma konemainogo eyu, te side augwaligo olo bidibo sogo dao wai. ²³Tama te olo bidibo side Jisas aga te Moni Lotu Be tempel moni mabode bilali. Tama te be mabo te polobadu genuai nogi yali bidi Solomon agai nigali be mabo dao. ²⁴Jisas te moni be mabode bilibadi, tama Juda bage aselama, Jisas bagulama, te po wai, “Nisu naga sogo nago dago homu si pedemainogo ebawe?” Juda bagego Jisas dali te po wai. “Nage Godigo sa muyu asaiba wali bidi da, te Krais bidi da wida, nago po hanilama, da dali wao,” augwaligo te po wai.

²⁵Jisasgo augwali dali te po wai, “Eno dagebolo polobadu wai dao. Tama tiali goli, dagego eno po mu po dao homu ebeo. Eno Ayago tigidali bomo yai sę eno agai nogide te sę yao obaso, tama tigidali ena konesiawani we bidi eno te ebo sęde sulama, ena konemainogo, eno te sę ebo dao. ²⁶Tiali goli, dagego enabolo duga homu dą olama, mubeo. Magi basowe? Dage da eno kibu sipsip menio. ²⁷Eno kibu sipsip dabego eno po wabo dogoni odobo dao. Eno augwali koneai, tama augwali ena wali asobo dao. ²⁸Tama eno augwali bidata peyu, bidata pabo bomo mobao, tama augwali munu me isigobeo, hagagobeo. Menio. Bidi me deligo augwali eno nogode ma dobola sabo usu egobeo. ²⁹Magi basowe? Eno Aya agai augwali enabolo mawai. Agai bomo te gasa bidi tigidaligo bomo aiyaba elalubo dao. Tama tibaso, bidi mego Ayago nogode augwali

dobola sabo usu egobeo. ³⁰ Ena dali Aya dali si page deli tama dao,” Jisasgo te po te Juda bage dali wai.

³¹ Te Juda bage augwaligo te po odolama, tama augwaligo masigi ma selama, tama Jisas tigiba masigi s̄awai hagede, aga elemainogo yai. ³² Jisasgo augwalibolo te po wai, “Eno dagebolo Ayago dwagi yai bomo yai s̄e hauwa ola mawai dao. Tama dagego eno te yali s̄ede dwai s̄e me deli ebo sulama, tama dagego te homu eyu, ena masigi s̄anama elainogo ebawe?” Jisasgo augwali dali te po wai. ³³ Tama Juda bage augwaligo Jisas dali po bomo elama weyu, te po wai, “Dago homugo nago de dwagi yai s̄e yalide dago te homu elama, nage masigi s̄anama elainogo ebeo. Nage olo tqde bidi tiwai digi, nago Godibolo posobo po weyu, te po wai, naga digi nage te God dao, te po obaso dago nage masigi s̄anama elainogo ebao,” augwaligo te po wai.

³⁴ Jisasgo te po augwali dali wai, “Dagego bomo yai po aseani bukude te God agai wali po me deli elalubao, e dao, ‘Eno te po wai, “Dage da God dabe dao,”’ te bukude te aseani po elalubao.^k ³⁵ Tama dago koneai, Godigo te bukude aseani po te mu po tigidali sogo mu po dao. Tama te po tomode God agai te gasa we bidi tonalubo we bidi augwali god dabe dao wai. Te we bidibolo God agai po mawai dao. ³⁶ Tialima God aga digi ena sa muyu, e tqba tagala palai. Tama eno te po wai dao, ‘Ena da Godigo Ogwa dao.’ Tama tilama, dagego enabolo magi baso ‘Nage Godigo nogi dwai posobo po wai dao,’ waliwe? ³⁷ Eno Ayago enabolo yao wali s̄e eno egi menigi sogo da, teda duga homu enaba mugimio. ³⁸ Dagego duga homu eno wali poba musiawai goli, eno Godigo enabolo yao wali s̄e eyu da, teda dagego duga homu te yali s̄eba muiāo. Magi basowe? Te eno yali s̄eba duga homu mubaso da, te dagego homu bugagia mu koneaibao, God Aya enade bidiyu, ena God Ayade bidiyu ebao, te dagego konemainogo duga homu eno yali s̄eba muao,” Jisasgo te po wai.

³⁹ Te Juda bage augwaligo Jisas nogo bono duainogo homu ma yai. Tialima, agai augwali bidibo digi tagalama, gasa badu pai.

⁴⁰ Te Jisas ma pelama, Jordan pabo aji ma togogi pelama, tama pelama, Jongo we bidi polobadu baptais mani te bulu sabolama, Jisas te bulude bidai.

⁴¹ Tama te we bidi hauwa Jisas bidibo digi asai. Augwaligo te po wai, “Mu tamao, Jongo e bidigo ebo bomo yai s̄e me deli yai menio. Tiali digi tigidali po Jongo Jisasde wali po mu tama wai,” augwaligo te po wai. ⁴² Tama tede we bidi hauwa augwaligo augwa bomo yai homu dāu olama, Jisasba muani.

Lasarus isai

11 ¹Bidi me deli nogi Lasarus, te bidi gasi yai. Te Lasarus aga bulu Betani, te bulude te we si bidali, we me nogi Maria, we me

^k 10:34 Tib 82:6

nogi Marta, augwali si ama name si dao. ² Te we Mariago Jisas saqade denami yai wel nosali pilama, tama aga moni bobobage tobolu nisigo ma holai. Te Maria aga abe Lasarus gasi yai. ³ Tama tibaso, aga abe sigo Jisas bidibo digi po ola tolai. Augwali sigo te po wai, “Genuai Bidi, nago godolo mu yali bidi aga gasi salio,” te po wai.

⁴ Jisasgo te po odama, te po aga wali pabo bidi dabebole wai, “Te gasi page tama telalubuo. Te gasigo s̄e te bidi Lasarus isibo gasi naga menio. We bidi augwaligo Godigo ula yai bomo sumainogo eyu te bidi gasi yai. We bidi augwaligo Godigo Ogwa me nogi ugwaba somainogo eyu, te gasigo Lasarus sai,” Jisasgo te po wai.

⁵ Jisasgo te Marta dali, aga ama dali, Lasarus dali augwali Jisasgo godolo mu yai goli, ⁶ agai te Lasarus gasi ebo po odama digi, tama Jisas aga polo pisabadi, si sogo te bidibo bulude ma bidai. ⁷ Nosali si sogo silama, Jisas aga wali pabo bidi dabebole te po wai, “Da Judia tq̄ba ma pebelainao,” wai.

⁸ Aga wali asobo bage augwali noma selama, tama te po wai, “Po ola mabo bidi, polobadu gana Juda bagego nage masigi s̄anama elai hagede te homu yai. Nage teba ma pelamuo,” te po wai.

⁹ Jisasgo te Godigo bodolu mani sogo naga te aga isaibao po augwalibolo ola momainogo agai po nogo habu sugunama te po wali, “Te giliga nanobadi yaide, te ula elalubao. Tama siade bilibo bidi tulamubo menio. Magi basowe? Te ulade dao, agai aga pabo t̄u bugagia suagameo. ¹⁰ Tiali ma, bidi hulide bilibo bidi, aga tulamubo dao. Magi basowe? Ula menio, te aga te pabo t̄u hulia sai elalubo,” Jisasgo te po wai.

¹¹ Jisasgo te po ma wadolama, te po wai, “Dago abagi Lasarus godege pibao. Tialima, eno aga hodoligi paibao,” Jisasgo te po aga wali pabo bidi dabe dali wai. ¹² Augwaligo te po wai, “Genuai Bidi, aga piyu da, te aga usu ma yaibao.” ¹³ Jisasgo wali po “Lasarus godege pibao,” te po page aga isai dao wali. Tialima, geda muyu, augwaligo homugo aga olo godege piali, te homu yai. ¹⁴ Tama tibaso, Jisasgo augwalibolo hanilama, te po wai, “Lasarus mu isalio,” te po wai. ¹⁵ “Aga isali sogode ena aga dali bidibe. Dage tobade ena agaba pabeo. Magi basowe? Nosali dagego enaba duga homu mumainogo ena tama tiwai. Te s̄e ebode eno dwagi yai homu ebao. Megi da aga bidibo digi pinao,” Jisasgo te po wai. ¹⁶ Tomas, augwaligo aga nogi me Didimus wabo, te nogi page aga ama name dali deli sogo ame nai bidi, te bidi te Jisas wali pabo bidi me deli dao. Agai te Jisas wali pabo bidi mebabolo te po wai, “Da aga dali pinao, da me aga dali isimainogo pinao,” Tomaso te po wai.

Isai bidi hodalobo bomo dali, bidabo bomo dali si Jisasde elalubo dao

¹⁷ Te augwali pelama, pelama, tama Betani be naniba sabolali. Bidi mego Jisasbolo “Lasarus pubulama, me si me si sogo bidali,” te po

wai.¹⁸ Te dwasianu be nani Betani te moni hanu Jerusalem pade digi tamao, usu ni kilomita sela tamao.¹⁹ Tama Juda we bidi hauwa augwali Jerusalemdu aselama, Marta dali Maria dali si bidibo digi asai, augwali si dali mumonani po omainogo, augwa si abe isali sogo tiwai.²⁰ Tama Martago Jisas asobo po odai, tama agai te be nani tagalama, tama Jisas tiqbā pai. Tialima, Maria aga te be tomode bidai.²¹ Martago Jisasbolo te po wai, “Genuai Bidi, nage ede bidigi sogo da, eno abe isigi menio,” Martago te po Jisasbolo wai.²² “Tialima, megi eno koneai, nago Godibolo magi nai me hanaluyu da, agai nagebolo mawaibao,” Martago Jisas dali te po wai.

²³ Jisasgo Martabolo te po wai, “Naga abe ma hodaluama, bidaibao.”

²⁴ Martago te po wai, “Eno koneai, aga nosali tq̄ dagalu dali silibo side hodaluama, ma bidaibao. Te sogo tigidali we bidi ma hodaluuibao,” Martago te po wai.

²⁵ Jisasgo te po wai, “Isai bidi hodalobo bomo dali, bidabo bomo dali, te ena digi eno tonalubo dao. Bidigo enabolo homu dą̄ olama, muani bidi isali, te aga bidabo bomo selama, ma bidaibao.²⁶ Bidibo bidi me agai enaba aga homu mu mubo bidi, aga munu me isigobeo. Nago homu te po waboba mubawe?” Jisasgo te po wai.

²⁷ Martago Jisasbolo te po wai, “Ao, Genuai Bidi. Nage da Krais dao. Nage Godigo Ogwa dao. Nage te bidi polobadu Godigo po weyu, e tq̄ba asaibao wali bidi da. Ena homu dą̄ olama, nageba muai dao,” Martago te po wai.

Jisas aga gela wai

²⁸ Te we Martago te po olama, aga ama Maria i wagi pai. Te po dua digi wai, “Po ola mabo bidi aselama, bidibao, agai nage i wai dao,” te po wai.²⁹⁻³¹ Tama te Juda dabe Maria dali be tomode bidai. Augwaligo Mariabolo mumanobo po weyu bidai. Mariago te Martago pusali po odolama, aga polo hodaluama, Jisas bidibo digi pabo gagalai. Jisas te be nani Betani sabalisiqbadi, aga Martago hasia tiqbā aselama, suali madigi me bidai. Tama te Juda bage augwaligo Maria polo hodaluama, buluba pabo suyu, tama augwaligo te homu yai, ‘Aga ḡu pageba gela wainogo pabo,’ te homu yai. Tama augwali aga wali pai.

³² Te Maria Jisas bidibo digi sabolai. Agai Jisas suyu, polo tama Maria aga tigi tq̄ba pigilubo tiwai yai, Jisasgo saq̄a pagede. “Genuai Bidi, nage ede bidigi sogo da, eno abe isigi menio,” Mariago te po Jisas dali wai.

³³ Jisasgo suai, Maria gela wabo. Tama agai suali, Juda bage aga dali asali bage, augwali me gela wabo suali. Tama Jisas agai me homu dene mu eyu, tama aga pade gela wabo homu yai, homu h̄e wai.³⁴ Jisasgo te po wai, “Dagego aga menade muaniwe?” Augwaligo Jisasbolo te po wai, “Nago suagasao.”³⁵ Jisas gela wai.³⁶ Tama tibaso Juda bage augwaligo

augwa hasi te po wai, “Suao. Agai te bidi godolo genuai mu yai dao,” te po wai. ³⁷Tialima, meba bidigo e po wai, “Te bidi agai gedu widai bidi gedu ma pedalai. Agai te isai bidi me tau sigi sogo da, aga isigi menio. Agai magi baso aga tau sabewe?” Juda bagego Jisasde te po wai.

Jisasgo Lasarus ma hodolai

³⁸Homu hē ma weyu, Jisas te gū pageba pai. Te gū page augwaligo moni masigi tomode nigai dao. Tama moni sawali masigi me deli selama, tama sunumi paliali. ³⁹Jisasgo te po wai, “Dagego te masigi sela sayaao.” Te isai bidigo abe nogi Marta, te wego Jisasbolo te po wai, “Genuai Bidi, aga isilama, me si me si tama sogo piai dao. Tama dwai kugumini ebo,” Martago te po wai. ⁴⁰Tama Jisasgo Martabolo te po wai, “Magi yaliwe? Hasia nagebolo eno wai dao, nago enabolo homu muyu da, nago Godigo bomo nago sueibao,” Jisasgo te po wai. ⁴¹Te agai te masigi sela sayaao te po obaso, augwaligo te masigi sela s̄awai. Tama Jisasgo dagaluba tonaluyu, te po wai, “Aya, eno nagebolo nage usu dao obao. Nago eno hanalu wali po nago odai dao. ⁴²Eno koneai, tigidali sogo nago eno hanalubo po wabo odobo dao. Tiali eno e dolalubo we bidi tobade e po megi nagebolo obao, augwaligo nago ena tagala palali bidibolo homu mumainogo ebao.” ⁴³Jisasgo te po olama, tama agai i bomo elama wai, “Lasarus, nage buluba asao,” Jisasgo te po wai. ⁴⁴Tama tilama, isai bidi hodaluama, buluba asai. Aga s̄aqā dali nogo dali augwaligo nami ugwago bebe pai dao. Augwaligo dwasianu nami ugwago aga gesabidide haluama tama kēani. Te kēani tama elalubadi, buluba soai. Jisasgo augwalibolo te po wai, “Pisigina sayaao, aga pomainao.” Tama augwaligo te ugwa dabe pisigina s̄anama, tama aga beba pai.

Juda bage tobolu bidi augwaligo Jisas elabo po miai (Mat 26:1-5; Mak 14:1-2; Luk 22:1-2)

⁴⁵Te Juda bage augwali Maria bidibo digi asai dao. Augwaligo Jisas agai te ebo s̄e suai. Tama augwali hauwago homu agaba muai. ⁴⁶Tialima, bidi meba pelama, Jerusalem be naniba sabolama, tama Jisasgo te yali s̄e po te Farisi bagebolo wagi pai. ⁴⁷Tama tibaso, te Farisi hani bage me, te pris hani tobolu bage me, augwaligo te kaunsil bage dali sisinama, Jisasde te po wai, “Dago te bidide magi yaibawe? Agai bomai s̄e hauwa mu ebo dao. ⁴⁸Tama tibaso, dago aga gogolama, agai te s̄e me ela peyu da, tigidali we bidigo agabolo homu munama, tama augwali aga wali paibao. Tama tiyu da, te da tonalubo Rom gavman bagego te ebo s̄e sulama, s̄eb̄ elama, tama dago Moni Lotu Be tempel dali, da bidi hani dali, augwaligo dolagasaibao,” Juda bagego te po wai.

⁴⁹Tialima, augwali tomode bidi me nogi Kaifas, aga bidai. Te kibu bede aga te pris bage tuni bidi nigai. Agai augwali dali te po wai, “Dage

umunalubo bidi dabe tiwai dao. ⁵⁰Dago hani tigidali dolidali weyu, bidi me deli isilama, tama aga isibogo te we bidi tau siyu da, te usu yaibao. Dagego te konebewe?” Kaiafasgo te po wai. ⁵¹Agai po aga homugo digi wabeo. Te menio. Me ma, te kibu bede aga te pris hani bage tuni bidi bidiyu, agai te Jisasde nosali pedalabo se po, te Juda we bidi tau siyu, aga nosali isabo se pedalisiqbadi te agai te po wai. ⁵²Tama Jisas aga isiyu, Juda we bidi naga tau sogobeo, te Godigo we bidi gasa bulude bidata pali we bidi deliba sisinama, agai hani deli naga yaibao.

⁵³Te sogo te Juda bagego toboli bidi dabe augwaligo po gagalama, Jisas elabo po miai. ⁵⁴Tama tibaso, Jisas te Judia tq tomode hania bilibeo. Agai te bulu tagalama, tama te moni tq me nogi Efraim, teba pai, te bidi meni yai tq sesegeba. Tama Jisas te bulude aga wali pabo bidi dabe dali bidai.

⁵⁵Te Juda bagego bo disawai nai bret tubo si te pade dao, te si nogi Pasova. Tama tibaso, we bidi hauwa te haniani bulu bidi hani augwali Jerusalem te buluba hodali, augwa yali dwai sege hasia sela səmainogo yai. Nosali te Pasova nai augwaligo tueibao. ⁵⁶Tama Jerusalemde augwaligo Jisas gegainogo yai. Tama augwali te Moni Lotu Be tempel tomode augwa hasi deliba sisinama, tama po miyu, te po hanalu wai, “Dagego magi homu ebewe? Jisas aga e nai tubo si eba asogowe?” Juda bagego augwa hasi te po wai. ⁵⁷Te pris toboli bage me, te Farisi hani bage me, augwaligo bomo elama, te po wai, “Bidi mego Jisas menade bidibo sulama, te bidi dabolo wagasao, tama dago aga kalabus yaibao,” te po wai.

Mariago te dwagi yai denami ebo wel Jisas sagade gelai (Mat 26:6-13; Mak 14:3-9)

12 ¹Te Sarere deli elalubadi, te Juda bagego bo disawai nai bret tubo si, te sogo pedalaiabao. Te olo bidibo sogo nogi Pasova dao. Te Pasova sogo pedalisiqbadi, tama Jisas te Betani be naniba pai, te Lazarus aga bulu dao. Te bidi Jisasgo ḡu pagede hodolali bidi dao. ²Augwaligo Jisas nai te bulude nogeai. Tama te we Marta agai te nai dobabo tau sai. Tama Lazarus Jisas dali nai tubo bidi dabe dali dulaluai. ³Tilama, te we Maria aga dwagi yai denami ebo wel selasa asai, dwasianu genagide. Te wel abelabo moni te hauwa mu, te dila pai nai mu dao. Agai te wel Jisas saḡ sawalide pilai. Tama Jisas saḡ Maria aga moni bobobage toboli nisigo holai. Tama te bede bidali we bidi tigidali augwaligo te wel denami odai.

⁴Te Jisas aga wali pabo bidi me Judas, aga page bulu Keriot, nosali te bidigo Jisas boi bidigo nogoba muani bidi, agai te wede wado po wai. ⁵Agai te po wai, “Te we agai te wel dabolo menama, tama dago te wel munama, gasa bidigo abelegi sogo da, teda dago masigi hauwa

300 kina sigi dao. Te sę egi sogo da, teda te masigi ge dago te nai meni yai we bidibolo magi da. Magi baso agai te tiwai sę ebewe?" Judasgo te po wai. ⁶Judas agai te nai meni yai we bidide homu dene elama, te po wabeo. Menio. Aga nai wi sabo bidi bidai dao. Tama agai te Jisas wali pabo bagego masigi mubo halobage tolalu, tama aga te halobagede mubo masigi deli deli sogo meba wi sai dao. ⁷Tialima Jisasgo te po Judasbolo wai, "Te we tagalao, wado po wagio. Agai te wel tolalubadi, ena gų pageba muabo sogo asobo si, te wel ena tigide mumainao. ⁸Nai meni yai we bidi augwali dage dali sesemane sogo bidaibao. Tama tibaso, dagego augwali tau sabo sogo hauwa elaluiba. Tialima, ena da dage dali sesemane sogo bidigobeo," Jisasgo te po wai.

Te pris toboli bage augwaligo Lasarus elabo po miai

⁹Te Juda bage hauwa mu augwaligo Jisas te be nani Betanide bidibo po odolama, tama teba Jisas sugi pai. Augwali Jisas naga suainogo asobeo. Augwaligo Lasarus te Jisasgo polobadu gų pagede ma hodolali bidi dao obaso, te Lasarus me augwaligo suainogo asai. ¹⁰Tama tibaso, te pris hani toboli bidi dabe augwaligo Lasarus me elabo po miai. ¹¹Magi basowe? Juda we bidi hauwa augwaligo te Jisasgo Lasarus dali yali sęde homu elama, tama augwaligo te pris bage wali pabo tagalama, tama augwaligo augwa homu tigidali Jisasba naga muani.

Jisas Jerusalem hanu tomoba tuni bidi tiwai pai

(Mat 21:1-11; Mak 1:1-11; Luk 19:28-40)

¹²Umabo we bidi augwali Jerusalem moni hanuba asai dao, te Pasova olo bidibo side. Tama do tama wabo sogo augwaligo Jisas Jerusalem buluba asaibao wabo po augwaligo odai. ¹³Tama tibaso, genuai bidi asobo homu eyu, augwaligo te ni sebedi nologo tiwai ni selama, Jisas tudu tiąba pai. Augwaligo bomo elama, i wai, "Dago Godigo nogi ugwaba sao. Dago te bidi nogi ugwaba sao. Aga Genuai Bidigo nogide asai. Aga da Israel bidi dabego tuni bidi dao," augwaligo te po wai, Jisasde. Te genuai bidi dabe augwali genuai wiegi yai kibu hos tudide dualasa pabo dao.

¹⁴Tialima Jisas aga nagamea pai homu eyu, tama gasa kibu hos nogi donki, te donki wai selama, tama te donki wai tudide dualasa pai. Te yali sę te Godigo bukude wali po egilama, te po tama wai,

¹⁵"Te dage Jerusalem hanu tomode bidiyu te

bulu du nogi Saion tede bidibo bage, dage wi ego.

Sua. Dagego tuni bidi asobo, aga kibu donki waide dualasa asobao,"^l

te po polobadu bukude tama po aşeani.

¹ 12:15 Sek 9:9

¹⁶ Te sę yali sogo Jisas wali pabo bidi dabe augwaligo te sę page konebeo. Tiali goli nosali Jisas dagaluba hodaluama, aga genuai nogi dali, genuai bomo dali si ma selama, te sogo augwaligo te bukude aşəani po ma koneai. Te po ma koneyu, augwaligo te homu yai ‘Jisas te kibu donki wai tudide dualasa pali me, te we bidi augwaligo wali po me, te po si polobadu bukude aşəani po wali peyu, te sę yai.’

¹⁷ Polobadu Lasarus isilama, gü pagede munalubadi, tama we bidi hauwa augwali Jisas aga dali bidibadi, tama agai Lazarus i olama, hodolai, tama augwaligo suai. Megi te we bidi hauwa augwaligo Jisasgo te yali sę po te gasa buludu tamadi asai we bidibolo pusai. ¹⁸ Te tamadi asai we bidi augwaligo Jisasgo te bomai sę yali po odobaso, tama augwali Jisas tiąba pai. ¹⁹ Tama te Farisi bage augwaligo te we bidigo te sę ebo sulama, tama augwa hasi po weyu, te po wai, “Megi dagego koneao. Agade dago yali sę usu ebeo. Tigidali tőde bidibo we bidi augwaligo aga wali poba,” te Farisi bage augwaligo te po wai.

Grik bidi dabe augwaligo Jisas suainogo yai

²⁰ We bidi umabo augwali te olo bidibo side Jerusalem hanuba holama, lotu po Godibolo wainogo yai. Tama Grik bidi hani bidi me badu augwali me Jerusalem hanuba lotu po wagasai. ²¹ Te Grik bage augwali Filip pageba asai. (Te bidi Filip aga page bulu te Betsaida be nani, te Galili tőde.) Tama te Grik po wabo bage augwaligo Filipbolo hanaluyu, te po wai, “Edao, dago Jisas gedugo sulama, te bidi deli dali dago po mieo,” te po wai. ²² Tama tilama, Filip te bidi Andru pageba pelama, tama agabolo te Grik bagego hanalu wali po pusali. Tama pusulama, tama Andru dali, Filip dali augwali si pelama, Jisasbolo te Grik bidi dabego wali po wagi pai. ²³ Tama Jisasgo augwali dali po wei ponoyu, te po wai, “Te Godigo Bidi Mu aga moni nogi dali, moni bomo dali, te si sabo sogo mu pedalai dao, meg. ²⁴ Eno mu po dagebolo obao, te nai wit wai tőba tulaluai, te pedama, kulubi holisiąyu da, te agaduba deli bidaibao, te tőde daumua paibao. Tialima, aga pedama, kulubi pedaliyu da, te agai nai hauwa walaibao. Te ena me tiwai dao.

²⁵ Tama te tiwai bidi aga tőde bidibo sogode aga tobade aga digi dąu obaso da, teda nosali te bidi aga mu bidada pabo sogo mu hagawaibao. Me ma, bidigo e tőde bidibo sogo aga digi tudiba muyu da, te bidi aga bidibo sogo mu elaluaibao, aga bidada peyu, bidada paibao. ²⁶ Niwai bidi me deligo eno sę yainogo ebo bidi, te bidi aga ena wali asao. Tama ena bidibo bulu, te bulude naga eno sę ebo bidi ena dali bidaibao. Bidigo eno sę ebo bidi, te eno Ayago te genuai nogi mawaibao,” Jisasgo te po wai.

Jisas aga isabo te po wai

²⁷ Agai po ma weyu, Jisasgo te po wai, “Megi eno homu sege mu eyu, midigi ebao. Tama eno magi po wagowe? Tiyu eno te po wagawe, ‘Aya,

nago te enabolo tamadi pedalainogo ebo sə sela sayao, enaba asidali.' Eno te po wagawe? Woo, te po eno wagobeo. Tialima, te tiabo sogo ena pedalagasaki dao, te ena dene somainogo yaibao.²⁸ Aya, naga nogi genuai emainao, eno homugo tama te ebo dao," Jisasgo te po wai. Te po olama, tama dagaludu po me deli duali, "Eno ena nogi genuai yai dao. Tama eno nogi genuai ma ilaibao," dagaludu po asiyu, te po Jisas dalí wai.

²⁹ We bidi dabe pade dolaluai, augwaligo te po odolama, mebagó te po wai, "Be kulu wai," tama mebagó te po wai, "Ensel mobo bidi me deligo aga dali po wai," te po wai. ³⁰ Jisasgo po wei ponoyu te po wai, "Te wali pogó ena tau sabo po wabeo. Menio. Te wali po agai dage tobade asai, dage tau somainogo yai. ³¹ Megi Godigo tqde we bidi osola suyu, sęge mabo sogo dao. Megi e tqde elalubo dwai kolesaga toboli bidi Satan sela sabo sogo dao. ³² Nosali augwaligo ena ni pedaide uwabala selama, elibaibao. Tama te sə ebo sogo eno tigidali tqde we bidi ena pageba gegasa asaibao," Jisasgo te po wai. ³³ Agai augwalibolo aga isabo tū ola mayu, agai augwali dali te po wai.

³⁴ Te we bidi augwaligo Jisasbolo po wei ponoyu, te po wai, "Dago bomo yai pode tama po elalubo dao, Godigo sa muyu, asaiba wali bidi Krais aga bidada peyu, bidada paibao, te po wai. Tama tibaso, magi baso nago te po obawe, augwaligo te Godigo Bidi Mu uwabala sao, po wai. Te Godigo Bidi Mu wali te de dawe?" augwaligo te po wai."^m

³⁵ Tama Jisasgo augwalibolo te po wai, "Dwasianu sogo me te ula dage dali bidaibao. Te hulia sabo dageba asidali weyu, megı dagego te ula elalubo si, te ulade dage bidao. Te hulide pabo bidi aga mena pabowe te agai konegobeo. ³⁶ Megi ula dagede elalubao. Tama tibaso, duga homu tigidali te ulaba muao. Tama tilama, dage te ula tiwai pedalama, bidaibao," Jisasgo te po augwalibolo wai.

Juda bage hauwa augwaligo homu Jisasba mube

Jisasgo te po olama, tama agai augwali taga peyu, gema duala sigi pai. ³⁷ Agai yali bomai sə hauwa augwaligo suali goli, augwaligo agabolo homu dą olama mubeo. ³⁸ Magi basowe? Polobadu Godigo nosali yabo sə po ola mani profet bidi nogi Aisaia, agai aşeani po usu numainogo yai. Aisaia polobadu te po wai,

"Genuai Bidi, dago wali po mena bidigo aga homu
te poba mubowe? Bidi menio. Tama Genuai Bidigo
aga bomo yai sə yali goli te bidi mego te homu teba
me mubeo,"ⁿ

Aisaia te po aşeani. ³⁹ Tama te we bidi augwaligo homu Jisasba mubo usu egobeo. Magi basowe? Po me Aisaia aşeani, e dao,

^m 12:34 Tib 110:4; Ais 9:7; Ese 37:25; Dan 7:14 ⁿ 12:38 Ais 53:1

⁴⁰ “‘Augwaligo homu begelegi sogo da, teda eno augwali usu ma iligi da,’ Godigo te po wai. Tialima, augwaligo gedugo sulama, homugo koneidali weyu, Godigo augwaligo gedu haluai dao. Agai augwali te homu tomoba masigi sawai gagawai we bidi ilali,”^o

Aisaiago te po polobadu aseani. ⁴¹ Aisaiago Jisasgo nosali sabo moni bomo suyu, agai moni nogi po odoyu yai dao. Tama tibaso Aisaiago agade te po aseani.

⁴² Te Juda bage augwaligo Jisasgo yali bomai se suali goli, augwaligo agabolo homu tigidali mubeo. Tiali digi, Juda bage tobolu bidi hauwa augwaligo agabolo augwa homu muai. Tialima, augwali te Farisi bage dali wi eyu, augwaligo augwa homu Jisasbolo muani po gasa bidibolo hanilama te po wabeo. Farisi bagego augwali te bomo yai po ola mabo be tomoba asobo habu selidali weyu, augwaligo gasa bidibolo te po pusubeo. ⁴³ Augwaligo te homu yai, ‘Bidi dabego dabolo “Dage dwagi yai bage dao,” obaso, te usu dao, te genuai dao. Te Godigo naga dabolo “Dage dwagi yai bidi dao,” obaso, te genuai menio, usu egobeo,’ augwaligo te homu yai.

Jisasgo pogo bidi po tu ela mawaibao

⁴⁴ Te Jisasgo i weyu, te po wai, “Bidigo homu enaba mubo bidi, agai enabolo naga homu mubeo. Te bidi agai homu te ena tagala palali bidibolo me muani. ⁴⁵ Tama niwai bidigo aga gedugo ena suali bidi, agai te ena tagala palali bidi me subo. ⁴⁶ Ena e tqba asali, te ula tiwai dao. Magi basowe? Tigidali bidi enabolo homu muani bidi augwali te hulide bididali weyu, ena te tqde ula tiwai asai dao. ⁴⁷ Bidi me deligo eno po odolama, wali pisawanu bidi, aga eno po tu ela magobeo. Ena tqba asali, te eno te tqde we bidi po tu ela momainogo asobeo. Ena asali eno augwali ma sagasainogo asai. ⁴⁸ Bidigo te ena tudiba munama, eno po agai sela sabo bidi, aga po tu yabo se elalubao. Eno wali po, te pogo nosali te tq dagalu silibo side te eno wali pogo te bidi dali po tu yaibao. ⁴⁹ Magi basowe? Eno po ena digi homugo me wabeo. Te menio. Aya Godigo ena tagala palobaso, ena asai dao. Aga digi enabolo te po wai, ‘Nago te se eyu, po weyu yao,’ te po wai. ⁵⁰ Tama eno koneai, eno Ayago pogo te bidada peyuu, biddada pabo bomo te we bidibolo mabo dao. Tama tibaso, eno wabo po tigidali agai enabolo wali po eno te po tigidali wabo dao,” Jisasgo te po wai.

Jisasgo aga wali pabo bidi dabe sagu aji telawai

13 ¹ Te olo bidibo si nogi Pasova pedalisiabadi, deli sogo naga elalubadi, tama Jisasgo koneai, aga e tq tagalama, Aya pageba

^o 12:40 Ais 6:10

pabo sogo te paba yagasai. Tama Jisas agai aga te tqde bidibo we bidi tigidali sogo godolo mu eyu bidai. Megi agai te godolo mu ebo se tagalobeo. Agai augwali godolo mu ela pidubadi te aga isibo sogoba usu nai dao.

² Te dwai haubo mobo bidi Satan agai dwai homu kolesaga te bidi Judas homuba hasia muai dao, agai Jisas te boi bidigo nogoba muabo po Judasgo homude muai dao. Judas aga aya nogi Saimon, tama aga bulu nogi Keriot. Te pio hulide Jisas dali, aga wali pabo bidi dabe dali, augwaligo nai tuyu bidali. ³Tama Jisasgo koneai, ‘God agai tigidali bomo enabolo mawai dao. God agai ena tqba tagala palai, te ena God aga pageba ma paibao,’ te me aga koneai. ⁴Tama tibaso, Jisas aga nai tubo tagalama, hodaluama, tama aga bulu badu muani ugwa te pedela muani. Tama tigi holobo ugwa selama, tabide bea sai. ⁵Tama tilama, agai aq moni pouba gelama, tama agai wali pabo bidi dabego saq aq telabo gagalama, tama aga tigi holobo ugwago saq ma holai. ⁶Tama te se gagalama, tama Saimon Pita pageba asai. Pitago te po wai, “Genuai Bidi, nago ena saq aq telawainogowe?”

⁷Jisasgo wei ponoyu, te po wai, “Eno ebo se page nago meg i kuna konebeo. Tialima tamadi digi te nago te se page koneabao,” Jisasgo te po wai.

⁸Pitago agabolo te po wai, “Nago eno saq aq munu me telagobeo. Te menio,” te po wai. Tama Jisasgo te po wai, “Eno nago saq aq telasiyu da, teda nage ena wali pabo bidi bidigobeo,” te po wai.

⁹Po wei ponoyu, Pitago te po wai, “Genuai Bidi, eno saq naga aq telagio. Nago eno tobolu me, nogo me aq telayao,” te po wai, Pitago.

¹⁰Jisasgo te po wai, “Bidi aga aq mu pauwai bidi te meda menio. Aga tigi ma aq paugobeo, saq naga aq telaibao. Tama te tiwai dage meda meni yai bidi dabe da. Tiali goli, dage tomode te bidi me deli digi aga te meda yai bidi bidibo,” Jisasgo te po wai. ¹¹Jisas aga boi bidi nogoba muabo bidi aga polo koneai. Tama tibaso, agai te po wai, “Dage tomode te bidi me deli digi te meda yai bidi bidibo.”

¹²Te Jisasgo augwaligo saq aq tedela silama, tama aga holobo ugwa ma tigide ma munama, tama aga augwali dali ma duayali. Tama agai augwali dali te po hanalu wai, “Eno dage dali meg i tama yali se sulama, tama te se page dagego koneaniwe? ¹³Dagego enabolo po ola mabo bidi da weyu, tama Genuai Bidi dao wabo dao. Ao, dagego te po mu po dao. Ena te bidi tama dao. ¹⁴Ena te po ola mabo bidi, Genuai Bidi da. Te eno dagego saq aq meg i tama tela yali. Tama tibaso, dagego me duga ama dabego saq aq telabo se tama yao. ¹⁵Tama eno dagebolo ola mobao, dage me te se ebo sulama, wali pomainogo yai. ¹⁶Tama te se page ola mayu, eno dagebolo mu po obao, se ebo bidi agai aga genuai bidigo nogi aiyaba elalugobeo. Tama te po sela pabo bidigo aga tagala palali bidigo nogi

aiyaba elalugobeo. ¹⁷Dagego te po page koneyu da, te sę yao. Tama te sę eyu da, teda dage dwagi yai homu yagameo,” Jisasgo te po wai.

¹⁸ Te agai po me weyu, te po wai, “Dage tigidali dali eno te po wabeo. Ena digi te ena sa muai bidi dabe, te eno konealubao. Tialima, te Godigo po bukude polobadu wali po te nai egilama, mu pedalaibao. Te polobadu aşəani po te dao, ‘Ena dali nai tuali bidi te bidi agai megı ena dali boi bidi yaibao.’ ¹⁹Te age dolobo sę pedalisiqbadi, megı eno dagebolo te obao. Tama tibaso, nosali te sę pedalobaso da, teda dagego te mu koneaibao, te ena da Godigo tagala palai bidi dao. ²⁰Eno dagebolo mu po obao, eno sę budi tagala palobao. Tama gasa bidigo te eno tagala palai bidide dwagi yai kolesaga ebaso da, te agai enade me te dwagi yai kolesaga ebo tiwai dao. Te kolesaga me ela pabo. Te bidigo te dwagi yai sę te ena tagala palali bidibolo me te sę ebo tiwai dao, te Godibolo,” Jisasgo te po wai.

Judasgo Jisas boi bidigo nogoba muabpo (Mat 26:20-25; Mak 14:17-21; Luk 22:21-23)

²¹ Te Jisasgo te po olama, tama aga homu sege mu yai. Tama agai po hanilama pusuyu, te po wai, “Eno mu po dagebolo obao, dage tomode me deligo ena boi budi nogoba muuibao,” Jisasgo te po wai. ²² Jisas agai te po obaso, te aga wali pabo budi augwa hasi deli deligo augwa hasi tonono pai. Augwaligo konebeo, Jisas agai debolo wabowe, te homu yai. ²³ Te augwali tomode budi me deli te Jisasgo aga dali dwagi yai homu eyu tama mu godola pabo, te budi aga pade bida. ²⁴ Te bidibolo Saimon Pita agai “Nago agabolo hanalu wao, agai debolo te po waliwe?” te po wabo tiwai Pitago te bidibolo guni midigilali. ²⁵ Tibaso, te budi me Jisas tigiba kisa sagaselama, Jisas dali te po hanalu wai, “Genuai Bidi, nago mena bidide te po obawe?” wali.

²⁶ Tama Jisasgo po wei ponoyu, te po wai, “Eno e tubo nai bret dagego te poude elalubo tubo nai meba selama, tama budi me deli mawaibao. Té budi te tama dao.” Tilama, Jisasgo bret naigo te poude elalubo nai meba selama, tama Judasbolo mawai. Te budi Judas, aga aya nogi Saimon, aga bulu nogi Keriot dao. ²⁷ Judasgo te nai sai, tama tamadi tama te dwai haubo mobo budi nogi Satan agai Judasgo homude dwai po mu muai. Jisasgo agabolo te po wai, “Nago te sę yai wida, te nago polo yao,” Jisasgo te po Judas dali wai. ²⁸ Te nai tuyu dulalualu budi dabe augwaligo Jisasgo Judasbolo wali po page konebeo. ²⁹ Judas agai augwaligo masigi bubo honoli tonalubo budi dao. Tama tibaso, mebago te homu yai, Jisasgo Judasbolo olo bidibo side tubo nai abelabo po agabolo wabo, te homu yai. Mebago te nai meni yai budi dabe maiabo nai po wabo, te homu yai. ³⁰ Tialima, Judas Jisasgo mani nai agai sai, tama polo Judas aga te be buluba pai. Tama bulu hulia sai.

Gesi bomo yai po

³¹ Te Judas te be buluba pai digi, tama Jisasgo te po wai, “Megı tama te Godigo Bidi Mu aga genuai bomo dali genuai nogi dali te we budi

augwaligo koneaibao. Tama Godigo Bidi Mu agai Godigo genuai bomo dali genuai nogi dali augwalibolo ola mawaibao.³² Tama Godigo nogi te Godigo Bidi Mude siyu da, teda Godigo te Bidi Mu nogi uwabwa saibao, tamadi tama te sę yaibao.³³ Abagi dede, dwasianu sogo ena dage dali bidaibao. Tama dagego ena gegebo sę yaibao. Tama eno Juda bagebolo wali po gilama, tama megi eno dagebolo me obao, dage ena pabo buluba me pogobeo.³⁴ Eno dagebolo gesi bomo yai po mobao, dagego duga hasi dali dwagi yai homu eyu, augwali godolo mu yao. Eno dage dali dwagi yai homu eyu, godolo mu yali gilama, tilama duga hasi dali me dwagi yai homu eyu, augwali godolo mu yao.³⁵ Tama dagego duga hasi dali dwagi yai homu eyu, augwali godolo mu eyu da, teda tigidali we bidigo sulama, koneaibao, dage da ena wali pabo bidi da waibao,” Jisasgo te po aga bidi dabe dali wai.

Jisasgo te po wai, “Pitago eno nogi dualaibao”

(Mat 26:31-35; Mak 14:27-31; Luk 22:31-34)

³⁶ Te Jisasgo te po augwalibolo olama, tama Saimon Pitago agabolo te po wai, “Genuai Bidi, nage mena paiwe?” Jisasgo Pitabolo po wei ponoyu, te po wai, “Ena pabo bulu nago ena wali megi pogobeo. Tialima, nosali da, nago ena wali asaibao,” wali.

³⁷ Pitago agabolo te po wai, “Genuai Bidi, magi baso eno nage megi wali pogobewe? Eno nage tau somainogo ena isiyu da, te usu yaibao,” Pitago te po wai. ³⁸ Jisasgo po wei ponoyu, te po wai, “Mu dawe? Ena tobade nage ena tau siyu, isabo sisi ebawé? Menio. Eno mu po nagebolo obao, be posisiąbadi, te ba kakaruk po wasiąbadi, selá sogo nago eno nogi dualaibao,” Jisasgo te po wai.

Tode we bidi da te Aya pageba pabo tü te Jisasde elalubao

14 ¹ Te bidi Jisasgo aga bidi dabebolo te po me wai, “Dagego homu kolesaga midigi sigio. Dagego duga homu God dali dą̄ wabo dao. Dagego ena dali me duga homu dą̄ wao. ² Eno Ayago be tomode dą̄j habu togwali te bidibo madigi hauwa elalubo. Te tiwai elalugi menigi sogo da, te eno dagebolo te po wagi menio. Eno dage bidabo bulu dodoligi pobao. ³ Tama eno dage bidabo bulu dodoligi peyu da, tama ena ma aselama, dage selama, ena dali bidigi paibao,” Jisasgo aga bidi dabebolo te po wai. “Ena bidibo bulude, dage me ena dali te bulude hodobo bidaibao,” Jisasgo te po wai. ⁴ “Tama dagego koneai dao, ena te buluba painogo ebo tü,” Jisasgo te po aga wali pabo bidi dabe dali wai. ⁵ Tomasgo Jisasbolo te po wai, “Genuai Bidi, nage mena paiwe, dago konebeo. Magi ilama, dago te tü koneaibawé?” Tomasgo te po Jisas dali wai. ⁶ Jisasgo Tomasbolo te po wai, “Ena digi ena te pabo tü dao, tama ena mu po wabo page dali, bidabo ula page dali te enade elalubo dao.

Tialima bidi me deli Aya pageba gasa tudu nogo habu sugunai tudu me pogobeo. Pabo tu ena deli dao. ⁷Tibaso, dagego ena kuna koneyu da, te dagego eno Aya God me koneaibao. Megi tama dagego gagalama, aga konebao, tama dagego God aga sualio,” Jisasgo te po wai.

⁸Te bidi nogi Filip agai te po wai, “Genuai Bidi, nago Aya dabolo ola mao, tama tiyu da, te da usu yaibao,” Filipgo Jisas dali te po wai. ⁹Jisasgo Filip dali te po wai, “Bobobage sogo ena dage dali bidali digi, tama nago ena gisiga konebewe? Bidigo ena suali da, te bidi agai Aya God me sualio. Magi baso nago ‘God dabolo ola ma,’ po waliwe?” Jisasgo te po wai. ¹⁰“Ena eno Aya dali bidibo dao, te aga ena dali me bidibo dao. Filip, nago te po odama, te mu po dao homu ebo meniwe? Eno dagebolo wabo po, te ena homugo digi me wabo menio. Aya ena dali bidiyu, Aya agai se mu te se naga eno ebo dao. ¹¹Eno tamadi tama e po wali, ‘Ena eno Aya dali bidibo dao, te aga ena dali me bidibo dao.’ Tama dagego te po odoyu, tama duga homu te poba begi pao. Te meni eyu da, eno te yali se dagego sulama, teba duga homu begi pao, te ena dali, eno Aya dali hodobo bidibo dao, te poba homu begi pao. ¹²Eno mu po dagebolo obao, bidigo enaba aga homu muyu da, eno ebo se te agai me yaibao. Tama agai genuai se mu yaibao, tama te sego eno yali se aiyaba elaluabao. Magi basowe? Ena eno Aya God bidibo digi paibao. ¹³Tama dagego magi nai po hanalu obaso da, Godigo aga Ogwade moni nogi somainogo, te eno dage tau saibao. ¹⁴Dagego eno magi se me deli emainogo, eno nogide gedu haluasa po weyu da, eno te dagego po odolama, te se yaibao,” Jisasgo te po wai, aga bidi dabe dari.

Jisas agai Mobo Bidi tagala palaibao, te po wai

¹⁵Te Jisasgo te po wai, “Dagego enabolo dwagi yai homu eyu, godolo mu eyu da, teda dagego eno bomo yai po wali paibao. ¹⁶Tama eno te Ayabolo hanaluama, tama agai dage tau selama, gasa tau sabo bidi dagebolo mawaibao. Tama te bidi dage dali bidada peyu, bidada paibao. ¹⁷Te bidi da, te mu po naga wabo Godigo Mobo Bidi dao. E tqde hulia sai we budi augwaligo aga sogobeo. Magi basowe? Augwaligo aga susuayu, tama augwaligo te Mobo Bidi aga konegobeo. Tialima, dagego aga koneai, aga dage dali bidibao, tama aga dage deli deli tomode bidaibao,” Jisasgo te po aga budi dabe dari wai.

¹⁸Jisasgo te po me wai, “Eno dage tagalama, duga naga olo bidigobeo, aya ida meni yai tiana wai bidibo tiwai egobeo. Ena dage pageba ma asaibao. ¹⁹Nosali gana tqde hulia sai we budi augwaligo ena ma sugobeo. Tialima, dagego ena nosali ma sueibao. Dagego ena ma subo sogode ena bidibo ula elalubaso, tama dage dali me te bidibo ula elalu, bidaibao. ²⁰Tama te sogo asobo si, dagego koneaibao, ena eno Aya dali bidibo dao, tama dage ena dali bidibo dao, ena dage dali bidibo, te dagego koneaibao,” Jisasgo te po wai.

21 “Bidigo eno bomo yai po selama, bugagia wali pabo da, te bidi agai ena godolo mu eyu ebao. Tama niwai bidigo ena godolo ebo bidi, te eno Ayago me te bidi godolo yaibao. Tama eno me aga dali dwagi yai homu eyu, godolo eyu, ena digi te ena agabolo hania ola mawaibao,” Jisasgo te po wai.

22 Te Jisasgo te po obadi, tama gasa bidi Judas, aga te Keriot bulu bidi menio, te bidi agai Jisasbolo te po wai, “Genuai Bidi, magi ilama, nage dago gedude hania pedalaibawe, tiali goli, nage tqde hulia sai we bidi gedude hania pedalogobewe?” Judasgo Jisas dali te po wai. 23 Jisasgo aga dali po wei ponoyu, te po wai, “Ena godolo mu ebo bidi, te bidi agai eno ola mabo po bugagia wali paibao. Tama eno Aya agai me te bidi godolo yaibao. Tama da si talua si aga dali bidagaselama, bidada peyu, bidada paibao. 24 Ena godolo mu isiqbó bidi, agai eno po bugagia wali pabo menio. Tama dagego te odali po, te eno po menio. Te po ena tagala palama asali bidi eno Ayago po dao,” Jisasgo te po wai.

25 “Ena dage dali bidiyu, eno te po dagebolo wai dao. 26 Tama dage tau siyu bomo maiabo bidi mu da te Godigo Mobo Bidi dao. Tama eno nogide Ayago te Mobo Bidi tagala palaibao. Te Mobo Bidi agai dage tigidali sę ola mawaibao. Tama agai dagego homu kolesaga ma hodoloyu, tama eno wali po tigidali dagego homugo ma koneaibao,” Jisasgo te po wai.

27 “Eno dage taga pabo sogo pąde dao. Tama dage wi idali weyu, tama eno dage homu nagame elama, dua bidimainogo eno dagebolo bomo mobao. Eno te dwagi yai homu nagame ebo kolesaga eno dagebolo mobao. Tqde we bidigo nagame yai mabo homu kolesaga tiwai eno dagebolo mabeo. Dagego homu kolesaga polo midigi siyu, tama dage wi egio. 28 Dagego eno mani po odai dao, eno dage taga peyu, ena pelama, tama ena dage bidibo digi ma asaibao. Dagego ena godolo mu egi sogo da, teda ena Aya pageba ma pabode dagego dwagi yai homu egi da. Magi basowe? Aya God aga genuai bidi mu dao, tama ena aga dali usu menio. 29 Te sę pedalisiqbadi, megi eno dagebolo e po wai dao. Tama tibaso, nosali te sę pedalobaso da, teda dagego enade te duga homu mumainogo yaibao. 30 Eno dage dali po hauwa megi wagobeo. Magi basowe? E tqde tobolu bidi megi tama asobao. Agai ena dali magi sę ebo usu egobeo. 31 Tialima, eno homugo tqde we bidi augwaligo eno ena Aya godolo mu ebo, augwaligo sulama, konemainogo, tama eno Ayago wabo po gilama, eno te sę ebo dao. Tialima, dage hodaluama, da pebelainao,” Jisasgo aga wali pabo bidi dabe dali te po wai.

Jisas aga naga te bono ni wain mu dao

15 ¹Te Jisasgo te po me aga wali pabo bidi dabebolo pusuyu, te po wai, “Ena da, te du walobo bono ni wain tigi mu tiwai dao. Tama eno Aya da, te bono ni wain gi page bidi dao. ²Tama enade wadolali

nologo, te nai walisiawai nologo te tigidali eno Ayago togolama, sela səbo dao. Tialima, nai walobo nologo tigidali agai te dwai sewa yali nologode elaluali yabe te pəqə səyu sela səbo dao, tama aga nai genuai walomai hagede tiwai.³ Tama eno dage meda meni yai bidi dabe ilai dao. Eno dagebolo polobadu wali pogo te dage meda meni yai bidi dabe ilai dao.⁴ Dage ena dali wadoloyu, bidaao. Ena dage dali wadoloyu bidimainao. Te bono ni nologo te ni wain tigide dəqə wasiąbaso da, nai walogobeo. Tibaso, dage ena dali wadoloyu, bidisiayu da, dage te tiwai yaibao, dage me nai me walogobeo,” Jisasgo te po aga bidi dabe dali wai.

⁵ Te Jisasgo te po me wai, “Ena da, te bono ni wain tigi dao, te dage da te bono ni waingo nologo dao. Bidi ena dali wadolama bidiyu, ena aga dali wadoloyu bidaibao. Tama te tiwai bidi agai du hauwa walaibao. Tibaso, dagego ena dali wadoloyu bidisiayu da, teda dagego te eno dwagi yai sə me egobeo, usu egobeo.⁶ Bidi me deli ena dali wadoloyu bidisiayu da, te aga da te sasia pai ni nologo tiwai dao. Te augwaligo te tobage ni nologo sela səbo dao. Tama sela sənana, augwaligo te sasia pai nologo sisinama, tama augwaligo siaba sənana, dabo dao.⁷ Dage ena dali wadolama bidiyu, tama eno wali po dage dali bidiyu da, tiali dagego magi naide hanalu obaso da, tama te eno dagebolo mawaibao. Dagego homu koneani gilama, dagebolo tama pedelaibao.⁸ Dagego sə yalide du hauwa waliyu da, te kolesagade eno Ayago genuai nogi saibao. Tama tilama, dage eno po wali pabo bidi dabe mu yaibao.⁹ Tama eno Aya agai ena dali dwagi yai homu eyu, godolo mu ebo gilama, tama eno dage dali dwagi yai homu eyu, godolo mu yai dao. Sesemané sogo dage eno te godolo ebo kolesaga tomode bidiəo.¹⁰ Tama dagego eno bomo yai po bugagia wali peyu da, teda dage eno te godolo mu ebo kolesaga tomode bidaibao. Eno ena Ayago bomo yai po bugagia wali peyu, tama agai dwagi yai homu eyu, godolo mu ebo kolesaga tomode ena bidibo dao. Tama dagego tebo gilamao.¹¹ Ena dwagi yai homu mu eyu bidibo. Tama eno homugo dage me dwagi yai homu mu eyu, te dwagi yai homu kolesaga ebo dagego homu tomode mu pəqənalu maio. Tama eno te homu eyu, dage dali te po mobo mabo po wai dao.¹² Eno bomo yai po e tama dao: duga hasi godolo mu eyu, bidiəo, eno dage dali godolo mu yali gilama.¹³ Bidi me deli aga abagi dabe dali godolo mu eyu, tau somainogo, aga bidabo ula augwali tobade olo mobaso da, teda te tobage kolesagago gasa kolesaga tigidali aiyaba elalubo dao.¹⁴ Tama dagego eno wali po selama, te po bugagia wali asobaso da, teda dage eno abagi dabe dao.¹⁵ Genuai bidi agai aga sə ebo bidibolo te sə yao po naga wabo dao. Agai te bidibolo te sə yabo po page ola mabo menio. Tiali goli, eno Ayago ena dali wali po tigidali, te po eno dage dali wai dao. Tama tibaso, eno dage sə ebo bidi da wabo nogi naga ma wagobeo, eno dage dali abagi dabe dao wabo.¹⁶ Dagego ena sai olama, sa mubeo. Eno dage sa muyu,

dage ena bage dao wai dao. Tama eno dage sęba muai dao, tama dage pelama, du gilama walama, tama dagego du elalumainogo, te da eno dage sa muani page dao. Tama dagego tama du waloluyu da, eno nogide dagego magi sę me yainogo, eno Ayabolo hanalubaso da, agai dage tau siyu, te nai mawaibao,” Jisasgo te po wai, aga wali pabo bidi dabi dali.

**Tode bidi dabe augwaligo Jisas aga wali pabo
sę bidi dali boi bidi gagawaibao**

¹⁷Te Jisas agai te po me wai, “Te eno bomo yai po e dao, duga hasi dwagi yai homu eyu, godolo mu eyu, bidiqo. ¹⁸Tode we bidi, augwaligo dage dali boi bidi yabo homu eboso da, dagego koneao, hasia augwaligo ena dali boi bidi yabo homu yai dao. ¹⁹Tama dage e töde bidi mu tigi sogo da, teda töde we bidi augwaligo dage dali dwagi yai homu eyu, dage augwaligo hani da wagi da. Tiali goli dage e töde bidi menio. Eno dage saiba olama, sa muyu, dage ena bage dao wai dao. Tama dagego e töde kolesaga tagalai dao. Tama tibaso, töde we bidi augwaligo dage dali boi bidi yabo homu ebo dao. ²⁰Eno tamadi wali po dagego bugagia ma koneao. Eno dagebolo te po wai, ‘Te nogi meni yai sę ebo bidi agai aga genuai bidigo nogi aiyaba elalugobeo.’ Tama te tiwai me, te töde we bidi augwaligo ena dali dwai sę yaligo da, teda dage eno sę ebo bage dali me augwaligo dwai sę yaibao. Tama augwaligo eno po wali pigi sogo da, te dagego po me augwaligo wali pigi dao. ²¹Tiali goli, augwaligo God konebeo, agai ena tagala palama, ena asai. Tama tibaso, dage eno hani gagalama, te eno po wali pabo suyu, tama augwaligo dage dali me dwai sę yaibao. ²²Tama ena aselama, eno augwalibolo te dwai sęde po wasiąwai tigi sogo da, te augwali sęge menigi dao. Tialima, eno augwalibolo te po waligo da, megı augwaligo sęge dualabo tų elalubo menio. ²³Bidigo ena dali boi bidi yabo homu eyu da, te bidi agai eno Aya dali me boi bidi yabo homu ebao. ²⁴Haniani sę polobadu gasa bidigo esiąwani sę, te sę eno augwali tomode yai. Tialima eno te sę me esiąyu da, te augwali sęge me sigi menio. Tialima, megı augwaligo te eno yali sę sulama digi, tama augwaligo ena dali, eno Aya da si talua si dali boi bidi yabo homu ebo dao. ²⁵Tama polobadu God agai po obaso, te bidi mego te po bukude aşeanı, augwaligo bomo yai po bukude. Tama augwaligo megı ebo boi bidi homu ebo sęde, augwaligo te po wali peyu, te po usu nuyu nai gilama walobao. Te polobadu aşeanı po e dao, ‘Augwaligo olo dali ena dali boi bidi yabo homu yai dao,’ te po wali,” Jisasgo te po wai.^p

²⁶Te Jisasgo po me weyu, te po wai, “Te tau mabo Mobo Bidi eno Aya dali bidibo. Tama eno aga dage bidibo digi tagala palaibao. Aga mu po naga wabo Mobo Bidi dao. Tama aga aselama, agai te we bidibolo enade

^p 15:25 Tib 35:19; 69:4

po ola mawaibao. ²⁷Tama dagego me enade te we bidibolo po pusao. Magi basowe? Polobadu dage ena dali bidibadi, eno te sę gagalama ebo dagego suai, tama megı me eno te sę ela asela dąj yagasobo dagego subao,” Jisasgo aga bidi dabe dali te po wai.

16 ¹“Te dagego ena konealubo bomo yai homu kolesaga me tagalidali weyu, tama eno te po dagebolo wai dao,” Jisas aga bidi dabebolo te po wai. ²“Augwaligo dage te Juda dabego bomo yai po ola mabo bede mu sela sawaibao, te dagede habu selebao. Tama te sę naga egobeo. Nosali sogo pedalobode, tama te dage ela mubo bage augwaligo homugo Godigo sę augwaligo bugagia eba, te homu yaibao. Tama te homu eyu, tama dage dali tiwai sę yaibao. ³Tama augwaligo Aya konesiąyu, tama augwaligo ena me konesiąyu ebaso, te sę dage dali yaibao. ⁴Tialima dagebolo eno te sę pedalabo po megı wai dao. Magi basowe? Nosali te sę pedalobo si, tama dagego eno te sęde polobadu wali po dagego homugo ma koneagameo,” Jisasgo te po wai.

God agai Mobo Bidigo ebo se

“Te polobadu ena dage dali bidibaso, tama eno te po dage dali wabeo,” Jisasgo te po aga sę bidi dabe dali wai. ⁵“Tialima megı ena te ena tagala palai bidi pageba ma pobao. Tama dage tomode bidi me deligo enabolo me hanalu, ‘Nage mena pobawe?’ wabeo. ⁶Tialima, dage dali eno te tamadi wali po obaso, tama dagego homu sęge mu te eba. ⁷Tiali goli, eno mu po dage dali obao. Dage tau somainogo, dage eno taga peyu, ena pobao. Ena pisayu da, te Tau Mabo Bidi dageba asogobeo. Tialima, ena peyu da, te bidi eno dage bidibo digi tagala palaibao. ⁸Tama aga asobo si, tama agai te tőde we bidi augwaligo te dwai sęde geda muani sę augwalibolo hanilagasaibao. Tama agai augwaligo dwai sę ebo page ola mawaibao. Te doloba pai kolesaga page me, te po tų ebo page me, te Mobo Bidi agai augwalibolo ola mawaibao. ⁹Te tőde we bidi augwaligo dwai sę page e dao, te augwaligo enaba augwa homu tigidali mubeo. ¹⁰Te Mobo Bidi agai te tőde we bidibolo ena te doloba pai bidi ena dao te po ola mawaibao. Ena eno Aya pageba pobao. Tama ena teba pobaso, augwaligo koneiba, ena te doloba pai bidi mu dao, te waibao. Tama dagego ena ma sugobeo. ¹¹Te Godigo po tų ebo page me, te Mobo Bidi agai augwali e tama ola mawaibao. Godigo e tőde dwai we bidigo tuni bidi dali po tüde te bidi aiyaba elaluali po te Mobo Bidigo augwalibolo hanilagasaibao,” Jisasgo te po aga bidi dabe dali wai.

¹²“Te eno po hauwa dagebolo maiabo me elalubo. Tialima, te po dagego megı sogobeo, te sęge yai po mu dao. ¹³Tiali goli, te mu po naga wabo Mobo Bidi aga asobo si, tama agai dagebolo tigidali mu po bugagia ola mawaibao. Agai wabo po aga digi homude sabo po me wagobeo. Agai eno wai po aga odolama tama te po naga te agai dagebolo pusaibao,

tama agai dagebolo nosali pedalabo s̄e te po dage dali waibao. ¹⁴Agai eno po selama, dage dali pusaibao. Agai te kolesaga ebode eno nogi genuai pedalumainogo yaibao. ¹⁵Ayago tigidali nai te eno nai dao. Tama tibaso, eno te po tamadi tama wai dao, te Mobo Bidi agai eno po selama, dage dali te pusaibao,” Jisasgo te po aga wali bilali bage dali wai.

Homu s̄eḡego begelama, dwagi yai homu pedalaibao

¹⁶“Te nosali ganama dagego ena ma osogo sugobeo. Tama bidama, nosali ma dwasianu sogo dagego ena ma sueibao,” Jisasgo te po wai.

¹⁷Jisas aga bidi augwa hasi po weyu, te po wai, “Agai te wali po magi po page da dali waliagawe? Agai te po wai, ‘Nosali ganama dagego ena ma sugobeo,’ te po wai. ‘Tama nosali ma dwasianu sogo dagego ena ma sueibao,’ tama agai te po wai. Te po me wai, ‘Ena Aya pageba pobao,’ agai te po da dali wai. ¹⁸Te ‘dwasianu sogo’ wali, te wali po page mena tama dawe? Te po page dago konebeo,” augwaligo augwa hasi te po wai.

¹⁹Augwaligo Jisas aga dali hanalu wainogo ebo agai koneai. Tama agai augwalibolo te po wai, “Dagego eno wali pode tama duga hasi te po page hanalu obawe? Eno te po wai, ‘Nosali ganama dagego ena sugobeo, tama nosali ma dwasianu sogo te dagego ena ma sueibao,’ te pode dagego hanalu obawe? ²⁰Eno mu po dage dali obao, dage genuai gela weyu, tama homu dene eyu, gela mu waibao. Tiali goli, enade konesiawai we bidi augwali da dwagi yai homu yaibao. Tama dagego homu s̄ege yaibao. Tiali goli dagego homu s̄ege yali ma begelama, dwagi yai homu mu yaibao. ²¹Te tiwai dao. Wego wai tega pabo sogo asobo si, te dene ebo sogo pedalobo koneyu, te we aga homu s̄ege ebo dao. Tiali goli, agai nosali te wai ame nenama, tama agai te dene homu yali ma agai konebeo. Tama te wai ame nenama, tama bidibaso, aga idago dwagi yai homu ebo dao. ²²Tama dage dali me te tiwai dao. Tama tiyu, megi dage homu s̄ege ebao. Tiali goli, eno dage ma sueibao, tama dage dwagi yai homu ma yaibao. Tama niwai bidi mego dagego te dwagi yai homu ebo me sela sagobeo,” Jisasgo te po aga bidi dabe dali wai.

²³“Te sogo dagego ena dali magi nai me hanalugobeo. Eno dage dali mu po obao, dagego gedu haluasa po weyu, Ayago magi nai me dagebolo mao eno nogide weyu da, teda Aya agai dagebolo mawaibao,” Jisasgo te po wai. ²⁴“Polobadu dagego eno nogide magi nai sainogo hanalu obeo. Tama dagego homu dwagi yai mu emainogo, tama megi hanalu wao, tama te nai God agai dagebolo mawaibao,” Jisas aga s̄e bage dali te po wai.

Jisas agai te dwai noma bidi Satango bomo aiyaba elaluali po

²⁵Te Jisasgo te po wai, “Te eno te po begelama, dage dali wai dao. Nosali eno po begelama, dage dali ma wagobeo. Te meni. Eno po

hanilama, Ayade po dage dali waibao. ²⁶Tama tebo sogo dagego eno nogide aga hanalu waibao. Tama eno dagebolo te po wabeo, ena digi Ayago dage tau sabo po eno hanalu waibao. Te menio. Duga digi te Ayabolo gedu haluasa po dolo wao. ²⁷Magi basowe? Aya aga digi dage godolo mu ebo dao. Tama agai dage magi baso godolo mu ebo dawe? Woo, dagego ena mu godolo eyu, tama dagego bomo yai homugo koneama, te ena Aya dali bidama asali, te homu dagego yai. Tama dagego te homu ebaso, Aya agai dage godolo mu eyu, dagego hanalu wabo po wei ponaibao. ²⁸Polobadu ena Aya dali bidai, tama eno aga taga soyu, ena e tqba dulai. Tama megi ma eno e tq taga peyu, Aya God bidibo digi painogo ebao,” Jisasgo te po aga bidi dabe dali wai.

²⁹Jisas aga wali pabo bidi augwaligo te po wai, “E, megi nago po te begelama po wabeo, tama nago po hania obao. ³⁰Dago nagebolo hanalu wabo po te dago hanalusiqbadi, te po nago polo koneai. Megi da dago koneanio, te nago tigidali nai koneai. Tama tibaso, nage God dali bidilama asai dao po, te pode dago te mu po dao te homu ebao,” Jisas aga wali pabo bidi augwaligo te po wai.

³¹Jisasgo te bidi augwali dali po wei ponoyu, te po wai, “Megida, dagego duga homu enaba mu muaniwe? ³²Edao. Te sogo pade pedalainogo ebao, te polo pedalalio, tama augwaligo dage tigidali deli deli pobeasa bilibaso, tama duga buluba tedela paibao. Tama dagego ena taga peyu, enaduba deli digi bidaibao. Tialima, enaduba me bidigobeo. Aya God ena dali bidaibao. ³³Eno homugo dage ena dali wadoloyu, tama dwagi yai homu nagame elama bidimainogo eyu, eno e po tamadi tama dage dali wai dao. Dage tqde bidibadi te tqde we bidi augwaligo dwai se dage dali yaibao. Tialima, dagego homu bomo elama, bida. Eno e tqde kolesaga aiyaba elaluai dao,” Jisasgo te po aga se bidi dabe dali wai.

Jisasgo gedu haluasa po aga bidi dabe tau siyu wai

17 ¹Te bidi Jisasgo te po aga bidi dabebolo olama, tama agai dagaluba tonaluyu, te po wai, “Aya, te bodolu muani sogo pedalalio. Tama eno nagebolo te genuai nogi momainogo, tama nago enabolo te genuai nogi mao,” Jisasgo aga Aya God dali te po wai. ²“Tama nago ena sa muyu, moni bomo mayu yai dao. Ena te tigidali tqde we bidigo genuai bidi dao weyu, tama nago te bomo enabolo mawai dao. Magi basowe? Te bidada pabo bomo te we bidi nago enabolo mani we bidi augwali eno te bidada pabo bomo mawaibao, te homu eyu, nago enabolo te nogi yai se mawai dao. Tama te bidada pabo bomo menama, tama augwali bidada peyu, bidada paibao, gamonaibao. ³Tama te bidada pabo bomo page e dao. Augwaligo nage koneyu, nage God deli mu dao. Augwaligo Jisas Krais koneyu, nago aga tagala palobaso asai bidi dao. Augwaligo te si mu koneyu da, teda te bidada pabo page te dao. ⁴Eno

nago genuai nogi dali, bomo dali, te si te tōde we bidi augwalibolo ola mawai. Nago enabolo yao olama mani sę, te sę eno tigidali mu ela silai dao. Tama tiyu, eno nago nogi dali bomo dali te we bidi augwalibolo ola mawai.⁵ Polobadu, te tō pedalisiqbadi digi, tama ena nage dali bidai dao. Tama ena nage dali bidiyu, bomo yai ula elaluai dao. Aya, ena nage dali bidiyu, tama nago megı enabolo te bomo yai ula digi ma mao,” Jisasgo te po God dali wai.

⁶ “Tōde bidibo we bidi meba nago sa muyu, tama nago augwali dią sali. Tama nago augwali dią selama, tama nago augwali enabolo mani. Te augwali nago bidi te elaluama, tama nago enabolo mani. Tama augwalibolo eno nago nogi haninai dao. Tama augwaligo nago po bugagia wali pai dao. ⁷Megı da augwaligo konebo, tigidali nai nago enabolo mani nai te nage pagedu te nai asai. ⁸Nago enabolo wali po, te po tigidali eno augwalibolo pusai dao. Tama augwaligo te po sali. Te po selama, tama augwaligo mu koneai, polobadu ena nage dali bidilama, asai dao. Tama nago ena tagala palama, ena asai dao, te pode augwaligo homugo te po wali, ‘Te po mu po da,’ olama, tama augwaligo konealubo po te pode dą̄ wabo dao,” Jisasgo te po wai.

⁹ “Te nago augwali tau somainogo, eno nagebolo e po obao. Eno nago te tōde we bidi augwali tau somainogo me wabeo. Eno e po nagebolo obao, nago ena mani bidi dabe augwali tau somainogo, augwali nago bidi hani bidibaso, eno te po nage dali obao. ¹⁰Tama eno bidi tigidali augwali te nago bidi me dao. Tama nago bidi tigidali te eno bidi dabe dao. Tama augwaligo eno nogi ugwaba sai dao. ¹¹Tama megı da ena tōde ma bidigobeo. Tialima, augwali da tōde me bideibao. Tama ena da nage bidibo madigi asobao. Aya, nage magi dwai sę me isiąwai bidi, nago augwali tonaluao. Nago enabolo nago bomo mawai dao. Tama te bomogo nago augwali tonaluao, augwali me deli homu naga elama, bidimainogo yao. Dadi si deli homu elama bidibo gilama, te tiwai augwali me te emainao. ¹²Tama ena augwali dali bidibo sogo da, nago nogi elalubo bomogo eno augwali bugagia tonaluali, nago te enabolo mani bomo. Eno augwali bugagia tonaluyu, tama augwali me hagabeo. Hagawali te bidi deli digi hagawai dao. Te nago polobadu bukude aseyu wali, te po nai gilama walomainogo, te dolabo bidi deli naga tamadi hagawalio,” wali.⁹

¹³ “Megı ena nage pageba asobao. Tama eno te po e tōde nage dali obao, te eno dwagi yai homu eno bidi dabe augwalide paganalumainogo augwali dwagi yai homu mu emainogo ebao. ¹⁴Nago po eno augwalibolo mawai dao. Tama tōde we bidigo augwali dali boi bidi gagawai dao. Ena da e tōde bidi menio. Te tiwai augwali me e tōde bidi menio. Tama tibaso, tōde we bidigo augwali dali boi bidi gagawai dao. ¹⁵Tama eno

⁹ 17:12 Tib 41:9; Jon 13:18

e po nage dali weyu, eno nage augwali te tqde bidibo tagalomainogo hanalu wabeo. Te meni. Nago augwali bugagia tonalumainogo eno te po nagebolo obao, tama te dwai bidi Satan agai augwali dolidali weyu, eno e po nagebolo obao. ¹⁶Ena da e tqde bidi menio. Te tiwai augwali me e tqde bidi menio. ¹⁷Tama tibaso, naga digi nago mu po augwalibolo ola mao, augwali gasagi yai tedali bidi dabe bidimainogo, magi se isiąwai bidi dabe bidimainogo yao. ¹⁸Tama polobadu nago ena tqba tagala palama, tama ena augwali tqde we bidi tomode bidai. Te tama tiwai eno e bidi dabe me tagala palama, augwali te tqde we bidi tomode bidigi pali. ¹⁹Tama eno augwali tobade tau siyu, ena digi ena bidabo ula tagalama, nago po wali peyu, ena isaibao. Tama po mu wabogo augwali nago bidi hani mu bidimainao,” Jisasgo te po wai.

²⁰“Te nago augwali naga tau somainogo eno nage dali e po wabeo. Menio. Nosali augwaligo gasa we bidibolo eno po ola mayu, tama te po odobo we bidi augwaligo augwa homu enaba muaibao. Tama te tibo we bidi augwali tobade me tau siyu, tama eno meg i nage dali e po obao, ²¹augwali tigidali deli homu naga elama bidimainogo ebao. Aya, nage ena dali wadoloyu, tama ena nage dali wadoloyu bidibo tiwai, eno homugo augwali da si dali homu deli elama, wadoloyu bidimaio. Tama te tiwai elama, tama tqde we bidi augwaligo te nago ena e tqba tagala palali po odama, tama augwaligo te mu po dao olama, koneagameo. Tama te se pedalomainogo, eno e po nage dali meg i obao. ²²Nago enabolo te bomo mani, te bomo eno augwalibolo manio, augwali deli homu elama, bidimainogo, dadi si deli homu elama bidibo tiwai, augwali me te deli homu elama bidimainogo eno te bomo augwalibolo mani. ²³Ena e bidi dabe augwali dali bidiyu, tama nage ena dali bidiyu yai, tama tiwai eno homugo augwali me deli homu elama, bidimainao. Tama tiyu, te tqde we bidi augwaligo koneaibao, nago ena tagala palama, ena asai. Te me augwaligo koneaibao, te nago ena godolo mu ebogia, nago e bidi dabe me godolo mu ebo dao,” Jisasgo te po wai.

²⁴Aya, eno homugo nago ena mani bidi dabe augwali ena bidibo bulude ena dali da hodobo nosali bidaio, augwaligo eno bomo yai ula dali bomo dali sumainogo yaibao. Polobadu, te tq pedalisiqabadi, te sogo nago ena godolo mu eyu, tama nago te bomo yai ula dali te bomo dali enabolo mawai dao. ²⁵Aya, nage doloba pai bidi mu dao. Tama tqde we bidi augwaligo nage konebeo. Tiali goli, eno da nage koneai dao. Tama e bidi dabe augwaligo konebao, te nago ena tagala palama, ena asai dao. ²⁶Tama nago nogi eno augwalibolo haninai dao. Tama tiyu, te se nosali me eno mu ela paibao. Magi basowe? Te nago ena godolo mu ebo homu tiwai augwa hasi te godolo mu ebo homu emainogo eno nago nogi augwalibolo haninai dao. Tama ena me augwali dali bidimainogo, eno nago nogi augwalibolo hanilaibao,” Jisasgo te po Godigo aga bidi dabe tau somainogo wai.

Judasgo Jisas boi bidi nogoba muai
(Mat 26:47-56; Mak 14:43-50; Luk 22:47-53)

18 ¹Te Jisasgo te po olama, tama Jisas aga bidi dabe dali augwali go te bulu tagalama, tama peyu, Kidron aji odogo nogogi pai. Te ni oliv sili, te aji u badu elaluai. Tama Jisas aga wali pabo bidi dabe dali augwali te oliv ni sili bulu tomoba pai. ²Hauwa sogo Jisas aga wali pabo bidi dabe dali augwali te oliv ni siliba sisinama bidiyu yai, polobadu. Tama tibaso, Judas, Jisas te boi bidi nogoba muabo bidi, agai me te ni sili koneai. ³Tama tibaso, Judasgo ami bidi hani dali, tama meba pris tuni bidigo enesigi bidi dabe dali, te Farisi bagego enesigi bidi badi, tama selama, augwali te ni sili giba dolo asai. Tama augwali go lam dali sole dali tolasa asiyu, tama augwali go hwijabo nai dabe dali sela asai. ⁴Tama Jisasgo agade pedalabo se tigidali koneyu, tama aga te ni sili gi buluba pelama, tama augwali tiqba pai. Tama agai augwali dali te po wai, “Dagego de gegagasaki dawe?”

⁵Te augwali go Jisas aga dali po wei ponoyu, te po wai, “Dago te Nasaret bulu bidi Jisas gegagasaki dao,” te po wai.

Jisasgo augwali dali te po wai, “Te bidi ena tama dao.”

Tama Judas, Jisas te boi bidi nogoba muabo bidi me augwali dali dolaluai.

⁶Jisasgo augwali dali “Te bidi ena tama da” obaso, tama augwali meba gegemani siyu, tudi bulu peyu elama tama tqba degasa pai. ⁷Tama Jisas agai augwali dali ma hanalu wai, “Dagego de gegagasaki dawe?” Tama augwali go te po wai, “Te Nasaret bidi Jisas gegeba,” te po wai.

⁸Jisasgo po wei ponoyu, te po wai, “Eno dage dali wai dao, te bidi ena tama dao. Dagego ena naga gegeba wida, e bidi dabe olo pomainao,” Jisasgo te po wai. ⁹Tamadi agai te po God dali wai, “Nago ena mani bidi dabe augwali eno me tagalobeo,” wali. Tama Jisas agai te tamadi wali po usu numainogo, agai ‘Augwali olo pomainao’ po megii wali.

¹⁰Te Saimon Pita agai moni kago hwq munaluai, te kago hwq bulubo bede. Tama agai te kago hwq kega siyu, tama agai bidi mego dolo nogo badu olo te kago hwq togwa sawai. Tama te bidi nogi Malkus, aga te pris tuni bidigo se ebo bidi da. ¹¹Tialima Jisasgo Pita dali te po wai, “Nago te kago hwq aga bulubo beba ma bulama muao. Eno Aya agai enabolo bodolu mani, te ena tigide dene saibao. Te augwali go ena dali yabo se nago te bodolu didigili painogo ebaw?” Jisasgo Pita dali te po wai.

Augwali go Jisas te Anas bidibo digi odasa pai

¹²Te ami bidi hani dali, te augwa polalubo bidi dali, tama te Juda dabego enesigi bidi dabe dali, augwali go Jisas nogo tulama, tama

augwaligo bonogo agai nogo si tudi badu munama, kəai. ¹³Tama kənama, tama augwaligo Jisas te bidi nogi Anas bidibo digi hasia teba sela pai. Te bidi Anas te bidi Kaiafas aga wəj dao. Tama te kibu bede te bidi Kaiafas agai te pris tuni bidi bidai. ¹⁴Tama te bidi Kaiafas agai te Juda bage dali te po mobo mabo po polobadu wai dao. Agai te po wai dao, “Dago hani tigidali dolidali weyu, bidi me deli isilama, tama aga isibogo te we bidi tau siyu da, te usu yaibao,” te po wali bidi Kaiafas aga dao. Tama augwaligo Jisas te Kaiafas aga wəj Anas te bidi bidibo digiba sela pai.

Pitago “Jisas eno konebeo,” te po wai
(Mat 26:69-70; Mak 14:66-68; Luk 22:55-57)

¹⁵Te augwaligo Jisas sela pobaso, te Saimon Pita dali, te Jisasgo sə bidi me dali augwali si Jisas wali pai. Tama te pris tuni bidi agai te gasa bidi konebaso, te gasa bidi te obo tomoba Jisas dali peyu, te be mesaloba sabolali, te pris hani tuni bidigo bede. ¹⁶Tialima Pita te tū sesege pəde dolaluai, bulu badu. Tama te gasa bidi, Jisas wali pabo bidi, aga te pris tuni bidigo abagi yaibaso, te bidi aga pelama, agai te tū tonalubo webolo po olama, tama agai Pita tomoba odasa asai. ¹⁷Te tū tonalubo wego Pita dali te po wai, “Nage me te bidi Jisas wali pabo bidi dawe?” te wego Pitabolo hanaluyu, te po wai. Tama Pitago te po wai, “Woo, ena te bidi wali pabo bidi menio,” wai.

¹⁸Te bede sə ebo bage dali, te Jisas odasa asali enesigi bidi dabe dali, augwaligo te be mesalo tomode sia nogai. Te kedau ebaso, tama augwali dolaluyu, te siade kedau tuyu, tigi posolo iliyu yai. Tama Pita me augwali dali dolaluyu, sia kedau tuai.

Te pris tuni bidi agai Jisas dali po hanalu wai
(Mat 26:59-66; Mak 14:55-64; Luk 22:66-71)

¹⁹Te be tomode, te pris tuni bidi agai Jisas aga wali pabo bidi dabede po hanalu wai. Tama agai Jisasgo te we bidi dali ola mani pode me hanalu wai. ²⁰Jisasgo aga dali po wei ponoyu, tama po wai, “Eno we bidibolo mani te po eno bulu ulade hania wai dao. Eno te we bidibolo po ola mabo sə eyu, tama te bomo yai po ola mabo be tomode te sə eno yali, ma te Moni Lotu Be tempel, tede me eno te sə yai dao. Te be dabede te Juda bage sisinibo bulude eno augwalibolo eno po hania ola mawai dao. Tama eno po geme dualama bulu tomode me wabeo. ²¹Tama tibaso, magi baso nago ena dali hanalu obawe? Nago eno te po odali we bidi dali hanalu wao. Eno wali po augwaligo koneai dao,” Jisasgo te po te pris tuni bidi dali wai. ²²Tama Jisas agai te po tama obadi yaide, enesigi bidi me deli Jisas pəde dolaluali bidi, te enesigi bidi agai Jisas nogo sawaligo Jisas nabo gede eleyu, te po wai, “Nago te tobage po te pris tuni bidi dali wei ponoyu obawe? Te dwali,” te po wai. ²³Jisasgo te enesigi bidi dali

po wei ponoyu, te po wai, “Eno dwai po wagi sogo da, nago te dwai po hania wagi da. Tialima, eno po dolo naga obadi da, teda magi baso nago ena elaliwe?” Jisasgo te enesigi bidi dali te po wai. ²⁴Tama Jisas te aga nogo si bonogo kęani tama elalubadi yaide, tama te bidi Anasgo Jisas aga te pris tuni bidi Kaifas bidibo digi tagala palai.

Pitago te po ma weyu, te po wai, “Jisas eno konebeo,” wai
(Mat 26:71-75; Mak 14:69-72; Luk 22:58-62)

²⁵Te Saimon Pita dolaluyu, sia kedau tudai. Tama augwaligo aga dali te po wai, “Nage me te bidi wali pabo bidi dawe?” Tama Pita agai hogwa siyu, “Ena menio,” te po wai. ²⁶Tama te pris hani tuni bidigo sę ebo bidi me deli tede bidai, te Pitago hwągo olo togwali bidi aga deli hani bidi dao. Tama te bidi agai te po wai, “Eno homu eno nage suali, te nage te bidi Jisas dali te ni sili gide bidibo eno suali. Te mu dawe?” te po hanalu wai. ²⁷Tama Pitago po ma weyu, hogwa siyu, te po wai, “Ena menio.” Tama Pitago te po obadi yaide, megi tama ba kakaruk po wai.

Augwaligo Jisas te gavman bidi Pailat bidibo digi sela pai
(Mat 27:1-2, 11-14; Mak 15:1-5; Luk 23:1-5)

²⁸Te be tama posobadi, tama augwaligo Jisas ma selama, te bidi Kaifas agai be tagalama, tama augwaligo Jisas te gavman tuni bidigo beba sela pai. Tama te beba sabolama, tama te Juda bage augwali digi te gavman tuni bidigo be tomoba pabeo. Te gavman bidi te Juda hani isąwai bidi bidibaso, te Juda dabe aga be tomoba pabeo. Te habu selali bolidalı weyu, tama augwali te be bulu badu bidali. Augwaligo te homu yai, te habu selali bolisiąbadı, dago te Pasova nai tueibao, te homu yai. ²⁹Tama tibaso, te Rom gavman tuni bidi nogi Pailat aga te be tomode bidilama, bulu badu augwali bidibo digi asai. Agai augwali dali te po wai, “Dagego te bidi magi pode tų ela mawainogo ebawe?” te gavman tuni bidigo augwali dali te po wai. ³⁰Tama augwaligo aga dali po wei ponoyu, te po wai, “Te bidi dwai kolesaga isąwai bidi tigi sogo da, te dago nage bidibo digi sela asigi menio,” augwali Juda bidigo te gavman tuni bidi dali te po wai. ³¹Tama Pailatgo augwalibolo te po wai, “Duga digi Jisas aga selama, tama duga bomo yai po usu gilama, tama duga digi aga po tų ela mao,” te Pailatgo Juda bidi dabe dali te po wai. Tama Juda bagego Pailatbolo te po wai, “Woo, dage Rom gavman bidi dabego te bomo yai po dabolo mawai, te po wai, ‘Dage Juda bagego po tų eyu da, te dwai sę yali bidi dagego elegio. Da Rom dabego naga te dwai sę yali bidi ela mubo sę ebo dao,’ dagego da Juda bagebolo te po wai dao. Tama tibaso, dago e bidi nage pageba sisali, te aga isimainogo yali,” augwaligo te po wai. ³²Polobadu Jisasgo aga isabo sogode po me weyu, te po wai, “Juda hani isąwai bagego ena nide walama, tama ena isaibao.” Tama te po nai

gilama walomainogo, meg i te Juda bage augwaligo Jisas te Pailat pageba odasa aselama, tama te po wai.

³³ Te bidi Pailat aga te gavman be tomoba ma pai. Tama agai Jisas i weyu, asao wai, tama agabolo hanalu wai, “Nage te Juda we bidigo tuni bidi dawe?” Jisas dali Pailatgo te po wai. ³⁴ Jisasgo po wei ponoyu, te po wai, “Naga digi te po homugo koneama obawe? Ma gasa bidigo nagebolo te po weyu, ena dali te po wao te po waliwe?” Jisasgo te po wai. ³⁵ Pailatgo Jisasgo po wei ponoyu te wai, “Ena da Juda bidi dawe? Mu menio. Naga hani dali, te pris tuni bidi dabe dali, augwaligo nage ena bidibo digi sela asai dao. Tama nago magi se yaliwe?” te Pailatgo Jisas dali te po wai.

³⁶ Te Jisasgo po wei ponoyu, te po wai, “Eno te we bidi tonalubo se te e tode yabo menio. Tama eno te we bidi tonalubo se te e tode elalugi soga da, teda eno se bidi augwaligo ena meg i tau somainogo hwigi dao. Tama tiyu, ena niwai bidi mego agai ena te Juda dabego nogoba mugi menio. Tiali goli, eno te we bidi tonalubo se te e tode menio,” Jisasgo te po wai. ³⁷ Tama tibaso, Pailatgo Jisas dali te po wai, “Nage te tuni bidi me deli dawe?” Jisasgo agai po wei ponoyu, te po wai, “Naga digi te po weyu, ena tuni bidi dao, te po wali. Te mu po page mu hania pedalomainogo, te ena te idago ena ame neyu, te ena e toba asai dao. Tama tibaso, te mu po naga wali pabo we bidi augwaligo eno po odobo dao,” Jisasgo te gavman tuni bidi dali te po wai. ³⁸ Pailatgo Jisas dali te po hanalu wai, “Mu po te magide dawe?”

Te Pailatgo Jisas dali te po olama, tama aga te Juda bage bidibo digi buluba ma pelama, tama agai augwali dali te po wai, “Eno Jisas agade magi dwai se yali sege me subeo. ³⁹ Tialima dagego kolesaga tama telalubo dao, te dagebolo eno te bo disawai nai tuabo side, te si nogi Pasova, te side te kalabus bidi me deli eno dageba olo tagala palobo dao. Tama tiyu, eno dagebolo te Juda bidi dabego tuni bidi dageba tagala palagawe?” te Pailatgo Juda bidi dabe dali te po hanalu wai. ⁴⁰ Tama te bidi dabe augwaligo i hae me po dag a me genuai mu olama, te po wai, “Te bidi Jisas menio, nago te bidi Barabas daba olo tagala palao,” te po olama i wai. Te bidi Barabas agai da te bidi eleyu mena nai anom a elama sabo bidi bidai.

19 ¹ Te gavman tuni bidi Pailat agai po olama, tama te ami bidi dabe augwaligo Jisas selama, tama aga tudide elali, te kibu waligo nigai dila pai bigo. ² Tama augwaligo aga dali gisugu omainogo, augwaligo sesani yai bono selama, tobolu madi nigelama, tama Jisasgo tobolude muai. Tama augwaligo te mama yai nami ugwa selama, aga tigide muai. ³ Tama augwaligo Jisas dali tibo posobo po weyu, “Siade dao, Juda we bidigo tuni bidi da” olama, tama augwaligo nogo sawaligo aga nabo gede elali. Augwaligo aga dolobo se yainogo, te tiwai te ami bidi hauwago aga elidu geai.

⁴ Te Pailat te Juda bage bidibo digi buluba ma aselama, te po wai, “Dagego suao, eno Jisas aga buluba odasa asobao, tama dagego konemainogo, eno agade magi dwai sę yali sęge me subeo,” Pailatgo te po wai. ⁵ Tama Jisas buluba asai, augwaligo te sesani yai bonogo nigali madi aga tobolude munaluai. Tama te mama yai nami ugwa me agai tigide me elaluai. Tama Pailatgo augwali dali te po wai, “Te olo bidi dagego suao,” te po wai.

⁶ Te tama tialima, te pris tobolu bidi dabe dali, te enesigi bidi dali augwaligo Jisas sulama, tama augwaligo po dagą weyu, te po wai, “Te bidi ni pedaide elao, te bidi ni pedaide elao,” te Juda bage augwaligo te po wai. Tama Pailatgo augwali dali te po wai, “Duga digi aga selama, ni pedaide elao,” te po wai. “Eno agade magi sęge me subeo,” te Pailatgo Juda bage dali te po wai. ⁷ Juda bage augwaligo te gavman tuni bidi Pailat agai po wei ponoyu, te po wai, “Dago bomo yai po me deli tama telalubo. Niwai bidi agai ‘Ena da Godigo Oгwa dao’ obaso da, te bidi ela muao. Te bomo yai po agai bolobaso, aga isao,” augwaligo te po wai.

⁸ Te Pailat agai te po odolama, tama aga wi genuai mu yai. ⁹ Tama tibaso aga te gavman moni be tomoba ma pai. Tama agai Jisasbolo te po wai, “Nage mena badu bidi nage asai dawe?” Tiali goli, Jisas agai te Pailatgo po wei ponobeo. ¹⁰ Tialima, Pailatgo Jisas dali te po wai, “Magi baso nago ena dali po wabewe? Eno nage olo tagala palabo bomo elalubao. Ma, eno nage ni pedaide elabo bomo me, te eno elalubao. Tama nago te konesiąyu ebawe?” te Pailatgo Jisas dali te po wai.

¹¹ Te Jisasgo agai po wei ponoyu, te po wai, “Tialima, God dagalu ugwdudu bidibo bidi agai bomo nagebolo magi menigi sogo da, te nago bomogo ena aiyaba elalugi menio. Tama tibaso, ena nago nogoba muani bidi, te bidi agai sęge genuai mu eyu, tama nago sęge aiyaba elaluabao,” Jisasgo te po wai.

¹² Te Pailat agai Jisasgo te po odolama, tama agai Jisas olo tagala palabo tų gegai yai. Tiali goli te Juda bage augwaligo bomo elama po dagą weyu, te po wai, “Niwai bidi aga digi ‘Ena tuni bidi da’ weyu da, te bidi agai te Rom gavman tuni bidi Sisar dali boi bidi dao. Tama e bidi Jisas agai te tobage po wai dao. Tama tibaso, nago te bidi Jisas olo tagala palu da, te nage te Rom gavman tuni bidi Sisargo abagi menio, boi bidi tiwai bidaibao,” Juda bagego Pailat dali te po wai. ¹³ Pailatgo te po odolama, tama agai te gavman moni be tomoba ma pelama, tama Jisas buluba sela asai. Tama Jisas buluba sela aselama, tama Pailat aga po tų odainogo duabo digi duawai, te bulu augwaligo nogi masigigo bidaboo sai nigai digi dao wai. Tama te Hibru pogo te nogi tama wai, Gabata, te nogi tama wai. ¹⁴ Te tebo sogo te bo disławai nai tuabo si nogi Pasova te nai dodolobo side dao. Tama belo nai tubo te giliga tomo ebode tamao. Tama Pailatgo Juda bagebolo te po wai, “Duga tuni bidi suiyo,” wai.

¹⁵ Te augwaligo po dagə weyu, te po wai, “Te bidi sela sayao, te bidi sela sayao,” tama po wai, “Te bidi ni pedaide elao,” te po wai. Pailat tuni bidigo augwali Juda bage dali te po wai, “Dagego homugo eno duga tuni bidi ni pedaide elao, te homu ebawe?” Te pris hani toboli bidi dabe augwaligo po wei ponoyu, te po wai, “Dago tuni bidi me menio, te dago tuni bidi te Sisar deli tama dao,” te bidi dabego tama po wai. ^{16a}Tama tialima, Pailatgo te Jisas augwali Juda bidigo nogoba munama, tama augwaligo Jisas ni pedaide elamainogo yali.

Augwaligo Jisas ni pedaide elama daganai
(Mat 27:32-44; Mak 15:21-32; Luk 23:26-43)

^{16b-17}Tama tiwai, tama te ami bidi dabe te Jisas augwa nogoba sai. Tama selama, tama Jisas aga digi te aga elabo ni pedai tolai, tama aga te Jerusalem hanu tagalama, tq me nogi Tobolu Dili te tqba pai. Tama te Hibru pogo te bulu du nogi Golgota wai. ¹⁸Te bulu dude augwaligo Jisas ni pedaide elama daganai. Tama augwaligo gasa bidi me si me Jisas dali elai. Tama me bidi Jisas agai dolo nogo badu eleyu, me bidi agai pobase nogo badu eleyu yai. Tama Jisas aga tomode elai. ¹⁹Tama gavman tuni bidi Pailat agai po me deli asənama, tama augwaligo te Jisas elali ni pedaide muai. Te asənai pode te po wai, ‘Jisas Nasaret bidi te Juda we bidigo tuni bidi dao,’ te po te ni pedaide asəna muai. ²⁰Augwaligo te Jisas ni pedaide elama daganani, te Jerusalem hanu pəde tamao. Tama tibaso, Juda bidi hauwa augwaligo te asənai po nedai te Hibru pogo. Tama Pailatgo te po Hibru pogo asəyu, te Rom pogo asəyu, te Grik pogo asəyu yai, te Jisasgo ni pedaide tama po asəai. ²¹Tama te pris toboli bidi dabe augwaligo Pailatbolo te po wai, “Nago te po tama asəgio, ‘Juda bidigo tuni bidi dao,’ te po wagio. Nago tama po asəqo, ‘Te bidi Jisas agai te po wai, ‘Ena te Juda we bidigo tuni bidi dao,’ ’ te po agai wai dao,” augwaligo te po wai. ²²Pailatgo augwaligo po wei ponoyu, te po wai, “Eno asənai po te eno polo asəai dao. Te po tama elalumainao,” te po wai.

²³ Te ami bidi dabe augwaligo Jisas ni pedaide elama daganai. Tama te sə elama, tama augwaligo Jisas aga ugwa dabe sai. Aga ugwa dabe selama, tama ami bidi me si me si augwa hasi te ugwa dabe dobola sai, tama te ami bidi deli deligo Jisas agai te ugwa me deli sai. Tialima agai holobo ugwa hobolisiwani bobobage mu nigai ugwa dao. ²⁴Tama tibaso, te ami bidi dabe augwa hasi po miyu te po wai, “Dago te ugwa pedegobeo. Dago satu gagali elama, tama te ugwa sabo bidi nigilaibao.” Augwaligo tama tiwai tama tiyu, te bukude polobadu wali po usu nanio. Te bukude te po wai, “Augwaligo eno ugwa dabe dobola sai. Tama augwaligo eno holobo ugwa sabo

bidi niginainogo, te satu gagali yai,” te bukude te po polobadu aşənai. Tama te po usu nanio. Te ami bidi dabe augwaligo tama tiwai.^r

²⁵Te Jisasgo ni pedai pade Jisas aga ida tede dolaluai. Te Jisas aga ida aga ama dede me tede dolaluai. Te gasa we me, aga nogi Maria, aga bidi nogi Klopas, te we me Jisas aga ida dali dolaluai. Tama gasa we te Makdala bulu we nogi Maria, aga tede dolaluali. Te we dabe me si me si augwali Jisas elali ni pedai pade dolaluyu bidali. ²⁶Tama Jisas aga ida dali, te se bidi me agai godola pali bidi me, augwali si te pade dolaluai. Tama Jisasgo augwali si tede dolalubo sulama, tama aga ida dali te po wai, “Te nage dali dolalubo bidi te naga ogwa dao,” Jisasgo te po aga ida dali wai. ²⁷Tama Jisas agai te se bidibolo te po wai, “Te naga ida dao.” Tama te sogo te bidigo Maria aga beba odasa pelama, tama Maria aga dali bidai.

Jisas isai

(Mat 27:45-56; Mak 15:33-44; Luk 23:44-49)

²⁸Te silama, Jisas agai koneai, eno se tigidali megı tama siliyu te ebao, te homu yai. Tialima, Godigo polobadu aşənai po me usu numainogo, agai te po wai, “Ena aji nogonego sobao,” te po wai.^s ²⁹Aj tubo nai me deli tede munaluai, tede gasagi yai aji paganaluai. Tama augwaligo te wawi yai bola tiwai nai selama, tama te ugwa te qide munama, tama augwaligo te aji sali ugwa awi dilide kənama, tama augwaligo Jisas agai te aji tumainogo te ugwaba selama, mawai. ³⁰Jisas agai te aji tulama, tama agai te po wai, “Eno yabo se tigidali te silali,” Jisasgo te po wai. Agai tama po olama, tama aga mage basi gulu, aga noma bidi tagala palama, tama Jisas aga isai.

³¹Te Jisas ni pedaide elali sogo augwaligo te Pasova bo disawai nai sisi ebo side dao wai. Te do me te Sabat yabo sogo dao, tama te Pasova olo bidibo si te do gagalaibao, te genuai sogo mu dao. Tama tibaso, Juda bage augwaligo homugo te Sabatde te isai bidigo tigi te ni pedaide me daganalubo hagelabo wai. Tama augwaligo Pailat tuni bidibolo te po olama, tama augwaligo te bidi dabe saq̄a dili togolama, tama megı augwali polo isimainogo yao. Tama isai digi, augwaligo tigi te ni pedaide sao, te po wai. ³²Tama tibaso, te ami bidi dabe pelama, augwaligo te Jisas dali elali bidi si saq̄a dili togogi pai. ³³Te bidi si saq̄a dili togolama, tama augwali Jisas munalubo digi aselama suai, tama augwaligo Jisas aga isai digi suai. Tama tibaso, augwaligo Jisas aga saq̄a dili togobeo. ³⁴Tialima ami bidi me deligo Jisas punali badu sesemonego enai. Tama polo kaneme dali aji dali geasa dulai, tq̄ba. ³⁵(Te tebo eno suali, eno po polo wai dao, tama tiyu, dagego duga homu Jisas agaba mumainogo yai.

^r 19:24 Tib 22:18 ^s 19:28 Tib 69:21; 22:15

Tama eno te wali po te mu po tama dao. Tama ena digi koneyu, tama eno mu po wabo dao.)³⁶ Te se tama pedalai, tama Godigo bukude wali po usu numainogo yai. Te bukude aseani po tama wai, “Augwaligo agai dili me deli togogobeo,” te po aseani.^t³⁷ Tama gasa po me te Godigo bukude aseyu te po wai, “Tama augwaligo te enani bidi teba gedugo tonaluaibao,” te po me aseani.^u

Augwaligo Jisas tigi ola be tomoba muai
(Mat 27:57-61; Mak 15:42-47; Luk 23:50-56)

³⁸ Te augwaligo Jisasgo tigide yali se silama, tama gasa bidi me nogi Josep, Arimatea bulu bidi, agai te gavman tuni bidi Pailatbolo olama, “Jisas tigi eno saio,” te po wai. Te bidi Josep aga Jisas wali pabo bidi dao. Tialima aga te Juda tuni bidi dabe dali wi eyu, tama agai ‘Ena da Jisas wali pabo bidi da,’ po hania wabe. Tama Pailatgo “Usu dao, nago sa,” te po wai. Tama tilama Josep pelama, Jisas tigi sigi pai. ³⁹ Te bidi me, agai nogi Nikodemus, te bidi polobadu hasia Jisas bidibo digi hulide asali bidi, aga me asai. Agai te ni kaneme si taluama sesai, te dwagi yai denami ebo nai dao. Tama te nai dila pai nai mu dao, abelabo mone genuai mu dao. ⁴⁰ Tama te bidi si augwali sigo Jisas tigi selama, tama augwali sigo te denami yai nai aga tigiba muyu, te pedai uwagago aga tigi bebe peyu yai. Te Juda bidi dabego isai bidi pubulainogo ebo tiwai gilama yai. ⁴¹ Te ami bidi dabe augwaligo Jisas te elali digi tede gi me deli elaluai. Tama te gide isai bidi musiawai gu page ola be elalualio. ⁴² Do te Sabat sogo dao. Megi da te Juda we bidi augwaligo Pasova bo disawai bret nai sisi ebo side dao. Te ola be padae elalubaso, te bidi sigo Jisas tigi teba muai.

Jisas gu pagede ma hodaloai
(Mat 28:1-8; Mak 16:1-8; Luk 24:1-12)

20 ¹ Te Jisas gu pagede munama, si sogo bidilama, tama moni Sarere dao wabo side, tama te Makdala bulu we nogi Maria, te we aga gu pageba kigamu asai. Tama te bulu hulialubadi ganao. Tama agai suali, te ola be tu halualu moni masigi te halualubo agai subeo. ² Tama sulama, tama te we aga Saimon Pita dali, te gasa bidi te Jisas agai godolo yali te bidi dali, te bidi si bidibo digi te we udawai. Tama Mariago augwali si dali po bomonama weyu, te po wai, “Augwaligo dago Genuai Bidi te ola bede sela pai yalio. Tama dago konebeo, augwaligo aga menaba mugi paliwe naga subeo,” te we Mariago te Jisas wali pabo bidi si dali te po wai. ³ Tama te wego te po obaso, Pita dali te gasa bidi me dali, tama augwali si te bidali be tagalama, tama augwaligo te hanu tagalama, Jisas muani digi ola beba pabo gagalali. ⁴ Tama augwali si

^t 19:36 Sai 12:46; Nam 9:12; Tib 34:20 ^u 19:37 Sek 12:10; Ped 1:7

hodobo udawai. Tialima gasa bidigo Pita geanama, tama aga polasa pai, tama ola beba polo polasa sabolai. ⁵Tama te polasa pali bidi aga basi gulama, bomo elama suali, te pedai ugwa nami dabe naga munalubo suali. Tialima aga te ola be gū page tomoba pabeo. ⁶Saimon Pita aga nosali tudi badu asai, tama aga te gū page ola be tomoba polasa pai. Tomoba pelama, tama aga bomo elama suali, te pedai ugwa nami dabe naga munalubo Pita agai suai. ⁷Tama gasa ugwa me munalubo agai suai, te Jisas tobolude bebe pali ugwa dao. Te ugwa gasa ugwa dabe dali munalubeo. Tama te ugwa bebe pelama, agaduba tali munaluai. ⁸Tama te gasa bidi aga polo Pita geanama polasa asali, te bidi aga me te gū page ola be tomoba pai. Tama agai te tiwai elalubo sulama, tama te bidi agai te Jisas ma hodaloali tede te sogo konealuali. ⁹(Tama te sogo augwaligo Godigo polobadu aseçani po page konesiabantadi. God agai po te bukude aseyu, te po wai dao, “Aga gū pagede ma hodaluao,” te po wai. Te sogo augwaligo te po page konebeo.) ¹⁰Tama te bidi augwali sigo te sē tigidali sulama, tama augwali si augwa si beba ma pai.

Maria te Makdala bulu we agai Jisas suai
(Mat 28:9-10; Mak 16:9-11)

¹¹Te we Maria te gū pageba ma sabolali, te bidi si augwali te ola be tomode bidibadi. Tama augwali si augwa si beba ma pelama, tama Maria te gū page ola be bulu badu gana dolaluyu, tama Maria aga gela udai. Aga gela udu digi, tama aga basi gulama, tama agai Jisas te muani ola be tomoba tonai. ¹²Tama Maria agai Godigo sē ebo ensel mobo bidi si tedela bobobage ugwa muai bidi si suai, te Jisas muani ola be tomode dulalubo suai. Tama te ensel mobo bidi me deli te Jisas tobolu muani digi dulaluyu, me te sagā muani digi dulaluyu yai, te Maria agai suai. ¹³Tama te ensel mobo bidi sigo Maria dali te po wai, “Te we, nage magi baso gela obawe?” te po wai. Tama Mariago augwali si dali te po wai, “Augwaligo eno Genuai Bidi selama, tama augwaligo menaba muaniwe, te eno konebeo,” Mariago te ensel mobo bidi si dali te po wai. ¹⁴Maria agai te po weyu, tama agai begelama suai, tama agai Jisas dolalubo suai. Tialima Mariago koneyu, te Jisas tama dao, te homu agai ebeo. ¹⁵Jisasgo Maria agabolo te po wai, “Magi baso nage gela obawe? Nago de gegeyu ebawé?” Maria agai te homu yai, te bidi aga e gi tonalubo bidigo agai te po aga dali wabowe, agai te homu yai. Tama agai te bidibolo te po wai, “Genuai bidi, nago te isali bidi tigi sela pali wida, te nago enabolo aga muani digi ola mao, tama eno aga sela paio,” wali.

¹⁶Jisasgo agabolo te po wai, “Mariao.” Tama Maria aga ma begelama, Jisas dali agai Hibru pogo weyu, “Rabonai,” te po wai. Te po page e tama wai, “Po ola mabo bidio,” te po wai. ¹⁷Jisasgo Maria dali te po wai, “Nago ena diaqio. Ena eno Aya God bidibo digi dagaluba me pabeo. Tama

tibaso, nago ena dą̄u ola sigio. Tialima, nage eno ama dabe bidibo digi pelama, augwali dali te po tama wagibao, ‘Ena eno Aya bidibo madigi dagaluba holobao, tama te aga dagego Aya me dao. Tama eno ena God bidibo digi pobao, tama te God dagego God me dao,’ te po eno ama dabebolo pusigi pao,” Jisasgo Maria dali te po wai.

¹⁸ Tama tibaso, te Makdala bulu we nogi Maria aga pai, tama agai te Jisas wali pabo bidi augwali dali po weyu, te po wai, “Eno Genuai Bidi Jisas sualio,” te po wai. Tama agai te Jisasgo agabolo mani te po augwali dali wai.

Agai bidi dabe augwaligo Jisas suai
(Mat 28:16-20; Mak 16:14-18; Luk 24:36-49)

¹⁹ Te Jisas wali pabo bidi dabe augwali Juda bidi dabe wi eyu, tama augwali bidibo te be tū dą̄u olama, augwali te be tomode bidai. Te sogo moni Sarere dao wabo sogo giliga iba dega sigi pai. Tama Jisas augwali bidibo digi tomoba dolaluagasaki, tama augwalibolo te po wai, “Dagego homu dwagi yai elama, tama dage bugagia bida,” Jisasgo augwali dali te po wai. ²⁰ Jisas agai te po olama, tama agai nogo dali punali badu dali augwalibolo waselai. Tama agai bidi augwaligo Genuai Bidi sulama, tama augwaligo homu dwagi yai mu yai. ²¹ Tama Jisasgo augwalibolo te po ma wai, “Dage dwagi yai homu elama, bida,” te po wai. “Tama Ayago ena tagala palobaso, ena asai dao. Tama tialigia, eno me dage tagala palobao,” Jisasgo te po aga wali bilali bidi dabe dali wai. ²² Jisas agai te po olama, tama aga mobo augwalibolo ponai, tama augwalibolo te po wai, “Dagego Godigo Dwagi Yai Mobo Bidi te sao,” Jisasgo te po wai. ²³ “Dagego gasa bidi dabe mego dwai sę̄ yali sege sela savy da, tama te dwai sę̄ sege Godigo silaibao. Dagego gasa bidi dabego dwai sę̄ yali sege dą̄u weyu da, teda te sege me elaluaibao, te dwai sę̄ sege Godigo sela sę̄gobeo,” Jisasgo te po wai.

Tomasgo Jisas suai

²⁴ Jisas aga te aga wali pabo bidi augwali bidibo digi pedalai, te sogo aga bidi me deli augwali dali bidisiąwai, te bidi Tomas dao, tama agai gasa nogi me Didimus wai, te nogi page aga idago wai si deli sogo ame nai. Te baso te nogi Didimus wai. ²⁵ Tama Jisas aga wali pabo bidi mebago Tomas agabolo te po wai, “Dago naga Genuai Bidi dago suai dao,” te po Tomas dali wai. Tialima Tomasgo augwalibolo te po wai, “Eno aga nogode nel enani digi susiayu da, tama eno nogo dani te nel enani digi tomoba musiayu da, te eno nogo aga punali badu palama susiayu da, teda te eno te poba ena homu mu mugobeo,” Tomasgo te po wai, augwali dali.

²⁶ Te nosali a naga olama me badu nogo sela sogo bidai, tama Jisas aga wali pali bidi augwali te be tomode ma bidai, tama Tomas me augwali

dali bidai. Augwaligo tigidali tü mu dąq ola silai digi, tama Jisas augwali tomoba dolagasai. Tama agai te po wai, "Dagego homu dua bugagia bida." ²⁷Tama agai Tomasbolo te po wai, "Nago nogo dani eba da muao. Tama nago eno nogo me suao. Tama nago nogo eno punali badu palama suao. Nago homu si ebo tagalao. Enade nago homu deli yao, te tiwai bida," Jisasgo te po Tomas dali wai. ²⁸Tomasgo aga dali po wei ponoyu te po wai, "Nage eno Genuai Bidi dao, tama nage eno God nage dao," Tomasgo te po Jisas dali wai. ²⁹Tama Jisasgo Tomas aga dali te po wai, "Nago ena subaso naga, tama nago homu enaba mubawe? Niwai bidi augwaligo ena susiąma, augwaligo homu enabolo mubo we bidi, te augwali dwagi yai homu mu yaibao," Jisasgo Tomas dali te po wai.

Jongo te buku aşəani po page e tama po wai

³⁰Te Jisas agai bomo yai sę hauwa mu aga wali pabo bidi augwaligo gedude agai te sę yai. Tama eno te Jisas agai yali sę po tigidali eno e bukude aşebeo, meba naga aşəani. ³¹Te bidi Jisas da, te Godigo sa muyu nosali asaibao wali bidi Krais dao, aga da te Godigo Ogwa dao. Tama dagego te po mu po dao homu emainogo, eno Jisasgo yali bomo yai sę po meba e bukude aşəani. Tama dagego Jisas da te Krais dao, te aga Godigo Ogwa dao, dagego te homu eyu, aga dali wadoloyu, mu bidada pabo ula dagego somainogo eyu, eno agai yali sę po aşəani.

A naga olama me badu nogo si bidigo Jisas suai

21 ¹Te nosali Jisas aga bidi dabego gedude ma pedalai, augwali te sigi aji nogi Taiberias pade bidibadi te aga ma pedalai, augwaligo aga suai. Aga augwali pageba te tiwai pedalai. ²Te bidi dabe nogi e tama wai, Saimon Pita, te me Tomas te agai gasa nogi me Didimus, te Nataniel aga bulu nogi Kana, te Galili tq pedai bulu, tama te Sebedigo ogwa si dali, te Jisas wali pabo bidi me si me, augwali hodobo bida, te sigi aji nogi Taiberias pade. ³Tama Saimon Pitago augwalibolo te po wai, "Ena sugu gegebibu pobao," wai. Tama augwaligo Saimon Pita agabolo te po wai, "Da me nage dali paio," te po wai. Tama augwali pelama, te gebaba holai. Augwaligo te sogo hulide te sę yali goli, sugu me sabeo. ⁴Tama te giliga pedalainogo ebode, tama Jisas te sigi aji sanide aga dolalubo augwaligo suai. Tiali goli augwaligo aga koneyu, tama aga Jisas dao, te homu augwaligo ebeo. ⁵Tama Jisasgo augwalibolo hanalubo po olama i weyu, te po wai, "Abagi dede, dagego sugu meba saliwe?" te po wai. Tama augwaligo aga dali po wei ponoyu, te po wai, "Menio," te po wai. ⁶Augwaligo te po olama, tama agai augwalibolo te po wai, "Dagego te agane wa te dagego u badu te dolo nogo badu te sugu sabo wa te aiba sayao," te po wai, "tama dagego sugu meba saibao," te po wai. Tama tibaso, augwaligo te wa agai te wali te dolo te wa aiyaba sawai. Tama

sənəma, augwaligo səgū hauwa mu sai, tama augwaligo te wa ugwbaba ma kegabo usu ebeo.

⁷Te bidi me Jisas agai godolo ebo bidi, agai Pitabolo te po wai, “Te aga dago Genuai Bidi dao,” te po wai. Tama Saimon Pita aga ugwa dabe pebeda munama, te sə yai. Tama agai te po odai, “Te bidi aga dago Genuai Bidi dao” wabo, te po odobaso, Pita aga ugwa bea selama, tama aga te əjba samonai. ⁸Tama te Jisas wali pabo bidi meba augwali te gebadu asai, te əj saniba. Tama augwaligo te səgū dabe te wa dali kegasa asai. Augwali digibulu gana bidibeo, te augwali bidali usu sabo te pədə gana tamao, tama te sigi əj saniba asai. ⁹Tama augwali te gebadu aselama, te əj sani badu sabolama, tama augwaligo suali, sia tede dabo suai, tama te siade səgū ulalubo suai, tama te tubo nai bret me tede munalubo augwaligo suai. ¹⁰Jisasgo augwalibolo te po wai, “Megi dagego te sali səgū, te dagego meba eba sesao,” te po wai.

¹¹Te Saimon Pita te gebaba holama, tama te səgū wa agai əj saniba kegasa asai. Genuai səgū hauwa mu te wade pəqənaluai, tama te 153 te tama səgū te səgū sabo wade bidai. Te səgū hauwa mu 153 tamao digi, te wa bono togobeo. ¹²Tama Jisasgo augwalibolo te po wai, “Dage nai tuagasao,” te po wai. Tama Jisas wali pabo bidi me deligo aga dali me hanaluyu, “Nage de dawe?” te po aga dali wabeo. Augwaligo koneai, te aga dago Genuai Bidi dao, te homu yai. ¹³Tama Jisas aselama, te bret selama, augwalibolo mawai. Tama te siade ulai səgū me tama naga tiwai.

¹⁴Jisas aga gə pagede ma hodaluama, tama si sogo Jerusalem hanude aga wali pabo bidi augwaligo gedude aga pedalai dao. Tama megi me te sela sogo aga augwaligo gedude ma pedalai, te Taiberias sigi əj sanide.

Jisas dali Pita dali side po

¹⁵Te augwali nai tula silama, tama Jisasgo Saimon Pitabolo po weyu, te po wai, “Saimon, nage Jongo ogwa dao, tama nago ena godolo ebo kolesagago e bidi dabe augwaligo ena godolo ebo kolesaga aiyaba elalubawe?” Tama Pitago agabolo te po wai, “Ao, Genuai Bidi, nago koneai dao, nage eno abagi dao.” Jisasgo agabolo te po wai, “Nago enaba homu tamadi muani we bidi augwali eno po nago augwalibolo ola mao,” Jisasgo te po wai. ¹⁶Tama bidama gana, tama Jisasgo Pita aga dali si sogo te po ma wai, “Saimon, nage Jongo ogwa dao, tama nago ena godolo mu ebawe?” Pitago aga dali te po wai, “Ao, Genuai Bidi, nago koneai dao, nage eno abagi dao.” Jisasgo agabolo te po wai, “Nago enabolo homu muani we bidi augwali nago tau siyu, tonaluyu yao,” Jisasgo te po wai. ¹⁷Tama bidama gana, tama sela sogo agai Pitabolo te po ma hanalu wai, “Saimon, nage Jongo ogwa dao, ena da nago abagi dawe?” Tama agai Pita dali sela sogo “Ena da nago abagi dawe?” obaso, Pita aga homu səge yai. Tama Pita agai Jisasbolo te po wai, “Genuai Bidi, nago tigidali nai

koneai dao. Tama nago koneai dao, nage eno abagi dao,” Pitago te po wai. Tama Jisasgo agabolo te po wai, “Nago enabolo homu muani we bidi augwali eno po nago augwalibolo ola mao.¹⁸ Eno mu po nage dali obao, polobadu nage gesi bidi bidiyu, tama naga digi kugulu gudulama, tama naga pabo mena mena bulu te naga homugo digi te buluba pai dao. Tialima nosali nage monu dabe ebo sogo, tama tebo sogo da te nago nogo ugwaba siyu, tama gasa bidigo nago nogo tulama, nago homugo pisayabo homu isawani te buluba nage odasa paibao,” Jisasgo te po wai.¹⁹ Jisasgo te po olama wai, nosali augwaligo Pita ela muaibao. Tama Pita isiyu, tama aga te isibogo tama agai Godigo nogi ugwaba saibao. Jisasgo te po olama wai. Jisas agai te po olama, tama agai Pita dali po weyu te po wai, “Nage ena wali asao.”

²⁰ Te augwali si pabo gagalama, pobadi, tama Pitago begela suali, te Jisasgo godolo ebo bidi, aga augwali si wali asobo suali. Te bidi aga polobadu gana augwali nai tuali sogo aga te Jisas hagawiade tialuyu, tama agai te po hanalu wai, “Genuai Bidi, niwai bidi agai nage boi bidi nogoba muaibawe?” te po wali. Te bidi Jisas dali Pita si wali asobo Pitago megi suali. ²¹ Pita agai te bidi sulama, tama agai Jisasbolo te po wai, “Genuai Bidi, te bidi dali magi se yaibawe?” ²² Jisasgo Pita dali te po wai, “Eno homugo ena ma asobo si te bidi aga me bidibadi asomai da wida, te nago se dawe? Nage ena wali asao,” Jisasgo Pita dali te po wai. ²³ Tama Jisasgo te bidide te wali po tama te aga wali pabo bidi mebago te po odolama, usu ela silai. Te pode geda muyu, augwaligo te homu yai, “Jisasgo te po wai, te bidi isigobeo.” Tiali goli Jisas agai te bidi dali nage isilamo dao, te po aga dali wabeo. Jisas agai te po wai, “Eno homugo ena ma asobo si te bidi aga me bidibadi asomai da wida, te nago se dawe?” te po wai. ²⁴ Tama te Jisas wali pabo bidi agai digi Jisasgo wali po odoyu, tama Jisasgo yali se suyu yai. Tama te bidi ena dao, tama eno te po dali, te se dali yali po pusulama, tama eno te po e bukude asęai. Tama dago koneao, agai te wali po mu tama dao.

²⁵ Te Jisas agai se hauwa mu yai. Meba naga eno e bukude asęai, meba po eno asębe. Tama e po asębo bidi eno te po tigidali deli deli asęyu da, tama te asębo buku hauwa mu yaibao, tama eno homugo tigidali bulu te buku dabe mubo usu egobeo.

Godigo Sęba Tagala Palai Bidigo Po

Te hasia nedebō tau sabo po

Te bidi Luk agai hasia te Jisas aga tōde bidibadi yali sę dali, aga wali po dali, te tigidalide po hasia aşenama, tama nosali agai te Jisasgo po wali pabo we bidi hani dabe geninama pedalobo po me aşenani. Agai homugo te aga abagi Tiofilus agai koneaibao, te Jisas wali pali bidi dabe augwaligo te Jerusalem moni hanude gagalama, tama tedu te Judia moni tō pedaiba pelama, te Godigo po pusubo sę egi pai. Tama tedu augwali te Samaria moni tō pedaiba pususu biligi pali, tama tedu nosali augwali te haniani digibulu tōba pali. Hasia bolo augwaligo te Juda we bidi dabebolo naga te po ola magi pai. Tiali goli nosali augwaligo koneai, te Godigo homugo te Juda hani isławai haniani hani we bidi tigidali augwaligo me te Jisasde wabo gesi dwagi yai po odomainao. Tama Godigo aga Tedali Mobo Bidi augwalibolo mayu tama agai tebogo augwali bomo mobaso, augwaligo te Juda dabego moni hanu Jerusalemde gagalama, tama nosali te gesi dwagi yai po te Juda hani isławai bagego moni hanu Romba me te po pusugi pai dao.

Te aposel dabe augwaligo Jisasgo po te Jerusalemde pusali (Dqi 1:1–8:3)

**Jisasgo bomo yai po dąu weyu, agai te Tedali
Mobo Bidi tagala palabo po wali**

1 ¹Eno abagi Tiofilus, te eno hasia bukude eno e po aşenani, te Jisasgo yali sę dabe tigidali dali, te agai po ola mawai po tigidali dali, te si aşenani.^a ²Jisasgo te tiwai yai, te aga sę gagalobo sogo pelama, Godigo aga dagaluba odasa pali sogoba dąj egi pai. Tama Godigo aga dagaluba odasa pesiąwai madi, Jisas agai sa muani tagala palai bidi dabebolo po pusa mawai. Tama agai Godigo Dwagi Yai Mobogo bomogo te po augwalibolo pusa mawai. ³Tama Jisas isilama, ma hodaluama, te bidi sese si sogo aga bidi dabebolo agai tigi waselai, hauwa sogo. Tama

^a **1:1** Luk 1:1-4

agai augwaligo gedude sē dabe hauwa yali, te augwaligo aga gesi ma bidibo mu konemainu yai. Tama augwali homu si ebe. Augwaligo aga gedugo suali. Agai Godigo we bidi tonalubo sē po augwalibolo pusa mani. ⁴⁻⁵Tama augwali deliba sisinagaselama, Jisasgo augwalibolo te po bomonama wai, “Polobadu Jon agai we bidi baptais mani. Tialima, tamadi tama dage Jerusalem moni hanude bidibadi, Godigo agai Tedali Dwagi Yai Mobo Bidi dageba mawaibao, te baptais sabo tiwai yaibao. Tama tibaso, dage te Jerusalem hanu taga pelamuo. Meo. Eno Ayago dagebolo mawaiba wali nai, te Godigo Dwagi Yai Mobo, aga asobo tonaluiqo, eno dagebolo polobadu pusa mani nai po,” Jisasgo te po wali.^b

Godigo Jisas dagaluba odasa sai

⁶Te Jisasgo tagala palabo bidi dabe augwali Jisas dali hodobo sisinagaselama, augwaligo aga hanalu, te po wali, “Genuai Bidi, polobadu da Israel hani bidi dabe dena tqde bidibo we bidi dabe tonaluali. Te polobadu yali sē yaligia nago tamadi ma gagalaibawé?” ⁷Tama Jisasgo augwalibolo te po wei ponai, “Menio. Te eno Aya deli naga konealubo, te sē ebo sogo me, te agai bodolu mabo. Agai homugo. Dagego nai menio, tama tibaso dagego Ayago bodolu mani sogo si dabe konegobeo. ⁸Me ma, e dagego koneagameo, te Godigo Mobo Bidi dageba asobo si, teda Godigo dage bomo ilaibao. Tama duga enade po te we bidi dabebolo pusa maiyqo, te Jerusalem be nanide me, te Judia tq pedai tigidalide me, te Samaria tq pedai tigidalide me, te moni digibulu tq pedai dabede me te po pusa mao,” te po wali. ^c ⁹Tama Jisasgo te po olama, Godigo aga te dagaluba odasa sai, te augwaligo tonalubadi. Tama aga hodaluama, pogo aga halua sagasali, te augwaligo aga ma subeo.

¹⁰Te Jisas holaboso, augwaligo bomo yaigo tonalubadi, tama polo te nala nisi ugwa gudai bidi si augwali dali hodobo dolaluagasaki. ¹¹Tama augwali sigo te po hanalu wai, “Dage Galili tq bidi dabe, dage te uwabawa dagaluba magi baso tonalu dolalubawé? U bidi Jisas, te Godigo dagaluba odasa holali bidi, te bidi ma asaibao, te aga dagaluba pabo yaligia ma asiyu me tiaibao, te dagego tonalubadi megi pabo yaligia tiwai yaibao, ma asobo sogode,” te po wali. Tama te po olama, tega si ma pali.

Te bidi Matias agai Judasgo sē sai

¹²Te Jisasgo tagala palai bidi dabe augwali te Oliv Ni Sili bulu dudu geasa pelama, Jerusalem be naniba ma pali, te bulu digibulu meni, pāde bidai, te kilomita deli naga. ¹³Tama augwali Jerusalem tomoba pelama, beba sabolama, augwa osogo bidigi pabo be habuba uwabawa holali. Tama te bidi dabego nogi e dao, te Pita, Jon, Jems, Andru, te Filip me, Tomas

^b 1:4-5 Mat 3:11; Mak 1:8; Luk 3:16; Jon 1:33 ^c 1:8 Mat 28:19; Mak 16:15; Luk 24:47-48

me, te Bartolomyu me, Matyu me, te gasa me Jems, aga aya nogi Alfius, te Saimon, te independes sainu ebo hani bidi me, te gasa Judas me, aga aya nogi Jems.¹⁴ Tama augwali hauwa sogo deliba sisinagasali, Godibolo po omainu yali. Tama te Jisas wali pai we dabe me, Jisas aga ida me, Jisas aga ama dede me, te bidi dabe dali hodobo deliba sisinagasali, Godibolo po omainu yali.

¹⁵ Te nosali si sela sogo silibaso, tama te sogo te Jisasde homu dą̄ wai we bidi dabe deliba sisinagasali. Bidi sese me sela me sela 120 tama bidi sisinagasali. Tama Pita doligulama, te we bidibolo po me wai.¹⁶ Pitago te po wai, “Ama dede, Godigo bukude polobadu aşənai po mu dią̄ holai dao. Polobadu Godigo Mobogo te Devitgo pedauwalidu po omainu ilai tiwai, te bidi Judasde. E Judasgo te Jisas tuabo sunumi te bidi dabebolo ola mawai bidi da.¹⁷ Jisasgo aga polobadu sa muani, aga da dali sę emainu yali. Tama tibaso, Judas da dali bilai dao,” te po wai.¹⁸ (Polobadu Judas agai Jisasde dwai sę elama, masigi dabe sai dao. Tama te masigigo tő abelama, tede tulaluyu, aga tabi peda peyu, aga haliga dabe buluba dią̄ soyu, tama isai dao.¹⁹ Tama te Jerusalemde bidibo we bidi tigidali augwaligo te sę po odali. Odolama, tama te tő augwaligo pogo nogi poai, te nogi Akeldama. Te nogi page e dao, “Kaneme tő dao.”)^d

²⁰ Te Pitago po ma wai, “Te lotu tə̄abi buku aşənai bidigo te bukude te po wai,

‘Aga be olo elalumainao, tede bidi me bidamuo.’^e

E po me te bukude aşənai, ‘Me bidigo aga sę sao,’ te po wali,” Pitago te po wali, Judasde.

²¹⁻²² Te Pitago po ma wai, “Te bukude aşənai po elalubaso, bidi me deli daba wadolama, da dali hodobo bidimainao. Te bidigo te we bidi dabebolo te po waibao, ‘Te Genuai Bidi Jisas isilama, ma hodaluali, ma bidibao,’ te po waibao. Tama polobadu Jongo we bidi baptais mabo sogode da dali hodobo bilai bidi me dą̄ ilinao. Te tama aselama, Jisas dagaluba peyu dą̄ yali. Te Jisas dali da hodobo biliyu bilali bidi, te bidi dago dą̄ ilaibao, te Judas hasegelainu, te Judasgo polobadu yali sę tiwai yaibao,” te po wai.

²³ Te po obaso, te Jisasde homu dą̄ wabo we bidi augwaligo bidi sigo nogi muai. Me bidi nogi Josep, agai nogi me si elaluali, me nogi Barsabas, me nogi Jastus. Tama gasa me bidigo nogi Matias.²⁴ Tama augwaligo Jisasbolo te gedu haluasa po wai, “Genuai Bidi, nago tigidali bidi dabego homu kolesaga konebo dao. Tama tibaso, Genuai Bidi, te bidi si me deli nago dabolo dą̄ ilama,²⁵ da ola mao, te Judasgo yali sę somainu, nago tagala pali bidigo sę. Te sę Judasgo tagalama, aga digi dwai sę yali. Tialigo da, aga genuai sęge mu salio,” te po wai.²⁶ Tama olama,

^d 1:19 Mat 27:3-8 ^e 1:20 Tib 69:25; 109:8

augwaligo Matias dali Jastus dali sigo nogi yai nai dabe kapde munama, tama begelali, te Matiasgo nogi yai nai hasia asali. Tama tibaso, Matias nogi si olama, sąqę deli bidi dabeba wadolai.

Godigo Mobo Bidi asai

2 ¹Te nosali te Pentikos sogo asobo si, te Jisas homu dąu wabo we bidi tigidali te deli beba sisinagasali. ²Tama polo augwaligo te u wabo dagaludu odali, te moni bomo yai wali asobo u wabo tiwai. Tama te bede bidali we bidi tigidali augwaligo te u wabo odali. ³Tama augwaligo te nai dabe suali, te dwasianu sia bogoli dabe tiwai, bidigo hamena gagawai dabe augwaligo suali. Tama te nai dabe pebeda pelama, bidi deli deliba pelama, diq yani. ⁴Tama Godigo Dwagi Yai Mobogo augwali sali, te tigidali agada weyu, tama augwali tigidaligo gasagi yai gasagi yai konesiąwai po dabe wabo gagalali, te me bidigo me po weyu, tama me bidigo gasa po me weyu yali. Tama Godigo Mobogo augwali te po dabe omainu te sę ilali, augwaligo pedauwalidu.

⁵Tede, te Jerusalem be nanide, te tigidali tq pedaidu asai Israel hani bidi dabe bidai, te augwali Godibolo lotu po wabo bidi dabe. ⁶Tama augwaligo te u wabo odama, we bidi hauwa kisu deliba sisinagasali, te beba. Tama te Jisasgo tagala palai bidi dabe augwa tigidaligo te bulu po augwaligo konesiąwai goli ola bidiyu yali. Tama, tibaso, te tamadi asai bidi deli deli dabego po odama, augwali nomu sali. ⁷Tama noma mu selama, augwali moni homu elama, te po wai, “Te po wabo bidi dabe tigidali augwali Galili tq pedai bidi dabe da. ⁸Tialima, dago odali, da deli deli bidi hani dabego po dabe augwaligo wabo dago odali. Dago po augwaligo mena tama koneaniwe?” te po wali. ⁹Tama te po ma wai, “Da tigidali buludu eba asali, e Judia tq pedai me, te Paria tq pedai me, Midia tq pedai me, Elam tq pedai me, te Mesopotemia me, Kapadosia me, Pontus me, Esia me, ¹⁰Frigia me, Pamfilia me, Isip me, tama da Rom bidi dabe eba aselama, bidibo me. Da me badu te Sairini be nanidu asali, te Libia tq tonalubo bidigo be nani. ¹¹Da me badu Juda dabe mu da, me badu da homu begelama, Juda dabego ebo sę wali pabo dao. Tama da Krit me, Arebia me. Tialima, te bidi dabego Godigo bomai sę po dabe dago po dabego wabo odali,” augwaligo te po wai, te tamadi asai bidi dabego. ¹²Tama augwali nomu selama, augwali homu kolesaga umana pali. Tama augwa hasi ma po miyu, te po wai, “Te nai mena tama tialiwe?” ¹³Tiali goli, bidi dabe me badu augwaligo te posobo po weyu, te po wai, “E bidi dabego bomai wę tulama, wabo pabo sę gagawai ebao,” te po wali.

Pitago te we bidi dabebolo pusali po

¹⁴Te bidi Pita dali, te Jisasgo tagala palai bidi nogi si olama, sąqę deli dali, augwali dodulalualu. Tama augwali dodulalu, Pitago te sisinagasaki

we bidigo wali po wei ponai, te po bomona wai, “Dage Juda hani, dagego odiqo, te Jerusalemde bidibo bidi dabego me, odiqo, te dagego te ede subo sę page koneagameo. ¹⁵Dagego homu da bidi dabego bomai wę tulama, wabo pabo sę gagalali. Woo, te meni. Te kigamu giliga tamadi tama holobao. We bidi augwaligo kigamude bomai wę tulama, wabo pabo sę ebo menio. ¹⁶Tiali goli, te subo sę page e dao. Te Godigo agabolo po olama, agai Godigo po pusa mawai bidi nogi Joel, agai e sęde polobadu te po wai,

¹⁷“Te Godigo te po wai, “Te e si sia sainu ebadi yaide, eno ena Mobo Bidi tigidali we bidibolo olo mu mawaibao. Tama menama, dagego ogwa dabe, wegi dabe augwaligo eno po pusa mawaibao. Tama eno duga gesi bidi dabebolo me me gasagi yai na dabe ola mawaibao, te monu dabe augwalibolo me.

¹⁸Mu tama, te side eno sę ebo bidi dabe me, eno sę ebo we dabe me, te siba eno ena Dwagi Yai Mobo Bidi olo mu mawaibao. Tama menama, augwaligo eno po pusa mawaibao. ¹⁹Tama eno dagalude me, tode me, te we bidi noma sabo gasagi yai bomai sę dabe yaibao. ²⁰Te kaneme me, sia me, sisi yai hano me yaibao, te giliga eno huli si ilaibao, tama te polua me kaneme tiwai mama yai ilaibao. Tama nosali Genuai Bidi Jisasgo si asobo si, te side Genuai Bidigo genuai sę dabe yaibao, tama tibaso te sigo moni nogi elaluabao. ²¹Tama te side Genuai Bidi nogi elama i wabo bidi dabe da, teda Godigo augwali tau selama, aga we bidi dabe yaibao,” Godigo te po wai,^f

Joelgo tama po wai,” Pitago te po wali.

²²Te Pitago po ma wai, “Dage Israel dabe, dage e po odiqo. Eno Jisas te Nasaret bidide po waibao, te agai bomai moni sę dabe Godigo agabolo mobaso, agai dagebolo ola mayu tama Godigo aga tagala palai dao. Dago te kone dao, te bomai sę dabe Jisasgo dage tomode yali duga kone dao, te bidi Jisas agai yali. ²³Tama Godigo polobadu mu koneama tiaibao homu elama, agaduba homugo po polo dąq waluyu homude tiwai, te Jisas augwaligo dagego nogode muaibao. Tama dagego dwai bidi dabego Jisas elemainu ola mobaso, tama augwaligo aga ela muani. ²⁴Tiali goli, Godigo te bidi ma hodolobaso, tama aga ma hodaloai dao. Bidi isibo sęgo Jisas kalabus usu isabaso, aga dene hauwa dali isama, Godigo agade te dene silali. ²⁵Tama polobadu Devitgo te Jisas me hodalobo sęde te po weyu, e tobo wai,

^f 2:21 Jol 2:28-32

‘Eno Genuai Bidi eno gesabide sesemane bidibo suali. Tama aga eno dolo nogo badu bidibo. Tama tibaso, dwai sē hauwa enabolo pedalai eboso da, augwali ena aiyaba elalugobeo.²⁶ Tama tibaso, eno homu wiegi yai elama, tama eno tede po pusubo sogo eno bugai homu mu ebo da. Ena bidi tama dao, ena isaibao. Tiali goli, ena te po wabo da, eno God agai enabolo dwagi yai sē ebo ena tonaluiba. ²⁷ Magi baso meni.

God, nago eno noma te isi bidi dabego pesagede olo tagalogobeo. Ena da, te nago dwagi yai sē ebo bidi da. Tama eno tigi nago damua pomainu tagalogobeo.²⁸ Nago bugagia bidiyu bidabo tū enabolo ola mawai dao. Nage ena dali hodobo bidibaso, ena tego dwagi yai homu mu ilali,’^g

Devit agai te po wali,” Pitago Jisasde te po wali.

²⁹ Te Pitago te we bidi dabebolo po ma wai, “Ena hani bidi ama dabe, dago wāj mu Devit, te bidide po eno dagebolo hanianama mu pusa momainu, e po obao. Devit polobadu isali, tama augwaligo aga pubulali. Agai tigi muani pesage te da bidibo digi pāde e elalubao, te ede me munalubuo. Tama tibaso, dago konebo dao, te Devitgo agai wali po agade digi wabe, te Jisasde wali. ³⁰ Tama Devit bidibadi yaide, te agai polo koneai, te magi sē dabe diā holaibao. Tama Godigo agabolo mu tama dao olama, te po mu dāq walai, te Devitgo koneai. Godigo agabolo te po wai,

‘Te eno naga hani bidi dabego bidi me nosali mu genuai bidi mu ilaibao, te nage tiwai,’

te po wai, Godigo. ³¹ Tama Devitgo suali, te Godigo nosali yabo sē. Tama tibaso, Devitgo te we bidi tau somainu sa muani bidi Krais ma hodaloabo, te sēde te po wai,

‘Te Godigo aga te isi bidi dabego pesagede olo tagalogobeo. Tama agai tigi damua pogobeo.’

³² Tama te bidi Jisas, Godigo aga ma hodolali. Te sē da Godigo po wali pabo bidi dabego gedugo mu suali. ³³ Tama Godigo Jisas ma hodolama, aga dolo nogo badude muani, tama te nogi yai bidi bidibo madi. Tama Godigo agabolo aga Dwagi Yai Mobo mawai, te aga aya Godigo polobadu mawaibao olama polo po dāq walai. Tama megij Jisas agai Godigo Dwagi Yai Mobo dabolo olo mu menama, e dagego suali sē me, odali po me pedalali. ³⁴ Tama Devit aga digi dagaluba pai menio, te Jisas yaligia. Me ma Devitgo e tōba wai,

‘Eno Godigo eno Genuai Bidibolo te po wai, “Nage

^g 2:28 Tib 16:8-11

eno e dolo nogo badu dugayao. ³⁵Tama pelama,
 eno naga boi bidi dabe aiyaba elaluama, nago sęqą
 dologoba muaibao, te sogo dąi egi paibao,” Godigo
 te Genuai Bidibolo tama po wai,’
 Devitgo te po wali.”^h

³⁶Te Pitago po ma wai, “Eno dagebolo te po obao, dage Israel we bidi
 tigidali, dagego hania koneao, te duga te nide enani bidi Jisas, te bidi
 Godigo te Genuai Bidi ilali, te Godigo we bidi tau somainu sa muani bidi
 Krais,” Pitago te po wai.

³⁷Te we bidi augwaligo te po odobo si, augwali moni homu mu elama,
 Pitabolo me, tama me badu Jisasgo tagala palai bidi dabebolo me te po
 wai, “Hani bidi ama dede, da magi egowe?”

³⁸Te Pita agai augwalibolo te po wai, “Dage tigidali deli deli dabego
 tigidali dwai sę dabe tudiba togolama, tama homu begelama, Jisasgo
 nogide baptais sao, te Godigo dagego dwai sę sela sənana, boi bidi
 egobe weyu yao. Tama tilama, Godigo aga Dwagi Yai Mobo dagebolo
 mawaibao. ³⁹Tama Godigo polobadu mawaibao olama polo dąu walai po
 dagebolo me, te duga ogomani dabe nosali ame nabo tebolo me, tama te
 digibulu bidibo we bidibolo me, te dago Genuai Bidi God aga pąba i wabo
 we bidi tigidalibolo me, agai te tigidali we bidibolo aga Dwagi Yai Mobo
 mawaibao,” Pitago te po wali.

⁴⁰Te Pitago augwalibolo dwasianu po wabe, te po hauwa wai, te po
 bomona weyu, te po wai, “Duga digi duga ma tau siqo. Tibaso, dage dene
 sogobeo, te Jisas ela muai dwai bidi dabe nosali dene sainu ebo yaligia,”
 te po wai. ⁴¹Tama we bidi hauwa augwaligo agai wali po homude dąu
 wai. Tama we bidi hauwa mu 3,000 augwali te sogo baptais selama,
 tama augwali te Jisasde polobadu homu dąu wai we bidiba wadolagasaki.
⁴²Tama augwali wadolali we bidi augwaligo Jisasgo tagala palai sę bidi
 dabego augwalibolo po hauwa mu ola momaina homu yali. Tama augwali
 deli hani tiwai bidali. Tama augwali deli madi hodobo nai tubo da,
 augwali Jisasde homu dąu wai dao weyu yai. Augwali Godibolo hodobo
 po wabo da.

Jisasde homu dąu wai we bidi augwali bugagia bidai

⁴³Te bidi Jisasgo tagala palai bidi dabe augwaligo te we bidi noma sabo
 gasagi yai bomai sę dabe hauwa sogo mu eduali. Tama tibaso, we bidi
 tigidali noma mu sai. ⁴⁴Tama te Jisasde homu dąu wai we bidi tigidali
 augwali deli hani tiwai pedelama bidali. Godigo po wali pabo bidi dabego
 homugo te da deli deligo munalubo nai dabe denaduba nai dabe da homu
 ebe, te Godigo dąi ilai me badu bidi dabe tau sabo nai dabe da, te homu yali.

^h 2:35 Tib 110:1

45 E tiwai yai. Te augwaligo me sogo be dabe me, te tōde me, te munalubo me badu nai dabe me bidi dabeba menama, tama mone ge selama, me me nai habuge yai bidi dabe tau siyu yali. Tama tilama, augwali tigidali usu yali. 46 Tama augwali te Moni Lotu Be tempel tede sesemane sogo sisinagasu sisinagasobo da, te deli hani tiwai. Tama augwaligo sesemane sogo wiegi yai homu dali nai tuyu bidali, te augwa be dabede. Tama augwali wiegi yai homu dali nai tubo da. 47 Augwaligo te po wabo da, “Te God da, aga dwagi yai mu da.” Tama te olo we bidi tigidali augwaligo te Jisasde homu dāq wai we bidi dabebolo wiegi yai homu yai. Tama Godigo sesemane deli deli sogo te olo we bidi dabe selama, agai po wali pabo bidi dabeba wadolobo dao.

Sağaq dwai bidi dwagi yai ma ilali

3 ¹Te me sogo Pita dali Jon dali te bidi si te Juda dabego Moni Lotu Be tempel teba pali, pioba poloba. Tama te Juda dabego pioba poloba Godibolo gedu haluasa po wabo sogo da. ²Tama te Moni Lotu Be tempelde te moni sunumi deli elalubo, te sunumi nogi Dwagi Yai Mu. Augwaligo te saqaq dwai bidi me deli te sunumiba sesemane sogo tolasa asama, teba mugasobo da, mone ge gonomainu yali. Te bidi aga idago tabide saqaq tama dwai ame nai. Tama te bidigo tigidali sogo “Dwasianu masigi ena mao,” wabo, te Lotu Be tempelba asobo we bidibolo. ³Aga Pita dali Jon dali si tomoba asobo sulama, “Dage sigo dwasianu masigi ena mao,” wabo po hanalu wali. ⁴Augwali sigo te bidi dolo tonalu, tama Pitago te po wai, “Da siba nago tonaluao,” wali. ⁵Tama te po obaso, te bidigo augwali si tonaluali, agai homugo ‘Augwali sigo masigi enabolo mawaibao.’ ⁶Pitago agabolo te po wai, “Ena masigi menio. Tialima, eno elalubo nai deli nagebolo mawaibao. Jisas Krais, te Nasaret bidi, agai te bomo elalubaso, eno nagebolo obao, nage bilao.” ⁷Tama olama, saqaq dwai bidigo dolo nogogo Pita nogo tolasa hodaluali. Tama megi tama saqaq si dali si ma dolo yali, te aga saqaq gāq si me ma dolo yali, tama tigidali saqaq dili ma bomo yai. ⁸Tama agai saqago sasa mano biliyu, posoga palu, posoga palu elama, aga saqago dolo dolaluali, tama agai bilalio. Aga augwali si dali Moni Lotu Be tempel tomoba pobadi yaide, agai posoga palu elama biliyu, agai Godigo nogi ugwaba salio. ⁹Tama tigidali we bidi te Moni Lotu Be tempel tomode augwaligo te bidi bilibo suali, agai tama biliyu Godigo nogi ugwaba sali. ¹⁰Augwaligo te bidi sulama, koneai, te po wai, “Te bidigo e Moni Lotu Be tempel sunumide dugulalu tigidali bidi hanalu wai, ‘Masigi enanu mao,’ wabo da, te sunumi nogi Dwagi Yai Mu,” te po wai. Te mone enanu mao gonudali bidi aga saqaq usu elama bilibaso sulama, augwaligo noma mu sai.

Pitago te Moni Lotu Be tempel tomode po pusai

¹¹Te bidi agai Pita dali Jon dali tagalabo homu meni, tama te bidi si nogogo toalio. Tama bidi sela Moni Lotu Be tempel tomode dolalubo, te

be mabode, te mabo nogi Solomongo Be Mabo. Tigidali we bidi augwali noma selama, udulama, te bidi sela pageba sabolali. ¹²Tama Pitago te we bidi sulama, augwalibolo te po wai, “Israel dabe, magi baso dage noma sobawe? Magi baso dagego da gedugo bugagia osabawe? Dadi sigo bomogo e bidi bilimai hagede dodolobeo, te menio. Dadi si dwagi yai bidi menio, e bidi dodolobeo. Godigo e sə yali. ¹³Dena wəi mu Abraham dede, Aisak dede, Jekop dede polobadu augwaligo koneama, Godibolo lotu po wabo page wai. Tama te Godigo agai ogwa Jisasgo nogi da ola mawai dao, te aga bomo me. Aga da, te da tau sabo bidi dao. Tiali goli, dagego polobadu Jisas te gavman genuai bidi teba odasa pai. Dagego aga po tū elama, te kiap bidi nogi Pailat agai Jisas olo tagalai homu yai. ¹⁴Tiali goli, dagego te bidi Jisas tudiba muani, dwagi yai kolesaga yai bidi, mu doloba pai bidi dao. Dagego te kiap Pailat hanaluyu, ‘Te bidi Barabas olo tagalama, da mao,’ te po wai. ¹⁵Te bidi Barabas da, te bidi ela mubo bidi da. Dagego Jisas agai da bida bida pomai hagede tau sabo bidi, te dagego ela muai dao. Tiali goli, Godigo aga ḡu pagede ma hodolali. Dadi sigo suali, aga ma bidibo. Tama dadi sigo koneama, te po dagebolo obe dao. ¹⁶Jisasgo bomogo e bidi ma dwagi yai ilali. Dage tigidali gedugo sualio. Te bomo dagego suali te bidi dwagi yai ma ilali. Tiali goli, Jisasgo bomo aselama, dadi sigo te bidi Jisas konealubo homu ebaso te bidi dwagi yai ma ilali, te dagego gedugo sualio,” Pitago te po wali.

¹⁷Te Pitago po me wai, “Eno ama dede, dage dali dago genuai bidi dabe dali, dagego Jisasgo page bugagia konesiawai baso, te agabolo te dwai sə yali, te eno konebao. ¹⁸Godigo polobadu mu agai po pusa mabo bidi dabe tigidalibolo te po wai, ‘Eno we bidi tau somainu sa muani bidi Krais, aga tigide dene hauwa yaibao, te augwaligo aga ela muaibao,’ te po wai. Tama dagego agabolo dene menama, ela munama, dagego te dwai kolesaga e baso, te polobadu wali po tiwai yaligia megi nai ebigia muani. ¹⁹Tama tibaso, dagego kolesaga begelama, Godigo kolesagadu wali piəo, tama Godigo dagego dwai səgə sela səmainu tama yao. ²⁰Tama te elama, Genuai Bidigo dage dwagi yai toma tuabo sogo mawaibao, te agai dagego kolesaga dəwə walaibao. Tama nosali Jisas tagala palaibao, aga Godigo sa muani bidi Krais, tama da tau somainu yaibao. ²¹Megi agai dagalude tonalu bidibo, Godigo tigidali nai gesi ma ilibō sogo, te sogo asobo tonalubo. Te po polobadu Godigo agai po pusa mabo bidigo dabebolo wai, mu dolo yai bidi dabe. Tama augwaligo te po pusa mani. ²²Tama Mosesgo polobadu te Juda dabebolo po wai,

‘Te Genuai Bidi, dago God, agai ena dagebolo tagala palai dao. Tama nosali agai te tiwai te po pusa mabo bidi me dagebolo tagala palaibao, dagego hani bidi deli. Agai wabo po tigidali dagego bugagia odiəo. ²³Tama te po pusa mabo bidigo po odisəbo

we bidi, teda dagego Godigo po odobo we bidi
tomo agebeledu buluba sela sànama, elai bao,”ⁱ
Mosesgo te po wali,” Pitago te tama po wai.

²⁴Pita agai po me wali, te po wai, “Te Godigo po pusa mabo bidi nogi Samuel dali, te nosali asai bidi dabe dari me, te Godigo po pusa mabo bidi dabe tigidali, augwaligo Jisasgo yabo së po polobadu pusa mawai. Tama meg i te së diaq holali. ²⁵Godigo agai mu po ola tolai dao, te agai po pusa mabo bidi dabego ola mawai, te da tau somainu. Godigo dago waj dabebolo agai mu po ola mawai dao. Tama Godigo Abrahambolo polobadu wali po meg i da pagede me bidibo. Godigo Abrahambolo polobadu te po wai,

‘Eno nago nosali ame nai waj dabebolo dwagi yai së
hasia elama, nosali augwaligo tigidali tqde bidibo
we bidi dabebolo dwagi yai së yaibao,’^j

Godigo te po wai. ²⁶Tama te së emai hagede, Godigo aga së ebo bidi sa munama, dabolo hasia tagala palali. Agai homugo dage tigidaligo dwai kolesaga tagalama, dage bugagia bidaibao,” Pitago te po wai.

Pita dali Jon si te kalabus elama, te kaunsil gesabide dolaluali po

4 ¹Te Pita dali Jon si te we bidibolo po ola mobadi, te pris bidi dabe dali, te Moni Lotu Be tempel genuai enesigi bidi kepten dali, te Juda dabe bidi sibi Sadyusi bage dali, augwali te bidi si pageba sabolali. ²Jisasgo tagala palai bidi sigo te we bidibolo te po wai, “Te Jisas isilama, ma hodaloai. Tibaso, dago koneagameo, te tigidali isibo we bidi ma hodaluibao,” te po wai. Tama te po baso, te genuai bidi dabe sëbë yali. ³Augwaligo te bidi side sëbë elama, nogo bono dunama, kalabus beba muai, piode, te do kigamu po tuq dodolainu. ⁴Tiali goli, augwali sigo po ola mabo po te odali we bidi te augwali hauwa mugo te po mu konealuali. Tama te bidi dabe nedelama, te namba hauwa mu 5,000 yali.

⁵Te sogo kigamu te Juda dabe genuai bidi dabe dali, te nogi elalubo monu dabe dali, te Juda dabego bomo yai po ola mabo bidi dabe dali, augwali Jerusalem buluba sisinagasali. ⁶Tama bidi dabe me sisinagasali, te pris bidi tuni bidi, te bidi nogi Anas, te bidi dali, aga hani bidi dabe Kaiafas dali, Jon dali, Aleksander dali, augwali tigidali sisinagasali. ⁷Tama te sisinagaselama, i olama, te Jisasgo tagala palai bidi si tomoba dolagasali. Augwaligo augwali sibolo te po hanalu wali, “Magi elama, dage sigo te sàgä dwai bidi ma dwagi yai ilaliwe? Mena bomogo aga dwagi yai ilaliwe? Mena nogigo te aga ma dwagi yai ilaliwe?” te po wai.

⁸Godigo Dwagi Yai Mobogo te Pita kolesaga pagana sayani. Te Pitago te po wei ponoyu te po wai, “Genuai bidi dabe, monu dabe, odao. ⁹Dadi

ⁱ 3:23 Bom 18:15, 18 ^j 3:25 Gag 22:18

sigo te səqə dwai bidi ma dwagi yai ilali baso, dagego da si po tū ebao.

¹⁰Tibaso, dage tigidaligo koneao, te Israel we bidi dabe tigidali me, dagego koneao, ede te səqə dwai bidi dolalubo, te Nasaret bidi Jisas Kraisgo nogi bomogo e bidi ma dwagi yai ilama, aga səqago dolalubo. Te bidi Jisas dagego ni pedaide elai bidi da. Tiali goli, Godigo aga gū pagede ma hodolai. ¹¹Te tiwai Godigo po buku tomode e po aseai elalubao,

‘Dage be sə ebo bidi dabego e masigi sela sayani.

Tiali goli, megı Godigo te masigibolo genuai nogi mawai.’^k

Te po page Jisasde po wali. ¹²Jisas deligo te da tqde bidi tau sabo te usu yaibao. Tigidali bulu Godigo da ma dobola sabo sa muani bidi me menio,” Pitago te po wai.

¹³Te Pita dali Jon sigo te po tama olama, wi meni baso, te Judago po tū ebo kaunsil bidi dabe noma sai. Augwaligo odai, te bidi si skulba pabe, olo bidi si naga dao, tama tibaso, augwali noma sai. Augwaligo te sogo koneai, te bidi si Jisas dali bidai dao. ¹⁴Tiali goli, te polobadu səqə dwai bidi agai te Pita dali Jon si pəde wiegi yai dolalubo suali. ¹⁵Sulama, te po magi ilama, aiyaba elalugobeo. Tama tibaso, augwaligo Pita de Jon sibolo “Gasa habuba dage si osogo piəo,” wali. Genuai bidi dabe augwa hasi tega si po dodolali. ¹⁶Augwa hasi te po hanalu wai, “Dago te bidi side magi sə yaibawe? Jerusalem tigidali we bidigo koneai, te dwagi yai bomai sə te bidi sigo yali, tama dago mena tama dualogo menio. ¹⁷Tiali goli, te po tigidali we bidi dabebolo pususu bilidali weyu, dago te bidi sibolo te po bomai mu wainao, ‘Dage sigo Jisasgo nogi munu ma pususu pigimio, we bidibolo,’ te tiwai po augwalibolo wainao,” augwaligo te po wai.

¹⁸Te po augwa hasi minama, augwaligo tega si i olama, dolagasali. Augwaligo po bomo elama, augwali sibolo wali, “Dago dage sibolo habu selebao. Dage sigo Jisas nogi ma gasa we bidibolo ola magio, agai po wagio,” te po wai. ¹⁹Tiali goli, Pita dali Jon si dolalubadi, te Pitago te po wei ponoyu te po wai, “Dadi sigo Godigo po tagalama, dagego po wali pobaso, Godigo gedude te dolo yaibawe? Duga digi gedugo dagaliəo.

²⁰Dadi sigo gedugo suali sə me, odali po me, te dago tagalogobeo,” te po wai. ²¹⁻²²Tama te kaunsil dabego me badu bomai sə yabo po tega sibolo ma wai. Tigidali we bidigo Godigo nogi uwabawa siyu bidali, agai bomogo te səqə dwai bidi dwagi yai ma ilai baso. Te bidi agai kibu be bidi si nogo səqə sese te 40 yia silai, tama aga da gesi bidi menio. Tama augwali sigo te səqə dwai bidi dwagi yai ma ilama, tama te we bidi tigidali Godigo nogi uwabawa sobaso, te kaunsilgo ‘Te bidi si dago mena tama elego menio,’ te homu yai. Tama te po olama, augwaligo te bidi si olo tagala palai.

^k 4:11 Tib 118:22

**Godigo po odama wali pabo bidi hanigo Godibolo
po pusubo bomo sai hagede hanalu wai po**

²³ Te kaunsil dabe augwaligo te Pita dali Jon si olo tagala palama, tega si augwa si haniba polo pai. Tama sabolama, te po pusa mani, te pris hani genuai bidi dabe dede, monu dabe dedego tamadi wali po. ²⁴ Tama te Godigo po odama wali pabo bidi hani augwaligo te po odama, augwali deli homu ebadi, Godibolo te po wai, “Genuai Bidi, dago sē Tolalubo Bidi, te dagalu dede, tq dede, te tamu qj dede, te augwali tomode bidibo nai tigidali me, nagaduba nigali. ²⁵ Dago wqj Devit, nago sē bidi, tebolo nago Dwagi Yai Mobogo po me deli e tama po wai. Te po obaso, Devitgo te po wai.

‘Gasa bidi hani magi baso moni sēbē yaliwe? Te bagego te sē usu isāwai, augwaligo magi baso hwīgi pabo homu yaliwe? ²⁶ Te tq genuai bidi dabe dali, te bidi tonalubo bidi dabe augwali deliba sisinagaselama, sisi yai, te God me, te Godigo sa muani bidi me, te side hwīabo homu yai,’¹

Devitgo te po wai. ²⁷ Tama te Devitgo polobadu wali po yaligia, augwaligo te sē tamadi yali. Te genuai bidi si, Herot dali, Pontias Pailat dali, e buluba sisinagasaki, te gasa bidi hani me, te Israel we bidi me. Augwaligo Jisas dali hwīabo homu yali, te nago dwagi yai tedali sē bidi, te bidi nago polobadu sa muai bidi. ²⁸ Polobadu nago bomogo me, nago homugo me, te po wai, ‘Augwaligo nosali te tigidali sē yaibao,’ wai. Tama tibaso, tamadi augwali sisinagaselama, te tigidali sē yali. ²⁹ Genuai Bidi, augwaligo da elabao po wai, te po nago odao. Da da, nago sē ebo bidi dabe da. Nago da bomo ilao, tama dago nago po pusubo wi egobeo. ³⁰ We bidigo nago bomo sumainao. Gasi ebo we bidi dwagi yai ma ilao. Da tagala palama, nago dolo sē ebo bidi agai nogide we bidigo polobadu susiāwai bomai sē emainao,’ augwaligo te po wai, Godibolo.

³¹ Te augwaligo Godibolo po olama, silibo si, te sisinagasaki bede tq mali yai. Godigo Dwagi Yai Mobo augwali kolesagaba asali, tama te sogo gagalama, Godigo po augwaligo pususu pai, wi ebe.

Godigo po wali pabo bidi augwali homu deli yali

³² Te bidi Jisas konealubo we bidi augwali homu deli, kolesaga deli elama, bugagia bidali. Bidi mego “Te nai ena naga dao” po me wabe. Augwali tigidaligo augwa doado bage dobolama, tigidali we bidi usu yai. ³³ Jisasgo tagala palai bidi dabego te po tigidali we bidibolo pusai, ‘Genuai Bidi Jisas gū pagede ma hodalualali,’ te po bomai mu. Godigo te

¹ 4:26 Tib 2:1-2

Jisas konealubo we bidi tigidalibolo moni dwagi yai sē yali. ³⁴ Augwali tomode me me nai te bage habuge menio. Be page bidigo, tq page bidigo me augwaligo te po wai, “Gasa bidigo e nai sabo homu ebaso da, abelagasarao.” ³⁵ Abelagaselama, page bidi dabego te masigi selama, te Jisasgo tagala palai bidi dabebolo mani. Augwaligo selama, te nai meni yai we bidi tigidalibolo dobayali.

³⁶ Te augwaligo te tobage sē ebadi, te bidi me deli bidali, agai nogi Josep. Augwaligo nogi me poai, te nogi Barnabas. Te nogi page, ‘Abagi pogo bidi tau sabo da.’ Agai hani nogi Livai, agai page bulu te Saiprus tqde, te tamu aji tomode elalubo tq dao. ³⁷Tama te bidi Barnabasgo agai tq me bidigo togwa menama, abelali. Abelama, Barnabasgo te mone ge dabe te Jisasgo tagala palai bidi dabebolo magasali, augwaligo dobamai hagede.

Ananaias dali Safaira side po

5 ¹Tiali, bidi me deli augwali dali bidali. Agai nogi Ananaias, agai wego nogi Safaira. Augwali sigo gasa kolesaga yali. Augwali sigo tq gasa bidi togwa menama, abelali. ²Tiali goli, te tqde sali mone bogea siyu, me badu augwali sigo dualali. Agai wego me te kolesaga koneai. Agai me badu masigi te Jisasgo tagala palai bidi augwalibolo magi pelama, te po wai, “Te tqde sali masigi tamanu dao.” ³Pitago agabolo te po wai, “Ananaias, magi baso Satango dwai kolesaga elama, nago te tq abelali masigi bogea siyu tama me badu dualama, te Godigo Dwagi Yai Mobobolo tibo po waliwe? ⁴Te tq polobadu te nago tq mu da. Te tqde magi sē yabo me naga homu naga da. Te tq me bidigo abelama, mone sabo me, te tiabo me naga homu naga da. Te tiali, nago mena homu elama, te mone me badu bogea sabo sē elama, tibo po waliwe? Nago bidi dabebolo naga tibo po wabe. Meni. Nago Godibolo tibo po wali,” Pitago te po wai. ⁵⁻⁶Ananaias te po odama, polo tama tqba degasa dulama, te aga polo tama isalio. Tama gesi ogwa bidi dabe aselama, augwaligo te bidi te nami uwg Wade belama, tolasa pelama, pubaligi pai. Tigidali we bidigo te yali sede po odama, wi mu yali.

⁷Te nosali nai po sel a wai madigi, Ananaias aga we te be tomoba asali, tiali agai aga bidi isali po agai odobe. ⁸Pitago agabolo hanalu wai, “Te tq abelali masigi, te tamanu dawe?” te po wai. Ananaiasgo wego te po wai, “Te tq abelali mone tamanu dao,” te po wai. ⁹Tiali goli, Pitago te po wai, “Magi baso dage sigo homugo te tibo po waliwe, te Godigo Dwagi Yai Mobo usu saliwe? Nago bidi pubulali bidi dabe tūba dolagasobo side, nage me tolasa paibao,” te po wai. ¹⁰Tama te we polo tama te bidi Pita sagā pagede degasa pelama, te aga isali. Te gesi ogwa bidi dabe te be tomoba asai. Augwaligo te we isai munalubo suali. Sulama, augwaligo te we tigi tolasa pelama, aga bidi muani madigi pubaligi pali. ¹¹Tigidali we

bidi Jisasgo po wali pabo bidi te po odali, tama augwaligo moni wi mu yalio. Te olo bidi dabego me sulama, wi mu yali.

Augwaligo bidi noma sabo së yali

¹² Te tibo sogo Jisasgo tagala palai bidi dabego te we bidi tomode augwaligo bomai së mu yalio, te bidi noma sabo së me. Tigidali bidi Jisasgo po wali pabo bidi Moni Lotu Be tempel beba sisinagasaki, sesemane sogo, te Solomongo Be Mabode. ¹³ Godigo po wali pisabo bidi augwaligo wi elama, te bagede nagulagasobeo. Tigidali we bidi augwaligo te po wai, “Te hani da, dwagi yai bidi dabe dao.” ¹⁴ Tama tialima, umabo we bidi augwaligo Jisasgo po wali pelama, tama augwaligo Genuai Bidigo haniba nagulagasalio. ¹⁵ Jisasgo tagala palai bidi dabego bomai së mu eboso, tigidali we bidigo augwa ama me, abe me gasi baso, gologobe wade munama, tü sesegeba selasa asali. Augwaligo homugo Pita te tü sesegedu biliyu, agai giligade bilibo noma te gasi yai bidi tigiba bogibaide ma dwagi yai ilimainu. ¹⁶ Jerusalem pâde bida bida pabo we bidigo gasi yai we bidi me, dwai mobo haubogo tuai we bidi me, Jisasgo tagala palai bidigo dwagi yai ma ilimaio olama, magasali. Tama augwali tigidali dwagi yai ma yali.

Jisasgo tagala palai bidi dabe augwali ensel mobo bidigo tau selama, kalabus bedu buluba tagala palai

¹⁷ Te side te pris hani toboli bidi dede, agai abagi solo dede, augwaligo lotu hani nogi Sadyusi, augwaligo te Jisasgo tagala palai bidi dabebolo dwai homu mu yali. Tigidali we bidigo te Jisasgo tagala palai bidi dabe dali dwagi yai homu eboso, te Sadyusi dabego moni sëbë elama, elainu yalio. ¹⁸ Augwaligo te Jisasgo tagala palai bidi dabe tulama, kalabus beba muani, dwai së ebo bidi dabe dali hodobo te kalabus beba muani. ¹⁹ Tiali goli, te hulide Godigo ensel bidi deligo te kalabus be tü dayagasali. Tü dayagasalama, te Jisasgo tagala palai bidi dabe buluba tagala palama, augwalibolo te po wai, ²⁰ “Te dage Moni Lotu Be tempel teba dolaligi pelama, we bidibolo te gesi kolesaga po tigidali ola mao,” te po wai. ²¹ Tama Jisasgo tagala palai bidi dabe augwaligo te po wali pelama, kigamu hulide te Moni Lotu Be tempel tomoba pelama, tigidali we bidibolo te po ola mabo gagalali.

Te pris toboli bidi dali, agai abagi solo dabe dali, augwaligo te Juda bidi monu dabe i olama, te kaunsilde moni po tü miainu yai. Augwali deliba sisinagaselama, augwaligo enesigi bidi dabe te kalabus beba tagala palama, “Te Jisasgo tagala palai bage eba odasa asao,” wali. ²² Tiali goli, augwali te kalabus beba sabolama, Jisasgo tagala palai bidi dabe te be tomode bidibo sube. Tama tibaso, te bidi dabe kaunsilba ma pelama, augwalibolo te po wai, ²³ “Te da te kalabus beba sabolama, dago suali, be

tū palialubo suali, te kalabus bidi tonalubo bidi dabe tonalubo suali, te be tūde. Tiali goli, te be tū dalama suali, te be tomode te bidi menio,” te po wai. ²⁴Tama te Moni Lotu Be tempel genuai enesigi bidi dali, te pris genuai bidi dabe dali, augwaligo te po odama, augwaligo moni homu yali. Augwaligo te po wai, “Te magi sə yaliwe?” ²⁵Bidi me deli te be tomoba aselama, agai augwalibolo te po wai, “Odao. Dagego kalabusiba muai bidi dabe, augwaligo te we bidibolo po ola mobao, te Moni Lotu Be tempel, tede dolalubo,” wali. ²⁶Tama te po obaso, te genuai enesigi bidi dali, agai enesigi bidi dabe dali, augwali pelama, Jisasgo tagala palai bidi dabe odasa asali. Augwali sesali sogo elebeo. Wi elama, augwaligo homugo “Dago te bidi dabe elebaso, te we bidigo masigi sənana, da elaibao,” te homu yai.

²⁷Augwaligo te bidi dabe te be tomoba dodoligi pali, te kaunsil dabe gesabide. Tede dolalubadi, te pris toboli bidigo augwalibolo te po wai, ²⁸“Te dago dagebolo Jisasgo po pusamuo olama, habu selai. Dagego homugo te da olo nai dao. Megi dagego tigidali we bidi Jerusalemde te Jisasgo po ola mawai. Dagego homugo dago Jisas elama, isilai,” agai te po wai.

²⁹Te tiali goli, Pita dali, me badu Jisasgo tagala palai bidi dabe, augwaligo te po wei ponoyu, te po wai, “Te dago dagego wali po wali pogobeo. Godigo dabolo mani genuai po mu dago wali paibao. ³⁰Dago wāj dabe augwaligo polobadu Godibolo lotu po wai dao. Tama dagego Jisas te ni pedaide neligo enama, isalio. Tiali goli, dago wājgo God, te Godigo digi Jisas ma hodolali. ³¹Tama Godigo selama, ogwaba pelama, Jisas te Godigo dolo nogo badu bidibo, moni nogi elalubaso. Tama tede bidibo, te we bidi toboli elalubo bidi da, te tau sabo bidi da, te Israel we bidi augwaligo homu begelama, Godigo augwaligo yali dwai sə dabe sela səmainu ebao. ³²Tama te Jisasgo polobadu yali sə te we bidigo konemai hagede, dago tede po sagwa mabo bidi dabe da. God agai po wali pabo we bidibolo te Dwagi Yai Mobo Bidi mabo da. Te Godigo Dwagi Yai Mobo Bidi me, te Jisasgo ebo sə konebo da, te səde po sagwa mabo dao,” Pitago te po wai.

³³Te kaunsil dabego Pitago po odama, moni səbə mu yali. Augwaligo homugo ‘Dago te Jisasgo tagala palai bidi dabe elaibao’ homu yai. ³⁴Tiali goli, bidi me deli augwali tomode bidali, te Juda dabego kaunsil bidi doligiluali te Farisi bidi sibi bidi, te bidi nogi Gamaliel. Te bidi agai Mosesgo bomo yai po pusubo bidi, tigidali we bidi augwaligo bugagia konemai hagede, tama te we bidigo te dwagi yai bidi mu augwaligo aga dali dwagi yai homu elama, te bidi nogi ugwaba sali. Te bidi Gamaliel te kaunsil tomode dolaluyu tama te po wali, “Te Jisasgo tagala palai bidi dabe gasa habuba osogo pomainao.” ³⁵Augwali teba pelama, agai te kaunsil dabebolo te po wai, “Dage Israel bidi, dagego te bagebolo ebo

sé dua yao.³⁶ Polobadu te bidi nogi Teudas dią holama, te po wali, ‘Ena genuai bidi mu dao.’ Tama bidi hauwa 400 aga wali pai. Tiali goli, gasa bidigo te bidi elebasso, aga wali pali bidi me badu wi pela silali, te agai sé silali.³⁷ Tama nosali te Galili tó bidi Judas, agai nogi sabi bidi dią holali, te gavmanigo we bidi nogi sabo side. Agai te homu yai tigidali bidi selama, gavmanide moni haqwa hwięba. Tiali goli, gavman bidigo enesigi bidigo aga elebasso, aga wali pali bidi wi pela silali. Tama te bidi si augwaligo yali sé tulolualu. ³⁸Tama megis Jisasgo tagala palai bidi dabede, dagego te dwai sé elamu. Olo bidimainao. Tama bidigo ebo sé dali kolesaga side sé eyu da, te polo sia saibao, tega sigo sé tuloluai tiwai.³⁹ Tiali goli, te sé Godigo bomogo ebo sé eyu da, teda dagego te sé aiyaba elalubo usu egobeo. Dagego ‘Te bidigo sé naga dao’ wagi sogo da, teda dage God dali hwj egi da,’ te bidi Gamaliel agai te po wai.

⁴⁰ Te kaunsil dabe augwali Gamalielgo wali po wali pali. Augwaligo Jisasgo tagala palai bidi dabe i olama, “Asao.” Augwaligo enesigi bidigo bigo elemainu, tama augwaligo bigo elali. Te kaunsil dabego augwalibolo te po wai, “Dagego Jisasgo nogide po munu ma pusulamu,” te po wai. Te po olama, augwaligo te bidi dabe olo tagala palali.⁴¹ Tega sigo te kaunsil be tagalama pali. Tama te kaunsil bagego elali goli, mu ma bugai homu yali. Tama augwaligo te homu yali, ‘Da Jisasgo po wali pobaso, Godigo usu da olama, da te bidigo gedude naga moni hale mu selama, Jisasgo sé tau sali,’ te homu yai.⁴² Tama te Moni Lotu Be tempel tede me, te we bidigo bede me, augwaligo sesemane sogo te Dwagi Yai Po te we bidibolo pusa mayu ola mani, te Jisas da, Godigo sa muai bidi Krais dao po wai.

Augwaligo te tagala palai bidi dabe tau sabo bidi a naga olama me badu nogo si bidi sa muani

6 ¹Te nosali Jisas wali pabo we bidi dabe genilama pedelali, dwasianu hani augwa hasi tomode wado po wali. Me hanigo te Grik po weyu, me hanigo te Hibrū po weyu yalio, te Juda dabego po mu dao. Tama te hani si da Juda bidi hani da. Tama te Grik po wabo Juda dabego te po wai, “Te dagego nai dobabo sogo, dago bidi isai we nai bugagia mabo meni, deli deli sogo mayu ebo,” te po wai. ²Tama te po obaso, te Jisasgo tagala palai bidi nogo si olama, saqago side, augwaligo Jisas wali pabo we bidi tigidali i olama, augwalibolo te po wai, “Odao. Te nai dobabo sego dago sé mu te aiyaba elalubo. Te dwali. Dago sé mu te Godigo po tigidali we bidibolo ola mabo sé dao. ³Tama tibaso, abagi dede, dagego bidi nogo a olama, me badu nogo si sao. Augwaligo te nai dobabo sé tonalumainao. Augwali Godigo Dwagi Yai Mobo Bidi augwalide bidibo bidi, dwagi yai kolesaga ebo bidi, te tobage bidi sao, te nai dobabo sé emainu yao. ⁴Tiali goli, dena te sé egobe. Da da, tigidali sogo Godibolo gedu haluasa po wabo sé dali, Godigo po pusa mabo sé dali, te sé si naga yaibao,” augwaligo te po wai.

⁵Te bidi Jisas wali pabo we bidi augwaligo te Jisasgo tagala palai bidi dabego po odama, “Usu da” wali. Tama tibaso, bidi dabe daj ilali. Hasia bidi agai nogi Stiven, te agai Godigo po mu daj olama odobo bidi dao, Godigo Dwagi Yai Mobo agai homude mu pagawai. Bidi mego nogi Filip, bidi mego nogi Prokorus, bidi mego nogi Nikanor, me Timon, me Parmenas, me Nikolas. Te bidi Nikolas, te agai page bulu Antiokdu asali. Polobadu agai te Juda dabego lotu po wabe, tama tamadi te Juda dabego lotu po agai wabo gagalali. ⁶Tama te Jisas wali pabo we bidigo te bidi a naga olama, me badu nogi si te Jisasgo tagala palai bidi dabego gesabide dodolalugi pali. Tiliama, Jisasgo tagala palai bidi dabego augwaligo nogi te bage tobolude munama, Godibolo po wai, agai augwaligo ebo se tau somai hagede. ⁷Tama tibaso, we bidi dabe hauwa augwaligo Godigo po odama, konealuali. Te Jerusalem hanude te Jisas wali pabo we bidi hauwa mu yali. Tama te pris bidi hauwa me augwaligo Jisasgo po wali pali.

Juda bidi dabe augwaligo Stiven po tų ela mawai

⁸Te Godigo te bidi Stivenbolo dwagi yai se elama, genuai bomo mu mani. Stivengo me me genuai bomai se yali, te we bidi noma sabo se tiwai me yali. ⁹Tiali goli, me badu bidigo te Stivengo ebo sede hagelabo homu yai. Polobadu augwali te mone ge sisabo olo se ebo bidi bidalio. Tama tomode te se tonalubo bidigo augwali olo tagala palali. Tama tibaso, augwaligo augwa Juda dabego bomo yai po ola mabo be nogi poai, Olo Tagala Palai Bidigo Be dao wali. Augwali da te Juda dabe da, te bulu sidu asali, te bulu si nogi me Sairini, me bulu nogi Aleksandria. Silisia bulu Juda bidi me, te Esia bulu Juda bidi me, augwali te olo tagala palai bidi dabe dali sisinagasali, Stivende augwaligo hwjai hagede gagalali. ¹⁰Tiali goli, Godigo Dwagi Yai Mobogo dwagi yai bomai po Stivenbolo mani. Tama menama, Stivengo wali po augwaligo aiyaba elalubo usubeo.

¹¹Tama tibaso, augwaligo me badu bidi abelama, te tibo po Stivende te po ola momainu, “Te Stivengo te Moses dali God dali te side dwai po wabo dago odali.” ¹²Augwaligo te se elama, te we bidi dabe dede, te genuai monu dabe dede, te Mosesgo bomo yai po ola mabo bidi dabe dede, augwali moni sebe yai, Stivende. Augwali pelama, Stiven nogo bono duasa aselama, te kaunsil gesabiba dolaluagasaki. ¹³Stivende tibo po wabo bidi dabe me augwali dolaluagasaki. Augwaligo te po wai, “Tigidali sogo te bidigo dwai po wabo bidi dao. Agai da dago dwagi yai Moni Lotu Be tempel dolobo dao, Mosesgo dwagi yai bomo yai po dolobo dao. ¹⁴Agai te po wabo dago odalio, ‘Te Nasaret bidi Jisasgo te Moni Lotu Be tempel dolaibao. Mosesgo polobadu dabolo mani po, te po Jisasgo ma hasegelaibao’ wali,” augwaligo te po wai. ¹⁵Tama olama, te kaunsil

dabe dali dualu tonalubo bidi dabe augwaligo Stiven bomona tonaluali. Augwaligo te bidi gesabidi suali da, te Godigo dagalude sē ebo ensel bidi gesabidi tiwai suali.

Stivengo kaunsilde pusali po

7 ¹Te pris tuni bidi agai Stivenbolo te po hanalu wai, “Nago te po wali mu dawe?” wali. ²Tama agai te po wei ponoyu te po wai, “Ama dede, aya dede, dagego eno po odao. Dago wāj mu Abraham aga te Mesopotemia tqde bidibadi, te Haran tqba pisabantu yaide, te sogode God aga pageba asai. God da, te genuai dwagi yai bomo mu elalubo God dao. ³Tama aselama, Godigo agabolo te po wai, ‘Nage naga bulu taga pelama, naga hani dabe taga pelama, gasa buluba pao, te bulu nage eno ola mawaibao,’ te po wai.” ⁴Tama te po obaso, Abraham te Kaldia tq taga pelama, te Haran tqba bidigi pali. Tede Abraham aga aya isali. Isilama, Godigo aga te Haran tqdu tagala palama, e tqba da megi Israel da bidibo tqba asali. ⁵Tama te sogode Godigo dwasianu tq me deli agabolo mabe, te agai tq tiwai elalumainu ebeo, te menio. Tiali goli, Godigo agabolo bodolu mayu, te po wai, ‘Nosali te tq eno nagebolo mawaibao, te nago hani wai dabe augwaligo te tq aya mu elama, tonaluibaob,’ te po wai. Tiali goli, Godigo te po mu wali sogode, Abrahamgo wai menibadi dao. ⁶Godigo agabolo te po me wai, ‘Naga hani wai te augwali gasa bulu me delide bidaibao. Tede bidibadi, augwaligo gasa bidigo sē olo ebo bidi dabe gagawaibao. Te sē tonalubo bidi dabego augwalibolo dwai sē mawaibao, te kibu be hauwa 400 tueibao. ⁷Tiali goli, eno nosali te sē tonalubo bidi dabe dene mawaibao,’ Godigo te po wai, ‘Nago hani te tq taga pelama, e tqba aselama, enabolo lotu po waibao,’ Godigo te po wai.””ⁿ

⁸“Tama te po olama, Godigo Abrahambolo po me ola mayu, te po wai, ‘Te nage dali nago hani dali, dagego ogwa dabe ame nabo si, te Sarere deli bidama, te augwaligo tigide dagego dāj ilibō sē eyu, te tigi wali togwao. Tama te dāj togobo te Godigo mani bodolu po koneaibao,’ wali. Tiliama, nosali Abrahamgo wego wai ame nani. Te wai nogi Aisak. Sarere deli bidama, te wai aga ayago te waigo tigiwali togwali. Tiliama, nosali mu Aisakgo we sali. Agai aga ogwa Jekop agai te yali sē tiwai yalio. Tama Jekop me aga genuai elama, agai te yali sē tiwai yali. Agai ogwa nogi si olama, saqā badu si wagi soali bage ame nenama, agai augwali tigidalibolo te yali sē tiwai yali. Te bidi dabe da Israel bidigo wāj dabe dao,” Stivengo te po wai.

⁹Te bidi Stivengo po ma ola mayu te po wai, “Te dago wāj nogi si olama, saqā badu deli wagi soali bage augwa amanu Josep delibolo aga ama dedego aga dali sēbē yali, dwai homu yali. Augwaligo Josep nogogo

^m 7:3 Gag 12:1 ⁿ 7:7 Gag 15:13-14

tulama, gasa bidi hanibolo menama, mone ge sali, aga Isip tqde gasa bidigo olo sə ebo bidi emainu yai. Tiali goli, Godigo aga tagalobeo.^o

¹⁰Tama Godigo aga tonaluali, me me səgə pedalobaso, Godigo aga tau selama, bugagia bidali. Te Isip tq genuai tuni bidi, tama Josep te Isip tq genuai tuni bidi gesabiba pelama, tama Godigo aga tau selama, Josepgo dwagi yai kolesaga ebo te tuni bidigo sulama, aga dwagi yai bidi dao, te tuni bidigo agade te homu yai. Tama tibaso, tuni bidigo Josep te Isip tq genuai gavman bidi nigelama, bidalio. ‘Tigidali me me sə nago naga tonaluao, eno bede me,’ Isip tuni bidigo te po wali.”

¹¹“Te me sogo tigidali bulude nasi yali, Isip tq me, Kenan tq me, augwali tigidali nasigo mu dolalio. Dago wəi Israel hani, augwaligo nai me gegelama, tubeo.^p ¹²Tama tibaso, Jekopgo te Isipde te tubo nai elalubo po odama, tama agai ogwa dabe, dago wəi dabe, agai augwali tagala palali, Isip buluba hasia sogo mu nai sigi pai, te augwa buluba ma pali. ¹³Tama nosali Isip buluba ma pelama, te sogo Josepgo agai ama dedebolo ‘Ena da Josep dao’ wali. ¹⁴Te sogo me Isip tuni bidigo agai me Josepgo hani koneai dao. Tama Josepgo aga ama dedebolo po walio, ‘Dage pelama, dago aya Jekop aga hani tigidali odasa aselama, da Isip bulude bidaibao.’ Tama te hani we bidi hauwa mu 75 bidali. ¹⁵Tama tibaso, Jekop dede dago wəi hani tigidali te sogo Isipba asali. Aga monu dabe bidiyu, tede isai. Nosali dago wəi dabe me augwali tede isai. ¹⁶Isilama, tama bidi dabego augwaligo tigi sela pelama, Sekem buluba pubaligi pali. Polobadu Abrahamgo te tq Hamor bidi hanide masigigo abelai tq,” Stivengo te po wai.

¹⁷Te bidi Stivengo po ma ola mayu, te po wai, “Tama dago hani Israel bidi hauwa mu Isip bulude bidali. Tama te sogo Godigo polobadu Abrahambolo wali po Isip bulu taga soaibao wali po pəde yagasalio.

¹⁸Tama te sogo Isip bulu tonalubo genuai bidi deli pedalama, tama agai te Josepgo polobadu mu yali sə konebe. ¹⁹Tama te bidigo dago wəi dabe mumuwani. Dago wəi dabebolo dene mawai. Tama agai augwalibolo te po wai, ‘Dagego we dabe sibigo wai ame nobaso da, dagego te wai dabe digibulu mu olo mugi pao.’ Agai homugo, ‘Te isimainao,’ te homu yali.

²⁰Tama olama, te side Moses ame neyu, tama aga te sawi yai wai mu yai. Tama aga idago bede ame modubadi, polua sela silali.^q ²¹Tama aga idago genuai bidigo po wali pelama, tama Moses buluba mugi pali. Tede munama, tama Isip genuai tuni bidigo wegi agai asama, suali. Tama agai te wai Moses negelama, aga wai mu tiwai əq yalio. ²²Tama nosali Isip bidi dabego ebo kolesaga page augwaligo Mosesbolo ola mani. Moses genuai yali, agai sə dabe, po dabe bomai po mu augwalibolo manio,” Stivengo te po wai.

^o 7:9 Gag 37:11, 28; 39:2, 21 ^p 7:11 Gag 42:1-2 ^q 7:20 Sai 2:2

²³ Te bidi Stivengo po ma ola mayu, te po wai, “Te bidi Mosesgo kibu be te 40 yia olama silibo si, agai homugo aga Israel hani bidi sugi paiba homu yali. ²⁴ Tama sugi pelama, sabolama, te Isip bidi me deligo Israel bidi me elebo suali. Tama tibaso, agai aga abagi tau sali. Tau selama, tama Isip bidi me deli agai wei ponoyu, ela muai. ²⁵ (Agai homugo eno hani augwaligo koneaibao, te Godigo ena sa muai, te eno augwali te Isip bidi boi bidi dabego nogode tagala pomainu yali. Tiali goli, augwaligo te sē konebe.) ²⁶ Do agai Israel bidi si hwībo suali. Sulama, agai pedegelebo si, ‘Abagi, odao. Dage si da, ama name si dao. Duga si hwīnamuo,’ wali. ²⁷ Tiali goli, te bidi mebolo dwai sē ebo bidigo Moses nogogo dega palali, Mosesbolo te po wai, ‘Nage te da tonalubo bidi menio. Nage da dabolo po tū dodolabo bidi menio. ²⁸ Te Isip bidi nago do elali tiwai, megi nago ena elai hagede ebawē?’ te po hanalu wali. ²⁹ Mosesgo te po odama, wi elama, aga te Isip bulu tagalama, digibulu pelama, te Midian tōba bidigi pai. Tede bidibadi, we selama, ogwa si ame nai,” Stivengo te po wai.

³⁰ Te kaunsil dabebole Stivengo po me ola mayu, te po wai, “Te Moses aga te bidi meni yai bulude bidibadi, te Sainai bulu du pāde, te kibu be te 40 yia olama silali. Tede Godigo dagalude sē ebo ensel bidi me deli dwasianu ni tomode isi dabo digi bididuali, te Mosesgo suali. ³¹ Te bidi Mosesgo tama tebo sē ebo sulama, aga homu hauwa tuā pelama, noma salio. Aga te ni page pāba pelama, bugagia tonama sueinu yali. Tiali goli, agai Godigo po wabo odali, te po wai, ‘Ena da God dao. ³² Ena naga wāj noq̄ dabe dedego God dao. Tama te bidi Abraham dede, Aisak dede, Jekop dede, naga wāj solo augwaligo enabolo lotu po wai dao.’ Mosesgo te po odama, wi mu elama, didibili yali. Tama agai te homu yali, ‘Eno te nai ma tonalogobeo.’ ³³ Genuai Bidigo agabolo te po wai, ‘Nago sāq̄ nadoba diā muao. Magi basowe, ena ede bidibaso, nage te dolalubo tō mu dwagi yai tedali elalubo tō dao. ³⁴ Eno we bidi dabego moni sēgē mu sabo te eno suali, te Isip bulude. Augwaligo gela wabo eno odalio, ē wabo me. Tama megi eno te sēgē sela sāwai hagede assali. Megi nage eno te Isip buluba tagala palobao,’ Godigo te po wai, Mosesbolo,” Stivengo te po wai.

³⁵ Stivengo te po me wali, “Te Mosesgo aga Israel bidi hani augwaligo polobadu aga sela sāwai, agabolo te po wai, ‘Nage da, da tonalubo bidi menio. Nage da dabolo po tū dodolabo bidi menio.’ Tiali goli, te bidi Godigo aga augwali tonalumainogo eyu sa muai bidi, augwali te boi bidi nogode dagala sānama, Godigo aga te sē emai hagede sa muai. Te sogo Godigo dagalude sē ebo ensel bidigo te po Mosesbolo pusa mawai, te isi dabo dwasianu nide. ³⁶ Moses te Isip bulu nosali taga pelama, polasa peyu, te tigidali Israel we bidi nosali aga wali asalio. Tama te Isip bulude me, te mama tamu aq̄ sesegede me, te bidi meni yai bulude me, tede bidi noma sabo bomai sē mu hauwa yali. E sē dabe edubadi, kibu be bidi noga sāq̄ sese si 40 yia silali. ³⁷ Te bidi Moses agai tigidali Israel we bidibolo

te po wai, ‘Godigo te po pusabo bidi me deli dagebolo tagala palaibao, ena tiwai. Te bidi duga hani bidi digi dao,’ te po wai.^r ³⁸Te bidi Moses aga polobadu te Israel we bidi hodobo sisinani, bidi meni yai bulude. Aga dago waj dabe dali bidibadi, tama aga Godigo dagalude se ebo ensel bidigo Sainai bulu bagede po miai. Tama Mosesgo Godigo po sai, te po mu bomai po mu, polo sia sogobeo. Te po dago wajigo uwabola mayu, ola mayu, ela pomai hagede, dabolo momainu yali. ³⁹Tiali goli, dago wajigo Mosesgo po sela sawai. Augwaligo aga dega palai. Dega pelama, augwaligo te homu yai, ‘Da Isip buluba ma paio,’ te po homu yai. ⁴⁰Tama tibaso, Moses te bulu du bagede bidibadi yaide, augwali Moses aga ama gomunai bidi pageba sabolali, te bidi nogi Aron. Augwaligo agabolo te po wai, ‘Aron, Moses magi yaliwe? Da Isip bulu tagala aselama, agai da bugagia odasa asai. Tiali goli, megis aga paliwe, isaliwe, te dago konebeo. Aron, nago po olama, bidi dabego te gasagi yai nai dabe nigelama, dago sulama, te naibolo dago lotu po waibao, God tiwai. Te naigo da bugagia polasa gegasa bilimai yaibao,’ augwaligo te po wai.”

⁴¹“Augwaligo te po olama, te sogo augwaligo bulmakau kibu wai tiwai nai me deli nigli, te augwaligo tibo god. Tama nigelama, augwaligo hasa dabe elama, te tibo godibolo lotu po olama, nai ula mani. Augwaligo moni kibu da tiwai tuali, augwa nogogo nigai nai sulama, dwagi yai homu elama, moni nai kibu da tiwai tuali. ⁴²Tialima, te se eboso, Godigo augwali tudiba ililio. Godigo augwali tagalama, ‘Giliga dede, polua dede, ho dede, te naibolo lotu po emainao,’ Godigo te homu elama, sula tagalali. Augwaligo te se yai hagede, Godigo po pusubo bidi dabego te po nosali aşeanı,

‘Godigo te po wai, “Dage Israel we bidi odio. Dage te bidi meni yai bulude bilidubadi, kibu be bidi si nogi saçə sese silali. Tama te sogode dagego hasa hauwa mu elama, lotu po olama, dagego enabolo te lotu po wabe. ⁴³Te tibo god nogi Molek agai ugwa be naga dagego tolasa bilu, te dagego tibo god nogi Refan agai ho noma me tolasa bilali. Augwali si naga te dagego nogogo nigai nai da, augwalibolo lotu po omainu yali. Tama tibaso, eno dage digibulu Babilon bulu tudiba tagala palaibao,” Godigo te po wai,’ ”^s

Stivengo wali.

⁴⁴Te bidi Stivengo te kaunsil dabebolo te po me badu ma wadolama, pusai, “Te polobadu dago waj dabe te bidi meni yai bulude bidali. Te bulude bidibadi, Godigo Mosesbolo ‘Te ugwa be tama tiwai se yao,’ po

^r 7:37 Bom 8:15, 18 ^s 7:43 Amo 5:25-27

ola mawai. Augwaligo te ugwa be te tiwai tama sē yani, te God augwali dali hodobo bidibo ola mawai hagede.⁴⁵ Nosali dago wāj augwa ogwago te ugwa be selama, te tobulu bidi Josua wali pelama, gasa hanigo tō sali. Godigo augwali tau selama, te tō sai. Tama te ugwa be tede elalubadi, genuai bidi Devit bidibo sogo te be me elaluali.⁴⁶ Tama Devit agai Godigo bidabo mobo dwagi yai sali. Tama Devitgo agai Godibolo hanalu weyu, te po wali, ‘Eno homugo nage bidabo lotu be sē yagawé?’ olama, hanalu wali. ‘Nage God mu dao, eno wāj Jekopgo nageba lotu po wai dao,’ te po wai.⁴⁷ Tiali goli, nosali Devit aga ogwa Solomon agai Godigo be sē yai dao.”^t

⁴⁸ Te Stivengo te po me wai, “Te tiali goli, God Genuai Bidi mu dao, te bidi dabego nogogo nigai bede bidigobeo. Tama te koneama, Godigo po pusa mabo bidigo polobadu te po aṣeai,

⁴⁹ ‘Te Godigo te po wai, “Te eno tigidali bulu tonalubaso, te dagalu da, te eno dugulalubo ni nami sia tiwai dao, te tō da eno sāgāgo diānalalubo ni nami tiwai dao. Dagego magi be enabolo sē yaibawé? Ena dulalu toma tuabo be menawé?⁵⁰ Ena digi te tigidali nai nigai dao, te dagalu me, tō me ena digi nigai dao. Dagego ena bidabo be sē ebo usu egobeo,” ^{“u}

Godigo te po wai.”

⁵¹ Te bidi Stivengo te kaunsil dabebolo te po ma wai, “Dage da te po sela sābo bidi dabe dao. Dagego kolesaga da, Godigo po odisābo bidigo kolesaga tiwai dao. Dagego Godigo Dwagi Yai Mobogo po tigidali sogo sela sābo dao. Polobadu duga wāj dabego po sela sāyani tiwai megi dagego te tibao.⁵² Polobadu duga wāj dabe augwaligo Godigo dwagi yai po pusa mabo bidi dabe tigidali ela silali. Me deli bidibawé? Mu menio. Polobadu mu Godigo dwagi yai po odasa pabo bidi dabe augwaligo te po wai, ‘Nosali God agai dwagi yai dolo sē ebo bidi asaibao.’ Tialima, duga wāj dabe augwaligo te po odasa pabo bidi dabe ela muani. Megi tama dagego te Godigo dwagi yai dolo sē ebo bidi ela muai.⁵³ Godigo dagalude sē ebo bidi ensel augwaligo Godigo bomo yai po dugabolo pusa mawai. Tiali goli, te po duga wali pabe dao,” Stivengo te po wai.

Augwaligo Stiven masigigo ela muani

⁵⁴ Te Stivengo te kaunsil dabebolo te po odubadi, augwaligo guni bulama, sēbē ebaso, augwa kele halua tuali, agade.⁵⁵ Tiali goli, Godigo Dwagi Yai Mobo Bidi aga homu kolesagade pagā yanio. Tama agai ugwaba dagaluba tonalubadi, Godigo dwagi yai ula suali. Tama agai

^t 7:47 1 Kin 6:1-38; 2 Sto 3:1-17 ^{“u} 7:50 Ais 66:1-2

suali, Jisas te Godigo dolo nogode dolalubo suali. ⁵⁶ Stivengo te po wai, “Sua. Eno megi suba, dagalu dalalubo. Tama tede Godigo Bidi Mu megi Godigo dolo nogo badude dolalubo eno subao,” te po wai. ⁵⁷ Tama augwa nogogo olo palia sali, tama moni i wali, augwaligo te po odidali weyu. Augwali tigidali aga pageba polo sisinani. ⁵⁸ Nogogo tulama, moni be nani bogoba sela sayani. Tede augwaligo masigi dabe Stiven tigiba sayani, aga ela mumainu eyu yali. Te kaunsilde tibo po wali bidi dabe augwa bulubo ugwa dabe osogo diani, te masigi dabe bugagia sāmainu eyu, te Stiven tigiba. Te gesi bidi deli, agai nogi Sol, aga pageba te ugwa dabe augwaligo muani. ⁵⁹ Augwaligo Stiven tigiba masigi sābo sē ebadi, Stivengo te Godibolo te po wai, “Jisas, Genuai Bidi, nago eno mobo megi sao,” te po wai. ⁶⁰ Aga kidu sugunama, agai Godibolo i bomo elama, te po wai, “Genuai Bidi, nago augwaligo te enabolo ebo dwai sē segē nago sela sāyao,” te po wai. Te po olama, aga isai. 8:1a Tama te bidi Sol agai augwaligo Stiven ela mubo sulama, Sol agai te sēde usu da wali.

Te bidi Sol me te bidi dabe augwaligo te Jisas wali pabo we bidi elali

8 ¹ Te sogo, Stiven isali sogode, augwaligo Jisas wali pabo we bidi elebo sē gagalali, te Jerusalemdē. Te tebo sē genuagi mu yali. Tama Jisas wali pabo we bidi tigidali te Judia tq, Samaria tq te bulu siba wi tedela pali. Tiali goli, te Jisasgo tagala palai bidi dabe wi pabe. ² Tama Jisas wali bugagia pabo bidi me badu augwaligo moni homu dene mu elama, diligi aselama, moni gela olama, Stiven pubaligi pali. ³ Tiali goli, Sol agai homugo te Jisas wali pabo we bidi tigidali eno ela silaibao, te homu yai. Tama agai te be deli deliba pelama, Jisasgo po wali pabo we bidi tigidali naga agai augwali nogo aligabo dunama, kalabus beba mugi pali, we dabe me, bidi dabe me.

**Te tagala palali bidi aposel augwaligo Jisasgo po te Judia
tqde me Samaria tqde me pusa mawai**

(Dqī 8:4–12:25)

Augwaligo Samaria bulude Godigo po pusubo sē yali

⁴ Te Jisas wali pabo we bidi augwali wi pelama, tigidali buluba tedela pelama, bidada pali. Tede augwaligo Jisasgo po pusa mani. ⁵ Me bidi nogi Filip, agai te Samaria buluba dulama, tama agai te we bidi dabebolo te po wai, “Te Jisas da, Godigo we bidi tau somainu sa muai bidi Krais dao,” te po wai. ⁶ We bidi hauwa augwaligo Filipgo po bugagia odali. Augwaligo agai wali po odama, agai we bidi noma sabo bomai sē ebo me suali. ⁷ Tama dwai haubo mobo dabe we bidi hauwa tudi badu polobadu aselama, dagā yagaselama elalu tede bidibadi, tama Filipgo po obaso, te

dwai mobo haubo dabe te we bidide bidali taga peyu, moni hwā mu wai. Me badu sagā isai we bidi Filipgo ma dwagi yai ilali, sagā dwai we bidi me. ⁸Tama tibaso, te Samaria dabe bugai homu mu yali.

⁹Te Samaria bulude te bidi me deli nogi Saimon bidali. Agai tede bobobage sogo bidu, dwai pobi wabo sē elama, te Samaria we bidi noma mu sabo sē yali. Agai te po wai, “Ena da, genuai bidi mu dao,” po wali. ¹⁰Samaria we bidi tigidali, te genuai bidi me, te olo we bidi me, augwaligo Saimongo wali po bugagia odali. Tama augwaligo te bidi nogi weyu, “Te bidi agai Godigo mawai bomo gagawai mu elalubao,” wali. Augwaligo “Te bomo nogi Genuai Bomo te bidide elalubo dao,” wali. ¹¹Bobobage sogo te bidi agai pobi wabo pogo te we bidi dabe noma sobaso, augwaligo agai po wabo bugagia olo munama, odalio.

¹²Tiali goli, Filipgo te Godigo we bidi tonalubo sēde dwagi yai po olama, te we bidibolo te Jisas Kraisde po me wali. Tama te po odama, te we bidi augwaligo te poba augwa homu tigidali munama, Filipgo augwali baptais mani, we dabe sibi me, bidi dabe me. ¹³Saimongo te Filipgo poba aga homu munama, tama Filipgo aga baptais mawai. Tama baptais menama, tama te Saimon te Filip wali pai. Agai te Filipgo we bidi noma sabo bomai sē mu ebo sulama, agai noma sai.

¹⁴Te Samaria we bidigo Godigo po bugagia odobo po te Jisasgo tagala palai bidi dabego odali, Jerusalemde. Tama tibaso, augwaligo Pita dali Jon si te Samaria we bidi pageba tagala palai. ¹⁵Te bidi si sabolama, augwali sigo Godibolo po hanalu wali, te we bidi augwaligo Godigo Dwagi Yai Mōbō Bidi somainu yali. Godigo Dwagi Yai Mōbō Bidi augwaliba polobadu asobeo. ¹⁶Tama tega augwali sigo koneai, augwaligo Jisasgo nogide naga baptais sai dao. ¹⁷Tama tibaso, Pita dali Jon sigo Godibolo po hanalu wali, Godigo Dwagi Yai Mōbō augwaligo homuba asomai hagede. Tama augwali sigo nogo te tigidali we bidi toboluba muani. Augwali Jisasgo hani tama tibo sogo augwaligo Godigo Dwagi Yai Mōbō Bidi sali.

¹⁸Te tama tibo sogo, te bidi Saimon agai Jisasgo tagala palai bidi sigo tigidali we bidi toboluba nogo mubo suali, tama Godigo Dwagi Yai Mōbō Bidi augwaliba asali. Agai masigi selasa asama, tega side te bomo abelai hagede yali, ¹⁹te po wai, “Te mone ge sao. Eno homugo te eno te Godigo Mōbō Bidi sabo bomo dage side eno abelaibao. Tama eno me we bidi toboluba nogo munama, augwaligo Godigo Dwagi Yai Mōbō Bidi saibao,” te po wai. ²⁰Tiali goli, Pitago te po wei ponoyu, te po wai, “Te Godigo olo mabo bomo te nago masigigo abelai hagede, nage dali nago masigi dali si te moni isiba paibao. ²¹Godigo gedude nago homu dolo meni baso, te nage da dali te sēde me bidigobeo. ²²Tama te dwai sē ebo homu begelao. Begelama, tudiba muao. Tama nago Godibolo gedu haluasa po wao, agai nago te kolesaga ebo sela sāmainu yao. ²³Eno nago homu sualio. Nago

e sę pesabo kolesagago nago homu dolo mu menio. Tama nago homu damua pabo homu tiwai elalubo. Naga dwai kolesaga ebogo nago dwagi yai kolesaga yaga wali kalabus elalubo,” Pitago te po wai.

²⁴ Te bidi Saimon agai Pita dali Jon sibolo te po wai, “Dage sigo Genuai Bidibolo po wao, ena tau somainu, nago wali po ena pageba aselama, ena dolidali,” te po wai.

²⁵ Te Pita dali Jon dali sigo augwalibolo te Godigo sę yai po pusa menama, te Genuai Bidigo po me olama, augwali si Jerusalemba ma geasa pali. Tama tomode augwali si peyu, Godigo dwagi yai po te Samaria bulu hauwade pususu pali.

Filipgo te Itiopia bidibolo Godigo bukude elalubo po pusali

²⁶ Te Godigo ensel bidi me deligo Filipbolo te po wai, “Nage sisi elama, te saut eba pedai badu soao, te Jerusalem pabo tų tagalama, te bulu nogi Gasa teba pabo tuba pao,” te po wai. Te pabo tų te kemi tą naga bega palai elalubo bulu da. Te sunumi te bidi meni yai badu elalubao. Tama tibaso, Filip aga sisi elama, polo pali. ²⁷⁻²⁸ Tama te tudu te Itiopia bulu kantri moni nogi yai bidi me deli te hos dabego kegebo karis nai tedu asali. Tama te bidi agai Itiopia genuai gavman we kwin Kandasigo masigi tonalubo sę ebo toboli bidi dao. Te bidi aga tigide nai domoge diaşawai bidi da. Te bidi aga Jerusalemba Godigo po odagasai. Tama megı aga buluba ma pai hagede, kibu hosgo kegebo bidi dulalubo karisde bidibo. Tama agai pobadi, Godigo polobadu po pusa mani bidi Aisaiago aşeai po elalubo buku agai nedada pali. ²⁹ Tama Godigo Dwagi Yai Mobo Bidigo te Filipbolo te po wai, “Nage te kibu hos kegasa pabo te bidi dulalubo karis paba pelama, bidao.” ³⁰ Tialima te bidi Filip udulama, paba pali. Te bidigo te Godigo po pusa mani bidi Aisaiago po aşeai buku nedada pabo odali. Tama agai hanalu wali, “Nage te nedebi po page nago koneaniwe?” wali. ³¹ Tama te gavman bidigo te po wei ponai, “Tama tiali bidigo enabolo te po page ola masiqyu da, eno konegobeo. Tama nage te karisba holama, ena dalì dugayagasa,” te po wali.

³² Te bidigo te bukude nedebi po Filipgo koneama, tama dao, te po wai,

“Augwaligo te kibu sipsip elai hagede, sela pabo sogo hwa wabo menio. Te tiwai te bidi agai hwa wabe. Augwaligo te kibu sipsip wai selama, nisi togwai hagede baso, te kibu sipsip wai dabe hwa wabo menio. Te tiwai te bidi agai hwa wabe. Agai po me wabe. ³³ Augwaligo te bidi hale manio.

Augwaligo agabolo dolo yai po tų ela mabe. Tama augwaligo aga elama, isilali. Tama tibaso, me bidigo agai hani sibide po wagobeo, agai bidi hani sibi

sia salio,"^v
te po aseai.

³⁴ Te Itiopia bulu gavman bidi agai Filipbolo te po wai, "Te bidi Aisaia aga homugo te po aga digide waliwe, ma mena bidide waliwe? Te po page enabolo wao." ³⁵ Filipgo agabolo te aga bukude nedali po page bugagia pusa mobadi, tama agai Jisasde dwagi yai po agabolo pusa manio. ³⁶ Tama augwali si te tħudu pobadi, te gavman bidigo aq sulama, te po wali, "Te aq ede elalubo. Ena magi baso baptais sogobewe?" te po wai. ³⁷ Filipgo agabolo te po wai, "Jisasba nago homu kolesaga tigidali agaba muyu da, teda eno nage baptais mawaiba," te po wai. Te bidigo te po wai, "Eno te Jisas Krais da te Godigo ogwa eno mu konealubo homu ebao." ³⁸ Tama te gavman bidigo i olama, te po wai, te kibu hos kekasa pabo sai guni tolasa pabo bidibolo, "Tama dolaluao," wali. Augwali si tqba dulama, tama aq tomoba pelama, tama Filipgo aga baptais mawai. ³⁹ Augwali si te aq taga solama, buluba hola sobadi, Godigo Dwagi Yai Mobo Bidigo Filip polo te gasa buluba selasa pali. Tama te gavman bidigo aga ma sube. Tama aga buluba pabo tħudu peyu, bugai homu yali. ⁴⁰ Filip te Asdot buluba polo sabolali. Agai te Asdot bulu taga pelama, te be nani tigidali bilama, Godigo gesi dwagi yai po pususu bilali, te Sisaria be naniba sabolali.

Te bidi Sol aga homu begelama, Godigo po wali pabo po

9 ¹ Te bidi Filip te be nani tigidali bilibadi, tama te bidi Sol agai moni po dagħ weyu, te po wai, "Jisasgo hani eno ela silaibao," wai. Tama aga te pris hani tuni bidi pageba pelama, te po hanalu wali, ² "Nago enabolo pas aseña mao. Te pas selama, ena Damaskus be naniba pelama, tede Juda dabego bomo yai po ola mabo be genuai bidi dabebole te pas mawaibao. Eno te Jisas wali pabo we bidi subaso da, nogo dħlama, tama te genuai bidi dabego 'Usu da' waibao. Te we bidi eno Jerusalemba ma odasa aselama, kalabusiba muaibao," te po wai.

³ Te pas selama, Sol te Damaskus pabo tħudu pobadi yaide, pħaba sabaligi pobadi, te dagaludu ula polo dulama, te Sol bologobeja sali. ⁴ Tama Sol aga tqba tulaluali. Tama agai bidi me deligo pedauwalidu po weyu, te tama po wabo odali, "Sol, Sol, nago ena magi baso dolobo sè ebawé?" te po wai. ⁵ Solgo te po hanalu wali, "Genuai Bidi, nage de dawe?" "Ena da Jisas da, nago ena dolobo sè ebo bidi da," agai te po wai. ⁶ "Megi nage hogodama, Damaskus hanu tomoba pao. Tama bidi me deligo agai te nago sè yabo po ola mawaibao," te po wai.

⁷ Te bidi Sol dali pali bidi dabe augwali dwai midigi selama, augwali te tħude po me wasiäma sagħiġa dodolaluali. Augwaligo te bidigo

^v 8:33 Ais 53:7-8

pedauwalidu po wabo odali, tiali goli, augwaligo bidi me sube.⁸ Tama te bidi Sol agai sagago doligiluali. Agai gedu si pedama, suali, agai gedu tigidali hulia sai elaluali. Tama tibaso, augwaligo nogo tulasa pelama, Damaskus be nani tomoba pali.

⁹ Te sela sogo agai gedu me hulia sai elaluali. Tama te sela sogo agai nai me aj me tube.

¹⁰ Te Damaskus bulude bidi me deli Jisas wali pabo bidi bidali, agai nagi Ananaias. Aga bidibadi, na gagawai yali. Tama te na ebadi, Genuai Bidi aga aselama, aga nagi wai. Tama Ananaiasgo te po wei ponoyu te po wai, “Genuai Bidi, ena da ede bidibao.” ¹¹ Genuai Bidigo agabolo te po wai, “Nage hogodama, pelama, te augwaligo doloba pai nagi wabo tüba pao, Judasgo beba sugi pao. Nago tede hanalu wao, ‘Tarsus bulu bidi Sol tede bidibowe?’ wao. ¹² Te bidi agai enabolo gedu haluasa po weyu, te bidibao. Tama Sol agai me na gagawai mu yali. Tama agai nage suali, te nage agai pageba asobo suali. Nago nogogo agai toboluba muani, agai gedu ma wiegi yai ilimainu ebo, te suali,” Genuai Bidigo te po wai, Ananaiasbolo.

¹³ Tama Ananaiasgo te po wai, “Genuai Bidi, hauwa we bidigo enabolo te bidigo Jerusalemdé nago po wali pabo hani we bidi dwai së mu ebo bidi dao po enabolo pusai dao. ¹⁴ Tama te pris tobulu bidi dabe augwaligo agabolo pas aseña manio, te aga Damaskus aselama, te agai nago nagi wabo we bidi da kalabusiba muainu,” te po wai. ¹⁵ Tama Genuai Bidigo agabolo te po wai, “Nage pao, eno aga daj i libaso, agai eno së yaibao. Sol agai eno nagi te gasa hani dabe we bidibolo ola mawaibao, te genuai gavman bidi dabebolo me, te Israel we bidibolo me eno nagi pusa maiabo bidi dao. ¹⁶ Tama ena digi aga ola mawaibao, agai ena nagi selasa pelama, tigidali we bidibolo pusa mawaibao, te me me sëgë, me me sëgë aga pageba asaibao,” Genuai Bidigo te po wai. ¹⁷ Tama te po obaso, Ananaias pelama, te beba sabolali. Tomoba pelama, agai nogo te Sol tobuluba muani. Agai te po wai, “Sol, nage da eno ama dao. Tama Genuai Bidi Jisas aga digi ena nage pageba tagala palai dao. Nage te pabo tüdu edaba asobadi, Jisas aga digi nagebolo sabolali. Agai ena tagala palali, nago gedu ma dwagi yai ilimainu yai. Tama agai homugo Godigo Dwagi Yai Mobo nage tomode bidimai hagede, te së yai,” Ananaiasgo te po wai. ¹⁸ Tama polo te Solgo gedude abolo tiwai elaluali nai polo tulaluali. Tulalubaso, te agai gedugo tigidali nai ma bugagia suali. Tama aga dolaluama, Ananaiasgo aga baptais mani. ¹⁹ Tama nosali Sol agai nai tulama, aga bomo ma sali.

Sol agai Godigo po Damaskus bulude pusali

Sol agai te Jisas wali pabo we bidi dali agai sela sogo bidali, te Damaskus be nanide. ²⁰ Agai te Juda dabego bomo yai po ola mabo be

dabeba polo pali. Tede agai Jisasgo po pusa mabo gagalali. Agai te po wai, "Jisas da, te Godigo Ogwa dao," wali. ²¹Tigidali we bidigo agai wabo po odama, augwali noma mu sai. "Te bidi Jerusalem bulude Jisasgo po wali pabo we bidi agai elebo po wali bidi, te dawe?" augwa hasi hanalu wali. "Tama te bidi agai eba asali, te Jisasgo po wali pabo we bidi agai nogo dunama, Jerusalemba odasa peyu, tama te pris hani genuai bidi dabebolo magi pai hagede aga eba asali," te po wai. ²²Tama Solgo po bomo yai po mu pusali. Agai te po wai, "Te bidi Jisas da, te Godigo we bidi tau somainu sa muai bidi Krais dao." Tama agai po bomo elalubaso, te Damaskusde bidibo Juda dabe augwaligo po wei ponogobeo. Agai pogo tigidali we bidigo po aiyaba elalualio.

²³ Te tama hauwa sogo silama, tama te Juda genuai bidi dabe sisinagaselama, Sol elabo sunumi gegali. ²⁴Tialima, augwaligo aga elaiabao wabo po bidi me deligo agabolo pusali. Tama Damaskus tomoba iliamma, u badu moni masigi obo elaluali. Sol wi dia pidali weyu, tama pio me, kigamu me, hulide me, te tūba Sol elai hagede, nō muagasai. ²⁵Tiali goli, me sogo hulide te Jisasgo po wali pabo bidi dabego Sol te moni bono wa tomoba bulama, bono kēnama, te obo dwasianu windo tūdu te buluba dilani, tama bono wa aiyaba tagalalulali, tōba sabolama, Sol wi dia pali.^w

Sol Jerusalemba pali

²⁶ Te Sol Jerusalemba sabolali. Tama tede agai homugo Jisasgo po wali pabo hani dali sisinai hagede yali. Tiali goli augwaligo agade wi mu yali. Augwaligo te homu yali, 'Te bidi agai Jisas wali pabo bidi mu menio,' te homu yali. ²⁷Tama te bidi Barnabas agai Sol tau sali. Agai aga odasa pelama, Jisasgo tagala palai bidi pageba tagaligi pali. "Tama agai tūdu pobadi, Genuai Bidi sabolagasaki, te Solgo aga suali. Genuai Bidigo agabolo po wali." Barnabasgo te po me wai, "Te Damaskusde Sol agai Jisasgo nogide po pusali, te aga wi me ebeo," te po wai. ²⁸Tama tibaso, Sol agai Jisasgo tagala palai bidi dabe dali bidama, tama agai te Jerusalem be nani tomode agai Jisasgo nogi pusubo po te we bidibolo pususu bilali, wi ebe. Agai te Grik po wabo Juda dabe dali sisinama, po miani. ²⁹Tiali goli, augwaligo aga elabo sunumi gegali. ³⁰Tama te aga elabo sunumi gegebo po te Jisas wali pabo bidi me badugo odama, tama augwaligo Sol te Sisaria be naniba odasa pali. Tedu augwaligo aga agai page bulu mu Tarsus buluba tagala palali.

³¹ Te side Jisasgo po wali pabo we bidi te Judia tōde me, Galili tōde me, te Samaria tō me, te bulu we bidi augwali bugagia bidali, wi ebe. Godigo Dwagi Yai Mobogo augwali tau selama, te umabo we bidi Jisasgo poba augwa homu tigidali munama, bomo yali. Augwaligo Genuai Bidigo nogi ugwaba mu sali, te augwaligo Genuai Bidigo po wali pali.

^w 9:25 2 Ko 11:32-33

Pita agai te bidi Ainias dwagi yai ma ilali

³²Te Pita tigidali buluba bilali. Me sogo aga te be nani nogi Lida, teba pai, Godigo po wali pabo we bidi sueinogo yai. ³³Tama te bulude agai bidi me deli suali, te bidi nogi Ainias. Tama te bidi saç̄ isa silai, aga bede naga bididubadi, kibu be nogo a olama, me badu nogo sela olama silali. ³⁴Pitago agabolo te po wai, “Ainias, Jisas Krais agai nage dwagi yai ma ilibao. Nage ma hodaluao, naga somo belama, teba muao.” Tama Ainias polo hodaluali. ³⁵Tama te Lida bulu we bidi me, te Saron tq we bidi me, augwali tigidaligo Ainias bilibo sulama, augwali tigidaligo homu begelama, Genuai Bidi wali pali.

Pita agai te we nogi Tabita ma hodolali

³⁶Te be nani Jopade te we me deli bidali, agai nogi Tabita. Agai Jisasgo po wali pali. Te Grik pode augwaligo aga nogi tama nogi wabo Dorkas. Tama tigidali sogo agai tigidali nai meni yai we bidi me, gasi ebo we bidi me, te agai tau sai dao. ³⁷Tama te sogo aga gasi deli sali, te isali. Augwaligo agai tigi wę pauluama, te be ugwa badu habuba muai. ³⁸Tama te be nani Jopa te Lida be nani digibulu meni, pade mu. Te Jopade bidali Jisasgo po wali pabo we bidigo Pita te Lidade bidibo po odama, augwaligo bidi si Pita pageba tagala palali. Augwali si teba sabolama, Pitabolo te po wai, “Nage polo asao.” ³⁹Tama te po obaso, Pita sisi elama, aga tega si dali pali. Tama Jopa buluba sabolama, augwaligo aga te ugwa badu be habuba odasa pali. Tede te bidi isai we dabe sibi augwaligo gela wabo suali. Tama Dorkas agai bidibo sogo te bulubuo ugwa dabe me, te kedau baso bulubuo ugwa dabe me nigliama, te bidi isai we dabebolo mawai. Augwaligo te ugwa dabe selama, Pitabolo ola mawai. ⁴⁰Tama Pitago augwali “Buluba pião,” wali. Tama agai kidu sugunama, Godibolo po wali. Nosali agai isai we tigiba suali, te po wai, “Tabita, nage hodaluao,” wali. Tama te we agai gedu peda sanama, tonono bilali, tama agai Pita sulama, hodasa holama, duagulali. ⁴¹Pitago agai nogo tola selama, doddolali. Pitago te Jisasgo po wali pabo we bidi me i olama, augwali aselama, agai te we augwalibolo ola mawai, “Dorkas te bidibao,” wali. ⁴²Pitago te s̄ yali po tigidali Jopade bidibo we bidi polo oda pela silali. Tama umabo we bidi augwaligo homu te Genuai Bidiba muani. ⁴³Pita te hauwa sogo Jopa be nanide piali, te bidi me deligo bede, te bidi agai nogi Saimon. Agai ebo s̄ te isai kibu kau wali nagamea dwagi yai pomai hagede s̄ ebo bidi da.

**Ensel mobo bidi te bidi Korniliusba pedelama, agaba po
magasai elalubadi, te bidi Pita te bidi Korniliusgo beba pali**

te 100 ami bidi agai tonalubo da. Augwali te Itali tōdu asai. ²Tama te bidi aga hani dabe dali tigidali sogo te Godibolo lotu po wedu te bidigo te Godigo godolo yabo kolesaga yali. Te bidi aga dali deli bede bidibo bagego tigidali te God dologode bidai. Tama te bidi agai te tigidali Juda tōde bidibo nai meni yai we bidi agai tigidali sogo tau sabo da. Agai Godibolo hanalubo po hauwa sogo wabo bidi dao. ³Tama me sogo pioba poloba nai po sela wabode, agai na gagawai yali. Tama agai Godigo dagalude sē ebo ensel bidi me deli aga pageba sabalobo hania sualio. Te Godigo ensel bidigo agabolo te po wai, “Kornilius.” ⁴Agai te ensel bidi gedugo bomonama tonama, wi mu yai. Tama agai te bidibolo hanalu wali, “Eno genuai bidi, nago homugo magi sē yaiwe?” Tama te ensel bidigo te po wei ponoyu, te po wali, “God agai nago agabolo po wabo me, te nai meni yai we bidi tau sabo kolesaga me, te Godigo sulama, bugai homu ebao. ⁵Tama megı bidi me badu te Jopa buluba tagala palao, bidi me deli agai nogi Saimon, agai nogi me Pita, te bidi Pita odasa asomainu yao. ⁶Tama te bidi agai nogi sabi bidi Saimongo bede bidibo, te tamu aji sesegede. Te nogi sabi bidi Saimon agai ebo sē te kibu kau waligo haniani nai nigibo sē ebo bidi dao,” te ensel bidigo te po wai.

⁷Te po olama, aga pali. Tama Korniliusgo aga bede sē ebo bidi si me i wali. Agai te ami bidi me deli me i wali, te bidigo Godibolo lotu po wabo bidi. Te bidigo Kornilius tigidali sogo mu tau sali. ⁸Tama augwali aselama, Kornilius agai te bidi selabolo te ensel bidigo wali po pura mani. Pura menama, agai te bidi sela Jopa buluba tagala palali.

⁹Te do te bidi sela augwali pelama, te Jopa be nani pāba sabaligi pobadi, te giligade Pita te be pedu sai yai madigi teba holama, bidali, te Godibolo po wainu yali. ¹⁰Tama agai nasi mu ebaso, agai homugo nai tuai hagede yali. Tama augwali nai dodolobadi, Pitago naa gagawai mu yali. ¹¹Tama agai dagaluba tonobadi, dagalude moni tū dalaluali. Moni nami ugwide po dunama, dagaludu tōba tula palali. ¹²Tama haniani hasa dabe, me me hasamani me, me me ba me te ugwa tomode kisu mu elaluali. ¹³Pitago te po wabo odali, “Pita, nage hodasa pelama, me badu hasa dabe ela tuao,” wali. ¹⁴Tiali goli Pitago te po wali, “Genuai Bidi, eno ela tugobeo. Polobadu eno te habu sai nai dabe tube, megı me eno tugobeo,” wali. ¹⁵Tama Pitago po me odali, “Godigo agai ‘Tubo nai dao’ obaso da, tama Godigo agai nigai nai nago habu sai nai dao po wagio,” wali. ¹⁶Tama sela sogo te nami ugwa dulama, te po wali. Silama, te nami ugwa dagaluba polo kegasali.

¹⁷Tama te bidi Pitago dagaludu te yali sē page homugo kone palali. Tedubadi yaide, te Korniliusgo tagala palai bidi dabe augwali te Saimongo be menawe po hanaluama, augwali te be maboba dolagasali. ¹⁸Augwali i olama, te po hanalu wai, “Te beba asali bidi bidibowe?” wali, “agai nogi Saimon dao, agai nogi me Pita dao,” te po wali. ¹⁹Tama

Pita te na gagawai yali sē konealu bidibadi yaide, Godigo Dwagi Yai Mobogo agabolo te po wai, “Edao, bidi selago nage gege asalio. ²⁰Tama tibaso, nage sisi elama, aiyaba dulao. Tama nago augwali dali pabo homu si egio. Eno augwali sela nage pageba tagala palai bidi dabe dao,” te po wai. ²¹Tama te po obaso, Pita aiyaba dulama, augwali selabolo te po wai, “Dagego ena gege asali bidi, te ena tama dao,” agai te po wali. ²²“Dage magi pogo asаливе?” wali. Augwaligo te po wei ponoyu, te po wali, “Te Rom ami genuai bidi nogi Kornilius, agai da nage pageba tagala palali. Te bidi da, aga dwagi yai bidi mu. Agai tigidali sogo Godibolo lotu po wabo bidi dao. Te Juda we bidi tigidali augwaligo agai nogi ugwaba sabo dao. Godigo dagalude sē ebo ensel bidi me deligo agabolo te po wai, ‘Nago Pita i olama, tama aga nago beba asomainao, Pitago wabo po nago odomainu tama yao,’ te ensel bidigo te po wali,” augwaligo te po wai. ²³Tama Pitago augwaligo wali po odobo si, agai augwali te be tomoba odasa pelama, pigi pai.

Te sogo kigamu, Pita dali Jisasgo po wali pabo Jopa bidi me badu dali, augwali sisi elama, augwali te sela bidi dabe dali augwali hodobo palio. ²⁴Tama tomode pilama, ma pelama, augwali Sisaria buluba sabolali. Tede Kornilius agai abagi dede, bidi hani dede i olama, sisinagaselama, Pita asobo tonaluali. ²⁵Tama Pita agai homugo Korniliusgo be tomoba pai hagede homu yai. Korniliusgo sulama, agai kidu sugunama, agai toboli me, nogo me tōba ilali, Pita sagade, agai lotu wali. ²⁶Tiali goli, Pita agai te bidi ma hodoliyu, te po wai, “Nage hodaluao. Ena da bidi naga dao, nage tiwai tama dao.” ²⁷Augwali si po ola peyu, te be tomoba pobadi, tama Pitago suali, te be tomode agai te we bidi hauwa sisinama bidibo suali. ²⁸Pitago augwalibolo te po wai, “Duga digi koneai dao, Juda we bidi dena te Juda hani isawai hani bidi dabe dali abagi olama, augwaligo beba da bilibo menio, habu sai dao. Tiali goli, Godigo enabolo te po ola mawai, ‘Nago Judago lotu po wali pisābo we bidi nago tudiba menamuo,’ wali. ²⁹Tama tibaso, nago e bidi sela tagala palama, ena oda sagasobaso, eno te po ‘Ena hagelabo’ po te eno me wabeo. Tama megi eno nage hanalu obao, nago ena magi baso i waliwe?” Pitago te po wai.

³⁰Te Korniliusgo te po wei ponoyu te po wali, “Te polobadu sela sogo polo walio, pioba poloba nai po sela wabode, eno Godibolo po weyu bidibadi, polo te bidi me deli ena pagede dolalubo suali. Agai ugwa ula genuai mu yali. ³¹Agai ena nogi olama, te po wai, ‘Kornilius, God agai nago agabolo po wabo me, te nago nai meni yai we bidi tau sabo dwagi yai kolesaga ebo sulama, Godigo bugai homu ebo. ³²Megi nago me badu bidi te Jopa buluba tagala palao, bidi me deli oda sigi pomainao, te bidi nogi Saimon, agai nogi me Pita. Te bidi aga nogi sabi bidi Saimongo bede bidibo, te tamu aq pāde. Te nogi sabi bidi Saimon, agai ebo sē te isai kibu kau wali nagamea dwagi yai pomai hagede sē ebo bidi da,’ te po wai.

³³Tama tibaso, eno nage pageba po polo te tagala palai dao. Tama nago dwagi yai kolesaga mu elama, da pageba sabolalio. Tama megi da tigidali Godigo gedude bidibao. Tama dago homugo Genuai Bidigo nagebolo mani po te dago odaibao,” Korniliusgo Pitabolo te po wai.

Pita agai Korniliusgo bede te po pusai dao

³⁴Te Pita agai po wabo së gagalali, “Mu tama dao, megi eno koneanio. God agai deli hani naga homu ebeo. Te mu menio.^x ³⁵Tigidali haniani po wabo bidi hani augwaligo God wi elama, dwagi yai kolesaga ebaso da, tede Godigo ‘Usu da’ waibao. Duga digi koneai dao. ³⁶Godigo te dwagi yai po da Israel we bidibolo mawai dao. Tama te dwagi yai po page e tiwai da, Jisas Krais da, te tigidali we bidigo Genuai Bidi da. Da tigidaligo aga godolo eyu da, te da dwagi yai homu elama, bugagia bidaibao.

³⁷Duga digi koneai dao. Polobadu Jongo dwagi yai baptais mabo po pusa mawai dao. Te sogo te po te Galili tqde gagalama, tigidali Judia tq usu yai dao. ³⁸Te po duga digi koneai dao. God agai te Nasaret bulu bidi Jisas sa muai. Tama Godigo agai Dwagi yai Mobo Bidi dali, bomo dali si agabolo mawai dao. Tama Jisas aga tigidali bulu bilama, dwagi yai së ela bilali, tama agai Satango dolai we bidi agai dwagi yai ma ilali. God aga dali bidibaso, te tobage së yali. ³⁹Tama dago suai dao, agai te së Jerusalem tomode me, tigidali Israel bulude me, tama dago te yali së po pusubao. Tama augwaligo aga ni pedaide walama, elai dao. ⁴⁰Tiali goli, sela sogo gù pagede bidama, nosali Godigo aga ma hodolai dao. Tama me badu we bidi augwaligo gedugo aga suali. ⁴¹We bidi tigidali augwaligo aga sube. Da polobadu Godigo agai po pusu maio olama daj ilai bidi, dago naga aga suai dao. Aga hodaluama, da aga dali hodobo bidu, nai me, aji me tuai dao. ⁴²Tama dabolo agai bomai po mu mawai dao. Agai ‘Te dwagi yai po te tigidali we bidibolo ola mao,’ wali. Godigo Jisas daj ilama, tigidali bidibo we bidi me, isali we bidi me, aga po tu yabo bidi nigliama, bidibo. Te së ebo po me dago te we bidibolo pusa mawaibao. ⁴³Polobadu Godigo po pusa mani bidi tigidali augwaligo agade po wai. Augwaligo te po wai, ‘Magwai we bidi deli deligo augwaligo agaba augwa homu tigidali mubaso da, agai nogigo bomogo augwaligo dwai së ebo kolesaga God agai sela sawaibao,’ te Godigo po pusa mabo profet bidi dabego te po wali,” Pitago te po wali.

Godigo Dwagi Yai Mobo Bidi gasa bidi haniba asali po

⁴⁴Te bidi Pita agai po odubadi, te Godigo Dwagi Yai Mobo Bidi te po odobo we bidi tigidali tigiba dulali. ⁴⁵⁻⁴⁶Tama augwaligo gasagi gasagi yai po, me me po haniani weyu, Godigo nogi ugwaba sali, “God, nage

* 10:34 Bom 10:17

dwagi yai bidi mu dao,” wali. Tama me badu Juda bidi augwali Jisasgo po wali pabo bidi dabe Pita dali asai, Jopadu. Augwali noma mu sai, Godigo agai Dwagi Yai Mobo Bidi te Juda hani isāwai we bidibolo me olo mawai.⁴⁷ Pitago te po wai, “Te we bidi dabe augwali pageba Godigo Dwagi Yai Mobo Bidi asali dao, da pageba polobadu asali tiwai dao. Tama tibaso, bidi mebago ‘Te bage baptais me sogobeo’ wagobeo,” wali.⁴⁸ Tama Pitago te hanibolo te po wali, “Megi dage Jisas Kraisgo nogide baptais sagameo.” Tama tilama, augwaligo agabolo te po wai, “Nage da dali hodobo si sela sogo bidao,” wali.

**Pitago agai ebo sē po te Jerusalemde bidibo Godigo
po wali pabo hanibolo ola magasai**

11

¹ Te Jisasgo tagala palai bidi dabe me, te Jisasgo po wali pabo bidi dabe me, augwali tigidali Judia bulu tōde bida bida pai. Tama augwaligo “Te Israel hani isāwai we bidi mego Godigo po odobuo,” wabo te po odali. ² Tama Pita te Jerusalem buluba sabolali, te Judia tō tomode. Tialima, Juda we bidi me badu augwaligo homugo ‘Te Israel hani isāwai bidi augwaligo Jisasgo po wali pobaso da, hasia augwa tigiwali togwao,’ olama, te po bomo yai po elaluali. Augwaligo te homu elama, Pitabolo wado po wai, ³ “Te nage te tigiwali togosīwai bidigo beba pelama, tama nage augwali dali hodobo nai tuyu yalio,” te po wai. ⁴ Tama te po obaso, Pitago agai yali sē po page tigidali augwalibolo pusa manio. ⁵ Agai te po wai, “Te ena Jopa bulude bidibadi, ena Godibolo po weyu bidibadi, na gagawai yai. Te nade eno nai me deli nami ugwa belama, dulubo suali. Te moni ugwa te dagaludu ena pageba sabolagasali. ⁶ Tama eno tomoba subadi yaide, te haniani hasa, haniani hasamani me, haniani ba dabe me, te nami ugwa tomode kisu delalubo suali. ⁷ Eno po me deli odalio, ‘Pita, nage hodaluama, te hasa dabe me badu nage ela tuao,’ wali. ⁸ Tiali goli, eno te po wali, ‘Genuai Bidi, te nai dabe da Juda we bidigo munu ma tubo nai dabe menio. Te dago habu sai nai dao. Eno tugobeo,’ te po wai. ⁹ Tama dagaludu enabolo te po ma dulali, agai enabolo te po wai, ‘Nago te nai habu sai dao po wagio. God aga digi te nai dwagi yai da obaso da, teda usu dao,’ wali. ¹⁰ Tama te sē enaba sela sogo sabolagaselama, tama nosali te nai tigidali me dagaluba kegasali. ¹¹ Tama te nai kegasobadi, bidi sela ena pibo beba sabolali. Sisaria bulu bidi me deligo augwali tagala pelama, ena oda sagasai. ¹² Godigo Dwagi Yai Mobo Bidigo enabolo te po wai, ‘Nage te bidi sela dali hodobo pao, homu si egio,’ wali. Tama ena Sisaria buluba pabo sogo, e Jopa bidi Jisasgo po wali pabo bidi me badu nogo kibisa deli olama, e bage da hodobo pali. Tama sabolama, da tigidali te bidi Kornilius agai be tomoba pali. ¹³ Korniliusgo da dali po pusali, agai te Godigo ensel bidi me deli aga be tomode dolalubo suali. Tama te ensel bidigo agabolo te po wai,

‘Nago bidi me Jopaba tagala palao, te bidi Saimon, aga nogi me Pita, odasa somainu yao.¹⁴ Aga aselama, dage tigidalibolo po pusa mawaibao, naga hani tigidali Godigo ma somainu eyu yaibao,’ te ensel bidigo agabolo te po wali.¹⁵ Tama nosali eno po pusubadi yaide, Godigo Dwagi Yai Mobo Bidi augwali tigiba dulalio, aga dago tigiba polobadu asali tiwai yai.¹⁶ Tama eno tama homu yali, polobadu Genuai Bidigo dabolo te po wai, ‘Jon agai te we bidi aigo baptais mobao. Tialima, nosali Godigo agai Dwagi Yai Mobo Bidi dagebolo mawaibao,’ wali.^y¹⁷ Dago te Genuai Bidi Jisas Krais polobadu agaba dena homu mubo si, Godigo agai Dwagi Yai Mobo dabolo olo mawai. Tama eno suali, Godigo te Juda hani isawai dabebole me te Dwagi Yai Mobo Bidi mani. Tama agai augwalibolo manigo da, teda eno mena tama Godigo tū paligobeo,” Pitago te po wai.

¹⁸ Te Jisasgo po wali pabo Juda bidi dabe augwaligo Pitago wali po odama, tama augwaligo wado po wabo tagalali. Tama augwaligo Godigo nogi ugwaba siyu, te po wai, “E, Godigo te sunumi dawai, te Israel bidi hani isawai bidi dabe augwali me homu begelama, bugagia bidimainu yali,” te po wali.

Antiok bulu we bidi augwaligo Godigo po odali

¹⁹ Te bidi Stiven augwaligo ela munama isali sogo, te Jisasgo po wali pabo we bidi wi pelama, me badu te Finisia tqba pali, me badu te tamu aq̄ tomode elalubo tq̄ nogi Saiprus, teba pali, me badu te Antiok buluba sabolali. Tiali goli, augwaligo po te gasa hani dabe augwaliba me pusubeo. Menio. Tama augwaligo Godigo po te Juda dabebole naga pusa mani.²⁰ Tialima, te Saiprus bidi dabe me, te Sairini tq̄ bidi dabe me badu augwali Antiok buluba sabolama, tama te Israel hani isawai bidi dabebole Jisas Genuai Bidigo dwagi yai po pusa mani.²¹ Tama te Genuai Bidigo bomo augwali dali hodobo bidama, tama umabo we bidi augwaligo Jisasba augwa homu mu muani, kolesaga begelama, Genuai Bidigo po wali pabo gagalali.

²² Te Jerusalemde bidali Jisasgo po wali pabo we bidigo te Antiok bulude Godigo genuai s̄e mu ebo po augwaligo odalio. Tama tibaso, augwaligo te bidi Barnabas tagala palali, te bulu Antiokba.²³ Tama aga Antiok buluba sabolama, suali, Godigo we bidibolo dwagi yai s̄e yali. Barnabas agai bugai homu pemene mu yali. Agai augwalibolo te po wai, “Dagego Godigo po wali bugagia piāo. Dagego te po tagalamuo, homu si egimio,” agai te po mobo mani.²⁴ Tama te bidi Barnabas aga dwagi yai bidi mu. Agai Godigo po bugagia konealubo bidi mu, Godigo Dwagi Yai Mobo Bidi agai kolesagade pagānalualu. Tama te sogo umabo we bidi mu Jisasgo po wali pabo we bidi wadolagasali.

^y 11:16 Tpi 1:5

²⁵Te nosali Barnabas te Tarsus buluba te bidi Sol gegegi pali. Tama agai gegelama, sulama, Antiok buluba odasa asali. ²⁶Tama augwali si te Jisasgo po wali pabo we bidi tomode bidama, tama kibu be deli yali. Augwali sigo umabo we bidi Godigo po ola mani. Te Antiok we bidi augwaligo te Jisasgo po wali pabo we bidibolo te ‘Kristen’ nogi pobo gagalali.

²⁷Te sogo me, Godigo po pusa mabo bidi te profet dabe me badu Jerusalem taga pelama, augwali Antiok buluba sabolali. ²⁸Tama augwali tomode bidi me deli agai nogi Agabus, te bidi doligiluama, Godigo Dwagi Yai Mobogo bomogo te po pusa obaso, te po agai wai, “Tamadi tama tigidali bulu moni genuai nasi mu yaibao,” wali. (Tama megi dago koneai dao, te bidi nogi Klodius te Rom gavman tobolu bidi bidibadi, te moni nasi yali.) ²⁹Tama te Jisasgo po wali pabo we bidi augwaligo te po wai, “Bidi deli deli naga masigi munalubaso da, muagasu yao,” wai, “te dago te masigi sisinama, te Judia tqde bidibo Jisasgo po wali pabo hani dabe augwali nasi ebo, dago augwali tau sinao,” te po wai. ³⁰Tama augwaligo te masigi sisinama, augwaligo Sol dali Barnabas sigo nogoba munama, augwali sigo te mone sela pelama, Jisasgo po wali pabo tobolu bidi dabebolo magi pali, te Jerusalemba.

Herotgo enesigi bidi dabego Jems ela muai, tama Pita naga kalabus ilai

12 ¹Te bidi nogi Herot aga te Juda bidi bidali goli, te Rom gavmanigo aga te genuai gavman bidi nigelili. Aga bidibadi te Sol dali Barnabas si Jerusalemba sabolali. Herot agai te Jisasgo po wali pabo bidi me badu elebo sē ebo gagalali. ²Tama agai enesigi bidi me deli tagala palama, Jon aga ama gomunai bidi Jems moni kago hwāgo mage togwa sayani.

³Te Jems elebo sulama, Juda bidi hanigo bugai homu yali. Tama Herot agai te sulama, tama agai Pita gegali. (Tama agai tilama, te sogo Juda we bidigo moni nai mu udumai hagede, tama augwaligo homugo ‘Te polobadu Godigo dago wāj dabe tau sali sogo, te bo disāwai bret tuali sogo da,’ te homu yai.) ⁴Tama augwaligo Pita nogo dulama, aga kalabusiba muani. Tama augwaligo Pita tonaluabo enesigi bidi nogo si olama, me badu sagā kibisa deli wagi solama sali. Me si me si nama bagego giligade me, hulide me, augwaligo me hasegeleyu, me hasegeleyu ilama, Pita tonaluali. Herot agai homugo Pita te tigidali we bidi gedude po tū ela mawainu yaibao, te moni nai nogeai sogo silibo si. ⁵Tama tibaso, augwaligo Pita kalabus bede tonaluali. Tiali goli, Jisasgo po wali pabo we bidi augwaligo Godibolo gedu haluasa po hauwa sogo mu oduali, te Pita tau somainu yai.

Ensel bidigo Pita kalabus bedu ma sali

⁶Te Herot agai homugo ‘Pita te we bidi gesabiba do kigamu odasa asaibao, po tū yai hagede,’ homu yai. Tama te sogo hulide Pita te

tonaluabo enesigi bidi si tomode piai. Augwali sigo nogo dali Pitago nogo dali daganama, aligabo bonogo kewai. Tama te kalabus be tude tonalubo enesigi bidi dolaluali. ⁷Tama Godigo dagalude sē ebo ensel bidi me deli polo te kalabus be tomoba sabolama dolaluagasali, tama te be tomode ulago sela pali. Tama ensel bidigo Pita pila mubadi, tigiba diañama, hodolai. Tama agai agabolo te po wali, “Nage polo hodaluao.” Tama tibadi yaide, te aligabo bono si augwa digi tqba tuloluai. ⁸Te ensel bidigo te po wai, “Naga ugwa bugagia gudama, kibu wali dāq wao. Naga sagā nadoba bulao,” wali. Pitago tilama, te ensel bidigo agabolo te po wai, “Tama nago moni ugwa homu pagede belama, tama nage ena wali asao,” wali. ⁹Pita te ensel bidi wali pelama, te kalabus be taga pelama, buluba pai. Tama Pitago te ebo sē konebe, agai homugo ‘Mu ebewe, ma nade ebewe?’ homu yali. ¹⁰Tama augwali sigo tomo tude tonaluali enesigi bidi bidibadi ela soali. Ela solama, ma pelama, tama tomode me tonaluali enesigi bidi me, te me ela pali. Ma pelama, te moni dila pai aingo nigali tūba sabolali. Tama te moni dila pai aingo nigali tū sunumi aga digi dalasa pali, te augwali si te kalabus be taga pelama, te be nani tomoba pai. Tama augwali si tūdu dwasianu pabo aq elama, ensel bidigo Pita polo taga pali. ¹¹Tama Pita agai homugo ‘Te yali sē te nade ebeo homu eyu, te eno mu koneanio,’ wali, ‘Genuai Bidi agai ensel bidi tagala palama, tama agai ena Herotgo nogode ma sali. Te Juda bidi hani augwaligo ena dali dwai sē yai hagede yali, tiali goli te Genuai Bidigo augwaligo homu dolai,’ Pitago te homu yai.

¹²Te Pitago te homu elama, aga te we nogi Maria, Mariago beba pali. Te Maria aga ogwa agai nogi Jon, agai nogi me Mak. Tama te bede we bidi umabo sisinagaseslama, Godibolo po weyu bidali. ¹³Tama Pitago te be tūba bebego wali. Tama te bede sē ebo gesi we tūba suagasali, te gesi we nogi Roda. ¹⁴Tama te wego Pitago dogoni koneai, tama agai dwagi yai homu mu ebaso, be tomoba polo ma pali, te tū dabe kegeda pali. Agai te we bidibolo te po wai, “Te Pita aga asai, bulu badu dolalubo,” wali. ¹⁵Augwaligo te webolo “Nage wabo pabo po wabowe?” wali. Tiali goli, “Eno mu po obao,” wali. Augwaligo te po wai, “Te da, te Pitago noma dolagasali bogo,” wali.

¹⁶Te augwaligo te po obadi yaide, Pitago te be tūba bebego oduali. Tama augwaligo tū dalama, Pita dolalubo sulama, noma mu sali. ¹⁷Pitago agai nogo paliam, “Dage po tagalao,” te po wai. Tama Genuai Bidigo aga kalabus bede buluba diañ palama soali po augwalibolo pusa mani. Agai te po augwalibolo wali, “Te po dagego Jemsbolo pusao, te Jisasgo po wali pabo tobolu bidi dabebolo me pusao,” wali. Tama olama, Pita te be tagalama, gasa beba pali.

¹⁸Te sogo kigamu, te kalabus bede bidali enesigi bidi dabe augwa hasi te po wai, “Pita mena tama paliwe?” Augwaligo moni homu mu eyu

bidali. ¹⁹Tama Herotgo te yali sę po odama, “Pita gegegi piąo,” wali. Augwaligo gegegi pali, Pita sube. Tama tibaso, Herotgo te enesigi bidi dabe po tų elama, tama agai me badu bidibolo walama, “Augwali ela muao,” wali. Tama augwaligo te enesigi bidi dabe ela muani.

Te sę elama, Herot te Judia tő tagalama, te Sisaria bulude osogo bidali.

Herot isali

²⁰Te nosali Herotgo te Tair bidi dali, te Saidon bidi dali, te bulu si bidi dabe dali agai moni sębę yai. Tama tibaso, tigidali sisinama, aga sugi pali. Hasia bolo augwaligo te Herotgo be tonalubo sę ebo bidi deli suali, agai nogi Blastas. Augwaligo te bidi ‘Abagi mu’ wali. Tama augwaligo agabolo hanalu wali, “Te Herotgo wado po mena tama isilaibawe?” Tama nosali augwali te Herot pageba pelama, te po wai, “Te dago nai abelebo nago bulude naga dago nai abelama, tubo dao. Tama tibaso, dago te hwiębo sę tagalinao,” wali.

²¹Te Herot me deli sogo bodolu mani. Tama te bodolu mani sogode agai dwagi yai ugwa aluama, tama agai genuai bidigo wiegi yai ni namide dugayali. Tede agai te we bidibolo bobobage po ola mani.

²²Augwaligo agai po odama, tama augwaligo te po bomo elama, i hae weyu, te po wai, “Te po wabo bidi, bidi mugo wabe. Te po te god me deligo obao,” wali. Te po olama, augwaligo nogi bada olama, Herotgo nogi uwawa sai. ²³Tama Herot agai Godigo nogi uwawa sisąbaso, Godigo ensel bidi me deli agai Herotgo tigide elali. Tama te dwai gasi agai tigide pedelama, te dwai osoganigo agai tigide tudu pedelama, te nosali aga mu isali.

²⁴Te sogo Godigo po te umabo we bidigo odama, augwaligo Godiba augwa homu tigidali muani, te haniani bulude.

²⁵Te Barnabas dali, Sol dali, augwali sigo sę silama, Jerusalem taga pelama, Antiok be naniba ma sabolali. Te bidi Jon, aga nogi me Mak, te bidi si dali hodopo pali.

Polgo te Jisasgo po te haniani tő pedai kantride pusali

(Dqj 13:1–21:14)

**Augwaligo Barnabas dali, Sol dali si Godigo
po pusa maiabo bidi si tagala palali**

13 ¹Te Antiok bulude, te Jisasgo po wali pabo bidi tomode, te Godigo po pusa mabo bidi profetgo pusubo po tiwai po wabo tiwai bidi me badu te bulude bidali, te Godigo po te we bidi augwaliba ola mabo bidi dabe me badu me bidali. Te bidi dabe augwaligo nogi me Barnabas, me Simeon, agai nogi me Husugo Bidi, me bidi Lusius,

agai page bulu Sairini, me bidi Manain, te moni gavman bidi Herot aga age, tama me bidi nogi Sol. ²Tama augwaligo tubo nai osogo gisilama, Godibolo nage dwagi yai da obadi, tama Godigo Dwagi Yai Mobo Bidigo augwalibolo te po wai, “Te Barnabas dali, Sol dali si te tedali sē emainu tedali muao, te eno daj ilali sē augwali sigo emai yaibao,” wali. ³Tama te po odama, augwaligo nai ma osogo tagalama, God dali po olama, augwa nogi tega si toboluba mubadi, augwali sigo te yabo tedali sēde sa muani. Tama tilama, tega si te sēba tagala palali.

Barnabas dali Sol si te Saiprus buluba pelama, Godigo po pusali

⁴Te Godigo Dwagi Yai Mobo Bidigo te Barnabas dali, Sol dali si tagala palama, augwali si te Selusia buluba pali. Tama Selusiade moni gebadu pelama, tama te tamu aq̄ bolama te Saiprus tq̄ sabolali, te aqgo u badu te e badu si bologobeia sai tomo yagu tq̄ba sabolali. ⁵Tama tede te be nani Salamis sabolama, augwali sigo te Juda dabego bomo yai po ola mabo be dabede Godigo po pusa mawai. Te bidi Jon, agai nogi me Mak, agai me tega si tau selama, te sē yali.

⁶Te nosali augwaligo te Salamis bulu taga pelama, gasa habu badu, bulu me nogi Pafos, teba sabolali. Tama augwaligo te bulude Juda bidi me deli suali, agai nogi Barjisas. Te bidi agai dwai pobi dabe wabo bidi, tama agai tigidali we bidibolo tibo po ola mayu, “Ena Godigo po pusubo bidi dao,” wali. ⁷Tama te bidi aga abagi te moni gavman bidi Sergius, aga nogi me Paulus, aga abagi dao. Tama Sergius, aga nogi me Paulus, agai te Saiprus bulu tq̄de bidibo we bidi tigidali agai tonalubo da. Aga haniani kolesaga koneai bidi da. Tama te moni gavman bidigo Barnabas dali Sol si i olama, “Asao,” wali, agai homugo ‘Augwali sigo Godigo po enabolo ola mabo po odaio,’ te homu yai.

⁸Tiali goli, te dwai pobi dabe wabo bidi Barjisas, te Grik pogo aga nogi Elimas, agai homugo ‘Moni gavman bidigo Godigo po wali pidali weyu,’ te homu elama, tega sigo wali po sela sayani, te agai po uwabu mu sali. ⁹Te yali, te Sol agai nogi me Pol, agai gedugo te pobi wabo bidi bomonama tonaluali. Tama Godigo Dwagi Yai Mobo Bidi aga homude paganaluali. ¹⁰Pol agai te po wai, “Nage da, te Satango ogwa dao. Te nago tigidali dwagi yai kolesaga boi bidi homu aq̄, te ebe yabao. Nage dwai dwai kolesaga elama, tibo po wabo bidi me dao. Nago te Genuai Bidigo dwagi yai tū mu dolobao. Nago te tibo kolesaga tagalabo homu meniwe? ¹¹Tama Genuai Bidigo nogogo nage geduba elaibao. Nago gedu hulia selama, giliga ge osogo sugobeo,” Polgo te po wai. Tama polo te hano tiwai te bidi Elimas aga gedude halua selama, hulia si elaluali. Aga nogi dali sāq̄ dali sigo naga tū gege pali. Agai homugo ‘Dego ena nogi tolama, tū ola magowe?’ te homu elama, bidi gegali. ¹²Tama te moni gavman bidigo te ebo sē sulama, agai homu tigidali Jisasba muani. Aga

noma mu sali, te Genuai Bidigo s̄e dabe augwali sigo aga ola mobaso tama noma sali.

Augwali te Antiok buluba sabolali, te Pisidia tōde

¹³ Te nosali Pol dali aga dali bidali bidi dabe augwaligo moni geba selama, Pafos bulu tagalama, tama tamu aji daidu pelama tama augwali Perga be naniba sabolali, te Pamfilia tōde. Tiali goli, Jon aga nogi me Mak, agai tede te bage tagalama, aga Jerusalemba ma geasa pali. ¹⁴ Tama augwali Perga be nani tagalama, augwali pelama, Antiok be naniba sabolali, te gasa me tedali Antiok, te Pisidia tōde. Tama te Juda dabego Sabat sogo augwali te Juda dabego bomo yai po ola mabo be tomoba pelama, augwali dugayali. ¹⁵ Tama bidi mego Mosesgo bomo yai po aşənai buku nedama, tama nosali bidi mego Godigo polobadu po pusa mani profet bidigo aşənai buku me nedama, tama te tobolu bidi dabego Pol dali Barnabas sibolo po ola tolali. Augwaligo augwalibolo te po wai, “Ama dede, dagego dwagi yai po me elalubaso da, teda da we bidibolo dage sigo meḡi da ola maiq̄o,” te po wai. ¹⁶ Tama Pol hodaluama, agai “Dagego odao,” olama, nogo muani. Agai te po wai, “Eno homugo dage Israel bidi me, dage Israel isəwai bidi hani me, tiali goli dagego Godibolo po mu wabo dao, dagego bugagia olo munama, eno po odao. ¹⁷ Da Israel we bidi dago God, agai dago waj̄i dabe polobadu daj̄i ilali. Tama augwali te Isip tōde bobobage sogo bidibadi, Godigo augwali te genuai hani mu nigelili. Tama God agai bomogo augwali te Isip tō taga solama,^z ¹⁸ te kemi tō bidi meni yai bulude bilidubadi, kibu be bidi sigo nogo sąq̄a sese te 40 yia silama yali. Tama te kibu be tomode bidibadi, augwaligo dwai kolesaga ebo seğ̄e Godigo selama, agai tonaluali. ¹⁹ Tama Godigo te Kenan tōde bidali hani a nogo olama, me badu nogo si wagi solama bidai bidi hani ela silali. Tama ela silama, Godigo te tō te Israel hanibolo mani.”

²⁰ “Te augwali te tōde bidama, te kibu be hauwa mu te 450 yia silali. Tama te silama, nosali Godigo te Israel hani dabe augwalibolo po tū dodolobo bidi dabe mawai. Tama me isibaso, hasegeleyu, hasegeleyu, tama ela pali. Tama bida bida pelama, te bidi Samuel diq̄ holali sogo sabaligi pali, te Godigo po pusa mabo profet bidi. ²¹ Tama te sogo augwaligo Godibolo hanalu wali, ‘Da gegasa pabo bidi, moni genuai gavman bidi dabolo mao,’ wali. Tama God agai te bidi Kis aga ogwa Sol te sa muani. Te bidi agai hani nogi Benjamin. Agai augwaligo moni genuai gavman bidi nigelama, tama bidali. Te s̄e eyu bidibadi, kibu be te 40 yia silali. ²² Tama tilama, Godigo Sol hasegelama, Devit te moni genuai gavman bidi nigelama bidali. Tama Godigo te po Devitde wai,

^z 13:17 Sai 1:7; 12:51

‘Megi eno te bidi Devit sualio, te bidi Jesigo ogwa,
eno agade dwagi yai homu ebao. Nosali eno sē
tigidali agai yaibao,’

Godigo te po wai.²³ Tama Jisas, te Devitgo nosali hani bidi, te bidi Godigo selama, da Israel dabe tau sabo bidi nigilali, Godigo polobadu wali po tiwai.²⁴ Tama Jisas agai yali sē gagalisa'badi, Jon agai te Israel we bidi tigidalibolo te po wai, ‘Dagego dwai kolesaga ebo tagalama, homu begelama, eno dage baptais mawaibao,’ wali.^a ²⁵ Tama Jon agai sē silabo maga ebadi, agai te we bidibolo te po wai, ‘Dagego homugo ena de dawe?’ wali. ‘Ena te dagego tonalubo bidi menio. Tiali goli, dagego odao. Bidi me deli nosali aga ena tudi badu asaibao. Aga da, te genuai bidi mu da. Ena da nogi elalubo bidi menio. Eno agai sāqā nadoba bono pisigabō sē yainogo eboso da, teda te sē ebo eno usu egobeo,’ Jongo te po wai.”

²⁶ Te bidi Polgo te po olama, po me ola mani, “Ama dede, abe dede, dage Abrahamgo hani bidi dagego me, odao. Dage Juda bidi hani isāwai bidi, dage God wali pabo dao, dagego me odao. Godigo agai da ma dobola sabo tū nigali po te da tigidalibolo tagala palali.²⁷ Tama te Jerusalemde bidibo we bidi me, augwaligo tobolu bidi dabe me, augwaligo te bidi Jisas agai yali sē page konebe, agai wali po page me augwaligo konebe. Augwaligo te Godigo po polobadu pusa mani bidi profet dabego wali po tigidali Sabat sogode odama, tama augwaligo te po page bugagia konebe. Tiali goli, augwaligo homugo Jisas elaibao homu e baso, polobadu Godigo po pusubo profet bidi dabego wali po meg i nai gilama mu walalio.²⁸ Jisasgo dwai kolesaga munu me isābadi, augwaligo Jisas olo dali po tū ela mani. Augwaligo te bidi Pailat agabolo moni po dagā weyu, te po wali, ‘Te bidi Jisas elao,’ wali.²⁹ Polobadu Godigo po pusa mani bidigo bukude aseāni po tiwai augwaligo te sē Jisasgo tigide ela silama, bidi sigo aga ni pedaide daganama, agai tigi selasa pelama, moni masigi dudulawe tomoba mugi pali.³⁰ Tiali goli, Godigo aga ma hodolama, tama ma bidibao.³¹ Tama nosali te polobadu aga dali Galilide bilali hani bidi dabe me aga dali Jerusalemba pali, agai augwalibolo hauwa sogo diq̄ holali. Te hani augwali tigidali Israel we bidi tomode bilu, te ebo suali sē po pusubo dao.”

³²⁻³³ “Tama dadi si me dage pageba sabolama, te Godigo dwagi yai gesi po dagebolo pusa mobao. Tama te bomo yai po Godigo polobadu dago wājibolo walai po dao. Tama meg i te po augwaligo wai puluba da pagede mu pedalalio, da tau somainu yai. God agai Jisas gū pagede ma hodolai dao. Polobadu bidi me deligo te Godide dwagi yai homu eyu wabo tēabi buku yabe side te po aseāni,

‘Godigo te po wai, “Nage eno ogwa mu dao. Tama

^a 13:24 Mak 1:4; Luk 3:3

megi nage eno ogwa mu nigilai dao.”^b

³⁴Jisas isilama, Godigo aga gū pagede ma hodolai, agai tigi nosali damua pogobe. Tama polobadu Godigo te sē yabo homu ebadi, te po wai, te bukude aşənai,

‘Polobadu eno Devitbolo po ola mawai, agabolo dwagi yai sē yabo po. Tama megı eno nagebolo me te po e mobao.’^c

³⁵Tama te aşənai buku yabe mede Devitgo te po me Godibolo wali,

‘Naga dwagi yai sē ebo bidi naga agai tigi gū pagede damua pomai hagede tagalogobeo,’^d

wali. ³⁶Tama Devit agai Godigo sē aga hani we bidi tomode elama, tama aga nosali isai. Tama isəma, augwaligo aga wājō masigi dudulaweba mugi pai. Tama tede aga tigi damua pai. Tama dago Devitgo polobadu wali po koneao, te po wali Devit aga tigide wabe. Agai tigide wabeo.

³⁷Tiali goli, te Godigo ma hodolali bidi agai tigi damua pabeo.”

³⁸⁻³⁹“Ama dede, dagego te sē bugagia koneao. Dago dagebolo Jisasgo tigidali yali sē dagebolo pusa mobe dao. Tama agai dago tigidali dwai sē ebo sela saya bo tu nigali. Duga bugagia koneao. Niwai we bidi augwaligo augwa homu Jisasba mubaso da, teda Godigo augwaligo yali dwai sē sela səwaibao. Tiali goli, Mosesgo bomo yai po dabe augwaligo dagego dwai kolesaga ebo sē sela sagobeo. ⁴⁰Tama dage dua dao. Te Godigo po polobadu pusa mani profet bidi dabe augwaligo wali po dage pagede mu pedalidali weyu, dua dao. ⁴¹Augwaligo te po aşənai, Godigo te po wai,

‘Odao, dage Godigo po sela səbo bidi dabe dao.

Dagego tonaluama, moni homu elama, nosali nomasiąq. Tiali goli, dage isaibao. Eno dage pagede sē ebadi, dagego te sē ebo dagego homugo mu konegobeo. Tama bidi me deligo dagebolo te sē page pusa mobadi, dagego agai wabo po page bugagia konealugobeo,”^e

Godigo te tama po wai,” Polgo te po wali.

⁴²Te Pol dali Barnabas dali si te Juda dabego bomo yai po ola mabo bede po pusulama buluba diq sobadi, te we bidi augwaligo tega sibolo te po wai, “Me Sabatde dage sigo dabolo te po ma ola magameo,” wali.

⁴³Tama te we bidi tedela pelama, te Juda dabe hauwa augwali si wali pali. Tama te Juda hani isəwai we bidi hani Juda haniba wadolagasali, augwali me te Pol dali Barnabas dali wali pai. Tama augwali sigo augwalibolo te po ola mani, “Dagego Godigo po odoyu, bugagia bidiq. Tama God agai bomo dologode bidiq, agai dage tau somainu, te dage bugagia bidimainu tama yao,” wali.

^b 13:32-33 Tib 2:7 ^c 13:34 Ais 55:3 ^d 13:35 Tib 16:10 ^e 13:41 Hab 1:5

⁴⁴Te nosali Sabat sogode te be nani we bidi tigidali pade sisinagasali, tega sigo Genuai Bidigo po wabo odainu yali. ⁴⁵Tama te Juda dabe me badu augwaligo te umabo we bidi sulama, augwali Pol dali Barnabas side dwai homu yali. Augwaligo Polgo wabo po sela sənama, aga nogi aiyaba elaluali. ⁴⁶Tiali goli, Pol dali Barnabas sigo bomo selama, wi isəma, te po wai, “Dago koneai, Godigo po hasia bolo dage Juda haniba mawainu yai. Tiali goli, dagego agai po sela səbaso da, teda dago dage Juda hani taga paibao. Duga homugo tama te da, dagego bugagia bida bida pabo kolesaga sogobeo homu eboso da, teda da te Juda hani isəwai we bidi haniba tau sigi paibao. Godigo dabolo te bomo yai po wai dao,

⁴⁷‘Nage eno sole tiwai nigilibe dao, te Juda
hani isəwai te tigidali tq pedaide bidalubo we bidi
augwaliba ula ilimai hagede ebao. Tama nago
tigidali tqde bidibo we bidi tau selama, Godigo
augwali ma somainu yao,’^f

wali,” Polgo te po wai. ⁴⁸Tama te Juda hani isəwai we bidi augwaligo Polgo wali po odama, augwaligo bugai homu mu yai. Bugai homu mu elama, augwaligo te Genuai Bidigo po uwgaba sai. Tama tigidali we bidi Godigo sesemane bida bida pabo kolesaga somai hagede polobadu sa muai we bidi, tama augwaligo megis Godigo po odama, te po mu po dao homu elama, te poba augwa homu tigidali muani.

⁴⁹Te tqde bidibo we bidi augwaligo Genuai Bidigo po oda pela silali. ⁵⁰Tama te Antiok be nanide te Juda hani isəwai genuai we dabe bidali. Tiali goli augwaligo Godibolo lotu po wabo dao. Tama te Juda dabe augwaligo te nogi yai we dabe dali, te kaunsil bidi dabe dali tigidalibolo bidi geme posobo po wali, Pol dali Barnabas si elemainogo yai. Tama augwaligo tega si gasa tqba gudulali. ⁵¹Tama tibaso, augwali sigo səga nadobade elaluali tq hogomu sela səwanu. Te yali sə te page elalubo. Augwali sigo te bidi dabego dwai kolesaga ebo sulama, te sə yali. Tega sigo te po wai, “Duga sə dao.” Tama augwali si te Aikoniam buluba pali.^g ⁵²Tama te Antiokde bidali Jisasgo po wali pabo we bidi augwali bugai homu yali, te Godigo Dwagi Yai Mobo Bidi augwaligo homude paganaluali.

Barnabas dali Pol si te Aikoniamde bidama po pusali

14 ¹Te bidi Pol dali Barnabas si te Aikoniam be naniba sabolama, te augwali sigo polobadu te bulu Antiokde yali sə tiwai ma yali. Augwali si te Juda dabego bomo yai po ola mabo be tomoba pelama, Godigo po bugagia pusa mani. Bugagia pusa menama, te Juda dabego me, te Juda hani isəwai bidi dabego me, te Jisasgo wiegi yai poba augwa

^f 13:47 Ais 42:6; 49:6 ^g 13:51 Mat 10:14; Mak 6:11; Luk 9:5; 10:11

homu tigidali muani, umabo we bidigo tialio. ²Tiali goli, te Juda dabe me badu augwaligo te po odobo hagela homu eboso, augwaligo te Juda hani isawai dabebolo bidi posobo po gema walali, augwaligo te Pol dali Barnabas dali sigo ebo se dolomainu yai. ³Augwali si Aikoniamde hauwa sogo mu bidama, augwali sigo Genuai Bidigo po bomo elama, mu pusali. Augwali sigo te po wai, “Te Genuai Bidi agai we bidibolo dwagi yai se ebo homu ebo dao.” Tama Genuai Bidigo agai bomo augwali sibolo menama, augwali sigo we bidi nomu sabo se dabe yali, te we bidigo ‘Te bidi sigo wabo po mu dao’ omainogo yai. ⁴Tama te be nanide bidali we bidi tomode si pedali. Me badu we bidi augwaligo te Juda dabego po wali pai, me badu augwaligo te Jisasgo tagala palai bidi sigo wali po wali pai.

⁵Te Juda hani isawai bidi dabe me badu me, te Juda dabe me badu me, augwaligo genuai bidi dabe me, augwali tigidaligo te homu yai, “Dago te bidi si tigiba masigi sanama, ela muaibao,” homu yali. ⁶Tama te bidi sigo tiwaibao wabo po odobo si, tama augwali si wi pelama, Listra buluba pali. Nosali te Derbe buluba pali, te bulu si te Likonia tqe elaluali. Tama te tqe pade elaluali dwasianu bulu meba pali. ⁷Te tigidali bulu tqe augwali sigo Godigo dwagi yai po tigidali we bidibolo pususu bilali.

Augwaligo Pol tigiba masigi sayani

⁸Te Listra bulude te sagaq dwai bidi me deli bidali. Te bidi aga idago tabide sagaq tama dwai ame nai, tama agai aga sagago bilibo menio. ⁹Tama agai dugulalu, Polgo wabo po odali. Tama Pol agai suali, te bidi agai homu tigidali te Jisasba bugagia muani kolesaga te usu yali, aga dwagi yai ma ilainogo elalubo usu da homu yali. Tama Pol agai te bidi gedugo bomonama dolo ponama tonaluali. ¹⁰Tama tialima Polgo bomonama tonalu, agai po bomonama pusuyu te tama wali, “Nage hodaluama, naga sagaq sigo bugagia dolalua,” te po wai. Tama te bidi agai polo hodaluama, aga sagago bilibo gagalali. ¹¹Tama te Likonia tqe we bidi dabe hauwa augwali sisinagaselama, Polgo wabo po odali. Augwaligo Polgo te yali se sulama, Likonia pogo moni i wali, “Dago god dabe dagaludu da pageba dulalio. Tama te bidi sigo tigide bidibo,” te po wai. ¹²Tama te we bidi augwaligo Barnabas te Sus nogi poai, te Sus aga augwaligo genuai tobolu god da. Tama augwaligo Pol suali, agai po wabo bidi, augwaligo te nogi Hermes poai, augwaligo po wabo god nogi. ¹³Tama te tibo god Sus lotu wabo be te be nani sesege badu elaluali. Te Susbolo nai ulama mabo pris bidi agai omai kibu bulmakau dabe magasali. Tama magaselama, te dwagi yai ni yabe tau dabe selama, kibu bulmakau magede domonani, au yali. Augwaligo homugo te kibu bulmakau dabe elama, te bidi sibolo augwaligo lotu po wainogo.

¹⁴Te Barnabas dali Pol si augwaligo te we bidi augwaligo augwali sibolo lotu po wainogo ebo sulama, augwa si ugwa pisa yali, augwali

sigo te së hagela baso. Augwali si te we bidi tomoba polo pelama, te we bidibolo bomona weyu, te po wali,¹⁵ “Dagego te kolesaga egimio. Dadi si me bidi dage tiwai tama dao,” wali. “Dadi si dage pageba asali, Godigo dwagi yai po dagebolo pusa mawainogo asai dao. Tama dagego te odolali lotu po wabo tibo god tudiba muiyao. Tudiba munama, dagego te God mu pageba asiyo, hauwa sogo bida bida peduabo God pageba asiyo.

Agai te dagalu me, tq me, tamu aq me, tigidali tede bidibo nai dabe me agai nigai dao.¹⁶ Tama polobadu Godigo tigidali we bidi hani augwa kolesagadu pabo sula tagalai.¹⁷ Tiali goli, agai tigidali sogo tigidali we bidi augwaligo aga bidibo konemainu, dwagi yai nai dabe we bidi tomode mubo dao. Agai te dagaludu tulubage me, giliga nanobo sogo me, agai daj ilibo dao. Tama agai nai pedalama, tama dage bugai homu emainogo te së ebo dao,” augwali sigo te po wai.¹⁸ Tama te we bidi augwaligo te bidi sibolo lotu po bomonama wainu yali, augwali sibolo nai noga mawai hagede me. Augwali sigo moni së bomo mu elama, te we bidigp ebo së paliali.

¹⁹ Te nosali te Juda dabe me badu Pisidia tqde bulu me si elalubo, me nogi Antiok, me nogi Aikoniam. Te bulu side Pol dali Barnabas dali si polobadu osogo bidali. Te Juda dabe augwali tedu te Listra buluba aselama, augwaligo tigidali we bidi homu hodolama, tama augwaligo Pol tigiba masigi sawai. Masigi sanama, tama agai mu isai bidi gagayali homu elama, augwaligo aga tigi be nani buluba kegasa pelama, mugi pali.²⁰ Tialima, te Jisasgo po wali pabo we bidi augwali sisinagaselama, agai tigi bologobeaa sagasali. Bologobeaa sagaselama, Pol ma hodolama, te be nani tomoba ma pali. Tama te sogo kigamu aga dali Barnabas dali si te gasa be naniba pali, te be nani nogi Derbe.

Pol dali Barnabas dali si Antiok buluba ma pali, te Siria tqde

²¹ Te bidi Pol dali, Barnabas dali augwali sigo te bulu Derbede bidibo we bidibolo Jisasgo dwagi yai po pusa mani. Tama pusa menama, we bidi hauwa mu Jisasba augwa homu mu muani. Tama augwali si te Listra be naniba tqdu ma geasa pelama, te Antiok be naniba sabolali, te Pisidia tqde. ²² Augwali sigo te Jisasgo po wali pabo we bidibolo dwagi yai po mobo mani, augwaligo Jisas konealubo homu daj walomainu. Augwali sigo te genuai po ola mawai, “Dago te Godigo tudu pobadi, gasa we bidi augwaligo dabolo haniani sëge mawaibao, tama nosali Godigo da tonalubo buluba da sabolaibao,” te po wai.²³ Tama tigidali bulude augwali sigo Jisasgo po wali pabo hani we bidi tonaluabo toboli bidi daj ilali. Tama nai osogo gisilama, Godibolo po olama, augwali sigo te toboli bidi dabe Godigo nogode muai, augwaligo aga konealubaso.

²⁴ Te Pol dali, Barnabas dali si augwali te Pisidia tq tomodu pelama, te Pamfilia tqba sabolali. ²⁵ Teba sabolama, augwali sigo Godigo gesi dwagi

yai po te Perga be nani we bidibolo pusa mawai. Tama tedu pelama, Atalia buluba sabolali. ²⁶Tama augwali sigo Atalia bulu taga pelama, moni geba deli selama, tama qidu pelama tama Antiok buluba sabolali. Tama te bulude polobadu Jisasgo po wali pabo hanigo augwaligo nogo tega si tobolude munama, agai tega si tau somainu, Godibolo gedu haluasa po wai. Te po olama, augwaligo te bidi si polobadu tagala palali. Tama augwali si te tqba ma sabolali, te se egi pomai hagede, tama augwali sigo te se ela bila silama, ma asali. ²⁷Tama augwali si Antiokba ma sabolama, augwali sigo Jisasgo po wali pabo we bidi dali deliba sisinagasali. Tama augwali sigo te se yali po augwalibolo pusali, tigidali nai Godigo augwali si tau sali se me, tama Godigo te Juda hani isawai we bidi augwaligo agai po konealubo sunumi dayali. ²⁸Tama augwali si Jisasgo po wali pabo hani dali bobobage sogo mu bidali.

Augwali Jerusalemba sabolama, genuai po mu miani

15 ¹Te Jisasgo hani we bidi me badu augwaligo Judia tq taga pelama, Antiok be naniba sabolali. Tama augwaligo Jisasgo hani Juda bidigo lotu po wabo kolesaga wali pomainu ola manio. Tama augwaligo te po wali, “Moses agai bomo yai pogo te tigidali bidi Godigo hani mu bidao wali. Tama tilama, tigiwali togwao, Godigo däi muao. Tama dagego te se isabaso da, Godigo dage sogobeo,” te po wai. ²Tama Pol dali Barnabas dali augwali sigo te po wabo mu hagela yali. Tama augwali sigo te Juda bage dali moni pogo wabi hwjanı, tama augwali sigo moni wado mu yali. Tama Antiokde bidali Jisasgo po wali pabo we bidi hanigo Pol dali Barnabas dali si, te bidi dabe me badu me, augwali Jerusalemba moni po miboba augwali pomainu homu yali. Jisasgo tagala palai bidi dabe me, tobolu bidi dabe me, augwali deliba sisinama, te po dodolomainu yaibao.

³Tama tibaso, Jisasgo hani Antiok be nani bidigo augwali Jerusalemba pabo bidi dabe tagala palali. Tama augwali Fonisia tq dali, Samaria tq dali, te bulu si tomodu augwali pali. Tama te sogo augwali Jisasgo hani dali bidu, augwaligo se ebo po dali pusali, me badu Juda bidi hani isawai bidi, augwali te sogo Jisasba augwa homu mu muani, te po augwalibolo pusa mani. Tama te sogo augwaligo te po odama, augwaligo moni bugai homu mu yali. ⁴Tama peyu, augwali Jerusalemba sabolali. Tama tigidali Jisasgo hanigo augwali sulama, dwagi yai homu yai, Jisasgo tagala palai bidi me, tobolu bidi me, augwaligo moni dwagi yai homu eyu augwali asobo suali. Augwali sigo augwalibolo Godigo tigidali se augwali si bilu yali se po pusa mani. ⁵Tiali Jisasgo hani bage me badu augwali te Juda dabego lotu po wabo bidi Farisi sibi da. Augwali doligulama, te po wali, “Te Jisasgo po wali pabo we bidi me badu, augwali te Juda hani isawai bidi dabe dao,” wali. Tama augwaligo augwali sibolo tama wali, “Dage

sigo te hanibolo te po wao, augwaligo Godigo Mosesbolo mani po mu wali pao, tama dage tigiwali togolama, tama Mosesgo yali kolesagadu wali pao,” te po augwali sibolo tama ola mani, te Farisi sibi bidigo.

⁶Tialima, nosali te Jisasgo tagala palai bidi me, te tobolu bidi dabe me, augwali sisinagasali, te po dodolomainu. Augwaligo homude elaluali po pususu pali. ⁷Pususu pelama, Pita doligulama, te po tama wali, “Ama dede, duga kone dao, Godigo homugo te Juda hani isawai bidi me augwaligo te Jisasgo dwagi yai po odama, augwa homu te poba mumainu yali. Tama polobadu mu God agai ena dage tomode te dwagi yai po augwalibolo pusumainu sa muani. ⁸Tama God agai da dago homu tigidali konebo da. Tama God agai Dwagi Yai Mobo Bidi te agai dabolo hasia mani tiwai, tama nosali augwalibolo me manio, te Juda hani isawai bidi dabe. Tama menama, dago koneagameo, Godigo augwali dali dwagi yai homu ebo dao. ⁹Tama Godigo te Juda hani isawai bidi hanibolo ebo se te ebo kolesaga tiwai, agai da dali yali, polobadu. Tialima, augwaligo te Jisasba augwa homu mubo si, agai augwaligo dwai kolesaga yali sege sela sawai dao. ¹⁰Tama dagego te Juda hani gagasiwai bidi sege mabo tagaliqo. Dagego ‘Dage Mosesgo po naga wali piqo’ po augwalibolo wagimio. Magi basowe? Augwali usu egobeo. Suao. Dago wai me, dago me, te Mosesgo mani bomo yai po wali pabo se bugagia wali pogobeo. Te tiwai moni sege dago tudide tolobo dao. Tama tiwai sege dagego augwalibolo mobaso da, dagego God usu saibao. ¹¹Te dwali. Tialima, dago Jisasba dago homu tigidali mubo dao, tama dago konebo da, Genuai Bidi Jisas agai dago yali dwai se agai tolai dao. Da tigidali we bidi Godigo da te tu deligo naga saibao. Tialima, agai te Juda hani isawai we bidi me te tudu naga ma saibao,” Pitago augwalibolo te po wai.

¹²Te po minama, tigidali bidi po sagia selama, Barnabas dali Pol dali sigo tigidali bomai se Godigo augwali si nogode yali se po pusali, te sogo augwali si te Juda hani isawai bidigo tqde biliyu, te se yali po pusali. ¹³Tama augwali sigo te po silibo si, Jems aga augwa tobolu bidi gagalama, aga dodoligulama, te po wali, “Ama dedeo, dagego eno po odao. ¹⁴Megi te Pita agai po dabolo pusali. Tama dago koneao, hasia sogo mu Godigo te agai hobede ebo homu te Juda hani isawai we bidibolo me manio. Tama Godigo me badu aga hani mu nigimai hagede daj ilai dao. ¹⁵Tama Godigo pedauwalide po selama pusubo buku da deli po tama tiwai augwaligo aseai da. Te po e tiwai,

¹⁶‘Genuai Bidi agai te po wai, “Nosali sogo ena ma asaibao. Augwaligo be me dodolama bidibo, polobadu be gagawali, degasa palio. Tiali goli eno te be ma gesi se yaibao. Tama te tiwai eno gesi kolesaga te Devitgo hani ma hodalagasaibao,” wali. ¹⁷“Tama gasa hani augwaligo me ena

gegebo sē yaibao, ena Genuai Bidi dao, te Juda
hani gagasiwai bidi me. Tiali goli, eno augwali
eno hani tomoba asomainu eno i wai dao,” wali.¹⁸ “Polobadu mu
Genuai Bidi agai te sē pedalabo po
wai dao, tama megis te sē pedalalio.”¹⁹^h

¹⁹ Te Jems agai te po pusali, “Eno homugo tama tibao. Dago te Juda
hani isāwai Jisas wali pabo bidi dago sēgē magio. Augwali God pageba
asali, tama dago augwali dago kolesagadu pao olama i wagio.²⁰ Me ma,
dago augwalibolo pas tolinao. Tama te pas tomode te po wainao, ‘Dagego
te augwaligo te tibo godibolo ula mabo nai te dagego tugimio, dagego
kibu me agai kaneme gelisāwai kibu tugimio, kaneme me tugimio. Te we
sabo bomo yai po bolama, dwai penani sē egimio,’ waibao.ⁱ ²¹ Te sē po
Moses agai aga bukude aseai dao, polobadu mu. Tama lotu po wabo sogo
tigidali augwaligo te Mosesgo po lotu be tomode nedebo dao. Tialima,
augwaligo koneama, te sē ebo habu mu selai dao,” Jemsgo te po wai.

Augwaligo te Jisasgo po wali pabo hani mebolo te pas tolali

²² Te Jisasgo sa muai tagala palai bidi dabe dali, te tobolu bidi dabe me,
te Jisasgo po wali pabo we bidi tigidali me, augwaligo deli homu elama,
bidi me badu augwaligo Antiok buluba tagala palabo homu yali. Augwaligo
bidi si dāj ilai, te Pol dali Barnabas si dali pomainu yali. Bidi si dāj ilai, te
bidi nogi me Judas, agai nogi me Barsabas, te gasa bidi nogi me da Sailas.
Jisasgo po wali pabo bidi dabe augwaligo te bidi side dwagi yai homu yali.
²³ Tama augwaligo te pas sela pomainu, augwaligo te po aseani,

“Da Jisasgo tagala palai bidi dabe me, tobolu bidi dabe me, te Jisasgo
hani me, Jerusalemde bidibo bage, da tigidali dagego ama da. Dago
te pas dage pageba te aseña tolobao wali, Siria bulu me, Antiok bulu
me, Silisia bulu me, dage Israel hani isāwai bidi, dago dagebolo bugai
homu ebao, te po wali.²⁴ Tama dago po odalio, dago hani bage me badu
augwali dage pageba aselama, augwaligo dagego homu dolali. Augwaligo
me me po walio, tiali goli dago te hani dage pageba me tagala palai
menio.²⁵ Tama megis da deliba sisinagaselama, dago deli homu elama,
te bidi si dage pageba tagala palali. Augwali si Pol dali Barnabas dali si
hodobo pali. Pol dali Barnabas dali si te dago godolo mu ebo da.²⁶ Tega
sigo Genuai Bidi Jisas Kraisgo sē eyu, moni homu ebe, gasa bidigo
augwali elebaso, usu dao homu yali.²⁷ Tialima, dago Judas dali Sailas
dali te augwali si dage pageba tagala palobao. Augwali sigo dago pasde
aseani po tiwai po dagebolo pusa mawaibao.”

²⁸ “Godigo Dwagi Yai Mobo Bidi dali, da dali si te deli homu ebo da,
dago dagebolo gasa sēgē magobeo, da Juda hanigo kolesagadu wali pabo

^h 15:18 Amo 9:11-12 ⁱ 15:20 Sai 34:15-17; Prs 17:10-16; 18:6-23

sege. ²⁹Dago homugo e po naga dagego wali pião. Dagego te augwaligo te tibo godibolo ula mani nai dagego tugimio. Kaneme me tugimio. Agai kaneme gelisawai kibu tugimio. Dagego we sabo bomo yai po bolama, penani egimio. Tama dago e ola mani po dagego wali peyu da, te dage bugagia bidaibao. Tama dao. Dage tao,” te po aşənai.

³⁰Augwaligo te pas aşənama, te bidi dabego sela pelama, te Antiok be naniba sabolali. Tama augwaligo tigidali Jisasgo po wali pabo hani deliba sisinama, te pas augwalibolo mani. ³¹Tama te sogo te Antiok we bidigo te pas aşənai po odama, augwali bugai homu mu yai, te pas tomode elalubo pogo augwaligo homu tau siyu dąu walali. ³²Te Judas dali Sailas dali te bidi si Godigo pedauwalide po selama, pusubo bidi da. Augwali si da Jisasgo hani dali hauwa sogo mu bidali, tama augwali sigo augwalibolo po pusulama, tau siyu dąu walali. ³³Tama augwali si tede hauwa sogo bidama, tama nosali Jisasgo po wali pabo hanigo tega si Jerusalemba ma tagala palali. Tama augwaligo te po wali, “Dage dwagi yai homu dali pao, te dage tagala palali bidi dabe pageba,” te po wai. ³⁴Tiali goli, Sailas aga homugo nigilama, te Antiok bulude bidali.

³⁵Te Pol dali, Barnabas dali si augwali si Antiok bulude bidali. Augwali si tede bidu, tama Jisasgo po wali pabo we bidi dali wadolagasali, we bidi Godigo dwagi yai po pusubaso bidali.

Augwali si Jisasgo po wali pabo we bidi hani dali bidu, Godigo dwagi yai po pusubadi, Godigo po odisa yali we bidibolo Godigo dwagi yai po pusu baso, Jisasgo po wali pabo we bidi pageba wadolagasali.

Pol dali Barnabas si bobegai po

³⁶Te nosali me badu polua silama, Pol agai Barnabasbolo e tama po walali, “Dadi si ma pelama, dadi sigo Genuai Bidigo po polobadu pusa mani we bidi augwali Godigo po bugagia wali pabo wenama, sugi pinao,” te po wai. ³⁷Barnabas agai homugo te bidi Jon, agai nogi me da Mak, aga dali pai homu yai. ³⁸Tialima, polobadu Mak aga augwali si dali pai goli, Pamfilia tqde bidibadi, ma wi pai. Tama agai augwali sigo te yali sə silisabadi yali. Tama tibaso, Polgo aga dali wado po wali, te Barnabas dali. Pol agai homugo Mak augwali si dali pogobe homu yali. ³⁹Tama Pol dali Barnabas dali si deli homu ebe, tama tilama, augwa si ma wado po olama, bobegali. Tama Barnabas agai Mak selama, augwali si moni geba selama, tamu aj̄i tomode elalubo Saipras tq teba pai. ⁴⁰Tiali goli Pol agai Sailas daj̄ ilai dao. Tama Jisasgo po wali pabo bidi hani augwaligo Godibolo po olama, “Tega si Genuai Bidi, nago tau sao,” te po wali. Tama olama, augwaligo tega si tagala palali. ⁴¹Tama augwali si Siria tq tomode tqdu pali, te Silisia tq tomode me. Tama augwali sigo Godigo po wali pabo we bidi hani tau sabo dąu walobo sə ela bilali.

Pol badi Sailas badi augwali si pabode Timoti me hodobo pali

16 ¹Te Pol aga Derbe be naniba sabolali. Tama nosali te Listra buluba pali. Tede agai bidi me deli suai, te bidigo nogi Timoti.

Aga dali, aga ida dali, augwali si augwa homu tigidali Jisasba munaluali. Te aga ida da te Juda hani we da. Tialima aga aya da, te da Grik hani bidi da.² Tama te tigidali Listra bulude bidibo bidi me, te Aikoniamde bidibo bidi Jisasgo po wali pabo hani, augwaligo Timoti ‘Te dwagi yai bidi dao’ homu yai.³ Tama Pol agai homugo Timoti aga dali sēba paibao homu yali. Tiali goli, agai koneani, te Juda hani bidi augwaligo Timoti aga ayade moni homu yali, augwaligo te homu yali, ‘Aga aya da Grik bidi da’ homu yali. Tama aga aya agai te sogo Timoti tigiwali togobe. Tialima, Polgo Timoti tigiwali togwali, te Juda bidi gagamai hagede dāj ilali da, te Juda dabego Timoti agai wabo po odomainu yali.⁴ Tama augwali te bulude bilali, te sogo Jisasgo po wali pabo hani dali sisinama bidali, te Jisasgo tagala palai bidi me, tobolu bidi dali augwaligo Jerusalemde polobadu wali po ola mani. Augwaligo “Dagego te wali po bugagia wali piəo,” wali.⁵ Tama tibaso, Jisasgo po wali pabo hani tigidali augwaligo bomo salio. Tama umabo we bidi te Jisasgo po wali pabo we bidi tomoba tigidali deli deli sogo asali.

Pol agai nade te Masedonia bidi suali

⁶ Te nosali Pol dali aga dwasianu hani dali, augwaligo homugo te Esia tōba pabo homu yali. Tiali goli Godigo Dwagi Yai Mobo Bidigo augwali si te bulu Esiaba pelamuo po olama, habu seleyu, tū sinilani. Tama tibaso, augwaligo Frigia tō dali, Galesia tō dali te si tomodu pali.⁷ Tama te sogo augwali Misia tō dāj sesegeba sabolali. Augwaligo homugo te Bitinia tō tomoba pabo homu yai. Tiali goli Jisasgo Dwagi Yai Mobo Bidigo te tū ma paliali.⁸ Tama tibaso, augwaligo Misia tō tomodu peyu, augwali te be nani Troasba sabolali, te nabis bulu da.⁹ Tama te sogo hulide Polgo na gagawai yali. Agai Masedonia tō bidi me deli dolalubo suali. Aga aselama, Polbolo bomo elama, hanalu wali, “Nage e Masedonia tōba aselama, da tau sagasao,” wali.¹⁰ Te sogo Polgo na gagawai elama, te sogo ena Luk da Pol dali munasa pali, tama dago walu dabe polo sisi elama, dago geba gezelama, Masedonia tōba pai hagede. Dago koneai, Godigo da i wali, agai dwagi yai po tede bidibo we bidibolo ola momainu yai.

Te we Lidia agai Jisasgo po wali pai

¹¹ Te tama da te Troas be nani taga pelama, da gebadu pelama, te Samotres tamu aīj tomode elalubo bulu teba dolo pali. Da pilama, do kigamu geba selama, da Neapolis be naniba tagaligi palio, sabolalio.¹² Tama dago Neapolis taga palio, augwaligo moni genuai taunba pali, te bulu nogi Filipai. Te bulu moni genuai bulu mu da, Masedonia tōde te bulu deli tobolu elalubo da. Te Rom bidi hani tede bidu, tonalubo da. Tama da te bulude hauwa sogo mu bidali.¹³ Tama te Juda bidigo lotu po

wabo Sabatde da te be nani tagalama, buluba pali. Da te moni pabo aq sesegeba bidigi pali. Dago te po odali, te pesagede me badu Juda dabe augwali deliba sisinama, Godibolo po wabo dao wali. Tama dago we dabe me badubolo te Jisasgo po dago augwalibolo ola manio.¹⁴ We me deli bidali, dago po wabo agai odali. Te we nogi Lidia, te Taiataira be nanidu polobadu asali. Te we agai ebo sē da te nene gagawai nami ugwa agai gasa bidibolo menama, monego abelebo sē ebo da. Tama te we agai Godibolo lotu po wabo da, tigidali sogo. Tama agai Polgo po wabo odalio, tama Genuai Bidigo te wego homu dwagi yai ilali, te wego Polgo wabo po bugagia odomainu yali. Te sogo te wego homu tigidali Kraisba muani.¹⁵ Tiali da dago aga dali agai bede bidibo we bidi dali baptais mani. Tama agai dabolo te po wali, “Dagego homugo eno Jisas wali pabo homu ebaso da, eno homugo Jisas mu konealu baso da, teda dage aselama, eno beba bidagasao, osogo,” te po wai. Tama agai “Dage eno beba pinao” wali bomo mu yali. Tama tibaso, da aga dali pai.

Pol dali Sailas augwali si Filipai bulude kalabus yali

¹⁶ Te me sogo da te Godibolo gedu haluasa po wabo pesageba pobadi, tama dago wegi me deli asobo suai. Te wegi te mone sisabō sē ebo wegi da. Dwai mobo me deligo te wegi tigide dagawai elaluali. Te dwai mobogo te wegibolo te we bidigo nosali yabo sē po ola mabo da, te wegigo pedauwalidu te po wabo da. Tama te wegi sēde bidu, olo dali aga tonalubo bidigo nai sela tubo da. Umabo we bidi aselama, augwaligo nosali yabo sē po te wegigo augwalibolo ola momai hagede asai. Augwaligo mone ge te wegibolo menama, nosali te wegigo te po pusubo da. Tama elama, te wegi tonalubo bidi dabe augwaligo umabo masigi mu sabo dao.¹⁷ Tama te wegigo agai da dali Pol dali sulama, wali asali. Wali asobadi, agai po bomonama mu wali, agai te po weyu, we bidi dabebole te po wali, “E bidi dabe te Genuai Bidi Godigo sē ebo bidi dao,” wali. “Augwali asali da, dagebolo Godigo dage ma sabo tū po ola mawai hagede asalio,” te po wai.¹⁸ Tama te wegigo agai umabo sogo tama naga tiali. Tibaso, nosali Pol aga hagela mu yali. Pol aga begegi solama, te dwai mobobolo te po wali, “Eno Jisas Kraisgo bomode nagebolo obao,” wali, “te wegi tagalama, nage pao.” Pol agai te po olama, tama te dwai mobogo te wegi polo taga pali.¹⁹ Tama te wegigo te gasa bidigo nosali yabo sē po ma pusube. Te sogo te wegi tonalubo bidi dabego koneani, augwaligo mone sabo sē dolo baso, tama augwaligo Pol dali Sailas dali nogo tolasa, te tobolu bidi dabego po tū ebo pesageba odasa pali.²⁰ Te augwaligo tega si genuai Rom gavman bidi pageba odasa pali. Tama augwaligo te po wali, “Dagego te Juda hani bidi si suo. Tama augwali sigo dwai hagoma ebo kolesaga dago bulu tomode yalio,” wali.²¹ “Da Rom bidi da, tiali goli e bidi sigo da gasagi yai kolesaga ola mabo da. Te

kolesaga te da Rom bidi dago kolesaga tiwai menio. Duga bomo yai po elalubaso, tama augwali sigo te kolesaga me te wali po tiwai me dago ilamuo,” te po wai. ²²Tama te tonaluali we bidi augwaligo te bidi sibolo dwai po wali, tama augwaligo te bidi si elebo gagalali. Tama te po tū ebo toboli bidigo te enesigi bidibolo po wali, “Augwali sigo gudubo ugwa peda sanama, keloago tudi badu elao,” wali. ²³Te tiwai obaso, augwaligo te bidi si hauwa sogo mu keloago elali. Tama nosali augwaligo te bidi si kalabus beba nogo tulama, sağı pali. Tama te po tū yali bidi dabe augwaligo te kalabus bidi tonalubo toboli bidibolo bomai po mu wali, “Nago te bidi si bugagia tonaluao,” wali, “augwali si wi pabuo.” ²⁴Tama te bomai po odama, te kalabus bidi tonalubo toboli bidi agai te Pol dali Sailas dali si odasa pelama, te moni dāj todogo pai te masigigo nigai be habu muba tagaligi pali. Tama te bidi si moni ni pedai si dudulaweba saqā si tagalaluama, ma lok dāj walali.

²⁵Te huli tomode mu Pol dali Sailas dali sigo Godibolo po weyu, aga nogi ugwaba sabo balia dabe weyu bidali. Tama te kalabus bede bidali bidi dabe me badu augwaligo te balia po wabo odali. ²⁶Tama tibadi, moni tq mali polo yali, te kalabus be ni dabe togwa pali, te be tū dabe polo augwa digi dala pali. Te augwaligo nogode kēani aligabo bono aga digi pisagana pali. ²⁷Tama te kalabus bidi tonalubo toboli bidi aga hodaluama, suali, te kalabus bede be tū tigidali dalalubo suali. Agai tama homu yali, ‘Kalabus bidi tigidali wi pali dao,’ homu yali. Tama tibaso, agai homugo ‘Genuai gavman bidigo ena elainao,’ homu yali. Te homu elama, aga moni ge hwā kugulude walaluai hwā ugwa diā selama, aga digi tabide elainu yali. ²⁸Tiali goli, Polgo agai moni po mu tama wali, “Naga digi ma elegio,” wali. “Da wi pabeo, da tigidali me bidibao,” wali. ²⁹Tama te kalabus bidi tonalubo toboli bidi agai te enesigi bidi i weyu, te po wali, “Sole selasa asao,” wali. Tama sole selama, agai te kalabus be tomoba polo pali. Agai moni wi mu elama, didibili yali. Didibili ebadi, agai toboli Pol dali Sailas dali si saqā pageba muani. ³⁰Tama agai tega si buluba odasa pelama, hanalu wali, “Dage si genuai bidi dao. Eno magi se elama, Godigo eno yali dwai sē sela sāmainu, Godigo ena ma sogowe?” wali. ³¹Tama Polgo agabolo te po wali, “Nago homu tigidali naga Jisas Genuai Bidi teba muyu da, te nage tigidali sogo bugagia bidaiba, Godigo nage dali nago bede bidibo we bidi dali ma saibao,” wali. ³²Tama augwali sigo Jisasgo dwagi yai po aga dali, aga hani dali augwalibolo pusa mani. ³³Tama te sogo hulide te kalabus tonalubo toboli bidi agai homu Jisasba mu muani. Agai tega si selama, te bidi dabego keloago elali madigi keni te qāgo tedelama, ugwa nami selama, te kenide kēani. Pol dali Sailas dali sigo te kalabus bidi tonalubo bidi dali, aga bede bidibo we bidi dali te sogo tama baptais mani. ³⁴Tama te bidigo Pol dali, Sailas dali si agai be tomoba odasa pelama, augwali si agai nai mani. Tama te

tobolu bidi dali, aga bede bidali we bidi dali augwaligo moni bugai homu mu yali. Magi basowe? Te sogo augwaligo augwa homu tigidali Godiba mu muani.

³⁵Te sogo kigamu te Rom gavman genuai bidi dabe augwaligo te enesigi bidi dabe tagala pelama, te kalabus bidi tonalubo toboli bidibolo te po wai, “Nago te bidi si olo tagala pelama, pomainao,” wali. ³⁶Tama tibaso, te kalabus tonalubo toboli bidi aselama, Polbolo wagasali, “Te Rom genuai bidi dabe augwaligo enabolo po ola tolalio, ‘Dage si meg i pao’ po walio. ‘Dage si pião, te po me menio,’ wali,” te po wai. ³⁷Tiali goli, Pol agai te po selasa asali enesigi bidibolo te po wai, “Woo,” wali. “Tialima, dadi si kalabus yali, augwaligo te page me gegebeo,” wali. “Te magi baso augwaligo da elama, da tigidali we bidi gesabide hale mawai dawe? Da si Rom bidi mu dao, dadi sigo nogi te Rom gavmanigo bukude elalubo dao. Te gavman bidi dabego konebewe? Megi augwaligo homugo dadi sigo pedauwali panama, dadi sigo augwali dali po wasiama, geme paibao. Augwa dwai kolesaga dadi si dali elama, te ma dualaibawe? Te menio,” wali. “Dadi si olo me pogobeo,” wali. “Te Rom gavman genuai bidi dabe augwa digi aselama, dadi si tagala palomainao,” Pol agai te po wai.

³⁸Te po selasa asali enesigi bidi dabe ma pelama, te Rom po tū ebo bidi dabebolo Polgo wali po pusigi pali. Tama te sogo te po odobo si, Pol dali Sailas dali si Rom bidi mu si da po odobo si, augwali wi mu yai. ³⁹Tama tibaso, te Rom po tū ebo bidi dabe augwali te kalabus beba pelama, Pol dali Sailas dali sibolo te po wai, “Dago dwai kolesaga dage side yali ma, da homu dene mu ebao,” wali. “Dage si e bulu tagalama, gasaba pagameo,” te po wali. ⁴⁰Tama Pol dali, Sailas dali si te kalabus be tagalama, te we Lidiago beba pali. Tede Jisango po wali pabo we bidi hani dali deliba sisinama, tama augwali sigo po pusulama, augwaligo homude dāq walobo po pusa mani. Tama augwa si peyu, augwali taga pali, te Filipai be nani taga pali.

Te Tesalonaika be nani bidi augwaligo Pol dali Sailas dali elai hagede yali

17 ¹Te Pol dali, Sailas dali si pelama, te Amfipolis be naniba sabolali. Te bulu taga pelama, Apolonia be naniba sabolali. Tede te Juda dabe augwaligo bomo yai po ola mabo be elaluai. ²Tigidali bulude bilu, Pol agai te Juda dabego bomo yai po ola mabo beba pabo koneai dao. Tama tibaso, Tesalonaikade me aga bilu, te beba pali. Tama agai Godigo bukude elalubo po nedama, aga Juda dabe dali po miani. Agai te sē Sabat sogode ela bilibadi, Sarere sela silali. ³Te sogo agai augwalibolo te po hania wali, te Godigo sa muani bidi, te we bidi tau somainu sa muai bidi

Kraisdé po agai ola mani. “Suao,” wali. “Godigo po elalubo bukude e po elalubo, te bidi Godigo dabolo tagala palaibao,” wali. “Agai moni dene tolama, isaibao. Tama nosali aga ḡu pagede ma hodalueibao. Tama megí eno dagebolo Jisas aga digi te Godigo sa muani bidi Krais dao obao,” Pol agai te po wai. ⁴Tama bidi me badu augwaligo te po odama, augwa homu te poba mu muani. Tama augwaligo Pol dali Sailas dali side wadolagasali. Tama me badu umabo bidi Grik po wabo bidi hani da, augwaligo Godibolo lotu po wabo, augwali me augwa homu te poba mu muani. Tama te nogi elaluai we dabe hauwa, augwali me augwa homu tigidali te Polgo wali poba muani.

⁵Tiali goli, bidi me badu te Juda bidi hani da, te augwaligo umabo we bidi Pol dali Sailas dali si wali pabo sulama, augwaligo səbə mu yali. Tama tibaso, te Juda hanigo te dwai bidi dabe tigidali sogo augwali te sisinabo pesagede olo bilalubo suali. Tialima, augwaligo te dwai bidi hani deliba sisinani. Tama augwali udulama, bilu, moni po daḡa wali, umabo we bidi hodalu, Pol dali Sailas side wado yali. Tama te Juda dabe me, te dwai bidi dabe me, augwali tigidali sisinama, peyu, te bidi nogi Jesongo be bogobea sali, be t̄u aluama togo sənana, Pol dali Sailas dali si kekasa painu, te augwali si po t̄u egi painu tama yali. ⁶Tiali goli, augwaligo tega si gegali munu me sube. Tama tibaso, augwaligo Jeson badi, me badu Jisasgo po wali pabo bidi dabe badi, augwaligo te bidi dabe nogo tulama, te bulu page bidi kaunsil bidi pageba odasa pali. Augwaligo moni daḡa bomai mu weyu, te po wali, “E bidi dabe augwaligo gasa kolesaga eyu, tigidali bulude bidibo we bidi dolobo dao,” wali. ⁷“Megí augwali dago moni be naniba sabolali, e bidi Jesongo agai beba bidagaso wali. Dagego suao,” wali, “augwaligo te dago Rom genuai gavman bidi Sisargo po dolobo. Tama augwaligo te po wali, ‘Dago gasa bidi wali pinao’ wali, ‘te bidi nogi Jisas da,’ ” te po wai. ⁸Augwaligo tama po wali, tialima tigidali we bidi me, te kaunsil bidi dabe me, tigidaligo moni po daḡa olama, augwaligo te yali s̄ede dwai homu eyu səbə yali. ⁹Tialima, te kaunsil bidi dabe augwaligo Jeson dali aga hani dali side te mone ge sai, tama augwalibolo tama po ola mani, “Nosali te yali s̄e ma eboso da, te dagego te mone ge ma sogobeo,” wali. Te po olama, augwaligo augwali tagala palali.

Pol dali Sailas augwali si Beriade s̄e yali

¹⁰Te sogo be huli asobo si, te Jisasgo po wali pabo hani augwaligo Pol dali, Sailas dali si te Beria be naniba tagala palai. Tama augwali si pelama, te buluba sabolali. Tama sabolama, te Juda dabego bomo yai po ola mabo be tomoba pai. ¹¹Te Beria bidi dabe te Tesalonaika be nani bidi hani tiwai meni. Te polobadu te Tesalonaika bagego tega sigo po polo sela s̄awai dao. Tiali goli, te Beria bidi hani augwaligo da bugai homu elama,

te po odali. Tama tigidali sogode Godigo po aşai bukude nedali, Polgo wali po usu niba pabo wenama suali.¹² Tama te Juda we bidi hauwago augwaligo homu te Jisasba muani. Te umabo Grik po wabo nogi elalubo we dabe me, augwa homu Jisasba muani, te Grik po wabo bidi dabe me. (Te augwali Jisasgo po wali pabo hani tomoba asali.)¹³ Tiali goli, te Tesalonaika be nanide bidali Juda bidi dabe augwaligo te Polgo Godigo po Beria be nanide me ola mani po odobo si, augwali te Tesalonaika taga solama, Beriaba sabolai. Tede te Tesalonaika Juda dabego te we bidi dabe sisinama, dwai sēbē yabo homu hodolali. Te homu hodolobo po obaso, augwaligo Pol dali, Sailas dali side dwai sēbē yai.¹⁴ Tama polo te Jisasgo po wali pabo bidi hani augwaligo Pol dali bidi me badu dali te nabisba tagala palali. Tiali goli, Sailas dali, Timoti dali te Beria be nanide bidaluali.¹⁵ Tama Pol dali pali bidi dabe augwaligo Pol te Atens buluba tagaligi pali. Tama augwali Beriaba ma aselama, Polgo Sailas dali Timoti dali sibolo wali po pusagasali, “‘Dage si Pol bidibo buluba polo asao,’ wali. Tama agai te po dabolo tama walio,” augwaligo te po wai.

Pol agai te Atensde bidibo we bidibolo po pusa mani

¹⁶ Te bidi Pol te moni hanu nogi Atensde te Sailas dali Timoti dali si asobo tonaluali. Tama tonalubadi, agai suali, te bulude bidibo we bidi dabego tibo god wali pabo kolesaga umabo yali. Tama tibaso, Pol agai te tibo sulama, moni homu mu yali.¹⁷ Tama tibaso, Juda dabego bomo yai po ola mabo po mibo be tomode agai te Juda dabebolo umabo po ola mani, te Juda hani isəwai bidi dabebolo me, augwaligo Godibolo lotu po wabo da. Te maketde Pol agai te maketba asobo we bidibolo sesemane sogo po ola mani. Agai homugo augwaligo Jisasgo po wali pomai hagede, te po bomo eyu ola mani.¹⁸ Tama te Epikuria hani po ola mabo bidi dabe me, te Stoik hani po ola mabo bidi dabe me, augwaligo Polgo po aiyaba elaluai hagede, pogo wəbi hw̄iāt aq yali. Te bidi me badugo te po wai, “Te bidi aga da, te mu konesiawai bidi da. Agai dabolo magi po obawe?” Me badu bidigo te po wali, “Agai te po wabo gasa habuba bidibo Godigowe?” te po wai. Pol agai te Jisasde po ola mobadi yaide, isai bidi te ḡu pagede ma hodaloabo po ola mobadi yaide, augwaligo te tobage po tama wali.¹⁹ Tama tibaso, augwaligo Pol odasa pelama, te Areopagus bulu duba tagaligi pali. Te bulu dude te kaunsil tobolu bidi dabe deliba sisinagasobo dao. Augwaligo Polba hanalubo po weyu, te po wai, “Dago homugo nagebolo hanalubo da, nago te gesi po nago koneama, tigidali we bidibolo ola mabo po, nago dabolo me ola mao.²⁰ Nago te wabo po me badu dali da noma sobao. Magi basowe? Polobadu dago te tiwai po odai menio. Tama tibaso, te po page dago bugagia odaio,” augwaligo te po wai. (Tama te sogo te Atens bulu page bidi dabe me, te gasa buludu e buluba asali bidi dabe me, augwali tigidali sogo, giligade me, pio

me bidu, augwaligo te gesi sē yabo po mibo dao. ²¹Tama te tiwai po augwaligo polobadu me odisāwai po odaio. Tama tibaso, augwaligo u po Polbolo hanalu wali.)

²²Te bidi Pol aga te Areopagus bulu dude sisinagasaki kaunsil bidi dabe tomode doligulama, te po wai, “Dage Atens bidi dabe. Dagego ebo kolesaga eno sualio. Tama eno homugo dagego umabo gasagi yai godibolo lotu po weyu, bomo mu ebo dao. ²³Tama ena e be nani tomode bilibadi, eno te dagego umabo godibolo lotu wabo pesage dabe suali. Tama eno dagego te god me delibolo hasa dabe ula mabo pesage me deli sualio. Dagego te hasa dabe ula mabo pesage masigide te po aseāni, ‘Te nai dago konesiāwai godigo nai dao.’ Tialima, dagego konesiāwai god, dagego te godibolo lotu po wabo da. Tiali goli, te god de dawe te dagego konebeo. Te god eno megī dagebolo e po pusa mabogo aga dagebolo waselaibao,” wali.

²⁴“God agai tq me, tqde bidibo nai tigidali me nigai dao. Te God agai tigidali nai dagalude elalubo nai me, te tqde elalubo nai me, tigidali aga naga tonalubo dao. Tama tibaso, bidigo nogogo sē yai lotu be tomode aga bidibo menio. ²⁵Me ma, agai dago nogode agai nai tubo mu menio. God aga digi tigidali tqde bidibo we bidibolo noma mabo dao. Tigidali nai dabe dago gegelama sabo, te Godigo naga mabo dao.^j ²⁶Godigo hasia mu bidi me deli nigai (te bidi nogi Adam). Tama nosali te bidi deligo te tigidali haniani bidi dabe dalali. Tama Godigo tigidali bidi dabe tigidali buluba dobayali, augwa te bulude bidimainu yai. Tama God aga digi polobadu mu augwali te bulu dabede bidabo sogo bodolu munama, dāj ilai dao. ²⁷God agai te sē ilai da, augwaligo ena gegemainu homu yali, tama augwaligo homugo gogone pelama, ena pageba asomainu homu yali. Tiali goli, suo, God digibulu bidibe, da pagede deli deli we bidi pagede bidibo. ²⁸God agai sē eboso da, da bidibo me, da bilibo me. Tama te page aga naga da. Te yali, duga me badu bidi dabe buku aseō koneai bidigo aseāi po tiwai dao, ‘Da bidibo me aga wai naga bidibao,’ te po aseāi. ²⁹Tama da bidibo Godigo wai dabe bidibao. Tama tibaso, dago te homu egio, te God masigi tiwai dao, te bunuwaligo nigai piksa tiwai God da, olamuo. Dago te homu ilamuo, ‘God da dago nogogo nigai dao,’ te homu egio. ³⁰Tama polobadu te bidi dabe augwaligo te sē eboso, tama Godigo po me wabe, moni homu me ebe. Magi basowe? Te augwaligo agade kuna konesiābaso. Tiali goli, megī te sogo God agai bomai po mu tagala palali, tigidali bulude bidibo bidi dabego me odomainu yali. Agai tama wali, ‘Dagego dwai kolesaga ebo tagalama, tama dage ena pageba asao,’ wabo dao. ³¹Tama agai deli sogo me bodolu mawai. Nosali te sogo agai tigidali tqde bidibo we bidi po tū ela mawaibao. Augwali po

^j 17:25 1 Kin 8:27; Ais 42:5; Tpi 7:48

tū yabo bidi Godigo sa muai dao, te bidi agai dwagi yai doloba pai po tū mu yaibao. Tama Godigo te sa muai bidi agai dabolo hania ola mani. Mena sē elama, da tigidaligo sualiwe? Agai te bidi isāma, gū pagede ma hodaluama, ma gesi bida bida paibao,” Pol agai te po wai.

³² Te sogo Pol agai bidi me deli gū pagede ma hodaluali po pusubo da, bidi me badu augwaligo te po gisugu mani. Tiali goli bidi me badu augwaligo agabolo te po wali, “Dago homugo nago te po dabolo ma pusa mao,” wali. ³³ Tialima, Pol aga te po mibo tagalali. ³⁴ Tama bidi me badu augwali augwa homu Jisasba mu muani, tama augwali Pol dali pali. Te bidi me deli aga te Areopagusde bidibo kaunsil bidi, agai nogi Dionisius da, te we me deli agai nogi Damaris, augwali si me, gasa bidi dabe me badu me, augwali tigidali augwa homu Jisasba muani.

Polgo te Korin taun bulude sē eyu, po pusali

18 ¹Te bidi Polgo nosali te Atens be nani taga pelama, agai Korin taun be naniba pali. ²Tama te bulude bidi me deli bidali, te Juda hani bidi, agai nogi Akwila. Aga bulu mu nogi da, Pontus da. Tama polobadu gana aga dali aga we dali te Itali tōde bidali taga soai. Aga we nogi da, Prisila da. Te Rom gavman tobolu bidi mu agai nogi Klodius, agai te Juda hani te Rom tōde bidali aga selā sawai dao. Tama agai te po wali, “Dage Juda hani Romgo tōde ma bidigimio,” wali. Tama tibaso, augwali si te Korin be naniba polasa soai madigi, Pol nosali Korin be naniba asai dao. Pol aga augwali sugi pali. Tama sugi pelama, agai augwali dali bidali. ³Tama Pol agai te we de bidi si te hasa waligo ugwa be hobolama, te mone sabo sē ebo suali. Polobadu Pol aga me te sē yai. Tama augwali sigo Pol hanalu wali, “Nage dadi si dali bidu, e sē yaibao,” wali. ⁴Tama Pol aga tede bidu, tigidali Sabat sogo Juda dabego bomo yai po ola mabo beba peyu yali. Tama agai te Juda hani bidi dabe dali me, te Grik hani bidi dabe dali me, agai po ola mani. Tama agai homugo augwali homu begelemainu hagede homu yali.

⁵ Te nosali Sailas dali, Timoti dali augwali si te Masedonia tō taga solama, Korin be nanide Pol bidibo madigi sabolali. Tama augwali si asobo si, Polgo te ugwa be hobolobo sē tagalali. Agai tigidali sogo te Juda hani we bidi bidibo tomode po ola bilali. Tama agai po bomai mu pusuyu, te po wali, “Te dagego koneao. Te bidi Jisas aga Godigo aga sa muai bidi Krais da, te we bidi tau somainu.” ⁶Tiali goli, augwaligo homugo te po pusubo po odobe. Augwaligo agade sēbē yali, tama augwaligo aga dali dwai po mu wali. Tama tibaso, Pol aga tama kolesaga yali, agai nogogo te aga gudali ugwide elaluali pobebe bage tedala sayani. Tama tiyu agai te dāj yali, agai nosali augwali ma homu egobeo olama, te sē yali. Tama agai augwalibolo po walali, “Tialima, nosali dage hagawai baso da, duga sē dao,” wali. “Eno sē menio. Tialima, meg i eno

dage taga peyu, eno te Israel hani isāwai bidi dabebolo Godigo po pusa mawaibao,” te po wai. ⁷Tama tibaso, Pol aga te Juda hani taga peyu, aga te Israel hani isāwai bidi me deli, agai nogi Titius, me nogi Jastus, tego beba bidigi pali. Te bidi Titius agai Godibolo lotu po wabo dao. Agai be te Juda dabego bomo yai po ola mabo be sesege badu elalubo. ⁸Tama bidi me deli bidibo, agai nogi Krispus, aga Juda dabego bomo yai po ola mabo be tonalubo genuai toboli bidi mu dao. Te bidi dali, aga bede bidibo we bidi dabe dali, augwali tigidaligo Jisasba augwa homu tigidali mu muani. Tama Korin we bidi umabo augwaligo Polgo wabo po odama, augwaligo homu Jisasba mu munama, tama augwali tigidali baptais mani.

⁹Te me sogo hulide Pol agai nai me deli te nadie suali. Tama Genuai Bidigo aga dali po tama wali, “Nage wi egio,” wali. “Nago po bomo elama, augwalibolo wao. Naga pedauwali pania sigio,” wali. ¹⁰“Ena nage dali bidibao. Gasa bidigo nage dologobeo. Magi basowe? E be nanide bidibo we bidi umabo augwali eno sa muai dao. Augwaligo nago po odama, te augwali eno hani gagawaibao,” wali. ¹¹Tama te po obaso, Pol aga Korinde bidibadi, kibu be deli silama, me tomoba egi pali. Tama agai tigidali we bidi Godigo po ola mani.

¹²Te nosali te bidi me deli nogi Galio, te Rom gavman genuai mu toboli bidi dabe augwaligo te bidi Galio te Grik tq tonaluabo toboli bidi nigli. Tama te sogo te Juda hani augwali sisinama, Pol selama, augwaligo aga po tūba odasa pali. ¹³Augwaligo Galiobolo te po wai, “Te bidi agai homugo dago bomo yai po dolobo. Tama agai te we bidibolo Godigo lotu po wabo gasa kolesaga elama, bugagia ola mabeo,” wali.

¹⁴Te bidi Pol aga doligulama, agai po gagalainogo, te gavman bidi Galio agai te Juda dabebolo te po tama wai, “E bidi Pol agai dwai sē mu egi sogo da, teda eno tonaluama, dagego po tū ebo po page tigidali eno odigi da. ¹⁵Tiali goli, dage dolaga aselama, tama dagego umabo me me nogi wabo po obaso, te dage Juda hanigo bomo yai po dabe po me obaso, dagego homugo ena te tiwai po odobo bidi dawe?” wali. “Menio. Duga digi te po dodolao,” po wali. ¹⁶Tama agai te Juda hani bidi dabe augwali te po tū ebo bede sela sayani. ¹⁷Augwali te be tagalama, buluba soali. Tede augwaligo te Juda dabego bomo yai po ola mabo be tonalubo bidi nogogo tuali. Te bidi nogi Sostenes. Augwaligo te po tū ebo be sesegede te bidi osogo elali. Tiali goli, Galiogo sulama, tama agai te dwai sē ebode moni homu ebe.

Pol aga Antiookba ma geasa pali, te Siria tōba

¹⁸Te bidi Pol aga te Jisasgo po wali pabo hani dali hauwa sogo bidali, te Korin be nanide. Tama nosali agai augwali taga soali. Agai te Prisila dali, Akwila dali augwali sela te Siria tōba pabo gagalali. Tama Senkria be naniba tōdu sabolama, tede Pol agai Godibolo bodolu mawai. Aga toboli nisi poayali,

te bodolu mani po dāq̄ omainu yai.^k ¹⁹Tama tilama, augwali selā te moni gebadu pelama, te tamu aji bolama tama Efesus moni be naniba sabolali. Tama Pol aga te Juda dabego bomo yai po ola mabo be tomoba pelama, te Juda dabe dali umabo po miani. ²⁰Augwaligo agabolo augwalide hauwa sogo mu bidaimai hagede hanalu wali. Tiali goli, Polgo “Menio,” wali. ²¹Agai augwali taga peyu, te po wai, “Te Godigo ‘Usu da’ obaso da, teda nosali ena dage pageba ma geasa asaibao,” wali. Te po olama, Pol te moni gebadu pelama, Efesus be nani taga pali.

²² Te bidi Pol te moni gebadu pelama, te nabis be nani Sisaria teba sabolali. Tedu tqđu pelama, Jerusalemba pali. Tama agai Jisasgo po wali pabo hanibolo “Dage tao,” wali. Tama nosali aga tedu pelama, Antiokba pali. ²³Tede aga hauwa sogenu bidama, aga Antiok taga pali. Tama ma pelama, tqđu pelama, te Galesia tq me, Frigia tq me tomodu pelama, Jisasgo po wali pabo hani we bidi suali. Tama agai augwalibolo dwagi yai po pusa mani, augwali bomo somainogo yali.

²⁴Te Juda bidi me deli Efesus be naniba sabolagasali. Agai nogi da Apolos, agai page bulu Aleksandria be nani da. Tama te bidi aga da po digi wābo bidi, te agai dwagi yai Godigo po așeansi bukude ebo po page tigidali koneai bidi mu da. ²⁵Tama agai koneai, te Genuai Bidigo agai tigidali we bidi ma sabo tū koneani. Tama tigidali sogo agai homugo dāq̄ mu eyu Jisasgo yali sē po dabe tigidali pusali, bugagia dolo pusa mani. Tiali goli, agai koneani, te Jongo agai te we bidi baptais mabo sē yali wali po naga agai koneani. ²⁶Tama te bidi Apolos agai te Juda dabego bomo yai po ola mabo bede agai po bomonama wali, wi ebe. Prisila dali Akwila dali sigo agai po wābo odama, augwali sigo beba aga odasa pali. Tede augwali sigo agabolo Godigo pabo tū po page bugagia hania ola mawai. ²⁷⁻²⁸Tama nosali Apolos agai homugo te Grik po wābo bidi dabego page bulu tqđa pomai hagede homu yali. Tama tibaso, te Efesusde Jisasgo po wali pabo hani we bidigo bugai homu elama, te Grik tqđe bidibolo Jisasgo hani dabebolo pas așeansi, te Apolos tau somainu yali. Te pas tomodē augwaligo te po așeansi, “Te bidi Apolos asobo si, dagego aga bugagia tau sao.” Tama Apolos pelama, sabalobo si, tigidali sogo augwali sisinama, po mibo sē yali, augwaligo Godigo po bukude așeansi po wali. Te po agai tigidali we bidibolo Jisas ola mani. Aga “Te bidi mu polobadu Godigo agai da tau somainogo sa muai bidi Krais da,” wali. Tama tigidali sogo Apolosgo te Juda hanigo konila po wābo aiyaba elalualu. Tialima, Apolos agai Jisasgo po wali pabo we bidi hani tau mu sali, polobadu Godigo augwali hobede ebo kolesaga olo menama, tau sali.

Pol Efesusde sē yali po da

19 ¹Te sogo Apolos te Korin be nanide bidibadi, Pol aga te Galesia tq tomoba sabolali, nosali te Efesus be naniba sabolali. Tama

^k 18:18 Nam 6:18

te bulude agai Jisasgo po wali pabo bidi me badu bidibo suali. ² Pol agai augwali te po hanalu wali, “Polobadu sogo dagego homu Jisasba mu muani sogo, te Godigo Dwagi Yai Mobo Bidi dage pageba asaliwe?” Augwaligo te po wei agade ponoyu, te po wali, “Godigo Dwagi Yai Mobo Bidi elalubo po dago polobadu odobeo,” wali. ³ Tama Pol agai augwalibolo hanalu wali, “Tialima, te sogo augwaligo dage baptais mani sogo, dagego dego po wali pai dawe?” Augwaligo te po wali, “Jon agai we bidi baptais polobadu mayu agai ola mani po, te po bidi me deligo dabolo ola menama, dago te po wali pabo dao,” wali. ⁴ Tama Pol agai te po wali, “Te polobadu te we bidi augwa dwai sē me, dwai kolesaga me tagalama, tudiba menama, homu begelama, te Jon agai te we bidibolo baptais mani. Tama tilama, agai augwalibolo te po wai, ‘Te ena nosali asobo bidi, te bidi dagego homugo mu koneao,’ wali. Tama eno dagebolo te po obao, te bidi da te Jisas da,” Pol agai te po wai. ⁵ Tama te Efesus bulude bidali Jisasgo po wali pabo hani we bidi dabe augwaligo te po odama, augwali Jisas wali po baso, baptais sali. ⁶ Te baptais selama, deli deli bidi toboluba Pol agai nogo mubadi, Godigo Dwagi Yai Mobo Bidi augwaliba asali. Augwaligo gasagi yai haniani po wabo gagalal. Tama augwaligo Godigo augwalibolo mani po pusubo sē yali. ⁷ Tama augwali te bidi hani nogo si olama, saqā badu si wagi sulama, bidi hani bidibo.

⁸ Te Pol te polua sel a tede bidali. Tede bidibadi, aga te Juda dabego bomo yai po ola mabo beba tigidali Sabat sogode te be tomoba pabo da. Agai augwalibolo te po wali, “Godigo homugo agai te we bidi tonalubo,” wali. Aga wi ebe, te po bomonama wai, augwaligo konemainu te po mu dao. ⁹ Tiali goli, augwali me badu bidi dabego augwa homude hagela elama, augwa homugo Jisas konebe. Tama augwali tigidali bidi gedude doligulama, Godigo gesi tūde pabo pobolo augwaligo dwai po wali. Tama tibaso, Pol agai te po odama, agai Jisasba homu muani bidi oda selama, te augwaligo Juda dabego bomo yai po ola mabo be taga pali. Tama tigidali sogo agai augwali dali po miani, te bidi me deli agai nogi Tiranus, tego skul be tiwaiba sisinama, po ola mani. ¹⁰ Tama Pol agai te sē ebadi, kibu be si silali. Te sē elama, umabo we bidi te Esia tō tomode bidibo we bidi augwaligo Godigo dwagi yai po odali. Me badu Juda hani we bidi da, me badu te Juda hani isāwai gasa hani dabe we bidi da.

**Sevago ogwa dabe dwai mobo augwaligo gagalama,
sela sāwai hagede yali, usu isāwai po**

¹¹ Te sogo God agai genuai bomo mu Polbolo mani. Tama Godigo tigidali we bidibolo haniani bomai sē bidigo ebo usu isāwai sē mu ola mawai. ¹² Polgo nami ugwa ugwa kugulu gudai dao, te duga holobo ugwa gebode kewai dao. Tama augwaligo te tobage ugwa dabe Polgo tulama, tama augwaligo te gasi sai bidi dabe bidibo madigiba selasa

pai dao. Augwaligo te ugwa te gasi sai bidi tigiba mubo si, te gasi sia sai dao. Te dwai haubo noma elalubo bidi dabe me, te sogo augwaligo te së ebo si, te dwai haubo nomago te bidi dabe tagalama, wi pai dao. ¹³⁻¹⁴Tama Juda genuai bidi deli bidali agai nogi Seva da. Agai së da, te pris bidi dabe tonalubo dao. Agai ogwa da nogo a olama, me badu nogo si da. Tama augwali biliyu, te dwai haubo noma bidibo we bidi dwai noma sela sayani. Tiali goli, augwaligo homugo Jisas mu konebe. Tama dwai noma bidi me badu sela sayu, Jisasgo nogi ilama, sela sawainu yali. Tama augwaligo te dwai mobobolo te po wali, “Nage dwai haubo noma, eno Jisasgo bomogo nage sela sâbo dao, te bidi Pol agai wabo po tiwai dao,” te po wai. ¹⁵Tiali goli, te dwai mobogo augwalibolo te po wai, “Eno Jisas kone dao. Eno Pol kone dao. Tiali goli, dagego mena bomo eyu, te së ebawe? Eno dage mu konebeo,” wali. ¹⁶Tama te dwai mobo elalubo bidi agai te bidi dabe dali bomonama mu hwînama, agai augwali tigidali aiyaba elaluali. Tama augwaligo tigi agai mu dolali, augwaligo ugwa dabe pebeda sayani, te augwali te be tagalama, wi pali, tama me badu augwaligo tigi olo wi pali. Magi basowe? Te bidigo augwaligo ugwa dabe pebeda sana silai dao. ¹⁷Tama te Efesusde bidibo Juda we bidi dabe me, te Juda hani isawai hani we bidi me, augwali tigidaligo te yali së po odama, wi mu yali. Augwaligo te Genuai Bidi Jisas nogi uwabwa mu sali. ¹⁸Tama nosali Jisasgo po wali pabo we bidi me badu augwali aselama, te po te we bidi tigidalibolo wai, “Te dwai pobi wabo së dago polobadu yai dao” wali. ¹⁹Tama augwaligo te pobi me, animani ola mabo buku dabe deliba sisinama, augwaligo tigidali we bidi gedude isiba ulai dao. Te buku abelebo mone ge te hauwa kisu 50,000 monego abelai dao. ²⁰Tama umabo we bidi augwaligo te bomai së yali po odobo si, augwaligo te Godigo dwagi yai po mu odali. Tama Godigo dwagi yai po tigidali we bidigo homuba pelama, dâq wali.

Efesusde bidibo we bidi dabego Pol dali wado po wai

²¹Te nosali augwaligo te së ela silama, Godigo Dwagi Yai Mobo Bidigo Polgo homuba menama, aga Masedonia tò dali Akaia tò dali te bulu siba pomainu homu ilali. Tedu pelama, aga Jerusalemba sabaligi pomainu homu yali. Tama Pol agai homugo bomo eyu te po wali, “Ena teba sabaligi pelama, nosali ena Rom be nani sugi paibao,” te homu yali. ²²Tama tiali, Pol agai së tau sabo bidi si te Masedonia tòba tagala palali, te bidi si nogi me Timoti, me Erastus. Tama te bidi si tagala palama, Pol te Esia tòde osogo bididuali.

²³Te bidi Pol te Efesus be nanide te sogo bidibadi, te Efesusde bidibo bidi dabe hauwa augwaligo Godigo gesi tûdu wali pabo bidi dabe dali konila po weyu, moni sëbë mu yali. ²⁴Tama te bidi me deli, agai nogi Demitrius, agai tigidali bidi sëbë ebo homu hodolali. Agai te mone sabo

sé te gasagi yai bunuwali tiwai nai geselebo sé ebo bidi da, te bunuwali tiwai nai nogi silva, te wiegi yai kapa dao. Te Efesus be nanide te tibo god nogi Artemis moni lotu wabo be elaluali. Tama te bidi Demitrius me agai tau sabo bidi dabe me, augwaligo te lotu be dwasianu noma te bunuwali tiwai naigo nigibo sé elama, tama umabo bidigo sulama, moni monego abelama, sabo sé ebo da. ²⁵Tama te bidi Demitrius agai te tibo godigo dwasianu be sé ebo bidi dabe me, gasa sé ebo bidi dabe me, agai i olama, sisinama, te po miani. Agai te po augwalibolo tama wali, “Ama dede, dagego konebo dao, dago e sé ebogo te umabo masigi selama, da bugagia bidibo dao. ²⁶Tama dagego te bidi Pol agai ebo kolesaga koneani dao, dago agai po dabe me odali dao. Agai Efesusde bidibo we bidi dabebolo wabo po dabe, tama agai Esia tōde bidibo we bidigo me agai po tama wabo da, ‘Te tobage bidigo nogogo nigibo god da, bomo menio, augwali god mu menio, agai dage tau sogobeo,’ te po walio. Agai tama po wabode tigidali we bidi augwaligo te po wali pali, te Efesus be nanide me, te Esia tōde me. ²⁷Tama eno dago mone sabo sé dolidali weyu eno wi ebo, tama tigidali we bidigo dago e ebo sède dwai po wabo. Dago bugagia tonalusayu da, te po genuai mu yaibao. Tama augwaligo Artemisgo moni lotu be dolaibao,” wali, “agai dago moni god we, tama augwaligo homugo genuai we god Artemis usu egobeo, agai dago tigidali Esia tō we bidi aga deliba lotu po wabo dao, te tigidali tōde bidibo we bidigo me,” te po wali. ²⁸Tama te we bidi augwaligo Demitriusgo wali po odobo si, augwaligo Pol dali moni sèbè yali, tama augwaligo moni po dagà weyu, te po wali, “Artemis, nage da Efesus we bidigo genuai god da,” te wali. ²⁹Tama te Efesusde bidibo we bidi augwaligo te po odoyu, augwaligo moni po dagà wali, tama augwali pelama, Masedonia bidi Pol tau sali bidi si nogo tuali. Te bidi si me nogi da Gaius, me bidi nogi da Aristarkus. Tama augwaligo te bidi si nogo tolasa, augwa moni po tū ebo pesageba pali. ³⁰Tama Pol agai homugo da, te bidi hani te po tū eboba agai po wagi pai homu yali. Tiali goli, te Jisasgo po wali pabo hanigo aga pigio wali. ³¹Gavman sé ebo tonalubo bidi dabe me badu, te Esia tōde, augwaligo Pol dali abagi wai dao. Tama augwaligo me Polbolo tama po ola tolali, “Pol, nage te po mibo tomoba pigio,” wali. ³²Tama te po mibode augwaligo homu agabe selama, te po dolali. Te moni po dagà weyu, me bidigo aga homugo konealubo po wali, me bidigo aga homugo konealubo po tedali me wali. Tama augwaligo umabo po mu dalasa pali. Te po miboba asali page augwali tigidaligo konebe. ³³Tialima, bidi me deli tede bidali, agai nogi Aleksander dao. Tama Juda hani augwaligo te bidi te po mibo tomoba doligi pali. Tigidali we bidigo augwaligo homu, te po mibo page agai dao, homu yali. Tama agai nogi tigidali bidigo po odoboba nogo ugwaba muani, augwa po wabo tagalomainu yali. Agai homugo te sisinama po mibo page te Juda hanigo menio wāj hagede nogo

muani.³⁴ Tiali goli, te we bidi augwaligo aga Juda bidi dao konebaso da, agai te Artemisbolo lotu po wabo meni konenama, tama augwali tigidaligo moni po dagå wali, te po wali, “Te Artemis, nage da Efesus we bidigo genuai god we dao,” wali. Te po wabo kigamu gagalama, giliga tomo yagasali.

³⁵ Te nosali te kaunsil kuskus bidi agai te po togolama, agai augwaligo te po aiyaba elaluali. Agai te po wali, “Dage Efesus bidi dabe, odao. Tigidali bulude bidibo we bidi augwaligo e Efesus bulu kone dao.

Augwaligo kone dao, dago te Artemis genuai we godigo moni lotu be tonalubo dao. Tama dago te masigi me tonalubo dao, te dagaludu tuloluai masigi, te masigibolo dago lotu po wabo da. Te me augwaligo konebo dao. Bidigo te po sela sagobeo.³⁶ Tama tibaso, dage dua bidaqo. Dagego bugagia konesiąwai sède wado egimio,” wali.³⁷ “Suao, dagego te bidi si po tūba odasa asali. Tiali goli, augwali sigo dago te lotu bede dwagi yai nai munalubo wi sabeo. Tama augwali sigo dago we god dali dwai po me wabeo,” wali.³⁸ “Tialima, Demitrius me, aga dali sè ebo bidi dabe me, augwaligo bidi me delide wado po wabo elalubaso da, teda augwa digi te po tū ebo sogo te po augwaligo dodolomainao, tama te po tū ebo bidi augwaligo te po dodolomainao,” wali.³⁹ “Tama dage me badu po elalubaso da, teda po tū ebo pesagede dagego te po wao. Tama te sogo genuai bidi dabe dugulama, po odama, augwaligo dodolobo da. Megi te po mibo silao. Magi basowe?⁴⁰ Dago meg i po mibo dobo yabo, dwalio. Tama tibaso, te Rom gavman toboli bidigo dago te kolesagade da tū egewe ma meniwe, te eno konebeo. Suao, da e sisinani po page menia madigi, dago umabo po mu dalasa pabo wali. Tama te gavman bidigo da po tū ebo si, dago magi po te gavman bidibolo wei begelaibawe? Po mu menio,” te po wai.⁴¹ Tama kuskus bidi agai te po olama, tama agai te bidi dabe tigidali augwa beba tagala palali.

Pol te Masedonia tō dali te Grik tō dali side bilali po

20 ¹Te wado po wali dabe sia selama, te hauwa sogeno bugagia bidama, te Polgo Jisasgo po wali pabo we bidi i wali. Tama agai dwagi yai po augwali homude dāq olama bomo sabo po ola mani. Tama nosali dage tao po olama, augwali nogo mani. Tama agai augwali taga pelama, aga moni gebadu Masedonia tōba pali. ²Tama te Masedonia tō tomode peyu, Jisasgo po wali pabo we bidi hani augwali tau sabo dwagi yai po Pol agai hauwa sogo ola mani. Ola menama, nosali aga te Grik tōba sabolali. ³Te bulude aga polua sela bidali. Tialima, nosali agai homugo Siria tōba moni gebadu paio homu yali. Tama agai nai sisi elama, te Juda dabego aga ela muabo po agai odali. Tama tibaso, agai te homu yali, ‘Ena Masedonia tōdu pelama, ma geasa paibao,’ homu yali. ⁴Tama te bidi dabe me badu Pol dali hodobo pali. Te bidi nogi me Sopater, aga aya

da Pirus da, aga bulu da Beria. Bidi me nogi da, Aristarkus, te gasa bidi me nogi Sekundus. Augwali sigo bulu da Tesalonaika. Tama gasa bidi me nogi da Gaius, aga bulu da Derbe. Tama gasa bidi me nogi Timoti. Bidi me nogi Tikikus, te gasa bidi me nogi Trofimus, augwali si bulu da Esia tq da.⁵ Te bidi dabe tigidali augwali Pol dali pali. Augwali polasa pali, te Troas be nanide da asobo tonaluali.⁶ Tama da Filipai be nanide bidama, nosali te bo disawai bret tuali bodolu silibo si, da moni gebadu pali. Tama pelama, a naga sogo silibo si, da Troasba sabolama, te polasa pali bidi dabe sulama, ma hodobo muna selama, da Troas be nanide Sabat deli bidali.

Te Troas be nanide Polgo Yutikus isai ma hodolai po

⁷Te dwasianu Sarere pio te da deliba sisinama, te Jisasgo po wali pabo we bidi dabe me sisinama, nai bolo tuali. Tama Pol agai te we bidibolo Jisasgo po pusa mani. Agai te bobobage po pususu pedubadi, huli tomo mu yali. Magi basowe? Agai homugo do augwali taga paibao.⁸ Tama te po mibo be habu badu augwaligo sole umabo wawalo pali. Tama te be da moni sigi be da, te po mibo habu da ugwa badu mu.⁹ Tama gesi bidi me deli te windo tq me delide dugulualu, agai nogi Yutikus. Tama Pol agai bobobage po pusubadi, te bidi godege magani elama, piali. Tama aga mu piai madigi, buluba tula muani, aga digibulu mu tama tqba tulolualu. Augwali aiyaba dulama, tqba pelama, suali, aga osawali, te bidi mu isai suali.¹⁰ Tiali goli Pol aga udulama, tqba dulali. Tama agai te bidi tigiba usu si elama, agai nogogo te bidi nogo si dua elama, tuali. Tama Pol agai tigidali we bidibolo te po wai, “Dagego te bidi homu dene baso, gela wagimio. E bidi bidibo. Megi ma hodaluama, bidaibao,” wali.¹¹ Pol te habuba ma holali. Tede aga dali te Jisasgo po wali pabo we bidi dali augwaligo homugo Jisas makone palama, te bret nai tuali. Tama te Pol aga te wali po wadolama, te po ola pedubadi, be posobode te po tagalama, aga pali.¹² Tama te gesi bidi Yutikus aga gedu pedalu bidibaso, te augwali dali hodobo agai beba pali. Tama augwaligo homu dwagi yai yali, aga ma gedu pedalu bidibo ula elalubaso.

Pol aga Troas be nani taga solama, Miletusba pai po

¹³ Te bidi Pol agai dabolo te po wali, “Dage gebadu polasa pelama, te Asos be naniba pao. Asos be naniba sabolama, ena asobo tede tonaluao. Ena tqdu asaibao, nosali da tigidali te moni gebadu ma paibao,” te po wai. Te po olama, da te moni gebadu Asos be naniba sabolali. Tama Pol aga te Asos pabo tqdu pelama, te buluba sabolali.¹⁴ Tama agai da Asos be nanide bidibadi sabolali, tama da hodobo moni gebadu pali, te Mitilini buluba sabolali.¹⁵ Tama da Mitilini bulu tagalama, da pelama, Kios buluba do sabolali. Tama dago do Kios bulu tagalama, me sogo da Samos

buluba sabolali. Tama kigamu ma pelama, te Miletus be naniba sabolali. ¹⁶ Pol agai homugo te Efesus be nani sugobeo, ela soaibao homu yai. Agai homugo ena Jerusalemba polo paibao homu yali, ena tede te Juda dabego moni nai tubo bodolu Jerusalemde bidibadi silaibao, te homu yali. Te Juda dabego moni nai tubo bodolu te nogi Pentikos dao.

**Pol agai Efesus be nanide bidibo Jisasgo po wali
pabo we bidi tobulu bidi dage tao wali**

¹⁷ Te Pol Miletusde bidu, agai Efesusde bidibo Jisasgo po wali pabo we bidigo tobulu bidibolo agai pas me deli tolali. Te pasde agai te po wali, “Dage aselama, ena pageba asao,” wali. ¹⁸ Tama augwali aselama, aga dali sisinama, bidali. Tama agai augwalibolo te po wali, “Ama dedeo, polobadu mu ena dage pageba hasia sogo mu te ena Esia tōba sabolai dao, dagego koneai dao, eno dage dali bidu tigidali yali sē kolesaga me dagego koneai dao. ¹⁹ Tama te sogo te Juda dabe augwaligo moni haniani sēgē enabolo mani, te ena gela gugai yali. Tama augwaligo ena dolabo tū me gegai dao. Tiali goli, ena digi nogi aiyaba elaluama, tama eno homugo Genuai Bidi Jisasgo sēba naga homu elama, sē yali. ²⁰ Te dage tau sabo po eno yogo yai menio. Duga bede me, duga sisinibo pesagede me, eno te po dugabolo eno umabo sogo pusa mawai dao. Te po duga koneai dao. Dage tau sabo po eno me deli dualai menio. ²¹ Sesemane sogo eno dagebolo po bomonama weyu, te po wai dao, ‘Te Juda bidi dabe me, te Griki bidi dabe me, dagego dwai sē ebo kolesaga me tudiba tagalama, homu begelama, God pageba aselama, dagego homu Jisasba mu muao.’ Te dage tau sabo po eno dagebolo tigidali sogo konelai dao. ²² Tama megis Godigo Dwagi Yai Mobo Bidigo ena dāq̄ olama, ena Jerusalemba odasa pabo. Te bulu bidi dabego enabolo magi sē egowe, te eno konebeo. ²³ Tialima, eno koneanio. Augwaligo ena elama, sēgē menama, ena kalabus yaibao. Tigidali be nanide te Godigo Dwagi Yai Mobo Bidigo te tobage sēgē sabo po enabolo ola mawai dao. ²⁴ Tama augwaligo ena elama isilibo eno moni homu menio. Te magigo menio. Tiali goli, eno genuai homu mu Genuai Bidi Jisasgo enabolo mani sē bomo elama mu yaibao. Tama te Godigo da homu dene ebo sē, te dwagi yai po eno tigidali we bidibolo augwaligo konealumai hagede bugagia pusa mawaibao,” Pol agai te po wai.

²⁵ Polgo te po me wali, “Mu tama dao, dagego te po odao. Tama eno homugo te po megis silibo dao. Tialima, ena polobadu dage tomode biliyu, dage tigidali we bidibolo eno ola mawai dao, God aga dago Genuai Tobolu Bidi, agai da tonaluiba wali. Tama megis eno koneanio, dagego ena munu ma sugobeo. ²⁶⁻²⁷ Tama tibaso, megis tama eno homugo e po dagebolo bugagia ola mabo dao. Tigidali sogo ena dage dali bidu, Godigo tigidali sē yabo homu ebo po eno dagebolo pusai dao. Te po eno yogo yai menio. Tama tibaso, bidi me deli dage tomode nosali aga hagabaso da, teda aga homugo dao, eno homugo menio,” wali.

²⁸ Pol agai te toboli bidi dabebolo te po wali, “Dua dao. Duga digi dali, te Godigo Dwagi Yai Mobo Bidigo dagego nogode muai we bidi dali, bugagia tonaluao. Tama dagego augwali te kibu sipsip tiwai negebo əq yao. Dagego kone dao, Godigo aga ogwa Jisasgo kanemego te hani aga abelama, aga ma sai dao. Tama dagego augwali bugagia negao. Magi basowe? ²⁹ Eno koneani, nosali te eno dage taga pabo sogode, te dwai bidi dabe dage tomoba aselama, dage dolaibao. Tama augwali te bulu yowi asobo əq elama, te sipsip kibu wai elabo əq yaibao. ³⁰ Tama duga digi tomode bidi me badu hodaluama, ili po ola maiabo, augwaligo homugo tigidali Jisasgo po wali pabo we bidi augwali wali asomainu yaibao. ³¹ Tama dage bugagia suao, te tiwai bidi gegabo. Tama dagego homugo eno yali sə tagalamuo. Ena dage dali bidibadi, te kibu be sela silai dao. Tama te hulide me, kigamu me, eno dagebolo dwagi yai tau selama, dəu walabo po ola mawai dao. Tama hauwa sogo eno dage moni homu dene elama, gela wai dao.”

³² “Te megı eno dage God aga digi tonalumainu, God agai nogoba mubao. Tama Godigo dabolo hobede ebo kolesaga da olo menama tau sabo da po, te wali pogo me dage tonaluabao. God aga usu elama, dage bomo ilaibao. God agai sa muani we bidi hani bugai homu ilabo sə elalubo da. Tama agai usu elama, te tobage sə dagebolo mawaibao. ³³ Tama dagego mone me, ugwa me, me me dwagi yai nai eno pesa yai menio. Eno homugo dagego masigi dabe, ugwa dabe eno dagego ena me mao wai menio. Duga digi koneai dao. ³⁴ Ena digi te be sə ebo ugwa hobolo sə elama, ena mone sai dao. Eno te mone selama, eno tubo nai me, eno abagigo tubo nai me, te eno abelali. ³⁵ Tubo nai sabo sə ebo kolesaga eno dagebolo ola manio. Dago te sə bomo elama, te gasi yai we bidi tigidali sogo tau soguə. Te tobage sə ebo kolesaga polobadu Jisasgo dabolo ola mawai dao, te po wai, ‘Bidi mego gasa bidi nai olo mabo, te agai moni bugai homu ebo. Te nai sabo bidigo agai dwagi yai homugo te tau sabo bidi aiyaba elalubeo.’ Tama dagego Genuai Bidi Jisasgo te wali po deli naga konealuao, homugo tagalamuo,” Pol agai te po wai.

³⁶ Te Pol agai po silibo si, tama agai augwali dali kidu sugunama, Godibolo po wai. ³⁷ Tama augwali tigidali sisinama, Pol pagea selama, sebedi usu eyu, gela wali. ³⁸ Tama augwali moni homu dene yali. Magi basowe? Agai te po wali, “Ena gesabi dagego munu ma sugobeo,” wali. Tialima, te we bidi tigidali augwaligo aga odasa pelama, moni gebaba tagaligi pali, te tamu əj̄ sanide.

Pol Jerusalemba pali

21 ¹ Te dago te Efesus bidi dabebolo tobalobo po olama, taga soali. Tama da pabo te moni geba te wali asiyu da te gebadu Kos buluba solama, dolo mu pali. Tama do kigamu dago te Kos bulu taga

pelama, te Rodes buluba sabolali, tede piai. Pilama, tama dago te Rodes bulu tagalama, te Patara buluba pigi pali. ²Tama te Patara be nanide dago te gasa moni geba selama, te Fonisia tqba pabo geba da. Tama tibaso, da me te gebadu pali. ³Tama pobadi, tomode dago te tamu aji tomode dwasianu bulu suali, te tq nogi Saiprus. Tama te Saiprus tq ela solama, te Siria toba sabolali. Tama te geba te Tair be naniba sabolama, te bulude augwaligo walu dabe sela muani, tede dago te geba tagalama, te be nani tomoba pali. ⁴Tama pelama, Jisasgo po wali pabo hani gegelama, augwali dali bidibadi, Sabat deli bidali. Tama te sogo Godigo Dwagi Yai Mobo Bidigo augwalibolo po me deli wali. Augwaligo Polbolo te po tama wali, “Te nage Jerusalemba pelamuo,” wali. “Augwaligo nage elabuo,” wali. ⁵Tiali goli, da tede bidali sogo sia selama, da te bulu tagalama, moni gebaba ma pali. Te Jisasgo po wali pabo we bidi, wai puluba me, augwali da hodobo pelama, tamu aji sesegeba sabolali. Te kemi tqde da sisinama, kidu sugunama, Godibolo gedu haluasa po wali. ⁶Po olama, nosali da tigidaligo “Dage tao,” olama, da te moni geba tomoba pelama, te Jisasgo po wali pabo we bidi augwa beba geasa pali.

Te bidi Agabusgo nosali yabo së po Polbolo ola mayu konelai dao

⁷Te da te moni gebadu Tair be nani tagalama, pelama, te nabis be nani nogi Tolemesba sabolali. Tede dago te Jisasgo po wali pabo we bidi dali deli sogo pilama, da ma peyu, “Dage tao,” olama pali., ⁸Tama do kigamu da pelama, be nani Sisariaba sabolali. Tama da pelama, Filipgo beba sabolali. Agai tigidali sogo Jisasgo dwagi yai po we bidibolo pusa mabo dao. Aga polobadu nai dobabo së emai hagede, nogo a olama me badu nogo si tama dajil ilali bidi da, aga te së yai bidi da. ⁹Tama Filip agai wegi me si me si nama wegi bidali. Tama augwali genuai yai wegi goli, bidigo sabe. Tama te wegi dabebolo Godigo dwagi yai bomo menama, tama augwaligo Godigo po pusa mabo së yai.

¹⁰Da tede hauwa sogonu Filip dali bidama, te bidi nogi Agabus aga Judia tqdu asai bidi da, te Filipgo beba sabolali. Tama te bidi agai me Godigo pedauwalide po selama, we bidibolo bomo elama, Godigo po pusa mabo bidi da. ¹¹Tama aga da pageba aselama, agai Polgo kugulu selama, tama Agabus aga digi nogo dabe saçqababe kënama, agai dabolo te po ola mani, “Dagego odao, e po Godigo Dwagi Yai Mobo Bidigo enabolo mawai po eno dagebolo obao,” wali. “E kugulu page bidi te Jerusalemdé te Juda bidi dabego e ebo tiwai nogo saçqababe kënama, kalabus yaibao,” wali. “Tama augwaligo aga tama tilama, te Juda hani isawai bidibolo mawaibao, aga tigide augwaligo dwai kolesaga emainu yaibao,” Agabus agai homugo koneama, te po dabolo wali.

¹²Te dago Agabusgo wali po odobo si, da tigidaligo homu dene elama, Polbolo te po bomonama wai, “Nage Jerusalemba pigio,” wali, Sisaria

we bidi me dago tigidaligo te po wai. ¹³Tama tiali goli, Polgo te po wei ponoyu te po wali, “Magi baso dage gela obawe? Dagego gela wagio. Tama dagego te homu sęgę ena magio. Suao, ena Jerusalemba pobao. Tama augwaligo ena kalabuside mubaso da, eno wi menio. Eno Genuai Bidi Jisasgo po pusa mobadi, augwaligo homugo ena elabo homu ebaso me, elemainao,” te po wai. ¹⁴Dago Polbolo te po wai, “Dago naga homugo pai hagede ebadi, dago togologobeo. Dago te po tama silali. Tilama, dago Godibolo po wainao, ‘Genuai Bidi, naga homugo naga tigidali sę pedalomainao, da wali paibao, dago te aga pelamuo po ma wagobeo,’ ” dago te po wali.

**Pol kalabus ilama te Judia tőde bidibadi augwaligo
agai po tų odali**
(Dqj 21:15–26:32)

**Pol agai te Jerusalemde bidibo tobolu bidi dabebolo
aga bilu ela bilali sę po pusa mani**

¹⁵Te da hauwa sogenou Sisariade bidama, me sogo dago Jerusalemba pai hagede, dago walu dabe sisi elama, pali. ¹⁶Te Sisaria bidi me badu Jisasgo po wali pabo bidi hani augwali da dali pali. Tama da augwaligo te bidi me deligo beba tagaligi pali, tede bidimainu yali. Te bidi nogi Nason, aga Saiprus buludu polobadu asai bidi da. Te bidi agai homu polobadu mu Jisasba muai bidi da.

¹⁷Tialima, te sogo da Jerusalemba sabolama, te Jisasgo po wali pabo we bidi hanigo augwaligo bugai homu elama, da suagasali. ¹⁸Tama do kigamu Pol dali da pelama, Jems dali po wagi pali. Tama te Jisasgo po wali pabo hani monu dabe tobolu bidi augwali me da dali sisinagasali. ¹⁹Pol dali dago te bage dabe nogo menama, bugai homu yali. Tama tilama, nosali Pol agai te aga te Israel hani isławai bidi dabego tőde bilu ela bilali sę po augwalibolo pusali. Agai te po wai, “Godigo ena dą̄ olama, eno te sę tigidali yali.”

²⁰Tama Polgo te po ola silama, augwaligo Godigo nogi uwababa sali. Bidi me deli hodaluama, Polbolo agai te po wai, “Dago ama, nage bugagia koneao. Umabo Juda hani we bidi augwaligo homu Jisasba mu muai elalubao. Tama augwaligo bomo elama, Mosesgo bomo yai po tigidali wali pabo da. ²¹Tiali goli, gasa bidi dabe me badu augwaligo te hani we bidibolo nago nogi dolobo po wali. Augwaligo te geda mubo po tiwai wabo da, ‘Pol aga tigidali buluba pelama, tama agai Juda hani gegebo da. Tama agai koneama, te po augwalibolo ola mabo da, “Dagego Mosesgo dago wajbolo mani bomo yai po wali pigio. Dagego ogwa ame nabode, tigiwali togogimio. Dago wajigo yali kolesaga tudiba tagalao,”

Polgo te tobage po ola mabo dao,’ augwaligo te po wabo dao, nago nogi dolomainogo. ²²Tama te tobage po wabo bidi dabe augwaligo nage eba asali po polo odaibao. Tama dago magi egowe? ²³Te usu dao. Pol, nage dago po wali pao. Da tomode bidi me si me si nama augwaligo deli bomai po bodolu God dali sai. Augwa bidibode me badu sē habu sai dao. ²⁴Naga dali te bidi me si me si nama bidi me nage hodobo te Moni Lotu Be tempel teba pao. Tama dagego te Juda dabego lotu po wabode te kolesaga ebode God gedude dwagi yai yaibao. Godibolo nai mabode nago te bidi me si me sibolo nago masigi mao. Tama augwa tobolu nisi poala sāyagameo, te augwaligo bomai po bodolu God dali sai tiwai. Nago te tibo si te Juda hanigo subo si, nage Juda dabego bomo yai po wali pobao waibao. Augwaligo nage te sē ebo sulama, augwaligo nage dago bomo yai po dabe bolobo menio koneibaio. ²⁵Me ma, te Jisasgo po wali pabo hani, te Juda hani isāwai we bidi, te dago augwalibolo te po pas asenama, tolai dao. Dago augwalibolo te po tama wai dao, ‘Dagego te augwaligo te tibo godibolo ula mabo nai dage tugimio, dagego kibu me agai kaneme gelisāwai kibu tugimio, kaneme me tugimio. Te we sabo bomo yai po bolama, penani sē egimio,’ dago augwalibolo te po wai,” te bidi me deligo te po Polbolo wali.

²⁶Tama te po obaso, do kigamu Pol agai te bidi me si me si nama bidi oda selama, Moni Lotu Be tempelba pali. Tama augwaligo te Juda hanigo God gedude dwagi yai kolesaga ilabo lotu wali. Tama nosali augwali te Moni Lotu tempel Be tomoba pelama, tama Pol agai te lotu po wabo tobolu bidibolo te po walali, “Te Sabat deli silibo si, nosali da te Godigo gedude dwagi yai ilabo lotu silaibao. Silama, te da deli deligo te Godibolo ula mabo nai dabe magasaibao,” te po wai.

Juda dabego Pol te Moni Lotu Bede nogo tuai po

²⁷Te Sabat deli silabo maga ebode, te Juda hani bidi me badu augwali Esia buludu aselama, Jerusalemba sabolama, tama augwaligo Pol te Moni Lotu Be tempel tomode bidibo suali. Tama sulama, augwaligo te umabo Juda hani bidi hodolama, Pol nogo tuali. ²⁸⁻²⁹Tama augwaligo Pol te Jerusalem be nani tomode Efesus bidi deli dali bilibo polobadu suali, te bidi agai nogi Trofimus, te Israel hani isāwai bidi. Tama augwaligo homugo Polgo te odasa asali bidi Israel hani meni homu yali, aga te Moni Lotu Be tomoba asali, tama te be dolali, augwaligo te geda mubo homu yali. Tama sulama, augwaligo i tama wali, “Hai, dage Israel bidi dabe, asiāo, da tau sagasiāo. Dago koneani. Bidi me deli agai tigidali bulude bidibo we bidi dabebole po ola mabo, te dago hani nogi me, dago bomo yai po me, dago Moni Lotu Be tempel me agai aiyaba elalubo da. Nogo tuyu, te tibo bidi e dao. Suiāo. Megi dagego aga suoao. Agai dwai kolesaga mu yali, Israel hani isāwai bidi dago dwagi yai Moni Lotu Be tomoba

odasa asalio. Te dwali. Tama tibaso, megi Pol agai dago Moni Lotu Be tempel dolalio, te be megi da te Godigo gedude dwagi yai mu menio,” augwaligo te po wali.

³⁰Tama te tobage po tigidali Jerusalemde bidibo we bidigo odobo si, augwali te Moni Lotu Beba sisinagasali. Augwaligo Moni Lotu Be tomode Pol tulama, buluba kega sayani. Tama augwaligo te Moni Lotu Be tempel tü polo paliali. ³¹Tama augwaligo Pol ela mubo sę yali. Tama ebadi, bidi me deli pelama, te Rom gavman enesigi bidi tonalubo toboli bidi pageba aselama, te po wai, “Te Jerusalem we bidi tigidali augwaligo moni po dagą obao, augwali pಡe hwịabo maga yali.” ³²Tama te po obaso, te ami toboli bidigo enesigi bidi hauwa mu me, augwali tonalubo bidi dabe me selama, te Moni Lotu Be tempel gobeba polo udulama pali. Tede augwaligo te we bidigo Pol elebo suali. Tama te we bidi augwaligo te ami toboli bidi me, te enesigi bidi hauwa asobo sulama, augwaligo Pol ma elebe, tagalali. ³³Tama te ami toboli bidi aga Pol pageba aselama, Pol nogo tuali. Tama enesigi bidi me badubolo te po wali, “Te bidi dagego aligabo bono si selama, te bidi nogode kęao.” Tama agai te Juda bidi hanibolo te po hanalu wali, “E bidi dewe? Agai dwai magi sę yaliwe?” wali. ³⁴Tialima, umabo bidi augwaligo bomonama po dagą weyu, augwaligo me me po, me me po wali. Te enesigi bidi toboli bidi agai Polgo te yali sę po page agai konebo usube. Tama tibaso, te toboli bidigo enesigi bidi me badubolo te po wai, “Dagego Pol selama, dagego bomai beba tagaligi pao,” wali. ³⁵Tama te enesigi bidi dabe augwaligo Pol togobilidu odasa holainu homu yai, tama te Juda dabego Pol ma sai hagede bomo yali. Tama tibaso, te ami bidi dabego Pol nogogo tobolude tolasa pali. ³⁶Te Juda dabe augwali wali asobadi, augwaligo “Pol ela muao,” po bomonama wali.

Pol aga digi tau sabo po page te Juda hani dali pusa mani

³⁷Te ami bidi dabe augwaligo Pol odasa aselama, augwa bomai be tomoba pai hagede, tü pobasede, Pol agai te toboli bidi hanalu wali, “Eno nagebolo po me deli hanalubo usu egowe?” Tama te ami toboli bidigo hanalu wali, “Nage Grik po wabo dawe?” wali. ³⁸“Eno homugo nage Isip bidi dao, te homu yali. Te bidi agai polobadu umabo we bidi homu hodolama, dago gavman bidigo po sela s̄awai dao. Tama augwaligo te gavman bidigo po wali pabo we bidi me elai hagede yai. Te bidi agai umabo 4,000 we bidi selama, te bidi meni yai wa pai buluba pai dao. Eno homugo nage te bidi yaliwe homu yai dao,” te po wai. ³⁹Tama Polgo te po wei ponani, “Ena da Juda bidi hani dao. Ena ame nani bulu da Tarsus da, te Silisia t̄o tomode. Tama tibaso, eno Grik po wabo dao. Tama eno nogi da te Tarsus bulude bukude aşenama elalubo dao, te moni be nani. Tiali megi eno homugo nagebolo hanalu obao. Eno homugo tigidali we

bidibolo po waio,” te po wai. ⁴⁰Tama te ami tobolu bidigo “Augwali dali nago po wao,” olama, tama Pol aga te be togobilide dolalu, agai nogo tū yali, te we bidi augwaligo po wabo tagalomainogo. Tama augwali pedauwali pania selama, tama agai Juda pogo po pusubo gagalali.

22 ¹Te bidi Pol agai augwalibolo te po wali, “Eno ama dedeo, eno aya dedeo, eno wabo po dagego koneao, eno dwai kolesaga yali menio, dagego bugagia odao.” ²Pol agai augwalibolo te po wali. Augwaligo odali, augwa Juda pogo agai po pusubo suali. Augwaligo po munu me wabe. Magi basowe? Augwaligo agai po bugagia odainu tama yali. ³Tama Pol agai te po wali, “Ena Juda hani bidi dao. Ena idago ena Silisia tōde Tarsus bulude ame nai dao. Tiali goli, te sogo ena dwasianude skulba pelama, ena genuai bidi ilalio, e Jerusalem be nanide bididuali. Te sogo te genuai bidi Gamaliel agai ena ola mawai dao. Tama eno dago wāj dabego bomo yai po tigidali eno skul mu wai dao. Tama eno bomo elama, Godigo po tigidali eno wali pali, dagego ede wali pabo tiwai tama dao. ⁴Tama polobadu eno Godigo gesi tūdu wali pabo we bidi tigidali eno dolai dao. Tama eno dwai sē mu elama, we bidi me badu eno aligabo bonogo augwali kēnama, eno augwali kalabus ilai dao. ⁵Tama te pris tobolu bidi me, te Juda lotu po wabo kaunsil bidi tigidali me, augwaligo dagebolo pusabo te yali sē po eno tibo po wabeo. Tama augwaligo enabolo pas me deli mawai dao. Eno te pas selasa pelama, te Damaskusde bidibo Juda hanibolo momainu eyu tama pali. Eno homugo ena Damaskusba pelama, Juda bidi hanigo ena konemainu, eno Jisasgo po wali pabo we bidi kalabus yainogo asai yaba homu emainu yali. Tama eno homugo augwali Jerusalemba odasa pelama, augwali moni segē me, dene me somainu tiwai dao. ⁶Tialima, ena Damaskusba pabo tūdu pelama, tama da Damaskus pāba sabalobadi, giliga tomode, tama moni sole ula gagawai dagaludu polo aselama, te ulago ena tigidali bologobe sali. ⁷Tama ena tōba degasa pali. Tōde munalubadi, eno bidi mego enabolo te po wabo odali, ‘Sol, Sol, nago ena magi baso dolobo sē ebawē?’ ⁸Eno te po wei ponoyu, tama wali, ‘Genuai Bidi, nage dewe?’ wali. Tama agai enabolo te po wali, ‘Ena Nasaret bidi Jisas dao, ena nago te dolobo sē ebo bidi dao,’ wali. ⁹Tama ena dali pali bidi dabego te ula suali. Tiali goli, te bidi me deligo ena dali te po wabo augwaligo odobe. ¹⁰Tama eno aga te po hanalu wali, ‘Genuai Bidi, nago homugo ena megi magi egowē?’ Tama te Genuai Bidigo enabolo te po wali, ‘Nage hodaluama, Damaskus tomoba pao. Bidi me deligo nagebolo Godigo homugo nago yabo sē po tigidali ola mawaibao,’ wali. ¹¹Tialima, eno gedu tigidali halua sali. Magi basowe? Te genuai sole ula gagawai nai eno geduba dolama, eno gedu hulia selama, hoşana pai dao. Tama ena dali pali bidi dabe augwaligo ena nogo tulama, Damaskus be nani tomoba odasa pali.”

¹² “Te Damaskus be nanide te bidi me deli bidali, agai nogi Ananaias. Te bidi Godibolo lotu po wabo da, da Juda dabego bomo yai po me agai wali pabo da, tama tigidali Juda te Damaskus tqde bidali bidi dabe augwaligo homugo ‘Te dwagi yai bidi da,’ homu yai dao. ¹³ Tialima, te bidi Ananaias aga ena pageba dolagaselama, agai ena dali te po wai, ‘Sol, nage dago ama dao. Megi nage usu elama, gedugo ma suao,’ te po wai. Tama te bidigo te po ola silibo si, eno gedu usu elama, aga eno suali. ¹⁴ Agai enabolo te po wai. ‘Te God dago wāigo lotu po wai dao, te da, agai homugo agai yabo sē tigidali nago konemainogo te yali dao. Agai sē ebo dwagi yai bidi nage sumainu homu eyu, nage sa muai dao. Tama agai homugo agai pedauwaligo po wabo nago odomainu yali. ¹⁵ Tialima, Godigo homugo nage agai po pusabo bidi nigelali dao, tama nago tigidali we bidibolo nago gedugo suali nai me, te ologo odali po me pusagameo. ¹⁶ Nage magi baso tonalubawe? Nage hodaluama, tama baptais sao. Nago dago Genuai Bidi i wao, tama agai nago dwai kolesaga yali sege tigidali sela sāmainu tama yao,’ Ananaiasgo enabolo te po wai,” Pol agai te po wali.

¹⁷ Te bidi Pol agai te po me wali, te Jerusalem we bidibolo, “Te nosali ena Jerusalemba geasa asali. Tama ena te Moni Lotu Be tempel tomoba pelama, Godibolo po obadi, te sogo eno nai me deli suali, ma nade subo aq yali. ¹⁸ Tama eno suali ma, Genuai Bidigo ena dali po mibo suali. Tama agai te po tama wali, ‘Odao, nage te Jerusalem be nani megis polo taga pao. Nago e we bidibolo te enade po wabo si, augwaligo odogobeo. ¹⁹ Tama tibaso, nage polo pao,’ te po wai. Eno te po wei ponoyu, te po wai, ‘Genuai Bidi, augwaligo ena koneai dao. Polobadu ena te bomo yai po ola mabo be dabe tomoba pelama, te nago po wali pabo we bidi nogi tulama, elama, kalabuside muai dao. Tama eno te yali sē augwaligo koneai dao. ²⁰ Tama me sogo augwaligo nago po wabo bidi Stiven ela mubo si, ena tede bidu, ena me usu da po wai dao. Te Stiven elali bidi dabe augwaligo ugwa eno tonaluali, augwaligo Stiven ela mubo si,’ eno te po wai. ²¹ Tama te Genuai Bidi agai enabolo te po wai, ‘Nage megis pao. Eno nage te Israel hani isāwai we bidi pageba tagala palabo dao, digibulu,’ te wali,” Pol agai te po wali.

²² Te Juda hani we bidi tigidaligo Polgo wabo po odali. Tiali goli, agai te po wabo augwaligo odali, ‘Te Israel hani isāwai bidi tau saibao,’ wabo po odama, augwaligo sēbē elama, bomo elama, po dagā wali, “Te tiwai kolesaga ebo bidi ela muao. Te dwai bidi aga da dali e tqde mu tama bidigio,” wali. ²³ Tama augwali moni sēbē mu eboso, augwaligo moni po dagā olama, tq hogomu dali augwa gudubo ugwa dabe me selama, ugwbaba sesayani. ²⁴ Tama te Rom ami tobolu bidigo aga enesigi bidi dabebole te po tama wali, “Dagego Pol dago bomai be tomoba odasa asao,” wali. “Dagego aga bono kēnama, keloago elao,” wali. “Keloago

elama, agai te Juda dabego agade te moni po dagą wabo page agai dabolo pusa mawaibao, agai tibo po wagobeo,” wali.

²⁵Tiali goli, augwaligo Pol bono kęnama, bomai be tomoba pelama, augwaligo aga elai hagede, te ami genuai bidi me deli agai page pąde dolaluali. Tama te bidibolo Pol agai te po hanalu wali, “Dagego te po tų isąwai bidi olo dali elaibawe? Bidi me deli aga nogi Rom gavman bidigo bukude elalubaso, te dagego te bidi olo elamuo. Te Rom gavmanigo bomo yai pode tiwai po elalubo dao, hasia po tų bolo ebo da, te bidi dwai kolesaga yai yabo wenama suenu,” Pol agai te po wai. ²⁶Tama te ami genuai bidigo te po odama, aga te enesigi tobolu bidi dolo pageba mu pelama, te po hanalu wali, “Nage magi sę yabo homu ebawę? E bidi agai nogi te Rom gavmanigo bukude nogi elalubo da,” te po wai. ²⁷Tama te ami tobolu bidi agai Pol sugi pelama, agai agabolo hanalu wali, “Nago nogi Rom gavmanigo bukude nogi elalubawe?” Pol agai “Awe” wali, “te mu dao,” wali. ²⁸Tama te enesigi bidi tobolu bidigo te po wali, “Eno Rom gavmanibolo mone ge hauwa mugo abelama, eno nogi Rom gavmanigo bukude aşenama tama elalubo dao,” wali. Polgo te po ma wali, “Mu tama dao, ena aya dali ida dali sigo nogi te Rom gavmanigo bukude muai dao, polobadu. Tama ena ame nani sogode te bidigo eno nogi me bukude aşənai,” te po wai. ²⁹Te ami genuai bidi dabe me, te Pol elai hagede yali bidi dabe me, augwaligo te po odobo si, augwali wi elama, polo habu kilali. Te tobolu bidi me moni wi mu yali. Magi basowe? Te bomo yai po bolama tama agai te enesigi bidi dabebolo megı tama te po wai dao, “Aligabo bono selama, Pol nogode kęao.” Tiali goli, agai hasia Pol dali po tų ebe. Tama agai megı tama koneani, te Polgo nogi te Rom gavmanigo bukude elalubo dao.

Pol agai te Juda hani kaunsil bidi dali po pusa mawai

³⁰Te do te enesigi bidi dabe augwa tobolu bidigo Pol nogode aligabo bono kęani pisagana palali. Tama agai homugo te Juda hanigo Pol po tų ebo po page mu gegai hagede tiali. Tama te ami tobolu bidigo te enesigi bidi dabe augwalibolo te po wai, “Dagego te pris hani tobolu bidi me, te Juda hani kaunsil bidi dabe me, sisinao,” wali. Tama augwali sisinagaselama, ami tobolu bidigo Pol te po miboba odasa dulama, doligiluali.

23 ¹Tama te moni po mibode Pol dolalu, te kaunsil tobolu bidi dabe bomonama gedugo tonalu, tama agai te po wali, “Dage eno deli hani dao. Eno te tiwai kolesaga Godigo susa aselama, megı eba usu naga sobao. Eno God dali dwai kolesaga me ebeo. Te tibo kolesaga yalide ena ma po tų ela mabeo,” wali. ²Tama Pol agai te po wabode, te pris tobolu bidi agai nogi Ananaias, te bidi agai Pol pagede dolalubo bidibolo te po tama wali, “Dagego te bidi pedauwalide elao,” wali, tama augwaligo

Pol elali.³ Tialima, Pol agai Ananaiasbolo te po wali, “God agai nage elaibao,” wali. “Nage te nago tigiwali badu naga sawi yai elalubo dao. Tiali goli nago homu kolesaga tomode da, te damua pai elalubao,” wali. “Nago homugo nage Mosesgo bomo yai po wali pelama, enade po tū dolo ela mobao homu yali. Tiali goli, megi nago te bomo yai po bolama, nago te bidi dabebolo olama, ena olo dali elao wali. Te dwali,” Pol agai te po wali.⁴ Tama te Pol pagede dolalubo bidigo Polbolo te po wai, “Te bidi da, te tuni bidi pris dao. Tama nago magi baso te dwai po agabolo obawe?”⁵ Tama Pol agai te po wali, “Ama dedeo, eno konebeo, te tuni bidi pris aga bidibadi digi yabuo. Te eno geda muai yabuo. Magi baso meni, Godigo po wabo aşənî bukude te po me deli elalubo, ‘Duga tonalubo tobolu bidibolo posobo po wagimio,’ ” wali.

⁶ Te Pol agai te tama weyu, agai bugagia koneama tonalu te homu yali. Te po miboba asali te kaunsil bidi dabe agai koneama, te bidi hani sibi dabe si bidibao homu yali. Agai suali, te bidi dabe tomode digi te bidi hani sibi si elalubao, me deli te Juda hani dabe tomode te Farisi bidi hani sibi dao. Te Juda dabego tomode digi te me badu bidi sibi hani da, te lotu po wabo tonalubo bidi hani sibi dabe da, te augwali te hani nogi Sadyusi dao. Tialima, agai augwali sulama, tama agai po bomo elama te po mibo bidi dabe augwaliba weyu, te po wali, “Ama dedeo, ena te Farisi hani bidi dao, eno hani nq̄ dabe augwali me te Farisi hani dao. Tama megi ena dage tomode dolalubadi, dagego ena po tū ela mabo. Magi basowe? Eno homugo te tigidali we bidi Godigo te ḡu pagede ma hodolaibao. Eno te tiabo sogo tonalubo dao. Ena tama wali pode megi dagego ena po tū ela mobao,” Polgo te po wali.

⁷ Te bidi Polgo te po olama silibo si, te bidi hani sibi si te Farisi me Sadyusi te hani augwa sibi tomode konila ebo wado po polo olama, te hani si te po miani te besela s̄awanio.⁸ (Magi basowe? Te Sadyusi hani sibigo te homu ebo da, te isai bidi dabe ma hodalogobeo homu elaluali, te Godigo ensel bidi dabe bidibeo, te homu ebo tiwai, te mobo bidi dabe me bidibeo, te homu ebo dao. Tiali goli, te Farisi hani sibi dabego te homu ebo da, te isai bidi dabe ḡu pagede ma hodalaibao, te mobo bidi dabe mu bidibo da, te Godigo ensel bidi dabe mu bidibao homu yali.)⁹ Tama te umabo bidi dabego bomonama, moni po daḡa wali. Me badu te Farisi bidi sibi me, augwligo te bomo yai po ola mabo s̄ eyu, dolaluali. Tama augwligo s̄eb̄ ebaso, te po bomonama wali, “Dago te bidigo dwai kolesaga me yai subeo. Mobogo me, ensel bidi me agabolo te po wali bogo,” te po wali.

¹⁰ Te hani bidi sibi si augwa te po mibode moni s̄eb̄ mu yali. Te ami tobolu bidi agai homugo tama tiali, ‘Te po miani bidi dabego Pol nogo s̄aq̄ uga keke, edaba keke elama, agai tigi polo tologa pabode ela muabo maga dao,’ homu yali. Tama te homu elama, agai te enesigi bidi dabebolo

te po wali, “Dage me badu te po mibo tomoba pao,” wali. “Tama augwaligo Pol nogo keke baso da, teda dagego aga nogo keka selama, dago aga te bomai be tomoba sela paibao,” wali.

¹¹ Te së augwaligo elama, te sogo hulide te Genuai Bidi Jisas aga Pol pageba aselama, dolaluali. Tama agai te po wali, “Pol, nago Jerusalem bidibolo eno po pusa mani. Tama nosali nago te pusali po tiwai naga te Rom be nanide me pusa mao. Tama tibaso, nago wi egio, nago homu däq olama, bidao,” wali.

Juda dabego Pol elabo po wali

¹² Te do kigamu Juda hani bidi me badu sisinani, augwaligo yabo së po dodolali. Tama augwaligo te po bodolu Godibolo däq walama, te po wai, “Dago tubo nai me, aq me gisilama, Polbolo polasa ela muaibao.

Tilama, nosali dago nai me aq me ma tueibao,” wali. ¹³ Te po minama mu däq wabo bidi dabe te bidi sigo nogo ságä sese te 40 silama bidi bidali.

¹⁴ Tama augwali te pris hani genuai bidi dabe pageba pali, tama te toboli bidi te monu dabe pageba me pelama, tama augwalibolo te po tama wali, “Dago te bomai bodolu po Godibolo wali, megi dago nai me, aq me tuguo wali. Pol ela muaibao, tama nosali dago nai me, aq me ma tugo. ¹⁵ Tama tibaso, megi dage me, te kaunsil toboli bidi dabe me, dage tigidali dagego te ami toboli bidibolo bidi mumubo po ola tolao. Agabolo te po wao, ‘Dago homugo nago Pol eba ma tagala palao. Tama dago homugo agabolo po me badu ma hanalu waio, dago homugo agai mena së mu yali te dago mu koneao,’ te po wao. Tiali goli, aga edaba asobadi, dago nq mugi pelama, aga ela muaibao,” te Juda dabego te po wai.

¹⁶ Te bidi Pol aga abego ogwa, te gesi bidigo te Pol nq mugi pelama elabo po mibo odali. Tama tibaso, aga pelama, ami bidi dabego bomai beba Polbolo te po wagi pali. ¹⁷ Tama Pol agai te enesigi bidi genuai bidi me deli i olama, agabolo te po wali, “Nago te gesi bidi duga toboli bidi pageba odasa pao. E bidi agai po me deli elalubo, agai odomainao,” wali. ¹⁸ Tama agai te gesi bidi odasa, aga toboli bidi pageba pali. Agai te po wai, “Te kalabus bidi Pol agai ena i olama, hanalu wali, eno e bidi nage pageba odasa soao. E bidi agai homude elalubo po me deli nagebolo mawaibao,” wali.

¹⁹ Te ami hani toboli bidigo te gesi bidi nogo tolasa, augwali si gasa habuba bidi meni yaiba pelama, agai te gesi bidibolo hanalu wali, “Nago homugo magi po enabolo waiwe?” wali.

²⁰ Te gesi bidigo agabolo te po wai, “Te Juda hanigo genuai bidi dabe augwaligo homu deli elama, augwaligo do nagebolo te tibo po nigilama, hanalu weyu, tama waibao, ‘Dago homugo Polgo yali së po ma odaio. Da pageba Pol odasa asao,’ te po tama do augwaligo waibao. ²¹ Tiali goli, augwaligo wabo po nago ‘Au’ wagio. Te augwaligo bidi sese si bidi

tūba nō muagasaibao, Pol pabode elainogo yaibao. Tama augwaligo God gedude Pol elaibao po polai dao. Augwaligo Pol elainu, te nai me, aji me osogo gisilali. Augwaligo te po dola selama, nago ‘Awe, Pol te kaunsilba pagameo’ po wabo wenama tonalubo,” te gesi bidigo te po wai.

²² Te ami hani toboli bidi agai te gesi bidibolo te po wai, “Nage pedauwali pania sao. Nago enabolo wali po gasa bidibolo munu ma pusugio, hogwa sao,” wali. Tama agai te gesi bidi aga beba tagala palali.

**Te ami toboli bidigo Pol te moni gavman
bidi Feliks pageba tagala palali**

²³⁻²⁴ Te ami hani toboli bidi agai te ami genuai bidi si i wali. Augwali si aselama, agai tega sibolo te po wai, “Dage sigo meg i hulide Pol te Sisaria buluba odasa pao. Eno homugo dage sigo bugagia odasa pelama, Feliks pageba tagaligi pao. Agai te gavman moni toboli bidi dao. Tama dagego enesigi bidi dabe bida sese nogo si nama 200 bidi sao. Te kibu hosde duayabo enesigi bidi dabe te bida sese sela olama, gasa bidigo nogo si nama 70 bidi me sao. Te bida sese nogo si nama 200 bidigo sesemone enabo bidi me sao. Dage sigo tama bidi dodolama, te Pol aga duayabo hos kibu dabe dodolao. Tama dodolama, te meg i huli tomode nai po wabo magade 9 klok e bulu taga pagameo,” te po wai.

²⁵ Te po olama, te ami toboli bidi agai te pas nogogo aşəani, te pasde te po wali,¹ ²⁶ “Eno nogi Klodius, me nogi Lisias dao. Megi eno te pas Feliks nagebolo aşebe dao, nage gavman genuai toboli bidi dao, nogi elalubo bidi dao. Nage tao. ²⁷ Eno te bida nage pageba tagala palebe dao. Magi basowe? Te Juda hani bidigo aga nogo tulama, pade mu tama elebad, tama dago tama odali agai nogi dago gavman bukude nogi elalubo. Tama tibaso, ena eno enesigi bidi dabe dali pelama, te bida augwaligo nogode eno salio, tau selama, bobelai dao. ²⁸ Eno homugo e bidigo mena dwai kolesaga ebaso, te Juda dabego elainu yaliwe? Tama tibaso, te po page eno koneainu, eno aga augwaligo kaunsil bagede po miboba odasa pali. ²⁹ Tama tilama, Pol agai yali po page eno odali. Augwaligo aga po tū yali Juda dabego bomo yai po me badu pode. Tama augwaligo aga elabo dwai kolesaga me ebeo. Tama augwaligo te dwasianu pode aga kalabus me egobeo. ³⁰ Tama tibaso, eno meg i aga nage pageba polo tagala palobo dao. Magi basowe? Eno te Juda dabe sisinama, te bida Pol elabo po eno odalio. Tama eno augwalibolo te po wali, ‘Te bida po tū yabo da, e tama dao. Dage meg i Sisaria be naniba pao, te gavman genuai toboli bidi Feliks agai pagede te po tū yao.’ Te elama, eno po tama dao,” te po agai aşəani.

³¹ Te ami enesigi bidi dabe augwaligo augwa toboli bidigo wali po wali pali. Tama augwali hulide Jerusalem taga pelama, augwaligo Pol te

¹ 23:25 Sai 22:28

Antipatris be naniba odasa pali. ³²Tama do kigamu te tōdu pabo enesigi bidi sibi me, te sesemone enabo bidi dabe me, augwali Jerusalemba ma geasa pali. Tialima, hos kibude duga yali bidigo naga augwaligo Pol te Sisaria be naniba tagaligi pali. ³³Tama te sogo augwali Sisariaba sabolali. Te ami toboli bidigo aşənai pas augwaligo te gavman genuai toboli bidi Feliksbole mani. Augwaligo te gavman toboli bidi pageba Pol tagalali. ³⁴Tama te gavman genuai toboli bidi agai te pas nedama, agai Polbolo hanalu wali, “Nage mena tō bidi dawe?” Tama Pol agai te po tama wali, “Ena Silisia tōdu asai dao,” wali. ³⁵Tama te gavman genuai toboli bidi agai te po odobo si, agai Polbolo te po wai, “Nage po tū yabo bidi dabe eba sabalobo si, eno te po tū ebo odaibao.” Tama aga enesigi bidi dabe i wali. “Dagego Pol genuai gavman bidigo dwagi yai beba tagaligi pao, te polobadu te genuai bidi Herotgo sē yai be dao. Dagego aga bugagia tonaluao,” te po wai.

Te Juda toboli bidi dabe augwaligo Pol po tū yai po da

24 ¹Te a naga sogo silama, te Ananaias aga Sisaria be naniba asali. Te budi Ananaias te pris toboli bidi da. Aga dali Juda dabego monu dabe me badu me asali. Te budi me deli agai nogi Tertulus, aga me asali. Te budi agai po tū ebo sē mu koneai bidi da. Tama augwali tigidali te gavman toboli bidi Feliks pageba sabolama, tama augwaligo Pol po tū yabo po tigidali agabolo pusa mani.

²Tama te toboli gavman bidi Feliks agai te Tertulusbolo “Nago po wabo gagalao,” wali. Tama aga doligluama, Polgo po tū yabo po gagalama, agai tama po wali, “Dago genuai bidi, hasia eno nagebolo nage usu da po waibao. Magi basowe? Nago dwagi yai kolesaga mu elalubo. Tama tibaso, da bugagia bidibo da. Nago te bomo yai po bugagia dodolama, me badu sē me dago bulu hodolabo sē bugagia dolasa pabo. ³Tama tigidali sogo dago nage dali moni bugai homu ebo dao. Te tama tibaso, dago homu nagebolo nage usu dao po obao. ⁴Tialima, eno nage dali bobobage po pusugomeo, nago sē yaga wali saqā tola sidilio. Tialima, megı eno nago da homu dene elama, da olo tau sabo po hanalu obao, nago dago pewadage ponu pusubo odao.”

⁵“Dago te bidi Pol sulama, koneani, agai da te dwai dwai kolesaga hauwa ebo bidi da. Tama dago koneani, te budi agai tigidali Juda bidi tomode me, tigidali bulude me, hwībo po page pabo bidi dao. Tama agai te wado po olama, tama te we budi hani tomode pedebo bidi. Tama aga te Nasaret dwai budi hani toboli bidi dao. ⁶Tama odao, agai dwai kolesaga dago Moni Lotu Be tempel tomode gagalama yali, te be meda ilainu, te dago Moni Lotu Be tempel bomo yai po agai bolalio. Tama tibaso, dago aga nogo tuali. [Tama dago homugo te dago bomo yai po bolalide, aga po tū ebao. ⁷Tiali goli, te ami hani toboli bidi nogi Lisias aga dali

te enesigi bidi dali aselama, augwaligo te bidi dago nogode bomo mu elama, dobawai dao. ⁸Tama nosali te ami tobolu bidi Lisias agai te po wai, ‘Te Pol po tū yai hagede yali bidi augwali aselama, nage gedude te po wagasao,’ wali.] Tama megis nago agai yali sē po page hanalu wabosi, tama aga digi te po page nagebolo pusaibao. Tama nago dago aga po tū yai hagede yali po page gegao,” te po wai. ⁹Tama Tertulusgo te po olama, te Juda dabego me aga tau selama, “Te mu po dao, te Polbolo naga,” te po wali.

Pol agai Feliksbole po pusali

¹⁰Te genuai gavman bidi Feliks agai nogo sibage elama, “Asao” olama, agai homugo Pol agai po omainu yali. Tama Pol aga dolalu, agai te po tama wali, “Eno nage koneanio, nage e tōde tobolu bidi nigila bidibadi, kibu be hauwa sililio. Tama tibaso, nago dago ebo kolesaga kone dao. Tama tibaso, eno dwagi yai homu eyu, ena digi tau sabo po nagebolo pusuba. ¹¹Megi te poluade ena Jerusalemba pelama, Godibolo lotu po wainu yali. Te hauwa sogo silibeo, nogo si olama, sāqā badu si wagi solama, sia sali. Tama nago augwalibolo hanalu wabo si, teda nago mu koneibaio, te po mu da. ¹²Te sogo augwaligo ena suali, eno gasa bidi dabe dali pogo wābi hwiyu ebe, te Moni Lotu Be tempel tomode. Tama eno bidi dabe me badu wābi hwijabo bidi me sisinibe. Eno te tobage kolesaga tigidali bomo yai po ola mabo bede eno me ebe, te Jerusalem tōde me ebe. ¹³Tama augwaligo te po megis ena po tū ela mabo, te po mu po menio. Tama eno te dwai sē yali po page tiwai me augwaligo nagebolo ola magobeo, te po mu da wagobeo.”

¹⁴“Tiali goli eno homugo dagebolo augwaligo ena po tū ela mani po dagebolo eno bugagia konelaibao. Ena te God wali pabo gesi tū wali pabo da. Ena God mu agabolo lotu po obao, te dago noqgo te lotu po wali God da. Tiali goli, bidi me badu augwaligo dago gesi tūdu wali pobaso, augwaligo homugo da Juda hani dolobo dao homu ebo. Tiali goli, eno tigidali Mosesgo aşənai po me tagalobeo. Tama eno te polobadu Godigo po bukude aşənama pusa mani po eno konealubo homugo tagalogobeo. ¹⁵Eno konealubo homugo God koneama, nosali we bidi tigidali gū pagede ma hodolaibao, te me badu we bidi dwagi yai kolesaga yali we bidi hani da, te me badu dwai kolesaga yali we bidi hani da. Tama te sē yabo sogo asobo eno tonalubao. Tialima, te Juda hani bidi me augwaligo te sē yabo sogo tonalubao. ¹⁶Tama tigidali sogo eno tigidali we bidibolo dwai kolesaga ebo ena mu hagelabo. Eno Godigo gedude me, we bidi tigidaligo gedude me dwagi yai kolesaga naga yai hagede, eno te sē bomo ebo da,” Pol agai te po wai.

¹⁷Te bidi Pol agai po me tama wali, “Te polobadu ena Jerusalemde bidama, nosali gasa buluba pelama, kibu be me si me si nama silama,

ena Jerusalemba tamadi ma pali. Te sogo ena peyu, eno ama dede Jerusalemdé bidibo bidi tau sai hagede, mone ge dali selasa pali. Eno homu me eno Godibolo hasa elama, Godibolo nai ula mabo kolesagadu wali pomainu yali. ¹⁸Tama ena te Moni Lotu Be tempel tomode te së ebadi, augwaligo ena suali. Te God gedude dwagi yai bidabo lotu së eno ela silama, augwaligo ena suali. Tama bidi dabe me badu sisinama, po dagä olo dali weyu, te ena dali hwiyu yabo bidi hani me sisinai menio. ¹⁹Tiali goli, Juda hani me badu te Esia tqde bidibo bidi hani aselama, te Moni Lotu Be tempel tomoba asali. Tama augwaligo ena dali te po wabo page bidi dabe da. Tama te Juda dabe augwaligo homu ena po tû ela magi sogo da, teda augwali nago pageba aselama, ena po tû wagasigi da. Augwa po elalubaso da, magi homu elama, augwali magi baso nage pageba te po polo wagasobewe? Magi basowe? Augwaligo po menio. ²⁰Tiali goli te bidi dabe eba sabolali bidi dabe, augwaligo nagebolo eno dwai kolesaga yali po pusao wao, te eno moni kaunsil bidi gedude dolalubadi yali së po pusao. ²¹Tiali goli, augwaligo eno dwasianu yali së me delide wado ebao. Eno te moni kaunsil bidi dabe gesabide tomode dolalu, eno te po wai dao, ‘Eno homugo God mu konealubo da, te isali we bidi tigidali Godigo gû pagede ma hodolaibao. Tama tibaso, dagego ena po tû ela mabo,’ eno te po wai,” Polgo te po wai.

²²Te bidi Feliks agai te Genuai Bidi Jisas wali pabo tû po bugagia koneani. Tama agai te Juda bidi hanibolo te po tama ola mani, “Te ami toboli bidi Lisias asobode, eno dagego te po tû ebo dodolaibao.” Agai te po tama olama, te po tû yali tagalama, nosali po tû ma yainu tonaluali. ²³Tama Feliksgo te ami hani genuai bidibolo te po wai, “Pol kalabusisa muao. Tiali goli, nago Pol kalabus bomonama egio. Pol aga abagi dabe aselama, aga suagaselama, nai dabe me magasomainao,” te po wai.

Feliksgo Pol kalabus bede bidabo kibu be si mani

²⁴Te nosali hauwa sogenu silama, Feliks dali aga we dali asai, te we nogi Drusila, te Juda hani we da. Augwali si aselama, tama augwaligo Pol i wai. Tama Pol aga pageba asali. Tama Pol agai augwali sibolo te Jisas Krais teba homu mubo po page ola mani, tama augwali sigo odali. ²⁵Tiali goli, Pol agai te po ola mayu, te po wai, “Tigidali we bidi dwagi yai doloba pai kolesaga mu elama, bugagia tonalua, dagego dwai kolesaga egio.” Tama agai te po wali, “Godigo we bidi tigidali po tû yaibao,” wali. Tama te sogo Feliks agai te po odama, agai wi mu elama, agai Polbolo te po wali, “Nage megí te kalabus beba ma pao. Tama nosali me sogo eno së meni baso, nage eno i obaso da, te nage ena pageba asagameo.” ²⁶Tama Feliks agai homugo Pol agai mone dualama, gême menama, agai kalabus ebo tagalamainu, te homu yali. Tama tibaso, agai Pol hauwa sogo i olama, aga dali po wali.

²⁷Te Feliks agai homugo te Juda hani bidi dabe abagi olama, bugagia bidainu homu yali, tama agai Pol kalabus bidibadi sula tagalali. Tama kibu be si silama, te bidi Porsius, aga nogi me Festus, agai Feliksgo së hasegelama sali, te moni gavman së. Tama Feliks gasa buluba së egi pali.

**Pol agai te po wai, te moni gavman bidi Sisargo
agai eno po tū odomainao wali**

25 ¹Tama te sogo Festus agai te gesi së selama, te Sisaria buluba asai dao. Tiali goli, tede sela sogo bidama, agai Jerusalemba pai dao. ²Tama te Jerusalemdé te pris tobolu bidi me, te Juda hani tobolu bidi me, augwali dali pai dao. Tama te hani Festus dali deliba sisinama, augwaligo Pol po tū yai dao. ³Augwaligo bidi me badu dodolama, tāba nō mumainu, tama augwaligo homugo Pol elainu, tama augwaligo Festusbolo bomonama hanalu wali, “Dago homugo nago te bidi Pol Jerusalemba odasa asao,” wali. ⁴Tialima, Festus agai te po wei ponoyu, te po wali, “Pol aga Sisaria bulu kalabus bede bidali. Pಡde tama ena Sisaria buluba ma paibao,” wali. ⁵“Tama dagego duga tobolu bidi dabe ena dali tagala palao. Tama te bidi agai dwai kolesaga yai baso da, te dagego aga te Sisaria bulude po tū ilagameo,” wali.

⁶Te Festus aga te Jerusalemdé bidibadi, nogo si sogo bidama, aga Sisariaba ma pali. Tama do kigamu aga te po tū bede bidali. Tama agai ami bidi i olama, “Pol odasa asao,” wali. ⁷Tama Pol te po tū ebo be tomoba aselama, te Jerusalemdé asali Juda tobolu bidi dabe aga pageba sisinagasali. Te augwaligo bomai po umabo olama, te bidi Polgo dwai dwai kolesaga dabe haniani ebo bidi da po olama, Pol po tū ela mani. Tiali goli, te po mu po meni, augwaligo Festusbolo te po mu po ola magobeo. ⁸Tiali goli, Pol agai te po wei begeleyu, te po wali, “Eno te Juda dabego bomo yai po me deli bolobeo. Eno dwai kolesaga augwaligo Moni Lotu Be tempel tomode me ebeo, te be tomode meda ilama, me dolobeo. Tama eno dago Rom gavman moni tobolu bidi Sisar agai nogi dolabo po me wabeo,” Polgo te po wai.

⁹Tialima te gavman bidi Festusgo agai homugo te Juda hani bidi dabego aga dali dwagi yai homu pemene eyu, abagi olama bidai hagede homu yai. Tama tibaso, agai te po Polbolo hanalu wali, “Nago homugo eno te nago po tū te Juda dabego kaunsil bidi dabe gesabide dodolomainuwe? Tama tiabo homu eboso da, teda nago homugo eno nago po tū te bulu Jerusalemba pelama, dodoligi paiwe?”

¹⁰Te bidi Pol agai te po wai, “Eno homugo Jerusalemba pogobeo. Megi ena e dolalu po tū ebo be, te tigidali bulu tonalubo moni gavman bidi Sisargo po tū ebo be deli da. Nago ena e bede po tū ilao. Naga digi koneai dao, eno te Juda hani dali dwai kolesaga me ebeo. ¹¹Eno te moni bomo

yai po me deli bolai tigi sogo da, te ena ela muao wagi da. Nago homugo augwaligo aga ela muao po wagi sogo da, teda eno ‘Ena elamuo’ po wagi menio. Tiali goli, augwaligo tibo pode ena po tū ebaso, te gavman bidigo ena augwaligo olo dali elemai hagede sula tagalogobeo. Tiali meg i eno homugo nago ena te Rom buluba tagala palao, te Sisar pageba pelama, tede agai te ena po tū bugagia dодолаibao,” Pol agai te po wai. ¹²Tama Festus agai te po odama, agai po tū ebo mu koneai bidi dabe dali po miani. Tama te po mibo silama, Festus agai Polbolo te po wai, “Nago homugo nage te Rom gavman moni tobolu bidi pageba pelama, agai nago po tū dодолаibao. Nage teba pao,” wali.

Festusgo Pol po Agripabolo hanalu wali

¹³Te nosali me sogo te moni gavman bidi me deli, te bidi nogi Agripa da, aga dali aga abe dali si te Sisaria be naniba asali. Te aga abe nogi da Bernaisi da. Augwali si Sisaria buluba aselama, te Festusbolo “Nago te sē elama, bidibo, usu dao,” wali. ¹⁴Tama augwali si Sisaria be nanide hauwa sogenou bidama, te Festus agai te Pol po Agripabolo wali. Agai tama po wali, “Te kalabus bidi me deli bidibo, agai nogi Pol da. Tama Feliksgo te agai po tū silisābaso, aga te kalabus bede bidibo. ¹⁵Tama polobadu gana ena Jerusalemba pelama bidagasali sogo, te Juda dabego monu dabe me, te genuai pris tobolu bidi dabego badi, te Juda hani dabe tobolu bidi dabego me, tama augwaligo te bidi po tū ilali. Augwaligo enabolo te po wali, ‘Nago te bidi po tū elama silibo si, enesigi bidi dabego aga mu ela muao,’ wali. ¹⁶Tama tiali goli, eno augwalibolo te po wai, ‘Da Rom bidi dabe dago te tobage sē ebo menio. Dago te po tū yabo sē te tiwai ebo da. Te po tū yabo page bidi dabe me, te olo bidi me, augwali tigidali sisinagaselama, te olo bidi agai bilali po page dabe me, agai yali sē po page me pusubo dao. Tama te tobage po tū yabo sē esiābaso da, teda da Rom dabego te bidi aga po tū yabo page bidi dabego nogoba mubo menio,’ eno te Juda dabebolo te po wali.”

¹⁷“Tama augwali ena dali e Sisaria buluba asali. Tama ena toma tube, tama do kigamu ena te po tū ebo beba pali. Tama eno enesigi bidi dabe me badu tagala palama, augwaligo Pol ena pageba odasa magasali.

¹⁸Tama dago po tū yali. Te Pol po tū ilibo bage dolaluyu, po wali. Tama eno homugo augwaligo te po tū ilibo Polgo haniani dwai kolesaga yai digi po tū ebo yaba homu yali. ¹⁹Tiali goli, meni. Augwaligo aga po tū ebo po page augwaligo lotu po wabode naga tama. Tama augwaligo aga po tū ilibo po page me deli e tiwai elaluali. Te bidi me deli isali, agai nogi Jisas da. Tiali goli, Pol agai po bomai mu weyu, ‘Te bidi Jisas da, te gesi bidibo ula elalu bidibao,’ wali. ²⁰Tama eno bugagia te po tū ebo eno konebeo. Tama tibaso, eno Polbolo hanalu wali, ‘Nago homugo Jerusalemba pelama, tede nago e po tū yaibawe?’ wali. ²¹Tiali goli, Pol

agai homu hagela yali. Tama agai enabolo te po wali, ‘Nage ena Rom buluba tagala palama, te Sisar pageba pelama, tede agai digi eno po tü dodolaibao,’ wali. Tama te po obaso, eno te enesigi bidi dabebole te po wai, ‘Aga dagego tonaluao. Nosali eno aga Rom gavman bidi Sisar pageba tagala palaibao,’ ” Festusgo te po wai.²² Tama te moni gavman bidi Agripa agai te Festusbolo po wai, “Ena digi te bidigo po ena odaibao.” Tama Festusgo agabolo te po wai, “Do kigamu naga odagameo,” wali.

²³ Te do kigamu te ami toboli bidi dabe me, te Sisariade bidibo genuai nogi yai bidi dabe me, te gavmanigo po mibo be tomoba pali. Tama Agripa dali, Bernaisi dali si te be tomoba pabo si, te bede au yai madigi pelama, augwaligo augwali si bugai homu ilali, nogi uwguba sali. Tama aselama, Festus agai ami bidi dabe me badu tagala palali, augwaligo Pol odasa aselama, te bidi dabe tomoba asomainu. ²⁴ Tama Festus aga doligi uluama, te po wai, “Te gavman genuai bidi Agripa me, te gasa genuai bidi dabe me, meg i po miboba asali bidi dabe, dagego te bidi suao. Tigidali Juda we bidi augwaligo e bidi enabolo elao wali bidi e dao. Tama Jerusalemde me, ede me, augwaligo te po wali, enabolo wali, e dao. ²⁵ Tiali goli, ena digi gegali, te aga elabo po page menio. Tama aga digi enabolo hanaluama, te po wai, ‘Te Rom moni gavman bidi Sisar pageba ena tagala palao,’ wali. Tama te po obaso, eno aga Sisar pageba tagala palaibao. ²⁶⁻²⁷ Te eno homugo moni gavman bidibolo te pas aṣenama, te agai e bidigo po tü page konemainu yaibao. Tiali goli, eno te pasde aṣeabo po page eno konebe. Tama tibaso, eno e bidi dage pageba odasa asali. Tama duga naga aga po odao. Tama eno homugo mu te genuai gavman bidi Agripa, naga digi te agai po odao. Eno e bidi dago gavman tigidali bulu tonalubo toboli bidi pageba tagala palu, te agai te po tü page bugagia wasiawai, eno homugo te usu egobeo, te homu yali. Tama nosali e bidigo po dago odama, eno dwagi yai pas me deli aṣenama, te Sisarbolo te po tü page pusa mawaibao,” Festusgo te po wai.

Pol agai Agripa dali po pusali

26 ¹ Te genuai gavman bidi Agripa agai Polbolo te po wai, “Megi naga digi tau sabo po pusagameo,” wali. Tama Pol agai nogo munama tigidali we bidigo agai po odomainu, aga digi tau sabo po tama wabo gagalama weyu, te po wai, ²⁻³ “Genuai gavman bidi Agripa, nage gesabidide eno meg i e po pusubo, ena dwagi yai homu ebao. Te Juda hani dabe augwaligo ena dali umabo dwai po tü yabo po wali, eno homugo te po wei begelebao. Tiali goli, nago mu koneai dao, tigidali da Juda bidigo haniani ebo kolesaga. Tama bidi dabe me badu augwaligo homu me deli te tiwai ebo dao. Bidi dabe me badu augwaligo pogo hwibō tiwai elama, gasa homu dali wali pabo da, te me nago koneai dao. Tama eno te po eno nage gesabide pusubo, eno dwagi yai homu ebao. Tilama, meg i eno homugo nage bugagia bidama, tonaluao, eno wabo po odao,” wali.

⁴ Te bidi Pol agai po me deli weyu, te po wai, “Te tama te Juda dabe tigidali augwaligo ena ogwade ena page bulude bidu yali kolesaga te augwaligo koneai dao. Tama ena gesi bidide Jerusalemba pelama, tede skul weyu bidali kolesaga me augwaligo koneai dao. ⁵ Augwaligo ena polobadu koneai dao. Augwaligo homugo te konegi sogo da, augwaligo eno Godigo po wali peyu te s̄e yali po nagebolo wagi da. Polobadu ena Farisi bidi sibigo ebo kolesaga wali pai dao. Tama da Farisi sibi dago bomo mu elama, te Juda dabego bomo yai po dabe tigidali dolo wali pabo dao. ⁶⁻⁷Tama megi ena e po t̄u ebo bede dolalubo. Magi basowe? Polobadu mu Godigo dago bulai hani bidi nōq dabe mubolo bodolu po polai dao. Godigo we bidi tigidali ḡu pagede ma hodolaibao po wali. Eno homugo te po mu po dao. Ena te wali po nai ebogila mubo tonalubo dao. Da Juda hani tomode Jekopgo ame nani hani sibi ogwa dabe nogo si olama, s̄aq̄a me si elalubo da. Tama da Juda hani tigidaligo Godibolo hulide me, ulade me lotu po obadi, dago homugo agai dago nōqbolo polobadu wali bodolu po nai ebogilia mubo tonaluyu bidibo dao. Gavman genuai bidi, eno te po konealubadi goli, augwaligo ena po t̄u ilibo. ⁸Dage Juda hani, dagego e homu ebo da, ‘Te Godigo te isali we bidi ḡu pagede ma hodalogobeo.’ Dage magi baso te homu ebawe?” Polgo te po hanalu wali.

⁹ Te bidi Pol agai po me weyu, te po wai, “Polobadu ena digi bomo elama, umabo dwai dwai kolesaga elama, te Nasaret bidi Jisasgo nogi aiyaba elalubo s̄e yai dao. ¹⁰Tama eno te s̄e Jerusalemda yai dao. Te pris hani tobolu bidi dabe augwaligo usu da olama, tibaso eno Jisasgo po wali pabo umabo we bidi kalabus ilai dao. Tama me badu po t̄u elama, augwaligo elemai hagede, eno usu dao wai dao. ¹¹Tama hauwa sogo ena te Juda dabego bomo yai po ola mabo be dabe tomoba pelama, tama eno te augwali elemainu, eno bidi dabe me badu tagala palai dao, dene mawai, augwaligo Jisasba augwa homu mubo s̄e tagalomainu yali. Tama ena moni s̄eb̄e mu elama, te Juda hani is̄awai bidigo be nani dabebe peyu, tede te Jisasgo po wali pabo we bidi augwalibolo s̄eḡe mawainu, gegegi pali,” Pol agai te po wai.

Pol aga Jisasgo po wali pabo bidi gagayali po pusali

¹² Te bidi Pol agai te po wai, “Te eno tama s̄e yai dao. Tama te pris hani tobolu bidi dabe augwaligo enabolo pas aseña menama, usu da olama, tilama eno te pas selasa peyu, Damaskus buluba pelama, te Jisasgo po wali pabo we bidi dabe gegegi pai dao. ¹³Dago genuai gavman tobolu bidi, bugagia odao. Nai po wabo pāde, da te Damaskus pabo t̄udu pobadi, te moni sole gagawai ula dagalude asali, te ula da mu udula pali, te giliga tiwai ulago da bologoea sali, te ena dali pali bidi dabe me, te ulago mu usu yali. ¹⁴Tama da tigidali tq̄ba degasa pelama, munalubadi, bidi mego

po wabo eno odali, te Hibru pogo wali. Agai enabolo te po wali, ‘Sol, Sol, nago ena magi baso dolobawe? Nago ena elebo sē ebadi, te naga digi dene sabao. Nage te kau kibu tiwai dao. Te kau kibu page bidigo te pua pai ni dagego te kau kibu dono tigiba tunu pabo si, te dwagi yai tūdu pomainu, te kau kibu sāq sabologo ibaba sela sābo da, tama usu egobeo, aga sāq dili dene sabo da,’ wali. ¹⁵Tama eno te po wei ponoyu, te po hanalu wali, ‘Genuai Bidi, nage de dawe?’ wali. Tama te Genuai Bidi agai enabolo te po wai, ‘Ena da Jisas da. Tigidali sogo nago ena dolobo sē ebo te bidi ena dao,’ wali. ¹⁶‘Tialima nage hodaluama, doligilua. Megi ena nage pageba asali, eno nage eno sē emainu sa mubao. Nage eno po sela pelama, tigidali we bidibolo nago megis na gagawai naide ena suali po pusao. Eno nosali nagebolo ola mabo sē po me, augwalibolo pusao. ¹⁷Te Juda hani bidi dabe augwaligo nage ela muainu ebaso da, eno nage tau selama, bobelaibao. Tama eno nage te Israel hani isāwai we bidibolo tagala palaibao. Te hanigo me nage elainu ebaso da, eno nage tau selama, bobelaibao. ¹⁸Tama nago augwali hulide bidibo pesage tagalama, ulaba kegasa asao. Tama nago augwali hulide bidibo kolesaga tagalama, nago augwali ula buluba kegasa asao. Augwali Satango bomode bidibadi, nago augwali ma sao, augwali God pageba asomainu tama yao. Tama augwaligo homugo ena konealu baso da, te augwaligo dwai kolesaga ebo Godigo tigidali sela sāwaibao, te Godigo sa muai we bidi dari wadolagasaibao,’ agai enabolo te po wai,’ Pol agai te po wali.

Pol agai te bidi Agripabolo Jisasgo sē yali po wali

¹⁹Te bidi Pol agai te po wali, “Moni gavman tobolu bidi Agripa, eno moni ula dagaludu asobo sulama, agai po wali eno odama, te po eno sela sābeo. ²⁰Tama hasia bolo eno te Damaskus we bidi pageba pali. Eno augwalibolo te po tama pusa mani, ‘Dagego dwai kolesaga ebo sē tudiba sānana, dage God pageba asao. Tama dagego dwagi yai kolesaga ebo tigidali we bidi augwaligo sulama, dwai kolesaga tudiba sāyani konemainao,’ wali. Tama eno te po Jerusalem we bidibolo me, te Judia tō tomode bidibo we bidi tigidilibolo me, te Israel hani isāwai we bidibolo me, eno te po tama augwalibolo pusali. ²¹Tama eno te we bidibolo te po tama pusubaso, te Juda bidi augwaligo homugo hagelabo olama, te po pagede augwaligo te Moni Lotu Be tempel tomode ena tulama, elainogo yalio. ²²Tiali goli, Godigo tigidali sogo agai ena tau sesa aselama, te megis eba sabolalio. Tialima, megis eno e po tūde mu po tigidali we bidi me, te tobolu bidi me, te olo bidibolo me, obao. Te Godigo pedauwalide po selama pusali bidigo aseāni po me, te Mosesgo pusali po me, te eno megis e pusubo po me te deli po tama dao. Augwaligo te pusali po tiwai eno ela pelama, gasa pobadi me pusubeo. ²³Tama Moses me, te Godigo pedauwalide po sali bidi me, augwaligo te po wali, ‘Te bidi Israel we bidi

tau somai hagede Godigo sa muai bidi Krais da, agai moni dene selama, isaibao. Tama aga hasia mu gū pagede hodalobo polali bidi dao. Tama agai tigidali pogo te Juda hani me, te Juda hani isāwai bidi me, dwai kolesaga sela sābo sē dwagi yai konelai bidi aga dao, tigidali bidigo agai po odama, hulide pabo dwai kolesaga tagalomainu yaibao,” Pol agai te po wali.^m

²⁴ Te bidi Pol aga digi tau sabo po tama obadi, te bidi Festus agai agabolo i bomonama weyu, te po wali, “Pol, nage wabo pobao. Nage hauwa sogo skul wai bidi dao. Tama te genuai kolesaga sai bidi dao. Tibaso, nage wabo pobao,” wali. ²⁵ Tama Pol agai te po wali, “Festus, nage dago gavman tobolu bidi dao. Ena wabo pabo bidi menio. Eno dwagi yai homu elalu, te po eno mu obao. ²⁶ E moni gavman bidi Agripa agai me ena e wabo po koneani. Tama te sē yali po pusubo eno wi ebo menio. Te tigidali yali sē agai gedude yai sē dao, te dualama me yai sē menio. ²⁷ Moni gavman bidi Agripa, nage Godigo pedauwalide po selama pusali bidigo aşeani po nago homugo mu konebawe, te poba naga homu maniwe? Eno homugo naga homu te poba mu muani,” Pol agai te po wali.

²⁸ Te bidi Agripa agai Polbolo te po wai, “Nago homugo te nago dwasianu wabo pogo ena Jisas wali pabo hani tomoba kegasa paibawe?” te po hanalu wali. ²⁹ Tama Pol agai agabolo te po wali, “Dwasianu pogo ma, te bobobage pogo ma, te usu dao, magigo menio. Tiali goli, eno Godibolo po olama, nage dali, e po mibo bede bidibo we bidi me tigidali ena yaligia emainu ebao. Tiali goli, eno homugo dage ena kalabuside bidibo tiwai bididalio,” Polgo te po wai.

³⁰ Te Pol agai po wabo silibo si, te moni gavman tobolu bidi Agripa me, te gavman tobolu bidi Festus me, te genuai nogi we Bernaisi me, te augwali sela dali bidali bidi me, augwali tigidali doliguama, augwaligo te po tū ebo be tagalama, pali. ³¹ Tama te be tagalama, augwa hasi tomode po miai, “Te bidi agai kalabus yabo dwai kolesaga me ebeo,” wali. ³² Tama Agripa agai te Festusbolo te po wai, “Te bidi agai ‘Te Sisar agai eno po tū odomainao’ wabo po wagi menigi sogo da, teda dago aga olo tagala paligi da,” te po wai.

Pol te Romba pali

(Dq̄i 27-28)

Enesigi bidi dabego Pol moni gebadu Romba odasa pali

27 ¹ Te Festus agai Pol dali, gasa kalabus bidi dabe dali te Itali tq̄ba moni gebadu pabo po dodolali, te Sisar pageba pomainu yali.

^m 26:23 Ais 42:6; 49:6; 1 Ko 15:20

Tama gavman tobolu bidi me badu augwaligo bidi me deli dąi ilali, te bidi nogi Julius da, augwali tonaluabo bidi dąi ilali. Te bidi Julius agai te ami enesigi bidi a naga bidi nogo sąąq sese silama, tonalubo toboli bidi da. Tama aga te umabo ami enesigi bidi hani me deli tomode bidibo bidi da, te hani nogi ‘Rom gavman moni toboli bidigo enesigi bidi hani da.’² Tama da moni geba me deli tomoba pali, te geba Esia tąq nabisde elalubo bulu tigidali bilibo geba da. Te geba page bidi aga bulu nogi Adramitium be nani da, te Esia tąde. Tama te bidi me nogi Aristarkus aga da dali asali. Agai page bulu nogi Tesalonaika, te Masedonia provins tąde. Tama da te Sisaria bulu taga pali, te moni gebadu, te tamu aji daide pali.³ Tama pelama, do kigamu geba tuagasabo pesageba sabolali, te bulu nogi Saidon. Te ami toboli bidi Julius agai Polbolo dwagi yai kolesaga yali. Agai Pol tagala palama, Pol aga abagi dabe sugi pelama, augwaligo agabolo tubo nai dabe mani.⁴ Tama nosali dago te Saidon bulu tagalama, ma pelama, te moni bomai wali da pabo guni badu asobaso, dago geba guni tubo bidigo te tamu aji tomode dwasianu bulu elalubo, te bulu nogi Saiprus, teba guni dodolali. Te tąq pąde moni wali meni yai.⁵ Tama te Saiprus tąq ela soali, da te moni tamu aji tomodu pali, te gebadu. Pelama, te bulu si ela pali, te nabis sesegede, te bulu si nogi me Silisia tąq, me Pamfilia tąq da. Tama te nabis sesegede bulu meba sabolali, te be nani nogi Maira, te Lisia tąde, tama dago geba tede gebelali.⁶ Tama tede dago te geba tagalama, te da tonalubo amigo geba me kegegi suali. Te geba te Aleksandria bulu bidigo geba, augwaligo Romba pai hagede ebo suali. Tama te ami bidi dabe augwaligo da te gebadu selasa pali.

⁷Te moni geba mudu da Maira tagalama, ma pelama, dua dua tama pali. Magi basowe? Moni bomai waligo da bomonama sela sąbaso. Tama da hauwa sogenon tamu aji bilali, te Nidas buluba polo sabalobeo. Tialima, te waligo naga dago pabo tą ma sinia sali. Tama da te tamu aji tomode bulu me elalubo, te bulu nogi Krit, te bulu pąba sabolama, tamu aji sesege badu pali, tede te moni wali meni baso. Tedu pelama, Salmone tąq dugulidu bobegegi pali.⁸ Tama da te moni tamu aji sesegedu pali, tama te bulu sesegedu pali, te geba guni tubo bidigo moni sę mu elama, geba tubo pesageba tugi pali. Tama augwaligo te ‘dwagi yai geba tubo pesage dao’ nogi wabo dao. Te geba tugi pabo pesage Lasia be nani pąde da.

⁹Te da tede olo dali bidibadi, hauwa sogo mu tama bidali. Tama tede bidibadi, tamu aji boj holobo sogo pąde yagasali. Te poluade tama moni wali asobo dao. Te kibu be yabo pąde yagasali, te Juda dabe augwaligo Godibolo nai ula mabo moni lotu wabo sogo silai dao. Godigo augwa dwai kolesaga yai sela səmainu, te moni nogi elalubo lotu po wabo side dao, te sogo augwa tubo nai osogo gisilai dao.¹⁰ Tama tebo sogo silibaso, te moni wali asobo sogo pąde yagasobaso, Pol agai te bidi dabe tau selama, bobelabo po wali, “Abagi dedeo, da moni gebadu tedu peyu da,

te dwali, te da moni waligo geba dolama, da me, walu dabe tigidali me, da tamu aji tomode dolama, isilaibao,” wali. “Da ede bolo me bidinao,” wali. ¹¹Tiali goli te sogo augwaligo Polgo wali po odama, te moni geba page bidi me, te moni geba tobolu bidi me, augwali sigo Polgo po sela sayani. Tama te ami tobolu bidi agai Polgo wali po tagalama, te bidi sigo wali po wali pali. ¹²Tama augwaligo umabo po wali, tama bidi dabe me badu augwaligo homugo ‘E bulu taga pelama, gasa bulu dwagi yai geba tugi pabo pesage te bulu Finiks badu pinao,’ wali, ‘Krit tqba.’ ‘E geba tubo pesagede moni wali asobo sogo bugagia bidigobeo. Tama tibaso, dago geba te Finiks buluba selasa pinao, te dwagi yai geba tubo pesage giliga pabo badu elalubo dao. Te pesagede wali aselama, geba dolobo menio,’ wali. ‘Te moni wali asobo sogo da pelama, te buluba bidigi pinao,’ wali.

Moni waligo te tamu aji boj dwai mu hodolai

¹³Te tialima, dwasianu dwagi yai wali me deli te saut badu tamu aji asali, te geba tudi badu. Te geba tomode se ebo bidi dabe augwaligo homugo ‘E waligo da te Finiks buluba sela paibao,’ homu yali. Tama tibaso, pomai hagede, augwaligo te geba daju walobo moni seqe yai ain dili tiwai nai tamu aji pudu uwawa guduama, geba daiba munama, tama augwa te bulu pada tamu aji sesegedu pali, te bulu nogi Kritba. ¹⁴Tiali goli, tama pelama goli, moni wali mu polo asali, te Krit tqba pedai badu asali. Augwaligo te tobage moni wali mu nogi ‘te giliga asoboba polobadu pobase nogo pedai badu asobo wali dao,’ nogi wabo da. ¹⁵Tama te wali polo aselama, te geba bomo elama pogolama sabilali. Tama dago te wali asoboba geba guni dodolai hagede, se bomo yali. Tiali goli, dago usu ebe. Tama te geba te waligo selasa pomai hagede tagalali. ¹⁶⁻¹⁷Tama da te dwasianu bulu me nogi Kauda tq paba asali, te tamu aji tomode elalubo tq. Tama da uba pedai badu te bomai wali meni yai madigi pali. Tama te dwasianu geba moni gebade bono polobadu gebelama, kegasa asobo dao. Tama te moni gebade se ebo bidi dabe augwaligo homugo ‘Te dwasianu geba hagaidali weyu, dago selama, moni gebaba muinao,’ wali. Tama augwaligo te dwasianu geba kegebo moni se mu yali. Tama augwaligo te dwasianu geba kegelama, moni geba daiba munama, tama bonogo bugagia keani. Te kena silama, tama gasa bono me selama, te bono aji sanama, a dologo badu solama, te bono ga yai naigo selama, te moni gebade keani, te geba dilide daju olama, keani. Te moni geba bomo te tiwai munama, da ma pali. Te moni gebade se ebo bidi dabe augwali te waligo geba te Libia buluba pobogolo pobaso, augwali moni wi mu yali. Te nabis bulu dwai nagame yai kemi ebo pesagedu painu ebaso, wi mu yali. Tama tibaso, augwaligo te moni ugwa aiyaba dagala muani, te moni geba waligo naga tamu aji olo dali sabilimainu tagalali. ¹⁸Tama te moni wali mu asiyu, aji boj me kisu mu dela pali. Tama tibaso, do te moni

gebade sē ebo bidi dabe augwaligo te walu dabe me badu tama aqiba sābo gagalali, te geba yadala pomainu yali. ¹⁹Tama te sogo ma te gebade sē ebo bidi augwaligo te gebade muani ni me, te bono me, te nami ugwa me augwaligo nogogo selama, säyanı. ²⁰Tama da te moni tamu aqide hauwa sogo bidali, te tulubage me, te pō me kisu dali, dago dagalu sube. Tama dago te giliga me, ho me hauwa sogo sube, te hogo dago bulu te badu elaluba homu ebe. Tama te moni wali agai te moni aq boj hodolali. Tama tibaso, da gisiga bidibe. Dago te homu yali, ‘Da tigidali e gebade tamadi isilaibao,’ homu yali.

²¹Te da nai hauwa sogo tube. Tama nosali Pol agai te geba tomode sē ebo bidi augwalibolo i olama, te po wali, “Te bidi hauwa, dagego odao. Dagego eno polobadu wali po sela sayanio. Dagego eno po odama, te bulu Kritde bidigi sogo da, teda usu egi dao. Tama da e tiwai sē egi menio. Tiali goli duga eno po sela sayanigo da, nai hauwa bage te hagela silali dao. ²²Tiali goli, megı eno homugo dage dą̄ walobe dao. Dagego wi elama, moni homu egio. Magu menio. Da bidi da me isigobeo. Tiali goli, te moni geba naga dolaibao,” wali. “Eno koneanio, te po mu dao. Magu menio. ²³Megi piali hulide Godigo enabolo po me olama, todalio. Te God eno agabolo lotu weyu, eno agai sē eyu ebo da. Te Godigo enabolo agai ensel bidi me deli ena pageba tagala palali. ²⁴Tama agai enabolo tama wali, ‘Pol, nage wi egio. Nage te moni Rom gavman tobolu bidi agai gedude dolalu, naga po wao. Tama odao. God da, te dwagi yai bidi mu dao. Tama tibaso, Godigo nagebolo dwagi yai sē elama, tau selama, tama te moni gebade nage dali bidibo bidi me deli isigobeo,’ te ensel mobo bidigo enabolo tama wali. ²⁵Tama tilama, abagi, dage noma sigio. Magu menio. Eno homu Godiba mubaso, agai dwagi yai kolesaga dabolo yaibao, tama agai dagalude sē ebo ensel bidigo enabolo te tiwai po wai dao. ²⁶Tiali goli, te moni geba te tamu aq tomode elalubo bulude sabalobadi, tede dolaibao,” Pol agai te po wali.

²⁷Te moni waligo da selasa pelama, te tamu aq nogi Adria tomode bilabadi, Sarere si silali. Te sogo huli tomode mu, te geba tomode sē ebo bidi dabe augwa homugo bulu me deli pāde elalubo homu yali. ²⁸Tama tibaso, augwaligo moni sege yai nai bobobage bonode gebelama, te tamu aq tomoba sanama, augwaligo te tamu aq degedu usu ni sali, te moni bobobage mu yali 40 mita. Tama da dwasianu pelagalama, te usu ma sali. ²⁹Tama te sogo, dwasianu pāde tama yali, 30 mita. Tama te sē elama, augwaligo koneani, te nabis me deli pāde elalubao homu yali. Tama augwaligo homugo masigiba taluama, doligi paibao homu eyu, augwali wi yali. Tama augwaligo moni sege yai ain me si me si nama bobobage bonode gebelama, deli deli te moni geba tudi badu tamu aq degeduba tagala palali. Tama tilama, augwaligo homugo masigiba taluidali weyu, be posomainu augwaligo Godibolo po wali. ³⁰Tama Pol agai suali, te

gebade sē ebo bidi augwaligo te dwasianu geba kēani bono pisaganama, te dwasianu geba tamu aq̄iba aiyaba tagalobo suali. Augwaligo homugo te moni geba taga peyu, te dwasianu gebadu buluba wi pinao. Tiali goli, augwaligo tibode ‘Moni geba gunide moni te sēge yai ain walaibao,’ te tibo po tama wali.³¹ Tama Pol agai koneyu agai te ami tobolu bidi me, te enesigi bidi dabebolo me, te po wali, “Te bidi augwali da dali bidisiayu da, teda dage tigidali tamu aq̄ide isigi da. Te bidi dabe augwali wi po baso da, Godigo da tau sogobeo, agai wali po tiwai.”³² Tama te po obaso, te ami bidi dabe augwaligo te dwasianu geba gebelali bono te ge hwāgo togwali, te dwasianu geba te tamu aq̄igo olo selasa pali.

³³ Te be posobo pāde Pol agai augwalibolo “Nai selama, tuao” wali, tama augwalibolo po bomona wali, “Megi dagego moni homu edubadi, dagego nai tusiāma, Sarere si mu silali.³⁴ Tama tibaso, eno homugo dagebolo po bomonama obao, dage megi nai tuao. Magu menio. Te nai tubode dage bomo selama, dage bugagia bidaibao. Eno koneanio, da tigidali tama bugagia bidaibao, da me deli dwasianu dologobeo, selegobeo,” wali.³⁵ Tama te po olama, Pol agai te bret nai selama, te bidi dabe gesabidide Pol agai Godibolo nage usu da olama, te nai nogogo pebedama, tubo gagalali.³⁶ Tama te pogo augwaligo homu dāq̄ olama, tama augwali tigidaligo me te nai tuali.³⁷ Tama da tigidali te moni gebade bidali bidi dabe hauwa mu da 276.³⁸ Tama dago te nai tuali, tabiali. Tama dago te tubo nai ge bek hauwa mu geba tabide muai te tigidali dago selama, tamu aq̄iba sayani, te geba yadala pomainu yali.

Moni geba dolario

³⁹ Te be posobo si, te gebade sē ebo bidi augwaligo te nabis bulu tq̄ sulama, te konebe. Tiali goli, augwaligo te bagu suai, te dwagi yai geba tubo gebabelede elalubo suali. Tama augwaligo te po wali, “Dago moni geba te bagudu dolo sela pabo usu sinao,” wali, “te geba te tq̄ sesegeba dāq̄ waligi pinao,” wali.⁴⁰ Tama pomai hagede, augwaligo te ain dilide gebelali bono dabe ge hwāgo togolama, tamu aq̄i tomoba olo tagalali. Tama bidi me badu augwaligo te geba guni dodolobo habesege si bono kēani pisagana sayani. Tama augwaligo te nami ugwa te geba gunide ma walali. Tama te nami ugwbaba waligo sabilibode da nabisba odasa pomainu, tama tiali.⁴¹ Tama tilama, dago geba te baguba pabo gagalali. Tiali goli, tamu aq̄igo geba selasa pelama, te tamu aq̄i dologode dwasianu kemigo du elalualu. Tama te geba guni te kemi duba tūq̄ paligi pabo si, te geba tudi badu tigidali pebeda pali. Magu menio. Moni tamu aq̄i bōi dabe asiyu, te geba ni tologa sayani.

⁴² Te ami bidi dabe augwa homugo te kalabus hani me ela muaibao homu yali. Magi basowe? Augwaligo te homu yali, augwaligo tamu aq̄idu paubo pelama, te nabis buluba sabolama, duala sigi pelama wi diq̄ paibao

homu yali. ⁴³Tiali goli, te ami tobolu bidi agai te ami dabego yali homu tagalao wali. Magu meni. Agai homugo augwaligo Pol elidali. Tama agai da tigidali i olama, agai te po wali, “Tialima, duga tamu aji paubo kone baso da, te duga samonama, paubo pelama, nabisba pião,” wali. ⁴⁴“Tama duga me badu nogo aji togobo konesiabaso da, dage te ni nami dabe me selama, te moni geba nigai ni hodigi selama, dage nosali aji pauluama, nabisba pião,” te po wali. Tama dago tama tilama, da tigidali te nabis buluba bugagia sabola silali, da me dolobe.

Pol te tamu aji tomode elalubo bulu nogi Maltade bidali

28 ¹⁻²Te da tigidali te nabis buluba bugagia sabola silali. Tama te bulu page bidi dabe augwaligo dwagi yai kolesaga elama, da tau sali. Tama augwaligo dabolo te po wali, “Te e tamu aji tomode elalubo bulu nogi Malta dao,” wali. Tama augwaligo moni sia nogwani. Te sogo tulubage be yali, da tigidali kedau mu yali, tama te siade da kedau tuali. ³Te Pol agai dwasianu isi dabe sesa bilama, te isiba ulagasali. Te dwasianu ni me si tomode hasamani me deli bidali, agai sube. Tama te isigo hasamani tigide dabo si, tama te hasamani posoga palunama, Pol nogode gąq kelanani. Te tobage hasamanigo kelanai bidi polo isibo da. ⁴Tama te sogo te bulu page bidi dabe augwaligo te hasamani Pol nogode walalubo sulama, augwali moni noma selama, augwa hasi tomode po umabo weyu, te po wali, “Te bidi agai gasa bidi elabo bidi dao,” te homu geda muani. “Tamu aqgo aga elebe. Tiali goli, te god me deli, agai nogi Dwai Kolesaga Dodolobo god, agai homugo aga elainu yali, te hasamani bidi isibo nabi aga tigide munalubo hasamani gąq kelali,” te po wai. ⁵Tiali goli Pol agai nogogo te dwai hasamani hogola şanama, te hasamani isi tomoba tuloluali. Tama Pol tigide dene ebe, aga bugagia bidali. ⁶Tama te bidi dabe augwaligo tonaluama, augwaligo aga te hasamanigo kelali madigi dabe delama, aga polo degasa pelama, isibowe naga suenu tonaluali. Tiali goli, augwaligo tonalubadi, bobobage sogo mu bidibadi, te Pol aga tigi dene ebe, tama aga isibe. Tama te we bidi augwaligo moni homu elama, augwa homu begelama, te po wali, “Te bidi aga god me deli dao,” wali.

⁷Te bulu pąde te me badu tq deli elalubo, te tq te bidi me deli agai tq da. Tama te bidi te Malta tqde bidibo we bidi augwa tobolu bidi deli da, te bidi nogi Publius. Tama te bidigo da agai beba odasa pelama, da agai bugagia nai ula mayu bidali. Tama da sela sogo aga dali bidali. ⁸Tama te sogo te Publius aga aya moni gasi selama, bede pila mubo. Aga te gasi si sali, me haligadu kaneme yali, me tigide moni posolo yali. Tama Pol aga pelama, aga suali. Tama Polgo Godibolo po olama, agai nogo te gasi bidi toboluba muani. ⁹Agai te gasi sela şanama, ma dwagi yai bidali. Augwaligo Polgo te tibo sulama, te Malta tqde bidibo gasi yai we

bidi tigidali Pol pageba sisali. Tama Pol agai te gasi yai bidi gasi sela sasq̄ pela silama, augwali ma dwagi yai ilali.¹⁰ Augwaligo dabolo dwagi yai kolesaga elama, haniani dwagi yai nai da olo mani. Tama nosali da pabode augwaligo tigidali nai dago habuge yali nai augwaligo selama, te moni gebaba munai.

Pol agai Malta tq̄ taga pelama, Romba sabolali

¹¹ Te hasia da te Malta tq̄de bidibadi, polua sela silali. Tama nosali da te gasa moni gebaba holali. Te moni geba page bidi te Aleksandria be nanide bidali. Tama agai tibo god nogi koneama, te tibo god nogi te moni geba sip gesabi badu daganai elaluali, “Deli sogo ame nai ogwa si da,” te po wali. Tama te Malta tq̄de bidu, te moni wali dabe, te moni tulubage me sia sabo tonalu tede bidali. Tama dago augwali taga pali.

¹²⁻¹³ Tama da te moni gebadu pelama, te moni be nani nogi Sirakyusba sabolama, tede sela sogo bidali. Tama da Sirakyus tagalama, moni gebadu ma palio olama, te bulu me nogi Regiumba sabolali. Tama do kigamu wali me da asali badu geba tudi badu asali. Tama tego da tau selama, da pidubadi, be me huliamma, me sogo kigamu da bulu me nogi Puteolibia sabolali.¹⁴ Tama te bulude Jisasgo po wali pabo we bidi tede bidalubo suali. Tama augwaligo da augwali dali bidaowali. Te po baso, da augwali dali Sarere deli bidali. Tama da, dago augwali taga pelama, tq̄du naga pidubadi, moni genuai hanu nogi Rom teba sabolali.¹⁵ Da Romba sabalisiqbadi, Jisasgo po wali pabo we bidi augwaligo da asobo po odama, da tū tomoba augwaligo tiqb̄a asali. Tama me badu digibulu bobenu gana aselawali, maket me nogi Apiusde dago suali. Tama me badu aselama, te bidigo osogo abelama pibo be sela elalubo digide dago suali. Pol agai Jisasgo po wali pabo we bidi suyu, Godibolo nage usu dao wali, tebogo aga homu dāq̄ walobao, te homu yali.

¹⁶ Te da Rom tomoba sabalobo si, gavman tobolu bidi dabego Pol agaduba bidabo pesage osogo abelama, bidimainu yali. Tiali goli, tigidali sogo enesigi bidi deligo tonaluali, Pol wi pidali weyu tiali.

¹⁷ Te bidi Pol aga Romde sela sogo bidama, Romde bidibo Juda hani tobolu bidi dabe “Dage ena pageba asiaq̄,” Pol agai te po wali. Tama augwali aselama, Polgo te po wali, “Abagi dede, polobadu ena Jerusalemde bidai dao. Tama dago hani dali eno dwai s̄e me yai menio. Tama dago noq̄go po me sela s̄awai menio. Tiwai goli, te pode ena kalabus yai dao, Jerusalemde. Tama augwaligo ena Rom gavman genuai bidi pageba ena po tū emainu sela pao wali.¹⁸ Tama Rom gavman genuai bidigo enabolo te yali s̄e po augwaligo odalio. Tama Rom gavman genuai bidigo eno magi s̄e me, ena isabo s̄e me yai sube, te po wali. Augwaligo homugo ena buluba tagala palainu yai digi.¹⁹ Tiali goli, Juda bagego ena kalabus emaina olama, bomo mu yalio. Ena te Juda dabego nogode diq̄

pabo tü me meni yani. Tama tibaso, eno te po wai, ‘Ena Rom gavman genuai bidi Sisar pageba tagala paliqo, agai ena po tü ela momainu,’ wali. Tiali goli, ena te Juda bagego po tü ela mawainu eba asai menio.²⁰ Tama tibaso, eno dage megis asomainu hanalu obao. Magi baso menio. Enade augwaligo yali sę dagego me konemainu obao. Megi dagego e konemainu, ena e aligabo bonogo ena nogo si megis augwaligo kęai dao, kalabus bidi ebo aq yalio. Magi basowe? Eno homugo te da Israel bage tonalubo bidi te Godigo dabolo nosali mawaibao, tama te sogo pedalobo eno tonaluyu bidibo dao. Tama tibaso, augwaligo ena kalabus mawai dao,” te po wai.

²¹ Te Juda dabe mego Polbolo te po wai, “Te Juda bidi dabe augwaligo nagede po pusumainu dabolo pas me tolobe. Be bidi me Jerusalem badu asama, nagede dwai po me pusagasobe. ²² Tiali goli, bidi hauwa mu me badu asama, dabolo tama pusali, te Jisasgo po wali pabo bage da mu hagela ebo po pusali. Tiali, Jisasgo hanigo ebo homu kolesaga dago sueo,” te po wali. ²³ Tama augwaligo Polgo wabo po ma odomainu, dua yabo bodolu me muani. Tama we bidi hauwa mu Polgo bodolu mani digi asali. Pol agai te Godigo homugo we bidi tonalubo sę po augwalibolo pusali. Tama Pol agai Mosesgo polobadu aşənai po dabe me, polobadu Godigo po sela bilali bagego aşənai po dabe me, pusa mani, te po dali daganama pusali, te augwaligo Jisasde po mu daba homu emainu. Tama te po pusubo kigamu mu gagalama, pio muba sabolali. ²⁴ Tama we bidi me badu augwaligo Polgo wali po mu dao homu yali goli, meba we bidigo te mu da homu ebe. ²⁵ Tama augwaligo po hauwa dogia pali. Tiyu augwaligo haliga digi deli ebe. Tama tibaso, Pol agai po me deli pusali, “God agai Dwagi Yai Mobo Bidi agai te Godigo po sela bilali profet bidi nogi Aisaia te bidibolo po me deli olama, tolalio, dagego noq mu dabebole. Te po dageba me dolo te wabose,” te po wali. ²⁶ “Godigo Aisaabolo te po pusa wali,

‘Nage te Juda bageba pelama, tama te po pusao.

“Dagego eno po oduda yaibao, tiali goli dagego te po page konegobeo. Dagego suyuda yaibao, tiali goli dagego munu me sugobeo,” te po wai. ²⁷ Te magi baso menio. Te po page da, te we bidigo homugo eno po odogobeo. Tama augwaligo olo dega salio. Tama te ebogo, eno po odabo aq ebe dao. Augwaligo gedu me halua sali dao. Te tibogo, eno ebo sę suabo aq ebe dao. Augwaligo te sę egi menigi sogo da, teda enaba augwaligo dwagi yai kolesaga sigi dao, tama augwaligo ologo eno wali po me odigi dao. Me augwaligo eno yali sę me bugagia sugi dao. Tama tigi sogo da, augwali homu digi begelama, tama eno ma augwali dodoligi dao,’ⁿ

ⁿ 28:27 Ais 6:9-10

Godigo Aisaiabolo tama po wai,” Pol agai te tama po pusa mani.

28 “Tama te po dage dolo mu te waliao. Tiali, dagego koneao. Tama Godigo da we bidi sela pabo tū po tama te Israel hani isāwai we bidibolo tolai yali. Tama te po augwaligo mu odaibao,” Pol agai te po wai. 29 Tama tilama, Polgo te po silama, augwa pebelayu, konila bomonama mu ela pali.

30 Te kibu be si Rom bulude agai osogo abelai bede bidali. Tama aga te bidibo bede mone gego aga digi abeleduali. Tama aga pageba te we bidi hauwa asobaso, dwagi yai homu yali. 31 Tama agai Godigo homugo we bidi tonalubo sē po te we bidibolo pusa mani. Tama agai te Genuai Bidi Jisas Kraisgo po pusa mayu, aga hale me ebe. Tama agai te po pusubadi, bidi mego ‘Nago te wabo po tagalao,’ te po wagasobe, bidi mego habu selebe.

Polgo Po Pas Rom Dabeba Aseani

Hasia nedebu tau sabo po

Te Kraisgo po sela pabo bidi Pol agai e pas aseani. Magi baso meni. Te aga digi te moni hanu Romba polobadu pabeo, te gasa bidigo Kraisgo po augwalibolo hasia polobadu pusugi pai dao. Te bidi Pol agai homugo te Romba pelama augwali dali tamadi bidigi paibao homu elama, tama te Rom bagego aga teba asobo kolesaga page hania konemainu eyu, agai e pas tolali. Tama nosali aga te bulu tq kantri Spenba pelama, te Kraisgo po wali pabo we bidibolo po pusigi paibao homu yali. Agai homugo me te agai gasa haniani bulu we bidibolo ola mani po page te Rom bagego konea saibao. Te po page e tiwai dao: te Juda hani we bidi dali te Juda hani isawai haniani bulu hani we bidi dali, da tigidali te God paba asobo usu mu egobeo. Magi baso meni, da tigidaligo dwai se eyu sege sai bage bidibo dao. Tiali goli Godigo aga Ogwa tagala palama, tama tialigo da te da aga paba asobo tu sunumi dawai dao. Te Krais wali pabo we bidi augwaligo yabo kolesaga po me te bidi Polgo e aseani pas tomode ola mani.

Hasia mu Polgo te Romde Jisasgo po wali pabo we bidibolo siade da po weyu, agai e tama po wali, te augwali tau somainu Godiba sesemane sogo gedu haluasa po hanalubo da. Tama nosali agai te pasde aseani homude po page pusa mani, te konealubo po daq wabo sunumi delide naga te God gedude doloba pai we bidi pedelaibao, te tobage wali po te Daj 1:17 tede elalubao. Polgo te tama po wali, tigidali we bidi, te Juda hani dabe augwali me, ma te gasa hani dabe me te tagalao, augwali me te sege sabo we bidi dao. Tama tialima Godigo olo tau sabo wiegi yai kolesaga eyu augwali ma sali. Te Jisas Kraisba konealubo homu daq wabo bidi yai baso da, te Godigo aga ma selama, tama aga te Godigo abagi pedaliyu, te Jisas Kraisgo ama bidai dao. Te bidi me deli Godigo ma sobaso da, teda agai bidabo ula te gesi noma pedelaibao. God aga dali bidibaso te Godigo Mobo Noma Bidi Ogwa Wai aga dali paganalu bidibao. Tama tialima te sege me isibo sego bomogo aga aiyaba elaluama tonalubaso, te usu me egobeo.

Tama te bidi Polgo pusali po tigidali te aga tau sabo bidi Tertius agai te po aseanama tama augwali sigo e pas te Rom moni hanuba tolali. Te tiwai me te bidi Pol agai te haniani tqde bidali te Kraisgo po wali pali we bidi hanibolo aga pas aseana tolobo se eyu, tama me sogo aga digi te pas tolobo po olama, tama gasa bidigo te Polgo pusali po aseani. Tama tiyu, tama Pol agai nogi aga digi nogogo te pasde aiyadu aseani, tama gasa bidigo te pas iba sela pali.

**Te konealubo homu dą̄ wabo sunumi delide naga da te
God gedude doloba pai we bidi pedelaibao**

(Dqj 1-4)

Polgo te Godigo po sela pabo sę yali

1 ¹Ena Pol da, tama eno e po asęna tolobao. Ena te Krais Jisasgo sę bidi dao. God agai ena i olama tama te po sela pabo sę bidi nigelili. Eno te Godigo wiegi yai gesi po te we bidibolo pusumainu agai ena hagea selama tedali muai. ²Tama polobadu digi mu agai te wiegi yai gesi po nosali maiabo po dą̄ olama, tama aga po pusali sę bidi profet dabe augwaligo te dą̄ wali po te Godigo po bukude asęai dao. ³Tama te wiegi yai gesi po te aga Ogwade wabo po dao. Te aga bidi mu pedalama bidibode, te aga waj mu Devitgo hanide pedalali. ⁴Tama me ma te wiegi yai kolesaga ebo Tedali Mobo Bidigo bomo eyu aga sa hania muani, aga te Godigo Ogewa da wai. Godigo aga te gę pagede ma hodolama, tama tebogo agai te we bidibolo aga Godigo Ogewa mu dao ola mayu waselai dao. Aga dago Genuai Bidi Jisas Krais dao. ⁵Te aga nogi delide naga te Godigo da olo mu tau sabo wiegi yai kolesaga eyu, tama aga nogide me agai ena te po sela pabo sę bidi nigelili. Te Krais aga nogi tobade Godigo tama tiali, te Juda hani we bidi dali naga meni, te tigidali tqde bidibo we bidigo konealubo po agade dą̄ weyu tama agai po wali pomainogo tama tiasi dao. ⁶Dagego me te Godigo i wabo odama, tama dage te Jisas Kraisde wadolali we bidi pedalali.

⁷Eno e pas te dage Rom moni hanude bidibo we bidibolo asęna tolobao. Dage Rom bage, te God agai dage dali dwagi yai homu eyu, godolo eyu elama, tama dage te aga we bidi mu bidimainogo eyu agai dage i wali. Tama eno homugo dago Aya God dali, Genuai Bidi Jisas Krais dali sigo te dage dali te olo mu tau sabo kolesagago eyu tama dage homu wiegi yai ilama dage dua bugagia bidaibao.

Polgo Rom dabe sugi pabo homu yali

⁸Hasia eno e po bolo dagebolo wainogo ebao: te tigidali gasa tq badu bidibo bidi dabe augwaligo dagego Kraisde konealubo po dą̄ olama bidibo po mibo dao. Tama tibaso eno te po mibode homu koneyu, tama Jisas Kraisgo nogide te eno usu da po weyu, te eno Godibolo gedu haluasa po wabo dao. ⁹Eno Godigo sę eno bomo tigidaligo eyu, tama eno te aga Ogwade te wiegi yai gesi po te we bidibolo pusubo sę ebo dao. Tama te God aga digi koneani, eno mu po obao, sesemane sogo eno gedu haluasa po wabo si te eno dagego nogi nogi ebo dao. ¹⁰Tama sesemane sogo eno agabolo gedu haluasa po weyu, eno te tiwai hanalubo

dao, "Hauwa sogo augwali pageba pabo tü elalusıqbadi ena tonaluali goli, megi nago usu da olama, te ena pabo tü nigelama, ena augwaliba pomainao," te po wabo dao. ¹¹ Magi baso meni. Eno dage suainogo ebo homu mu godolo yai. Eno te Godigo Mobo Bidigo tau sabo po mobo meba te dagebolo mayu, te dage bomo ilimainogo homu ebo dao. ¹² Te e tama tiwai dao: eno homugo dagego te Kraisde konealubo po dąu wabogo te ena tau siyu, te eno te Kraisde konealubo po dąu wabogo dage tau siyu emainogo eno te dageba pabo homu ebo dao. Tama te tiwai ebogo te da tigidaligo homu bomo ilimainogo homu ebo dao.

¹³ Eno ama dedeo, eno homugo dagego e po bugagia koneiəo, hauwa sogo eno te dage bidibo madi asaibao homu yali. Tiali goli sesemane sogo nai me deligo te ena tü palialubo dao. Te eno sego gasa bulude bidibo Juda hani isawai we bidi augwali tau selama te augwaligo Godigo po wali pabo we bidi pedalali, tama eno dage tomode me te tau sabo sę egi pabo homu hauwa sogo yai dao. ¹⁴ Magi baso meni. Tode we bidigo gedude te Grik po wabo bage augwali te haniani naide kolesaga page tolalubo bage dao, nogi elalubo dao. Me ma, te Grik po wasiąbo bage, augwali nogi meni yai bage dao. Tiali goli agai enabolo te wiegi yai gesi po pusubo sę mayu, "Te Grik dabe dali, te Grik hani isawai we bidi dabe dali si augwali tigidaliba pusao" weyu yai. "Te kolesaga koneai bidi dabe dali, te kolesaga konesiawai bidi dabe me, tigidalibolo pusao," wai. ¹⁵ Tama tibaso eno homu me hodaloyu, te wiegi yai po te dage Rom hanude bidibo bidi dabebolo me te po pusainogo te homu bomo ebo dao. ¹⁶ Magi baso meni. Ena te wiegi yai gesi po wabode te ena hale me ebo menio. Te wiegi yai po Godigo bomo elalubao, te tigidalı konealubo po dąu wali bidi dabe ma sabo te po usu dao, te hasia Juda dabe ma selama, te nosali gasa hani dabe me ma dobola sabo te wiegi yai po usu mu dao. ¹⁷ Odiəo. Te wiegi yai gesi pogo te Godigo te dwai sę yali we bidi te doloba pai we bidi ilabo sę page te dabolo hania ola mabo dao. Te sę page e dao: bidigo aga homu tigidalı Kraisba munama tama agade naga tialuyu da, teda te Godigo gedude te bidi te doloba pai bidi pedalalıba. Gasa sę ebo te usu egobeo, te Kraisde tialubo kolesaga naga usu yaibao. Tama te doloba pai bidi ilabo sę page hania ilimainogo te Godigo po pusali profet bidi agai polobadu mu te Godigo wali po me deli tama asęai, "Te bidigo aga homu tigidalı enaba muyu, te enade tialubo bidi, te bidi eno gedude doloba pai bidi pedalama, tama bugagia bidada peyu bidada paibao," te po asęai.^a

Tigidali we bidi sęgę sabo we bidi dao

¹⁸ Te Godigo sębę ebo te aga bidibo madidu hania pedalalio. Agai te God tudiba muyu, te dwai kolesaga eyu bidibo bidi dabe dali sębę ebo

^a 1:17 Hab 2:4

dao. Te tobage dwai sę ebo bage augwaligo te dwai kolesagago te mu pogo sę idali weyu te mu po hogwa sabo dao.¹⁹ Augwaligo te mu po page konebo tų elaluali, tiali goli augwaligo te tų wali pisiąbaso, Godigo augwali dali sębę ebo dao. Magi baso meni, te tigidali Godigo kolesaga te geme me dualalubeo. Te augwaliba hania hanilani, God aga digi augwalibolo ola mawai dao.²⁰ E tiwai dao: polobadu mu Godigo tigidali nai nigali, tama te sogo gagalama megı e sogoba usu nagasali, tama te bidi dabe augwaligo agai nigali nai dabe suali. Tama augwaligo tede te Godigo kolesaga meba koneani, te bidi dabego gedugo susiąbo kolesaga te augwaligo koneagameo. Te aga gasagi yai tedali mu da, aga God dao, te augwaligo hania koneagameo. Tama agai genuai bomo te sesemane sogo bidada pabo bomo dao, silisiąbo bomo mu dao, te me augwaligo agade koneagameo. Tama tibaso, te bidi dabe augwa dwai sę ebo kolesaga te geme dualiyu tama augwaligo te po wei ponabo tų menio, “Dago te God konebeo,” te po me wagobeo.²¹ Magi baso meni, augwaligo God koneali goli augwaligo aga te God mu da te homu me isayu, tama augwaligo aga nogi ugwaba me sabeo. Tama augwaligo gedu haluasa po weyu agaba puba hwi me wabeo. Menio. Te augwaligo augwa homu kolesaga te olo naiba muani, te augwaligo God gegeda peyu, tama augwaligo homu te be hulia sabo tiwai pedalai.^b ²² Augwaligo hagoma eyu te po wai, “Dago kolesaga koneani,” tiali goli augwali esela pai bidi dabe mu pedalai dao.²³ Tama tiyu, augwaligo te isisąbo Godigo moni ula yai bomo tudiba muyu, tama augwaligo lotu po agabolo me wabeo. Menio. Augwaligo aga hasegelama, tama olo isabo bidigo piksa nomabolo me, tama ba noma me, te kibu piksa noma me, tama hasa yogai hani dali, te hasamani hani dali noma me, te tama piksa dabe selama, tama “Te nai dago god dao,” weyu, tama augwaligo te nai piksa noma dabebe lotu po wabo gagalama ebo dao.^c

²⁴ Tama tibaso Godigo augwali tagalali. Augwa dwai kolesagago digi augwa te dwai meda yai kolesagaba kegeyu, tama augwa digi augwa tigi doloyu yainogo eboso, agai augwali tagalali.²⁵ Da bidi dago te Godigo nogi sesemane bidada pabo sogo ugwaba sidu geao. Mu dao. Tiali goli te tobage bidi dabe augwaligo te Godigo mu po tagalama tama hasegelama tibo po sali. Tama tiyu, augwaligo te tigidali nai nigali God tagalama, tama augwaligo agai nigali naiba naga lotu po weyu, tama augwaligo teba sę yali.²⁶ Augwaligo aga tagalobaso, Godigo augwali te dwai meda kolesagaba tagalama bidai. Augwa we dabe augwaligo te bidigo augwali sabo te dolo kolesaga augwaligo te tagalama, tama te we dabe augwa hasi te wego isisąbo dwai meda yai kolesaga wali pai dao.²⁷ Tama bidi dabego me augwaligo te we sabo dolo kolesaga ebo te tagalama, tama

^b 1:21 Ef 4:17-18 ^c 1:23 Bom 4:16-18

augwaligo homu te sia dabo tiwai eyu, tama augwaligo dwai meda yai kolesaga te augwa ama hasi dabe dali yainogo yai. Te bidi dabe augwaligo te bidi aga hasi isiąbo hale ebo kolesaga te gasa bidi dabe dali yai. Tama te we bidi dabe augwa digi augwa te tobage dwai dwai sę yali kolesaga usu nama wei ponoyu, te augwali dwai dene mu sai dao.

²⁸ Augwaligo te God augwa homude dą̄ ola sabo hagela homu yaligo da, teda Godigo augwali te augwa dwai kolesaga page tolalubo bidigo kolesaga wali pomainogo sula tagalalio. Tama tibaso, augwaligo te bidigo isławai doloba pisławai haniani kolesaga yai. ²⁹ Tama augwaligo te doloba pai kolesaga me isayı, tama dwai kolesaga mu eyu, tama mena nai pesa eyu, tama boi bidi ebo kolesaga yali. Augwaligo te doado bage hauwa elalubo bidi dali dwai homu eyu sębę sabo homu elama, tama bidi ela muyu yai, tama wado po weyu, tama tibo po weyu elama, tama gasa bidi dali dwai sę yabo homu kone palobo dao, tama augwaligo po tola sabilibo po wabo dao. Te tigidali dwai kolesaga augwalide mu paganaluai. ³⁰ Te augwaligo posobo po olama tama hanilama me po pusuyu tama bidi mebago nogi dolali. Augwaligo God dali boi bidi eyu, tama po dagą weyu, tama hagoma elama, tama augwa digi augwa nogi uwabaya sai. Augwaligo dwai gesi noma kolesaga pedalai. Tama augwaligo augwa aya de ida sigo po sela sayu yai dao. ³¹ Te augwaligo kolesaga me konebeo. Tama augwaligo gasa bidibolo te dą̄ wali po wai, tiali goli augwaligo te augwa po wali me pisławai. Augwaligo te augwa deli kanemego ame nani bage augwali me godolo me egobeo. Augwaligo te gasa bidi dabe homu dene eyu tau me magobeo. ³² Te Godigo te tobage dwai sę ebo bage dali ebo homu e tiwai dao: “Te tobage haniani dwai kolesaga ebo bidi dabe augwali isimainao, te dolo mu dao,” agai te homu ebo dao. Te dwai kolesaga ebo bidi dabe augwaligo te Godigo ebo homu bugagia koneai goli, koneama tagalama, augwaligo te tiwai dwai kolesaga yai. Tama augwaligo te sę naga me ebeo. Menio. Te augwaligo te tiwai dwai kolesaga ebo gasa bidi dabe augwali nogi me uwabaya siyu, te sę usu dao weyu yai.

Godigo po tų te dolo mu ebo dao

2 ¹ Te Godigo te tobage dwai dwai kolesaga ebo we bidi dabe dali sębę ebo dao. Tama agai te sębę ebo homu haninanigo da, teda dage tigidali bidi dabego gasa bagebolo po ela palobo da, eno dage deli delibolo e po obao, nago te naga yali dwai sę te gema dualobo usu me egobeo. Nago po wei ponainogo yali usu egobeo. Odao, nago gasa bidi dali naga po weyu yali, tama tebo kolesagago nago po nagaba digi te po obao. Magi baso meni, nago gasa bidi agabolo naga “Nago dwai kolesaga yai,” po wai, tiali goli naga digi nago me te tobage dwai kolesaga ebo dao. ² Tiali goli dago koneani, Godigo te tiwai dwai kolesaga ebo bidi

augwalibolo te dwai dene sabo sę wei ponobo dao. Tama tiyu Godigo po tų ebo te dolo mu naga ebo dao.³ Odao. Nago te tobage dwai kolesaga ebo bidi dabe augwalibolo te po weyu yali, tiali goli naga digi nago me te tiwai kolesaga yai, nago magi homu ebo dawe? Naga digi te Godigo po tų gedelama wi pabo usu yaibawe?⁴ Te ma, nago e homu ebawé, “Te Godigo ena wiegi yai bugagia iliyu, tama ena bobobage sogo tonaluyu, tama agai te dwai sę ebo wei enabolo polo me ponogobeo.” Te homu egio. Te Godigo wiegi yai polo wei ponosiąbo kolesaga ebode, te nago homugo te olo nai tiwai da, te homu ebawé? Godigo homugo nage homu begelemainogo, tama agai dwagi yai kolesaga naga nagebolo eyu tonalubo dao. Te kolesaga page nago konebewe?

⁵ Tiali goli nago naga homu mu palia selama, tama nago homu me begelebeo. Tialima tebo kolesagago te nago te dwai dene sabo sę ebo te pesage genuai holobao, te mone ge sabobo piduai tiwai. Te nosali te bodolu mani side te Godigo doloba pai po tų ebode te agai sębę hania haninama pedalaibao, tama nage te dwai dene te sogo saibao.⁶ Godigo te tigidali bidigo yali kolesagade usu nama dobawaibao.^d ⁷Tama mebago da, te dwagi yai kolesagade bomo elama bidiyu, tama tebo kolesagago augwaligo te genuai nogi me te wiegi yai nogi me te me dolisąbo bidada pabo ula te tų gegebo sę ebo dao. Tama Godigo te tama kolesaga ebo bidi dabe augwalibolo te bugagia bidada peyu, bidada pabo bidibo ula mawaibao. ⁸Tama mebago homugo augwade naga koneyu, tama augwaligo mu po wabo te tudiba munama, tama dolo isławai kolesaga wali pabo dao. Teda Godigo te bidi dabe augwali dali dwai homu mu eyu, tama genuai sębę eyu yaibao. Tama tiyu agai te dwai dene mu sabo sę augwaliba wei ponabao.

⁹ Te dwai denede augwaligo hwa mu waibao, te dwai kolesaga yali bidi dabe tigidali, te Juda dabe augwaligo te dwai dene hasia selama, tama nosali te Juda hani isławai bidi dabe augwali me tama naga tiaibao. ¹⁰Tiali goli Godigo te wiegi yai kolesaga ebo tigidali bidibolo te genuai nogi me, te wiegi yai nogi me augwalibolo mayu, tama augwali aga dali hodobo bugagia bidaibao. Te Juda dabe augwalibolo hasia menama, tama nosali te Juda hani isławai bage augwalibolo me mawaibao. ¹¹ Magi baso meni. God agai te we bidi dabe dagalobo si, agai te nogi yai we bidi tedali dagaloyu, te nogi meni yai we bidi tedali dagaloyu ebo menio. Aga da te tobage kolesaga ebo bidi menio.

¹² Te e tiwai yaibao: God agai te Juda hani isławai bagebolo aga bomo yai po mabe. Tama tibaso, agai te augwaligo yali dwai kolesagade augwali po tų ebo si, augwaligo te bomo yai po bolali sęde agai augwali osola sulama dene magobeo. Tiali goli augwaligo augwa digi bomai po

^d 2:6 Tib 62:12; Prs 24:12

bolo baso, agai augwali dene mawaibao. Me ma, te Juda dabe augwaligo te Godigo augwalibolo mani bomo yai po konebo dao. Tama te bomo yai po koneyu dwai sę yali bage augwali Godigo te bomo yai pogo osola sulama tama dene mawaibao. ¹³ Magi baso meni. Te bidi dabe augwaligo bomai po odolama, tama te po augwaligo homuba musiąwani da, augwali te God gedude doloba pai budi me pedalogobeo. Menio. Te tigidali bomai po tigidali sogo wali pali budi, te budi dabe augwali naga te Godigo augwali te doloba pai budi nogi yaibao. ¹⁴ Eno te kolesagade po me elalubao. Te Juda hani isąwai gasa hani budi dabe augwaligo te Godigo te Juda hani dabebole mani bomai po meni yani, tiali goli augwa digi augwa homude augwaligo te bomai po wali pabo kolesaga wali peyu da, teda te kolesaga ebo budi dabe augwaligo te bomai po meni yai goli, augwa tama tilama tama augwa homu aga digi te augwa bomai po tiwai elalubo dao. ¹⁵ Augwa tama kolesaga ebode, te bomai pogo page te Godigo augwaligo homude aşeani te hania mu pedalai. Tama te homude elalubo bomai pogo augwaligo ebo kolesaga osola subo dao. Tama me sogo augwa homugo augwa yali sęde po tų iliyu ebo, tama me sogo augwaligo yali kolesagade te augwa homugo te kolesaga usu da homu ebo dao. ¹⁶ Eno te Godigo wiegi yai gesi po te we bidibolo pusubo si eno e po me pusubo dao. Odao, te Godigo te aga bomai po mani bage me, te bomai po sisąwani bage me augwali tigidali dali Godigo te po tų nosali yaibao. Tama tiyu agai te po tų dodolobo sę te Krais Jisasgo nogoba muyu, tama te budi dabego geme ebo kolesaga osola suyu yaibao.

**Juda dabe augwaligo te gasa bidi dabebole ola mani
po te augwa digi augwa me te po wali pabe**

¹⁷Dage Rom dabe tomode te budi dabe meba te Juda dabe da. Te dage Juda dabe delibolo eno po obao. Nage da, nago nogi Juda elaluyu tama nago homu te bomai poba tialuyu, tama Godigo nagebolo te bomai po mobaso, tebogo nage te po tude tau saibao, te homu ebo dao. Naga digi naga nogi ugwaba siyu tama nago te po wabo dao, “Ena Godigo bidi dao,” te wabo dao, ¹⁸“Te Godigo homu kolesaga eno koneai, agai enabolo ‘Te kolesaga yao’ po eno odali,” nago te po weyu tama naga digi naga nogi ugwaba sabo dao. Augwaligo nage te bomai pode usu da olama, tama nago te doloba pai kolesaga koneyu godolo ebo dao. ¹⁹⁻²⁰Nago e tiwai homu ebo dao: “Te bomai pode eno te kolesaga page badi te mu po me sali da,” te homu eyu, tama “Ena te gedu widai budi dabe augwali te eno tų me ola mabo usu dao. Ena te hulide bidibo budi dabe augwaligo ula tiwai bidibao. Ena te kolesaga meni yai budi dabe augwali po ola mabo budi. Ena te bugagia konesiąwai dwasianu wai puluba tiwai bidibo bage po ola mabo tisa budi da” wai. ²¹Odao. Nago te gasa budi dabe ola mobaso da, teda magi baso nago naga digi naga ma ola mabo meniwe?

Nago po pusuyu te bidigo nai wi me sigio po wali, tiali goli naga digi nago magi baso nai wi sabo dawe? ²²Nago te po wali, “We bidigo te dwai penani ebo kolesaga me igimio” wali, tiali goli naga naga digi te penani sę ebo kolesaga magi baso ebo dawe? Gasa we bidi augwaligo te tibo god dabebolo lotu po weyu tama augwalibolo masigi me haniani dwagi yai nai me mabo dao. Nago te sede te po wabo dao, “Eno te tibo godibolo lotu wabo kolesaga mu hagelabo.” Tiali goli magi baso nago te tibo godigo lotu beba pelama, te mani nai wi sabo dawe? ²³Nago naga nogi ugwaba siyu, tama nago te po wai, “Eno Godigo bomai po koneai dao” wai. Tiali goli naga naga digi te bomai po boloyu yali, tama te kolesagago nago te Godigo nogi dolai dao. ²⁴Te nago te kolesaga dolali, tede te bukude te tama tiwai po elalubao, “Te Juda hani isławai bagego dwai posobo po weyu te po wabo dao, ‘Te Juda dabego God aga bomo meni yai bidi mu dao,’ augwaligo te posobo po Godigo nogide wabo dao,” te po te bukude asęna elalubao.^e

Te dwasianu tigiwali togwa səbo kolesaga ebo po

²⁵Te Godigo nogi dolobo sęde eno po me elalubao. Odiqo. God agai dagede sa muyu, tama dagego aga dąi ilemainogo duga tigiwali togolama, tama dagego te bomai po tigidali bugagia wali pobaso da, teda te tigiwali togobo sę ebogo aga du mu walaibao. Tiali goli dagego te bomai po bolali da, teda augwaligo dage tigiwali togwali digi, dage te tigiwali togosiławai bidi dabe tiwai pedalai dao. Te tigiwali togobo sę ebogo dage tau sogobeo. ²⁶Me ma, te tigiwali togosiławani Juda hani isławai bidi dabe augwaligo te Godigo bomai pogo kolesaga tigidali bugagia wali pobaso da, teda te bidi dabego nogi te tigiwali togwali Juda dabego nogi tiwai mu elaluaibao. ²⁷Mu tama, dage Juda dabe dagego te bomai po elalubao, tama augwaligo dage tigiwali togwai. Tiali goli dagego te bomai po boloyu yai. Tama te Juda hani isławai bage augwali olo bidibao, augwa tigiwali togosiławani bidi dabe bidibo dao. Tiali goli augwaligo te Godigo bomai po wali mu pai yaibaso da, teda augwaligo ebo kolesagago dagego kolesaga aiyaba elaluyu tama po dagebolo naga waibao. ²⁸Magi baso meni. Te bidi aga tigi daide naga te Juda bidi bidibo bage, te tobage bidi aga te Juda bidi mu menio. Tama te tigiwali togobo sę ebogo te tigiwali togwali bidi te Godigo gedude te doloba pai bidi nigigobeo, te usu egobeo. Te menio. ²⁹Te mu Juda bidi mu bidibo bidi, aga agai homu kolesagade te God wali pabo bidi bidibo dao. E tiwai dao, aga homude te dwai kolesaga togwa səwai bidi, te tobage bidi te Juda bidi mu dao. Tama Godigo Mobo Bidigo aga dali te sę ebo dao, te bomai po wali pabo kolesagago te tobage sę ebo usu menio. Tama te dwai kolesaga

^e 2:24 Ais 52:5

togwa səwai bidi, aga te e tqde bidi gedude nogi ugwbaba sabo bidi tiwai bidigobeo. Menio. Agai nogi te Godigo ugwbaba saibao.

Bidigo dwai kolesaga ebogo te Godigo po aiyaba me elalugobeo

3 ¹Te tigiwali togobo səde te tamadi wali po eno waligo da, te səde dago ma kone palao. Te Juda dabe augwaligo te kolesaga wali peyu, tama augwaligo te Juda hani isəwai bidi dabe augwali mena tama aiyaba elaluabawe? Te tigiwali togobo kolesaga ebogo augwali tau saibawe? ²Tegoba! Te wiegi yai haniani səde te Juda dabe augwaligo te gasa hani bage aiyaba elalubo dao. Te hasia nai e dao: Godigo agai wiegi yai po te Juda dabe augwaligo bugagia tonalumainogo mawai dao. ³Mu dao, augwali mebago te pode te po mu po dao homu me isiqyu tama augwa homu tigidali te poba mubo meni. Tiali goli magigo menio. Ma augwaligo Godigo pode te tobage homu ebogo te Godigo digi te agai te Juda dabego wąj mubolo mani dąj wali po tagalomainogo ilaibawe? ⁴Mu menio. Tigidali we bidi augwaligo tibo po wabo bage bidibogo da, God agaduba deligo mu po sesemane sogo wabo dao. Polobadu te genuai bidi Devit agai dwai sə elama tama Godigo agade po tū dolo mu elama tama Devitgo te sogo asęani pogo te eno megi tama wali po tau sabo dao. Agai te we bidigo dwai sə ebogo Godigo po tū dolo mu naga ebo kolesaga hania waselebo po te bukude asęyu tama e po asęani,

“Nago po wabo si, tigidali sogo te we bidi augwaligo
koneaibao, nago po te dolo po naga dao. Tama
augwaligo nage po tū ila mobaso da, teda nago po
tū ebogo augwali aiyaba mu elaluabao,”

te po asęani.^f

⁵Te bidi dabe mebago e tqde bidigo homu kolesaga wali peyu augwaligo e po obao, “Magi yaliwe? Te dago dwai kolesaga ebogo te Godigo doloba pai kolesaga hanilibaso da, teda Godigo te dago yali dwai səde dene wei ponobo, tama agai te tama tebo kolesaga te dolo ebo menio.” ⁶Woo, mu menio. Te God dolo me egi menigi sogo da, teda mena tama agai te tigidali tqde bidibo we bidigo kolesaga dagaligi dawe?

⁷Tama gasa bidigo e po enabolo wei ponaibao, “Te eno te God dali kęq pisławai kolesaga ebogo te Godigo aga we bidi dali kęq pabo kolesaga mu hanilama, te tama tialigo te aga genuai nogi mu pedalobaso da, teda magi baso agai enabolo te dwai sə ebo bidi nogi polali tama enabolo te dwai sə yali wei ponaibawe?” ⁸Tama we bidi augwaligo te po tama weyu e po me wabo dao, “Ao, Godigo te dwagi yai kolesaga pedalumainogo te dago dwai sə inao. Te bidi Pol agai te tiwai po naga wabo dao,” augwaligo enade nogi posobo po weyu te po wabo dao. Nosali te bidi

^f 3:4 Tib 51:4

dabe augwalibolo te Godigo dwai dene wei ponoyu, te agai dolo mu naga wei ponaibao.

Te doloba pai kolesaga ebo bidi deli me bidibeo

⁹ Te Godigo te Juda dabe dari yali kolesagade dago magi homu egowe? Te ena me, te dage Rom we bidi meba me, te da te Juda hani bage dao. Te dago te Juda hani isawai we bidi dabe augwali aiyaba elalubo dawe? Te me tegobeo. Mu menio. Eno tamadi te po walio, te dwai kolesaga segego da tigidali badi, te Juda me te Juda hani isawai bage dari te segego mesegelai dao. ¹⁰ Te Godigo po bukude te tiwai po wali e elalubao:

“Te doloba pai bidi deli me bidibeo. Mu menio. Te
bidi me deligo wiegi yai kolesaga me konebeo.

¹¹ Te bidi me deligo God gegebo se me ebo
menio. ¹² Tigidaligo te tu wali pabo tagalali.
Augwali tigidali bidi dari te Godigo gedude te
olo bidi naga mu pedalai. Te wiegi yai kolesaga
ebo bidi mu menio. Awe, me deli me elalubeo.^g

¹³ Te ma dala muai gu pagede polobadu pubulali
tigi dwai dwai kugumini ebo tiwai, te bidi dabe
augwaligo pedauwaligo wabo po te dwai mu dao.
Augwaligo tibo po hauwa wabo dao. Augwaligo
te bidi dolobo haniani po hauwa weyu, te dwai
hasamanigo te bidi ela mubo tiwai ebo dao.^h ¹⁴ Sesemane sogo
augwaligo dwai
dwai i ola mabo po odu geyu, te bidibolo sege mayu
tebo dao.ⁱ

¹⁵ Augwaligo asesa polo gasa bidi dari boi bidi
homu elama tama ela mubo dao. ¹⁶ Augwaligo
augwa dwai se ebo kolesaga wali peyu, tama te
bidi dabe hauwabolo te dene me sege me te si naga
mabo dao. ¹⁷ Augwaligo te gasa bidi dabe dari deli
homu elama me bidibeo. ^j ¹⁸ Augwaligo
te God dari wi dwasianu me ebo menio,”
te po te bukude polobadu asçani.^k

¹⁹ Tama dago koneani, te tigidali bomai pogo ebo se agai te da te bomai
po dologode bidibo Juda bidi dari dari te se ebo dao. Godigo bomai
pogo te da Juda bagebolo me te dena yali dwai se ola mabo dao. Tama
tialigo da, bidi me deli agai “Te ena doloba pai bidi dao,” te po wabo usu
egobeo. Te Godigo bomai po te pogo se si elalubao. Te bomai pogo dago

^g 3:12 Tib 14:1-3; 53:1-3 ^h 3:13 Tib 5:9; 140:3 ⁱ 3:14 Tib 10:7 ^j 3:17 Ais 59:7-8

^k 3:18 Tib 36:1

ebo dwai sę dabolo ola mabo dao, tama dago wei ponobo po menio. Tama me, da tigidali bidi te da tigidali gasa haniani tqde bidibo we bidi dago te Godigo gedude dwai sę yali elaluai, te Godigo da tigidali dali po tų yaibao. Dago te me konemainogo, te bomai po elalubo dao. ²⁰ Magi baso meni, te bomai po wali pabo kolesagade te bidi deli agade Godigo ‘Aga doloba pai bidi dao’ po me wagobeo. Te bomai pogo dena dwai sę ebo kolesaga denabolo hania mu ola mayu ebo dao, te tama sę naga te bomai pogo ebo dao.

**Bidigo konealubo po Kraisde dąu wali bidigo
doloba pai nogi elaluabao**

²¹ Te bomai po wali pabo kolesagade te bidi me deli aga Godigo gedude te doloba pai bidi munu me pedalogobeo. Tiali goli megı da te Godigo te bidi doloba pai bidi ilibо kolesaga hania pedalali. Te bomai po wali pabo tųdu me pedalobeo. Menio. Te gasa tųdu pedalai. Tama te bomai po asęani po me, te Godigo po polobadu pusali sę bidi profet dabego pusali po me, te po sigo Godigo te bidi doloba pai bidi ilibо kolesagade nosali yabo sę po wai dao. ²² Te bidi doloba pai bidi ilibо kolesaga e dao: te bidigo konealubo po Jisas Kraisde dąu wali bidi, aga Godigo doloba pai nogi poaibao. Tama tigidali haniani we bidigo konealubo po dąu obaso da, Godigo augwali doloba pai we bidi nogi waibao. Magi baso meni, te Juda hani bidi doloba pai bidi ilibо kolesaga, te Juda hani isławai bidi doloba pai bidi ilibо kolesaga tedali tedali meni. ²³ Magi baso meni. Da tigidali bidi dago dwai sę yai dao, tama da tigidali te Godigo wiegi yai usu niba kadu wabo usu menio. ²⁴ Tiali goli Godigo da olo mu tau siyu mabo kolesaga yalio. Tama Krais Jisasgo yali sęgo da ma abelama, tama Godigo da doloba pai we bidi nogi poai. Dago te me abelebeo. Godigo olo mu dabolo te Krais Jisasgo yali sęde te doloba pai we bidi nogi poai. ²⁵⁻²⁶ Polobadu Godigo Jisas sa muyu, te aga isäma tama agai ni pedaide te dulubo kanemego te agade konealubo po dąu wali bidi dabego dwai sę yali te selä sawaibao wai. Te kolesagago Godigo te agai ebo doloba pai kolesaga dabolo ola mani. Polobadu Godigo te we bidi augwali dali dua nagame eyu tama augwaligo dwai sę suali goli, agai aga nosali yabo sęde homugo kone pelama agai te dwai sę wei ponebeo. Tiali goli megı e sogode agai te dwai sę ebo sula tagalobo menio. Aga ogwa isalide agai te dwai sę wei ponobo doloba pai kolesaga dabolo hania ola mawai dao. Tama tibaso dago koneani, God digi tigidali doloba pai mu bidibao. Tama dago e me koneani, te tigidali we bidigo konealubo po Jisasde dąu obaso da, agai augwali doloba pai we bidi nogi nogi yaibao.

²⁷ Tama tibaso, dena digi dena nogi ugwaba sabo tų mena tama elalubawe? Te meni dao. Te tų palia salio. Magi naigo te tų palialiwe? Te Godigo augwali doloba pai we bidi nogi yai hagede augwaligo

te bomai po wali pabo kolesagago augwali doloba pai bage ilibomeni. Te menio. Te Kraisde te konealubo po dą̄ wabo kolesagago naga te we bidi doloba pai we bidi ilibodo. Tama tibaso, dena nogi ugwbaba sabo tū meni dao.²⁸ Tama koneyu, dago e tiwai po wabo dao: bidigo konealubo po dą̄ naga obaso tama Godigo aga doloba pai bidi nogi yaibao. Te bomai po wali pabo bidi da, agai te bomai po tigidali dolo mu wali pabo usu meni baso, te Godigo aga doloba pai bidi nogi me wagobeo.²⁹ Nago te po mu meni homu eyu, nago e po wabo dawe, “Te God aga te Juda dabe augwaligo God naga dao. Aga da, te Juda hani aq isawai te gasa hani dabe augwaligo God meni,” nago te homu ebo dawe? Te po mu po menio. Aga da te gasa hani augwaligo God me dao, agai augwali me ma dobola selama dwagi yai madiba mubo dao.³⁰ God aga deli naga dao. Tama tialigo da, te tigiwali togolama Kraisde konealubo po dą̄ wabo Juda bidi, te Godigo aga doloba pai bidi nogi yaibao. Tama tigiwali togosı̄ma Kraisde konealubo po dą̄ wali bidi, te Godigo te bidi aga me te doloba pai nogi nogi yaibao.¹ ³¹Dago e po wabo dao: we bidi augwaligo Kraisde konealubo po dą̄ obaso, te Godigo augwali aga gedude doloba pai we bidi ilaibao. Tama te po wabogo dago te bomai po dolobo dawe? Mu menio. Dago te bomai po page hania haninama tama te page da bugagia wali pabo dao.

Godigo Abraham doloba pai bidi nogi poai

4 ¹Awe, te Abrahamde me te tiwai pedalali. Abraham aga te da tiwai bidi, tama aga da Juda dabego wą̄ mu dao. Tama dago agade homu kone paluyu, tama Godigo bidi doloba pai bidi ilibokolesaga page dago bugagia koneagameo. Agade magi sę pedalaliwe? ²Te mu tama Abrahamgo te dwagi yai kolesaga eboso tama tede aga te doloba pai bidi pedaligi sogo da, teda aga digi aga nogi ugwbaba sainogo tigi dao. Tiali goli God gedude aga digi aga nogi ugwbaba sigi meni. ³Tama te sęde te Godigo po bukude e tiwai po wai dao, “Te Abrahamgo Godigo wali pode te mu po dao aga homu tomode weyu, tama Godigo po homude dą̄ wali. Tama tibaso, Godigo ‘Te Abraham te doloba pai bidi dao’ wali,” te bukude te po elalubao.^m ⁴Dago koneani, bidigo sę elama sabo mone, te mone dago te olo sabo dao te nogi nogi egobeo. Menio. Te sę ebo wei naga ponobo nai dao. ⁵Tiali goli te Godigo te bidi dabe doloba pai bidi ilibokolesaga te tiwai menio. Te menio. Bidi me deligo homu eyu ‘Eno te Godide konealubo po dą̄ obaso, agai ena te doloba pai bidi nogi poaibao. Eno ena ebo sęde te nogi sogobeo.’ Te homu ebo bidi agai homugo te God da te dwai sę yali we bidi te doloba pai bage ilibodo God dao. Tama te homu ebo bidigo homugo konealubo po Godiba dą̄ obaso, teda Godigo

¹ 3:30 Bom 6:4; Gal 3:20 ^m 4:3 Gag 15:6; Gal 3:6

gedude te tiwai konealubo po dą̄ wali bidi te doloba pai bidi dao. Tama Godigo agabolo te nogi olo mawai, te bidigo aga yali sego abelebeo.

⁶Tama te polobadu bidai bidi nogi Devit agai te tobage bomai po wali pisawani doloba pai bidi nogi sai bidide homu kone paluyu, tama Devitgo te bidi aga wiegi yai homu pemene ebo koneai dao. ⁷Tama te koneama, tama tede Devitgo te po asęani,

“Te Godigo bidi dabego te bomai po bolali dwai kolesaga sela sənama, tama augwaligo dwai s̄ yali kolesaga mesegelali, te bidi dabe augwali wiegi yai homu pemene mu ebo dao.”

⁸“Te Genuai Bidigo bidi me deligo dwai s̄ yali te homu me konesiąbaso da, te bidi aga wiegi yai homu pemene mu ebo dao.”ⁿ

⁹Tama te tigiwali togwali Juda bidi dabe augwali naga augwali te tiwai wiegi yai homu pemene emainogo yaibawe? Ma te tigiwali togosiąwai bidi dabe, te Juda hani isawai bage, augwali me te wiegi yai homu pemene egowe? Woo, te tigiwali togosiąwai bidi dabe augwali me te wiegi yai homu pemene yaibao. Magi baso meni. Dago te po tama wabo dao:

“Abrahamgo homugo te Godigo agabolo nai maiaboo dą̄ walali po te mu po dao. Tama tiyu, Abrahamgo te agade konealubo po dą̄ wali kolesaga te Godigo sulama, tama Godigo homugo ‘Te Abraham te doloba pai bidi dao,’ te po wali.”

¹⁰Tialima, Abraham te mena tama bidibadi tama Godigo aga doloba pai bidi da homu yaliwe? Ma aga tigiwali togwai elalubadi, ma aga tigiwali togosiąbadi dawe? Te aga tigiwali togosiąbadi tama Godigo homugo aga te doloba pai bidi da te homu elama, tama aga doloba pai bidi nogi wai dao. ¹¹Aga te tigiwali togosiąbadi, tama agai Godide konealubo po dą̄ obaso, tama Godigo aga doloba pai bidi nogi wai. Tama nosali te sa muyu, te tigiwali togobo kolesaga mayu tebogo Godigo hania hanilali, te agai Abraham te doloba pai bidi nogi polali dao. Abraham agai hasia tama tilama, tama nosali gasa bidi dabe augwa tigiwali togosiąbadi goli, te Godigo augwalibolo te doloba pai bidi nogi omainogo eyu, tama augwaligo Godide te konealubo po dą̄ wai. Tama Abraham aga te kolesagade polasa pai bidi dao, tama augwali nosali wali asai. Tama tibaso aga da augwaligo hasia waj monu bidai.^o ¹²Tama aga te tigiwali togosiąwani bagego waj naga ebeo. Menio. Aga da te da Juda dabego waj mu me dao, te da te dena tigiwali togolama tama Abrahamgo sągadu wali pabo Juda bage, dago te konealubo po dą̄ wali. Tama tiyu te aga tigiwali togosiąbadi te sogo agai tama tiwai kolesaga dago yai dao.

ⁿ 4:8 Tib 32:1-2 ^o 4:11 Gag 17:10

**Godigo dą̄ wali po te tigidali konealubo po
dą̄ wabo bidibolo wali po dao**

¹³ Polobadu Godigo po Abraham dali me te aga bulai wai dali po dą̄ wali elaluai, te agai te tigidali bulude bidibo we bidigo tō tigidali augwalibolo mawaibao po wai. Tiali goli Abrahamgo te bomai po wali pobaso Godigo te po agabolo dą̄ me wabeo. Menio. Abrahamgo Godide konealubo po dą̄ obaso tama Godigo aga doloba pai bidi nogi nogi yali, tama tibaso Godigo aga dali te tō maiabo po dą̄ wai dao.^{p 14} Te e tiwai dao: te bidi augwaligo te bomai po wali pobaso, augwaligo tede naga te tigidali nai sabo tigi sogo da, teda te konealubo po dą̄ wabo kolesaga te olo nai tiwai elalugi da, tama te Godigo dą̄ wali po me te bomo menigi dao. Magi baso meni. We bidigo te bomai po tigidali bugagia wali pabo usu meni baso, tama sege sai we bidi bidibo dao. ¹⁵ Bomai po elalubaso da, teda dago koneani, te bomai po bolobo bidi aga Godigo nogode dene sabo tū te me elalubao. Tama te bomai po menigi sogo da, teda dago te bidigo bomai po bolobo te po me wagi menigi dao.

¹⁶ Tama tibaso, Godigo e homu ebo dago hania koneagameo, Godigo agai te nai maiabo dą̄ wali po mu po pedalomainogo eyu, te we bidi augwaligo te sa muani nai sabo homu eyu da, te augwaligo konealubo po agade dą̄ obaso da, augwaligo te nai saibao. Tama tiyu, tama te Godigo agai olo tau sabo kolesagago te polobadu dą̄ wali po mu po pedalobo dao. Tama elama, tama Godigo nai maiabo dą̄ wali po te bomo elalubao, te tigidali Abrahamgo bulai wai dabe nosali pedalabo bage augwalide te po bomo elalubao, tulalugobeo. Te bomai po elalubo Godide konealubo po dą̄ wabo Juda we bidi augwaligo naga te nai me sogobeo. Menio. Te bomai po elalusiaþo Juda hani isawai bage me, augwaligo Abraham tiwai eyu tama Godigo dą̄ wali poba homu begi pobaso da, teda augwaligo me te Godigo maiabo nai mu saibao. Abraham aga da, te Godide konealubo po dą̄ wali we bidi da tigidaligo hasia wāj monu mu dao. ¹⁷ Tama tede te Godigo po bukude e tiwai po wai dao: “Eno nage te geninama pedalabo bidi hani hauwago wāj mubao” wai. Te dą̄ wali po Godigo obaso, Godigo gedude te po te bomo elalubao. Abraham te dago aya dao. Tama Abrahamgo konealubo po te dą̄ wali po wali peyu Godiba homu dą̄ wai. Te Godigo naga te isali bidi dabebolo te bidibo ula mayu, tama te pedalisiawani nai dabe me i weyu, te augwali pedelainu ebo dao. Tama tibaso Abrahamgo e homu mu yali, te Godigo aga yaibao po wali sē te mu yaibao.^q

¹⁸ Abrahamgo Godigo te sē yaibao po wabo tū te agai me susiabadi, tiali goli agai konealubo po mu dą̄ weyu, te tū suai bidigo ebo tiwai

^p 4:13 Gag 17:4-6; 22:17-18; Gal 3:29 ^q 4:17 Gag 17:5

yalio. Tama aga te bidi hani hauwago waj monu bidi pedelali, te Godigo wali po tiwai yario, “Te nago bulai wai hani dabe e tiwai geninama tama pedalabao,” te po wai dao.^r ¹⁹Te Abrahamgo kibu be te bidi sese a naga te 100 kibu be pade elalubadi, tama aga tigi te monu dabe tiwai elalualio. Tama aga we Sarago tigi me te mosi dabe tiwai yario, augwali sigo wai ame nabo usubeo. Abrahamgo tede te homu yali, tiali goli agai Godigo wali pode konealubo po daj wali te bomo kimi me isibeo. Te agai konealubo po daj mu wai dao.^s ²⁰Godigo po weyu, te nai nosali pedalabao po wali, tama Abrahamgo tede homu elama, tama homu si eyu, tama agai te konealubo po tagalabo te homu me ebeo. Menio. Agai homu te Godigo poba begi pai, tama tebogo aga bomo ilali. Agai tama tiyu, te Godigo nogi uwgaba selama, ²¹tama kuna koneanio, God agai te se yabo usu yaibao, te agai polobadu wali po tiwai wali pelama te se mu yaibao. ²²Tama Godigo homugo ‘Te Abrahamgo enade te konealubo po daj obaso, te aga doloba pai bidi dao.’ ²³Te po te Godigo po bukude elalubao, “Godigo homugo aga te doloba pai bidi da te homu yali,” agai te Abraham dali naga te po me wabeo. ²⁴Menio. Agai te po dabolo me walio. Te Godigo dago Genuai Bidi Jisas te gu pagede ma hodolali. Tama te sede dago konealubo po daj obaso da, teda Godigo homugo da te doloba pai we bidi dao, te homu agai da dali me yaibao. ²⁵Godigo Jisas e toba tagala palali te aga isama dago dwai se yali sege sela səmainogo yai. Tama tiyu me, Godigo aga te gu pagede ma hodolaligo te agai da doloba pai we bidi nogi emainogo tiai dao.

Da te Krais dali isilama, tama da aga bidibo ulade bidibao

(Dq̄i 5-8)

Godigo da doloba pai we bidi nogi poali po wai

5 ¹Te dago konealubo po Godide daj waibaso tama Godigo da doloba pai we bidi nogi polaligo da, teda dago Genuai Bidi Kraisgo da God dali deli homu ilama pedalalio. ²Aga me agaduba deligo da megis te bidibo te wiegi yai olo tau mabo kolesaga tomoba pomainogo tu dalalio. Dago agade konealubo po daj weyu, tama agai te tu tama dalama, tama Godigo dabolo aga genuai nogi tiwai genuai nogi me maiabo sogo asobo dago tonalubao. Tama te asobo sogo tonalubadi dago wiegi yai homu pemene ebo dao. ³Tama dago tede naga wiegi yai homu pemene me egobeo. Menio. Te sege dali, dene dali daba pedalubode me te dago wiegi yai homu pemene ebo dao. Dago koneani, dago te sege toloyu tama tebogo da homu bomo ilibo dao, tama dago te sege bugagia tolaluyu

^r 4:18 Gag 15:5 ^s 4:19 Gag 17:17

bidibo dao.⁴ Tama dago te sege tolabo bomo te tiwai dali me bidibaso da, teda da te usu sabo kolesagade dolalubo usu yaibao. Tama da dolalubo si da, teda Godigo da dali dwagi yai homu ebo dao. Tama agai da dali dwagi yai homu ebaso da, teda Godigo nosali da selama tama dabolo aga genuai nogi tiwai genuai nogi me maiabo sogo asobo te dago wiegi yai homu eyu tonaluyu bidibo dao.⁵ Tama tiyu, tama te dago aga bugagia tonalubo kolesaga te tulalugobeo, te kolesaga ebogo da guni bula sabo bidi tiwai pedalogobeo. Magi baso meni. Godigo aga Tedali Mobo Bidi dabolo mani, tama agai te Godigo da dali wiegi yai homu eyu tama godolo mu ebo kolesaga te da homude gisiga ola mawai dao, te kolesaga dwasianu menio.

⁶ Awe, polobadu da bomo meni yai elalubadi, te da te Godigo gedude doloba pai we bidi bidabo usu yai menio, te sogo naga Krais isilama, agai te da dwai se yali we bidi ma dobola sai dao.⁷ Edao. Te doloba pai bidi tau siyu te bidi hauwa te isabo homu me egobeo. Tialima deli deli bidigo da, te aga homu bomo ilama tama te dwagi yai bidi me delide dwagi yai homu eyu tau siyu isabo homu elama tama isaibao.⁸ Tiali goli, Godigo kolesaga e tiwai dao. Da dwai se ebo we bidi naga bidai digi, Kraisgo da tau somainogo homu eyu aga isali. Te kolesagade Godigo da ola mani, te God aga digi agai da dali dwagi yai homu eyu godolo mu ebo dao.⁹ Tama tialigo da, megis dago mu koneani, te agai da me mu dobola sesa pidubadi geyu, tama dago te dwai se ebode aga sebe tagalama tama dago dene me sogobeo. Krais agai kaneme gelama tama da penama, tama megis Godigo da doloba pai we bidi nogi obao.¹⁰ Polobadu dago God dali boi bidi homu elama bidibadi, tama te sogo Godigo Ogwa isai. Tama te isaligo agai te dago boi bidi yali kolesaga silama, tama da God dali deli homu ilama pedalali. Tama agai tama tialigo da, teda dago mu kuna koneani, te dago dene sidali weyu, te Ogwago bidibogo te Godigo da ma dobola sainogo tiaibao.¹¹ Tama tede naga me egobeo. Menio. Dago Genuai Bidi Jisas Krais agai da te God dali deli homu pedalumainogo ilali, tama agai te yali sede te megis dago Godibolo wiegi yai homu pemene ebo dao.

Adamgo isabo se nigilai, tiali goli Kraisgo bidabo ula nigilali

¹² Edao. Eno aseçani po page e tiwai dao. Bidi deligo dwai se hasia polobadu yali, tama te kolesagade te dwai se ebo kolesaga e tqba pedalalio. Tama te dwai sego te isibo se sela asai. Tama te isibo se tigidali we bidibolo mena mena pali. Magi baso meni, tigidali we bidigo dwai se yai dao.^t ¹³ Te Godigo bomai po me pedalisiabadi, tiali goli te sogo te dwai se ebo kolesaga e tqde elaluai. Tialima, te bomai po te sogo meni baso, Godigo te dwai se yali we bidi dali te ‘Augwali da te negeli elalubo

^t 5:12 Gag 3:6

bage dao,’ te homu yai menio. ¹⁴Tiali goli te isibo sę te Adam bidali sogo dąj elama asiyu, te Moses bidali te sogoba usu nagasai, tama te sogo tigidali te dwai sęgo dolobo kolesagago tigidali bidi aiyaba elaluatio. Te bidi mebago te Adamgo te Godigo agabolo dolo wali bomai po bolali tiwai me isawani, tiali goli isibo sęgo te augwali me aiyaba elaluai.

Te Adam dali Krais sigo yali kolesagago te we bidi umabode du walali. Tama tibaso, te Adam da te piksa noma tiwai te nosali pedalabo bidi me deligo piksa noma te hasia pedalai dao. ¹⁵Tiali goli Adamgo dwai sę yali dali te Godigo olo tau siyu mabo wiegi yai kolesaga dali, te tiwai si me ebeo. Mu menio. Te bidi deligo dwai sęde te bidi hauwa isai. Awe, te mu po dao. Tiali goli Godigo te olo mabo wiegi yai kolesaga dabolo eyu, tama te olo tau siyu mabo wiegi yai kolesaga yali te bidi Jisas Krais delide dago te olo mabo nai sai. Tama te olo tau siyu mabo wiegi yai sę me, te olo mabo wiegi yai nai dali sigo te bidi deli Adamgo yali sęde walali du aiyaba mu elaluama, tama we bidi umabobolo te sę pedaludu gebo dao. ¹⁶Te Godigo olo mabo nai dali te bidi deligo dwai sę yali dali te tiwai si me ebeo. Mu menio. Te bidigo dwai kolesaga yaligo du walama tama Godigo te po wali, “Agai dwai sę yali, aga dali aga bulai wai dali augwali mu dolomainao” wai. Tiali goli bidi hauwago dwai sę ebo goli, tama megı Godigo augwalibolo te olo tau mabo wiegi yai kolesaga eyu tama augwali doloba pai we bidi nogi obao. Te Godigo olo mabo naigo te tiwai aiyaba elalubo dao. ¹⁷Te bidi deligo te po sela sawanigo, tama te bidi deligo yali dwai sęgo te isabo kolesaga te tuni bidi tiwai bidibo ilali, tama tigidali bidi aiyaba elaluai. Te mu po dao. Tiali goli Godigo olo tau mani wiegi yai kolesaga badi te olo tau siyu mabo naigo me, agai da doloba pai we bidi nogi polali, tego te isibo kolesaga aiyaba elaluama tama genuai mu ilalio. Tama dago mu koneani, tigidali bidigo te doloba pai bidi ilibo olo mabo sę siyu da, teda augwali bidibo ula dali bidiyu, te Jisas Kraisgo sęde tama aga dali tuni bidi dabe bidaibao.

¹⁸Tama tibaso, dago homugo te pode bugagia koneao. Bidi deligo te Godigo po bolaligo, tama te dwai sę yaligo te da tigidali bidi da sęge sai bidi ilai digi dao. Tama tiali goli, gasa bidi deligo doloba pai kolesaga yaligo te da tigidali bidigo elaluali sęge sela səwai, tama da te wiegi yai bidibo ulade megı bidibo dao. ¹⁹Tama te bidi deligo po sela səwainogo, tama agai te kolesagade te bidi hauwa te dwai sę ebo bidi ilalio. Tama te tiwai naga me, te gasa bidi me deligo te Godigo po wali paligo, tama agai te tiali kolesagade te bidi hauwa te doloba pai bidi te Godigo gedude pedalibaob.

²⁰Te we bidi tigidali augwaligo augwa ebo dwai sę te Godigo gedude genuai mu dao konemainogo eyu, tama Godigo te bomai po dabe Mosesbolo ola mawai. Tama mayu, tama augwaligo te bomai po me bolodu mu geanio. Te bidi dabe augwaligo dwai sę umabo mu idualı, tiali

goli Godigo te olo tau sabo wiegi yai kolesaga te augwalibolo me mu idu gebo dao.²¹ Tama tiyu te olo tau sabo wiegi yai kolesagago te dwai sę aiyaba mu elalubo dao. Magi baso meni, te dwai sęgo te isibo kolesaga nigliama, tama te isibo kolesagago da tigidali aiyaba elaluyu bidai. Tiali goli te tiwai me megı Godigo te olo tau mabo wiegi yai kolesaga te ugwdadu daide bidibao. Te kolesagago da megı tonalubo dao. Godigo te olo tau mabo wiegi yai kolesaga elama tama da doloba pai we bidi nogi obaso, dago te sesemane sogo bidata peyu, bidata pabo ula elalubao. Dago te ula dago Genuai Bidi Jisas Kraisgo sęde sai dao.

Da te Krais dali isali

6 ¹Te dago te Godigo bomai po dabe bugagia wali pesiąbadi goli, agai da olo mu tau siyu, agai da ma dobola sali. Te agai da dali te wiegi yai sę ebaso, dago magi po waibawe? Bidi mego e tiwai po weyu, “Te Godigo olo tau mabo wiegi yai kolesaga dabolo me hauwa geninama idumainogo eyu, dago dwai sę hauwa idu geinao,” te po weyu da, te po usu dawe, ma meniwe? ²Mu menio. Magi baso meni. Da te dwai kolesaga ebode te isai bidi tiwai mu elama tama dago te dwai kolesaga ebo tagalalio, te dago isiabo kolesaga mu dao. Tama tibaso, dago te dwai sę hauwa yabo homu mu egobeo. ³Da te Krais Jisas dali tiasiyu tama baptais sali, te kolesagade da tigidali te aga isalide me tiasiyu tama baptais salio. Te sęde dagego homugo me konebewe? ⁴Te baptais saligo da te Krais isalide da tede dali kęq selama, tama Godigo da te Krais dali gę pagede pubulai tiwai yali dao. Tama Ayago genuai bomogo agai te Krais gę pagede ma hodolali. Tama te tiwai me da me te gesi noma bidibo ula selama bidimainogo eyu, da te baptais salio.

⁵ E tiwai eyu dago te gesi noma bidibo ula sabo dao: da aga dali kęq pelama tama da te aga isali tiwai isai. Tama tialigo da, da te aga dali kęq pelama tama hodaloyu, me te aga hodalualı tiwai gilama te dago isali noma dabe ma hodaluama te gesi noma bidibo ula sabo dao. ⁶Tama dago koneani, te dago poloba homu kolesaga te ni pedaide Krais dali isama tama te dwai sęgo da tigide sę yali bomo te silimainogo yilio, te da te dwai sę ebo kolesaga dologode me bidamu dao. ⁷Magi baso meni, te isali bidide te dwai sę ebo kolesaga me daganalugobeo. ⁸Awe, da Krais dali isali tiwai gilama yaligo da, teda dago konealubo po dą mu weyu e homu ebo dao, te da aga dali hodobo te gesi noma bidibo ulade me da bidaibao. ⁹Magi baso meni. Dago koneani, Godigo Krais te gę pagede ma hodolali, tama aga munu me isigobeo. Te isibo bomogo te aga aiyaba me elalugobeo, te usu menio. ¹⁰Awe, te aga deli sogo naga isali, munu me ma isigobeo. Tama te isaligo agai te dwai sę ebo bomo aiyaba elaluai. Tiali goli megı aga bidibo ulade ma bidibao, tama te bidibode agai Godigo nogi ugwbaba somainogo eyu bidibo dao. ¹¹Tama tibaso, duga me duga

digi isama tama dwai səgo bomo dologode ma bidibeo. Menio. Dage te Krais Jisas dali kəq selama, tama dage bidibo ulade God dali bidibao. Dagego duga digi dali te homu yao. Tama te homugo ebo te usu ni tiwai dao, tama dagego ebo kolesaga te usu niba kadu wao.

¹² Te tama tiyu, dwai səgo dage isabo tigi tonalumainogo gogolamuo. Tiyu te dwai səgo dage kegeyu tama tigigo dwai kolesaga wali pabo homu yabuo. ¹³ Tama dagego duga nogo səqə te dwai sə ebo madi menama, te dwai kolesaga emainogo elamuo. Te menio. Godigo dage te gə pagede ma hodolali tiwai yaligo da, teda dagego duga tigi tigidali badi, te dagego homu kolesaga me te Godibolo mayu, te doloba pai kolesaga naga eyu bidiqəo. ¹⁴ Dagego koneani, te dwai sə ebo kolesagago te dage tonaluamuo. Magi baso meni. Te Godigo dage ma dobola somainogo eyu dagego te bomai po bugagia wali pabo homu ebo meni. Te meni. Tede dagego koneani, me sogo dagego geda muyu dwai sə eyu ebo dao. Te usu egobeo. Tama dagego homugo te Godigo olo tau sabo wiegi yai kolesaga tego naga dage ma dobola sobaso dage te wiegi yai kolesaga dologode bidabo homu yao.

Da te doloba pai kolesagago sə bidi dabe dao

¹⁵ Tama da te bomai po dologode me bidisiayu, tama da te Godigo olo tau sabo wiegi yai kolesaga dologode megı bidibaso, dago magi yaibawe? Dago te dwai sə ebo usu egowe? Mu menio. ¹⁶ Te dagego duga tigi te bidi me deligo nogoba menama tama agai po naga wali pobaso da, teda dage agai sə ebo bidi bidibo dao. Koneaniwe? Ma dage te dwai sə ebo kolesagago sə bidi bidiyu tama dage agade duga noma mu isabo sə saibao. Ma dage Godigo po odoyu tama te pogo sə ebo bidi dabe bidiyu tama dage doloba pai kolesaga eyu bidibo dao. ¹⁷ Mu tamao, polobadu dage te dwai sə ebo kolesagago sə bidi bidali, tiali goli nosali augwaligo dagebolo Godigo po ola menama, tama dage homu mu eyu te po wali mu pabo gagalali. Te tama tebode dago Godibolo usu da po olama gedu haluasa po wao. ¹⁸ Tama Godigo dage te dwai sə ebo kolesaga dologode bidali te dagala sanama, tama dage te doloba pai kolesaga dologode bidibo we bidi dabe bidibo dao. ¹⁹ Te dagego homu kolesaga bomo menibadi, tama eno te da bidigo homu wali peyu, tama sə ebo bidide po digi po begeleyu, tama eno e po obao: polobadu dagego duga tigi tigidali te meda yai kolesagade sə ebo bidi bidiyu, tama dagego yali dwai dwai sə geninama mu pedalali. Tiali goli megı dagego te duga tigi dabe me homu kolesaga te doloba pai kolesagaba munama sə ebo bidi bidiyu, tama dage te dwai sə me isəwai te wiegi yai tedali kolesaga naga pedalomainogo yao.

²⁰ Magi baso meni. Polobadu dage te dwai səgo sə ebo bidi bidibadi, te soko dage te doloba pai kolesagade sə ebo sə bidi me bidibeo. ²¹ Tialima

te dwai sę ebode dagego magi nai saliwe? Woo, te megi te sęde dage hale ebo dao. Te kolesagago te bidigo noma isibo sę naga pedalubo dao. ²²Tiali goli megi Godigo dage te dwai kolesagade kalabus elaluali te agai dagala sənana, tama dage aga sę ebo bidi munama bidibao. Tama dagego e tiwai wiegi yai nai saibao, God agai dage te wiegi yai tedali te dwai sę me isəwai we bidi ilibao, tama dagego te wiegi yai sesemane sogo bidada pabo te bidibo ula saibao. ²³Magi baso meni. Te dwai sęgo te aga sę ebo bidi augwalibolo te pe mabo dao. Te mabo pe te isibo sę naga dao, augwali te God dali dagalama tama aga dali bidada peyu bidada pogobeo. Tiali goli te da te ula sabo dolo meni yai goli, Godigo dabolo te wiegi yai olo mabo kolesaga eyu, te sesemane sogo bidibo ula mawaibao, te da te dago Genuai Bidi Krais Jisas dali wadolali we bidi dabolo agai te ula olo naga mawaibao.

Megi da te gesi homu kolesagade bidibao

7 ¹Eno ama dedeo, eno e po dage te bomai po bugagia koneani bidibolo obao. Te bidi bidibo ula elaluyu bidibadi, te sogo naga aga te dago elalubo bomai po dologode bida wabo dao. Eno homugo dagego te tiwai ebo kolesaga koneani homu yalio. ²E tiwai dao, te bidigo sai we tama aga bidi bidibadi da, teda te bomai pogo aga te aga bidi dali kęnario. Tiali goli, aga bidi isai digi yai baso da, teda aga bidi dali te kęnani bomai pogo te aga ma kęlubeo. ³Tama te bidi bidibadi tama we gasa bidi dali pobaso da, teda te we sabo kolesaga te wego dolobo nogi waibao, te penani ebo we dao te waibao. Tiali goli, te bidi isai digi yaibaso da, te bomai pogo aga ma kęlubeo. Tama te we aga gasa bidi dali pobaso da, teda agai te we sabo kolesaga me dolobeo, aga te penani we dao wagobeo.

⁴Tama te tiwai me dage dali pedalalio, eno ama dedeo. Dagego tigi te Krais dali kę selama, tama te dali dage isalio, tama te bomai pogo dage me tola sabeo. Tama bidi isai we gasa bidi dali bidigi pabo tiwai, dage gasa bidi dali bidi pelama agai dage sali, aga te Godigo aga te gę pagede ma hodolali bidi. Tama dago te Godigo homu kolesaga wali peyu tama wiegi yai sę emainogo eyu, tama Godigo aga te gę pagede ma hodolali. ⁵Da te poloba meda yai kolesagade bidali sogo, te bomai po elalubaso, tede dwai homu eyu, tama dago tigigo ebo dwai kolesaga hodoliyu tama dena tigigo dago dwai sę eyu bidai dao. Tama te sę dago elaluama, tama dena noma isabo sę naga pedalainogo yai dao, te da God dali bidisiąbo sę naga pedalai dao. ⁶Tiali goli megi da, megi te Godigo da ma dobola somainogo eyu, te da te Mosesgo mani bomai po wali pabo sę, te sę tagalama tama da olo bidibao. Magi baso meni. Da te isai bidi tiwai bidibao, te dago tigi me homu me augwali sigo ebo dwai sęgo da me tonalubo menio. Tama tiyu, dago te Godigo sę ebo dao, te bomai po

dologode bidibo meni. Te meni. Dago te gesi noma kolesaga te Tedali Mobo Bidigo te sę hodolama dago te sę ebo dao.

Dwai sęgo da dolali

⁷Tama tibaso dago magi po waibawe? “Te bomai pogo digi dabolo te dwai sę ilibo page pedalai dao,” ma dago te tiwai po waiba agawe? Mu menio. Te bomai pogo te eno yali sęde te dwai sę ebo po me ola magi menigi sogo da, teda eno me konegi meni dao. E tiwai yali, bomai pogo te po wai, “Nago gasa bidigo nai sabo homu eyu pesa me elamu.” Tama bomai pogo te tiwai po me wasiąwai tigi sogo da, teda eno te gasa bidigo nai pesa ebo kolesaga te dwai kolesaga dao me konegi menio.^{“8-9”}Awe, te bomai po menigi sogo da, teda te dwai sę ebo kolesaga te isai bidi tiwai elalugi dao. E tiwai dao. Polobadu te ena ogwade bidibadi te sogo eno te bomai po konebeo, tama ena bugagia olo bidali, eno homu ena sęge sai bidi meni. Tiali goli nosali Godigo bomai po eno kone selama, tama eno homu tomode elaluali dwai sę ebo kolesagago eno dwai sę yabo homu hodaluama, tama haniani naide pesa ebo sęgo ena homu hodolai. Tebogo eno koneani, eno te bomai po bolama tama dwai sę yalio, te eno koneanio.¹⁰Tama eno me koneani, eno te dwai sę ebaso, ena isali tiwai yalio, ena God dali bidibeo. Hasia sogo Godigo te bomai po sa muyu te enabolo bidibo ula mawaibao po wai. Tiali goli eno te bomai pode bidibo ula me sabeo, agai ena ela muyu naga yai dao.¹¹Magi baso meni, te dwai sę ebo kolesagago te bomai pogo tų gegelama, tama ena ili po ola mani, tama te kolesagade te bomai pogo ena ola mani, te ena dwai sę eboso ena isali tiwai yalio, ena God dali bidibeo.

¹²Tama tibaso dago koneani, te Godigo bomai po aga digi te magi dwai sę me isayı te wiegi yai naga elalubao. Tama te Godigo dabolo tama tiao wali po tigidali me te dwai sę me isąwai wiegi yai elaluali, tama doloba pelama, tama wiegi yai naga dao.¹³Tialima megi dago magi homu yagawe? Ma te wiegi yai bomai po agai ena te Godide dagalaliwe? Mu menio. Te eno dwai sę ilabo kolesagago naga ena te Godide dagalali, tego ena isai bidi tiwai ilalio. Te dwai sę yabo kolesagago te bomai pogo ena te isai bidi tiwai ilalio. Magi baso meni, te dwai sę ebo te hania pedaluyu tama te bomai pogo da ola mani, te dwai sę ebo te dwai dwai kolesaga mu dao.

Dwai sę ebogo dago homu kolesaga kalabus elaluali

¹⁴Dago koneani, te bomai pode te Godigo Tedali Mobo Bidigo te Godigo homu kolesaga dabolo ola mabo dao. Tiali goli ena, eno poloba homu me elaluyu tama te homu ena wali pabo dao. Te dwai sę ebogo

^{“7:7”}Sai 20:17; Bom 5:21

ena kalabus ilama tama eno agade sę iduai dao. ¹⁵Hauwa sogo eno ebo kolesaga page te eno me konesıqma ebao. Tama eno homugo godolo mu elama yainogo ebo kolesaga, te eno ebo meni. Tiali goli eno homugo hagela mu yali kolesaga, te eno ebo dao. ¹⁶Tama eno homugo hagela mu yali kolesaga te eno yali goli, eno koneani, te dwai sę dao, tama te kolesaga ebo eno hagela yalio. Tama tialigo da, eno homu me te bomai po me te deli dao, te eno te po obao, “Awe, te Godigo bomai po te wiegi yai naga dao.” ¹⁷Tama tibaso megı eno koneani, te ena digi eno te dwai sę me ebo meni. Menio. Te ena tomode bidibo dwai sę ilibı homu kolesaga agai naga te sę ebo dao. ¹⁸Eno koneani, ena tomode te wiegi yai nai deli me bidibo menio. Eno tqde bidibo tigide me te homude me, te side te wiegi yai nai me deli bidibo menio. Mu tama, eno wiegi yai kolesaga yabo homu ebo, tiali goli eno te kolesaga yabo usu me ebeo. ¹⁹Awe, te wiegi yai kolesaga eno yainogo homu ebadi goli, te kolesaga eno me ebo meni. Me ma, eno ebo hagela homu yali dwai kolesaga, te kolesaga eno ebo dao. ²⁰Tiali goli eno ebo hagela homu ebo dwai kolesaga eno yaligo da, teda ena digi eno te dwai sę ebo menio. Eno te sę yao homu ebeo. Menio. Te ena tomode bidibo dwai sę ilibı homu kolesaga agai naga te dwai sę ilibı dao.

²¹Tama tibaso, enade te tiwai kolesaga bidibo eno sulama koneba: eno wiegi yai kolesaga yabo homu ebaso da, teda te eno homude elalubo dwai sę ebo kolesagago te homu aiyaba elalubo dao. ²²Mu tama, eno homude eno Godigo bomai po mu godolo ebo dao. ²³Tiali goli eno subao, gasa bomai po te eno tigi tomode elalubao, te gasa bomai pogo eno tigi tonalubo dao. Tama te gasa bomai pogo te eno Godigo bomai po mu godolo ebo homu dali hwıbo dao. Tama te gasa bomai pogo ena te ena tomode bidibo dwai sę ilibı homu kolesaga wali pomainogo ilibı dao. ²⁴Ena da te hobedagia bidibo bidi mu dao. Dego ena te eno tigı yainogo ebo kolesaga dagala sagowe? ²⁵Eno Godibolo usu da po olama gedu haluasa po obao. Te dago Genuai Bidi Jisas Kraisgo nogode agai ena dagala olo muanio. Tama ena e tiwai bidibao. Ena digi ena homugo te ena Godigo bomai po dologode bidiba homu ebo dao. Tiali goli poloba homu kolesagade ena te dwai sę ebo kolesaga dologode bidibo dao.

**Kraisgo te dago yali dwai sę sela şanama,
te Tedali Mobo Bidi dabolo mani**

8 ¹Te da Kraisde tialubaso, God agai da aga gedude te doloba pai we bidi dao te po wabo dao. Tama tibaso, Godigo da Krais Jisas dali wadolali we bidi dali po tı eyu tama sege dabolo magobeo. ²Magi baso meni, ena megı da Krais Jisasde tia selama tama Godigo Tedali Mobo Bidigo tı dalali. Te da te dena homude elalubo dwai sę ilibı kolesaga dologode me bidibadi, tama da te isai bidi tiwai bidiyu tama da Godide

tedali bidai dao. Tama da te tama tiwai me bidibo tagalomainogo eyu, tama Tedali Mobo Bidigo gasa tü dawai, te da olo bugagia bidimainogo agai tama tiai dao. ³E tiwai yai dao. Te dena tigi tomode bidibo dwai sę ilibo kolesaga elalubaso, dago te Godigo bomai po dolo wali peyu tama da doloba pai we bidi pedalisiabo dao. Tiali goli God aga digi da doloba pai we bidi aga gedude pedalalio. Agai aga Ogwa naga tagala palai, te aga tigi te da dwai sę ebo bidi tigi tiwai elaluali. Aga dago dwai sę yali sęge sela səwainogo asai, tama da bidigo dwai sę yali dene te Godigo aga delide naga wei ponai dao. ⁴Agai tama tialigo te da te bomai pogo usu niba kadu walainogo yai. Magi baso meni, megı da te poloba yali dwai homu kolesagade me bilibeo. Menio. Dago te Tedali Mobo Bidigo wiegi yai kolesagade bilibo dao. ⁵Te augwa homude elalubo dwai sę ilibo kolesagade bilibo bidi dabe, augwali te augwaligo homu kolesaga te poloba yali sęde naga homu dąu weyu tebo dao. Tiali goli te Tedali Mobo Bidigo ebo kolesagade bilibo bidi dabe augwali da, te augwaligo homu kolesaga te Tedali Mobo Bidigo naiba homu dąu wabo dao. ⁶Te augwa homude elalubo dwai sę ilibo kolesagaba naga homu dąu wabo we bidi, augwali da dwai sęgo dolama te bidada peyu bidada pogobeo. Tiali goli bidigo homugo te Mobo Bidigo wiegi yai kolesagaba homu dąu weyu da, te bidi te bidibo ula bidiyu, tama homu nagame elama bidada peyu, bidada paibao. ⁷Te bidigo homugo te dwai sę ilibo kolesaga wali pobaso da, te tebo bidigo God dali boi bidi ebo bidigo tibo dao. Magi baso meni, aga te Godigo bomai po dologode me bidibo menio. Mu tama, agai te bomai po wali pabo usu egobeo. ⁸Te dwai sę ilibo homu kolesagade bilibo bidi dabe, augwali te bidi augwaligo te Godigo godolo yabo kolesaga me egobeo, augwali tede usu egobeo.

⁹Tiali goli dage da, dage te dwai sę ilibo homu kolesagade me bidibeo. Menio. Te Godigo Mobo Bidi dagede bidibaso, dage te Mobo Bidigo kolesagade bidibo dao. Tiali goli, te bidi me delide te Kraisgo Mobo Bidi meni baso da, te bidi aga te Kraisgo bidi menio. ¹⁰Te dagego dwai sę ebaso, te dagego tigi te isabo sogo elalubao. Tiali goli, te Krais dage tomode bidiyu da, teda Godigo dage te doloba pai we bidi nogi nogi ebaso, dagego homu noma bidi te bidibo ula elaluabao. ¹¹Godigo Jisas te gę pagede ma hodolai. Tama te sę yali Godigo Mobo Bidi dage tomode bidaligo da, teda te Krais te gę pagede ma hodolali bidi agai te dagego osogo bidibo isabo tigiba te bidibo ula me mayu tama dage me gę pagede ma hodolaibao. Te agai tama tiwai sę emainogo te aga Mobo Bidi dage tomode bidibo dao.

Tedali Mobo Bidigo da Godigo wai dabe pedalumainu nigilali

¹²Eno ama dedeo, Godigo Mobo Bidigo dago tigi ma hodolaibao. Tama tibaso, agade dago negeli elalubao, te agai kolesagade da wali pao. Tiali

goli dago te dena tigigo homu kolesagade me negeli elalubeo, te dago poloba bilali homu kolesagade wali pelamuo.¹³ Te dagego tigigo dwai sę ilibo homu kolesagade me bidibaso da, teda dage isabuo. Tiali goli, te Tedali Mobo Bidigo bomogo te dagego tigide dwai kolesaga dabe ebo te ela mubaso da, teda dage bidata peyu, bidata paibao.¹⁴ Te Godigo Mobo Bidi wali bilibo we bidi augwali tigidali te Godigo wai dabe bidibo dao.¹⁵ Magi baso meni, te Godigo dagebolo mani Mobo Bidi da, te dage olo sę ebo bidi bidiyu God ma wi ilibo Mobo Bidi meni. Te menio. Te mani Mobo Bidigo dage Godigo wai dabe ilibo Mobo Bidi dao. Te Tedali Mobo Bidigo dago i olama tama Godibolo “Aya, Aya” wabo dao.¹⁶ Te Mobo Bidigo digi agai dago mobo noma bidi tau siyu tama dago homu tomode hania hanilama, da te Godigo wai puluba bidibo po wabo dao.¹⁷ Tama da te Godigo wai dabe bidaligo da, teda nosali dago te Ayago nai me saibao. Awe, te dago Godigo nai saibao, te nai me dago Krais dali saibao. Te megı dago Godigo sę eyu tama Krais dali dago te dene tolobaso da, teda dago aga dali te genuai nogi me te ula yai bomo me, te me dago aga dali nosali saibao.

Nosali da bugagia bidabo digi mu te dagalude saibao

¹⁸ Te da e tqde bidibadi te da God wali pabo we bidi dali dwai homu ebo bagego dabolo dene dali sęge dali mabo dao. Tiali goli eno te Godigo dabolo nosali maiabo ula yai bomo dali, haniani wiegi yai nai dali, te naide eno homugo kone palobo si, te eno e po wabo dao, “E, te eno megı tolobo sęge te genuai menio, te dwasianunu naga dao, te olo nai tiwai dao,” eno te homu ebo dao.¹⁹ Te nosali Godigo da ugwaba selama, tama da agai wai dabe te hania hanilaibao. Tama te sę yabo sogo asobo te Godigo nigali tigidali naigo tonaluyu bidibo dao, te bidi aga homu memenege eyu, tama aga wiegi yai nai asobo sogo tonalubo tiwai gilama.²⁰ Megı e sogo tigidali nai dabe dwai bidiyu tama dolobao. Te augwa homugo digi me ebeo. Menio. Godigo digi augwali te tiwai kalabus elama bidibo. Te augwaligo te Godigo augwalibolo nosali yabo sę tonaluyu bidibo dao.²¹ Tama megı augwali te dolama bidibo kalabuside te tigidali nai Godigo dagala şanama, tama te tigidali bugagia mu te da Godigo wai dabe dali bidaibao. Te tigidali nigali nai te sę yabo sogo asobo tonaluyu bidibao.²² Dago koneani, tigidali nai Godigo nigali, te tigidali dene eyu te hę wabo tiwai ebo dao, te wego wai ame nainogo dene ebo tiwai ebao. Tama Godigo nigali nai tigidali te dwai hę weyu bidali, te megı e sogoba usu nagasobo dao.²³ Tama te nai dabe augwali naga me tebeo. Menio. Dago te Tedali Mobo Bidi salio, te tiwai Godigo hasia mu dabolo te olo mu manio, te agai dabolo nosali gasa nai me mawaibao. Tama da me,

^v 8:20 Gag 3:17-19

dago homu tomode dene elama hę weyu, tama Godigo te da aga wai dabe pedalabo kolesaga te silimainogo ebo sogo tonalubao, te agai dago tigi ma dobola selama olo bidabo sogo dao. ²⁴Magi baso meni, Godigo da ma selama, tama megi dago agade konealubo homu dą̄ olama tama agai da dali te wiegi yai sę̄ mu nosali usu numainogo dago megi tonalubao dao. Tiali goli dago tonaluali nai te nosali dago subo si da, te dago aga ma tonalugobeo. Bidigo te nai me deli suali da, magi baso te agai ma tonalugowe? Te egobeo. ²⁵Tiali goli megi te nai dago sisabadi da, dago homu dą̄ mu olama te nai dago mu saiba homu yali da, teda dago homu bomo te naiba elama tama bugagia tonaludubo dao.

²⁶Te bugagia tonalubo kolesagago da tau sabo dao. Te tebo kolesagade me te Godigo Tedali Mobo Bidigo te da bomo meni yai bidi me tau sabo dao. E tiwai dao, dago te God dali gedu haluasa po wabo tų̄ te kuna gisiga konebo menio. Tiali goli Godigo Mobo Bidigo digi da tau siyu, Godibolo gedu haluasa po wabo dao. Agai homude bomo eyu tama te hę̄ wabo tiwai eyu, te pusisabō pogo agai Godibolo te po wabo dao. ²⁷Tama te bidigo homu tomode elalubo nai subo bidi God, agai te Tedali Mobo Bidigo ebo homu konebo dao. Magi baso meni, te Tedali Mobo Bidigo te Godigo homu kolesaga wali peyu tama da Godigo we bidi tau siyu te gedu haluasa po hanalubo dao.

²⁸Tama dago koneani, te augwaligo aga dali dwagi yai homu eyu godolo mu ebo we bidi, te we bidibolo pedalabo sę̄ tigidali te Godigo digi dodolama, tama te sę̄ tigidali te we bidi dabeba pedaluyu augwali tau sabo dao. Te we bidi augwali te Godigo ma saiba po wali we bidi augwali tama agai augwali sa munama i wai dao. ²⁹Magi baso meni, te Godigo augwali polo koneani bidi dabe, agai augwali me hagea siyu tedali muani, te aga Ogwa tiwai pedalomainogo yai, tama ama name hauwa bidimai hagede yali, tama Krais te augwaligo ama gomunai bidi bidaibao. ³⁰Tama God agai te polobadu hagea sali we bidi augwali, te agai augwali me i walio. Tama agai te i wali we bidi augwalibolo te agai augwaligo yali dwai sę̄ segē sela sə̄nana, tama augwali me te doloba pai bidi nogi poali. Te agai doloba pai nogi wali we bidi augwalibolo agai te aga digi elalubo ula yai bomo dali genuai nogi dali augwalibolo mani.

Godigo wiegi yai homu eyu godolo mu ebogo da munu me tagalogobeo

³¹Te Godigo te da tau sabo sę̄ hauwa po odobaso, tama dago magi po Godigo te ebo sę̄ dabede waibawe? E tama naga dao, te Godigo da tau sobaso, teda dego da dali boi bidi elama tama da aiyaba elalugowe? Woo, bidi mu menio. ³²Agai aga Ogwa digi te dabolo mawainogo homu si me ebeo. Menio. Agai aga tagala palali te agai da tigidali tau sagasomainogo olo tagala palalio. Agai aga Ogwa digi da tau somainogo mobaso, teda mu tama dao, agai homugó te gasa nai me tigidali te olo mu dabolo te

aga dali mawaibao. ³³God aga digi da doloba pai we bidi nogi pobaso, te da God aga digi hagea sali we bidi bidiyu, te mena boi bidigo da kisiliyu po tū ebo usu egowe? Woo, bidi mu menio. ³⁴Te dego da dali te dwai sē yali bidi te dwai dene sabo po wagawé? Menio. Magi baso meni. Krais Jisas aga digi isāma, tama ma hodalubadi yai. Tama aga digi te Godigo dolo nogode genuai bidi bidiyu, tama God hanalu wabo po wabogo me da tau sabo dao. ³⁵Te Kraisgo da dali dwagi yai homu eyu godolo mu ebo kolesagade te da mena nai mugo dagala sāyabo nai menio. Ma te sēgē daba pedalobo si da, ma dago dene tolobaso, ma bidigo da dolobo si da, ma augwaligo da nasi ilabo sē eboso, ma da gudubo ugwa meni baso, ma augwaligo da te dwai bulude bidimainogo ilibo sē eboso, ma augwaligo da hwāgo ela mubo si da, tama te tobage sē ebo dabego da te Kraisgo da dwagi yai homu eyu godolo mu ebo sēde dagala sagobeo. ³⁶Mu tama, dago koneani, te tobage sē dabe te daba pedalai bao, te Devitgo Godibolo polobadu e tiwai po wali gilama te tiwai sē yali,^w

“Da te nago we bidi bidibaso, tama tigidali sogo augwaligo da ela muabo homu eyu, da pobeasa bilbo dao. Augwaligo da sulama, ‘Te ela muabo kibu sipsip wai tiwai naga yai dao,’ augwaligo dade te homu ebo dao.”

³⁷Tiali goli, te augwaligo da dali te tobage dwai sē yali goli, Godigo da dali dwagi yai homu eyu godolo mu eboso, tama agai da tau selama, tama dago te tobage sē tigidali aiyaba mu elaluaibao. ³⁸Awe, eno tede konealubo homu mu dāq wali, te magi nai me deligo da te Godigo godolo ebo sēde munu me dagala sagobeo. Ma te augwaligo da ela mubo, ma da bidibadi dago sēgē tolobo, ma ensel mobo bidi dabe, ma te dwai haubo mobo bidi dabe, ma te tqđe bidibo toboli bidi dabe, ma megı elalubo nai, ma te nosali pedalabo nai, ³⁹ma te dagalude bomo elalubo dwai bage, ma te moni sia dabo bulude bomo elalubo bage, ma te meba gasade elalua pabo Godigo nigali nai, te tigidali nai dabego te Godigo dade dwagi yai homu eyu godolo mu ebo kolesaga te dagala sāwainogo ebo usu me egobeo. Te dago Genuai Bidi Krais Jisasgo yali sego te Godigo aga dade ebo godolo ebo kolesaga dabolo ola mawai dao.

Te Godigo te Israel dabede yali kolesagade Polgo po wali (Dq̄l 9-11)

Polgo Israel dabe augwalide homu sēgē mu yali po wai

9 ¹Ena Kraisde wadolai bidi bidibaso, tama eno megı wabo po te mu po naga waibao, tibo po wagobeo. Tama Godigo Tedali Mobo Bidigo

^w 8:36 Tib 44:22

te eno yabo kolesaga dagalobo homu tonaluyu, tama agai eno po me tau selama tama eno mu po naga obao. ²E tiwai dao, eno homu sege mu elama tama sesemane sogo ena dwai dene ebo dao. Magi baso meni, te eno hani Juda bage augwali meba hauwago Krais tudiba muanio. ³Eno homugo te Godigo eno ama dede augwali ma dobola somainogo ebo homu godolo ebao, augwali ena dali deli kaneme elalubao. Tama te tü elalugi sogo da, augwali tobade te eno Kraisba gedu haluasa po olama agai ena i ola mayu tama sela şanama tama ena hagamainogo elama tama augwali tau somainogo hasegeligi da. Eno te homu bomonama ebo dao. ⁴Augwali da, te Abraham aga ogwago ogwa Jekop aga hani dao, tama Godigo augwali aga wai dabe nogi poali. Tama tiyu aga agai ula yai bomo augwali dali bidagasidu geai dao, te bidi meni yai kemi to bulude. Aga digi agai dą̄ wali po augwalibolo madu geai. Godigo agai bomai po me augwalibolo mani. Tama agai te augwaligo agabolo lotu po wabo kolesaga te agai ola mani. Tama agai aga sa muani bidi Krais nosali augwaligo hanidu pedalaibao po augwali dali dą̄ walali.^x ⁵Augwaligo wą̄ mu Abraham dali, Aisak dali, te Jekop dali, augwali polobadu bidiyu te genuai nogi sai bidi dabe hasia bidali, tama augwali te augwa bulai wai dabe naga bidai. Tama Krais aga e tɔba dulama tama da bidi tiwai tigi sali sogo, agai te Juda hanide naga te bidi mu pedalali. Aga te tigidali nai toboli bidi bidibao. Aga te God dao, te aga nogi dago sesemane bida pabo sogo ugwbaba sinao. Mu dao.

⁶Te eno hani Juda bage augwali hauwago Krais tudiba muai goli, te Godigo polobadu dą̄ wali po te olo hagabo tiwai me egobeo. Menio. E tiwai dao, te Jekop aga nogi me Israel, te bidi aga hanide pedalali bidi augwali tigidali te Godigo hagea sali Israel dabe mu me ebo meni. ⁷Tama dago e tiwai po me olamu, “Augwali te Abrahamgo kanemedi pedalama, tama tigidali augwali te aga wai dabe mu bidibao,” te wagio. Menio. Polobadu Godigo e tiwai po Abrahambolo wai dao, “Te nago hani bidi nogi nosali nedada pabo si, te Aisakgo hani augwali naga nedada paibao.”^y ⁸Te po page e dao, te Godigo gedude te tigigo ebo kolesagade naga pedalali wai dabe augwali te Godigo wai dabe me egobeo. Menio. Te Godigo Abraham dali dą̄ wali pode ame nani wai dabe, te augwali Abrahamgo hanide nogi elaluai dao. ⁹Tama te kolesagade homu paliyu, Godigo te dą̄ wali po e tiwai hasia polobadu te Abrahambolo wai, “Te eno te bodolu mani sogo ena ma asaibao, tama nago we Sarago te wai ogwa ame naibao,” te po wai.^z

¹⁰Tama Godigo te naga me ebeo. Te Sarago ogwa Aisak ame nenama, tama genuai elama, tama agai aga we Rebeka sali. Tama Rebekago tabi elama tama te wai si deli sogo elaluali. Tama te wai sigo aya deli naga, te

^x 9:4 Sai 4:22 ^y 9:7 Gag 21:12 ^z 9:9 Gag 18:10

Aisak, da Juda dabego wąi monu dao. ¹¹⁻¹²Tiali goli, Godigo homude bidi sa muabo kolesaga yalio. Agai te bidigo sę ebode homu me ebeo. Aga digi aga homu naga wali peyu, te bidi i olama tama aga sa muaibao. Tama te wai si Jekop dali, Iso dali, augwali si ame nesiąbadi, tama augwaligo te wiegi yai kolesaga ma te dwai kolesaga me isąbadi, Godigo Rebekabolo te aga tamadi ame nabo wai side te po wai, “Te nago ogwa si deli sogo ame nenama, tama nosali te gomunai bidi te i badu bidi dologode bidaibao,” te po wai.^a ¹³Tama te tiwai naga pedalali, te Godigo po pusali bidi nogi Malakai agai nosali asęani Godigo wali po tiwai gilama yalio, “Eno Jekopde dwagi yai homu eyu godolo mu yali, tiali goli eno Iso hagela homu mu yali,” Godigo te po wai.^b

¹⁴Tama tibaso, dago te sęde magi po waibawe? “Godigo aga homu wali peyu, te bidi deli naga sa mubaso, agai te dolo me isąwai kolesaga yalio,” te dago te tiwai po omainogo yagawe? Mu menio. ¹⁵Magi baso meni. Godigo e tiwai po Mosesbolo polobadu wai, “Te ena digi eno bidi me delibolo te olo tau siyu mabo wiegi yai kolesaga yabo homu ebaso da, teda eno homu naga wali peyu, eno olo mabo wiegi yai kolesaga agabolo yaibao. Te eno bidi me deli homu dene yainogo da, teda eno homu naga wali peyu, aga eno homu dene ebo dao,” Godigo te po wai.^c ¹⁶Tama te po obaso, dago koneani, te Godigo bidi sa mubo page, te bidigo homugo me te aga sę denego me ebaso Godigo aga sa mugobeo. Menio. Te Godigo te bidide homu dene eyu, olo tau siyu mabo wiegi yai kolesagago naga te bidi sa mubo dao. ¹⁷Tama Mosesgo te bukude asęani Godigo e tiwai po te Isip tq tuni bidibolo wali, “Eno bomo tigidali bidibolo ola mawaio wali, te augwaligo eno nogi te tigidali tqba sela pelama pusugi pomainogo obao. Tede naga eno nage hodolama, tama tuni bidi nigelama, tama eno te nage dali hwı̄bo dao,” Godigo te wali po asęani.^d ¹⁸Tama tibaso dago koneani, te Godigo aga homu naga wali peyu te olo tau siyu mabo wiegi yai kolesaga te bidi me delibolo yainogo da, teda agai te olo mabo wiegi yai kolesaga te agabolo yaibao. Me ma, te bidi me deli agai te po odosiąbo bidi ilainogo homu eyu da, teda agai te bidi te po odosiąbo bidi ilibo dao.

Godigo sębę dali te Godigo wiegi yai kolesaga ola mabo po dali wai

¹⁹Tiali goli, bidi mego enabolo e tiwai po wagi da homu yali da, “Te Godigo aga homu naga wali peyu, tama bidi me deli sa munama tama gasa bidi meni. Tama tiyu da, teda magi baso agai te bidigo dwai kolesaga ebo po me odubadi geaibawe? Dego te Godigo ebo homu kolesaga gisilainogo usu egowe? Bidi menio.” ²⁰Bidi me deligo te tiwai po hanalu weyu da, teda eno te po wei ponoyu te po waibao, “Abagi, nage de da weyu, tama nago te po Godibolo ela palamu. Ma te mama tqo nigali senego te aga nigali bidigo geda muani

^a 9:11-12 Gag 25:23 ^b 9:13 Mal 1:2-3 ^c 9:15 Sai 33:19 ^d 9:17 Sai 9:16

homu eyu, tama te bidibolo te po wai, ‘Magi baso nago ena te tiwai nigali’ po waibawe? Menio.^e ²¹Te sene nigibo bidigo te agai mama tq pedai me deli selama, tama te tqo te sene si nigali, me deli te wiegi yai se yabo sene te wiegi yai nigali, tama me deli te olo se yabo dwai sene nigai. Aga homu naga wali peyu, tama te tiwai ebaso da, te usu da, po meni, te aga se dao.”

²²Te Godigo me te tiwai yai. Agai te aga sebe homu ebo te bidi dabebolo hania hanilabo homu yali, te tigidali bidigo agai bomo me konemainogo yai. Tama te dwai se yali dene sabo we bidi augwali dolabo se te sisi yai elalubo, tiali goli agai augwali gogolama polo elebeo, tama bobage sogo tonaluali. ²³Magi baso meni, agai homugo te agai homu dene eyu tau sabo sa muani we bidi augwalibolo mabo wiegi wiegi yai ula yai bomo, te bomo augwali ola momainogo agai bobage sogo tonaluali. Augwali agai polobadu hagea sai dao, tama agai bomo yai ula augwaligo saibao. ²⁴Te da dao. Agai da i wali, te da Juda hani naga i me wabe, menio, te gasa hani dabe dali me i walio. ²⁵Te Godigo aga homu naga wali peyu, te we bidi meba naga hagea sabo kolesagade te polobadu Godigo po pusali bidi Hoseago asęani pode Godigo wali po me te e tiwai po asęani,

“Te eno hani isawai we bidi hani, te augwali eno hani nogi poaibao. Tama te eno augwalide dwagi yai homu eyu godolo isawai hani, te hani eno ‘Te eno godolo mu ebo hani’ nogi poaibao.^f

²⁶‘Dage eno hani meni,’ tama eno te po wali madi, te bulude naga te eno augwali nogi olama, ‘Te bidabo ula elalubo Godigo wai da’ po waibao,”^g

Godigo te po olama, tama Hoseago asęani. ²⁷Tama te gasa polobadu Godigo po pusali bidi Aisaiago te Israel hanide po olama tama te tiwai i wali, “Tama te Israel dabe augwaligo hani nedebonamba te aq sanede elalubo masigi kemi tiwai pedalubaso da, tagalao, teda Godigo augwali meba naga dia selama, tama dwasianu hani naga ma dobola saibao. ²⁸Magi baso meni. Genuai Bidigo po tu silibo si tama te po polo togwa sənamama tama te tqde we bidi augwalibolo te dene wei ponaibao,” Aisaiago te po wai.^h ²⁹Tama polobadu Aisaiago te po olama po wai tiwai. Agai te po wai, “Te tigidali bomo elalubo Genuai Bidi agai te dago dwasianu hani bidimainogo egi menigi sogo da, teda da mu doloyu, te bulu si nogi Sodom dalì Gomora dalì si tiwai pedalama, tama da mu dolai bidigi dao.” Aisaiago te po asęani.ⁱ

Te Israel dabe augwaligo Kraisde konealubo po dąu mu olama, te doloba pai we bidi pedelabo homu elama konealubo po dąu wabe

³⁰Tama tibaso dago koneani, te gasa hani dabe augwaligo te doloba pai bidi nogi sabo se dene me ebe, tiali goli augwaligo te doloba pai bidi nogi

^e 9:20 Ais 29:16; 45:9 ^f 9:25 Hos 2:23 ^g 9:26 Hos 1:10 ^h 9:28 Ais 10:22-23

ⁱ 9:29 Ais 1:9

sario. Te e doloba pai kolesaga te augwaligo konealubo po dą̄ olama sai.
 31 Me ma, te Israel dabe augwali da, te Godigo augwalibolo doloba pai
 bidi nogi pomainogo eyu, tama augwali te bomai po bugagia wali pabo
 tū gegali goli, te tū augwaligo subeo, te augwali te bomai pogo usu niba
 kadu wabeo. 32 Augwali te Godigo gedude te doloba pai we bidi magi
 baso pedalebewe? Augwaligo te Kraisgo yali sęde te konealubo po dą̄
 wasiąyu, tama augwaligo te Godigo te doloba pai bidi nogi poaibao homu
 eyu yali. Te po digi po begelama te tiwai yali, te sągade dolobo masigigo
 te augwaligo sągade dolama tama augwali tulaluai dao. 33 Te tiwai po me
 deli te Godigo po bukude polobadu asęani, te po e tama wai,

“Oda. Te Saion hanude eno te bidi sągą Dani tuą̄
 palama tulaluabo masigi me deli mubao. Eno te
 bidi me deli tede mubao, tama we bidi augwaligo
 aga dali dwai homu yaibao, te augwali Dani tuą̄
 palama tulaluabo masigi tiwai dao. Tama tiali goli
 we bidigo agaba konealubo po dą̄ wabo bage, agai
 augwali tau mu sabo usu mu yaibao, te augwali
 tulaluama hale me sogobeo,”

te po asęani.^j

**Te Israel dabe augwaligo te Godigo bidi doloba
 pai bidi ilibo kolesaga wali pabe**

10 ¹Eno ama dede dabeo, eno homu dene eyu tama te Godigo te
 eno hani Israel bage augwali ma dobola somainogo ebo homu
 godolo mu elama, tama sesemane sogo eno Godibolo gedu haluasa
 po tede bomonama wabo dao. ²Eno augwali bugagia koneama tama
 eno hanilama augwalide mu po obao, augwaligo te Godigo kolesaga
 wali pabo sę bomo elama mu ebo dao. Tiali goli augwaligo me gisiga
 konesiąma tama tibo dao. ³Te Godigo da we bidi doloba pai nogi pobo
 te kolesagade augwaligo konesiąbaso, tama augwa digi augwa kolesaga
 doloba pai pedalumainogo ebo sę yai. Tama tibaso, augwali te God
 dologode me bidisiąyu, tama agai augwali nogi doloba pai nogi omainogo
 me ebeo. ⁴Dago koneani, te bomai po wali peyu tama Godigo bidi doloba
 pai bidi nogi pobo tū, te tū te Krais asali sogo silali. Megi te gesi tū
 elalubao. Te Kraisde konealubo po dą̄ wabo we bidi, te Godigo augwali
 doloba pai we bidi nogi poaibao.

⁵Te bomai po wali peyu tama Godigo bidi doloba pai bidi nogi pobo
 tūde te Mosesgo polobadu te po asęani, “Bidi te kolesaga tigidali eyu da,
 teda aga te bidata pabo ula saibao,” te po asęani.^k ⁶Tiali goli te bidigo
 Godide konealubo po dą̄ obaso tama Godigo aga doloba pai bidi nogi

^j 9:33 Ais 28:16 ^k 10:5 Prs 18:5

wabo kolesaga, te kolesagade augwaligo polobadu tama aşəani, “Nago naga homude te po olamuo, ‘Te agai dabolo Godigo po pusumainogo, te Krais edaba sela dulemainogo eyu, de te dagaluba pogowe,’ te po olamuo,” te po aşəani. ⁷Po me aşəani, “Tama nago te po me olamuo, ‘De te isai bidi dabego buluba dulaibawe,’ ” te po aşəani. Te Krais tedu selasa asomainao homu eyu te po olamuo. ⁸Tiali goli te aşəani pogo magi po wabowe? Agai e po wabo dao, “Te Godigo po nage pəde mu elalubao. Te nago pedauwalide me te nago homude me te po elalubao,” te po bukude polobadu aşəani. Te dago hanilama te we bidibolo pusubo po te Kraisde konealubo po dao.¹ ⁹Tama nago po hanilama pusuyu Jisas aga te Genuai Bidi da po olama, tama nago naga homude te Godigo aga te gụ pagede ma hodolali səde konealubo po dąu weyu da, teda Godigo nage ma dobola saibao. ¹⁰Magi baso meni, te dago homugo te konealubo po dąu obaso, tama Godigo da doloba pai we bidi nogi poaibao. Tama dago pedauwalidu te dena konealubo po we bidi gesabide pusubaso, tama te Godigo da ma saibao. ¹¹Tama Godigo po bukude te səde te tama po wai dao, “Te bidigo konealubo po agaba dąu obaso da, teda aga hale me sogobeo.”^m ¹²Tama te pode te Juda dabe me te gasa hani dabe dali augwali te deli tigi poai tobage naga yali. Te da tigidaligo Genuai Bidi deli naga elalubao, tama agai te olo mu tau siyu mabo wiegi yai kolesaga te genuai mu te agaba i wabo we bidi tigidaliba mabo dao. ¹³Tama tiyu, te Godigo po bukude wali po tiwai dao, te po e dao, “Tigidali bidigo Genuai Bidi nogi ilama tama agaba i wali da, teda agai augwali ma saibao,” te po aşəai dao.ⁿ

¹⁴Tiali goli bidi me deligo te Juda dabede enabolo te po waibao, “Te augwaligo konealubo po Kraisba hasia dąu me wasiąbaso da, teda augwaligo agaba gedu haluasa po olama i wagobeo. Tama augwaligo agade po me odisayu da, teda augwaligo konealubo po agaba dąu wagobeo. Tama te bidi me deligo po te augwalibolo me pusisławani da, magi ilama augwaligo agade po odaibawę?” ¹⁵Tama Godigo te po pusabo bidi augwali me tagala palisiawanı da, magi ilama augwaligo te po pusigı pogowe?” Bidi mego enabolo te tobage po obaso da, teda eno te po wei ponoyu, e po waibao, “Woo, te Juda dabe augwaligo Kraisde te po odali dao, te Godigo po bukude elalubo po me deli tiwai, te po e dao, ‘Te wiegi yai gesi po sesebo bidi dabe augwali asobo te homu dwagi yai ilibo sę mu dao,’ te po aşəani,” eno te po waibao.^o

¹⁶Tiali goli, te Juda dabe tigidaligo te wiegi yai gesi po selama wali me pabeo. Te polobadu bidali bidi nogi Aisaia, aga Godigo po pusali profet bidi bidali. Tama te aga dali bidali bagego yali kolesaga te megı bidibо bidi dabego ebo kolesaga tiwai yai dao. Tama tede dwai homu eyu, te

¹ **10:8** Bom 30:12-14 ^m **10:11** Ais 28:16 ⁿ **10:13** Jol 2:32 ^o **10:15** Ais 52:7

Aisaiago te po asęani, “Genuai Bidi, dago te nago po augwalibolo pusali. Tiali goli, augwaligo te po odaliwe ma meniwe, te eno konebeo,” te po asęani.^p ¹⁷Tialima dago koneani, we bidigo te Godigo po odobaso tama tebogo te konealubo po dą̄ wabo homu hodolobo dao. Tama bidi mego Kraisde po pusubaso, augwaligo Godigo po odobo dao.

¹⁸Tiali goli te Juda dabede, te mu dawe, te augwaligo Kraisde te po odaliwe ma meniwe? Magia. Augwaligo odalio. Te Godigo po bukude elalubo po me deli tiwai dao, te po e dao,

“Te augwaligo dogoni te tigidali tqba pelama sabolali.

Tama augwaligo po pelama, te tigidali bulu mu
usu egi pai.”^q

¹⁹Tiali goli eno po ma obao, te Israel dabe augwaligo te po koneaniwe ma meniwe? Awe, augwaligo koneani. Hasia Mosesgo te sęde te Godigo wali po polobadu asęani,

“Te eno olo we bidi meba saibao, augwali te deli
hani mu meni, tama dagego tebode dwai homu
elama tama eno augwalibolo wiegi yai kolesaga
ebaso, tama dage te sulama pesa yaibao.

Te eno te kolesaga konesiąwai bidi hani augwali
me deli sobaso, tama dagego augwali dali sębę
yaibao.”^r

²⁰Tama te Godigo po polobadu pusali bidi Aisaiago te po hanilama pusubo wi me ebeo. Agai Godigo te gasa hani we bidide wali po e tiwai asęani,

“Te ena gegebo sę me isawani bidi dabego, te
augwaligo ena suali.

Te bidi dabe meba augwaligo te bidi mebabolo te
enade po hanalusiąbadi, tiali goli ena augwaliba
hanilama pedalobo dao.”^s

²¹Tiali goli te Israel hani we bidide te Aisaiago Godigo e wali po asęani, “Te bobage sogo mu eno augwali i wabo sę ebadi, te hani bidi augwaligo te po selasąnama tama dwai po wei ponai dao.”^t

Godigo te olo tau mabo wiegi yai kolesaga te Israel hani badu yali

11 ¹Te bidi Aisaiago te tobage po asęai baso, eno e po hanalu obao, te Godigo aga hani we bidi aga digi sela sayabo homu me yaliwe? Mu menio. Ena me ena te Israel bidi dao. Te bidi Abraham te eno wąj mu dao. Ena te Benjamingo hani dao. ²Te Godigo hani augwali te agai polobadu koneyu hagea sai, agai te augwali me selasąwai menio.

^p 10:16 Ais 53:1 ^q 10:18 Tib 19:4 ^r 10:19 Bom 32:21 ^s 10:20 Ais 65:1

^t 10:21 Ais 65:2

Dagego te Godigo po pusali profet bidi Elaijago po te Godigo po bukude elalubo te dagego koneani. Elaijago gedu haluasa po olama, tama te Israel dabe augwali te Godigo gesabide po tü ela mawai. Agai te wali po e dao, ³“Genuai Bidi, augwaligo te nago po pusubo bidi profet dabe augwali ela muyu yali. Tama augwaligo te nagebolo mabo nai ulubo alta sai aluali. Tama ena deli naga ena bidibao. Tama augwaligo ena gegebo sé eyu, tama ena ela muainogo ebo dao,” Elaijago te po wai.⁴ Tiali goli Godigo agabolo mena po wei ponaniwe? Agai te po wai, “Eno digi ena bidi dabe te bidi sese hauwa 7,000 bidi sali, tama augwaligo te tibo god Bal dologoba pelama teba lotu me wasiąwai dao,” Godigo te po wai.⁵ Te tama megı e sogo me te hani bugai meba elalubao, Godigo te aga olo tau mabo wiegi yai kolesagago te augwali hagea siyu ma sai dao. ⁶Agai te olo tau siyu mabo wiegi yai kolesaga eboso tama augwali sali. Tama agai te augwaligo yali sède homugo te augwali me sabeo. Tama augwaligo te sé ebode te Godigo augwali siyu da, teda te olo tau siyu mabo wiegi yai kolesaga ebo te olo munu me ma egi menigi dao.

⁷Tama tibaso dago te Israel dabede magi po waibawe? Te Israel dabe augwaligo te Godigo augwali doloba pai we bidi nogi poabo tü suainogo te sé dene yali goli, te tü augwaligo me susiąwai. Te Godigo meba we bidi naga dia selama, tama augwaligo te tü suali. Tama gasa bage, te augwaligo Godigo po odobo hagela eyu, tama augwa olo dąu wali. ⁸Te Godigo po bukude wali po tiwai gilama yali, te po wai,

“Godigo te augwaligo homu kolesaga te godege
pibo tiwai ilali.

Agai te augwaligo gedu te susiąbo tiwai
ilama, tama ologo te po me odosiąyu yalio.^w

Tama augwali te tiwai bidali, tama megı e sogoba
usu nagasai dao.”

⁹Tama Devitgo me te boi bidi dabede Godibolo te tiwai po olama wai,

“Te eno homugo te nago tilama, tama augwaligo
wei ebo naigo te augwali te konesiąwai bidi tiwai
ilao, te aga te subigila peyu te no aselama bidibo
bidi te konegobeo. Te bidi tiwai nago augwali
tiwai ilao. Tama augwali tulolumainao, augwali
wei ponao.

¹⁰Te eno homugo nago augwali gedu hulia
somainu elama, tama augwaligo te hulia sai
pedalumainogo elama, tama augwaligo gedu
pedama suainogo ebo usu me egobeo.
Tama nago augwalibolo sęgę mao, tama augwaligo

^u 11:3 1 Kin 19:10, 14 ^v 11:4 1 Kin 19:18 ^w 11:8 Bom 29:4; Ais 29:10

tudi sugunama, tama augwali te tiwai sesemane
 sogo bidimainogo yao,”^x
 Devitgo te po polobadu wai.

Godigo te gasa hani augwali ma sali

¹¹ Te eno te po hanalu obao, te Juda dabe augwaligo te Kraisde konealubo po däq wasiayu tama tulaluama, tama augwali tede mu dolaliwe? Mu menio. Augwaligo te dwai sę eyu tama te tų geda mubaso, tama tede te Godigo te gasa hani dabe augwali ma sai. Godigo homugo te wiegi yai kolesaga agai te gasa hani dali ebo te Israel dabe augwaligo suyu tama augwali pesa emainogo tiai dao. ¹² Augwaligo te dwai sę ebaso, tama tede Godigo te tigidali tőde bidibo we bidi tau mu sidubadi geaibao. Augwaligo te Godigo kolesagade tulalubaso, tama tede te Godigo te Juda əq isławai gasa we bidi hani augwalibolo wiegi yai kolesaga mu yai. Tama tibaso, tigidali Israel dabe Godiba ma geasa asobaso da, teda tigidali hani wiegi yai mu bidaibao, me deli dwai bidigobeo.

¹³ Tiali goli megi eno po te dage gasa we bidi hani dabe dagebolo mawainogo obao. Godigo ena tagala palali, te eno dage Juda hani isławai gasa we bidi dagede sę emainogo yai. Tama tibaso eno homu pemene wiegi yai te sęde elama, tama te sę bidigo gedude ugwaba siyu tama eno te sę ebo dao. ¹⁴ Magi baso meni, te sęde eno homugo te eno hani Juda bage augwaligo te Godigo dage dali yali wiegi yai kolesaga sulama pesa eyu, tama eno te augwali tomode meba te eno ma sainogo ebo dao. ¹⁵ Edoa. Godigo te Juda dabe augwali sela şanama, tama tede agai te tigidali tőde bidibo bidi selama, tama augwaligo deli homu aga dali pedalabo tų dawai. Te dwagi yai kolesaga dao. Tiali goli, Godigo te Juda dabe augwali ma sabo si, te wiegi yai mu yaibao, te isali bidi aga gų pagede ma hodalobo tiwai yaibao.

¹⁶ Te po digi po si begelama tama eno dagebolo obao. Te Juda dabe augwaligo tubo nai bret nigibo si, tama hasia augwaligo te dwasianu pedai bret nigibo plaua te Godibolo hasia mabo dao, te Godigo nai dao, te po wabo dao. Tama tibaso, dago koneani, te plauago nigibo bret tigidali te Godigo nai dao. Tama te ni pedali dabe te Godigo da wida, teda te ni nologo dabe augwali me te Godigo naga dao. Tama te tiwai me te Juda dabego wąj dabe augwali Godigo we bidi bidalibaso, te megi bidibo Juda bage me te Godigo we bidi me bidibao. ¹⁷ Tama augwali te gide elalubo ni oliv tiwai bidiyu, tama Godigo te ni oliv nologo meba dwali togolama sela şanama, tama agai dage olo ni oliv nologo te bulude elalubadi selama, tama dage te gide elalubo ni olivgo nologo togwali pesagede wadolali. Tama dagego augwali hasegelama, tama megi dage bugagia

* 11:10 Tib 69:22-23

bidibao. Tama dage te elalubo dwagi yai ni olivba wadolobaso, tama dage dali te ni aga nologo mu dali te dagego te ni oliv pedalidu asobo aigo ili sabo dao, te nigo bomo me dagego sabo dao. ¹⁸Tiali goli dagego te togwali ni nologo dabe augwalibolo te posobo po munu me olamuuo. Te dagego duga nogi uwabawa siyu, augwalide posobo po wai wida, teda dagego homu bugagia koneyu bolo yao. Dagego te ni pedalii me uwabawa sagolobo menio. Te ni pedaligo dage sagolobo dao.

¹⁹ Tiali goli dagego te duga nogi uwababa sabo po wabo homu yaibao: "Godigo te ni oliv nologo dabe togwali madi, te ena augwali togwali pesagede wadolomainogo yai," waibao. ²⁰ Awe, te mu dao. Tiali goli, te augwaligo Kraisde konealubo po dąu me wasiawani, tama te tialigo naga agai augwali togwa sawai. Tama dagego konealubo po dąu obaso, tama dage bugagia bidibao. Tiali goli dua dao, dagego hagoma me elamu. Te dage wi iyao. ²¹ Polobadu, Godigo te Juda dabe, te nigo nologo mu dabe augwali me sula tagalasiawai, tama tiwai naga te dage tuloluyu da, te agai dage me te me sula me tagalogobeo. ²² Tialima, dagego te Godigo te we bidi dali ebo tau sabo kolesaga me te agai sesena pabo kolesaga dali me bugagia suiyao. Te aga kolesaga tagalali bidi dabe augwalibolo, te agai augwali sesenaibao. Me ma, dage te Godigo dage homu dene eyu tau sabo dao. Tama dagego te aga dage dali ebo kolesagade puba hwi weyu tama agade homu kę̄ paí we bidi bidiyu da, te usu da. Ma, te meni yani da, te agai dage me togolama sela sawaibao. ²³ Tama te Juda dabe, te ni olivgo nologo mu, te augwaligo te Kraisde konealubo po dąu wabo hagelabo homu tagaluyu da, teda Godigo augwali te augwali togwali pesagede ma wadoliba. Awe, Godigo te augwali ma wadoligi pabo usu yaibao. ²⁴ Magi baso meni. Dage gasa hani we bidi da, te buside holali ni oliv nologo naga tiwai dao, te ni oliv mugnologo meni. Tiali goli Godigo dage te nide togolama, tama agai dage te gide elalubo ni oliv muba wadolali. Tama te Juda bage augwali da, te gide elalubo ni oliv dao. Tama tibaso, Godigo te augwali polobadu te ni nologo tiwai togwa sanama, tama augwali te augwa oliv niba digi te augwa ma wadoloyu ebo usu mu dao, te pedalisiabo se meni.

Godigo tigidali we bidibolo aga homu dene eyu tau sabo kolesaga yaio

²⁵ Eno ama dede, dage homu hagoma me idali weyu tama eno homugo dage te polobadu geme dualali po page gisiga koneao. Te e tiwai dao: te Israel hani we bidi me badugo homu palia sali, tama te kolesaga augwalide osogo elalubadi tama te gasa haniani hani we bidi augwali te Godiba asiyu, tama te sogo augwaligo hani nambaba usu nagasaibao.
²⁶ Tama te kolesagago te Godigo te Israel dabe tigidali ma dobola saibao. Te agai po aşəni bukude wali po tiwai gilama yaibao,

"Te we bidi ma dobola sabo bidi aga te Saion buludu

asaibao.

Te agai te Jekopgo bidi hanigo yali Godigo po sela
sabo kolesaga te agai sela sawaibao.^y

²⁷ Tama te sogo eno te po dąu augwali dali
waibao,

Te po e dao, Te eno augwaligo dwai sę ebo tigidali
sela sawaibao.”^z

²⁸ Te Godigo gesi noma wiegi yai po pusubo sęde te Juda dabe
augwaligo Godide te boi bidi homu ebo dao, tama tede Godigo dage
gasa hani we bidi tau sobao. Tiali goli, te Godigo augwali polobadu sa
muani sęde, te augwali da aga abagi hani dao. Magi baso meni, polobadu
mu agai te augwaligo wąj dabede mu po dąu walai dao. ²⁹ Tama tiyu,
te Godigo agai te bidibolo olo mani wiegi yai naide te enabolo ma mao
po munu me wagobeo. Agai te bidi sa munama tama i obaso da, teda
agai homu te sęde me nosali ma hasegelegobeo. ³⁰ Polobadu dagego te
Godigo po sela sawanı. Tama megı te Juda hani bidi augwaligo agai po
sela sənama, tama Godigo augwali osogo tagalabaso, tama agai dage
gasa haniani hani we bidi dali homu dene eyu tau salio. ³¹ Tama te tiwai
me augwaligo me te Godigo po sela səbao. Magi basowe? Te Godigo
dage dali homu dene eyu tau sali kolesaga naga ebo gilama agai augwali
dali me emainogo yaibao. ³² Magi baso meni, Godigo te po sela sabo
kolesagade te tigidali we bidi dali kalabus ilama, te agai tigidalibolo me
homu dene eyu olo tau sabo wiegi yai kolesaga yainogo tialio.

Dago Godigo nogi ugwbaba sao

³³ Ei tegoba! Te Godigo wiegi wiegi yai homu kolesagade ena noma
sobao. Te agai sę yabo homu kolesaga dali, agai koneani kolesaga dali,
te mu pagana pelama, tama te tamu aji gebo dabo tiwai gilama aiyaba
mu dulai. Da bidigo agai yali homu kolesaga page tigidali konemainogo
ebo usu me egobeo. Dago agai da dali ebo sę page me munu me kuna
konegobeo, da tede usu me egobeo.^a ³⁴ Te agai po bukude te tiwai po me
asęani,

“Dego te Genuai Bidigo homu kolesaga koneai
dawe? Dego te mobo mabo po agabolo mabo usu
egowe?^b

³⁵ Dego te nai me deli hasia agabolo mani, tama
agai te nai wei ponomainogo yaliwe?”^c

³⁶ Bidi menio. Magi baso meni. Aga tigidali nai nigali bidi dao, tama
agade te tigidali elalubo nai te bidibo ula elalubo dao. Tama tigidali

^y 11:26 Ais 59:20 ^z 11:27 Jer 31:33-34 ^a 11:33 Ais 55:8 ^b 11:34 Ais 40:13

^c 11:35 Jop 41:11

naigo te aga nogi ugwaba somainogo eyu bidibo dao. Tama eno homugo dago sesemane sogo bidada peyu aga nogi ugwaba sao. Mu tama dao.^d

**Polgo te Kraisba homu dąu wabo we bidi dabego yabo
kolesagade po wali**

(Dq̄i 12:1-15:13)

Dago dena tigi Godibolo ofa tiwai mainao wali

12 ¹Eno ama dede, eno homugo te Godigo da dali homu dene eyu tama haniani olo tau mani wiegi yai kolesaga genuai mu yali, eno te homu ebaso, eno e po megi dagebolo hanilibao. Bidigo hasa ela munama tama Godibolo olo mabo sę, te ebo sę nogi poai te ofa dao. Tama te tiwai gilama dagego duga tigi te Godibolo olo mabo ofa tiwai yao. Te tigi bidibo ula elalubadi tama dagego Godibolo menama, tama te God aga deliba naga mao, te dwai sę me isawai nai ofa dao, tama dagego te Godigo godolo ebo kolesaga yaibao. Dagego tama tiyu, tama dage te tiwai God dologode bidiyu, tama duga lotu po mu te Godibolo waiyao. ²Tama te kolesaga edubadi, dage te tqđe bidi dabe biladubo tiwai elama me bilalugio. Menio. Dagego homu kolesaga Godigo gesi noma pedalomainogo ilama, tama dagego kolesaga me gesi noma pedalomainogo emainao. Tama tiyu da, teda dagego te Godigo homu kolesaga koneabao. Tama agai homu kolesaga koneama tama te bidigo yabo wiegi yai sę me, te Godigo gedude te usu niba kadu wabo kolesaga dali, te doloba pai kolesaga dali, te tobage dwagi yai kolesaga page tigidali dagego hania koneabao.

³Te Godigo te eno sę yabo homu kolesaga enabolo olo mobaso, eno dage tigidali deli delibolo e po obao: nago geda muyu naga digi te nage mu koneai bidi mu da nago te homu me elamu. Te menio. Hasia nago nagede homu dolo kone palao. Te Godigo te agade konealubo po dąu wabo bomo nagebolo dobolama mani. Tama te bomo da, te usu ni tiwai dao, nagede. Tama te usu nigo nago naga sę yabo bomo dali, te nago sę yabo homu kolesaga dali te si usu sao. Dage tigidali deli deligo te tama yao. ⁴Magi baso meni. Dago koneani, bidigo tigide te nogo me saq̄a me, te haniani badu sę ebo me te tigi delide naga elalubao. Tiali goli tigidali badu te sę deli tigi tiwai sę naga me ebo menio, te augwaligo haniani sę elalubao. ⁵Tama te tiwai me da haniani we bidi hauwa elalualu goli, Kraisde da wadolama tama da tigi deli naga elalubao. Tama bidiyu, tama da tigidali deli deli da tigidali te gasa badu abagi tiwai dao.^e ⁶Godigo dabolo olo mabo kolesaga elama, tama da deli delibolo gasagi gasagi

^d 11:36 1 Ko 8:6 ^e 12:5 1 Ko 12:12

yai te we bidi tau mabo sə yabo kolesaga dobola mani, te agai olo mabo kolesaga yai. Tama agai tama tialigo da, te da tigidali deli deligo te mani kolesagago dena hasi tau mao. Tama tiyu, bidi me deligo te Godigo po pusubo homu kolesaga elaluyu da, teda agai te aga Godide konealubo pogo bomo wali pelama te Godigo po pusao. ⁷Ma, te bidi me deligo te ama dede dabe tau sabo homu kolesaga elalubaso da, teda agai te ama dede dabe tau sabo sə mu yao. Tama bidi mego te Godigo po ola mabo tisa sə ebo kolesaga elaluyu da, teda agai te tisa sə mu yao. ⁸Bidi mego te bidi dabe augwali homu hodolobo kolesaga elalubaso da, teda agai te augwali homu hodolobo sə mu yao. Te Godigo hani we bidi tau somainogo aga nai dobabo bidi, aga dwagi yai homu eyu agai nai hauwa augwalibolo mao, te agai nai yogo homu elamu. Te polalubo bidi, te agai homugo te sə mu yao. Te gasa bidi homu dene eyu tau sabo bidi, te bidi me agai homu pemene wiegi yai elama tama aga tau sao.^f

Te Godigo we bidi hanigo yabo kolesaga dago dolo mu yao

⁹Duga hasi dagego duga ama dabebolo dwagi yai homu eyu godolo eba wida, teda dagego homu mu naga eyu augwali godolo mu ela pao. Tama tiyu, dagego te dwai kolesagaba tudi mu ola menama, tama dagego te wiegi yai kolesagaba homu mu kə̄ sao. ¹⁰Dage da, te deli hani bage dao. Tama tibaso, te deli hani we bidi dabego yabo kolesaga bomo eyu, tama duga hasi duga ama dede abe dede augwali dali dwagi yai homu eyu godolo mu yao. Dage tigidali deli deligo duga nogi aiyaba elaluyu, te gasa bage augwali nogi naga uwguba sao. ¹¹Dagego sesemane sogo sə bomo mu yao. Tama dagego homude bomo eyu tama Genuai Bidigo sə yao. ¹²Dagego agade konealubo po də̄q olama, tama Genuai Bidigo dage tau sabo tonalubadi tama dagego wiegi yai homu pemene dali yao. Te sege dageba pedalobaso da, teda dage bomo elama bugagia dolaluao. Dagego tigidali sogo gedu haluasa po wao. ¹³Tama te Godigo we bidi meba augwali te nai dabe meni baso da, teda dagego augwali tau sao. Me ma, te gasa bulu bidi dabe dage bidiboba pedalobo si da, teda dagego augwali bugagia geseyu tonaluao.

¹⁴Te bidi dabe augwaligo dage dali dwai sə eyu dene mobaso da, te dagego Godibolo gedu haluasa po olama, te agai augwali wiegi yai ilimainao. Awe, dagego gedu haluasa po agaba obaso, te augwali agai wiegi yai ilimainogo wao. Dagego agai augwali dolomainogo gedu haluasa po weyu te i ola mabo po me olamuo. ¹⁵Te bidi dabe augwaligo wiegi yai pemene ebaso, te dagego wiegi yai homu pemene augwali dali hodobo iyə̄o. Augwali homu dene eyu gela obaso, teda dage me augwali dali hodobo gela wao. ¹⁶Dagego duga ama dede augwali dali deli homu

^f 12:8 1 Ko 12:4-11 ^g 12:14 Mat 5:44; Luk 6:28

tiwai elama, te duga digi dugade ebo homu tiwai augwali dali yao. Dagego homu dage genuai bidi bidabo homu me ilamuo. Menio. Dage te nogi meni yai olo we bidi dabe dali abagi homu eyu bidiqo. Dagego te homu elama duga digi te po me wagio, “Eno naga eno koneai bidi dao,” te po me wagio.

¹⁷Tama gasa bidigo dwai kolesaga dagebolo eboso da, teda dagego te dwai kolesaga augwalibolo wei me ponogimio. Menio. Dagego duga ebo kolesaga bugagia osola sulama, tama te tigidali bidigo gedude wiegi yai dolo kolesaga te kolesaga naga iyqo. ¹⁸Duga digi te hwjabo homu me egio. Te tū elalubaso da, teda dagego deli homu tigidali bidi dali elama bidiqo. ¹⁹Eno abagi dede muo, te augwaligo dwai sē dagebolo ebo te duga digi wei munu me ponamuo. Te menio. Dagego te Godigo sēbē ebo sē augwalide emainogo sula tagaliaqo. Magi baso meni, te Godigo po bukude agai te po wai, “Te dwai sē wei ponobo kolesaga da, te eno sē dao. Ena digi te eno dwai dene wei augwalibolo ponaibao, Genuai Bidigo te po wai.”^h ²⁰Te dwai sē wei munu me ponamuo. Te menio. Tiali goli, te Godigo po bukude wabo po tiwai, “Te nagebolo boi bidi ebo bidi aga nasi eboso da, teda nago aga nai mao. Te aga aqj nogone eboso da, teda nago aqj agabolo mao. Nago tama tiali da, teda agai yali kolesagade te nago aga hale ebo kolesaga mu ilaibao, tama te kolesagade ge naibao.”ⁱ ²¹Gasa bidigo nagebolo dwai sē elama tama nago aga dwai sē ma wei ponoyu da, teda dwai kolesagago nage aiyaba elaluai dao. Te tama gogologio. Menio. Nago agabolo dwagi yai sē naga wei ponao. Tama tiyu, nago dwagi yai kolesaga ebogo te aga dwai kolesaga yali aiyaba elaluao.

Da te gavman bidi dabe augwali dologode bida po wai

13 ¹Da Godigo po wali bilibo we bidi da tigidali te gavman bidi dabe augwali dologode bida. Magi baso meni. Te tqde elalubo gavman sē yabo bomo, te bomo tigidali te God aga digi agai dodolai dao. Te gavman me deli te olo me pedalubeo. Menio. Tigidali gavman bidibo, te Godigo digi augwali munama tama augwali bidibao. ²Tama tibaso, bidigo te gavmanigo po wali pabo hagela homu ebo bidi, te agai Godigo muani naide te homu ebo dao. Tama bidi augwaligo tama tibo da, teda augwali te augwa yali kolesagade te dwai dene saibao. ³Magi baso meni. Te wiegi yai dolo kolesaga ebo bidi dabe augwali te gavman bidide wi ebo meni. Tiali goli te dwai kolesaga ebo bage augwali wi ilainogo te gavman bidi bidibao. Te nago te gavmanide wi ebo hagela homu ebewe? Teda, nago wiegi yai kolesaga naga eboso, tama agai nago nogi uwabawa saibao. ⁴Tama aga dali wi ebo page elalugobeo. Magi baso meni, aga te Godigo sē bidi te agai nage tau siyu, tama nage bugagia bidaibao. Tiali

^h 12:19 Bom 32:35 ⁱ 12:20 Prs 25:21-22

goli, nago dwai kolesaga eboso da, teda nage aga wi yao. Nago koneani, te gavman enesigi bidi agai te poa pai genuai hwq ge tolalubo, tama agai te olo me tolalubo menio. Te gavman genuai bidi aga da te Godigo s̄e bidi, tama te dwai kolesaga ebo bidibolo te Godigo nogide te wei ponama dene mabo dao.⁵ Tama tibaso, da te gavman bidi dologode bidao. Da te Godigo s̄eb̄e geda somainogo ebode naga tama te gavman bidigo po wali pigio. Menio. Dago homugo te kolesaga ebo te dolo dao te tiwai homu yao.

⁶ Tama tede naga dagego te takis me abelebo dao. Magi baso meni, te gavman bidi dabe augwali te Godigo s̄e bidi bidibaso, tama sesemanse sogo augwaligo bomo elama te s̄e naga tonalubo dao. ⁷Dagego te bidi dabe augwalibolo te haniani negeli elalubaso da, teda dagego te augwalibolo mao. Te haniani takis, te maket takis dali, kaunsil takis dali, te tobage negeli te tedali tedali takis mone sabo bidi dabebolo mao. Dagego te gavman dabelede deli dologode bidabo negeli elalubao. Tama tibaso, dage augwali dologode bidao. Dagego te gavman bidi dabe nogi ugwaba sabo negeli elalubao. Tama tibaso, dagego augwaligo nogi ugwaba sao.^j

Te bomai po dolo wali pabo kolesaga

⁸ Dagego bidi me delibolo negeli elalubaso da, te negeli polo wei ponao. Te negeli tigidali bugagia wei ponao. Tiali goli te negeli me deli dage tigidali deli deligo sesemanse sogo me elaluabao, siligobeo: te da te ama dede dabebolo dwagi yai homu eyu godolo mu yabo negeli elalubao. Magi baso meni, te bidi me deligo te gasa bidi dwagi yai homu eyu godolo ebo bidigo agai te kolesaga ebogo bomai po wali mu peduai dao, te aga te bomai pogo usu niba kadu wai dao. ⁹Dago koneani, te bomai pode te po wai, “Nago te penani s̄e egio. Nago bidi ela mugio. Nago nai wi sigio. Nago mena gasa bidigo nai dabe sulama pesa egio.” Te bomai po dabe me, tama gasa bomai po tigidali elalubo, te tigidali bomai po deliba sisinama, tama augwali page deli naga elalubao, te page po e dao, “Te naga digi naga godolo ebo tiwai gilama te nago gasa we bidi dabe augwali godolo eyu tiao.”^k ¹⁰Te bidigo gasa bidi dali dwagi yai homu eyu godolo mu ebo bidi, te agai dwai kolesaga te agabolo me egobeo. Tama tibaso, te we bidi dali wiegi yai homu eyu godolo ebo kolesaga ebo bidi, te agai te Godigo bomai po page usu nagasobo dao.

Da dolo bilao

¹¹ Magi baso eno dagebolo te tiwai kolesaga yao po waliwe? Edao. Te meg i da bidibo sogo te dagego koneanio. Megi dage te godege pila

^j 13:7 Mat 22:21; Mak 12:17; Luk 20:25 ^k 13:9 Sai 20:13-17; Prs 19:18; Bom 5:17-21

muani tagalama hodaloabo sogo dao. Magi baso meni. Polobadu da gesi konealubo po dą̄ wabo bidi pedalali, tama Godigo da ma dobola sainogo homu yali sogo te digibulu gana elalubadi yali, tiali goli megi e sogo te dwasianu pą̄ba pedalalio. ¹²Te be hulialuali silainogo elama, tama pą̄de be posainogo ebao. Tama tibaso, dago te be hulia saide bidibo we bidigo ebo dwai kolesaga ebo tagalao. Te ami bidi dabe augwaligo augwa pibo ugwa guda munama, tama te augwa tigi duala sabo hwı̄aboo ugwa gudubo dao. Tama te tiwai gilama, dago te dwai bidi Satan aiyaba elaluabo wiegi yai kolesaga te dago ugwa gudubo gilama guda sao. ¹³Da dolo bilao, te giligade bilibo bidi tiwai yao. Dago te hagoma eyu te bomai ą̄i tuai bidi tiwai dedege bilamuo. Dago te penani ebo kolesaga eyu tama te meda ebo dwai kolesaga dali gagali egio. Dago gasa bidigo nai pesa elama godolo eboso, tama wado po dabe me olamu dao. ¹⁴Te tobage kolesaga menio. Dagego Genuai Bidi Jisas Krais selama, tama aga te bebo ugwa tiwai elama tama duga homude bea sao. Tama dagego te tigigo ebo dwai kolesaga wali pabo homu me egimio.

Dago ama bilibo me dagalamuo

14 ¹Tama bidigo Kraisde konealubo po dą̄ weyu da yali, tiali goli agai konealubo po bomo isayu tama aga homu te God aga dali dwagi yai homu emainogo aga te bidigo nigali haniani bomai po aga wali pao homu ebo bidi dao. Te tobage bidi te dagego duga hani tomoba selasaao. Tiali goli tama tiyu te dagego homude aga dali gasa gasa konila po me olamu dao. Te menio. Te bidi olo mu sao. ²E tiwai yao. Bidi me deligo Kraisde konealubo po bomo elama dą̄ olama, tama agai tigidali haniani nai tubo dao. Tiali goli gasa bidi mego Kraisde konealubo po dą̄ olama gisiga konesiąwai bidi, te bidi agai te mi tubo sęde habu selama, tama te gide holobo nai naga agai tubo dao. ³Tama tigidali nai tubo bidigo, agai te kibu me gasa nai mi tusiąbo bidi dali dwai homu me egio, bo wagio. Me ma, te kibu me gasa nai mi tusiąbo bidigo, agai homugo te tigidali nai tubo bidi te sęge sali homu me egio. Menio. Godigo te bidi me selama, tama aga hani dali dagayani dao. ⁴Nage niwai bidi da olama, tama nago gasa bidigo sę ebo bidigo ebo kolesagade te sęge sali homu ebo dawe? Te aga sęde bomo elama dolalubaso, ma aga tulalubaso da, te sę aga Genuai Bidigo digi osola sulama tama aga dali yaibao. Tama te bidi aga dolaluabao. Magi baso meni, te Genuai Bidigo digi te aga dą̄ ilama, tama aga bomo elama dolalubo usu yaibao.

⁵Te Krais wali pabo we bidi hani tomode bidi me deligo homugo te deli sogo bubugade te Godigo gedude te genuai sogo da homu mu elama tama te gasa sogo dabe te aiyaba elaluali homu ebo dao. Tama gasa bidigo homugo tigidali sogo te deli sogo bubugade tiwai da te homu ebo dao. Tigidali bidi deli deligo augwa digi augwa homude te sęde bugagia

hania homugo koneao. ⁶Bidigo homugo deli sogo te polalubo genuai sogo da homu eyu da, te bidigo te Genuai Bidigo nogi uwabwa somainogo tama tebo dao. Te tigidali nai tubo bidi me, te bidigo te Godibolo te tubo naide puba hwi po obaso tama te nai tubo si agai te Genuai Bidigo nogi tama uwabwa sabo dao. Me ma, te tigidali nai me tusiabo bidi me, agai te Genuai Bidigo nogi uwabwa siyu, tama Godibolo te puba hwi po weyu ebadi, aga nai meba tubo menio.¹ ⁷Dago koneani, te da usu da homu eyu, tama dena homu naga wali peyu tama da e tiwai bidaibao, ma da e tiwai isaibao, te homu eyu te da bidibo meni. ⁸Menio. Te da bidibo ula elalubo sogo da, ma da isibo si da, te dago te Genuai Bidi dwagi yai homu ilabo se yao. Tama tibaso, da bidibadi me, ma da isai digi yaibaso, da te Genuai Bidigo we bidi hani dao. ⁹Magi baso meni. Krais me isama tama bidibo ula ma sali da, te aga te isali bidi dabe dali te bidibo ula elalubo bidi dabe dali augwaligo Genuai Bidi bidainogo tama tiai dao.

¹⁰Tama aga tama tialigo da, tama nago, magi baso nago te naga ama bilibo kolesaga dagalama tama aga dali dwai homu ebo dawe? Tama nago me, te magi baso nago te sege sali homu naga ama u bidide ebo dawe? Dago koneani, te da tigidali te Godigo po tu ebode dolaluabao.

¹¹Magu meni, te Godigo po bukude aşeani po tiwai yaibao, te po aşeani,

“Genuai Bidigo te po wai dao: ‘Ena mu tama
bidibo, ena isigobeo. Te tiwai eno meg i wabo
po me te mu usu nagasaibao. Te tigidali we
bidigo ena pagede kidu sugunama, tama tigidali
bidigo God po hanilama weyu aga God mu
da waibao.’ ”^m

¹²Tama agai tama po waligo da, teda da tigidali we bidi deli deligo te dago Godibolo te dago yali tigidali kolesaga page te po pusaibao.

Dago ama dolobo se me egio

¹³Te da tigidali te Godigo po tu ebode mu dolalubaso, tama dago dwai homu gasa amago ebo kolesagade ebo tagalao, te me elamu. Menio. Dago te tiwai homu yao: dago te ama dwai segeba tulalumainogo magi se me deli elamu dao. Te aga Godigo pabo tudu pabo dolamuo. ¹⁴Ena te Genuai Bidi Jisas dali wadolama, tama agai ena ola manigo tama te eno e po page bugagia hania koneai, te magi tubo nai me deli te aga digi meda eyu tama te habu selai nai menio. Tiali goli bidigo te nai me deli te meda yai habu selali nai dao homu ebaso, te aga homude naga te nai meda elalubao, te agade te nai te habu selai nai dao. Dagego agabolo tuao olamuo. ¹⁵Magi baso meni. E tiwai dao: nago amago homu te tubo nai me deli te habu selai nai dao. Tama agai nago te nai tubo subaso, tama aga homu te nai habu selali po wai nai goli, tama

¹ 14:6 Kol 2:16 ^m 14:11 Ais 45:23

aga te habu selali po bolama, agai me te nai tubaso, aga te tiwai tulaluama te dwai homu sege elaluabao. Tama nago naga ama tama doloyu da, teda nago koneao, te kolesagade nago te aga ama dali dwagi yai homu eyu godolo eyu bidibo kolesaga nago tagalai dao. Krais isolama te ama ma dobola sainogo yali. Tama tibaso, nago nai tubo kolesagago te ama me dologio.¹⁶ Tama tiyu, nago te kolesaga me deli dali te habu selesiawani kolesaga dao homu ebao. Awe, tiali goli nago te kolesaga ebogo te nago ama te dwai se tomoba kegeyudia, teda te kolesaga ebo tagalao. Te gasa bidi dabe augwaligo te sulama, tama Godigo nogi posobo po waidali weyu, te nago te habu selesiawani kolesaga ebo tagalao.¹⁷ Magi baso meni. Te Godigo da we bidi tonalubo se page da, te nai me we tubo kolesagade te page elalubeo. Menio. Te aga da tonalubo se page e dao, te doloba pai kolesagade elaluyu, tama wiegi yai homu nagame eyu, tama wiegi yai homu pemene ebo kolesaga ebo. Te Godigo Tedali Mobo Bidigo te kolesaga da tomode nigilibo dao.¹⁸ Tama bidi te tobage kolesaga ebogo te Kraisgo se bidi bidiyu da, teda aga Godigo usu niba kadu waibao, tama te bidi dabe augwaligo homugo te aga wiegi yai bidi da te homu yaibao.

¹⁹ Tama tibaso, da te tu naga wali peyu, te da deli homu ilabo kolesaga dali, te dena hasi dena bomo mabo kolesaga dali si, te da pobasa pao. ²⁰ Tama tiyu, e homu yao: eno ama da te Godigo ma dobola sai bidi dao. Tama tibaso, eno aga te konealubo pode dolidali weyu, te agai habu selali homu yai tubo nai te nai eno me tugobeo. Mu tama, te tubo nai tigidali wiegi yai dao, te we bidigo tuabo nai dao. Tiali goli, te nago nai me deli tuali digi tama tede te gasa bidi me deli tulalubo se eboso da, teda nago dwai kolesaga ebao. ²¹ Te doloba pai kolesaga e dao: nago amade kone palao. Aga te mi tubo kolesagade, ma te bomai we tubo kolesagade, ma gasa sede me te habu selai dwai se dao homu eboso da, teda agai nage te tobage kolesaga ebo sulama, tama aga homude elalubo habu selali po bolama tulaluidali weyu, nago te tobage kolesaga egio. Tama tiyu te nago te wiegi yai ilibo dao. ²² Nago te mi dali we dal tubo kolesagade nago naga homugo hania konebo, te homu te naga digi God dali dage si tomode dodolama elalua. Bidigo homugo te haniani ebo kolesaga usu selama tama meba dwai dao, meba dwagi yai se dao, te aga konebo dao. Tama te bidigo te wiegi yai kolesaga naga eyu, tama agai aga ebo sede dwai homu isawai bidi, te bidi aga wiegi yai homu pemene yao. ²³ Tiali goli bidigo homu si elama te nai tuali da, te Godigo agabolo sege mawaibao. Magi baso meni. Aga te sede te wiegi yai se naga dao te homu isiqbadi aga homu si elama te nai tuali. Te tigidali se deli delide e po mu po dao: te se doloba pai se mu da homu isiqbadi tama homu si elama te se eyu da, teda dago tede dwai se yalio.

Dago Kraisgo homu kolesaga wali pao

15 ¹ Te da Godigo we bidi hani tomode te we bidi meba augwaligo te Kraisde te konealubo po bomo meni yai bidiyu, tama augwaligo

haniani sede te habu selebo dao, te ena tamadi tama te sede po asęani. Tama da meba te Kraisde te konealubo po bomo eyu dąu olama bidibao. Tama da augwali dali te nagamea pai kolesaga eyu augwali sao. Dago augwali dali tama tiyu, tama dago augwaligo sęgę tolao. Dago augwali sula tagalama tama dena homu kolesaga naga wali me piduamu dao.² Te menio. Da tigidali deli deli dago te da pąde bidibo bidide homugo kone palama, tama aga tau sabo sę yao, te aga wiegi yai kolesaga selama, tama aga te Kraisde konealubo po bugagia dąu wali bidi pedalomainao.³ Te Kraisgo me, Krais aga digi aga homu wali me pabeo. Te meni. Te we bidi augwaligo agade nogi posobo po wali goli, aga Godigo homu naga wali pali. Te agade pedalali kolesaga te bidi mego Godibolo polobadu wali po tiwai gilama yai. Te bukude asęani po e dao: “Te God, te bidi dabe augwaligo nagebolo wabo dwai po wabo, te augwaligo dwai po wabo te po asiyu ena mesegelai dao,” te po asęani, tama te Kraisde usu nagasai dao.⁴ Godigo po tigidali augwaligo polobadu asęani, te augwaligo te po dabolo te wiegi yai bidabo kolesaga ola momainogo asęanio. Tama dago te asęani po nededu geyu, tama tede dago te haniani sęgę tolabo bomo dali, te dwagi yai po mobo mabo po dali somainogo eyu augwaligo te po asęani. Tama dago te bomo me te mobo mabo po me te bukude asęani pode selama, tama dwagi yai homu eyu, dago te Godigo da dali yabo wiegi yai sę bugagia tonaluabao.⁵ Te God da, te haniani sęgę tolabo bomo page bidi dao, te dwagi yai mobo mabo po page bidi dao. Tama eno homugo te Godigo dage tau siyu, tama dage te Krais Jisasgo yali homu kolesaga wali mu peyu, tama dage deli homu naga duga hasi elaluyu bidaibao.⁶ Eno homugo dage te tama bidiyu, tama pedauwali deli elama, tama Godigo nogi uwawa somainogo yao, aga God tama dago Genuai Bidi Jisas Kraisgo Aya dao.

Krais da te Juda dabe dali gasa hani dabe dali ma dobola sabo bidi dao

⁷Dago te da pąde bidibo bidide homugo kone palao. Tama tibaso, duga hasi dage tigidali deli deligo te ama dede dabe selama, tama augwali dali deli homu elama bida, te Kraisgo me da sali tiwai yaligi yao, te Godigo genuai nogi uwawa pedalomainogo tiao.⁸ Eno po page e dao: Krais agade digi naga aga homugo kone palisiqbadi tama aga te tigiwali togobo Juda hani tau sabo sę bidi pedalai. Agai tama tialigo te God da te mu po naga wabo bidi dao ola mani dao. Tama tede Kraisgo te Godigo te polobadu bidali augwa wąj dabebolo menama dąu wali po tigidali usu nai dao.⁹ Tama aga te Juda hanigo sę ebo bidi pedalobo te page me elalubao, te e dao: agai homugo te gasa hani augwaligo te Godigo homu dene eyu olo tau mabo wiegi yai kolesaga ebo te augwaligo sulama, tama

ⁿ 15:3 Tib 69:9

aga nogi uwababa somainogo homu yali, te Godigo po bukude wali po tiwai gilama yali, te po e dao:

“Tama eno nago nogi uwababa sabo po gasa hani dabe tomode augwalibolo pusaibao.

Tama eno təabi pogo nago nogi uwababa saibao.”^o

¹⁰ Tama bukude te səde gasa po me wali e dao:

“Dage gasa hani dabe, dagego te Godigo hani we bidi dali wiegi yai homu pemene yao.”^p

¹¹ Tama bukude te po gasa badu e tiwai po wali,

“Dage tigidali gasa hani bidi, dagego te Genuai Bidigo nogi uwababa sao. Tama tigidali we bidi dagego aga nogi uwababa sao.”^q

¹² Tama te Juda hani isawai bagede te polobadu Godigo po pusali bidi Aisaiago me te po wai,

“Te gelali ni pedalide te ni koliamma holobo tiwai gilama tama te bidi me deli te Jesigo hanide pedalaibao. Tama te bidi Godigo te gasa hani we bidi tonalubo bidi nigilaibao. Tama nigilama, tama augwaligo agade augwa homu tialuama, tama dwagi yai homu eyu, agai augwalibolo nosali yabo sə ebo tonaluibao,”^r

te Godigo po polobadu pusali bidi Aisaiago te po aşənai.

¹³ God da, aga te dago homu agaba tialuama tama dwagi yai homu eyu te agai dabolo nosali yabo sə tonalubo kolesaga page bidi dao. Tama eno gedu haluasa po weyu tama wabo dao, “God, te Rom bulude bidibo we bidi augwaligo nageba te konealubo po dəq wali dao. Tama tebogo nago augwali wiegi yai homu pemene genuai elama, tama nagame yai homu te augwaliba pedalama tama paganalumainogo yao, te eno homugo dao. Tama nago Tedali Mobo Bidigo bomogo augwali tau siyu tama augwaligo te nago nosali yabo sə bugagia tonalubo kolesaga te geninama mu pedalomainao,” eno te tobage po te Godibolo hanalu wabo dao.

Polgo aga ebo səde digi po weyu, tama agai te Rom dabede siade po wai

(Dəq 15:14–16:27)

Pol agai te Godigo sə te Juda hani isawai gasa hani bage tomode yali

¹⁴ Eno ama dede dabeo, te eno dagede te homu si ebo meni. Te eno homugo digi te dagego te we bidi tau sabo wiegi yai kolesaga sesemane

^o 15:9 2 Sml 22:50; Tib 18:49 ^p 15:10 Bom 32:43 ^q 15:11 Tib 117:1 ^r 15:12 Ais 11:10

sogo ebo dao, tama dagego haniani kolesaga tigidali elaluyu, tama dagego te Godigo wiegi yai homu kolesaga te duga hasi ama dede dabe augwalibolo ola mabo te dage usu ebo dao. ¹⁵ Tiali goli eno e pas tomode po meba ena homu wi me isäyu, tama bomo elama te po dagebolo hania asęani. Eno te pode dage homu hodolainogo homu ebao, te dagego te po kegeda pidali weyu yali. Magi baso meni, Godigo te aga olo tau mabo wiegi yai kolesaga ena dali eyu, tama enaba te dwagi yai sę mawai dao. ¹⁶ Tama agai ena te Krais Jisasgo sę ebo bidi bidimainogo ilama, te Juda hani isäwai gasa hani augwali tomode sę emainogo yai. Ena te Godibolo lotu po weyu sę ebo bidi pris tiwai elama, tama eno Godigo wiegi yai gesi po pusubo sę ebao. Eno te gasa hani augwali te Godiba sela aselama, tama Tedali Mobo Bidigo augwali wiegi yai mu doloba pai we bidi ilibo si, tama eno augwali Godibolo te usu si yai ofa tiwai elama mawaibao. ¹⁷ Tama tibaso, ena Krais Jisas dali wadolama, tama eno te Godibolo ebo sęde te ena wiegi yai homu pemene ebo usu ebo dao. ¹⁸ Tama eno gasa bidigo yali sęde po me wagobeo. Menio. Tama bomo elama, eno te Kraisgo sę ena nogode yali sę po naga pusubao. Agai eno po tau selama, tama wiegi yai sę dabe eno nogode yai. Tama te si ebogo te Juda hani isäwai gasa hani we bidi augwali te Godigo po odoyu, tama augwaligo homu tulaluyu, tama augwali agai po wali pabo sę ilali. ¹⁹ Tama agai eno nogode te haniani bidigo me isäwai bomai sę yai. Tama Tedali Mobo Bidigo me enabolo sę bomo yali. Te tigidali sę agai yai, te gasa hani dabe hodolama, tama augwaligo te Godigo po wali pomainogo yalio. Tama tiyu, eno te sę Jerusalemde gagalama, tama eno Kraisde wiegi yai gesi po tigidali augwalibolo pusali, tama ena bilali te tigidali habuba te digibulu mu bulu nogi Ilirikum dąj egi pelama, tama te sę ela silai dao. ²⁰ Tama tiyu, te sęde eno homugo te Kraisgo nogi polobadu konesiąwani bage bidiboba pelama, tama augwalibolo eno te wiegi yai gesi po pusubo homu godolo mu yalio. Te po digi po begelama tama e tiwai dao, eno te gasa bidigo tulai be ni daide eno be me sę idali weyu, ena te digibulu buluba pai dao. ²¹ Tama tiyu, eno te Godigo po bukude polobadu asęani po usu numainogo yai, te po e dao,

“Te agade po munu me odosiąwani bidi dabe, te augwaligo aga sueibao. Tama agade po odosiąwani bidi dabego, te augwaligo agade bugagia koneabao.”^s

Polgo Rom dabe suabo homu yali

²² Te digibulu bulude bidibo bage, te augwali Kraisgo nogi munu me odosiąwani we bidi, te eno augwalibolo Godigo po pusubo sę hauwa elalubaso, tama te sęgo hauwa sogo ena tų palidubaso, tama ena dageba

^s 15:21 Ais 52:15

pabo usu me ebeo.^t ²³Tiali goli megı eno yabo sę te gasa pąde elalubo tő pedai dabede me elalubeo, te sę tede silai dao. Tama hauwa kibu bede te ena dage bidibo madi asabo homu godolo mu yai dao. ²⁴Tama tialigo da, megı eno homugo te ena te digibulu tő pedai nogi Spen, te dagego bulu Rom u badu bulu, teba ena paio. Tama te Spenba pobadi tama tomode ena dagego hanu Romba hasia sabolaibao. Tama dageba te tiwai sabolama, tama ena dwasianu sogo dage dali dwagi yai homu eyu bidama, tama dagego ena tau siyu ena odasa pelama, te Spen bulu pabo tuba tagaligi pagameo. ²⁵Tiali goli megı hasia bolo ena te Jerusalem hanuba pabo tamadi gagalaibao, te tede bidibo Godigo we bidi tau magi paibao. ²⁶Te e tama tiaibao: te Masedonia dali Akaia dali te tő pedai side bidibo Godigo we bidi augwaligo po mia selama, tama dwagi yai homu eyu augwa nai sesa pelama sisinama, tama eno nogoba munama, tama te nai meni yai te Godigo we bidi augwalibolo te Jerusalemba tolainogo ebo dao.^u ²⁷Mu tama, augwa digi augwaligo te mone mabo sęde wiegi yai homu elama augwaligo tama tiwai yali, tiali goli augwaligo negeli me te Jerusalem dabede elaluai. Magi baso meni, te Jerusalemde bidibo Juda dabe augwaligo te Juda hani isławai gasa hani dabe augwali te Godigo wiegi yai gesi po mani negeli elaluai. Tama tibaso, gasa hani augwaligo te tigide nai tau sabo negeli te Juda dabe augwalide elaluai dao.^v ²⁸Te gasa hani bage augwaligo Godigo wiegi yai po odama, tama te pogo megı du walobao, te gasa hani bage augwaligo augwa monego te Juda dabe tau saibao. Tama eno te ena nogoba muani sę silabo homu eyu, tama eno te wiegi yai du tigidali te Jerusalem dabe augwaligo nogoba bugagia menama da, tama nosali ena te Spen buluba pabo tudu painogo, tama tedu pobadi hasia eno dage bolo suagasaibao. ²⁹Tama eno koneanio, te ena dage bidiboba sabalobo si, te Kraisgo da tigidalibolo te wiegi yai homu ilibo dwagi yai sę elama, tama da pagawaibao.

³⁰Eno ama dede, eno homugo dagego te dago Genuai Bidi Jisas Krais homu koneama, tama te Tedali Mobo Bidigo da tomode hodolali duga hasi godolo ebo kolesaga me homu kone palao. Tama te side homu kone palama, dage homu hodolama, tama te gedu haluasa po wabo sę dene ena dali emainu eno te homu godolo ebao. Dagego te Godibolo gedu haluasa po weyu ena tau somainogo yao, ³¹tama ena te Juda dabe meba te Godigo po sela səbo bidi augwali nogode ena dagala samainogo yaibao. Tama me, dagego te Godibolo gedu haluasa po obaso, te Godigo aga we bidi Jerusalem dabe augwaligo te eno augwali tau sabo sęde dwagi yai homu eyu tama godolo emainao. ³²Tama tiyu, tama Godigo usu da homu ebaso da, te ena wiegi yai homu pemene eyu, tama dage bidiboba sabolaibao. Tama ena dage dali dwasianu sogo bidiyu toma

^t 15:22 Rom 1:13 ^u 15:26 1 Ko 16:1-4 ^v 15:27 1 Ko 9:11

nabo homu yaibao. ³³ Eno homugo God da, aga te wiegi yai homu nagame ebo page bidi, aga te dage tigidali dali bidao. Mu dao.

Polgo we bidi hauwabolo siade da po ola tolali

16 ¹Eno homugo te dago abe Fibi aga dage bidiboba sabalobo si dagego aga selama, tama agabolo wiegi yai sę bugagia yao. Agai te ede Senkria bulude Godigo po odobo we bidi tau sabo sę ebo dao. ²Eno homugo dagego homu Genuai Bidiba koneama, tama dagego te we Fibi selama, te dage Godigo po odobo we bidi dali bidimai homu yao. Te wiegi yai kolesaga da Godigo we bidigo ebo kolesaga dao. Tama Fibi aga magi nai me deli meni baso da, teda dagego aga tau sao. Magi baso meni, agai abagi homu eyu tama we bidi hauwa tau sai, tama agai ena me tau sai dao.

³Dagego eno siade da po wali te we Prisilade, aga bidi Akwila sibolo mao, augwali si te Krais Jisasde ena dali deli sę ebo dao. ⁴Te augwali sigo ena isidali weyu ena tau siyu isabo sisi yai elaluali. Tama eno naga eno gedu haluasa po augwali side weyu Godibolo usu da po me wabeo. Menio. Te Godigo po odobo gasa hani dabe tigidali augwaligo me te gedu haluasa po weyu, te Prisila dali Akwila dali side Godibolo puba hwi wabo dao. ⁵Tama eno siade da wali po dagego te augwali sigo beba sisinibo te Godigo po odobo we bidibolo te po wao.

Dagego eno siade da wali po te bidi Epainetus agabolo mao, eno abagi mu dao. Te moni tq Esiade te tigidali we bidi augwaligo augwa homu Kraisba musiqbadi te agai polasa aga Godigo po wali pabo bidi hasia pedalai. ⁶Dagego eno siade da wabo po te we Mariabolo wao. Agai te se dene hauwa elama dage tau sai. ⁷Te eno siade da wali po dagego te bidi si Andronikus dali Junias sibolo wao. Augwali si eno Juda hani deli tama ena dali me sogo polobadu kalabuside bidai dao. Augwali si te Godigo po sela pabo bidi augwali tomode nogi elalubao, tama augwali si ena dali polama Kraisde wadolama bidai.

¹²Dagego eno siade da wali po te we ama name si Trifina dali Trifosa sibolo wao, augwali si te Genuai Bidigo se ebo dao. Te eno siade da wali

po te we nogi Persisbolo wao, eno abagi mu dao. Agai sę dene hauwa Genuai Bidide yai dao. ¹³ Eno siade da wali po dagego te Rufusbolo waiyqo. Aga te Genuai Bidi wali pabo wiegi yai bidi dao. Eno siade da wali po agai idabolo me wao. Te we te enade te aga eno ogwa tiwai dao homu eyu, tama agai enade dwagi yai sę ebo dao. ¹⁴ Eno siade da wali po te Asinkritusbolo me, Flegon, Hermes, Patrobas, Hermas me, te bidi dabebolo dagego te po waiyqo, tama augwali dali bidalubo ama dedebolo me wao. ¹⁵ Dagego eno siade da wali po te Filologus dali aga we Julia sibolo me, tama te bidi Nereus dali aga abe dali sibolo weyu, tama te bidi Olimpasbolo me, tama augwali dali bidibo Godigo we bidi tigidali augwalibolo te po waiyqo.

¹⁶ Te Godigo we bidi dago ebo kolesaga te tiwai eyu, tama abagi homu eyu, duga hasi dage tigidali deli deligo te ama dede augwali pageiço. Te Kraisgo po odobo hani tigidali augwaligo siade da po dagebolo ola tolobao.

Bidi mebago Kraisgo hani we bidi tomode pedebo po

¹⁷ Ama dedeo, te we bidi hani pedebo kolesaga ebo bidi dabe, te bagede dagego bugagia suao, dua dao. Te dagego Kraisde polobadu odali ola mabo po, te po augwaligo sela sawainogo eyu, tama augwaligo we bidi dwai sę ebo kolesaga tomoba kegebo dao. Te tobage we bidi dagego tagalao, augwali tudiba mu muao. ¹⁸ Magi baso meni, te tobage bidi dabe augwaligo te dago Genuai Bidi Kraisde sę me ebeo. Menio. Te augwaligo augwa tigigo digi ebo kolesaga naga wali pabo dao. Tama pusu ebo po me tama te bidi homu begasa pabo tibo pogo augwaligo te dwai sęde konesiabo we bidi dabe homuba tibo po ola menama, tama te bidi dabe augwaligo homugo te dwai kolesaga da homu me isawaibao. ¹⁹ Dagego Godigo po bugagia wali pabo kolesaga po, te tigidali bidi dabe augwaligo odalio. Tama tibaso, eno wiegi yai homu pemene dagede eba. Tiali goli eno homugo dagego te wiegi yai doloba pai kolesagade bugagia gisiga koneao. Me ma, te dwai kolesagade eno homugo dage te tobage kolesaga isayabo homu mu yao. ²⁰ Tama tiyu da, teda God da, aga te wiegi yai homu nagame ebo page bidi, dwasianu sogo tama silama, tama agai te Satan dagego sagą dologoba munama agawaibao. Te eno homugo te dago Genuai Bidi Jisas Kraisgo da olo mu tau sali wiegi yai kolesaga dage dali bidao.

Bidi meba augwaligo Rom dabebolo siade da po ola tolai

²¹ Ena dali deli sę ebo bidi, Timoti, agai siade da wabo po dagebolo ola tolobao. Tama Lusius me, Jeson me, Sosipater me, eno Juda hani deli bage, augwaligo me siade da wabo po dagebolo ola tolobao.

²² Ena Tertius, te eno Polgo pedauwalide po selama tama eno e pas eno nogogo aseai. Te Genuai Bidigo nogide eno siade da wabo po dagebolo obao.

²³ Te bidi nogi Gaius agai siade da po dagebolo ola tolobao. Agai ena Pol bugagia agai bede tonaluyu nai gesali. Aga beba te Kraisgo po odobo we bidi augwali deliba sisinibo dao. Erastus, aga e hanude te gavmanigo kuskus sę ebo masigi tonalubo bidi, tama dago ama Kwartus, te augwali sigo siade da po dagebolo ola tolobao.

²⁴ [Te dago Genuai Bidi Jisas Kraisgo da olo mu tau mani wiegi yai kolesaga te dage tigidali dali bidao. Mu dao.]

Dago God nogi ugwaba sao

²⁵ Dago Godigo nogi ugwaba mu sinao. Eno aga gesi wiegi yai po pusubogia tama God agai dage te Kraisde homu kęq̄ pai we bidi mu dąq̄ wabo usu yaibao. Te wiegi yai gesi po te Jisas Kraisde elalubao. Tama polobadu tigidali sogo te po te geme dualali po geme dualaluali, ²⁶ tiali goli megi Godigo te po hania hanilai dao. Godigo po pusali bidi profet dabego te geme dualali po polobadu aseçani. Tama megi te sesemane sogo bidibo Godigo agai te augwalibolo te po pusao po olama, tama agai po sela pabo bidi dabe augwaligo te tigidali tqđe bidibo we bidibolo pusugi peyu, tama augwalibolo hania ola mabo sę megi ebo dao, te tigidali we bidi agaba konealubo po dąq̄ olama tama agai kolesaga wali pomainogo ebao.

²⁷ Te God agaduba deligo naga mu koneai elalubao, dago te Jisas Kraisde sesemane bidada pabo sogo aga nogi ugwaba sao. Mu dao. Eno po tama dao. Ena Pol da.

Polgo Hasia Pas Deli Korin Dabeba Aşəni

Hasia nedebə tau sabo po

Polobadu te bidi Pol bidali sogo, aga digi te bulu Korin genuai taun me deli te provins tō pedai Akaia bulude te Grik dabego moni tō pedai tomoba pelama, tama te moni genuai hanu Korin teba sabolama, tama Krais Jisasgo po te Korin we bidi dabebolo pusali. Te Korin hanu dwai nogi elaluali, te dwai dwai penani sē ebo hanu wai, tama tibo god hauwa tede elaluali. Te Korin we bidi mebago te Godigo po bugagia odali. Tama nosali Pol aga te gasa hanu nogi Efesus tede bidibadi, agai e pas te Korin bagebolo aşəna tolali. Agai odali, te hani augwa hasi tomode pebeda pali. Tama bidi me deligo dwai penani sē yali. Tama te Korin bage augwaligo pas te Polba aşəna toloyu, tama haniani kolesaga ebode te augwaligo aga po hanalu wali. Tama Pol agai te hanalu wali po wei ponoyu, tama aga homu me Godigo homu dali si augwalibolo pusa mani.

Polgo moni homu te Jisasgo po wali pabo te Korinde bidalubo we bidide yali, tiyu augwaligo konealubo homu dą̄ wabo te bomo kimi meni dali weyu yali. Tama augwaligo wiegi yai kolesaga yali te dolidali homu yai. Agai te we de bidi si deliba dagana selama bidu ebo te doloba pai kolesagade po weyu, tama te sęgę dabe pedalubo si te Godigo Tedali Mobo Bidigo te augwali bilibo dodolomainu yabo po weyu yai. Agai te lotu wabo wiegi yai kolesaga ebo po me te haniani gasagi yai homu kolesaga te Tedali Mobo Bidigo te Jisas wali pabo bagede ebo po wali. Tama me te isali bidi dabe ma hodalueibao po wai dao.

Te tama tigidali sē dabego te Korin dabeba sęgę mobaso, te bidi Polgo te wiegi yai mu pogo te augwali tau somainu eyu te Godigo ebo homu kolesaga konemainu yali. Te e bukude dą̄ me badude te Genuai Bidi wali pabo bagego homu godolo ebo po te buku Dą̄ 13 tede te po elalubao. Te dą̄jde te tiwai po te gasa bidi hasi homu godolo ebo po wali elalubao, te hasia mu Godigo aga we bidi dabeba mani homu kolesaga te dao. Dago te tama kolesaga wali pabo usu dao.

**Te Genuai Bidigo po wali pabo bagego augwa digi augwa
nogi ugaba sabo konila po me olamuuo po wai**

(Dai 1-4)

1 1-2 Ena Pol da, tama Godigo digi aga homugo konea pelama tama agai ena i olama, te Krais Jisasgo tagala palali bidi sēba muani. Ena dali dago ama Sostenes dadi sigo e pas te dage Korin moni hanude bidalubo Godigo we bidi hanibolo aṣeṇa tolobao. Dage te Godigo dwai sē me isābo wiegi yai we bidi pedalomainu eyu agai dage i wai dao. Tama dage Krais Jisas dali wadolama, tama dage dali te tigidali bulude bidalubo we bidi augwaligo te dago Genuai Bidi Jisas Kraisbolo lotu po wabo bage dali, te da tigidali Krais Jisas dali wadoloyu tama Godigo we bidi hani bidibo dao. Aga da, te augwaligo me te dago me Genuai Bidi dao.^a 3 Ena homugo dago Aya God dali, te Genuai Bidi Jisas Krais dali, augwali sigo te augwa olo tau sabo kolesaga me, te bidi homu dua digi nagame ilibo kolesaga dali si te dagebolo mao.

Polgo Godiba puba hwi po wali

⁴Eno gedu haluasa po weyu, tama tigidali sogo eno te ena Godibolo dagede puba hwi po wabo dao. Magi baso meni, dage Krais Jisas dali wadolobaso Godigo dage olo tau siduai dao. ⁵Dage Krais dali wadoloyu tama Godigo bomo dagebolo mayu, dage te tigidali dwagi yai kolesaga ebode te dage usu mu dao, sqaq pabeo. Tama tiyu, dagego te Godigo po kuna koneyu tama gasa we bidibolo pusubo se te dage usu nubo dao. ⁶Te Kraisde ola mani po te dagego bugagia mu odolama te sai dao. Tama selama, tama dagego ebo kolesaga hasegelebaso, te gasa we bidi dabe augwaligo sulama tama augwaligo koneai, dagego te Kraisde ola mani po mu odobo dao. Tama tibaso, ⁷te Godigo dagebolo maiabo wiegi yai se yabo bomo tigidali dagego sai dao, tede dage sqaq peyu habuge me ebeo. Tama dagego tama selama, dagego dago Genuai Bidi Jisas Krais hania pedalabo sogo asobo tonaluyu bidibo dao. ⁸Tama agai te dagego agade konealubo po daq weyu agaba homugo tialubo kolesaga, te agai bomo ilama, tama te tigidali nai silabo sogo usu nigipai bao. Agai tama tiyu, tama dago Genuai Bidi Jisas Krais aga ma asobo sogo te sogo dage sege meni yai we bidi pedalaibao. ⁹Te God aga digi dage aga ogwa Jisas Krais dali wadolomainogo eyu tama dage i wali bidi, te tiwai God aga digi da te agai homugo dage dari kqai pai bidi mu dao, te dage agaba tiq pabo te usu dao.

Te Korin dabe augwa hasi bugulama hani si sela pedalai

¹⁰Ama dedeo, te dago Genuai Bidi Jisas Krais agai aga nogigo bomo enabolo mobaso, eno homu dene ebadi te nogi bomogo eno e po dagebolo

^a 1:1-2 Tpi 18:1

megi obao, dage tigidaligo deli homu naga eyu tama po deli tama wao. Dage si sela pebeda pigimio. Te mu menio. Dage bidibo deli hani tama bidiyu, deli homu kolesaga naga dali, te deli *sę* yabo homu dali te *sę* yao. ¹¹ Eno te po dagebolo magi baso obawe? Woo, eno ama dede, te dage tomode bidibo we nogi Kloe, aga bede bidibo bage meba augwaligo enabolo wali, duga hasi tomode wado ebo wali. ¹² E tiwai dao: dage tigidali deli deligo gasagi gasagi yai po wabo. Me badugo te po wabo, “Ena Pol wali pabo dao.” Me badugo te po wabo, “Ena Apolos wali pabo dao.” Me badugo “Ena Pita wali pabo dao” wabo. Tama me badugo “Ena Krais wali pabo dao,” te po wabo.^b ¹³ Tega! Magi yaliwe? Krais tomode pebeda pali elaluba agawe? Ena Pol, te ena dage tobade te ni pedaide isaliwe? Te dage baptais yalide, te ena Pol wali pomainogo eyu tama dage baptais yali dawe? Te mu meni.

¹⁴⁻¹⁵ Dage tomode eno baptais yali te Krispus dali Gaius dali te bidi sidigi da. Gasa bidi meni. Tama eno te we bidi hauwa te baptais masiabantu, ena dwagi yai homu ebo dao. Magi baso meni. Te eno we bidi hauwa te baptais magi sogo da, teda augwaligo te “Da Pol wali peyu tama baptais salio,” te po augwaligo wagi da. ¹⁶ E, eno megis tama ma kone palali, te bidi Stefanus dali aga hani dali digi te me eno baptais mani da. Eno gasa me baptais maniwe ma meniwe, te eno konebeo, kegeda pai. ¹⁷ Tama Krais ena tagala palali te we bidi baptais emainogo tagala palobeo. Menio. Agai ena tagala palali eno te Godigo wiegi yai gesi po te we bidi augwalibolo pusumainogo tagala palali. Tama tiyu agai homugo eno te töde koneai bidi dabego wabo pogo agai gesi po page ola menamu te homu yai. Te Krais aga te ni pedaide isibogo bomo eno dolidali weyu tama eno te töde koneai bidigo po pusubo kolesaga wali pabo meni.

Godigo wiegi yai homu kolesaga dali agai genuai bomo dali si po

¹⁸ Eno koneani, te augwali digi dolobo *sę* ebo tüdu pabo we bidi augwaligo homu te Krais ni pedaide isali po te homu kolesaga meni yai bidigo wabo po naga dao. Tiali goli te da Godigo ma dobola sabo we bidi, te dago homu te po da te Godigo genuai bomo hania ola mabo po dao.

¹⁹ Tama tede te Godigo po aşənai bukude Godigo wali po me deli e tiwai elalubao:

“Te eno te töde koneani bidi dabego homu
kolesaga dolaibao, te haniani *sęde* polo konea pabo
bidi dabego homu kolesaga ena sela *sawaibao*,”^c

Godigo te po wai. ²⁰ Tama Godigo te po polobadu obaso, te töde koneai bidi dabe augwali magi yaibawe? Te buku hauwa elalubo po page konebo

^b 1:12 Tpi 18:24 ^c 1:19 Ais 29:14

bage, augwali me magi yaibawe? Ma, te gasa bidigo homu bega sabo po bugagia wabo bage, augwali me mena sę me elalubawe? Menio. Godigo dabolo hanilama hania ola mawai dao, te e tőde elalubo wiegi yai homu kolesaga te olo nai tiwai dao, te homu kolesaga meni yai bidigo olo po naga dao.^d

²¹ Magi baso meni, God aga homu kolesaga te wiegi yai mu, aga tigidali naide kuna konebo kolesaga sia pai elalubo dao. Tama agai te tiwai ilama tama we bidi augwaligo augwa homu kolesagago naga aga konesiąbo sę ilali. Tialima Godigo homugo te dago Kraisde pusubo pogo agai te po augwa homugo konealubo we bidi agai ma dobola saibao. Tőde we bidi augwaligo te pode te homu kolesaga meni yai bidigo olo po naga dao homu yali, tiali goli Godigo homugo te pogo agai we bidi ma saibao. ²²⁻²³ Te Juda bage augwaligo te po wabo dao, “Te ola mabo pode, te dago gedugo te nago te bidigo isąbo genuai bomai sę ebo subaso da, teda dago te nago ola mabo po te mu po dao homu yaibao.” Tiali goli eno “Te Krais aga te ni pedaide isali kolesaga te genuai sę dao,” te po eno te Juda dabebolo obaso, augwaligo te po hagela eyu oda tagalobo dao. Me ma, te Juda hani isąwai bage augwaligo homugo bidi mego aga digi homu kolesagago naga augwalibolo augwa e tőde bidibo kolesaga page hania ola mao, te homu augwaligo ebo dao. Tama tiali goli dago te Krais ni pedaide isali po augwalibolo ola mobaso, hagela homu eyu te pode augwaligo me te homu kolesaga meni yai olo po naga dao, te homu ebo dao. ²⁴ Tiali goli te da Godigo i olama dią sali we bidi, da me badu Juda bage, me badu te Juda hani isąwai bage, dago homu te Kraisde pusubo pogo te Godigo genuai bomo dali aga wiegi yai homu kolesaga me te hania ola mabo dao. ²⁵ Magi baso meni, bidigo gedude te Godigo yali homu kolesaga te page meni yai homu kolesaga dao. Tiali goli agai homu kolesaga wiegi yai mu dao, tego te tőde bidigo homu kolesaga tigidali aiyaba elalubo dao. Tama bidigo gedude Godigo yali sę, te bomo meni yai sę dao. Tiali goli te mu meni, agai genuai bomogo te tőde we bidigo bomo tigidali aiyaba elalubo dao.

²⁶ Eno ama dede, kone palao. Te Godigo dage i wali sogo te dage magi we bidi dabe bidaliwe? Te tőde bidigo gedude dage tomode te haniani naide bugagia koneani bidi hauwa meni, te gasa we bidi tonalubo bomo elalubo bidi hauwa meni, te genuai nogi yai bidi dage tomode hauwa menio. ²⁷ Te meni. God agai homugo eyu tama te tőde haniani naide kuna koneani we bidi hale emainogo eyu, agai te augwaligo gedude te homu kolesaga meni yai bage dią sali. Tama me te tőde genuai bomo elalubo bage hale emainogo eyu, agai te tőde we bidigo gedude bomo meni yai we bidi dią sali. ²⁸ Te tőde we bidi augwaligo gasa we bidi me badude

^d 1:20 Jop 12:17; Ais 19:12; 33:18; 44:25

e homu ebo dao, “Woo, augwali te nogi meni yai bage naga dao, dwai bage dao, augwali olo nai naga dao,” te homu ebo dao. Tiali goli agai te tqde we bidigo gedude genuai wiegi yai nai dolomainogo eyu, Godigo te tobage olo we bidi diq sai dao. ²⁹Tama tibaso, dago hania koneani, te bidi me deligo aga digi nogi Godigo gedude uwawaba me sogobeo. ³⁰Tiali goli Godigo dage Krais Jisas dali wadolali, te agai tilama tama Kraisgo da wiegi yai homu kolesaga elalubo we bidi nigali. Te Kraisde God agai da agai wiegi yai we bidi hani mu ilali, tama dago dwai sede sali sęę seli şanama tama da olo bugagia bidibao. ³¹Tama tibaso, te dago te Godigo po bukude elalubo po me deli tiwai inao. Tede e tiwai po wai dao, “Bidi me deligo te nogi uwawaba sabo po wabo homu eyu da, teda agai dago Genuai Bidigo nogi naga uwawaba sao,” te po aşəani.^e

Polgo te Korin dabego konealubo po dąu omainu te ni pedaide po page pusali

2 ¹Tama eno ama dedeo, polobadu hasia ena dageba asama, tama eno Godigo geme dualali mu po te dagebolo pusagasali, tiali goli eno te haniani pogo te dage homu begelemainogo me wabeo. Tama eno te koneani genuai genuai kolesagade te po dagebolo me pusubeo. ²Te eno homugo digi eno tiwai po walio: te ena dage tomode bidibo sogo, te eno homugo gasa nai me konebo sę me ebeo. Menio. Eno homugo te Jisas Kraisba naga konealumainogo yaibao. Awe, te Jisas Krais ni pedaide isai dao, tede naga eno dagebolo po pusabo homu yai. ³Tama polobadu ena dage dali bidali sogo, te sogo ena bomo meni yani. Ena moni wi elalu, tama ena tigi didibili hauwa yai. ⁴Tama eno ola mani po me, te dagebolo pusali po me, te eno te kolesaga koneai bidigo kolesaga selama, te dagego homu bega sabo po me wabe. Menio. Dagego te Tedali Mobo Bidigo bomo kuna konemainogo eyu, eno Godigo po dagebolo ola mayu wai dao. ⁵Eno tama tiali. Magi baso meni, eno homugo te bidigo homu kolesagaba te dagego homu teba tialugobeo. Menio. Eno homugo te dagego Godigo bomode naga te Kraisde konealubo po dąu weyu, tama teba naga duga homu bugagia tialuaibao. Tama tibaso, eno te Kraisgo po dagebolo pusuyu, eno te kolesaga koneai bidigo po wabo kolesaga wali pabeo, eno te tobage homu bega sabo pogo te Kraisgo po dagebolo pusubeo.

Godigo Tedali Mobogo te kuna koneabo kolesaga dabolo mani

⁶Te tqde kolesaga koneai bidi dabego kolesaga eno dagebolo ola masiwani goli, te Godigo Mobo Bidigo te Godide ola mabo po page kuna konebo usu yali we bidi augwalibolo eno te koneani kolesaga po pusubo dao. Tiali goli te tqde bidi dabego koneani kolesaga po me wabo

^e 1:31 Jer 9:24

meni. Tama te təde toboli bidi dabego kolesaga me dago wabo meni, te augwaligo bomo kimi megi meni ebo. ⁷Tiali goli dago te Godigo koneani kolesaga po pusubo dao. Te po te bidi dabego koneidali weyu geme dualaluali. Godigo te tə dagalu nigisiqbadi tama agai te koneani kolesaga sa muani te dabolo mayu, tama te koneani kolesagago dago te Godigo bomai ula digi nosali selama tama bugagia bidimainu yalio. Tama te tobage koneani kolesaga po dago te we bidibolo ola mabo da. ⁸Te e təde toboli bidi deli mego te koneani kolesaga po page me konebeo. Menio. Te augwaligo konegi sogo da, teda augwaligo te ula yai bomo elalubo Genuai Bidi me sisinama, tama aga te ni pedaide elama me isigi meni dao. ⁹Tiali goli dago te sə dabe po wabo te Godigo po bukude wali po gilama yali,

“Te we bidigo gedugo susiąwani nai, tama odogo
me odobe, tama bidigo homuba me pedalisiąwai, te
nai digi Godigo sisi ilali te we bidi dabe augwaligo
aga godolo mu ebo bage augwalibolo momainogo
yai.”^f

¹⁰Tiali goli te polobadu geme dualaluali po te Tedali Mobo Bidigo səde te Godigo dabolo ola mani. Tedali Mobo Bidigo te tigidali nai osola suyu tama koneani. Tama te Godigo homu kolesagade aga geme dualali nosali sə yabo homu, te me te Mobo Bidigo konebo dao. ¹¹Mena bidigo te gasa bidi mego homu konegowe? Menio. Te bidi aga mobogo digi, te aga tomode bidibo, tego naga koneani. Te tiwai naga, te gasa bidi me deligo te Godigo homu kolesaga me konesiąwai. Te Godigo Mobogo digi agai naga konebo dao. ¹²Tama dago e təde we bidi tonalubo mobo me sabeo. Menio. Dago te Godidu asali Mobo Bidi sali, tama dago te Godigo dabolo olo maiabo tigidali nai konemainogo yalio.

¹³Tama tibaso, dago te Godigo Tedali Mobo Bidi elalubo we bidibolo te Godigo olo maiabo naide po hanilama pusubadi, dago te bidigo homude selama dago te po me wabo meni. Menio. Te Tedali Mobogo digi da ola menama, tama dago te po ola mabo dao. ¹⁴Tiali goli te Tedali Mobo Bidi elalusiąbo bidi da, agai te Godigo Mobogo olo mabo nai dabe sogobeo, aga usu egobeo. Magi baso meni, agai homugo te page meni yai nai dao, tama agai te naide te page bugagia kongobeo. Te naide po dago te Tedali Mobo Bidide naga sali, tama te Tedali Mobo Bidi meni yani bidi da, agai te po page me dagalogobeo. ¹⁵Tialima, te Tedali Mobo elalubo bidigo, agai te tigidali nai dagalama, tama te nai page konebo usu ebo dao. Tiali goli te bidi me deligo te Tedali Mobo elalubo bidi dagalainogo ebo te usu me egobeo. ¹⁶Awe, te Godigo po bukude po me elalubo e tiwai wabo,

“Dego te Genuai Bidigo homu konebaso, te agai

^f 2:9 Ais 64:4

Genuai Bidi mobo mabo usu egowe? Bidi meni,” te
asęani po tama wabo. Tiali goli te Kraisgo homu
kolesaga dago elalubo dao.^g

Godigo po pusubo bidi da te Godigo sę ebo bidi dao

3 ¹Tama tialima, ama dedeo, polobadu eno digi dagebolo mani po te
eno dagebolo te Tedali Mobo Bidi elalubo bidi dabebolo mani po
tiwai gilama me mabeo. Usubeo. Menio. Eno dagebolo mani po te eno te
poloba homu elalubo bidi dabebolo mabo po tiwai mani. Te sogo dage te
Kraisgo kolesagade kuna konesiąyu tama te wai bǫų tiwai bidibadi tiwai
dao. ²Eno po digi po begelama obao. Dage te Krais wali pabo kolesagade
wai bǫų tiwai bidibaso, te eno po dagebolo ola mobadi, eno te yadala
pai po naga dage ola mani, te wai bǫų ame pe mabo tiwai. Eno te dili
yai nai dage mabeo. Te sogo dagego te dila pai nai tuabo ąq isawai,
dagego Godigo sęge yai po sabo usube. Megi me dage usu yabo me
elalubao.^h ³Magi baso meni, dage te poloba meda yai homu kolesagade
me bididubao. Awe, te ama hasi dali dwai homu eyu tama konila po
wabo homu kolesaga te dagede me elalubao. Tama te kolesaga dagego me
idubo, te poloba dobo homu kolesaga ebao. Te tama tebo kolesaga te tőde
bidigo ebo kolesaga naga dao. ⁴Dage tomode bidi me badu deli deligo te
po wabo, “Ena Pol wali pabo dao.” Tama gasa bidi me badu deli deligo
te po wabo, “Ena da te Apolos wali pabo bidi dao,” te po wabo. Te tiwai
kolesaga ebaso, dago koneani, te dage tőde bidi tiwai mę bidibao.

⁵Dagego bugagia homu kone palao. Apolos wali te de dawe? Ena Pol,
ena de dawe? Da si da te sę bidi naga bidibao. Genuai Bidigo gasa gasa
sę da sibolo mawai, tama da sigo te yali sęde dagego konealubo po te
Kraisde dąų wali. ⁶Eno da te nai wai bulali. Te Apolosgo te nai wai bulali
madi pageba wę gegeli pali. Tiali goli God agai te nai pua pai holomainu
iliduali. ⁷Tama te nai wai bulali bidi, agai nogi te meni yaibao. Tama te
wę mabo bidi, agai nogi me te elalugobeo. Magigo menio. Godigo te nai
holomainu ilidubao, agaduba deligo genuai nogi naga elalubo dao. ⁸Tama
te nai wai bulubo bidi me, te nai waiba wę mabo bidi, te augwali sigo sę
te deli tigi poai naga yali. Tama augwali si deli deligo te augwa si yali sę
usu nama, te Godigo augwalibolo mabo dwagi yai nai saibao. ⁹Magi baso
meni, da si te Godigo deli sę naga ebo sę bidi dao, tama dage te Godigo gi
tiwai dao.

Te Godigo we bidibolo po pusubo sę bidi te kamda sę ebo bidi tiwai

Tama dage te Godigo be tiwai, aga te be sędu bidibao. ¹⁰Te God aga
olo da tau sali wiegi yai kolesagade ena te Godigo po pusubo sęde te

^g 2:16 Ais 40:13 ^h 3:2 Hib 5:12-13

polalubo tobolu bidi te kolesaga koneai kamda bidi tiwai pedalali, tama eno te be pos ni bulalio. Tama gasa bidigo te pos ni daide ugxadu te be sə eba. Tama tigidali bidi augwali deli deli dua bugagia koneama tama te pos ni daide be sə yao.¹¹ Dagego koneani, te be pos ni mu bulai elalubao, te Jisas Krais naga dao. Tama niwai bidi me deligo agai te gasa pos ni me bulainu ebo te usu me egobeo.¹² Tama te pos ni daide ugxadu be sə yainu ebo bidi augwali deli deligo haniani naigo te be sə yaibao. Bidi me deligo te wiegi yai kapa nogi gol tego te be sə yaibao. Bidi mego te kapa nogi silvago ma te dila pai masigi mugo, me te nigo, ma te kalago, ma te gasagi yai nosai dili dabego te be sə yaibao.¹³ Te magi naigo te be sə yainu homu eboso da, teda te tigidali bidigo sə yali te nosali po tū ebo sogo te hania haninama pedalaibao. Tama te po tū ebo side te sia dabo posolo ebo tiwai pedalaibao. Tama te sia aga digi te tigidali bidi deligo yali sə usu sesa pelama, tama augwaligo yali sə te wiegi yai yaliwe ma meniwe, te augwaligo koneaibao.¹⁴ Te bidi deligo be te pos ni daide sə eboso, tama agai te be siago disiąboso da, teda te sə bidibolo Godigo dwagi yai nai mawaibao.¹⁵ Tiali goli te sə bidi me deligo be te tigidali siago dobaso da, teda te bidigo yali tigidali sə te hagawaibao. Tialima te sə bidi aga digi te bugagia bidaibao, tiali goli te bidi siago dabo be buluba wi paligo te sana pali bidi tiwai bidaibao.

Dage te Godigo wiegi yai be dao

¹⁶ Dage da te Godigo wiegi yai lotu be tiwai dao, tama te Godigo Tedali Mobo Bidi te dage tomode bidibao, bidi aga bede bidibo tiwai bidibao. Tama te dagego me konebewe?¹⁷ Te bidi deligo Godigo te wiegi yai lotu be elalubo te dolobaso da, teda Godigo te bidi dolaibao. Magi baso meni, te Godigo be te tedali gasagi yai mu elalubo, te Godigo be naga dao. Te dage tama dao.

¹⁸ Tiyu te bidi me deli agade digi tibo po ola mayabuo. Te dage tomode bidi deli agai te e təde homu kolesaga wali peyu tama te tiwai homu eyu, ‘Eno kolesaga koneai elalubo,’ aga te homu eyu da, teda aga hasia bolo aga te təde we bidigo gedude te wabo pabo bidi tiwai pedalao. Tama tiyu aga te Godigo gedude te kolesaga koneai bidi mu pedalaibao.¹⁹ Magi baso meni, te e təde koneani kolesaga te Godigo gedude te wabo pabo bidigo kolesaga tiwai eba. Tede te Godigo po bukude te e tama tiwai po wai:

“God agai tilama tama augwaligo kolesaga koneanigo
te augwa digi tibo haniani kolesaga koneai bidi
dabe sali, te bidigo ba munama te kebi sabo tiwai
gilama ebo dao.”ⁱ

²⁰ Tama tede te bukude te tiwai po me wali:

ⁱ 3:19 Jop 5:13

“Genuai Bidigo koneani, te kolesaga koneai bidi dabego homu kolesaga te du walisiabo olo nai tiwai ebo dao.”^j

²¹Tama tibaso, te dage tomode te bidi me deligo te da Godigo po pusubo bidigo nogi ugwaba sabuo. Suao, te tigidali nai duga nai dao. ²²Ena Pol, me Apolos, me Pita, da te dage tau sabo se ebo bidi dabe da. E tode elalubo nai tigidali me, tego dage aiyaba elaluama tonaluabo nai meni, dagego te nai tigidali aiyaba elaluama tonaluabo bage dao. Te tode bidibo sogo me, te isibo kolesaga me, te megis elalubo sogo me, te nosali pedalabo sogo me, te tigidali te dagego nai dao. ²³Tama dage te Krais dologode bidiyu dage agai we bidi hani dao. Tama Krais aga digi God dologode bidiyu aga Godigo bidi dao.

Genuai Bidigo digi aga sę bidi dagalaibao

⁶Ama dedeo, eno homugo dage tau sabo homu elama, tama eno te ena dali Apolos da side te tamadi tama wali po wali. Dagego homugo da side homu koneama, tama te Godigo po bukude wali po tiwai gilama dolo wali peyу tama te po me boligio. Tama tiyu dagego hagoma eyu tama bidi me deligo nogi uwgaba siyu tama gasa bidi mego nogi aiyaba munu me elalugio. ⁷Abagi, magi yaliwe? Dego nage genuai bidi muai dawe? Tama nago mena nai te Godide sisawani nai elalubowe? Te mu tama nago te nai

j 3:20 Tib 94:11

Godide saligo da, teda magi baso te nago naga nogi ugwaba siyu, te naga digi nage te nai page bidi da wainogo ebawe? Te hagoma ebo tagalao.

⁸Awe, dagego homugo te dagego haliga pağana palio! Dagego homugo te dage tigidali nai elalu tama dage usu yai elalubao. Te dagego da aiyaba elaluama, tama dage te gavman tuni bidi king tiwai pedalalio! Mu tama dawe? Woo, te duga homu naga dao. Eno homugo dage te tuni bidi king mu pedalomainao. Dage tama tigi sogo da, teda da me dage dali te tuni bidi dabego bomo elalugi da. ⁹Magi baso meni, eno te homu yali: Godigo te da aga po sela pabo şe bidi da te nosali badu mubo bidi tiwai ilama bidibao. Da te po tu yali bidi dabe da olama tama da isimainu emainao wai. Tama augwaligo da tigidali te ensel dabe me te tqde bidi dabe dali augwaligo gedude da elainu homu yali, te tigidaligo da dali gisugu mawainogo yali. ¹⁰Te Kraisgo nogi ugwaba sainu, da te tqde we bidigo gedude te kolesaga geda muyu te polobo bidi tiwai bidibo dao, tiali goli dage te Kraisgo kolesagade te kolesaga koneai bidi tiwai bidibao. Dage bomai we bidi mu bidimainogo eyu tama dago dena digi bomo meni yai bidi dabe ilali. Dage genuai wiegi yai nogi elalubao, tiali goli dago nogi meni yanio. ¹¹Polobadu me tama bidada asali te meg i sogoba me usu nagasali, da Godigo po sela pabo bidi dabe, da nai sili bidiyu, tama dago dogoni me wa peyu aq nogone ebo, tama da badi ugwa naga elaluali. Augwaligo nogo tudi badu da eliyu ebo dao. Tama da bugagia dulalu bidabo pesage meni yai dao. ¹²Dago dena nogogo digi masigi dena tigi tau sabo şe eyu dene mu ebo dao. Augwaligo dwai posobo po dabolo wabo, tiali goli dago augwali bugagia bidabo po naga augwaliba ponoyu ebo dao. Augwaligo dabolo dwai şe eyu, te dene mabo kolesaga ebo, tama augwaligo te tiwai şe eyu dago sula tagalama, te sege bugagia tolobo dao.^k ¹³Augwaligo po dwai mu da dali weyu ebo dao, tiali goli dago homu nagame ilibo po dua digi augwaliba weyu ebo dao. Da te tigidali tq pedaide bidibo bagego gedude te dwai pobele bage tiwai mu gagawali. Da te tigidali bidigo gedude te nai ulubo genagide nai kagali te aqjo sela şabo meda yai nai tiwai dao. Da te tiwai bidali, te meg i sogoba usu nagasu te tiwai me bidibao.

Te Korin we bidi augwaligo me te Polgo ebo kolesaga yao po wai

¹⁴Te ena dali Apolos da si hobedagia bidibadi dage bugagia te po aşəanigo te dage hale eyu dwai bidimainu homu me ebeo. Menio. Eno wai puluba tiwai dage eno dwagi yai homu eyu godolo ebaso, tama eno dage homu tau sabo po ola momainu obao. ¹⁵Te mu tama dage te Kraisgo kolesagade te dage bugagia tonalubo bidi te bidi sese umabo te 10,000 bidi elaluyu da, tagalao, te dagego aya hauwa me elalubeo. Menio. Te

^k 4:12 Tpi 18:3

¹⁸ Te dage tomode bidi meba augwaligo homugo te ena dageba asogobe homu eyu, tama augwali hagoma ebao. ¹⁹ Tiali goli menio. Te Genuai Bidigo homu usu yali da, teda ena dage bidiboba polo asaibao. Tama eno te hagoma ebo bidi dabego wabo po naga konegobeo, te augwaligo te Godigo sę yabo bomo me elalubowe ma meniwe, te me eno koneaibao. ²⁰ Magi baso meni, te Godigo bidi deli tonalubo si, te bidigo ebo sęde naga dago God aga dali bidibo te konebo dao. Aga wabo pogo naga dago konegobeo. ²¹ Dagego mena kolesaga godolo ebowe? Te dagego homugo eno te dage dodolabo dono wąbi tolasa ena dageba asomainogowe? Ma, dagego homugo eno te dage dali dwagi yai homu eyu godolo ebo kolesaga me, te homu nagame ebo kolesaga elalubo te eno dageba sela asomainogo homu ebo dawe?

**Te Godigo po wali pabo bagego te augwali tomode
pedalubo dwai kolesaga dodolao po wali**

(Đại 5-6)

Te dwai penani sę te Korin bage tomode pedelali

5 ¹Te we sabo kolesaga togolama dolobo sē te dage tomode mu tama elalubao, te po wabo eno me odali. Tama te we sabo togolama dolobo gasagi yai kolesaga me, te tobage kolesaga te Godigo po odisawani we bidigo me isābo dwai kolesaga dao. Te e tama tiwai: te dage tomode bidi me deligo aga ayago we sai.¹ ²Tama dage, dage me tama duga nogi uwabawa siyu hagoma idubawe? Te dagego tede hagoma ebo kolesaga tagalama, te dage homu dene eyu gela wagi sogo da, teda te usu igi mu da. Tama tiyu, te dagego te dwai penani kolesaga ebo bidi sela şanama, tama dage dali me bidimainu me elamu dao! ³Te enade, mu tama, te eno tigi te dagede digibulu elalubo, tiali goli te eno homude

¹ 5:1 Bom 22:30

ena te dage dali bidibao. Tama ena da te ena dage dali mu bidibo tiwai aq ebo, tama eno te kolesaga ebo bidigo sə te eno me dagala suai dao.
 4 Eno te tiwai po wai dao: te Genuai Bidi Jisasgo nogide te dage deliba sisinama po miao. Tama eno homu me, te dago Genuai Bidi Jisasgo bomo me te dage dali bidaibao. 5 Tama tiyu te bidi dagego te Satango nogoba munama, te agai te dwai sə yali bidigo tigi dolomainao. Dago te tiwai elama, tama aga tigi dolai goli Godigo te bidigo mobo noma bidi te Genuai Bidi ma asobo side ma dobola somainogo tama tiao.

Te Korin bidi dabe augwaligo te dwai sə ebo bidi sela şəmainu wai

6 Te dage tomode te bidi me deligo te dwai penani sə idubao, tama dagego tede hagoma ebo kolesaga ebao, te dwali. Te aga dage dali me bididubadi, te aga te tubo nai bret bo dabo nai yis tiwai dao. Te dwasianu yisgo te tigidali bret bo domainu ilibo dao. Te dagego konesiąyu ebawę?
 7 Dage da te yis meni yai bret tiwai dao. Awe, te eno koneani. Tiali goli te dwai penani sə ebo bidi dage tomode bididubadi aga te yis tiwai eyu, tama agai dwai sə ebo kolesagago dage me dolaibao. Te Juda dabego Pasova nai tubo olo bidibo side, tede augwaligo te sipsip wai ela tuyu, tama te sogo me te bo disławai bret me tuai dao. Te tiwai me megı te dago Pasova sipsip Krais aga isəma te ofa mayu yai dao. Tama tibaso, dagego te bidi buluba şayaо, te dage te gesi bret, te yis meni yai bret tiwai ma pedalomainogo yao.^m 8 Tama tilama, da dwagi yai homu eyu deliba sisinama tama dago Pasova nai tuinao. Tede eno po digi po begelama tama po page obao, dago tama tuyu dago te poloba yis dali tulamuo, te yis meni yai bret naga tuao. Te po page e dao: dago te dwai sə yabo homu dali te dwai dwai sə ebo kolesaga dali te si ilamuo. Meni. Dago homu mu naga eyu, tama mu po naga weyu yao.ⁿ

9 Te eno gasa me dagebolo aşəna tolali pasde eno e tama po wai: “Dagego te dwai penani sə eyu we sabo kolesaga dolobo bidi dabe dali kisasa biligimio,” te po aşəna tolali. 10 Eno te we sabo kolesaga doloyu ebo te Godigo po odışławani tigidali bidi dabe augwali te mu tagalao po weyu eno te po wabe. Te təde bidi dabe augwaligo Godigo po wali pisayu tama te mena nai pesa ebo bidi dabe me te gasa bidigo nai anoma elama sainu ebo bidi me, te tibo godiba lotu po wabo bidi dabe, te augwali mu tagalao olama eno te po me wabeo. Te dagego te dabe mu tagalabo homu egi sogo da, teda dagego te tigidali tə mu taga pelama, tama gasaba bidigi pigi da. 11 Tiali goli eno aşəni po page te e tiwai dao: te bidi me deligo aga dage dali ama da wabo bidigo te we sabo kolesaga dolobo me, agai te gasa bidigo naide pesa eyu, me agai tibo godibolo lotu po weyu, me agai posobo po obaso me, ma agai bomai wę tubaso, ma agai te gasa

^m 5:7 Sai 12:5 ⁿ 5:8 Sai 13:7; Bom 16:3

bidigo nai anoma elama te tigidali kolesaga eboso da, teda dagego aga dali kisasa biligio, aga dali abagi me wagio. Menio. Dagego te tiwai sę ebo bidi dali te nai me munu me tulamo dao. ¹²⁻¹³ Te Godigo po odisäma dago hani bulu badu bidibo we bidi dabe dagalobo sę, te eno sę dawe? Menio. Te God aga digi augwaligo kolesaga dagalaibao. Tiali goli te dage dali bidiyu Godigo po wali pabo we bidi hani tomode elalubo bage, te augwali dagalobo sę, te dagego yabo sę dao. Tede te Godigo po bukude po me deli elalubao, te po dago wali pinao, te po e dao: “Dagego te dage tomode bidibo te dwai bidi buluba mu sela saya.”^o

Te Godigo po wali pabo we bidigo te augwa ama po tų ela magio wali

6 ¹ Te dage tomode bidi me deligo po te gasa bidi me dali elalubaso da, te agai te Godigo we bidi bolama tama te Godigo po odisawani jas bidi dabe gesabidide te po tų egi pogowe? Ya! Agai te tebo kolesagade te aga hale meni yaibawe? ² Da Godigo we bidi te dago te tigidali tőde bidigo kolesaga nosali dagalainu yaibao, te dagego konesiamawe? Mu tama, te dagego te tigidali tőde bidigo kolesaga dagalaibao. Tama magi egowe? Te dagego duga hasi te tobage dwasianu po naga dagalobo te usu meniwe? ³ Te dago te mobo bidi ensel dabego kolesaga me nosali dagalaibao, te me dagego konebewe? Mu tama, te dago augwaligo kolesaga te dagalaibao. Tama tibaso, dago te tőde dwasianu nai dabe po dagalobaso te usu mu yaibao. ⁴ Tama tialigo da, teda dagego e tőde naide po elalubaso da, magi baso dagego te po dagalobo sę te Godigo po odisäma te dago gedude nogi meni yani bidiba mobawe? ⁵ Eno te po wabode dage bugagia bidimainu obao, te dagego te tiwai ebo kolesagade te dage hale yao! Magi baso meni. Te dage tomode te ama name si tomode pedalobo po dagalabo te kolesaga koneai bidi me deli naga meni ebawe? ⁶ Tiali goli dagego te tiwai ebo meni. Te po pagede naga te ama me deligo te gasa ama me te po tų ela mayu, tama te Kraisde konealubo po dąu wasiąwani bidi dabe gedude te po tų ilibo da. Te dwali.

⁷ Awe, dagego duga hasi te ama dabe po tų ilibo, tama te kolesagade digi te dage tulualio. Magi baso augwaligo te dwai sę dagebolo emainu gogolobewe? Magi baso te augwaligo dagego doado bage anoma elama somainogo gogolobewe? Dagego te tiwai egi sogo da, teda tebogo dagego te Godigo po odisawani bidigo gedude po tų ebo kolesaga aiyaba elalugi da. ⁸ Tiali goli menio. Duga digi te meba bidi dabe dali dwai sę elama, tama augwaligo doado bage anoma elama sali! Awe, dagego te tiwai dwai kolesaga te duga ama dabe mu dali ebo dao. ⁹ Te dwai kolesaga ebo bidi dabe, augwali te augwali Godigo te we bidi tonalubo bomo tomoba me pogobeo. Te dagego konebewe? Tiyu dagego te duga homuba digi tibo

^o 5:12-13 Bom 13:5; 17:7

po ola maiabuo. Te penani sę kolesaga ebo bidi dabe me, tama te tibo god wali pabo bidi dabe me, te we sabo kolesaga dolobo bidi dabe badi, tama te we dali ebo kolesaga tiwai eyu godolo ebo bidi dabe me, tama te hale ebo kolesaga te gasa bidi dabe dali ebo bidi dabe me,¹⁰ tama te nai wi sabo bidi dabe tama te gasa bidi dabego doado bagede pesa homu ebo bidi dabe me, tama te bomai wę tubo bidi me, tama te gasa bidi dali posobo po wabo bidi dabe me, tama te gasa bidi dabego doado bage anoma elama sabo bidi dabe me, te tobage kolesaga ebo bidi dabe tigidali te augwali Godigo we bidi bugagia tonalubo bomo tomoba pabo usu me egobeo.¹¹ Tama polobadu dage meba te tiwai sę ebo we bidi dabe bidaluali. Tiali goli dagego te dwai sę ebo tagalama, tama baptais salio. Godigo dage aga da olama sa muai. Dagego te doloba pai nogi salio. Te Genuai Bidi Jisas Krais me te Godigo Tedali Mobo augwali sigo sę eyu, tama dage Godigo gedude doloba pai we bidi hani tama pedalai dao.

Te dago tigigo ebo kolesaga ebogo te God nogi ugwaba sao

¹² Dage tomode te bidi me deligo e tiwai homu ebo dao, ‘Te tigidali sę eno ebo da te usu egi da.’ Awe, mu tama. Tiali goli te tigidali sę ebogo ena tau me sogobe. Tigidali kolesaga eno yabo usu da yaibao. Tiali goli eno te kolesaga me deli ebogo te ena tonalumainu me gogologobeo.

¹³ Gasa bidigo eno po aiyaba elalumainu eyu e tiwai po waibao, “Tubo nai te tabigo sabo nai da, tama tabigo te nai sabo dao.” Agai homu te tiwai me aga tigigo te dwai penani sę ebo te me usu dao, te aga tigigo yabo sę dao. Awe, agai te tubo nai dali te tabi dali side wali po te mu dao. Tiali goli Godigo te si dali nosali silaibao. Tiali goli dago tigigo te penani kolesaga yabo nai meni. Menio. Dago tigi da te dago Genuai Bidigo nai dao. Tama Genuai Bidi te tigi tau sabo nai dabolo mabo dao.¹⁴ Tama tiyu, God aga bomogo digi te dago Genuai Bidi te gę pagede hodolali, tama te tiwai dago tigi tau siyu agai da me hodolaibao.

¹⁵ Te dage deli deligo tigi te Kraisgo tigi nogo sęgą tiwai elalubo, te dagego me konebewe? Tama eno te Kraisgo tigi pedai me badu dagala selama, tama penani eyu, te genuai tıdu bilibo wego tigiba munama elalumainu homu egowe? Munu me tegobeo. Mu menio!¹⁶ Te penani sę ebo we dali kisa sali bidi, te aga dali te tigi deli aga dali yali, te dagego konebewe? Godigo po bukude te tiwai po olama hania wali, “Te bidi dali aga we dali augwali si tigi deli naga pedalali,” te po aşeanı.^p ¹⁷Tiali goli te Genuai Bidi dali kęs sali bidi da, agai homu mobo bidi te aga dali deli elalubo dao.

¹⁸ Dage te penani kolesaga idali weyu te boi bidi tiwai wi pao! Te tigidali dwai sę te bidigo ebo, te tigi bulu badu ebo dao. Tiali goli te

^p 6:16 Gag 2:24

penani sə kolesaga ebo bidi, agai aga tigi aga digi dolobo dao.¹⁹ Te dagego tigi da, te homude Godigo Tedali Wiegi Yai Mobogo be elalubao, te dagego konebewe? Godigo te Tedali Wiegi Yai Mobo te dagebolo manio, tama te Mobo dage tomode bidibao. Dage te dugade digi me elalubo meni.⁴ ²⁰Menio. Godigo te genuai naigo mu dage ma abelalio. Tama tibaso, penani sə isayu, te dagego tigigo te dagego Godigo nogi uwawa sabo kolesaga naga yao.

Polgo te we sabo kolesagade po wali

(Dq̄i 7)

Polgo te we sabo kolesagade ola mabo po wai

7 ¹Megi da eno dagego enaba tolali pasde aşəani po wei ponainogo homu ebao. Eno homugo te bidigo te we dwasianu me nogogo diaşıabaso da, te wiegi yai dao. ²Tiali goli te haniani penani ebo kolesaga te tq̄de elalubao. Tama dagego te kolesaga idali weyu, te tigidali bidi deli deligo te augwa we sao, tama tigidali we dabe deli deligo me te augwali sali bidi dali bida. Te bidigo tigi te aga wego da, tama bidigo me geą siyu tama dą̄ munu me olamuo. Te tiwai naga, wego tigi te aga bidigo da, tama wego me geą siyu tama dą̄ munu me olamo dao. ³(-) ⁴Magi baso meni. Te wego aga tigi me tonalugobeo. Menio. Te aga bidigo tonalubao. Tama te tiwai naga, te bidigo aga tigi geą selama dą̄ weyu munu me tonalugobeo. Menio. Te aga wego tonalubao. ⁵Dage we de bidi si taluama bidibo, te me deligo me tudiba muyu tama aga tigi dą̄ weyu geą siyu me elamuo. Te kolesaga ebo tagalao. Mu tama, duga si homu deliba munama, tama duga si tigi te pewadage sogo habu selabo homu elama, te duga si Godibolo gedu haluasa po wabo sə yainu osogo habu selabo homu eboso da, te usu da. Tiali goli nosali te duga si homu deli elama te duga si tigi deliba ma taluao. Tiyu duga digi te duga tigi ma tonaluabo usu isayu, tama Satango dage usu siyu, te dagego dwai penani sə emainogo sinabuo.

⁶Te e we sabode wabo po, te dagego enabololo hanalu obaso tama eno te usu da wai. Tiali goli te eno dagego we sao po weyu te bomai po tiwai me ebeo. ⁷Te eno homugo tigidali we bidi te ena digi tiwai bidimainu homu ebo dao. Tiali goli eno koneani, te Godigo tigidali bidi deli delibolo te haniani sə yabo kolesaga mani. Te me deligo te gasa tobage me tiwai tedali siyu, te gasa mego te gasa tiwai tedali sali.

⁸Tiali goli te we sisəwai bidi me, te bidigo sisəwai we badi, tama te augwa bidi dabe isai we dabebole me, te augwalibolo eno te tiwai po

⁴ 6:19 1 Ko 3:16; 2 Ko 6:16

obao: te augwali ena tiwai bidibaso da, te wiegi yai dao. Ena da te we sisayu enaduba bidibo bidi dao. ⁹Tiali goli, te augwaligo homu me tigi te augwa digi bugagia tonaluabo homu usu yabo qo isabantoso da, te augwa sao. Te augwali we sobaso da, te wiegi yai da. Tiyu augwaligo homu hogodaluyu tama dwai se ebo homu yabuo.

¹⁰Te we sali bidi me, te bidigo sali we te augwalibolo eno te bomai po mobao. Te eno digi eno bomai po me wabeo. Menio. Te dago Genuai Bidigo polobadu mani bomai po dao. Te e tiwai elalubao: te wego aga bidi me taga pelamuo wali. ¹¹Te aga bidi tagalai baso da, te aga olo bidimainao. Te meni baso da, te aga ma begasa pelama, tama aga bidi dali deli homu elama bidigi pao. Tama bidigo me te aga we munu me sela sagio.^r

¹²Tama dage tomode gasa bidi dabe augwalibolo te ena digi eno naga te po obao, te dago Genuai Bidigo wali po meni. Eno e tiwai po obao: te ama me deligo we sali tama te wego te Kraisde konealubo po däq wasiąbaso, tama te we aga dali bidainogo homu ebaso da, te amago te aga me sela sagio. ¹³Ma, we me deli selama tama te we aga bidigo te Kraisde konealubo po däq wasiąbaso, tama te bidi te we dali bidabo homu ebaso da, teda te wego aga te bidi me taga pelamu dao. ¹⁴Magi baso meni. Te konealubo po däq wasiąwani bidigo te aga we dali mu kęq pelama bidiyu, tama tebogo te aga te Godigo gedude te dwagi yai bidi ilaibao. Te tiwai naga te Kraisde konealubo po däq wasiąwani wego te aga bidi dali mu kęq pelama bidiyu, tama tebogo te we aga te Godigo gedude te dwagi yai we ilaibao. Te meni yani da, teda dagego wai puluba dabe te augwali dwagi yai me egobeo. Tiali goli megis te augwali Godigo gedude wiegi yai elama mu bidalubao. ¹⁵Tiali goli, te konealubo po däq wasiąwani bidi agai te aga Kraisde konealubo po däq wali we tagalabo homu ebaso da, te usu da, agai tagalomainao. Te tiwai kolesaga pedaliyu, te duga ama ma abe aga te kalabus tiwai me elalugobeo. Magi baso meni. Godigo dage i olama, te wiegi yai homu nagame ebo kolesaga wali pomainu ebo dao. ¹⁶We, nago te naga bidi tau selama, te aga Godigo po wali pabo bidi pedelabo, ma meniabo, te nago konebeo. Te nage bidi, te nago naga we tau sobaso tama aga te Godigo po wali pabo we pedelabo, ma te meniabo me, te nago konebe dao.

Te Godigo dabolo doba yali kolesagade te da bidaluao

¹⁷Tiali goli dago Genuai Bidigo te deli deli bidibolo dobaba pali se eyu, tama aga te se eyu bidibadi te Godigo aga i obaso da, teda aga te sede naga bilao. Eno te tiwai bomai po te tigidali Godigo po wali pabo we bidi hanibolo bomonama ola mabo dao. ¹⁸Te po page e tiwai dao. Te

^r 7:11 Mat 5:32; 19:9; Mak 10:11-12; Luk 16:18

bidi me deli te Juda dabe augwaligo aga tigiwali sa muyu tama togolama tama te tiwai bidibadi Godigo aga i waliwe? Teda, agai te aga tigiwali togwali te ma dodolabo homu egio, te tagala. Te gasa bidi me deli aga tigiwali togosiąwai bidibadi te Godigo aga i waliwe? Teda, agai tigiwali megi togogio. ¹⁹Te tigiwali togobo kolesaga, te Godigo gedude te olo nai tiwai dao. Tama te tigiwali togosiąbo kolesaga me te aga gedude te olo nai tiwai dao. Tiali goli te Godigo bomai po wali pabo kolesaga, te mu nai dao, te seğe dao, tede magigo meni wagimio. ²⁰Te bidi te şe me delide bidibadi tama Godigo aga i obaso da, teda aga te şede me bididua. ²¹Te e tiwai dao. Te nage masigi sisąbo olo şe ebo bidi bidibadi tama Godigo nage i waliwe? Teda, tagala, magigo menio. Tiali goli, nago te masigi sisąbo olo şe ebo tagalabo sunumi elalubaso da, teda nago te sunumi wali pao. ²²Tiali goli te olo mu şe ebo bidi bidibadi tama Godigo aga i wali, megi da te aga dago Genuai Bidigo selama, tama te Genuai Bidigo gedude te aga olo şe ebo bidi me bidigobeo, te aga olo naga bidibao. Te tiwai naga, te olo wiegi yai bidali bidi, te olo şe me isabantu tama Genuai Bidigo aga i wali, megi da aga te Kraisde masigi sisąbo olo şe ebo bidi tiwai pedalama bidibao. ²³Te Godigo te genuai naigo mu dage ma abelalio. Tama tibaso, dage te bidi dabede te masigi sisąbo olo şe ebo bidi tiwai me pedaligimio, te bidi dabego olo nigibo bomo yai po dologoba bidigi pigimio. ²⁴Te ama dedeo, te dage deli deli te niwai şe bidi bidibadi tama Godigo aga i obaso, aga te şede naga te God dali deli homu eyu tama bidimainao.

Polgo te we sisawai bidi me te bidigo sisawai we augwalide wali po

²⁵Te bidigo sisawai we te augwalide po tama, eno te dago Genuai Bidigo bomai po me elalubo meni, tiali goli eno te ena homude po pusubao. Te Godigo olo tau sabo wiegi yai kolesaga enade elama, tama agai ena te homu mu naga ebo bidi ilali, tama dage enaba duga homugo tialubo te usu dao. ²⁶Eno homugo e tiwai kolesaga ebo te wiegi yai da wai: te megi tama sogo te genuai seğe dali dene dali si te daba pedalubao, gasa bidi dabego nogogo. Tama tibaso, dage tigidali deli deli te megi bidibo tiwai gilama te tama bidaluao, te eno homu dao. ²⁷Te nago we sai dawe? Tialima, te nago aga tagalabo sunumi gegebo şe me egio. Te nago we sabe dawe? Teda, nago te we sabo homu ma elamuo. ²⁸Tiali goli, te nago we siyu da, te dwai şe meni. Tama te gesi wegi te bidigo siyu da, te wegi agai te dwai şe me ebeo. Tiali goli te we sali bidi me te bidigo sali we te augwali seğe meba te tqde elaluabao, tama eno homugo te tobage şe dageba pedalidali homu eyu eno e po obao, te dage megi bidibo tiwai gilama te tama bidaluao.

²⁹Ama dedeo, eno te megi wali po te page e dao: te tq dali dagalu si silabo bodolu megi da pewadage ebao. Tama tibaso, te bodolu sogo

elalubadi, te təde elalubo naide naga dago homugo kone pelamuo. Te we elalubo bidi dabe te augwali te we meni yai bidi dabe bidibo tiwai bidao. ³⁰Tama te homu dene eyu gela wabo bidi dabe, augwali te gela wasiąbo bidi dabe tiwai bidaluao. Te wiegi yai homu pemene ebo bidi dabe, te augwali wiegi yai homu pemene isąbo bidi dabe tiwai bidao. Tama te doado bage abelebo bidi dabe, augwali te doado bage mu sisąbo bidi bidibo tiwai bidao. ³¹Tama te təde doado bage sabo bisnis sę ebo bidi dabe, augwali te e təde doado bage dął olalusiąbo bidi dabe tiwai bidao. Dago te təde elalubo nai dali kolesaga dali si tede naga dago homugo kone pelamuo. Dago koneani, te e megi elalubo tə silama tama hasegelama, tama te gasagi yai mu pedalaibao.

³²Tama tibaso, eno homugo te haniani naide te dagego moni homu isąyu tama dage bugagia bidao. Te we sisawai bidigo, agai te dago Genuai Bidigo kolesagade te aga homugo kone palobo dao, te kolesaga aga bugagia wali pomainogo aga tama tebo dao. Agai te Genuai Bidigo homugo godolo yabo kolesaga yabo homu ebo dao. ³³Tiali goli te we sali bidi, agai te təde doado bagede homugo kone palobo dao. Agai te aga wego godolo ebo kolesaga yabo homu ebo dao. ³⁴Tama tiyu, agai homu kolesaga pebeda paibao. Tama bidigo sisawai we me, te gesi wegi me, agai te dago Genuai Bidigo kolesagade te agai homugo kone palobo dao. Aga homugo te aga tigi me te homu mobo bidi dali me te Godigo gedude bugagia wiegi yai mu bidimainu homu ebo dao. Tiali goli te bidigo sali we, agai te təde doado bagede homugo kone palobo dao. Agai te aga bidigo godolo ebo kolesaga yabo homu ebo dao.

³⁵Eno te megi aşəani po te dage tau selama dage bugagia bidimainogo wali. Te dage palibo po me wabeo. Menio. Enō homugo te dage dolasa bidiyu, tama agade dagego homugo kę̄ peyu tama sesemane sogo te dago Genuai Bidigo sę emainogo, te nai me deligo te dage homu kegabi sidali weyu te po wali.

³⁶Te bidi me deli aga homugo agai te dolo meniabo kolesaga te aga noma sali gesi wegi te dali te tiwai kolesaga ebaso, tama agai homu te wede hodoloyu bomo mu eyu, tama agai suali te gasa sunumi me elalusiąboso da, teda te bidigo te wegi kę̄mainao. Te sęgę̄ sabo sę ebeo. Te augwa si bidimainao. ³⁷Tiali goli, te bidi me deligo aga homude bomo eyu, tama te nai me deligo te aga selibo sę me isiąbadi, tama aga homugo digi ebo tonaluyu, tama aga homude te po olama, te agai homugo te gesi wegi te augwaligo aga noma sali te aga olo mu bidimainogo ebaso da, te wiegi yai dao. ³⁸Tama tibaso, bidigo te gesi wegi sabo, te agai wiegi yai kolesaga ebao. Tama te we sisawai bidi, agai kolesaga te wiegi yai mu ebao.

³⁹Te we me deligo bidi te aga bidi bidibadi, te we te aga bidi dali naga kę̄ pelama bidao. Tiali goli, te we aga bidi isibo si da, te we te bidi dali

me kęalubeo. Te aga gasa bidi dali pabo homu eboso da, teda aga te bidi dali pomainao. Tiali goli aga te Godigo po wali pabo bidi dali naga pao.
 40 Tiali goli ena digi eno homugo te tiwai homu yai: te bidi isai we aga olo bidaingo eboso da, te aga wiegi yai homu pemene mu yaibao. Tama eno homugo te Godigo Tedali Mobo Bidi te enade me bidiyu, tama agai ena te kolesagade agai homu ola mani.

**Te Godigo po odobo we bidi dabe augwaligo te tibo god
dabeba ofa ebo kibu mi dabe tueibawe ma tugobewe?**

(Dqj 8-10)

**Te augwaligo tibo godibolo ofa mani kibu mi te
augwaligo tugowe obaso Polgo te po wai**

8 ¹Dagego te enabolo aşəna tolali pode, tede dagego e po me ena hanalu wali, “Te gasa we bidi augwaligo hasa ela munama, tama te tibo godibolo te ofa tiwai eyu, te hasa mi meba te tibo god pageba mubo dao. Tama da Godigo po wali pabo we bidi dago te tobage mi tubo te usu dawe, ma meniwe?” te po dagego enabolo aşəna tolali. Te kolesaga ebode eno wabo po elalubao.

Dage mebago e po wabo dao, “Da tigidaligo koneani, te tibo god te olo nai dao.” Awe, te mu po dao. Tiali goli te olo konebo kolesagago te hagoma ebo kolesaga ebo homu hodolaibao. Tiali goli dago dena hasi te gasa we bidi dali wiegi yai homu eyu godolo ebo kolesaga selama, tama tebogo te da Godigo po wali pabo bomai we bidi pedalaibao. ²Te bidi me deligo agai te nai me deli mu koneani homu eboso da, teda te bidigo koneani kolesaga sqə pali, te usu yabo me elalubao. ³Tiali goli, te bidi me deligo aga God dali dwagi yai homu eyu godolo eboso da, teda Godigo koneama, te bidi te Godigo bidi dao.

⁴Te gasa we bidi augwaligo te tibo godiba ofa elama te mi dabe tubo kolesagade eno po megı obao. Dage mebago te tobage mi tuaio homu eyu tama dagego e po wabo dao, “Te tibo god te mu bidibo nai menio. Te olo piksa noma naga dao,” te po wabo. Awe, dago te po page koneani. Tama dage mebago e po me wabo dao, “Te god hauwa me elalubeo. Menio. Te God deli naga aga bidibao,” te wabo. Awe, te me dago koneani. ⁵Mu tama, te gasa we bidi augwaligo te nogi “god” nogi ebo nai hauwa elalubao, tama te augwaligo hauwa naide nogi ilama, te “genuai bidi da” wai. Tama mu tama te “god” dabe, te dagalude, ma te tqde bidigi sogo da, ⁶tagalao, te dade dago God deli naga te elalubao, te God Aya dao. Aga te tigidali nai page bidi. Tama dago agai sə emainogo eyu da aga wai mu bidibao. Tama te Genuai Bidi deli naga elalubao, te Jisas Krais da. Agai te tigidali nai nigali. Tama dago bidibo ula te agadu sai dao.

⁷Tiali goli dage tomode te we bidi mebago te tibo godide te kolesaga kuna konebeo. Te mebago te polobadu te tibo godibolo mi ofa yali kolesaga hauwa sogo wali pedu geani. Tama megı me augwaligo homugo te gasa we bidigo te mi te tibo godiba ofa mu yali homu me ebo dao. Tama te homu ebadi augwaligo te tobage mi tubaso da, teda augwaligo homu tede sege sobao. ⁸Tiali goli dagego te kolesagade e po wei ponobo dao, “Te nai tubo kolesagago da te God paba odasa me pogobeo. Te dago nai tusiąbaso, teda da te God gedude me sqaq pogobeo. Me ma, te dago tubaso da, teda da te God gedude wiegi yai me pedalugobeo.”

⁹Awe, te mu dao. Tiali goli dage mi tubo bage dage dua dao. Tiyu tama te tibo godibolo mani mi tubo se dugi digi elama, tama te bomo meni yai bidi dabego sulama, tede sagade dolama, tama augwali te dwai segeba tula muabuo. ¹⁰Nage bidi te koneani kolesaga elalubao wida, te nage te tibo godigo lotu beba pelama, tama nage tede dulalu nai tueibao, tama bidi me deli te aga Kraisde konealubo po daq wabo kolesaga bomo meni yai bidi te agai nage subaso, te tebode te aga homu hodolama tama aga homu te mi tubo te dwai kolesaga da homu yali goli, te tibo godiba ofa yali nai tuabo homu yaibao, tama agai te mi tueibao. ¹¹Tama tibaso, te nago koneani kolesagago te bomo isawani bidi dolali, te amade te Krais aga isama tama aga ma sai dao. ¹²Te ama mebago te Kraisde konealubo po daq wabo kolesaga te bomo me ebeo. Tama dagego te dwai se augwaliba elama, tama augwaligo te augwa gedude se ebo dwai ilibaso da, te kolesagade te dagego dwai se te Kraisba digi yaibao. ¹³Tama tibaso, te nai tubogo eno ama te dwai seba tulalumainogo ilibaso da, teda eno te mi munu ma tugobeo. Tiyu eno te eno ama te dwai seba tulalubo se ilidalio.

Te Godigo po sel a pabo se bidi Pol bilali sede po

9 ¹Te gasa we bidi me tau siyu tama augwali dolidali weyu, eno te gasa kolesaga me ebo dao. Ena olo mu bidibo dao, te gasa bidigo enabolo “E tiwai kolesaga yao” te po wabo usu egobeo. Tama me ena te Godigo po sel a pabo se bidi mu dao. Aga te gu pagede hodaluama tama nosali eno digi gedugo ena dago Genuai Bidi Jisas mu suai bidi dao. Te eno dago Genuai Bidi tobade se yaligo tama te sede naga dage te God wali pabo we bidi pedalali. ²Te bidi meba augwaligo ena te Godigo po sel a pabo bidi meni da homu yali, tiali goli tagalao, dugi koneani, ena te Godigo po sel a pabo bidi bidibo. Suao, ena te Genuai Bidigo po sel a pabo se bidi bidibao, tama te koneabo se te dagede elalubao.

³Te bidi mebago eno dagede masigi sisabaso ena te Godigo po sel a pabo bidi meni da wabo si, tama eno e tiwai po te augwaliba wei ponobo dao: ⁴te eno ebo sede te Godigo po odobo we bidi augwaligo augwa doado bagego ena tau sobaso da, te dolo dawe ma meniwe? Te dolo mu dao. ⁵Te

gasa Godigo po sela pabo s̄e ebo bidi dabe augwali deli deligo te Godigo po wali pabo we k̄enama, tama augwali te po pusubo s̄e eyu gasaba bilibadi te augwa we augwali dali hodobo pabo dao. Te dago Genuai Bidi Jisas aga ama dedego badi, te Pitago me te tama tebo dao. Tama ena me, eno we elalugi sogo da, teda eno me te tiwai eyu da te usugi mu da.⁶ Te gasa Godigo po sela pabo s̄e ebo bage tigidali augwaligo te Kraisde po pusubo s̄e sesemané sogo ebaso, tama augwa nogogo te masigi sabo s̄e ebo meni. Te ena me Barnabas da sigo naga te tiwai me ebo usu meniwe?⁷ Mena bidi te ami s̄e ebo bidigo tama aga digi te aga tubo nai abelegowe? Te menio. Mena bidigo te gi bulama tama aga te gide bulali nai sabo meniwe? Me ma te bidi mego te kibu meme dali sipsip dali hani tonaluyu tama aga digi te augwaligo ame p̄e me tugobewe? Woo, te tiwai menio. Agai te nai meba tueibao.

⁸ Te eno tede bidigo homu naga wali pelama tama eno te tiwai po wabowe? Meni. Te bomai pode me te s̄e ebo bidigo aga pe masigi sabode te tiwai page elalubo po me elalubao. ⁹Mosesgo te bomai pode te tiwai po aseani elalubao: “Te dagego wit ge dagalomainogo eyu tama te bulmakaugo te wit sagago agabo s̄e eboso, teda nago te aga pedauwali me paniamuo,” po wai. Te Godigo te bulmakau dabe augwa tubo nai sabode naga homu koneama wali dawe?^s ¹⁰Menio, te agai te po bidi dabolo me wali homu ebao. Awe, te po aseani te da tobade wali dao. Magi baso meni. Godigo te tiwai kolesaga emainogo yai: bidigo te gi tq̄ elibo s̄e eyu, tama bidigo te gide inaiani nai sabo s̄e ebo bidi me, augwali si augwa yali s̄ede te nai sabo homu elama tama te s̄e ebo dao. ¹¹Tialima, dago te Godigo po dagebolo pusubo s̄e yali, te dago te dagego homu noma bidi mobo tomode te ge bulali tiwai yai. Tama tibaso, dagego dabolo te tigi tau sabo nai naga mobaso, te dolo dawe ma meniwe? Te dobu si ebode te dage sq̄ paliwe? Te meni.^t ¹²Te dagede bidi mebago te tigi tau sabo nai sabo usu ebo da wida, teda eno me te nai sigi sogo da, te usu mu egi dao.

Te nai dago sabo usu yaiba wali goli, te dago me sabeo. Menio. Dago te we bidigo Kraisde wiegi yai gesi po odobo sunumi te panibo te dago hagela homu yai. Tama tibaso te haniani s̄eq̄ dabe dago tolobo dao. ¹³Te Moni Lotu Be tempel, te bede s̄e ebo bidi dabe, augwaligo te bede augwa nai sela tubo dao. Tama tiyu te Juda we bidi augwaligo te Godibolo maiabo nai magaselama, tama te be tomode te alta saide te nai Godibolo mabo s̄e ebo bidi dabe augwaligo da te alta saide ulubo nai hasa mi meba te sela tubo dao. Tama tiyu augwaligo augwa nai abelebo menio, te augwaligo Godigo s̄e ebode augwa nai tama sabo dao.^u ¹⁴Tama te tiwai naga dago Genuai Bidigo te bomai po muani: te Godigo wiegi yai gesi po pusubo s̄e ebo bidi dabe, te s̄ede augwaligo te wiegi yai gesi po sabo we bidigo tigi tau sabo nai meba somainogo yao.^v

^s 9:9 Bom 25:4; 1 Ti 5:18 ^t 9:11 Rom 15:27 ^u 9:13 Bom 18:1 ^v 9:14 Mat 10:10; Luk 10:7

¹⁵Tiali goli ena digi eno te tama tiwai nai me deli sisawai dao. Tama megi me eno te nai saiba olama eno e po me aşebeo. Menio. Te ena bolo hasia isimainao wai! Eno masigi sisabadi te şe ebo dao. Tama eno te şede wiegi yai homu pemene ebao. Tama bidi me deligo enabolo masigi mayu eno te wiegi yai homu pemene ebo page te dagala samainogo me egobeo. ¹⁶Eno te Kraisde wiegi yai gesi po pusubo, tede eno te ena nogi uwgaba sabo te usu menio. Te menio. Eno sunumi gasa me elalubeo. Dago Genuai Bidigo enabolo te şe naga mawai dao. Tama eno te wiegi yai gesi po pususiąyu da, teda ena hobedagia mu bidaibao. ¹⁷Te ena homugo digi eno te şe egi da, teda eno te şede sabo usu egi da. Tiali goli, eno homugo te şe eno yabo homu me isabaso da, teda Godigo te şe enabolo emainu mawai dao. ¹⁸Tama tibaso, te şede eno mena nai saibawe? Te eno sabo nai te e tiwai elalubao: te eno sainu elalubo nai te Godigo wiegi yai gesi po pusubo şede sabo elalubo, te eno me sabo meni. Menio. Eno te wiegi yai gesi po pusama tama eno augwaliba olo mabo dao. Tama tede eno dwagi yai homu pemene ebo usu baso, te wiegi yai gesi po olo pusubo kolesaga da eno sabo nai tiwai dao.

Pol te tigidali we bidigo şe ebo bidi tiwai bidali

¹⁹Ena da te bidi me deligo olo şe ebo bidi me bidainogo me bidibe. Tiali goli te ena homugo ena digi te ena te tigidali bidi dologoba muyu, tama ena augwaligo olo şe ebo bidi tiwai bidainogo homu elama ebao, te eno bidi hauwa sabo homu elama tibo dao. Augwali Jisas wali pabo bage pedalomainogo eyu ena tama ebo dao. ²⁰Tama eno te Godigo wiegi yai gesi po te Juda dabebolo pusubadi, ena te augwali tiwai bidibo dao. Ena digi ena te Mosesgo mani bomai po dologoba pabe, tiali goli eno te bomai po dologode bidibo Juda bidi dabe sainogo eyu tama ena augwali tiwai gilama te bomai po dologode bidibo dao. ²¹Te Juda hani isawai bidi dabe, augwali te Mosesgo mani bomai po meni yani bidi dabego gedude, ena te Mosesgo mani bomai po meni yani bidi tiwai pedalali, te bomai po meni yani bidi dabe sainogo tama tiali. Tiali goli eno te Godigo bomai po tagalainogo ebeo. Menio. Eno te Kraisgo bomai po wali pabo dao. ²²Te Kraisde konealubo po dąu wabo bomo meni yani we bidi augwali eno tau sainogo eyu, tama ena te bomo meni yai bidi tiwai bidibo dao. Eno te tigidali sunumidu te gasa bidi dabego ebo kolesaga tigidali usu siyu, tama augwali tiwai bidibo dao. Augwali meba eno ma dobola somainogo tama ebo dao. ²³Eno te şe tigidali ebo te Godigo wiegi yai gesi po pusubo şe te uwgaba somainogo ebo dao, tama te wiegi yai gesi pogo dabolo mabo dwagi yai nai meba me eno somainogo eno te tiwai şe ebo dao.

Te dago te nai sigi painu bomonama udaiyao po wali

²⁴Megi eno te po digi po begelama obao. Te udabo ususu si ebo bidi dabe te tigidali augwali udulama, tama te geanani bidi deligo naga te

dwagi yai nai sabo dao. Te dagego konebewe? Tialima, dage me te tiwai bomonama Godigo po bugagia mu wali piəo, agai te dagebolo dwagi yai sə emainogo yao. ²⁵Tama tigidali bidigo te nai sainogo homu eyu udabo da, te augwaligo homu dali, te augwaligo tigigo ebo kolesaga dali, te tigidali augwaligo aiyaba elaluyu bugagia tonalubo dao. Te bidi dabego tama tiyu te geanani bidigo sabo dwagi yai nai sainogo tebo dao. Tiali goli te nai polo dolobo nai naga dao. Me ma, dago Godigo po wali peyu te me dolisəbo nai sabo sə ebo dao. ²⁶Tama tibaso, ena digi me, ena te dwagi yai nai me sainogo eyu tama ena udabadi te eno gasaba tonono peyu me udagobe. Eno nogo wəbi hwıainogo, te eno nogo subigila şanama olo dali nogo me sağobeo, tama te wali naga me eligobeo. ²⁷Menio. Eno te ena tigiba mu eliyu tama aga ena homu wali pomainogo ebo dao. Magi baso meni. Eno te Godigo wiegi yai gesi po te gasa we bidi hauwabolo pusubo dao, te augwaligo te po bugagia wali pomainogo ebo dao. Tiali goli nosali ena digi te eno te po bugagia wali pisayu tama ena tulaluidali weyu, tama eno bomonama te eno ebo kolesaga bugagia tonalubo dao.

Dago te tibo god dabe wali pelamuo

10 ¹Ama dedeo, dage ede gegeda pelamuo: dago wəj dabe tigidali te bidi meni yai dwai bulude bilibadi augwali te dagalu pə dologode bugagia bidali. Tama augwali tigidali te saqago naga pelama, tama te tamu aqı nogeyu sana pai dao.^w ²Tama tigidali augwali te pəde tamu aqı side baptais sali tiwai yali, tama te baptais saligo augwali te Moses wali pomainogo sa muani. ³Tama augwali tigidaligo te Godigo Tedali Mobo Bidigo augwali mani te nai nogi mana augwaligo tuai dao.^x ⁴Tama augwali tigidaligo te Godigo Tedali Mobo Bidigo augwali mani aqı te augwaligo tuali. Awe, augwaligo te Tedali Mobogo te genuai sau pado masigidu asobo aqı tuali, te masigi augwali dali hodobo pai. Te masigi te Krais aga digi dao.^y ⁵Te Godigo te tobage tau sabo sə tigidali augwali dali yali goli, agai te we bidi dago wəj dabe hauwa tomode augwaligo kolesaga te Godigo godolo me isıawani. Mu menio. Magi baso meni. Dago koneai, augwali umabo te bidi meni yai bulude isilama, tama augwaligo tigi tede besela palama, wilalua pali, te bidi si sela naga bugagia sana pali.^z

⁶Tama te augwalide pedalali sə tigidali te noma tiwai pedalali, te dago sulama tama dago wəj dabe augwaligo te pesə yali tiwai te dago me te dwai səde pesə idali weyu dago sumainogo yali. ⁷Tama suyu, tama dagego te tibo god dabebolo lotu po munu me wagimio, te augwali

^w 10:1 Sai 13:21-22; 14:22-29 ^x 10:3 Sai 16:35 ^y 10:4 Sai 17:6; Nam 20:11

^z 10:5 Nam 14:29-30

tomode mebago yali sə tiwai me egio. Te bukude te augwaligo te tibo god dali yali səde e po wai dao: “Te we bidi augwali dualama te nai tuyu wə tuyu elama, tama augwali hogodama tama augwaligo təqabı yali.”^a ⁸Tama dago me te penani ebo kolesaga me egimio, te augwali tomode mebago te yali kolesaga tiwai me egio, tama deli sogo naga te bidi sese umabo te 23,000 bidi te augwali isai dao.^b ⁹Tama dago me dwai sə eyu te Genuai Bidi usu me selamuo. Te augwali tomode mebago dwai sə eyu aga usu sobaso, tama te dwai hasamani dabego augwali gąq kelama tama augwali isai dao.^c ¹⁰Tama dagego dwai homu eyu Godibolo wado po me olamuo. Te dago wąj dabe augwali tomode mebago te God dali dwai homu eyu wado po obaso, tama te bidi ela mubo ensel mobo bidigo te augwali ela munama tama augwali dolai dao.^d

¹¹Te sə dabe tigidali augwaliba pedalali, te gasa we bidigo sumainogo ebo sə noma tiwai pedalali. Tama dago me te tobage dwai sə idali weyu gasa bidi dabego te po te Godigo po bukude aşəani. Magi baso meni. Te da megi bidibo sogo te tigidali nai silabo sogo pąba yagasaki dao. ¹²Tama tibaso, dagego duga digi bomogo bugagia dolalubo usu da homu eyu da, teda dage tulaluyu dolidali weyu dage bugagia suao. ¹³Te dwai sə ilibo usu sabo sə dagebolo pedalobo, augwali tigidali te gasagi yai me egobeo. Menio. Te tigidali we bidibolo pedalobo usu sabo deli tigi poai sə pedalubao. Tama Godigo aga dage dali homugo kęq pai bidi bidiyu tama aga dąq wali po wali peyu, te usu sabo sə ebogo dagego bomo aiyaba elaluainogo ebo gogolama me sula tagalogobeo. Menio. Te dwai sə tomoba kegebo usu sabo sə dageba pedalubaso da, teda Godigo dage sana pabo tū nigilaibao. Te tū e dao: te agai dage dąq walama, tama dage te usu sabo səde bomo elama dolalubo usu yaibao.

¹⁴Tama tibaso, eno abagi dede dabe muo, dagego te tibo god lotu beba nai tugi pabo kolesaga wi eyu tagalama, tama te kolesaga tudiba muao. ¹⁵Dagego kolesaga elalubaso, tama eno dagebolo te po obao. Duga digi eno pusubo po dagaliqo. Eno po e dao. ¹⁶Te dago komunion tubaso da, dago te kapde gedu haluasa po olama tama Godibolo puba hwi po wabo dao. Te kapde elalubo wain aq̄i da tigidali deli deligo tubo si da, tebogo dago te bidi Kraisgo tigi kaneme dobayu tubo dao. Tama dago komunion tubadi, dago te dwasianu pebedama dobaba pabo bret, dago te bret tubo si da, tebogo dago te bidi Kraisgo tigi mi dobayu tubo tiwai ebo dao.^e ¹⁷Te komunion tubo bret te deli naga elalubao, tama da we bidi hauwa elaluali goli, te tigi delide naga wadolali elalubao. Magi baso meni, da tigidaligo te bret deli naga tubo dao.

¹⁸Dagego te Israel dabe augwaligo yali kolesagade homugo kone palao. Godigo augwaligo yali dwai sə sela səwainogo eyu, tama augwaligo te

^a 10:7 Sai 32:6 ^b 10:8 Nam 25:1-18 ^c 10:9 Nam 21:5-6 ^d 10:10 Nam 16:41-49

^e 10:16 Mat 26:26-28; Mak 14:22-24; Luk 22:19-20

sipsip dali meme dali selama, tama te pris bidi dabego nogoba mawai. Tama menama, tama te pris bidi dabego te nai dabe ela munama, tama te mi te alta sai ugwdudu daiba muyu, tama siago uluyu, tama Godibolo ofa tama mawai dao. Tama tiyu te nai sesali bage dali, te pris bidi dabe dali, augwali tigidaligo te altade ofa mani nai tuyu deli hani naga bidiyu tama bidali.^f ¹⁹Eno magi homu elama tama te po waliwe? ‘Te tibo god me aga mu bidibao, te agabolo ofa mabo tubo nai me te sęgę nai mu dao,’ eno te tiwai homu elama te Israel dabego Godibolo ofa mabo kolesagade po waliwe? ²⁰Mu menio. Eno wali po page e dao: te Godigo po odisawai bagego augwa alta saide ofa ebo nai, te augwaligo dwai haubo noma bidi dabebolo te ofa mabo dao. Augwaligo te Godibolo ofa me mabeo. Tama dage te dwai haubo noma bage dali deliba sisinibo te eno godolo me egobeo, ena mu hagelabo. ²¹Dagego te dago Genuai Bidi Kraisgo kap wain wę tuyu, te dwai haubo noma bagede lotu wainogo eyu augwaligo kapde dali si wę tuyu ebo usu me egobeo. Te dagego dena Genuai Bidigo ni nami tebol saide nai tuyu, te dwai haubo noma dabego lotu bede tebol saide nai dali si tuyu ebo te usu me egobeo. ²²Dago augwaligo te tibo god bagebolo ofa mani nai tuyu da, teda dago te Godigo da dali dwai homu ebo sę ilibaao. Dago bomogo agai bomo aiyaba elalubo da, agawe? Te dago bomo usu menio.

Tigidali sę ebogo dago Godigo nogi ugwbaba sao

²³Dage tomode bidi mebago e po obao, “Te mi tubo kolesagade te da olo bidibo dao, tede habu selebo po meni. Dago te mi tuyu da, tebogo dago Godigo bomo yai po me bologobeo,” augwaligo te po wabo dao. Awe, mu tama. Tiali goli te tigidali sę ebogo da tau me sogobeo. “Te haniani sę hauwa dago yabo te usu dao,” augwaligo te po me wabo dao. Tiali goli te tigidali sę ebogo da God wali pabo bomo mabo meni. ²⁴Bidi me deligo aga digi naga bugagia bidabo homu me elamuo. Menio. Tigidali we bidi deli deligo te gasa bidi bugagia bidimainogo homu eyu tama augwali tau sabo kolesaga yao.

²⁵Tigidali haniani mi augwaligo te maketde elalubo, te dagego abela tuyu da, te usu da. Po meni. Dagego homu hauwa elama tama ‘E mi augwaligo te tibo god me delibolo ofa maniwe, ma meniwe?’ te po hanalu wagio. ²⁶Magi baso meni. Dago koneani, te bukude elalubo po me deli e tiwai dao, “Te e tőde, paganalubo tigidali nai dabe dali, te Genuai Bidigo naga dao.”^g

²⁷Tama te Kraisba aga homu tigidali musiąwani bidi me deli agai te dage meba i olama dage dali nai tuainogo eboso da, tama dage pabo homu eboso da, te usu da. Augwaligo dagebolo mabo te nai tigidali

^f 10:18 Prs 7:6 ^g 10:26 Tib 24:1

dagego tuiqo. Tama dagego homu hauwa elama ‘E mi augwaligo te tibo god me delibolo ofa maniwe, ma meniwe?’ te po wagio. ²⁸Tiali goli, te bidi me deligo te po dagebolo weyu, “Te mi da, te ofa yai mi da” po obaso da, teda te bidigo dagebolo wali po te dagego homugo koneama, tama aga tobade dagego te nai me tulamu dao. Dwai sę dwagi yai sę dagalabo homu dolidali weyu te nai tugio. ²⁹Eno dagebolo te po te dagego dwai sę dwagi yai sę dagalabo homu tobade te po wabeo. Meni. Eno te dagebolo te mi tubode po wali bidi agai te dwai sę dwagi yai sę dagalabo homu tobade te po dagebolo obao. Magi baso meni, te agai homu si eyu bidibao.

Dage tomode bidi me deligo te po hanalu waibao, “Ena digi ena haniani nai tubo usu yabo digi, tama gasa bidigo te ebo kolesaga dagalabo homugo digi eno ebo kolesaga magi baso te dagalaibawe? ³⁰Te eno te tubo naide Godibolo puba hwi po olama te nai tuali goli, te gasa bidigo eno te puba hwi wali tubo naide te magi baso ena dali dwai po waibawe?”

³¹Te dage tomode bidi me deligo te po obaso, eno e po agabolo wei ponai bao, te dagego te nai tuyu me wę tuyu ebode, ma dage gasa sę ebo si da, dagego gasa we bidide homugo koneao, augwaligo Godigo nogi uwguba somainogo eyu dagego duga kolesaga tigidali tama bugagia tiao. ³²Tama tiyu, dagego te Juda dabe me, te Grik dabe me homugo koneao, tama Godigo po odobo we bidi hani dabe me, tama dagego ebo sęde augwaligo God dali agai po dali si dali dwai homu idali weyu, dagego duga ebo kolesaga bugagia tonaluao. ³³Ena me eno te tiwai kolesaga ebo dao. Eno homugo te eno ebo kolesaga tigidali te we bidi tigidali augwaligo dwagi yai homu naga emainao. Tama te homu ebaso, eno ena digi naga bugagia bidabo homu me egobeo. Meni. Eno homugo te eno tigidali we bidi augwali tau siyu, tama Godigo augwali ma dobola somainogo eyu, tama eno ena ebo kolesaga tigidali tama dodolobo dao.

Polgo po weyu te Tedali Mobo Bidigo mabo wiegi yai sę ebo me te lotu wabo wiegi yai kolesaga yabo po wali

(Dqj 11-14)

11 ¹Te we bidi tigidali agai augwali tau somainogo eyu Krais agai aga digi aiyaba muyu bidali. Tama ena me eno agai te yali kolesaga wali pabo dao. Tama dage me dagego ena wali asiyu, tama te tiwai kolesaga naga yao.

Polgo te lotu wabode tobolu halubo kolesagade ebo po

²Dagego sesemane sogo ena homugo koneama tama eno te selama dagebolo mani po tigidali dą eyu wali pabo dao. Tama tibaso, eno te po obao, dagego wiegi yai kolesaga mu ebo dao. ³Me ma, te dagego ena

te po hanalu wali, “Te da deliba sisinama tama Godibolo po weyu, tama Godigo po odoyu tebo sogo, te dago we dabe sibi augwaligo augwa tobolu te nami ugwago haluaibawe ma meniwe?” te po dagego ena hanalu wai dao. Tiali goli eno homugo hasia dagego te po konemainogo obao: te bidi Kraisgo tobolu bidi te God dao, tama tigidali bidigo tobolu bidi te Krais dao, tama wego tobolu te aga bidi dao.⁴ Te dage deliba sisinama tama bidi mego tobolu haluama tama Godibolo po weyu, ma te Godigo po pusuyu da, te bidigo aga tobolu bidi Kraisba hale mabo dao. Te dwali.⁵ Tama we me deligo te aga tobolu halusiąma tama Godibolo po obaso, ma Godigo po pusubaso da, te agai aga bidigo tobolu bidi tama tiwai bidiyu, aga aiyaba elalubo dao. Te dwali. Tama tiyu da, te aga te hale isabo moni tudu bilibo we tiwai dao.⁶ Te tobage dwai penani kolesaga ebo we hale ilimainogo augwaligo aga tobolu nisi tigidali mu poabo dao. Tama te dage tomode te we me deligo aga tobolu halusiąma tama Godibolo po obaso, te wego te sę ebogo aga bidi tama aiyaba elalubaso, aga tobolu nisi mu poa yao. Tiali goli we aga tobolu nisi mu poabo te moni hale iliyu da, teda te we te lotu obadi aga tobolu te nami ugwago halumainao.⁷ Bidigo te aga tobolu me haluamuo. Magi baso meni, te Godigo bidi nigali sogo agai aga digi tiwai nigilio, tama te bidibolo Godigo aga digi wiegi yai homu kolesaga tiwai mani. Tiali goli te we aga te aga bidigo kolesaga naga elalubo dao.⁸ Magi baso meni. Godigo bidi nigali te wego tigigo me nigibeo. Menio. Agai we nigali te bidigo tigigo nigai dao.⁹ Tama Godigo te we homu koneama tama bidi nigliama aga tau somainogo me ebeo. Menio. Agai bidi homugo koneama tama wego aga bidi tau somainogo nigilio.ⁱ ¹⁰ Tama tibaso, te Godigo sę ebo ensel mobo bidi augwaligo te we aga bidi dologode bidibo sumainogo eyu, te wego aga tobolu te nami ugwago halumainao.¹¹ Tialima da we bidi te dena Genuai Bidi dali wadoloyu bilibode, tede te we naga tedali bidiyu tama bidi meniam, tama bidi naga tedali bidiyu, tama we meni eyu me ebeo.¹² Menio. Godigo hasia sogo te we bidigo tigigo nigali, tama tialima megi te tiwai te agai bidi wego tigide nigliama pedalobo dao. Tiali goli God da te tigidali nai nigali bidi mu dao.

¹³ Duga digi te eno megi wali po dagaliqo. Te wego tobolu halusiąma tama Godibolo po wabo, te kolesaga usu egowe?¹⁴ Te we bidi dena kolesaga digi te tiwai dagebolo ola mabo dao: te bidigo bobage tobolu nisi elalubaso da, te dolo meni.¹⁵ Tiali goli te wego bobage tobolu nisi elalubaso da, te aga wiegi yai au yabo nai elalubao. Magi baso meni, Godigo bobage tobolu nisi agabolo mani te aga tobolu halualumainogo yali.¹⁶ Tialima, bidi me deligo te wego Godibolo po obadi aga tobolu haluabo sęde konila po wabo homu eyu da, te agai koneao, dago gasagi

^h 11:7 Gag 1:26-27 ⁱ 11:9 Gag 2:18-23

yai kolesaga me elalubo meni, tama gasa bulude bidibo Godigo po odobo we bidi hani dabego me te gasagi yai kolesaga me elalubo menio. Da tigidaligo te we aga tobolu haluabo kolesaga wali pabo dao.

Te komunion nai tubo po

²³ Magi baso meni. Te eno dagebolo mani po te eno dago Genuai Bidide naga te ola mani po sali. Te e tiwai dao: te pio hulide Judasgo Jisas te Juda dabe boi bidigo nogoba musiabantadi, te sogo pio hulide te Genuai Bidi Jisasgo ²⁴ te bret selama, tama te naide Godibolo puba hwi po olama, tama te bret pebedama, tama aga dali bidali bidi dabebole mayu, te po wali, “Te eno tigi dao, te eno dage tobade mobao. Dagego tigidali sogo tama tidu gebo si ena homugo koneao,” agai te po wai. ²⁵ Augwaligo augwa hulide tuabo nai tula silibo si, tama agai te kap me selama, tama tiwai naga Godibolo puba hwi po olama, tama augwalibolo mayu te po wali, “Te kapde elalubo wain aq te eno kaneme dao. Tama te kanemego eno te gesi daq wali po daq obao. Tigidali sogo dagego e aq tubaso da, teda dagego tama tiyu ena homugo konealuao,” te bidi Jisasgo te po wai.^j

^j 11:25 Sai 24:6-8; Jer 31:31-34

²⁶Tama tibaso, dago Genuai Bidi aga ma asisabadi te tigidali sogo dagego te bret dali te kapde dali wę tubo si, dagego te aga isali po pusubo dao.

²⁷Tama tibaso, bidi me deligo hasia bugagia homu kone palisiama tama Genuai Bidigo te bret dali te kapde aji dali olo subigila tuali da, tebogo agai te Genuai Bidigo tigi me kaneme te dolobo tiwai ilali, tama aga tede sege elalubao. ²⁸Te komunion tubo sogo te bidigo aga digi homu bugagia osalama tama usu yali homu eyu da, teda aga te bret me te kapde te aji tuao. ²⁹Magi baso meni, bidigo te dago Genuai Bidigo tigide homu kone bugagia palisiama, tama agai te bret me te wę me olo subigila tuyu da, teda agai bret me wę me tuali tede Godigo agabolo te sege menama tama dwai se agaba pedalaibao. ³⁰Te page delide naga te dage tomode we bidi hauwa augwali tigi bomo meniam, tama augwali gasi elama, tama augwali meba me isalio. ³¹Te dago dena homu hasia bugagia osola suyu da, teda te Godigo dabolo te sege magobeo. ³²Tiali goli, Genuai Bidigo dago ebo kolesaga osola sulama, tama dabolo dene osogo mobaso da, tede te da aga wai boq tiwai dodolobao. Agai tama tebo te da töde bidi dabe augwali dali nosali mu hagaidali weyu tebo dao.

³³Tama tibaso, eno ama dedeo, dage te nai tuboba sisinainogo da, dagego te gasa bage augwali asobo hasia tonaluao. ³⁴Te me deli moni nasi ebaso da, te agai bede nai tuao. Tiyu dage deliba sisinibo kolesagade Godigo dagebolo sege magobeo. Te gasa kolesagade elalubo po, te nosali ena dageba asobo sogo te eno dodolaibao.

Te Tedali Mobo Bidigo haniani se yabo homu kolesaga dobabo dao

12 ¹Eno ama dedeo, te Godigo Tedali Mobo Bidigo te haniani se yabo homu kolesaga dabolo mabode, te dagego tede gisiga konesiama bididali weyu eno tede dage homu dodolabo po me megipusaibao. ²Dagego koneanio, polobadu dagego te Godigo po odisabadi, te sogo augwaligo haniani kolesaga ebogo dage te po meni yai tibo godiba kekasa pelama, tama dagego augwali wali naga piduai dao. ³Tama tibaso, eno homugo dagego hania koneao, te Godigo Mobo Bidi te bidi me deli dali bidama tama agabolo po mobaso da, te bidigo te po me wagobeo, “Jisas hagamainao, agaba dwai se pedalomainao,” te po munu me wagobeo. Me ma, te Tedali Mobo Bidi meni yani bidigo “Te Jisas da, te Genuai Bidi dao” po wabo te usu me egobeo.

⁴Te Godigo Tedali Mobo Bidigo haniani se yabo homu kolesaga dabolo olo mu mabo dao, tiali goli te Godigo Mobo Bidi deli naga elalubao.

⁵Tama dago dena hasi haniani tau sabo se ebo, tiali goli dago Genuai Bidi deli naga bidibao. ⁶Te haniani tau sabo se ebo homu kolesaga elalubo, tiali goli te God deligo naga te tigidali bidibolo bomo dari homu kolesaga dari si menama, tama augwaligo tigidali tau sabo se ebo usu yaibao. ⁷Te Tedali Mobo Bidigo aga bomo te tigidali we bidi delibolo

pedalobo dao. Tama elama, tama augwali deli deligo te mani bomogo te Godigo po odobo we bidi hani tau sabo usu yaibao. ⁸E tiwai dao. Te Godigo we bidi hani tomode te bidi me delibolo te Tedali Mobo Bidigo te we bidi dabebolo te Godigo wiegi yai homu kolesaga ola maiabo homu kolesaga agai olo mabo dao. Tama te gasa bidibolo te Tedali Mobo deligo naga te Godigo kolesaga te we bidi augwaligo bugagia konemainogo te po pusubo sę ebo homu kolesaga mabo dao. ⁹Tama te Tedali Mobo Bidigo gasa bidi mebolo te bomo mayu, tama te bidigo Godiba aga homu tigidali mayu agaba tialubo kolesaga, te kolesaga bomo menama tama te bidigo homu si isiąbadi tama agai genuai sę ebo usu dao. Tama gasa bidi mebolo te haniani gasi yai we bidi dabe usu ilabo bomo te Tedali Mobo Bidi deligo naga mabo dao. ¹⁰Tama gasa bidi mebolo te Tedali Mobo Bidigo te haniani bomai sę yabo bomo mabo dao. Tama gasa bidi mebolo te Godigo po pusabo kolesaga agai mabo dao. Tama mebolo te haniani dwai haubo noma bidi dali te dwagi yai noma bidi dali dagalabo kolesaga agai mabo dao. Tama gasa bidi mebolo te Godigo Mobo Bidigo te tőde bidibo we bidigo homugo konesiąwai po wabo kolesaga mabo dao. Tama agai me te gasa bidi me delibolo te hasia bidigo wabo po begelabo kolesaga olo mabo dao. ¹¹Eno megi tama nedada pali haniani sę yabo homu kolesaga augwali tigidali te Godigo Mobo Bidi deligo naga te nigibo dao. Te aga homugo digi agai te gasa sę yabo kolesaga te gasa bidi me delibolo dobayu, tama gasa bidi mebolo te gasa sę yabo kolesaga mayu ebo dao.^k

Da tigidali da tigi delide sę hauwa elalubo

¹²Te bidi Krais da te bidigo tigi me deli tiwai dao, tama te tigigo nogo saçq me, te haniani nai hauwa te elalubao. Tama te tigigo haniani gasagi gasagi yai nai hauwa elaluali goli, te tigi deli naga dao. ¹³Tama da me te tiwai elalubao. Te da meba te Juda hani da, da meba te Juda hani bidi aq isąwai bage dao, meba te masigi sisąbo olo sę ebo we bidi da, meba olo sę isiąwani we bidi dao. Tiali goli te Tedali Mobo Bidi delide naga da tigidali te baptais selama tama deli tigi poāj naga pedelali, tama Godigo te Tedali Mobo Bidi deli naga dabolo mawai dao.^l

¹⁴Te bidigo tigide, te dago koneani, te tigi te deli badu naga me elalubeo. Menio. Te aga haniani sę yabo nai elalubo dao. ¹⁵Te saçqo te tiwai po wagi sogo da, “Ena te nogo meni, tama tibaso ena te tigide me wadoalubeo,” te saçq aga togolama tedali agaduba elalueibao wabo digi, tagalao. Te meni. Aga te tigi badu naga me wadoalubo dao. ¹⁶Tama ologo te po wagi sogo da, “Ena te gedu meni, tama tiyu ena te tigide me wadoalubeo,” te olo aga togolama tedali agaduba elalueiba wabo digi, tagalao. Te meni. Aga te tigi badu naga me wadoalubao. ¹⁷Te tigi sesede

^k 12:11 Rom 12:6-8 ^l 12:13 Rom 12:4-5

te gedu naga elalugi sogo da, magi ilama te agai po odaibawe? Tama te tigi sese te olo naga elalubaso da, teda magi ilama agai te nai denami ebo odaibawe? Meni, te tiwai usu egobeo.¹⁸ Tiali goli tigi te tiwai me elalugobeo. Menio. Godigo aga digi homu wali peyu, te tigi tigidali badu te haniani sə yabo nai deli deli muna muna pali, te aga digi godolo yainogo tiwai dao.¹⁹ Tama tigi sese te deli sə yabo nai naga elalugi sogo da, teda te tigi mu te menade elaluabawe?²⁰ Tiali goli te tiwai me egobeo. Menio. Te tigi badu haniani sə hauwa yabo nai elalubao, tiali goli te tigi deli naga elalubao.

²¹ Tama tibaso, gedugo te nogobolo te po wabo usu me egobe, “Te nogo, nage bidigi menigi sogo da, te enaduba deli ena bugagia bidigi dao.” Tama tobolugo me saga bolo te po me wagobeo, “Te saga, nage bidigi menigi sogo da, te enaduba deli digi ena bugagia bidigi dao,” te po wabo usu me egobeo.²² Mu menio. Te tigi dabe badu dago te bomo meni homu yali, te me elalusiąwani da, teda te tigi bugagia me elalugobeo. Mu menio.²³ Tama te tigi dabe badu dago homugo augwali te dwasianu dwali homu yali, te dago augwali bugagia tonalubo dao. Tama te tigi wiegi yai isiąwani dabe badu, tede dago hale idali weyu, dago augwali te gudubo uwgago halua sabo dao.²⁴ Tiali goli te dago augwalide hale isąbo badu, te dago gudubo uwgago halua sabo menio. Tiali goli Godigo te tigi dabe tigidali te deli badu wadolai elalubao. Tama me badu augwali te nogi meni yai tiwai elaluali, teda agai augwalibolo te nogi ma mayu ebo dao.²⁵ Agai tama tiwai eboso, te augwali tedali me pebeda pogobeo, menio, te tigidali deli deli badu te augwaligo augwa hasi te gasa badu te deli sə tiwai naga eyu bugagia tonalumainogo ebo dao.²⁶ Tama tiyu te tigi me badu pedai badu dene eyu da, te tigidali badu dwai bidaibao. Tama me deli badu te nogi sobaso da, te tigi tigidali badu augwaligo te aga dali wiegi yai homu yaibao.

²⁷ Tialima dage da, da tigidali deliba wadolama, tama dage da te Kraisgo tigi tiwai dao. Tama dage deli deli te Kraisgo tigigo haniani sə yabo badu dabe dao.²⁸ Tama te Godigo po odobo we bidi hani tomode Godigo aga digi te sə dodolama, tama tigidali bidi te haniani səba muani. Te hasia te po sela pabo bidi dabe nigelili, te si wali te Godigo po pusabo bidi dabe, te sela wali te agai po ola mabo tisa bidi dabe muani. Te dabe tudi badu nosali te bomo menama, te bomai sə ebo bidi dabe nigelili. Tama nosali ma te gasi yai bidi dabe usu ilibo bidi dabe elalubo, tama te we bidi dabe tau sabo bidi me, tama te haniani sə dabe tonaluabo bidi dabe muani, tama haniani homugo konesiąbo pogo po wabo bidi nigelili.^m²⁹ Magi yaliwe? Te Godigo po odobo we bidi hani tomode te tigidali bidi te Godigo po sela pabo sə ebo bidi dabe bidibo dawe? Ma, tigidali te po

^m 12:28 Ef 4:11

pusabo bidi bidibawe? Ma, tigidali te po ola mabo tisa bidi bidibawe? Ma, tigidaligo te bomai sę ebo bomo elalubawe? ³⁰ Ma, tigidaligo te gasi yai bidi dabe usu ma ilibo bomo te elalubo dawe? Ma, tigidaligo te haniani homugo konesiąbo pogo po wabo dawe? Ma, te tigidaligo te gasa bidigo wali po begelebo sę ebo usu egowe? Mu menio! ³¹ Tiali goli dagego bomo eyu tama godolo elama, te Godigo dabolo olo mabo agai we bidi hani tau sabo bomo tigidalide te polali nai sao.

Tama megi eno dagebolo te polalubo tü mu me deli te dagebolo ola maiabo homu ebao.

Te we bidi dali dwagi yai homu eyu godolo mu ebo kolesaga po

13 ¹ Te haniani dago homugo konesiąbo pogo po wabo, tede eno po tamadi wai dao. Te eno te da tqde bidibo we bidigo dena homugo konesiąbo haniani pogo wabo, ma te tqde bidi dabego wabo haniani po, ma te ensel mobo bidi dabego gasagi yai po me, te po tigidaligo eno po wabo usu eyu da, tiali goli eno te gasa we bidi dali dwagi yai homu eyu godolo ebo kolesaga esiąyu da, teda eno po wabo te belo olo subigila elibo tiwai eyu, ma te moni nigo nigali habidi te olo elibo tiwai gilama yaibao. ² Ma, eno te profet bidigo wabo po tiwai te Godigo po pusubo bomo elaluyu, tama eno te Godigo geme dualali po tigidali koneyu, tama eno gasa haniani homu kolesaga me koneyu, tama eno Godide bomai konealubo po dąu elaluyu, tama eno te genuai bulu du gasaba pogolobo usu iligi da, ena te tiwai bidiyu, tiali goli eno te gasa we bidi dali dwagi yai homu eyu godolo ebo kolesaga esiąyu da, teda ena te olo nai tiwai dao.ⁿ ³ Tama eno ena doado bage tigidali te magi nai meni yai we bidi dabe augwalibolo mena mena pelama, tama ena te Kraisde boi bidi homu ebo bagego selama, tama eno tigi te siaba ulama tama ena te isiyu da, tiali goli eno te gasa we bidi dali dwagi yai homu eyu godolo ebo kolesaga esiąyu da, teda te eno yali tigidali dwagi yai sęgo ena dwasianu tau sabo usu me egobeo.

⁴ Te gasa we bidibolo wiegi yai homu eyu godolo ebo bidi agai e tobage kolesaga ebo dao. Augwaligo dwai kolesaga aga dali ebaso, te agai wei polo me ponogobeo. Te gasa we bidibolo wiegi yai homu eyu godolo ebo bidigo, te agai tigidali bidi tau sobao. Agai te doado bage hauwa elalubo bidi dali dwai homu me egobeo. Te gasa bidibolo wiegi yai homu ebo bidigo te aga digi aga nogi uwgawa me sogobeo. Tama agai dwai hagoma me egobeo.

⁵ Agai te bidi dabe augwali dali te kolesaga usu isławai bidigo ebo kolesaga ebo meni. Agai te aga doado bage dabede te nai yogo homu ebo meni. Te agai sębę polo me egobe, konila po polo wagobeo. Te augwaligo agabolo dwai sę ilibaso, te agai te sęde aga homugo ma nededu gebo meni. ⁶ Te

ⁿ 13:2 Mat 17:20; 21:21; Mak 11:23

gasa bidigo ebo dolo isawai kolesagade te agai wiegi yai homu pemene me egobeo. Menio. Agai te we bidi augwaligo Godigo mu doloba pai kolesaga ebode te wiegi yai homu pemene agai ebo dao. ⁷Te gasa we bidibolo wiegi yai homu eyu godolo ebo bidi agai tigidali sege bugagia tolobo dao. Te tama tiyu, agai aga abagi dali homugo keq pai bidi bidata pabo dao, te kolesaga me sia sogobeo. Te aga dali dwai se yali abagi, tede agai wiegi yai homu pemene eyu tama te bidigo homu hasegelebo aga bugagia tonalubo dao, agai te kolesaga ebo tagalogobeo. Te tigidali sege sabode te aga bomo elama bugagia dolalubo dao, aga munu me sebe polo egobeo.

⁸Te Godigo aga we bidibolo te tau sabo bomo osogo mawai dao. Agai bidi mebolo te Godigo po pusubo bomo olo mayu, tama gasa bidibolo te haniani gasagi yai homugo konesiabu pogo po wabo bomo olo tama mayu, tama tedali bidibolo gasa haniani homu kolesaga koneabo bomo mayu ebo dao. Te tobage mani se yabo bomo te osogo elalubo nai naga dao. Tiali goli te gasa we bidi dali dwagi yai homu eyu godolo ebo kolesaga da, te gamonabo kolesaga mu dao, te munu me siligobeo. ⁹Te megidago haniani homu kolesaga koneabo bomo te sese meni, te sqaq pali. Tama te Godigo po pusubo bomo me, te sese meni, te sqaq pali. ¹⁰Tiali goli nosali te sese usu mu yai nai asiyu, tama te sogo te sese isawai sqaq pali nai dabe tigidali silaibao, te augwaligo se me meni. ¹¹E tiwai yaibao. Polobadu ena dwasianu ogwa bidibadi, te sogo eno dwasianu ogwago po wabo tiwai yai dao. Eno te dwasianu ogwago homu ebo se tiwai yai dao. Eno te dwasianu ogwago homu dodolobo kolesaga tiwai me eyu bidai dao. Eno kuna konesiabaso, eno haniani sede sqaq peyu bidali. Tiali goli nosali ena genuai bidi pedalama, tama eno bugagia konebaso, eno te dwasianu ogwago yali kolesaga yali te tagalai dao. ¹²Dago te aq dulade subadi, te dena gesabidi dago kuna subo meni, te dwasianu hulia sai tiwai subo dao. Tama te tiwai me, dago God gisiga mu konebo menio. Tiali goli te sogo nosali da, te dago Godigo gesabidi mu dolo sueibao. Megidago te God kuna konebeo, te me badu naga koneani. Tiali goli nosali da, te dago aga mu koneyu, te agai da mu konebo tiwai gilama yaibao.

¹³Tama te sogo asisabadi, te kolesaga sela sesemane sogo elalubao, te homugo keq pabo kolesaga dali, te dwagi yai homu eyu bugagia tonalubo kolesaga dali, te we bidi dali wiegi yai homu eyu godolo ebo kolesaga dali, te augwali sela sesemane sogo elalubo dao. Tiali goli te kolesaga selade te polalubo kolesaga me deli, te gasa bidibolo wiegi yai homu eyu godolo ebo kolesaga elalubo dao.

**Te Godigo Tedali Mobo Bidigo mabo polalubo bomo sabo homu
eyu, te dagego Godigo po godolo homu elama pusao po wai**

14 ¹Te gasa we bidi dali wiegi yai homu eyu godolo ebo kolesaga da te polalubo kolesaga elalubaso, te dagego bomo eyu te kolesaga

bugagia wali pao. Tama tiyu, dagego te Tedali Mobo Bidigo maiabo tau mabo bomo sabo homu bomo eyu godolo tigidali sogo idua. Tiali goli te maiabo bomo dabe tomode te Godigo po gasa we bidi dabebolo pusubo bomo te polalubo bomo elalubaso, dagego te bomo sabo homu hasia yao. ² Magi baso meni, te tōde bidibo we bidigo konesiąbo po wabo bidi agai te we bidibolo te po wagobeo. Menio. Agai te po wabogo te Godibolo naga wabo dao. Magi baso meni, te we bidi augwaligo agai wabo po page konegobeo. Te Tedali Mobo Bidigo bomogo te agai te geme dualali po page wabo dao. ³ Me ma, Godigo po pusubo bidi, agai po te we bidibolo weyu, tama te pogo augwa homugo God dali kę̄ pabo kolesaga tebolo bomo mabo dao, tama augwaligo kolesaga wiegi yai emainu homu hodolama, tama augwali homu nagame ilibō dao. ⁴ Te tōde bidibo we bidigo konesiąbo po wabo bidi, te aga digi naga tau sabo dao. Tiali goli te Godigo po pusubo bidigo, agai te Godigo po odobo we bidi hani sese tau sabo dao. ⁵ Eno homugo dage tigidaligo te we bidigo konesiąbo pogo po omainogo te homu godolo ebao. Tiali goli eno homugo te Godigo po dagego pusumainogo te homu mu godolo ebao. Magi baso meni, te Godigo po hania pusubo bidi agai te we bidi tau sabo sę̄ ebogo te we bidigo konesiąbo pogo po wabo bidigo tau sabo sę̄ aiyaba elalubo dao. Tiali goli, te we bidi augwaligo te po page hania konemainogo eyu, bidi mego te po page begeleyu da, teda te usu da, te po pusubo bidi dali te we bidigo konesiąbo pogo po wabo bidi dali sigo tau sabo sę̄ te tiwai si dao.

Dago Godigo po dena pogo pusao po

⁶ Ena ama dedeo, dagego te po homugo bugagia koneao. Ena te dage bidibo madi aselama, tama eno po te we bidigo konesiąbo gasa pogo naga wainogo eyu da, tiali goli te Godigo enabolo waselali po meba te eno dagebolo wasiąyu, ma eno wiegi yai kolesaga dagebolo masiąma, ma te Godigo po eno pususiąma, te eno dage me po ola masiąbaso da, teda eno te we bidi konesiąbo pogo wabogo dage bugagia tau sogobeo. Mu menio. ⁷ Te bidibo ula meni yai nai, te ona me gita, te tiwai naga elalubao. Te agai haniani po dolo bugagia wasiąbaso da, teda dago magi ilama te agai dogonide wabo po bugagia odaibawé? Te usu egobeo. ⁸ Ma, te ami enesigi bidi dabe augwaligo te bu wabo nai biugel bu wabo odobo si, augwaligo konebo dao, te hwiąbo sogo asai dao, te homu yaibao. Tiali goli ami bidi me deligo te biugel naigo dolo hwa wasiąbaso da, teda dego te wąbi hwiąbo sisi elaluibawé? Bidi meni. ⁹ Dage me, dage te tiwai gilama naga yaibao. Dagego duga lotude te bidi dabego konesiąbo gasa pogo po obaso da, magi ilama augwaligo te po page koneibawé? Menio. Teda dagego po olo madi hagagi paibao. ¹⁰ Mu tama, te haniani we bidi hani augwaligo te haniani po hauwa e tōde elalubao, dago te haniani po nedebu usu egobeo. Tiali goli te po me deli olo me elalubeo.

Te tigidali pogo te page elalubao. ¹¹ Tialima, te bidi me deligo pusubo po page eno me konesiąbaso da, te agai homugo ena te gasa digibulu bidibo bidi hani da homu yaibao. Tama eno me eno homugo te po wabo bidi te gasa digibulu bidibo bidi hani da, te homu ebo dao. ¹² Dagego me dagego te we bidigo konesiąbo pogo po weyu da, teda dage tama tiwai ebo dao. Tialima, dagego te Tedali Mobo Bidigo olo maiabo tau sabo bomo dabe sainogo homu godolo yaligo da, teda Godigo we bidi hani bugagia dolalumainao homu eyu, dagego te augwali wiegi yai mu tau mabo bomo sabo homu bomonama eyu, tama te Mobo Bidibolo te bomo da mao weyu bidiqo.

¹³ Tama tibaso, te we bidi dabego konesiąbo pode po wabo bidigo, agai te po begelabo bomo somainogo eyu tama agai Godibolo te bomo ena mao po hanalu wao. Tama tiyu, tama agai te bomo sobaso da, teda agai te aga gasa pogo wabo po begelama, tama gasa we bidi augwaligo te po page hania koneaibao. ¹⁴ Magi baso meni, eno te da we bidigo konesiąbo pogo Godibolo po weyu da, teda eno mobo bidigo me te gedu haluasa po wabo, tiali goli tebogo eno homu kolesaga tau sabo meni, te olo elaluaiabao. ¹⁵ Tama eno magi egowe? Te eno ena homu ogwa wai dali te da we bidi konesiąbo pogo Godibolo po weyu aga nogi uwababa saibao, tama ena homugo kone paliyu tama waibao. Eno aga nogi uwababa sabo tęabi po te konesiąbo pogo te eno homu ogwa waigo weyu, tama te eno homugo dali me te tęabi po waibao. ¹⁶ Te nago tama tisiąma, tama naga homu ogwa waigo naga te lotu wabo sogode nago Godibolo puba hwi po weyu da, tama tede bidibo olo bidi me deligo te po konesiąwani da, teda magi ilama agai te nago puba hwi po walide te “Amen, mu dao” po agai wagowe? Te usu me egobeo. Agai nago te wali po me konegobeo. ¹⁷ Mu tama, nago Godibolo po wali te wiegi yai wali, tiali goli nago te po waligo te gasa bidi homu tau siyu bomo me mabeo.

¹⁸ Dagego te da tqde bidibo we bidigo dena homugo konesiąbo pogo me sogo Godibolo po wabo dao. Awe, te usu da. Eno me hauwa sogo tama tebo dao, tama te sęde eno dage aiyaba elalubo dao. God agai te pogo po wabo bomo ena mobaso, eno agabolo puba hwi po wabo dao. ¹⁹ Tiali goli te Godigo po odobo we bidi sisinibode, eno homugo te eno te augwaligo konesiąbo po hauwa mu wagobeo. Menio. Eno homu e tiwai dao, te dena pogo weyu, eno augwali tau siyu, te ola mabo po bugagia ola momainogo eyu, te eno dwasianu pogo hania waibao, te usu dao.

²⁰ Eno ama dedeo, dagego te haniani sęde dagalabo homude dage te wai puluba tiwai me bidilamu. Menio. Te dwai kolesaga ebode dage te dwasianu wai puluba bidibo tiwai bida, te dwai kolesaga egimio. Tiali goli duga haniani sę ebo dagalabo homude, dage te genuai bidi tiwai pedaliqo. ²¹ Te Godigo bomai pode augwaligo te tiwai po polobadu asəai dao, te gasa konesiąbo pogo wabo kolesagade,

“Genuai Bidigo te po wai, ‘Te gasa po wabo bidigo pedauwalide, tama te gasa bidi hanigo pedauwalide te eno po e we bidi hanibolo mawaibao. Tiali goli tebogo me usu egobeo, te augwaligo eno po wali me pogobeo,’ agai te po wai.”^o

²²Tama tibaso, dago koneani, te da tode bidibo we bidigo konesiąbo gasa pogo po wabo kolesaga da, te muani sa dao, te Kraisba augwa homu tigidali musiąwai bagego augwaligo te tobage po wabo odoyu, tama augwaligo Godigo bomo meba sueibao. Me ma, te Godigo po pusubo kolesaga da, te me te muani sa dao, tama te po odoyu bugagia wali pabo we bidi augwaligo tedu koneibao, augwaligo augwa homu tigidali te Kraisba mu muai dao. ²³Tama tibaso, te dage Godigo po odobo we bidi tigidali dage deli madi sisinama, tama dage te sogo po wabo bage tigidaligo we bidigo konesiąbo gasa gasa pogo po weyu, tama bidi mebago konesiąma, tama Kraisba augwa homu musiąwani bidi dali, augwali te tomoba asiyu da, teda augwaligo dagede te po waibao, “Dage esela pobao” waibao. ²⁴Tiali goli, dage tigidali deli deligo Godigo po dena pogo pusubaso, tama Kraisba augwa homu musiąwani bage, ma bugagia konesiąwani bidi me deli, aga te tomoba asobaso da, teda dage tigidaligo pogo te bidi homude enaibao, tama dage tigidaligo pogo aga po tu ela mabo tiwai eyu tama aga koneaibao, Godigo gedude aga dwai se yali sege elalubao. ²⁵Tama tigidali po aga homude geme dualaluali, te agai hania pusaibao. Tama aga ge neyu, aga gesabidiba basi gulama, tama God nogi uwababa siyu, tama hanilama te po waibao, “Mu tama, God te dage tomode bidibao,” agai te po waibao.

Te lotu po wabo se tigidali dolo pedalomainao

²⁶Ama dedeo, dagego magi yaibawe? Dage lotu po wainogo eyu sisinibo sogo, dage tigidali deli deligo te duga hasi tau sabo se elalubao. Me deligo te Godigo nogi uwababa sabo balia weyu, tama me deligo te dage po ola mabo se eyu, tama me deligo te Godigo agabolo tamadi mani po, tama agai te po pusaibao. Tama me deligo te dago konesiąbo gasa pogo po weyu, tama mego te po begelebo se elalubao. Dagego ebo se tigidali ebogo te dage Godigo po odobo we bidi tau siyu bomo momainogo iyao. ²⁷Tama mebago te da tode bidibo we bidigo konesiąbo pogo po wainogo homu ebaso da, teda sigo ma selago naga yao. Te usu dao. Tama augwaligo po hodobo me olamuo. Menio. Me deligo bolo po hasia olama, tama gasa aga po nosali weyu yao. Tama bidi me deligo te augwaligo wali po page begelemainao. ²⁸Tama te po begelabo bidi meni baso da, teda te we bidigo konesiąbo pogo po wabo bidi te dage Godigo

^o 14:21 Ais 28:11-12

po odobo we bidi sisinani sogo po wabo pedauwali pania sao. Agai aga digi homu tomode God dali naga aga po mimainao. ²⁹Tama te Godigo po pusubo bidi si ma sela, augwaligo te Godigo po pusumainao. Tama gasa bage augwaligo te pusali po dagaloyu tama osola suyu miao. ³⁰Tama me deli dulaluali bidibolo, tama Godigo Mobo Bidigo po me deli agabolo te sogo naga ola mani po wainogo eboso da, teda te hasia doligulama po wabo bidi, te aga wabo po silao, te Godigo agabolo po tamadi mani bidigo te mani po omainao. ³¹Te kolesaga ebogo da, teda dage tigidali deli deligo Godigo po pusagameo, tama dage tigidali we bidigo koneama kolesaga selama, tama dage tigidali bomo somainogo yaibao. ³²Te Godigo po pusubo bidi dabe augwaligo augwa Godigo Mobo Bidigo nogode sali po pusubo bomo augwa digi tonalumainao. ³³⁻³⁴Magi baso meni, Godigo te da dago lotu po wabode te subigila ebo homu me ilibo meni. Te menio. Agai da deli homude naga nagamea homu elama bidimainogo ilibo dao.

Te Godigo po odobo we bidi sisinibo sogo te we dabe sibigo po me olamuo, augwali pedauwali naga pania sao. Da Godigo po odobo we bidi hani te tigidali tqde bidiyu, da tigidaligo tama naga tebo dao. Te we dabe sibi augwali te Godigo po odobo we bidi tomode me polalugobeo. Augwali te dologode bidao, te Juda dabego bomai pode wali po gilama yao. ³⁵Te we dabe sibi augwaligo te lotude odali po me deli page koneainogo da, teda augwaligo augwa bidibolo augwa bede hanalu wao. Ma, te Godigo po odobo we bidi sisinibo sogo wego po obaso da, agai te dolo isawai hale ilibo kolesaga eba.

³⁶Awe, eno koneani, te dagego eno meg i tama wali po bolobo dao. Te dage tomode te dage deliba sisinibo sogo te we mebagi po pusubo dao. Magi basowe? Dage te Godigo wiegi yai gesi po page bage dagede da agawe? Dagego naga te Godigo po siyu, tama gasa we bidi augwali meni yaiba agawe? Te meni. Dagego te tigidali gasa tqde bidibo Godigo po odobo we bidi hani augwaligo ebo kolesaga wali peyu, tama te we dabe sibigo lotu po obadi po pusubo habu selao. ³⁷Tama bidi me deli aga homugo digi aga te Godigo po pusubo bidi da te homu eboso, ma aga digi homugo te Godigo Tedali Mobo Bidigo agabolo te Godigo we bidi tau sabo se agabolo mani, te homu eyu da, teda aga koneao, te po eno dagebolo meg i asəani te Genuai Bidigo bomai po dao. ³⁸Tiali goli aga te tiwai homu me isayu da, teda dago me aga te Godigo po pusubo bidi da te homu me egobeo.

³⁹Eno ama dede dabeo, eno wali po page e dao: dagego te Godigo po pusubo se emainogo eyu duga homugo bomo elama godolo yao. Tama me, dagego te da tqde bidibo we bidigo konesiabo gasa gasa pog o te Godigo nogi uwgaba sabo se te habu munu me selamu dao. ⁴⁰Tiali goli dage deliba sisinama tama lotu po obadi, te subigila egimio, te se dodolama tama wiegi yai naga pedalomainao.

Te isali we bidi dabe augwali ma hodalueibao
(Dq̄ 15)

Te Krais isilama tama ma hodaluali po

15 ¹Eno ama dedeo, megi eno homugo te eno dagebolo polobadu pusali wiegi yai gesi po, te po pagede dage homu ma hodolainogo eno homu ebao. Dagego te wiegi yai gesi po salio, tama dage tede bomo elama dolalubo dao. ²Tama Godigo te wiegi yai gesi pogo naga dage ma dobola siyu wiegi yai madiba mubao. Dagego te eno dagebolo pusali wiegi yai gesi po dali duga homugo mu kę̄ peyu da, te pogo agai dage ma dobola saibao. Te dagego te tiwai isayu da, teda dagego olo naga Kraisba duga homu tigidali muyu agaba tialuali.

³Te eno polasa po dagebolo hasia bolo mani, te eno me eno polobadu te po naga sali. Te po e tiwai dao: te Krais isilama dago dwai sege tigidali sela samainogo yali, te Godigo po bukude polobadu aşəani po tama usu nani.^p ⁴Tama augwaligo aga te masigi dedage ḡu pageba mugi pai. Tama sela sogo wabode Godigo aga ma hodolama, tama aga me bidibao, te Godigo po bukude polobadu aşəani po tama usu numainogo yai dao.^q ⁵Tama nosali aga Pita bidibo madi pedalali, tama nosali te aga se bidi nogo si olama saç̄ badu si bidi bidibo madi pedalama augwaligo aga suali.^r ⁶Tama nosali ma dago ama dede hauwa dali augwaligo aga suali, te bidi sese hauwa 500 bidi augwaligo suario. Tama te suali ama dede augwali meba nosali isiyu yai, tiali goli hauwa augwali megi me bidibao. ⁷Tama nosali ma Jemsgo aga suali. Tama te sogo nosali aga seba tagala palali bidi dabego me aga suario. Te tiwai aga isilama ma hodaluali po eno dagebolo hasia bolo ola mani.

⁸Tama augwaligo sula silama, tudi badu mu aga te ena geduba me pedalai, ena te wai boq̄ tiwai te aga idago te ame nesiabo sogo ame nani.^s ⁹Magi baso meni. Ena da, ena te Godigo po sela pabo bidi dabe augwali tomode te dwasianu gagayali. Tama ena te bidi augwaligo te Godigo po sela pabo bidi nogi wabo usu me egi menio. Magi baso meni, polobadu eno te Godigo po odobo we bidi hani dolobo se hauwa mu yai dao.^t ¹⁰Tiali goli Godigo olo mu tau sabo kolesagago ena tau selama, tama agai ena megi bidibo tiwai ilali, ena te aga se ebo tagala palali bidi dao. Tama agai ena olo mu tau sali wiegi yai kolesaga te olo me hagabeo. Mu menio. Eno aga se bomo mu elama yai, te gasa Godigo po sela pali bidi dabe augwaligo yali se eno yali se ebogo aiyaba elaluali. Tiali goli eno ena digi me ebeo. Menio. Te Godigo olo tau sabo wiegi yai kolesaga ena

^p 15:3 Ais 53:5-12 ^q 15:4 Tib 16:8-10; Mat 12:40; 28:16-17; Mak 16:14; Luk 24:36;
 Jon 20:19; Tpi 2:24-32 ^r 15:5 Luk 24:34 ^s 15:8 Tpi 9:3-6 ^t 15:9 Tpi 8:3

dali bidiyu, agai naga te sə ebo dao. ¹¹Tiali goli te eno ma augwaligo te gesi wiegi yai po pusali, te tagalao. Te magigo meni. Da aga tagala palali bidi tigidaligo te Kraisde po naga pusubo dao. Tama dagego te pode naga konealubo po duga homugo dąu olama tama Kraisba homu dąu elalubo dao.

Nosali tigidali isali bidi ma hodalobo kolesagade po

¹²Sesemane sogo da Godigo gesi wiegi yai po pusubo bidi dabe dago te Krais isəma tama Godigo aga ma hodolali po pusubo dao. Tama tialigo da, magi ilama tama dage tomode meba augwaligo e tiwai tibo po weyu ebo dao: “Te isai bidi, aga ma hodalugobe, dago te homu ebo da,” te po wabo. ¹³Edao. Te isai bidi mu ma hodalobo usu menigi sogo da, teda Godigo Krais te ḡu pagede ma hodoligi meni da. ¹⁴Tama mu tama Godigo Krais ma hodoligi menigi sogo da, teda dago te pusubo po, te po olo nai tiwai gagagi da, tama dagego Kraisde konealubo po dąu olama agaba homugo tialubo kolesaga, te me te olo nai tiwai pedaligi da. ¹⁵Tama te tiwai da wida, teda me da te Godigo po pusubode te da tibo po wabo bidi tiwai pedaliba. Magi baso meni, dago te Godide po weyu tama dago te agai Krais te ḡu pagede ma hodolali po dago hanilama hania wali. Tiali goli Godigo te isai bidi ma hodalobo meni eyu da, teda agai te Krais me ma hodolobeo. ¹⁶Awe, mu tama Godigo te isai bidi ma hodalobo meni da wida, teda Godigo te Krais me hodoligi meni. ¹⁷Tama mu tama Godigo te Krais ma hodoligi menigi sogo da, teda dagego te Kraisba duga homu tigidali mubo kolesaga ebogo te duga tau sabo usu me egi menio. Duga dwai sege dali bididubadi gebo dao. ¹⁸Tama me elalubao, te Kraisde konealubo po dąu olama isali we bidi dabe, augwali me hagawai dao. ¹⁹Te Krais agai da ma dobola somainogo eyu, dago dena homu tigidali agaba munama tama agaba tialuyu, tama dwagi yai homu eyu aga ma asobo tonalubo dao. Tama tebogo da e təde bidibō sogode naga da tau siyu da, teda da hobedagia mu bidibao. We bidi augwaligo da dali homu dene ebogo te gasa we bidide homu dene ebo sə aiyaba elaluabao.

²⁰Tiali goli te tiwai me egobeo. Mu menio. Te Krais isali, tama mu tama Godigo aga te isai we bidi tomodu ma hodolali. Aga te isali we bidi dabe hodalomainogo te hasia polasa hodalualu bidi aga dao. Tama te gide nai inabo hasia pedalali nai tiwai aga te ḡu pagede hasia mu ma pedalai dao. Tama tibaso, dago koneani, agade konealubo po dąu wali we bidi tigidali augwali me te Godigo ma hodolaibao.

²¹Magi baso meni, te bidi deli Adamgo yali səde tedu te isibo kolesaga pedalali, tama te tiwai me te gasa bidi me deli Kraisgo yali səde te isai bidi ma hodaloabo kolesaga me pedalalio. ²²Te e tama tiwai: te Adamgo bulai wai augwali tigidali isibo bage dao. Tama tiali goli Kraisgo we bidi hani augwali tigidali bidibō ula saibao. ²³Tiali goli da tigidali we

bidi deli deli te da ma hodaluama, tama dena sogo tede te bidabo ula saibao. Te hasia bolo polalubo te Krais aga ma hodaluama tama bidabo ula sai dao. Tama nosali aga ma asobo sogo, da aga hani tigidali ma hodaluabao.²⁴ Tama te sogo tigidali nai silaibao. Tama Kraisgo te gavman şe tigidali silibadi, tama te haniani tobolu bidi şe ebo tigidali badi, tama tigidali bomo dola silibadi elama, tama agai aga tigidali nai tonalubo bomo me ula te Aya Godigo nogoba muaibao.²⁵ Magi baso meni, Krais te tuni bidi bidimainu eyu, tama bidadu pidubadi tama Godigo te boi bidi tigidali augwali aiyaba elaluama siligi pabo si usu nigi paibao.²⁶ Agai te gasa boi bidi dabe augwali tigidali dolobode da, teda agai te isibo kolesaga me sia saibao.²⁷ Magi baso meni, te Godigo po bukude te tiwai po wai, “Godigo tigidali nai te aga dologode muaibao” wai. Te aşeanı pode te Godigo tigidali nai te Krais dologode muaibao po wai. Tama tialima dago hania koneani, Godigo tigidali nai te Krais dologoba muani, tiali goli God aga digi te Krais dologode me bidigobeo. Menio.²⁸ Tama nosali Godigo tigidali nai Krais dologode munama silibo si da, teda God aga Ogwa digi te God dologoba pelama, te tigidali nai aga dologoba munama, tama God te tigidali nai dali, tigidali we bidi dali tobolu bidi mu bidimainogo yaibao.

²⁹ Edao. Te Godigo te bidi dabe te gü pagede ma hodaluabao po te mu po menigi sogo da, magi baso te meba bidibo bidigo te isali bidi tau somainogo eyu baptais sabo dawe? Te mu tama te isai bidi munu me ma hodalugobe da weyu da, teda magi baso te isai bidi dabe tobade te bidibo bidigo augwali tau somainogo eyu baptais sabo dawe?³⁰ Tama ena dali, te ena dali deli şe ebo bage me, da me sesemane sogo bidi mebago da dolainogo ebo dao. Te isai bidi ma hodoligi menigi sogo da, teda magi baso da e tiwai bidaibawe? Te isai we bidi ma hodoligi menigi sogo da, teda te Godigo pode boi bidi homu ebo bagego da dene me maidali weyu dago e şe tagaligi da.³¹ Ama dedeo, te tigidali sogo te ena dali boi homu ebo bagego dene mabo homu ebaso, te tigidali sogo deli deli ena isigowe, te eno konesiabantu ena tama bidibo dao. Te po mu po naga dao, te eno dagede ebo homu te mu tama dao tiwai. Mu tama, da tigidali dago Genuai Bidi Krais Jisasde tia selama bidibo tama eno wiegi yai homu pemene dagebolo mu ebo dao.³² Ena e moni hanu Efesusde polobadu bidibadi, te Godigo pode boi bidi homu ebo bagego ena dali dwai şe yali, augwali te bulude bidibo dwai hui digi ebo hasa dabe tiwai yali. Tama eno tqde bidigo homu wali naga pigi sogo da, teda te şege tolobogo ena mena tama tau sogowe ena te homu egi da. Tama tiyu, mu tama te isai bidi dabe ma hodoligi menigi sogo da, teda “Da do ma tamadi isibaso, tagalao, dago te nai me wę me subigila tuinao,” te homu egi dao.^w

^u 15:25 Tib 110:1 ^v 15:27 Tib 8:6 ^w 15:32 Ais 22:13

³³ Augwaligo dage te tobage tibo po ola mabo gogolamu! Bidi me deligo te dwai kolesaga ebode polobadu wali po te mu po naga dao. Agai te po wai, “Te da dwai bidi dabe dali kisasa biliyu da, teda augwaligo dwai kolesagago dago wiegi yai kolesaga ebo dolaibao,” agai te po wai.

³⁴ Dagego te wabo pabo kolesaga tagalama tama dolo homu kolesaga yao. Dagego dwai se ebo tagaliao. Dagego odao. Dage tomode meba augwaligo te Godigo te isai we bidi ma hodalugobe po wabo bage, augwaligo God kuna konebeo. Te dage hale ilainogo eyu eno te po dagebolo obao.

Te isali tigi gasagi yai ma hodaluibaao

³⁵ Tiali goli bidi me deligo te tiwai po hanalu waibao, “Te Godigo po wali pali isai we bidi dabe augwali mena tama hodalugowe? Te augwali mena tiwai tigi selama ma hodalugowe?” agai te po waibao. ³⁶ Te eno te po wei ponoyu e po obao: nage kolesaga meni yai bidi dawe? Nago hanalu wali po si te kidu meni yai po naga dao. Naga digi te nai yiyu ge bulubo naga koneani, tama te nai ge bulama tama tq tomode te ge peda pelama tama kulubi holisiayu da, teda te holabo yiyu aga bidabo ula me sogobeo. ³⁷ Tama nago te ge naga bulubo dao, te nosali pedalobo sese nai tigi bulubo meni. Te menio. Nago olo ge naga bulali, te yiyu ge, ma gasa nai ge me te olo ge naga bulubo dao. ³⁸ Tama Godigo digi aga homugo te yiyu gede pedelabo yabe dodolama nigali, te aga digi homugo koneama te tiwai yali. Tama agai haniani yabe te haniani nai wai tigidali deli delibolo mabo dao.

³⁹ Tigidali tqde elalubo naigo tigi te deli nai tigi tiwai naga me elalubeo. Menio. Te bidigo tigi gasagi yai me tedali elalubo, tama hasa dabego gasagi yai me tedali, tama ba dabego gasagi yai me elalubo, tama suq̄u dabego me gasagi yai tedali tigi elalubo dao. ⁴⁰ Tama dagalude nai dabe me tqde nai dabe me tedali elalubao. Tiali goli te dagalude nai dabego au yali te deli tigi poai elalubo, tama tqde nai dabego au yali te gasagi yai tedali elalubao. ⁴¹ Te giligago au yali te deli tigi poai elalubo, tama poluago au yali te gasagi yai me, tama te hoq dabego au te gasagi yai me elalubo. Tama hoq dabego au me te gasagi gasagi yai elalubao.

⁴² Te Godigo te isali we bidi dabe ma hodolobo kolesaga me, te tiwai naga yaibao. Te tigi dago te nai ge tiwai pubalobo, te dolaibao. Te ma hodalobo tigi te gasagi yai dao, te munu me dologobeo, te gamonabo tigi dao. ⁴³ Te tigi dago pubalobo, te sawi isawai dwai mu yali. Te ma hodalobo tigi, te wiegi yai sawia pai mu yaibao. Te dago tqba pubalobo tigi, te bomo me elalubeo. Te ma hodalobo tigi, te bomo hauwa elaluibaao. ⁴⁴ Te tigi dago pubalobo, te tqde bidabo tigi naga pubulaibao. Te ma hodalobo tigi, te dagalude bidabo tigi elaluibaao. Te tqde tigi elalubo, tama tibaso dago koneani, te dagalude bidabo tigi me elalubo dao. ⁴⁵ Te Godigo po bukude aşeanı pode me te tiwai po wai, “Te polasa hasia bidi, Adam, te bidibo ula elalubo bidi pedalai,” te

po aşəni. Tama nosali mu pedalali Adam aga te bidibo ula mabo mobo bidi pedalali.^x ⁴⁶Tiali goli te bidibo ula mabo mobo bidi te hasia me pedalobeo. Menio. Te e təde bidabo ula te hasia pedalali. Tama bidibo ula ebo mobo bidi noma te nosali badu pedalaibao, aga te təde bidabo ula hasegelaibao. ⁴⁷Te hasia polali bidi Adam te e təde bidibolo polali. Godigo togo naga aga nigali. Nosali pedalali bidi te agade Adam si wabo bidi, te aga dagalude bidai bidi dao, tedu asai dao. ⁴⁸Da təde we bidi tigidali, da te Godigo te togo nigali bidi Adam tiwai pedalali. Tama da Kraisgo we bidi hani bage, da te dagaludu asali bidi Krais tiwai mu pedalaibao. ⁴⁹Tama megı da te Godigo togo nigali bidi Adam tiwai dao, dago elalubo tigi te agai elaluali tigi tiwai si naga dao. Tama te tiwai naga me dago te dagaludu asali bidi Krais aga tigi tiwai naga digi dago nosali saibao.

⁵⁰Ama dedeo, eno megı wali po page e dao: te e təde bidabo tigi naga elalubo bidi te Godigo we bidi tonalubo madide bidibo usu me egobeo. Tama te gamonasiąbo tigide bidibo bidi me gamonogobeo.

⁵¹Dagego odiąo. Eno geme dualali po me deli dagebolo pusubao: te da tigidali me isigobeo. Tiali goli Godigo da tigidaligo tigi te hasegelama te gasagi yai tigi me pedalaibao, ⁵²polo mu, bidigo gedu gagamu ebo tiwai, te təde dagalu si silibo sogo te bu wabo nai biugel po wabo sogo tiaibao. Awe, te bu wabo nai biugel po waibao, tama te Godigo po wali pali isali we bidi augwali g̃u pagede hodalaibaibao, tama augwali munu me dologobeo, te augwali gamonaibao. Tama da me bidibo bage, dago tigi hasegelama, gasagi yai mu pedalaibao.^y ⁵³Te e tiwai: te dolobo tigi, te hasegelama tama te dolisiąbo tigi pedalama, tama sesemane sogo bugagia bidimainogo emainao. Te isibo tigi te hasegelama, tama gamonabo tigi ulade bidimainogo emainao. ⁵⁴Mu tamao, te dago elalubo tigi, te dolobo tigi, te hasegelama sesemane sogo bugagia bidaibao. Tama te isibo tigi te hasegelama te gamonabo tigi pedalama tama sesemane sogo bidaibao. Te tebo sogo te Godigo po bukude aşəni po me deli te usu nagasaibao. Bukude te po wai:

“Godigo te wąbi hwjani bomo elama, tama te isibo kolesaga te aiyaba elaluama, tama tigidali mu sililio.”^z

⁵⁵Bukude po me e tiwai elalubao,

“Nage da, isibo kolesaga, tama nago te we bidi aiyaba elalubao s̄e mena elalubawe? Menio! Te mu sililio! Nage da, isibo kolesaga, te nago dene mabo bomo menawe? Te menio! Te aiyaba elalualio!”^a

Te po bukude aşəni. ⁵⁶Təde we bidi augwaligo te isibode magi baso wi ebo dawe? Woo, augwaligo koneani, augwaligo dwai s̄e eyu bidibaso,

* 15:45 Gag 2:7 y 15:52 1 Te 4:15-17 z 15:54 Ais 25:8 a 15:55 Hos 13:14

nosali augwali dene saibao. Augwaligo dwai s̄e yali, te augwaligo mena tama koneaniwe? Te Godigo Mosesbolo mani bomai pogo te dwai s̄e yali page augwali hania waselebo dao.⁵⁷ Tiali goli Godibolo dago puba hwi po wao! Te dago Genuai Bidi Jisas Kraisgo yali s̄ede, te Godigo da bomo mobaso, tama dago te boi bidi, te isibo kolesaga, te dago aiyaba elalubo dao.

⁵⁸ Eno ama dede muo, te da nosali ma hodaluama tama tebogo te isibo kolesaga aiyaba mu elalubaso, meg i dage bomo elama bidiyu, tama wi homu eyu dwasianu ibaba kila selamuo. Te dagego Genuai Bidigo s̄e dene ebo, te olo me tagalogobeo, te s̄e ebogo aga du mu walaibao. Dagego te tiwai koneama, tama sesemane sogo dagego dago Genuai Bidigo s̄e dene s̄e bomo mu yao.

Polgo homugo mena s̄e dabe agai igi da, homu yali po

(Dq̄l 16)

Polgo te Godigo we bidi tau sabo masigi po wali

16

¹Dagego ena te Judia tq̄de bidibo bage tau sabo masigide po hanalu wali. Megi eno te po wei ponoyu, dagego te sisinama Godigo we bidi augwalibolo mawainogo ebo masigi po wabo elalubao. Te s̄e yabo sunumi eno te Galesia moni tq̄de bidibo Godigo po odobo we bidi hani dabe augwalibolo ola mani, tama dagego me te tiwai gilama yao.^b ²Te tigidali Sande dage tigidali deli deligo te hasia Sarere s̄e elama sali mone tede homugo koneama, tama te bugulama tama me badu te duga bede bugagia munalumainao, te tiwai saboao. Tama nosali ena sabolobode, teda dagego augwali maiabo mone gegebo s̄e me egobeo. ³Nosali ena dage bidibo digi sabolobode, teda duga digi te mone sel a pabo bidi meba nogo t̄u elama, dagego te tau sabo masigi dabe te moni hanu Jerusalemba sel a pomainogo yaibao. Tama dagego pas dabe aseñama, tama augwalibolo menama, tama augwali teba tagala palaibao. ⁴Tama ena me ena pabo homu ebaso da, teda augwali ena dali hodobo paibao.

Pol pelama Korin dabe suainogo homu yali

⁵Eno tede s̄e me elalubaso, eno e bulu Efesus tagalama tama hasia ena te Masedonia moni t̄o pedai teba paibao. Te moni t̄o tomodu biliyu, tama tede eno s̄e silibo si, tama ena dage bidibo madi pedalaibao.^c ⁶Tama sabolama, tama ena dwasianu sogo te dage dalí bidabo homu eba. Ena kuna konebe, te ena dage dalí bidibadi te moni kedau ebo silibo sogoba

^b 16:1 Rom 15:25-26 ^c 16:5 Tpi 19:21

usu nagasaibao homu yai. Tama nosali ena gasa buluba sę egi paibao, te mena bulu te megı eno konebeo. Tialima ena gasa buluba painogo ebode, teda dagego te pabo sunumiba ena odasa pelama, tama tau siyu tagaligi pagameo. ⁷Ena megı te Masedonia tǫba pobadi ena dageba asigi sogo da, teda ena dage dali dwasianu sogo naga bidibo usigi da. Te ena hagelabo. Dago Genuai Bidigo usu da po obaso da, te ena Masedonia tőde elalubo sę silama tama dageba asama, tama ena dwasianu bobage sogo dage dali bidabo homu ebao.

⁸ Tiali goli ena e Efesus bulude bidibadi te Juda dabego moni nai tubo sogo nogi Pentikos pedalobo sogoba usu nagasomainu homu ebo dao. ⁹ Magi baso meni, Godigo eno sunumi dalobaso, tama eno te we bidi hauwa te Godigo po wali pomainogo tau sabo sę genuai elalubao. Tama ena dali boi bidi homu ebo bidi dabe me hauwa ede elalubao.

¹⁰ Te nosali Timoti dage bidibo madiba pedalobo si da, teda dagego bugagia tonalu te aga dage tomode wi isayu homu nagame elama dua digi bidimainao. Magi baso meni, agai Genuai Bidigo sę eyu, te eno digi ebo sę tiwai ebo bidi dao. ¹¹ Tama tibaso, bidi me badugo aga te olo nai tiwai bidi da homu eyu, tama aga tudiba me munamuo. Menio. Dagego aga homu nagame ilama, tama nosali aga te enaba asabo sunumiba bugagia tagalagaselama, tama aga ena pageba asomainogo yao. Eno te ama dede meba dali aga asobo tonaluibao.

¹² Tama dago ama Apolos, te agade po te tiwai dao: te hauwa sogo eno po agabolo bomo elama weyu, te aga ama dede dali augwaligo dage suagasomainogo po wai dao. Tiali goli aga pabo hagela homu mu yai. Nosali, te aga pabo sogo suali usu ebaso da, teda aga dageba sabolagasaiabao.

Po silagasu wabo po wai

¹³ Dagego bugagia tonaluyu, tama te Kraisde konealubo pode bomo elama bugagia dolaluao. Dage bidi mu sesemane sogo bidiyu, tama bomo elama bidaloao. ¹⁴ Tigidali sę dagego ebo, dagego dwagi yai homu te Godibolo me te we bidi dabe augwali dali eyu, tama dagego duga sę tigidali iduaoo.

¹⁵ Ama dedeo, dagego te bidi Stefanas dali aga hani dali koneani, augwali te gasa Akaia tǫ pedai hani bidi dabe augwaligo Godigo po wali pabo gagalisabantu te augwalibolo polasa te Godigo po wali pabo hani we bidi pedalama tama megı bidibao. Tama augwa digi homugo augwaligo te Godigo po odobo we bidi augwali tau sabo sę salio. Eno homugo dage te tobage we bidi augwali ¹⁶ dologode bidimainogo homu ebao, tama tigidali bidi dabego augwali tau selama, tama te sęde sę bomo elama ebo dao. ¹⁷ Tama Stefanas me Fortunatus badi te Akaikus, te bagé augwali ena bidibo madi asali, tama eno homu wiegi yai pemene yalio. Magi baso

meni, dagego ena tau somainogo eyu eba asabo te usu isəbaso, tama augwali selago dage hasegelama, tama augwali ena bidibo madi asai dao.¹⁸ Augwaligo ena homu me, tama dage homu me nagame ilali. Tama tiyu dagego te tobage tiwai bidi dabe augwali nogi ugwaba sao.

¹⁹ Te moni tq pedai Esiade te Godigo po odobo we bidi augwaligo te giligade dao po dagebolo obao. Te Akwila de aga we Prisila dali, te Godigo po odobo we bidi te augwali sigo beba sisinibo bage, augwaligo dage dali dwagi yai homu eyu, dagebolo te Genuai Bidigo nogide siade dao po hauwa obao.^d ²⁰ Tama tigidali Efesusde bidibo ama dedego siade dao po dagebolo wali. Te da Godigo we bidigo kolesagade, dage tigidali deli deligo te ama dedebolo wiegi yai homu eyu augwali nogo mayao.

²¹ Ena Pol da, te ena digi eno nogogo te siade da po așəna dagebolo tolobao. ²² Bidi me deli aga homugo te dago Genuai Bidi Krais dali dwagi yai homu ebo hagela homu eyu da, te bidi agabolo dwai sə pedalomainao. Genuai Bidi, nage asao!

²³ Te eno homugo te Genuai Bidi Jisasgo olo tau sabo wiegi yai kolesaga te dage dali bidao.

²⁴ Te Krais Jisasgo yali səde te da tigidali hodobo deliba wadoloyu bidibo dao. Tama tiyu, eno dage dali dwagi yai homu eyu godolo eyu bidibao.

^d 16:19 Tpi 18:2

Polgo Korin Dabeba Si Wabo Pas Aşəni

Hasia nedebo tau sabo po

Te Korin moni hanude te Kraisgo po wali pabo we bidi hani dabe elaluali. Tama te tibo po ola mabo bidi dabe augwaligo ili po weyu tama te hani dabe bidibo tomoba pali. Te bagego augwa tibo po te Korin we bidibolo ola mobadi tama augwaligo Polde haniani dwai posobo po weyu, te aga te Godigo po sel a pabo bidi mu menio wai. Tama te bidi Pol gasa digibulu bulude bidibadi agai te posobo po wabo kolesaga ebo po odolama, tama te tibo po ola mabo bagego te Korin we bidi dabego te Krais wali pabo kolesaga dolidali weyu, tama agai e tau sabo po aşəna tolali. Aga da te Kraisgo sə ebo bidi mu da weyu, tama agai te sə ebode te boi bidi dabego nogode sali dene dali seğe dali te tigidali te Polgo augwaliba ola mobao. Aga te Korin buluba ma asaibao wali.

Tama te sogo te Judia tq pedaide bidibo te Godigo po wali pabo bage augwali dwagila bidibaso, tama te bidi Pol aga hani bage dali mone sisilama, te augwali magi painu yali. Tama te buku Daj 8 me 9de, te bidi Polgo te bulu Korin bidi dabe haliga hodolobo po weyu, te səba mone maiabo po wai dao. Te te bidi Polgo silagusu aşəni pasde te e tama po wali, te tibo po sel a pabo bidi aposel dabe aselama te bulu Korinde bidiyu, tama augwaligo te bidi Polgo nogi aiyaba elalubo sə eyu, tama agai te Godigo po sel a pabo sə emainu te tagala palali bidi nogi aposel sə ebo nogi dolama begela tagalali. Te po wai dao.

Polgo po hanilama weyu, te Godigo tagala palali bidi aposel dabeba sə mani po wali

(Daj 1-7)

1 ¹Ena Pol dao, ena te Krais Jisasgo sə ebo tagala palai bidi dao. God aga homugo digi tama Godigo ena te aga sə ebo bidi muai. Ena dali, te dago ama Timoti da sigo pas te dage Godigo po odoyu te Korin moni hanude bidibo we bidi dagebolo e pas aşəna tolobao, te moni Grik tq pedai tigidali badu bidalubo te Godigo we bidi tigidilibolo eno e pas aşəna tolobao. ²Eno homugo te dago Aya God dali, te Genuai Bidi Jisas Krais daligo, te olo mu da tau siyu mabo wiegi yai kolesagago te dagego homu nagame ilama bidiqo.

Polgo te Godigo aga tau sobaso gedu haluasa po weyu usu da wai

³Dago agabolo puba hwi po weyu, tama God nogi uwababa sao, aga te God tama dago Genuai Bidi Jisas Kraisgo Aya dao. Aga te dago Aya, tama aga te hobede eyu tau sabo page bidi dao. Aga te tigidali sege elalubo bidigo homu nagame iliboo God dao. ⁴Te tigidali dene mabo sege daba pedalobo agai te dago homu nagame iliboo dao. Magi basowe? Agai da homu nagame iliboo kolesagago naga dago te haniani sege elalubo bidi dabe augwali homu nagame ilimainogo eyu, te Godigo da homu nagame bugagia iliboo dao. ⁵Magi baso meni, te Kraisgo tolali genuai dene, te dago me te tiwai naga tolobao. Tama tiali goli, te sogo me te Kraisgo genuai homu nagamego da paganai dao, te nagame iliboo kolesaga te dene tiwai si pedalobo dao. ⁶Te da sege tolobaso da, te dagego homu nagame iliyu tiaibao, tama Godigo dage ma somainogo ebao. Tama Godigo dago homu nagame ilibaso da, te dagego homu me nagame ilimainogo ebao. Te dage bomo elama dolaluyu, tama dago tolobo dene tiwai tolobaso da, teda Godigo dage homu nagame iliaibao. ⁷Tama homu si isayu, dago homugo koneani, te dage bomo elama dolalueibao. Dago koneai, dage da dali dene tolobao, tama tibaso te dage da dali te homu nagame ebo kolesaga me selama bidaibao.

⁸Ama dedeo, te dago homugo te moni tq pedai Esia tede te sege daba pedalali te dagego koneaibao. Te genuai sege mugo da aiyaba elaluama, tama dago bomo aiyaba mu elalualu. Tama tiyu, tama dago homugo te da isabo homu yali dao. ⁹Mu po da wali, te da homu sege ebo te po tu ebo bidi jasgo te da isimainao po wali tiwai elama bidali. Te sege dabe te tiwai magi baso pedalali? Te dena bomogo usu yabo homu idali weyu te sege daba pedalali. Dago te Godigo bomoba homu tialumainogo yai, te agai te isai bidi dabe augwali hodolobo bidi dao. ¹⁰Te Esia tqde dwai nai mugo da ela muainogo yali, tiali goli Godigo tede da ma dobola sai. Tama megi me te agai da ma sidu gebo dao. Tama tibaso, dago dena homu te tobage se ebo God agaba daq weyu, tama dago homu e tiwai ebo dao, sesemane sogo te dwai naigo da dolainogo ebadi, te agai da ma selama, tama da bugagia bidaibao. ¹¹Tama dagego tede Godibolo hanalu wabo po wabogo da tau sao. Tama tiyu te Godigo te we bidi hauwago aga hanalu wabo po tama odama, tama agai da tau saibao. Tama we bidi hauwago te agai da tau sali seba homu koneama, tama Godibolo usu da po agai te yali dwagi yai sede waibao.

**Pol aga se yabo homu hasegelama, te Korin dabe
tibo po ola mayabo homu me ebeo**

¹²Dago wiegi yai homu pemene ebo se e kolesaga delide ebo dao: dago homugo hanilama po pusuyu da, te magi dwai se isabo te wiegi yai

kolesaga me tama te Godigo da mabo te meda isawai homu kolesagade bilibo po pusubao. Te e tqde bidigo koneani kolesaga te dago wali pabeo. Menio. Te Godigo olo mayu tau sabo wiegi yai kolesagago naga da tau selama, tama da te tiwai kolesagade bilibao. Tama da te kolesagade te tigidali bidi tomode bilibo dao. Tama dageba dago te kolesaga me mu ela pidu geai dao. 13-14Dago gasa po me dageba aseña tolobeo. Menio. Te po dagego nedama tama page koneabo po naga asebao. Tama megis dagego da gisiga konesiąyu, mesela naga koneai goli, dena homugo te dagego nosali da kuna koneaibao homu yai. Tama tiyu, te Genuai Bidi ma asobo sogo te dago dagede wiegi yai homu pemene ebogia, te dagego da dali wiegi yai homu pemene yagameo, te tiwai si naga yaibao.

¹⁵Tama dagego enade te dwagi yai abagi homu ebo kolesaga tede eno homu si isəbaso, tama polobadu eno po weyu, te eno homugo hasia dage bidibo madibolo pelama, tama duga wiegi yai homu si sogo yagameo po wai. ¹⁶Eno homugo hasia ena dage bidibo madibolo pabo homu yali, tama eno dage tagalama, tama ena te Masedonia genuai tq pedai teba paibao wali, tama eno te Masedonia tq tagalama, te ena dage bidiboba ma asaibao wai. Tama eno homugo dagego ena te Judia tqba tagala palomainogo yai dao. ¹⁷Tiali goli, te dageba pabo tū paliali, te ena dageba asobe. Magi basowe? Eno e tama tiabo po wai, tiali goli eno po subigila hasegelali homu elama tama eno po olo wali dawe? Ma, eno te yaibao wali sə isəbaso da, te eno e tqde bidigo olo po wabo tiwai elama, tama ena te homu mu isəawai bidi dawe? Mu menio. ¹⁸God da, te homu mu ebo bidi dao, tama aga da dali homu kəq pai bidi dao, tama agai dabolo te du walisiəbo po pusubo meni. Tama tialigo da, te dago dagebolo pusali po me te page si elaluali po meni. Polobadu eno dagebolo te ena dageba asaibao po wai. Tama homu mu naga eyu eno te po wai. Tiali goli eno gasa sə elalubaso, ena dageba ma asobo usube. ¹⁹Ena me Sailas me Timoti, dago dage tomode pusali po, te Godigo Ogwa Jisas Krais agade te po pusali. Tama Krais aga subigila hasegelebo menio, aga da te aga homu polo subigila hasegelebo bidi meni. Agai aga dəq walali po togogobeo, aga yaibao wali sə te aga mu yaibao. ²⁰Te Godigo dəq wali po hauwa elalubao, tama Kraisde naga te dəq walali po tigidali mu usu nagasai dao. Tama tibaso, dago Godigo po odama, tama Kraisgo nogide naga dago te po weyu, “Awe, mu dao,” te pode olama, tama dago Godigo nogi ugwbaba sabo dao. ²¹Tama Godigo digi da dali dage dali bomo ilama, tama da Krais dali homugo kəq pai we bidi bidibao. Tama agai digi da diə selama tama səba me muai dao. ²²Agai aga dəq iliyu daba sa muani, tama dago homuba Tedali Mobo Bidi mawai. Godigo te da dali gasa wiegi yai sə nosali yabo homu eyu, tama te Mobo Bidi hasia dabolo mani, tama dago te koneao wai: mu tama agai te tigidali wiegi yai sə da dali mu yaibao.

Pol te augwali bidibo madi te Korinba polo me pabeo wai

²³ Te eno te polobadu asəna tolali pasgo te dageba asobode tibo po wai yaibaso da, teda Godigo eno te tibo po wali te hania haninagameo. Tiali goli, menio. Eno mu po naga obao. Te eno seğe dageba mabo te eno hagela homu yali, tama tiyu te ena dage bidibo madi polo me te Korin buluba ma asobe dao. ²⁴ Te dagego Kraisde konealubo po dąu olama, agaba homu tialubo te dago tonalubo tiwai me egobeo. Menio. Te agaba tialubo kolesagade dage bomo elama dolalubao. Tama dago sę dage dali eyu te dagego wiegi yai homu pemene ebo te pedalomainogo tebo dao.

2 ¹Tama tibaso, ena homugo digi eno te po wai: ‘Te eno hasia asəna tolali pas te Korin bagego selama, tama augwali homu seğe eyu bidali. Te ena augwali pageba pelama, tama augwaligo ebo kolesagade te augwaligo dwai sę yali po olama, tama augwali homu seğe ma ilibo te eno hagela ebao,’ eno dage dali te homu yai dao. ² Magi baso meni. Te eno dagebolo homu seğe mayu da, teda dego te eno homu wiegi yai pemene iligowe? Te eno dage homu seğe ilai digi da, teda ena wiegi yai homu pemene ilabo bidi menigi da. ³Dage we bidigo te wiegi yai homu pemene enabolo mabo bage dao. Tama ena dage pageba pelama, te eno homu seğe sidali weyu, te delide naga polobadu eno te pas asəna tolama tama dagego sali. Eno dage tigidalide te tiwai homugo koneai: te eno nai me delide te wiegi yai homu pemene ebaso da, teda dage tigidaligo me wiegi yai homu pemene teba ebo dao. ⁴Mu dao, polobadu eno pas dageba asəna tolali, te sogo eno homu seğe genuai badi, dene dali elalualu, tama ena gela hauwa dali weyu bidali. Eno te pas asəna tolali te eno dageba homu seğe mawainogo ebeo. Menio. Eno te pas polobadu asəani te dagego ena konemainogo yali, eno dage dali dwagi yai homu eyu godolo ebo kolesaga te genuai mu dao.

Augwaligo te dwai penani sę yali bidigo yali dwai sę sela sayaowai

⁵ Te dage tomode polobadu dwai penani sę eyu homu seğe ilali bidigo, agai te homu seğe enabolo naga me mabeo. Menio. Agai te homu seğe meba te dage tigidaliba manio. Eno te po bomo elama wabo te ena hagela ebaso, tama eno te po wai, “Meba dao.” ⁶ Te dagego eno hasia asəna tolali pas po nedeyu, tama dagego eno po wali peyu te bidi buluba səy yali. Tama aga dali te sę ebogo te dwai dene te dage hauwa bidigo te bidi agaba wei ponani, te tibogo aga usu ilai, te bidigo ge neyu homu begelai dao. ⁷Tama tibaso, dagego gasa kolesaga me megı iyao. Te dagego agai seğe sela sənama, tama aga homu nagame ilao. Tiyu genuai homu seğe mugo te bidi aiyaba mu elaluabuo. ⁸Tama tibaso, eno homugo dagego te duga ebo dwagi yai homu eyu godolo ebo homu te agabolo bugagia ola mao. ⁹Polobadu eno te pas asəna tolali, te dage eno usu naga sai. Eno koneainogo yali, dagego te tigidali naide eno po

wali pogowe naga suainogo yai dao. ¹⁰Tama dagego bidi me deligo sege sela sabaso da, teda eno me eno tagalaibao. Awe, te eno sela sabo gasa bidigo yali se sege elaluyu da, te eno Krais gedude te sege sela sabao, te dage tobade tau siyu tiaibao. ¹¹Eno te dago aga sege sela sabo homu yali, tiyu Satango da tibo po ola menama tama da aiyaba elaluidali weyu tiaibao. Dago agai te we bidi dolabo dwai homu kolesaga koneai dao.

**Pol aga te bidi Taitus suabo homu eyu, aga homu
sege eyu te bulu Troasde bidali po**

¹²Polobadu gana ena pelama te Troas hanuba pedalama, te gesi wiegi yai po Kraisde pusainogo yali, tama Genuai Bidigo te po pusubo tü dalalio. ¹³Tiali goli eno te moni homu tagalama, te homu nagame me elalubeo. Magi baso meni, te eno ama Taitus aga dage bidiboba pelama bidali, tiali goli aga ma asama eno aga me subeo. Tama tibaso, eno te Troas bage augwali tagalama, te Taitus gegegi peyu, tama ena asama te Masedonia moni to pedaiba sabolai dao.

Te Godigo bomode te tagala palali bidi dabego te hwıbo bomo aiyaba elaluai

¹⁴Tiali goli te Masedonia tqde eno Taitus sulama, tama agai dagede dwagi yai po olama, megı eno usu da weyu Godibolo po odu gebao. Sesemane sogo agai da tau selama, tama dago Kraisgo bomode te wabi hwıani usu yai. Tama dago se ebode te Godigo po pusali, tama te bidi dabe augwaligo Krais konea sabo dao. Te koneani kolesaga te pusu ebo nai tiwai denami te tigidali habuba pabo tiwai eba. ¹⁵Mu tama, dena digi te pusu yai denami ebo nai te Kraisgo selama tama Godibolo mabo tiwai dao. Te denami te Godigo augwali ma sabo tü tomode bidibo we bidi dabe augwaliba me, tama te bidi dolabo tü tomode bidibo we bidi dabe augwaliba me te denami pedalobo dao. ¹⁶Te bidi dolabo tü tomode bidibo hanigo te odobo denami te isabo denami odobo dao, tama augwali te isabo madi pedalaibao. Tama te Godigo augwali ma sabo tü tomode bidibo hanigo te odobo denami te bidibo ula sabo denami odobo dao, tama agai te bidibo ula augwaliba pedalomainogo yaibao. Te sede Godigo da tau sisayu tama dago te se ebo usu egowe? Mu menio. Tialima aga da tau mu sabo dao. ¹⁷Tiali goli, da te bidi hauwa augwali tiwai me ebeo, augwali tedali tedela pelama, te Godigo pode masigi sabo bismis se tiwai me ebo, te tiwai dago egobeo. Menio. Dago te se Godide sali, tama dago te Godigo sede tibo po subigila me wagobeo. Menio. Dago se dolasa mu tigidali ela pobao. Da te Krais dali wadolama, tama homu mu naga eyu, tama God gedude dago agai po te we bidi dabebolo pusubo dao.

Te Godigo gesi dąu wali po se yabo bidi po

3 ¹Eno te da bidi sigo ebo sede te tobage po asębaso, tama dago megı ma gagalama te dena nogi ugwaba ma sainogo ebawe?

Menio. Gasa bidi dabe, te dagebolo tibo po ola mabo bage, augwali dageba asiyu tama pas dagebolo mani. Augwali gasa bulude bidibadi, tama augwaligo te bulu page bidi dabebole te tobage po wai, "Te Korin bagego da koneyu, da dali dwagi yai homu emainogo eyu, tama dagego augwalibolo tolabo pas aşeyu dago nogoba muao," te po olama, tama te tobage pas dageba tolasa asai. Me ma, augwaligo dage tagaliju gasaba pai hagede, augwaligo homugo dagego me te tobage augwali tau sabo pas aşeqo wai. Te bagego te augwa nogi ugwbaba sabo kolesaga ebo dao. Tiali goli ena dali Timoti da sigo te tobage tau sabo pas mao po dagebolo wabeo. Menio. ² Eno te aşəna tolobo pasde po digi po dwasianu begeleyu tama obao. Te da bidi si te Godigo po pusubo şe ebo bidi mu dao po wabo pas, te pas te dage we bidi dao. Tama dage te dena homude aşəai tiwai elalubao. Te pas nedebə şe tiwai eyu tama tigidali bidi augwaligo dage suyu, tama da sigo dage dali yali şe page augwaligo haninama hania konebo dao. ³ Dage haninama te dage te Kraisdu asai pas tiwai me deli bidibao. Te da sigo yali şede Kraisgo te pas aşəai. Agai te aşəbo medabugo sisi aji selama tama me aşəbeo. Menio. Agai te bidibo ula elalubo Godigo Mobo Bidigo aşəai. Agai te sawali yai masigi daide me aşəbeo. Menio. Agai te we bidigo homude aşəai dao.^a

⁴ Da Kraisde wadolama tama Godiba homu tialubaso, dena homu si isayu dago dagede yali şede te tobage po wabo dao. ⁵ Mu tama, dena digi te şe ebo usu egobeo, tama tiyu dena digi dago te magi şe me deli yaibao po me wagobeo. Menio. God deligo naga te dago şe emainogo ebo usu ilibo dao. ⁶ Magi baso meni, aga digi da usu ilama, tama da te agai da tau somainogo eyu gesi noma dąw wali pogo şe ebo bidi bidibao. Te gesi noma da tau somainogo eyu dąw wali po te hasia aşəani bomai po tego nai me egobeo. Menio. Te Godigo Mobo Bidigo nai dao. Magi baso meni. Te hasia aşəani bomai pogo te bidi ela mubo dao, tiali goli te Godigo Mobo Bidigo bidibo ula te bidibolo mabo dao.^b

⁷⁻⁹ Te Godigo te we bidi dali polobadu yali şe dali, te agai megı ebo gesi şe dali, te şe side dago homugo kone paluyu dagalinao. Polobadu Godigo te bomo yai pogo po te sawali yai masigi daide aşəai. Tama te bomo yai pogo ebo şego te we bidi dabe augwali isaboba pedalibao. Te bomo yai pogo şe te da we bidi po tı ilama, tama da şeqə sai bage dao hania hanilabo şe dao. Tiali goli te şe te Godigo wiegi yai bomo yai ula dali pedalali. Tama Mosesgo gesabidi ula mu ebasso, tama Israel dabe wi eyu, augwaligo aga gesabidiba tonabo usu me ebeo. Te bomo yai pogo şe tidubadi te şe ebode te bomo yai ula elalualı. Tiali goli nosali te bomo yai ula silalio. Tama megı, megı Godigo şe ebogo te we bidi augwalibolo aga Tedali Mobo Bidi mabo dao. Megı Godigo wiegi yai gesi po pusubo şe

^a 3:3 Sai 24:12; Jer 31:33; Ese 11:19; 36:26 ^b 3:6 Jer 31:31

ebode te bidi dabe augwali doloba pai nogi nogi yaibao, te sède Godigo bomo yai ula te umabo mu elalubo dao.^c ¹⁰Tama te bomai pogo sè ebo ula polobadu sali, te tiwai ula megi meni yanio. Magi baso meni, te nosali pedalali gasa sègo aga aiyaba mu elaluama, tama genuai ula mu elalubo dao. ¹¹Magi baso meni. Te osogo elaluali sè aga te bomo yai ula elalualigo da, teda te Godigo Mobo Bidigo te we bidibolo maiabo gesi wiegi yai po sè, te sè sesemane sogo elalubao, te sè aga Godigo bomo yai ula umabo mu elalubo dao.

¹²Awe, te Godigo te we bidi doloba pai nogi nogi yabo po pusubo sè, te sègo bomo yai ulago te Mosesgo mani bomo yai pogo ula aiyaba mu elalubo dao. Dago te sède te homu eyu tama dwagi yai homu ebaso, da wi me egobeo. Menio. Bomo eyu dago po hanilama pusudubao. ¹³Dago te Mosesgo yali kolesaga tiwai me ebo meni. Agai aga gesabidi te ugwa namigo mesegeleyu palia sidu geai, tama te Israel dabe augwaligo te aga gesabide elalubo ula sula painogo ebo munu me suidali weyu idu geai.^d ¹⁴Tiali goli te Israel dabe augwaligo homu mu puna peyu, kone tuq pali. Tama tigidali sogo augwaligo te Godigo te we bidi tau sabo poloba dàq wali po naga te bukude nedeyu iduai, te ugwa nami tiwai me augwa homude elalubadi, te megi e sogoba usu nagasoba. Menio. Te Krais delide naga Godigo te homu mesegaluali ugwa nami dagala sàbo dao. ¹⁵Awe, tigidali sogo te Israel dabe augwaligo te Mosesgo aşəani po nedeyu ebo, te ugwa namigo augwaligo homu mesegaluali tiwai elalubao, te megi e sogoba usu nagasobao. Tama te nedebo po page augwaligo kuna konebo menio. ¹⁶Tiali goli, bidigo homu Genuai Bidiba ma begelegi pobaso da, teda agai te bidi aga homu mesegaluali ugwa nami dagala sàbo dao. ¹⁷Te pode, te Genuai Bidi wali, te da aga te Godigo Tedali Mobo Bidi dao. Tama Genuai Bidigo Mobo te bidi me deli dali bidiyu da, teda te nai me deligo te bidi me kęqlugobeo. Menio. Aga olo mu bidibo dao. ¹⁸Tama da tigidali, da te nai me deligo da gesabidi me au palialubeo. Tama Genuai Bidigo wiegi yai bomo yai ula daba asiyu, tama da te gesabidi subo aji dula tiwai pedalama te ula te bidi dabe augwaliba pobao, tama augwaligo subo dao. Sesemane sogo dago ula umabo mu sabo, tama da hasegeleyu tama Genuai Bidi aga noma tiwai pedalobo dao. Genuai Bidi aga te Mobo, tama agai te tiwai kolesaga da dali ebo dao, tama te bomo yai ula te genilama mu ela pabo dao.

Godigo po sela pabo bidi augwali te togo nigai sene tiwai

4 ¹Godigo da homu dene eyu tau selama, tama te agai gesi dàq wali po pusubo sè dabolo mawai. Tama tialigo da, teda te sède da bomo kimi isayu me egobeo, te sè tagalabo homu me egobeo. ²Menio. Dago

^c 3:7-9 Sai 34:29 ^d 3:13 Sai 34:33

te geme dualama hale ebo kolesaga te tudiba muanio. Te tibo po wabo kolesagade da me bilibeo. Tama dago Godigo po me hasegelegobeo. Menio. Dago mu po hanilama mu pusubo da, tama tigidali bidi deli deli augwa homugo dago pusubo po mu po dao konemainogo ebo dao, tama augwa dago ebo sə God gedude konemainogo ebo dao.³ Tiali goli te dago pusubo gesi wiegi yai po, te po te geme duala sobaso da, teda te hagayabo we bidi dabe augwaligo gedude naga te po te geme dualubao.⁴ Magi baso meni. Te e təde tibo god Satan agai te Kraisgo poba augwa homu begi pisabo bidi dabe augwaligo homu kone tuq palali. Magi baso meni, Krais aga da te God tiwai mu dao, tama agai dabolo Godigo noma mu hanilibo dao. Tama te Kraisgo genuai bomo yai ula waselabo wiegi yai gesi po, te po te giliga nanobo tiwai dao. Tiali goli te hagayabo we bidi augwaligo te pogo nanobo ula suidali weyu, Satan agai augwaligo homu kone puna palama tuq palali.⁵ Dago denade po te we bidibolo me pusugobeo. Mu menio. Dago e tiwai po pusubo dao: “Te Krais Jisas aga dago Genuai Bidi dao, tama Jisas tobade da te dagego sə ebo bidi bidibao,” te tiwai po pusubo dao.⁶ Magi baso meni, e tiwai dao. Polobadu mu Godigo te po wai, “Te be hulia sai madi ula pedalomainao,” wai. Tama te po wali God aga ula digi da dali bidibao, tama da homu ula mu ilibo. Te ula e dao: dago te Godigo bomo yai ula te Krais gesabidide elalubo koneai dao.^e

⁷Tiali goli ena dali, te ena dali deli sə ebo bidi dabe dali, dena te bomo yai ulade po pusubo wiegi yai sə elalubo, te təgo nigai olo sene tomode elalubo tiwai ebao, te dena isibo tigide naga elalubo dao. Te tigidali bidigo konemainogo ebao, te Kraisde wiegi yai gesi po pusubo sə ebo wiegi yai genuai bomo mu, te Godigo bomo naga dao. Te dago menio. ⁸Edao. E tiwai dao, te tigidali badu te bidi dabego dabolo te səgə madu gebo dao, tiali goli tego da mu dolobeo. Te hauwa sogo dago dena pabo tū hania konebo menio, tiali goli tigidali sogo dena tū me elalubo dao, te mu dəq wabeo. Tama tibaso da Godigo səde bomo kimi munu me isibo menio. ⁹Te boi bidi dabe augwaligo dwai sə da dali yainogo da pobesa bilidu gebo dao, tiali goli Godigo da me tagalobeo. Augwaligo da elama tulaluidu gebo dao, tiali goli da mu me dolobeo. ¹⁰⁻¹¹Polobadu te gasa bidi dabe augwaligo Jisas aiyaba elalubo homu eyu, tama agabolo dene menama tama aga isali. Tama te tiwai me te boi bidi dabe augwaligo dabolo səgə megi mayu, tama dene me mayu, tama da hauwa sogo pədə isali, te Jisas tobade. Tialima dago Jisasgo bomo selama tama aga sə eyu, te gasa bage augwaligo te suyu konebo dao, te gə pagede ma hodolali bidi Jisasgo da isabo tigide bidibo bage tau siyu, tama dago agai sə tama ebo dao. Augwaligo da dali tama homu ebo dao. ¹²Tama tibaso, te e tiwai

^e 4:6 Gag 1:3

dao: te isabo sę te dade hauwa sogo idubao. Tiali goli dago Kraisgo bomo elaluyu, tama agai gesi wiegi yai po pusubo sę ebaso, tama dagego te bidabo ula bugagia siyu tama bidata peyu, bidata paibao.

¹³Awe, te isabo sę enade hauwa sogo idubao. Tiali goli dago Godigo po pusubo sę tagalobeo. Magi baso meni. Polobadu te Godigo po bukude bidi me deligo te po wai, “Eno Godiba homu elalubaso, eno po hanilama pusai,” te po aşəani. Tama dago me te tobage homu eyu, dago Kraisba homu elalubaso, tama dago te Godigo gesi wiegi yai po te we bidibolo me hanilama pusubo dao.^f ¹⁴Dago homu si isayu tama mu koneanio, Godigo dago Genuai Bidi Jisas hodolali, tama agai da me Jisas dali hodolama, tama da dali dage dali aga pąba odasa paibao, te da tigidali aga gesabidiba pedalaibao. ¹⁵Magi baso meni. Te tigidali seğe te da Godigo po pusubo bidi dabeba pedalali, te dage tau somainogo tama yai. Nosali Godigo olo mu tau mani wiegi yai kolesaga te we bidi umaboba ela pelama, tama genilama augwaligo usu da po umabo mu Godibolo waibao, tama aga nogi ugwaba mu saibao.

¹⁶Dago te homugo konebaso, tama da Godigo sęde bomo kimi munu me isibo menio. Te mu tama, dago tigi dolainogo ebo dao. Tiali goli magigo meni, dago homu dali noma dali si te tigidali deli deli sogo gesi ma pedaliyu ebo dao. ¹⁷Te e tiwai: te da Godigo po pusubo bidi dabe, te dabolo pedalubo seğe te dwasianu dao, tama te pewadage sogo naga osogo elaluabao. Tama da e tőde bidibadi te seğe tolobaso, nosali dagalude dago te sesemane sogo bugagia bidata peyu, bidata pabo wiegi yai nai mu saibao. Tama te dagalude bugagia bidabo te wiegi yai sęgo te dago megı elalubo dwasianu seğe aiyaba mu elaluabao, te wiegi yai mu naga yaibao. ¹⁸Magi baso meni. Dago te gedugo e tőde subo nai dabeba dago tonqoł me ebo meni. Te menio. Dago koneani, dago gedugo subo nai, te pewadage sogo naga elaluabao. Tama dago gedugo te susiąbo nai, te sesemane sogo bidata peyu, bidata paibao. Tama tibaso, te tobage naiba naga dago dena gedugo tonqoł ebo dao.

Dago gedugo susiąbo nai tonalubadi bilibo dao

5 ¹Dago te daba pedalobo haniani seğe tede moni homu me ebo menio. Magi baso meni. Dago te tiwai koneanio: te da e tőde megı elalubo tigi da, te dena osogo bidabo be tiwai dao, te nami ugwa be tiwai dao. Tama te osogo bidabo be hugibaso da, teda Godigo da maiabo be me deli elalubao. Te be bidigo nogogo me sę ebeo. Te dagalude elalubo, tama te be sesemane sogo elalua peyu, elalua paibao, te be gamonaibao. ²Megı da e tőde tigi elalubadi, te haniani seğe toloyu, tama dago te hagela homu eyu me sogo gela weyu bidibao. Magi baso meni. Dago dena

^f 4:13 Tib 116:10

te dagalude elalubo be, te dago gesi tigi, tego te da tigi te gudubo ugwago mesega sabo tiwai emainu godolo ebo dao.³ Dago tigide te gudali da, teda da tigi bolu olo tiwai me bidibo augwaligo sugobeo.⁴ Awe, da e osogo bidabo ugwa bede me bidaludu, tama da sęęg siyu gela weyu bidibao. Te dago poloba tigi tagalainogo homu eyu me wabeo. Menio. Dago homugo dago gesi tigi mubode, te gesi ugwa tiwai elama, teda te isibo tigi te aga bidibo ula somainogo ebo dao.⁵ Godigo digi dago te gamonabo tigi somainogo dabolo sisi ilai dao. Tama agai Tedali Mobo Bidi dabolo mani. Te Godigo me badu nai dabolo nosali mawainogo te agai hasia podolali nai te Tedali Mobo Bidi dabolo mani, tama dago e tama koneai: mu tama te agai tigidali nai dabolo maiabo homu yai, tama mu mawaibao.

⁶Tama tego dago homu sesemane sogo dąę waliyu ebao. Dago tede bomo elalubao. Dago koneani, megı te dago tigi te dena bidibo be tiwai elalubao. Tama megı e sogo da ede me bididubadi, da Genuai Bidigo bulude aga dali me bidibeo.⁷Menio. Tama megı da e tode bididubadi, dago dena homu tigidali agaba muyu tama aga dali bilibo dao. Dago gedugo aga susiąbadi tama tibo dao.⁸ Tiali digi, dago homu sesemane sogo dąę waliyu elama dago bomo elalubao. Dago homugo e elalubo tigi tagalama tama Genuai Bidi dali hodobo bugagia mu bidigi pabo homu godolo ebo dao.⁹ Tama da dena tigide me bididubadi, ma tigi tagalama gasaba bidigi pai, te magigo menio. Sesemane sogo dago homu bomo elama, te Genuai Bidigo godolo yabo kolesaga tigidali naga inao homu ebo dao.¹⁰ Magi baso meni. Dago koneani, da tigidali te Kraisgo po tüde hania hanilama pedalaibao. Tama da megı e bidibo tigi dali bidiyu tama wiegi yai kolesaga ebaso, ma dago dwai kolesaga eyu me yali da, teda da tigidali deli deli te dena yali kolesagade usu nama tama dago te tiwai saibao.⁸

Dago te we bidi dabego God dali deli homu ilibo sę yabo po elalubao po wali

¹¹ Te da tigidali te moni po tüde pedalaibao homu ebaso, da Genuai Bidide wi eyu, tama te bidi dabe augwaligo te da Godigo po sel a pabo bidi dabe mu dao te hania konemainogo eyu, dago augwalibolo homu bega sabo po weyu bidibao. Godigo da gisiga koneani. Tama eno homu te dage me, dage deli deli duga te dwai sę dali dwagi yai sę dali dagalabo homugo ena hania koneai, te ena homu mu eyu te Godigo sę ebo bidi bidibao.¹² Te dagego homugo da wiegi yai bidi da homu emainogo, dena digi dena nogi ugwbaba siyu te po me wabeo. Menio. Dage tomode bidi meba hagoma homu eyu, augwa nogide naga olo wiegi yai homu pemene

⁸ 5:10 Rom 14:10

ebo bidi dabe bidibao, augwa ebo kolesagade wiegi yai homu pemene me isabo bage dao. Tama bidiyu, augwaligo da Godigo po sela pabo bagede nogi posobo po wabo dao. Tama te ena te homu mu eyu Godigo şe ebo bidi bidibao po, dago te po aşena tolali, te u tobage bidigo gedude dagego da dali wiegi yai homu pemene emainogo ebao. Dago homugo dagego te bidi dabego wabo ena nogi posobo po te po wei ponabo usu yaibao homu yali.¹³ Eno te Godigo şe bomo ebadi, tama gasa bidi dabe augwaligo ena dene mabo dao. Tama ena dali boi bidi homu ebo bage augwaligo te şe sulama tama “Te bidi Pol aga polobo bidi mu dao,” augwaligo enade te po obao. Te usu dao, eno Godigo şe me yaibao. Me ma, da Godigo şe ebo bage, da homu dolo elaluyu bidibaso, teda tama bidiyu, dena şe eyu, tama tebogo dage tau sabo da, te dage tobade te şe ebo dao.¹⁴ Magi baso meni. Te Kraisgo da dali dwagi yai homu eyu godolo ebogo, tebogo naga da homu hodolama tama dago Godigo şe ebo dao. Magi baso meni, dago homugo bugagia kone palama, tama te tiwai homu koneanio: bidi deligo da tigidali hasegelama tama da tobade aga isalio, tama tede da tigidali isai tiwai yai dao.¹⁵ Tama agai da tigidali hasegelama isalio, te agai tama tibaso, da bidibo ula dali bidibo we bidi dago dena digi homu koneama munu me biligobeo. Menio. Te da tobade hasegeleyu isama tama ma hodaluali bidi, te dago aga homu naga wali peyu tama aga şe eyu bilao.

¹⁶Tama tibaso, megı dena digi te poloba te şode bidi dabego ebo homu kolesaga wali me pisama tama bidi me deligo kolesaga me dagalogobeo. Mu tama, polobadu dago te şode poloba homu kolesaga wali peyu tama Krais dagaloyu tiwai. Tiali goli megı dago aga te dagalabo kolesagade me dagalobeo.¹⁷Tama tibaso niwai bidi Kraisba wadolobo si da, teda Godigo aga gesi noma bidi mu ilama pedalaibao. Bugagia odao. Megı te bidigo ebo poloba kolesaga tigidali silalio, tama gesi kolesaga pedalai dao.

¹⁸God aga digi te tigidali hasegelebo şe page bidi dao. Polobadu da agade boi bidi bidali, tiali goli Kraisgo yali şede Godigo da aga dali deli homu ilama, tama da aga abagi hani pedalai. Tama agai te şe dabolo mani, te aga tau selama te aga dali boi bidi homu ebo bidi dabe augwaligo aga dali abagi homu pedalomainogo ilibo şe dabolo mani.¹⁹Dago pusubo po e tama tiwai: God agai te Kraisgo yali şego te tigidali we bidigo te boi bidi şe ebo kolesaga tagalama, tama aga dali abagi homu pedalomainogo yai. Agai te augwaligo yali dwai şede homu kone ma ebeo. Tama agai dabolo te boi bidi dabe aga dali abagi homu ilabo po pusubo şe dabolo mawai dao.²⁰Tama tibaso, dago te Kraisgo pedauwalide po selama tama agai po pusubao. Te tiwai God aga digi te tigidali bidi dago pedauwaligo i obao. Dago Kraisde digi te po tigidali we bidibolo pusubao, tama dago te tiwai po augwalibolo obao, “Te dagego boi bidi homu ebo kolesaga tagalama, God dali abagi homu ebo kolesaga mu yao,” dago te po pusubo dao.²¹Te bidi Krais agai dwai şe me isawai, tiali goli da tobade Godigo

dago dwai sə yali səgə tigidali agaba sisinama, tama aga te dwai səgə sai bidi tiwai mu pedalai. Agai tama tiali te da Kraisde wadolomainogo yali, tama agai bomogo da te Godigo gedude doloba pai we bidi pedalomainogo yai dao.

Godigo po sela pabo bidi dabe augwali te səde səgə hauwa tolali po

6 ¹Dago sə God dali eyu tama dago te tiwai po bomo elama dagebolo obao: dagego te Godigo olo mani wiegi yai tau sabo kolesaga salio, tiyu dagego agai te olo mu mani wiegi yai tau sabo kolesaga tagalabuo, te kolesagago agai sə dage tomode bugagia emainao. ²Magi baso meni. Polobadu Godigo aga we bidi hanibolo te po wai dao,

“Te eno bodolu mani wiegi yai sogo, eno nago po
odai dao. Tama te bidi dabe augwali ma dobola sabo
sogode, eno nage tau sali.”^h

Odao! Megi naga te bodolu mani wiegi yai sogo. Megi e sogo naga te Godigo da ma dobola sabo sogo dao. Tama tibaso, dagego agai olo mabo wiegi yai tau sabo kolesaga sula tagaligimio.

³Dago homugo te bidi dabe augwaligo dwai po te dago ebo səba me badi te tama po waidali homu elama, tama augwaligo Godigo po tudiba muidali weyu, dago te bidi dabe augwali səgəde magi nai me deligo enama tulaluabo sə me egobeo. ⁴Menio. Da Godigo sə ebo bidi bidiyu, tama tede sesemane sogo dago wiegi yai kolesaga ebogo tigidali bidibolo dago ola mayu, te tiwai ebao: te haniani səgə daba pedalubaso, tama dwai naigo da dolobadi me, tama te dabolo pedalobo dwai sogo tego da dəqə obadi, te da bomo elama mu dolalubo dao. Tama tibaso, tigidali bidigo konebo dao, te da Godigo sə ebo bidi dabe mu dao. ⁵Bidi dabe augwaligo da elama tama da kalabus iliyu yai. Te boi bidi dabe augwaligo da pobesa bilama tama moni po dagə weyu, po dwai i olama dabolo wai. Da moni sə dene mu yali. Da hauwa sogo bugagia godege me pisəwai. Tama da nai sili bidiyu yai dao.ⁱ ⁶Dago meda isəwai wiegi yai kolesaga eyu, tama Godigo pode dago wiegi yai homu kolesaga elaluyu kuna koneai dao. Bidi dabego dabolo dene mani goli, dago wado po polo me wasiąbo. Dago te bidi tau siyu, augwalibolo wiegi yai kolesaga ilibo dao. Dago te Tedali Mobo Bidigo bomo elalubao. Dago dena homu mu eyu, te dwagi yai homu eyu godolo ebo kolesaga te bidi dabe augwalibolo ebo, te pedauwalide naga te kolesaga ebode me wabo meni. Tama dago te tobage kolesaga ebadi, gasa bidi dabe augwaligo koneagameo, da te Godigo sə ebo bage mu dao. ⁷Dago mu po pusubo dao. Dago dena sə Godigo bomode ebo dao. Dago doloba pai kolesaga ebo dao, tama tebogo te wəbi hwıbo nai te dolo nogode me, pobase nogo me elalubo

^h 6:2 Ais 49:8 ⁱ 6:5 Tpi 16:23

tiwai elama, tama tede dago wąbi hwijbo dao. ⁸Tama bidi mebago dago nogi ugwaba sabo dao, tama bidi mebago da nogi aiyaba elaluyu ebo dao. Mebago posobo po dwai dabolo wabo, tama mebago gasa bidi dabe augwalibolo te dago wiegi yai kolesaga ebo po pusubo dao. Boi bidi dabe augwaligo da tibo po weyu, te we bidi dwai sę tomoba kegebo bidi da homu ebo dao, tiali goli menio, dago mu po naga wabo dao. ⁹Te we bidi mebago gedude te da nogi meni yai bage da, da koneabo bidi meni ebo tiwai ebo dao, tiali goli bidi hauwago da koneani. Da te isainogo ebo bidi tiwai ebo dao, tiali goli meni, da bidibo ula dali me bididubo dao. Te Godigo da dodoloyu te keloago elebo tiwai ebo, tiali goli agai da me ela mubeo. ¹⁰Da Godigo sę ebo bidi dabe, da te homu sęgę mu hauwa sogo ebo dao, tiali goli te magigo meni, sesemané sogo dago homu pemene wiegi yai ebo dao. Da te magi nai meni yai bidi tiwai bidibo dao, tiali goli tagala, dago te mu wiegi yai nai hauwa we bidi hauwabolo mabo dao. Da te bidigo gedude te magi nai deli me meni yai tiwai ebo dao, tiali goli te meni, dago tigidali nai mu elalubo dao. Tama tebogo te tigidali we bidibolo hania ola mabo dao, da te Godigo sę ebo bidi dabe mu dao.

¹¹Dage Korin bulu we bidi dabe, dagebolo dago dena homu hania hanilama dagebolo megi tama wai dao. Dago dage dali dwagi yai homu eyu godolo mu ebo kolesaga te genuai mu dao. ¹²Dago dena homu dagede me palia sabeo. Menio. Dago dage godolo mu ebao. Tiali goli duga digi duga homu da dali palia selama, tama da deli homude me bidibeo. ¹³Megi eno dagebolo wabo po te ayago aga waibolo po mobo mayu wabo po tiwai obao: dabolo te kolesaga wei ponoyu, dagego me da dali dwagi yai homu eyu, da godolo mu genuai yao.

Da te Godigo be tiwai elalubao, tiyu Godigo po wali pisąbo bage dali kisasa biligio wali po

¹⁴Te Godigo po wali pisąwai bage augwali te tedali gasagi yai, tama dage augwali dali kisasa bilama tama augwaligo ebo kolesaga tau me selamuo. Menio. Magi ilama tama te doloba pai kolesaga dali, te bomai po selu səbo kolesaga dali, te si dali abagi omainu yaibawe? Menio. Mena tama te ula te be hulia sai dali deliba sisinimainogo yaibawe? Te usu egobeo. ¹⁵Ma, te Krais te Satan dali deli homu elama bidibo da, agawe? Te Kraisde konealubo po dąu wali bidi dali, te konealubo po dąu wasiąwani bidi dali, te augwali sigo deli homu tolaluabawe? Mu menio. ¹⁶Mena tama dago te Godigo wiegi yai be dali, te bulu haubo bidigo dali si te deli madi sisinaibawe? Te tiwai me egobeo. Dagego koneani, da digi, da te bidibo ula elalubo Godigo bidabo be tiwai dao, te polobadu Godigo te tiwai po wai,

“Te ena augwali dali bidiyu, tama augwali tomode
bilaibao. Tama ena augwaligo God bidiyu, tama

augwali eno we bidi bidaibao.”^j

¹⁷Tama Genuai Bidigo te aga we bidigo te dwai sę ebo bage tagalamainogo eyu po ma wai,

“Tama tibaso, dagego augwali tagalama, tama gasa
madi bidigi pao, tedali mu bidaao. Tama dagego
te augwaligo dwai sę yabo meda yai nai munu
me tolamuo. Tama ena digi eno dage saibao.”^k ¹⁸Tama ena dagego

Aya bidiyu, tama

dage eno wai ogwa me wegi me bidaibao, Genuai
Bidi tigidali bomo page bidi, agai te po wai dao.”^l

7 ¹Eno ama dede muo, dago te Godigo te da dali dą̄ wali po dabe
tama salio. Tama tibaso, dago dena tigide me homu elalubo meda
tigidali sela sənama tama wiegi yai tedali bidinao. Tama dago Godide wi
elama, tama wiegi yai doloba pai kolesaga mu naga sesemane sogo wali
pinao.

Polgo te Korin bulu bidi dabe dali wiegi yai homu pemene mu yali po

²Dagego da dali dwagi yai homu eyu da godolo mu genuai yao. Magi
baso meni. Dago bidi me delibolo dwai sę me ilibeo. Dage deli me
dolosiąwai. Te dago bidi me deli tibo po ola menama, agai nai anoma
elama me sisawai. ³Eno dagebolo te tiwai po kisiliyu me wabeo. Magi
baso meni. Eno tama tiwai po polobadu walio: dago dage dali dwagi
yai homu eyu godolo mu ebao, tama dage isibo si da, teda da me dage
dali isabo homu yaibao. Tama dage bidibo ula elaluyu bidibaso da, teda
da te bidibo ulade dage dali bidabo homu yaibao. ⁴Eno dagede homu si
ebo meni. Eno homu pemene wiegi yai dagebolo ebao. Te tigidali dabolo
pedalobo seğede, te eno homugo dage koneama, tama tede ena homu dua
nagame mu ilama bidibo, tama eno homu wiegi yai pemene mu elalubo
dao.

⁵Magi baso meni. Polobadu da aselama te Masedonia tɔba sabolali,
tama tede me da tigi dwasianu toma me nabeo. Menio. Te haniani seğe
daba pedalai. Dago po konila te Godigo po odisabo bidi dabe dali wali,
tama da homude wi yali. ⁶Tiali goli God da, te seğe elalubo bidigo homu
dua nagame ilibido da. Agai te Taitus da bidibo madi asobogo agai
da wiegi yai homu nagame ilai da. ⁷Taitus te da bidibo digi sabalobode,
tede naga te Godigo da wiegi yai homu nagame me ilibeo. Menio. Dagego
Taitusgo homu nagame ilibaso, tama agai te po sela asali, tama tede me
Godigo dago homu nagame ilama bomo mani. Taitusgo te dagego da
suabo homu godolo mu eyu, tama dagego enade homu dene eyu gela
wabo po dabolo pusali, tama dagego ena dali deli homu elama bidabo

^j 6:16 1 Ko 3:16; 6:19 ^k 6:17 Ais 52:11 ^l 6:18 2 Sml 7:14; 1 Sto 17:13; Ais 43:6; Jer 31:9

homu ebo po me wali. Tama eno homu pemene wiegi yai hauwa mu eyu bidibao.

⁸ Eno koneani, eno aşəna tolali pasgo dagebolo dene mani, tiali goli tede eno ge nabo meni. Mu tama, polobadu hasia bolo eno tede ge nani, tiali goli megı da menio. Eno koneani, te pasgo dagebolo homu sege mani, tiali goli te pewadage sogo naga yalio. ⁹Taitusgo po dabolo pusubaso, megı eno homu pemene wiegi yai ebao. Eno dage homu sege yalide wiegi yai homu pemene me ebeo. Menio. Eno te homu segego dage homu begelali, tede eno wiegi yai homu pemene ebao. Eno koneani, dagego duga homu begelemainogo eyu, Godigo digi te homu sege dageba pedalomainogo ilali. Tama tibaso, dago pogo dage dwasianu me dolobeo, te eno aşəni pogo dage te tiwai tau sai dao. ¹⁰Homu sege ilibo te Godigo nigilibo, tebogo da bidi dabe dago dwai se yalide ge neyu tama homu begelemainogo ebo dao, tama te kolesagade Godigo da ma saibao. Tama dago te homu begelebo kolesagade te ge negobeo, te dwagi yai naga dao. Tiali goli te tqde bidi dabe augwaligo homu sege ebo kolesagago, tede te isibo se pedalobo dao. ¹¹Dagego bugagia homu koneao. Te homu sege Godigo dagebolo mani, tego agai te haniani wiegi yai kolesaga dagebolo pedalomainogo yali. Agai dage asesa selama, tama dage hogodolama duga po dodolomainogo yali. Agai dage hodolama te dwai penani se yali bidi wado ilama, tama dage Godide wi yaibao. Dagego homugo da suabo homu elama tama gela weyu, tama dagego te dwai penani se yali bidi dodolobo se bomo elama yabo homu yai. Te dage tomode te bidi me deligo dwai penani se yali, tede te tigidali badude dagego ebo kolesaga te po dodoloyu yali. Dagego kolesaga tama tiwai hania hanilama pedalai dao. Tama tiyu, te dagego te bidigo yali dwai sede megı sege me elalubo menio.

¹²Te mu tama, polobadu eno te pas dagebolo aşəna tolali. Tiali goli eno te bidi me deligo dwai se yali te homu elama te po me aşəbeo. Tama eno gasa bidi homu me ebe, te agabolo dwai se yali bidi me homugo konebeo. Eno homugo augwali siba naga homu elama te po polobadu aşəna me tolobeo. Menio. Eno te dagego kolesaga hanilama pedalomainogo yali, tama God gedude duga bugagia konemainogo yai: dagego da godolo mu yalio. Tede me tama eno te polobadu pas dagebolo aşəna tolali. ¹³Dagego te kolesagago da homu nagame ilama dua bidai.

Tama dago homu nagame naga me ebeo. Menio. Dago homu wiegi yai pemene yai. Magi baso meni. Dage tigidaligo te Taitusgo homu noma toma nabo nigilali, tama aga wiegi yai homu pemene yalio. Dago te sulama, tama da wiegi yai homu pemene mu idubadi bidali. ¹⁴Polobadu eno dage nogi te Taitus gesabidide ugwaba sali, tama megı eno te pode ena hale me sabeo. Menio. Tigidali po dago dagede wabo po, te mu po naga wai dao. Tama tiwai naga eyu, dago dage nogi te Taitus gesabidide

ugwaba sali, tama te eno dagede agabolo pusali po me hanilama pedalali, te mu po naga dao. ¹⁵Taitus aga dage bidibo madi pedalobaso, tama dage wi elama didibili eyu, tama dagego aga siyu geseali, tama dage tigidaligo agai po wali pai. Agai megi te homu me konedu tama agai dage dari dwagi yai homu eyu godolo mu ebo homu genuai pedalobo dao. ¹⁶Megi eno homugo mu konebo, eno dage dari homu si ebo meni, te dagego tigidali kolesaga dolo mu eboso, eno homu dageba tia pabo te usu dao.

**Te Korin dabe augwaligo te mone me doado bage sisi
elama, te Godigo po odobo we bidi te Judia tqde bidigo
bage tau sinao po wali**

(Daq 8-9)

Te Godigo po odobo we bidi augwaligo ama dede tau sao po

8 ¹Ama dedeo, te Godigo po odobo we bidi hani dabe te Masedonia moni tq tomode te haniani bulude elalubao. Tama dago homugo dagego koneao, te Godigo olo tau sabo wiegi yai kolesagago augwali tomode yali se, te dagego koneao. E tiwai dao. ²Genuai sęgę augwaliba pedalama, tama tego augwali homu usu sabo sę mu yali. Tama te sogo augwali magi nai meni yai mu bidali. Tiali goli magigo meni homu elama, augwaligo wiegi yai homu pemene genuai mu dari elaluali. Tama tiyu, augwaligo te gasa Godigo po odobo we bidi tau sabo homu mu genuai elama, tama augwaligo masigi hauwa sisinai dao. ³Eno koneama tama eno po hanilama obao: augwaligo augwa digi homu kolesaga wali pelama tama te masigi muani. Augwaligo maiabo nai usu selama, tama te tiwai augwaligo mawai. Awe, augwaligo te maiabo masigi aiyaba elaluama tama umabo mu madu geai. ⁴Augwaligo te dago usu da po omainogo bomo mu elama augwaligo me te Godigo po odobo gasa we bidi dabe dari hodobo augwaligo augwa masigigo te Godigo Juda we bidi olo tau sabo sę yaio po bomonama wali.^m ⁵Polobadu dago augwalide tama tiwai homu yali, ‘Te augwaligo mone meba mawaibao,’ wai. Tiali goli augwaligo te tiwai naga me ebeo. Menio. Hasia bolo augwa bolo augwa digi te dago Genuai Bidibolo menama, tama augwaligo te Godigo homu wali pelama, tama augwa digi dabolo me mawai dao. Tama elama tama augwaligo augwa tau sabo masigi me mawai dao. ⁶Polobadu Taitusgo te Juda bage olo tau sabo wiegi yai kolesaga ebo sę dage tomode hodolali. Tama te Masedonia we bidi augwaligo genuai olo tau sabo sę eboso, dago bomo eyu agai dage tau siyu, tama dagego duga tau sabo sę silimainogo ebao. ⁷Te tigidali sęde dagego kolesaga wiegi yai mu ebo dao. Dagego homude Kraisde konealubo po dą olama, tama dagego te

^m 8:4 Rom 15:26

konealubo po hanilama pusubo sə bomo ebo dao. Dagego kolesaga hauwa koneama, tama dagego Godigo sə yabo homu mu hodaluali. Dagego da dali dwagi yai homu eyu godolo ebo kolesaga, tede me dagego bugagia mu yali dao. Tialima te tiwai naga megi dagego te gasa we bidi olo tau sabo wiegi yai kolesaga ebo sə me bugagia mu yao.

⁸ E tau sabo səde eno bomai po dagebolo me mabo meni. Te menio. Eno dagebolo te meba bidi dabe augwaligo te wiegi yai sə yabo homu hodaluali po obao, tama te kolesagade eno dagego ama dabe dali dwagi yai homu eyu godolo ebo kolesaga usu sobao. Te dago koneainogo, te dagego te we bidi godolo ebo kolesaga te nai mu dao. ⁹ Magi baso meni. Dagego te dago Genuai Bidi Jisas Kraisgo olo tau sabo wiegi yai kolesaga ebo sə koneai. Aga God dali hodobo bidiyu, tama genuai nogi dali, bomo yai ula dali si umabo elalubadi, tiali goli agai dage tau somainogo eyu tama aga magi nai meni yai bidi pedalali. Tama aga te magi nai meni yai bidi tiwai pedalaligo te dagebolo te God dali bidiyu bomo yai ula umabo sabo tū dawai dao.

¹⁰ Te tau siyu maiabo masigi, tede eno yali homu megi eno dagebolo pusubao: te hasia bidali kibu bede dagego te sə yabo homu godolo naga hasia yai dao, tama te Masedonia tqde bidibo we bidi augwaligo nosali te sə yabo homu yai. ¹¹ Teda te sə megi tama dagego ela sili yao. Polobadu dagego te sə yabo godolo polo yali, tama tiwai yali gilama megi me dagego te sə polo silao, te duga nai usu nama te mone gego tiao. ¹² Magi baso meni. Te bidigo godolo mu elama nai maiabo homu ebaso da, teda Godigo te kolesaga godolo mu yaibao. Godigo te bidigo elalubo nai tigidalide homu koneama, tama agai kolesaga tede dagalaibao. Agai te aga elalusiąbo naide me dagalogobeo.

¹³ Te Juda bage tau siyu, tama dagego duga mone hauwa mayu, tama augwali bugagia bidiyu, tiali goli dage sqaq peyu emainogo eno te homu ebeo. Te menio. Eno homugo dage bidibo tigidali ususu si naga elama bidimainogo homu ebo dao. ¹⁴ Megi e sogo dagego nai hauwago te nai sqaq pali we bidi usu numainogo yaibao. Tama nosali me sogo dage nai sqaq pelama tama te Juda dabe augwaligo nai hauwa elalubaso da, teda augwaligo naigo dage usu numainogo yao, eno te homu eba. Te kolesagade te dage dali augwali dali si tiwai usu yaibao.

¹⁵ Te bukude wali po e tiwai dao,

“Te bidigo te tubo nai nogi mana hauwa sali bidi,
te hauwa me meni yani. Tama te nai dwasianu sali
bidigo, te aga te nai me sqaq pabeo.”ⁿ

Te sə ebo bidi meba augwali te Korin buluba sabolaibao po wai

¹⁶ Eno Godibolo po weyu usu da po obao, agai te bidi Taitusgo homu hodolobaso, tama agai dago homu tiwai eba. Agai me dage tau sabo

ⁿ 8:15 Sai 16:18

homu godolo mu ebo dao. ¹⁷Magi baso meni. Agai dago Korin buluba pao wali po wali pali. Tiali goli aga me te sə yabo homu godolo mu ebaso, tama aga digi aga homugo dage bidibo madi asabo homu ebao. ¹⁸Tama dago ama me deli aga dali hodobo tagala palaibao. Te tigidali bulude te Godigo po odobo we bidide te ama agai Godigo gesi wiegi yai po pusubo sə ebo nogi elalubao. ¹⁹Tama te tiwai naga me ebeo. Menio. Te haniani bulude bidibo Godigo po odobo we bidi augwaligo te aga sa munama, te aga da dali Jerusalem hanuba biliyu, te olo tau sabo wiegi yai kolesaga tau sabo sə emainogo yai. Dago te Genuai Bidi nogi uwawa siyu te sə ebao, tama te bidi dabe augwali ola menalama augwaligo konemainogo yali, te dago te tau sabo sə yabo homu mu ebao.

²⁰Dago te olo mabo genuai nai tonalubo kolesaga ebode te bidi me deligo dwai po da dali weyu, “Polgo te Juda bagebolo olo mu maiabo masigi meba buga salio,” te tobage po waidali weyu dago homu yai. Tama tiyu dago te ama dali tagala palobao. ²¹Dago wiegi yai dolo kolesaga yabo homu ebo, te dago Genuai Bidigo gedude naga te kolesaga me egobeo. Menio. Te e təde bidi dabego gedude dali te kolesaga ebo dao.[°]

²²Tama tibaso, dago dena ama me deli augwali si dali hodobo tagala palobao. Hauwa sogo dago aga haniani səde usu sali, tama agai sə bomo elama ebo dago suali. Megi agai homugo te dagego wiegi yai kolesaga naga ebo homu bomo ebaso, tama agai te sə yabo homu bomo ebao. ²³Te Taitusde dagego konemainogo ebao: aga tama ena dali deli səde dage tau sabo sə ebao. Tama dago ama si aga dali hodobo pabo bage, te dagego konemainogo yai: augwali si te Godigo po odobo we bidigo sa muani tagala palali bidi bidibao, tama augwa səde te Kraisgo nogi uwawa sabo dao. ²⁴Teda dagego duga dwagi yai homu eyu godolo mu ebo kolesaga te bidi dabe augwalibolo ola maiqo. Tama te Godigo po odobo we bidi dabe augwaligo dagego te kolesaga ebo mu konemainogo elama, tama dagego səde dago dagede wiegi yai homu pemene ebo page me augwaligo konemainogo tiao.

Godigo po odobo te Korinde bidibo we bidi augwaligo te Godigo po odobo we bidi me badu olo mabo tau sabo nai po wali

9 ¹Te Godigo we bidi Juda bage augwali tau siyu olo mabo nai te dagego koneanio. Tama eno tede bobage po me asəgobeo. ²Eno koneani, dagego te sə yabo homu hodaluali, tama sesemane sogo eno dage nogi te Masedonia bulu bidi dabe augwali gesabidide uwawa sabo dao. Eno dagede te tiwai po augwalibolo wabo dao, “Te polobadu bidali kibu bede te Akaia genuai təde bidibo we bidi dabe augwaligo te masigi mabo tau sabo sə gagalainogo sisi yalio.” Tama augwaligo dagego te

[°] 8:21 Prs 3:4

sede bomo ebo po odolama, tama tede te Masedonia bidi dabe me hauwa homu hodolalio. ³Tiali goli dago te wabo pode te duga nogi ugwaba siyu, te olo po tiwai pedali weyu, eno te ama dede augwali dageba hasia tagala palobao. Te eno homugo te dagego duga maiabo nai sisi elama bida, te eno te Masedonia bagebolo wali po gilama tiwai yao. ⁴Dago homu si meni, te dagego maiabo nai sisi yali elalubo homu ebao. Tiali goli eno te homu yali, te Masedonia bidi dabe meba augwali ena dali nosali asiyu tama suyu, te dage sisi isawai ebaso, tama tiyu, da tede hale siyu, tama dage dali me genuai hale mu yabuo. ⁵Tama tibaso, eno homugo eno ama dede augwali bolo te dage bidibo madi aselama polasa sabalomainogo eno augwalibolo te po obao, tama dagego te olo tau selama tolaibao wali nai te augwaligo hasia bolo sisi ilao. Tama te ena me nosali sabalobo si, te olo tau siyu mabo nai te olo mu mayu sisi ebo tiwai elama, tama te nai dago dagede anoma elama sabo tiwai me egobeo.

⁶Dagego homugo te bugagia koneao: nai yogo homu eyu dwasianu nai bulubo bidigo, te agai nai dwasianu naga nosali saibao. Tama te nai hauwa bulali bidigo, te agai nai hauwa saibao. ⁷Dage tigidali deli deligo te Juda bage tau mabo monede duga digi duga bugagia homugo hasia kone palama, tama te homu kolesaga tiwai wali naga peyu mone mao. Tiyu bidi me deligo mabo naide homu sege elama, tama agai homugo bida dabego bomo ebaso, tama te kolesagade naga agai te nai mani homu me ilamuo. Menio. Agai digi aga homu hasia dodolama, tama te tiwai naga mao. Magi baso meni. Godigo te bidigo wiegi yai homu pemene elama nai mabo kolesaga ebo bida, te tobage bida Godigo godolo ebo dao. ⁸Tama Godigo olo mabo nai tigidali te dagebolo mabo usu mu eyu, tama dage mu paganaluaibao. Tama tigidali sogo dage tigidali nai usu mu elama, tama dagego tigidali wiegi yai se yabo nai hauwa elaluabao. ⁹Te Godigo po bukude te nai mayu tau sabo kolesaga ebo bida dali po wali, te po e dao,

“Te bidigo nai hauwa te magi nai meni yai we
bidibolo mani, te bidigo nai wai sanama bulala pabo
tiwai yilio. Te agai doloba pai kolesaga sesemane
sogo elaluabao.”^p

¹⁰Godigo nai wai te bidibolo bulumainogo menama, tama tigidali bidibolo tubo nai menama tama augwaligo tubo dao. Teda Godigo dage usu nama te nai dabe mayu, tama dagego te gasa Godigo po odobo we bidibolo tau sabo kolesaga genuai mu ilaiabao. Tama dagego doloba pai kolesaga umabo mu pedaludaibao, te bidigo nai wai bulai digi tama nosali te nai umabo mu walobo tiwai iduaibao.^q ¹¹Tama dagego nai hauwa elaluabao, tama dagego homu mu naga eyu, nai hauwa te ama

^p 9:9 Tib 112:9 ^q 9:10 Ais 55:10

dede augwalibolo tigidali sogo mabo usu yaibao. Tama dago sede dagego te olo tau siyu mabo naide te ama dede augwaligo te Godibolo usu da po waibao.¹² Awe, dagego te tiwai sègo te Godigo we bidi tau siyu, te kolesagade dagego te augwali sòq pali nai usu nubo sè yaibao. Tama te tiwai kolesaga naga me egobeo. Menio. Dagego te tebo kolesaga ebaso, te augwaligo dwagi yai homu eyu, Godibolo usu da po hauwa waibao.¹³ Dagego te ama dede tau sabo sè ebode, tede te dagego kolesaga hanilama pedalibaibao. Te ama dede augwaligo koneama, dagego te Godigo po bugagia wali pelama tama Kraisgo wiegi yai gesi po we bidi gedude hania hanilai dao. Tama dagego homu mu naga eyu, olo mabo nai genuai augwalibolo mabo me, te gasa bidi dabebolo me mabo sueibao. Tama eyu augwaligo Godigo nogi uwguba saibao.¹⁴ Te Godigo olo mabo wiegi yai kolesaga genuai mu dagede elalubo, te augwaligo koneaibao. Tama tiyu augwaligo dage godolo elama, tama augwaligo Godibolo po weyu, te agai te olo tau sabo wiegi yai kolesaga dagebolo mobaso, augwaligo agabolo puba hwi po waibao.¹⁵ Godigo dabolo te olo mani nai, te genuai mu egi pali, tama tede te dwagi yai po tigidali dago pusubo usu me egobeo. Dago Godibolo te olo mabo naide puba hwi po wao.

**Bidi mebago po dwai Polba wali tama te Korin dabego
agaba dwai haliga ilabo sè yali, tiyu Polgo te Korin dabe
augwali homu dodolobo po wali**

(Dqj 10-13)

Polgo aga nogide posobo po wali bagebolo po wei ponai po

10 ¹Te dage tomode bidi mebago po kisila ena dali weyu te po wai, “Pol aga da dali bidiyu, tama aga digi aga aiyaba elaluali, tiali goli aga digibulu bidibo sogo te agai po bomai aséna toloyu da dali wabo dao,” te po wali. Tiali goli ena Pol eno homugo te dagego Kraisgo homu kolesaga hasia bolo kone palao, te aga digi aga homu aiyaba elaluama tama te bidi dabe augwali dali nagame yai kolesaga yai, tama eno me te tobage homu eyu, dagebolo e mobo mabo po meg i obao.² Eno e tama tiwai po dagebolo obao: nosali ena dageba pedalobo si, teda dage dua dao, tiyu eno dagebolo sesena pai po mayabuo. Tiali goli eno homugo eno po te bidi mebago da te tqde kolesagade biliba homu ebo bidi dabe augwalibolo hanilama bomo elama te sesena pai po pusabo homu ebao.³ Mu tama, da te we bidi tomode e tqde bidibo dao, tiali goli Godigo pode boi bidi homu ebo bidi dabe dali hwibode dago te tqde bidigo wabi hwibø tiwai me ebo meni.⁴ Tigidali wabi hwibø nai dabe dago tolalubo, te tqde nai tiwai me elalubeo. Menio. Te Godigo bomo elalubao, te boi bidigo bomai obo alubo usu yaibao.⁵ Dago augwaligo da dali konila po wabo

page pedeyu, tama augwaligo wabo po aiyaba mu elalubo dao. Tama tigidali kolesaga ugwdadu mu dolaluyu tama te God koneainogo homu ebo bidi dabego tū palialubo, te me dago hugibo dao. Tama da tigidali bidigo homu kolesaga dago kalabus ilama, te Kraisgo homu kolesaga wali pomainogo ebo dao. ⁶Tama da sisi elama dage tonalubao. Te da dagego bidibo digi sabolama, tama dagego dago po tigidali wali pobaso da, teda dago te dage tomode bidibo te po sela şabo bidi augwalide po tū dodolama tama augwali tigidalibolo dwai dene wei ponabao.

⁷Dagego te duga gedude elalubo nai bugagia suiyao. Te dage tomode bidi me deli aga homu aga digi te Kraisgo bidi bidiyu da, teda aga digi homu kone ma palama tama aga te tiwai koneabao, aga digi te Kraisgo bidi da homu yali da, teda da me te Kraisgo bidi bidibao, da aga dali tiwai si mu dao. ⁸Magi baso meni. Dago Genuai Bidigo dabolo te şe emainogo te genuai nogi dabolo mani, te dago dagego Kraisde homu tialubo kolesaga ebode dą̄ walomainogo yali. Te dage dolomainogo eyu agai te bomo dabolo mabeo. Tama eno dena te şede dena nogi ugwbaba mu sali goli, tede ena hale me sogobeo, te dolo dao, dago dena şe bugagia yaibao. ⁹Tiali goli dagego eno aşəna tolobo pasgo te dage olo wi ilib homu ebo te eno hagela homu ebao. Dagego te tama egimio. ¹⁰Mu tama, bidi meba augwaligo enade tama tiwai po obao, “Awe, te agai aşəna tolobo pasde şege yai po elaluyu, tama bomo elalubo po me elalubo dao. Tiali goli aga digi sabalobo si tama dago aga digi suyu bomo meni yani, tama agai po te olo nai tiwai dao.” Te tama po wabo dao. ¹¹Te po wabo bidi dabe, augwaligo e tama tiwai homu bugagia kone palao: da digibulu bidiyu tama dago pas naga aşənاما dagebolo tolobo po, te po dali, te da asama dage dali bidiyu ebo kolesaga dali, te si tiwai si mu yaibao, te tedali gasagi yai menio.

¹²Te dago dena digi dali te augwali digi augwa nogi ugwbaba sabo bidi dabe dali si dago osola sulama, tama da augwali tiwai si da po wagobeo. Te po wabo dago hagela homu ebao. Magi baso meni. Te bidi dabego augwaligo ebo kolesagago naga te augwa kolesaga usu sabo dao. Me deligo aga ebo kolesaga te gasa bidi mego ebo kolesagade usu sabo şe ebo dao. Te tama tebo bidi dabe, augwaligo bugagia konesībaso, wiegi yai koneai kolesaga me elalubo menio. ¹³Tiali goli da dali, God agai te dago şe yabo madi sesegede dą̄jilalı. Te dą̄jilama, tama dage Korin bulude bidibo we bidi dage te dą̄jtomode bidibao. Tama dago ebo şede dago dena sali dą̄jedelama tama dago dena nogi ugwbaba me sogobeo. ¹⁴Tama dage te dą̄jtomode bidaligo da, teda da pologi solama tama Kraisde wiegi yai gesi po dageba sela asali sogo, te sogo dago dena şe yabo madi dą̄jmu edelebeo. ¹⁵Dago te Godigo mawai dą̄jbolama, tama te gassa bidi dabe augwaligo yali şede te dago dena digi dena nogi ugwbaba me sabo meni. Te menio. Dago homugo te tiwai bomo ebo dao: te dagego duga

homu tigidali Kraisba mubo kolesaga bomo yai pedalobo si, tama dago sę genuai dage tomode pedalomainogo eyu, te dena dage tomode Godigo sę yabo dąj usu nama tama te genuai mu pedalaibao.¹⁶ Tama tiyu, dago dage tagalama, tama te Kraisdé wiegi yai gesi po te dage u badu elalubo me badu tqde bidibo we bidibolo sela pabo usu yaibao. Te elama, tama dago gasa bidigo te gasa dąj ilali tq tomode yali sęde te dago nogi olo uwawa me sogobeo.

¹⁷Awe, te meni. Te Godigo po bukude po me deli e tiwai elalubao, “Te nogi uwawa sabo homu ebo bidi, agai te dago Genuai Bidigo yali sęde po weyu, tama Genuai Bidigo nogi naga uwawa sao,” te po aşeani.^r ¹⁸ Magi baso meni. Dago koneani, te bidi aga digi aga nogi uwawa sabo, te bidi aga nogi te God gedude me elalugobeo. Mu menio. Te dago Genuai Bidigo bidi me deligo nogi uwawa siyu, te dwagi yai bidi da obaso da, te bidi naga nogi mu elaluabao.

Polgo te tibo po sela pabo bidigo po hanilama pusali

11 ¹Te dageba nosali asali bidi dabe augwaligo augwa digi augwa nogi uwawa siyu, tama homu kolesaga meni yani po wali goli, dagego augwali tede tagalao wabeo. Tama tibaso, eno homugo dagego ena me gogolama, tama eno te homu kolesaga meni yai po dwasianu waio. Awe, dagego ena gogolao. ²Te gasa bidi dabe augwaligo te dagego Krais wali pabo kolesaga dolidali weyu, eno augwalide dwai homu ebo dao, te Godigo augwalide dwai homu ebo tiwai gilama. Magi baso meni. Bidigo aga penani sę munu me isławai wiegi yai bidibo gesi wegi noma te bidi delibolo naga mabo tiwai, te eno dage te bidi deligo naga somainogo eyu sa muanio. Eno dage Kraisbolo maiabo homu ebo dao. ³Tiali goli ena wi ebao. Dago koneani, te dwai hasamani tiwai bidibo bidi Satan agai tibo po wabo mu koneani homu elama, tama polobadu agai te we Iv dago auwa tibo po ola menama tama aga tulaluali. Te dagego tiwai me dage, te dageba tamadi asali bagego po odolama, te tiwai kolesaga dageba pedalobuo. Tiyu, dagego homu mu eyu Krais dali naga wadolama tama wali pabo wiegi yai kolesaga tagalidali homu eno ebao. Ena tede wi ebo dao.^s ⁴Magi baso meni. Te bidi meba augwali dage pageba pedalama, tama Jisade gasagi yai po pusubao, augwaligo wabo po te dago te Jisade pusubo po tiwai me wabo meni, te gasagi yai tedali dao. Tama te kolesagade dagego te gasagi yai mobo sabo, te dagego polobadu sali te Tedali Mobo Bidi tiwai meni. Tama dagego gasagi yai po augwalidu odobao, te dagego dade sali te wiegi yai gesi po tiwai meni, te gasagi yai tedali dao. Te bidi me deligo te tobage kolesaga dage tomode me eboso da, teda dagego dwagi yai homu eyu, agai te tobage kolesaga

^r 10:17 Jer 9:24 ^s 11:3 Gag 3:1-5, 13

emainogo gogolobo dao. Tiali goli te dolo menio. ⁵Te bage augwaligo homu te augwali Godigo po sela pabo sə ebo bidi dabe bidiyu, tama augwali te səde polalubo bidi dabe dao, augwaligo te homu ebo dao. Odao. Eno homu augwaligo ena te dwasianu sə me delide aiyaba elalubo menio. ⁶Mu tama, eno te Grik dabego po bugagia pusubo kolesaga te me konesiąwani, tiali goli te magigo menio, eno te Kraisde homu kolesaga me səq pabeo. Mu menio. Tigidalı sə ebode dago dagebolo hania ola mawai dao, dago Kraisde kuna mu konebo dao.

⁷Dagego koneani, eno te Godigo wiegi yai gesi po dagebolo ola mani sogo, tede eno masigi me sabeo. Te kolesagade ena digi ena aiyaba elaluama te dage ugwaba siyu yai. Magi yaliwe? Dagego homu eno te yali kolesagade te ena səgə sali, agawē? ⁸Eno masigi dabe te gasa bulude bidibo Godigo po odobo we bidi mebade sali, te ena dagede sə emainogo eyu augwaligo ena tama tau sai. Te kolesagade te eno augwaligo nai anoma elama olo sabo tiwai yai dao. ⁹Ena dage dali polobadu bidali sogo ena nai me səq pali, te sogo eno dagede bidi me deli dali aga nai anoma eyu səgə me mabeo. Menio. Te ama dede dabe augwaligo te Masedonia tq tagalama tama Korin hanuba pedaliyu, augwaligo ena səq pali nai usu nani. Tama tigidali nai eno bugagia tonaluama, tama dagego duga masigigo ena tau sabode eno dwasianu səgə dagebolo me mabeo. Tama sesemane sogo eno te tiwai bugagia tonaluiba. ¹⁰Te Kraisgo mu po enade elalubao. Tama tibaso, eno tibo po wasiąbo, e mu po naga obao, te tigidali Akaia moni tq badu te bidi me deligo te eno dagede masigi sisąbo kolesagade ena nogi ugwaba sabo te bidi mego tū palibo usu me egobeo. ¹¹Magi baso eno tama obawe? Eno te dagego masigi sisąbo kolesaga ebogo te eno dage dali dwagi yai homu isayu godolo mu isayu bidibo te waselebo dawe? Menio. Eno dage dali dwagi yai homu eyu godolo ebo kolesaga ebo, te Godigo koneai dao.

¹²Meba bidi augwaligo homugo eno me te eno ebo səde dagede masigi sao, augwaligo te masigi dagede sabo tiwai yao, augwaligo te homu ebao. Magi baso meni, augwaligo homugo eno te tiwai eyu da, teda augwali da tiwai si bidibaso, augwa digi augwa nogi ugwaba sabo tū elaluiba. Tiali goli menio, eno te dagego masigi sisayu te tū palibo sə augwaliba ebao. Tama eno tiwai sə naga me iduaibao. ¹³Magi baso meni. Te tobage sə ebo bidi dabe augwali te Godigo po sela pabo bidi dabe mu menio, augwali te tibo po wabo sə ebo bidi dabe naga bidibao. Augwaligo augwa kolesaga hasegelama, tama tigigo naga augwali te Kraisgo po sela pabo bidi dabe tiwai bidibao, we bidigo gedude. ¹⁴Tama dage tede moni midigi me selamuo. Dago koneani, Satango digi aga tigi hasegelama, tama tigigo naga aga te dwai sə isawai wiegi yai ensel mobo bidi tiwai pedalobo dao.

^t 11:9 Fil 4:15-18

¹⁵Tama tibaso, aga sə ebo bidi dabe augwaligo me te augwa kolesaga tibo hasegelama, tama te bidi dabe augwali gedude te augwali doloba pai kolesagade sə ebo bidi dabe tiwai pedalobaso da, teda da tede moni midigi me selamuo. Nosali augwali te augwa sə yali usu nama tiwai dwai dene mu saibao.

Pol te Godigo po sela pabo səde dene hauwa tolali

¹⁶Hasia eno po wali, tama megı eno po ma obao, bidi megı ena te konesı̄wai bidi da te homu munu me elamuo. Tiali goli, dagego homu ena te homu kolesaga meni yai bidi da homu ebaso da, teda dagego ena gogoliqə, tama ena me ena nogi ugwbaba dwasianu sainogo yaibao, te homu kolesaga meni yai bidi tiwai. ¹⁷Eno dago Genuai Bidigo homu kolesaga wali pelama, eno e po me wabeo. Menio. Eno po te konesı̄wai bidigo po wabo tiwai eyu, tama ena nogi ugwbaba sabo bomo ena digi ebo dao.

¹⁸Bidi hauwa augwaligo te təde kolesaga wali pelama, tama augwa nogi augwa digi ugwbaba sabo dao. Tama eno me te kolesaga osogo wali pelama, tama ena digi ena nogi ugwbaba sabo po dwasianu obao. ¹⁹Dagego te eno te tobage kolesaga ebo sə ilali. Magi baso meni. Dagego wiegi yai koneani kolesaga elalubao, tama dagego te konesı̄wai bidi gogola sula tagalabo homu godolo elama, te konesı̄wai bidigo po dagebolo momainogo yali! ²⁰Awe, te bidigo dage te aga dologoba mubaso, ma agai dagego nai tigidali silibaso, ma agai dage dali hagoma ebaso, ma agai dage gesabidide elibaso da, teda agai tama temainogo te dagego gogolobo dao, po meni! ²¹Mu tama, augwaligo te tebo kolesagade dago te sə yabo bomo me elalubeo! Tama eno te kolesaga igi sogo da, teda eno seğe siyu tama hale egi da.

Megı eno po te aga digi nogi ugwbaba sabo po wabo kolesaga meni yai bidigo po tiwai obao, te bidi mebago augwa ebo kolesaga po te bomo elama pusubaso da, teda eno me eno bomo elama tama augwali aiyaba elaluabo po pusaibao. ²²Augwali te Hibru dabe da wida, teda ena me te Hibru bidi dao. Augwali te Israel hani bidi dabe da, agawe? Teda, ena me ena te Israel hani bidi da. Augwali te Abrahamgo bulai wai hani da, agawe? Teda, ena me ena te Abrahamgo bulai wai hani bidi mu dao. ²³Augwali te Kraisgo sə ebo bidi dabe da wida, agawe? Megı eno po te aga digi nogi ugwbaba sabo kolesaga meni yai polobo bidigo po tiwai mu obao. Eno augwali te Kraisgo səde aiyaba mu elaluali. Te sə dene idu gealigo eno edelama ugwanu igulali. Te eno Kraisde po pusubaso, te boi bidi dabego ena kalabus beba hauwa sogo muani. Tede eno te tibo po ola mabo bidi dabe ela holai dao. Te boi bidi dabe augwaligo ena hauwa sogo mu elali, bidigo nedebo usu egobeo, tede eno e bage augwali aiyaba mu elaluali. Hauwa sogo ena pəde isabo tiwai yai.^u ²⁴E tiwai yai. Te a naga sogo Juda dabe augwaligo ena te dwai kibu waligo nigai bigo elali,

^u 11:23 Tpi 16:23

te nedali te bidi sese deli olama, nogo si olama, nogo me badu a naga me si me si, te 39 tama sogo daj egi pai. A naga sogo te tiwai ena elali.^v 25 Te sela sogo te Rom dabego ena keloago elali. Deli sogo te Juda dabe augwaligo ena ela mumainogo eyu masigi şanama ena elali. Sela sogo moni geba sip dabe doloyu, ena te tamu ajde hagawai. Tama tiyu, sip me deli tama dolali sogo te deli sogo hulide me giligade ena te tamu aj daide bidali.^w 26 Te hauwa sogo ena digibulu tüdu bilali. Ena te pabo aj hauwade hagawainogo yali. Ena te tüdu bilibo bidi elebo aga nai wi sabo dwai bidi dabe augwaligo nogode dolainogo yali. Te eno hani bage, te Juda hani dabe augwaligo me ena dolainogo homu yali, tama Juda hani isawai bidi dabe augwaligo me ena dolainogo homu yai. Ena te haniani hanude dolainogo yali, tama te bidi meni yai bulude me ena dolainogo yai. Ena te tamu ajde dolainogo yai. Ena te tibo po wabo abagi dede dabe augwaligo nogode me elainogo yai dao.^x 27 Eno se dene haniani mu yilio. Hauwa sogo ena hulide se eyu, tama ena godege me pibe. Ena nai sili bidali, tama ena aj nogonego sali. Hauwa sogo eno nai gisilali. Ena kedaugo me siyu, tama ena ugwa me meni yai bidai dao. 28 Tama te naga me ebeo. Menio. Te tigidali deli sogo eno te haniani bulude bidibo Godigo po odobo we bidi tigidali tonalubo se eyu, tama tede genuai sege mu enabolo mubo dao. 29 Te bidi me deli bomo meni ebawe? Teda, ena me te bomo meni yai tiwai bidaibao. Te bidi me deli te dwai seba tulaluai dawe? Teda, eno te aga te dwai se tomoba kegali bidi dali dwai homu mu yaibao. Awe, tigidali haniani se ebode eno te dagebolo tibo po ola mabo bage augwali eno aiyaba elalubo dao.

30 Te gasa tu me meniamma, tama ena nogi ena digi ugwaba sobaso da, teda eno te ena bomo meni da po olama, tama tede ena homu pemene yaibao. 31 God, te God tama dago Genuai Bidi Jisasgo Aya, dago sesemane sogo aga nogi ugwaba siyu tama bidada peyu bidada pomainao. Agai koneani, eno tibo po te enaba pedalali sede me wagobeo. 32 Te polobadu eno Godigo se edubadi, me sogo ena te Damaskus moni hanude bidibadi, te toboli bidi me deli aga te tuni bidi Aretas dologode bidali. Tama te toboli bidi agai te Damaskus hanu buluba pabo tüde tonalubo bidi muani. Agai ena selama kalabus ilainogo yali. 33 Tiali goli meba ama dede augwaligo ena moni basket wade munama, tama te hanu genuai masigigo nigai bobage obo te windodu augwaligo ena buluba aba bonogo tagalama, tama ena buluba dilama teda soali. Tama ena te toboli bidi nogode muani tagalama, tama ena sana pelama wi pai dao. Te sogo te sede ena bomo meni yai bidi mu bidali. Tialima Godigo ena tau sali.^y

**Te nade subo se dabe tiwai gilama eyu, te
Godigo po hauwa Polbolo ola mani**

12 1 Te gasa bidi dabe augwaligo eno nogi dolobo po dage dali olama, tama dagego ena tau sabo po wei ponosiqbaso, ena digi ena nogi

^v 11:24 Bom 25:3 ^w 11:25 Tpi 14:19; 16:22 ^x 11:26 Tpi 9:23; 14:5 ^y 11:33 Tpi 9:23-25

ugwaba sobao. Te gasa tū me elalubeo. Mu tama, te kolesagago da tau me sisābo usu me isāwani. Tiali goli tagalama, te dago Genuai Bidigo enabolo te nā yali me, te geme dualali po meba mani, tede eno po megī waibao.

² Ena te Kraisgo bidi bidiyu, tama kibu be nogo si olama sāgāgo me si me si polobadu Godigo ena te dagalu sela wali sigi mu teba ugwaba sela holali. Te ena teba pobadi ena tigi dali bidaliwe, ma ena tigi tagalama te eno noma bidi naga teba paliwe, te eno me konebeo. Godigo naga koneanio.

³⁻⁴ Tama Godigo ena te Paradais teba sela holali. Te ena tigi dali bidaliwe, ma eno tigi tagalama eno noma bidi naga teba paliwe, te eno me konebeo. Godigo koneani. Tede eno te bidigo me pusubo usu isiąbo tobage po odama, tama te po bidigo me pusidali weyu habu selali dao. ⁵ Godigo ena dali te yali kolesaga, tede eno homu pemene yaibao. Tiali goli ena digi ena nogi ugwaba me sogobe. Ena bomo meni yani po ena olama, tama tede naga ena nogi ugwaba sabo dao. ⁶ Mu tama, ena digi ena nogi ugwaba sigi sogo da, teda ena konesiawai bidi tiwai me egi menigi dao. Menio. Te eno mu po naga wagi da. Tiali goli ena digi ena nogi ugwaba me sogobeo. Magi baso meni, eno homugo te bidi me deligo te po odolama tama agai homugo ena te wiegi yai bidi mu da homu idali. Eno homugo dagego eno ebo kolesaga sulama, tama dagego eno Godigo po pusubo po odolama, tama te si naga osola sulama, tama dagego tiwai homu dolo enaba emainogo ebo dao.

Te sesani tiwai naigo Pol tigiba enani

⁷ Te po hauwa Godigo enabolo te dagalude ola mani, te genuai wiegi yai nai mu dao. Tama tede ena digi ena ugwaba sabo te Godigo godolo me ebe, tama agai te dene mabo sesani ena tigiba enebo nai tiwai nai me deli enabolo mani. Te dene mabo nai te Satango s̄e ebo bidi tiwai dao, te ena elidumainogo ebao. Te ena aiyaba elaluama tama te eno te dagalude suali naide ena digi ena ugwaba me sidali olama tibo dao. ⁸ Sela sogo eno dago Genuai Bidibolo hanaluyu po wali, te dene mabo nai agai enade sela sāmainogo yai. ⁹ Tiali goli agai te po enabolo wai, “Woo, te eno olo tau sabo wiegi yai kolesaga nagede usu yai elalubao. Magi baso meni, te bomo meni yai bidide eno bomo hania mu pedalobo dao,” Genuai Bidigo te po wai. Tama ena bomo meni yai da te homu sēgē munu me egobeo. Menio. Ena wiegi yai homu pemene mu tede ebo dao, te Kraisgo bomo enade elalumainogo ebao. ¹⁰ Tama tibaso, Krais tobade ena bomo meniam, tama te bidi dabego enade nogi dwai posobo po weyu, enabolo dwai s̄e ilama, tama haniani sēgēgo ena siyu, tama bidi dabe augwaligo ena doloyu dwai sogo enaba pedalobaso da, teda eno wiegi yai homu tede ebo dao. Awe, te ena digi bomo meni ebo sogo, te sogo naga eno homu Kraisba tialuyu, tama aga bomo eno sabo dao.

¹¹ Te eno te ena digi nogi ugwaba sali po tamadi weyu, te eno te kolesaga meni yai bidi tiwai yali. Tiali goli dage, dagego ena hodolobaso

tama eno te po wali. Te duga digi eno nogi ugwaba sigi sogo da, te doloba pai kolesaga egi da. Tiali goli tama me tibeo. Mu tama, ena te olo nai tiwai dao. Tama te gasa bidi dabe augwaligo homu te augwali Godigo po sela pabo se ebo bidi dabe bidiyu, tama augwali te sede polalubo bidi dabe dao, augwaligo augwa sede te homu ebo dao. Tiali goli ena dali augwali dali si usu siyu da, teda augwaligo ena te dwasianu se me delide ena aiyaba elalugobeo. Mu menio. ¹² Ena dage tomode bidibadi, te gasa bagego enabolo mani sege tigidali eno bugagia toloyu, tama dage tomode se hauwa elama, tama ena da, te Godigo po sela pabo bidi mu da ola mabo bomai se eno nogode pedalali. Te e dao: te haniani bidigo isawai bomai se dage tomode pedalali, te Godigo se sa munama, tama bidi dodola midigi selama, tama Godigo bomo sumainogo yilio. ¹³ Eno te deli tiwai kolesaga te gasa Godigo po odobo we bidi hanibolo yali, te dagebolo yali tiwai se yali. Eno dage tau sabo se mede soq mu pabeo. Deli sede naga eno dage dali te gasa Godigo po odobo we bidi hani dali tiwai si ebe. Augwaligo augwa masigigo ena tau sali goli, eno digi dagebolo duga masigigo ena tau sao po munu me wabeo. Tede dagego homu eno sege sali homu eyu da, eno homugo dagego te eno sali sege sel a sawao! Tiali goli eno koneani, eno tede sege me sabeo.

¹⁴ Megi ena sela sogo dage bidibo madi asabo sisi ebao, tama dagego nai eno anomia eyu sainogo tama dagego duga masigigo ena tau sao po me wagobeo. Te menio. Odao, eno dagego nai me sogobeo. Menio. Eno dage naga sabo homu ebao, eno dage Kraisbolo momainogo ebao. Dagego koneani, te wai dabe augwaligo te nai dabe gegebo se elama te aya de ida si tau sabo se me egobeo. Menio. Te aya ida augwaligo naga te wai dabe augwali tau sabo se yaibao. Tama ena da dagego aya tiwai dao. ¹⁵ Tama dwagi yai homu eyu, dage tobade eno ena nai tigidali maiabo homu elama, tama ena bidibo ula me maiabo homu ebao, te dage tau sabo homu ebao. Eno dage dali dwagi yai homu eyu godolo mu ebo kolesaga genuai mu eboso, tama te dagego magi baso ena dali homugo dwasianu naga kone palobowe?

¹⁶ Tiali goli dage tomode meba augwaligo enade te tiwai po waibao, "Mu tama, agai digi dago masigi hania hanilama me sabe, tiali goli agai te po bebegelebo bidi tibo se ela mabo bidi, tama te tibo po wabo kolesagago agai te da muma menama, tama gasa bagego nogode te dago masigi sai dao," augwaligo te po wai. ¹⁷ Tialima, eno bidi meba dageba tagala palidu geai. Magi yaliwe? Te augwali me deli augwali nogode eno tibo po olama tama dagego nai anomia elama me sai da, agawe? Te menio. ¹⁸ Eno te Taitus hodolama, tama aga dage bidibo madi asali, tama eno te gasa ama me deli aga dali hodobo tagala palali. Tama te Taitusgo ili po olama dagego nai anomia elama me saliwe? Menio. Ma dagego homu te ena dali Taitus si da te Tedali Mobo Bidi deligo bomode naga me

bidibo meni, dagego da si dali te homu ebawe? Da si te tū delide naga me bilibo meni, dagego te homu ebawe? Edao. Dagego te tobage homu da si dali eyu da, teda duga homu hasegelao, te da sigo ebo kolesagade bugagia homugo koneao.

¹⁹Dagego eno tamadi aşeanı po tigidali tede homugo kone palama, tama tede dagego e tiwai homu idubadi bogo, ‘Te wali pogo te Pol agai aga nogi tau sabo sę naga ebao.’ Tiali goli te mu menio. Dagego da dali po tū eyu, tama dena yali sę osola suabo bidi dabe meni. Abagi mu dede, da Krais dali wadolama tama Godigo gedude dolalubadi, dago te po tigidali dagebolo aşena tolobao. Tama tiyu dage tau somainogo eyu dago te po dagebolo aşena tolobao. ²⁰Eno e homu ebao: ena dageba asama, tama dagego ebo kolesaga sulama te eno suainogo homu yali tiwai we bidi me bidibo sugobe homu yaibao, dagego gasagi yai kolesaga ebo eno sueibao. Tama tiyu, eno te dagego ebo kolesaga subaso, tama eno dage dali dodolobo sę ebo tede dagego hagela homu yaibao. Polobadu eno dage dali sę hauwa yali, tiali goli megı ena wi dwasianu eyu homu si dagede ebao. Eno homu ena dageba asama, tama eno dage tomode duga hasi e tiwai haniani dwai kolesaga ebo eno sueibao: konila po wabo me, te amabolo aga elalubo naide dwai homu ebo me, tama sębę elama wado po wabo me, tama nai yogo kolesaga ebo me, dwai nogi posobo po wabo me, bidi geme posobo po wabo me, te hagoma ebo me, te Godigo po odobo we bidi hani pedaloyu dolobo kolesaga me, te tobage dwai kolesaga ebo eno dage tomode te sueibao, eno te homu ebao. ²¹Eno e homu me ebao, ena dage bidiboba ma asobo si tama ena God agai ena te dagego gesabidide aiyaba elaluabao. Tiyu eno dage hauwade gela waibao. Magi baso meni, te we bidi polobadu augwaligo te dwai sę yali te tagalama tama homu begelama, tama te meda yai kolesaga me, te penani ebo kolesaga me, te hale isąbo dwai sę subigila ebo kolesaga, te augwaligo polobadu yali te dwai kolesaga tudiba me mube. Tama tede eno dage dali yabo sęde homu eyu tama homu sęgę elalubao.

Te Korin dabe augwa konealubo po bugagia tonalu dua dao wali po

13 ¹Megı ena dage bidibo madi sela sogo wagisu te asainogo ebao. Tama asama, eno dage tomode po tū eyu, tama bidi me deli ma we me deli agai naga gasa we bidide po kisilibo te usu egobeo. Godigo po bukude elalubo po me deli wali peyu dago te po tū dodolaibao, te po e dao: “Te bidi si ma bidi sela te pedauwali deli poba muani wida, teda te po bomo elalubaso, tama te tobage pogo naga te po tū dodolobo usu yaibao,” te po aşeanı.² Te polobadu dwai sę yali we bidi dabe augwali me, te gasa bidi dabe dage tigidilibolo me, te ena si sogo wagisu dage

^z 13:1 Bom 17:6; 19:15

dali bidagasali sogo te eno yabo kolesaga po dage dali wali. Tama megı me ena digibulu bidiyu, eno te tiwai po dagebolo ma obao: te ena dage bidibo madi ma asobo si, teda eno te dwai sę yai we bidi dabe augwali eno olo me gogologobeo, eno augwalibolo sęge mawaibao. ³Dagego enade e tiwai homu ebao, ‘Te Kraisgo Polgo pedauwalidu dabolo po wabo meni dawe, ma po wabo dawe?’ Te homu dagego enade yaligo da, teda dagego hania bugagia konemainogo eyu eno te bagebolo augwa sali sęge mawaibao. Te Krais dage dali bomo kimi me isiyu me egobeo. Menio. Agai dagede sę bomo mu ebo dao. ⁴Magi baso meni. Polobadu agai aga digi bomo meni yai bidi tiwai ilama tama bidibadi, tama augwaligo aga ni pedaide elali goli, Godigo bomogo megı aga bidibo ulade ma bideibao. Tama da aga dali wadolama, tama da me bomo meni yani tiwai bidibao. Tiali goli Godigo bomogo da aga dali bidibo ulade bidibao. Tama dago te bomo dage tomoba hanilaibao.

⁵Dagego sesemane sogo duga digi duga homu usu sela suyu, te duga homu tigidali Kraisba munama agaba homu tialubowe, ma meni yani, te bugagia koneao. Duga digi duga dagalao. Te bidi Jisas Krais dagego homude bidibo te dagego konebewe? Te meni wida, teda dage usu selama, te usu niba kadu wabeeo. ⁶Tama eno homugo dagego konebo te Godigo sę ebode da te usu niba kadu waibao homu dagego ebo dao. ⁷Tama Godigo dage tau siyu, tama dagego dwai kolesaga me deli isämainogo eyu, dago agabolo hanalu wabo po wabo dao. Dago magi baso te tiwai ebo dawe? Te dage wiegi yai we bidi bidibaso, dago dena sę dage dali bugagia yali, te homu emainogo eyu, te dago Godibolo te po hanalu wabo dawe? Woo, te menio. Dena homugo te dagego doloba pai kolesaga yao. Tama tiyu, tama da dageba asama te duga ebo kolesagade po meni baso, tama dago dage dali po tų ebogo dena bomo ola mabo tų meni eyu da, te usu da, magigo meni. ⁸Dagego koneani, dago te mu po aiyaba elaluainogo ebo usu me egobeo. Menio. Dago te mu po naga wabo sę tau sabo naga usu yaibao. Tama tiyu, dagego wiegi yai kolesaga naga eyu da, teda dago dage dali po me wagobeo. ⁹Tama dago dage dali po tų isayu tama tede Godigo da mani bomo waselabo tų meni baso, bidi mebago da bomo meni yai bage da te homu yaibao. Te usu da, po meni. Dagego dwai sę me isayu tama Godigo po bugagia wali peyu tama tede bomo elalubaso, da wiegi yai homu pemene yaibao. Tama dago Godibolo sesemane sogo hanalu wabo po weyu, dago homugo agai dage tigidali dodolama tama dage agai po odobo bomai we bidi mu pedaloyu, agai we bidi mu naga bidaibao. ¹⁰Megı ena digibulu bidiyu, tama eno te dagebolo po aşena tolali, te pagede naga dao: te ena dage dali bidagasobo sogo tama sesena pai bidi tiwai eyu, eno dage te dago Genuai Bidigo enabolo mani sę yabo bomogo eno dage selebo sę idalio. Agai dena yabo sęde te bomo dali, genuai nogi dali si dabolo mani, te dago dagego Kraisde homu

tialubo kolesaga ebode dą̄ walomainogo yali. Te dage dolomainogo eyu agai te bomo dabolo mabeo.

Po silagasu wabo po

¹¹ Eno ama dedeo, megj eno po paliama, tama eno dage tao po obao. Dagego duga ebo kolesaga dodolama, tama Godigo po odobo bomai we bidi mu pedalobo kolesaga yao. Dagego eno dage tau sabo po odiqo. Dagego te deli tigi poai deli homu naga elama, nagame yai bidao. Tama God da, te we bidi dali dwagi yai homu eyu godolo kolesaga ebo dali, te homu nagame ilibo kolesaga ebo dali si ebo God, aga te dage dali bidaibao.

¹² Te da Godigo we bidigo kolesagade, dage tigidali deli deligo te ama dede, abe dede dali wiegi yai homu elama augwali nogo mao. ¹³ Ede bidibo Godigo we bidi tigidali augwaligo dagebolo wiegi yai homu elama siade da po ola tolobao.

¹⁴ Eno homugo dago Genuai Bidi Jisas Kraisgo olo tau sabo wiegi yai kolesaga dali, tama Godigo dage dali dwagi yai homu eyu godolo ebo kolesaga dali, tama Tedali Mobo Bidi dage tigidaligo homude abagi tiwai bidibo kolesaga dali, te kolesaga sela dage tigidali dali hodobo mu bidao.

Polgo Galesia Dabeba Pas Aṣeṇi

Hasia nedebo tau sabo po

Te Jisas Kraisde gesi wiegi yai po sela pabo bidi dabe augwaligo te Juda dabego tɔ tagalama tama haniani gasa tɔba pali sogo, tede augwaligo te gesi po te Juda hani we bidi dali, te Juda hani isawai we bidi dali sibolo te gesi po ola mani. Tama te po odali we bidi meba augwaligo te po mu po dao homu eyu, Krais wali pabo gagalali. Polgo te po ola mabo sè te Galesia Provinsde yali. Tiali goli nosali gasa bidi dabe augwaligo te po wai, “Te we bidi Krais mu wali pabo homu eyu da, teda hasia augwali te da Juda hani we bidi tiwai pedaluyu, tama te Godigo Mosesbolo mani bomo yai po wali peyu, tama te bidi dabe augwaligo Godigo daj i sainogo eyu augwa tigi togwao,” te po wai.

Pol agai homugo te tobage po ola mabo po te dolo meni. Tialima te Galesia Provins tomode gasa bidi augwaligo te Kraisgo po wali pali we bidibolo te po wai, “Te bidi Pol te Godigo po sela pabo bidi mu menio, aga te bomo yai pode geda muani,” te po wai. Te po obaso, Polgo e pas te Galesia tɔde bidali Krais wali pali we bidibolo aṣeṇa tolali, agai augwali tau somainogo yai. Tama tiyu, agai augwali ola mani, Godigo digi aga i obaso, aga te Kraisgo po sela pabo bidi mu dao. Tama agai te Juda hani isawai we bidibolo Kraisde po pusumainogo eyu, Godigo aga te səba muani. Te we bidi te Juda hani tiwai pedalomainao po tagalao, Polgo wali. Bidi aga Kraisde konealubo po daj weyu, tama aga homu Kraisde naga tialubo bidi, te bidi Godigo gedude doloba pai bidi pedalaina, Polgo te po wali. Tama te pasde simanobo po te tama wai, te Kraisgo da bidi te magi sè isawai te tedali wiegi yai olo mu bidibo bidi dabe pedalomainu yali sogo, te Tedali Mobo Bidigo dago yabo wiegi yai kolesagadu pabo tū dodolobaso, tama dago te wiegi yai kolesaga te gasa bidi dabeba ebao, te po wai dao.

Godigo digi te bidi Pol agai po sela pabo bidi nigilai po (Dq̄j 1:1–2:14)

1 ¹Ena da Pol da. God agai ena tagala palali, eno agai po wagi pomainogo yai. Bidigo ena tagala palobeo, bidi mego ena te po wagi pabo səba mubeo. Te menio. Te God dago Aya dali te agai te ḡu

pagede ma hodolai bidi Jisas Krais dali, augwali sigo ena te şeba muai dao. ²Tama ena dali, ena dali bidibo ama dabe tigidali dali, dago te pas dage Galesia tə tomode bidibo Kraisgo po wali pabo we bidibolo aşəna tolobao. Tama aşənama, tama dwasianu hani deli delibolo te po aşəna tolobao. ³Tama dago homugo God dago Aya dali, dago Genuai Bidi Jisas Krais dali, te augwali sigo dagebolo olo tau sabo sə eyu, dage dwagi yai homu elama bida. ⁴Tama Krais agai te dago Aya Godigo homu wali peyu, tama aga digi aga bidibo ula olo mayu, agai dago yali dwai dwai səge te sela səawai. Tama tiyu agai homu da e təde megi elalubo dwai kolesagade sela pomainogo yai. ⁵Tama agai te sə ebaso, dago God agai nogi sesemane sogo ugwbaba mu sao. Eno homugo dago tama wainao.

Kraisde dwagi yai gesi po me deli digi elalubao

⁶Tegoba! Dagego yali səde ena noma mu salio. Dagego magi yaliwe? Te Krais agai dage olo tau siyu, tama God agai dage i wai dao. Tiali goli polo tama dagego te sə tagaluyu, tama dagego gasagi yai po wali pabo gagalali. Tama te gasagi yai po dagebolo pusali bage augwaligo “Ao, e po Kraisde dwagi yai gesi po mu dao,” wali. ⁷Tiali digi gasa wiegi yai po me elalubeo. Mu menio. Bidi meba augwaligo dagego homu kolesaga gasaba hasegelabo homu eyu, tama augwaligo te Kraisde wiegi yai po gasaba begelainogo yai. ⁸Tiali goli, dago digi, ma Godigo sə ebo ensel bidi me deligo digi te dagebolo dago polobadu wali gesi wiegi yai po hasegelama, gasa po weyu da, teda da te moni sia dabo buluba pao, te eno homugo. ⁹Dago te po polobadu wai dao, tama megi me eno ma obao, niwai bidi agai te dagego polobadu odali dwagi yai po wasiąyu da, tama agai gasagi yai po dagebolo obaso da, teda te po wabo bidi aga te siaba pao, hagamainao.

¹⁰Te eno te tobage bomai po weyu, te we bidi augwaligo ena dali dwagi yai homu emainogo wabeo. Te menio. Eno homugo God agai ena dali dwagi yai homu yaibao. Eno te tobage po weyu, we bidi augwaligo eno nogi ugwbaba sao, eno te homu ebowe? Woo, te menio. Eno te we bidi te enade homu bega sabo po wagi sogo da, teda ena Kraisgo sə ebo bidi bidigi menio.

Godigo Pol agai po sela pabo bidi nigelai po

¹¹Ama dedeo, dagebolo eno mu po obao, e wiegi yai gesi po eno polobadu dagebolo wali po page te bidi mego pedalomainogo ebeo.

¹²Tama eno te po bidi mede sabeo. Tama bidi mego te po enabololo ola mabeo. Mu menio. Jisas Krais aga digi enabololo te po ola mayu waselai. Tama te koneama, ena da Godigo tagala palai po wagi pabo bidi mu dao, te dagego koneaibao.

¹³Te eno polobadu yali kolesaga te ena Juda bidi hani dali bidibadi yali sə po, te po dagego polo odai dao. Tama eno Jisas konesiəbadı, te

Juda bidi hanigo Godibolo lotu wabo s̄e eno wali pai dao. Tama te tiwai bidibadi, te sogode eno Kraisgo po wali pabo bidi hani elala bilaluai, tama eno te hani tigidali mu ela silainu homu eyu bidaluali.^a ¹⁴Tama augwali dali homu dene isiqabadi eno te s̄e yai. Tama me, te ena gesi bidi bidibadi, dena Juda dabego wajgo yali kolesaga wali pabo homu ebode, tede te Juda hani tomode elaluali gesi bidi tigidali eno ena abagi dede te dena wajgo kolesaga wali pabo s̄ede augwali aiyaba elaluali. Te Juda dabego ebo s̄ede eno bomo mu elama, tama Juda hani tomode nogi sai.

¹⁵Tiali digi, polobadu eno idago ena ame nesiabadi, tama Godigo ena te sogo sa muai dao. Tama tiyu, agai ena dali aga dwagi yai homu eyu, olo tau siyu, tama ena ame nenama, tama aga bidi mu pedalumainu ilama, tama agai ena i wai, eno agai s̄e emainogo yai. ¹⁶Tama agai ena i olama, tama agai eno homu mu hasegelainogo eyu, tama agai homu ‘Megi eno Polbolo eno ogwa waselaibao,’ te homu eyu, tama te sogo agai aga ogwa Jisas enabolo waselai. Tama eno te Juda bidi hani isiqwai we bidibolo te bidi Jisasde gesi dwagi yai po pusigi pomainogo eyu, God agai ena i olama, tama ena gasa bidigo bidibo digiba pabeo, agai enabolo te s̄e page ola momainogo eyu teba pabeo. Te menio.^b ¹⁷Tama Godigo ena i wasiqbadi, agai gasa bidi dabe aga po sela pabo bidi dabe nigliai dao. Augwali Jerusalem hanude bidali. Tama Godigo enabolo aga ogwa waselama, tama nosali ena augwali dali te s̄ede po miainogo ena Jerusalemba pabeo. Te menio. Eno te bidi meni yai tq Arebia teba osogo bidigi pai. Tama nosali te tq tagalama, tama ena te Damaskus buluba bidigi pai. ¹⁸Tama nosali kibu be sela bidama, tama ena Jerusalem hanuba pai, tama Pita dali po miainogo yai. Tama ena aga dali bidibadi, Sarere si te me deli tama sogo tede bidai. ¹⁹Tama ena tede bidibadi, te Godigo po sela pabo bidi tigidali eno subeo. Te dago Genuai Bidi Jisas aga amanu Jems deli naga bidibo eno suai, Pita dali. ²⁰Tama eno megidage dali asena tolobo po, te eno te yali s̄ede tibo po dage dali wagobeo. God agai koneani, e po mu po naga dao.

²¹Tama Jerusalem tagalama, tama nosali ena ma te tq Siria dali te Silisia te tq siba pai. ²²Tama te sogo te Kraisde wadolama te Judia tqde bidali we bidi augwaligo ena gesabi susiroma, ²³tama gasa bidigo enade wali po naga odai. Tama augwaligo enade te po wai, “Polobadu te bidi Pol agai da elebo s̄e yai, dago Jisasde konealubo po doloyu yai. Tiali goli aga homu begelama, tama megidage biliyu, agai we bidibolo te po wabo dao, ‘Te Jisasde konealubo po te po mu po dao.’” Augwaligo enade te Godigo ena homu hasegelali po odali. ²⁴Tama augwaligo enade te po odoyu, tama augwaligo Godigo nogi ugwaba sai. Tama tibaso, te s̄ede dageko koneagameo, Godigo digi te eno dagebolo ola mani gesi dwagi yai po agai enabolo ola mawai dao.

^a 1:13 Tpi 8:3; 22:4-5; 26:9-11 ^b 1:16 Tpi 9:3-6; 22:6-10; 26:13-18

**Godigo po sela pabo bidi dabe augwaligo Pol agai
yali sę po odama, tama te usu dao wali**

2 ¹Te ena gasa bulude bidibadi, te kibu be nogi si olama, sąqą badu me si me si bidai. Tama nosali ena dali Barnabas da si Jerusalemba pai. Tama eno te bidi Taitus me selama, da hodobo pai. Te da bidi sela Jerusalem hanuba sabolama, tama tede da dali pedalali sę dagego bugagia koneao.^c ²Ena Jerusalemba olo pabeo. Menio. Godigo digi ena teba pao obaso, ena pai. Tama da teba sabolama, tama te toboli bidi dabe augwaligo beba pali. Te dagebolo gasagi yai po ola mabo bage augwaligo te Jems dali, Pita dali, Jon dali, te bidi sela te tuni bidi dabe da, te homu ebao. Tama da augwaligo beba sabolama, tama eno augwalibolo naga te eno te Juda bidi hani isąwai we bidibolo pusali dwagi yai po te eno augwalibolo ola mawai. Te eno polobadu yali Godigo po pusubo sę me, megı ebo sę me te sę olo ela tagalidali weyu, eno augwalibolo te sę yali po page ola mawai. ³Tama te sogo Taitus ena dali bidai. Tama aga te Grik bulu bidi dao, Juda bidi menio. Tiali goli te toboli bidi dabe augwaligo sisinama, tama po mibadi, te bidi Taitus te Juda dabego kolesaga wali peyu, te aga tigiwali togolama tama dago bomo yai po tigidali wali pao, augwaligo te po wabeo. Menio. ⁴Tama te sogo gasa bidi meba asai. Tama augwaligo “Ao, da Jisas wali pabo bidi dao,” weyu, te tibo po naga wai. Sa asobo bidi tiwai augwali geme aselama, tama da dali wadolali. Tama polobadu da te da Juda dabego wąj dabego nigali bomo yai po dologode bidaluali. Tama da Krais Jisasde wadolama, tama agai da te kolesagade tagalali, da olo bugagia bidimainogo yai. Tiali goli te bidi dabe augwaligo te kolesaga page geme suagasai, augwaligo da te augwa bomo yai po dologoba ma munama tama tede dąq olama, da tede bidimainogo yai. ⁵Augwaligo homugo te bidi aga Kraisgo hani tomoba asobo si, tama hasia aga tigi togwao, da Juda dabe tiwai eyu, tama dago bomo yai po tigidali wali pao. Tiali goli augwaligo Godigo gesi dwagi yai po dolidali weyu, tama te po bugagia bidiyu dage tau somainogo, dago augwaligo wali po odobeo. Te po dago polo odama tagalali.

⁶Te Jems dali, Pita dali, Jon dali, te tobage bidi dabe augwali Jerusalem hanude bidiyu, te we bidigo gedude augwali te Godigo bidi hani toboli bidi dabe tiwai bidai. Tiali goli, eno homu augwali da genuai bidi dawe, ma olo bidi dawe, te magigo menio. God agai we bidi osola subo si, agai augwaligo tigide osola subo meni. Tama te toboli bidi nogi elalubo bidi sela augwaligo gasa po te eno te Juda hani isąwai we bidibolo wabo pode wadolobeo. ⁷Mu menio. Augwaligo koneai, God agai te Pitago agai po te Juda hanibolo pusumainogo yai tiwai gilama,

^c 2:1 Tpi 11:30; 15:2

tama megi Godigo ena te Juda hani isiąwai we bidibolo te Godigo po pusumainogo tagala palai bidi dao.⁸ Tama God agai te Pitabolo aga bomo menama, tama Pitago te Juda bidi hanibolo Godigo po selama pusigi pali. Tama tiwai me te God agai digi enabolo aga bomo menama, tama eno te Juda hani isiąwai we bidibolo Godigo po sela pusigi palio.⁹ Tama Jems dali, Pita dali, Jon dali augwali te Godigo hani bidi tomode te be ni bomo elama dolalubo tiwai bidama dolaluai, te we bidigo gedude. Tama te bidi sela augwaligo koneai, te God agai ena olo mu tau siyu, tama enabolo te se mawai. Tama tibaso, augwaligo ena dali Barnabas dali si nogo mani. Tama nogo mayu, da tigidaligo te homu yali, te da sigo te Juda hani isiąwai we bidi tomode Godigo se yaibao, tama augwali selago te Juda bidi hani tomode te se yaibao.¹⁰ Tama te homu eyu, tama augwaligo da sibolo te po wai, “Dage sigo te Juda hani tomode bidibo magi nai meni yai we bidi gegeda pelamuo, te dago augwaligo tuabo nai abelemainogo, dagego masigi dabe eba tolao,” augwaligo te po wai. Tama te se eno digi eno bomo eyu, te se ebo dao.

**Pol agai Pitabolo te po wai, “Nago ebo
kolesaga meba te dolo mu menio”**

¹¹ Te dageba tamadi asai gasagi yai po ola mabo bage, te bage augwaligo e tiwai po wabo dao, “Te bidi Pol agai Godigo po ola mabode te geda mubo dao. Tiali goli Pita agai te po bugagia dolo ola mabo dao,” te bagego te po wabo dao. Tiali goli deli sogo Pita aga geda muani te eno suali. Te e tiwai pedalali. Te ena te Jerusalem hanude te bidi sela dali po mibo silama, tama nosali ena te Antiock moni hanude bidibadi, Pita aga teba asai. ¹² Tama aga Antiock tede osogo bidibadi, agai te Kraisgo po wali pabo we bidi dali nai tudu geai. Tama augwali meba te Juda hani we bidi dao, meba Juda hani isąwai bage dao. Tama Pita aga Juda bidi digi, agai te Juda bagego habu selali po me deli bolali, te aga te Juda hani isąwai we bidi dali nai tudu geai. Tama tiyu, bidi meba augwali polobadu te Jerusalem hanude bidibadi, augwali Jems dali bidai dao. Tama te bage augwali Jerusalem tedu asama, tama augwali te Antiock hanuba sabolali. Tama te bage sabalobaso, tama Pita agai te Juda hani isąwai we bidi dabe dali nai tubo tagalali. Magi baso meni. Te tamadi asai Juda bidi augwaligo bomo eyu, te homu yai, te Juda hani isąwai bidi Godigo hani tomoba asomai hagede, augwaligo tigiwali togobo kolesaga wali pao, te Juda bage tiwai. Tama Pita aga te tamadi asai Juda bage dali wi eyu, tama agai te Juda hani isąwai bidi dabe dali nai tubo tagalali. ¹³ Tama te Antiock bulude bidali Juda bage, te Kraisgo po wali pabo bidi, augwaligo me wi eyu, te Pitago yali dwai se tiwai yai. Augwaligo koneai, te gasa hani we bidi dali nai tubo se te Godigo gedude usu dao, dwagi yai se dao. Tama augwaligo te tiwai koneai digi augwali te Jerusalemdu

asai bidi dabe dali wi eyu, tama te Juda hani isəwai bage dali nai tubo tagalali. Tama Barnabas me, augwaligo te yali kolesagago te Barnabas aga digi kege elama, tama Barnabas agai me te kolesaga yai.¹⁴ Tama tiali goli eno suali, augwaligo Godigo gesi dwagi yai po tagalama, te wiegi yai doloba pai kolesaga me wali pabeo, te eno suali. Tama tibaso, eno Pita augwaligo gedude te eno aga dali te po wali, “Naga ida dali aya augwali si Juda bidi hani bage dao. Tama augwali sigo nage Juda hani tomode ame nani, te nage Juda bidi mu dao. Tiali digi, me sogo nago te Juda dabego ebo kolesaga tagalama, tama nage te Juda hani isəwai we bidi tiwai bidibo dao. Tama tibaso, megis nago te Juda hani isəwai bidi dali bomo eyu, augwaligo te Juda hanigo ebo kolesaga wali pao po nago magi baso obawē?” eno Pitabolo te po wai.

**Te Krais Jisasde konealubo po dəq wali we bidi dabe
augwali naga te Godigo gedude te doloba pai we bidi
pedelaibao**

(Dqī 2:15–4:31)

¹⁵ Eno Pitabolo e po me augwaligo gesabidide wai, “Te mu dao, te gasa hani we dabego da si ame nabeo, te menio. Te Juda hani isəwai we bidi augwaligo Mosesgo mani bomo yai po konesiąma, tama augwaligo dwai sə eyu, subigila naga bidibo dao. Tiali goli da bidi si te Juda bidi hani tomode ame nenama, tama dago te Mosesgo mani bomo yai po koneai. ¹⁶ Tama tiali digi dago te me koneai, te Godigo agabolo ‘Nage doloba pai bidi mu dao’ omainogo, bidi mego te bomo yai po dolo mu wali pabo usu egobeo. Te tobage kolesaga ebo bidi Godigo usu niba kadu wagobeo. Tiali goli te bidi aga homu tigidali Jisas Krais teba munama, agade konealubo po mu dəq olama, tama te kolesaga ebo bidi naga te doloba pai bidi mu pedalaibao, te Godigo gedude. Tama tibaso, da me te tiwai yai. Dago te homu yai: te dago te bomo yai po bugagia wali peyu da, te sə naga usu egobeo. Tama dena homu tigidali te Kraisba munama, tama agade konealubo po dəq obaso, teda da Godigo gedude doloba pai we bidi mu bidaibao. Tama tibaso, dago Krais Jisasde konealubo po dəq wai dao. Te bomo yai po wali pabo kolesaga naga ebo bidi, aga Godigo gedude doloba pai bidi munu me bidigobeo.^d ¹⁷ Tama da Juda dabe meba, da Krais dali wadolama, tama da Godigo gedude doloba pai we bidi bidaibao. Tama dago te homu naga eyu, dago te bomo yai pogo da tau sabo homu ebo tagalama, tama gasa Juda hani dabe augwaligo gedude da te bomo yai po bolobo bage dao, te dwai Juda hani isəwai we bidi tiwai dao, augwaligo da dali te homu yaibao. Tama tiyu da, augwaligo te homu me yaibao, ‘Ao,

^d 2:16 Tib 143:2; Rom 3:20, 22

te Krais agai te bage te dwai sə yabo kolesagaba kegalio', te homu yaibao. Tiali goli te pode eno bomo elama e po obao, te tiwai mu menio.¹⁸ Edao. Polobadu eno te homu yai dao, ena te bomo yai po bugagia wali pobaso da, te Godigo 'Nage doloba pai bidi dao', te waibao. Tiali ma, nosali eno te homu ebo tagalali. Tiali goli megi ena te polobadu tagalali homu ma eyu da, teda te we bidi augwaligo hania koneabao, ena polobadu te bomo yai po bolama, eno dwai sə yali bidi dao waibao.¹⁹ Tama eno te bomo yai po nedeyu tama te nedebogo eno koneani, eno te bomo yai po dabe bolama, tama eno Godigo gedude dwai sə yai dao, tama agai ena səgə mawaibao, te eno konea sali. Tama koneyu, eno te me koneani, eno te dena wəj̄ dabego bomo yai po wali peyu, tama tedu ena Godigo gedude te doloba pai bidi munu me pedalogobeo. Tama tibaso, megi eno Godigo po wali peyu aga sə eyu bidibo dao. Tama ena te bidi Jisas dali te ni pedaide isali tiwai ebo əq̄ te homu ebo dao.²⁰ Megi ena eno bomogo naga bidibo meni, ena Kraisgo bomogo bidibao. Aga da te Godigo Ogwa da, tama agai ena dali dwagi yai homu eyu godolo mu elama, tama aga digi bidibo ula tagalama tama ena tau siyu isai. Tama ena ena homu tigidali agaba muyu, megi ena e tqde tigi tomode bidiyu, tama te tiwai ena aga bomogo bidibo dao.²¹ Tama da te Godigo gedude doloba pai we bidi pedalomainogo eyu, te bomai po bugagia wali pabo usu egi sogo da, teda da tau siyu Jisas aga olo naga isali, dago te homu egi da. Tialima agai te tiwai ebeo. God agai da dali olo mu tau sabo kolesaga eyu, Jisas tagala palali. Tama eno agai te sə yali tudi badu mugobeo," eno te po me Pitabolo wai, te Antiok hanude.

**Dagego te duga homu tigidali Jisasba mubo
kolesaga magi baso tagalaliwe?**

3 ¹Idao! dage Galesia bulu we bidi hani bage, dage homu kolesaga meni yai bage, eno dagede noma mu sobao. Polobadu ena dage dali bidibadi yaide, te sogo eno dagebolo te Jisas Krais aga te ni pedaide wadolama tama isəma, dago yali dwai sə səgə sela səwani po, te po eno dagebolo mu hania pusai dao. Tama te po odolama, tama Godigo gedude dage doloba pai we bidi pedalainogo eyu, dagego duga homu tigidali te poba mu muani. Tiali digi megi dagego homugo te Juda bagego bomo yai po wali paibao, te God agai dage doloba pai we bidi dao omainogo ebao. Dagego duga homu magi baso hasegelaliwe? Dego te homu bega sabo pobi olama, tama homu begelabo po dagebolo pusaliwe?² Tama dagego te Juda dabego bomo yai po wali pabo homu ebaso, eno dage te po me deli hanalu obao. Edao. Godigo Dwagi Yai Mobo Bidi aga dageba asai dao, polobadu. Tama aga dageba magi baso asaliwe? Dagego te bomo yai po bugagia wali pidu baso Godigo Mobo Bidi dageba asaliwe? Te menio. Dagego te Kraisde gesi dwagi yai po odama, tama te poba duga

homu tigidali mubaso, te Godigo aga Mobo Bidi dagebolo mawai dao.
³Tama Godigo Mobo Bidigo bomo dali dagego God wali pabo gagalali. Tama megi dagego homu eyu, ‘Te Godigo Mobo Bidigo bomo tagalama, tama dena bomo elama da te bomo yai po bugagia wali peyu, te tiwai bidiyu, tama dena kolesaga wiegi yai mu pedalaibao,’ dagego te homu eyu da, teda dage te homu kolesaga meni yai we bidi mu dao. ⁴Tama homugo kone palao. Polobadu te Godigo Dwagi Yai Mobo Bidi aga dageba aselama, tama haniani dwagi yai sę dageba pedalai. Tama megi dagego te dwagi yai sę olo subigila sela sawaibawe? Woo, eno homu dagego te tiwai egobeo. ⁵Tama God agai aga Mobo Bidi dagebolo menama, tama agai dage tomode bidi noma sabo bomai sę ebo dao. Magi basowe? Dagego te bomo yai po bugagia wali pobaso agai te Mobo Bidi mabo dawe? Te menio. Dagego te Kraisde gesi dwagi yai po odama, tama te poba duga homu tigidali mubaso, te God agai dage dali te dwagi yai sę ebo dao.^e

⁶Te Godigo dagebolo yali dwagi yai sę, te tobage sę naga me agai te polobadu bidai bidi Abraham dali yai. Tama agai Abrahambolo te sę yalide augwaligo Godigo po bukude e po aşeani, “Te Abraham agai Godigo wali po odama, tama agai aga homu tigidali te poba mubaso, tama Godigo gedude Abraham te doloba pai bidi mu pedalai,” augwaligo te po aşeani. ⁷Tama tibaso, dagego bugagia koneao, te Godigo wali po odoyu, te poba augwa homu tigidali mubo we bidi, augwali naga te Abraham aga hani we bidi mu dao. Te dagebolo te homu bega sabo po wali bage, augwaligo geda muyu te homu ebo da, ‘Abraham aga bulai wai dabe augwali da te aga hani we bidi mu dao,’ augwaligo te homu eba. Tiali goli te mu menio. ⁸Tama polobadu God agai koneai, nosali te Abrahamgo bulai wai aq isiąwai we bidi meba augwaligo Godigo po odama, augwa homu tigidali te poba munama, tama Godigo augwaligo yali dwai dwai sę sela şanama, tama agai augwali doloba pai we bidi dao waibao. Tama tibaso, polobadu, te sę pedalisiąbadi, Godigo te Abrahambolo te po wai, “Te eno nage dali wiegi yai sę eyu, tama tebogo nosali te tigidali haniani bidi hani dali wiegi yai sę me yaibao.” Godigo te po olama, tama bidi mego te po bukude aşeani.^f ⁹Tama Abraham agai Godigo agabolo wali po odama, tama te poba aga homu sese mubaso, Godigo aga dali dwagi yai sę yai dao. Tama tiwai, niwai we bidi augwa homu sese Godigo wali poba mubaso, Godigo augwali dali dwagi yai sę ebo dao.

¹⁰Me ma, we bidi meba augwaligo te homu ebo dao, ‘Te dago te bomo yai po bugagia wali peyu, tama Godigo gedude da doloba pai we bidi pedalalaibao.’ Tiali goli te tobage homu ebo we bidi augwalibolo Godigo

^e 3:5 Gag 15:6; Rom 4:3 ^f 3:8 Gag 12:3

dwai sęgę mena mena piduaibao. Magi baso meni. Te God agai wali po bukude te po me deli elalubao, e dao, “Niwai bidi aga te bomo yai po wali pabo bidi aga sesemane sogo te bukude aşeani bomo yai po tigidali te gisiga wali pisławai bidi, te bidibolo God agai dwai sęgę mena mena piduaibao,” te po aşeani. Tama da we bidigo te bomo yai po tigidali gisiga wali pabo usubeo.^g ¹¹Tama Godigo po bukude tobo me wai, “Niwai bidi aga homu kolesaga tigidali Godiba mubo bidi, Godigo agabolo nage doloba pai bidi da olama, te tobage bidi naga bida bida paibao,” te po te Godigo bukude elalubao. Tama tibaso, tede dago hania koneani, bidi me te bomo yai po wali pelama Godigo agabolo nage doloba pai bidi dao wagobeo. Te usubeo.^h ¹²Te bomo yai po wali pabo kolesaga me, te bidi aga homu kolesaga tigidali Godiba mubo sę me, te sę si tedali dao, tiwai si menio. Tama Godigo po bukude te po me elalubao, “Te bomo yai po tigidali mu wali pabo bidi, te bomo yai po me deli sela sasıławai bidi, te sę ebogo te bidi tau siyu, tama te bidi bidaibao,” te po te bukude augwaligo aşeani.ⁱ ¹³Tiali goli dago koneai, da te sę ebode usubeo, da te bomo yai po tigidali mu wali pisławai bage dao. Tama tibaso, da te Godigo dabolo maiabo dwai sęgę dologode bidali. Tialima, Krais agai da ma abelama, tama megı da te dwai sęgę dologode bidibo menio. Tama agai da ma abelali sę e tiwai yali, agai te Godigo dabolo maiabo dwai sęgę aga tigide selama, tama aga digi isali. Tama Godigo po bukude te po me deli e dao, “Te augwaligo nide walali bidi te bidi te Godigo dwai sęgę maiabo bidi dao,” te po aşeani. Tama augwaligo Krais eleyu, te ni pedaide walama, tama aga da tobade te Godigo dwai sęgę maiabo bidi aga pedalai.^j ¹⁴Agai te sę magi baso yaliwe? Te God agai te tama homu yai, te da tigidali Krais Jisas dali wadolama, tama te Godigo polobadu Abrahambolo dąw wali po te po te Juda hani isiąwai bagede mu pedalaibao, te God agai augwali tigidali dali dwagi yai sę mu yaibao, agai Abraham dali yali gilama tiwaibao. Tama te tiwai eyu, Godigo homugo da tigidali dena homu tigidali te Jisasba munama, tama God agai aga Dwagi Yai Mobo Bidi dabolo mawaibao po weyu dąw wali. Tama te po mu pedalainogo, Jisasgo te dwai sęgę da tobade sali. Tama tiyu, te dago Godigo Mobo Bidi sabo tū te tiwai megı elalubao.

Godigo bomo yai pogo te God agai hasia dąw wali po sela sęgobeo

¹⁵Eno ama dedeo, megı eno te da tőde bidibo bidigo ebo kolesagade dwasianu po waibao, dagego Godigo ebo kolesaga hania konemainogo ebao. Te bidi si augwaligo homu deli eyu, tama te homude te dąw wali po aşeyu, te gasa bidi agai te augwali sigo dąw wali po sela sęgobeo. Agai te poba gasa po ma wadologobeo. Tama te dąw wali po da te tőde bidi dabego po naga

^g 3:10 Bom 27:26 ^h 3:11 Hab 2:4 ⁱ 3:12 Prs 18:5 ^j 3:13 Bom 21:23

digi, gasa bidigo te po sela sagobeo. Tama te tiwai me, te Godigo dą̄ wali po te gasa pogo munu me sela sagobeo, te usubeo.¹⁶ Tama Godigo agai po dą̄ weyu, tama Abrahambolo te tobage po wai, “Eno nage dali, nago wą̄ me deli dali, te dage sibolo dwagi yai sę̄ yaibao,” te po dą̄ weyu wali. Tama Godigo wali po bukude augwaligo te po asębeo, “nago wą̄ dabe,” te bidi hauwa badi wabo menio, te wą̄ bidi deli nagade Godigo agai dą̄ wali po wai dao, tama te wą̄ deli te Krais naga dao.^k¹⁷ Tama eno megi dagebolo wabo po page e dao, te Abraham dali nosali yabo dwagi yai sę̄ po weyu, tama te po Godigo polobadu mu dą̄ wali. Tama tialigo da, te nosali asali bomo yai po tego te polobadu dą̄ wali po togogobeo. Te kibu be 430 silama, tama Godigo te bomo yai po mawai. Tama tibaso, te nosali asali bomo yai pogo te hasia wali dą̄ wali po aiyaba elaluama, tama te po hasegelama, te olo po tiwai pedalogobeo.^l¹⁸ Tama da te bomo yai po naga bugagia wali peyu, tama God agai da dali dwagi yai sę̄ egi sogo da, teda agade agai dą̄ wali po wali peyu agai da dali dwagi yai sę̄ egi menigi da. Tiali goli te menio. God agai ‘Eno Abraham dali dą̄ wali po polobadu obaso, tama megi eno aga dali dwagi yai sę̄ yaibao’ te homu eyu, Godigo Abraham olo tau siyu, dwagi yai sę̄ yai. Tama tibaso dago koneai, te Mosesgo sali bomo yai po tego te Godigo polobadu dą̄ wali po aiyaba elalugobeo.

¹⁹ Tialima, te po konila eyu, bidi mego te po enabolo waibao, “Te nago megi wali po te mu po weyu da, tama Godigo te dą̄ wali po hasia olama, tama agai te da Juda dabebolo te bomo yai po me magi baso nosali maniwe?” te po bidi mego ena hanalu waibao. Tama Godigo e homu eyu te bomo yai po mani, ‘Augwaligo augwa te eno bomo yai po bolobo sę̄ hania konemainogo yaibao.’ Tama te bomo yai po mayu, Godigo e homu me yali, ‘Polobadu eno te Abraham aga wą̄ deli te bidi dali eno dwagi yai sę̄ yaibao po dą̄ wali. Tama te bidi asisəbadi te bomo yai pogo sę̄ elalubao, te aga asobo sogo usu nagasaibao. Tama te bidi asobo si te bomo yai pogo sę̄ silaibao,’ Godigo te bomo yai pode te homu yai. Tama te homu eyu, God agai te bomo yai po mayu, te we bidigo nogoba dolo mubeo. Te menio. Agai te bomo yai po te aga sę̄ ebo ensel bidi dabebolo menama, tama augwaligo te tomode bidali bidi Moses tebolo mani, te po te bidi Mosesgo dabolo pusa mani. ²⁰ Te bomo yai po mabo sę̄ te tiwai yali. Tiali goli te Godigo hasia polobadu dą̄ wali po tego te bomo yai po aiyaba elalubaso, God aga digi te dą̄ wali po te Abrahambolo pusali, te tomode bidibo bidibolo pusa mabeo.

Te bomo yai pogo da te Kraisba odasa pabo te tudiba tonalubo aya tiwai elalualı

²¹ Te bomo yai po dali, te Godigo we bidibolo dwagi yai sę̄ yaibao dą̄ wali po dali, te po si augwa hasi boi bidi si tiwai dawe? Woo, te tiwai mu

^k 3:16 Gag 12:7 ^l 3:17 Sai 12:40

menio. Te po olamuo. Tama Godigo te bomo yai po me deli menama, tama te bomo yai pogo te we bidi Godigo gedude doloba pai we bidi egi sogo da, teda te we bidi tigidali augwali te bomo yai po wali pelama, augwali Godigo gedude doloba pai pedelali wagi da.²² Tialima, te tobage bomo yai po elalubo menio. Tama te Godigo po bukude augwaligo te po aséani, “Te tigidali tode bidibo we bidi augwaligo Godigo bomo yai po boludubo dao. Tama te kolesaga ebogo augwali mu dagana selama, tama augwali te sé tomode kalabus bidi tiwai dao,” te po aséani. Tama te aséani po odama, tama dago koneani, te bomo yai po wali pabo tū te usubeo. Tama tibaso, te pabo tū me deli naga elalubao. Godigo polobadu te po wai, “Niwai we bidigo homu kolesaga Jisas Kraisde dāu wabo we bidi eno augwali dali te doloba pai bidi da waibao,” te po dāu wai. Tama da dena homu tigidali agaba muyu da, teda da doloba pai we bidi te Godigo gedude pedelaibao.²³ Tialima, te dena homu te Jisasba muabo sogo pedalisiqbadi, tama te bomo yai pogo da kalabus bidi tiwai dāu wali, te da dena homu Jisasba muabo tū pedalabo sogo tonalubadi bidai dao.²⁴ Tama tibaso, te Krais aga asisqbadi te bomo yai pogo da tonaluai dao. Magi baso meni. Te Krais aga aselama, tama dago dena homu tigidali agaba menama, tama Godigo da dali te doloba pai we bidi dao omainogo, da te bomo yai po dologode tonaluyu bidai dao.²⁵ Tialima, meg i te dena homu Jisasba muabo sogo asaligo da, te da te bomo yai po dologode bidabo sogo sia sali dao.

Dago konealubo po dāu weyu, Godigo wai puluba pedelaibao

²⁶ Te dage tigidali bidigo Jisas Kraisde konealubo po dāu weyu, tama dagego te konealubo po dāu wabode te dage da Godigo wai puluba dao.²⁷ Tama dagego duga homu tigidali Kraisba munama tama baptais selama, tama dage aga dali wadolama tama bidibao. Tama bidiyu, bidi aga gudubo ugwa gudubo tiwai eyu, dagego Kraisgo digi homu kolesaga duga homude dāu walao, te dagego te homu kolesaga wali pomainogo tama yao.²⁸ Tama aga homu kolesaga siyu, tama dage Krais agai we bidi bidiyu, tama dage deli hani naga bidaligo da, teda dage haniani tedali tedali bage dao, te homu egio. Polobadu dage meba Juda hani we bidi bidai, meba Juda hani isiqwai bidi bidai. Meba nogi meni yai we bidi bidai, meba genuai nogi elalubo bidi bidai. Dage meba bidi, meba we dao. Tiali goli meg i dage te haniani tedali bidali kolesaga mu sila palio. Dage te Krais Jisasde wadolama, tama dage tigidali meg i Jisasde we bidi hani deli naga mu bidibo dao.²⁹ Tama tiyu, dage Krais aga dali wadolama, tama dage agai hani we bidi bidibaso, te dage Abrahamgo wai me bidibao. Tama tibaso, te polobadu Godigo Abrahambolo sa muyu sagameo wali te hagea sali nai, te nai dagego sabo bidi dabe dao. Godigo dage ma dobola sai dao.^m

^m 3:29 Rom 4:13

Te Kraisgo yali sède da olo mu sè ebo bidi bidali tagalama, te Godigo wai puluba pedelali po wali

4 ¹ Te Krais aga asisabantu, te bomo yai pogo da tonaluai dao. Tama eno po meba te pode elalubao. E tòde dago kolesaga e tiwai elalubo dao. Ogwa me deli aga aya ida si isibaso, nosali agai aga ayago elaluali nai mu saibao. ² Tiali goli aga dwasianu ogwa bididubadi, aga te nogi meni yai bidi tiwai bidiyu, aga ayago amago aga tonaluabao. Te ogwa te bidi dologode bidibo dao, te aga ayago doado bage sabo sogo tonalubo dao. ³ Tama te tiwai polobadu dago bugagia konesiąbadi, da e tòde dwai olo kolesaga ebo dologode bidai dao. ⁴ Tialima, te Godigo bodolu mani sabolobo side, agai aga ogwa e tqba tagala palai. Tagala palama, tama e tòde wego aga ame nai, tama aga e tòde bidibadi aga te Juda dabego bomo yai po dologode bididubadi yai. ⁵ Tama tiyu, agai da tòde bidi bomo yai po dologode bidibadi abelai dao, da Godigo wai puluba pedalama bidimainogo yai. ⁶ Tama dage agai wai puluba bidibaso, God agai Ogwago Mobo Bidi dago homuba tagala palama, tama dago i weyu, te po agabolo wabo da, “Aya, Aya.” ⁷ Tama tibaso, megii dage deli deli te olo sè ebo bidi tiwai ma bidigobeo. Menio. Dage agai ogwa dabe bidibao. Tama agai aga ogwabolo maiabo nai dagebolo mawaibao, te agai te we bidi ma dobola sabo kolesaga agai dage dali yaibao.

Pol agai Galesia hani dali moni homu ebo dao

⁸ Te polobadu dagego God konesiąbadi, tama dage e tòde dwai haubo noma bidi dabe dologode bidai dao, dage augwaligo olo sè ebo bidi tiwai bidai dao. Tama te god mu menio, te augwali tibo god dao. ⁹ Tiali goli, megii dagego God koneai dao. Woo, meo, te po dwasianu usube. Te e tiwai dao, megii Godigo dage aga dali wadolai. Tama megii dagego God mu koneai digi, magi baso te tòde dwai olo kolesaga ebo dologoba ma geasa peyu, tama dage te kolesagade kalabus sède ma bidibo tiwai ebawe? Augwaligo dage tau sabo usu egobeo, bomo elalubeo. ¹⁰ Tama tiyu, sesemane sogo dagego te genuai si bidibode me, te gesi polua pedalubode me, te genuai lotu po wabo sogode me, te gesi kibu be gagalobode, te dagego suyu, dagego homu te naide dą̄ wabo dao. Dagego homu ‘Dago te sè ebode Godigo da ma saibao’ geda muyu te homu ebo dao. ¹¹ Dagede homu sege eyu, tama eno moni homu ebao. Te eno dage dali yali sè te olo elama, tama tagalobowe te homu eyu, eno dagede homu si ebo dao.

¹² Eno ama dedeo, dagede eno homu dene eyu, tama bomonama eno dagebolo e po obao. Polobadu ena te da Juda dabego wajgo yali kolesaga dologode bidibadi, tama dage te tiwai bidibe. Tama dage tau sainogo eno te eno wajgo dabego kolesaga dologode bidali tagalama, tama dage tiwai bidali. Tama megii dage te Juda dabego wajgo kolesaga tomoba pidali

weyu, eno dagebolo te po obao, dage ena tiwai olo mu bidao. Ena hasia dage pageba asali sogo dagego ena dali magi dwai s̄e me yai menio.

¹³Dagego koneani, te sogo eno tigi gasi selama, bomo meni yai. Tama te sogo hasia eno te Godigo dwagi yai po dagebolo pusai dao. ¹⁴Tama eno gasi ebadi, dagego ena geseyu, bugagia tonaluai dao. Te s̄ede dage dene sai dao. Tama tiali goli ena tudiba muyu, tama dagego ena hagela ebo po me wai menio. Te tiwai menio. Tama Godigo ensel bidi me deli aga dage pageba asiyu da, tama dagego aga bugagia gesaibao. Ma, Krais Jisas aga digi aga dage pageba asiyu da, tama dagego aga bugagia gesaibao. Tama te tiwai ena dage pageba asali sogo dwagi yai homu mu eyu, dagego ena bugagia gesai dao. ¹⁵Tama dagego te gesebo s̄e ebadi dagego ena dali te dwagi yai homu yali. Te homu meg i mena tama elalubowe? Dage te homu gegeda paliwe? Eno mu po tama dagego te dwagi yai kolesaga yali haniliyu te po obao. Tama tebo sogode dagego te homu yai, ‘Dago Pol tau siyu, dago dena gedu ge gudama, agabolo magi sogo da, teda usu egi dao,’ dagego te homu yai. ¹⁶Tiali goli dage meg i magi yaliwe? Megi eno mu po dage dali obaso, tama dagego ‘Woo, meg i Pol agai da dali boi bidi homu ebao,’ dagego te homu enade ebawē?

¹⁷Te gasa bidi dabe meba augwali dage pageba nosali asiyu, tama augwaligo dagebolo homu bega sabo po bomo elama wabo dao. Tiali goli augwaligo dage homu bega sabo po wabo te dwalio. Te dwagi yai po menio. Augwaligo dage ena dali tomode togolama, dage augwaligo po wali pomainogo bomo ebo dao. Tama dagego augwaligo nogi uwababa somainogo tama tebo dao. ¹⁸Tama bidigo te homu bega sabo po te pode te wiegi yai po obaso da, teda te po usu dao. Tama sesemane sogo da te wiegi yai homu bega sabo po naga wao. Tama te sogo da hodobo bidisiayu da, tialima dagego te tebo homu kolesaga me tagalamu dao. ¹⁹Eno wai puluba, polobadu dagego homu kolesaga Kraisde dāq̄ wasiābadi, te sogo dagede ena moni homu eyu dene sai dao. Tama te tiwai meg i me ena te dene ma sabo dao. Te wego wai ame nainogo dene ebo tiwai, dene meg i eno ebo dao. Tama ena te dene sesa pidubadi tama dagego homu kolesaga te Kraisgo homu kolesaga tiwai ebo side te eno homu wiegi yai eyu usu yaibao. ²⁰Tama meg i moni homu eyu, eno homugo dage pageba asabo homu ebo dao. Tama ena dage dali bidiyu da, teda eno po dua dage dali wagi da. Tiali goli ena dage dali meni baso, eno dagede moni homu eyu, tama eno dagebolo te po bomo elama obao.

Te we Hagarde Sara side po digi po begelama wai

²¹Te dage Galesia dabe mebago ‘Godigo da doloba pai bidi dabe da waibao’ homu eyu, tama dage te Juda dabego bomo yai po dologoba painogo homu ebo dao. Tama tibaso da, te po eno meg i dagebolo hanalu obao, dagego te bomo yai po page bugagia odobo dawe? ²²Tama te bomo

yai po tomode po me deli e tama wai dao, te bidi Abraham polobadu mu bidai, te Juda hanigo agai waj, te bidi Abraham agai wai ogwa si elaluai. Tama te ogwa mego ida te Abrahamgo aga we mu bidai, te we nogi Sara dao. Tama gasa ogwa aga ida, te we da te Sara aga sę ebo we nogi Hagar dao.ⁿ ²³Tama Abraham aga te we Hagar dali bidibaso, te wego aga ogwa nosali ame nani. Te ogwa ame nabo te tqde we bidi dabego ebo kolesagade bidiyu ebo kolesaga tiwaigo te sę elama te ogwa ame nani. Te polobadu pedalisiabo kolesagade isiąbo tiwai yai meni. Tiali goli aga wai ame nesiąbo mosi we mu Sara, te wede Godigo aga dąw wali po wali pobaso, Sarago te ogwa ame nani. Tama tiyu, te we bidi noma sabo sę tama pedalali. ²⁴Tama te we si augwalide te po digi po begelama tama wali po page e tiwai elalubao. Te we si da, te dąw walali kontrak po si dao. Te dąw walali kontrak po me deli te bulu du nogi Sainai tedu asali, tama te dąw walali kontrak po te Godigo Mosesbolo mani bomo yai po dao. Tama te bomo yai po dologode bidibo we bidi augwali da te kontrak pogo wai puluba tiwai dao. Tama dago po digi po begelama, tama te bomo yai po kontrak po te we nogi Hagar dao. ²⁵Tama Hagar da, te Arebia tqde elalubo bulu du nogi Sainai dao. Tama gasa piksa mede, te we Hagar te megis elalubo hanu Jerusalem tiwai dao, te hanude bidibo we bidi augwali te bomo yai po dologode dąw weyu bidibo dao. ²⁶Ao, tiali goli megis eno te gesi hanu me Jerusalem tede po digi po begelama obao, te hanu aga dagalude megis tonalubo dao. Te gesi hanu Jerusalem te gasa we dao, te we nogi Sara dao. Aga te olo sę ebo we menio. Tama da te Godigo mani gesi kontrak po dologode olo bugagia bidibo, tama te we Sara aga te dago ida tiwai bidibo dao. ²⁷Tama te Godigo da dali dąw walali gesi kontrak po, te gesi pogo te polobadu mani bomo yai po kontrak po aiyaba elalubao. Eno tede tamadi wali po digi po tiwai po meba te bidi me deligo Godigo bukude tama po polobadu asęai,

“Tama nage dwai haliga tabi elalubo we, tama nago
wai ame nabo usu isiąwai, tama nage wai ame nabo
dene ebe, tama naga digi nago homu wiegi yai
hauwa elama, tama i bomonama ola bilao. Nago
bidi aga nage osogo taga pai goli, tama nosali nago
wai puluba hauwa ame naibao, te aga bidi dali
bidali wego wai puluba namba aiyaba elaluabao,”
te po asęani.^o

²⁸Eno ama dedeo, dage te bidi Aisak tiwai dao. Godigo te we Sarabolo dąw wali po mobaso, tama nosali te ogwa Aisak ame nani. Tama dagede me Godigo agai dąw wali po wali pelama, tama agai dage ma dobola sai dao. ²⁹Tama te Abraham tqde bidali sogo te we Hagar aga ogwago te

ⁿ 4:22 Gag 16:15; 21:2 ^o 4:27 Ais 54:1

Sarago ogwa dali boi bidi homu eyu bidali. Awe, te tqde kolesagade ame mani ogwa agai te Godigo Mobo Bidigo bomogo ame nani ogwa dali dwai homu eyu dene mani. Tama megi e sogo me te tqde kolesaga wali pabo bage augwaligo te Kraisgo po wali pabo we bidi dali boi bidi homu ebo dao.^p ³⁰Tiali goli, te bukude wali Godigo po te magi po elalubowe? Augwaligo te po e tama aṣeai:

“Te olo s̄e ebo we dali aga ogwa dali si megi sela
s̄aya. Te olo s̄e ebo wego ogwa agai te aga ayago
doadō bage meba nosali sogobeo. Te olo bidibō
wego ogwa naga, aga aya isibo si, agai aga ayago
doadō bage saibao,”^q

bukude te po aṣeani. ³¹Tama tibaso, eno ama dedeo, suo. Da te olo s̄e ebo wego wai puluba menio, da te bomo yai po dologode bidibō menio. Da te dāu wasiawai olo bidibō we Sarago wai puluba tiwai dao.

**Te Kraisgo da bidi dabe olo magi s̄e isiaawai pedelama
bidimainu ilali sogo, te Tedali Mobo Bidigo da bilibo page
dodolobaso tama dago wiegi yai kolesaga gasa bageba
ebao**

(Dqj 5-6)

5 ¹Te da olo mu bugagia bidimainogo eyu tama Krais agai te da dāu wali nai pisigma s̄anama, tama megi da olo bidibao. Tama tibaso, augwaligo dage te bomo yai po dologoba ma muidali weyu, tama dage bomo elama, tama dāu wasiawai olo bidibō bidi dabe bidiao. ²Odiāo. Ena da Pol da, tama eno dagebolo e sege yai po megi obao. Gasa bidi augwaligo dagebolo te po waidu gebao, “Te God agai dage dali ‘Dage dwagi yai doloba pai bage dao’ agai te po omainogo, duga tigiwali togwao,” augwaligo dagebolo te po mobo mabo dao. Tiali goli eno dagebolo e po obao, dage te usu da po weyu, tama duga tigiwali togoyu da, teda Krais agai dage tau somainogo yali s̄e te sego dage tau sogobeo. Agai dage tau sainogo ebo usu egobeo. ³Te po tiwai me elalubo. Dage dolidali weyu, eno gasa dage tau sabo po waibao. Te dage tomode bidi me deli aga tigiwali togomainogo agai usu da weyu da, teda agai te gasa bomo yai po tigidali me wali pao, te bomo yai po deli naga wali pigio. ⁴Tama dagego te bomo yai po wali pabo homu eyu da, tama dagego te bomo yai po wali pabode God agai dage doloba pai we bidi da te homu emainogo yali weyu da, teda dagego Krais tagalama, tama duga tali bobogasa pai. Tama dagego Krais agai dage olo tau sabo kolesaga tagalalio. Tama tiyu, dage te sege sai we bidi me bidaibao. ⁵Tiali goli

^p 4:29 Gag 21:9 ^q 4:30 Gag 21:10

dago da te gasagi yai homu kolesaga tedali sabo dao. Tama dago e homu ebo dao: God agai Mobo Bidigo da tau siyu, tama dago homu Godide dą wabo dao. Tama te tiwai elaluyu, dago aga tonaluyu, agai da doloba pai we bidi da omainogo bugagia bidibo dao. ⁶Tama tiyu, dago koneani, te bidi aga Krais Jisasde wadoloyu da, teda aga tigiwali togobo sę te olo sę tama tiwai da, tama te tigiwali togisawai bidi me, te me te olo sę tiwai da. Te sęde magigobeo, te olo sę tama dao. Tiali goli, te bidigo aga abagi dali te wiegi yai homu elama tama tau sabo, te bidigo Godide konealubo po dą wabo homu kolesaga hodolobao, te agai kolesaga te usu mu elalubao.

⁷Te polobadu dagego Kraisgo mu po wali peyu, te tudu bugagia wali pai dao. Te mena bidigo te tų palibaso, dagego te po mu bugagia wali pabo tagalaliwe? ⁸Te dagego megı te wali pabo homu kolesaga te po page God pagedu asobo menio. God agai dage i wali te mu po wali pomainogo yai.

⁹Te eno te gasa bidi augwaligo dage dolobo sę, tede te po digi po begelama obao. Te bret bo dabo nai nogi yis, tama te nai yis dwasianunu selama, tama te aji dali te plaua hauwa dali si taluama, tama te yisgo te plaua tigidali usu nama, bo dela silibo dao. Tama te tiwai augwaligo dage dali wabo dwai mobo mabo pogo dage tigidali mu dolaibao.^r ¹⁰Tiali goli, ena dage dali da tigidali te Genuai Bidi Kraisde wadolobaso, tama dagede eno e homu ebao, dagego eno homu wali pabo tagalama, gasa bidigo po wali pogobeo. Tama te dagego homu hodolobo bidi te agai nogi eno konebeo. Tialima, te bidigo dagede dwai sę ebaso, tama Godigo agabolo dene mawaibao.

¹¹Te tigiwali togwabo po wabo bidi augwaligo dagebolo te po wali, “Te bidi Pol me, agai te po wabo dao, ‘Bidi me Godigo agabolo te doloba pai bidi da omainogo, tama aga tigiwali togwao, aga te Godigo bomo yai po tigidali me wali asao,’ Polgo te po wabo dao,” augwaligo enade te po wali. Tiali goli te mu meni, eno te po wabo menio. Eno ama dedeo, eno te tobage po odubadi tigi sogo da, teda te Juda dabe augwaligo ena dali boi bidi eyu, ena elainogo homu me egi menio. Woo, eno te we bidibolo te Krais aga te ni pedaide isiyu dago sege sela sayani po naga ola mabo dao. Tama eno te po naga ola mobaso, tama augwaligo hagela eyu, tama augwaligo ena dene mabo dao. Tialima, te eno te tigiwali togwao po me, te duga homu tigidali Kraisde muao po me, te po si taluama, tama te po si wagi sogo da, teda augwaligo ena dene dali sege dali magi menio. ¹²Tama dage te tigiwali togwa po wabo bidi dabe augwaligo dagego wiegi yai homu elalubo te homu kolesaga augwaligo dolainogo eyu, te tigiwali togobo po wabo dao. Tama eno homugo te bidi dabe augwaligo augwa digi domo diao!

^r 5:9 1 Ko 5:6

¹³ Ama dede, polobadu God agai dage i wai dao, dage olo mu bugagia bidimainu yai. Tama dage megi olo mu bugagia bidiyu, tama bugagia suao. Te da te bomo yai po dologode bidisiqboso, tama dago polo homu kolesaga wali peyu, tama dena tigigo kolesaga wali pinao, te homu egimio. Te menio. God agai da tau selama, tama da olo mu bugagia bidibaso, tama dage duga hasi dwagi yai homu eyu, duga abagi tau sao, te augwaligo olo s̄e ebo bidi tiwai bidao. ¹⁴Tama bidigo te bomo yai po me deli bugagia wali pobaso da, teda agai gasa bomo yai po tigidali usu nagasaibao. Tama te bomo yai po me deli e dao: dagego duga hasi dali dwagi yai homu eyu godolo ebo homu yao, te duga digi naga godolo ebo homu tiwai yao.^s ¹⁵Tiali goli, dagego wado wado po weyu, tama gasa bidi aiyaba elaluyu, tama duga hasi tomode hw̄ibo po weyu da, teda dage dua dao. Tiyu dage tigidali hodobo hagabo dao, tama deli hani bidibo kolesaga dolaibao.

**Godigo Mobo Bidigo kolesaga dali tqde dwai
haligago meda kolesaga dali side po**

¹⁶ Te eno po e tama dao: dage te Godigo Mobo Bidigo ebo dwagi yai kolesagade bilao. Tama dagego tama tiyu da, teda dagego te dwai dwai tqde kolesaga wali munu me pogobeo. ¹⁷Tama te dago tigigo ebo dwai tqde kolesaga te Godigo Mobo Bidigo ebo dwagi yai kolesaga tiwai menio. Te gasagi yai dao, tedali dao. Tama augwali sigo augwa hasi hw̄iyu, tama augwali si konila eyu, mego kolesagago me kolesaga te aiyaba elaluainogo eyu, te kolesaga augwa si boi bidi tiwai ebo dao. Tama te Godigo Mobo Bidigo ebo kolesaga dali, te dago tigigo tqde ebo dwai kolesaga dali, te kolesaga si augwali dagego homude hw̄ibaso, tama dagego te yainogo yali te s̄e egobeo.^t ¹⁸Tama te Godigo Mobo Bidigo dagebolo ola mabo t̄u te t̄u dagego wali pidu da, teda dage te Juda dabego bomo yai po dologode bidigobeo.

¹⁹ Te bidigo tigigo tqde ebo dwai dwai kolesaga te hania elalubo, te dago subo dao. Tama te tobage kolesaga nogi eno nedada paibao, e dao: te penani ebo s̄e me, te dwai meda yai kolesaga me, te homu hodolobo kolesaga hania ebo me, ²⁰te Godigo nogi aba munama tama gasa naigo nogi uwawala sabo kolesaga me, te animani sabo dwai pobi wabo kolesaga me, tama boi bidi ebo kolesaga me, te wado po wabo me, te dwai homu eyu, te konila po wabo kolesaga me, te mena nai gedugo sulama godolo eyu sabo kolesaga me, te s̄eb̄e ebo kolesaga me, te nai yogo ebo homu me, te bidi hani si pedebo kolesaga me, ²¹te gasa bidigo naide dwai homu ebo kolesaga me, te bomo yai aq̄ tulama polobo bidi tiwai ebo kolesaga me, te dwai dwai penani s̄e ebo kolesaga me, tama te tobage haniani kolesaga

^s 5:14 Prs 19:18 ^t 5:17 Rom 7:15-23

ebo dao. Tama eno polobadu dagebolo wali po megi ma obao, te tobage kolesaga ebo bidi aga te Godigo we bidi tonalubo bomo dologoba munu me pisiąbaso aga tede wiegi yai homu egobeo.

²² Tiali goli Godigo Mobo Bidigo te bidigo homude hodolobo dwagi yai kolesaga e dao: te we bidide dwagi yai homu eyu, godolo mu ebo kolesaga me, te dwagi yai homu ebo kolesaga me, te homu nagame ebo kolesaga me, te wei polo ponosiabo kolesaga me, te we bidi tigidali tau sabo kolesaga me, te doloba pelama bilibo kolesaga me, te homu kę̄ pabo kolesaga me, ²³ te imilai bidigo ebo homu kolesaga me, te dago homu kolesaga bugagia tonalubo kolesaga me, te tobage kolesaga tigidali te Godigo Mobo Bidi agai dago homude hodolobo dao. Tama te tobage dwagi yai kolesagade te bomo yai po me deligo habu selebeo. ²⁴ Tama Krais Jisasde wadolali we bidi augwaligo augwa tigigo tqđe ebo dwai kolesaga ela silai dao, te ni pedaide elali gilama tiwai. Tama te dwai kolesagago hodolobo sę̄, te gedugo mena nai sulama sainogo ebo homu kolesaga te me, te Kraisgo we bidi augwaligo te kolesaga tagala silai dao.

²⁵ Te Godigo Mobo Bidi agai da bidibo ula menama, tama da me te Mobo Bidi bilibo kolesaga tiwaide pepela walinao. ²⁶ Tama tiyu, dago dena digi dena nogi uwgaba siyu, tama dago dena ama homu hodolobo po weyu aga sę̄bę̄ yabo po wagio, tama tiyu dago homugo augwaligo nai sabo homu elamo dao.

Mena tobage nai wae nago bulai baso da, te tobage naga nago saibao

6 ¹ Ena abagi dede, dagego bidi me deli aga dwai sę̄ ebadi subaso da, teda te Godigo Mobo Bidi agai ebo wiegi yai kolesaga wali pabo bidi dagego te bidibolo dua dua digi agai homu begelabo dodolobo po wao. Dagego aga dali homu sę̄bę̄ eyu wado po wagio. Dage tigidali deli deli dua dao, tama te dwai bidi Satango dage me te dwai kolesaga tomoba kegidali weyu yao. ² Tama dage tomode bidi me deli agai te tobage sege tololyu da, teda dagego aga tau mao. Tama dagego duga hasi te tobage tau sabo sę̄ eyu da, teda dagego te Kraisgo bomo yai po usu nagasaibao. ³ Tama dage dua dao, bugagia suao. Te bidi deli agai te homu ebo, aga digi aga nogi ugadu elalubo homu eyu da, tama agaduba bomo dali bidibo bidi da homu eyu da, tiali goli aga nogi me bomo me elalusiąbaso, teda te bidi aga digi aga homu tomode ili po ola mabo dao. Tama aga tulamuidali weyu, agai te homu ilamuo. ⁴ Tama tidali weyu, tigidali bidi augwa ebo sę̄ augwa digi osola suyu, tama dago ebo sę̄ wiegi yai sę̄ ebowe te suainogo bugagia osola suao. Tama tebo bidi agai te aga digi ebo kolesagade sulama, tama te kolesaga usu baso, aga wiegi yai homu emainao. Tiyu aga ebo kolesaga dali te gasa bidigo ebo kolesaga dali si te dagalamuo. ⁵ Magi baso meni. Godigo tigidali bidi deli delibolo augwaligo e tqđe yabo sę̄ tedali tedali dobolama mawai dao. Tama tiyu, tama augwali deli deligo te mani sę̄ te ni nagede tolobo tiwai ebo dao.

⁶Te Godigo po odali bidi agai aga wiegi yai nai tigidali togolama, tama te Godigo po ola mabo bidibolo dobayao.

⁷Te e pode dagego geda munamu: bidi mego te Godigo po olo oda tagalama, tama nosali Godigo te bidibolo sègè magobeo, te homu mu egimio. Tama bidi mego te tubo nai ge me tqde buluyu da, teda te bulali naigo du te naga nosali saibao, te gasagi yai naigo du sogobeo. ⁸Tama te nai ge bulubo sède eno te po digi po begelama obao, bidi aga tigigo tqde ebo dwai kolesaga wali peyu bidiyu da, teda tede agai te tobage kolesagago du walama saibao. Tama te kolesagago te bidi dolama, mu hagabo tiwai yaibao. Tiali goli, te bidi agai Godigo Mobo Bidigo dwagi yai kolesaga wali peyu bidiyu da, teda te bidigo te tobage dwagi yai kolesagago walobo du nosali saibao, te Godigo Mobo Bidigo agabolo te bidada pabo bidabo ula mawaibao. ⁹Tama tibaso, dago te dwagi yai kolesaga edubadi, te tigi dene eyu da, teda dago te dwagi yai kolesaga ebo sè hagela ilamuo. Magi baso meni. Dago te sè ebo tagalosiabaso da, teda nosali te nai inabo side Godigo dabolo te wiegi yai kolesaga ebo sego nai wai du mawaibao. ¹⁰Tama tibaso, dago te dwagi yai kolesaga ebo tu subaso da, teda dago te tigidali we bidi tau sao. Tama te Kraisde augwa homu tigidali muani we bidi te augwali dago hani we bidi tiwai dao. Tama tibaso, dago bomonama, tama augwali te dwagi yai kolesaga eyu, hauwa sogo tau sao.

¹¹Eno dagebolo e pas po tolainogo eyu, tama eno te dagebolo pusubo po obadi, gasa bidigo odolama tama agai nogogo aséba. Tiali goli megi eno dagebolo te po silagasu wabo po obaso, ena digi eno e po eno nogogo aséba. Suao. Eno e po silagasu asébo po te eno genuaigo aséba. ¹²Te Juda bidi meba augwaligo bomo elama, tama te dagego tigiwali togwao po te mobo mabo po dagebolo megi wedu gebao. Tama tiyu, augwaligo te tigi daide ebo sède augwa nogi ugwaba saibao. Augwaligo e homu ebo dao, augwaligo dagebolo te tigiwali togwao po olama, tama dagego duga tigiwali togobo si, tama gasa Juda bagego te sè yali po odobo si si augwaligo te dage tigiwai togwao po ola mani bagego nogi ugwaba saibao. Me ma, augwaligo koneani, te augwaligo dagebolo te Godigo gedude dage doloba pai we bidi pedalomainogo, Krais aga ni pedaide isali po weyu da, teda te gasa Juda dabe augwaligo augwalibolo dene mawaibao. Tama tibaso, augwaligo dagebolo te tigiwali togwao po naga weyu, mobo mabo po dagebolo wabo dao. ¹³Tialima, te augwa tigiwali togwali bage, te bage augwa digi augwaligo te Juda dabego bomo yai po tigidali mu bugagia wali pabo menio. Tama dagebolo te duga tigiwali togomainogo mobo mabo po weyu, tama augwaligo dagede te homu eba, ‘Augwali dago po wali peyu, augwa tigiwali togobo si, tama te dago Juda hani bagego dago nogi ugwaba saibao,’ te homu eyu augwaligo dagebolo te tigiwali togwabo po wabo dao. ¹⁴Tama augwaligo te sède

augwa nogi uwabawa sabo dao. Tiali goli, ena digi eno te dago Genuai Bidi Jisas Krais agai da tau somainogo aga ni pedaide isali po, te po weyu, tama eno aga nogi naga uwabawa sabo dao. Tama te ni pedaide eno te po obao, eno ena tigigo e tode ebo dwai kolesaga ela silai dao, te ni pedaide elali gilama tiwai. Tama ena me, te tobage dwai kolesaga ebode mu isali bidi tiwai dao, te tode ebo kolesagago eno homu ma hodologobeo.

¹⁵ Tama te tigiwali togobo sę dali, te tigiwali togisiąbo sę dali si te olo sę dao. Te sęde magigobeo, te olo sę tama dao. Tialima, te God agai da gesi noma sai we bidi nigibo kolesaga, te kolesaga wiegi yai mu dao, genuai mu dao, sęgę mu dao. ¹⁶ Tama eno homugo te eno megı tamadi wali po wali pabo we bidi tigidali, te Godigo augwalide homu dene eyu, tau sao, augwali moni homu isiąma bugagia bidimainogo yao. Tama te tobage we bidi augwali te Godigo dia sali Israel we bidi hani mu dao.

¹⁷ Te eno po silagasu wabo po e dao: polobadu eno te Jisasgo sę ebaso, augwaligo eno tigi elali. Tama elama, tama te eno tigide elalubo masalu tego te ola mobao, te ena da te Jisasgo sę ebo bidi mu dao. Tama tibaso, megı gagalama, tama bidi mego eno po tudiba muyu te tigiwali togobo po wabo bagego po wali peyu agai tebogo ena dwai homu ilamu. Dagego eno po wali piąo.

¹⁸ Eno ama dedeo, dagede eno homugo dago Genuai Bidi Jisas Krais agai dage tigidali olo tau sao, te dage bugagia mu bidimainogo yao. Te mu dao. Te eno po tama dao.

Polgo Efesus Dabeba Pas Aşəani

Hasia nedebo tau sabo po

Te boi bidi dabe augwaligo Pol dali dwai homu eyu, tama aga kalabus beba muani, te moni hanu Romde. Tama agai te Kraisgo po wali pabo we bidi hani meba tau somainogo eyu, tama Polgo augwalibolo pas dabe aşəna tolali. Tama tiyu agai pas me deli te bidi Filemon agabolو aşəna tolali. Te pas me deli me te Kolosi hanuba tolali. Tama te tudi badu Polgo e pas aşənama, tama te bidi Tikikus aga nogoba muyu, tama Tikikusgo e pas te Efesus moni hanuba sela pali. Te Efesus moni tq̄ tomode bidali Kraisgo po wali pali hani bage augwaligo me e pas nosali selama tama nedali.

E pas tomode Polgo genuai po sela ola mani. Hasia agai te Kraisde wali, aga da te tq̄de bidibo we bidi ma dobola sabo wiegi yai bidi mu dao. Tama gasa po te Krais wali pabo we bidi augwalide wali. Augwali haniani gasagi gasagi yai we bidi dao, tiali goli augwali me te dedeli hani naga elalubao, augwali te Kraisgo tigi dao. Tama te tudi badu Polgo te Efesus bagebolo te doloba pai kolesaga eyu bugagia bidabo tau sabo po ola mayu aşəani.

Te pas aşəani homu kolesagago page e tiwai dao, Godigo homude te tigidali elalubo nai te bidi Kraisba sisinabo homu yali, te tigidali dagalude nai me tq̄de nai me, tama Kraid aga te tigidali naigo polalubo tobolu bidi bidaibao. Te Daj 1:10 tede te tama po elalubao. Tama Godigo digi agade homu kę̄pabo we bidi homu hodolabo homu yali, te augwali Krais dali mu usu selama, tama augwali haliga delide bidimainu yaibao.

Godigo Kraisde te da te gesi noma we bidi dabe ilibo s̄e yai dao
(Dq̄j 1-3)

1 ¹Ena Pol da, ena Krais Jisasgo po pusigi pabo bidi dao. Tama God aga homugo ena te po wagı pabo s̄e emainogo eyu, agai ena te s̄eba muai dao. Tama eno e pas Godigo we bidi dagebolo eno aşəna tolobao, dage Efesus bulu bidi hani, dage Krais Jisas wali pabo we bidi hani mu dao. ²Tama eno homugo dago Aya God dali, dago Genuai Bidi Jisas Krais dali te augwali sigo dagebolo olo tau siyu, dage haliga nagame eyu bidaio.

Godigo Kraisde wiegi yai homu ilib sę da dali yai dao

³Dago Godibolo usu da po weyu, agai nogi ugwaba sao. Aga dago Genuai Bidi Jisas Kraisgo Aya dao, agai God dao. Tama da te Krais dali wadolama, tama te da we bidigo gedugo susiąbo bomo elalubo naide, te tobage naide Godigo wiegi yai homu ilib sę tigidali da dali yai dao. Agai te dago homu noma bidi tau somainogo eyu te wiegi yai homu ilib sę yai dao. ⁴Tama Godigo tq nigisiąbadi, agai da Krais dali wadolainu, da sa muai dao. Te sę page e dao: Godigo homugo da aga gedude dwai sę isiąwai we bidi, agai gedude doloba pai we bidi bidimainogo eyu agai da sa muai dao. ⁵Tama God agai da dali wiegi yai homu eyu, da godolo mu eboso, tama agai polobadu digi te agai da sa muyu, da te Jisas Kraisgo yali sego da ma selama, tama da God aga wai puluba bidimainogo yai dao. Tama te sę God aga homugo digi da godolo eyu tiwai dao. ⁶Tama Godigo aga ogwa Jisasde dwagi yai homu eyu, tama da aga ogwade wadolo baso, tama agai da dali wiegi yai homu ilib sę yai dao. Tama God agai da olo mu tau siyu agai te genuai sę eboso, te dago God aga ula yai bomo elalubo nogi ugwaba sao. ⁷Te Krais aga ni pedaide isilama, tama agai kanemego te da dą wali nai pisigma s̄awai, tama megi da olo mu bidibo dao. Te po page e dao, te Jisasgo kanemedé te God agai dago yali dwai dwai sęgę tigidali te mu sela s̄awai dao. Godigo da dali yali olo tau sabo kolesaga te dwasianu menio, agai te kolesaga umabo mu da dali yai.^a ⁸⁻⁹Tama tiyu, God agai te dwagi yai homu kolesaga eyu, tama agai te tigidali naide mu konea silibaso, tama agai polobadu mu yali homu aga wali peyu, agai dabolo te bidibolo polobadu ola masiawai po ola mawai. Tama te po dabolo ola nigisiąbadi, God aga homu te Krais agai eno homu wali peyu, te agai te sę yaibao, Godigo polobadu mu te homu yai. ¹⁰Tama te sę e tama dao, God agai tigidali nai dodolo piduainu, agai bodolu mani sogo asobo si, te tigidali dagalude elalubo nai me, te tigidali tqde elalubo nai me, te Kraisba tigidali nai deliba sisinaibao. Tama te sogo Krais aga tigidali naigo toboli bidi bidaibao. ¹¹Ao, te God agaduba agai te nosali pedalabo sęde homu bugagia konea pelama, tama agai homugo magi sę yainogo ebo sę, te sę tigidali mu pedalobo dao. Tama agai te homu kolesaga wali peyu, tama polobadu agai da Juda dabe sa muai. Tama aga homugo da Juda dabe da aga hani we bidi mu bidimainogo agai da Krais dali wadolali. God agai te sęde hasia mu konea pelama, tama tiwai dao. ¹²Tama hasia te gasa we bidi augwaligo te kolesaga isiąbadi da Juda we bidi dena homu tigidali te Godigo sa muani nosali asaibao wali bidi Krais te bidiba dena homu muani. Tama dena homu tigidali agaba munama, tama dwagi yai homu eyu, da aga ma asobo bugagia tonaluai dao. Tama

^a 1:7 Kol 1:14

da te tobage sə hasia ebo bidi dabe dago Godigo ula yai bomo elalubo nogi ugwaba sao. ¹³ Te dage me, dage Juda hani isiąwai we bidi, te mu po pusubo dagego odai, te Godigo wiegi yai pogo dage ma sabo po dao. Tama dagego te po odama, tama dagego konealubo po Kraisde dą̄ wai dao. Tama dage Krais dali wadolama bidibaso, tama God agai dage hagea siyu, sa momainogo tama aga Mobo Bidi dagebolo mawai. Polobadu agai po weyu, te Mobo Bidi dabolo mawaibao po aga homugo wai dao. ¹⁴ Polobadu Godigo aga we bidi dali wiegi yai kolesaga yabo po wai dao. Tama megi agai dabolo aga Mobo Bidi manigo da, teda agai tebogo dago konebo dao, te agai da sa muani, te agai polobadu wali po tiwai nosali mu pedalaibao. Agai aga Mobo Bidi dabolo mobaso, te nosali te Godigo aga sa muani we bidi mu selama, tama augwali aga dali hodobo mu olo bidaibao, te me dago hania konebao, tede dago homu si ebo menio. Tama tibaso, dago Godigo ula yai bomo elalubo nogi ugwaba sao.

**Godigo Efesus hanibolo koneaboo kolesaga
momainogo Polgo hanalubo po wai**

¹⁵ Te Godigo te tobage wiegi yai sə dabolo eboso, eno agabolo usu da po wabo dao. Eno odali, dagego konealubo po Genuai Bidi Jisasde dą̄ wali po me, tama dagego augwali dali wiegi yai homu eyu, te Kraisgo po odobo we bidi tigidali godolo ebo po me, te po si eno odali. ¹⁶ Tama tibaso, dagego tebo po eno odoyu, sesemane sogo eno Godibolo usu da po weyu agai dage tau somainogo po wabo dao. Dage eno homugo gegeda peyu me tagalobo menio. Tigidali sogo God dali eno po wabo si, dage tau somainogo eno dagego nogi me eno wabo dao. ¹⁷ Tama God da dago Genuai Bidi Jisas Krais aga God da, te dago genuai nogi mu elalubo Aya dao. Tama eno aga dali po weyu, eno homugo agai aga Mobo Bidi dagebolo mao. Tama menama, tama te Mobo Bidi agai dage wiegi yai homu kolesaga menama, tama agai God dagebolo waselaibao, te dagego God aga bugagia kuna konea silimainogo tiaibao. ¹⁸ Te eno homugo agai wiegi yai ula yai pogo dage homude ula momainogo yaibao. God agai dage i wali, te dagego agai te da mu ma sabo sogo tonalumainogo agai dage i wai dao. Tama Godigo Mobo Bidi agai dagego homude te wiegi yai ula yai po ola mayu, tama dagego te da mu ma sabo sogo tonalubo se page gisiga koneyu, tama wiegi yai homu ebadi dagego te sogo asobo tonaluaibao. Tama God agai aga we bidi dali wiegi yai kolesaga nosali yaibao po weyu, te po dą̄ wai dao. Tama tibaso, dagego te kolesaga page wiegi yai mu dao konemainogo, eno God hanaludu gebo dao, agai te dagebolo te dage dali nosali yabo kolesaga page gisiga ola mao. ¹⁹⁻²⁰ Tama eno God dali po weyu, eno po me deli dage tau somainogo wabo dao. Eno homugo te Godigo agai bomo dagebolo ola menama tama dagego te bomo bugagia koneaibao. Te bomo dwasianu meni. Tama

agai bomo te bidigo usu nigo usu sobaso, te usu egobeo, te bomo genuai mu elalubo. Tialima God agai te bomogo da Kraisde konealubo po dą̄ wali we bidi da tomode tau siyu sę̄ ebo dao. Tama te da tomode sę̄ ebo bomo naga eyu, tama Godigo Krais te gų̄ pagede ma hodoloyu, tama aga dolo nogo badu munama, tama megı̄ aga God dali hodobo dagalude bidibao.^b ²¹Tama megı̄ Krais aga ugwdadu mu bidalubao, tigidali toboli bidi, tigidali polalubo bidi me, tigidali bomai bidi, tigidali nogi elalubo bidi me, tőde me, dagalude me, Krais agai augwali tigidali aiyaba elaluama, aga ugwdadu mu bidibo, te nosali me tama tiwaibao. ²²Tama Godigo tigidali nai mu Krais dologoba muai, tama Krais aga te nai dabe tonaluabo bidi nigliama, tama Godigo po wali pabo we bidi genuai toboli bidi nigliai.^c ²³Tama aga te toboli bidi bidiyu tama Godigo po wali pabo we bidi hani aga tigi tiwai bidiyu, tama te hani te Krais agai te sę̄ yao obaso, te po wali pabo dao. Te tigidali bulude elalubo habuge yai nai tigidali te Krais aga da te nai tigidali simanobo page bidi dao. Tama te Kraisgo po wali pabo we bidi hani augwaligo Krais te tigi sese ilibo dao.^d

Da isai bidi tiwai elalubadi Godigo da Krais dali ma hodolai

2 ¹Te dage, polobadu dagego dwai kolesaga elama, te tų̄ geda mubaso, tama dage isai bidi tiwai elaluai dao. Isai bidi agai Godigo wabo po odosiabo gilama, tama dagego me Godigo po odobe. ²Tama te sogo dage e tőde bidibo we bidigo ebo dwai kolesaga wali bilaluai dao. Tama tiyu, dagego te dwai haubo noma toboli bidigo kolesaga wali pai dao. Agai te dagalude bidibo dwai haubo noma bage tonalubo dao, tama megı̄ me agai te Godigo po sela sə̄bo we bidigo homu kolesaga tonalubo dao. ³Tama da me, da tigidali polobadu te hani tiwai bidaluali. Dago tigigo tőde ebo dwai dwai kolesaga wali peyu, tama dago tigide pusu yabo kolesaga ela piduai. Dago homude pusu yabo kolesaga me dago ela piduai. Tama te kolesaga edubadi, Godigo da dali sę̄bę̄ eduai, agai te gasa we bidi tigidali dali sę̄bę̄ iduali tiwai. Tama God agai da eligi sogo da, teda te dolo egi dao, po meni. ⁴⁻⁵Mu tama, dago yali dwai kolesagago da ela munama, tama da isai bidi tiwai bidibo aq̄ eyu bidai. Tama da te tiwai bidaluai goli, Godigo da dali dwagi yai homu elama, tama da godolo genuai mu yali. Tama tibaso, agai da dali homu dene genuai mu eyu, da tau sabo homu mu yai. Tama eyu, agai da Kraisba wadolama, da ma hodolai, te da ma bidimainogo yai. Tama tiyu, te Godigo da olo mu tau sabo wiegi yai kolesagago naga agai dage ma dobola sai dao.^e ⁶Tama Godigo da Krais Jisas dali wadolama, tama agai Krais dali da dali ma hodolai, te da isai bidi tiwai bidibo aq̄ ebo silalio, dago tomode ogwa wai gesi noma ma pedalai. Tama da te Krais dali te dagalude bidiyu dago agai we bidi

^b 1:19-20 Tib 110:1 ^c 1:22 Tib 8:6 ^d 1:23 Kol 1:18 ^e 2:4-5 Kol 2:13

tonalubo sę meba emainogo te God agai da ma hodolai tiwai yai. ⁷Agai te sę da dali magi baso yaliwe? Woo, agai da dali dwagi yai homu eyu, da godolo mu ebaso, tama agai Krais Jisas tagala palali, da tau somainogo yai. Agai da olo tau sali, te dago abelegobeo. Tama agai da olo tau sali kolesaga te mu genuai mu tama dao, te we bidi tigidali augwaligo kuna konemainogo, tigidali sogo nosali, te Godigo da Krais dali ma hodolali. ⁸Tama tiyu, Godigo da olo tau sabo kolesaga naga tego dage tau selama, dage Satango nogode ma sali dao. Tama dagego te Krais hagede te konealubo po duga homu dąu olama, tama God agai dage tau siyu ma sali dao. Te dagego bomogo me ebeo. Te menio. Te God agai dage olo tau sai dao. ⁹Niwai bidi aga digi bomogo te wiegi yai kolesaga eyu, aga digi nogi uwawala sidali weyu, tama Godigo da olo tau sai dao. ¹⁰Tama God aga digi agai da gesi noma ma nigli. Agai da Krais Jisas dali wadolama, tama da tqde bidibo sogo tigidali dago we bidi tau sabo sę naga ela bilimainogo eyu, agai da gesi noma ma nigli. Tama dago te we bidi tau sabo sę yabo te sę agai polobadu sisi yai.

Krais agai te bidi hani si deliba sisinai

¹¹Te God agai dage olo tau selama, tama Satango nogode ma siyu, tama dagego yabo wiegi yai sę sisi yai. Tama tibaso, dagego duga polobadu bidali kolesaga ma konea palao. Dage da te Juda hani isiąwai ame nani we bidi hani dao. Da Juda hani bidi dago ge hwago dena tigiwali togobo dao, te da Godigo hani da olama waselemainogo ebo dao. Tama te Juda hani bidi dabe augwaligo dage hagede bo olama, “Te God konesiabaso augwaligo augwa tigiwali togosiąwani bidi dabe dao,” te po dagede wabo dao. Tiali goli te tigiwali togobo sę te bidigo nogogo aga tigi daide naga ebo sę dao, te genuai sę menio.

¹²Tama polobadu dage te tiwai bidibadi, te dagego Krais aga de dawe, te dagego konebeo. Dage te Israel bidi hani bulu badu bidaluai, te dage God agai hagea sai we bidi hani meni. Te God agai te da Israel we bidi dali dwagi yai sę nosali yabo po olama, tama dabolo polobadu mu pusai dao. Tama te pogo bomo te Godigo dena wąjibolo mu dąu wali po te dao. Tiali goli Godigo dage Israel hani isiąwai we bidi dali te tobage tau sabo dąu wali po wabeo. Tama dage tqde bidibadi dage dwagi yai homu eyu, te Godigo dage dali wiegi yai sę yabo sogo tonaluai menio. Tama dagego God konesiawai bidai dao.

¹³Polobadu dage te God digibulu bidai dao, pade meni. Tiali goli te Godigo sa muani tagala palali bidi Krais aga ni pedaide isilama, tama aga kanemego dage te Krais Jisasde wadolama, tama megı agai dage God paba bidagasomainogo yai dao, dage te Juda dabe tiwai bidimainogo yai. ¹⁴Magi baso meni. Krais aga digi te boi piabo tų nigai dao. Polobadu da Juda bidi hani dali dage Juda hani isiąwai bidi hani dali gasagi yai

tedali bidaluai. Tama tiyu, te bidi hani si augwa hasi te boi bidi homu eyu bidaluai. Tama te bidi hani si tomode te dą̄j tiwai elaluai. Tama Krais aga ni pedaide isilama tama te tiwai eyu aga tigigo te hani si tomode elaluali dą̄j te agai hugialio. Tama hugilama, tama agai da hani si deliba sisinama, deli hani tiwai nigelai, te megı̄ te boi bidi homu mu silai dao. ¹⁵ Magi baso meni. Agai te Juda dabego bomo yai po silali, te bomai po te dą̄j tiwai polobadu elaluali. Awe, agai te homu yali, ‘Te eno te bidi hani si deliba sisinama, tama te gesi noma bidi hani deli nigilaibao, tama augwali enade wadolalaibao,’ te homu yai. Tama te homu eyu, agai te Juda dabego bomo yai pogo ebo sę̄ agai mu silali. Tama megı̄ te dwasianu bomo yai po me, te genuai bomo yai po me, te augwali tigidali megı̄ sę̄ elalubo menio.^f ¹⁶ Tama tiyu, agai te da Juda bage dali dage Juda hani isią̄wai bage dali tomode yali boi bidi homu agai ela silimainogo eyu te aga te ni pedaide isali. Tama aga te ni pedaide isilama, tama agai te bidi hani si deliba sisinama, wadolama, tama tigi deli tiwai nigilama, tama agai te wadolali hani we bidi God pageba ma sesali.^g ¹⁷ Tama Krais aga asama, tama agai te wiegi yai gesi po, te boi piabo po agai da tigidalibolo pusagasali. Te dage God digibulu bidali Juda hani isią̄wai bage dali, te da God pade bidali Juda bidi hani dali si, te da tigidalibolo agai te boi piabo po ola magasali.^h ¹⁸ Eno te po magi baso obawe? Te Krais agai te da hani si tau sabo sę̄ ebaso, Godigo Mobo Bidi aga da tigidalide hodobo bidiyu, tama da gedu haluasa po wabo si te God dago Aya agai dago wabo po odaibao. ¹⁹ Te Krais agai te tobage genuai sę̄ tigidali ebaso, megı̄ dage Juda hani isią̄wai we bidi te dage gasa bulu we bidi menio, osogo bidagasai bage me menio. Woo, megı̄ dage Godigo we bidi hani tomoba mu asai dao, te bidi hani dage mu wadolai dao, te augwali dali hodobo kaneme deli dao. ²⁰ Tama eno te be sę̄ ebo po pagede te po digi po begelama te po megı̄ obao. Te Krais aga digi aga te be dą̄j wabo page ni tiwai dao. Tama agai tagala palali bidi dabe augwaligo dagebolo pusali po me, te Godigo po ola mabo bidi augwaligo dagebolo ola mani po me, te wiegi yai po te be kau ni dabe tiwai dao. Tama dage da, te be kele ni dabe tiwai dao, te be dą̄j wabo page ni dali te be kau ni dali si tede dage bugagia dą̄j olama elalubao. ²¹ Tama Krais aga digi agai te be sę̄ ebo ni tigidali wadolama, tama te be genuai mu pedalobo dao. Tama tiyu, te be gasagi yai tedali be elaluaibao, te dago Genuai Bidigo aga hagea sai be. ²² Dage me Kraisde mu dą̄j olama, tama Krais agai dage dali te gasa we bidi dali te deliba munama, tama Godigo Mobo Bidigo bidabo madigi nigibo dao.

Pol agai Godigo wiegi yai po gasa hanibolo pusubo sę̄ yai

3 ¹ Te Godigo te da bidi hani si deliba wadolobaso, te ena Pol ena digi eno Godibolo hanalubo po wabo dao. Tama eno te dage Juda

^f 2:15 Kol 2:14 ^g 2:16 Kol 1:20 ^h 2:17 Ais 57:19

bidi hani isiąwai we bidi tau sainogo eno Krais Jisasgo po ola bilaluali. Tama eno te sę ebaso, te Juda dabe augwaligo tede dwai homu eyu tama te Rom gavman bidi dabe augwaligo ena nogo si dunama, kalabus beba muani. Tama megı ena tede bidiyu, te eno Godibolo hanalubo po wabo dao, te dage tau somainogo ebo dao.

²Dagego polo odai, te Godigo wiegi yai homu elama, olo tau sabo te kolesaga agai enabolo mani, te eno te dage tau somainogo yai. Eno homu dagego agai ena dali te sę yali po odalio. ³Te Godigo yabo kolesaga po te po polobadu geme dualaluali. Tama te po God agai enabolo ola mani, te agai yabo kolesaga page eno hania konemainogo yai. Tama Godigo tede ena hania ola mani kolesaga eno megı tama pewadage aşəani pogo dagebolo pusali. ⁴Tama dagego eno te aşəani po nedeyu da, teda dagego te bugagia koneaibao, te eno homu kolesaga te hania ula eyu, tama te Krais agai yabo sę po, te polobadu geme dualaluali po, te po page eno hania konea pai, te dagego koneaibao. ⁵Tama te tigidali sogo polobadu Godigo te geme dualali po hania me haninai menio. Tiali goli megı Godigo Mobo Bidi agai te po page te God aga po wagi pabo bidi dabe dali, te Godigo po ola mabo bidi dali sibolo te geme dualaluali po haninama ola mawai. ⁶Te dualaluali po page e dao: dage Juda hani isiąwai bidi hani dagego Godigo wiegi yai gesi po odama, dagego homu kolesaga tigidali te poba munama, tama dage te Juda hani dali wadolama tama da dali deli hani bidibao. Tama tibaso, da te megı e tiwai dao: polobadu Godigo agai te Kraisba augwa homu begi pabo Juda dabe dali dwagi yai sę hauwa yaibao po dą̄ walali. Tama megı Kraisgo yali sęde Godigo te tobage dwagi yai sę te Juda hani isiąwai bage dali me yaibao, te augwa homu agaba begi pali we bidi augwali dali agai te tiwai mu yaibao.ⁱ ⁷Te God agai wiegi yai po eno pusigi pomainogo ena te sęba muai dao. Tama agai te olo tau sabo wiegi yai sę enabolo eyu, tama agai bomo me enabolo mani, te ena dą̄ olama eno te sę emainogo tebo dao. ⁸Tama Kraisgo we bidi tomode te eno nogi augwali tigidali dologode elaluali goli, God agai enabolo olo tau sabo kolesaga eyu, tama agai ena te wiegi yai po pusubo sę gasa we bidi, te Juda hani isiąwai we bidi augwalibolo te po pusumainogo ena te sęba muai. Tama te wiegi yai po page hagede eno augwalibolo te tobage po pusubo dao, te Krais agai da dali ebo olo tau sabo kolesaga te moni genuai mu, tama bidigo te kolesaga konemainogo eyu gegebo usu egobeo. ⁹Tama te tigidali nai nigai God, te hasia mu agai homude aga nosali yabo kolesaga dualai. Tama te homu kolesaga tigidali sogo polobadu aga homude dualaluai. Tama megı agai homu kolesagade dualaluali yabo sę po page eno haninama te tigidali we bidibolo pusumainogo agai enabolo te wiegi yai po pusubo

ⁱ 3:6 Kol 1:26-27

sę mawai. ¹⁰Tama polobadu agai homude yabo sę dualaluai. Tiali goli megi agai te agai po wali pabo we bidibolo haninama ola mani. Te gasa we bidi me augwaligo te Godigo po wali pabo we bidigo pedauwalidu te po odama tama Krais wali peyu tama aga hani bage pedalomainogo eyu, agai aga po haninama ola mani. Tama tebogo augwaligo te Godigo wiegi yai sę ebo kolesaga te dagalude bidibo ensel mobo bidi tobolu bidi dali, te polalubo bidi dabe augwalibolo te wiegi yai ebo kolesaga page waselemainogo yai. Tama te wiegi yai kolesaga page te ensel mobo bidi dabebole tama waselama, tama augwaligo Godigo haniani sę ebode wiegi yai homu kolesaga mu elalubo te augwaligo hania koneabao.

¹¹Polobadu digi dago Genuai Bidi Krais Jisasgo sęde Godigo te wiegi yai homu kolesaga eyu tama tiaibao homu yai. Tama megi agai te yali homu kolesaga wali pelama te sę yali dao. ¹²Tama dago Krais agai te wiegi yai sę ebo suyu, tama dago homu kolesaga tigidali agaba muyu, tama aga dali wadolobaso, tama wi esiayu, homu si esiayu, tama da God pąba olo pabo da. ¹³Tama tiyu dago konebao, te dago hanalu wabo po te Godigo odaibao. Tama tibaso, megi eno te po dagebolo obao, tama dagego odao: tama eno dage tau siyu te dene sabode, te dagego homu kolesaga tede bomo kimi menia pigimio. Menio. Te eno e sę ebode dagebolo genuai nogi mawaibao.

Te Efesus hani tau somainogo, Pol agai Godibolo tau sao po wali

¹⁴Te Godigo agai homugo da Juda bidi hani dali te dage Juda hani isiąwai bidi hani dali te si deliba wadolama te hani deli tiwai elama bidimainu yali. Tama te hani si deliba wadolabo homu yali te homu Godigo polobadu osogo dualaluali. Tama polobadu Godigo dualaluali po page megi eno homude koneboso da, teda eno kidu sugunama God Ayabolo hanalobo dao. ¹⁵Tama da tigidali dagalude me tőde bidibo we bidi hani da wiegi yai bomo dali bidabo ula me te God Aya aga nogode sabo dao. ¹⁶Tama tibaso eno gedu haluasa po e tama wabo dao: “Aya God, nago naga we bidi dali wiegi yai sę yabo homu umabo mu elalubo dao. Tama tiyu, eno homugo nago te Efesus hani we bidi dali dwagi yai sę eyu, tama nago Mobo Bidi agai nago bomo meba selama, tama agai augwalibolo te bomo mao, augwaligo homu bomo ilemainogo, te Mobo Bidigo bomogo augwali dąu mu walomainogo tama tiao,” eno God dali te tobage hanalu wabo po wabo dao. ¹⁷Eno homugo dagego Kraisde konealubo po dąu obaso da, teda te Kraisgo dage tau siyu dage homude wiegi yai kolesaga ola mayu bidaibao. Tama dagego God dali we bidi dali wiegi yai homu eyu godolo ebo kolesaga bugagia emainogo eyu, tama agai dage te sęde tau somainogo eno God dali hanalu wabo po wabo dao. Tama eno homugo dagego te God dali we bidi dali godolo ebo kolesagade te dage dolaluaao, te ni pedali tőde dąu olama te ni dąu weyu dolalubo

tiwai yaibao. ¹⁸Tama tiyu da, te dage me, te Godigo we bidi tigidali me, te dage tigidaligo bomo selama, te Krais agai dage wiegi yai homu eyu godolo mu ebo kolesaga dagego bugagia mu koneaibao. Tama agai tebo kolesaga te genuai mu dao, te bidigo pobesa pabo usu egobeo. ¹⁹Awe, Kraisgo te dage we bidi godolo mu ebo kolesaga tigidali te bidigo kuna bugagia kone palasiabo kolesaga digi, te eno homugo dagego te kolesaga bugagia mu koneao. Tama dagego tama tiyu da, teda dagego ebo kolesaga tigidali te God agai ebo wiegi yai kolesaga naga tiwai pedalobao. Tama eno dagede te homu ebaso, tama eno God dali dage tau sabo po wabo dao. ²⁰Te dago Godigo nogi ugwaba mu sinao. Tama agai te wiegi yai kolesaga ebo bomogo da we bidi tomode genuai s̄e ebo dao. Te s̄e ebo bomogo te da Godibolo hanaluyu gedu haluasa po wabo me, te dago homude ebo kolesaga te tigidali agai aiyaba elaluyu, tama agai wiegi yai kolesagade s̄e ebo te genuai mu ebo dao. ²¹Te dwasianu s̄e menio. Tama tibaso, da God agai po wali pabo we bidi, da Krais Jisasde wadolai we bidi hani dago Godigo genuai wiegi yai nogi ugwaba siyu, te tigidali bidada pabo sogode me, te tigidali sogo te tiwai wiegi yai kolesaga me mu ela pidubadi geao. Te tebo kolesaga me tagaligio. Te mu po dao.

Da Kraisgo tigide dagana sai elalubao, tama dago Godigo kolesagade digi wali pinao

(Dqj 4-6)

**Da Godigo po wali pabo we bidi te Kraisde
wadolama, tama da deli tigi tiwai dao**

4 ¹Te God agai dage Kraisde wadolomainogo agai dage Juda hani is̄awai we bidi i obaso, te eno dagebolo homu hodolobo po megibao. Tama ena Genuai Bidi Krais agai s̄eba munama, tama eno te s̄e eyu, tama augwaligo ena kalabus beba muai goli, eno bomo eyu dagebolo e homu hodolobo mobo mabo po obao. Te dage agai we bidi hani tomoba asomainogo Godigo dage i wali. Tama te sogo agai dage aga usu ni ola mani. Tama dagego agai wali po bugagia wali peyu, te usu niba dolo mu kadu wao. Dagego aga tama wali peyu da, te usu mu dao. ²Dagego tama kolesaga wali peyu, duga digi duga nogi ugwaba sis̄aima, tama imila pai we bidi mu bidiqo. Tama bidigo dage dali dwai kolesaga ebaso da, te dagego te s̄e emainu sulama ton a tagalao, wei sigimio. Tama tiyu, dagego duga abagi dabe dari wiegi yai homu elama godolo mu yao, tama augwaligo mabo s̄eqe te dagego tolao.^{j 3} Tama Godigo Mobo Bidi agai dage homu k̄enai we bidi dabe nigilibaso, te kolesagago agai dage

^j 4:2 Kol 3:12-13

te bonogo kebo tiwai elama tama dage deli hani tiwai mu bidibo dao. Tama tibaso da, dage bomo elama sę dene eyu te deli hani kolesaga dą̄ olá selama bidao. ⁴Tama da Godigo po wali pabo we bidi da tigidali deli tigi tiwai elalubo, tama te Godigo Mobo Bidi me te deli naga bidibo dao. Tama tiwai elalubaso, Genuai Bidi agai da i wali sogo te sogo te po wai, “Te ena ma asobode homu konea paluyu, tama dage ena tonaluao,” te po deli naga dao. ⁵Tama dago Genuai Bidi deli naga elalubao, tama Kraisde dago konealubo po deli naga elalubao, te baptais sabo kolesaga me te page deli digi naga elalubo dao. ⁶Tama te God me deli digi naga bidibo, te da tigidali tqđe hani bidi dabe dago Aya deli aga dao. Tama agai tigidali bidi aiyaba elaluama tama agai nogi dali bomo dali te ugwadu mu elalubao, tama tiyu agai sę tigidali we bidi tomode eyu, tama tigidali bidi tomode bidibo dao.

⁷Te Krais agai da deliba sisinama, tama agai da deli tigi tiwai nigliai goli, tama agai da usu selama, nedama, tama aga homu wali peyu agai da deli delibolo haniani sę yabo homu kolesaga agai dabolo dobawai dao. ⁸Tama polobadu augwaligo Godigo po bukude te Krais agai yabo sęde e tobage po asęani,

“Agai te genuai boi bidi hani nogo dunama,
kalabuside muainu dagalu sigiba mu sela holai dao.
Tama tilama agai wiegi yai nai dabe bidi dabebolo
olo mani,”^k

te po augwaligo polobadu asęani. ⁹Tama te “dagalu sigiba mu holai” po magi baso waliwe? Woo, te page e dao, hasia bolo aga aiyaba mu dulai dao, e tqđa sabolama, tama tqđ tomoba aga dulai dao. ¹⁰Tama hasia dulali bidi, aga me te nosali ugwaba holali bidi dao. Aga holali, te dagaluba holali, tama te dagalu ela soali, te sigiba mu holali, agai te tigidali bulude elalubo sese isławai nai tigidali te ma siminainogo aga holali. ¹¹Tama aga digi agai naga agai te wiegi yai nai dabe bidi dabebolo e tiwai olo mawai: te agai meba bidi augwalibolo Godigo po sela pelama pusigi pabo sę yabo bidi nigliai. Bidi me badubolo agai wabo po ola mabo bidi te sęba muai. Bidi meba augwaligo Godigo wiegi yai po pusa mabo sę yabo bidi nigliai. Tama me badu bidibolo te Godigo we bidi hani tonalubo sę dali te Godigo po ola mabo sę dali emainu agai te sę augwalibolo mawai dao. ¹²Tama agai dabolo te haniani wiegi yai sę yabo homu kolesaga magi baso dobabo dawe? Te Godigo we bidi hani augwaligo we bidi tau sabo sę ebode bugagia sisi elama bidimainogo agai tebo dao, te Kraisba augwa homu tigidali muai we bidi hani augwali Krais aga tigi tiwai bidiyu, augwali geninama eyu bomo siyu bugagia bidimainogo agai te dwagi yai sę yabo homu kolesaga dabolo tama dobabo dao. ¹³Tama tiyu,

^k 4:8 Tib 68:18

tama we bidi tau sabo wiegi yai sə dago me ela pidubadi geyu da, teda da tigidaligo bomo yai homu Kraisde dą̄ wabo sə deli homu kolesaga naga mu eyu, tama dago Godigo Ogwa bugagia konea silimainogo tiyu dago deli homu kolesaga naga agade mu yaibao. Tama tiyu, te da Godigo hani we bidi mu pedalaibao. Tama tiyu, da Godide wiegi yai kolesaga ebo we bidi mu te Krais aga tiwai mu elama bidaibao. Tama aga dago usu ni mu tiwai da, agai usu niba dolo pedaliyu da, teda da aga dali usu mu yaibao.

¹⁴Tama da Godigo hani we bidi mu bugagia pedalama, tama te Godigo pode da te homu subigila pabo wai puluba tiwai ma bidigobeo. Te eno po digi po me megı obao. Te geba, te geba moni sigi ağıdu pobadi, wali asiyu te ağı dini me te bomo yai wali me augwali sigo te geba subigila bega səyū sela səbō dao. Tama te tiwai bidi muma sabo tibo po wabo bidi augwaligo ili po weyu, tama bidi hauwa augwaligo homu polo tulalubo dao. Tama tiyu, te bidi muma sabo bidi augwaligo te we bidi te gasa dwai sə ebo tuba kegebo dao. Tiali goli, da Godigo hani we bidi mu bugagia pedalama bidibaso, tama te bidi muma sabo dwai bidi dabe augwaligo wabo tibo pogo da tulalugobeo. ¹⁵Te menio. Da Godigo we bidi hani tomode dena abagi dabe augwali dali wiegi yai kolesaga eyu godolo mu elama, tama Godide mu po naga wao. Tama tiyu, tama da te tobage wiegi yai sə idubadi, tama da Kraisde mu dą̄ waibao. Aga te dago tigigo tobolu bidi aga deli dao. ¹⁶Tama aga te dago tobolu bidiyu, tama da agai tigi tiwai bidibaso, teda agai da nogo səgə gedu tigide elalubo te tigidali agai tonalubo dao. Tama aga da tigidali tonalubaso, tama da tigidali bugagia deli tigiba wadolama, tama te dili dabe wadolobo nai augwaligo te tigi deliba bugagia dą̄ wabo dao. Tama dago tigi deli badu sə ebo augwa hasi tau sabo sə ebo si, tama te tebo kolesaga te tigigo ebo wiegi yai kolesaga genuai eyu, tama te wiegi yai kolesaga eyu godolo mu ebaso da, tama te tigi genuai bomo selama wiegi yai mu pedalobo dao.¹

Godigo po wali pabo we bidigo wiegi yai gesi kolesaga wali pao

¹⁷Tama tibaso, eno po me deli dage dali wainu obao. Te ena da Genuai Bidigo po wabo bidi bidibaso, dage tau somainogo eno te po bomo elama obao. Odiqo. Dagego te Godigo po odisəbo bidi dabego ebo kolesaga munu me ma wali pelamo dao. Augwaligo homu kolesaga da te olo habuge naide naga te homu ebo dao. ¹⁸Tama tiyu augwaligo homu kolesaga dwai eyu, be hulia sabo tiwai ebo dao, augwaligo ebo homu te kedu meni yai homu kolesaga dao. Tama te Godigo mabo bidadu pabo ula augwaligo sogobeo. Magi baso meni. Augwaligo bomo elama konebo hagela homu eyu, tama augwali munu me konesiąyu bidibo dao. ¹⁹Augwaligo te haniani dwai dwai kolesaga ebo tomoba mu peyu tama

¹ 4:16 Kol 2:19

augwaligo homu mu hodaloyu tama dwai meda yai haniani kolesaga mu ebo dao. Sesemane sogo augwaligo te sə yaio homu ebo dao. Tama tiyu tama augwali hale munu me ebo menio.²⁰ Tialima, dagego te tobage dwai sə emainogo gasa bidi dabe augwaligo te Krais aga kolesaga page dagebolo ola mabeo. Te tiwai si menio.²¹ Tama augwaligo dagebolo agade po olama, tama dagego mu odali. Tama dage Jisasde wadolama, tama augwaligo agade mu po dagebolo ola mani dao.²² Te mu po da wali po e tiwai dao: polobadu dagego duga dwai dwai sə yabo homu kolesagade biliyu bidai dao. Tama te sogo te dwai homu kolesagago dage tonaluyu, tama dagebolo te dwai dwai sə yao po weyu yai. Tama tiyu, te dagego te dwai sə ebode godolo emainogo tama te dwai sə yabo homu kolesagago tibo po weyu, dagego homu hodolai dao, tama dage te dwai sə ebo tudu pai dao. Tama te dwai sə ebogo te dwai sə yabo homu kolesaga doloyu yai. Tialima megı dagego te polobadu yai dwai homu kolesaga mu sela sayao.^m ²³Tama tilama, dagego homu kolesaga dali mobo dali wiegi yai gesi mu ma pedalama bidiao. ²⁴Tama dagego dwai meda yai kolesaga ebo tagalama, tama dagego wiegi yai gesi kolesaga eyu tama dage te gesi noma bidi tiwai pedalao, te aga tigi wə paluai bidigo aga gesi ugwa gudubogia tiwai yao. Tama dage te gesi noma bidi tiwai pedaloyu, tama God aga digi agai te dage gesi noma bidi nigali, tama dage God aga homu kolesaga tiwai mu pedalainogo nigali. Tama tibaso, gasa we bidi augwaligo dagego Godigo po odoyu bidibo sumainogo te dagego bugagia bidiao. Tama tiyu, dage gasa we bidide te wiegi yai dolo mu kolesaga naga eyu, tama God agade te dagego aga pabo tudu naga peyu yao, aga gedude doloba pai we bidi mu bidiao.ⁿ

²⁵Te God agai dage te gesi noma we bidi nigaligo da, teda dagego dwai tibo po wabo kolesaga tagalama tama munu me egimio. Te menio. Tama dage tigidaligo duga hasi tomode mu po naga wao. Magi baso meni.

Dagego koneani, da tigidali te deli tigide naga wadolama bidibo dao.^o

²⁶Tama me sogo dagego homu səbə eyu da, teda dua dao, te dagego səbə ebo homugo dage te dwai sə ebo kolesaga tomoba kekeidali weyu. Tama te giliga piode dega sigi pisiabadi te homu səbə polo tagalama silao.^p

²⁷Dagego tisiawani da, te səbə me elalubadi, tea te dwai haubo noma bidi dabe augwaligo toboli bidi tebolo te dagego sunumi dalaibao, agai dage dwai sə tomoba kegaibao. ²⁸Tama te polobadu nai wi sidu geai bidi agai te nai wi sabo sə tagalama silao. Megi aga digi doloba pai sə yao. Tama agai aga digi nai sabo sə aga nogogo digi eyu, tama aga digi tau siyu, te nai meni yai we bidi me tau siyu yao. ²⁹Tama dagego dwai meda yai po me wagio. Menio. Dwagi yai po naga weyu, te bomo kimi meni yai we bidi augwali bomo somainu te bomo mabo po wabo usu dao. Tama

^m 4:22 Kol 3:9 ⁿ 4:24 Kol 3:10; Gag 1:26 ^o 4:25 Sek 8:16 ^p 4:26 Tib 4:4

tiyu, dagego te Godigo olo tau mabo wiegi yai kolesaga te dagego po odobo we bidibolo tama mao.³⁰ Tialima dagego tisiawani da, dwai meda yai po weyu da, teda dagego te Godigo Mobo Bidi dwai homu dene mu ilaabao. Tama te dwali dao. Te Godigo Mobo Bidi aga wiegi yai tedali mu dao. Tama God agai dage ma dobola sai hagede te dage hagea siyu sa mumainogo eyu agai dagebolo aga Mobo Bidi mawai dao. Tama te Godigo Mobo Bidi dage dali bidibaso, dagego mu konebao, te God agai dage olo mu bidabo bidi nigelabo sogo te nosali mu pedalaibao. Tama tibaso, dwai po weyu aga dwai homu dene mu iligio.³¹ Tama dagego boi bidi homu ebo me, te wado po weyu tama homu səbə ebo me, te genuai po daga wabo me, te posobo po me, te moni dwai homu ebo me, te tigidali dwai kolesaga ebo tagaliyu sela sayao.³² Te tobage dwai kolesaga munu me egimio. Te menio. Tama dagego duga ama dede dali deli homu eyu dwagi yai tau sabo sə yao. Tama duga hasi dali homu dene eyu, augwali godolo mu yao. Tama duga hasigo dwai sə dagebolo ebaso da, teda dage səbə egio, te dagego augwali godolo mu eyu augwaligo yali dwai sə sela sayao. Te Krais agai dage tau selama tama Godigo dagego yali dwai sə səge sela sawai dao. Te tiwai kolesaga dagego me tiao.⁴

Da wiegi yai kolesaga ebo ulade bilao

5 ¹Te God agai dage godolo mu eyu dage aga wai puluba nigaligo da, teda dagego agai ebo kolesaga tiwai wali bugagia pao. ²Tama tiyu, dagego duga hasi godolo mu ebo kolesaga eyu, tama dagego yabo sə tigidali ebo si te kolesagago dage tonalumainogo, te Kraisgo da godolo eyu wiegi yai homu ebo tiwai gilama. Agai da godolo eyu, tama aga digi aga bidabo ula da hagede tagalama, tama augwaligo aga isilali. Tama tiyu, agai aga tigi te Godibolo olo mani, te polobadu bidali bagego Godibolo mani wiegi yai denami ebo nai mani tiwai yai dao. Tama te səde God aga Kraisde dwagi yai homu ebo dao.^r

³ Te God agai dage aga hani we bidi nigaligo da, teda te penani ebo kolesaga me, te dwai dwai meda yai kolesaga me, te mena gasa bidigo nai pesa eyu godolo ebo kolesaga tigidali, te tebo dwai kolesagago ebo sə dwasianu munu me dage tomode te pedalamuo. Gasa we bidi dabe augwaligo dagego te tobage dwai kolesaga yali po waidali weyu, tama dagego doloba peyu bidiqo. ⁴Dagego dwai meda yai po me, te homu kolesaga meni yai bagego wabo po me, te dwai gagali po wabo me, te po dabe dagego wagio. Te tebo kolesaga usu egobeo. Menio. God agai dage tau sobaso, tama dagego agabolo usu da wabo po weyu da, teda te po usu dao, te tobage po wao. ⁵Dagego gisiga mu koneao, te penani ebo bidi me, te dwai dwai meda yai kolesaga ebo bidi me, te mena gasa bidigo nai

^q 4:32 Kol 3:13 ^r 5:2 Sai 29:18; Tib 40:6

godolo eyu pesa ebo bidi me, te tobage dwai sę ebo bidi dabe augwali Krais dali God dali sigo tonalubo we bidi hani tomoba munu me pogobeo. Tama te nai godolo eyu pesa ebo kolesaga, te kolesaga da te tibo godibolo lotu po wabo sę tiwai dao, te naiba te bidigo aga homu tigidali muani.

⁶Dage bugagia dua dao. Tiyu dage te gasa bidigo agai dage te dwai kolesaga tomoba kekainogo eboso da, agai wabo kedu meni yai po wali pelamuo. Te eno tamadi wali dwai kolesaga ebode te Godigo agai po sela sębo bidi dabe dali sębę yaibao. ⁷Tama tibaso, dage augwali dali kisa selama tama te hai namu tiwai si elamo dao. ⁸Te polobadu dage dwai kolesaga ebode biliyu tama dage be hulia side bidibo tiwai yai dao. Tiali goli megi dage te Genuai Bidide wadolama, tama agai dage wiegi yai ulaba munama bidibao. Tama tibaso, dagego wiegi yai kolesaga naga eyu dage te ula yai we bidi tiwai bidiqo. ⁹Tama te gide bulali nai bugagia holama, tama geninama walobo gilama tama te tiwai me te ulago agai te tigidali dwagi yai kolesaga ebo me, te doloba pai kolesaga me, te homu mu sai wiegi yai kolesaga, te tigidali hania bugagia ugwaba hanilama pedalobo dao. ¹⁰Tama te ula yai we bidi bidiyu, dagego mena tiwai kolesaga eboso te Genuai Bidi God aga dwagi yai homu ilabo kolesaga dagego usu sela suo. ¹¹Tama dagego te dwai kolesagade biliyu hulia side bidibo bidi dabe augwali dali hai namu olama augwaligo te ebo kolesaga egio. Te tiwai kolesaga ebogo te nai dwagi yai me walogobeo. Menio. Te kolesaga da te hulia sai kolesaga dao. Te egimio. Te kolesaga ebo page dagego hania bugagia ugwaba haninama pedalao, tigidali we bidi augwalibolo ola mao. ¹²Me ma, eno augwaligo geme dualama ebo dwai meda yai kolesaga po pusugobeo. Menio. Eno augwaligo te tobage dwai dwai kolesaga ebode po wagi sogo da, teda eno pedauwali sege eyu hale naga egi dao. Magi baso meni, te dwai dwai sę ebo po pusainogo ebo te usu menio. Eno dage dali te sede po mibo hagalabo. ¹³Tiali goli, tigidali ebo kolesaga te ulaba sela mubo si, teda te kolesaga page tigidali hania haninama elaluaibao. Tama te haniani nai tigidali, te ula elalubo tiwai yaibao. ¹⁴Tama tialigo da, te po me elalubao:

“Nage pila mubo bidi, hodaloao, tama nage te gu
pagede ma hodaloama, tama Krais agai wiegi yai
ula nage mawaibao.”

¹⁵Tama tibaso, dagego duga bilibo bugagia tonaluyu bilao. Dage bilibo te kolesaga meni yai bidi tiwai biligio. Menio. Dage bilibo te kolesaga koneai we bidi bilibo tiwai bilao. Tama tiyu dagego wiegi yai kolesaga naga yao. ¹⁶Tama megi da, te we bidi hauwa augwaligo dwai sę ebo sogo dao. Tialima, megi da, te dage Godigo kolesagade bilibo sogo dao. Tama tibaso, te dwagi yai sę yabo sogo dagego olo gesegeliyu tagaligimio.^s

^s 5:16 Kol 4:5

¹⁷Tama dage te kolesaga meni yai we bidi tiwai biligio. Te menio. Dagego mena tiwai kolesaga ebaso te Genuai Bidi God aga dwagi yai homu ilabo kolesaga dagego usu selu suo.

¹⁸Te dage te bomo yai aji hauwa tulama te polobo bidi tiwai egimio. Menio. Te tebo kolesagago dageba daganama dolainogo ebo dao. Dagego God agai wiegi yai Mobo Bidigo dageba daganama tonalumainao, te dage bugagia bidimainogo yao. ¹⁹Tama tiyu, dagego duga hasi duga ama dedego noma bidi mobo daqumainogo, dagego haniani dwagi yai balia po wao. Tama te lotu balia wabo buku nogi Sam, te bukude elalubo Godigo nogi uwgaba sabo po me, te Jisasgo nogi uwgaba sabo təqabi po me, te po tama duga ama dedebolo wao. Tama tiyu, bomo eyu te dago Genuai Bidibolo me aga nogi uwgaba sabo balia po dali lotu təqabi po dali wao. ²⁰Tama te tigidali sogo te dageba pedalobo tigidali sede te dagego God Aya dali usu da po wao. Te dage te dago Genuai Bidi Jisas Kraisde wadolobaso, God dali usu da po wao.^t

Polgo te we sabo sede da bugagia dodolobo po wali

²¹Te bidi Krais agai genuai nogi mu elaluama, tama dagego duga digi aga dologoba muani obaso, duga hasi dali duga ama dede dologode bida.

²²Tama tiyu, te we dabe sibi deli deli dagego duga bidigo po bugagia wali peyu, te dagego te Genuai Bidi Kraisgo po wali pabo tiwai gilama te duga bidigo wabo po wali pao, augwali dologode bidiqo.^u ²³Tama Krais aga te aga po wali pabo we bidide tobolu bidi bidibo gilama, tama bidi me aga wede tobolu bidi bidibo dao. Te agai po wali pabo we bidi te agai tigi tiwai, tama Krais aga digi augwali ma dobola sabo bidi dao. ²⁴Tama tibaso agai po wali pabo we bidi te Krais aga dologode bidibo gilama, te tiwai dage we dabego me tama naga tiyu, sesemane sogo dagego duga bidigo po bugagia wali peyu duga bidi dologode bida.

²⁵Tama bidi dabe deli deli, dagego duga we dabe dali abagi dao homu eyu, godolo mu yao, te Kraisgo aga po wali pabo we bidi godolo mu yaligia tiwai yao. Agai da godolo mu eyu, aga bidabo ula tagalama da tau siyu aga te ni pedaide elama isai dao. Tama agai da dali godolo eyu tau sabo homu tiwai dagego duga we dali tama naga tiao.^v ²⁶Tama Krais agai tama tiali te aga po wali pabo we bidi hani agai augwali Godibolo mawainogo agai augwali aji telawali te meda meni yai pedaliyu, tama agai pogo me augwali tedali gasagi yai nigelili. ²⁷Tama Krais agai homugo aga po wali pabo we bidi agai gedude augwali te wiegi yai mu pedalomainu yali. Tama augwali te husugwa sai me, bedogola sai me, te tiwai elaluidali weyu, tama augwaligo te magi dwai se me esiyau wiegi yai kolesaga naga eyu bugagia mu bidimainao. Te homu Kraisgo

^t 5:20 Kol 3:16-17 ^u 5:22 Kol 3:18; 1 Pi 3:1 ^v 5:25 Kol 3:19; 1 Pi 3:7

aga po wali pabo we bidi dali yai.²⁸ Tama dage bidi dabego duga we dabe augwali dali wiegi yai kolesaga eyu, augwali godolo yao, te dagego duga digi duga tigi dali wiegi yai homu eyu godolo ebogia yao. Aga we godolo ebo bidi, te aga digi aga godolo ebo dao.²⁹ Dago koneai, te bidi mego aga digi aga tigi dali boi bidi homu ebo meni. Te menio. Agai aga tigi nai mayu, bugagia tonalubo dao, te Kraisgo aga po wali pabo we bidi dali ebo gilama.³⁰ Da te nogo, ságä, gedu te nai dabe te Kraisgo tigi dagi tiwai dao.³¹ Tama te Godigo po aseai bukude te po me deli wai, “Tama tibaso, te bidigo aga ida aya taga soyu, tama aga we dali dagana selama, deli tigi gagawai pedalobo dao.”^w³² E po tomode te genuai geme po digi po page tede elalubo. Tama ena digi eno homugo te Krais dali aga we bidi dali po page hanilibao.³³ Tiali digi agai dage deli deli bidi dali me te po wali, “Nago naga tigi dali dwagi yai homu eyu godolo mu ebogia, nago naga we dali dwagi yai homu eyu, godolo mu yao.” Me ma, we dabe dagego duga bidigo nogi ugwbaba selama augwali dologode bida.

Te bidi Polgo ida aya me wai dabe dali po wali

6 ¹Dage wai dabe dagego te Genuai Bidigo po wali pobaso, te ida ayago wabo po wali pao. Te tama tebo kolesaga te dolo dao.^x ²⁻³ Te Godigo po weyu, tama Mosesgo bukude aseani po tiwai, “Te duga aya idago po wali pao. Tama te po mobo te wali peyu da, tama dage bugagia mu bidiyu, e tøde hauwa sogo bideibao,” te po wai. Tama Godigo te po bomo eyu, däü walai. Agai te mobo po hauwa weyu, te e po dali te däü wali po hasia wadolali.^y

⁴Tama dage aya dede dagego duga wai dabe homu hodolama augwali sëbë emainogo elamu. Menio. Dagego te Genuai Bidigo po wali peyu, tama augwali bugagia tonaluyu, tama agai po augwali ola mao.^z

Te bidi Polgo te olo së ebo bidi dabe dali, te së tonalubo bidi dabe dali augwali side po wali

⁵Dage olo së ebo bidi dabe, dagego duga së ebo tonalubo bidide wi eyu, augwaligo po wali peyu augwali dologode bida. Tama tiyu, homu mu eyu, dage deli deligo te homu yao, ‘Eno yabo së te Krais tobade yaibao.’⁶ Tama te homu eyu duga së yao. Dagego së ebo tonalubo bidigo dagede dwagi yai homu emainogo augwaligo dage tonalubadi naga dagego së bugagia egio. Te menio. Te homu mu eyu, te dage Krais agai olo së ebo bidi dabe bidiyu, tama Godigo homu kolesaga wali peyu bida. ⁷Tama dagego dwagi yai homu eyu, së yao. Te së te bidide naga ebo menio. Te menio. Te dagego duga së te Genuai Bidi Krais agade yao. ⁸Dagego koneani, bidi me deligo dwagi yai së eyu da, Genuai Bidigo dwagi yai nai

^w 5:31 Gag 2:24 ^x 6:1 Kol 3:20 ^y 6:2-3 Sai 20:12; Bom 5:16 ^z 6:4 Kol 3:21

mawaibao. Agai te olo sę ebo bidi dali me, te gasa bidigo sę isiabo bidi dali me te sę naga yaibao.^a

⁹Dage te olo sę ebo bage mu abelai bidi dabe, dagego odao. Dagego augwaligo sę ebo tonaluyu, dagego me Godigo homu kolesaga wali peyu te tiwai kolesaga naga augwali dali yao. Dagego augwali wi ilibo kolesaga tagalao. Dagego koneani, te Genuai Bidi aga dagalude bidibo, tama aga da te augwali olo sę ebo bidigo Genuai Bidi me, te dagego Genuai Bidi me bidibao. Tama agai tigidali we bidi deli usu nigo naga usu sabo dao.^b

Godigo we bidi te enesigi bidi tiwai dao

¹⁰Te eno po silagasu wabo po e dao: dage te Genuai Bidi Krais agade wadoloyu, tama dagego agai genuai bomo meba siyu, tama dage bomo eyu bida. ¹¹Tama eno dagebolo hwịbo po digi po begelama megı obao. God agai dagebolo te duga tigi duala sabo nai mobao. Tama dagego bomo eyu, te dwai haubo noma bidi Satango geme dualama ebo dwai kolesaga tigidali te aiyaba elaluyu, dage bugagia dolalumainogo eyu, tama dagego te tigi duala sabo nai tigidali selama tigide muao. ¹²Magi baso menio. Te da Krais wali pabo we bidi hani, dago te dwai sę ebo kolesaga dali hwịyu tama dago e tqde bidibo bidi dali hwịbo meni. Dago te dwai sę ebo kolesaga dali hwịbadi, tama dago te dwai haubo noma bidi ugwdadu te dagalude bidibo bage dali me hwịbo dao. Augwali da te megı hulia side dwai sę ebo tobolu bidi dabe me, te polalubo bidi dabe me, te we bidi tonalubo dwai noma bidi dabe dao. ¹³Tama tibaso, Godigo dagebolo mabo tigi duala sabo nai megı duga tigide muao. Tama tiyu, te augwaligo dage dali dwai sę ebo sogo pedalobo si, te dage bomo elama augwali dali hwịdu gelama, tama aiyaba elaluama, tama dage bomo yai bidi mu me dolaluabao, wi pogobeo.

¹⁴Awe, dage e tama tiwai dola selama dolaluao. Dagego Godigo mu po te duga kugulu tiwai gudulama, tama bugagia dąu olama, tama te doloba pai wiegi yai kolesaga ebo te dagego duga hagawia sesela sabo nai tiwai abiao.^c ¹⁵Tama te enesigi bidi agai te hwịabo sisi elama, tama saçadə mubo nai nadoba mubo dao. Tama te tiwai dagego te Godigo dwagi yai gesi po mu konealubo kolesaga bugagia dolasa elaluao, God agai gasa bidi dali dwagi yai homu yabo po.^d ¹⁶Tama enesigi bidi agai aga sabei abibo tiwai tama dagego Godide konealubo po tigidali sogo abilasa bilao. Tama tiyu, te sabei te boi bidigo sia dage ponai ene dabe selā sawaibao. Te boi bidi nogi te Satan dao. ¹⁷Te Godigo dage polo ma dobola sai dao. Te homu ebo kolesaga te kapago nigai tobolu madi tiwai selama,

^a 6:8 Kol 3:22-25 ^b 6:9 Bom 10:17; Kol 3:25; Kol 4:1 ^c 6:14 Ais 11:5; 59:17

^d 6:15 Ais 52:7

tobolude muao. Tama dagego te Mobo Bidigo bobobage poa pai hwą ge tiwai te Godigo te bukude aşəni po bugagia odama, sao.^e ¹⁸Tama tiyu, tigidali sogo dagego po God dali wao, agai dage tau somainu yai. Tama te Godigo Mobo Bidi agai dage bomo mayu, tego Godibolo po wao. Te sę yainu, dage pila mugimio, hodaluao, nolq isiąbo aq egimio. Te sę munu me tagaligio. Tigidali sogo dagego gedu haluasa po Godigo we bidi tau somainu wao. ¹⁹Dagego po Godigo ena me tau somainu wao. Eno homugo dagego po e tama omainogo obao: God agai eno pedauwalide po mumainogo, tama eno te wi ebo homu aiyaba kęna sigulumainu, tama te Godigo wiegi yai pogo geme dualali po page bugagia pusumainu agabolo po wao. ²⁰Ena da te Godigo dwagi yai po pusubo bidi. Tama te tebo pode te ena kalabuside bidibao. Tama tibaso, ena te wi ebo homu aiyaba kęna sigulumainu tama ena te bomo elama te Godigo wiegi yai po pusumainu dagego God hanalu wabo po wao.

**Te bidi Polgo Godiba hanalu te augwaliba wiegi
yai sę emainu augwali tobalobo po wali**

²¹Te bidi Tikikus aga te dago ama mu tiwai, tama aga te Genuai Bidigo dwagi yai sę ebo bidi dao. Tama agai te eno ebo sę po tigidali dagebolo pusagasomainu te bidi eno megi aga dage bidibo digi tagala palobao. ²²Tama eno aga dage bidibo digi tagala paliyu, da ede mena tama bidibo wenama tama agai pusaibao, dagego homu dąu walomainu tama yaibao.

²³Te eno ama dedeo, eno homugo dago Aya God me, dago Genuai Bidi Jisas Krais me, augwali sigo dagego homu dua nagame ilao, tama augwaligo dagebolo te godolo mu ebo kolesaga me, te konealubo po dąu wabo kolesaga me mao, te eno homugo. ²⁴Te eno homugo me, Godigo agai olo tau mabo kolesaga te dago Genuai Bidi Jisas Krais godolo mu eyu aga me tagalisąbo we bidi dabe tebolo te olo tau mabo kolesaga mao. Tama dao. Ena da, Pol da.

^e 6:17 Ais 59:17

Polgo Filipai Dabeba Pas Aşənəi

Hasia nedebo tau sabo po

Te bidi Pol polobadu hasia sogo te tamu aji nogelama, te bulu Grik moni tō pedai tomoba pelama, tama te Filipai moni hanuba sabolama, tama tede Kraisgo po pusa mani. Tama elama tama Kraisgo po wali pabo we bidi hani pedalali, te bulu Masedonia genuai tō pedaide dao. Te po da te buku nogi Tagala Palai te Dāj 16:8-15, tede elalubo suo. Tama nosali Pol gasa hanuba me bidigi pai elalubadi, te augwaligo aga kalabus hadabu ilali. Te aga kalabuside bidali sogo agai odali, te bidi mebago te Filipaide bidibo Godigo po wali pabo we bidigo konealubo homu dolobo po wabo odali. Tialima dago te pas Polgo aşenama te bulu Filipai haniba tolali pas nedebo sogo da, dago suali, te nai dabego te bidi Pol haliga sege yabo sə me ilibeo. Menio. Agai konealubo homu Jisasde mu kəq̄ pelama elalu, tama aga homu pemene idu bidai dao.

Te Pol aga te kalabus bede bidibadi te mone me doado bage habuge yai elalubo po obaso, tama te Filipai bage augwaligo te Pol tau sabo mone ge sisinama, tama te bidi Epafroditus aga nogoba te mone munama tama Pol bidibo digiba tagala palali. Tama Epafroditus te Filipai buluba geasa ma pobaso, Polgo augwalibolo puba hwi po omainogo eyu, e pas aşenama tama agabolo mani. Polgo te Kraisgo po wali pabo we bidi homu bomo mabo po aşənəi. Te Juda dabego bomai po dologoba pigio wali. Agai te dene me sege dari elalubao, tiali goli aga dwagi yai homu pemene eyu bidibao. Aga homugo Godigo aga tau siyu tama aga kalabus tamadi silaibao.

**Te Filipai dabego Pol dali hai namu elalubaso, tama Pol
wiegi yai pemene mu yai**

(Dq̄i 1-4)

1 ¹Ena da Pol dao. Tama ena dari Timoti da si Krais Jisasgo sə bidi, da sigo e po te dage Filipai hanude bidibo Godigo po odobo we bidibolo aşənə tolobao. Dage Krais Jisas dari wadolama bidu, tama e pas dagebolo me, te dage tonalubo bidi dabebolo me, te tonalubo sə tau sabo bidi dabebolo me, te dage tigidali Godigo po odobo we bidibolo tolobao. ²Eno

homugo dago Aya God dali dago Genuai Bidi Jisas Krais augwali sigo dage dali te olo tau sabo kolesaga eyu, tama dage homu nagamea peyu bugagia bidaio.

Polgo augwalide Godibolo buba hwi po wai

3-5 Te polobadu hasia sogo ena dage bidibo digi sabolama, tama eno dagebolo Godigo wiegi yai gesi po pusulama, tama dagego te po homugo selama, tama Godigo we bidi hani dage pedalalali. Tama te sogo gagalama, eno te gasa bulu we bidibolo te Godigo po pusubo sę eyu, tama dagego ena tau siyu bididuai dao, tama megı me dagego tama tibo dao. Tama tibaso, eno dage dali dwagi yai homu pemene eyu, eno homugo dage ma kone palobo sogo tigidali te eno Godibolo nage usu da po dagede wabo dao. Tama Godigo dage tau somainogo eyu, eno agabolo hanalu wabo po wabo dao. 6 Tama tiyu, eno homu si menio, eno mu koneai, te God agai dage deli deligo homu tomode te dwagi yai sę gagalama, tama te sę ela peyu, mu ela pelama, tama Krais Jisas tqba ma asobo side naga agai te dagede ebo dwagi yai sę silaibao. Te eno mu koneanio. 7 Tama tigidali sogo eno dwagi yai homu eyu dagede homugo konea palobo dao. Tama eno dagede dwagi yai homu ebo te dolo naga dao. Magi baso meni, God agai ena dali dwagi yai sę elama, tama agai po pusubo sę eno nogoba mani. Tama tigidali sogo eno te sę ebadi, te dagego ena tau sai dao.

Polobadu ena kalabus menibadi eno te Godigo pode boi bidi homu ebo bagego po aiyaba elaluabo po wabo sę yai. Tama tiyu, eno te gasa we bidi tau sali, augwaligo augwa homugo Godigo po bugagia dąu omainogo yai. Tama megı ena kalabuside bidibao. Polobadu me, megı me, te tigidali sogo dagego ena te sęde tau sai dao. Tama tibaso, eno dage dali kone palobo si ena dwagi yai homu ebo dao. 8 Awe, eno dage dali dwagi yai homu moni pemene eyu, bomo elama godolo mu ebo dao, te Krais Jisas agai aga digi tiwai gilama ebo dao. Godigo koneai, eno tede mu po naga obao.

9 Te Godigo dage tau somainogo eyu, eno agabolo hanalu wabo po wabo dao. Tama tiyu, eno homugo agai dage tau siyu, tama dagego duga hasi we bidi dali dwagi yai homu eyu godolo ebo kolesaga te geninama mu pedaluyu bididuaio. Tama eno homugo me te dagego te mu po page tigidali hania kuna koneama, tama dagego te dwagi yai kolesaga me dwai kolesaga si bugagia dagalabo homu kolesaga mu elaluabao. 10 Magi baso meni, dagego te kolesaga dagalabo homu kolesaga elalubaso da, teda dagego te tigidali kolesaga osola sulama, tama te wiegi yai mu kolesaga sabo usu yaibao. Tama tiyu da, teda te Krais aga tqba ma asobo sogo tonalubadi dage meda meni yai me, sęgę sisławai we bidi bidaibao. 11 Tama Jisas Krais agai naga pedalabo dolo mu yai kolesaga augwali dagede geninama pedalama, tama dagego ebo kolesaga tigidali te tiwai

naga elaluaibao. Tama tebogo Godibolo bomo yai ula dali genuai nogi si mawaibao. Eno dagede te homu eyu, Godibolo gedu haluasa po wabo dao.

Pol kalabuside bidali, tebogo te Godigo po pusubo sə tau sai

¹² Eno ama dede, eno homugo dagego hania koneao, te enade ede polo pedalali sə, te augwaligo ena kalabus muani sə, te sə ebogo ena te Godigo po pusubo sə tagalamainogo eyu usu ebeo. Menio. Te augwaligo ena kalabusiba mubaso te Godigo po pusubo sə ela pomainogo tiwai, te gasa we bidi augwali te po odisawani bage, te augwaligo me te po odai dao.

¹³ Tama tibaso, megı te gavman tuni bidigo be tonalubo enesigi bidi dabe augwali tigidaligo koneai, ena Kraisgo sə ebo bidi bidibaso naga, ena e kalabus bede bidibao. Tama gasa ede bidibo we bidi tigidali augwaligo me te koneai.^a ¹⁴ Tama ena e kalabus bede bidibaso, dago ama dede meba hauwa augwaligo bomo te dago Genuai Bidide selama, tama wi ebo kolesaga tagaliyu bomo elama, te Godigo po pusubo sə megı bugagia ebao.

¹⁵ Awe, eno koneani, augwali mebago konila weyu, eno nogide dwai homu eyu, tama eno nogi aiyaba elalubadi tama augwa nogi ugwaba momainogo eyu, tama augwaligo we bidibolo Kraisgo po pusubo dao. Tiali goli dago ama dede me badu augwaligo enade dwagi yai dolo homu eyu, Kraisgo po te we bidibolo pusubo dao. ¹⁶ Augwaligo ena dali dwagi yai homu eyu godolo mu ebo kolesaga ebaso, augwaligo Kraisde po pusubo dao. Magi baso meni, augwaligo koneai, te Godigo pode boi bidi homu ebo bagego po aiyaba elaluabo po wabo sə, te sə Godigo enabolo mani. ¹⁷ Tiali goli u bage augwaligo eno nogide dwai homu ebo bage, augwaligo me Kraisgo po we bidibolo pusubo dao. Tialima augwaligo homu mu esiąyu, tama Krais po pusubo dao. Augwaligo eno nogi aiyaba elaluama, augwa nogi ugwaba sabo kolesaga naga eyu, tama e homu ebao, ‘Te dago Kraisde po te we bidi dabeebolo pusuyu da, teda Pol te kalabuside bidibadi aga homu dwai mu ilaibao,’ te homu augwaligo ebo dao.

¹⁸ Magigo meni. Bidi mebago ena dali dwai homu eyu, augwaligo Kraisde po te we bidibolo pusubo dao. Bidi mebago me te homu mu eyu, te we bidibolo Kraisde po pusubo dao. Awe, usu dao, po meni, augwaligo Kraisde po pusubaso eno dwagi yai homu mu ebao. Tama eno dwagi yai homu mu eyu tama bididuaibao. ¹⁹ Magi baso meni, eno mu koneai, dagego ena tau somainogo gedu haluasa po wabogo me, te Jisas Kraisgo Tedali Mobo Bidigo tau sabogo me, te sigo ena tau selama, tama te ena kalabusiba muani bage augwaligo ena olo tagala palaibao.

^a 1:13 Tpi 28:30

²⁰Tama eno dwagi yai homu elama, tama eno te kolesaga mu pedalaibao olama tonaluyu, tama me eno te kolesaga pedalomainao homu mu ebao, te kolesaga e dao: eno homugo te Godigo ena mani sede ena munu me tulalugobeo. Menio. Eno homugo te tigidali sogo, te meg i tama me, te ena bomo selama wi esiyu, tama eno tigigo me eno homu kolesagago me te eno te Krais te we bidibolo ola mayu, tama augwaligo agai nogi uwawa saibao. Tama homu eyu, te ena me bidibogo ma ena isibogo, tebogo agai nogi uwawa somainao. ²¹Magi baso meni. Eno homu tama tiwai: ena e tqde me bidiyu da, teda ena Krais dali homugo keq pai bidi mu bidaibao. Ena isiyu da, teda ena wiegi yai mu bugagia bidaibao, tebogo e tqde bidibo aiyaba mu elaluaibao. ²²Tiali goli ena e tqde me bididuyu da, teda eno we bidi hauwa tau sabo se ebo usu yaibao. Tialima eno mena tu wali pogowe? Te eno konebeo. ²³Eno homu si ebao, tama te homu sigo ena augwali si tomode daq walali. Te homu me e dao: ena Krais dali bidigi pomainu ena isaio homu bomo elama ebo dao. Te aga dali bidibogo te e tqde bidibo kolesaga aiyaba mu elaluaibao. ²⁴Tiali goli me homu e tiwai dao: eno dage tobade e tqde me bidiyu dage tau sabo se, te me te genuai se dao, tebogo ena aga dali bidigi pabo se aiyaba elalubo dao. ²⁵Tama tede eno homu si ebo meni, eno mu koneai, ena e tqde me bidaibao. Tama ena dage dali bidiyu, tama dagego te konealubo po daq wabo bomo genuai pedaluyu, tama dage dwagi yai homu mu pemene emainogo eyu, eno dage dali tau siyu bidaibao. ²⁶Tama tibaso, ena dage dali ma bidibo si, te dage Krais Jisas dali wadolobaso tama eno yali sede dagego te dwagi yai homu pemene ebo page hauwa elaluaibao.

27 Te enade nosali pedalabo sę te dago megi konebeo. Tialima te tagalao, te sęge menio. Te sęge nai, te e dao: te dago Kraisde ola mabo wiegi yai po, te po te da usu sabo usu ni tiwai dao, tama te dagego ebo kolesaga te usu niba kadu wao. Dagego tama tiyu da, teda ena dage bidibo digi pabo ma gasa bulude bidibo, te usu dao, eno dagego ebo kolesagade dwagi yai po naga odaibao. Dagego te Kraisde ola mabo wiegi yai po bugagia wali pobaso da, teda dage duga hasi deli homu naga eyu, tama bomo elama dolaluabao. Tama me dagego ebo kolesaga deli naga eyu, tama duga hasi tau siyu, tama te Kraisde dwagi yai konealubo po aiyaba elaluabo dwai sę ebo bage augwaligo dage dologobeo. Dagego tama ebo kolesaga po eno odaibao. 28 Eno te dagebolo dene mabo bage augwalide po odaio. Augwaligo dage wi homu me ilibo gogologio. Dage munu me wi isiąbo, te kolesaga ebogo te augwalibolo ola mawaibao, te augwali dolama tama mu hagawaibao, tiali goli God aga digi dage bugagia tonaluyu tama dage wiegi yai bidaibao. 29 Magi baso meni, dage, dagebolo Godigo dwagi yai sę olo elama, tama agai dage te Kraisgo sę ebo we bidi nigelai dao. Tama tiyu, agai dage tau selama, tama dagego Kraisde konealubo po homugo dau wali. Te me elalubao, te agai dagebolo

agai nogide dene sabo kolesaga me olo manio, te wiegi yai dao. ³⁰Tama dagego te Krais tobade dene sobaso, te dage ena dali hodobo te tobage dene sabo sə ebo usu dao. Polobadu ena dage dali bidibadi eno hwibō dagego suai dao, augwaligo Kraisde ena dene mani. Tama megı me dagego odali, augwaligo e bulude me enabolo dene mə mabo dao.

Kraisgo aga nogi ugwaba sisiabo wiegi yai kolesaga yali

2 ¹Te dage Krais dali wadolama tama bidu, tama dagego bomo tama elalubo dao. Tama agai dage dali dwagi yai homu eyu godolo ebaso, tama dagego homu nagame elama bugagia bidibo dao. Dage agai Tedali Mobo Bidi dali deli homu eyu kisasa biliyu bidibo dao. Tama dagego duga hasi tomode te abagi homu eyu, homu dene eyu duga hasi tau sabo dao. ²Dagego tama tialigo da, eno homu dwagi yai genuai mu dagego emainu e kolesaga tama yao: te deli homu naga bugagia yao, tama duga hasi dwagi yai homu eyu godolo ebo kolesaga te dobayao, tama homu dali, homu kolesaga dali te duga hasi deli naga tiwai si naga elaluao. ³Gasa bidi tau sabo kolesaga tagalama, tama duga digide naga homugo kone paluyu, duga nogi naga olo ugwaba sabo kolesaga eyu, dage te tiwai bidilamu. Te menio. Te imilai homu eyu, e homu yao, “Te gasa we bidi augwali dwagi yai bage dao. Ena augwali dologode bidaibao,” te homu yao. ⁴Tama tiyu, dagego duga digi naga tau siyu, duga nai naga bugagia tonalugimio. Gasa we bidi augwali me tau siyu, augwaligo nai me dagego bugagia tonaluiqo.

⁵Dagego elaluabo homu kolesaga te Krais Jisasgo elaluali homu kolesaga tiwai gilama yao. Te kolesaga e dao:

⁶ Aga tigidali sogo polobadu God tiwai mu bididuai dao.

Tiali goli agai aga digi tau somainu “Ena e tiwai bidaibao” homu te munu me ebeo.

⁷ Te mu menio. Agai digi aga genuai wiegi yai nogi tagalama, tama nogi meni yai səde dəq walali bidi tiwai pedalali.

Aga te tqəde bidibo bidi dabe tiwai pedalama, tama bidi augwaligo suali aga be bidi mu bidai.

⁸ Aga digi aga nogi aiyaba munama, tama Godigo po wali peyu, tama augwaligo aga ela muabo sogo usu nagasai, te dwai ni pedaide naga isali.

⁹ Tama tialide Godigo aga ugwaba mu sela muai, tama agabolo te gasa nogi tigidali aiyaba elalubo genuai nogi mawai.

¹⁰ Tama tibaso, dagalu bidi me, tqəde bidi me, tqə dai dologo badu bidibo bidi dabe me, augwali

tigidaligo Jisasgo nogi ugwaba somainogo augwali
kidu sugunaibao,

¹¹ tama tigidali bidigo e po hania waibao, “Jisas
Krais da, aga naga te Genuai Bidi dao.”

Tama tiyu, augwaligo God Ayago nogi ugwanu mu
elaluiba**^b**o.

Godigo po odobo we bidi te dagalu ho dabe tiwai ula yao po

¹² Eno abagi mu dede, Krais aga Godigo po mu wali pali. Tama tibaso, ena dage dali polobadu bidibadi dagego eno po wali pali tiwai gilama, te megı me, ena digibulu bidibadi te dagego bomo elama, te eno po bugagia wali pao. Te sege dao, olo se mu menio. Tama tiyu, God dali duga homugo keq̄ pai we bidi mu bidiyu, tama te dage bidibo kolesaga wiegi yai mu sese pedalomainu bomo elama tidua. ¹³ Magi baso meni, te dagego aga homu wali pabo homu emainogo, te dagego aga homu wali pabo bomo me elalumainogo, te God aga digi dage tomode aga se eyu, tama dagego homu agai hodolobo dao.

¹⁴ Tama dage Godigo po tama wali peyu tama dagego elalubo se ebadi, te duga hasi wado po wabo me, konila po wabo me, te tobage po wagimio.

¹⁵⁻¹⁶ Tama dagego te se tama eyu da, teda dage te gasa we bidigo gedude te magi se isawai we bidi bidiyu, tama dage te dwai se dari dwagi yai se dari gealusıbo we bidi bidaibao. Tama bidiyu, dage te homu gagea pai haniani dwai dwai se ebo we bidi to mode bidibadi goli, dage Godigo mu doloba pai wai puluba bidaibao. Tama dage augwali to mode bidibadi dagego te ho dabe hulide ula nanobo tiwai eyu bidaqo. Tama tibadi, dagego augwalibolo te wiegi yai bidibo ula elalubo po pusao. Dagego tama tiyu da, teda te Krais aga e tqba ma asobo side eno dwagi yai homu dage dari yaibao. Magi baso meni, eno koneiba, eno dage to mode yali tigi dene se me te eno bomo me te olo dari ebeo.^c

¹⁷ Dagego duga homugo Kraisde konealubo po daq̄ wabo kolesaga ebo, te kolesaga ebo te Godigo gedude te dagego agabolo te ofa nai mabo kolesaga ebo tiwai dao. Tama bidi dabe augwaligo ena ela mugowe, mugobewe, te eno konebeo. Tama augwaligo ena ela muyu da, teda eno kaneme dari te dagego ofa mabo nai dari te si dago agabolo mawaibao, te polobadu bidali bidi dabego te wain aq̄ te ofa nai daiba gelali tiwai yaibao. Awe, tama tiyu da, teda usu da, eno tede dwagi yai homu pemene ebao, tama dage dari hodobo eno dwagi yai homu ebao. ¹⁸ Te tama tiwai me, dagego me te enaba pedalabo sede dwagi yai homu pemene yao, tama ena dari hodobo dwagi yai homu yao.

Polgo bidi si Filipai hanuba tagala palaibao

¹⁹ Genuai Bidi Jisasgo homu usu weyu da, te eno dage bugagia bidibowe wabo po odomainogo, eno Timoti dage bidibo digi tamadi tagala palaibao.

^b 2:11 Ais 45:23 ^c 2:15-16 Bom 32:5

Tama aga ma asama, dagede po enabolo olama, eno me dagede dwagi yai homu yaibao. ²⁰Eno Timoti tiwai bidi me menio. Agai ena dali homu deli naga ebo dao. Agai dage tau sabo homu mu ebo dao. ²¹Tigidali gasa bidi dabe augwa naide naga homu eyu, tama tede tonalubo dao, tama augwaligo Jisas Kraisgo sède homu eyu tonalubo menio. ²²Tama duga digi Timoti mu koneai, te aga yali se dagego osola sulama tama dagego koneai, te aga se bugagia ebo dwagi yai bidi dao. Agai ena dali hodobo te Godigo po pusubo se iduai dao, te aga ogwago aga aya dali hodobo se ebo tiwai yai dao. ²³Te gavman bidi dabe augwaligo ena e kalabus bedu tamadi olo tagala palogowe, ma meniwe, te eno meg i konebeo. Tialima te eno nosali konebaso da, teda eno Timoti polo dage bidibo digi tagala palaibao. ²⁴Tama Genuai Bidigo homu usu weyu da, te ena digi ena dage bidibo digi tamadi asaibao, eno meg i te homu ebao.

²⁵Eno homugo te bidi Epafroditus dage bidibo digi ma tagala palaibao. Aga dago ama dao, tama ena dali deli sède abagi olama biduai dao. Tama gasa bidi dabe augwaligo Godigo po pusubo se dolidali weyu tama agai ena tau siyu, tama da sigo tigi dene se iduai dao, te ami enesigi bidigo bomo elama hwjbo tiwai yai dao. Polobadu dagego Epafroditus ena bidibo digi tagala palai, tama agai ena tau siyu ena dali bidibao. ²⁶Agai dwai homu mu eyu, tama agai homugo aga dageba polo paio wabo. Magi baso meni, dagego aga gasi yali po odali, te po agai odali. Tama agai te po odama, tama dagego agade moni homu idali weyu aga dagede homu dene eyu dage sugi pabo homu eyu bidibao. ²⁷Awe, mu tama, polobadu aga gasi mu yai, tama pade mu aga isabo tiwai yai. Tiali goli Godigo aga dali homu dene eyu, tama aga tau selama aga isibeo. Tama tebode Godigo aga deli naga homu dene eyu tau sabeo. Agai ena me homu dene elama tau salio. Agai koneai, ena e kalabuside bidibaso, ena sege dali dene me te elalubao. Tama eno abagi isibaso, eno genuai sege elaluabao. Tama idali weyu Godigo te bidi tau sabogo ena me tama tau sai dao. ²⁸Tama tibaso, ena wiegi yai homu eyu tama eno homugo aga dage bidibo digi tagala palabo homu ebao. Tama tiyu, tama dagego aga ma subo si, teda dagego dwagi yai homu agade ma yaibao. Tama eno sege me te tama silaibao. ²⁹Dage dali, te bidi Epafroditus dali, te dage tigidali te Genuai Bidi Kraisgo hani deli dao. Tama tibaso, aga dageba asobo si, dagego aga duga ama tiwai ma sao. Te tobage bidigo nogi dagego ugwaba siyu, tama augwali dali dwagi yai homu yao. ³⁰Magi baso meni. Kraisgo se tobade aga pade tama isai digi dao. Agai homugo aga bidabo homu yai menio. Dage digibulu bidiyu, tama duga digi ena tau sabo usu sàbaso, agai ena tau sabo homu elama, tama Kraisgo se ebadi pade isai digi dao.

Godigo te we bidi doloba pai ilibo se po

3 ¹Eno ama dede, eno po silainogo e po obao, eno homugo te dage te dago Genuai Bidi dali wadolobaso, te dage dwagi yai homu

pemene yao. Te eno dagebolo polobadu pusali po, te po megi ma asębo eno hagelabo menio. Te po dagebolo ma asębogo dage tau siyu, tama gasa bidigo ola mabo pogo dage dologobeo. ²Dage dua dao, te sę dwai ebo bidi dabe, te wili sulai yowi tiwai. Dage dua dao, dwai bidi dabego dagebolo “Te da Juda bidi dabe tiwai eyu, duga tigi togoyu, Godigo sa mubo dąj tigiba muao,” te po wabo bage, te augwalide dua dao. ³Magi baso meni. Augwali meni, te dago naga te Godigo sa mubo dąj mu sai dao. Augwaligo homu te augwa tigiwali togobaso augwali Godigo gedude doloba pai bidi dao, tede geda muyu augwaligo te homu ebo dao. Tiali goli dago te doloba pai bidi nogi sabo tų koneai. Magi baso meni. Godigo Mobo Bidigo da tau siyu, tama dago Godibolo lotu po wabo dao. Da Krais Jisas dali wadolama bidiyu, tama tede da dwagi yai homu mu pemene ebo dao. Tama bidiyu, dago Godigo sa mubo dąj elalubao. Dago te dena tigiwali togobo sęde te da tau sabo kolesaga dao, te homu mu ebo menio. ⁴Te tigiwali togobo kolesaga dali, te bidi aga tigi bomogo ebo haniani kolesaga dali, te tobage kolesaga ebogo te bidi te Godigo gedude doloba pai bidi ilibo usugi da, teda ena aga gedude doloba pai bidi mu dao. Tama gasa bidi me deligo aga tigiwali togobo sę elama tama gasa sę me eyu, tama aga wiegi yai bidi dao homu eyu da, teda eno te bidi aiyaba elaluai dao. ⁵Magi baso meni. Edao. Ena ame nenama, tama Sarere deli bidama, tama augwaligo eno tigiwali togwai, te Godigo hani sa mubo dąj enaba tama muai. Ena te Israel bidi mu, tama ena Benjamin te bidigo hani. Eno aya ida si augwaligo Hibru po weyu bidai, tama ena me Hibru po wabo bidi mu dao. Ena genuai hodolama, tama ena te Farisi hani bage dali wadolali. Augwaligo bomo eyu, te Juda dabego bomo yai po tigidali deli deli dolo mu bugagia wali pabo bage dao. Te tiwai ena me te da Juda dabego bomai po tigidali dolo mu odama wali peyu bidai dao. Tebode ena olo bidi meni. ^d ⁶Eno te Godigo nogi dolobo we bidi elaibao homu bomo elama, tama tede geda muyu eno te Krais wali pabo we bidi hani augwalibolo genuai dene mayu bidai dao. Te Godigo te Juda dabego bomai po dolo wali pabo bidibolo te doloba pai bidi nogi pogı sogo da, teda enabolo agai te nogi pogı da. Eno te bomai po me deli me bolobeo. Te eno dwagi yai kolesaga tama yali goli, te usu meni. ^e ⁷Tiali goli te eno megi tama nedali eno nogi tau sabo wiegi yai kolesaga, te augwali tigidalide eno homu hasegelama, tama megi eno homu te augwali te ena tau sisębo nai naga dao, te hagawai nai naga tiwai dao. Magi baso meni, Krais agai ena tau mu sai dao. ⁸Tiali goli te da Juda dabego ebo kolesagade naga eno homu te augwali te ena tau sisębo nai dao. Tede naga menio. Te ena Godigo gedude doloba pai bidi pedalomainogo eyu, polobadu eno haniani gasa kolesaga hauwa me eyu bididuai dao. Te

^d 3:5 Tpi 23:6; 26:5; Rom 11:1 ^e 3:6 Tpi 8:3; 22:4; 26:9-11

kolesaga tigidalide me megı eno e homu ebo dao, te augwali ena tau sisabo kolesaga dao, te olo nai mu dao, te homu eno megı ebo dao. Magi baso meni. Te wiegi yai kolesaga me deli naga eno megı subo dao. Te kolesaga e dao: ena te eno Genuai Bidi Krais Jisas dali mu wadolama, tama ena aga dali abagi mu kisasa bilbao, te kolesaga da te genuai wiegi yai kolesaga mu dao, tebogo te gasa kolesaga tigidali aiyaba elalubo dao. Tama aga tobade eno te gasa ena tau sabo kolesaga tigidali tagalai dao. Eno Krais tama somainu eyu, tama te gasa kolesaga tigidali te dwai olo pobele bage naga dao, eno te homu ebo dao. ⁹Eno homugo ena aga dali wadoloyu tama homugo mu kę̄ paibao. Polobadu eno e homu eyu bidai dao: eno te Juda bagego bomo yai po dolo mu bugagia wali peyu da, teda Godigo gedude ena doloba pai bidi pedalaibao. Tiali goli megı eno te homu ebo menio. Eno Kraisde konealubo po dą̄ olama, tama Godigo ena doloba pai bidi nogi yai dao. God aga digi te Kraisde konealubo po dą̄ wabo bidibolo te doloba pai bidi nogi ebo dao. ¹⁰Tama bomo elama, eno deli homu naga ebo dao: ena Krais dali wadoloyu, tama eno aga kuna koneaio. Aga isama ma hodaluama tama bomo elalubao. Eno homugo eno te bomo mu koneaio. Eno aga dali abagi mu olama, tama aga dene sali tiwai eno dene sobaso te usu dao, eno te dene saio. Tama tiyu, aga isali tiwai ena isaio. ¹¹Eno homugo te t̄̄ elalubaso, nosali ena te isali we bidi tomodu Godigo ena ma hodaluibaio, tama ena ma bidaibao.

Polgo bomo elama dą̄ yali digi sabolainogo udawai

¹²Tiali goli eno megı tama wali kolesaga, te tobage kolesaga eno polo selama, tama megı ena doloba pai wiegi yai bidi mu dao, eno te homu ebo meni. Te menio. Bidi dabe augwaligo bomo elama dą̄ yali digi polo sabolainogo udabo tiwai, te eno bomo elama, tama te Godigo enabolo maiabo nai sabo homu ebo dao. Eno te tiwai emainogo eyu, Krais Jisasgo polobadu ena aga wali pomainogo ilai dao. ¹³Ama dedeo, te enade, te eno homugo te kolesaga polo mu sai dao, te homu ebeo. Meni. Tiali goli eno homu me deli digi tama ebo dao. Eno polobadu yali homu kolesaga tagaluyu, tama augwalide homu ma esiąyu, tama eno nosali sabo nai sę bomo ebo dao. ¹⁴Tama tibaso, eno bomo elama, dą̄ yali digi sabolama, dwagi yai muani nai sainogo udabo dao. Te dwagi yai muani nai sabo e tiwai, Godigo da Krais Jisas dali wadolama, tama aga dali bidada peyu, bidaada pomainu agai da dagaluba holao olama i wai dao.

¹⁵Te da Godigo po kibu be hauwa bugagia wali pali bage, te dago aga homu kolesaga koneai bage, te da tigidaligo te bomo elama dą̄ yali digi sabolama, dwagi yai muani nai sainogo uda yabo homu deli naga yao. Tiali goli dage mebago gasa homu me elalubaso wida, teda Godigo dagebolo te po page hania waselaibao. ¹⁶Tialima te Godigo dabolo polobadu waselali yabo kolesaga, te kolesaga dago bugagia wali pomainao.

¹⁷Eno ama dedeo, dage tigidaligo eno ebo kolesaga sulama, tama te tama tidua. Dago dagebolo te dolo yabo kolesaga ola mawai dao. Tama tibaso, duga hasi dagego dago ebo kolesaga wali asobo bidi dabe bugagia suao, te dagego augwaligo ebo kolesaga dolo wali pomainogo tama yao.^f ¹⁸Polobadu hauwa sogo eno dagebolo wai dao, tialima megı eno dagebolo ma obao, tama eno homu dene eyu gedude aji pedalabo dao. Magi baso meni. Godigo po odobo we bidi hani tomode te we bidi hauwa augwaligo ebo kolesagago augwali te Krais ni pedaide isali se page dali boi bidi ilibo dao. ¹⁹Augwa tigigo tuabo nai dabe, te nai sabo homu naga augwaligo eyu, tama te kolesaga wali pabo dao. Te sabo nai dabe augwaligo tibo god tiwai mu dao. Augwaligo dwai haniani hale ebo kolesaga ebo dao. Tiali goli augwali tede hale menio, tede augwaligo dwagi yai homu eyu, tama augwa nogi uwgaba sabo dao. Tama augwaligo e tode elalubo naide naga homugo daq olama tama bidibo dao. Tama augwaligo te tobage kolesaga eboso, augwali mu dolaibao, te dwai buluba paibao. ²⁰Tiali goli, da, te da gasagi yai we bidi hani dao. Dago bulu mu te Godigo bidibo digi mu dao, tama wiegi yai homu eyu dago te da ma dobola sabo bidi, te Genuai Bidi Jisas Krais, aga tedu dulama, tqba ma asobo tonaluyu bidibo dao. ²¹Magi baso meni. Agai bomo te gasa tigidali bomo aiyaba elalubo dao. Tama agai bomogo agai tigidali nai deliba sisinama, tama aga dologoba muabo te bomo tede usu dao. Tama aga tqba ma asama, tama dago bomo meni yai polo isibo tigi, te tigi agai bomogo hasegelaibao, tama dago tigi aga wiegi yai ula elalubo tigi tiwai si pedalaibao.

Dage deli homu eyu tama dwagi yai homu kolesaga sao

4 ¹Eno ama dedeo, te Krais e tqba ma asama, tama da dali wiegi yai se yaibao. Tama tibaso, dage aga dali polobadu wadolama tama megı bomo elama dolaluiqo. Eno dage dali wiegi yai homu mu pemene ebo dao, tama eno dagede homugo ma kone palobo si eno homu dene ebo dao. Dagego ena homu dwagi yai ilibo dao. Dage da, te eno bulali nai du walali tiwai dao.

² Yuodia dali Sintike, te we dage sigo odao: dage si Krais dali wadolama, tama ama name si tiwai bidiyu, homu deli naga yao. Dage si tama naga tiao. ³Tama nage me, nage ena dali homugo keq pai bidi, ena dali deli se ebo bidi dao, eno nagebolo e po obao, te we si augwaligo deli homu naga emainogo nago augwali tau sao. Eno Godigo po pusubo se ebadi, augwali sigo tigi dene se eyu, ena tau sali. Te bidi Klemen dali, gasa ena dali deli se ebo bidi dabe dali, augwaligo te we si dali se yali dao. Tama augwali tigidaligo nogi te Godigo bukude aseña elalubo dao, te bidibo ula sali bagego nogi asəani bukude.

^f 3:17 1 Ko 4:16; 11:1

⁴ Eno homugo dage te Genuai Bidi dali wadolali we bidi dage sesemane sogo dwagi yai homu pemene eyu bidao. Awe, eno te po ma obao, dagego homu dwagi yai pemene yao.

⁵ Dagego homu nagame ebo kolesaga tigidali sogo eyu, tama tigidali we bidi augwaligo te kolesaga sueibao. Dago Genuai Bidi ma asobo sogo paba yagasaki dao. ⁶ Dagego haniani naide moni homu egimio. Te menio. Te dageba pedalobo se tigidalide dagego Godibolo tede po weyu, tama agabolo buba hwi olama, tama te dagego soq pabo naide aga hanalu wao. ⁷ Dagego tama tiyu da, teda dage Krais Jisas dali wadolama, tama aga dali hodobo bidiyu, tama Godigo dage nagamea pai homu ilibo kolesagago dage bugagia tonaluaibao, tama dage wi egobeo. Te nagamea pai homu ilibo kolesaga page te da tqde bidibo we bidigo kuna munu me konegobeo, te agai kolesagago dago homu kolesaga aiyaba mu elalubo dao. Awe, tede dago homu kolesagago dəq sabo dao, tiali goli agai te nagamea pai homu ilibo kolesaga page me hauwa elalubao.

⁸ Eno ama dedeo, eno po silagasu wabo po me deli waibao. Dagego eno e nedebu kolesaga nogi selama tama augwalide naga dagego homugo bugagia kone pabalo pidua. E tobage kolesaga augwali dwagi yai dao, tama tigidali we bidigo e kolesaga ebo bidigo nogi ugwaba sabo dao. E dao: te tibo po wasiąbo kolesaga me, te wiegi yai kolesaga me, te Godigo gedude me bidigo gedude me dolo kolesaga, tama meda isawai kolesaga dali, te abagi homu ilibo kolesaga dali, te doloba pai kolesaga dali, te dwagi yai nogi elalubo kolesaga dali, te tobage ebo kolesagade dagego homugo kone pabalu pidubadi geao. ⁹ Ena dage dali bidibadi eno te haniani kolesaga po dagebolo ola menama tama dagebolo mani. Tama dagego eno yali kolesaga gedugo suali. Dagego te enade tama sali kolesaga sesemane sogo idua. Tama tiyu te dabolo nagame homu ilibo God aga dage dali bidaibao.

**Te Filipai hani bagego tau sabo nai dabe Polbolo
tolai baso, te Polgo buba hwi po wai**

¹⁰ Ena te dago Genuai Bidi dali wadolama tama bidiyu, tama megı ena dwagi yai homu mu pemene ebao. Magi baso meni. Hauwa sogo silama tama dagego ena tau sabo tū ma dalama, tama dagego ena tau sabo kolesaga te ni dululi pisigalubo tiwai eyu, tama dagego mone ge enabolo tagala palali. Tama tiyu, tama dagego enade homugo konea palobo, te eno koneai. Dagego ena gegeda pabeo. Te meni. Tiali goli dage tū meni yai dao. ¹¹ Tama tede ena nai soq pabo hobedagia bidibao, eno te po megı wabeo. Te meni. Eno elalubo nai, te naide ena dwagi yai homu eyu bugagia bidibo kolesaga te eno konea silai dao. ¹² Ena magi nai meni yai bidi bidibo kolesaga dali, te nai hauwa elalubo kolesaga dali si eno koneai. Te eno polobadu konesiawai kolesaga eno megı konebo dao. Tama

tibaso, tigidali bulude me, tigidali sogo me, te ena dwagi yai homu eyu, bugagia bidabo ena usu yaibao. Ma, eno nai hauwa tubo sogo ma nasi ebo sogo, tama doado bage hauwa elalubo sogo, ma nai sqą pabo sogo, te magigo menio. ¹³Krais agai aga bomo ena menama, tama te bomogo eno tigidali sę ebo usu ebo dao.

¹⁴Tiali goli, dagego ena dali hai namu si weyu, eno sege dagego tolai, te kolesaga dwagi yai dao. ¹⁵Tama dage Filipai we bidi, duga digi mu koneai: te polobadu eno te Godigo gesi wiegi yai po sela pabo sę dage tomode ebo gagalali sogo, te sogo eno te Masedonia tő tagalama, tama gasa tɔba pali sogo, te sogo gasa Godigo po odobo we bidi hani augwaligo ena tau sabe, te dagego naga ena dali deli sę yabo homu eyu, tama enabolo mone ge menama, tama eno te mone ge sai dao. ¹⁶Ena Tesalonaika bulude bidibadi tama eno nai sqą pobaso, dagego ena si sela sogo tau sai dao.^g ¹⁷Te dagego ena tau sabo badi, te eno dagego enabolo mani masigi gede homugo kone paluyu sabo homu ebo meni. Te meni. Eno homugo Godigo te dagego ena tau siyu duga nai dobabo dwagi yai sę ebo sulama, tama agai nosali dage wei ponaibao. ¹⁸Dagego mani tigidali nai usu elama eno selama, ena sqą pabo meni. Te dagego dwagi yai nai dabe te bidi Epafroditus nogoba munama, tama agai tolasa asai, te eno sai, tama megı ena pagana pabo. Te dagego tolali nai dabe augwali da te Godibolo olo maiabo denami ebo ofa nai tiwai dao, te agai gedude te usu dao, tama agai homu dwagi yai ilibo nai dao.^h ¹⁹Tama ena wali pabo God agai dage bugagia wei ponaibao. Dage Krais Jisas dali wadolama tama dagego mena nai sqą pobaso da, teda agai umabo elalubo wiegi yai ula yai naigo dage tau siyu, tama dage me mu pagana paibao. ²⁰Eno homugo da tigidaligo dena Aya Godigo bomo yai ula elalubo nogi sesemane sogo uganu sao, bidada peyu, bidada pabo sogo tama yao. Te mu tama dao.

Po me badu wai

²¹Eno siade da wabo po te tede bidibo Godigo po odobo we bidi tigidalibolo wao, augwali Krais Jisasgo hani bage dao. Dago ama dabe ena dali ede bidibo bagego dage dali siade dao po olama tolobao. ²²Ede bidibo Godigo we bidi augwali tigidaligo dagebolo siade dao po ola tolobao. Meba gavman tuni bidi Sisar agai bede sę ebo bidi augwaligo te siade da wabo po bomo elama, dage dali te po wai.

²³Eno homugo dago Genuai Bidi Jisas Kraisgo olo tau sabo wiegi yai kolesaga dage dali bidao. Te tama dao.

^g 4:16 Tpi 17:1; 2 Ko 11:9 ^h 4:18 Sai 29:18

Polgo Kolosi Dabeba Pas Aşeanı

Hasia nedebo tau sabo po

Te hanu nogi Kolosi te Esia moni tq tomode elaluali. Pol aga digi te Kolosi hanuba pabe, gasa bidigo Godigo po teba hasia pusugi pai dao. Tama Pol te Rom moni hanu kalabus bede bidibadi tama te bidi Epafras te Kolosi hanu taga soyu, te Romba sabolama tama Pol suagasali. Agai Polbolo te Koloside pedalali se po pusuyu, tama te we bidi meba te augwa polobadu yali dwai kolesaga tomoba ma painogo ebao wali. Te me te tibo po ola mabo bage augwaligo te we bidibolo te augwa tigi aiyaba elaluabo tibo po ola mobao, te po me Polbolo pusali. Tiali goli te we bidi hauwa augwali Krais bugagia wali pabo dao, te po me Epafrasgo Polbolo pusali. Tama tibaso, Pol dwagi yai homu eyu, tama agai te Kolosi we bidi dali godolo eboso, agai e tau sabo bomo mabo po aseñama, tama te bidi Tikikusgo augwalibolo sela pomainogo yai. Te si wabo bidi nogi Onesimus, te bidide Polgo po hauwa olama, te bidi Filemonbolo te pas aseyu te tama po wai dao.

Krais aga te tigidali naigo toboli bidi da, tama te tigidali bidibo ula me te Godigo kolesaga agade paganalubao

(Dai 1:1-3:4)

1 1-2 Ena Pol dao, ena Krais Jisasgo po sela pabo sę bidi dao. God aga homugo digi ena te sęba muani. Tama dago ama Timoti aga ena dali bidibao. Tama eno e pas asęna dagebolo tolobao, dage Kolosi moni hanude bidibo Godigo we bidi hani. Dage da, dago ama dabe, dage Krais dali wadolama tama aga dali homu kę̄ai bage dao. Eno homugo dago Aya Godigo olo tau sabo wiegi yai kolesagago dagego homu dua nagame ilama, tama dage bugagia bidimainao.

Polgo Godibolo puba hwi po wai

³Te God agai dage tau somainogo da sigo gedu haluasa po wabo dao. Tama weyu, tama sesemane sogo te dago Genuai Bidi Jisas Kraisgo Aya Godibolo dago dagede puba hwi po wabo dao. ⁴Magi baso meni, dago

odali, te dagego Krais Jisasde konealubo po dą̄ wali po me, te Godigo we bidi tigidali dali dagego dwagi yai homu eyu godolo ebo kolesaga po me, te po si dago odobaso, dago agabolo puba hwi po wabo dao. ⁵ Te mu po, te Godigo gesi wiegi yai po, te po pusubo bidi hasia sogo dage bidibo digi sabolali sogo, te sogo dagego te po odama, tama dagego koneani, te nosali Godigo dage dali dwagi yai sę mu yaibao. Te tama odama, tama dagego tede dwagi yai homu eyu, bugagia tonalubo dao. Dage tama tonalubaso, dagego Kraisde konealubo po dą̄ olama, tama Godigo we bidi tigidali dali dwagi yai homu eyu godolo ebo kolesaga ebo dao. Tama te Godigo dage dali nosali yabo dwagi yai kolesaga page te Godigo aga bidibo digide bugagia tonalubo dao, te dologobeo. ⁶ Tama te gesi wiegi yai po pusubo bidi dabe augwali te tigidali tqba tedali pelama, tama tede bidibo we bidibolo te po pusama, tama tebogo te we bidi dali dwagi yai sę ebo dao, te ni aga du bugagia walobo tiwai ebo. Te dage tomode me te tiwai yai dao. Hasia dagego te Godigo olo tau sabo wiegi yai kolesaga po odama, tama te kolesagago dage tau selama, tama te kolesaga dagego kuna konebo dao. Tama te sogo gagalama tama megı e sogoba usu nagasama te wiegi yai pogo dage tomode aga du bugagia walobo dao. ⁷ Epafras agai te wiegi yai gesi po dage ola menama, tama dagego konea sai. Aga dago deli sęde bidibo dwagi yai bidi dao, tama da sigo aga dali dwagi yai homu ebo dao. Aga te Krais dali homu kę̄ pai sę ebo bidi dao, tama agai da si te sęde tau sabo dao.^a ⁸ Tama agai da sibolo e po hania hanilai dao, “Te Godigo Mobo Bidigo te Kolosi we bidi tau sobaso, tama augwaligo te Godigo po odobo we bidi tigidali dali dwagi yai homu eyu godolo ebo dao,” te po wai.

⁹Te Godigo po dage tomode te tobage dwagi yai sę yali baso, dago dagede te po odali sogo gagalama tama eduali tama megi usu nagasama tama dago Godibolo po wabo dao. Tama tiyu, dago Godibolo e po hanalu wabo dao, "God, nago te Kolosi we bidi augwalibolo te nago Mobo Bidigo maiabo wiegi yai homu kolesaga tigidali augwalibolo mao. Tama mobaso, augwaligo nago sę yabo homu kolesaga gisiga koneabao," dago dagede te po Godibolo wabo dao. ¹⁰Tama agai te homu kolesaga dagebolo mobaso, teda dagego ebo kolesaga te dago Genuai Bidigo gedude te usu yaibao, tama te kolesaga tigidaligo aga homu dwagi yai ilaibao. Tama dagego haniani dwagi yai sę yaibao, te dwagi yai ni aga du walobo tiwai yaibao. Dagego God koneama tama te konebo sę genuai pedalaibao. ¹¹Dago homugo Godigo agai moni ula yai wiegi yai bomo meba selama, tama te bomo dagebolo mao, tama te bomogo dage bomai we bidi ilao. Tama agai dwagi yai bomogo dage bomo elama dolaluyu, tigidali sęge bugagia tolaluyu, tama dagego boi bidi homu egobeo, dagego augwali wei ponobo

^a 1:7 Kol 4:12; Flm 23

homu egobeo. ¹²Tama dagego tama tiyu, dwagi yai homu mu pemene eyu, dago Aya Godibolo puba hwi po wao. Magi baso meni. Te agai tonalubo wiegi yai ula elalubo digi tede agai aga we bidibolo maiabo nai hagea selama munaluali. Tama dagego te hagea sali nai meba somainogo agai dage usu ilai dao. ¹³Da te dwai haubo toboli bidi Satango dologode te hulia sai bulude bidibadi, God agai da ma dobola selama, tama da bugagia sela pelama, tama aga godolo ebo Ogwago we bidi tonalubo kolesaga dologoba mugi pali. ¹⁴Agai Ogwago te da dą̄ wali nai pisigina s̄awai dao. Te po page e dao, agai yali s̄eđe Godigo dago yali dwai s̄e selā s̄awai dao.^b

Krais da te tigidali nai toboli bidi dao

¹⁵God aga te dago susiabo bidi goli, Krais te God tiwai mu bidiyu tama bidigo gedugo suali bidi bidai. Aga Godigo hasia ogwa dao, te tigidali nigali naigo nogi agai nogigo aiyaba elalubo dao. ¹⁶Magi baso meni. Godigo agabolo te s̄e yao olama, tama agai te dagalude nai tigidali dali, t̄de nai tigidali dali nigai. Agai dago subo nai me dago susiabo nai te tigidali agai nigai. Te dago gedugo susiabo dagalude bidibo ensel mobo bidi tonalubo bage dali, te haniani tuni bidi dabe dali, te toboli bidi dabe dali, te bomo elalubo bidi dabe dali, agai augwali tigidali nigai. Tigidali elalubo naide Godigo agabolo nigao olama, tama agai nigliama, tama te Krais aga nogi ugwaba somainogo eyu bidibo dao, te aga te tigidali naigo peni dao. ¹⁷Te tigidali nigali nai nigisiqbadi, te sogo aga bolo biduduai dao, tama tigidali nai agai aga bomogo tonaluyu, tama megı bugagia bidiyu tedela pabo menio. ¹⁸Godigo po odobo we bidi augwali da te Krais aga tigi tiwai dao, tama aga da te aga tigigo toboli dao. Tama aga da te tigigo bidabo bomo page bidi dao. Aga naga te tigidali naide polalubo bidi bidimainogo eyu, tama aga da te Godigo hasia ogwa da, tama aga hasia mu ḡu pagede hodaloai bidi dao.^c ¹⁹Magi baso meni. God aga digi homugo agai homu kolesaga sese te aga ogwago elaluyu, tama ogwa aga tiwai mu bidaibao. ²⁰Tama tiyu, God aga digi homugo te aga Ogwago s̄e ebogo agai te tigidali nai God dali deli homu ma ilaibao, t̄de nai dali dagalude nai tigidali. Aga Ogwago kaneme ni pedaide gelai. Tama tebogo Godigo da dali boi piabo s̄e yai dao.^d

²¹Awe, polobadu dagego dwai homu kolesaga eyu, tama dwai s̄e idubaso, dagego God dali boi bidi homu elama tama dagego aga konebeo, dage digibulu bidai dao. ²²Tiali goli megı aga Ogwago t̄de bidali tigi isali kolesagago agai dage aga abagi ilai dao. Agai homugo dage tedali mu we bidi, dage bugagia magi sege me meniamma wiegi yai agai gedude nigiliyu, tama agai dage aga pageba odasa asomainogo agai dage aga

^b 1:14 Ef 1:7 ^c 1:18 Ef 1:22-23 ^d 1:20 Ef 2:16

Godigo geme dualali po waselali

²⁴Ena meg i kalabus bede bidiyu tama dene sobao. Tiali goli eno dage tau somainogo eyu, tama te dene sobaso, eno dwagi yai homu ebao. Magi baso menio. Da Godigo po odobo we bidi da, te Krais aga tigi tiwai bidibao. Tama aga tigi tobade te dene tolobo se me elalubao. Tama eno tigide te dene me sobaso da, teda eno te agai aga tigi tau sabo dene meba toloyu, tama te dene silibo se eno tama tau sabo dao. ²⁵Tama God aga digi ena aga we bidi hanigo se bidi nigelai dao. Eno dage tau somainogo eyu agai e se enabolo mani, te Godigo po sese eno gisiga ola mayu, tama we bidi augwaligo te po page kuna konemainogo ebo dao. ²⁶Tigidali sogo polobadu te po page tigidali bidi hanigo gedude dulaluai. Tialima meg i God agai aga we bidi mubolo te po page hania waselai dao. ²⁷Te Godigo homu e dao: agai aga polobadu dulaluai po agai we bidi mu augwalibolo hania hanilaibao. Tama te dulaluali pogo te gasa hani we bidi tigidali tau sabo po dao. Te dulaluali po wiegi yai mu dao, te bomo yai ula umabo elalubo po dao. Te dulaluali po page e dao: Krais aga digi dage deli delide hodobo bidibao, tama aga tama bidibaso dagego Godigo bomo yai ula dali, genuai nogi dali, bomo dali te meba saibao, tama tede dagego dwagi yai homu eyu bugagia tonalubo dao. ²⁸Tama tibaso, dago Kraisde po te tigidali bidibolo pusubo dao. Dago homugo tigidali we bidi deli deli augwali Krais dali wadolama, tama bugagia holama, tama wiegi yai we bidi mu bidimainogo eyu, tama dago augwali Godibolo mawaibao, bidigo aga wiegi yai nai ofa te Godibolo mabo tiwai. Tama emainogo dago tigidali wiegi yai homu kolesagago augwali ola mayu, tama dua dao, e pode geda mugio, te tobage po weyu dago tigidali we bidi Kraisde po ola mabo dao. ²⁹Tama te se emainogo eno bomo eyu tama ena se dene mu ebo dao. Kraisgo enabolo aga genuai bomo menama, tama te bomogo naga eno bomo eyu te se ebo dao.

2 ¹Eno homugo dagego tama koneao: eno se dene eyu, eno dage Kolosi bage dali, te Laodisia hanude bidibo Godigo po odobo we bidi hani dali, te gasa ena gesabidi susiąwai bidi dabe tigidali dali, eno dage dali augwali dali tau sabo se yai dao. ²Magi baso meni. Eno

homugo te dage me, augwali me, dage tigidaligo homu kolesaga bomo emainu eyu, tama augwa hasi dwagi yai homu eyu godolo ebo kolesaga ebogo augwali deliba kę̄ somainogo ebo dao. Tama eno homugo me te augwaligo te Godigo gesi dwagi yai po page sese kuna koneama, tama te konebaso augwaligo tede homu si munu me egobeo. Tama bidiyu, augwali tede te doado bage hauwa elalubo bidi tiwai bugagia bidaibao. Tama tiyu, augwaligo Godigo dualai po page hania koneaibao, te page da te Krais aga digi naga dao. ³Aga da te Godigo wiegi yai homu kolesaga dali konebo homu dali si dabolo waselai bidi dao. Te homu kolesaga dali konebo homu dali si polobadu dualalubadi bidai dao, te bidigo umabo wiegi yai doado bage geme dualali tiwai elaluali.

⁴Bidi me deligo dage homu bega somainu ili po ola menama, tama dagego homu polo tulaluidali weyu, eno te po dage Kolosi we bidibolo asəna tolobao. Agai wiegi yai po mu dage ola mani digi, te po ola tagalao. ⁵Magi baso meni. Ena dage dali megi bidibo meni goli, eno homugo dage dali kone palobo dao. Tama dagego Kraisde konealubo po bugagia dą̄ olama, tama hani deli naga wadoloyu, tama dage homu dila pai we bidi bugagia bidibao. Eno dagede tama konebaso, ena dwagi yai homu pemene eba.

Dago Krais dali kę̄ selama bidao

⁶Dagego “Awe, Krais Jisas aga dago Genuai Bidi dao,” te po dagego polobadu olama tama aga tama saligo da, teda agai kolesaga eyu aga dali hodobo bidao. ⁷Dagego aga dali wadolama, tama bomo elama aga dali bugagia dą̄ wao, te ni pedali sele tőde aba mu peyu dą̄ olama te ni dą̄ weyu dolalubo tiwai yao. Tama aga te be dą̄ wabo tuni ni dali, te be kau ni dali si tiwai dao, tama dage da te be kele ni dabe tiwai elaluyu, tama dage aga dali bugagia dą̄ weyu bidiqo. Tama tiyu, te bidi Epafrasgo dagebolo ola mani Kraisde konealubo po, te pogo dagebolo bomo momainao, te dagego elalubo bomo genuai usu emainogo yao. Tama bidiyu, tama dagego Godibolo puba hwi po hauwa wao, dagego duga homu te puba hwi pogo paganao.

⁸Dage dua dao. Bidi dabe meba augwaligo te tőde bidigo olo homu kolesaga, te we bidibolo tibo po ola mabo homu kolesaga, augwaligo dagebolo te tobage dwai homu kolesaga ola menama, tama te homu kolesagago dage dą̄ waidali weyu, dage dua dao. Te tobage homu kolesaga te Kraisgo ola mabeo. Mu menio. Te tobage olo homu kolesaga te bidi dabego polo wajgo ola mani kolesaga dao, me te tq dali dagalu dali si tonalubo dwai genuai mobo bagego ola mani homu kolesaga dao. Te Kraisde sabeo. ⁹Magi baso meni. God aga digi sese mu te Kraisgo tigi tomode bidibo dao, tama Krais aga tiwai mu bidibo dao. ¹⁰Tama dage aga dali wadolobaso, agai dagebolo te bidabo ula sese mawai dao, tede dage

səq pogobeo. Krais agai te bomo elaluyu tonalubo sə ebo genuai mobo bida tigidi aiyaba elaluama, tama aga polalubo bida dao.

¹¹ Te me elalubao. Te Juda dabe augwaligo ame nani ogwa tigidi te tigiwali togwai, te Juda hanigo sa augwaligo tigiba tama muani. Tama dage, dage Krais dali wadolobaso, te dagede te Godigo sa mu elalubo dao. Te sa te bidigo nogogo ilali sa meni. Te Kraisgo muani sa dao. Te dagego tigigo dwai sə yabo kolesagago dage dəq wali. Tiali goli Kraisgo te kolesaga pisigma sayani. Tebogo dageba Kraisgo sa muai dao. ¹² Magi baso meni. Te dagego duga homu begelama tama əiba dulali sogo, te sogo dage Krais dali hodobo pubulali tiwai yai. Tama te sogo me te dage te əidu ma hodaluali sogo, te dage Krais dali hodobo gə pagede ma hodaluali tiwai yai. Aga te isali we bida tomode osogo bidama tama Godigo aga tedu ma hodolali, agai sə yabo bomogo. Tama dagego te bomode duga homu bugagia dəq obaso, God agai dage me Krais dali hodobo hodolali tiwai yai.^e ¹³ Polobadu dage Juda bida hani isəwai bage, dagego te Godigo bomo yai po wali pisayu, dagego te bomo yai po bolama dagego haniani dwai sə iduyu bidai. Tama tibaso dage Godide te isali bida dabe tiwai bidai dao, dagego aga me konebeo. Tiali goli Godigo dage Krais dali gə pagede ma hodolali tiwai elama, tama bidibo ula menama, tama dage megı bugagia bidibao. Godigo dago yali dwai sə sege tigidi mu sela səwai dao.^f ¹⁴ Dago agai bomo yai po bolama tama dago aga dali dwai genuai negeli elaluali. Te bomo yai aşənî pogo da po tə yabo paliali. Tama agai te po tə yao wali po sela şanama tama te Krais aga te ni pedaide isibogo te bomo yai pogo da po tə yabo sə tigidi silai dao.^g ¹⁵ Tama te ni pedaide Krais agai aga bomogo te bomo elaluyu tonalubo sə ebo genuai dwai mobo bida dabego bomo aiyaba elaluama, tama dili eleyu, tama tigidi bidigo gedude te dolali mobo bida bide hania waselali.

¹⁶ Krais aga isaligo te da po tə yabo sə silibaso, dagego bida me deligo dagebolo po weyu dagego tubo naide me, tubo əjde me te bomo yai po mabo gogolamu. Te lotu po wabo tedali sa muani sogo dabe dali, te yaluai polua sogode wabo lotu dali, te Sarere deli deli toma tubo sogode me, te sogo tigidalide te bida me deligo dagebolo bomo yai po mabo gogolamu.^h ¹⁷ Te tobage bomo yai po tigidi augwaligo sə polobadu elaluali, te dago te nosali asabo bida asaibao po wabo konemainogo yai. Tama aga asai dao, te Krais dao. ¹⁸ Bidi me deligo agai nade suali nai po weyu, tama dagebolo te po waibao, “Duga digi aiyaba elaluama, ensel mobo bida dabebolo lotu po wao,” agai te po waibao. Tiali goli agai te tobage po olama, tama dagego homu polo tulaluamu. Godigo dagebolo nosali maiabo nai hagaidali weyu dagego te bidigo wabo po odogio. Te

^e 2:12 Rom 6:4 ^f 2:13 Ef 2:1-5 ^g 2:14 Ef 2:15 ^h 2:16 Rom 14:1-6

bidi agai te təde homu kolesaga naga eyu, tama hagoma homu genuai eyu aga nogi ugwaba sabo dao. Tiali goli agai po kedu meni yai dao.¹⁹ Te po wabo bidi agai Krais aga homugo dą̄ wabo tagalai dao. Krais aga da te tobolu tiwai dao, tama da Godigo po odobo we bidi te tigi tiwai dao. Tama te tobolugo te tigi sese bugagia tonaluyu te dili dabe te kigibiligo deliba bugagia dą̄ olama, tama nai tulama tama te tigi dwagi yai pedalobo dao. Tama da Godigo po odobo we bidi me te dago tobolu bidi Krais dali tama wadolama, tama Godigo bomo selama da bugagia holobo dao.ⁱ

²⁰Dage Krais dali hodobo isali tiwai yai. Tama tialigo da, teda megı dage te tə dali dagalu dali si tonalubo dwai genuai mobo bage dologode me bidibeo. Tama tibaso, magi baso dage təde bidi tiwai me bidibawę? Magi baso dagego təde bomo yai po dologode bilibawę? ²¹E tobage bomo yai habu selebo po elalubao, “E nai nogogo tugio, u nai tula sugio, te gasa nai nogogo diagio.” Dagego te bomo yai po magi baso odobawę? ²²Te bomo yai po te naide wabo dao, tiali goli dago te nai tubaso da, te nai mu ela silibo dao. Te tobage bomo yai po dabe, te bidigo naga augwa homugo nigilama tama ola mabo dao. ²³Mu tama, te tobage tubo naide wabo bomo yai po nigali bidi dabe, augwali gasa we bidigo gedude te mu koneai bage dao. Tiali goli, te meni. Augwaligo bomo elama tama we bidibolo te po wabo dao, “Dagego te ensel mobo bidi dabebole lotu po wao.” Tama augwaligo tibo po weyu “Ena imilai homu ebo bidi dao,” te po wabo dao. Tama augwaligo te homu ebo dao, “Awe, eno ena tigibolo nai masihbaso, teda Godigo gedude ena dwagi yai bidi pedalaibao.” Tiali goli augwaligo te bomo yai pode mu geda muani. Te tobage habu selebo kolesaga ebogo augwaligo tigigo bomo elama yainu ebo dwai kolesaga aiyaba elalugobeo. Te menio.

Krais da tomode bidibaso, tama da gesi noma we bidi dabe pedelama bidibao

(Dq̄l 3:5–4:18)

3 ¹Dage Krais dali hodobo ḡu pagede ma hodaluama tama gesi noma bidabo ula elaluyu bidibao. Tama tialigo da, dagego bomo elama, duga homu te dagalude elalubo naiba muao, tede elalubo nai sabo homu yao. Tede Krais aga tuni bidi duabo saide bidibao, te God aga dolo nogo badu.^j ²Sesemanę sogo dagego te Godigo bidibo digide elalubo naide homu dą̄ wao. Dagego təde naiba duga homu mugio. ³Magi baso meni. Dage isali aq̄ tiwai yai, tama dagego megı elalubo bidibo ula te Krais dali God pagede geme dulaluyu bidibao. ⁴Krais aga dago bidibo ula page

ⁱ 2:19 Ef 4:16 ^j 3:1 Tib 110:1

bidi dao. Tama nosali aga e tōba ma asama hania pedalama, tama dage me aga dali pedalaibao, tama dagego agai ula yai wiegi yai bomo meba elaluabao.

⁵Dage Kolosi bulude bidibo we bidi, dage Krais dali hodobo gū pagede ma hodaluali aq̄ tiwai ebaso, dagego te duga tigigo ebo dwai kolesaga tigidali isilao, te tōde kolesaga ebo tagalao. Te tobage kolesaga e dao: dwai penani ebo kolesaga dali, meda yai kolesaga dali, te homu hodolobo dwai s̄ yabo kolesaga dali, te habu selali nai sabo homu ebo dali, tama doado bage hauwa sainogo godolo ebo kolesaga dali. Te doado bage hauwa sabo kolesaga da, te tibo god selama tama agabolo lotu po weyu aga dologode bidibo kolesaga tiwai dao. ⁶We bidi augwaligo te tobage kolesaga dabe ebaso, te Godigo augwali dali s̄eb̄ eyu, tama augwalibolo dwai dene mabo sogo mu asaibao. ⁷Polobadu dage te bidi dabe dali bilali, tama dagego te tobage dwai kolesaga tigidali duga digi yai, tama te kolesagago dage aiyaba elaluali.

⁸Tiali goli megi dagego e tobage kolesaga tigidali sela sayao: boi bidi homu ebo dali, haliga s̄eb̄ ebo dali, gasa bidi dene mabo homu ebo dali, te nogi posobo dwai po wabo kolesaga dali, tama meda yai po wabo dali, te tigidali sela sayao. ⁹Dagego duga hasi ama dabe tibo po wabo tagaliao. Magi baso meni, polobadu dagego tigigo dwai s̄ yabo kolesaga dologode bidibo dagego tagalalio, tama te tobage dwai kolesaga ebo dagego tagalali.^k ¹⁰Tama dagego te gesi noma homu kolesaga selama elalubao. God aga digi te gesi noma bidi nigai, tama dagego aga kuna koneyu, tama aga tiwai mu pedalomainogo, agai dage sesemane sogo tau sabo dao.^l ¹¹Tama Godigo tama tibaso, megi aga gedude te we bidi haniani tedali elalubo menio. Te Juda hani isawai hani dali Juda bidi hani te si tedali gasagi yai meni. Te tigiwali togolama sa elalubo bage dali, te tigiwali togisiabo bage dali, agai gedude te tedali gasagi yai me menio. Te bulu tomode mu bidibo bidi dabe dali, te bulu yowi tiwai bidibo bage me, te augwaligo s̄ede dą̄ olama masigi sisabo s̄ ebo bage me, te olo bugagia bidibo we bidi me, Godigo gedude augwali tedali tedali gasagi gasagi yai meni. Te magigo meni. Krais aga digi naga te genuai dao, tama aga te aga we bidi tigidali deli deli tomode bidibao.

¹²Dage da, te Godigo we bidi hani dao. Agai dage dali dwagi yai homu eyu, tama dage godolo eboso tama dage aga we bidi hani pedalomainogo, agai dage te tigidali we bidi tomodu diā sali. Tama diā sobaso, bidigo aga gesi ugwa dabe gudubo tiwai gilama dagego e dwagi yai kolesaga selama tama yao: dagego we bidi hobede yao, augwalibolo dwagi yai s̄ naga yao, hagoma homu eyu duga nogi uwgaba sigio. Sesena pai homu egimio, we bidi dali dua dao. Bidigo dage dali dwai s̄ eboso da, te

^k 3:9 Ef 4:22 ^l 3:10 Gag 1:26; Ef 4:24

dagego sula tagalama səbə polo egimio.¹³ Duga hasi bidi me deligo “Eno ama dwai sə ena dali yali,” te po weyu, tama agai te dwai sə ebaso da, te agai nagame homu eyu aga amago yali dwai sə səgə sela sayaao. Dago Genuai Bidi Krais agai dagego səgə sela səwai dao. Te tiwai gilama duga hasi dagego me abagigo səgə sela sayaao.^m ¹⁴ Tama te duga hasi dwagi yai homu eyu godolo ebo kolesaga me te eno megı nogi yali haniani dwagi yai kolesagaba te polalubo kolesaga dəqə walao. Te duga hasi dwagi yai homu eyu godolo ebo kolesagago te gasa haniani wiegi yai kolesaga deliba sisinama, tama wiegi yai mu pedalama tama usu niba kadu mu waibao. ¹⁵ Krais agai da dwagi yai homu nagame ilibo kolesaga ebo dao. Tama te kolesagago dagego homu tonalumainao. Magi baso meni. Dage dwagi yai homu nagame eyu bidimainogo God agai dage deli deli i olama tama deliba sisinama, tama dage tigi deli naga tiwai pedalai dao. Tama sesemanə səgə dagego Godibolo puba hwi po weyu bidao. ¹⁶ Krais agai ola mani po te wiegi yai po mu naga dao. Tama te po dagego homude bugagia elalumainao. Duga hasi dagego wiegi yai homu kolesagago Kraisgo po ola mayu tama dua dao, e pode geda mugio, te tobage po weyu duga hasi ola mao. Tama tiyu, tama dagego haniani balia po wao, tama te lotu balia wabo buku nogi Təqbi Po Buku, te bukude elalubo Godigo nogi uwawa sabo po me, te Kraisgo nogi uwawa sabo təqbi po me, te Godigo Mobo Bidigo mabo haniani təqbi pogo me duga hasi ola mao. Dagego duga homude Godibolo usu da po weyu tama te balia po wao. ¹⁷ Tama tigidali səgə dagego po obadi ma dagego nogogo sə ebadi, te tigidali ebo kolesaga dagego dago Genuai Bidi Jisasgo nogide yao, tama agai dage dali yali səde dagego dago Aya Godibolo puba hwi po weyu bidao.ⁿ

Bede bidibo bagego yabo kolesaga po

¹⁸ Dage bidigo sai we dabe sibi, dage deli deli duga bidi dologode bidiyu agai po odao. Dage dago Genuai Bidi Krais wali pabo we bidibaso tama tiao.^o

¹⁹ We sai bidi dabe, dage deli deligo duga we dali abagi homu eyu aga bugagia tonaluao. Tama sesena pai bidigo kolesaga tiwai naga we dali egio.^p

²⁰ Wai dabe, dagego duga aya ida sigo wabo nai po tigidali odoyu wali pao. Te dwagi yai kolesaga ebogo te dago Genuai Bidi dwagi yai homu ilibo dao.^q

²¹ Aya dabe, dagego duga wai dabe dali wado po tigidali səgə olamuo, te augwali dwai homu ilibo kolesaga egimio. Dagego augwali dali te

^m 3:13 Ef 4:2, 32 ⁿ 3:17 Ef 5:19-20 ^o 3:18 Ef 5:22; 1 Pi 3:1 ^p 3:19 Ef 5:25; 1 Pi 3:7

^q 3:20 Ef 6:1

tobage kolesaga eyu da, teda augwaligo te sębę sabo homu eyu, tam dwagi yai kolesaga ebo tagalaibao.^r

22 Dage sède dàq olama masigi sisabo sè ebo bidi dabe, duga tonalubo bidigo po tigidali wali pao. Augwaligo dage dali dwagi yai homu emainu tama augwaligo dage tonalubadi naga dagego duga sè bugagia egimio. Te meni. Tigidali sogo dagego dago Genuai Bidi Krais dali wi eyu aga dologode bidibaso, tama homu mu eyu dagego duga se bugagia yao.

²³Tigidali sę dagego ebo, te sę dagego bomo elama yao. Tama dagego
duga sę ebadi e homu yao, "Eno e sę ebo, te bidi naga tau siyu ebo
duga sę ebadi e homu yao." Gənəsi Bidi. Uzunluğunu 100 m'lik

menio, te eno e sę ebogo te Genuai Bidi Krais tau sabo dao," te homu yao.

²⁴Tama tiyu dagego koneao, Genuai Bidi agai dage wei ponoyu tama

dage aga nai nosali sabo we bidi dabe ilaabao. Te Krais aga da te dagego

Genuai Bidi bidi dao, tama dagego sę ebogo aga tau sabo dao. 25 Tam

niwai bidi agai dwai sę ebaso da, teda Godigo aga te yali dwai sęde

wei ponaibao. Te nogi elalubo bage da, ma nogi meni yai we bidi da, te magigo meni, Godigo usu ni deligo naga da tigidali usu saibao.^s

⁴ ¹Dage sə bidi tonalubo bidi, dagego augwali tigidali dali kolesaga deli naga yao, te doloba pai kolesaga naga yao. Koneao, dage me te tonalubo Genuai Bidi elalubao, aga dagalude bidibao.^t

²Dage Kolosi we bidi, dagego Godibolo gedu haluasa po bomo elama oduao, tagaligimio, tama subigila wagimio. Tama tiyu, agabolo puba hwi po wao. ³Dagego gedu haluasa po obadi, Godigo da me tau somainogo te po wao, “Aya, nago po, te Kraisde polobadu gema dualali po, te po augwaligo te we bidibolo pusumainogo tü dayao,” dagego te po hanalu wao. Eno gasa we bidibolo agai po pusubaso, augwaligo ena e kalabusiba muai dao. ⁴Tama tibaso, eno agai po page hanilimainogo dagego Godibolo ena tau sao po wao. Agai enabolo te se mawai dao.

⁵Dage te Godigo obo tomoba asisawai we bidi dali bidibadi, dagego homugo kone palama tama bugagia bilao, subigila meni. Augwalibolo Godigo po pusubo sunumi dabaso da, teda augwalibolo pusao.⁶ Tama tiyu dagego wabo po sesemane sogo dwagi yai eyu tama augwaligo odai hagede emainu tama pusu yabo po naga wao. Tama bidi mego dage Godigo po pagede po me hanalu obaso da, dagego agabolo bugagia wei ponobo po kuna homu kone palama wei ponao.

Polgo te bidi si Tikikus dali Onesimus augwali si te Kolosi haniba tagala palu, siade dao wabo po silagasobo po wai

⁷Tikikus da, te dago aga dali dwagi yai homu eyu godolo ebo ama dao, tama agai dagebolo te enaba pedalali se po tigidali pusaibao. Agai te ena dali homugo kea pai bidi dao, tama agai te ena tau sabo dwagi yai se bidi

^r 3:21 Ef 6:4 ^s 3:25 Bom 10:17; Ef 6:5-9 ^t 4:1 Ef 6:9 ^u 4:5 Ef 5:16

¹⁰ Aristarkus, te ena dali Jisasgo sede kalabus elama bidibo bidi, agai siade dao te po dagebolo e pasgo ola tolobao. Tama Mak, Barnabas aga hai, dage dali agai siade dao te po ola tolobao. Dage bidibo digi aga sabaloyu da, dagego aga bugagia sao, te eno dagebolo polobadu ola tolali po tiwai agade yao.^y ¹¹ Josua, augwaligo te bidi nogi me Jastas wabo, agai me dagebolo siade dao te po ola tolobao. Aga dali, Aristarkus dali, Mak dali, augwali sela naga te Krais wali pabo Juda bage ede bidiyu tama augwaligo ena dali se eyu, te Godigo te we bidi tonalubo kolesaga pedalomainogo ebo dao. Te gasa Jisas wali pabo Juda bagego ena te sede tau sabo meni. Tama te bidi selago ena tau genuai mu sabo dao.

¹²Epafras agai dagebolo siade dao po ola tolobao. Aga me dage hani deli dao, tama aga Krais Jisasgo se ebo bidi dao. Sesemane sogo agai gedu haluasa po weyu homu daq olama, tama bomo elama weyu dage tau sabo dao. Agai homugo dage Godigo homu tigidali bugagia wali peyuu, tama tede homu si munu me isayu, tama dage bidi mu pedalama tama bomo elama bugagia dolalumainogo eyu agai gedu haluasa po Godibolo weyu, “Augwali te tiwai pedalomainogo, tau sao,” agai te po wabo dao.^z ¹³Awe, ena digi eno aga koneama, eno e po agade obao, te agai dage dali, te Laodisia hanu we bidi dali, te Hierapolis hanu we bidi dali, dage tigidali tau somainogo eyu aga se dene mu ebo dao.

¹⁴Luk, te dago aga dali dwagi yai homu eyu godolo ebo dokta bidi dao, aga dali Demas augwali sigo dage Kolosi we bidibolo siade dao po ola tolobao.^a

¹⁵Dagego eno siade dao wabo po te Laodisia hanude bidibo ama dabe, te Godigo po odobo bage augwalibolo wao. Tama eno te siade dao wabo po te we Nimfa dali, agai beba sisinibo Godigo po odobo we bidi augwalibolo me wao. ¹⁶Dagego e pas nedelama, tama dagego te Laodisia hanude bidibo Godigo po odobo we bidibolo tolao, augwaligo me e po nedemainogo eyu yao. Tama eno te Laodisia we bidibolo asena tolali pas po, te dagego me selama nedao. ¹⁷Tama dagego te bidi Arkipus aga dali e po wao, “Te Genuai Bidigo nago nogoba muani se sula tagaligio. Nage aga se ebo bidi bidibaso, te mani se bugagia silao,” te po Arkipusbolo wao.

^v 4:7 Tpi 20:4; 2 Ti 4:12 ^w 4:8 Ef 6:21-22 ^x 4:9 Flm 10-12 ^y 4:10 Tpi 12:12, 25; 13:13; 15:37-39; 19:29; 27:2; Flm 24 ^z 4:12 Kol 1:7; Flm 23 ^a 4:14 2 Ti 4:10, 11; Flm 24

¹⁸ Ena Pol da, tama ena digi eno nogogo dagebolo siade dao po asəna tolobao. Dagego ena kalabus bede bidibo te gegeda pigimio.

Eno homugo Godigo olo tau sabo kolesaga dage dali bidao. Te tama dao.

Polgo Hasia Pas Deli Tesalonaika Dabeba Aşəani

Hasia nedebo tau sabo po

Te Tesalonaika moni hanu te nabis bulu dao, te Masedonia moni tō pedai sesegede elaluali. Tama Pol teba sabolama, tama Kraisde po hasia te Juda hani we bidi dabebolo pusali. Augwali hauwa homu hasegelama tama Kraisgo po wali pabo gagalali. Tama te Juda hani isiąwai we bidi augwali me hauwa tama tiali. Tama nosali Pol te Korin hanude bidibadi, agai te Timoti te Tesalonaika hanuba tagala palali. Te Timoti ma asama, tama agai Polbolo te Tesalonaika hani tomode pedalali sę po pusali. Te tibo po ola mabo bage Tesalonaikaba asama, tama Pol nogi posobo po obaso, e pas tomode Polgo aga digi nogi tau sabo po aşəani. Tama boi bidi dabego augwali dene mani goli, te Tesalonaika we bidi augwali Krais bugagia wali pobaso, Pol dwagi yai homu eyu, te Godibolo buba hwi po aşəani. Tama augwaligo te augwa hani isali we bidide homu hauwa ebaso, Polgo te Godigo da gų pagede ma hodalueibao po augwalibolo wei ponobo po aseyu, tama gasa tau sabo homu bomo mabo po me aşəna tolali.

Pol dali aga deli sę ebo bagego me te Tesalonaika hani bagede augwaligo moni homu yali

(Dqj 1-3)

1 ¹Pol, me Sailas, Timoti dali, da bidi selago te po dagebolo aşəna tolobao, dage Tesalonaika bulude bidibo we bidibolo. Dage te God Aya me Genuai Bidi Jisas Kraisde wadolama bidibao. God agai dage olo tau selama, tama dage bugagia bida, dago homugo tebo dao.^a

Tesalonaika we bidi augwaligo God dali konealubo po dąu olama, bugagia bidai

²Tigidali sogo dago dage tigidali dali Godibolo buba hwi po weyu, dago bomo eyu, gedu haluasa po dage tau somainogo wabo dao. ³Tama dago Aya Godibolo po obadi, dagego ebo dwagi yai kolesaga te dago

^a 1:1 Tpi 17:1

gegeda pabo menio, te dago ma konebo dao. Dagego Kraisde duga homu tigidali mubaso, tama dagego dwagi yai sə ebo dao. Dagego duga hasi dwagi yai homu eyu, tau siyu ebaso, sə dene ebo dao. Tama dwagi yai homu eyu, dagego ‘Dago Genuai Bidi Jisas Krais mu aselama, da tau saibao,’ te homu eyu, tama bomo elama, dagego tonalubo dao. Tama dagego te sə ebo po dago ma koneyu, dago Godibolo buba hwi po wabo dao.⁴ Dago abagi dabe, God agai dage godolo mu eyu, agai dage aga we bidi mu da olama, sa muyu yai dao, te si dago konebo dao. Tama tibaso, dago Godibolo nage usu dao te po wabo dao.⁵ God agai dagebolo te homu yali dago mena tama koneaniwe? Dago te Godigo po dagebolo pusagasali sogo, te olo po dali naga wagasai menio. Te pode Godigo Mobo Bidi agai bomo mu eyu, tama dagego te po mu po dao homu yali, te dagego te pode homu si ebeo. Duga digi dago dage dali hodobo bidiyu tau sabo kolesaga, te dagego konebo dao.⁶ Tama dagego dago kolesaga dali, te Genuai Bidi Kraisgo kolesaga dali te kolesaga si dagego wali pabo gilama. Polobadu augwaligo da dali, Genuai Bidi Krais dali dene mani gilama, dage me Godigo po sobadi, tama dage me dene salio. Dage dene sali goli, te Godigo Mobo Bidi agai dagego homu dwagi yai mu ililio.^b
⁷Tama tibaso, te Masedonia dali Akaia dali te genuai tq side bidibo Jisas wali pabo we bidi augwaligo dagego te dwagi yai sə yali po odama, tama augwaligo te tiwai inao, te po wai. ⁸Dagego Genuai Bidigo po gasa we bidibolo pusubo te po te digibulu bulude odalio. Te po te Masedonia bulu dali Akaia te bulu side naga te po odai menio. Tigidali bulu bidi augwaligo dagego te Godibolo konealubo po dą̄ wabo po augwaligo odalio. Tama tibaso, dago dagego te sə ebo po te dago augwalibolo ma wagobeo. ⁹Dage bidibo digi da asali sogode dagego yali sə po augwa digi augwaligo dabolo pusubo dao. Augwaligo da dali pusuyu, te po wai, ‘Augwaligo te tibo god tagaliyu, tama augwaligo homu God muba muai,’ te po wabo dao, tama dage bidabo ula sabo te God agai sə bidi dage bidibao, te po wabo dao. ¹⁰Tama augwaligo te po wabo dao, dage te Godigo Ogwa dagalu tagalama e tqba ma asobo sogo te dagego tonalubo dao, te po wabo dao. Te Godigo polobadu gụ pagede ma hodolali bidi, te Jisas, tama te bidi agai da dali Godigo nosali səbə idali weyu tau sali bidi Jisas dao. Dagego te bidi asobo tonalubo po augwaligo dabolo pusubo dao.

Polgo Tesalonaika bulude sə yali po

2 ¹⁻²Dago abagi dabe, polobadu da dage bidibo digi aselama, tama dago yali sə te nai walosiwai sə menio, te dagego koneai dao. Hasia da dage bidibo digi asisabadi, da Filipai bulude bidibadi, da dene siyu,

^b 1:6 Tpi 17:5-9

tama augwaligo dago tigi doloyu, nogi posobo po weyu yai, te me dageko koneai dao. Tiali goli, da dage bidibo digi aselama, tama God agai da homu kolesaga dą̄ waliyu, tama dago boi bidi sulama, wi eyu didibili homu yai menio. Dago bomo elama, Godigo po dagebolo pusa mawai.^c

³Dago dage dali po ola mobadi, te dago te po doloyu, dwai sę yabo po dali, ili po wabo kolesaga dali, dago te tobage po wabo menio. ⁴Te menio. God agai da osola sulama, tama da usu ebaso, tama agai dabolo agai dwagi yai po pusumainogo dabolo te sę mawai. Tama tibaso, dago te po hania hanilama te po pusubo dao. Dago te sę ebo tőde we bidi augwali da dali homu dwagi yai emainogo te sę ebo menio. God agai deligo naga dago te sę ebo godolo emainogo te sę ebo dao. Tama God aga digi dago homu kolesaga tomode osola subo dao. ⁵Dagego koneai, dago te wabo pode dage homu bega somainogo dago te po wabeo. Dago te Godigo po dage dali obadi, dagego nai sainogo dago tibo po dage dali weyu menio. Tama God agai me te sę ebo gedugo suai dao, te po mu po dao waibao.

⁶Tama dago te sę ebo te tőde bidigo dago nogi ugwaba somainogo te sę ebeo, te dage me te gasa bidi me tomode te dago te sę ebeo. Te Jisas Krais aga digi da tagala palali agai sę bidi da bidibadi goli, dago bomo elama, tama dagego dabolo te genuai nogi momainogo dago te sę ebeo. ⁷Te menio. Tialima, da dage dali bidali sogo, da homu nagame yai kolesaga eyu bidali, wego aga wai dabe bugagia tonaluyu negebo tiwai eyu bidai dao. ⁸Tama dago dage godolo mu yai, tama dago Godigo dwagi yai po dagebolo te pusa mawainogo yai. Tama te sę naga menio. Dago dage tau siyu isabo te sisi eyu, te homu me dago yai dao. Magi basowe? Dago dage godolo mu eyu, te homu yai dao. ⁹Dago abagi dabe, da dage tomode bidibadi, dago sę dene ebo te tigidali dagego koneai dao. Tama dago dagebolo Godigo dwagi yai po pusubadi, tama dago te masigi sabo gasagi yai sę yai dao, te siade me hulide me yai dao. Te yali sę dagego koneai dao. Dago te sę magi baso yaliwe? Te dago dagebolo sege maidali weyu, dago te sę yai dao. ¹⁰Tama da dage Jisas wali pabo we bidi tomode bidali sogo, dago te gasagi yai mu kolesaga yali. God agai gedude dago yali kolesaga te dwagi yai mu yali. Tama we bidigo gedude dago yali kolesaga te doloba pai mu yali, tama te sę ebadi, magi dwai sę me yai menio.

Tama te yali kolesaga dagego sulama, koneai dao. Tama God me agai te dago yali kolesaga sulama, koneai dao. ¹¹Tama dagego koneai, ayago aga wai dabe dali ebo kolesaga tiwai dago me dage deli deli dali yai dao. ¹²Tama dage tulaluidali weyu, dago dagego homu kolesaga tomode hodoloyu, tama dagego homu kolesaga dą̄ waliyu yai. Tama dago bomo elama, dagebolo po mobo maidu geai, te po wai, “God agai dage dali dwagi yai homu emainogo, agai dwagi yai kolesaga mu wali pao. God

^c 2:1-2 Tpi 16:19-24; 17:1-9

agai dage i wali, tama dage aga obo tomode bidiyu, agai genuai ula yai bomo sumainogo agai dage i wai dao,” dago dage dali te po wai.

Augwaligo konealubo po dąu weyu, bomo elama, sęge dali tolai

¹³Tama tibaso, sesemane sogo dago Godibolo gedu haluasa po weyu, dago nage usu dao po wabo dao. Magi basowe? Polobadu Godigo po dago pedauwalide wabo po dagego odai. Tama te po odama, tama te olo bidigo po dao homu eyu, dagego te po sai menio. Te meni. Te po Godigo po mu dao. Tama dagego te po odoyu, dagego te homu yai, awe, te Godigo po mu dao. Tama te pogo te Godibolo konealubo po dąu wabo bidigo homu kolesagade sę bomo mu ebo dao. Te Judia təde bidibo we bidi meba augwali Godigo we bidi hani mu dao. Augwali te Jisas Kraisde homu dąu wali we bidi dao. ¹⁴Dago ama dabe, dage augwali tiwai dao. Augwali te Jisasde homu dąu obaso, te Juda bage mebago hagela ebaso, augwali dene mawai. Tama te tiwai dage me duga hanigo nogode dene sai dao.^d ¹⁵Tama te dwai sę yali Juda bage augwaligo Godigo po pusa mani profet bidi elama isai, tama augwaligo Genuai Bidi Jisas me eleyu yai. Tama tiyu, augwaligo da me ela guduluyu sela səwai dao. Tama augwaligo ebo sęde te Godigo dwagi yai homu isiąwai sę dao. Tama augwaligo tigidali bidi dali boi bidi mu ebo dao.^e ¹⁶Tama boi bidi mu bidiyu, augwaligo dago sę yabo tų pania sabo sę ebo dao. Tama te Juda hani isiąwai we bidi Godigo augwali ma somainogo, dago Godigo po augwalibolo pusainogo ebadi, te Juda bage augwaligo da dali “Te po wagio,” wabo dao. Tama tiyu, augwaligo dwai sę yali te hauwa mu yai dao, te genagi naigo pagławai tiwai. Tialima, God agai moni sębę ebo augwali pąba mu bidagasai elalubao.

Pol agai Tesalonaika we bidi augwali ma suabo homu yai

¹⁷Dago abagi dabe, Juda bage augwaligo da dage dali bidibadi ela gudulai dao. Tama tiyu, da aya ida meni yai wai bidibo tiwai yai dao, osogo. Dago dage gesabi subeo. Tialima, dago homu dage dali bidibao. Tama dago dage gesabi suainogo asabo tų gegebo sę bomo mu yai. Dago dage suainogo dago homu bomo mu yai dao. ¹⁸Tama da dage pageba asainogo yai. Ena Pol dao, tama hauwa sogo ena dage bidibo digi asainogo usu sai, te usu menio. Magi baso menio. Te dwai mobo bidi Satan agai da asabo tų dąu walio.

¹⁹Tama nosali dago Genuai Bidi Jisas e tōba ma asobo sogo te da təde we bidi aga gesabidide da dolaluaibao. Tama aga asobo sogo da dwagi yai homu eyu tonalubo dao. Tama aga asobo sogo dago te dwagi yai nai dali te dwagi yai au yabo nai dali te si waibao. Dago dwagi yai nai dali au

^d 2:14 Tpi 17:5 ^e 2:15 Tpi 9:23, 29; 13:45, 50; 14:2, 5, 19; 17:5, 13; 18:12

yabo nai dali te si de dawe? Te dage tama dao.²⁰ Awe, duga digi te dago dwagi yai au yabo nai dao. Dagede te dago dwagi yai homu mu ilibo nai dao.

Pol agai Timoti te Tesalonaika hanuba tagala palai

3 ¹Te dago dage ma suainogo hauwa sogo tonaluama, tama dago te homu yai, da nosali ma tonalugobeo. Pol me Sailas da si naga te Atens hanude bidaibao homu yai.^f ²⁻³Tama te homu elama, da sigo dago ama Timoti dage bidibo digiba tagala palai. Timoti aga te Godigo s̄e ebo bidi dao. Aga te Jisas Kraisde po pusubo bidi dao. Da sigo Timoti dage pageba tagala palai, tama agai dage bomo mayu, tama dagego Kraisde konealubo po dāu walomainogo, tama augwaligo dage dene mobaso da, dage meba bidi te Jisasgo po tagalidali weyu yai. God aga digi da te dene dali s̄ege dali te somainogo, agai da te bodolu mawai. ⁴Awe, polobadu da dage dali bidibadi, te dene dage pageba asisabadi, tama dago te po dage dali odu geai, “Nosali da dene saibao,” wai. Tama te po wali gilama tama tiwai, tama dagego sulama koneai dao. ⁵Tama te dene dage pageba asali baso, tama eno ma tonaluyu gesenge ma egobeo homu eyu, eno bidi me deli dageba tagala palai. Te eno dagego Kraisde konealubo po me dāu wabowe, te eno koneainogo te bidi tagala palai. Te dwai s̄e ebo tomoba kegebo dwai mobo tuni bidi agai dage dali te s̄e yaliwe eno te homu yali. Agai te s̄e dage dali egi sogo da, tama dago dage dali yali s̄e olo dali eyu, te nai walosiąwai s̄e egi da.

⁶Te da dagede moni homu te tiwai eyu bidali. Tiali goli, Timoti aga dage pageba sabolama, tama dage dali osogo bidiyu, tama agai dage tagasu, megı tama aga da bidibo digi ma asai. Tama aselama, agai dwagi yai po da dali pusai. Dwagi yai po pusuyu, agai te po wai, “Te Tesalonaika dabe augwaligo Godide konealubo po bugagia dāu waliyu bidibo dao. Augwaligo augwa hasi godolo mu eyu bidibo dao,” te po wai. Me agai te po wai, sesemane sogo dagego da dage dali bidali sogo homugo ma koneyu, tama dagego da dali dwagi yai homu ebo dao. Tama dagego da suabo homu bomo mu dali elama bidai, te dago dage suainogo ebo homu tiwai dagego me te homu ebo po Timoti agai da sibolo tamadi pusai, megı tama.^g ⁷Dago abagi dede, gasa bidi augwaligo dabolo s̄ege dali dene si mayu, tama da isabo tiwai yai dao. Tiali goli, Timoti agai po dabolo pusubaso, tama dago konebao, dagego Godide konealubo po me dāu wabo dao. Tama tibaso, da bomo ma selama, bugagia bidibao. ⁸Magi baso menio. Dage Genuai Bidi agai bomode bomo elama, tama aga dali bugagia wadoloyu eboso, teda te tebogo dago s̄ege dali dene dali si aiyaba elaluali. Tama elama, da moni dwagi yai homu elama, da bugagia

^f 3:1 Tpi 17:15 ^g 3:6 Tpi 18:5

bidibao. ⁹Tama tibaso, dagego te dwagi yai sę ebo po odolama, tama God agai da dali te dwagi yai homu kolesaga mabo te sęde tama magi ilama dago agabolo te nage usu da po weyu, tiwai si yaibawe? Woo, da usu egobeo. Agai dabolo yali dwagi yai sę, te sęgo dago usu da po wabo sę aiyaba mu elalubo dao. ¹⁰Tama hauwa sogo mu dago giligade me, hulide me God dali hanalu wabo po wabo dao, te da dage pageba aselama, dage pagia sainogo. Tama dagego God dali duga homu tigidali mubo sę dwasianu habuge eyu da, te dago ma paganainogo dage tau siyu, te po wabo dao. ¹¹Tama dago homugo dago Aya God, aga digi, te dago Genuai Bidi Jisas augwali sigo da dage pageba pabo tü damainogo, dago te po olama, gedu haluasa augwali sibolo hanalobo dao. ¹²Tama dagede, dago homugo Genuai Bidi agai te dagego duga hasi godolo mu ebo sę genuai mu ilimainogo dago hanalobo po wabo dao. Tama me agai dagego te gasa we bidi tigidali augwali dali godolo mu ebo sę genuai mu eyu pagana palomainogo dago hanalobo dao. Tama te dago dage dali godolo ebo sę gilama dagego te tiwai emainogo dago Genuai Bidi hanalobo po wabo dao. ¹³Tama te Genuai Bidi agai dage te we bidi dali godolo mu ebo sęde dą̄ omainogo, dago aga dali te hanalobo po wabo dao. Tama agai tama tilama, tama nosali dago Genuai Bidi Jisas aga doloba mu pai we bidi tigidali aga dali e tqba ma asobo sogo, te dage me te sogo Godigo doloba mu pai we bidi dago Aya God agai gesabidide bidimainogo, tama dago te Genuai Bidi dali te po hanalobo dao.

**Tesalonaika bagego te wiegi yai kolesaga dabe te augwa
bidibo side bomo elama pedalumainao wali**

(Dq̄i 4-5)

Mena kolesaga te God agai gedude dwagi yai kolesaga dawe?

4 ¹Dago abagi dede, dago gasa po me elalubo. Tama da te Genuai Bidigo po sela pabo bidi dabe dao. Tama tibaso, dagego e po tudiba muidali weyu, tama dago bomo elama, dagebolo e po megi obao. Polobadu dago te Godigo gedude dwagi yai dolo yai kolesaga ebo po dagebolo ola mawai. Tama dago te tobage po dagebolo ola menama, tama dagego te po odoyu, wali peyu bidibo dao. Tiali goli, megi dago bomo elama, dagebolo e po megi obao, te dagego dene siyu te tobage sę tigidali dagego bugagia mu yao. ²Tama te Genuai Bidi Jisas agai da tau selama, tama dago dagebolo te sę yao po wali, te dagego koneai dao. ³Tama te po page mu e dao, God agai dage dali ebo homu e tiwai, dagego magi dwai sę me isiąma, doloba pai we bidi mu bidao. Tama penani ebo sę dagego egimio. ⁴Tama te dwai sę isiąbo kolesaga bugagia wali peyu, tama we sabo kolesaga dage deligo bugagia koneama, tama tebo kolesaga eyu

bido, God agai homu dage dali te tiwai homu ebo dao. Tama dagego tebo kolesaga, te Godigo kolesaga naga tiwai wali pao, tqde we bidi augwaligo ‘Te sę dwagi yai sę dao’ omainogo yao.⁵ Tama we sabo sę te tiwai eyu, tama dagego te God konesiąwai bidi hanigo ebo kolesaga tiwai egimio. Te God konesiąma, augwali augwa dwai sę yabo homu kolesaga wali peyu, te bomogo, te we sabo dao.⁶ Tama God agai ebo homu e dao. Dagego te we sabo sę po bolama, tama duga abagi dali dwai sę egimio. Magi baso menio. Genuai Bidi Jisas agai te tobage dwai sę ebo kolesaga ebo bidi augwali tigidali agai wei ponobo dao. Tama polobadu da dage dali bidibadi, e sęge yai po dao homu eyu, dago te po hanilama, dage dali wai dao, dage tau somainogo.⁷ God agai da i wali, dago te dwai meda yai kolesaga wali pomainogo da i wabeo. Menio. Agai da i wali, te dago dwagi yai doloba pai kolesaga mu wali pomainogo agai da i wai dao.⁸ Tama tibaso, e po odolama ela pabo bidi, te bidi agai e tqde bidigo po naga tudiba mubeo. Te bidi agai Godigo po odolama ela peyu, aga tudiba muani bidi dao. Te God agai naga dagebolo te Dwagi Yai Mobo Bidi mani God da, te Mobo Bidi agai dagebolo mani, dage Godigo we bidi mu bidimainogo.

⁹ Te eno duga abagi dabe augwalibolo dagego dwagi yai homu ela mabo, te po eno meba asegobeo. Magi basowe? God agai te duga hasi dali dwagi yai homu mabo te kolesaga dagebolo ola menama, tama te kolesaga dagego koneyu bidibao. Tama eno dagebolo te po ma ola magobeo.¹⁰ Tama dagego dwagi yai homu duga abagi dabe te Masedonia tq tigidali tomode bidibo bidi dabe augwali dali ebo dao. Dagego te kolesaga eboso, God agai te kolesaga dagebolo ola mani, te dago koneai. Tiali ma, dago abagi dede, dago po bomo elama, dage dali obao, tama dagego duga abagi dabe augwali dali dwagi yai homu ebo kolesaga te kolesaga dagego me mu ela pao.¹¹ Dagego homu kolesaga tomode bomo elama, tama dagego homu dwagi yai nagamea peyu, tama duga bidibo bugagia tonaluao. Tama dagego duga digi duga masigi sabo sę yao, dago polobadu dagebolo te po wali gilama.¹² Dage magi nai me menia sidali weyu, te duga masigi sabo sę yao. Tama te Godigo po wali pesiąwai we bidi augwaligo dagego te dwagi yai kolesaga ebo sumainogo, tama dagego homu dwagi yai nagamea peyu, tama duga bidibo bugagia tonaluao.

¹³ Dago abagi dede o, edao. Te Godigo po wali pisiąwani we bidi augwaligo augwa homu Godiba musiąyu, te isali we bidi gü pagede ma hodalo bo sogo augwaligo tonalusiąma, tama te isibo we bidide augwali homu dene eyu, gela mu wabo dao. Tiali goli, dago homugo te Godigo po wali pelama isali we bidide te dagego bugagia koneao. Dagego te buluba bidibo we bidigo gela wabo tiwai waidali weyu, dago e po dagebolo obao.¹⁴ Da tigidaligo te Jisas aga isilama, tama ma hodaloai dao, te

dago te mu po da homu eyu, konealubo dao. Tama tibaso, da tigidali Jisas dali wadoloyu bidibaso, dago e po me konealubo dao, te Godigo te Jisasgo bomode te agai po wali pelama isali we bidi Jisas aga dali ma hodasa sela asaibao.¹⁵ Tama Genuai Bidigo po naga dago dagebolo megi obao. Nosali Genuai Bidi ma asobode, da e təde isisiawanı we bidi, da polo hasia polasa te Godigo po odolama, isali we bidi taga peyu da polo pogobeo.^h ¹⁶ Te menio. E tiwai pedalaibao. Te Godigo bomo elama po weyu, tama polalubo genuai ensel mobo bidigo i weyu, tama Godigo moni bu wabo nai biugel po weyu, tama tebo sogo Genuai Bidi Jisas aga digi dagalu tagalama, dulubo gagalaibao. Tama polobadu Jisasde konealubo po dąq olama isali we bidi, augwali polo hasia mu g̃u pagede hodaloibao.¹⁷ Tama te sogo da təde isisiawanı we bidi, Godigo da te ma hodolali we bidi dali pogo odasa dagaluba holaibao, te da te asobo Genuai Bidi tiąba pomainogo yaibao. Tama elama, da te Genuai Bidi Jisas dali sesemane sogo bidada peyu, mu bidada paibao.¹⁸ Te sę pedalama, tama da tigidali te tiwai bidaibao. Tama tibaso, dage tomode we bidi meba augwali isibaso, dagego te pogo duga hasi tau siyu, duga homu dąq walao.

Dago sisi elama, Genuai Bidi asobo tonaluao

5 ¹ Dago abagi dede o, te da dage dali bidibadi dago dagebolo dago Genuai Bidi asobo po wai. Tama tibaso, agai asobo sogode dago dagebolo po me aşəgobeo. ² Menio. Duga digi koneai dao, Genuai Bidi asobo sogo te nai wi sabo bidi hulide geme polo asobo tiwai yaibao.ⁱ ³ Tama te Godigo po wali pisı̄wai we bidi augwaligo te po waibao, “Megi te da bugagia bidabo sogo dao, te da dolabo nai pąba asogobeo,” te po waibao. Tiali goli, augwaligo te tobage po obadi, sisi isı̄wai, te sogo digi tama augwali dolabo nai polo augwaliba pedalaibao, augwali noma mu saibao. Te wede ebo sę tiwai, we mego wai ame nainogo tigide ebo dene tiwai ebo si pedelaibao, tama te we te dene wi pabo tū menio, wi sana pogobeo. Tama te tiwai te Genuai Bidi asobo sogode te Godigo po wali pisı̄wai bage augwali wi pabo tū menio.

⁴ Tiali ma, abagi dede, dage hulide bidibo menio, te Genuai Bidi asobo sogo te nai wi sabo bidi tiwai geme eyu, polo aselama, dage noma sogobe. Menio. Dage te hulide bidibeo. ⁵ Te menio. Dage tigidali we bidi giligade ula dali bidibo dao. Da be hulia sai digi huli tomode me bidibo menio. ⁶ Tama tibaso, da sisi eyu, godege piabuo, te gasa sisi isı̄ma godege pibo we bidi tiwai. Tama dago gedu pedaluyu, bugagia tonaluyu, tama dago homu kolesaga wiegi yai mu elama, bidaio. ⁷ Dago koneai, godege pibo bidi augwali hulide pibo dao. Tama bomo yai aq̃ tulama

^h 4:15 1 Ko 15:51-52 ⁱ 5:2 Mat 24:43; Luk 12:39; 2 Pi 3:10

aiyoge ebo bidi, te bidi dabe augwali te hulide naga te sę ebo dao. ⁸Tiali ma, da ulade bidibo bidi dao. Tama tibaso, dago homu kolesaga wiegi yai mu elama bidinao. Te hwıbo bidi aga hagawiade te boi bidigo elidali weyu mubo nai tiwai, tama dago Godide konealubo po bugagia selama, we bidi dali dwagi yai homu ebo kolesaga eyu, bugagia bidinao. Tebo sę si te dago hagawiade muabo dila pai nai tiwai dao. Tama Godigo da ma sabo homu bomo eyu, agai te sogo da somainogo dago tonaluinao. Tama te homu kolesaga tiwai, te dago tobolude muabo dila pai kapa madi tiwai dao, te hwıbo sogo da tau somainogo.^j ⁹⁻¹⁰Magi baso menio. God agai da bodolu mani te dago agai homu sębę ebo dago somainogo ebo menio. Woo, agai da sa muyu, te homu yai, augwaligo Genuai Bidi Jisas Krais agai augwali tobade isilama, tama augwali ma saibao, God agai te homu elama, da sa muani. Tama Genuai Bidi aga ma asobo sogo da bidiyu da, ma da isali da, te sogo da aga dali hodobo bidada peyu, mu bidada pomainogo, Godigo da sa muani. ¹¹Tama tibaso, duga hasi te pogo duga abagi dabe augwali homu kolesaga dąu waliyu, tau siyu, te po augwalibolo ola mao, tama megı dagego te ebo sę tiwai tama naga yao.

**Po silagasu wabo po tama wali, Godigo te aga po wali pabo
we bidi dabego te dwagi yai kolesaga mu saibao po wali**

¹²Dago abagi dabe, dago dagebolo te po obao, dage tomode Godigo sę ebo bidi dabe dologode dage bidao. Genuai Bidi agai te bidi dabe augwali dagego tobolu bidi nigliama bidai, tama te bidi dabe augwaligo Godigo po dagebolo ola mayu, dagego homu kolesaga dodolobo dao. ¹³Dagego homugo augwaligo sę ebo kone palao, augwaligo te sę eyu, dage tau sabo sę dao. Tama dagego augwali dali dwagi yai homu mu elama, augwali godolo mu yao. Tama dagego duga abagi dabe augwali dali deli homu elama bidao.

¹⁴Dago abagi dage tuni bidi dabebolo dago po bomo elama dage dali obao. Dagego te sę hagela ebo bidi dabe augwalibolo po bomo elama, augwali homu kolesaga dagego bugagia ma dodolao. Tama te wi ebo bidi dabe augwaligo homu kolesaga dąu walao. Tama te bomo meni yai bidi dabe augwali dali dagego dwagi yai kolesaga naga eyu bidao, sębę egimio. ¹⁵Gasa bidi dabe augwaligo dage dali dwai sę eboso da, dagego augwali dali te dwai sę ebo wei ponogio. Dagego te tiwai idali weyu, bugagia tonaluao. Tigidalı sogo dagego bomo elama, duga hasi augwali dali dwagi yai sę naga yao. Tama te sę tiwai tigidalı bidi dali me yao. ¹⁶Tama tiyu, sesemane sogo dage dwagi yai homu elama bidao, ¹⁷te dagego sesemane sogo gedu haluasa po bidada peyu me, God dali po wao. ¹⁸Te dage dali magi sę me eboso da, dagego God dali buba hwi po

^j 5:8 Ais 59:17; Ef 6:13-17

wao. Te dage Krais Jisasde wadolama, tama God agai homugo dagego tama kolesaga emainogo tebo dao.

¹⁹Dagego te Godigo Dwagi Yai Mobo Bidigo sə ebo paligio. ²⁰Bidi dabe augwaligo ‘Te God agai enabolo wali po eno dagebolo pusaibao’ obaso da, teda dagego te po olo sela sagio. ²¹Tialima dagego te tobage po wabo tigidali bugagia osola suao. Tama dwagi yai po naga dagego dąq ola siyu, ²²tama dwai sə tigidali tagalama, sela sayaø.

²³Te God aga te dwagi yai homu nagame ebo kolesaga page bidi mu dao. Tama eno homugo te God aga digi dage doloba pai mu ilaibao, aga tiwai bidimainogo yaibao. Tama eno homugo agai dagego homu kolesaga tomode sə ebo mobo bidi me, te dagego noma bidi me, te dagego tigi me God agai bugagia tonaluibaø, tama dage dwagi yai mu bidimainogo. Tama dago Genuai Bidi Jisas Krais ma asobo sogo te dage magi dwai sə isiąwai we bidi tiwai bidaibaø. ²⁴Tama te dage i wali God agai te sə dage dali mu tiwaibaø. Magi baso meni. God agai te tigidali sə yaibao wali, te sə tigidali agai ebo dao.

²⁵Dago abagi dabeo, dagego God agai da tau somainogo gedu haluasa po wao. ²⁶Dagego tede bidibo Godigo we bidi dali dwagi yai homu eyu, tama augwalibolo nogo maiqo. ²⁷Ena da te Genuai Bidigo po selo pabo bidi dao. Tama tibaso, eno dage dali e po obao, eno te aşəani po te tigidali abagi dabe augwali dali nedao. ²⁸Eno homugo te dago Genuai Bidi Jisas Krais agai olo tau sabo kolesaga dage dali bidaibaø. Ena Pol dao.

Polgo Si Wali Pas Tesalonaika Dabeba Aseani

Hasia nedebu tau sabo po

Te bidi Pol te Korin moni hanude bidibadi tama agai te hasia wali pas deli te Tesalonaika hani we bidibolo aseña tolali. Tama te pas sela pali bidi nosali ma asama, tama agai Polbolo te Tesalonaika bagé tomode pedalali së po wagasali. Bidi mebago geda muyu, tama te Krais aga polo e tøba ma asai dao po wali, tama te pogo gasa we bidigo homu dolama, tama augwaligo augwa digi tau sabo së tagalama olo bidali. Te Tesalonaika hanude bidibo Kraisgo po wali pabo we bidi dabego homude subo te tiwai yali. Te Krais ma asobo sogo mena së mu pedalugowe tama homu yali. Te bidi mebago te po weyu, te Genuai Bidi asabo sogo te pedelalio tama po obaso, te bidi Pol dali Sailas me Timoti, augwali sela bidigo te hani bage augwaligo homu dodolobo po weyu, te si wali pas aseai dao. Polgo te tiwai po weyu, te sogo pedalube dao, wali. Hasia bolo te we bidi dabego dwai hagoma mu eyu, te tobage dwai kolesaga umagi elama bomo yai mu pedelaibao. Tama te bomo yai po bolama sela sábo bidi me deli pedelama, tama agai Kraisba boi bidi mu yaibao. Tama te sogo te boi bidi dabego te Kraisgo po wali pabo we bidibolo dene dali sëge dalí si mabo po, te me Polgo odali. Tama tibaso, agai e pas aseyu, tama augwali te sëge side tau sabo po augwalibolo tolali.

Genuai Bidigo side nosali pedelaibao wali

(Dqj 1-2)

1 ¹Pol, me Sailas, Timoti, te dago te po dagebolo aseña tolobao. Dage Godigo po odama wali pabo we bidi, te dage Tesalonaika bulude bidibo we bidi dao. Dage dago Aya God me Genuai Bidi Jisas Kraisde wadolama bidibao. ²Aya God dali Jisas Krais Genuai Bidi augwali sigo dage olo tau selama, tama dage haliga nagame ilama bugagia bidao, dago homugo tebo dao.

Te Tesalonaika bage te sęę sabo sogo augwali bomo elama dolalu tulalusiąmainogo Polgo Godibolo gedu haluasa po weyu usu da wai

³Dago abagi dabe, sesemane sogo dago Godibolo usu da weyu, dago dagede homu kone palu gedu haluasa po wabo dao. Tama dago Godibolo nage usu da po wabo si, te usu si ebo dao. Magi basowe? God agai dage tau selama, tama dagego Jisasde po konealubo kolesaga mu genuai mu yai dao, tama dage deli deligo dwagi yai homu duga abagi dabe dali ebo dao, tama dagego te kolesaga ebo mę ela pabo dao. ⁴Tama tibaso, dago Godide dwagi yai homu ebo dao. Dagego te dwagi yai kolesaga ebo po dago odobaso, tama da gasa buluba biligi peyu, tama dago digi dagego ebo dwagi yai kolesaga te Godigo po wali pabo we bidi augwalibolo pusuyu, dago dagego nogi ugwaba sabo dao. Gasa bidi augwaligo dage dali dwai kolesaga eyu, tama augwaligo dage eleyu, tama dagebolo sęę mabo dao, te po dago gasa we bidibolo pusubo dao. Tama dago te po wabo dao, ‘Te Tesalonaika we bidi augwaligo tigide sęę siyu dene sobadi digi, tama augwaligo bomo elama dolaluyu, konealubo po dąę wabo dao,’ dago te po gasa we bidi dali weyu, dago dagego nogi ugwaba sabo dao.

God agai dago ebo kolesaga dolo osola subo dao

⁵Te dagego te ebo kolesagade God agai da hania tama ola mobao, agai dago ebo kolesaga osola subo si, tama agai dolo osola subo dao. Tama dagego te God agai we bidi tonalubo sę tobade te dene dali sęę dali si sai. Gasa bidi dabe augwaligo dagebolo dene dali sęę dali si mawai. Tama tibaso, God agai dage dali tama tiyu, tama dage agai we bidi hani tomode bidibo usu yaibao. ⁶God agai dolo kolesaga e tama yaibao. Agai dage dali te dwai sę yali boi bidi dali begelama wei siyu, augwalibolo dwai sę hauwa elama, tigi dene mawaibao. ⁷Tama agai dagego megı te tolobo sęę sela sənana, tama dage da dali olo bidiyu, toma tuabo sogo menama bidaibao. Agai tebo sogo Genuai Bidi Jisas aga boma pai ensel mobo bidi dabe dali dagalu tagalama, e tɔba asobo te sogo aga moni sia bogoli dali e tɔba asaibao, we bidigo bulu ulade hania sueibao, te aga asobo sogode. ⁸Tama tiwai aselama, tama te sogo God konebo hagela yali we bidi dali, Genuai Bidi Jisasgo po wali pisawanı bidi dali augwalibolo agai dene mawaibao. ⁹Tama te bidi dabe augwali e tama dene saibao, augwali Genuai Bidi gesabidide digibulu bidaibao, tama agai genuai ula dali bomo dali digibulu bidata peyu, bidata paibao, tama tiyu augwali mu dwai bidaibao. ¹⁰Te we bidi dabe augwali te Jisas e tɔba asobo side augwali te tiwai mu hagawaibao. Tama agai e tɔba asobo sogode, agai doloba pai mu we bidi augwaligo aga nogi ugwaba mu saibao. Tama konealubo po Jisasde dąę wali we bidi, augwali noma siyu, Jisas dali dwagi yai po waibao. Tama dago Godigo po dage tomode

pusulama, tama dagego konealubo po te pode dą̄ obaso, te dagego me augwali dali Genuai Bidigo nogi te sogo ugwaba saibao.

**Polgo Tesalonaika bulu we bidi tau somainogo
Godibolo gedu haluasa po wai**

¹¹ Te dago te Genuai Bidi aga ma asobo sogode homu eyu, tama tigidali sogo dago Godibolo gedu haluasa po dage tau somainogo wabo dao. Tama Godigo dage polobadu i walide, tama agai homugo dage aga wai puluba gagawaibao, agai te homu elama, i wai dao. Tama megı dago Godibolo usu da weyu gedu haluasa po agai dage tau siyu dage aga wai puluba mu gagawaibao. Dago Godibolo po e tama wabo dao, “God, te Tesalonaika we bidi augwaligo konealubo po nagede dą̄ weyu, tama augwaligo homugo haniani sę te konealubo po dą̄ wabo bidi dabego ebo sę tiwai yabo homu eyu, tama augwali dwagi yai we bidi nago gedude bidainogo tebo dao. Tama dago nagebolo po hanaluyu, nago augwali tau siyu, tama augwaligo te sę tigidali emainogo tama augwaligo te sę yabo homu tiwai,” dago te tobage po wabo dao. ¹² Tama dagego te dwagi yai kolesaga ebode dago Genuai Bidi Jisasgo nogi dagego ugwaba saibao. Tama dago God dali Genuai Bidi Jisas Krais dali augwali sigo dwagi yai homu da dali eyu, da olo mu tau mabo homu kolesaga dwagi yai mu eyu, tama Jisasgo dagego nogi me ugwaba saibao.

Bomo yai po sela səbo bidi po

2 ¹Dago abagi dede, dago Genuai Bidi Jisas Krais aga ma asiyu, tama da aga dali deliba sisiniyu ebo, tebode megı dago dage tau sabo po elalubao.^a ²Bomo elama, dagebolo te po obao, bidi mego dagebolo te Genuai Bidi asabo bodolu te pedalai dao te po obaso, dagego te wabo po odolama, dage polo homu hauwa eyu, dage homu sęgę egio. Bidi mego na eyu, Jisas ma asai dao po te bidigo odali bogo. Ma, bidi mego aga homugo digi te po waliwe? Ma, augwaligo, ‘Woo, Pol agai te Jisas ma asai dao po pasde asəna tolai dao, dabolo,’ tama me augwaligo waliwe? ³Jisas ma asobode augwaligo geda muani po dagego odamu. Te Jisas ma asobo sogo olo dali tama polo pedalogobeo. Te menio. Te sę pedalainogo hasia bolo bidi hauwa augwaligo dwai sę hauwa elama, tama God nogi gegeda peyu, tudiba mu muaibao. Te bomo yai po sela səbo dwai sę ebo bidi hasia aga bolo dago gesabidiba pedalaibao. Te bidi Godigo te moni sia bulude nosali mu dola silaibao. ⁴Tama te bidi mu dwai bidi mu dao. Tode we bidi augwaligo haniani naibolo lotu po wabo dao. Tama te bidi agai te nai tigidali dali boi bidi elama, tama te bidi aga God tiwai mu yaibao. Tama te bidi aga digi aga nogi ugwaba mu siyu, te tigidali lotu

^a 2:1 1 Te 4:15-17

po wabo nai aiyaba elalu dolama, tama te bidi aga Godigo Moni Lotu Be tempel tomode bidiyu, tama agai po weyu te po waibao, “Ena digi ena God dao,” te bomo yai po sela səbo bidi agai te po waibao.^b

⁵ Polobadu ena dage dari Tesalonaika bulude bidibadi yaide, eno dagebolo te sə nosali pedalaibao po wai dao. ⁶ Tama te bomo yai po sela səbo bidi aga asobo tū palialubao. Tama te bidi aga Godigo bodolu mani sogo naga bulu ulaba hania pedalaibao, tama dagego te konebao. ⁷ Megi te bomo yai po sela səbo kolesaga e təde geme dulalubo digi, aga sə ebo dao. Tama aga geme dulaluama, tama aga te tū palialuali bidi bogia soabo tonalubao. ⁸ Tama te tū palialuali bidi bogia solama, tama te sogo naga te bomo yai po sela səbo bidi hania bulu ulaba pedalaibao. Tama Genuai Bidi Jisas nosali asama, tama agai te bidi agai po wabo mobogo ela muaibao. Tama Genuai Bidi Jisas aga bomo dari ula dari hania pedalama, asaibao. Tama agai te bomo yai ulago te bomo yai po sela səwani bidi mu dolaibao.^c ⁹ Tiali goli te bidi pedalama, Jisasgo aga ela musiabantu, te bidi agai Satango genuai bomo selama, tama agai tigidali me me bomai sə me, bidigo isiąwai sə me, bidigo noma sabo tibo sə me, te sə tigidali te bomo yai po sela səbo bidigo te sogo yaibao.^d ¹⁰ Tama agai tigidali ili po wabo dwai kolesaga eyu, agai te hagayabo tūdu pabo bidi dabe dari tibo po waibao. Tama te bidi dabe augwaligo te Godigo mu po dago odaio homu egi sogo da, teda God agai augwali ma sigi da. Tiali goli augwaligo te Godigo mu po odobo hagela yai. ¹¹ Tama tibaso, Godigo augwaligo homu pesegelaibao, tama augwaligo te tibo po wabo mu po dao omainogo yaibao. ¹² Tama elama, Godigo mu po augwaligo homude dą̄ wasiąyu, tama dwai sə ebo kolesagade dwagi yai homu mu yai we bidi tigidali augwali Godigo po tūde sęgę mu saibao.

Godigo dage sa muyu, dage ma saibao

¹³⁻¹⁴ Tiali ma, eno abagi dede, megı dage te tobage we bidi menio. Genuai Bidigo dagebolo dwagi yai homu eyu, dage godolo mu ebo dao. Polobadu mu God agai dage sa muyu, dage ma saibao wai. Tama Godigo Mobo Bidi agai dage habu seliyu, ‘Godigo hani dao’ wai. God agai homugo dago Genuai Bidi Jisas Krais agai genuai ula dari bomo dari agai dage dari nosali dobawaibao. Tama te homu eyu, agai dage i wali, dago agai gesi dwagi yai po dagebolo pusali sogo. Tama dagego te mu po dao wai dao, tama God dari, dage dari sigo te tebo kolesagade Godigo dage ma sai. Tama tibaso, sesemane sogo dago gedu haluasa po weyu, dago Godibolo buba hwi weyu nage usu dao po wabo dao. ¹⁵ Abagi dedeo, God agai dagebolo te dwagi yai sə eboso, dage bomo elama, dago dagebolo pusali po me, pasde aşeani po me, te po tigidali mu dą̄ olama, tama bugagia bidao.

^b 2:4 Dan 11:36; Ese 28:2 ^c 2:8 Ais 11:4 ^d 2:9 Mat 24:24

16-17 Te dago Aya God agai da dali dwagi yai homu eyu, da godolo mu ebo dao. Tama tiyu, agai da olo mu tau siyu, dago homu kolesaga dwagi yai eyu, sesemane sogo bidada paibao. Tama agai da olo mu tau siyu, tama Godigo da nosali bugagia bidimainogo yaibao, da tonaluyu bidibo dao. Tama dago homugo dago Aya God dali, dago Genuai Bidi Jisas Krais dali, augwali sigo dagego homu kolesaga bomo dą̄ walomainao, tama dage tau sao, dagego tigidali dwagi yai kolesaga eyu, tama dwagi yai po naga omainogo yao. Dago homugo tama timainogo eba, tama tibaso dago gedu haluasa po obao.

**Tesalonaika hani bage augwaligo te sę ebo hagela ebo bidi
dabe dodolobo kolesagade po wali**

(Dqj 3)

Dagego Godibolo gedu haluasa po da tau somainogo wao

3 ¹Abagi dedeo, dago po me deli elalubuo. Te po e dao, dagego Godibolo gedu haluasa po da tau somainogo wao. Tama God agai da tau selama, tama dago Genuai Bidi Jisasgo po te tigidali buluba polo sela pelama, we bidi hauwa augwaligo te po odama, tama Genuai Bidigo nogi genuai emainao. Te pogo dage tomode sę polo yali tiwai gilama gasa bulude emainogo, dagego Godibolo po hanalu wao. ²Dagego koneai, bidi hauwa augwaligo Godigo dwagi yai po odoyu, homude dą̄ wabeo. Tama tibaso, te tobage mu dwai sę ebo bidi dabe augwaligo da Godigo po sela pabo bidi dali dwai sę idali weyu, dagego te sęde me Godibolo gedu haluasa po wao.

³Awe, we bidi mebago dwagi yai kolesaga mu ebo menio. Tialima, Genuai Bidi Jisas agai da dali dwagi yai kolesaga naga mu ebo dao. Tama tibaso, da we bidi agade homu dą̄ olama bidibaso, te usu yaibao. Agai dage bomo menama, tama dage tonaluyu, tama dwai haubo bidi Satan agai dage dali dwai kolesaga me egobeo. ⁴Tama me, Genuai Bidigo da ola menama, tama dago dagede te konebao, tigidali kolesaga dago dagebolo yao te po wali, te sę dagego megı̄ me ebo dao, tama nosali me dagego tama naga tiwai sę yaibao. ⁵Dago homugo Genuai Bidi Jisasgo dagego homu kolesaga dodolomainogo yai. Tama agai te sę dage dali eyu, tama dagego Godigo dage dali dwagi yai homu eyu, godolo mu ebo sę page mu koneaibao. Tama agai dagego homu kolesaga dodolama, tama Krais agai moni seğe tolaluyu, aga bomo elama dolaluali sę page dagego te me mu koneaibao. Tama koneama, dagego te sę tiwai gilama eyu bida. Dago dage dali te homu eyu, dago Godibolo gedu haluasa po wabo dao.

Godigo po wali pabo we bidi tigidali augwaligo sę yao wai

⁶Abagi dede, dago Genuai Bidi Jisas Kraisgo nogide, dago po bomo elama, dagebolo obao, dagego suali abagi agai tubo nai sabo sę ebo

hagelau, olo bidiyu, tama agai dagego dade sali po wali pisąbaso da, dagego te tobage bidi sula tagalao. ⁷Polobadu da dage dali bidibadi, tama da olo bidai menio. Tama dagego koneai, dagego dago yali kolesaga tiwai gilama tama dagego tama tiao. ⁸Tama da dage dali bidibadi dago dagego nogode tubo nai olo me sabe. Menio. Dago abeleyu naga yai. Dago sę bomo elama, tama siade me hulide me te sę dene hauwa mu eyu, tama dago dagebolo naga sęge maidali weyu tiwai dao, dage habuge idali weyu. ⁹Da da, dagego tubo nai masiąbo bidi menio. Da da, dagego po ola mabo bidi dabe dao. Tama tibaso, dago dagego nai olo sobaso, te usugi da. Tiali goli, te menio. Dago te tubo nai sabo sę ebo dagego suali. Tama dagego dago yali kolesaga wali pomainogo te sę dago yai dao. ¹⁰Polobadu da dage dali bidibadi, tama dago e bomo yai po dagebolo maiyu tama wai, niwai bidi sę ebo hagelabo homu eyu sę isiąwani te bidibolo tubo nai magio.

¹¹Magi baso dago te po waliwe? Dago odali, dage tomode bidi meba tubo nai sabo sę isiąma olo bidibo po dago odalio. Augwaligo sę me ebo menio, tigidali sogo. Augwali olo biliyu, gasa we bidigo ebo sę suyu, tama augwaligo te po ola bilibo dao. Tama dago augwaligo te dwai sę ebo po odama, tama dago dagebolo te nai magio po ma obao. ¹²Te Genuai Bidi Jisas Krais agai nogigo bomogo dago te tobage sę ebo bidi dabe augwalibolo po mobo mayu, bomo elama te po obao, augwali nagame elama, bugagia bidiyu, sę eyu, tama augwa digi nai sela tumainogo yao.

¹³Eno abagi dede, dage dwagi yai sę ebo bage, dagego dolo dwagi yai kolesaga ebo hagela egimio. ¹⁴Tama niwai bidi me deligo dago megı asęna tolali po tigidali wali pisąbaso da, te bidi dagego sulama, koneao. Tama dage te bidigo ebo kolesaga sulama, sula tagalao, digibulu bidao. Tama aga yali dwai kolesagade hale emainao, aga homu begelemainogo tama tiao. ¹⁵Tiali ma, dagego homugo aga dali boi bidi yabo homu egimio. Te menio. Dagego homugo dago abagi dao te homu elama, tama dagego agabolo po mobo ola mao.

Po silagasu wabo po

¹⁶Te Genuai Bidi Jisas aga dwagi yai homu nagame ebo page bidi mu dao. Tama dago homugo sesemane sogo aga digi dage dali bidiyu, tama dage dwagi yai homu nagame emainogo yao. Tama dago homugo haniani sę dagebolo pedalubaso da, teda agai dage dwagi yai homu nagame emainogo yao.

¹⁷Ena Pol ena digi eno te po dage tao olama, asębao. Te eno tigidali pas asębo silagasu, eno tama po naga asębo dao.

¹⁸Eno homugo Genuai Bidi Jisas Krais agai da olo mu tau sabo dwagi yai kolesaga dage tigidali dali bidao. Te tama dao.

Polgo Hasia Pas Deli Timotibolo Asəna Tolai

Hasia nedebo tau sabo po

Te bidi Pol te Godigo gesi wiegi yai po pususu biligi pobadi, aga te hanu nogi Listraba sabolama, te bulu Galesia Provins tq pedaide biliyu, tama te po tede pusali. Tama gesi bidi me deli nogi Timoti agai te po odolama tama homu hasegelama, tama Kraisgo po wali pabo gagalali. Aga te hanu Listra buludu asai bidi dao. Aga ida te Juda hani we da, te aga aya te Grik hani bidi dao. Polgo aga selama, tama augwali si biliyu, te Godigo sə haniani buluba egi pai. Te po te buku nogi Tagala Palai, te Dqj 16:1-3, tede elalubo po suao. Nosali Polgo Timoti te Efesus hanude taga soali. Agai homugo te bidi Timotigo te tede bidali Kraisgo po wali pabo we bidi hani tonalubo sə eyu, aga augwaligo toboli bidi bidaibao. Tama e pas tomode Polgo te bidi Timotibolo te haniani tau sabo po weyu, tama te we bidi hani dodolobo po wabo. Te tibo po ola mabo bage te Efesus bulude elalubaso, te bidi Polgo Timotibolo augwaligo po wabo tagala wao wali. Tama te bidi Timotigo te Kraisgo po wali pabo hani tomode elalubo bidi meba selama tama augwaligo te Godigo we bidi tau sabo səba muao, te Polgo te tobage po me asəna tolali.

**Timotigo aga digi aga ebo kolesaga bugagia tonalu, tama
Godigo po wali pabo we bidi tigidali me tonalu yai**

(Dqj 1-6)

1 ¹ Ena Pol dao, ena Krais Jisasgo po sela pabo sə bidi dao. God da, te da ma dobola sabo bidi dao, tama dago suainogo dwagi yai homu eyu tonalubo bidi deli te Krais Jisas dao, tama augwali sigo enabolo te sə yao po obaso, eno te Kraisgo po sela pabo sə bidi bidibao.

² Timoti, nage dali eno e po asəna tolobao. Te eno nagebolo Godigo po pusama, tama nago homu te poba begi peyu, tama nage te gesi noma bidi pedalali. Tama tiyu, tama nage eno ogwa mu tiwai dao. Tama eno homugo dago Aya God dali, dago Genuai Bidi Krais Jisas dali, augwali sigo nagebolo te olo tau sabo kolesagago dwagi yai sə eyu, tama homu dene eyu elama, tama nago homu nagamea peyu bugagia bida.

Tibo po ola mabo bage sagia sao wao po

³Polobadu ena te moni tq Masedonia teba painogo eno nagebolo po wali, te tiwai naga megı eno nagebolo po ma obao. Nage te Efesus hanude me bidao, tama bidi meba augwalibolo te po weyu, augwaligo te we bidi dabe augwali tibo po ola mabo tagalao, te bomonama te po augwalibolo wao. ⁴Tama wao, “Dagego te haniani olo namu po dali, te polobadu waj dabego nogi hauwade po mibo dali, te tobage po mibo tagalao,” te po bomonama augwalibolo wao. Magi baso meni. We bidi augwaligo te po odolama, tama tede po miyu, tama augwa hasi wado po wabo dao. Tama tebogo te we bidi augwaligo Godigo se yabo homu konebo tau sabo menio. Te dago te Godide konealubo po daj wabo, tebogo naga dabolo Godigo se yabo homu ola mabo dao. ⁵Tama eno augwaligo te tobage po ola mabo tagalao wali po page e dao: augwaligo eno po wali pobaso da, teda augwaligo homu te meda meniamma, tama te dwai se me dwagi yai se me dagalabo homu bugagia elaluama, tama augwaligo homu mu eyu, tama Kraisde konealubo po daj mu waibao. Tama tiyu, tama te tigidali kolesagago augwaligo te gasa we bidi dali dwagi yai homu eyu godolo mu yabo homu kolesaga hodolaibao. ⁶Bidi meba augwaligo te dwagi yai kolesaga tagalama, tama augwaligo te pabo tu me tagalama, tama augwali subigila te olo kedu meni yai po ola bilibo dao. ⁷Augwali te Godigo bomai pode te po ola mabo tisa bidi bidabo godolo homu ebo dao. Tiali goli augwa digi augwa wabo po page me konebe, tama augwaligo bomonama tama “Awe, dago gisiga koneani, te dago ola mabo po te mu po naga dao” wali goli, augwaligo te ola mabo po page me konebeo.

⁸Dago hania koneani, te Godigo bomai po da, te dwagi yai dao, te bomai pogo ebo se elalubao. Dago te bomai pogo ebo se naga eyu da, te usu mu dao. ⁹Tiali goli te me dago konea. Godigo te bomai po mani. Te bomai po da, te doloba pai we bidi dabe augwali tonaluabo po meni. Te menio. Te bomai po te haniani dwai kolesaga ebo bagebolo wai dao. Augwaligo te bomai po ola tagalama tama te po sela sabo bage dao. Augwaligo God tudiba muyu, dwai kolesaga ebo bidi dabe dao. Te Godigo kolesaga tagala po weyu, tama te tqde kolesaga wali pabo we bidi dao. Meba augwaligo augwa aya ida ela mubo bage dao, meba te gasa bidi ela muyu ebo bidi dabe dao. ¹⁰Te penani kolesaga ebo we bidi, te ogomani dali dwai dwai se ebo bidi dabe, te we bidi wi sabo bidi dabe me, te tibo po wabo bage, te po tu de tibo po wabo bidi dabe me, te bomai po dabe te tobage we bidibolo muai dao. Te tobage kolesaga te Sodom de Gomora hanu side yali kolesaga tiwai dao. Me te gasa haniani dwai se ebo bidi dabe me, te Godigo dwagi yai ola mabo po odisabo bage, augwalibolo me te bomai pogo po elalubao. ¹¹Te dwagi yai ola mabo po da, te ula yai bomo elalubo wiegi yai bidi God agai te po pusao olama enabolo mani gesi wiegi yai po tomode elalubao.

Godigo Pol aga homu dene eyu tau sali po

12 Dago Genuai Bidi Krais Jisas agai eno sə yabo bomo mobaso, tama eno agabolo buba hwi wabo dao. Agai homu ena agaba homu kę̄ pai budi bidiyu, tama agai sə yabo ena usu yaibao. Agai te homu elama, tama aga seba ena mubaso, eno agabolo nage usu da po wabo dao. ¹³ Mu tama, polobadu eno agai nogibolo dwai posobo po wabo bidi bidai, tama eno agai po odobo we bidi dabe dali boi bidi eyu, augwalibolo dene mabo sə iduai. Tama eno aga dali hagoma eyu, aga nogi dolobo sə eyu bidai. Eno Kraisde tama dwai sə yali goli, Godigo ena homu dene eyu tau sali. Magi basowe? Eno konealubo po Kraisde dą̄ wasią̄baso eno bugagia konesią̄ma, tama eno te tiwai dwai kolesaga aga dali iduai.^a ¹⁴ Tama dago Genuai Bidigo olo tau sabo wiegi yai kolesaga umabo mu enabolo eyu, tama agai enabolo te agaba homu begi pabo bomo me, te we bidi dali dwagi yai homu eyu godolo ebo kolesaga me, te kolesaga si agai enabolo olo mani. Da Krais Jisas dali wadolobaso, tama te kolesaga si agai dabolo mani. ¹⁵ E konealubo po te mu po dao, tama tigidali we bidi e po odama augwaligo homugo mu dą̄ omainao: Krais Jisas te tq̄ba dulali, te tq̄de dwai sə ebo we bidi dabe ma dobola sainogo asali. Awe, te mu po dao, tama te hasia polasa dwai sə yali bidi te ena digi tama e dao, eno yali dwai sə te gasa bagego dwai sə aiyaba elaluali. ¹⁶ Ena te hasia polasa dwai sə yali bidi te ena digi bidali goli, Jisas Krais agai ena dali homu dene eyu tau selama, tama ena ma dobola sai. Magi basowe? Te ena subo piksa noma tiwai yali. Tama nosali te gasa dwai sə ebo we bidi augwaligo te Kraisgo te dwai sə ebo bidi polo elisəbo wiegi yai kolesaga hania konemainogo eyu, agai ena dali te kolesaga naga hasia yai dao. Tama augwaligo homu aga poba begi peyu, tama bidibo ula selama, bugagia sesemane sogo bidada peyu, bidada pomainogo yaibao. ¹⁷ Tama tibaso, eno agai ena dali yali sęde homugo kone paluyu, tama aga genuai nogi me aga wiegi yai ula yai bomo me te si uwawa muyu, tama eno e po obao: “Aga te Tuni Bidi tigidali sogo bidibao. Aga me isibo meni, gamonaibao. Tama bidigo aga me subo menio. Agaduba deli naga te God mu dao. Genuai nogi me bomo me te agade sesemane sogo mu bidada peyu, bidada pomainao. Mu dao,” eno te po obao.

¹⁸ Eno ogwa Timoti, polobadu Godigo po pusubo profet bidi dabe meba augwaligo nago nosali yabo sęde mu yabo po augwaligo dabolo pusai dao. Tama megi me eno te po wali peyu, tama eno e po nagebolo obao. Tama nage me, nago te po ma koneama, tama te pogo nage tau siyu, te nago hwı̄abo nai tiwai elalumainao. Tama tiyu, tama nago bomo elama, tama nago ebo sə bugagia yao, te hwı̄bo tiwai yao. ¹⁹ Tama bidiyu, tama

^a 1:13 Tpi 8:3; 9:4-5

nago te konealubo po nago homugo bugagia dą̄ wao, te dwai sę me isiąma, tama nago te dwai sę me dwagi yai sę me dagalabo homu bugagia elaluyu bidao. Te bidi meba augwaligo te augwa dwai sę me dwagi yai sę me dagalabo homugo augwalibolo wali po ola tagaluyu ebaso, tama augwaligo Godide konealubo po dą̄ wabo tagalai dao, tama augwali hobedagia dwai kolesaga daide bidibao. Te augwali te tamu aji daidu pabo moni geba sip tiwai dao, tama tede elalubo moni masigigo te moni geba sip dolobo tiwai gilama yai dao. Augwaligo Godide konealubo po dą̄ wabo tagalai dao.²⁰ Te Himeneus de Aleksander, te bidi sigo te tiwai kolesaga yilio. Tama tibaso, augwali si eno te dwai haubo toboli bidi Satango nogoba muani, agai augwalibolo sege mawaibao. Augwali sigo sege selama, tama Godigo nogide dwai posobo po wabo tagalamainogo eno tama yai dao.

**Dago Godiba hanalu gedu haluasa po wabo kolesaga
eyu, te tigidali we bidi tau sao wali po**

2 ¹⁻² Tama tibaso, nago yabo sęde, te sę nago emainogo eno nage homu hodolobo po obao. Hasia tuni po e tama. God agai tigidali we bidi tau somainogo eyu, nago te Godigo hani we bidi tigidalibolo gedu haluasa po wao, te po wao. Tama tiyu, agai augwali tau sao po hanaluyu, tama agabolo nage usu dao po me wao. Godigo te gavman tuni bidi dabe dali, te genuai gavman sę ebo bidi dabe tigidali tau somainogo eyu, dagego agabolo gedu haluasa po wao. Magi basowe? Godigo augwali tau siyu, tama augwaligo augwa te we bidi tonalubo sę bugagia eyu da, teda da we bidi tigidali da bugagia bidaibao. Gasa bidi augwaligo dabolo sege magobeo, tama da tigidali homu nagame wiegi yai elama Godigo homu naga wali peyu, tama gasa we bidi dali bugagia bidaibao. ³ Te tobage gedu haluasa po wabo kolesaga dwagi yai dao, tama tede te da ma dobola sabo bidi God aga dwagi yai homu ebo dao. ⁴ Te agai homugo te agai tigidali we bidi ma siyu, tama augwaligo aga mu po page mu konemainogo ebo dao. ⁵ Magi baso meni. Te God deli naga bidibao. Tama te God de bidi si tomode naga dolalubo bidi deli naga te elalubao, te bidi te Krais Jisas dao. Agai God dali we bidi dali deliba sisinabo bidi dao. ⁶ Agai aga bidibo ulago digi te tagaliyu, te tigidali we bidi ma abelali. Te tama tiali kolesagade Godigo aga bodolu mani sogo da ola mani, te agai tigidali we bidi ma sabo homu ebo dao. ⁷ Tama tede Godigo ena te agai po sela pabo sę bidi mubaso, tama eno agai po pusubo sę elalubao. Eno mu po naga obao, eno tibo po me wabeo, te Israel hani isiąwai bidi dabebolo po ola mabo tisa bidi agai ena nigelili, te eno augwalibolo te Godigo mu po dali te Kraisde konealubo po augwa homugo dą̄ wabo kolesaga me eno ola momainogo yali.

⁸ Tama eno homugo te tigidali bulu bidi dabe augwaligo gedu haluasa po omainogo homu ebao. Eno homugo augwali Godigo kolesaga naga

wali pabo bidi dabe bidu, tama haliga səbə me wado po wabo tagaliyu, tama augwa nogo uwabawa siyu, te augwaligo gedu haluasa po omainogo ebo dao. Nago augwalibolo tama tiao po wao.

We dabe sibigo yabo kolesaga po

⁹Eno homugo te we dabe sibigo me augwa gudubo ug Wade homugo bugagia kone paliyu, augwa nogi uwabawa sabo kolesaga te ug Wade elamuo, te bidigo homu hodolobo sə me elamuo. Augwaligo te tobolu nisi me te tigi me te haniani bis dabego badi, te wiegi yai kapa golgo me te moni masigigo sabo ug wago me, te augwa tigi dali tobolu nisi me au ilama elamuo.^b ¹⁰Menio. Te we dabe sibi augwaligo te Godigo homu wali pabo homu eyu da, te augwaligo we bidi tau sabo haniani wiegi yai sə yao. Te da te augwa au ilibo nai tiwai mu dao. ¹¹Te we dabe sibi augwa digi aiyaba elaluama, tama pedauwali pania selama, tama po ola mabo bidigo wabo po sao. ¹²Te Godigo po odobo we bidi hani tomode te eno te we me deli te po ola mabo tisa bidi ma te bidi dabego tobolu we bidimainogo me gogolobo menio. Te menio. Te we dabe sibi augwali te pedauwali pania selama, tama bidigo wabo po naga odao. ¹³Magi baso meni. Te tiwai yai: Godigo Adam bolo hasia nigali, tama nosali agai te we Iv nigai dao.^c ¹⁴Tama me te Adamgo tibo po homude dəq me wabe. Wego te tibo po homu dəq olama, tama agai Godigo bomai po bolali.^d ¹⁵Tiali goli te we dabe sibigo te wai dabe ame nabo sə yaibao. Augwaligo te wai ame nabo kolesagade Godigo augwali ma dobola saibao. Tama augwaligo Godiba konealubo po sesemane sogo dəq weyu, tama we bidi dali dwagi yai homu ebo kolesaga wali peyu, tama augwali dwai sə isəbo kolesaga me wali pabo sə isəma bugagia bidiyu, tama wiegi yai homu elalubaso da, teda Godigo augwali ma dobola saibao.

Te Godigo po odobo we bidi tonalubo bidigo wiegi yai kolesaga yao po wali

3 ¹E po te mu po dao: bidi me deligo te Godigo po odobo we bidi tonalubo homu ebaso da, te bidi aga wiegi yai sə godolo eba. ²Tama nago te Godigo we bidi tonalubo bidi nigiyu tama aga e tama bida. Aga dolo mu bida, tama te bidi dabe augwaligo agade te dwai sə ebo me gegegobeo. Aga te we deligo bidi naga bida. Aga homu bugagia dodolama tama dulaluao. Agai aga digi kolesaga bugagia tonalua. Aga subigila bidibo bidi bidamu. Te aga te Godigo po odobo gasa buludu asali we bidi agai aga beba sabo bidi bida. Tama aga te Godigo po ola mabo səde aga usu yao. ³Aga te bomai aq̄ tulama te esela pabo bidi tiwai bidamu. Agai səbə polo eyu, bidi eleyu me egobeo. Menio. Agai te bidi

^b 2:9 1 Pi 3:3 ^c 2:13 Gag 2:7, 21-22 ^d 2:14 Gag 3:1-6

dabe dali imilai homu nagame yao. Agai te wəbi subigila hwigio. Agai homu te monede kuna dą̄ me olamuo. ⁴Aga bugagia kənasa bidiyu, agai te aga digi we wai puluba bugagia tonaluyu, tama te wai dabe aga dologode bidiyu, te augwaligo agai po wali pomainogo yao. ⁵Magi baso meni. Te bidigo aga digi aga we wai puluba bugagia tonalusiąbo bidi da, aga te Godigo po odobo we bidigo tobolu bidi bidibo te usu me egobeo. ⁶Te tamadi gesi noma baptais tamadi sali bidi te tonalubo bidi sə munu me menamuo. Tiyu aga te hagoma ebaso tama Godigo aga dali po tū elama dene mayu, te agai Satan po tū yaligia tiwai elama sela səwanı. ⁷Te bidigo wiegi yai nogi te Godigo po odisawani bidi dabe augwali tomode elalubo bidi, te aga naga te tonalubo bidi sə ebo usu yaibao. Te aga nogi wiegi yai me elalusiąwani da, teda aga dwai sə eyu, tama aga hale elama, tama te Satango hagani togobo wago te aga saibao.^e

Te Godigo po odobo we bidide sə ebo bidi po

⁸Te nago te Godigo po odobo we bidi tonalubo sə tau sabo bidi dabe nigliu, augwali me e tama bidao. Te homu mu naga eyu, te wiegi yai kolesaga ebo bidi bidao. Augwali te bomai aji tulama esela pabo bidi tiwai me elamuo. Augwali te gasa bidi dabego mone dabe anomā elama sabo homu ebo bidi bidamuo. ⁹Te augwaligo dwai sə isiąma tama augwali homu wiegi yai elaluyu, tama augwaligo te polobadu geme dualali po, te Godigo Kraisde dabolo waselali konealubao po homugo dą̄ olama bidao. ¹⁰Te hasia dagego augwaligo ebo kolesaga usu sao. Tama augwaligo kolesaga dolasa elama tama po meni baso da, teda augwali te tau sabo səba muao.

¹¹Tama te bidi dabe augwaligo we dabe, te we dabe te wiegi yai kolesaga ebo we bidao. Augwali te posobo po wabo we dabe bidamuo. Te augwaligo augwa homu bugagia dodolama tama bidao. Sesemane sogo te augwaligo wiegi yai dolo kolesaga naga yao.

¹²Te tau sabo bidigo we te deli digi naga selama bidao. Agai te aga we wai bugagia tonaluao. ¹³Te bidi dabe augwali te Godigo po odobo we bidi tau sabo sə bidi bidiyu tama wiegi yai sə eyu da, teda we bidi gedude augwali nogi wiegi yai elaluaibao. Tama augwaligo te Krais Jisasde konealubo po bomo elama pusubo usu yaibao.

Godigo po page megı waselali kolesaga po page te genuai nai mu da po wali

¹⁴Eno homugo ena nage bidibo madi tamadi asaibao. Tiali goli megı eno e pas nagebolo asəna tolobao. ¹⁵Magi baso meni, ena polo sabalisiabaso da, teda nago e pas selama tama nedama, tama nago nage Godigo hanide bugagia

^e 3:7 Tai 1:6-9

bidabo kolesaga po tede koneagameo. Te God aga da te bidibo ula elalubo God dao. Te agai po odobo we bidi hani augwali da te Godigo be tiwai we bidi dao. Tama augwali te Godigo mu po tolalubo te bomai ni pos dali kau ni me tiwai elalubo dao.¹⁶ Awe, mu tama, te polobadu geme dualali po, te Godigo dabolo waselali konealuabo po page te genuai mu elalubo, tama bidigo te pode te po mu menio wabo te usu me egobeo. Te konealuabo po e dao:

Aga te tigi elalubo bidi mu pedalali, tama hania hanilai.

Tedali Mobo Bidigo we bidibolo ola mani, te bidi aga dolo mu yali.

Te dagalude mobo bidi ensel dabego aga suai.

Tama po pusubo bidi augwaligo agade po te tigidali we bidi hanibolo pusigi pali.

Te tqode bidi dabe augwaligo konealubo po agade dą̄ wai.

Te Godigo aga dagaluba odasa holama, tama megı́ aga bomo dali, genuai nogi dali selama bidibo dao.

Tibo po ola mabo bidi dabe augwaligo po waibao

4 ¹Godigo Tedali Mobo Bidigo hanilama te po wai: nosali sogo bidi meba augwaligo te Kraisde konealubo po tagalaibao wali. Te augwaligo te tibo po wabo dwai haubo noma bidi dabego ola mabo po odama, tama augwaligo te dwai haubo noma bidigo po wali paibao. ²Bidi meba augwaligo dwai sę dali dwagi yai sę dagalabo homu te isali tiwai dao. Tama tibaso augwaligo augwa ebo sę dagalisiayu tama augwali tibo po wabo bage dao. Tama “Eno mu po naga obao,” wai goli, augwaligo te dwai haubo noma bidi dabego tibo po naga ola mabo dao. ³Tama tiyu, augwaligo e tiwai po ola mabo dao, “Dagego te we sabo sę elamu, te sę habu selai sę dao,” te po augwaligo ola mabo dao. Tama me augwaligo haniani tubo nai me badu habu selebo dao. Tiali goli Godigo te nai dabe nigali te da bidigo konealubo po dą̄ weyu tama agai mu po koneani we bidi, dago te nai dabe selama tuyu, tama Godibolo gedu haluasa po weyu ‘Nage usu da’ omainogo yai. ⁴Magi baso meni. Dago koneani, te Godigo nigali nai tigidali, te wiegi yai naga yai. Tiyu dago sayabuo. Dago Godibolo usu da weyu gedu haluasa po olama sao. ⁵Te Godigo te naide polobadu wali po dali, te dago gedu haluasa po wabo po dali, te po sigo te nai wiegi yai ilama pedalubo dao. Tama tibaso, te nai dago tuagameo, po meni.

Timoti te Kraisgo wiegi yai sę bidi bidimainao

⁶Nago te eno megı́ aşənai po te dago ama dedebolo mobaso da, teda nage te Jisasgo wiegi yai sę bidi bidaibao. Tama tiyu, te konealubo pode

me, te nago wali pabo tigidali wiegi yai kolesaga ola mabo po me, te po side nago genuai bomo bugagia sidu bideibao. ⁷Tiali goli te haniani olo namu po dali, te haniani kedu meni yai po dali, te tobage po mibo te nago odogio, te tudiba muao. Te tobage olo po dago God bugagia koneabu tau sabo po menio. Bomo elama, nago naga digi te Godigo kolesaga wali pabo se ola mayu bidao. ⁸Nago koneani, te dago tigigo se ebogo te tigibolo bomo mobaso, tebogo da tau sabo dwasianu usu ebo dao. Tiali goli Godigo kolesaga wali pabogo te da tau sabo te hauwa mu ebo dao. Te se ebogo da meg i te bugagia bidibo ula mabo dao, te nosali bidabo ula tau sabo me te usu yaibao. ⁹Te po mu tama wali, tama te po tigidali bidigo odama, tama augwaligo homu te poba begi pobaso, te usu yaibao. ¹⁰Tama da Godigo kolesaga wali pabo, tebogo da meg i me, nosali me tau sabo usu baso, dago bomo eyu se dene mu ebo dao. God da, te tigidali we bidi ma sabo bidi da, tama agai te Kraisde konealubo po augwa homugo daq wali we bidi da mu ma dobola sabo bidi dao. Tama tibaso, dago te bidibo ula elalubo Godiba homu begi pelama, tama agai da somainogo dago aga tonalubo dao.

¹¹Nago bomonama te po te Godigo we bidi augwalibolo pusao, tama augwaligo wali pomainogo ola mao. ¹²Augwaligo suali, nage gesi bidi homu ebo, tiali goli augwaligo homugo nage te olo bidi yali homu ebo gogologio. Menio. Nage te polalubo bidi bidao. Tama tiyu, tama nago po wabo kolesaga me, te bilibo me, tama nago we bidi dali dwagi yai homu eyu godolo ebo kolesaga me, te nago Godiba homu begi pabo kolesaga badi, tama te magi dwai se isiqwai wiegi yai kolesaga nago ebo augwaligo suyu, tama augwaligo homu Godiba begi pabo we bidi augwaligo nage wali asaibao. ¹³Ena nago bidibo digi nosali asaibao. Te sogo nago ena tonaludu digi, nago te Godigo bukude aseani po aga hani we bidibolo nedebi se yao. Tama augwalibolo Godigo po pusuyu tama ola mayu bidalua. ¹⁴Polobadu te Godigo po pusubo bidi augwaligo nago nosali yabo sede mu yabo po weyu, tama te monu dabe tobolu bidi augwaligo augwa nogo nago toboluba muani. Tama te sogo Godigo nago se yabo bomo dali, homu kolesaga dali nagebolo olo manio. Te mani nai tagaligio. Te mani bomogo me, te homu kolesagago me nago naga se yao. ¹⁵Tigidali bidigo nago ebo te pua pai holobo ni tiwai se sumainogo eyu, tama sesemane sogo nago te Godigo we bidi tonalubo se bomo elama bugagia yao. ¹⁶Tama naga digi ebo kolesaga me, te we bidi ola mabo se te bugagia tonalua. Tama tidua. Nago tama tiyu da, teda naga sego digi nage dali nago po odobo we bidi dali ma dobola saibao.

We bidi dodolobo wiegi yai kolesaga po

5 ¹Te Godigo po odobo we bidi hani tomode te monu dabe tobolu bidi me deligo dwai se eyu da, nago aga te dwai sede ma dodoloyu

tama nago agabolo sesena pai po me olamuo. Menio. Nago po nagame elama dua digi dodolao, te naga aya monu dodolobo tiwai gilama yao. Tama nago te gesi ogwa bidi dabe dodoloyu, te naga ama dodolobo tiwai gilama yao. ²Tama nago te mosi dabe dodoloyu, te naga ida mosi dabe dodolubo tiwai gilama yao. Tama nago te gesi we dabe dodoloyu, te naga abe dodolubo tiwai eyu, te wiegi yai dolo homu naga ebadi augwali dodolao. Mena bidi nago dwai sède dodolabo homu ebo bidi, nago sesena pai homu eyu dodologio.

³Te we me deli aga bidi isai digi, tama we agaduba mu bidibaso da, teda nago te Godigo po odobo we bidi augwaligo te we tama bidibo koneama tama augwaligo augwa mone gego te we tau sao po wao. ⁴Tiali goli te bidi isai we me deligo te aga wai genuai yai me, ma aga waigo wai te genuai yai elalubaso da, teda augwaligo bugagia koneao: te augwaligo polasa yabo sè te augwaligo Godigo po wali peyu, tama augwa hani we bidi bugagia tonaluyu, tama augwali polobadu dwasianude aya idago bugagia tonaluali tobage kolesaga wei ponoyu tonaluao. Awe, Godigo te kolesaga godolo mu ebo dao. ⁵Tama we aga bidi isai madi, tama we agaduba mu bidiyu aga tau sabo bidi meni baso da, teda te wego te tiwai kolesaga ebo dao: agai Godiba tialuyu, tama Godigo aga tau somainogo eyu giligade me hulide me te agai Godiba gedu haluasa po weyu ena tau sao wabo dao. ⁶Tiali goli gasa we me, te aga bidi isai madi, tama te wego te tigigo ebo kolesaga naga wali pabo homu eyu, tama dwai kolesaga eboso da, teda aga tigi bididubadi goli aga bidibo noma te Godigo gedude isai dao. ⁷Nago bomonama te eno tamadi wali po te Godigo po odobo we bidi augwalibolo pusao. Awe, augwaligo tama temainao, magi baso meni, augwali te gasa we bidigo gedude augwaligo dwai kolesaga elalugobeo. Tiyu gasa bagego po augwali dali elalugobeo. ⁸Eno te po magi baso obawe? Te bidigo aga deli hani dabe me, ma aga kaneme deli hani digi te bugagia tonalusiwani da, teda te bidigo aga Godide konealubo po te tudiba munama tama agai ebo kolesaga te dwai mu elama, tama tebogo te Godigo po odisawai bidi dabego ebo dwai kolesaga te aiyaba elaluabao. Te Godigo po odisawai bidigo augwa digi te tiwai dwai kolesaga me ebeo. Menio! Augwaligo te augwa bidi isai we dabe, te augwaligo bugagia tonaluyu tau sabo dao.

⁹Te augwali tau sabo hani bage meni yai wilawe we elalubaso da, te Godigo po odobo we bidi hani augwaligo augwa mone gego te tobage wilawe we tau somainogo eyu, augwaligo nogi te bukude dago asebo dao. Te bukude nogi elalubo wilawe we dabe naga augwaligo te tau sabo mone sabo dao. Tama nago te bidi isai we dabe nogi te bukude olo asegio. Menio. Te bidi isai we aga kibu be bidi sese sela wali, te tobage bidi isali we aga bidi deli naga dali bidali mosi we elalubaso da, teda aga nogi naga nago aseqo. ¹⁰Tama e tobage haniani wiegi yai sè yai nogi elalubo

we tiwai: agai te aga wai puluba bugagia tonaluali. Tama agai te gasa bulu we bidi augwali te agai beba asobode nai mayu yali. Tama imilai homu eyu, agai te Godigo po odobo we bidi tau siyu səqə we tedabo sə yai dao. Tama agai te səqə dali dene dali sali we bidi dabe tau siyu yai. Tama te wilawe we aga te tobage haniani we bidi tau sabo dwagi yai sə ebo kolesaga wali pabo we bidali da, teda nago te tobage we dabe augwali naga nogi te bukude aşəqə.

¹¹⁻¹² Tiali goli nago te augwa bidi dabe isai, te gesi we dabe augwali nogi aşənamuo. Menio! Te augwaligo homu hodolama tama te bidi dali ma pabo homu ebo si, te augwaligo Krais te tudiba muaibao. Tama tiyu, tama augwaligo agai səde te hasia dəqə wali po augwaligo togolama, tama tede səqə saibao. ¹³ Tama gasa dwai kolesaga me augwaligo koneabao. Augwaligo sə isayu tama augwali tigidali we bidigo beba olo pabo kolesaga saibao. Te kolesaga naga egobeo, te gasa dwai kolesaga me yaibao. Augwaligo te gasa we bidi dabe augwaligo po anomā elama tama po sabilibi sə eyu, tama augwalibolo posobo po weyu yaibao. Te po augwaligo tedela paibao, haniani beba. Tama tiyu, tama augwaligo me te hogwa sa wali po togolama, tama augwaligo gasa we bidibolo subigila pusaibao. ¹⁴ Tama tibaso, augwaligo tama idali weyu, eno homugo Timoti nago te bidi isai gesi we dabe te augwali bidigo ma sao po wao, tama wai ame nobaso, te augwa hani tonalubo sə yao. Te augwaligo tama tiyu da, teda, te da dali te dwai po wabo boi bidigo tū gegabo usu meni yaibao. ¹⁵ Eno tama tiwai po te gesi we dabede wali, magi baso meni, te we dabe mebagi te Kraisgo səde dəqə wali po te tagalama, tama augwaligo te Satan wali pabo gagalai dao. ¹⁶ Te Kraisde konealubo po dəqə wali we me deli te aga hani tomode te aga bidi dabe isai we dabe meba elalubaso da, teda te we aga digi te bidi isai we dabe tonaluyu tau sao. Te tau sabo sə te Godigo po odobo we bidi hanibolo te wego munamuo. Meni. Augwaligo te agaduba deli mu bidibo wilawe we dabe, te augwali tau sabo bage meni yai we dabe, augwaligo te tobage we dabe tau siyu tonalumainao.

Tobolu bidi dabede wali po

¹⁷ Te Godigo po odobo we bidi hani tonalubo monu dabe, augwaligo te sə bugagia eyu da, teda te hanigo augwaligo nogi ugwbaba siyu, tama augwalibolo te augwaligo sabo pe mone mayu, tama meba ugwdadu manuma mao. Te tonalubo bidi dabe tomode te bidi dabe meba augwaligo te sə eyu, tama augwaligo me te Godigo po pusuyu tama te we bidi dabebolo ola mabo sə bugagia eyu te sə dene yali, te tobolu bidi dabe augwalibolo te manani masigi polasa mao. ¹⁸ Magi baso meni. Te Godigo po bukude te Mosesgo polobadu e po aşəani, “Te nai wit ge bo selā somainu te nago bulmakau agai sə eyu tama te ge dabe səqago agabadi, nago aga gani te bonogo dəqə wagio, aga te ge meba tumainao,” te po

asəani. Te tobage po me elalubao, “Te sə bidigo aga mone sabo usu dao,” te po wai dao.^f ¹⁹Tama bidi me deligo naga te po waibao, “Te Godigo po odobo we bidi tonalubo bidigo dwai sə yali” po obaso da, teda nago te po odogio. Tiali goli bidi sigo ma selago te po obaso da, teda nago odao, te bidi osola suo.^g ²⁰Tama tiyu, toboli bidi dabe mebago te dwai sə yaibaso da, teda nago te Godigo po odobo we bidi augwali tigidali gedude te dwai sə yali bidibolo “Nago te dwai sə yilio, te kolesaga tagalama, tama Godigo po wali pabo ma gagalao,” te po wao. Augwaligo gedude tama eyu da, tama gasa toboli bidi dabe augwali me te tiwai dwai sə ebo wi elama tagalumainao.

²¹ Te God me, Krais Jisas me, te Godigo dią sali ensel mobo bidi dabe, te augwaligo gesabidide eno nagebolo dolo mu obao, te eno megi tama nagebolo asəani ola mabo po nago bugagia wali pao. Tama tiyu, tama nago te toboli bidi dabego yali sə osola subadi, nago te bidi me delide wei ebo abagi homu eyu, tama gasa bidi me delide dwai homu eyu munu te tiwai elamu dao. Te bidi dabe osola subo sə te nago dolo mu naga yao. ²²Tama me nago te bidi me deli polo selama, tama aga bugagia osola susiąbadi, tama nago nogo aga toboluba muyu, tama aga te Godigo we bidi tonaluabo toboli bidi nigliamuo. Magi baso meni. Te nago aga polo te toboli bidi nigliama tama agai dwai sə eyu da, teda nago aga te dwai sə ebo tau sali tiwai waibao. Tama idali weyu, dua dao. Nago te naga digi bugagia tonaluyu, tama dwai sə me deli isiąwai bidi bida.

²³Timoti, nago te olo wę naga tubo kolesaga tagalao. Tama te hauwa sogo te tigi bomo silabo gasi nageba pedaliyu ebo, tama te gasi sela sawainogo da, teda nago te naga tabi tau sainogo te nago dwasianu wain wę dali tuao.

²⁴ Te Godigo po odobo we bidi hani toboli bidi niglibo səde eno e po me nagebolo obao. Nago te bidi dabe hasia osola subadi, e po ma koneao. Te bidi mebago dwai sə dabe hanilama hania mu elaluyu, tama augwali te po tū yabo madi poligi pobaso, tama dago augwali polo dagalama koneani. Tiali goli bidi mebago dwai sə geme dualaluama, tama nosali naga hania hanilama pedalubo dago subo dao. ²⁵Te wiegi yai kolesaga me te tiwai naga dao. Te wiegi yai kolesaga dabe me te hania elalubo dago subo dao. Tama meba dwagi yai kolesaga te we bidi dabego ebo te hania polo me pedalisiyu yali goli, te me sesemane sogo geme me dualugobeo. Menio! Nosali dago te me koneaibao.

Olo sə ebo bidi dabede po wali

6 ¹Te nago bidibo digi Efesusde bidibo Godigo po odobo we bidi augwali meba te masigi sisabo olo sə ebo we bidi dabe dao.

^f 5:18 Bom 25:4; Mat 10:10; Luk 10:7 ^g 5:19 Bom 17:6; 19:15

Augwaligo augwa genuai bidigo sę eyu augwaligo tama tiwai homu yao, “Te ena genuai bidi aga te wiegi yai bidi, tama eno aga nogi uwababa sabo te usu dao. Agai te sę yao wabo po eno odaibao,” augwaligo te homu yao po wao. Tama te sę we bidi dabego te tiwai homu kolesaga eyu da, teda te genuai tonalubo bidi dabego te Godigo nogide me te Godigo po me te si dali dwai posobo po wabo kolesaga me egobeo. ² Me ma, te olo sę ebo bagego genuai bidi aga te Godigo po odobo bidi bidiyu da, teda te sę ebo bidi dabego te homu me ilamuo, “Te genuai bidi aga Kraisba homu begi pai bidi bidibaso, aga da te eno ama tiwai dao. Tama tibaso, ena dali eno sę tonalubo genuai bidi dali, te da si Godigo gedude tiwai si dao. Tama tibaso, eno agai po odogobeo, te tigi dene sę egobeo.” Te homu augwaligo ilamuo. Menio. Augwaligo tama homu yao: “Eno bomo elama eno genuai bidigo sę bugagia mu eyu, tama eno te tiwai aga tau saibao. Magi baso meni. Eno genuai bidi aga te Kraisba homu begi pai bidi, tama eno aga dali dwagi yai homu eyu godolo ebao.” Te sę ebo bage augwaligo te homu yao wao.

**Te mone me doado bage hauwa sabo godolo ebo homu
kolesagade te tigidali dwai kolesaga page elalubao**

Te sesemane sogo nago te we bidi augwalibolo te tiwai kolesaga eno nagebole wali po tiwai gilama te we bidi ola madubadi geao, tama augwaligo homu hodolama wali pomainao. ³ Tiali goli bidi mebago te po wali pisäma tama augwaligo bidi dabe gasa po ola mabo dao. Te gasa po te dago Genuai Bidi Jisas Kraisgo doloba pai po dali tiwai si isiąwai po dao. Tama te gasa po te dago te Godigo kolesaga wali pabo ola mabo po dali tiwai si isiąwai po dao. ⁴ Te gasa po ola mabo bidi agai te hagoma genuai eyu, te agai Godigo kolesaga dwasianunu me konebeo. Menio. Agai homu kolesaga gasi tiwai eboso, tama agai te bidi dabe dali konila po wabo kolesaga godolo ebo dao. Tama subigila te dwasianu po pagede te po si wado po wabo ebo tiwai kolesaga me agai godolo ebo dao. Te tobage konila po wabode te tiwai kolesaga pedaludu gebo dao: augwaligo dwai homu gasa bidi dabe dali eyu, tama augwaligo augwa hasi konila po weyu, tama posobo po wabo, tama augwaligo te homu ebo dao, ‘Te gasa bidigo dwai sę yabo homu ebao.’ ⁵ Tama sesemane sogo augwaligo wado po subigila weyu ebo dao. Te tobage bidi dabe augwali te gagea pai homu ebo bidi pedalama, tama augwaligo te mu po te augwa homude däę wabo tagalai dao. Augwaligo homugo te Godigo kolesaga wali pabo te bisnis ebo sunumi augwaliba bugagia pedalama, tama mone hauwa siyu, tama walu hauwa sabo mone bidi pedaliba homu ebo dao.

⁶ Mu tama, te bidigo Godigo kolesaga wali peyu, tama aga homude te tigidali nai te aga usu yali da homu eboso da, teda aga te wiegi yai doado bage hauwa elalubo bidi tiwai yaibao. ⁷ Dago koneani, te idago da ame

nenama tama da tqde pedalali, te sogo dago magi nai me deli sela asobeo. Menio. Te da olo naga asai. Tama nosali sogo da isibo sogo tama te tq tagalobode te dago magi nai me deli te dago isibo noma bidigo me sela pogobeo. Menio! ⁸Tama tibaso, dago tubo nai me ugwa me elalubaso da, teda dago dwagi yai homu pemene idu te homu yao, “Te naigo ena usu ilali. Ena dwagi yai homu pemene ebo dao,” te homu yao. ⁹Tiali goli te doado bage hauwa saio homu ebo bidi dabe augwali te buside bidibo uni kibu dabego te nai tugi painogo te denami odobo tiwai ebo dao. Tiali goli te kibu aga te dedagede tulaluyu isabo homu me konegobeo. Te moneba homu konebo bidi dabego homu te tiwai ebo dao. Te augwa homu te moneba dą olama, tama augwaligo te haniani dwai kolesaga wali peyu, tama te homu kolesaga meni yai bidi tiwai bilibadi, te augwa digi dene mabo kolesagago augwali dą wabo dao. Tama tiyu augwa digi dolama, tama augwali dwai mu hobedagia bidaibao. ¹⁰Magi baso meni, te mone godolo homu ebo kolesaga te tigidali haniani dwai kolesaga page mu elalubao. Te bidi meba augwaligo te bomo elama te mone godolo eboso, tama te kolesagago augwali kegelama tama augwaligo te Kraisde konealubo po tagalai digi, tama augwa yali dwai sę hauwago te augwali homude enani tama genuai dene mu tolali.

**Timoti nage tau sabo po nago bomonama uda baso da, te
bidibo ula selama, sesemane sogo bidata paibao**

¹¹ Te bidi dabe meba augwaligo te doado bage hauwa saio homu eboso tama tiwai dolaibao. Tiali goli Timoti, nage da te Godigo bidi da olama, tama nago te tobage dwai sę ebo kolesagaba tudi ola mao. Me ma, nago te bomo elama te doloba pai kolesaga badi, te Godigo godolo mu ebo kolesaga me, te Kraisde konealubo po dą mu wabo kolesaga me, tama te gasa ama dabe godolo ebo kolesaga dolo wali pao. Tama te bomo elama dolaluyu, tama te boi bidi dabego mabo sęgę tigidali bugagia tolobo kolesaga me, tama augwali dali nagame elama bidibo kolesaga yao. ¹²Te Kraisde konealubo po dą wabo bidi te ususu si yainogo udabo tiwai sę elalubao. Tama tibaso, nago te sesemane sogo bugagia bidata peyu, bidata pabo ula somainogo te sę bomo elama yao. Magi baso meni, polobadu nago te we bidi hauwago gedu tomode te “Ena Kraisde konealubo po dą wai dao,” te dwagi yai po nago augwalibolo pusali sogo te Godigo nage sa myu te bidibo ula saibaō wali. ¹³Te God da te tigidali nai bidibo ula menama tonalubo bidi dao. Tama Krais Jisas aga te gavman tuni bidi Pontius Pailat gedude te dolo po naga weyu, aga digi aga te Godigo we bidi tau somainogo tagala palali bidi Krais dao po wai. Tama te God badi, te Krais Jisas dali sigo gedude te tiwai po bomo elama nagebolo eno megı obao:^h ¹⁴nago te Godigo po bugagia tonaluao. Nago te gasa bagego te Godigo pode dolobo po wabo gogologio. Te

^h 6:13 Jon 18:37

nago bugagia tonaluali da, teda te pode dwai po wainogo yabo te usu meni yaibao. Nago tama tonalua pidubadi te dago Genuai Bidi Jisas Krais te ma asobo sogoba usu nagasu tama Krais aga hanilama hania pedalaibao.¹⁵ Aga ma asobo sogo te Godigo aga digi sa muani bodolu sogo elalubo, te sogo te dolo sogo mu naga yaibao. God naga te dwagi yai homu pemene ebo page bidi, tama agaduba deligo naga tigidali se yabo bomo elalubao. Agai te tqde tuni bidi dabego Tuni Bidi, tama aga te genuai bidi dabego Genuai Bidi dao.¹⁶ Agaduba deli naga te munu me isisabo ula page elalubo bidi dao. Aga te genuai nanobo ula tomode mu bidibo, tama da aga paba pabo te usu me egobeo. Te bidi me deligo aga munu me sube, tama aga me subo usu egobeo. Genuai nogi mu me, bomo me te agade sesemane sogo bidada peyu, bidada paibao. Mu dao.

Te doado bage hauwa elalubo bidi dabebolo wabo po

¹⁷Timoti, nago te tqde doado bage hauwa elalubo bidi dabebolo e po bomo elama wao: “Dagego te gasa bidi dabe dali hagoma me elamuo, tama dagego te tiwai homu me egio, ‘Eno doado bage hauwa elalubaso, te bugagia bidaibao.’ Dagego te homu me egio. Menio. Dagego däq wabo homugo te nai dabego augwali tau siyu bugagia bidaiba homu elamuo. Magi baso meni, te tqde nai augwaligo da tigidali sogo tau sabo usu menio. Tama dagego e homu yao, ‘Eno Godiba konealubo po däq mu olama, tama agai ena tau siyu, ena bugagia bidaibao,’ dagego te homu yao. Te dago homu dwagi yai pemene emainogo eyu, tama God aga digi te haniani dwagi yai nai te dabolo olo mu mabo dao.” Te doado bage hauwa elalubo we bidibolo te po pusao.¹⁸ Nago te augwalibolo te po weyu, tama e po me wao, “Dagego te we bidi tau sabo dwagi yai kolesaga haniani yao, dwagi yai se umabo yao, te sesemane sogo dagego doado bage te gasa bidi dabebolo olo mayu, tama te nai dobabo bidi kolesaga bugagia yao,” te po bomo elama augwalibolo wao.¹⁹ Te augwaligo tama tiyu da, teda augwaligo te augwa nosali Godigo bulude te augwali tau sabo bomo hauwa tede elaluabao. Tama tiyu da, te augwaligo sabo bidibo ula augwali te wiegi yai mu bidibo ula sabo usu mu yaibao.

²⁰Timoti, Godigo agai po nagebolo mani. Nago te po bugagia tonalua. Bidi dabe mebago te Godigo kolesaga wali pisabo olo po dabe wabo dao. Augwaligo homugo augwa wabo po te koneai kolesaga po mu dao. Tiali goli meni, augwaligo wabo po te page meni yai konila ebo po naga dao. Nago te tobage po dabe tudiba muao.²¹ Magi baso meni, bidi meba augwaligo te po wai, “Dago te mu koneanio,” te po wali. Tiali goli augwali geda mayu, tama augwaligo te Kraisde konealubo po däq wabo tagalama tama bidibao.

Te tama dao. Te Godigo olo mu tau sabo wiegi yai kolesaga te dage dali bidaio.

Polgo Si Wali Pas Timotiba Asęani

Hasia nedebo tau sabo po

Te Pol te Rom moni hanude kalabus bidibadi agai e pas te gesi pasto bidi Timoti agaba asęna tolali. Polgo koneani, te Efesus hanude te boi bidi dabe augwaligo te Kraisgo po wali pabo we bidi dabebolo mabo dene dali, sęęgę dali te genuai mu nosali pedalaibao. Tama agai me koneani, te Kraisgo po wali pabo we bidi hani tomode te tibo po ola mabo bage pedaluyu, tama te gasa we bidigo dwagi yai kolesaga ebo dolobo sę yaibao. Tama koneyu, tama Polgo te Timoti homu hodolobo tau sabo po asęani, te Timotigo te aga te we bidi tonalubo sę bugagia emainogo yai. Tama Polgo homugo te Timoti aga Romba asao, te po wali. Magi baso meni, Polgo koneani, aga digi isabo sogo pąba yagasai dao.

Te bidi Timotigo sę bomo elama ebaso, te sę bidi mu nogi te God gedude elalueibao

(Dqj 1-4)

1 ¹Ena Pol dao, ena Krais Jisasgo po sela pabo sę bidi dao. God aga homugo digi ena te sęba muani. Da te Krais Jisas dali wadolobaso da, teda Godigo te bidibo ula dabolo mawaibao. Agai te ula mabo po mu dąu walali. Tama agai ena te po we bidibolo pusigi pomainogo agai ena tagala palai dao. ²Timoti, eno nage dali dwagi yai homu eyu godolo ebo dao, nage eno ogwa mu tiwai dao, tama eno e pas nagebolo asęna tolobao. Eno homugo God Aya dali, dago Genuai Bidi Krais Jisas dali sigo, te olo tau sabo wiegi yai kolesagago te nage homu dene eyu tau selama, tama nago homu dua nagame ilama bidimainao.

Dago te Godigo po dali hale me elamu

³ Te eno wąj dabego Godigo kolesaga wali pali, te tiwai naga gilama eno me wali pobao. Tama eno te dwai sę dali dwagi yai sę dali dagalaboo homugo kone paluyu, eno te ebo kolesaga te dolo mu ebo homu ebao. Tama eno gedu haluasa po wabo, te eno hulide me giligade me obao,

sesemane sogo te eno nage homugo koneama te Godibolo buba hwi weyu, te nage usu da po agabolo wabo dao.⁴ Te eno nage Efesus bulude tagalali sogo te nago homu dene ebaso nago gedude aq̄ gelali. Tama tede eno homu ebaso, tama eno homugo eno dwagi yai homu pemene yainogo eyu, eno nage suabo homu godolo mu ebao.⁵ Eno te nago Kraisde konealubo po naga homugo dą̄ mu wali kolesagaba homu kone palama, te nago te tibo menio. Te tobage konealubo po tiwai hasia te naga auwa mosi Loisgo me, te naga ida Yunisgo konealubo po dą̄ wabo kolesaga me te tiwai elaluai. Tama eno mu koneani, homu si meni, te tiwai konealubo po te nagede me elalubo dao.^a ⁶Tama tibaso eno nago homu hodolabo po megı nagebolo obao. Te Godigo nagebolo te nago yabo s̄e me, te s̄e yabo bomo dali, homu kolesaga dali si te nagebolo olo mawai dao. Tama te nagebolo mani nai te nago homugo kone palao. Polobadu eno nogo nago toboluba mubaso tama nago te nai sai. Megı nago te sali nai ma hodolobo s̄e yao, te bidigo sia bogoli genuai emainu ponobo tiwai ilao. ⁷Magi baso meni, te Godigo da te wi ebo bage bidimainu aga Mobo Bidi dabolo me mabeo. Menio. Agai Mobo Bidigo dabolo te bomo hauwa me, te dena ama dede dali dwagi yai homu eyu godolo ebo kolesaga me, te dena digi bugagia tonaluabo bomo me, te dabolo momainogo eyu, Godigo aga Mobo Bidi dabolo mani.

⁸Tama tibaso, nago te dago Genuai Bidi Jisas da, te Godigo sa muani te we bidi tau somainogo tagala palali bidi Krais dao, te po te we bidibolo pusubo te hale me egio. Tama eno te po we bidi meba augwalibolo pusubaso, augwaligo ena kalabusiba muani. Tiali goli nago enade me hale me elamu. Menio. Nago bomo te Godide selama, tama ena dali te Kraisde wiegi yai gesi po pusubo s̄ede seğ̄ tolao. ⁹Godigo da ma dobola selama, tama da aga we bidi mu bidimainu agai da i wali. Agai te dago dwagi yai kolesaga ebaso, te homu elama tama i me wabeo. Menio. Te aga homugo digi te agai da olo mu tau sabo dwagi yai kolesaga elama tama da i wali. Polobadu mu, Godigo te t̄o dali dagalu dali nigisiqbadi, tama te Krais Jisasgo yabo s̄ede koneama agai te olo mu tau sabo wiegi yai kolesaga dabolo mawai dao. ¹⁰Tama megı e sogo Krais Jisas, te da ma sali bidi, aga te hanilama pedalalio. Tama tedu te Godigo olo mu tau sabo wiegi yai kolesaga te hania pedalali. Krais Jisasgo te isibo kolesagago bomo togolama, tama te agai ola mani gesi wiegi yai pogo te dwagi yai bidibo ula dali, te dolosıqb̄o gamonabo kolesaga dali te si pedalamana, tama te ulaba munama elalubao.

¹¹Godigo te wiegi yai gesi po pusubo s̄eba ena mubaso, tama ena te po pusubo bidi bidiyu, tama ena te Godigo s̄eba tagala palali s̄e ebo po ola mabo tisa bidi dao. ¹²Tama tiyu, ena kalabus bidi megı bidiyu,

^a 1:5 Tpi 16:1

tama te sege eno tolobao. Tiali goli, ena tede hale me egobeo. Menio. Ena da, te eno Godiba homu tia pai bidi da weyu, te aga eno konebaso hale egobeo. Tama eno koneani, agai ena nogoba te muani se te agai mu tonaluyu, tama te sesemane sogo bugagia bidata peyu, te genuai bodolu pedalubo sogoba usu nigi pabo aga usu yaibao, te se hagagobeo.¹³ Te doloba pai tau sabo po nago eno pedauwalide odali. Te odali po te usu ni tiwai elaluyu, tama te po bugagia wali pao. Tama tiyu, nago konealubo po Krais Jisasba bomo elama daq weyu, tama aga dali wadolama, tama God dali, we bidi dali dwagi yai homu eyu godolo mu eyu bida. ¹⁴Nago te Godigo nagebolo mani dwagi yai po te nago bugagia tonaluao. Tama Godigo Tedali Mobo Bidi te da tomode bidiyu, agai nage te sede tau saibao.

¹⁵Timoti, nago koneani, te Esia genuai tqde bidibo Godigo po odobo bidi augwali tigidaligo ena tagalai dao. Te augwali tomode te bidi si Figelus me Hermogenes si dali, te augwaligo me ena tagalai dao. ¹⁶Eno homugo te Genuai Bidi Godigo te bidi Onesiforus aga we wai puluba dali homu dene eyu tau sao. Te hauwa sogo Onesiforusgo eno homu dwagi yai bugagia ilai. Tama aga ena kalabus yalide hale me ebeo. Menio. ¹⁷Aga te e moni hanu Romba asama, tama ena gegagasobo se dene iduama, tama nosali agai ena sualio. ¹⁸Te genuai po tu yabo sogode eno homugo te Genuai Bidigo Onesiforus homu dene eyu tau sao. Tama te bidi agai ena te Efesus bulude hauwa sogo tau sali, te naga digi bugagia naga koneai dao.

Nage te Krais Jisasgo wiegi yai ami bidi bida

2 ¹Timoti, eno ogwa, naga digi sesemane sogo nago te Krais Jisasgo olo mu tau sabo dwagi yai kolesagago te nage bomo momainao.
²Tama tiyu, te nago eno pedauwalide odali po, te po te bidi hauwa gedude pusali po tigidali nago odali. Tama te po naga nago te Godigo poba homu keq pai bidi dabe, augwaligo nogoba te po bugagia muao, te augwaligo me usu elama tama te po gasa Godigo poba homu keq pai bidi dabebolo nosali ola momainu yao.

³Da Godigo po odobo we bidi te da te ami bidi hani tiwai dao, tama Krais Jisas aga da te dago tuni bidi dao. Nage te agai dwagi yai se ebo ami bidi bididu, tama da gasa ami se ebo bidi dabe dali hodobo te sege dali dene tolobo se yao. ⁴Te ami se eyu bidibo bidigo agai te gasa haniani se dali eyu me egobeo. Menio. Te aga tonalubo genuai ami bidigo agai ebo sede dwagi yai homu emainu eyu, agai te ami bidigo se naga ebo dao. ⁵Te bidi geanainu udabo bidi, agai te udabo bomai po bugagia dolo wali pao. Ma te meni eyu da, teda agai te udabo bidigo ugaba ela holobo nogi sabo namba me sogobeo. ⁶Te se dene elama gi bulama tonalubo bidi da, aga te gasa bidi dabego te gide nai polasa sisabadi te polasa nai sabo

bidi dao. ⁷Timoti, nago eno te wali po digi po begelali po sela homude kone palao. Te Genuai Bidigo nage homu ula ilibaso, tama te po page tigidali nago koneaibao.

⁸Sesemane sogo nago te Jisas Krais homugo koneao. Aga te isäma, te isali bidi bidibo digidu ma hodaluali. Aga te polobadu tuni bidi Devitgo hani bidi bidai. Te eno te Godigo gesi dwagi yai po wabo si, te Krais aga te bidi Devitgo bulai wai dao, te po me eno pusubo dao. ⁹Eno te gesi dwagi yai po pusubaso, tama tede naga te bidi augwaligo ena te gavmango bomo yai po bolali dwai bidi da homu elama, tama augwaligo haniani sęę̄ enabolo mani. Awe, augwaligo ena kalabusiba me muani. Tiali goli te Godigo po da, augwaligo te kalabusiba me mugobeo, te usu egobeo. ¹⁰Tama tibaso, eno ena homu dą̄ walama, tama eno te sęę̄ tigidali tolobode bomo elama dolalubo dao. Eno te Godigo aga sa muani we bidi tau sainu ebo dao. Eno homugo te Krais Jisasgo yali sęę̄ te Godigo augwali ma dobola selama, tama dagalude bugagia mu bidada peyu, bidada pomainu ebo dao. ¹¹E po eno megı̄ obao te mu po dao, tama bidigo aga homu teba tialubaso, te aga tulalugobeo:

“Te mu tama, da Krais dali wadolama tama aga dali
isali tiwai yaligo da, teda da me aga dali bidibo
ulade bidaibao.

¹²Te da tigidali sęę̄ tolobode bomo elama dolaluali
da, teda da aga dali tuni bidi me bidaibao.

Te dago aga tudiba mubaso da, teda agai me da
tudiba muuibao.^b

¹³Te dago te Kraisba homu begi pabo kolesaga
tagaliyu da, teda agai aga doloba pai kolesaga
tagalogobeo.

Agai te aga doloba pai kolesaga te munu me
hasegelegobeo. Mu menio.”

**Te sę̄ bidi mu nogi te Godigo gedude elaluainogo
eyu, te bidi Timotigo sę̄ bomo elama yao wali**

¹⁴Sesemane sogo nago te nago tonalubo we bidi augwali homu te eno megı̄ wali pogo hodolao. Tama God gedude nago augwalibolo te haniani olo pode konila po olamuo po bomo elama wao. Te olo pode konila po wabo kolesagago te bidi me deli tau sabo usu me egobeo. Menio. Te tobage po odobo bidi dabe te doloyu naga ebo dao. ¹⁵Tialima, te genuai pabo tų̄ bugagia dolo mu nigibo bidi tiwai gilama eyu, tama nago te Godigo mu po dolo augwalibolo ola mao. Tama tiyu, nago naga sęę̄ hale idali weyu, te Godigo nago ebo sęę̄ “Te usu mu dao,” omainogo eyu,

^b 2:12 Mat 10:33; Luk 12:9

tama nago bomo elama, nago s̄e bugagia yao. ¹⁶Te kedu meni yai olo po, te Godigo kolesaga wali pisabo olo po, te tobage po wabo nago ela soao, augwali dali po migio. Te tobage po mibogo te bidi dabego te Godigo kolesaga tagalabo kolesaga genuai ilibo dao. ¹⁷Te tobage olo po ola mabo bagego po te dwai keni tiwai elama, tama te genuai mu pedaliyu, tama tigi mi t̄du pabo keni tiwai yaibao. Te tobage po ola mabo bidi si te Himeneus de Filetus si dao. ¹⁸Te bidi si augwaligo te Godigo mu pode geda munama tama tagalali. Tama tiyu, augwaligo te we bidibolo te po ola mabo dao, “Da ma hodaloai dao, tama da isibo si dago tigi nosali ma hodalogobeo.” Te pogo augwaligo te we bidi mebago Kraisde d̄u wali konealubo po dolobo dao. ¹⁹Tiali goli Godigo mu po te bidigo dolobo usu egobeo. Te bomai be tuni ni pos tiwai bulalio, tama te dolalubao, te be peme egobeo. Tama te tuni ni posde hagea siyu aséani po te tiwai elalubao, “Genuai Bidigo aga we bidi digi bugagia koneani.” Tama te po me aséani elalubo, “Te Genuai Bidi nogi nogi eyu ‘Ena aga bidi dao’ po wabo tigidali bidi, augwaligo te dolo isławai kolesaga tudiba muao,” te po aséani elalubao.

²⁰Te doado bage hauwa elalubo bidigo bede te haniani plet pou elalubo dao. Te plet pou meba augwaligo te wiegi yai kapa si gol me silva, te sigo nigali. Tama te nogi elalubo sogo augwaligo nai tuenu augwaligo te wiegi yai nai naga te tobage wiegi yai pou dabebe mubo dao. Te pou dabe te gasagi yai tedali dao. Tama plet pou meba augwaligo nigo nigali me, tama meba augwaligo te mama t̄go nigali me elalubao. Te tobage olo pougo te olo s̄e naga elalubao. ²¹Tama bidi dabe augwali te pou dabe tiwai dao. Bidi me deligo te olo po ola mabo bage tagalama, tama aga te meda meni yai bidali da, teda aga te dwagi yai s̄e mu ebo pou tiwai bidiyu, te aga tedali gasagi yai s̄e ebo bidi bidaibao. Magi baso meni, aga magi s̄e me isławai bugagia bidibaso agai aga Genuai Bidigo s̄e ebo usu eyu, tama we bidi tau sabo haniani dwagi yai s̄e tigidali yabo sisi ilaibao. ²²Nage gesi bidi dao. Te gesi bidigo dwai s̄e godolo ebo homu kolesaga nageba pedalubo si, te sesemane sogo nage te kolesaga suyu sali siyu wi pao. Tama tiyu nago te doloba pai kolesaga me, te homu mu ebo kolesaga me, te we bidi dali dwagi yai homu eyu godolo mu ebo kolesaga me, te homu nagame eyu we bidi dali bugagia bidibo kolesaga me, te kolesaga tigidali nago pobasa pao. We bidi meba augwali te meda meni yai homu kolesaga elalu tama te Genuai Bidigo nogi nogi eyu, “Da aga we bidi dao,” te po wabo bage dao. Tama nago augwali dali wadoloyu, tama dagego te eno megi tama nogi yali wiegi yai kolesaga pobasa pao. ²³Tama te kedu meni yai olo pode konila po wabo te nago tudiba muao. Nago koneani, te tobage pogo te konila po wabo homu hodolobo po page elalubao, tama tede te s̄eb̄e ebo kolesaga pedalobo dao. ²⁴Tiali goli te Genuai Bidigo s̄e ebo bidigo te munu me pogo hw̄namuo. Menio. Agai

te tigidali we bidi dali abagi homu eyu dua digi yao. Aga te Godigo po ola mabo sęde usu eyu wiegi yai tisa bidi bidiyu, tama sębę polo eyu polo wei ponosiabo bidi bidao. ²⁵Te agai ola mabo po sela sębo bidi dabe dali agai te nagamea pai homu naga eyu, augwaligo homu dodolao. Te agai tama tiyu da, teda Godigo augwali tau siyu, tama augwali homu hasegeleyu tama te mu po bugagia koneabo tų elaluabao. ²⁶Polobadu te Satango agai hagani togobo wago augwali sali, te augwaligo agai po wali pomainu yali. Tiali goli augwaligo te mu po koneyu da, teda augwaligo homu hania ma ula eyu, tama augwaligo te Satango hagani togobo wa wi pabo usu yaibao.

**Te tq de dagalu si silibo sogo te bidi dabe augwaligo
dwai kolesaga hauwa pedalaibao**

3 ¹Timoti, nago te tiwai tama koneao: te tq de dagalu si silibo sogo te pąba yagasobo si te dwai sę ebo bidi dabe augwaligo dwai sę hauwa ebaso, te Godigo po odobo we bidiba te dwai sęgo kekainu sinabo sogo pedelaibao. ²Te bidi dabe augwa digi te augwa naga godolo elama, tama augwaligo te mone ge godolo mu yaibao. Te augwa digi augwa nogi uwawa siyu, tama subigila hagoma eyu, tama posobo po waibao. Te meba augwaligo aya idago po sela sęwaibao. Te augwaligo buba hwi po te Godibolo me, te gasa we bidibolo me wagobeo. Augwaligo Godigo kolesaga tudiba muaibao. ³Te augwa deli kanemede ame nani ama dede dabe dali digi te deliba wasia sogobeo. Gasa bidigo augwali dali yali dwai sę te augwaligo sela sębo homu munu me egobeo, te homu dene me egobeo. Te geme dualama posobo po subigila waibao. Te meba augwaligo augwa tigigo homu me tonalugobeo. Te augwali sębę eyu subigila bidi dabe dolaibao. Tama augwaligo te tigidali dwagi yai kolesaga dali boi bidi nigaiabao. ⁴Te augwaligo augwa abagi dabe te boi bidi nogoba muaibao. Te augwaligo augwa ebo kolesaga osola susuayu tama bomo elama, tama augwa homu naga polo wali paibao. Te augwa homugo digi te augwali genuai bidi da homu yaibao. Te augwaligo te tigigo te haniani godolo ebo homude te wiegi yai homu pemene eyu, tama augwaligo God godolo homu me egobeo. ⁵Te augwaligo te Godigo po odobo we bidi mu tiwai me sogo bilaibao. Tiali goli augwa homu uwadu daidu naga tama tiyu, tama Godigo augwaligo kolesaga hasegelabu bomo te augwa tudiba mubo dao. Te tama kolesaga ebo bidi dabe augwalide te nage ibaba kisa selama bidamuo. ⁶Te tama tobage bidi dabe meba te augwali dua digi biliyu, tama te wiegi yai homu kolesaga meni yai we dabego be tomoba pelama, tama augwaligo augwali homu te kalabus ilibo dao. Te tobage we dabe augwali te dwai sę hauwa elalu, te augwali homude sęge elalubao. Tama augwaligo homu te haniani naide hodolama, tama augwa homu subigila hogwaiabo homu eyu, tama tebogo augwali te haniani

kolesagaba kegebo dao. ⁷Te we dabe augwaligo sesemane sogo augwaligo te ola mabo po odobo sé ebadi, tiali goli augwaligo te Godigo mu po page koneainu ebo usu egobeo. ⁸Polobadu Janes de Jambres te bidi sigo Moses dali boi bidi yali, tama tiwai yali gilama te megi elalubo bidi dabe augwaligo me te Godigo mu po dali boi bidi ebo dao. Te augwaligo homu kolesaga te dolario, tama augwaligo Kraisde konealubo po däü wali te tibo naga ebaso, Godigo augwali buluba sawai dao.^c ⁹Tiali goli augwaligo te Godigo mu po dali boi bidi ebo kolesaga te we bidi tomode genuai mu me pedalugobeo. Menio. Te tigidali bidigo augwaligo kolesaga te esela pabo bidi dabego ebo kolesaga tiwai ebo sueibao, te tiwai te polobadu te bidi dabego te bidi Janes de Jambres sigo te esela pabo bidigo ebo kolesaga suali tiwai gilama yaibao.

Nago Godigo po däü ola sao

¹⁰Te gasa bidi dabe augwaligo te tobage dwai sé eyu bidaibao. Tiali goli nage da, nage ena dali biliyu, tama eno te we bidi dabebolo ola mani po te nago koneai. Tama eno kolesaga page tigidali te me nago koneai. Ena e tqde bidibo sogo eno bomo elama, tama Godigo sé yabo homu ebo me te nago koneai. Nago ena me koneani, eno konealubo po Godiba däü olama, tama sesemane sogo eno te gasa we bidi dali sëbë polo ebeo, te eno sé augwali dali dua yali dao. Eno augwali dali dwagi yai homu eyu, godolo mu ebo kolesaga eyu, tama augwaligo enabolo mani sëgë menama, tama eno bomo elama bididu te sëgë eno bugagia tololo dao, te me nago koneai. Eno ebo kolesaga tigidali nago koneama, nago wali pabo dao. ¹¹Te bidi dabego dwai kolesaga ena dali ebo tigidali te nago koneani, tama tigidali dene ena te bulu Antiokde me, Aikoniamde me, te Listrade me sai. Te tigidali sëgë augwaligo enabolo menama tama eno te sëgë tololo nago koneanio. Tiali goli Genuai Bidigo ena tau siyu, tama te sëgë tigidali agai sila palali.^d ¹²Te mu po dao, tigidali bidi te Krais Jisas dali këq selama, tama Godigo kolesaga wali pabo bidi, teda te boi bidi dabego dwai sé eyu, sëgë augwalibolo me mawaibao. ¹³Tiali goli te dwai bidi dabego me, te tibo po ola mabo bidi dabego me, te bidi dabe augwaligo ebo dwai sé dwasianu gagalama tama genuai pedalaibao. Tama tiyu, augwaligo te tibo po te gasa we bidibolo ola mobadi, te Satango me augwali tibo po ola maduaibao. Tama augwaligo kolesaga te dwai mu pedaluaibao. ¹⁴Tiali goli, Timoti, nago da, nago te Godigo mu po odama tama bomo elama nago “Te po mu po dao,” te homu te pode yali dao. Tama megi nago te kolesaga me eyu bididua. Dago nage te mu po ola mani we bidi nago da bugagia konebo dao. ¹⁵Tama e me nago koneani, polobadu nage te dwasianu wai bœl elalubadi tama nago te tedali gasagi yai wiegi yai bukude po konebo se

^c 3:8 Sai 7:11 ^d 3:11 Tpi 13:14-52; 14:1-7, 8-20

gagalama sai. Te tedali bukude pogo te dwagi yai homu kolesaga nagebolo mabo usu yali. Tama nago te dwagi yai homu kolesagago eyu, tama konealubo po Krais Jisasba dą̄ obaso da, teda Godigo nage ma saibao.¹⁶ Te Godigo Mobo Bidigo digi te tigidali wiegi yai po bukude aşəani bidi dabe tau selama, tama augwaligo te po te bukude aşəai dao. Tama te dwagi yai kolesaga dabolo ola mabo sę me, tama dena dwai sę denabolo ola mabo sę me, tama da bilibo kolesaga ma dodolobo sę me, tama dabolo te doloba pai kolesaga ola mabo sę me, te sę tigidali ebode te Godigo bukude aşəani po usu dao.¹⁷ Tama tibaso, da Godigo sę ebo bidi tigidali dago te bukude aşəani pode te sę yabo bomo dali, te homu kolesaga dali si selama, tama dago tigidali haniani dwagi yai sę yabo usu elama sisi ilimainu ebo dao.

Nago Godigo po mu pusao

4 ^{1-2 Timoti, te God de Krais Jisas si gedude eno nagebolo e moni sęge} yai po bomo elama wainogo ebao. Krais Jisas agai te tigidali we bidi, te bidibo ula elalubo bidi badi, te isali bidi dabe dali me po tų eyu dagalaibao. Te aga tɔ̄ba ma asiyu, tama tigidali bidi geduba pedalama, tama tuni bidi mu bidaibao. Tama tibaso, eno e sęge yai po bomo elama nagebolo obao, nago Godigo po mu pusao. Tama te po odainu sisi elalubo bidi dabe eboso, ma augwali sisi elalusiąbaso me, te homu eyu tagalao, te sesemane sogo nago te Kraisgo po bomo elama pusubo sę yao. Nago te augwali homuba te po eniyu, te augwali homu begelemainu te augwali hodolao. Augwaligo dwai sę eboso, tama nago te pogo te dwai sę tagalabo po augwalibolo pusao. Nago te augwaligo Godigo kolesaga wali pomainu homu hodolao. Tama te tobage haniani sę eyu, sesemane sogo nago augwalide sę dua digi eyu, sębę polo isą̄yu tama augwali bugagia ola mao. ³ Magi baso meni, nosali te gasa sogo pedalaibao. Tama te sogo te bidi dabego Godigo mu po ola mabo odobo hagela yaibao. Odogobeo. Menio. Te augwa digi augwa homu kolesaga naga wali peyu, tama augwaligo te po ola mabo tisa bidi hauwa saibao. Augwaligo godolo ebo po odomainogo te bage saibao. Tama te po ola mabo bidi dabe augwaligo te augwali sali we bidi dabebolo Godigo po pusugobeo. Menio. Augwaligo te we bidigo godolo ebo po naga pusaibao. Te we bidi augwaligo olo te dini eboso, te tibo po ola mabo bidi dabego te augwaligo olo te pogo kieibao. ⁴ Tama te we bidi augwaligo te mu po odobo tagaliyu, te tudiba munama, tama te haniani olo namu po waboba olo munama odaibao. ⁵ Tiali goli naga digi te polobo bidi tiwai bidisią̄yu naga homu sesemane sogo bugagia tonaludao. Tama tiyu nago te sęge tolao. Nago te bidi dabe augwalibolo te Godigo gesi dwagi yai po pusubo sę yao. Nago te we bidi dabe augwali tau sabo haniani sę elalubaso, te sę nago bugagia mu yao. ⁶ Magi baso meni, te ena isą̄ma pabo sogo paba yagasalio. Nago koneani, te polobadu te bidi dabe augwaligo te wain ą̄j gelama te

Godibolo ofa mabo, te tiwai naga te eno kaneme gelabo sogo paba yagasali. ⁷Te Kraisde konealubo po däq wabo bidi te usu si yainogo udabo tiwai se elalubao. Te usu si yainu ena bugagia udawai dao. Megi da te däj ilaliba ena mu sabolario. Eno Kraisde konealubo po homugo däq mu wai dao, te eno munu me tagalobeo. ⁸Megi da te udabo däj ilaliba pedalali bidigo genuai nogi yai namba te sisi elama ena tonalubao. Te genuai nogi sabo namba te tiwai yaibao: te Genuai Bidigo ena te doloba pai bidi nogi poaibao. Genuai Bidi aga te doloba pai po tu ebo bidi jas, tama te genuai sogo pedalubode agai te doloba pai bidi nogi enabolo mawaibao. Tama agai enaduba delibolo naga te me magobeo. Menio. Te aga hania pedalubo suainu godolo homu ebo bidi dabe tigidilibolo te doloba pai bidi nogi mawaibao.

Po silagasus wabo po

⁹Nage asesä tama nage ena bidibo madi polo asao. ¹⁰Te bidi Demas agai ena taga palio. Agai te meg i töde elalubo kolesaga godolo mu elama, tama agai ena tagalama te Tesalonaika hanuba pai. Te Kresens aga te Galesia töba pobadi yali, tama te bidi Taitus me te Dalmesia töba pai dao.^e ¹¹Luk deli naga ena dali bidibao. Nago te Mak selama, tama odasa nage dali asao. Agai te bugagia te sede ena tau somainu usu yaibao.^f ¹²Eno te bidi Tikikus te Efesus hanuba tagala palai dao. ¹³Nage enaba asobadi tama nago te eno kedau sogo gudubo bobage ugwa sela asao. Te ugwa eno te Troas hanude tagalali, te bidi Karpus aga bede munalubao. Tama tede muani buku dabe me sao. Tama bugagia dua mu nago te eno sipsip wali dabego nigali te buku dabe sabo te homu munu me gegeda peyu tagalamu dao.^g

¹⁴Te bidi nogi Aleksander, agai mone ge sabo se da te haniani nai te aga kapago nigibo bidi, te bidi agai enabolo dwai se mu ilali. Nosali te Genuai Bidigo agabolo te dwai dene wei ponoyu, te aga yali dwai kolesaga usu nama te dene mawaibao.^h ¹⁵Nage me nage te bidi Aleksanderde dua dao, bugagia tonaluao. Agai bomo mu elama, tama te dago ola mabo po mu aiyaba elaluainu eyu, tede boi bidi homu yai dao.

¹⁶Te ena ede Rom hanude bidiyu, tama te hasia sogo eno te po tu de te po wei ponani sogo te bidi me deli ena tau sabo po me wagasobeo. Menio. Tigidali bidi augwaligo ena tagalali. Eno homugo te augwaligo te dwai se te Godigo homu kone me elamu, wei ponamuo. ¹⁷Tiali goli Genuai Bidi aga ena dali bidaluyu, tama enabolo bomo mani. Eno te Godigo po sese pusubo te usu mu emainu, tama te agai po odisawai hani tigidali augwaligo odomainogo eyu, agai bomo enabolo mani. Tama

^e 4:10 2 Ko 8:23; Gal 2:3; Kol 4:14; Tai 1:4; Flm 24 ^f 4:11 Tpi 12:12, 25; 13:13; 15:37-39; Kol 4:10, 14; Flm 24 ^g 4:13 Tpi 20:6 ^h 4:14 Tib 62:12; Rom 2:6

augwali te bidi ela tubo dwai hasa laion tiwai bidiyu, tama augwaligo ena ela muidali weyu Godigo ena tau selama dwagi yai madiba muanio.
¹⁸ Te augwaligo dwai kolesaga tigidali ena dali yainu ebo, tede te Genuai Bidigo ena tau selama, tama agai ena ma sai hagede eyu, tama ena oda selama, te aga bomo elalubo bulu te dagaluba sese muaibao, aga we bidi tonalubo sę ebo madiba. Te genuai nogi me bomo te agade sesemane sogo mu bidada peyu, bidada pomainao. Mu dao.

¹⁹ Nago eno te siade da wali po te we Prisila dali, aga bidi Akwila si dali me, te Onesiforus me te aga we wai puluba augwalibolo te po wao.ⁱ

²⁰ Te bidi Erastus te Korin hanude me bidibao. Tama Trofimus te gasi elalubaso, tama eno aga te Miletus hanude tagalama bidibao. ²¹ Nage asesa polo asiyu, tama te kedau eyu dwai wali asobo sogo asisabadi nage eba polo sabolao.

Te bidi dabe Yubulus me, te Pudens badi, te Linus me, te we nogi Klodia me, augwaligo te siade dao po nagebolo ola tolobao. Te gasa ede bidibo ama dede dabe tigidaligo me te po ola tolobao.

²² Eno homugo te dago Genuai Bidi te nage dali bidao. Te agai olo mu tau sabo wiegi yai kolesaga te dage dali bidao. Te tama dao.

ⁱ 4:19 Tpi 18:2

Polgo Pas Taitusbolo Asəani

Hasia nedebo tau sabo po

Te bidi Taitus aga te Juda hani bidi meni. Tiali goli aga te Godigo po wali pabo bidi pedelali sogo, agai te bidi Pol te po sela pabo sede tau sabo se yai dao. Te Grik dabego moni tq sesegede te genuai tamu aj elalubao, tama te tamu aj tomode te tq me nogi Krit te elalubao. Tama te bidi Pol dali, Taitus dali augwali si te bulu tq Kritba pelama, tama Kraisde gesi dwagi yai po pusa mani. Te po pusa menama, tama te Krit we bidi mebago te po odama, homu begelama tama Kraisgo po wali pabo we bidi hani tede pedalali. Tama nosali te bidi Pol gasa buluba painogo eyu, tama agai te bidi Taitus te Krit bulude taga soyu, te bidi Taitus te we bidi hanide tobolu bidi nigelali. Tama te bidi Pol nosali e pas te Taitusbolo tolali. Te bidi Polgo homugo te Taitus agai te Krit moni tq tomode te tigidali hanude te Kraisgo po wali pabo we bidi hani tonalubo tau sabo bidi dabe dodolama augwa seba muao. Tama te we bidi dabe me augwaligo yabo wiegi yai kolesaga po me Polgo e pas tomode asenama tama tolali.

**Te bidi Taitusgo te tq ailan Kritde te Godigo po wali
pabo bidi dabego konealubo po dąu waliyu, te augwaligo
kolesaga dodolobo se yali po**

(Dqj 1-3)

1 ¹Ena Pol dao, tama ena Godigo se ebo bidi dao. Ena te Jisas Kraisgo po sela pabo se ebo bidi ena dao. Agai ena dia selama tama tagala palama, tama eno te Godigo hagea sai we bidi augwaligo te agade konealubo po augwa homude eno bomo iligi pao ena dali te po wai, tama eno augwali tau siyu elama, tama augwaligo Godigo mu po selama, tama augwali aga tiwai bidimainogo agai ena te se mani. ²Tama te mu po page e dao: God agai tibo po munu me wabo meni, tama polobadu mu agai tigidali nai nigisiqbadi tama agai te sesemane sogo bida pabo bidibo ula dabolo mawaibao te po agai olama tama dąu wali. Tama tibaso, megi dago te mu po odolama, tama dwagi yai homu eyu, te bidabo ula sabo sogo tonaluyu bidibo dao. ³Tama polobadu mu agai te po dąu

olama, tama tamadi te sogo aga digi bodolu mawai sogo agai bidi meba homu hodolama, tama agai po aga augwalibolo hania ola mani. Tama elama, tama agai te po pusubo sę eno nogoba muai dao, tama te da ma dobola sabo bidi God agai te po ola mao obaso, tama eno te mu po te we bidibolo ola mabo dao.

⁴Taitus nage dali eno e po asena tolobao. Te da dali, nage dali da tigidaligo God dali, Krais dali te konealubo po deli naga elalubaso, tama nage eno ogwa mu tiwai dao. Tama eno homugo dago Aya God dali, Krais Jisas dali augwali sigo nagebolo te olo tau sabo kolesagago dwagi yai sę eyu elama, tama nago homu nagamea peyu bugagia bida.

**Polgo Taitusbolo sę mani, te Godigo we bidi tonode tonalubo
sę yabo toboli bidi polalubo bidi dabe nigli mainu yali**

⁵Eno nage taga soayu, tama nage te Krit moni tqde bidibadi ena soai dao, nage eno taga soali te po pagede tama dao: eno homugo nago te tigidali dodoloyu silisawanı sę te sę nago dodolomainogo tiwai dao. Tama tiyu, nago tigidali hanu deli delide te Godigo po wali pabo we bidi hani augwa toboli bidi nigliao, te eno polobadu nage dali wali po gilamao.

⁶Tama nago te toboli bidi nigli si te pode ma kone palao: niwai bidi me deli te we bidi gedude agai dwai kolesaga isiąwai bidi yai baso da, tama agai we me deli digi yai baso da, tama agai wai dabe augwaligo Godide konealubo po dą̄ wai yai baso da, tama augwaligo dwai sę subigila yai po meni baso da, tama augwaligo ida de aya sigo po sela sasiąwai yai baso da, tama te tiwai bidi nago augwali toboli bidi nigliao. ⁷Magi baso meni, te Godigo we bidi tonalubo bidi te bidi agai Godigo sę tonalubo dao. Tama tibaso, te bidi aga dolo bugagia bilao, seğe meni yai bidi bida. Agai hagoma ebo kolesaga ebo bidi bidilamu, tama agai sębę polo me elamu. Agai bomai aji hauwa tubo bidi menio, tama agai bidi dabe me elebo menio. Tama agai masigi dabe hauwa sabo homu eyu pesę ebo bidi menio. ⁸Te menio. Tiali goli gasa buludu asobo we bidi agai augwali dali dwagi yai homu eyu bugagia gesebo bidi bida. Tama agai dwagi yai kolesaga naga godolo eyu, tama tiyu dwagi yai homu dali yao. Aga homu kęnai bidi bida. Aga te doloba pai bidi bidiyu, tama Godigo gedude aga dwagi yai bidi bida. Aga digi aga bidibo te kolesaga bugagia tonaluao. ⁹Te Godigo po da te wiegi yai tulalusiąbo po dao, tama te Godigo we bidi tonalubo bidi agai te po odolama, tama agai te po aga homugo dą̄ wao. Tama tiyu da, teda agai te ola mabo pogo te gasa we bidi tau siyu, augwaligo homu bomo ilibo usu yaibao. Me ma, agai te po sela sębo bidi dabe dali po miyu, tama augwaligo te pode geda muani kolesaga agai augwalibolo ola mabo usu yaibao.^a

^a 1:9 1 Ti 3:2-7

¹⁰ Magi baso meni. Te Krit tōde te Godigo we bidi hani tomode te bidi hauwa augwaligo te toboli bidigo po odogobeo, tama te po wali pabo hagela ebo dao. Augwaligo page meni yai olo po naga weyu, gasa bidi dabe tibo po ola mabo dao. Te tama tebo bidi dabe hauwa augwali te Juda bage dao. Augwaligo polobadu Kraisde konealubo po dāq wali goli, augwaligo homugo te da tigidaligo te Juda dabego bomo yai po me wali pomainao. ¹¹ Tama augwaligo gasa bidi dabego mone masigi bomo elama sainogo eyu, tama augwaligo te ola masiq̄o po ola mabo dao. Te usu meni. Tama tebogo augwaligo te we bidi hani meba tomode si bugulama, tama we bidi meba augwaligo Godigo po megi bugagia wali me pabo meni. Tama tibaso, te nago nigilibo tonalubo bidi dabe augwaligo te olo po ola mabo bagego pedauwali dāq wao. ¹² Polobadu mu Krit bulu bidi me deli, te bidi agai haniani po page mu koneai bidi bidai. Tama te bidi agai te po wai, “Te Krit tōde bidibo bidi dabe augwali tigidali sogo te tibo po wabo bidi hani bidibo dao. Augwali uni sulai kibu tiwai dao. Tama augwaligo nai hauwa tulama, tama s̄e ebo hagela ebo bidi dabe dao,” te Krit bidi aga digi agai te po polobadu mu wai dao. ¹³ Tama agai po mu tama dao. Tama tibaso, augwaligo te God dali konealubo po augwa homugo bugagia dolo mu ma dāq omainogo nago augwali dali po bomo elama te po wao, “Te gasagi yai po ola mabo tagalao. ¹⁴ Te Juda dabego haniani olo namu po dali, te bidi dabego olo nigali bomo yai po dabe me, te tagalao. Te tobage po page bidi augwali da te Godigo mu po tudiba muani bage dao. Tama tibaso, dagego te tobage olo po wali pabo tagalao,” nago augwalibolo te po wao. ¹⁵ Te homu kolesaga meda meni yai bidi dabe augwaligo gedude te tigidali nai te habu selis̄awai nai naga dao. Tiali goli te dwai meda yai homu elalubo bage, augwaligo God dali konealubo po dāq wasiawai bage augwalide magi s̄e dwagi yai me ebeo, augwaligo dwagi yai kolesaga ebo page konebo menio. Magi baso meni. Augwaligo homu kolesaga dali, augwa dwai s̄e dwagi yai s̄e dagalabo homu me, te si dolama tama dwai meda elama elalubao. ¹⁶ Augwaligo pedauwaligo naga te po wabo dao, “Eno God koneai dao,” te po wabo. Tiali goli augwaligo bilibo kolesaga ebogo te God hogwa sabo dao. Godigo augwali me godolo ebo menio, hagela mu ebo. Augwali agai po sela sabo bidi dao, tama augwaligo dwagi yai kolesaga me deli ebo usu meni.

**Te monu dabego te Godigo godolo yabo kolesaga bugagia
wali peyu, te wiegi yai kolesaga ola mabo po wao**

2 ¹ Te dwai po ola mabo bage augwali te tiwai bidibo dao. Tiali goli nage, nago te Godigo wiegi yai po wali pabo we bidigo yabo kolesaga ola mabo po nago bugagia ola mao. ² Tama tiyu, nago augwalibolo e tobo wao: monu dabe yai bidi augwaligo te bomai aji

⁶Te gesi bidi dabe augwalibolo me ola mayu, tama augwalibolo wao, “Dagego duga tigigo ebo kolesaga bugagia tonaluao,” te po wao. ⁷Tama naga digi nago ebo kolesaga tigidali ebogo te nago te gesi bidi dabebole dwagi yai kolesaga naga tama ola mao. Tama tiyu, nago homu mu eyu, tama ‘E po sege yai po dao,’ te homu eyu elama, tama Godigo po ola mao. ⁸Tama nago agai po ola mabo si te dolo po naga augwali dali wao. Tama tiyu da, teda nage dali boi bidi homu ebo bage augwaligo da dali, te nago ola mabo po dali, tede augwaligo dwai po me wabo usu s̄abaso, tama augwali hale yaibao.

¹¹ Magi baso meni. Tigidali we bidi agai ma dobola somainogo eyu, tama Godigo agai da olo tau sabo wiegi yai kolesaga hania waselai dao.

¹² Tama da tode we bidi dago Godigo bomai po tudiba muyu, tama te dwai dwai kolesaga eyu bidai dao. Tiali goli agai olo tau sabo wiegi yai kolesaga tego da e tiwai ola mabo dao: “Dagego te dwai sę tudiba muao, te doloba pai kolesaga naga yao, tama dage e tőde bidibadi te Godigo gedude dwagi yai we bidi bidaoo.” ¹³ Tama dago te ola mani po odolama, tama te tiwai kolesaga eyu bidibadi, tama dwagi yai homu eyu, te wiegi yai sogo asobo dago tonalubo dao. Tama te sogo asobo si, teda dago genuai God te da ma dobola sali bidi Jisas Krais agai bomo yai ula dali, genuai nogi dali, te hania ulaba pedalaibao. ¹⁴ Aga digi aga bidibo ula tagalai dao, tama agai te bidibo ulago da ma abelama, tama dago te tigidali bomo yai po sela səbo te kolesaga agai sela səwainogo tama yai dao. Agai da penama, tama da we bidi aga hani mu pedalainogo te sę yai, tama dago tigidali dwagi yai kolesaga bomo elama te sę naga emainogo agai aga bidibo ula tagalai dao.^b

¹⁵ Nago eno megi wali ola mabo po te po te we bidi dabe dali nago te po ola mao. Nago augwali te pogo hodolama, tama augwaligo te po wali pomainao. Tama nago te po sela sənana wali pisəbo bidi augwaligo homu begelemainu nago augwali dali po bomo elama wao. Te bidi dabe augwaligo nage olo bidi yaliwe te homu idali weyu tama nago te ola mabo po bugagia bomonama augwalibolo ola mao.

**Godigo wiegi yai sę mu dade yali, tama dago
dwagi yai kolesaga yao po wali**

3 ¹Taitus, nago te nago tonalubo Godigo po wali pabo we bidi augwalibolo e po widu geao: augwali te gavman tuni bidi dabe dali genuai bidi dali dologode bidiyu, tama augwaligo po odolama te po wali pao. Tama tiyu tama augwaligo tigidali dwagi yai kolesaga yabo sę sisi eyu bidaoo, te po ola mao. ²Augwaligo bidi mede dwai po olamuo. Te menio. Augwali homu nagame elama, tama abagi homu eyu bidaoo. Tama sesemanee sogo augwaligo tigidali we bidi dali te imilai homu eyu, tama augwali tau sao. Te po augwali ola mao. ³Magi baso meni. Polobadu da me, nage me da tigidali Godigo po odisabadi tama da te homu kolesaga meni yai bidi tiwai bidai dao. Tama dago me po sela səwai dao, tama tibo po odolama, tama dago pabo tőde geda muyu tama bilai dao. Tama bidibadi tama dena tigigo ebo haniani dwai kolesaga dali te tigi pusu ilibo sę me, te tobage sę ebogo da kalabus mu yai dao. Dago te bidi hasi dali dwai homu ebo kolesagade biliyu, tama dago augwaligo nai dabe pesə eyu yai dao. Tama bidi meba augwaligo da dali boi bidi eyu, tama dena hasi tomode me boi bidi naga elalua pai dao. ⁴Tiali goli, God aga da, te da ma dobola sabo bidi dao. Tama agai da dali yabo tau sabo

^b 2:14 Sai 19:5; Bom 4:20; 7:6; 14:2; Tib 130:8; 1 Pi 2:9

kolesaga dali, aga da godolo ebo kolesaga me, te si hania pedalali sogo,
 5 te sogo agai da ma dobola sai. Agai dago doloba pai kolesaga eboso,
 tama agai da ma sabeo. Dago te doloba pai kolesaga ebeo. Aga digi da
 we bidi hobede mu eboso tama da ma sai dao. Tama aga digi da ajigo
 paluama, tama da gesi noma wai ma pedalai dao. Tama tiyu tama agai
 Mobo Bidigo da gesi noma bidibo ula mawai dao. 6 Te Jisas Krais da,
 dena ma dobola sabo bidi, te agai sęde Godigo aga Mobo Bidi dabolo mu
 mawai dao, te bidi megó aj̄ hauwa gea palobo tiwai eyu tama Godigo aga
 Mobo Bidi dabolo mani. 7 Agai homugo da aga gedude doloba pai we bidi
 pedaliyu, tama te da tonalubo bida pabo ula dago mu somainogo eyu
 agai dabolo aga Mobo Bidi mawai dao. 8 Te po mu dao.

Tama eno homugo nago te po bomo elama ola mao, te Godibolo augwa
 homu tigidali mani we bidi augwaligo te ola mabo po dali homugo
 bugagia kone palama, tama augwaligo bomo elama te dwagi yai sę eyu
 bidimainao. Dwagi yai sę te dwagi yai page elalubao, tama te dwagi yai sę
 ebogo te tigidali gasa we bidi dabe me tau sabo dao. 9 Tiali goli te Godigo
 we bidi meba augwaligo te peni meni yai olo naide hanalua peyu te po
 wabo dao. Augwaligo te polobadu waj̄ dabego nogide po weyu, tama
 augwa hasi wado po wabo dao. Tama te bomo yai pode konila ebo dao. Te
 tobage po wabo dabe nago gedelao. Dago koneani, te pogo da tau sogobeo,
 tama dwagi yai nai walobo menio. 10 Niwai bidi agai te Godigo we bidi
 hani bugulubo po wabo bidi da, nago te bidibolo deli sogo me si sogo me
 te sę tagalao po wao. Tama agai nago po odisabaso da, teda nago te bidi
 aga tudiba muao. 11 Nago koneani, tama tiwai bidi aga homu te gagea pai
 dao, tama agai ebo dwai sęgo aga te dwai bidi dao hania ola mabo dao.

Po silagasu wabo po

12 Nosali eno Artemas me Tikikus te eno nage bidibo digi tagala
 palobaso da, te nage polo ena bidibo digi Nikopolis te hanuba asao. Magi
 baso meni, ena te Nikopolis bulude te dwai kedau sogo ena te bulude
 bidaibao, eno te homu dą̄ wali.^c 13 Nago te bomai po page koneai bidi
 nogi Senas dali, te gasa bidi me Apolos augwali si nago tau sao. Augwali
 si te gasaba painogo ebo si, tama nago augwalibolo te gasaba pabo tau
 sabo nai bugagia mao, tama augwali si bilibo nai tjęde menia sogobeo.^d
 14 Tama dago we bidi, te Krit tđde bidibo Godigo po wali pabo we bidi,
 augwaligo te gasa we bidi tau sabo dwagi yai sę ebo kolesaga koneao.
 Augwali tama tiyu da, teda augwaligo te nai meni yai we bidi tau sabo sę
 ebo usu yaibao. Augwali te nai walisiąbo ni tiwai bidilamu.

15 Te ena dali bidibo we bidi tigidali augwaligo nage dali siade dao,
 bugagia bida, te po nagebolo ola tolobao, e pasgo. Tama te nage dali

^c 3:12 Tpi 20:4; Ef 6:21-22; Kol 4:7-8; 2 Ti 4:12 ^d 3:13 Tpi 18:24; 1 Ko 16:12

bidibo bage, augwali da dali deli homu eyu tama God dali konealubo po
dą̄ wali, te we bidibolo nago dago te siade dao, bugagia bidaو wali po
wao.

Eno homugo Godigo da olo tau sabo kolesaga dage tigidali dali bidaو.
Te tama dao.

Polgo Pas Filemonba Aṣeṇi

Hasia nedebu tau sabo po

Te me sogo Pol kalabus tomode bidibadi tama aga te kalabusde bidali gasa bidi nogi Onesimus suali. Te Onesimus polobadu te Kolosi moni hanude bidama, tama aga te bidi Filemon aga masigi sisabo olo s̄e ebo bidi bidali. Tiali goli aga wi peyu, tama gasaba pelama, te Pol kalabus bidibo digi sabolali. Tama Polgo agabolo Kraisgo po pusa menama, tama Onesimus aga homu hasegelama, te aga yali dwai s̄e tudiba munama, te Kraisgo po wali pabo bidi pedalali. Tama Polgo Onesimus te aga tonalubo bidi Filemon tebolo ma tagala palainogo eyu, tama agai e pas aṣeyu tama Onesimusgo nogoba muani. Agai homugo te Filemon agai Onesimus dari s̄eb̄e esiayu tama aga bugagia sao wali. Tama Pol nosali te Filemon bidibo digi asaibao, te po me aṣena tolali.

**Filemongo olo s̄e ebo bidi wi pali, tama nosali aga
Godigo po wali pabo bidi pedelai, tama Polgo te bidi
aga te Filemon bidibo digi ma tagala palali po**

¹ Ena Pol da. Tama eno we bidibolo Krais Jisasde po weyu, tama augwali mebago hagela eyu, tama augwaligo ena kalabus beba muani. Tama ena te kalabus bede bidibadi, te ena dali, dago abagi Timoti dali, da sigo e pas aṣenama, Filemon nagebolo tolobao. Nage dago dwagi yai abagi mu, da dali deli s̄e ebo bidi dao. ²Tama da sigo e po te we Apiabolo me, te bidi Arkipusbolo me aṣeai. Tama Arkipus agai te we bidi tau sabo s̄ede te aga bomo eyu te tau sabo s̄e ebo dao, ami bidigo bomo eyu hwibō te tiwai ebo dao. Tama da sigo nago beba sisisnibo Godigo po wali pabo we bidibolo me e po aṣebao.^a

³ Eno homugo dago Aya God dali, te Genuai Bidi Jisas Krais dali, augwali sigo dage olo tau sabo kolesaga te homu dage dali bidimainao, dage dwagi yai homu eyu bidimainogo hagede.

^a 1:2 Kol 4:17

Filemon agai dwagi yai kolesaga ebo dao

⁴ Enō abagi Filemon, enō Godibolo enō gedu haluasa po weyu, enō nago nogi wabo si, sesemane sogo eno Godibolo buba hwi wabo dao. ⁵ Magi basowe? Sesemane sogo eno odali augwaligo nagede po weyu, nago te Genuai Bidi Jisasbolo dwagi yai homu eyu, tama nago konealubo po agade dāq wai. Tama tiyu nago Godigo we bidi tigidalibolo dwagi yai homu eyu, tau sabo dao, te po me eno odali. ⁶ Tama eno Godibolo gedu haluasa po weyu, eno te homu ebo dao: da dena homu Jisasba muyu, te da nage dali wadolobo dao. Tama tiyu, eno homugo dago Jisasde konealubo po dāq wabo kolesaga ebogo nage ola momainao. Tama ola menama, tama God agai da Jisasde wadolali we bidi da dali yabo dwagi yai sē page nago gisiga mu koneabao. Te homu eyu, eno Godibolo hanalu wabo dao. ⁷ Enō dwagi yai ama, Godigo we bidi tigidali nago augwali dali dwagi yai homu eyu, godolo mu ebo dao. Tama tiyu, nago te kolesaga eyu, augwaligo homu pua peyū, dwagi yai ilai. Tama te kolesaga ebode ena dwagi yai homu elama, tama eno moni homu me esiąyu, te eno homu dwagi yai elama bidibao.

Filemon agai Onesimus te aga ama ma oda sabo tiwai yao

⁸ Te nago te we bidi tau sabo sē ebaso, eno te homu elalubo dao: Te Kraisgo nogi te bomode eno te po bomo elama, nagebole weyu te nage wiegi yai doloba pai kolesaga me yainogo wagi sogo da, tama tiyu eno po nago wali pigi dao. ⁹ Tiali goli eno homugo nago te kolesaga emainogo te eno nagebole te bomo elalubo po wagobeo. Menio. Dago dena hasi wiegi yai homu eyu godolo ebo homu eyu, tama da deliba wadolama bidibao. Tama tiyu, eno nage dali po bomo elama wabo homu eno egobeo, te eno duadigi nage dali hanaluyu te po obao. Ena Pol, ena da Godigo po sela pabo bidi dao, tama Krais Jisas tobade augwaligo ena kalabus beba munama, megī tede bidibao. Tama ena te Pol, tiali digi, eno nagebole te po bomo elama wagobeo. ¹⁰ Tama tibaso, “Abagi aga tau saibao,” homu eyu, eno te bidi Onesimus tobade megī nage dali eno hanalu obao. Tama ena te kalabus bede bidibadi, te bidi Onesimus aga me te kalabus bede bidai. Eno agabolo Godigo po pusulama, tama Onesimus agai te po bugagia odama, aga homu begelama, tama aga Godigo hani bidi pedalali. Tama tibaso, megī aga da eno ogwa tiwai dao.^b ¹¹ Tama polobadu Onesimus aga nage dali bidali sogo aga nago olo sē ebo bidi bidiyu, tama aga hagela eyu, tama aga nage tau sisābo bidi bidai. Tiali goli megī da, aga nage dali ena dali tau sabo bidi mu bidaibao.

¹² Te eno te bidi Onesimus dali dwagi yai homu eyu godolo mu ebo digi, megī eno aga nage pageba ma tagala palobao. ¹³ Tama eno homugo

^b 1:10 Kol 4:9

agai ena tau somainogo aga ede ena dali bidimainao, homu yali. Eno Godigo gesi dwagi yai po te we bidibolo pusubaso, augwaligo ena e kalabus beba muani. Tama ena ede bidibadi nage digibulu bidiyu, nago ena tau sabo usu səbaso, eno homugo Onesimus aga e hanude bidiyu agai ena tau somaina homu yali. ¹⁴Tiali goli nago te usu da po wasiąbaso da, te eno aga ede bidao wagobeo. Eno nage dali bomo egobeo. Menio. Eno homugo nago dwagi yai sə eyu, nago homugo Onesimus agai ena tau siyu ede bidiyu bidimainogo homu eyu da, nago te homu usu eyu da, te aga ede bidiyu ena tau saibao.

¹⁵Te Onesimus wi peyu, agai nage tagalama, osogo eba bidagasai. Magi basowe? Nago aga ma siyu, tama aga nage dali mu bidaibao, eno te homu ebao. ¹⁶Tama megi aga te olo sə ebo bidi naga ma egobeo. Menio. Da bidi sela Genuai Bidi Jisasde wadolobaso, te bidi Onesimus aga da te da sigo ama mu dao. Tama megi aga dago ama mu gagawali, dago dwagi yai homu aga dali ebo dao. Te eno digi aga dali te eno ama mu te homu eyu, aga dali wiegi yai homu ebo dao. Me ma, nago eno ebo homu aiyaba elaluyu, tama nago te homu eyu, aga nago sə ebo bidi bidiyu, te me nago ama dao, tama nago aga dali dwagi yai homu elama, godolo mu yao.

¹⁷Te nago homugo ena te Kraisgo səde age name si ebo tiwai homu eyu da, te aga nage pageba ma asobo si, te nago Onesimus bugagia ma sao, te nago ena dali wiegi yai homu ebo gilama te nago Onesimus dali me wiegi yai homu eyu aga ma sao. ¹⁸Tama agai nage dali dwai sə me elama, tama agai nage dali negeli elaluyu da, teda nago agai te negeli ilali hasegelama, eno nogi tede muao. ¹⁹Ena Pol, ena digi eno e po eno nogogo aşəai, ena digi eno te Onesimusgo negeli ma wei ponaibao. Tama eno nagebolo Godigo po polobadu ola magi menigi sogo da, teda te səde nago ena dali genuai negeli elalugi menigi da. Tiali goli megi eno te genuai negelide po wagobeo. ²⁰Eno ama, te Genuai Bidi Jisasgo nogi tobade nago enabolo te wiegi yai homu nagame ilao. Tama da si te Krais agai sə ebo bidi bidai, tama tiyu nago te ebo dwagi yai kolesaga te Onesimusde eyu, te nago eno homu wiegi yai pua pomainogo tama tiao.

²¹Eno te homu bomo ebogo da, te nago eno te po wali pabo homu ebao. Tama tiyu eno nago Onesimus tau sao po nagebolo aşəna tolobao. Eno koneani, nago yabo te kolesagago megi eno nagebolo te yao wabo kolesaga te aiyaba elaluama, tama nago te Onesimus dali nosali ebo kolesaga te wiegi yai mu yaibao. ²²Tama tiyu, eno po me deli elalubao. Te eno homugo dagego gedu haluasa po wabo te Godigo odabo homu yaibao. Tama tiyu, agai ena dagebolo ma maiabo homu yaibao. Tama tibaso, ena nage dali bidaboo be tomode dąj togwali te ena bidaboo digi sisi elama elaluao.

²³⁻²⁴Te bidi Epafras aga ena dali e kalabus bede bidibao. Da sigo Krais Jisasgo sə ebaso, augwaligo da si kalabus beba muani. Tama Epafras

dali, Mak dali, Aristarkus dali, te Demas dali, te Luk dali, te bidi tigidali augwaligo ena dali Kraisgo s̄e ebo bidi dabe dao. Tama tiyu, augwaligo nagebolo nage tao po obao.^c

25 Eno homugo te dago Genuai Bidi Jisas Krais agai we bidi olo mu tau sabo kolesaga dage tigidalide bidimainao. Tama dao.

^c 1:23-24 Tpi 12:12, 25; 13:13; 15:37-39; 19:29; 27:2; Kol 4:10

Hibru Dabeba Tolali Pas

Hasia nedebo tau sabo po

Te e pas nogi Hibru, te nogi page e dao: te pas bidi me deligo aşənai te Godigo po wali pabo hani me deli augwa konealubo homu tagalainu ebaso, te haniba aşənai pas dao. Magi baso meni, te bidi hani mebagi augwali aiyaba elaluama, te augwaliba səgə mani. Te Hibru po wabo Juda hani we bidi dabe, augwalibolo bidi me deligo e pas aşənai tolali. Dego e pas aşənaiwe, te dago konebeo, agai aga nogi e pas tomode aşəbeo. Tama augwali te Juda we bidi bidali goli, augwaligo te Kraisde gesi wiegi yai po odama, tama te Krais wali pabo we bidi hani pedelali. Tama e pas aşənai bidi agai augwaliba te genuai po peni page sela ola mani. Te pogo me deli e dao. (1) Te Jisas Krais aga te wiegi yai mu tama, te Godigo Ogwa dao. Te Jisas e tqde bidali sogo, agade te səgə hauwa me dene dali tolali, tama te tiali kolesagade Godigo Jisas te polalubo bidi mu pedalumainu elama, te we bidi dabe augwali tau sali. Te po te Daj 2:10 tede elalubao. Te bidi Jisas agai te Juda dabego polobadu elaluali nai tigidali aiyaba mu elaluai dao. Krais agai te ensel mobo bidi dabe me, te bidi Moses me, te bidi Arongo hani pris bidi sə ebo me, te bidi Melkisedek me, te tigidaligo nogi te Godigo Ogwa Jisas Kraisgo nogigo ela solama aiyaba elaluali. (2) Godigo digi Jisas sa munama, te pris sesemane sogo bidimainu yali, tama agai te Juda pris bidali bidi dabe aiyaba elaluai dao. (3) Jisas te dagalude polalubo pris me bidada pidu bidaibao. Tama agai te agaba konealubo homu dəq wabo we bidi ma dobola sobaso, te usu yaibao. Te bidi Mosesgo lotu po ola mayu pusali bomo yai po dabe, te Jisasgo yabo sə ola mabo sə ebo kolesaga naga yali.

Te pasgo te we bidi augwaligo konealubo homu dəq walobo po aşənai, tama agai te polobadu bidali Israel we bidi dabego boma pai konealubo po dəq wali te po te Daj 11 tede hauwa elalubao. Agai tame po wali, te mena tiwai seğego augwali gegebaso, te augwa konealubo po dəq ola selama elaludu te augwa isiboba usu nubaso, te usu dao. Augwaligo te Jisasba naga tonono elalua pedu te agai kolesaga wali pobaso da, teda tebogo te augwalide tolobo səgə me dene te dagala səwaibao. Tama tibaso, augwali aga dali homugo kəq pai we bidi mu bidiqə, e pas aşənai bidigo te po obao.

Jisasgo te ensel dabe aiyaba elaluali
(Dqj 1-2)

Godigo Ogwago po dabolo mani

1 ¹Te polobadu mu hauwa sogo me, te haniani kolesaga hauwago me, te Godigo agai po pusali bidi profet dabego pedauwalidu agai po meba te dago wqj dabebolo mena mena pai dao. ²Tiali goli megi e sogo da, te nosali pedalobo sogo tiwai mu yali, te Godigo aga O gwago pedauwalidu agai po dabolo pusai dao. Te aga O gwago nogogo me te Godigo te tq dali dagalu dali te tigidali nai nigai dao. Tama Godigo agai te tigidali nai nosali somainogo aga sa muai. ³Te O gwaga agai te Godigo wiegi wiegi yai homu kolesaga te dabolo hania ola mabo bidi dao, tama aga te God tiwai gagawai mu tama. Agai po da te genuai bomo elalubo, tama te bomai pogo agai te tigidali bidibo nai me bidaluao odubadi tama te bidalubo dao. Agai te we bidigo sege sali sela sabo se te silama, tama megi da te Tigidali Bomo Elalubo Tuni Bidi, te God dolo nogo badu dulalubao, aga genuai bidi mu dao.

**Te Godigo O gwago nogigo te ensel mobo bidi
dabego nogi aiyaba elalubo dao**

⁴ Te aga Ayade sali nogigo te ensel mobo bidi dabego nogi te aiyaba elaluama, tama wiegi yai mu yali. Tama tiwai yaligo da, aga digi te mobo bidi ensel dabe augwaligo Genuai Bidi mu pedalama, tama augwali aga dologoba pali. ⁵Magi baso meni. Polobadu Godigo aga O gwaga dali te po wai,

“Nage eno O gwaga dao. Megi tama ena digi nago Aya
pedalomainogo yai.”

Tama agai po ma wai,

“Te ena digi agai Aya bidiyu,
tama aga te eno O gwaga bidaibao.”^a

Te me sogo Godigo te po si te ensel mobo bidi me deli dali wai dawe? Menio. ⁶Tiali goli agai aga gomunai O gwaga te e tqba tamadi tagala palobo sogo tama agai te po wai,

“Tigidali eno se ebo ensel mobo bidi dabe, dage
kidu sugunama, tama dagego aga nogi ugwbaba
sao,” wali.^b

⁷Tama God agai te ensel bidi dabe augwalide te po wai,
“Godigo te aga ensel mobo bidi dabe augwali te wali
tiwai pedalomainogo ilibo dao.

^a 1:5 2 Sml 7:14; 1 Sto 17:13; Tib 2:7 ^b 1:6 Bom 32:43

Te agai aga sę ebo bidi dabe augwali te moni
posolo ebo sia tiwai pedalomainogo ilibo dao.”^c

⁸Tiali goli aga Ogwabolo agai te tiwai po wai,
“Nage God dao, nage tuni bidi sesemane sogo bidada
peyu, bidada paibao.

Nago naga we bidi te doloba pai kolesagago tonalubo
dao, tama te kolesaga naga ebode nago genuai
wiegi yai nogi elalubao.

⁹Nago te doloba pai kolesaga ebo te godolo mu
eyu, tama te bomo yai po sela səbo te nago hagela
mu ebo dao.

Tama tibaso, ena nago God bidiyu, tama eno
nago nogi uwgaba somainogo eyu, te wel nago
toboluba gelali, tama tebogo nage te wiegi yai
homu pemene ilali.

Te naga hai namu dabe augwaligo te nago wiegi yai
homu pemene ebo tiwai me egobeo.”^d

¹⁰Tama agai po agabolo ma weyu te po wai,
“Genuai Bidi, polobadu mu nago e tq nigilama
tama aga bomo elalubao. Te dagalu me, te naga
nogogo nigai.

¹¹Te dagalu de tq si te tigidali dolaibao, tiali goli
nage da me dologobeo. Menio. Nage da sesemane
sogo bidaibao.

Te dagalu de tq si da te tigidali te badia paibao, te
poloba ugwa badia pai tiwai yaibao.

¹²Te nago augwali pedeyu, te bidigo badia pai
ugwa pedebo tiwai yaibao.

Te nago augwali hasegeleyu, te bidigo ugwa
hasegelebo tiwai yaibao.

Tiali goli, nage da, tama naga bidibo dao. Nage
me hasegelegobeo.

Tama nage bidibo sogo te munu me siligobeo.”^e

¹³Polobadu Godigo te po wai,
“Nage genuai bidi ena dali hodobo bidimainogo eyu,
tama eno dolo nogo badu duayao.

Tama dualubadi, te eno nago boi bidi dabe augwali
te nago səqə dologoba muaibao.”^f

Tiali goli me sogo Godigo te po te ensel mobo bidi me deli dali waliwe?
Menio. ¹⁴Te ensel mobo bidi dabe augwali da, te noma bidi, tama

^c 1:7 Tib 104:4 ^d 1:9 Tib 45:6-7 ^e 1:12 Tib 102:25-27 ^f 1:13 Tib 110:1

augwaligo te Godigo sə ebo dao. Te Godigo augwali tagala palaibao, te aga augwaligo sege sali sela sənama ma sainogo ebo we bidi dabe tau somainogo tebo dao.

Godigo da ma sali, te genuai sə mu dao

2 ¹Te Godigo O gwago genuai nogigo te ensel mobo bidi dabego nogi aiyaba elalualigo da, teda dago te dago odali mu po tagalaидали weyu, dago ma bomonama tama te odali po homugo bugagia dą̄ ola sao. ²Magi baso meni. Polobadu Godigo po meba te ensel mobo bidi dabebolo pusama, tama augwaligo te we bidibolo ma pusali. Tama pusama, tama te po Godigo bomonama bugagia dą̄ walali. Tama tiyu, tama bidigo te po bolama tama te po sela sawani bidi tigidali, augwali te dwai dene mu te augwa yali dwai kolesaga usu nama sai dao. ³Tiali goli megi da, Godigo da ma sabo sə yali, tama agai te sə yali te genuai nai mu dao. Tama tibaso, dago Godigo te sə yali po oda tagalama tudiba muani da, teda da wi peyu, tama te dwai sə yalide te dene sabo sə te mena tama geda saibawe? Te usu munu egobeo. Hasia Genuai Bidigo digi po pusuyu, tama agai da ma saibao homu yai. Tama agai po odali bidi dabe augwaligo dabolo te po mu po naga dao hania ola mawai dao. ⁴Tama ebadi, God me agai te po te haniani bomai səgo me tama agai haniani bomo yai idualigo te po mu po dao dabolo hania ola mani. Tama tiyu, agai te Mobo Bidigo olo mabo haniani wiegi yai sə ebo kolesaga te we bidi dabe augwaliba dobayali, te God aga digi homugo tama tiai.

Te da ma sali sə yali tuni bidi Jisas dao

⁵Eno megi asəbo po, te we bidigo gesi kolesaga eyu bidibo te nosali pedalabo po obao. Godigo te ensel mobo bidi dabego te kolesaga ebo dodolama tonalumainogo teba me mubeo. Menio. ⁶Te Godigo po bukude asənai po me delide te bidi me deligo te po pusai,

“God, bidi dabe augwali te magi nai da weyu, tama nago augwali homugo konebo dawe?

Magi baso nago augwali tonalubo dawe? Augwali təde bidibo bage naga dao.

⁷ Te osogo naga, nago augwali te ensel mobo bidi dabe augwali dologoba muai.

Nago augwalibolo genuai bomo me, genuai nogi mawai, tama te kolesagago nago augwaligo nogi ugwbaba sai.

⁸ Nago te tigidali nai augwali dologoba muani, te nai tigidali augwaligo tonalumainogo tiai.”^g

^g 2:8 Tib 8:4-6

Awe, Godigo te tigidali nai bidi dologoba munama elaluai. Tama agai te nai me deli te olo me augwali dologode elalumainogo me ebeo. Tiali goli megi dago me susabadi digi te tigidali nai bidi dologode elalubeo. Menio. ⁹Tiali goli dago Jisas konebao. Polobadu osogo naga Godigo aga nogi te mobo bidi ensel dabego nogi dologode bidimainogo ilali, te Godigo wiegi yai homu eyu, te olo mu tau sabo kolesaga pedalomainogo me te tigidali bidi tau siyu isainogo tiai. Agai te dene tolama isali, tama Godigo aga nogi ugwaba selama, tama genuai bomo me genuai nogi agabolo mawai dao, tama megi aga te tiwai bidibo dago konebao. ¹⁰God aga te tigidali nai nigai bidi, tama agai tigidali nai bugagia bidimainogo tonalubo dao. Tama agai homugo aga wai puluba hauwa te dagaluba odasa pelama, tama bugagia mu aga dali bidimainogo yai. Tama tiyu, agai dene Jisasba pedalobo gogolali, tama te dene yaligo te Jisas te we bidi augwali hasia mu polasa pabo augwali ma sali bidi usu mu ilali. Godigo te kolesaga yaligo, te dolo mu yai.

¹¹Dago koneani, te tigidali we bidi te magi dwai se isama wiegi yai pedalomainogo ilali te bidi aga Jisas dao, tama te magi dwai se me isayu te wiegi yai pedalali we bidi te tigidali augwaligo aya te Jisasgo aya me te deli naga dao. Tama tibaso, Jisasgo te we bidi augwali nogi weyu, “ama” wai, tama agai augwali te tiwai nogi ebo te aga hale me ebeo. ¹²Te Jisasgo da “ama” wabo pode augwaligo polobadu e po bukude aséai dao,

“God, eno nago nogi te eno ama dede augwalibolo
pusaibao.

Awe, te eno nago nogi ugwaba sabo tèabi weyu,
te genuai po miyu sisinibo madi tomode te po
pusaibao.”^h

¹³Tama agai po ma wali,

“Te eno digi agade konealubo homu mu däu
waibao.”

Tama agai po ma weyu te po wai,

“Ena digi bidibo, suao. Tama Godigo ena mani we
bidi dabe, augwali me ena dali bidibao, te wai dabe
tiwai bidibao.”ⁱ

¹⁴Tama te agai “wai dabe” wabo we bidi dabe augwali te tqde we bidi bidai, te da tigidali tiwai yai. Augwali tama bidaligo da, Jisas me te bidi augwali tiwai mu gilama pedalai, te aga tigi isimainogo yali, tama te isibogo agai te bomo elalubo bidi agai te bidi isimainogo ebo bidi te agai bomo dolaibao. Te bomo elaluali bidi te Satan dao. ¹⁵Te we bidi augwali isibode wi yai. Tama augwali te tqde bidali tigidali sogo, te isibode wi ebogo augwali kalabus elaluai. Tama augwali te kalabuside bidibo sela sawainogo eyu, Jisas aga e

^h 2:12 Tib 22:22 ⁱ 2:13 Ais 8:17, 18

tode isai dao. ¹⁶Mu tamao, agai te ensel mobo bidi dabe tau sainogo te sé me ebeo. Menio. Agai te sé yali te Abrahamgo hani augwali tau sainogo te sé yai dao. ¹⁷Tama tibaso, te tigidali naide aga te tigidali we bidi tiwai mu pedalomainogo tiali. Magi basowe? Agai tama tialigo da, tama aga te God dali we bidi dali tomode dolalubo pris toboli bidi bidabo te usu igibu tama Godigo sé tolaluuaibao. Agai te we bidi homu dene eyu, tau sabo wiegi yai kolesaga eyu, tama aga te Godiba aga homugo kę̄ paí bidi bidai. Tama tiyu, agai te Godigo te tigidali we bidigo dwai sé yali sege selasawainogo eyu, te aga ofa ilali te usu yai dao. Tiali goli aga te we bidi tiwai mu pedaligi menigi da, teda te sé tigidali ebo aga usu menigi da. ¹⁸Aga digi te dene tolali, te Satango aga dwai sé ebo kolesagaba kekainu eyu te usu sabo sé tigidali agaba pedalali, tiali goli aga dwai sé me ebeo. Tama tibaso, megí te usu sabo sé te we bidi dabe augwaliba pedalobo si te agai augwali tau sabo usu dao.

Jisasgo genuai nogigo Mosesgo genuai nogi aiyaba elaluali
(Pai 3:1-4;13)

Jisasgo genuai nogigo Mosesgo genuai nogi aiyaba elaluai

3 ¹Te Godigo po odolama wali pabo ama dede dabe, te dagalude bidibo Godigo dage me te Jisasgo sə ebogo i wai dao. Tama tibaso, dagego homugo Jisas bugagia kone paliqə. Agai te dago agade konealubo homu dəqə weyu tama agade po te we bidi gesabide pusubo tau siyu, tama dago pris toboli bidi bidimainogo eyu, Godigo aga e təba tagala palali. ²Godigo aga te səba muani, tama agai Godide homu kəq̄ pai bidi bidai. Agai te bidi Mosesgo polobadu te Godigo we bidi tau sabo sə tiwai yai. Te we bidi augwali Godigo be tiwai bidai.^j ³Tama dago koneani, be sə yai bidigo genuai nogigo te aga sə yai bego genuai nogi digi aiyaba elalubo dao. Tama te tiwai me Godigo homugo Jisas koneani, agai te genuai nogi me deli sabogo te Mosesgo genuai nogi te aiyaba elaluabo homu yai. ⁴Te tigidali be te bidigo aga sənama elalubao. Tama te tigidali nai nigali bidi da, te God dao. ⁵Te bidi Moses aga te Godigo sə bidi, tama te Godigo we bidi tigidali tomode yali səde agai Godide homu kəq̄ pai bidi bidai. Tama agai te Godigo nosali wabo po pusubo sə te Mosesgo bugagia yai. ⁶Tiali goli Krais aga da te Godigo Ogwa, tama agai da te Godigo hani augwali tonaluyu tama te toboli bidi bidibo sə elaluyu, tama agai me te səde Godide homu kəq̄ pai bidi bidibao. Tama tibaso, agai nogigo te Mosesgo nogi aiyaba elalubo dao. Tama sesemané sogo dago konealubo po dəqə weyu tama wi isəyū tama dago wiegi yai homu pemene elama tama Genuai Bidi naga tonaluyu da, teda da me te Godigo hani mu bidaibao, te da agai be tiwai elaluibao.

j 3:2 Nam 12:7

Te Godigo po sela səbo bidi dabe augwali toma munu me tugobeo

⁷Te dago Kraisde konealubo po bugagia dąu obaso da, teda da te Godigo we bidi hani mu bidaibao wali. Tama tialigo da, dago te Godigo dabolo wabo po mu odao, te Godigo Mobo Bidigo polobadu wali po tiwai. Agai po te bukude aşənai, te po e dao:

“Megi e sogo tama dagego Godigo pedauwalide po odali da, ⁸teda dagego duga olo palia sigio, te tiwai dagego wąj dabe augwaligo polobadu Godigo po sela səyū hagoma yali sogo tiwai. Augwali te bidi meni yai madi bidiyu tama augwaligo God usu sai. Te sogo augwaligo augwa olo palia sali.

⁹Tama Godigo te po wai, ‘Tede dagego wąj nōq dabe augwaligo eno yali bomai sę tigidali te kibu be bidi sese si tede usu nama augwaligo suai. Tiali goli te sula tagaliyu, augwaligo ena usu mu sai.

¹⁰Tama tibaso, te we bidi hani dali eno sębę mu elama, tama eno te homu yai, “Tigidali sogo augwali te enade homu kęq pisławai we bidi bidai dao. Tigidali sogo augwaligo te eno kolesagadu me bilai menio.”

¹¹Tama eno sębę eyu, tama eno po hasegelidali weyu eno mu po olama dąu wali, te po wai, “Augwali eno te toma nabo pesageba munu me asogobeo. Munu me asogobeo. Mu menio.” te po wai dao.’ ”^k

Te Godigo Mobo Bidigo te po tigidali polobadu olama tama bukude aşənama elalubao.

Dago te Godigo po te Israel dabego sela səwani tiwai yabuo

¹²Ama dede dabe, dage bugagia bidaio. Tiyu dage tomode ama me deli aga homude dwai sę ebo homu elaluyu, tama aga Godide konealubo po tagaliyu, tama te bidibo ula elalubo God gegeda peyu tudiba muidali weyu, dagego dua dao. ¹³Tama tiwai pedalidali weyu, megı e sogo Godigo nogi yali “te megı” te me elalubadi, tigidali sogo deli deli dagego wiegi yai po te ama dedebolo mayu, tama augwali homu hodoloyu tau sao. Duga hasi tama tiluao. Tiyu te sęgę sabo kolesagago dage tomode bidi me deli ili po ola

^k 3:11 Tib 95:7-11

mayu, tama te sego aga olo palia selamu. ¹⁴ Magi baso meni. Polobadu dago Godide konealubo po dą̄ wali, teda te konealubo po megı me dago bugagia dą̄ weyu, teda da isiboba usu nigi paibao. Dago tama tiyu da, teda da te Krais dali wadolama, tama sę̄ deli naga aga dali hodobo eyu tama bidaibao.

¹⁵ Dago koneani, te Godigo po bukude te po me elalubao,

“Megi e sogo tama dagego Godigo pedauwalide
po odali da, teda dagego duga olo munu me palia
sigio,

te tiwai dagego wą̄ dabe augwaligo polobadu
Godigo po sela sāyū hagoma yali sogo tiwai.”^l

¹⁶ Polobadu niwai we bidi augwaligo Godigo po odali goli, augwaligo hagoma eyu, te Godigo po sela sāwai dawe? Te bidi Mosesgo te Isip tō tagalama odasa asali we bidi tigidali augwaligo te sę̄ yai. Augwaligo naga tama te kolesaga yai dao. ¹⁷ Te kibu be bidi sese si usu nama te Godigo sę̄bę̄ de dali yaliwe? Agai te dwai sę̄gę̄ sabo we bidi augwali dali sę̄bę̄ yali, tama te we bidi augwali isai, tama augwaligo tigi te bidi meni yai bulude elaluai. Godigo te dwai sę̄ yali we bidi augwali dali naga sę̄bę̄ yai. ¹⁸ Godigo debolo po olama, tama mu da olama agai po dą̄ weyu, te augwali agai toma nabo pesage tomoba munu me asogobeo waliwe? Te agai po sela sāwani we bidi augwalibolo te po wai. Agai te po augwalibolo naga wai dao.^m ¹⁹ Tama tibaso, dago hania koneani, te augwaligo augwa homugo Godiba tią̄lusią̄baso, tama te tebogo naga te augwali Godigo te toma tumainogo ebo digi te pesage tomoba painogo ebo te usu me ebeo.

Te Godigo we bidi augwali toma nabo po wai

4 ¹ Godigo dą̄ wali po megı me elalubao, tama agai tede te po wai,
“Dage eno te toma nabo nigli te tomoba piagameo.” Tama tibaso da wi me yao. Tiyu Godigo gedude dage tomode me deli te tū geda muyu, tama te toma nabo pesage tomoba pabo usu egobeo waidali weyu, dage dua dao. ² Dago te Godigo bukude te toma nabo pesagede wiegi yai po pusali te odai, te Israel dabego polobadu odali po tiwai. Tiali goli augwaligo te po olo dali odolama, tama tede augwaligo homude te konealubo po dą̄ me wabeo. Tama tiyu, augwaligo te odali po, te pogo augwali tau me sabeo. ³ Da te Kraisde konealubo po dą̄ wabo we bidi, te da toma nabo pesage te tomoba paibao. Polobadu Godigo te pesageba pisabo bagede po weyu te po wai,

“Ena sę̄bę̄ eyu, tama eno po hasegelidali weyu eno

mu po olama dą̄ wali, te po wai,

‘Augwali eno te toma nabo pesageba munu me

^l 3:15 Tib 95:7-8 ^m 3:18 Nam 14:1-35

asogobeo. Munu me asogobeo. Mu menio,’ te po wai.”ⁿ

Godigo te tigidali nai nigila silali sogo, te agai yabo sę me elalubeo. Tiali goli dago agai te tiwai po te aga toma nabo pesagede po wai odobaso, teda dago koneagameo, te toma nabo pesage me elalubao. ⁴Tama te bukude aşənai po me delide te bidigo te nogo a naga me badu si wali sogode te po wai,

“God aga tigidali nai nigila silama, tama te nogo a naga olama me badu si wali sogo te aga toma neyu olo bidai.”^o

⁵Tama te gasa aşənai pode me te toma nabo pesagede Godigo te po wai,
“Augwali te eno toma nabo pesageba munu me asogobeo. Munu me asogobeo!”^p

⁶Tama te wiegi yai po te polobadu odali te we bidi, augwaligo te po mu po dao te homu isąyu tama te po sela sąwani, tama augwali da te toma nabo pesage tomoba pabeo. Tialima gasa we bidi augwali Godigo gedude te toma nomainogo yali te pesage tomoba pabo usu dao. ⁷Te dago e tama koneani: Godigo bodolu me sogo deli ma muai dao. Agai te bodolu muani nogi yali “Te megı naga tama.” Hasia te Israel dabego agai po sela sąwani. Tiali goli nosali te kibu be hauwa pai madigi tama Godigo po te bidi Devitgo penanede ma pusali, te dago te tiwai po tamadi wai,

“Te megı e sogo tama dagego Godigo pedauwalide po odali da, teda dagego duga olo munu me palia sigio.”^q

⁸Te polobadu te tobolu bidi Josuago te Israel we bidi augwali te Godigo mawaibao wali toma nabo pesage tomoba selasa pigi sogo da, teda Godigo nosali te gasa sogode me da po wagi menio.^r ⁹Tiali goli dago koneani, te toma nabo sogo te me elalubao. Te Godigo tigidali nai nigila silama, tama aga toma nani sogo, te tiwai tama te toma nabo sogo asobo te Godigo we bidi augwali tonalubo dao. ¹⁰Magi baso meni. Dago koneani, te Godigo te toma nomainogo nigelili pesage tomoba pabo bidi, te aga digi sę yali silama te toma nabo te tiwai eba, te polobadu God aga digi sę silama, te toma neyu olo bidali tiwai gilama tebo dao.^s ¹¹Tama tibaso, te toma nabo pesage tomoba painogo da te dago sę bomonama yao. Tiyu yaide te bidi me deligo te Godigo po sela sąbo kolesaga wali peyu, te Juda bage augwaligo polobadu yali sę tiwai yabuo, tama aga tula munama tama hagawaibao. Te tiwai idali weyu, dago bomonama Godigo po bugagia wali pao.

¹²Magi baso meni. Te Godigo wali po te bidabo ula elalubao, tama aga te sę bomo idubao. Te mu poa pai, tama te si dali si badu poa pai hwą

ⁿ 4:3 Tib 95:11 ^o 4:4 Gag 2:2 ^p 4:5 Tib 95:11 ^q 4:7 Tib 95:7-8 ^r 4:8 Bom 31:7;
Jos 22:4 ^s 4:10 Gag 2:2

gego poai yali te aiyaba elaluai. Tama bidigo poa pai kago hwą gego hasa mi togoyu, tama te poa pai hwą ge polo te hasa dili tomoba tugi pelama, tama te dili hania pedalobo dao. Tama te tiwai me Godigo wali po dago homu tomoba peyu, tama dago homu ogwa wai dali dago mobo dali si pedebo dao. Tama agai wali pogo dago ebo homu dali dago homu kolesaga page dali si, te tigidali te agai osola subo dao. ¹³ Te Godigo nigali nai me deli te God agai gedude te geme dula sainogo ebo te usu munu me egobeo. Menio. Te tigidali nai te hania mu te Godigo gedude tigidali te elalubao. Tama Godigo naga te dago ebo kolesaga tigidali dagalabo bidi dao.

Te gesi dąu wabo sę kontrak yali bidi Jisas te dagalude polalubo pris bidi bidibao

(Dqj 4:14–10:38)

¹⁴ Te God aga te dago ebo kolesaga dagalabo bidi bidibaso, dago te Kraisde homugo konealubo po, te gasa we bidi dabebolo pusabo po, dago te pode dago homugo mu kęą pao. Magi baso meni, dago genuai pris toboli bidi te bidibao, tama aga te dagaluba holama tama Godigo bidibo digi tomoba mu pai. Aga te bidi Jisas, te Godigo Ogwa dao.

¹⁵ Dago digi te seğę aiyaba elaluabo bomo menio. Tiali goli dago genuai pris toboli bidi aga tede da homu dene isąbo tiwai bidi da po wagobeo. Menio. Te daba usu siyu te pedalobo seğę tigidali, te tigidali seğę agaba me pedalama aga me usu sai. Tiali goli agai dwai sę munu me ebeo.

¹⁶ Tama dago te tobage genuai pris toboli bidi elalubaso, da te dwagi yai homu eyu tama God pąba pao, te da wi me egimio. Aga da te olo tau siyu wiegi yai kolesaga mabo bidi dao. Tama da agaba peyu, tama agai da homu dene ebo homu eyu te da tau saibao. Tama dago seğę elalubaso da, teda agai te olo tau sabo wiegi yai homu kolesaga ebogo te da tau saibao.

Jisas aga te dago genuai polalubo pris bidi da ma sabo te usu mu yalio

5 ¹ Te tigidali genuai pris toboli bidi sa mubo kolesaga te e tiwai ebo dao: te Godigo bidi dabe augwa hani tomodu dią selama, te Godigo augwali sęba munama, te we bidi augwali tau sabo sę elala paibao.

Augwaligo te we bidi dabego Godibolo haniani maiabo nai mabo sę eyu, tama te seğę sela səbo haniani ofa me Godibolo mabo sę ebo dao. ² Te bidi dabe augwa digi te Godigo po dolo wali pabo bomo meni yai bidi me sogo bidibaso, augwaligo te kolesaga konesiąbo te Godigo tų wali pabo tagalali we bidi dabe dali te dua digi kolesaga sesa pobaso te usu dao. ³ Tama augwali me te bomo meni yai bidi dabe bidibaso, augwaligo te we bidi augwaligo seğę sela səbo ofa naga mabo meni, te augwade

digi sęge dali sela səbo ofa me te Godibolo mabo te dolo dao.^t ⁴Te genuai pris toboli bidigo ebo sę te genuai nogi elaluiba. Tama bidi me deli aga homugo aga digi te sę me sogobeo. Menio. Godigo naga hasia agabolo i olama, tama agai te sę yaibao, te polobadu agai te bidi Aron te genuai pris toboli bidi sęba i wali tiwai gilama ebo dao.^u

⁵Krais me agai te Livai hani pris bidi dabe tiwai tama tiai. Agai aga nogi aga digi ugwaba selama tama ‘Ena te genuai pris toboli bidi pedaliba,’ agai te homu ebeo. Menio. God aga digi aga nogi ugwaba siyu, tama te sę emainogo sa muai. Tama tiyu Godigo agabolo te po wai,

“Nage eno Ogwa dao. Megi tama ena digi nago Aya
pedalamainogo yai.”^v

⁶Te Godigo po buku tomode te gasa badu me agai te po wai,

“Nage pris bidi sesemane sogo bidada paibao, te
polobadu bidali pris bidi Melkisedek tiwai yaibao.”^w

⁷Polobadu Jisas te e tode bidi tiwai bidibadi, te sogo agai po Godibolo wai. Godigo aga te isibode ma sabo homu yali, tama tiyu agai gedu haluasa po aga dali weyu genuai i wali, tama aga gela hauwa mu wai. Agai aga homu kolesaga te aga digi aiyaba elaluama tama imilai bidi bidama, tama aga God dologode bidali, tama tibaso Godigo agai gedu haluasa po wabo odai dao.^x ⁸Jisas da te Godigo Ogwa tama, tiali goli aga dene tolali, tama te tialigo te Godigo po wali pabo kolesaga te aga mu konea sali dao. ⁹Te tama tialigo aga te usu mu ilama, tama aga te we bidi ma dobola sabo bidi pedalamana, tama agai po wali pabo we bidi tigidali ma siyu, augwali bugagia bidada peyu, bidada pabo bidi dao. ¹⁰Tama Godigo aga sa munama tama te po wai, “Nage pris bidi dao, te polobadu bidali pris bidi Melkisedek tiwai yaibao.”

Da te dwasianu wai bōu tiwai munu me bidigio po wali

¹¹Te bidi Krais aga te pris bidi dao, te Melkisedek tiwai, tede eno po hauwa elalubaso, tama dagebolo eno te po wainogo yai. Tiali goli dagego homu kolesaga megı puna pelama, tama dagego polo konea sabo menio. Tama tibaso, dagebolo eno te po page ola mawainogo sinabo sę dene yaibao. ¹²Te dage Godigo po ola mabo bidi bidabo sogo usu yali homu yai. Tiali goli menio. Dagego homu kolesaga habuge elalubaso, tama eno homu bidi me deligo te Godigo hasia polalubo po page deli deli te dagebolo ma ola momainogo yao. Dage te wai bōu tiwai dao, dagego te dili yai nai me sela tugobeo. Te dagego te ame pę naga tubo usu dao. Dage tama bidibo te dwai dao, usu egobeo. ¹³Dago koneani, te ame pę naga tubo bidi tigidali augwali dwasianu wai bōu naga bidibao. Tama

^t 5:3 Prs 9:7 ^u 5:4 Sai 28:1 ^v 5:5 Tib 2:7 ^w 5:6 Tib 110:4 ^x 5:7 Mat 26:36-46;
Mak 14:32-42; Luk 22:39-46

augwaligo te doloba pai kolesaga dali, te dwai kolesaga dali bugagia dagalabo te augwaligo me konebeo.^y ¹⁴Tiali goli te dili yai nai da te genuai bidi dabe augwaligo tubo dao. Te tobage bidi dabego te augwa digi augwa homude kolesaga hauwa sogo osola suyu, tama augwaligo te wiegi yai kolesaga ebo me te dwai kolesaga ebo me te augwaligo dagalabo usu dao.

6 ¹⁻²Tama tibaso, dago te bidi mugo odabo po odao. Dago te hasia sogo odali Krais pode naga te po page po wabo s̄e elala pigimio. Tama dago te be ni pos me deli te hauwa sogo buluyu idu gebo menio. Dago te s̄e silama, tama gasa s̄e egi pabo dao. Tama tiyu, dago e tobage po naga me olamuo: te dago homu begelama te bidibo ula elalusiābo te kolesaga tigidali tudiba munama homu begeleyu, tama dago Godide konealubo po d̄aq weyu, tama te haniani baptais sabo kolesaga po wabo me, tama te bidi toboluba nogo mubo me, tama te tigidali isai bidi ma hodaloabo po me, tama te bidi dabe augwali te po t̄u elama, tama te po t̄u dodolobo bidi agai po sesemane sogo bidada peyu, bidada paibao po wai. Tama da te tobage hasia sogo odali po wabode naga bidigimio. Menio. Te da pidu geyu, tama dago te we bidi mu augwalibolo ola maiabo po odinao. ³Tama Godigo tede usu da obaso da, teda mu tama dago te tiwai s̄e naga eguo, tama dago agai gasa po me odama tama wali paibao.

⁴⁻⁶Magi baso meni. Te bidi meba augwaligo te Godigo ula salio. Augwaligo te Godigo olo mabo wiegi yai nai usu sel a sulama koneani. Tama te Godigo Mobo Bidi me te augwaligo sai dao. Augwaligo te Godigo wali po odolama, tama augwaligo koneani, te wiegi yai mu da wai. Augwaligo te Godigo wiegi yai sogo bomo ebo suyu genenama, tama te tiwai bomo te nosali pedalaibao te homu yilio. Tama te bidi dabe augwali tulaluyu tama God tudiba mubaso da, teda augwali ma begasa aselama, homu ma begelabo t̄u te usu munu me egobeo. Menio. Te tebo kolesagago augwa digi augwaligo te Godigo Ogwa te ni pedaide ma elali s̄e tiwai yai. Augwaligo aga ni pedaide walama, te bidi dabego agade te posobo po waibao.

⁷Eno te Godigo ula sel a tagalali bidi tede po digi po begelama tama aga e tiwai dao. Te tq te elalubao. Te tq te hauwa sogo tulubage teba bugagia tuluyu, tama tqo te tulubage sabo dao. Tama te tq te gi bulali we bidi augwali tau somainogo eyu, tama te tqo wiegi yai nai walobaso da, teda te kolesagade Godigo wiegi yai s̄e te tqo ilibao dao. ⁸Tiali goli, agai te haniani sesani yai bono naga walobaso da, teda te tq te olo dwai tq dao. Te p̄ade Godigo gedude dolaibao. Nosali da siago aga daibao.^z

⁹Te abagi dabe mu, megi eno e sege yai po dagebolo wali goli, eno mu koneani, homu si meni, te dage te tiwai me dologobeo. Menio. Eno e

^y 5:13 1 Ko 3:2 ^z 6:8 Gag 3:17-18

homu dage dali ebao, te dagego te dwagi yai tū wali peyu tama Godigo dage ma dobola saibao.¹⁰ God aga te dolo osola subo konesiabo bidi meni. Agai homugo dagego te yali tigidali sēde te homu me gegeda peyu, me tagalogobeo. Menio. Dagego duga homugo agade kone palobadi tama agade dwagi yai homu eyu, tama te tialigo te dage homu hodolama tama agai we bidi augwali te dagego tau sidu geduai dao. Tama te tiwai kolesaga dagego me ela pabo dao.¹¹ Tama bomonama eno homugo dage tigidali deli deligo te tiwai sē bomo naga eyu, tama dwagi yai homu ebadi duga konealubo po dāu weyu, tama Godigo duga ma sabo te tonaluao. Dagego te tiwai sē ela pidu, te duga e tōde bidibo sogo te silibode te usu nigi pao.¹² Dage sē ebo hagela egimio. Menio. Bidi meba augwaligo te Godide konealubo po dāu mu weyu, te hagela homu polo isiabo bidi dabe bidibao. Tama tiyu, tama te polobadu Godigo te aga wai dabe augwalibolo mawaibao wali nai tigidali te tobage bugagia tonalubo bidi dabego sabo dao. Dagego augwaligo ebo dwagi yai kolesaga wali pião.

Godigo dāu wali po mu po pedalaibao

¹³ Polobadu Godigo te agabolo nai maiabo po Abraham dali dāu wai. Tama bidi me deli aga te genuai bidi da olama tama God aga aiyaba me elalugobeo. Mu Menio. Godigo nogi naga te ug Wade mu elalubao. Tama tiwai tialigo da, teda God agai homugo agai te Abrahambolo nai maiabo mu po olama, tama te dāu wali poba genuai bomo me momainogo eyu, God aga digi nogigo bomo teba manani.¹⁴ Agai te po bomonama wai, “Eno mu po naga obao, te eno nagebolo dwagi yai sē yaibao, tama eno nage wāj hani hauwa mu nosali pedalomainogo ilaibao,” te po wai.^a

¹⁵ Tama Abrahamgo hauwa sogo bugagia tonaluyu, tama aga hagela polo me isawai, tama nosali agaba te tigidali sē mu pedalali, te tiwai polobadu te Godigo agabolo te wāj hauwa mawaibao po wai dao.¹⁶ Bidi si augwa hasi konila po weyu da, teda bidi mego te gasa bidibolo agai wabo po mu po naga dao te hania ola momainogo eyu, te bidigo aga digi nogi weyu te mu po dao te wagobeo. Menio. Agai te gasa bidi me deli, te genuai nogi elalubo bidi, te bidigo nogi weyu tama agai wabo po te tiwai dāu wabo dao. Tama tebogo te bidi si tomode elalubo konila po togolama tama po me meni.¹⁷ Tama te tiwai me, polobadu Godigo po weyu, te Godigo aga we bidi tau saibao po wai. Agai hania mu augwalibolo ola mawainogo yali, agai te tau sabo po me hasegelegobeo. Tama tibaso, te dāu wali poba genuai bomo me momainogo eyu God aga digi nogigo bomo teba manani.¹⁸ Tama tibaso, te Godigo mu po dāu wabo me, te aga teba aga nogigo bomo manubo me, te sē si me hasegelegobeo. Te sē side Godigo tibo po

^a 6:14 Gag 22:16-17

munu me wagobeo. Tama tibaso, tebogo da te God paba wi pelama geme duala sigi pali we bidi da homu bomo mayu, mu däq ilimanogo yai. Tama tiyu, dago homugo te Godigo po dabolo weyu te däq olama, te agai da dali nosali yabo dwagi yai s̄e dago tede dwagi yai homu eyu tama tonalubo dao.¹⁹ Tama agai wali pode dago dwagi yai homu eyu tonalubo kolesagago te dago homu bugagia däq wabo dao, agai po te genuai sege yai ain nai bonogo gebelama, tama te moni geba sip tede däq olama, tama te tamu aji sesegede te sip bugagia däq ola sali tiwai dao. Tama te tonalubo kolesagade dago homu si ebo meni, tede dago mu koneani, te Godigo wali po mu po pedalaibao. Tama te homu eyu, dago dena homu te Jisasba muai dao. Aga te dagalude elalubo Moni Lotu Be tempel tomoba pelama, tama tede walali genuai nami ugwa tudi badu pelama, tama te God bidibo be habuba mu sabolai dao.^b ²⁰Tama da tobade Jisas aga digi polasa peyu, te be habu tomoba pali, te da tau sainogo yali. Aga te genuai pris tobulu bidi pedalali, te bidi Melkisedek tiwai pedalali, tama aga sesemane sogo bidada peyu, bidada paibao.^c

Melkisedek aga genuai nogi mu elaluai bidi mu da po wai

7 ¹U bidi Melkisedek aga te genuai hanu nogi Salem tuni bidi bidali, tama aga God uwadu bidi mugo pris bidi dao. Polobadu Abrahamgo boi hw̄inama, te tuni bidi dabe augwali elama tama aga buluba ma sobadi, tama te sogo Melkisedekgo aga te tude tība sabolama tama Godigo Abraham dali dwagi yai s̄e emainogo eyu gedu haluasa po wai. ²Tama Abrahamgo te boi hw̄igi pelama sali tigidali nai dodolama tama nogo si selama, deli deli bugulama, tama te bidi Melkisedekbolo deli mani. Abrahamgo te hw̄ibode sali nai tigidalide tama yali. Dago te nogi Melkisedek begelama e tama po wai: te doloba pai kolesaga ebo tuni bidi da wai. Aga me te bulu Salem tuni bidi dao. Te nogi Salem begelama tama te po page e tiwai dao: te homu nagamea peyu bugagia bidibo kolesaga tuni bidi dao.^d ³Te Godigo po bukude aga aya me ida me augwali sigo nogi as̄ebeo, tama aga w̄aq nōq hani me menio. Aga te aga idago ame nani si te sogo nogi as̄ebeo, tama aga isali sogo me menio. Aga te Godigo Ogwa tiwai bidai, aga te pris bidi sesemane sogo bidada peyu, bidada paibao.

⁴Dagego te Melkisedek homugo koneao, aga genuai nogi mu elaluai. Magi baso meni. Dago hasia w̄aq mu, Abraham, agai digi te tigidali wiegi wiegi yai nai te w̄abi hw̄iyu sali nai dobolama, tama agai te nai nogo si nogo si dodolama tama te tigidali nogo si nedali naide te nai deli digi wai te Melkisedekbolo mawai, te aga genuai nogi elalubaso te agabolo tama mawai. ⁵Te Livai hanigo wai dabe augwaligo te pris bidi s̄e sai dao.

^b 6:19 Prs 16:2 ^c 6:20 Tib 110:4 ^d 7:2 Gag 14:17-20

Tama Godigo te Mosesbolo mani bomai pogo augwalibolo te po wai, augwaligo te Israel dabe augwaligo tigidali elaluali nai nedeyu, nogo si nogo si tama dodolama, tama tigidali nai nogo side te nai deli digi wabo somainao wai, te sali nai te Livai hani bidi dabebolo momainogo yao wai. Te Israel dabe augwali te augwa ama dede dabe mu te augwali, tama augwali te Abrahamgo wai dabe dao. Tiali goli tagaliyu, te Livai dabe augwaligo te augwa ama dedego nai dabe te me badu deli deli te augwaligo siyu yai dao.^e ⁶Tama Melkisedek aga te augwaligo hanide te aga pedalobeo, aga te Livai hani bidi menio. Tiali goli te Abrahamgo aga nai dabe nogo si nogo si nedelama tama nogo si deli delide Melkisedekgo nai me deli salio. Tama Abraham aga te Godigo aga dali wiegi yai sę ilabo dą̄ wali po sali bidi bidaligo da, teda te Melkisedekgo Godigo te Abraham dali dwagi yai sę emainogo eyu tama te gedu haluasa po wai. ⁷Tama dago koneani, te Godigo gasa bidi dali dwagi yai sę emainogo eyu gedu haluasa po wabo bidi te aga ugxadu elalubao. Te agade Godigo tau sali bidi, te aga aiyadu dologode bidibao. Tama tibaso, dago koneani, Melkisedek aga nogigo te Abrahamgo nogi aiyaba elaluali. ⁸Te Livai dabe augwaligo te pris bidi sę eyu, tama te Israel dabede te nai tigidali te tomode bugulama tama nogo si nogo si dodolama tama me deli wabo siyu yali, augwali da te isabo bidi naga dao. Tiali goli te bidi Melkisedek agai te nai me deli wabo sali, tama te bukude po agade weyu te po wai, “Aga da te bidibo ula dali bidibao” po wai. ⁹⁻¹⁰Tama dago e tama tiwai po wabo te usu dao: te Livai hani bidi dabe augwaligo te pris bidi sę eyu, tama augwa ama dede dabe te Israel bagede te nai siduai dao. Tiali goli polobadu hasia te Livai hani augwali Abrahamgo hanide pedalisiqbadi, tama augwali te Abrahamgo tigi tomode me bidibadi tiwai wabo, te sogo te bidi Melkisedek aga te Abraham tią̄ba asama tama Abrahamgo agabolo te hwı̄yu sali nai meba mani. Tama tiyu augwaligo wai mu Abrahamgo te nai meba te Melkisedekbolo mobaso, te Livai dabe augwaligo me te nai te Melkisedekbolo mani ą̄ yai. Tama tibaso, dago koneagameo, te bidi Melkisedek agai nogigo te Livai hani pris bidi dabego nogi aiyaba elalubo dao.

¹¹Te Livai hani bidi dabe augwaligo te pris bidi sę ebo kolesaga, te kolesaga Godigo Mosesgo pedauwalidu te sę yao wali. Tama te pris bidi sę ebo kolesaga elaluyu, tama Godigo te Israel dabebolo agai bomo yai po hauwa mawai dao. Tiali goli, te Livai dabe augwaligo pris sę yaligo te we bidi augwali usu ilama tama wiegi yai mu pedaligi sogo da, teda te gasagi yai pris, aga te Melkisedek tiwai elama, tama aga te bidi Aron aga hani bidi meni, aga te Livai bidi meni, te tobage gasagi yai pris bidi aga pedaligi meni da. Tiali goli aga pedalama bidibao. ¹²Tama te pris hani

^e 7:5 Nam 18:21

hasegelebaso da, teda te hasegelebo sə usu ilimainogo eyu, augwaligo te pris sə ebo kolesagade bomai po me augwaligo hasegelao. ¹³Godigo po bukude te agade po wabo bidi, te bidi dago Genuai Bidi, aga te gasa hani bidi dao, aga te Livai hani bidi menio. Tama aga te hani bidi mede polobadu te Godibolo ofa mabo sai nogi alta, te altade te pris sə munu me yai menio. ¹⁴Dago hania koneai, dago Genuai Bidi aga te Juda hanide naga pedelai. Tama Mosesgo te hani augwali te pris hani bidaibao po me wabeo.

**Jisas aga te Melkisedek tiwai te pris bidi
sesemane sogo bidaibao po wai**

¹⁵Te Livai dabe augwaligo pris sə yaligo te we bidi augwali usu ilama tama wiegi yai mu pedalobo usu ebe. Dago te po page te hania mu konebo dao. Magi baso meni, te gasagi yai pris me pedalobo suao tama aga te bidi Melkisedek tiwai dao. ¹⁶Te bomai po me deligo aga mena hani bidi dawe, ma aga mena kaneme bidi dawe, te tobage po wabo bomai pogo bomogo aga te pris bidi səba me mubeo. Menio. Te gamonabo ula elalubo te bomogo naga, te munu me dolisiqbo ulago bomogo aga te pris bidi nigelali. ¹⁷Magi baso meni. Godigo po agade e tiwai po wai,

“Nage pris bidi sesemane sogo biddada paibao, te
polobadu bidali pris bidi Melkisedek tiwai yaibao,”
te po wai.^f

¹⁸Tama Godigo te hasia polobadu te pris səde wali bomo yai po te dagala sayanio. Magi baso meni, te bomo yai pogo bomo usu menio. Te bomo yai pogo da tau me sabo usu ebeo. ¹⁹Te Godigo Mosesgo pedauwalidu mani bomo yai pogo te magi nai me deli te wiegi yai mu ilama sese me pedalubo usu ebeo. Tiali goli Godigo gasa tū me dayali, te wiegi yai elama tama te polobadu mani bomai po te aiyaba elaluai, tama da dwagi yai homu eyu, agai da dali yabo dwagi yai sə asobo sogo bugagia tonaluyu ebadi, te tūdu da te God pəba pomainogo tiai dao. Da polobadu dwagi yai homu eyu tonaluali kolesaga te gesi kolesagago aiyaba elalubo dao.

²⁰Me po elalubao. Godigo Jisas te pris səba sa muani, agai aga te olo me sa mubeo. Menio. Agai mu po obao olama, tama aga sa muai. Te polobadu pris nigali bidi dabe augwali dali te tiwai me ebeo. Te Godigo hasia agai mu po obao olama tama augwali te pris bidi pedalai menio. ²¹Tiali goli Godigo mu po da po wabogo te Jisas te pris bidi nigelali. Godigo agabolo te po wai,

“Ena da Genuai Bidi dao, tama eno mu po da po wai,
tama tede eno homu me hasegelegobeo,
‘Nage te pris bidi sə eyu, sesemane sogo biddada peyu,

^f 7:17 Nam 18:21

bidata paibao.' ^g

²²Tama tiyu tama dago koneai, te Godigo agai da tau somainogo eyu dąu wali po olama, tama Jisas da te Godigo dąu wali po du mu walobo sę ilabo bidi dao. Tama te we bidi tau sabo dąu wali gesi pogo te polobadu dąu wali po aiyaba mu elalubo dao.

²³Polobadu te bidi hauwa pris sę ebo bidi bidai. Magi baso meni, te bidi dabe augwaligo te pris sę iduama tama augwali isibaso, te augwa ogwago augwa sę sali. Tama nosali te bidi dabe me isama, tama augwa ogwago te pris sę sali. Tama tiyu, te bidi me deligo sesemane sogo te pris sę eyu me bidigobeo. ²⁴Tiali goli Jisas da, sesemane sogo bidada peyu, bidada pabo dao. Tama tibaso, agai te pris sę sesemane sogo tonaluyu, tama gasa bidigo aga me hasegelegobeo. ²⁵Tama tibaso, agai nogide te God pąba asobo we bidi augwali te agai ma siyu, tama dwagi yai madiba mubo sę bugagia ebode aga usu mu dao, tede sqą pabo meni. Magi baso meni, te agai bidibo ula sesemane sogo elalubo, tama agai gedu haluasa po te Godigo da tau somainogo wabo dao.

²⁶Da we bidi te magi kolesagade sqą pobaso, te tobage polalubo pris bidi agai da tau sabo usu mu dao. Godigo gedude aga te wiegi yai mu, tama magi dwai sę delinu te agade me elalubeo. Aga te wiegi yai mu yai. Aga te sęgę dwasianu sai bidi te tiwai me ebeo. Menio. Aga te dwai sę ebo we bidi dali bidibo menio, aga gasagi yai tedali mu dao. Godigo aga ugwbaba mu selama, tama agai te dagalu me aiyaba elaluama, tama ugwdadu mu bidibo dao.

²⁷Te polobadu polalubo pris bidi dabe deli augwaligo te tigidali sogo te Godibolo nai mabo ofa sę elaluai. Te augwaligo hasia augwa sęgę bolo sela səbo ofa yai. Tama elama, tama nosali augwaligo te we bidigo sęgę sela səbo ofa me yai. Tiali goli Jisas aga gasagi yai tedali elalubaso, agai te aga yali dwai sę sela somainogo te Godibolo nai mabo ofa sę me ebeo. Menio. Te we bidi naga tau somainogo eyu agai ofa te deli sogo naga yai. Me sogo te sę ma egobeo, te deli sogo yali te usu dao. Te aga digi aga bidibo ula te Godibolo mawai dao.^h ²⁸Tama te Godigo Mosesbolo mani bomo yai pogo te bomo meni yai bidi augwali sa munama, tama augwali te polalubo pris sę ebo bidi bidai. Tiali goli nosali te bomo yai po aiyaba elaluyu, Godigo agai dąu wali pogo aga Ogwa te polalubo pris bidi sę emainogo eyu aga sa muani. Tama te sę bugagia dąu omainogo eyu, Godigo te mu po obao olama tama te sę yao wai. Tama tiyu, aga Ogwa te agabolo mani sę ebode te usu sese mu pedalai dao, sę me delide aga sqą me pabeo. Tama sesemane sogo aga te tiwai naga tama bidada peyu, bidada paibao.

Jisasgo polalubo pris bidi sę dagalude te wiegi yai be mude sę ebo dao

8 ¹Te dago te wabo po page mu, te po e dao: dago te tobage polalubo pris bidi elalubao, tama aga genuai nogi elalubaso, aga te dagalude

^g 7:21 Tib 110:4 ^h 7:27 Prs 9:7

te Polalubo Tuni Bidi Godigo dolo nogode dualaluyu megı bidibo dao.ⁱ
² Agai te pris bidi sę te Godigo tedali wiegi yai mu bede sę ebao. Te nami ugwago nigali lotu be mu dao. Te bidi dabe augwaligo e tqde te be me sę ebeo. Menio. Genuai Bidi Godigo naga te be aga bidibo digi sę yai dao.

³ Tigidali polalubo pris bidi augwali deli deli te augwaligo augwali sa munama tama te sęba muani, te augwali deli deligo te we bidi tobade te haniani nai dabe te Godibolo sela pelama ofa iligi pabo sę yai. Tama tibaso, dago polalubo pris bidi me agai ofa me deli elalumainao. ⁴ Aga e tqde bidigi sogo da, te aga pris bidi munu me bidigi meni dao. Magi baso meni, te gasa pris bidi dabe e tqde megı me bidalubao, tama augwaligo haniani nai te Godibolo te ofa ilama mayu ebo dao, te Juda dabego bomai pode wali po tiwai ebo dao. ⁵ Augwaligo pris sę te tqde moni lotu bede ebo, te piksa noma naga ola mabo tiwai eyu, tama te wiegi yai sę mu da te dagalude elalubao. Te Godigo Mosesbolo wali po tiwai elama, te Mosesgo te polobadu lotu ugwa be sę yainogo ebo sogo tiwai po wai. Tama Godigo te po wai, “Nage dua dao, te nago te tigidali nai te eno nagebolo te bulu dude ola mani nai te noma tiwai mu usu nama nigao,” te po Mosesbolo wai dao.^j ⁶ Tiali goli megı te Godigo Jisasbolo te pris bidi sę mawai dao, tama te mani sęgo te polobadu pris bidi dabe augwaligo yali sę te aiyaba elaluai. Magi baso meni, Jisas agai te God dali, te da we bidi dali, da si tomode te dąu wali po bugagia dodolai. Tama te dąu wali pogo te Godigo polobadu te Juda dabe dali dąu wali po te aiyaba elaluai. Magi baso meni, te gesi dąu wali po weyu tama te po dąu omainogo eyu, Godigo te we bidi bugagia mu tau saibao po wai. Tama te megı mani agai augwali tau saibao wali po, te gesi pogo te agai polobadu dąu wali tau sabo po te aiyaba elaluai.

Gesi dąu wali pogo te polobadu dąu wali po aiyaba elaluai

⁷ Te polobadu hasia dąu wali pogo aga sę tigidali bugagia egi sogo da, teda Godigo te gasa dąu wali te po me wagi menio. ⁸ Tiali goli Godigo te we bidi augwaligo sęge po haninama agai te po wai,

“Eno te po obao, ‘Odao!

Nosali me sogo te eno augwali tau somainogo eyu,
 dąu wabo gesi po te Israel hani augwali dali me,
 te Juda hani augwali dali me dodolama, tama
 dąu waibao.

⁹ Te megı e sogo te dąu wabo gesi po polobadu
 eno te augwa wąi dabe dali dodolama dąu wali po
 tiwai me ebeo. Menio.

Polobadu te eno augwali te Isip tq taga somainogo

ⁱ 8:1 Tib 110:1 ^j 8:5 Sai 25:40

te eno augwali nogo bugagia tulama soali sogo te
eno augwali tau sabo po dą̄ wai.

Tiali goli augwaligo eno augwalibolo mani dą̄ wali
po te pode augwaligo augwa homugo kę̄ pisiąma
tama te po wali me pabeo.

Tama tibaso, augwali eno tudiba munama tagalali,’ ”
Genuai Bidigo te po wai.

¹⁰ Tama Genuai Bidigo po ma wai, “Te tama tiali
sogo te hasia silali. Tama nosali eno gasa augwali
tau somainogo dą̄ wabo po augwalibolo mawaibao.
E tiwai yaibao. Te eno bomo yai po dabe tigidali te
eno augwaligo homu tomoba munama, tama eno
augwaligo homu kolesaga tomode te po așeaibao.
Tama ena augwaligo God bidiyu, tama augwali te
eno we bidi bidiyu yaibao.

¹¹ Tama tigidali bidi deli deligo te augwa hani
bidi dabe me te augwa ama dabe bidi hasi augwali
ola mabo sę̄ te me elalugobeo,
‘Nago te Genuai Bidi koneao,’ te po wagobeo.
Menio.

Te sogo te tigidali augwaligo ena bugagia koneyu,
te dwasianu wai pulubago me, te genuai bidi dali
augwaligo ena koneaibao.

¹² Te eno olo tau sabo wiegi yai kolesaga augwali
dali eyu, tama eno augwaligo sę̄ge sela sę̄ayu
yaibao.
Tama augwaligo sę̄ge dabe, te eno homugo koneama
me egobeo,”^k

Genuai Bidigo te po wai dao. ¹³ Agai te augwali tau somainogo eyu, te
gesi dą̄ wali pode te Godigo te lotu wabo bomai po meba
mawai. Tama te lotu wabo be, te me e tőde sę̄ yai elaluai dao.
²⁻³ Augwaligo ugwa be me deli sę̄ yai. Tama te be tomode augwaligo
te genuai nami ugwa te obo tiwai dą̄j ilama walali. Tama e badu, te tų̄
pade te polalubo be habude te lam me, tebol sai me, te pris bidi dabego

Polobadu polalubo pris bidigo Godibolo ofa nai mani sę̄ po

9 ¹ Te hasia dą̄ wali pode te Godigo te lotu wabo bomai po meba
mawai. Tama te lotu wabo be, te me e tőde sę̄ yai elaluai dao.

²⁻³ Augwaligo ugwa be me deli sę̄ yai. Tama te be tomode augwaligo
te genuai nami ugwa te obo tiwai dą̄j ilama walali. Tama e badu, te tų̄
pade te polalubo be habude te lam me, tebol sai me, te pris bidi dabego

^k 8:12 Jer 31:31-34

te Godigo gedude munalubo bret badi, tama nai munaluai. Te be habu augwaligo nogi yali nogi “Tedali Gasagi Yai Be Habu dao.” Tama te obo tiwai ilama walali nami ugwa te tudi badu te be habu augwaligo nogi yali nogi e tiwai “Tedali Gasagi Yai Be Habu Mu dao” wai.¹ ⁴Te wiegi yai denami ilibo alta sai te be habude munaluai. Te alta sai augwaligo ni namigo nigelama, tama te wiegi yai kapa nogi gol, te golgo te ni nami alta sai haluali, tama munaluai. Te Godigo dą̄ wali po ola maiabo genuai halobage me munaluai. Augwaligo te halobage tigidali badu te golgo naga haluai. Te halobage tomode te gol sene me elalubao, te Godigo te Israel dabebolo polobadu mani tubo nai nogi mana meba me te gol sene tomode munaluai. Te polobadu te bidi Arongo te kulubi pedalali ni dono me, te polobadu Godigo mani nogi si bomai po aseani masigi name si me, te nai dabe me tama te halobagede munaluai dao.^m ⁵Tama augwaligo te kapa gol meba selama, tama te golgo augwaligo te wiegi yai au yai ensel mobo bidi si tiwai nigelama, tama te halobage ugwidu daide munama elaluai, tama te ensel mobo bidi sigo te God bidibo pesage ede da olama sa muani. Tama augwaligo te ensel mobo bidi si e tiwai nigli, augwa bogo dabe ugwaba dodolali, te bogo dabe dologode te polalubo pris bidigo kaneme gelama, te Godigo te Israel we bidi dabego sege selasabo pesage elaluai. Tiali goli megieno te se page tigidali haninibo te usu me egobeo.ⁿ

⁶Augwaligo te tama tiwai nai dabe nigelama, te tigidali sogo te pris dabe augwali te polalubo ugwa be habu tomoba pelama, tama augwaligo te augwa se egi pidu geai dao.^o ⁷Tama te polalubo tobolu pris bidi agaduba deli naga te si wali be habu tomoba peyu yai. Aga te tigidali kibu bede deli sogo naga peyu yali. Tama aga olo me pabeo. Menio. Agai te ela muani omai bulmakau dali te meme dali te sigo kaneme sela peyu te tomoba pai. Tama te kaneme agai Godibolo ofa mani, te kanemego aga sege bolo sela sanama, tama te we bidi augwaligo bugagia konesiqama yali dwai sege me te sela səmainogo yai dao.^p ⁸Te tama tebo kolesagade te Godigo Mobo Bidigo dabolo e tama ola mobao: tama te polalubo ugwa be habude te ebo se me elalubaso da, teda da te Godigo dagalude elalubo Tedali Gasagi Yai Be Habu Mu, te be habu tomoba pabo tu, te me dabeo. ⁹Te ugwa bego te megie sogo te sa mubo tiwai te ebao. Te ugwa bede, augwaligo te haniani nai te Godibolo menama, tama augwaligo haniani ofa agabolo mabo dao. Tiali goli te nai dabe tigidaligo te augwaligo te lotu wabo bidi dabe augwali homu dodolabo te usu me ilibe, tama augwaligo wiegi yai mu me pedalobeo. Menio. ¹⁰Magi baso meni, te tiwai Godibolo maiabo ofa te tubo nai tiwai eyu, te tubo aji tiwai yali, tama

¹ 9:2-3 Sai 25:23-40; 26:1-33 ^m 9:4 Sai 16:33; 25:10-16; 30:1-6; Nam 17:8-10; Bom 10:3-5

ⁿ 9:5 Sai 25:18-22 ^o 9:6 Nam 18:2-6 ^p 9:7 Prs 16:2-34

haniani wę paubo gagawai yai. Te e tigide bomai po naga dao. Godigo te tigidali bomai po muani te augwaligo wali peyu, te agai tigidali nai gesi nigilama dodolobo sogo usu nigi paibao.

Krais aga kanemego digi ofa ilali po wai

¹¹ Te polobadu augwaligo te ugwago nigali lotu bede tama kolesaga yali. Tiali goli megi da, Krais isaligo da, tama aga te wiegi yai nai dabe pedalabo te tobolu pris bidi pedalai. Tama aga te wiegi yai ugwa be mu tomoba pelama, tama tede aga sę ebo, te be te polobadu tőde elaluali ugwago nigali lotu be te aiyaba elaluai. Bidigo te nogogo me nigibeo, tama te e tőde nai menio. ¹² Tama Kraisgo te kibu meme kanemego me te omai bulmakau kanemego me te selama, tama aga te Tedali Gasagi Yai Be Habu Mu tomoba me pabeo. Menio. Agai te aga kanemego digi ofa Godibolo elama, tama aga te Tedali Gasagi Yai Be Habu Mu tomoba deli sogo naga palio. Tama tiyu, agai da te sesemane sogo bidada peyu, bidada pabo tede bidimainogo da ma siyu abelai dao. ¹³ Tama we bidi mebago tigide ebo kolesaga te Godigo gedude meda pedalobaso da, teda te pris dabe augwaligo e tama yali: augwaligo te so kibu bulmakau ela munama, tama ofa eyu aga tigi siaba ulai. Tama augwaligo te keli selama tama aji dali taluama tama te keli dali, te kibu meme kaneme badi te omai kibu bulmakau kaneme badi selama, tama augwaligo te we bidi dabe augwali tigiba te aji segeni tiwai sasaqa pali. Te pris dabego tama tiyu, tama te we bidi augwali tigi wiegi yai ma elama, tama meda meni yai te God gedude ma pedaliyu yai dao. ¹⁴ Te tama tialigo da, te Kraisgo kanemego digi ofa ebogo te genuai bomo mu elalubao, te hasia ofa yali sę aiyaba mu elaluai. Te Kraisde dwai sę deli agade me elalubeo. Mu menio. Tama te sesemane sogo bidada pabo Mobo Bidigo bomogo, aga digi te aga wiegi yai bidibo ula te Godibolo ofa tiwai elama mawai. Tama agai kanemego dago tigi naga me penebeo. Menio. Te dago yali dwai sę sela sasiabo polobadu ofa mabo kolesaga tagalama, tama agai dago homu me penaibao. Tama dago te bidibo ula mabo Godigo sę tulama emainogo agai tama yai dao.

Krais agai kanemego te gesi dąu wali po dąu waliyu dodolali

¹⁵ Tama Krais te gesi dąu wali po dąu walobo tomode bidibo bidi pedalai. Magi baso meni. Aga isilama, te we bidi augwali ma abelama, tama augwaligo te hasia sogo dąu wali pode me elaluali te bomo yai po bolali dwai sę tigidali yali te sela sawai, tama megi augwali olo bugagia bidibao. Tama te Godigo i wabo odama te wali pali we bidi tigidali augwaligo te polobadu Godigo aga wai pulubabolo mawaibao wali te

^a 9:13 Prs 16:15-16; Nam 19:9, 17-19

bidibo ula somainogo yaibao. Tama augwali tama eyu sesemane sogo bugagia bidada peyu, bidada pomainogo Krais agai te gesi dą̄ wali po dodolobo tomode bidibo bidi pedalai dao. ¹⁶Te e tőde te da bidi dabego ebo kolesaga e tiwai dao. Bidi mego te aga nosali isaibao te homu elama, tama dego agai nai dabe sabo po minama, agai te po te pepade aşenama, te dą̄ wabo po tiwai yaibao. Tama aga waigo te dą̄ wali po wali peyu, tama aga ayago te doado bage dabe sainogo homu eyu da, teda te bidi dabego hasia bugagia koneao, te aya mu isai dao. Te aga aya isibode naga te aga ogwago te doado bage dabe tigidali saibao. ¹⁷Te bidi isai digi, teda te dą̄ wali po te bomo elalubao. Tama te po dą̄ wali bidi bidibadi da, teda agai te dą̄ wali po te olo elalubo dao. ¹⁸Tama kone palao: augwaligo te kibu bulmakau dali meme dabe elama, tama te kaneme selama, te polobadu dą̄ wali po me tama dą̄ waliyu te kaneme gelai dao. ¹⁹Tama tiyu, hasia bolo Mosesgo te tigidali bomo yai pogo te kolesaga yao po te we bidi augwalibolo pusai. Tama nosali agai te kibu bulmakau wai me te meme wai selama, tama elama, tama te kaneme dali, te aji me, te mama yai sipsip nisi badi, te ni hisop dwasianu nologo me sai. Agai te nai dabe sobadi elama, tama te mama yai sipsip nisi te hisop ni nologoba gebelama, tama te naigo te talualu aji dali kaneme te Godigo bomo yai po buku daiba me te tigidali we bidi tigiba te kaneme segeni tiwai sasaşa pai dao. ²⁰Tama tibadi agai te po wai, “Te e kaneme da, te Godigo dagebolo te wali pao dą̄ wali po te dą̄ walobo kaneme dao,” te po wai.^r ²¹Tama te tiwai me Mosesgo te kaneme te lotu po wabo ugwa beba me, te lotu wabo doado bage te nai dabe tigidali te pouba me te kaneme segeni sasaşa peyu yai dao.^s ²²Te bomo yai pogo kolesagade te pade te tigidali nai te kanemego naga te meda isawai naga pedalomainogo yai. Tama te kaneme gelisabaso da, teda Godigo te sege selasabe da te homu yai dao.^t

Kraisgo aga digi ofa iliyu te sege sela sawai

²³ Augwaligo tama tiwai ofa yaligo te tőde elaluali nai dabe peneai. Te nai dabe te dagalude elalubo nai dabe te piksa naga ola mabo tiwai yali dao. Tiali goli gasagi yai ofago te tőde yali ofa aiyaba elaluyu, te wiegi yai mu yali, tama tego naga te dagalude nai dabe digi te meda meni yai ilibo usu yaibao. ²⁴Dago koneao, Krais aga te Tedali Gasagi Yai Be habu tomoba peyu, aga te bidi dabe augwaligo nogogo se yai be tomoba pelama, tama te Godigo be mu tiwai elama te piksa tiwai naga ebeo. Menio. Aga te dagaluba digi tomoba dolo mu pai. Tama meg i aga te God gedude hania bidibao, tama agai da tau sabo se meg i ebo dao. ²⁵Tigidali kibu be tomode te deli sogo te tobolu pris bidigo te Godibolo

^r 9:20 Sai 24:6-8 ^s 9:21 Prs 8:15 ^t 9:22 Prs 17:11

ofa ilibo kibu bulmakau kaneme sela peyu yali, tama aga te Tedali Gasagi Yai Be Habu Mu tomoba pai. Tama te kaneme te aga kaneme menio. Tiali goli Kraisgo te tiwai me ebeo. Aga te dagaluba pali te aga bidibo ula te Godibolo te ofa ilainogo pali, tama agai te s̄e hauwa sogo me idu gebeo. Menio. ²⁶Te agai hauwa sogo te s̄e egi sogo da, teda aga dene hauwa sogo toloyu, te Godigo t̄o nigali sogo gagalama tama meg i e sogoba usu nagasigi dao. Tiali goli menio. Megi e sogo tigidali te p̄ade silainogo eboso, tama Krais e tq̄ba deli sogo naga mu asali, te aga digi aga bidibo ula te Godibolo menama, tama te we bidigo yali dwai s̄e s̄egē sela s̄awainogo yai dao. ²⁷Tama te tigidali we bidi dabe augwali deli deli te deli sogo naga isaibao, te isabo sogo sa muani, tama nosali te augwali Godigo augwali po t̄u ebo madiba pedalaibao. ²⁸Te tiwai me Kraisgo te aga bidibo ula aga digi te Godibolo deli sogo naga mani, te we bidi hauwago s̄egē sela s̄awainogo eyu tama tiai. Nosali te aga si sogo ma asiyu, te agai te s̄egē sela s̄awainogo me asogobeo. Menio. Te aga ma asobode te dwagi yai horu elama tonaluyu bidali te we bidi dabe augwali naga te agai mu ma sagasaibao.^u

Te polobadu yali ofago te s̄egē sela s̄abo usu me egi menio

10 ¹Te Juda dabego ofa mabo bomai pode dago te nosali pedalabo dagalude elalubo wiegi yai nai dabe noma naga subao. Te bomai po da, te nai dabego te hania piksa noma mu menio. Te bomai pogo te po wai, augwaligo te deli tigi poai ofa naga te tigidali sogo yao wai, te tigidali kibu bede me te yao wai. Tama te ofa maiabo bomai pogo te we bidi augwali te God p̄aba asomainogo dodolobo te usu egobeo. Te bomai pogo augwali te wiegi yai mu munu me pedalogobeo. ²Menio. Te ofa maiabo bomai pogo augwaligo yali dwai s̄e sela s̄anama tama augwali wiegi yai mu ilama pedaligi sogo da, teda augwaligo te ofa ma egi menigi dao. Tama te Godibolo lotu po wagasali we bidi dabe augwali te deli sogo yali ofade te wiegi yai pedaligi sogo da, teda augwaligo homude te s̄egē elalubo homu kone me egi menio. ³Tiali goli menio. Tigidali kibu bede, te ofa mabo s̄e ebogo augwaligo te s̄egē ma homugo kone palobo. ⁴Magi baso meni. Te omai bulmakau kanemego me te meme kanemego me te s̄egē sela s̄abo te usu munu me egobeo. ⁵Tama tibaso, Krais e tq̄ba dulubo sogo p̄aba yagasali sogo agai Godibolo e po wai dao:

“Nago te augwaligo kibu dabe dari te gasa nai mego
te ofa yainogo te nago homugo hagela yai.

Tiali goli nago enabolo maiabo te tigi deli te sisi
ilai dao.

⁶ Te ofa dabe augwaligo te kibu tigi sese siago

^u 9:28 Ais 53:12

domainogo ulubo ofa me, tama te sègè sela sàbo ofa
me, tede nago homugo hagela ebo dao.

⁷ Tialima megı eno e po obao: Godio, ena asalio.

Te tiwai te augwaligo enade po olama, te po
polobadu te bukude aşənai, te megı ena asali te
eno nago homu kolesaga wali painogo asai dao.”^v

Kraisgo te po polobadu wai. ⁸ Te po tomode hasia Krais agai te bomai
pode augwaligo te ofa ebo kolesaga po wai. Agai Godibolo te po wai,
“Nago homugo te augwaligo te kibu bulmakau dabe elama te ofa ebo
me, te gasa nai mabo me, tede hagela homu yali. Te augwaligo te siago
domainogo te kibu tigi sese ulubo ofa me, tama te sègè sela sàbo ofa me,
te nago homugo hagela ebo dao,” agai te po wai. Te we bidi augwaligo
Godigo digi bomai po wali peyu, tama te tobage ofa tigidali mani goli,
agai te po wai. ⁹ Tama nosali agai te po me wai, “Ena asali, te nago homu
kolesaga wali painogo asalio.” Tama tiyu, Godigo te hasia elaluali ofa
mabo kolesaga tagaliyu hasegelali, tama agai te Kraisgo ofa mani nosali
asali kolesaga bomonama dodolai dao. ¹⁰ Jisas Krais agai te Godigo homu
kolesaga wali pelama, tama aga bidibo ula aga digi Godibolo te ofa tiwai
ilama, te deli sogo naga mawai. Tama tialigo agai da tigidali wiegi yai
mu ilai dao, te da sègè me elalubo menio.

Te Kraisgo ofa ebogo te sègè sela sàbo te usu mu yaibao

¹¹ Te tigidali pris bidi dabe augwali doligulama, tama augwa pris sè
tigidali sogo ebo dao. Tama tiyu, augwaligo te ebo ofa tiwai naga me idu
gebo dao. Tiali goli te ebo ofa dabego te we bidigo dwai sède sali sègè
selà sàbo usu munu me egobeo. ¹² Tiali goli Kraisgo aga digi te sègè sela
sàbo ofa te deli sogo naga mani, tama te ofa te tigidali sogo usu nama
elalua paibao. Agai tama tilama, tama aga megı te Godigo dolo nogode
dulalubao. ¹³ Aga te tiwai bidiyu, tama agai te Godigo aga boi bidi te
aga dologoba mubo te tonalubo dao.^w ¹⁴ Te me te we bidi augwali agai
te usu niba kadu mu wagasomainu ilali, agai te ofa deligo naga augwali
wiegi yai mu pedalomainogo yali, te augwali bugagia mu bida pabo
ula somainogo tama tiai dao. ¹⁵ Tama tede me Godigo Mobo Bidigo me e
tiwai po dabolo wai dao:

¹⁶ “Genuai Bidi Godigo te po wai,

‘Te sogo bolo silibo si, teda nosali te eno gasa po te
augwali dali dàq̄ waibao.

Te augwali tau sabo dàq̄ wabo po e dao:

Te eno bomai po tigidali te augwali homuba
munama, tama augwali homu kolesagade eno te po

^v 10:7 Tib 40:6-8 ^w 10:13 Tib 110:1

asəaibao.' ”^x

¹⁷Tama Mobo Bidi agai te po ma wadolama wai:

“Tama eno augwaligo səgəba me te augwaligo
yali dwai kolesaga teba te eno homugo kone ma
egobeo.”^y

¹⁸Tama tibaso, Godigo te səgə sela səwai baso da, teda te səgə sela
səwainogo te ofa mabo kolesagago te sə me elalugobeo.

Dago konealubo po dəq̄ mu olama God pəba pinao

¹⁹Ama dedeo, Jisasgo aga digi te dago səgə sela səbo ofa tama bugagia
yaligo da, teda da wi isəbadi te Tedali Gasagi Yai Be Habu Mu tomoba
pabo usu dao. Jisasgo digi aga kaneme geleyu tama isibaso, da te habu
tomoba pabo usu mu ilai dao. ²⁰Aga tigi isibogo te tude walalubo nami
ugwa bogo badu muani tiwai, tama te bidibo ula sabo gesi tū dalali,
te da te be habu tomoba painogo yali. ²¹Tama aga da, te dago genuai
polalubo pris bidi dao, tama aga te Godigo dagalude elalubo be tonalubo
bidi bidibo dao. ²²Tama elalualigo da, teda da homu mu eyu, tama homu
si me esiąyu dago Godiba konealubo po dəq̄ mu olama, tama da aga
pəba pinao. Agai dago yali dwai sə səgə sela sənāma, tama dago homu
wiegi yai ma ilali. Me agai dago tigi sese te wiegi yai qigo mu telawali.^z
²³Tama dago homu nosali da Godigo bidibo digi bidigi paibao. Tama
homu eyu, tama dago te gasa we bidibolo te homu ebo po haninama
pusali. Awe, dago te konealubo pode dena homu bugagia dəq̄ olama,
tama tede homu si me ilamuo. Magi baso meni. Godigo ebo kolesaga
dago koneani, tigidali sə te agai yaibao po wabo sə te mu tama agai te sə
ebo dao. ²⁴Da we bidi deli deli dena hasi te dago abagide homugo kone
palao. Augwa hasi augwaligo dwagi yai homu eyu godolo ebo kolesaga
dali, te dwagi yai tau sabo kolesaga me, te kolesaga si yabo homu
hodolomainogo eyu, dago dena abagi dabede homugo kone palama tama
tau sao. ²⁵Tama tiyu, dago te ama dedeo dali deliba sisinibo kolesaga te
me tagalamuo, te bidi mebago te ebo kolesaga tiwai egimio. Menio. Duga
koneani, te dago Genuai Bidi Jisas asabo side bodolu te pəba yagasalio.
Tama konealigo da, ama dedego homu kolesaga tau siyu dəq̄ walobo sə
bomonama dago yao.

Dago Godigo Oggwa tudiba me mugio

²⁶Te dago te Kraisde mu po mu sai digi tama nosali te dena homugo
digi dago te səgə sabo kolesagade ma bilidubaso da, teda te səgə sela
səyabo te gasa ofa me elalugobeo. ²⁷Menio. Te da wi mu elama, tama
te po tū yabo bodolu naga tonaluabao. Tama te sia te posolo yai mu

^x 10:16 Jer 31:33 ^y 10:17 Jer 31:34 ^z 10:22 Prs 8:30; Ese 36:25

elalubao tama te siago te God dali boi bidi ebo bidi tigidali ulaibao, te me tonaluyu bidaibao.^a ²⁸Dago koneani, te bidi me deligo te Mosesgo bomai po hagela homu eyu tama te bolobaso, tama te bidi sigo me selago sulama tama augwaligo agai te dwai sę yali po pusubaso da, teda augwaligo te bidi homu dene munu me ebeo. Menio. Te aga isimainao wai dao, tama te tobolu bidi dabe augwaligo aga ela muani.^b ²⁹Te Mosesgo mani bomai po bolali bidi dali te bidi dabego tama tialigo da, teda dagego magi homu te Godigo Ogwia tudiba mubo bidi dali yaibawe? Magi baso menio. Te Kraisgo te Godigo da tau sabo po dąu wali kanemego te bidi wiegi yai ilali. Tiali goli te bidigo dwai kolesaga ma ebogo te po dąu wali kaneme te olo nai tiwai ililio. Tama agai dwai kolesaga mu te olo tau sabo kolesaga mabo Mobo Bidi dali eyu, tama Mobo Bidi nogi posobo po tama wai dao. Kone palao. Te bidi aga sęgę genuai mu sobaso, te dolo mu dao.^c ³⁰Dago koneani, te Godigo me sogo po weyu te po wai, “Te dwai kolesaga wei ponobo sę, te eno yabo sę dao. Ena digi eno te dwai dene sabo te wei ponaibao.” Tama dago koneani, agai po ma wai, “Genuai Bidi aga digi aga we bidi augwali te po tų ebode dagalaibao,” te po wai dao.^d ³¹Te bidibo ula elalubo God agai da dąu weyu, te dwai dene ebo te dabolo wei ponainogo eyu da, te dwai wi mu ebo nai dao.

Da konealubo pode bomonama dolaluao

³²Tiali goli te dageba polobadu pedalali sę te dagego homugo ma kone palao, te sogo dagego Godigo po odama tama tede te ula sai. Te sogo gasa bidi dabe augwaligo genuai sę dene dagebolo mani, tama dagego dene hauwa tolai. Tiali goli dage bomonama bugagia dolaluai dao. ³³Me sogo augwaligo dage te tigidali we bidi gedude dodolama, tama augwaligo dwai posobo po dagebolo wali, tama augwaligo gedude dagebolo dene mawai. Tama me sogo dage te sabo sęgę tiwai sabo we bidi dali dage kisa selama, tama dagego augwali tau sai dao. ³⁴Tama tiyu, dagego te kalabuside bidali we bidi augwali homu dene eyu tau sobadi, te dagego me te dene sali. Tama me sogo te bidi dabe augwaligo bomonama dagego doado bage dagala siyu yali goli, dagego homu wiegi yai pemene eyu, tama augwaligo te nai dabe sabo gogolali. Magi baso meni, dagego koneani, tama duga nai digi mu da, te tedali me elalubao homu yali, te Godigo dagebolo maiabo nai dabe, tama te nai da te sesemanee sogo elalua pabo nai dao. ³⁵Tama tibaso, dagego duga te bomai konealubo po dąu wali te munu me tagaligio. Menio. Te kolesaga me ebogo te genuai nai nosali sabo bomo te elalubao. ³⁶Dage bomo elama dolaluyu, tama sęgę bugagia toloyu, tama duga te Godigo homu wali pagameo. Tama

^a 10:27 Ais 26:11 ^b 10:28 Bom 17:6; 19:15 ^c 10:29 Sai 24:8 ^d 10:30 Bom 32:35, 36

tiyu, duga wiegi yai nai somainogo yaibao, polobadu Godigo te nai dagebolo mawaibao po dą̄ wai dao. ³⁷Magi baso meni. Godigo wali po te bukude aşənai me e tiwai po elalubao:

“Te sesabi me egobeo.

Dwasianu sogo digi, tama te asobo bidi te aga sabolaibao.

Te aga gesege elama me tonalugobeo.

³⁸Tiali goli eno doloba pai we bidi augwaligo enade konealubo po wali pobaso, tama augwali bidata paibao.

Tialima augwali tomode te bidi me deligo ena tagaliyu tama ibaba kila sobaso da, teda eno homu aga dali wiegi yai me egobeo,” te po wai.^e

³⁹Tiali goli da te ibaba kila selama te hagayabo we bidi te me tegobeo. Menio. Da te konealubo po dą̄ wabo we bidi hani dao, tama God agai da ma dobola sabo dao.

Dago konealubo homu Godiba kę̄ pelama bomonama dolaluao po wai

(Dq̄i 11-13)

Konealubo homu dą̄ wabo kolesaga page po wai

11 ¹Te konealubo po dą̄ wabo kolesaga te e tiwai ebo dao: te da Godide tiqlubaso da, teda te da dwagi yai homu eyu asobo tonalubo naide da hania konebao, Godigo te nai dabolo mu mawaibao. Tama dago gedugo susiąwai nai digi, tede dago homu si isabantu te dago homugo mu konealuai. ²Te polobadu e tq̄de bidali we bidi meba augwaligo Godide konealubo po dą̄ olama tama agade tiqlubaso, tama Godigo te po wai, “Augwaligo kolesaga te wiegi yai yalio,” te po wai dao.

³Dago Godide konealubo po dą̄ olama tama agade tiqlubaso, dago koneani, Godigo agai po wabogo e tq̄ de dagalu si nigai. Tama agai tama tialigo da, tigidali nai megis dago gedugo subo, te Godigo dago susiąbo naigo nigai dao.^f

Abel me Enok me Noa tama bidide po

⁴Te polobadu bidali bidi nogi Abel agai konealubo po Godide dą̄ weyu, tama agade tiqluyu agabolo ofa yai. Tama te ofago te aga ama Keingo ofa yali te aiyaba elaluama tama wiegi yai mu yai. Awe, Abelgo Godide tiqluali, tama tego Godigo aga doloba pai bidi nogi yai. Godigo

^e 10:38 Hab 2:3-4 ^f 11:3 Gag 1:1; Tib 33:6, 9; Jon 1:3

te Abelgo agabolo mani naide te agai godolo yai. Tama nosali Abel isali, tiali goli agai te Godide tiālubo kolesaga yaligo te po dabolo me ola mabo dao.^g

⁵ Te bidi Enokgo konealubo po Godide dāq olama tama agade tiālubaso, tama Godigo aga dagaluba sela holai. Aga me isibeo. Meni. Te bidi dabe augwaligo aga gegebo sē yali, tiali goli augwaligo aga me subeo. Godigo aga salio. Tama Godigo po bukude te po wai, “Polobadu Godigo Enok sisābadi, tama te sogo Enokgo Godigo homu kolesaga wali paligo da tama tede Godigo godolo yai,” te bukude te po aseai dao.^h ⁶ Tama bidigo Godide tiāluama tama agade konealubo po dāq me wasiāwani bidi, agade te Godigo dwagi yai homu egobeo, godolo munu me egobeo. Magi baso meni, te bidigo Godibolo lotu po wagi painogo homu eboso da, te bidigo konealubo po Godide dāq olama agade tiāluyu bidao. Tama tiyu, agai e homu dolo yao: “Awe, God aga mu bidibo dao, te aga gegebo we bidi dabebolo agai wiegi yai nai nosali mu mawaibao,” te homu aga dolo yao.

⁷ Te Godigo te bidi Noabolo po weyu, “Te nago gedugo susiāwai nosali pedalabo sēde dua yao,” te po wai. Tama te bidi Noa agai Godide tiāluama tama konealubo po dāq obaso, agai te Godigo agabolo te aga gedugo susiāwani naide pusali po bugagia odali. Tama te po wali peyu, tama agai te moni geba me deli nigai. Tama tiyu, aga dali, aga we wai puluba augwali te geba tomoba pelama, tama bugagia bidali, tama augwali me dolobeo. Te geba sē tama ebogo Noago te tqde we bidi tigidali augwaligo dwai sēde po tū ela mabo tiwai yilio. Tama te bidi Noa aga Godigo wali pode tiālubo kolesaga elalualigode Godigo Noa te doloba pai bidi da wali, te Godigo tigidali konealubo po agaba dāq wabo we bidi dabe dali ebo kolesaga yilio.ⁱ

Abraham aga we Sara dali augwali sigo konealubo homu Godiba dāq wali po wai

⁸ Te bidi Abrahamgo konealubo po Godide dāq olama tama agade tiāluyu bidali. Tama tibaso, Godigo aga i obaso, tama Abrahamgo Godigo po wali pai. Tama tiyu, aga bidali bulu tagalama, tama Godigo aga tq mu dolo te agabolo mawaibao wali tq teba pabo gagalali. Abraham aga menaba pogowe te agai me konebeo. Tiali goli aga Godigo agabolo wali pode aga homugo tiāluama, tama aga page bulu taga pai dao.^j ⁹ Tama aga Godide tiā peyu, tama Godigo agabolo polobadu te mawaibao po wali te tqde bidaluali. Tama aga te tqde bidali te gasa bidi hanigo tqde bidibo tiwai yai. Aga te ogwa Aisak de Jekop si dali te osogo bidabo ugwa bede bidaluali. Te agabolo te tq saibao wali po, te Godigo te tiwai po polobadu wai dao, tama Godigo te po te bidi sibolo me nosali ma dāq walali.^k ¹⁰ Tama Abraham aga

^g 11:4 Gag 4:3-10 ^h 11:5 Gag 5:21-24 ⁱ 11:7 Gag 6:13-22 ^j 11:8 Gag 12:1-5

^k 11:9 Gag 35:27

te osogo bidabo ugwa bede bidibode te usu da homu magi baso idualiwe? Woo, sesemane sogo aga te gamonabo hanu suabo homu yai. Abraham aga te hanu tomoba pabo sogo tonaluai. God agaduba deligo naga agai te hanu nigibo homu kolesaga koneama tama aga digi nigai dao.

¹¹ Tama Sarago me konealubo po Godide dą̄ olama tama agade tiāluali. Agai wai ame nabo sogo bodolu silai madi, tiali goli agai konealubo po dą̄ elaluali, tama agai wai ame nabo bomo usu yai. Sarago e tiwai homu yai: ‘Godigo po dą̄ weyu eno wai ame naibao wai. Tama Godigo mu po naga wabo dao,’ Sarago te homu yai.¹ ¹² Tama te bidi deli, aga monu dabe elama tama pą̄de isainogo yai goli, aga te wai hauwagoaya pedalai. Tama augwali hauwa mu pedaludubadi geai, te dagalude elalubo ḥo dabe tiwai me, tama te tamu ą̄j sanede elalubo masigi sane tiwai pedaludali. Te bidigo augwali nedebō me usu egobeo.^m

¹³ Tama te Abraham dali Sara dali, te Aisak me Jekop, te we bidi augwaligo konealubo po dą̄ olama Godide tiā̄ peyu bidaluama tama augwali isalio. Tama augwali e tōde bidali sogo, te Godigo polobadu augwalibolo te nai mawaibao po wali, te wiegi yai nai augwaligo mesabeo. Menio. Augwali digibulu dolaluyu, tama augwaligo augwa homugo naga te Godigo augwalibolo maiabo nai sulama, wiegi yai homu pemene yai. Tama augwaligo te gasa we bidibolo te po haninama hania wai, “Da e tōde bidibao te gasa bulu bidi tiwai bidibao. Da e tōde dwasianu sogo naga bidagasai dao.”ⁿ ¹⁴ Te bidi dabe augwaligo te tiwai po obaso, te dago kuna koneai, te augwaligo te augwa mu bidigi pabo to mu gegainogo homu eyu te po obao. ¹⁵ Tama augwali homu te polobadu taga soali bulude me elalugi sogo da, teda augwa ma geasa asabo tū elalugi da. ¹⁶ Tiali goli augwaligo te tiwai me ebeo. Menio. Augwaligo homu gasa tōba paiba homu elaluali, tego te augwaligo taga soali bulu aiyaba elaluama tama wiegi yai mu yalio. Te dagalude elalubo dao. Tama te po wabo bidi dabe dali te Godigo hale homu me egobeo, “Nage dago God dao,” te po wabo. Menio. Agai te agade konealubo po dą̄ wali bidi dabe dali hale homu me isəbaso, agai te augwali bidabo hanu me deli sisi elama elaluai dao.

¹⁷⁻¹⁸ Polobadu Godigo Abraham usu sai. Hasia bolo Godigo agabolo te po wai, “Te eno nagebolo te bulai wai dabe umabo mawaibao, te po wai dao. Tama megi eno e po obao, te nago ogwa Aisak, te agade te augwali nosali pedalaibao,” te po wai. Tama nosali Godigo Abrahamgo agade konealubo po dą̄ wabo kolesaga osola suainogo eyu, tama agabolo te po wai, “Nago naga ogwa Aisak digi selama, tama aga ela munama, enabolo te ofa tiwai mao,” te po wai. Abrahamgo koneani, te Aisak

¹ 11:11 Gag 18:11-14; 21:2 ^m 11:12 Gag 15:5; 22:17; 32:12 ⁿ 11:13 Gag 23:4; 1 Sto 29:15; Tib 39:12

da, te aga nosali pedalabo hani we bidi page mu dao. Tiali goli agai te Godide konealubo po dą̄u weyu, tama agade mu tią̄ pobaso, tama agai te ofa tiwai eyu tamadi tama aga Aisak elama Godibolo mawainogo yai.^o 19 Magi baso meni, agai e homu yai, “Awe, te eno aga ela munama tama Godibolo mobaso, teda Godigo te aga ma hodolama enabolo ma mabo bomo usu mu yaibao,” te homu yai. Tama mu tamao, dago te sęde po digi po begelama e tiwai po wai: “Abrahamgo aga ogwa Aisak te ḡu pagede ma sabo tiwai aq̄ yai dao.” Te po wai.

Aisak me Jekop me Josep te bagede po wai

20 Aisak me aga Godide konealubo po dą̄u olama agade tią̄ peyu bidibaso, tama agai aga ogwa si Jekop de Iso siba nosali pedalabo sęde po pusali. Godigo augwali sibolo dwagi yai sę̄ yaibao po agai dą̄u walali.^p

21 Te nosali Jekop me agai Godiba konealubo po dą̄u olama tama agade tią̄ peyu bidibaso, tama aga pą̄de isainogo ebo sogo, agai te aga ogwa Josepgo ogwa side dwagi yai po wai. “Godigo augwali si dali wiegi yai sę̄ yaibao,” te po wai. Tama te sogo aga te aga donoba tigulama, tama Godibolo lotu po wai.^q

22 Te nosali Josep me agai konealubo po Godiba dą̄u olama agaba tią̄ peyu bidibaso, tama aga isainogo ebo sogo agai te po wali, nosali te Israel dabe augwaligo te Isip t̄o tagalama gasaba paibao wai. Tama augwaligo agai dili dabe te sogo teba sela pelama, gasa t̄ode pubulao po me wai dao.^r

Mosesgo konealubo po dą̄u olama, Godide tią̄luali po

23 Te Mosesgo aya de ida sigo konealubo po Godiba dą̄u olama agaba tią̄ peyu bidai. Tama te Mosesgo idago aga te Isip bulude ame nenama, tama augwali sigo suali, aga sawi yai wai mu bidai. Tama tibaso, polua selade augwali sigo aga geme dualama bidai. Te Isip gavman tuni bidigo bomai po weyu, te po polobadu gana wai dao, “Te Israel dabego we dabego te wai ogwa dabe ame nobaso, augwali ela muao,” te po wai. Tiali goli augwali si te tuni bidigo bomai pode wi me ebeo. Tama tibaso polua selade augwali sigo aga geme dualama bidai.^s

24 Te bidi Moses me agai konealubo po Godiba dą̄u olama tama Godide tią̄ peyu bididuali. Tama tibaso, nosali aga genuai yaide, te Isip dabego aga te Isip tuni bidigo wegigo negali wai da nogi wabo te tagalao, agai te homu yalio.^t 25 Magi baso meni, aga digi te aga Godigo hani te Israel we bidi dali dene sabo homu yai. Agai koneani, aga te tuni bidigo wegigo negali ogwa me bidiyu da, teda agai nosali dwai sę̄ eyu bidagameo.

^o 11:17-18 Gag 21:12; 22:1-14 ^p 11:20 Gag 27:27-29, 39-40 ^q 11:21 Gag 47:31-48:20

^r 11:22 Gag 50:24-25; Sai 13:19 ^s 11:23 Sai 1:22; 2:2 ^t 11:24 Sai 2:10-12

Tiali goli te pewadage sogo naga tede wiegi yai homu pemene yaibao. Tama hagela homu yai dao.²⁶ Agai te homu yali, te aga te nosali asaibao wali bidi Kraisgo nogide hale siyu da, tego te tigidali mone me te Isipde elalubo te au dobage dabe te aiyaba mu elaluabao. Tama te gasagi yai wiegi yai nai te Godigo agabolo mawaibao po, tede aga homugo kę̄ palio.

²⁷ Te bidi Mosesgo konealubo po Godiba dą̄ olama tama agade tią̄ piduali baso, agai te tuni bidigo sę̄bę̄ homu ebode te aga wi me ebeo. Meni. Aga hogodolama tama Isip tq taga soali. Te e tqde bidigo God gedugo me susią̄bo digi, tiali goli Mosesgo te God subo tiwai yali, tama tiyu aga bomo elama geasa ma pabeo.²⁸ Agai Godide mu tią̄lubaso tama agai te Israel we bidi te tedali sogo nogi Pasova tede yabo kolesaga ebo sę̄ ilali. Te bidi elabo mobo bidigo te Israel dabego gomunai ogwa tigidali ela muidali weyu, agai augwalibolo te po wai, “Te duga be deli delide kibu sipsip wai elama, tama te kaneme te be tų̄ sesegede pos niba segeni tiwai sasaqa pao,” te po wai.²⁹

²⁹ Te Israel we bidi dabe augwaligo Godiba konealubo po dą̄ olama tama agade tią̄ piduali baso, te Isip tq taga soali sogo augwali te tamu aji nogainu, tama Godigo te aji buga somainu ilama, tama augwali te wa pai tq tiwai elalubo tomo tǖdu nogai. Te augwali pobeasa asobo Isip dabe augwali me te aqidu usu selama nogali, tiali goli te aijo augwali elama, tama poma pobaso te wę̄ tomode isila pai dao.³⁰

³⁰ Te nosali te Israel dabe augwaligo Godiba konealubo po dą̄ olama tama agade tią̄ piduali baso, tama augwali pelama tama Jeriko hanu bagulali masigigo nigai obo te a naga olama me badu nogo si sogo usu nama bagulali, tama te masigigo nigali obo te tqba degasa dulai dao.^x

³¹ Te sę̄ pedalisiabadi, tama te hanude bidali penani ebo we Rahap agai te Godigo te Israel dabe tau sali po odoyu, tama agai Godide aga homugo tią̄luali. Tama tibaso, agai te bulu geme sa pelama sugi pali Israel bidi si tau salio. Tama te we aga te Godigo po sela sawani we bidi augwali dali me dolobeo.^y

³² Tiali goli dagego te Godide tią̄lubo kolesaga page bugagia konemainogo eyu, megı̄ eno mena po me wadolama tama ma wagowe? Menio. Te eno te bidi Gideonde po wabo sogo me, te Barak me, te Samson me, te Jepta me, te Devit de Samuel, me te Godigo po pusali profet bidi dabe augwalide po eno wabo sogo te usu menio.

³³ Te tobage bidi dabe augwaligo te Godiba konealubo po dą̄ olama tama agade tią̄ piduali baso, tama augwaligo te wą̄bi hwı̄bo bomo ugwaba ela holoyu, tama te tuni bidi hauwago ami bidi dabe augwali

^u 11:27 Sai 2:15 ^v 11:28 Sai 12:21-30 ^w 11:29 Sai 14:21-31 ^x 11:30 Jos 6:12-21

^y 11:31 Jos 2:1-21; 6:22-25

aiyaba elaluyu yai. Augwaligo doloba pai kolesaga yai, tama augwaligo te Godigo augwalibolo mawaibao po wali nai me salio. Augwaligo te bidi ela tubo moni kibu laion dabego pedauwali pania siyu yai dao.^z ³⁴Tama augwaligo te moni sia bogoli ebo me sula savy yalio. Tama me te augwali wi pidu gebaso te gasa bidi dabego te bobage hwā gego te augwali elali te usu me ebeo. Tama augwali bomo meni yai bidilama, tama nosali augwali bomo sai. Augwali te wābi hwībode bomai bidi mu pedalai. Augwaligo te gasa hanigo genuai ami bidi dabe augwali aiyaba elaluyu pobeasa peyu yai dao.^a

³⁵Te we dabe meba augwaligo Godide konealubo po dāu olama tama agade homugo tiā piduali baso, tama isai ogwa dabe augwali ma hodaloyu elama, tama augwa idago augwali ma siyu yali. Tama gasa bidi meba kalabus elama tama boi bidi dabego augwali tigi mu dolali, te augwali isabo usu tiwai mu yai. Tama augwaligo te God tudiba mugi sogo da, teda te boi bidi dabego augwalide te tebo sē tagaligi dao. Tiali goli augwaligo te boi bidi dabego po te augwaligo wali me pabeo. Menio. Augwaligo homugo te augwali gū pagede ma hodaloabo te homu elama, tama augwaligo tebogo te bidabo wiegi yai ula sabo homu naga yalio.^b ³⁶Tama te Godide konealubo po dāu wali we bidi meba te boi bidi dabe augwaligo te dwai posobo po sēgē siyu, tama augwali dodolama te dwai bigo subigila elali, tama sengo augwali kēnama, tama augwali kalabusiba muyu yai dao.^c ³⁷Tama augwali tigiba te boi bidi dabego masigi savy ela muyu yai. Tama augwaligo te ni togobo so selama, tama augwali tigi te sogo togolama pedai pedalai. Tama augwaligo te bobage hwā gego augwali ela muyu yai. Tama te konealubo po dāu wali we bidi meba augwali nai meni yai baso, augwaligo te kibu sipsip tigi waligo me te meme waligo te ugwa tiwai gudama, tama augwali bilalio. Augwali te tigi tau sabo doado bage tigidali menia sali, tama te bidi dabego sēgē augwalibolo mayu, tama dwai kolesaga mu augwalibolo yai dao.^d ³⁸Tama tibaso, augwali tedela pelama, tama gema te bidi meni yai buluba me, te bulu duba me, te masigi ola beba me, te tō dedage tomoba me gema bidigi peyu yai. Augwali te wiegi yai we bidi mu, tama e tōde we bidigo te bidi dabego konealubo po dāu wabo te dali usu nisiāyu, tama augwali tomode me bidigi homu elama augwali dali boi bidi mu yalio.

³⁹Te tobage polobadu bidali Godiba konealubo po dāu wali tigidali we bidi, tama augwali te God gedude wiegi yai nogi mu sai, agai augwalide ‘Augwaligo kolesaga te wiegi yai yali,’ te homu yai dao. Tiali goli augwaligo te wiegi yai nai polobadu Godigo augwalibolo te mawaibao po wali nai te augwaligo te sogo me sabeo. ⁴⁰Magi baso meni, polobadu digi

^z 11:33 Dan 6:1-27 ^a 11:34 Dan 3:1-30 ^b 11:35 1 Kin 17:17-24; 2 Kin 4:25-37

^c 11:36 1 Kin 22:26-27; 2 Sto 18:25-26; Jer 20:2; 37:15; 38:6 ^d 11:37 2 Sto 24:21

Godigo wiegi yai nai me deli dabolo sisi ilama dodolali elalubao. Tama aga homugo te polobadu agade tiq̄ pai we bidi dabego da nosaliba ilama augwali polasa peyu tama te wiegi yai mu me pedalogobeo. Menio. Te da me doloba pai wiegi yai mu augwali dali naga pedalaibao, Godigo te tama homu eyu dodoloyu yai dao.

Dago Jisasba tonono eyu agade homugo kę̄ pinao

12 ¹Te da me, da magi ebawe? Te polobadu bidali we bidi augwali doligulama tama da te genuai pogo bagulubo tiwai elama, tama augwaligo dabolo te Godide konealubo homu dą̄ wabo kolesaga ola mawai. Tama tibaso, dago me te ususu si yainogo uda yabo bidi tiwai eyu, te tigidali sege yai nai guda sayao, te dade dą̄ wabo dwai kolesaga tigidali me te dago guda sayao. Tama dena homu dą̄ ilama, tama Godigo dabolo sa muyu uda yao wali madi sabolainogo da bomonama te dą̄iba uda iyao. ²Tama tiyu dago gedugo Jisasba naga tonono iyao, aga te dago agade konealubo po dą̄ wabo kolesaga page bidi, tama nosali agai dago agade tiq̄ pabo kolesaga ebo mu usu naibao. Polobadu Jisas aga homugo te wiegi yai homu pemene yabo se te nosali sabo homu elama, tama aga bomo elama bidali, tama aga dene bugagia tolama aga ni pedaide isai. Agai homugo te ni pedaide hale sabo te olo nai tiwai da, te homu yai. Tama megi da agai genuai nogi elalubaso, aga te God dulalubo sia saide te dolo nogo badude megi dulaluyu bidibo dao.

Godigo sege dabolo mayu da, te da dodoloyu emainogo ebo dao

³Dagego te bidi Jisasde bugagia kone palao. Te sege sai bidi dabego polobadu augwaligo dwai boi bidi mu aga dali eyu, tama aga dwai dene mawai. Tiali goli aga bomo elama dolaluai. Dagego te tiali koneba wida, te dage te Godide tiq̄ pabo kolesagade hagela me egio, tama dagego homu nagamea me pelamu dao. ⁴Te Godigo po odobo hagela homu ebo bage augwaligo dage dali dwai se elama, tama dage bomonama eyu, te Godide konealubo po dą̄ wabo kolesaga tagalobeo. Tama tiyu dage bomonama ebadi te boi bidi dabe augwaligo dage elama, pade isainu yai. Te gasa bidi dabe augwaligo Jisas dali dwai se eyu aga ela muyu yali. Tiali goli te dagede meni.

⁵Te Godigo dagego homu bugagia dą̄ walomainogo bomo mayu wali po te dagego homugo gegeda pai dawe? Agai dage te aga wai da olama nogi ilama, tama agai te po wai, augwaligo te bukude aşeanı,

“Te eno waio, te eno nage dodolobo kolesaga me
deli nagebolo ebaso da,

nago homugo te olo nai tiwai da me wagio. Nago
geda muani kolesagade bugagia kone palao.

Te eno sege nagebolo mayu te nage dodolobaso

da,
teda nago homu me dolamu dao.

⁶ Magi baso meni, te eno bidi me deli godolo
ebaso da,
teda agai kolesaga te eno dodolaibao.
Tama eno bidi me deli selama tama eno wai da
wabo nogi eyu da,
teda eno te aga dodolobo dao, te bidigo aga ene sigi
te siade ulama tama nogogo dodolobo tiwai ebogia
yaibao,” te po wai.^e

⁷ Te dage bomo elama dolaluyu, tama Godigo dage dodolomainogo emainao. God agai dagebolo ebo kolesaga ebogo dage te aga wai mu dao te hania ola mabo dao. Mena wai bidibadi tama aga ayago aga me dodologobewe? ⁸ Menio. Godigo aga wai dabe tigidali dodolobo dao. Tama agai dage dodoligi menigi da, teda dage te agai wai mu menigi da, dage te tude biliyu penani ela bilibo wego wai tiwai egi da. ⁹ Dagego te me koneao. Te dena e tude aya augwaligo da dodoloyu yai, tama dago augwali nogi ugwaba sai. Teda dago dagalude bidibo Aya dologoba mu pelama, tama dago te bidibo ula mu sao. ¹⁰ Te da te ogwa wegide bidibadi, dago e tude aya augwaligo te dago kolesaga te dwasianu sogo naga dodoloyu, te augwaligo homu kolesaga usu nama tama tiali. Tiali goli God agai da dodolobogo te da mu tau selama, tama dago te aga digi ebo te wiegi yai magi dwai se isawai kolesaga saibao wai. ¹¹ Tama God Ayago sege dabolo mani te da dodoloyu eboso da, tama te sogo dago wiegi yai homu pemene me ebeo. Menio. Dago homu te sege naga me elalubao. Tiali goli agai da dodelali tama te tiwai wiegi yai nai nosali pedalaibao wai: dago doloba pai kolesaga eyu, tama dago homu nagame elama bidaibao.

Dago dili bomaluyu bomo elama dolaluao po

¹²⁻¹³ Godigo te dago ebo kolesaga dodolobo se tama yaligo da, teda dagego agai po wali pabo kolesagade dage te bomo kimi isali bidi tiwai eyu biligimio. Te meni. Te dagego nogo te olo walalubo tiwai elalubo, te tagalao, dagego bomo ma sao. Tama te sagu kidu isai tiwai eboso da, tagalama, te duga bomo elama dolaluao. Dage Godigo po wali pobadi, te dolo wiegi yai kolesaga naga yao, te bilibo bidi agai te dwagi yai dolo tudenaga pabo tiwai yao. Te dage tomode bidibo bidi me deli aga Godigo po wali pabode bomo meniamma tama aga tulaluidali weyu, dagego aga tau somainogo eyu, te dolo wiegi yai kolesaga naga eyu bidaao.^f

¹⁴ Dage deli deligo te tigidali bidi dali te homu nagamea pabo kolesaga wali pabo se bomo elama yao. Tama dagego te Godiba homugo keq peyu,

^e 12:6 Jop 5:17; Prs 3:11-12 ^f 12:12-13 Prs 4:26; Ais 35:3

te dwai sę me isawai kolesaga me wali pabo sę bomo elama yao. Magi baso meni. Te bidigo te tobage kolesaga meni yani da, teda agai dago Genuai Bidi me sugobeo. ^g 15 Te ama me deli tula muyu tama Godigo te olo tau siyu mabo kolesaga tagalidali weyu dagego bugagia tonaluao. Tama tiyu dage tomode pedalobo ama me deli aga te ha ebo nedu du tiwai walama, tama dagebolo sege menama, tama dage God gedude meda yai pedelabuo. ^g 16 Tiyu bidi me deligo te penani ebo kolesaga wali pabuo. Tiyu bidi me deligo te God tudiba muyu, te polobadu Isogo yali tiwai idalio. Te aga amade te tubo nai deli sogo naga abela tuali, tama agai te aga digi gomunai ogwa da wali bomo me, nogi me, te sigo te tubo nai abelama tama aga olo sawai dao. ^h 17 Dagego koneani, nosali agai te yali sede ge neyu, tama te gomunai ogwa da wali bomo dali nogi dali si ma sainogo yali, tiali goli aga ayago te menio po wai. Iso aga te gomunai bidi nogi ma sainogo te gela hauwa wali, tiali goli te aga daq wali po togobo te tu menio.ⁱ

18 Megi dagego te Israel hani we bidi augwaligo polobadu mu yali sę tiwai ebeo. Augwali te augwa nogogo tula subo naiba asali, te bulu du nogi Sainai teba augwali asali. Te bulu dude augwaligo suali, te genuai sia dabo, tama be hulia si te sisi yai mu me, te bomai wali dali be sele dali be kulu wabo dali, ^j 19 tama te bu wabo nai biugel moni bu wabo dali, te Godigo po wabo me, augwaligo te suali me odali. Tama te Israel we bidi augwaligo te po wabo odolama, tama augwali wi eyu, tama bomo elama Mosesbolo te po wai, “Dago te po wabo ma odobo usu egobeo,” te po wai. ^j 20 Magi baso meni. Te Godigo augwalibolo mani bomai po, te po odolama augwali wi mu yai. Agai te po wai, “Te bidi me deligo nogo munama te bulu du nogogo diqbaso da, teda dagego masigi agaba sanama tama aga ela muao. Tama bulmakau ma sipsip dabe me te tiwai naga elama ela muao,” te po wai. ^k 21 Augwaligo suali nai te dwai mu baso tama Mosesgo me te po wai, “Ena wi mu elama, tama eno tigi didibili mu ebao,” te po wai.^l

22 Tiali goli dage, dage te tiwai naiba me asobeo. Menio. Dage te Saion bulu duba asai dao, tama te bidibo ula mabo God bidibo moni hanu te dao. Te bulu da te dagalude elalubo Jerusalem hanu dao. Te moni umabo ensel mobo bidi dabe augwali sisinama te wiegi yai homu pemene ebo madi, teba dage asai dao. ²³ Dage te Godigo gomunai ogwa dabe augwali sisinama te bidibo madi, dage teba asai dao. Godigo augwali nogi aşeanı, tama te aşeanı po Godigo bidibo digide elalubao. Dage paba dolagasali, tama po tu dodolobo bidi jas aga bidibao, aga te tigidali we bidigo God

^g 12:15 Bom 29:18 ^h 12:16 Gag 25:29-34 ⁱ 12:17 Gag 27:30-40

^j 12:18-19 Sai 19:16-22; 20:18-21; Bom 4:11-12; 5:22-27 ^k 12:20 Sai 19:12-13

^l 12:21 Bom 9:19

dao. Polobadu mu bidai we bidi meba, augwali isama tama Godigo augwali doloba pai we bidi ilama tama augwaligo po wabo mobo noma me bidibo dao. Tama dage augwali bidibo digi asai dao.²⁴ Tama dage Jisasba asai dao. Godigo da we bidi tau sabo po olama dą̄ walali. Tama te dą̄ wali tau sabo po dabolo waselemainogo eyu Godigo Jisas tagala palali, tama aga tomode bidiyu te dą̄ wali tau sabo po dodolali. Te polobadu bidai bidi Abel aga amago aga ela mubaso, aga gelali kanemego “Boi yao, boi yao,” po wali tiwai bidai. Tiali goli Jisasgo kaneme te dago sali dwai sege te sela səbo kaneme dao, te boi ilabo kaneme meni. Tama teba me dage asai dao.

Dago bugagia tonaluao po

²⁵ Dage dua dao. Tiyu dage olo pania selama tama megi e po wabo bidigo po sela səyabuo. Polobadu digi e tqde Godigo bomai po te we bidi augwalibolo mani, tiali goli augwaligo agai po sela səawai. Tama te sogo polobadu, te augwali wi me pabo usu meni eyu, tama augwa sege te geda sabeo. Megi God te dagalude bidiyu dabolo agai po mawai. Tama dago aga tudiba muyu da, te da wi peyu te dabolo mabo sege geda sabo usu egowe? Mu menio.^m ²⁶ Tama polobadu Godigo pedauwalide tq malililai. Tiali goli megi agai dabolo e dą̄ wali po walio, “Te eno tq deli sogo ma malililaibao. Tama tq naga me tegobeo. Te eno tq de dagalu dali si malililaibao.”ⁿ ²⁷ Te pogo “Te deli sogo ma” weyu te po wai, agai dabolo e tama ola mawai: te polobadu Godigo nigali nai dabe tama megi agai dagalama, tama te nai dabe aga sela səanama, tama me elalugobeo. Tama agai te dagalisiabo nai dabe da, te me elaluiba.

²⁸ Te dago sali te bidibo digi te magi naigo munu me dologobeo, usu egobeo. Tama te tebode dago Godibolo usu da olama gedu haluasa po wao. Tama dago agaba lotu po weyu, tama agai godolo ebo kolesagade se tulama yao. Tama tiyu dago aga nogi ugwaba siyu, tama agade wi yao. ²⁹ Magi baso meni, dago God da, aga te tigidali nai dabo genuai sia tiwai dao.^o

Dago te Godigo da dali dwagi yai homu ilibo kolesaga iyəo

13 ¹ Dage Godigo po wali pabo we bidi, sesemané sogo dagego duga hasi duga ama dede dali dwagi yai homu eyu godolo idua.

² Dagego te duga beba digibulu asobo bidi dabe augwali tau sabo homu ebo te dagego me gegeda pigio. Duga koneani, polobadu bidi mebago te tiwai elama, tama augwaligo te ensel mobo bidi meba te augwa beba odasa pelama, augwali gesali. Augwaligo te ensel bidi asobo me konebeo. Augwaligo te bidi naga da te homu yai dao.^p ³ Dagego te ama

^m 12:25 Sai 20:22 ⁿ 12:26 Hag 2:6 ^o 12:29 Bom 4:24 ^p 13:2 Gag 18:1-8; 19:1-3

dede augwaligo Krais wali pobaso te boi bidi dabe augwaligo augwali meba kalabus beba muani. Tama te kalabuside bidibo ama dabe dagego homugo konealua, augwali tau sao, te duga digi te kalabuside augwali dali bidibo tiwai ebao. Tama te bidi dabe augwali tigide sęgę sabo te dagego homugo koneao. Dagego koneani, te duga me tigi elalubo dao.

⁴Tama te we sabo te wiegi yai kolesaga dao, te we bidi tigidaligo te homu yao. Dagego e tama yao, te bidi dali aga we dali augwa hasi te homugo kęq̄ pai kolesaga naga yao. Dagego koneao, nosali Godigo te penani yali we bidi me, te we sabo kolesaga dolali we bidi dali, augwalibolo te wei ponabo te dwai dene genuai sabo te elalubao.

⁵Dagego te monede pesę eyu godolo ebo kolesaga wali me pigio. Te dagego tolalubo naide te dagego e tiwai homu yao, “Te wiegi yai dao. Te ena usu yaibao.” Magi baso meni, Godigo digi te po walio, “Te ena nage munu me tagalogobeo. Te eno nage tudiba munu me mugobeo.”^q ⁶Tama Godigo te po obaso, dago dena homu bomonama tama dago e tiwai po waiyao,

“Genuai Bidi da ena tau sabo bidi dao. Te ena wi
me egobeo.

Te bidi dabe augwaligo ena dali ebo dwai kolesaga
tigidaligo ena dologowe? Menio!”^r

⁷Dagego duga toboli bidi dabego yali kolesaga homugo bugagia koneao, polobadu augwaligo Godigo po dagebolo pusai. Dagego augwali bilali kolesaga dali, augwali isali kolesaga dali si homugo koneama, tama augwaligo konealubo po dąq̄ weyu Godiba tiq̄ pali kolesaga te wali pao.

⁸Jisas Krais aga munu me hasegelegobeo. Polobadu aga hasegelebeo, megi aga hasegelebo meni, nosali aga munu me hasegelegobeo. Aga ebo kolesaga deli naga me ela piduaibao. ⁹Tama tibaso, te gasa haniani haniani ola mani pogo dagego homu kegeyu, tama dagego Godigo tū wali pabo tagalu gogologimio. Te dago homugo te Godigo da olo tau siyu mabo kolesagade dago bomo sai yai baso da, te wiegi yai dao. Dago homugo te haniani nai tubode bomai po wali pabode te bomo sainogo ebo usu egobeo. Te kolesagade bilali we bidi augwali te kolesagago tau me sabeo.

E tiwai ofa mabode Godigo godolo ebo po

¹⁰Dago ofa ebo alta sai tiwai elalubao, tama tede dago Godigo nogi ugwaba sabo po wabogo te ofa tiwai agabolo mabo dao. Tama te Juda dabego pris bidi dabe augwaligo augwa lotu wabo te ugwa bede sę eyu, augwaligo te dago ofa tiwai ebo kolesagade sę meni. ¹¹Tama tigidali kibu bede te Juda dabego polalubo toboli pris bidigo te sipsip dabe me

^q 13:5 Bom 31:6, 8; Jos 1:5 ^r 13:6 Tib 118:6

te bulmakau me te kaneme selama, tama agai te Tedali Gasagi Yai Be Habu Mu tomoba pelama, te we bidigo sege sela sayu ofa ilai. Tiali goli te kibu dabego tigi da, te augwaligo te augwa bidibo digi bulu badu sia nogonama, siaba ulai dao.^s ¹²Tama tibaso, Jisas me te obo bagulali hanu bulu badu te aga dene tolali, te agai kanemego digi te we bidigo sege sela sayu, tama augwali Godigo gedude wiegi yai mu pedalomainogo ilali dao. ¹³Tama tibaso, da me te pesage nigali te bulu badu agaba pelama, tama dago agai aga isibode tolali hale tiwai te dago me tolao. ¹⁴Dago koneani, te e tqde dago te gamonabo hanu me deli dago me elalubo menio. Tiali goli dago te nosali pedalabo hanu godolo mu ebo homu ebo dao. ¹⁵Tama tibaso, Jisasgo nogide Godibolo wiegi yai homu pemene elama, tama dago te aga nogi uwgaba sabo kolesaga te sesemane sogo agabolo mayu, te ofa tiwai yao. Awe, dago pedauwaligo aga dago Genuai Bidi dao te po wabogo dago Godibolo dena ofa tiwai mabo dao. ¹⁶Tama dagego duga hasi te we bidi augwalibolo wiegi yai kolesaga ebo te dagego homugo gegeda pelamuo. Tama tiyu dagede elalubo doado bage, te dagego te nai meni yai we bidiba dobayu, te augwali tau sao. Godigo te tiwai ofa ebode dwagi yai homu mu ebo dao.

¹⁷Te duga tobolu bidi dabe augwaligo dage tau sabo homu elama, tama augwaligo dage sesemane sogo tonalubo dao. Magi baso meni, nosali augwaligo digi yali se po tigidali te Godibolo pusaibao. Tama dagego augwaligo ola mabo po wali pelama, tama augwali dologode bidao. Te dagego tama tibaso da, teda augwali wiegi yai homu pemene elama, tama augwa se tulama se eyu, tama augwali homu sege me egobeo. Tialima augwaligo dage tonaluabo te homu sege ebaso da, teda te tebogo te dage tau me sogobeo.

¹⁸Dagego gedu haluasa po Godigo da tau somainogo wedua. Dago homugo koneani, te da God gedude dolo bidibao. Tama da tigidali sede dolo bilabo homu ebo dao. ¹⁹Tama eno homugo godolo mu ebao, te dagego gedu haluasa po Godibolo olama ena tau somainogo yao, tama ena dage bidibo madi polo tamadi asomainogo yao.

²⁰⁻²¹God aga te da we bidi homu nagame ilibo page bidi elalubao. Agai te dago Genuai Bidi Jisas te gu pagede ma hodolama, tama aga ma bidimainu ilali. Hasia Jisasgo aga digi bidibo ula olo mayu, tama Godibolo ofa tiwai mani, te da we bidi tau somainogo yali. Tama tebogo agai te Godigo te we bidi tau sabo da wali gamonabo po te mu da wali. Tama tiyu, aga te da sipsip tiwai bidibo we bidi tonalubo te polalubo bidi pedalai dao. Tama eno homugo te God agai te tigidali wiegi yai kolesaga dagebolo mao, te dagego agai homu kolesaga wali pabo usu ilimainogo yao. Tama eno homugo me da tomode agai tigidali te aga digi

^s 13:11 Prs 16:27

godolo yabo kolesaga tigidali pedalomainogo yao, te Jisas Kraisgo nogide tama tiao. Aga genuai nogi te sesemane bidada pabo sogo elalua peyu, elalua paibao, te eno homugo. Mu dao.

Po silagasu wabo po

²²Ama dedeo, eno po bomo elama dagebolo obao, dagego eno e mobo mabo wali pode dwagi yai homu eyu, odao, te eno dagego homu dąq ilabo po e pas tomode wai dao. Eno dagebolo e așena tolobo pas te pewadage tiwai naga dao. ²³Eno homugo duga koneao, augwaligo te dago ama Timoti olo tagala palali, tama aga te kalabuside me bidigobeo. Tama aga enaba polo pedalobaso da, teda ena dali da si talua si pelama dage suagasaibao.

²⁴Te dagego dago te siade da wali po te duga tobolu bidi tigidilibolo me, te tigidali Godigo we bidiba dali te po wao. Te ede bidibo Itali hani Godigo we bidi augwaligo te siade da wabo po te dagebolo tolai dao.

²⁵Te eno homugo Godigo olo tau siyu mabo wiegi yai kolesaga te dage tigidali dali bidao.

Jemsgo Aşəni Pas

Hasia nedebə tau sabo po

Te bidi nogi Jems, te aga Jisas aga amanu, te bidigo e pas aşəni. Agai homugo te haniani bulude bidibo Kraisgo po wali pabo Juda we bidi augwalibolo agai te augwa ebo kolesaga tigidali bugagia suao po wali. Haniani səqə augwaliba pedalobaso da, teda augwaligo te səqə dabe bugagia tolao wali. Tama tiyu, te tibo kolesaga egimio wali, te homu mu naga eyu, tama wiegi yai doloba pai kolesaga gasa we bidi dali yao wali.

**Dago te usu sabe səqə toloyu bomo elama dolalubaso da,
teda da God dali bugagia bidaibao po wali**

(Dqj 1:1-18)

1 ¹Ena Jems dao. Ena God dali, Genuai Bidi Jisas Krais dali sigo sə ebo bidi dao. Dage te Israel bidi hani nogo si olama, saqə badu si wali bidi hani bage, dagede eno homu kone paluyu, eno te pas aşəna tolobao. Dagego duga page bulu tagalama, tedela pelama, gasa haniani buluba polobadu bidigi pai. Tama eno dage dali dwagi yai homu eyu, e pas toloyu, dage tao obao.

Da bomo somainogo, bidi usu sabo səqə pedalaibao

²Eno ama dedeo, haniani səqə dagebolo pedalobaso da, teda dwagi yai homu yao. ³⁻⁴Dagego koneai, te səqə me deli dagebolo pedalama, tama dagego te səqə bugagia toloyu, dagego te səqə aiyaba elalubo dao. Tama dage te tiwai idu geyu da, teda nosali asobo səqə tigidali aiyaba elaluabo bomo elaluabao. Tama tilama, dage bugagia bidaibao, te Godigo dwagi yai kolesaga me deli habuge egobeo, dage usu mu yaibao. Habuge idali weyu, bomo yao. ⁵Tialima, dage tomode te bidi me deli aga te sə yabo kolesaga habuge ebaso da, te agai God hanalu wao, dwagi yai kolesaga momainogo hanalu wao. Tama Godigo agabolo mawaibao. Wado po wagobeo, God agai tigidali bidibolo augwaligo hanalu wali nai mabo dao. Agai dwagi yai homu eyu augwalibolo nai olo mabo dao. ⁶Tiali goli te bidi aga səqə tolabo kolesaga habuge yai bidi agai Godibolo hanalu wabo

po wabo si, deli homu naga eyu hanalu wao. Agai te homu si elamuo. Godigo te dwagi yai kolesaga ena magowe, ma magobewe, te homu egio. Magi basowe? Bidi homu si ebo bidi aga homu kolesaga te tamu aji asiyu, dini besela pabo tiwai dao. ⁷⁻⁸Tama te tobage bidi aga sesemané sogo homu si ebo dao, tigidali sède homu kolesaga besela pabo dao. Tama aga Godibolo po hanalu wabo tede me aga homu si ebo dao. Tama tibaso, bidi agai te homu elamuo, Genuai Bidi agai ena magi nai me mawaibao, te homu elamuo.

**Te bidi Jemsgo te magi nai doado bage meni yai bidide po dali
te nai doado bage hauwa munalubo bidi dali side po wali**

⁹Te dage magi nai doado bage meni yai we bidi, dagego Godiba konealubo po daq olama, tama dagego dwagi yai homu yao. Magi basowe? God agai dagego nogi ugwbaba saibao. ¹⁰Tama dage doado bage nai hauwa munalubo bidi dabe, dage me dwagi yai homu yao, God agai dage nai meni yai bidi tiwai bidimainogo yaibao. Te magi baso menio. Te nai hauwa munalubo bidi aga te noswai wiegi yai holobo tiwai elama, tama nosali te noswai ma isibo dao. Tama te tiwai te nai hauwa munalubo bidi isiyu tama tiaibao. ¹¹Tama dago koneai. Te noswai plaua duduli wiegi yai au osogo elalubo dao. Giliga pedaliyu, te giliga posolo eyu, tama te noswai tigidali bogwa selama wa pabo dao. Tama te noswai tqba tululuai, tama te noswaigo au yali dolobo dao. Te tiwai te nai hauwa munalubo bidi me aga te tigidali sè yali nai dabe tagalama, tomode isiyu, te nai walu doado bage taga pabo dao.^a

God agai dago dwai sè emainogo sinabo menio

¹²Niwai bidi me aga dali te dwai sè yanama sinayu bomo ebadi tama te bidigo dwai sè emainogo te bidi me deligo te dwai sè yao po weyu da, te bidigo te sè isiqma, te bidi aga bomo elama te dwai sè aiyaba elalubaso, te tiwai bidi aga dwagi yai homu eyu bidaibao. Magi baso meni. Agai te dwai sè usu sabo sogo aiyaba elaluama, tama Godigo aga bidabo ula mawaibao. Godigo te po polobadu wai dao, “Niwai bidi agai ena dali dwagi yai homu eyu, godolo mu ebo bidi agabolo te bidabo ula eno mawaibao,” te po wai dao. ¹³Tama bidi aga homude dwai sè yabo homu hodobaso da, agai te po olamu, “Godigo enabolo ‘Dwai sè yao’ wali.”. Te menio. Dwai sè ebo homu God agai homu kolesagade pedalobo menio, usu egobeo. Tama tibaso, Godigo te bidibolo ‘Dwai sè yao’ wagobeo, te tobage po agai wabo menio. ¹⁴Tiali goli tigidali bidi deli deli augwa homugo digi te dwai sè yabo homu hodolobo dao, tama dago te dwai sè emainogo te dwai homu kolesaga tomode dabolo te ili po wabo dao.

^a 1:11 Ais 40:6-7

¹⁵Tama tiyu, tama te dwai sę ebogo bidi homu hodolama, tama te dwai kolesaga hauwa eyu, te wego wai ame nainogo haliga ebo tiwai elama, tama nosali te dwai sę haniani hauwa eyu, tama te dwai kolesagago wai hauwa ame nai. Tama nosali te dwai sę ebo genuai mu pedalama, tama te dwai sę ebogo te bidi dolama, tama bidi te sęgo isibo tiwai pedalibaob.

¹⁶⁻¹⁷Eno dwagi yai ama dedeo, dagego homu te dwai sę ebode geda mugimio. God agai we bidi dwai sę yao olama sinabaso, te dwai sę ebo menio. God agai te dwai sę egobeo. Te menio. Te Godigo tigidali dwagi yai olo mabo kolesaga me, te tigidali agai da mabo nai te dwagi yai mu dao, tama te dwagi yai sę tigidali dagaludu asobo dao. God agai naga te dagalude ula ebo nai tigidali nigali bidi, agai te dabolo dwagi yai sę naga tɔba mabo dao. Tama God Aya agai te kolesaga subigila hasegelebo menio. Aga te magi nai me giligade nomu pedalobo tiwai eyu, tama te nomu bobobage elama, pewadage ma eyu ebo, God agai te tiwai egobeo. ¹⁸Agai aga homu kolesaga naga wali peyu, agai mu po dabolo ola menama, tama da aga hani mu tiwai dao. Te da aga hani tomode te gomunai bidi tiwai bidimai hagede agai da nigali. Te Godigo da nigilama, te tigidali gasagi yai nai dabego gomunai bidi dabe bidiyu, te dago te nai dabe tonalumainogo yai dao.

Te dago konealubo homu Godiba dąu wabo si da, dago te wiegi yai kolesaga dabe me yaibao

(Dqj 1:19–5:6)

Dago po odama, wali piəo

¹⁹Eno dwagi yai ama dedeo, dagego e po pagede bugagia kone palama, koneao. Dagego te po odabo homu sisi elama, wabo po odao. Te dagego polo asesa te po weyu, tama dagego polo wado po wabo homu olamu dao. Dua yao, sębę polo egimio. ²⁰Magi baso menio. Bidigo sębę ebogo te Godigo gedude wiegi yai doloba pai kolesaga egobeo. ²¹Tama tibaso, dage deli deligo aga me ebo dwai dwai kolesaga tigidali mu sela sayaoy. Tigidali dwai sę ebo homu me te tagalama, te tobage sęde digibulu bidaob. Tama duga digi duga nogi aiyaba elaluao, te Godigo po dagego homude bulali po sao. Te po aga digi usu elama, dage tau siyu ma saibao.

²²Dagego Godigo po dagego ologo naga odogimio. Ologo naga odoyu da, teda duga digi dugabolo ili po te ola mobao. Te egio. Dagego te Godigo po odama, mu wali pao. ²³Niwai bidi agai Godigo po ologo naga odama, agai te po wali pisäma ebo bidi, te aga digi gesabidi te duluade subo bidi tiwai dao. ²⁴Agai aga gesabidi polo sulama, tama bedu buluba teda pelama, aga gesabidi suali ma polo gegeda pabo dao, eno gesabi mena tiwai suali wagawe homu ebo dao. ²⁵Godigo wiegi yai doloba pai

bomo yai po te bomo yai pogo da we bidi tau siyu, tama da bugagia bidiyu, tama da magi nai mego da kalabuside bidibeo. Tama niwai bidi me agai te Godigo bomo yai po page bugagia osola susa pelama, tama te bidi agai te po olo naga odola tagalobeo, menio, te bidi agai te bomo yai po wali pabo dao. Te tiwai bidi Godigo tau siyu, tama te bidi aga bugagia bidiyu, aga ebo sède tigidali aga homu wiegi yai yaibao.

²⁶Te bidi me deli agai homu ‘Ena te baptais sali dwagi yai bidi dao, hauwa sogo eno lotu po wabo dao,’ te homu ebo bidi dao. Tiali goli agai bidi dene mabo dwai po waidali weyu, agai aga pedauwali bugagia tonalubo menio. Tama tiyu da, geda muyu, aga digi aga homugo agabolo tibo po naga wabo dao. Agai te baptais olo sali, agai lotu po wabo te olo po naga wabo dao. ²⁷Godigo gedude bidi agai wiegi yai kolesaga eyu, agai po bugagia odobo bidi agai magi dwai sè isabo bidi, agai e tiwai kolesaga si yao: te kolesaga me e dao, niwai wai dabe meba augwa aya de ida si isiyu, tama te tiana wai dabe augwaduba naga bidibaso da, te me bidi isiyu we taga pai agaduba bidibaso me, te dago te tiwai wai dabe me, te wilawe we me augwali magi nai meni basso te sègè sobadi tau sao. Te me kolesaga e dao: dago dena bilibo kolesaga bugagia tonalua bilao, tama e tòde meda yai dwai kolesagago dago homu kolesaga dolidali weyu.

Dago tigidali bidibolo homu deli naga tiwai yao

2 ¹Eno ama dedeo, dagego dago Genuai Bidi Jisas Kraisde duga homu tigidali muyu bidibao. Aga genuai tobolu bidi mu dao, moni nogi me, moni ula yai bomo me elalubo dao. Tama dagego Jisasde konealubo po dàu waligo da, teda dagego te nogi yai bidibolo naga dwagi yai sè eyu, te olo nai meni yai bidi dagego tudiba muyu, te kolesaga munu me egio. ²Te bidi me deli agai wiegi yai tedela ugwa gudama, tama aga nogode te nogi wabo dwagi yai nai ring munama, tama te bidi aga dagego lotu be tomoba asiyu, tama me te nai meni yai bidi aga me meda yai ugwa gudasa dagego te lotu be tomoba asobadi da, ³tama dagego te dwagi yai ugwa gudai bidibolo te po weyu, “Nage te dwagi yai ni namide duayao,” te po wai. Tama te ugwa meda yai bidibolo dagego “U badu dolaluao, tama nage ena pagede degedude dulaluao,” te po wai. ⁴Tama dagego te bidi si dali te tobage sè eyu da, teda dagego duga ama dede dagego homugo augwali osalama, dagalobao. Tiali goli dagego te kolesagade geda muyu, dagego bugagia dagalobeo. Dage te bidi po tû dodolobo bidi jasgo dwai homu elalu te bidi dabe po tûde dagalabo kolesaga tiwai dagego homude me gagabo. Tegio.

⁵Eno ama dedeo, eno dagebolo dwagi yai homu eyu, godolo mu eboso, eno dagebolo te po obao. Bugagia odao. Te tòde tigidali bidi gedude magi nai meni yai bage, te Godigo te tiwai bidi sa munama, tama augwaligo te Godigo po dàu waligo te augwaligo te homu kolesagade te masigi me

walu hauwa munalubo bidi tiwai yaibao. Te polobadu Godigo tama po wai, "Niwai bidi agai homu enaba muyu godolo ebo bidi, te aga eno we bidi bugagia tonalubo madi tomoba asagameo," te po wai. Tama tiyu, agai te magi nai meni yai bidi augwali sa muyu, augwaligo te Godigo po mu dą̄ waligo da, te augwali te dą̄ ilali madi te pesage saibao.⁶ Tiali goli dagego te magi nai meni yai bidi augwali gisugu mabo dao. Tama dagego bugagia kone palao. Te walu hauwa munalubo bidi augwaligo Godigo po wali pisiqbadi, augwaligo dage dali dwai s̄e haniani eyu, tama dage aiyaba elaluama, tama dagebolo s̄eḡe mabo dao. Tama te bidi dabe augwaligo naga dage te po tū ebo digi kegasa pabo dao, augwaligo dagego nai somainogo.⁷ God agai dage ma selama, tama agai dageba Jisasgo dwagi yai nogi muai dao. Tiali goli te walu hauwa munalubo bagé augwaligo te nogi posobo po wabo dao.

⁸ Te dago genuai tuni bidi God agai bomo yai po me deli bukude polobadu mu aseyu, te po wai, "Nago naga tigi dali dwagi yai homu eyu, godolo ebo tiwai, nago gasa bidi dali me tama naga tiyu, tama nago te bidi dali wiegi yai homu yao," te polalubo bomo yai po aṣeansi. Tama tiyu, dagego te bomo yai po wali peyu da, te dagego wiegi yai kolesaga naga wali paibao.^b ⁹ Tiali goli, dagego bidi deli dali wiegi yai homu eyu, tama bidi me bidi dali dwai homu eyu da, te dage dwai s̄eḡe saibao. Tama tibaso, te bomo yai pogo dage homude dene iliyu, tama te dene dagego mu siyu, tama dage te dwai s̄e eyu bomo yai po bolobo bagé dao olama, tama dagego te s̄ede mu koneabao.¹⁰ Tama bidi me deli agai tigidali gasa bomo yai po wali peyu, tama agai te bomo yai po me deli naga bolali, te bidi agai te bomo yai po tigidali bolali bidi te tiwai dao, te s̄eḡe saibao. Magi baso meni.¹¹ Te God agai te po wai, "Nago te we sabo kolesaga dologio." Tama agai te pogo naga te po me weyu te po wai, "Nago bidi ela mugio." Tialima, nago te we sabo kolesaga dolisiayu da, tama nago te bidi me ela mugi sogo da, te nage te bomo yai po bolali bidi dao wagı da.^c ¹² Tama tibaso, dagego te nosali pedalabo s̄e homugo koneao. God agai te bomo yai po deligo da bugagia bidimainogo ebo dao. Tama te sogo Godigo tigidali tōde we bidi te bomo yai po deligo naga osalama dagalaibao. Tama dagego homugo te tiabo koneama tama duga po wabo me, te bidibo kolesaga me te bugagia duga tonaluao.¹³ Magi baso menio. Bidi me deligo gasa bidi homu dene eyu tau sisayıu bidali, tama te sogo Godigo we bidi dagalobode, te gasa bidi homu dene esiayıu tau sisayıani te bidi aga Godigo homu dene eyu tau sogobeo. Te menio. Tiali goli, niwai bidi agai gasa bidi homu dene elama augwali tau sali te bidi, te usu da, Godigo te bidi tau siyu, tama te Godigo bidi dagalobode te tiwai bidi aga te po tū dali te s̄eḡe me dene sogobeo. Te menio.

^b 2:8 Prs 19:18 ^c 2:11 Sai 20:13, 14; Bom 5:17, 18

Konealubo po wiegi yai kolesaga dali esiayu te isibo dao

¹⁴Eno ama dedeo, bidi mego te po weyu “Eno Kraisde konealubo po dą̄ wabo dao” weyu da, tiali goli agai wiegi yai kolesaga mu isiąwai, tiali ma te bidigo konealubo po te olo nai tiwai yai. Tama te tiwai konealubo pogo aga tau siyu ma sogowe? Menio. ¹⁵Tama tiyu, ama me abe augwali te ugwa dwai eyu, tama tuabo nai me menio. ¹⁶Tama tibaso dage tomode bidi me deligo te magi nai meni yai bidibolo te po weyu, “Nage homu wiegi yai elama bida,” te po olama, “tama nage pelama naga tigi posolo ilabo ugwa mugi peyu, tama naga nai selama tuyu naga haliga pagqanao.” Tama dagego te po weyu da, te dagego te nai meni yai bidi ugwa me te nai me te bidi tigi tau selama masiayu da, tama dagego te po wabogo te bidi mena tama aga tau sogowe? Te meni. Te usu egobeo. ¹⁷Te tiwai gilama, te Jisasde konealubo po dą̄ wabo tama naga ebo dao. Tama tibaso, te bidi aga olo bidiyu da, te tebo kolesagago magi dwagi yai sę̄ me pedalisiayu, tama te olo dwai nai tagalobo tiwai sę̄ yaibao. ¹⁸Te bidi mego te po wali, “Ao, eno Jisasde konealubo po dą̄ wabo dao,” wai. Tiali goli agai gasa we bidi tau siyu wiegi yai sę̄ ebe, tama te tiwai bidi dali eno tama po waibao, “Nago pogo naga te konealubo po dą̄ wabo po wai, tama eno da, te eno we bidi tau sabo kolesaga ebo dao. Tialima, eno te dwagi yai kolesaga ebo suyu da, te sogo nago koneyu eno Jisasde konealubo po dą̄ wabo mu koneaibao. Tiali goli nago wiegi yai kolesaga ebe, tama mena tama eno nago te konealubo po dą̄ wabo koneaibawé? Te tū̄ menio, eno kongobeo.” Eno te po te tiwai bidibolo waibao. ¹⁹Tama nago konealubo po dą̄ wabo homu tama yai, “Te God deli digi bidibao,” wai. Te homu wiegi yai dao. Tama tiali goli te usu menio. Te dwai haubo noma bidi augwaligo me te homu tiwai ebo dao, tama te pode augwali homu didibili eyu midigi sabo dao. ²⁰Nage homu kolesaga meni yai bidi, te nago konealubo po naga dą̄ weyu, tama nago wiegi yai kolesaga dali esiayu, tama nago te konealubo po dą̄ wabo te olo nai tiwai eyu te usu menio. Tama tibaso, nago te po page mu koneai homu ebawé? ²¹Edeo. Dago wāj Abraham agade kone palao. Polobadu Godigo agabolo “Te sę̄ yao” po olama, Abraham aga ogwa Aisak te masigi saiba munama elainogo, tama Godibolo te ogwa te olo mabo tiwai yainogo tiwai. Tama te sogo Godigo agai te kolesaga ebo sulama, tama “Abraham aga wiegi yai doloba pai bidi mu dao” wai.^d ²²Dagego suao. Abraham agai Godigo “Nago ogwa enabolo mao,” wali po bugagia wali peyu, tama te yali wiegi yai kolesaga aga konealubo po dali sę̄ eyu, tama te dwagi yai kolesaga yaligo te agai konealubo po Godide dą̄ wabo te usu mu eyu, te habuge me ebeo. Menio. ²³Tama tiyu, Abraham agai tama tiai, tama

^d 2:21 Gag 22:1-14

nosali Mosesgo te Godigo po meba te bukude agai aséai, “Abraham agai te Godigo pode konealubo po dą̄ wai. Tama tibaso, Abraham aga te Godigo gedude wiegi yai doloba pai bidi mu pedalai,” Mosesgo tama po aséai. Tama me, te Godigo Abrahamde dali te po wai, “Aga eno abagi dao.”^e ²⁴Tama te wali pode te Abrahamgo yali kolesaga te po dagego koneao, te bidi mego konealubo po naga dą̄ weyu, tama agai te wiegi yai kolesaga ebo po wali pisawai, te tiwai bidi Godigo wiegi yai doloba pai bidi dao wagobeo. Menio. Niwai bidigo te wiegi yai yai kolesaga dali eyu konealubo po dą̄ wabo bidi, te Godigo gedude te tiwai bidi te wiegi yai doloba pai bidi dao waibao.

²⁵Tama dago Godigo gedude doloba pai we bidi bidabo kolesaga sao, te polobadu we mego po wali, te we nogi Rahap. Te we aga penani we, tialima Godigo te Kanan tq Juda bidi hanibolo mawainogo yali sogo, tama augwaligo te Kanan tqba sa pabo bidi dabe tagala palai, te sogo te we Rahap agai te bage tau sai. Te we aga hanigo augwali elidali weyu, tama te we Rahap agai te bidi dabe dualama, gasa tudu Juda bage bidibo digiba tagala palai. Tama te wego te yali sède, te we aga Godigo gedude doloba pai mu pedelai dao.^f

²⁶Tama te bidi Abraham dali te we Rahap augwali sigo yali sède dago koneaibao, tama niwai bidigo agai konealubo po naga dą̄ weyu tama wiegi yai kolesaga esiayu da, teda agai Godide konealubo po wabo isali tiwai dao, te bidigo tigide bidibo noma bidi meniamma, tama te bidi isai tiwai yaibao.

Dago dena wabo po bugagia tonaluao

3 ¹Eno ama dedeo, dage tomode Godigo po ola mabo bidi hauwago te po ola magio, bidi si sela naga usu yaibao. Dago konebo dao, nosali Godigo agai we bidi dagalobo sogode, agai da te po ola mabo bidi dabe agai da bugagia dagalama, osola sueibao. Tama dago dena sè bugagia esiayu da, teda agai dabolo sègè mawaibao. Tiali goli te sogo agai po odali gasa we bidi te agai dua digi augwali bugagia dagalama osola sueibao. ²Tama hauwa sogo da tigidali bidigo te pode geda muyu haniani sè ebo dao. Tama tibaso, bidi mego agai wabo pode dwai sè me esiayu da, te aga te wiegi yai bidi mu dao. Tama te bidi aga tigigo ebo sè tigidali bugagia tonaluyu te bidi usu yaibao.

³Tama dago dena wabo po bugagia tonalubo sède eno te po obao, dago te moni kibu hos kelede ain dage munama, tama te ain bonogo kegeyu, tama te hos aga dago ebo homu kolesaga wali bilimainogo tebo dao. Tama tiyu dago aga genuai tigi tigidali kegasa biliyu, tama da bidigo homu kolesaga wali hosgo pabo dao.

^e 2:23 Gag 15:6; 2 Sto 20:7; Ais 41:8 ^f 2:25 Jos 2:1-21

⁴Tama dagego homugo te moni geba sip, tede me bilibo kone palao. Te moni geba sip te genuai nai mu dao, tama tiyu bomai waligo te sip selasa, te tamu qjdu bilibo dao. Tama te sip tolasa bilibo nai te dwasianu nai mu dao. Tiali goli, te sip tolasa bilibo bidi agai homugo gasaba painogo da, te bidi agai te sip tolasa pabo nai teba begelama pabo dao. ⁵Te tiwai gilama, te da bidigo kele te dago tigide elalubo dwasianu nai dao. Tiali goli te kelego genuai po hauwa wabo dao, tama te wali pogo genuai sə ebo usu dao, te sə meba dwagi yai dao, meba dwai sə dao.

Kone palao, te dwasianu sia dabogo te genuai sia mu deyu, tama te bulu tomode elalubo ni dabe tigidali te siago dainogo ebo te dagego konebo dao. ⁶Te sia dabo tiwai da bidigo kelego wabo po tiwai dao. Tama te sia dabo tiwai, dago wali dwasianu dwai po te genuai mu pedaluama, dago tigi tomode dwai meda mu elama, tama da dolobo page elalubo. Tama dago wabo dwai po aga page bulu da te Satan aga moni dwai sia dabo bulu dao. ⁷Tama tigidali tqde bidibo bidi augwaligo te bulu tomode bidibo wili hasa dabe sobadi, te ba me, te hasamani me, tama te tigidali tamu qjde bidibo nai tigidali sai. Tama augwaligo te hasa dabe tigidali negelama tama nagame ilibaso, tama augwaligo po odolama bugagia bidibo dao. Tama megi me bidi dabe augwaligo tama tebo usu yaibao. ⁸Tiali goli mena bidi deli agai kele bugagia tonaluabawe? Te tobage bidi menio. Sesemané sogo bidigo kelede dwai po haniani subigila homu hodolama, te dwai po wabo dao. Tama dago kele da te bidi isibo nai elalubo bidi gą̄ kelebo dwai hasamani tiwai dao, dago wabo pogo we bidi dene mabo dao. ⁹⁻¹⁰Tama dago kelego naga po weyu, te dago po si wabo dao. Po me deli te dago Genuai Bidi dali te dago Aya God te augwali sigo nogi dago uwabala sabo dao. Tama gasa po me dago kelego dwai po weyu, meba bidi dabe dali posobo po olama dolobo dao. Tiali goli, God agai tigidali tqde we bidi aga tigi tiwai nigaligo da, Godigo nogi uwabala sabo po dali, te bidi posobo dwai po wabo dali, te tiwai po si dago deli kelego olamuo. Eno ama dedeo, te dwai po wabo tagalao.^g ¹¹Te qjde kone palao. Te dwagi yai asobo ulu wę dali te tamu qj dali gelama asobo menio. ¹²Ama dedeo, te ni kayago te ni oliv du walogobeo. Tama te bono du ni wain tego te ni kaya du walogobe. Tama tiali me, te tamu qjigo dwagi yai qj ma gagagobeo. Menio.

Dwagi yai homu kolesaga God pagedu asobo po

¹³Te dage tomode bidi me deli agai wiegi yai homu eyu, te dwagi yai po konebawé? Te dage tomode te tiwai bidi me deli bidibaso da, te bidi agai bilibo kolesaga dwagi yai yao. Tama wiegi yai kolesaga eyu dwai kolesaga isiqma, tama dwagi yai kolesaga ebo koneyu, tama agai

^g 3:9-10 Gag 1:26

te dwagi yai kolesaga ebo gasa bidi dabe augwalibolo ola mao. ¹⁴Tiali goli, dagego dwai homu gasa we bidi dabe dali elaluyu, tama dagego augwaligo nogi uwababa sabo eno hagelabo homu eyu da, tama dage nai yogo homu eyu da, dage te tobage dwai homu eyu da, teda geda muyu dagego te po wabo dao, “Da da, te wiegi yai homu eyu, te dwagi yai po konebo bage dao.” Te tobage tibo po wabo tagalao, duga nogi uwababa sabo po wagimio. ¹⁵Tama dagego te gasa we bidi dali dwai homu eyu, tama duga digi duga nogi uwababa siyu ebo, te tiwai kolesaga te dagaludu asobeo. God agai te tobage kolesaga dabolo mabo menio. Tama te homu ebo dwai kolesaga te e tōde we bidigo homugo naga ebo kolesaga dao. Te dago dwai tagalai s̄e ma eyu, tama te dwai s̄e ebo page bidi te Satan dao. ¹⁶Tama tiyu, bidi meba augwaligo gasa bidi dabe dali dwai homu eyu da, tama augwaligo te haniani kolesaga ebode te augwa digi augwa nogi uwababa siyu da, te tiwai bidi dabe augwaligo konila po subigila wabo bidi dao, te haniani dwai s̄e ebo page bidi dao. ¹⁷Tiali goli niwai bidi augwaligo te God pagedu asobo te wiegi yai homu kolesaga sabo bidi dabe augwaligo ebo kolesaga e dao: polasa mu, te augwaligo meda isiąwai wiegi yai homu kolesaga wali pabo dao. Tama te kolesaga me, te augwaligo gasa bidi dabe dali wiegi yai kolesaga eyu deli homu elama bidiyu, tama augwali dali homu nagame eyu, tama tiyu augwaligo gasa bidi dabego po wabo odobo dao. Tama augwaligo homu dene eyu, we bidi tau sabo wiegi yai kolesaga ebo dao. Tama tiyu, augwaligo deli homu tiwai naga tigidali we bidi dali ebo dao. Tama augwaligo ugwidu homugo naga augwaligo po wabo menio. ¹⁸Tama tiyu, dago wiegi yai kolesaga eyu, deli homu naga elama bidiyu da, te s̄e ebo dago te nai ge tōba bulubo tiwai dao. Tama dago te wiegi yai kolesaga eyu, te deli homu naga ebo te kolesaga ebode te nai ge dwagi yai walobo tiwai yaibao, te doloba pai kolesaga ebo genuai pedalaibao.

E tōde ebo kolesaga godolo ebo bidigo te God dali boi bidi ebo dao

4 ¹Te duga hasi te boi bidi yabo homu dali, te wado po wabo homu dali te si menadu pedalobo dawe? Woo, dage bidi deli deligo magi nai sulama, te nai eno tigi tau somainogo, te saio homu eyu, dini ebo dao. Te tama te ebo sego dagego homu hodolama, tama homu si eyu, tama duga hasi konila po weyu, wado po idu gebo dao. ²Dagego te haniani nai sabo homu godolo yai, tiali goli dagego sabo menio. Tama tiyu dagego te bidi ela muabo homu ebo dao. Tama dagego nai sabo homu eyu pes̄a eyu, tama dagego te nai sisāma, tama dagego wado po weyu hw̄ib̄o dao. Tama me sogo dagego Godibolo nai sainu po hanalu wasiābaso, dagego te nai sabe dao. ³Tama me sogo dagego Godibolo te nai sainogo po hanalu obadi digi, dagego te nai sabe dao. Magi baso menio. Geda muyu, dagego homu dolo pisiāwai, dwai s̄e emainogo, duga tigi tobade, duga haliga tobade

naga te nai sai hagede te dagego homu dąu ola sabo nai sainu te dagego God te naide hanalu wabo dao. Tiali goli agai dagebolo mabe.

⁴Dage te penani ebo we tiwai dao, te we aga bidi dali bidisiayu, gasa bidi dali penani ebo tiwai dao. Niwai bidi agai e tőde ebo kolesaga naga godolo eyu da, teda te bidi aga God dali boi bidi homu ebo dao. Te dagego konebewe? Tama tiyu, niwai bidi agai te tőde kolesaga ebo bidi dabe dali abagi weyu, te bidigo aga digi te God dali boi bidi gagawai. ⁵Dagego te polobadu bidali bidigo aşəani pode ma kone palao, te pode geda mugio. Te aşəani po e dao: “God agai aga Mobo Bidi da dali bidimainogo tagala palali. Tama tiyu, da God taga peyu da, te Mobo Bidi agai bomo eyu, da dali dwai homu ebo dao,” te po Godigo po bukude bidi mego aşəani. Te pode dagego “Te po olo po naga dao” homu elamu. ⁶Tama God agai aga Mobo Bidigo dabolo mabo sę te genuai dao. Tama agai da olo mu tau sabo sę, te genuai mu dao. Tama tiyu, agai da olo tau siyu, te dago homude pedalobo ‘Dwai sę yao’ po te po dago odosı̄ma, tama dago te po aiyaba elalubo dao. Tama te sę ebode te Godigo wali po bukude te po elalubao, “Te aga digi aga nogi ugwbaba sabo bidi, te bidi God aga tudiba mubo dao. Tiali goli te imilai bidi da, te bidi God agai olo mu tau sabo dao,” te po aşəani.^h ⁷Tama tibaso, dagego duga dwai kolesaga ebo te homu aiyaba dualao, tama dage Godigo bomo dologode bidao. Tama tiyu, dagego te Satango dwai sę yainogo ebo dagalama sela sayaو, tama agai dage dali te dwai sę yainogo yali tagalama Satan aga wi paibao. ⁸Tama tiyu, dage God pąba mu peyu tibaso da, aga dage pąba mu aselama, bidaibao. Tama dage te dwai sę me sogo me sogo ebo bidi dabe, duga nogogo dwai sę ebo tagalama, dwagi yai sę naga yao, te bidigo nogo ąjde telabo tiwai te meda meniamada dwagi yai tiwai yao. Dagego te Godigo po wabo odobo me te tőde kolesaga ebo te homu si elalubo, te dwai homu ebo kolesaga dagego homude elalubo te sela sayaو, homu deli naga eyu bidao. ⁹Tama duga te dwai sę ebo kolesagade homu sege eyu tama gela hauwa waiyao. Tama dagego megı tama tebo kolesagade dagego dwagi yai homu eyu gisugu wai, tama dagego te dwai sęde gisugu wabo te kolesaga hasegelama, tama duga te dwai sę yalide homu begeleyu gela wao. Tama dage te megı naga wiegi yai homu te dwai sęde ebo bidi dabe, dagego te homu ebo hasegelama, tama duga te yali dwai sęde hale eyu homu dene yao. ¹⁰Tama duga digi duga nogi Genuai Bidigo gedude aiyaba dualao. Dagego tama tiyu da, te Genuai Bidi agai dagego nogi ugwbaba saibao.

Dena ama dali dolabo po olamuo

¹¹Ama dedeo, duga hasi bidi dolabo po dagego wagimio, te tagalao. Niwai bidi agai aga abagi dali te nogi posobo po weyu, “Nage dwai sę

^h 4:6 Pro 3:34

elama, tama sege sao,” te tobage po weyu da, te bidi agai Godigo bomo yai po me posoyu, te bomo yai po dolai dao. Tama nago te Godigo bomo yai pode posobo po weyu da, teda nage te bomo yai po odoyu wali pabo bidi me menio. Nago te bomo yai po osola sulama, tama ‘Te bomo yai po usu ebe’ homu eyu, nago te bomo yai po bolobo bidi dao.¹² Tiali goli, God aga digi naga agai bomo yai po dabolo mawai dao. Aga digi naga we bidi osola suabo bidi dao. Aga digi naga agai we bidi tau siyu ma sabo bidi dao, ma we bidi mu dolabo bidi dao. Tama tibaso, we bidi osola suyu sege mabo se te nago se mu menio.

Dago dwai se egio wabo po

¹³ Dage meba bidi dagego te po wabo dao: “Megi me, do me, da te hanu meba pelama, tama te hanude dago bisnis se eyu, kibu be deli bidaibao. Tama dago mone ge hauwa saibao,” te po dage mebago wabo dao. Tialima eno dagebolo te po obao: ¹⁴ Dagebolo magi nai te do pedalabo te dagego konebeo. Tama dagego bidibo ula te mena tiwai dawe? Te dagego bidibo ula e tiwai elalubao te kigamu po holama, tama te giliga asobode te po polo hagabo tiwai, te da bidigo bidibo ula te tiwai osogo naga ebo dao.ⁱ ¹⁵ Tama tibaso, dagego nosali yabo sede homu eyu, te po wao, “Genuai Bidi agai ‘Ao, usu da’ homu eyu da, te da bidibo ula dali bidiyu, tama dago te masigi sabo se me te gasa se me te nosali yaibao.” ¹⁶ Tiali goli dagego te tiwai ebo meni. Dagego genuai po dagq olo dali ola biliyu, tama dagego nosali yabo sede duga digi nogi uwawa sabo po wabo dao. Te tobage nogi uwawa sabo po wabo te dwalio.

¹⁷ Tama tibaso, bugagia kone palao. Dwagi yai kolesaga ebo koneai bidi, tama te bidi agai te dwagi yai se esiayu da, te bidi agai dwai se yali dao.

Te walu hauwa munalubo bidi dabe dali wali po

5 ¹ Megi eno te dage walu hauwa munalubo bidi dabe dali te po obao. Dage dwai homu eyu, te hwa weyu, gela weyu yao. Dagebolo moni dwai sege dali, dene dali si tamadi pedalaibao. ² Tama dagego te wiegi yai walu dali te au dobage te nai dabe tigidali te dolama, tama damua pai dao. Tama dagego te ugwa dabe me tigidali, te asibago me te sagado dabego tula silai. ³ Tama dagego te wiegi yai kapa nogi gol te golgo nigali nai dali, te kapa nogi silva si te wiegi yai nai dabede nai yogo ebo homu eyu, te nai dabe olo munaluyu, te yaba yai. Tama te nai si yaba ebo gilama te dagego dwai se ebo te hania pedaliyu, tama te naigo dagego tigi te sia ulubo tiwai yaibao. Dagego megi bidiyu, te walu me te mone ge hauwa sisinibao. Tiali goli te Genuai Bidi aga ma asobo sogo padae

ⁱ 4:14 Prs 27:1

dao. Tama tibaso, megi da te nai deliba sisinabo sogo menio.^j ⁴Te po bugagia odao. Te se ebo bidi dabe augwaligo te dagego moni gide dagego nai sabo se yai. Tama dagego augwali ili po weyu, te augwali maibao mone ge bogia siyu, tama meba duga geme halobageba dualobo dao. Odao. Dagego te geme dualali masigigo agai i olama, dwai po dage dali wabo tiwai po wabo dao. Tama te se bidi dabe augwaligo masigi habuge eyu, dwai homu eyu, tama augwaligo i wabo te dagalude bidibo Genuai Bidi agai odalio, God aga tigidali bomo page bidi mu dao, te aga digi augwaligo gela wabo po odalio.^k ⁵Tama tigidali sogo dage e tqde bidibo sogo, dagego dwagi dwagi yai nai siyu, tama dage homu dwagi yai naga eyu bidai. Tama dage nai hauwa tuyu genuai bidi nisai, tama dage elabo bodolu te paba pedalai dao, te nisai genuai kibu tamadi elabo bodolu paba pedalobo tiwai dao. ⁶Dagego te wiegi yai doloba pai bidi dabe po tu elama, te bidi dabe augwali ela muai. Tama dagego augwali dali te dwai se ebadi yaide, augwaligo dage dali po wei ponobo usu ebeo.

Da bomo elalu bidu te Godiba gedu haluasa po weyu tama Genuai Bidi asobo tonaluinao

(Dqj 5:7-20)

Dago homu dąu olama te sęgę toloyu, Genuai Bidi ma asobo tonaluao

⁷Eno ama dedeo, te walu hauwa munalubo bage augwaligo tama tiyu, dagego homu dąu olama, dagego te tigidali sęgę toloyu, tama te Genuai Bidi Jisas ma asobo tonaluao. Dagego koneani, te gi page bidigo te aga gide bulali nai dwagi yai holobo tonalubo dao. Tama te bidigo homu dąu olama, moni homu esiąyu, te tulubage dali te giliga dali sigo se usu ela silibo si, tama te bidi aga te gide te wiegi yai nai sabo dao. ⁸Dagego me tama duga homu kolesaga dąu olama, te tigidali haniani sęgę tolao. Tama te Genuai Bidi ma asobo sogo te paba yagasobao. Tama tibaso, dwagi yai homu eyu, dagego homu kolesaga dąu olama tonaluyu bidao.

⁹Eno ama dedeo, te po tu ebo bidi Jisasgo dagebolo dwai dene wei ponoidalii weyu, duga hasi te gasa ama dabe dali wado po weyu, augwali dali te posobo po olamu dao. Dagego e po odao. Te po tu ebo bidi Jisas te be tu bulu badu dolagasai elalubao. ¹⁰Ama dede, dagego te polobadu Genuai Bidigo nogide po pusali bidi profet bage augwali dali yali te se homugo koneao. Te bage dali gasa bidi dabe augwaligo boi bidi homu eyu, augwali dali dwai se yai. Tiali goli te profet bidi augwaligo homu kolesaga dąu olama, te sęgę bugagia tolai dao. Tama dagego augwaligo te yali kolesaga suyu, te kolesaga dagego usu ni tiwai dao. Tama dage te usu

^j 5:3 Mat 6:19 ^k 5:4 Bom 24:14-15

niba kadu wao.¹¹ Tama te tiwai augwaligo te sege polobadu bugagia tolai baso, megi dago tama po wabo dao: “Te homu kolesaga daq olama te sege tolali bidi dabe, te bidi megi augwaligo homu wiegi yai eyu bidibao.” Tama gasagi yai bidi me agai nogi Jop, agai yali se po dagego odai. Te genuai sege hauwa te agabolo pedalali digi te agai bomo eyu dolalu, te sege te aiyaba elaluai. Tama nosali Genuai Bidigo dwagi yai kolesaga aga dali yai, te me dagego koneai. Tama te bidi Jopde yali se po odama, tama dago koneani, Genuai Bidi agai da hobede mu eyu, tama sesemane sogo agai da homu dene elama, da agai dwagi yai homu eyu, da olo mu tau sabo dao.¹

Dago po wabode dago Godigo nogi olo weyu da, te dwalio

¹² Ama dedeo, dagego polasa te yabo sege se e dao: Dagego te God aga bidibo madi dagalu me, tq me, te gasa nai me nogi eyu, tama dagego te po wabo dao te pogo daq wagimio. Tama dagego “Awe” weyu duga wabo po daq walomainu, “Awe” naga wao, te usu yaibao. Me ma, dagego mu po weyu, “Menio” weyu, duga wabo po daq walomainu, “Menio” naga wao, te usu yaibao. Bidi mego aga wabo po daq walomainu Godigo nogi weyu da, te bidibolo Godigo sege mawaibao. Tama Godigo dagebolo sege maidali weyu, dagego te Godigo nogi olo nogi igio.^m

Dwagi yai doloba pai bidigo Godibolo hanalu wabo po te bomo elalubao

¹³ Te dage tomode bidi me deli aga te sege tolobawe? Tibaso da, agai te Godibolo gedu haluasa po hanalu wao, Godigo aga tau somainogo. Ma, bidi me aga homu dwagi yai eyu bidibawe? Te homu ebo bidi agai te Godibolo wiegi yai homu elama, tqabi po weyu, Godigo nogi ugwaba sao. ¹⁴ Tama dage tomode ama me deli aga te gasi saliwe? Tama tibaso da, agai te Godigo po odobo we bidi tomode bidibo toboli bidi augwali i wao. Tama augwali aselama, augwaligo te Genuai Bidi Jisasgo nogide te bidi tigiba te wel muagasiyu, tama Godigo te gasi sai bidi tau somainu augwaligo Godibolo gedu haluasa po hanalu waibao.ⁿ ¹⁵ Tama augwaligo Godibolo te konealubo po mu daq olama gedu haluasa po weyu da, te Genuai Bidigo te gasi bidigo gasi usu ilama ma hodolaibao. Tama te gasi bidi agai dwai se meba yaibaso da, te Genuai Bidigo te dwai se tigidali sela sqaibao. ¹⁶ Tama tibaso, dagego duga dwai se yali te duga ama dabebolo pusao, te duga hasi tau somainogo Godibolo te po hanalu wao, te God agai dage dwagi yai ma usu ilemainogo yao. Tama tiyu, te doloba pai bidigo gedu haluasa po wabode bomo elaluyu, tama agai te gedu haluasa po wabogo te we bidi tau sabo se ebo usu yaibao. ¹⁷ Te

¹ 5:11 Jop 1:21-22; 2:10; Tib 103:8 ^m 5:12 Mat 5:34-37 ⁿ 5:14 Mak 6:13

polobadu bidai bidi nogi Elaija aga doloba pai bidi bidiyu, tama agai gedu haluasa po wabode bomo elaluali. Tama agai Godigo nosali yabo sę po augwalibolo pusuyu bidai. Tiali goli Elaija aga te da tiwai bidi bidai. Tama bidiyu, agai Godibolo gedu haluasa po bomonama wai, te tulubage tuluidali weyu, tama te tulubage dagalude tulisiąbadi kibu be sela olama, tama te polua a naga olama, me badu nogo deli olo bidai.^o ¹⁸Tama nosali agai Godibolo po ma hanalu obadi, tama dagaludu te tulubage tagala palama, tama tulubage tuluyu, te tqde nai ma holai.^p

Godigo po wali pabo tų tagalobo bidi, te dago ma oda sabo po

¹⁹Eno ama dedeo, dage tomode ama me deli agai te Godigo mu po tagalobaso da, tama ama me bidigo te ama ma oda siyu da, ²⁰tama te gasa bidi ma oda sali ama agai koneama te homu yao: tama te bidi mego te dwai sę yali bidi tau siyu, tama te dwai sę yali bidi agai te dwai sę ebo tų tagalama tama te bidi God pageba ma asobaso da, te bidigo te dwai sę yali bidigo mobo ma sai, tama te bidi agai te dwai sę eyu te dwai sego aga ela mugobeo. Te dwai sę yali bidi tau sabo kolesagade Godigo te dwai sę ebo bidigo dwai sę hauwa sela sawaibao. Te tama dao.^q

^o 5:17 1 Kin 17:1; 18:1 ^p 5:18 1 Kin 18:42-45 ^q 5:20 Prs 10:12; 1 Pi 4:8

Pitago Hasia Pas Deli Aşəni

Hasia nedebo tau sabo po

Te bidi Jisas wali pali bidi nogo si olama saqago si bidi dabe tomode te bidi Pita bidali. Tama te bidi Pita nosali te Kraisgo po wali pabo we bidi hani dabe tomode te genuai bidi pedalali. Tama agai e pas te digibulu moni tə pedai a naga tede bidali Godigo we bidi hani augwalibolo aşəna tolali. Magi baso meni, te sogo te Rom gavman me, te haniani olo we bidi me, augwali tigidaligo te Kraisgo po wali pali we bidibolo genuai seğə dali dene dali mayu bidali. Tama tibaso, te bidi Pitago homugo agai te augwali homu hodolobo bomo mabo po augwalibolo pusa mawaibao. Augwaligo te haniani seğə tolobadi, tama augwa hasi dali yabo kolesaga me, te gasa we bidi dali yabo kolesaga me, te gavman dali yabo kolesaga me, te tigidalide Pitago augwalibolo te tau sabo po e pas tomode aşənama tama tolali.

**Da te Godigo hani we bidi mu pedelai baso, tama dago te
wiegi yai kolesaga dabe eyu, te dago dwagi yai nai dabe
saiba homu eyu tonaluinao**

(Dqj 1:1–2:10)

1 ¹Ena da Pita da, te Jisas Kraisgo tagala palai bidi me deli dao. Tama te dage haniani gasa tedali bulude bidibo we bidibolo eno e pas aşəna tolobao. Dage meba te moni tə nogi Pontus tede bidibao, meba te moni tə Galesiade me, meba te moni tə Kapadosiade me bidibo, meba te moni tə Esiade me bidibao, meba te moni tə nogi Bitiniade me, dage te təde bidalubo, tede osogo bidibo we bidi tiwai bidibao. ²Dago Aya God agai dage polobadu mu konebaso, agai dage hagea sai dao. Tama agai Mobo Bidigo dage doloba pai mu iliyu, tama dage wiegi yai kolesaga naga eyu bididuyu tama dage Jisas Kraisgo po odoyu, agai aga kanemego dagego yali dwai sə sela şəmainogo, God agai dage koneyu polobadu hagea sai dao. Tama eno homugo God agai olo tau sabo kolesaga dage dali genuai mu elama, tama dage bugagia mu bida.

³Te dago dena Genuai Bidi Jisas Kraisgo Aya God aga nogi dago ugwaba sinao. Agai da moni homu dene mu eyu, tama da tau somainogo, agai Jisas Krais te isai bidi dabe bidibo digi tomodu ma hodolali. Tebogo dabolo te gesi noma ula mawai. Tama menama, da dwagi yai homu eyu, bugagia tonaluyu bidalubao. ⁴Aga bidibo digi dage maiabo nai agai dagala munama, megi bugagia tonalubo dao. Tama agai dagebolo maiabo nai te gamonabo nai dao, te dwai səgo dolisiəbo nai dao, te nai munu me mobia pogobeo. ⁵Tama dagego duga homu tigidali te Krais agaba mubaso, God agai bomogo dage bugagia tonalubao. Tama nosali te tigidali nai silabo bodolu mani sogo pedalobo si, agai te we bidi ma dobola sabo kolesaga polobadu sisi ela muani te sogo waselaibao. Tama tibaso, megi agai dage bugagia tonalubao.

⁶Tama agai dage dali te sə ebode dage moni dwagi yai homu mu ebo dao. Godigo te dage usu sabo sə pedalama gogolama, tama dage homu osogo dene eba. Tiali digi, dage moni dwagi yai homu mu ebo dao.

⁷Tama te haniani dene mabo sə augwaligo page elalubao. Dage duga homu tigidali Godiba muani sə, te sə usu somainogo te dene mabo sə dageba pedalobo dao. Eno megi te wiegi yai kapa nogi gol te naide po digi po begelama obao. Augwaligo te kapa gol te təde diganama, tama te dwai nai sela səwainogo augwaligo te gol siade ulubo dao. Siago uludama, tama nosali te wiegi yai kapa gol naga pedalama, augwaligo saibao. Tama te gol te osogo wiegi yai nai dao, te təde elalubo nai dao, tama nosali te nai mu dolaibao. Tiali goli dagego duga homu tigidali Godiba mubo sə te wiegi yai mu dao, tebogo te kapa gol aiyaba elalubo dao. Tialigo da, dagego konealubo po dəq wabo kolesaga usu selama, tama usu baso, te Jisas Krais aga ma asobo hanilabo sogode te Godigo dagego nogi ugwaba mu siyu, dagebolo dwagi yai genuai nogi mawaibao. ⁸Tama dagego duga gedugo aga munu me susiawai digi, dagego Kraisde dwagi yai homu eyu godolo ebo dao. Dagego megi me aga susiəbadi digi, dagego duga homu tigidali agaba muyu, tama wiegi yai homu mu ebo dao. Tebogo te tigidali gasagi yai dwagi yai homu ebo aiyaba elalubo dao. Tama te dagego wiegi yai homu ebo te genuai mu dao, augwaligo Godigo bidibo digide ebo wiegi yai homu ebo sabi si dao. Tama tialigo da, dagego pedauwaligo tede po wabo usu egobeo. ⁹Tama God agai dage ma dobola saibao homu eyu, megi dagego Krais susiəbadi digi dagego duga homu tigidali agaba muyu, tama God agai dage ma dobola sabo sə eyu bididubao.

¹⁰Te Godigo dage ma dobola sabo sə, polobadu mu te səde te Godigo nosali yabo sə po pusabo profet bidi dabe augwaligo te səde bomo eyu osola suali, te sə pagede dua dua eyu hanalu wali, augwaligo te sə page kuna konemainogo yai. ¹¹Tama Kraisgo Mobo Bidi agai augwaligo homu tomode hanilama, te po widu geai, “Te Godigo sa muani nosali asaibao

wali bidi Krais agai dene selama, tama nosali agai te genuai bomo yai ula me saibao,” te po wai. Tama augwaligo te pode homu konea peyu, te po hanalu wai, “Te sə nisu pedalaibawe, mena side pedalaibawe?” te po wai.¹² Augwaligo te po hanalu wali digi, tama God agai augwalibolo waselama, tama augwaligo koneai, augwaligo po pusubo səgo augwa digi tau sabo sə meni, te dage nosali bidabo we bidi tau sabo sə dao. Tama augwaligo te sə eyu, augwaligo te polobadu sogo mu pusali po dagego tamadi odali. God agai aga Tedali Mobo Bidi aba tagala palama, tama agai gasa bidi dabe tau siyu, augwaligo Godigo dwagi yai po dagebolo pusagasasai. Tama te səde te Godigo dagalude sə ebo ensel bidi dabe augwaligo bomo eyu, te sə page kuna koneaio homu ebo dao.

¹³ Te God agai dage dali te sə yaligo da, te bidi me sə yai hagede aga ugwa sugwa sabo tiwai, dagego duga homu bugagia dodola selama dą̄ wao. Tama dage deli deli duga digi bugagia tonaluao, te homu kənai we bidi bidao. Tama te Jisas Krais aga asobo hanilabo sogo agai dagebolo te wiegi yai olo tau sabo sə mawaibao. Dagego tede duga homu bugagia dą̄ olama, dwagi yai homu eyu tonaluao.

¹⁴ Dage Godigo po wali pabo we bidi bidibaso, dagego God konesiąbadi polobadu yali dwai dwai kolesaga wali ma pigimio. ¹⁵ Te menio. Te dage i wali God aga da, te tedali mu doloba pai bidi bidibaso, dage me tigidali kolesagade mu doloba pai we bidi bidao. ¹⁶ Magi baso meni. Te Godigo bukude e po aşeanı, “Ena tedali mu doloba pai bidi bidibaso, teda dage tedali mu doloba pai we bidi bidao.”^a

¹⁷ Tama nogi yai bidi dali, nogi meni yai bidi dari God agai po tū ebo sogode dagalama egobeo. Te meni. God agai we bidi po tū eyu osola subo si, agai augwaligo yali sə naga osola subo dao. Tama tibaso, dagego agade dago Aya waligo da, teda dage e tōde osogo bidibadi, agade wi eyu aga dologode bidao. ¹⁸ Magi baso meni. Dagego wājigo dagebolo polobadu ola mani bidabo kolesaga te usu isiąbo kolesaga dao. Tama dagego koneai, God agai dage te usu isiąbo kolesagade ma dobola siyu, agai te mobi elama damua pabo nai mego agai dage ma abela sabeo, te dila pai kapa si nogi gol dari silva dari si, te tobage gamonasiąbo naigo dage ma sabeo. ¹⁹ Te meni. Te Kraisgo kanemego agai dage abelama, tama ma dobola selama, tama megı dage olo mu bidibao. Tama aga kaneme te dila pai nai mu dao. Krais aga te wiegi yai kibu sipsip wai tiwai bidali, te sipsip wai aga tigi dwai naigo doloyu husugu yai digi te menio, te Godibolo te ofa mabo sipsip usu dao. ²⁰ Tama God agai e tō nigisiąbadi, polobadu mu agai aga koneama tama te sə yabode sa muani. Me ma megı e nosali sogo agai aga dage tobade waselai dao. ²¹ Tama tiyu, Godigo aga te ḡu pagede ma hodolama, agabolo genuai ula yai nogi mawai dao. Tama tiwai ebaso,

^a 1:16 Prs 11:44-45; 19:2

agadu dagego duga homu tigidali Godiba muyu agade mu dą̄ wali. Tama duga homu tigidali Godiba munama, tama agai dage dali wiegi yai sę yabo sogo dagego dwagi yai homu eyu tonalubo dao.

²² Te dagego Godigo wiegi yai mu po bugagia wali peyu tama duga homu kolesagade elaluali dwai kolesaga sela sənama, tama dagego duga hasi we bidide dwagi yai homu ebo gagalali. Tama tiyu, megi dage bomo eyu, homu mu elaluyu duga hasi godolo mu yao. ²³ Awe, duga hasi godolo mu yao. Magi baso meni. Dagego te gesi noma bidabo ula sai dao. Tama te dagebolo te gesi noma bidabo ula mani nai te gamonasiąbo nai menio, te gamonabo nai mu dao, te Godigo bidabo ula mabo bidada peyu, bidada pabo po, te pogo dagebolo te gesi noma bidabo ula mawai dao. ²⁴ Tama Godigo pode te bukude aşeṇi po me deli e dao, “Te tigidali we bidi osogo naga bidibo dao, te noswai tiwai. Tama augwaligo genuai nogi me te osogo naga elalubo dao, te noswai aga duduli tiwai. Te noswai holama, sasia peyu, aga duduli me tegasa dulaibao. ²⁵ Tiali goli te Genuai Bidigo po bidada peyu, bidada pabo dao,” te po aşeṇi. Tama te po da, te augwaligo dagebolo pusagasali wiegi yai gesi po dao.^b

2 ¹Tama God agai dage te gesi noma bidabo ula mobaso, dagego te gasa bidi dabe dene mabo kolesaga tigidali tagalama, sela sayao. Tigidali tibo kolesaga dali, te ugwidu homugo tibo po wabo kolesaga dali, te si tagalao. Tama gasa bidigo doado bage me, te agai ebo sę dali sigo dage aiyaba elaluyu, tama tibaso dagego te bidi aga dali dwai homu elama tama aga dali sębę egio. Te gasa we bidi nogi posobo po weyu ebo, te kolesaga me dagego tagalao. ²Te tobage dwai sę egimio. Te menio. Te tamadi ame nani wai boqı̄ aga bomo eyu, te ame pę naga tuabo homu ebo dao. Tama dagego homu te wai boqo homu ebo tiwai gilama, dagego Godigo po naga sao, te gasa po dali talusiąwai po dao. Te po naga sao. Tama tiyu, dage bugagia holoyu bidaø, te God agai dage ma dobola sabo sę silabo sogo tonaluaø. ³Tama dagego te Genuai Bidigo dage dali ebo dwagi yai sę sulama koneai dao.^c

Genuai Bidi aga te bidabo ula elalubo genuai masigi tiwai dao

⁴ Te eno megi te bede po digi po begelama obao. Dage te dago Genuai Bidi Krais aga pageba asiao. Aga da te bidabo ula elalubo masigi tiwai dao. Tama bidi dabe augwaligo agade ‘Te olo masigi dao’ homu eyu, aga sela səwai goli, te Godigo gedude aga da te wiegi yai masigi mu dao, te Godigo aga deli hagea sali. ⁵Tama bidi me deligo aga bidabo be te masigigo sę ebo tiwai te Godigo dage aga we bidi hani ilibo dao. Tama tiyu, dage tedali gasagi yai magi sę isiąwai we bidi hani bidaibao, te pris bidi hani tiwai. Tama te pris bidi dabe

^b 1:25 Ais 40:6-8 ^c 2:3 Tib 34:8

augwaligo Godibolo dwagi yai nai ula mabo sé eyu, tama agabolo ofa nai mabo dao. Tama tede Godigo dwagi yai homu ebo dao. Tama te tiwai me Krais agai dage tau selama, dagego Godigo homu wali peyu dwagi yai sé yaibao. Tama dagego te dwagi yai sé te tiwai ebaso, God agai te dagego ebo sède dwagi yai homu yaibao. ⁶Te eno po digi po begelama wali pode, te Godigo po bukude te Godigo wali po te bidi me deligo tama aşeani,

“Odiqo. Te eno masigi dabego te be nigliyu, tama eno te wiegi yai dila pai masigi me deli selama, tama ‘Te be bugagia däq wabo masigi dao’ weyu, eno te dila pai masigi te sëba däj ilali elalubao, te bulu nogi Saion tede munalubao. Tama bidigo aga homu tigidali agaba mubaso da, te bidi hale munu me egobeo,”^d

te po aşeani. ⁷Tama dage duga homu tigidali agaba muani bage, te dagego gedude te aga wiegi yai mu da. Tiali goli te agaba augwaligo homu musiąwai bage, augwalide te bukude aşeani po tama dao,

“Te be sé ebo bagego polobadu sela sawanı masigi, te masigi megı te bede te genuai nogi elalubo masigi pedalai dao.”^e

te po aşeani.

⁸Tama te bukude aşeani po me dao,

“E masigi da, te we bidi augwali saçqı dani tıqbo masigi dao, te augwali te tqba tula muabo genuai masigi dao.”^f

Tama augwaligo Godigo poba augwa homu tigidali musiąboso, tama augwali tulalubo dao. Te God agai polobadu augwali te sëba muani.

⁹Me ma, dage da, dage te sa muani we bidi hani dao. Bidi meba augwali te we bidi dali, God dali tomode bidiyu, tama pris bidi sé eyu, augwaligo Godibolo te dwagi yai nai ula mabo sé ebo dao. Tama te tiwai dagego me te dago genuai tuni bidigo sé ebo dao. Dage da, te tedali gasagi yai doloba pai we bidi hani dao, God aga we bidi hani mu te dage dao. Tama agai dage i olama, tama dage te hulia sai bidibo digi tagalama, tama agai wiegi yai ula yai buluba bidagasai dao. Tama dagego agai yali wiegi yai sède po te gasa we bidibolo pusumainogo te agai dage sa muani.^g ¹⁰Polobadu dage we bidi hani meni yai goli, megı dage te Godigo we bidi hani dao. Polobadu dage agai homu dene eyu tau sisiąwai goli, megı dage agai homu dene eyu tau sai dao.^h

^d 2:6 Ais 28:16 ^e 2:7 Tib 118:22 ^f 2:8 Ais 8:14-15 ^g 2:9 Sai 19:5; Bom 4:20; 7:6; 14:2; Tai 2:14 ^h 2:10 Hos 2:23

**Da te gasa we bidi tomode bidu te doloba
pai kolesaga naga inao**

(Dqj 2:11–3:22)

¹¹ Eno abagi dede mu, eno dage tau somainogo bomo eyu e po dagebolo obao. Dage da e tøba tamadi tama asai osogo bidibo we bidi dao. Tama tibaso, dago tigigo e tøde ebo dwai dwai së egimio. Te tobage dwai së dabe augwaligo da aiyaba elaluai hagede da dali hwïbo dao. ¹² Tama dage te God konesiąwai we bidi tomode bidiyu, tama dwagi yai kolesaga naga yao. Magi baso meni. Augwaligo dage dali nogi posobo po weyu, “Dage dwai së ebo we bidi dao,” po weyu da, teda augwaligo dagego dwagi yai së naga ebo sulama, tama nosali te Godigo po tu yagasabo sogo asobo si augwaligo aga nogi ugwbaba siyu te po waibao, “Ao, agai po wali pabo we bidi augwaligo dwagi yai së yalio.”

¹³ Te augwaligo gedude te dago Genuai Bidigo nogi tulaluidali weyu, augwali tigidali tuni bidi dologode dage bida, augwaligo po wali pao. Tama tiyu, tama te genuai gavman tuni bidi dologode bidiyu agai wabo po odiäo. ¹⁴ Tama te tuni bidi agai aga së bugulama, tama te me me tø pedai tonalubo së gasa bidi dabego nogoba muani, te augwaligo te dwai së ebo bage dene mayu, tama te dwagi yai së ebo we bidi nogi ugwbaba somainogo ebo dao. Tama dage augwali me dologode bidiyu, augwaligo po odiäo. ¹⁵ Te Godigo homugo te dage te tuni bidi dabe dologode bidiyu, tama dagego te dwagi yai së naga ebogo te homu kolesaga meni yai bidi dabego kedu meni yai po wabo pedauwali däę̄ waibao. ¹⁶ Tama dage God dali däę̄ olama, tama dage da aga olo së ebo we bidi dao. Tama te dwai së ebo kolesagago dage däę̄ waidali weyu, dage bugagia olo bida. Tiali goli olo bidibadi dagego te homu egimio, ‘Te da olo bidibaso, tama dago dwai së eyu da, te usu dao,’ te homu egio. ¹⁷ Tama dage tigidali bidi dali augwali nogi ugwbaba sabo homu eyu, augwali dologode bida. Godigo we bidi hani dali dwagi yai homu eyu, godolo mu yao. God aga wi eyu, tama aga dologode bida. Te gavman tuni bidi aga nogi ugwbaba muyu, aga dologode bida.

¹⁸ Te dage masigi sisabo së ebo we bidi, te dagebolo së mabo bidi dabe wi eyu, augwali dologode bida. Tama dage te dwagi yai nagamea pai bidi dologode naga bidigobe. Te sesena pai bidi dologode me dage bidiyu, augwaligo po odiäo. ¹⁹ Tama tiyu, te dagego genuai bidi me deli agai dage dali dolo së esiyu, dene mayu da, teda dage Godigo homude homu konea peyu te sëge bugagia tolao. Tama dage tama tiyu da, teda God agai dage dali dwagi yai homu yaibao. ²⁰ Me ma, dage dwai së idu geyu, tama augwaligo nogogo dage elama, tama dagego te sëge bugagia toloyu da, te mena bidigo dagego nogi ugwbaba saibawe? Bidi meni. Tiali goli, me sogo dage dwagi yai së yai goli augwaligo dage dene mawaibao. Tama te sogo

dage nagamea homu eyu, te sęgę bugagia tolomainogo, God agai dage dali dwagi yai homu yaibao.

²¹Tama dagego te sęgę bugagia tolomainogo, God agai dage i wali. Magi baso meni. Krais aga digi dage tobade dene sai. Tama aga tama tiyu, dagebolo te sę page agai bugagia hanilama ola mawai, dage aga tiwai gilama, bugagia pąde wali asomainogo yai. ²²Tama tiyu, agai magi dwai sę munu me ebe, te tibo kolesaga eyu tibo po me deli digi wabeo.ⁱ ²³Augwaligo aga dali dwai dwai po wabo si agai augwali dali dwai po wei ponobe, sagia sai. Tama augwaligo aga dene maidu gebo si, agai te boi bidi homu eyu, po wei munu me ponobeo. Woo. Te menio. Aga te homu yali, ‘God agai te augwaligo ena dali yali sęde te po tų dolo mu yaibao,’ te homu yai. Tama te homu eyu, agai te po tų yabo sę Godigo nogoba maidu geai.^j ²⁴Tama aga digi agai dago yali dwai sę sęgę aga tigigo selama, tama te niba dąu wagi pai. Tama tiyu, agai homugo dago te dwai sę ebo kolesaga tagalaibao, te isai bidigo dwai sę ebo tagalali gilama. Tama dago te dwai sę ebo tagalama, tama dago doloba pai kolesaga naga eyu bidaibao, te me aga homu dao. Tama augwaligo aga tigi doloyu dene mawai, tama tebogo da tau selama dwagi yai ilali.^k ²⁵Tama polobadu dage te kibu sipsip tiwai eyu, augwali tonalubo bidi tagalama tama hagawai digi, megı dage ma geasa asiyu, te dage bugagia tonalubo bidi pageba ma asai dao.^l

We aga bidi dali bidibo po

3 ¹Te da te tigidali tuni bidi dologode bidabo po tama wali peyu, tama dage we dabe sibi dage deli deli duga bidi dologode bidiyu aga po odao. Tama tiyu, te bidi meba augwaligo Godigo dwagi yai po odobo hagela yai digi, augwaligo wego wiegi yai kolesaga ebo suyu, te wego po mobo masiąwai goli te bidi augwa homu begelaibao.^m ²Tama te we dabe augwali Godide wi eyu aga dologode bidibo, te magi dwai sę isiąbo kolesaga te bidi dabe augwaligo subaso da, teda augwaligo homu tululuama, tama Godigo po mu po dao te homu yaibao. ³Tama dage we dabe sibi, dagego duga tigide bulu badu eda badu au ebo sę tede te moni homu egimio. Tama tiyu, duga tobulu nisi dali haniani sę eyu au ego. Te wiegi yai kapa nogi gol tego nigali tigi au yabo nai dali, te wiegi yai bobobage ugwa dabe dali, te tobage naigo duga tigi au eyu tama gasa we bidigo suyu, dage wiegi yai au yai we dao te po omainogo munamuo. Te meni.ⁿ ⁴Te tobage au yabo nai te osogo naga elalubo nai dao. Dagego au yabo nai te gasagi yai mu dao. Te dagego homu kolesaga tomode geme dualali au yabo gasagi yai nai mu tedali elalubo dao. Tama dage nagamea

ⁱ 2:22 Ais 53:9 ^j 2:23 Ais 53:7 ^k 2:24 Ais 53:5 ^l 2:25 Ais 53:6 ^m 3:1 Ef 5:22; Kol 3:18

ⁿ 3:3 1 Ti 2:9

pai homu eyu, dua bidabo kolesaga elalubaso, teda te gamonabo au yabo nai mu dao, tama Godigo gedude te wiegi yai dila pai nai mu dao.⁵ Te polobadu bidai we dabe sibi augwali te tama tiwai bidai dao. Augwali dwagi yai homu eyu, God agai augwali dali dwagi yai sę ebo sogo bugagia tonaluali. Tama tiyu, augwali nagamea pai homu eyu dua bidabo kolesaga ebadi, augwali deli deli augwa bidi dologode bidai dao.⁶ Te polobadu mu bidai we nogi Sara agai tama tiyu, tama aga bidi Abraham dali te nage da eno genuai bidi dao weyu, agai wali po bugagia wali pai dao. Tama dage me, dage Sara tiwai dwagi yai sę eyu da, tama te homu wi ilabo naide wi esiąyu da, teda dage me te Sara aga wegí hani mu dao.⁷

⁷Te dage we sai bidi dabe me, dage Godigo we bidi hani dali dwagi yai homu eyu, tama dage deli deli duga we dali tau sabo homu eyu, abagi homu eyu, bugagia bida. Tama dagego koneani, te bidi me aga we me augwali sibolo God agai te bidada peyu, bidada pabo bomo olo mawaibao. Tama dagego augwali bomo genuai meni homu ebadi, te bidi agai aga wego nogi uwabao sao. Bidigo tama tiyu bidibaso da, teda Godigo augwali sigo aga hanalu wabo po odaibao.⁸

Dwagi yai sę yai goli dene sabo po

⁸Te eno po silagasu po obao. Dage tigidali deli homu naga eyu bidiq. Tama teyu, hobede eyu, te dage Godigo hani we bidi bidiyu, duga hasi dwagi yai homu eyu godolo mu yao. Tigidali we bidi dali homu dene eyu, tama nagamea pai homu ebadi bida. ⁹Bidi mego dage dali dwai sę ebo si, tama dagego dwai sę eyu ma wei ponogio. Ma, bidi mego dage dali dwai dwai po wabo si, dagego te dwai po me weyu wei ponogio. Te menio. Dagego God hanalu wabo po wao, agai augwali dali dwagi yai sę emainogo yao. Te God agai dagego te tobage sę emainogo dage i wali dao, tama nosali agai dagebolo dwagi yai kolesaga mu yaibao. ¹⁰Magi baso meni. Te polobadu mu bidi mego e po asçani,

“Niwai bidi agai homu ‘Ena dwagi yai homu eyu, tigidali sogo bugagia bidaio,’ te homu agai eyu da, teda agai dwai po olamuo, te we bidi dene maiabo tibo po wagio. ¹¹Me ma, agai dwai sę tudiba muao, te dwagi yai sę naga yao. Tama agai bomo eyu, te gasa we bidi dali bugagia bidabo sunumi gegegi pao, tama sulama aga te sunumi wali bugagia pao.

¹²Magi basowe? Te Genuai Bidi God aga gedugo te doloba pai we bidi dabe augwali bugagia tonaluyu, augwali dali dwagi yai homu ebadi, tama agai augwaligo hanalu wabo po odoyu, wei ponobo dao.

[°] 3:6 Gag 18:12 ^P 3:7 Ef 5:25; Kol 3:19

Tialima, te dwai sę ebo bage dali agai te boi bidi
homu ebo dao.”^q

¹³Te dage bomo eyu, tama te dwagi yai sę yabo homu dąu weyu da, teda tego dagebolo dene mawaibawe? Woo, te tobage sę ebo bidi hauwa meni. ¹⁴Tialima dagego te doloba pai sę yai goli te gasa bidi dabe augwaligo dage dene me sogo mayu da, teda God agai dage dali dwagi yai homu eyu dwagi yai kolesaga dage dali yaibao. Tama tibaso, dage augwalide wi egio, te augwaligo dage dali ebo sęde me dage moni homu egimio. ¹⁵Te meni. Dage duga homugo “Krais aga da, dago Genuai Bidi mu dao” homu eyu, aga dologode mu bidao. Tama teyu, dagego duga homu hasia bugagia dodolama, tama me sogo bidi mego dagego Kraisde konealubo po page hanalu obaso da, dagego agabolo te konealubo po page bugagia ola mao.^r ¹⁶Tialima, te po page agabolo ola mobadi dagego wado po wagio. Te meni. Dage te nagamea pai homu kolesaga elama, tama aga dologode bidiyu, te konealubo po page agabolo ola mao. Tama timainogo dage te doloba pai kolesaga naga yao. Tama dagego tama tiyu da, te bidi meba augwaligo dage dali nogi posobo po weyu, tama dage Krais aga hani we bidigo ebo dwagi yai sęde augwaligo ‘Te dwai sę dao’ po wabo bage, nosali augwaligo koneaibao, te pode augwaligo mu gedä muani. Tama te koneama tama augwali ge neyu hale mu yaibao. ¹⁷Tama dago dwagi yai sę naga yai goli, tama God agai “Awe” weyu, te bidi dabe augwaligo dabolo dene mayu da, te usu dao. Tialima dago dwai sę elama tama augwaligo da dene mayu da, teda te dwali dao.

¹⁸Magi baso meni. Te Krais aga digi agai dago yali dwai sę sęgę selä şamainogo aga deli sogo naga isali. Tama aga te doloba pai bidi mu bidai goli, tama agai da doloba pisławai bage te God pageba sesimainogo agai da tobade dene sali. Bidi dabe augwaligo aga tigi isilali. Me ma Godigo Mobo Bidigo Krais bidimainogo ma hodolali. ¹⁹Tama te sogo Krais aga mobo bidigo te isali bagego noma bidi dabe kalabuside bidalubo madiba aga teba pelama, tama agai aga po augwalibolo pusali. ²⁰Tama polobadu mu te bage augwali e tode bidibadi augwaligo Godigo po odobo hagela yai dao. Tama te sogo polobadu mu te bidi nogi Noa aga e tode bidiyu, tama Noa agai te moni geba nigibadi te sogo Godigo te dwai sę yali we bidi dali sębę polo isiąbadi tonaluali. Tama te moni geba nigibo sę silama, tama te we bidi isilabo moni aji asali sogo, te we bidi hauwa te geba tomoba pelama bugagia bidibeo. Woo, te we bidi a naga olama me nogo selä naga augwali te sipde bidibadi te aqdu selä bilama tama bugagia bidaligo sana pali. Tama tebogo Godigo augwali te aqgo tau siyu ma dobola sali.^s ²¹Tama te aji te augwaligo dage baptais mani aji tiwai dao. Tama Jisas Krais aga te gü pagede ma hodalobaso, Godigo te baptais

^q 3:12 Tib 34:12-16 ^r 3:15 Ais 8:12-13 ^s 3:20 Gag 6:1-7:24

mani aqigo dage tau siyu ma dobola sali. Te aqigo te dagego tigide elalubo meda sela savy, tama dage tau siyu ma dobola sabo menio. Te meni. Te dagego te doloba pisiąwai sę idali weyu, tama dagego Godibolo te da tau sao po weyu, tama augwaligo dage baptais mawai dao. Tama te tiwai ebogo dage tau siyu ma dobola sabo dao. ²²Tama te Jisas Krais aga te gę pagede ma hodolama, tama Godigo dagalude bidibo madiba sabolama tama genuai nogi sobaso, aga te Godigo dolo nogo badu megi bidibao. Tama aga tede bidiyu, tama ensel mobo bidi dabe tigidali dali, te nomá bidi tuni bidi dabe dali, te bomo yai nomá bidi dabe dali, augwali tigidali Krais aga dologode bidibo dao.

Genuai usu sabo sę te Godigo po wali pabo we bidi dabeba pedelama augwali te sęgę tolali

(Daq 4-5)

4 ¹Te bidi Krais aga tigide dene saligo da, teda dage bomo siyu bugagia bidimainogo eyu, dagego agai yali homu kolesaga tiwai gilama yao. Magi baso meni. Niwai bidi agai dwagi yai sę yali goli aga dene siyu da, te bidi agai te dwai sę ebo tagalai dao. ²Tama tiyu aga e tqde bidibo sogo tigidali agai e tqde we bidigo yabo dwai dwai kolesaga munu me egobeo. Te meni. Agai te Godigo homu naga wali peyu bidaibao. ³Tama polobadu te dagego te tqde bidibo we bidigo ebo dwai dwai sę hauwa sogo yai dao. Tama tiyu, dagego te penani ebo sę te we bidi gabidide hania idu geai dao. Tama dagego te dwai meda yai penani yabo homu eyu, tama te bomai aq tulama te polobo bidi tiwai idu geai dao. Tama tiyu, te moni nai hauwa mu nogelama, te nai daa mu te ma tuyu, ma tuyu ela pedubadi, tama dagego te bomai aq subigila tuyu, te polobo bidi tiwai pedaluyu, tama dwai sę eyu bidai dao. Tama dagego te tibo god augwalibolo lotu po weyu tama augwaligo dage tau somainogo te dagego te dwai dwai penani ebo sę te polobadu idu geai dao. ⁴Tiali goli megi te dagego polobadu abagi dabe augwaligo dagede nomá siyu bidibao. Dage augwali dali kisasa biliyu, tama bomo eyu, te haniani dwai dwai sę ela bilisabaso, tama augwali nomá siyu, dage dali te nogi posobo dwai po augwaligo wabo dao. ⁵Tialima, te po tų dodolobo bidi Krais aga tamadi asobo si, te agai te polobadu isali we bidi dali, te me bidibo we bidi dali si augwali tigidali dali agai te moni po tų yaibao. Tama te sogo te dage dali dwai po wabo bage augwaligo te bidibolo te nogi posobo dwai po wali po page pusulama, te pode te augwali dene saibao. ⁶Tama te Krais agai te isali we bidi dali me te po tų ebo sisi yai elaluyu, tama agai te polobadu isai we bidi dali me te Godigo gesi dwagi yai po pusigi pai. Magi basowe? Te God agai augwali osola sulama, tama augwali isali, te tigidali tqde bidibo we bidi tiwai. Tama augwaligo tigi isali goli,

augwaligo noma bidi te God tiwai bidimainogo Krais agai augwalibolo te Godigo po pusigi pai.

⁷Te tigidali nai silabo sogo te paba yagasobao. Tama tibaso, dage te homu nagamea pai we bidi bidao, te dage God dali te hanalu wabo po gisiga omainogo te dagego duga homu bugagia tonaluyu bidao. ⁸Tama dagego genuai hasia yabo se e dao, te dage bomo eyu, te duga hasi te dwagi yai homu eyu godolo mu yao. Tama te we bidi godolo mu ebo kolesaga, te tebogo te augwaligo ebo dwai se sula tagalabo kolesaga dao.^t ⁹Tama tibaso te kolesaga yao. Tama te kolesaga eyu, te dwagi yai homu eyu, tama duga hasi dage deli deligo te gasa we bidi dali te nai gesobo se yao. ¹⁰Tama God agai te dage deli delibolo te haniani tau sabo homu kolesaga olo mena mena pai dao. Agai tama tialigo da, dage deli deligo te olo mani homu kolesaga ebogo gasa we bidi tau sao. Tama dagego tama tiyu da, teda dage te Godigo olo mani tau sabo homu kolesaga bugagia tonalubo we bidi mu bidaibao. ¹¹Tama dage deli deligo te haniani se eyu, tama te po ola mabo bidi agai te Godigo po ola mao. Tama te gasa we bidi tigi tau sabo se yabo bidi me, agai te Godigo agabolo mabo bomogo te se yao. Tama te tiwai yao, tama dage Jisas Kraisde wadolama, tama tigidali sede Godigo nogi ugwaba somainogo te tiwai yao. Te God aga te moni ula yai nogi dali, te tigidali nai tonalubo bomo dali si te sesemanee sogo elalua peyu, elalua paibao. Te tiwai emainao. Mu dao.

¹²Eno abagi mu dede, te dageba te dwai usu sabo sogo megi pedalobo. Tama te sede te gasagi yai konesiabo se dao homu eyu, dagego noma sigimio. Woo, te menio. ¹³Dagego te Krais aga dene sali tiwai te dagede me te dene tolobo se meba megi tama siyu eboso, tama dage dwagi yai homu yao. Tama nosali aga ma asobo si, aga bomo yai ula te sogo hanilibo si, te dagego aga dene meba ede sobaso tama dage te sogo me te didibili eyu moni dwagi yai homu yaibao. ¹⁴Tama dage Krais wali pobaso augwaligo dage dali te nogi posobo dwai po weyu da, teda dage dwagi yai homu yao, God aga moni ula yai Mobo Bidi aga dage dali bugagia bidibaso. ¹⁵Me ma, dage tomode bidi me deli agai te bidi ela mubo se, ma te nai wi sabo se te si ilamu, te tobage se ebode dene sigio. Dagego dwai se eboso dene sigimio. Ma, te kolesaga hagoma eyu, gasa bidi dabe dali augwali tonalubo bidigo po weyu bidigio. Te tobage se ebode me te dene sigimio. ¹⁶Tiali ma dage te Godigo po wali pabo we bidi bidibaso tama tede augwaligo dage dene mayu da, teda dage hale ilamu. Woo, te menio. Dagego te nogi te Godigo po wali pabo we bidi nogi elalubaso te Godigo nogi ugwaba siyu, nage usu da po agabolo wao.

¹⁷Magi baso meni. Te Godigo we bidi osola subo bodolu mani sogo paba yagasai dao, tama agai te aga hani we bidi dali te osola suyu, te

^t 4:8 Prs 10:12

po tū ebo sē gagalaibao. Tama da, te da Godigo po wali pabo we bidi hani dao. Tialima God agai te po tū dodolobo sē gagalainogo eyu, tama hasia bolo agai te da aga hani we bidi dali te sē yaibao. Tama tibaso da, te Godigo gesi dwagi yai po odobo hagela yai we bidi dabe, nosali agai augwali dali te po tū ebo si, te augwaligo genuai dene mu saibao. ¹⁸Tama te aseani po tiwai,

“Te doloba pai bidi, te tobage bidi Godigo agabolo
dene hasia mayu, tama nosali God agai te bidi
ma dobola sabo dao. Tama te doloba pai bidi dali
tama tialigo da, teda te Godigo po sela sāyu dwai
sē yali bidi te aga dali te Godigo magi yaibawē?”^u

te po aseani. ¹⁹Tama tibaso, God agai “Awe” weyu, tama dage dene siyu da, teda dagego dwagi yai sē naga ebogo dagego duga digi God nogoba muao. Te God aga digi agai dage nigali, te agai dage tau siyu ma dobola sabo bomo te munu me siligobeo.

5 ¹Tama tibaso, megı eno te dage Godigo hani we bidi tonalubo
bidi dabe dali e homu kēna sabo po obao. Ena digi me ena da te
Godigo hani we bidi tonalubo bidi dao, te dage tiwai. Tama eno gedugo
Krais aga dene sabo suai bidi dao. Tama aga ma asiyu, tama aga bomo
yai ula pedalobo si, te sogo ena te bomo yai ula meba sabo bidi me
bidaibao. ²Tama te homu kēna sabo po e dao: te kibu sipsip tonalubo
bidi agai te kibu sipsip bugagia tonalubogia tama dagego te Godigo
dagego nogoba muani we bidi bugagia tonaluao. Tama te sēde augwali
tonalubo hagela homu eyu tama tonalugio. Woo, te menio. Dwagi yai
homu naga eyu, dagego augwali bugagia tonaluao. Tama dagego te
masigi naga somainogo te sē egimio. Te menio. Dagego homu mu bomo
eyu, te augwali tau somainogo te sē yao.^v ³Tama kolesaga hagoma elama,
tama dwai homu eyu te Godigo dagego nogoba muani we bidi tama
tonalugio. Woo, te dage te dwagi yai sē ebo tūdu polasa pao, te augwali
dage wali asomainu, te kibu sipsip augwali te augwali tonalubo bidi wali
pomainogo aga polasa pabo tiwai gilama yao. ⁴Tama dage te kibu sipsip
tonalubo bidi dabe tiwai bidiyu, tama Krais aga te sipsip tonalubo bidi
dabego tuni bidi mu tiwai dao. Tama aga ma asiyu hanilibo si, te sogo
dagego te bomo yai ula saibao, te bomonama udayu nai sabo bidi agai
te wiegi yai toboli au yabo nai sabo tiwai. Tama agai au yabo nai osogo
elaluyu dolai goli, te dagego sabo bomo yai ula te dolisiaþo nai mu dao.

⁵Te dage gesi bidi dabe, dage me te dolo kolesaga eyu, te tonalubo bidi
dabe dologode bidiyu, augwaligo wabo po bugagia odio. Tama dage we
bidi me, dage tigidali te nagamea pai homu eyu, tama te olo sē ebo we
bidi tiwai bidiyu, dage tomode duga hasi te tau sabo sē yao. Magi baso

^u 4:18 Prs 11:31 ^v 5:2 Jon 21:15-17

meni, te Godigo po bukude te nagamea pai homu ebo kolesagade e po elalubao,

“God agai te kolesaga hagoma ebo we bidi dali boi
bidi homu eyu, bomo elama dolalubo dao. Tialima
te nagamea pai homu ebo we bidi dali agai te olo
tau sabo kolesaga ebo dao.”^w

⁶Tama tibaso, te nagamea pai homu eyu, God agai genuai bomo elalubo nogo dologode bidiqo, te agai bodolu mani sogo asobo si agai dage ugwaba somainogo tama bidiqo.^x ⁷Tama bidiyu, tama God agai dagede homu eyu, tama agai dage bugagia tonalubaso te dagego moni homu ebo se tigidali aga nogoba muiqo.

⁸ Te dagego duga homu bugagia dodolao, tama bugagia tonaluao. Te dagego boi bidi Satan aga susa bilibo dao. Te moni hasa nogi laion, te aga nasi baso bomo elama, tama moni hwa olama gaa weyu aga tuabo nai gegeyu bilibo dao. Tama te boi bidi Satan aga te tiwai eyu susa bilibo dao, te dage dolainogo ebo dao. ⁹Tama dagego duga Godide konealubo homu bugagia daq olama, tama dolaluyu te boi bidi sela sayao. Dagego koneani, te augwaligo dage dene mabo tiwai gilama eyu, te gasa bidi dabego te Godigo hani we bidi tigidilibolo te tobage dene mabo dao, te tigidali tqde. ¹⁰Tama dagego te segé osogo tolama, tama God aga digi agai dage sese bugagia ma ilama, tama dage bomo menama, bugagia mu daq waibao. Te God aga da te tigidali wiegi yai olo tau sabo kolesaga page bidi dao, tama agai dage i wali, te dage Krais wali peyu, te Godigo bomo yai gamonabo ula meba dagego somainogo yali. ¹¹Eno homugo te God aga te tigidali nai tonaluabo bomo sesemane sogo elalua peyu, elalua paibao. Te tiwai emainao. Mu dao.

Po silagasus wabo po

¹² Te bidi nogi Sailas agai ena tau siyu, tama eno e pewadage po dagebolo aseña tolobao. Tama eno homu te bidi Sailas da te aga nogoba muani se bugagia tonaluyu se ebo bidi dao. Tama eno e po dagebolo aseyu, tama bomo elama eno dage homu kena sabo po weyu, tama te eno ASEANI po te God agai aga we bidi olo tau sabo kolesaga mu dao. Tama tibaso, te kolesaga bugagia daq olama, tama dolaluyu bidiqo.

¹³ Te Godigo hani we bidi meba augwali te bulu nogi Babilon tede augwali bidibao. Tama Godigo augwali te dage dali te hagea sai dao. Tama te we bidi dabe dali, te eno ogwa tiwai bidibo bidi nogi Mak dali, augwaligo dagebolo te dage bugagia bidao po obao. ¹⁴Tama dage me duga hasi pagea siyu, tama gasa we bidi bugagia bidao po wao. Tama eno homugo te dage Kraisde wadolai we bidi dage tigidali te homu kënasa bugagia bidiqo.

^w 5:5 Pro 3:34 ^x 5:6 Mat 23:12; Luk 14:11; 18:14

Pitago Si Sogo Aseani Pas

Hasia nedebu tau sabo po

Te bidi Pitago koneani, nosali te haniani tibo po ola mabo bage aselama, tama te asobo bagego te tibo po ola mabogo te Kraisgo po wali pali we bidigo ebo kolesaga dolainu yaibao. Tama te tiwai idali weyu, te bidi Pitago e pas tomode te we bidi tau sabo po aseani. Agai homugo augwaligo te bidi Jisas Krais dali, te agai yali se dali, tede homugo bugagia kone palao. Tama eyu augwaligo bomo siyu, tama augwaligo te Godigo po odobo hagela homu ebo bagego wabo dwai po te augwaligo wali pogobeo. Bidi mebago homu te bidi Krais ma asogobeo, te po obaso, te wabo pode mu po wabowe te homu idali weyu, tiali goli Pitago aseani pasde te po weyu, aga mu asaibao po wai. Mu tamao, aga te polo asesa me asogobeo, tiwali goli te page e tiwai elalubao. Godigo homude te da bidi dabe me deli hagaidali homu eba. Agai homugo te tigidali bidi homu begelimanu eba, tama agai te we bidi augwalide dua dua tonalua peyu bidibo dao. Te buku Daj 3:9 tede te po elalubao suao.

**Dago dena te bidibo ula elalubo sogo te dwagi yai
kolesaga dabe ebo bomo elama pedalubo se eyu, tama
dago dwai bidi dabego dwai dwai po sela sayao**

1 ¹Ena da Saimon Pita dao, te bidi Jisas Kraisgo se ebo bidi dao, te ena agai tagala palai bidi me deli dao. Tama eno e pas aseña dagebolo tolobao. Te Jisas Krais aga te dago God dao, te aga da te da ma dobola siyu dwagi yai buluba muabo bidi dao. Tama aga doloba pai bidi mu bidiyu, tama da tigidali dali deli homu naga elama, tama agai te dagebolo te agaba duga homu tigidali muabo kolesaga mawai dao. Tama te dagebolo mani kolesaga te agai dabolo mani kolesaga tiwai si dao, te wiegi yai dila pai kolesaga mu dao. ²Tama eno homugo dagego te God dali, te dago Genuai Bidi Jisas dali si bugagia kuna koneyu, tama tebogo te God agai olo tau sabo kolesaga dage dali genia peyu, tama dage nagamea homu eyu bugagia mu bidimai yaibao.

Godigo augwali hagea siyu, i wai dao

³Te God agai aga bomogo te dabolo te da God tiwai bidibo usu ilabo bomo tigidali mawai dao. Tama agai aga bomo yai ula me, te aga wiegi

yai kolesaga me te dabolo mawainogo agai da i wai. Tama dago aga koneyu, tama tebogo te agai te doloba pai bidabo bomo dabolo mabo dao. ⁴Tama tiyu, agai te polobadu wali maiabo genuai wiegi yai nai dabe dabolo olo mawai dao. Tama agai te nai dabe dabolo magi baso mawai dawe? Te dagego te mani nai dabe selama, tama dage te God konesiąbo we bidigo ebo dwai dwai sę yabo homu tagalama, tama te tobage we bidi dolobo sęde geda selama wi peyu, tama dagego te Godigo doloba pai wiegi yai homu kolesaga somainu, agai te polobadu mawaibao wali maiabo genuai wiegi yai nai dabe dabolo olo mawai dao. ⁵Tama agai da dali tama tibaso, dagego duga homu Godigo poba dąu wabo kolesaga ebadi, te gasa kolesaga me yao, te dwagi yai sę naga ebo kolesaga yao. Te tama eyu, tama dagego Godigo homu konebo kolesaga me yao. ⁶Tama te kolesaga ebadi, te duga digi duga tigi dali homu dali si bugagia tonalubo kolesaga, te me yao. Tama te kolesaga ebadi, e kolesaga me yao, te dagego dene hauwa sogo bugagia tolao. Tama dene bugagia tolobadi, dagego Godigo kolesaga naga dolo mu wali pabo kolesaga yao. ⁷Tama te kolesaga ebadi, te duga hasi abagi dali dwagi yai homu eyu godolo mu ebo kolesaga me yao. Tama tibadi, te tigidali we bidi dali dwagi yai homu eyu godolo mu ebo kolesaga, te me dagego yao. ⁸Tama te tobage homu kolesaga dagego elaluyu, geneniyu da, teda dagego dago Genuai Bidi Jisas Krais bugagia kuna mu koneyu, tama wiegi yai du walaibao. ⁹Tialima te tobage wiegi yai kolesaga esiąbo bidi te gedu widai bidi tiwai dao, aga digibulu tonobo gisiga bugagia susiąbo bidi dao. Tama te bidigo gegeda pai, te Godigo aga polobadu yai dwai sę tigidali sela səwai dao.

¹⁰Eno ama dede, u haniani dwagi yai kolesaga ebode eno po me elalubao. Godigo dage aga sa muyu, tama agai dage i wai dao. Tama agai dage dali yali sę bugagia dąu omainogo te dage bomo eyu, te u haniani dwagi yai kolesaga yao. Dagego tama tiyu da, teda dage munu me tulalugobeo. ¹¹Tama te kolesaga dagego wali peyu da, teda te tų mu dala pelama, tama dage te Jisas Kraisgo we bidi tonalubo bomo dologoba olo bugagia mu peyu tama bidaibao. Aga te dago Genuai Bidi, tama agai da ma sali bidi dao. Tama te agai we bidi tonalubo sę bidada peyu, bidada paibao.

¹²Tama tibaso, dagego te kolesaga page koneyu, tama dagego te mu po selama, tama dage tede bomonama dolaluai goli, eno homugo te eno dagebolo te po widu geaibao. ¹³Eno homugo e kolesaga ebo dolo dao, ena megi e elalubo tigi me bidibadi te eno dagebolo te po ma widu geaibao, te dage homu hodolomainogo yaibao. ¹⁴Tama eno koneani, dwasianu sogo digi te eno e tigi tagalaibao, te dago Genuai Bidi Jisas Krais agai tama tiabo po enabolo pusalio. ¹⁵Tama eno bugagia dua dua eyu te tų nigaibao, tama ena isai digi nosali dagego te po tigidali sogo dagego homugo ma koneaibao.

Dago suali, Godigo ula yai bomo Kraisde bidai

¹⁶ Te dago dagebolo te dago Genuai Bidi Jisas Kraisgo bomo dali, aga nosali ma asobo po dali, te po si polobadu ola mobadi yaide, te dago te bidi me aga homugo naga olo nigali po wali pelama, tama dagebolo te Kraisgo po ola mabeo. Woo, te menio. Dago suali, Godigo genuai ula dali bomo dali te dago gedugo suai. ¹⁷Tama da aga dali bidibadi te aga Aya Godigo aga nogi ugwaba siyu, tama te wiegi yai ula agaba mawai. God aga te hasia polalubo dagalu ulade bidiyu, agai te po wali, tama te dagaludu wali po Kraisba dulama te po wai, “Te eno ogwa dao, eno aga godolo mu eyu, tama eno homu wiegi yai aga dali mu ebao.” ¹⁸Da aga dali te tedali bulu dude bidibadi, tama te po dagaludu asiyu wabo po odai dao.^a

¹⁹Tama tibaso, dago te Godigo po odolama we bidibolo pusali bidi dabego polobadu wali poba dena homu te poba dą̄ wabo dao. Tama te tiwai gilama tama dagego me augwaligo wali po bomonama dą̄ ola siyu da, te wiegi yai yaibao. Te Godigo po pusali bidi profet bagego po te be hulia sai madide te lam sole ula elalubo tiwai dao. Tama dagego te profet bagego po bugagia odao, tama te po ododubadi te be posainu ebode tama te genuai ula elalubo hq pedalugulama tama te hogo ula te dagego homu tomode ula elaluabao. Te sogo asobo tonalubadi, dagego te profet bagego po bugagia odiqo. ²⁰Tiali goli hasia dagego te bugagia koneao, bidi mego aga digi aga homu wali peyu, te bukude elalubo profet bagego po me deli te page pusugobeo. Te aga usu egobeo. ²¹Magi basowe? Polobadu bidi me deli aga homugo digi te Godigo po pusubo profet dabego wabo po munu me pedalobeo. Menio. Godigo Mobo Bidi aga digi te bidi dabe homu hodolobaso, tama augwaligo te Godigo augwalibolo mani po pusai dao.

Tibo profet bidi dabe augwaligo ebo dwai kolesaga po

2 ¹Tiali goli polobadu te tibo po wabo profet bidi dabe meba te Israel dabe tomode pedalai. Tama tialima te tibo po wabo tisa bidi dabe meba augwali te dage tomode me pedalaibao. Te augwaligo geme te bidi dolabo tibo ola mabo po haniani ola mabo gagalaibao. Tama tiyu, te Genuai Bidigo augwali ma dobola siyu abelai goli, augwaligo te Genuai Bidi nogi tudiba muyu hogwa saibao. Te augwaligo tama tiyu, te augwa digi polo dolaibao. ²Tama we bidi hauwa augwaligo dwai penani ebo kolesaga haniani augwaligo wali paibao. Augwaligo tama tibaso, gasa we bidi augwaligo te wiegi yai kolesaga mu wali pabo bidi dabego kolesaga dali dwai posobo po waibao. ³Tama te tibo po ola mabo bage augwaligo te gasa we bidi dabego nai sulama pesa elama mu sainogo ebo bidi dabe,

^a 1:18 Mat 17:1-5; Mak 9:2-7; Luk 9:28-35

tama augwaligo te dagego mone dabe bomonama sainogo tibo po hauwa dage dari waibao. Tiali goli polobadu mu Godigo augwali po tu ilama hagayabo te sisi yai elalubao. Tama augwali mu dolabo nai te sesemane sogo tonalubao.

⁴Magi baso meni. E tiwai dao. Te Godigo ensel mobo bidi dabe augwali mebagi polobadu dwai kolesaga yai. Tiali goli Godigo augwali sula tagalobeo. Menio. Agai augwali te sao dedage pagede kalabus elaluyu, tama te sau dedage page dwai be mu hulia side bidibao. Tama megime augwali te po tu yabo sogo te pedalobo tonaluyu bidibo dao. ⁵Te polobadu mu bidai we bidi augwali me, te augwaligo God gegeda peyu tudiba muai, tama agai augwali sula tagalobeo. Menio. Agai te we genuai augwaliba asomainogo elama, tama augwali te węgo ela silama tama hagawai. Tiali goli te bidi Noa aga te doloba pai kolesaga ebo po pusubo bidi bidai. Tama Godigo aga dari, te we bidi a naga olama me badu nogo si agai tonaluyu ma dobola sai.^b ⁶Tama agai te Sodom dari Gomora dari si me dene ilai. Te genuai hanu si Godigo siago ulai, tama te keli naga elaluai dao. Agai te hanu sigo yali dwai kolesaga wei ponama tama te hanu si tigidali mu dolai. Tama nosali, te Godigo po tudiba mubo bidi dabe, augwaligo te polobadu yali po tu konemainao. Te po tu nosali augwaliba pedalabo te piksa noma waseliyu yali dao.^c ⁷Tama Godigo te doloba pai bidi Lot ma dobola sali, tama Godigo aga dolobeo. Lot aga te penani kolesaga ebo we bidi augwaligo yali kolesagade aga homu sege mu yai.^d ⁸Te doloba pai bidi augwali tomode bidai, tama augwaligo ebo dwai kolesaga hauwa sogo sudu geai, tama tigidali sogo augwaligo dwai po wabo agai odai. Tama agai homu bugagia dolo elaluai, tama aga noma siyu, tama agai homu dene mu augwaligo te bomo yai po sela sabo kolesagade yai. ⁹Tama te polobadu yali se pode dago koneai, Godigo te we bidigo ebo dwai se wei ponobo konealigo da, teda e me dago koneani, te God wali pabo we bidi augwalibolo te usu sabo se pedalobaso da, teda Genuai Bidigo augwali te sede ma dobola sainogo koneama tama tiaibao. Tama agai te dwai bidi dabego ebo kolesaga me koneyu, tama te dwai dene wei augwaliba ponobo, te me agai konebao. Tama koneyu, agai te po tu yabo sogo tonalubadi augwali dene mabo dao. ¹⁰Tama te bidi dabe augwali meba te dene genuai mu saibao. Te augwaligo tigigo yainu meda yai kolesaga wali pabo homu hodolo bidi dabe augwaligo te tigidali genuai bidigo po hagela eyu, tama te po sela sabo dao.

Tama te tibo po ola mabo bidi dabe augwali te hale isiabo bage dao, tama augwaligo augwa homu naga wali pabo dao. Wi me esiyu, tama te bidi dabe augwaligo te dagalude bidibo genuai mobo bidi dabe dari dwai posobo po wabo dao. ¹¹Tama te mobo bidi augwaligo te bidi dabe

^b 2:5 Gag 6:1–7:24 ^c 2:6 Gag 19:24 ^d 2:7 Gag 19:1-16

augwali aiyaba mu elaluabo digi, tama augwaligo augwali dali te posobo po me wasiąma, tama augwali te Genuai Bidi gedude po tü ela magobeo. ¹²Tama te tibo po wabo bidi dabe augwaligo homu te bulu hasa dabego homu tiwai elaluyu, tama augwaligo tigigo ebo kolesaga naga wali pabo dao. Te idago augwali ame nani tama te bidigo augwali selama ela mumainogo tebaø. Te augwaligo konesiąbo naibolo te augwaligo dwai po aga dali wabo dao. Tama te bulu hasa dabe dolobo, te tiwai ebo gilama tama te bidi dabe augwali me dolaibao. ¹³Tama augwaligo dwai kolesaga haniani ebo, tama augwalibolo te dwai kolesaga ebo wei ma ponobo sę pedalaibao. Augwaligo homugo te siade nai dali te wę dali hauwa tubo kolesaga, te wiegi yai homu ebo kolesaga dao. Tama tebo homugo augwaligo nai dabe dage dali tuyu, tama augwali te dwai meda yai tiwai dage tomode bidiyu, tama augwaligo tibo kolesaga ebode te wiegi yai homu pemene ebo dao. ¹⁴Tama augwaligo gedugo te we dabe sibi sesemane sogo tonono eyu te penani yainogo, tama augwaligo te dwai kolesaga ebo tagalogobeo. Mu menio. Augwaligo te homu bomo meni yai bidi dabe augwali te sę emainogo homu begelama, tama augwaligo te dwai sęge sabo kolesaga yai. Te augwaligo gasa bidigo nai sabo pesą ebo kolesaga konea sai dao. Tama Godigo te bidi dabe augwali mu dolaibao. ¹⁵Tama augwaligo te doloba pai kolesaga wali pabo tü tudiba muyu, tama augwali hagawai. Augwaligo te polobadu bidai bidi Beorgo ogwa, Balam, tego yali kolesaga te tü wali pai. Agai te sęge sabo sę elama, tama te sęde sabo masigi te agai godolo mu yai dao. ¹⁶Tama te moni kibu donki tego po wabo meni, tiali goli te kibu donki me deligo te bidigo po wabo tiwai olama, tama agai te bidi Balamgo dwai kolesaga ebaso te aga dali wado po wai. Tama te kolesaga yaligo, te donkigo te nosali yabo sę po pusubo profet bidi Balamgo dwai kolesaga yainogo yali tü te paliai dao.^e

¹⁷Tama te tibo po ola mabo bidi dabe augwali te wę ulu meba te wę meni yai pedalisiąbo tiwai dao. Tama augwali te pö tiwai elama, te genuai waligo besela sənama tedela pabo tiwai gilama ebao. Godigo te be sisi yai hulia sai digi aba mu tama augwali teba pabo sisi yai elalubo dao. ¹⁸We bidi meba augwali te Godigo po odisawai bage tomode bidai digi, tama tamadi tama augwaligo te kolesaga ebo tagalali. Tama te we bidi dabebole te tibo po ola mabo bage augwaligo te genuai po weyu, tama augwaligo te dwai kolesagade te po dwai dabe wabo dao. Augwaligo te homu begelai we bidi te homu hodolobo kolesaga eyu, te penani me te tigigo haniani dwai kolesagago augwali te dwai kolesagaba ma kekebo sę eyu tama augwali te kolesaga wali pabo dao. ¹⁹Tama te tibo po ola mabo bidi dabe augwaligo te po te we bidibolo wabo dao, “Dagego

^e 2:16 Nam 22:4-35

dago po wali peyu da, teda dage olo mu bidaibao.” Tama augwaligo te tobage po wabo digi tiali goli augwali te augwa digi dolobo kolesaga ebo sə bidi bidibo dao. Te tiwai dao: tama te bidi te magi kolesaga me deligo te bidi me deli aiyaba elaluyu aga dą̄ obaso da, teda te bidi aga te elalubo kolesagade dą̄ wali bidi dao. ²⁰Mu tama, augwaligo te Jisas Krais koneani, aga dago Genuai Bidi tama da ma sali bidi dao. Tama tede koneyu augwali wi pelama, te tqde elalubo dwai meda yai kolesaga tigidali tagalai. Tama augwali te kolesagade dą̄ ma weyu, tama te kolesagago augwali aiyaba elalubaso da, teda augwali tama tiwai bidaibao: te hasia mu augwali dą̄ olama, augwali dwai bidali, tiali goli nosali augwali ma dą̄ wai, tama augwali dwai mu bidibao. ²¹Tama augwaligo te doloba pai kolesaga ebo tū munu me konegi menigi sogo da, teda augwaligo nosali te genuai segē sigi meni da. Tiali goli meḡi te tū augwaligo koneama, tama augwaligo te wiegi yai tedali bomai po sali, tiali goli te wiegi yai po te augwaligo geasa peyu, te po tudiba muai dao. Tama tibaso, segē saibao. ²²Tama augwaligo ebo kolesaga te dago wą̄igo polobadu wali mu po tiwai dao, “Te yowi ma geasa pelama, aga bugali bogu ma tugi pai.” Tama gasa po me weyu te po wai, “Te kibu aga wę̄ pauwai digi, tiali goli te kibu aga pelama te tq pu yai digi pebege ma piligi pabo dao.”^f

Mu tama, te genuai bidi asaibao

3 ¹Eno abagi dede dabe mu, meḡi eno e asəna tolobo te eno pas si dao. Tama eno dagebolo asəna tolali pas side te dagego homu wiegi yai ilimainogo hodolobo po wai dao, te po dagego ma koneiəo. ²Tama eno homugo dagego te nosali pedalabo nai po ma konemainogo homu eyu, te wiegi yai tedali profet bidi dabego pusali po dao. Tama te Genuai Bidi te da ma sali bidi agai aga bomo yai po olama, tama te dugaba tagala palali sə bidi dabego pedauwalidu wali po odoyu, tama te po me dagego homude dą̄ olama ma koneiəo. ³Hasia dagego tebolo koneiəo: tama te tq de dagalu si me te tigidali nai silibo sogo, te posobo po wabo bidi dabe augwali pedalama, tama augwa bomonama naga te homugo ebo dwai kolesaga naga wali paibao. Tama augwaligo posobo po e tiwai po weyu, “Aga ma asabo po wali dawe?”^g ⁴Tama aga menade bidibawé? Aga asobeo. Tama te dago wą̄i dabe isali sogo tama dą̄i elama meḡi tama bidada asobo sogo, te tigidali nai Godigo nigali sogo, te tiwai polobadu elaluai dao, hasegelebeo,” augwaligo te tobage po waibao. ⁵Tama tiyu, augwaligo homugo te Godigo polobadu yali sə konebo hagela homu yai dao. Te polobadu mu Godigo po obaso te dagalu pedalama elaluai, tama tq te wę̄ tomodu pedalama, tama te wę̄ tomode te tq elaluai dao.^h

^f 2:22 Prs 26:11 ^g 3:3 Jut 18 ^h 3:5 Gag 1:6-9

⁶Tama nosali te wę te tqode te genuai asama, tama te sogo tqode elaluali nai tigidali mesegelama dolai.ⁱ ⁷Tiali goli, megi Godigo pogo naga te dagalu me tq me sa munama, tama te dolobo sia dabo pedalobo tonaluyu bidibao. Tama te dagalu de tq sigo te Godigo po tu te agai po tudiba muani we bidi augwali te po tu ba pedalobo tonalubao, tama te we bidi augwali dolaibao.

⁸Tiali goli, abagi dede dabe mu, dagego homugo te po me deli gegeda pigio. Te po e dao, te Genuai Bidigo gedude be deli sogo siade te kibu be hauwa mu 1,000 tiwai te si dao, tama te kibu be hauwa mu 1,000 wabo kibu be te deli sogo siade tiwai si dao. Te Genuai Bidigo homude te si te deli tigi tiwai dao.^j ⁹Tama tede konesiąwai bidi mebago homu te Genuai Bidi agai te po dąu wali sęde te sę dua dua eyu polo egobeo. Tiali goli te menio. Agai dage bugagia tonaluyu bidibo dao. Agai homugo te we bidi me deli hagaidali te tonaluibao. Agai homugo tigidali we bidi augwa homu begeleyu te dwai kolesaga ebo tagalamainogo, te aga tonalubo dao.

Te tq de dagalu si sia saibao

¹⁰Tiali goli te Genuai Bidi asobo sogo mu asaibao, te nai wi sabo bidi geme asobo gilama. Tama te sogo dagalu kulukulu genuai olama tama hagawaibao. Tama te giliga dali, polua dali, te tq dabe tigidali, te siago dela silaibao. Tq me, te tigidali nigali nai elalubo me, te siago tigidali daibao.^k ¹¹Tama te nai dabe tigidali tama tiwai ela silaibao. Tama tibaso, dage kone paliqo, te dage magi we bidi megi bidaibawe? Dage te wiegi yai tedali kolesagade biliyu, tama Godigo kolesaga naga tigidali wali piąo. ¹²Tama tibadi, te dagego te God aga sę yabo sogo asobo tonaluyu, tama dagego bodolu pedelaiba weyu, tama sę bomonama selebo sę yao. Tama te sogo te dagalu sia dela silama, tama posolo yai siago mu te dagalude elalubo nai dabe tigidali delama, tama te wę tiwai begelama pedalaibao. ¹³Tiali goli Godigo te gesi dagalu dali gesi tq si nigabo po dąu wai, tama doloba pai kolesaga naga tede bidaibao. Tama dago te nai naga tonalubo dao.^l

Dago dua bugagia te Genuai Bidi asobo tonaluao

¹⁴Abagi dede mu, dagego te gesi nai pedalobo tonalualigo da, teda dagego bomo eyu, te meda meniamama tama magi dwai sę me isamax bidiyu, tama God dali dagego deli homu elama bida. Tama nosali te sogo Godigo dage osola suyu, dage te tiwai bugagia bidibo agai sueibao. ¹⁵Tama Genuai Bidigo me tonaludu tama agai da dali dua ebao. Tama dagego te kolesaga ebode tama kone palao, te agai da ma sainogo ebao.

ⁱ 3:6 Gag 7:11 ^j 3:8 Tib 90:4 ^k 3:10 Mat 24:43; Luk 12:39; 1 Te 5:2; Ped 16:15

^l 3:13 Ais 65:17; 66:22; Ped 21:1

Tama Godigo wiegi yai homu kolesaga te dago dwagi yai ama Polbolo menama, tama agai me te tobage po dagebolo asəna tolai dao.¹⁶ Agai tigidali pasde agai te səde te tobage po naga wabo dao. Tama meba po te pasde elalubo te po page polo hania pedalobo meni, te dago bugagia hania koneainogo sinabo sə ebo dao. Tama te bugagia dolalusiąbo bage, te konesiawai bidi dabe, augwaligo te po hasegelebo dao, te augwaligo te gasa po te Godigo bukude elalubo po te me hasegelebogia. Tama tebo bidi dabe augwali augwa digi dolaibao.

¹⁷Abagi dede dabe mu, dagego te tibo po ola mabo bage nosali pedalabo te polo konealigo da, teda dagego duga digi bugagia tonaluao. Tiyu te bomo yai po sela səbo tibo po wabo bidi dabego dage te geda muani poba kegelama tama dage pasega səyū tulaluidali weyu, bugagia suiəo.¹⁸ Me ma, dage te dago Genuai Bidi me te da ma sali bidi Jisas Kraisgo olo tau sabo kolesagade bidiyu, tama dagego aga koneanio. Tama dagego te olo tau siyu mabo kolesaga me mu siyu, tama dagego Krais aga konebo kolesaga hauwa siyu bidiaqo. Tama agai te genuai ula yai bomai nogi megi elalubao, tama te nogi sesemane sogo mu bidada peyu, bidada paibao. Mu dao.

Jongo Hasia Deli Sogo Aṣeṇi Pas

Hasia nedebō tau sabo po

Te haniani tibo po ola mabo bage pedalama tama Jisasde nogi posobo dwai po weyu bidali. Mebago te agade te tiwai po pusali, aga te isi bidi ma te nomā bidi tiwai naga asai dao, aga tigi mu elalubeo. Tama e pas tomode te bidi Jon, te Jisas dali polobadu bidali bidi, agai bomo elama tama Jisasde genuai po si wali. Te Jisas da, te Godigo Ogwa mu dao, te Godigo sa muani bidi Krais mu dao. Tama gasa po me wali, te Jisas e tqde bidibadi aga da olo bidi dabe tiwai bidiyu, tama agai tigi mu elaluyu bidali. Tama Jongo dago te Godigo bomai po dabe wali peyu, tama dena hasi we bidi dali dwagi yai homu eyu godolo ebo kolesaga yao, agai te po me e pas tomode ola mani.

**Da te ulade bilinao tama te be hulia side bidibo hani
bagego dabolo tibo po omaina olama sula tagalu
gogoligimio**

(Daq̄ 1:1–3:10)

Gesi noma bidibo ula po hanilama pedelali po

1 ^a Dago te gesi noma bidibo ula elalubo pode, te pode dagebolo e po asēna tolobao. Te Godigo nai me deli me nigisiqbadi te po hasia bidaluai dao. Te po polobadu mu elaluali goli dago te po dena ologo odali dao, tama dena gedugo suai. Awe, dago gedugo suali, tama dago nogogo tuyu yai.^a ^b Te gesi noma bidibo ula aga bulu ulaba hania pedalama, tama dago aga suai. Tama tibaso, dago agade po dagebolo pusuyu, tama te Ayade bidali bidada peyu, bidada pabo ula aga hania pedalama, tama dago sulama, tama dago dagebolo pusubao.^b ^c Awe, agade dago gedugo suali s̄e dali te dago ologo odali po me, te si dago dagebolo me pusubao. Te dage da dali wadolama, tama da tigidali te dago Aya dali, aga ogwa

^a 1:1 Jon 1:1 ^b 1:2 Jon 1:14

Jisas Krais aga dali me dago deli homu elama bidimainogo eyu te dago meg i po dagebolo pusubao. ⁴Tama da dali dage dali te da tigidali dwagi yai homu pemene mu emainogo dago e po dagebolo asəna tolobao.

Da ulade bilinao

⁵ Te Kraisgo dabolo ola mani po dago meg i dagebolo hania ola mobao. Te po e dao: God aga te ula dao, tama dwasianu hulia sali agade me elalubo menio. ⁶Tama tibaso, dago “Da God aga abagi bidiyu, tama dago aga dali deli homu ebo dao,” te po weyu, tiali digi da hulide biliuyu da, teda dago tibo po wai, tama dago ebo kolesaga te mu menio. ⁷Tiali goli da ulade biliyu da, te aga te ulade bidibo gilama, tama tiali da, da dena hasi abagi dede dali deli homu elama bidaibao. Tama bididuyu, tama Godigo ogwa Jisas agai kanemego dago dwai sə tigidali sela şanama, tama da dwagi yai ma pedalobo dao.

⁸ “Eno dwai sə menio,” dago te po weyu da, teda dago dena homu kolesagabolo ili po ola mayu, tama mu po wabo dago homu kolesagade me menio. ⁹Tiali goli dago yali dwai sə dabe po dago te Godibolo pusuyu da, teda agai aga polobadu dą̄ wali po wali peyu, tama agai da dali te doloba pai kolesaga naga eyu yaibao. Agai dago dwai sə yali sela şawaibao, tama dago yali dwai kolesaga tigidali agai sela şanama tama da te meda isəwai we bidi ilaiabao. ¹⁰Dago hogwa sabo po weyu, “Eno dwai sə me ebeo,” dago te po weyu da, teda te po wabogo dago God aga nogi ili po wabo bidi dao wai, tama agai po dago homude menio.

Krais agai da tau sabo bidi dao

2 ¹Eno wai dabe, dagego dwai sə isəmainogo eno e po dagebolo asəna tolobao. Tama bidi me deligo dwai sə eyu da, te da tau sabo bidi me deli elalubao, te mu doloba pai bidi Jisas Krais dao. Tama aga Aya dali bidiyu, tama agai te da tau sabo po agabolo wabo dao. ²Tama Krais agai tigi menama, tama aga digi dago dwai sə yali sela şabo tū dawai bidi dao. Tama agai da naga tau selama, dago dwai sə yali te naga sela şabo bidi menio. Agai tigidali tōde bidibo we bidi me tau siyu, tama augwaligo yali dwai sə sela şabo tū dawai dao.

³ Te dago Godigo bomo yai po dabe wali peyu da, teda homu si isəbadi dago e po mu wagameo, “Dago God koneyu bidibao.” ⁴Godigo bomo yai po wali pişabo bidigo te po weyu da, “Eno God mu koneai dao,” te po wabo bidi aga te ili po wabo bidi dao, tama mu po te bidigo homude bidibeo. ⁵⁻⁶Tiali goli niwai bidi me deligo Godigo po wali pabo bidi, teda te bidi agai God dali dwagi yai homu eyu godolo ebo kolesaga te sese mu ebao, te soq̄ pabeo. Tama niwai bidi me deligo te po weyu “Ena God dali wadoloyu bidibao,” te po wabo bidi aga te Jisas Kraisgo yali kolesaga tiwai dolo wali pao. Tama dago te tiwai gilama eyu da, teda dago

homu si isəbadi dago e mu hania koneagameo, te da God dali wadoloyu bidibao.

**Niwai bidigo aga abagi dabe dali dwagi yai
homu ebo, te bidi ulade bidibo dao**

⁷Eno abagi mu dede, eno dagebolo e bomo yai po asebo po te gesi po menio. Te hasia bomo yai po polobadu mu dagego sai po dao, te augwaligo dagebolo Godigo po ola mabo gagalali sogo dagego te bomo yai po odai dao. ⁸Me ma, megı eno dagebolo te asebo bomo yai po page meba te gesi po dao. Tama te eno asebo bomo yai po te mu po dao, te dago konebao, te Kraisde me, te dagede me, tede dago te bomo yai po te mu po dao dago subo dao. Magi baso meni, te ula mu te pedalama bidiyu, tama te ulago te be hulia si elaluali silibao.

⁹Niwai bidi me deligo te po weyu, “Ena te ulade bidibo dao” obaso da, tialima te po wabo bidigo aga ama dali səbə elama boi bidi homu eyu da, te bidi aga be hulia sai digi me bidibao. ¹⁰Niwai bidigo aga ama dali dwagi yai homu ebo bidi, te bidi aga ulade bidibo dao. Tama aga ulade bidibadi te aga dwai sə ilibo magi dwai nai pedelegobeo. ¹¹Tiali goli niwai bidigo aga ama dali səbə eyu boi bidi homu eyu da, te bidi hulide bidibo dao. Aga hulide biliyu, be hulia saligo agai gedu dą̄ olama, tama aga pabo tū aga konesiąbaso gegebo dao.

¹²Dage eno wai dabe, tama Krais aga nogi tobade Godigo dagego dwai sə yali səgə selə səawai dao. Tama eno te po dagebolo aşəna tolobao.

¹³Aya dede, dagego te tigidali nai gagalali sogode bidali bidi, aga megı me bidibo, te bidi dagego koneai dao. Tama eno te po dagebolo aşəna tolobao. Dage gesi bidi dabe, dagego Satango bomo aiyaba elaluai dao. Tama eno te po dagebolo aşəna tolobao.

¹⁴Dage eno wai dabe, dagego dago Aya bugagia koneai. Tama tiyu, eno te po dagebolo aşəai dao. Dage aya dabe, te tigidali nai gagalali sogode bidali bidi, aga megı me bidibo, te bidi dagego koneai dao. Tama tiyu, eno te po dagebolo aşəai dao. Dage gesi bidi dabe, dagego bomo yai, tama Godigo po dage tomode bidibao, tama dagego Satango bomo aiyaba elaluai dao. Tama eno te po dagebolo aşəai dao.

Dago təde kolesaga teba homu mugio

¹⁵Dagego te təde kolesaga dali, təde elalubo nai dali pesə eyu teba homu mugio. Niwai bidi me deligo e təde kolesaga teba homu mubaso da, te bidi agai Aya God dali dwagi yai homu elama godolo ebo menio.

¹⁶Magi baso meni, təde bidigo kolesaga tigidali, te kolesaga e tama telalubo da wali, te tigigo bidigo homu hodolama tama mena dwai sə ebo kolesaga, te gedugo haniani nai sulama godolo ebo kolesaga, te bidigo mena naide hagoma homu eyu aga nogi ugwaba sabo kolesaga, te tobage

kolesaga Aya Godigo mabeo. Menio. Te kolesaga e tqde pedalobo kolesaga dao.¹⁷Tama e tqde kolesaga silaibao, tama te mena nai sainogo gedugo sulama godolo ebo te se me sia saibao. Tiali goli Godigo pedauwalidu wabo po wali pabo bidi, te bidi aga gamonaibao, aga sesemane sogo mu bidada paibao.

Krais dali boi bidi homu yabo bidi pedalai dao

¹⁸Dage eno wai dabe, te tigidali nai silabo sogo paba yagasaki dao. Polobadu augwaligo dagebolo te po wai, “Te Krais dali boi bidi homu yabo bidi pedalaiibao,” wabo, te po dagego odali. Awe, megis Krais dali boi bidi homu yabo bidi hauwa augwali mu pedalai dao. Tama tibaso, dago koneai, te tigidali nai silabo sogo paba yagasaki dao.¹⁹Te bidi dabe augwali polobadu te da bidi hani deli bideiba homu meni baso, tama augwaligo da tagalai dao. Augwali dago hani tigi sogo da, te da dali me bidigi dao. Augwaligo da taga pobaso, dago hania koneani, te bidi dabe tigidali augwali da deli hani bidi mu meni.

²⁰Dage, te dagebolo te Tedali Bidi Kraisgo te Godigo Mobo Bidi olo mani. Tama tibaso, dage tigidaligo te mu po koneai dao.²¹Dagego te mu po page konesiqbaso, tama te pode eno dagebolo e po asəbao, te homu dagego egimio, te menio. Dagego te mu po page koneai, tama te mu pogo tibo po munu me wabo menio, te me dagego koneai dao, eno te homu elama te po eno dagebolo asəbao.

²²Tibo po wabo bidi de dawe? “Jisas aga Godigo sa muani tagala palali bidi Krais menio,” te po wabo te bidi aga te tibo po wabo bidi te dao. Te bidigo te Aya dali aga ogwa dali sigo nogi wabo hogwa siyu, tama tudiba mubo bidi, te bidi agai Krais dali boi bidi homu yabo bidi dao.²³Niwai bidi agai te ogwa nogi wasiąma hogwa siyu tudiba muani bidi, te bidi agai te ogwa aga Aya me nogi wasiąma hogwa siyu tudiba muai dao. Niwai bidi agai te ogwa dali konealubo po dą̄ wali da, te bidi agai Aya dali me agai konealubo po mu dą̄ wabo dao.

Godigo Dwagi Yai Mobo Bidi agai da mu po ola mabo dao

²⁴Te dagego polobadu te Godigo po odobo gagalali sogode odali po, te po dagego duga homude dą̄ ola sao. Dagego te gagalali sogode odali po bugagia dą̄ ola siyu da, teda dage te Ogwa dali Aya dali si dali wadoloyu sesemane sogo bidaibao.²⁵Tama aga digi agai dabolo aga dą̄ wali po tama wai, agai da sesemane sogo bidabo ula mawaibao, te po wai.

²⁶Eno te dagebolo te tibo po ola mawainogo ebo bidi dabe augwaligo ebo kolesaga te po dagebolo pusuyu asəbao.²⁷Tialima dagede, dage Kraisgo aga Mobo Bidi olo mayu tama aga dage dali me bidibao. Tama aga Mobo Bidi dage dali bidibadi, te sogo dage te po ola mabo bidi dage dali me sqə pabeo. Dagego te gasa po ola mabo bidi dabe sabo homu

egio. Menio. Mobo Bidi agai dage tigidali kolesaga ola mabo dao. Tama te Mobogo mu po tama naga wabo dao. Agai tibo po me wabeo. Agai tama tibaso, dagego agai po wali peyu tama Krais dali wadoloyu bidiaqo.

²⁸Awe, eno wai dabe, dage aga dali bida. Magi baso meni, nosali aga hania pedalaibao, te sogo da bomo elama dolaluabao, te aga ma asobo sogode, te tama da hale eyu geme duala sogobeo. ²⁹Dagego te bidi Krais aga dwagi yai doloba pai bidi mu da weyu mu dolo kolesaga ebo bidi da te tiwai konealigo da, teda dagego me tama koneao: dwagi yai doloba pai kolesaga ebo bidi, aga te Godigo wai mu bidibao.

Megi da Godigo wai dabe bidibao

3 ¹Te goba! Ayago da dali dwagi yai homu eyu godolo mu yali kolesaga te moni genuai mu pedalali. Suao. Godigo aga digi da te agai wai dabe dao wai. Mu tama, da Godigo wai dabe dao. Tama da Godigo wai dabe tama bidiyu, tama tqde bidi dabe augwaligo God konesiąbaso, tama augwaligo da me konebeo.^c ²Abagi mu dede, megi da te Godigo wai dabe bidibao. Tama nosali da mena tama bidigowe, te dago meg i bugagia hania konebeo. Tialima dago koneani, nosali Krais hania bulu ulaba pedalobo si, te sogo dago aga magi bidi dawe te dago te page mu hania koneabao. Tama dago aga subaso, te sogo da aga tiwai gagawaibao. ³Tama te augwali Krais tiwai pedalobo sogo bugagia tonaluyu bidibo we bidi tigidali, augwaligo magi se isayu dwagi yai naga tedali gagabo dao. Magi baso meni, augwaligo koneani, te Krais me aga magi dwai se isayu dwagi yai naga tedali bidibo dao.

⁴Dwai se ebo bidi, agai Godigo bomo yai po olo oda tagaluyu sela səbo bidi dao. Magi baso meni, te dwai se ebo kolesaga page da, te Godigo bomo yai po bolobo kolesaga dao. ⁵Dagego koneai, Krais asali agai te tqde we bidigo dwai kolesaga ebo sela sawainogo asai, tama dwai se ebo kolesaga agade me bidibo menio.^d ⁶Tama tibaso, aga dali wadolama bidibo bidi, te bidi agai te dwai kolesaga me eyu bidibo menio. Niwai bidi me deligo dwai kolesaga eyu bidibo bidi, te bidi agai Krais susiama, tama agai Krais konesiąwai bidi bidibo dao.

⁷Dage eno dwasianu wai dabe, dage dua dao. Dage bidi me deligo tibo po ola maidali weyu bugagia suao. Dwagi yai doloba pai kolesaga ebo bidi, te doloba pai bidi dao, te Krais aga dwagi yai doloba pai bidi tiwai dao. ⁸Niwai bidigo dwai se idu bidibo, te bidi Satango hani bidi dao. Magi baso meni, te Godigo tigidali nai nigisiąbadi, polobadu mu Satango dwai se ebo gagalama, tama eyu, tama meg i me aga tama tibo dao. Tama agai te Satango we bidi tomode ebo dwai kolesaga ela silimainogo te Godigo Ogwa aga hania pedalai.

^c 3:1 Jon 1:12 ^d 3:5 Jon 1:29

⁹Niwai bidi me deli aga Godigo wai gagawai bidi, te bidigo dwai kolesaga idu bidibo menio. Magi baso meni. Godigo homu kolesaga page te bidide elalubo. Tama God da aga Aya bidibaso, te bidi agai te dwai kolesaga idu bidibo usu egobeo. ¹⁰Edao. Te Godigo wai dabe dali, te Satango wai dabe dali, augwali dagalama hania koneabo tū e dao: dwagi yai doloba pai kolesaga wali pisabo bidi, aga te Godigo wai menio. Tama aga ama dali dwagi yai homu eyu godolo isabo bidi, te bidi me aga te Godigo wai menio.

Da deli deligo gasa abagi dede dabe godolo homu yao po

(Dqj 3:11–5:21)

Ama dali dwagi yai homu eyu godolo ebo kolesaga

¹¹Te tobage kolesaga isabo bidi aga Godigo wai menio. Magi baso meni. Augwaligo dagebolo Godigo po ola mabo gagalali sogode, te sogode dagego tama po odai: dago dena hasi abagi dali dwagi yai homu eyu godolo mu iyao.^e ¹²Da te polobadu bidali bidi Kein bidali tiwai bidamuo. Aga te Satango bidi bidai, tama agai aga ama ela muai. Tama magi baso aga ama ela muaniwe? Agai dwai kolesaga naga yali, tama aga amago yali kolesaga tigidali dwagi yai doloba pai kolesaga yai. Tibaso, aga səbə elama, aga ama ela muai.^f

¹³Eno ama dede, təde elalubo kolesaga wali pabo bidi dabe augwaligo dage dali boi bidi ebaso da, dage te kolesagade dage midigi sigio. ¹⁴Dago dena ama dabe augwali dali dwagi yai homu eyu godolo ebaso, tama te dago koneai, dago te genuai sia dabo buluba pabo tū tagalama, tama da te bidada peyu bidada pabo ula sabo tū sabolai dao. Gasa we bidi dali dwagi yai homu eyu godolo ebo kolesaga masiabo bidi, aga te genuai sia dabo buluba pabo tūdu me bilibo dao.^g ¹⁵Bidigo aga ama dali boi bidi homu ebo bidi, aga te bidi ela mubo bidi dao. Tama dagego koneai, bidi ela mubo bidi, te bidi aga te dwagi yai bidada peyu, bidada pabo ula elalubo menio. ¹⁶Tama bidi dali dwagi yai homu eyu godolo mu ebo kolesaga page, te kolesaga page dabolo hania ola mabo sə e dao: Krais aga digi agai da təde we bidi tau somainogo aga bidabo ula tagalama, tama da tobade isali. Tama tibaso, dago me dago bidibo ula tagalama, dago ama dede augwali tau sao. Tama tiyu, dago augwali tau sobadi tama gasa bidi dabego da elebaso, dago usu da homu yao. ¹⁷Tialima te doado bage hauwa elalubo bidi agai aga ama te nai meni yai bidi bidibo sula tagalama, tama aga tau masiayu da, teda magi baso te bidigo te po wali, “Eno Godibolo dwagi yai homu eyu godolo ebo bidi dao.” ¹⁸Dage eno wai dabe, dago te we bidi dali dwagi yai homu

^e 3:11 Jon 13:34 ^f 3:12 Gag 4:8 ^g 3:14 Jon 5:24

eyu godolo ebo kolesaga, te kolesaga dago pedauwaligo po wabogo naga ilamuo. Menio. Dago homu mu eyu, tama dago augwali dali dwagi yai homu ebo kolesaga te dago augwali tau sabo səgo augwalibolo hania ola mao.

Konealubo po dəq̄ wali bidi aga Godide wi meni yaibao

¹⁹ Te eno megi tama wali kolesagade, te dago te kolesaga eboso da, teda dago koneagameo, da te mu po naga wabo Godigo we bidi dao. Dago te gasa we bidi dabe dali dwagi yai homu eyu godolo ebo kolesaga eyu da, teda da God pəba pabo sogo te da agade wi egobeo. ²⁰ Magi baso meni. Dago homude te dena homugo da dali po tū eboso da, teda dago koneani, te God agai dago homu kolesaga aiyaba elalubo dao, tama agai homu kolesaga genuai ugwanu mu ela holai elalubogo, tama agai tigidali nai mu konebo dao. ²¹ Abagi dede, dago homude ebo te kolesagade da po tū esiqyu da, teda Godigo gedude wi isiqma da dolalubo dao. ²² Tama tiyu, tama dago magi nai me sainogo gedu haluasa po obaso da, te agai dabolo mabo dao. Magi basowe? Dago agai bomo yai po wali peyu, tama agai godolo ebo kolesaga dago ebo dao. ²³ Tama agai bomo yai pode tama wai: dago konealubo po agai ogwa Jisas Kraisgo nogide dəq̄ olama, tama dago gasa we bidi dabe augwali dali dwagi yai homu eyu godolo mu yao, te agai dabolo polobadu wali po tiwai.^h ²⁴ Niwai bidi me deligo Godigo bomo yai po wali peyu da, te bidi God dali bidalubo dao, tama God aga te bidi dali bidalubo dao. God agai aga Tedali Mobo Bidi dabolo mawai. Tama tibaso, dago koneai, God da dali bidibo dao.

Dagego te Godigo Mobo dali, tibo mobo dali si dagala suiyəo

4 ¹ Abagi dedeo, tibo po ola mabo bidi dabe hauwa augwali tigidali tqde bilalubao. Tama bidi hauwago te po obao, “Godigo Mobo Bidi agai enabolo mu po olama, tama eno te mu po pusubo dao.” Te po obaso, dagego homu te augwaligo ola mabo poba olo subigila dəq̄ wagio. Dagego koneainogo, tigidali te po ola mabo bidi osola suo, te Godigo tagala palali Mobo Bidi augwali dali bidibawe, ma meniwe, te suainogo tama tiao. ² Dagego te bidi me deligo Godigo Mobo Bidi elalubowe naga tede dagego hania konemainogo e tiwai aga osola suo: Bidigo “Te Jisas aga Godigo sa muani bidi Krais dao, tama aga tqba asama aga e tqde bidigo tigi tiwai selama tama bidali bidi dao,” te po wabo bidi te Godigo Mobo Bidi aga dali bidibo dao. ³ Tiali goli tigidali bidigo Jisas dali te po tiwai wasiąbaso da, te bidi dabe augwali te gasa dwai bidi nomago dagana sagasali, te Godigo Mobo Bidi menio. Te tobage bidi agai Krais dali boi bidi homu ebo dao, polobadu dagego po odali te tobage bidi aga asaibao wai. Tama megi aga aselama, tqde bidibao.

^h 3:23 Jon 13:34; 15:12, 17

⁴Dage eno wai dabe o, dage Godigo we bidi hani, tama dagego te tibo po ola mabo bidi aiyaba elaluai dao. Magi baso meni. Te Mobo dage tomode bidibo Mobo Bidi agai bomogo te tqde bidi dali tomode bidibo mobogo bomo aiyaba elalubo dao. ⁵Te tibo po ola mabo bidi dabe augwali tqde bidiyu, tama tqde elalubo kolesaga naga augwaligo wali pabo dao. Tama augwaligo po te tqde elalubo naide po wabo dao. Tama tibaso, tqde bidigo augwaligo po odobo dao. ⁶Da Godigo we bidi dao. God koneani bidi, te bidi agai dago po odobo dao. Tialima God konesiąwani bidi, agai dago po odali goli, te po wali pabo menio. Tede dago te mu po wabo Mobo dali, tibo po wabo dwai bidi noma elalubo bidi dabe dali dagalama, tama augwali si koneagameo.

**God aga te dwagi yai homu eyu godolo mu
ebo kolesaga page bidi mu dao**

⁷Abagi mu dede o, dena hasi dago we bidi dali dwagi yai homu eyu godolo mu inao. Magi baso meni. Te we bidi dali dwagi yai homu eyu augwali godolo mu ebo kolesaga page bidi te God dao. Bidigo dwagi yai homu mabo kolesaga wali pabo bidi, aga te Godigo wai dao, tama agai God mu konebo dao. ⁸Bidigo aga ama dali dwagi yai homu eyu godolo isəbo bidi, agai God konebeo. God agai homu kolesaga page da, te we bidi dali dwagi yai homu eyu augwali godolo mu ebo homu kolesaga dao. ⁹God agai Ogwa deli digi mu, tama agai te Ogwa e tqba tagala palai, tama agai da aga yali səde te bidibo ula somainogo tiwai. Tebogo da ola mani, God agai da dali dwagi yai homu eyu, da godolo ebo dao. ¹⁰Dwagi yai homu mabo kolesaga te tama menio: hasia dago bolo God dali dwagi yai homu eyu godolo yai da, te homu egobeo. Te tama menio. Dwagi yai homu mabo kolesaga e tama tiwai: God agai bolo te dwagi yai homu mu da dali elama, tama aga Ogwa e tqba tagala palama, tama agai aga tigi menama, tama dago dwai sə tigidali sela səbo bidi bidimainogo tiwai dao.

¹¹Abagi mu dede o, God agai te tiwai da dali dwagi yai homu eyu godolo mu yaligo da, teda dago me dena hasi dwagi yai homu dago abagi dabe dali inao. ¹²Bidi me deligo God munu me subeo. Dago dena hasi dwagi yai homu dago abagi dali eyu da, God aga da dali bidibo dao, tama aga dwagi yai homu eyu godolo ebo kolesaga te da tomode sese wiegi yai mu pedalai dao.ⁱ

¹³God agai aga Mobo Bidi dabolo mawai. Tama tibaso, dago koneai, da God dali bidibo dao, tama aga da dali bidibo dao. ¹⁴Tama Aya God aga Ogwa e tqba tagala palama, tama agai da e tqde we bidi tigidali ma dobola sabo bidi pedalomainogo yai. Dago te suai dao, tama dago te sə

ⁱ 4:12 Jon 1:18

po gasa we bidi dabe augwalibolo pusubo dao. ¹⁵Bidi me deligo te gasa we bidi gabidide po weyu, “Awe, te bidi Jisas aga te Godigo Ogwa dao,” obaso da, God aga te bidi dali bidibao, tama te bidi aga God dali bidibo dao. ¹⁶Tama dago koneai dao, Godigo da dali dwagi yai homu eyu godolo mu ebo dao. Tama koneyu, tama da te kolesagaba dago homu tiālubo dao, tede homu si ebo menio.

God agai homu kolesaga page da, te we bidi dali dwagi yai homu eyu augwali godolo mu ebo homu kolesaga dao. Tama bidi te kolesaga eyu bidibo bidi, aga God dali bidiyu, tama God aga te bidi dali bidiyu ebo dao. ¹⁷Tama bidiyu, tama te dwagi yai homu eyu godolo ebo kolesaga te da tomode sese wiegi yai mu pedalobo dao. Magi baso meni. Tama tiyu da, da e tōde bidibo sogo te da Krais tiwai bidibo dao. Tama tibaso, te nosali te tō dagalu silibo side genuai po tu ebode da wi me egobeo. ¹⁸Tama God agai da dali te dwagi yai homu eyu godolo mu ebo kolesaga te sese wiegi yai mu dao, sqaq pabeo. Tama tibaso, da wi menio, te agai da dali ebo kolesagago te wi ebo sela sabo dao. Wi ebo page e tama: da dwai dene sabo homu ebo we bidi bidiyu da, teda da wi ebo dao. Tama tiyu da, dago koneaibao, te Godigo da dali dwagi yai homu ebo kolesaga page te dago kuna konebeo, da tede sqaq pabo.

¹⁹Te dago God dali, dena hasi abagi dali te dwagi yai homu eyu godolo ebo kolesaga page e dao: hasia bolo God agai da dali te godolo ebo kolesaga yali. ²⁰Bidi me deli agai te po weyu “Eno God dali dwagi yai homu eyu aga godolo ebo dao,” te po agai weyu, tiali goli te bidi agai aga ama dali dwai boi bidi homu eyu da, teda te bidi agai tibo po wabo dao. Magi baso meni. Te bidigo aga gedugo aga ama subo dao. Tiali goli agai aga dali dwagi yai homu eyu godolo ebo menio. Tama tibaso, agai te aga gedugo susiabo God dali mena tama dwagi yai homu ebo kolesaga egowe? Mu menio, aga usu egobeo. ²¹Tama te bomo yai po dago God agade sai, te po tama wai: niwai bidigo God dali te dwagi yai homu eyu godolo ebo bidi, agai aga ama dali me dwagi yai homu eyu godolo mu yao.

Kraisde konealubo po dāq wabo bidi agai tōde kolesaga aiyaba elalubo dao

5 ¹Tigidali bidigo Jisas aga te Godigo sa muani tagala palali bidi Krais dao olama konealubo po dāq wai, te bidi dabe augwali Godigo wai dabe dao. Tama tigidali bidigo aya dali dwagi yai homu ebo bidi, te augwaligo te dwagi yai homu eyu godolo ebo kolesaga agai wai dabe dali me ebo dao. ²Tama dago God dali dwagi yai homu elama tama aga godolo mu eyu, tama agai bomo yai po dago wali peyu da, teda dago te kolesaga ebode koneagameo, dago God agai wai dabe dali dwagi yai homu eyu godolo ebo dao. ³Magi baso meni. Dago God dali dwagi yai

homu eyu godolo ebo kolesaga page e dao: dago God agai bomo yai po wali pabo dao. Tama agai bomo yai po dabe augwali te bidigo wali pabo usu isəbo bomo yai po meni, te dago augwali wali pabo usu yaibao.^j

⁴Godigo wai dabe tigidali augwali deli deligo te təde elalubo dwai kolesaga aiyaba elaluai dao. Te dago e təde elalubo dwai kolesaga aiyaba elalubo tə e dao: dago te Jisas aga te Godigo sa muani toba tagala palali bidi mu dao, te konealubo po dago Jisasde dəq wabo, te kolesagago dago te təde kolesaga aiyaba elaluama tagalobo dao. ⁵Mena bidigo hwıñama tama təde dwai kolesaga ebo aiyaba elalubo bidi dawe? “Te bidi Jisas aga Godigo Ogwa mu dao,” te po konealubo po dəq wabo bidi aga naga dao.

Godigo agai Ogwade po hania pusai

⁶Te aga da, Jisas Krais aga digi aga hania pedalali. Aga aigo baptais mabo te kolesaga dali, tama aga te ni pedaide kaneme gelabo te kolesaga dali asai. Aga asali te aigo kolesaga dali naga asai menio. Aga asali te aga aq̄ dali kaneme dali te kolesaga si dali asai. Tama tiyu, te Godigo Mobo Bidi agai te Krais aga asali kolesagade te mu po dao, te po wai dao. Magi baso meni, te Mobo Bidi da te mu po wabo page mu dao. ⁷Awe, sela augwaligo te da ola mabo da, te Krais aga Godigo Ogwa dao. ⁸Me te Mobo Bidi, me aq̄, me te kaneme tama dao. Tama te sela augwaligo te Kraisde deli po naga dabolo ola mabo dao. ⁹Bidi me deligo agai suali sə po dabolo pusubo si, te dago homu si isəyu tama “Te mu po dao” weyu dago agai pusali po sabo dao. Tama bidigo wabo pode dago tama tialigo da, teda dago Godigo aga Ogwade dabolo pusubo po odoyu, dago mu po dao weyu te po sao. Magi baso meni, te Godigo pogo bomo te bidigo pogo bomogo aiyaba elalubo dao. Te Godigo aga digi aga Ogwade pusali po dao. ¹⁰Tama te konealubo po Godigo Ogwa dali dəq weyu agaba tialubo bidi, te bidi agai te Godigo aga Ogwade pusali po aga homude elalubo dao. Te Godigo aga Ogwade wali po, te pode “Mu po dao” wasiəbo bidi, te bidi agai “God aga nogi ili po wabo bidi dao” wai dao. Magi baso meni. Te po, te Godigo aga Ogwade wali pode te bidigo “Te po mu po menio” homu eyu sela səwai dao. ¹¹Tama Godigo aga Ogwade wali po e dao: God agai da sesemane sogo bidata peyu, bidata pabo bidibo ula mawai dao, tama te bidabo ula page aga Ogwa Jisasde elalubo dao.^k ¹²Bidigo Godigo Ogwa dali kəq̄ pali bidi, aga dali te bidibo ula elalubo dao. Tama bidigo Godigo Ogwa dali kəq̄ pisəwani bidi, aga dali te bidibo ula elalubeo.

Po silagasu wabo po

¹³Te dagego Godigo Ogwago nogide konealubo po dəq weyu agaba tialubo we bidi, te dagego te dwagi yai bidata peyu bidata pabo ula

^j 5:3 Jon 14:15 ^k 5:11 Jon 3:36

elalubo konemainogo eyu, eno e po dagebolo aṣeṇa tolobao. ¹⁴ Da Godigo gesabide bidiyu, tama dago aga dali homu si ebo menio. Magi baso meni, magi nai po aga dali gedu haluasa po weyu, tama dago aga homu wali peyu da, teda agai dago te gedu haluasa po wabo odobo dao, te dago mu hania konebo dao. ¹⁵ Awe, dago aga dali gedu haluasa po weyu da, teda agai te po odobo dao. Tama te dago konebo dao. Tama konealigo da, teda dago e me konebo dao, te dago magi naide po aga dali gedu haluasa po weyu da, agai te nai dabolo mabo dao.

¹⁶ Bidi me deligo aga amago dwai sę ebo suyu da, tama te dwai sę ebogo te yali bidi aga dwai madigi pisabo dwai sę elaluyu da, teda aga amago Godibolo gedu haluasa po wao. Tama weyu, tama Godigo te dwai sę yali sela sənāma tama bidibo ula te bidibolo mawaibao. Te dwai sę tedali tedali dao, mebago te sę yali bidi dwai madigi tagala palabo dao, mebago meni. Tama te sę yali bidi dwai madigiba pisabo dwai sę ebode eno te po wai, Godibolo gedu haluasa po wao. Tiali goli te bidi dwai madigi tagala palabo dwai sę, tede eno dagebolo “Gedu haluasa po wao” wabeo. ¹⁷ Tigidali dolo isabo kolesaga, te dwai sę dao. Tiali goli dwai sę mebago te bidi dwai madigi tagala palabo menio.

¹⁸ Dago koneai, tigidali bidi Godigo wai dabe bidalubo bidi, augwaligo dwai kolesaga wali me pabo menio. Magi baso meni. Godigo Ogwago augwali bugagia palibo dao, tama Satango augwaliba aga nogo mugobeo.

¹⁹ Dago koneai, te tigidali tqde bidibo we bidi augwali te Satango dologode bidibo digi, da Godigo wai dabe bidibao.

²⁰ Dago koneai, Godigo Ogwa aga asai, tama agai homu kolesaga da mawai, dago te God aga God mu dao, te dago konemainogo te kolesaga da mawai. Da aga Ogwa Jisas Krais dali wadolama bidibaso, tama da God dali bidibo dao. Te Krais da, te aga God mu dao, tama agai te bidibo ula sesemane sogo bidada peyu, bidada pabo ula mabo dao.

²¹ Eno wai dabe, dua dao. Dagego te tibo god dabe wali pidali weyu, dagego duga digi bugagia paliqo. Te tama dao.

Jongo Si Sogo Pas Aseani

Hasia nedebu tau sabo po

E pas aseani bidigo aga digi nogi tiwai wabo “Ena monu dabe dao,” tama weyu, tama dago homu te aga Jon dao. Agai e pas hasia nedali we bidi tau somainogo eyu, tama te Kraisde polobadu ola mani po tagaluyu gasa po ola mabo bidi dabe augwalide dua dao wali. Te tobage tibo po ola mabo bage dali kisasa biligio wali.

Dago Godigo po mu dą̄ ola sai elalu tama te bidi dabego te tobage gasa po pusubo side dua dao

¹ Ena monu dabe bidiyu, tama ena Jisasgo se ebo tobolu bidi, te eno te Godigo dia sali we dali nago wai puluba dali, te dagebolo e po aseña tolobao. Eno homu mu eyu, dage dali dwagi yai homu eyu godolo mu ebao. Tama eno naga te kolesaga dage dali ebo menio. Tigidalii Godigo mu po koneani we bidi augwaligo me dwagi yai homu dage dali ebo dao. ² Magi baso meni, te Godigo mu po da dali bidibo dao, tama sesemane sogo da dali mu bidada peyu, bidada paibao, tama tiyu dago dwagi yai homu dage dali ebao.

³ Dago Aya God dali, te Aya aga Ogwa Jisas Krais dali, augwali sigo da dali olo tau sabo kolesaga dali, te homu dene eyu tau mabo kolesaga me, te bidi homu dwagi yai nagamea ilibo kolesaga me, te kolesaga sela da dali augwaligo yaibao. Tama dago Godigo mu po koneyu, tama dena hasi dwagi yai homu eyu godolo ebo kolesaga ebadi, augwaligo te kolesaga da dali yaibao.

Dago dena hasi dwagi yai homu eyu bidiəo

⁴ Eno odali, nago wai dabe meba augwaligo Ayago dabol “Tama tiao” wali po odoyu, tama augwaligo te mu po wali peyu bidibo dao. Tama odolama, eno dwagi yai homu yai. ⁵ Nage we, meg i eno nagebolo e po ma obao, da tigidaligo dena hasi abagi dali dwagi yai homu eyu godolo yao. Eno gesi bomo yai po nagebolo aseña mabeo. Menio. Te dago Godigo po odobo gagalali sogo dago te bomo yai po odai dao.^a ⁶ Te we bidi dali dwagi yai homu eyu godolo

^a 1:5 Jon 13:34; 15:12, 17

eko kolesaga page e dao: dago Godigo bomo yai po dabe wali peyu bidao. Tama te Godigo po odobo gagalali sogo daj elama, tama megis e sogoba usu nagaselama, dagego te bomo yai po e tiwai odai dao, dagego te dwagi yai homu eyu godolo eko kolesaga eyu bidao.

⁷Magi baso meni. Bidi hauwa augwaligo da dwai sē tomoba kegainogo eyu tibo po ola mabo bidi dabe, augwali haniani tqba augwaligo po pusigi pai dao. Tama augwaligo “Te Jisas Krais e tqba asama bidali te bidi mugo tigi sali, te da bidi dabego tigi tiwai sali,” te po wabo augwaligo hagela ebo dao, te po page hogwa sabo dao. Te tobage bidi aga te tibo po wabo bidi, tama agai Krais dali boi bidi ebo bidi dao. ⁸Tama tibaso, dage dua dao. Dagego sē elama tama te Godigo dagebolo maiabo nai tagalabuo. Te menio. Dagego dwagi yai sabo nai mu sese somainogo dage dua dao.

Po silagasu wabo po

¹² Eno dagebolo pusubo po hauwa me elalubao. Tiali goli eno te po dagebolo asena tolobo hagela homu ebo. Eno dage suagasobo homu eba. Tama eyu, tama dagego gesabide eno te po dagebolo pusaibao, tama da tigidali te dwagi yai homu mu yaibao.

¹³ Godigo nago ama aga diaq sali. Tama nago te amago wai dabe augwaligo nage dali dwagi yai homu elama, bugagia bida po nagebolotolobao. Te tama dao.

Jongo Sela Sogo Wabo Aseani Pas

Hasia nedebo tau sabo po

Te e pas Jongo aga abagi Gaius agabolo aseña toloyu, tama te bidi Gaiusgo te Godigo po sela pabo bidi dabe tau sabo sède buba hwi po wali. Jongo gasa bidi side me po aseyu, te bidide dow dao wabo po wali. Te bidi me nogi da, te Diotrefes dao.

Dago te Godigo sę ebo bidi dabe tau sabo sę inao

¹ Ena monu dabe bidiyu tama ena Jisasgo sę ebo toboli bidi, eno e po Gaius nagebolo aşena tolobao. Nage eno abagi mu dao, eno homu mu eyu nage dali godolo mu ebo dao.^a

Gaius agai dwagi yai sę yai

⁵ Abagi mu, nago homu mu naga eyu, tama tigidali ama dabe augwali tau sabo sę yai. Tama tiyu, te nago konesiąwai bage augwali gasa buludu asali digi, augwali me nago tau siyu tebo dao. ⁶ Tama te nago tau sali bidi dabe augwaligo te ede bidibo Godigo we bidibolo te nago augwali

^a 1:1 Tpi 19:29; Rom 16:23; 1 Ko 1:14

dali dwagi yai homu eyu tau sabo se ebo po pusali. Tama te tobage bidi augwali Godigo po haniani buluba sela peyu, tama nago bidibo digi asobo si, teda nosali augwali gasaba bugagia ma pomainogo eyu nago augwali tau sao. Augwaligo Godigo se ebo dao. ⁷Augwaligo te sede Kraisgo po wagi pai. Tama peyu, tama augwaligo te Godigo po wali pisabo bagego augwali tau sabo hagela yai, te sabeo. ⁸Tama tibaso, da Godigo po wali pabo we bidi, dago augwali tau sao. Te kolesagade dago augwali dali hodobo se deli eyu, tama te Godigo mu po te haniani buluba tedela paibao.

Bidi nogi Diotrefes agai dwai kolesaga yai

⁹Eno po meba te nago bidibo digi bidibo Godigo we bidibolo aṣeṇa tolai. Tiali goli te bidi Diotrefes aga augwaligo polalubo bidi bidainogo homu eyu tama agai eno wabo po odobo menio. ¹⁰Tama tibaso, ena dage bidibo digi sabalobode, eno dagebolo agai te yali kolesaga te po hanilaibao. Agai nogi posobo dwai po haniani da dali wabo dao. Tama agai homugo te se ebo naga usu egobeo. Meni. Godigo po pusigi pabo bidi dabe, dago ama dabe, augwali teba asobo si agai augwali beba odasa pabo menio. Tama bidi meba augwaligo te asai ama dabe beba odasa painogo eboso, agai augwali dali te tigio olama, tama agai augwali te Godigo we bidi hani tomode me bidigio olama, augwali sela sabo dao.

Bidi nogi Demitrius agai dwagi yai kolesaga yai

¹¹Eno abagi mu, nago te dwai kolesaga ebo bidigo kolesaga wali pelamuo. Nago dwagi yai kolesaga wali pao. Dwagi yai kolesaga ebo bidi, te bidi Godigo bidi dao. Dwai kolesaga ebo bidi, agai God konebeo. ¹²Te bidi Demitrius, agade tigidali we bidi augwaligo aga nogi uwawa sabo po weyu, “Te aga dwagi yai bidi dao,” te po wabo dao. Tama aga homu mu eyu doloba pai kolesaga ebo te Godigo mu po dolo si dao. Tama da me dago aga dwagi yai bidi dao po weyu, aga nogi uwawa sobao. Tama nago koneai, dago po te mu po dao.

Po silagasu wabo po

¹³Eno nagebolo pusubo po hauwa me elaluai dao. Tiali goli eno te po nagebolo aṣeṇa tolobo hagela homu ebo. ¹⁴Eno nage tamadi suagasobo homu ebao. Tama eyu, tama nago gesabide eno te po pusaibao.

¹⁵Eno homugo nago homu dwagi yai elama bida. Nago ede bidibo abagi dabe augwali tigidaligo nagebolo siade dao po obao. Nago te nage dali bidibo dago abagi dabe augwali deli delibolo siade dao po wao. Te tama dao.

Jutgo Aşəani Pas

Hasia nedebə tau sabo po

Te Jutgo e pasde aşəani po tiwai si dwasianu te 2 Pitago aşəani pas tiwai elalubao. Te bidi Jut aga da, te Jems aga ama da wabo, te po obaso dago koneagameo, aga te Jisasgo amanu dao. Tama te tibo po ola mabo bage augwalide te bidi Jutgo wado po weyu, tama augwaligo ebo dwai dwai kolesaga te Godigo wei ponaibao wabo po aşəani. Tama te bidi Jutgo te Kraisgo po wali pabo we bidi te Krais ma asobo sogo bugagia tonaluao po weyu, tama Godigo augwali tau saibao wabo po pusali. Te tiwai po te ves 3, tede elalubao.

Dagego te duga konealubo homu dąu wabo bugagia tonalu tama te dwagi yai buku po dali boi bidi ebo bidi dabego po sela sayaqo

¹ Ena Jut da, ena te Jisas Krais agai sę ebo bidi da, tama ena Jems aga amanu dao. Tama eno e po dage Godigo i wali we bidibolo aşəna tolobao. Tama God dago Aya agai dage dali dwagi yai homu eyu, tama godolo mu ebo dao. Tama Jisas Krais me agai dage palibo dao. Augwali sigo dage dali tama tiyu, tama dage bugagia bidibao.^a ² Te eno homugo Godigo agai homu dene eyu tau sabo kolesaga me, te dage homu nagamea ilabo kolesaga me, te agai dage dali dwagi yai homu eyu godolo ebo kolesaga me, te kolesaga sela dagebolo geninama mu pedalaibao, te eno te homu ebao.

Tibo po ola mabo bidi dabe pedalali

³⁻⁴ Eno abagi mu dede, hasia eno homugo te Godigo da tigidali ma dobola sabo sęde eno po dagebolo aşəna tolabo homu bomo yai. Tiali goli, eno homu hasegelali, tama megı dagebolo gasagi yai po aşəna tolobao. Magi baso meni, gasa bidi dabe augwali dage Godigo we bidi hani tomoba geme asai, te sa asobo bage tiwai asai. Te polobadu te deli sogo naga te God agai aga po te aga we bidibolo mu mawai dao.

^a 1:1 Mat 13:55; Mak 6:3

Tama te po e dao, te dago te God dali Jisas dali augwali side konealubo po däu wao. Tiali goli, te geme asai bagego augwaligo ebo dwai dwai kolesaga bolainogo augwaligo te Godigo mani po hasegelali, tama tibo po dagebolo ola mayu, "Woo, te God agai da olo tau siyu, tama dago ebo dwai sege sela sabsaso, teda dago dwai dwai penani ebo kolesaga eyu da, te usu da," augwaligo te tibo po ola mabo da. Tama tibaso, eno meg i dagebolo e po aséna tolali, te dage bomo elama tama te Godigo mani po bugagia tonaluyu paliqo, augwaligo te po dolidali weyu yao. Tama augwaligo te tobage tibo po weyu, augwaligo te Jisas Kraisde hogwa sabo po wabo dao. Augwaligo dago Polalubo Bidi, te dago Genuai Bidi deli naga tudiba mubo dao. Tama polobadu mu Godigo po aséani bidi augwaligo te po aséani, te God agai te tobage dwai dwai se ebo bage sa munama tama sege mawaibao, te po te bukude aséani.

⁵ Te Godigo polobadu mu yali se po te dagego gisiga koneai digi, eno dagego ma konealumainogo eyu e po ma obao. Polobadu agai te Israel bidi hani tau siyu, tama augwali kalabus togaluyu elama, tama Isip to tagalama odasa pai. Tiali goli nosali augwali meba agai wali poba augwa homu tigidali musiawai, tama te po wali pisiqabaso agai augwali doloyu ela silai.^b ⁶ Tama te ensel mobo bidi meba me, augwalide ma kone palao. Te ensel mobo bidi meba augwaligo te Godigo augwaligo nogoba mani tonalubo bidi se hagela eyu, tama te se tagalali. Tama agai augwalibolo mani bidabo madi, te me augwali hagelama, tagalalio. Tama Godigo augwali dila pai aligabo bonogo nogo dunama, kalabus ilama, bida bida peyu bidibo, tama augwali te a bulu hulia sai digi tede mu däu olama bidibao. Tama augwali te a hulia sai digide bidiyu, tama augwali Godigo genuai bodolu sali te tonaluyu bidibadi, tama te moni po tu ebo sogo pedalaibao.

⁷ Te polobadu elaluali moni hanu si me, te nogi Sodom dali, Gomora dali, te hanu side pedalali dwai sege dagego ma konea palao. Tede bidali bage me, te hanu si pade elaluali dwasianu bulude bidali bage me, augwali tigidaligo te ensel mobo bidi mebago yali dwai dwai penani ebo se tiwai yali. Augwali penani sede bidaluali, tama augwaligo homu hodaloama, tama augwali te se bomo elama eyu pobeasa pali. Tama tibaso, Godigo augwali te moni sia te dagaludu tagala palali, tama augwali te siago ela silai. Tama dago augwalide te yali se sulama, tama dago koneai dao, te tobage dwai dwai se dago ilamuo, da te dene sidali weyu.^c

⁸ Tama te dage tomoba geme duala sagaselama bidibo bidi dabe augwaligo me te tobage dwai dwai kolesaga ebo dao. Haniani na eyu, augwali homu hodoliyu, tama augwaligo meda yai kolesaga augwa

^b 1:5 Sai 12:51; Nam 14:29-30 ^c 1:7 Gag 19:1-24

tigide ebo dao. Tama augwaligo dago Genuai Bidigo augwali tonaluabo bomo sela sayu, tama augwaligo te Godigo dagalude bidibo ensel mobo bidi dabe dali me nogi posobo po wabo dao. Te ensel dabe augwaligo ula yai bomo elaluali goli, te bagego nogi posobo po augwalide widu gebao.⁹ Augwaligo te posobo po olamuo. Suao. Polobadu te ensel mobo bidi dabego polalubo ensel nogi Maikel, agai te dwai haubo mobo tuni bidi Satan dali augwali si po konila yai, te isai bidi Mosesgo tigi hagede konila yai. Tama te sogo Maikel agai te Satan dwai nogi posobo po me wabeo. Te meni. Agai Satanbolo te po wai, “Genuai Bidi aga digi nage osola sulama, tama sege mawaibao,” te po wai.^d ¹⁰Tiali goli te tibo po ola mabo bidi dabe augwaligo te page konesiawai naide te dwai posobo po wabo dao. Me ma, augwaligo te dwai sede kuna koneani. Tama koneyu, te homu kolesaga meni yai bulu hasa tiwai bidiyu, tama augwaligo magi magi dwai se edubadi gebo dao, tama te tobage dwai kolesaga ebaso augwali mu dolama dene saibao.¹¹ Augwali hobedagia bidibao. Augwali te polobadu mu bidali dwai se yali bage tiwai ebo dao. Te polobadu bidali bidi nogi Kein, te Adam aga ogwa, te bidi aga pali dwai tu te augwali megi te tudu bilibo dao. Tama te dwai bidi me aga nogi Balam, agai yali se tiwai eyu, tama augwaligo masigi sabo pesa eyu, gasa we bidibolo dwai se yabo po hwa po mabo po wabo dao. Tama augwaligo te polobadu bidali bidi me nogi Kora agai yali se tiwai ebo dao. Te bidi Kora agai te Godigo wali po odobo hagela eyu, tama te po sela sabsaso, nosali dene mu sai. Tama e bidi dabe me augwaligo te tobage po sela sabo kolesaga ebaso, tama augwali me mu doloyu hagawaibao.^e

¹² Te dage deliba sisinama, tama ‘Da deli hani dao,’ te homu eyu, dagego nai tubo dao. Awe, tiali goli te tibo po ola mabo bage augwali me te nai tubo madiba aselama, tama augwaligo dagego ebo kolesaga dolobo dao. Augwali te gudubo ugwa dwai meda ilibo nai tiwai dao. Augwaligo dage dali nai tubadi, te augwali wi isayu tama augwa hasi naga kissa bidiyu, tama te nai tubode gasa we bidi tau sisayu, augwaligo te nai subigila tuyu ebo dao. Augwali te tulubage tulisiawai po tiwai dao, tama waligo augwali pona palobaso tedela pabo dao. Tama augwali te ni aga du walobo sogo walisiawai ebo, te tobage ni tiwai dao. Tama augwali te page sasia pai ni tiwai dao, te bidigo te ni page guda sawai. Tama augwali te tiwai bidiyu, du walobeo, we bidi tau sabo se dwagi yai ebo menio.¹³ Tama te moni tamu aji boji dini wadolama nosali asiyu, tama te aji dinigo meda yai pesa hania pedalobo dao, te aji sanide. Tama te tiwai te bidi dabe augwaligo te hale ilibo kolesaga hania ebo dao. Augwali te dagalude elalubo ho meba tiwai dao. Te tobage ho osogo ula eyu, ma

^d 1:9 Bom 34:6; Dan 10:13, 21; 12:1; Sek 3:2; Ped 12:7 ^e 1:11 Gag 4:3-8; Nam 16:1-35; 22:1-35

sula siyu ebo họ dabe dao. Te họ pabo te bugagia dolo pabo menio. Tama Godigo te dwai sisi mu a bulu hulia sai digi sisi yai elalubo, tama te tibo po ola mabo bidi augwali te hulia sai bulude sesemane sogo bidada peyu, bidada paibao.

¹⁴ Te polobadu bidi Adam aga ogwago ogwa tama nedada peyu, te nogo a olama me badu nogo deli wali, te bidi megoo ogwa te Inok da, aga polobadu mu bidai bidi dao. Tiali goli, agai te sogo polobadu te megoo bidiboo tibo po ola mabo bagede te po wai, “Suao, Genuai Bidi aga ensel mobo bidi umabo mu dali asaibao.^f ¹⁵ Tama aselama, tama agai te we bidi tigidali osola sueibao. Tama osola sulama, agai augwaligo aga tudiba muani bidi tebolo augwaligo sęgę hania ola mawaibao. Tama augwaligo Godigo po oda tagalama te dwai sę eyu, tama te God tagalali bagego dwai sesena pai nogi posobo po agade odu geai. Tama te yali sę tigidali me, te wali dwai po tigidali me wei ponoyu, tama Godigo augwali dene mawaibao,” te bidi Inok agai te po polobadu wai.

¹⁶ Te dage tomode bidiboo tibo po ola mabo bidi dabe, augwali te tigidali pedalobo naide hagela homu eyu, tama sesemane sogo augwaligo gasa we bidide dwai homu naga ebo dao. Tama augwaligo tigigo ebo kolesaga hodolama, tama augwaligo te kolesaga naga wali pabo dao. Augwaligo genuai po weyu, tama augwa nogi augwaligo uwababa sabo dao. Te gasa we bidi dabebolo augwaligo po mumubo po weyu, tama te bagego nai dabede pesę elama sabo dao.

**Te dago konealubo po dą̄ homu dagego
elalumainu eyu, te bugagia suoao po wai**

¹⁷ Te bidi dabe augwaligo te dwai sę yali goli, dage da, dage abagi dabe mu, te dago Genuai Bidi Jisas Krais agai po sela pabo bidi dabego dagebolo polobadu pusali po te dagego te po ma koneao. ¹⁸ Te sę pedelasiąbadi tama augwaligo dagebolo te po wai, “Te nosali te tq dali, dagalu dali si silibo sogo te pąba yagasobadi, tama bidi mebagoo Godigo da ola mabo wiegi yai doloba pai kolesagade gisugu wagasobo bidi dabe pedalaiabao. Tama augwaligo Godigo po tudiba muyu, tama bomo eyu, augwa tigigo tqde ebo dwai dwai kolesaga naga wali paibao,” te po augwaligo wai dao.^g ¹⁹ Te tiwai asobo bidi dabe augwaligo dage Godigo po wali pabo we bidi hani tomode si pedebo bage dao. Tama augwaligo e tqde ebo kolesaga naga wali peyu, tama Godigo Mobo Bidi agai augwali dali hodobo bidiboo menio, te mu dao. ²⁰ Tiali goli dage abagi dabe mu, dagego te Godide konealubo po bugagia dą̄ olama, tama bidigo aga be bugagia sę ebogia tama duga digi duga homu kolesaga dą̄ olama te sędę bomo yao. Te konealubo po te gasagi yai tedali mu dao. Tama te Godigo

^f 1:14 Gag 5:18, 21-24 ^g 1:18 2 Pi 3:3

Mobo Bidigo dage te gedu haluasa po wabo tau siyu, tama dagego te po sesemane sogo bugagia dą̄ weyu yao. ²¹Tama God agai dage dali dwagi yai homu eyu godolo mu ebo dao. Tama tibaso, dage duga ebo kolesagade bugagia tonaluyu tama dage aga pą̄de mu bidaluao. Tama tiyu, te dago Genuai Bidi Jisas Krais dagego tonalua, te agai dage dali homu dene eyu, tau siyu elama tama agai te dagebolo te bidada peyu, bidada pabo ula mabo sogo te dagego bugagia tonaluyu bidoqo.

²²Te dage tomode te we bidi meba augwaligo te tibo po ola mabo bagego wabo po odama, tama megi augwali te Godigo pode homu si ebo dao. Tama tibaso, dagego augwali dali homu dene eyu, tama tau somainogo te augwalibolo te homu bega sabo po wao. ²³We bidi mebago te dwai dwai sę ebo kolesaga ma gagalama, tama augwali te sia tomoba tulolualu bidi tiwai da. Tama tibaso, augwali te moni sia dabo buluba nosali pidali weyu, dagego augwali polo tau siyu ma sao. Te we bidi meba gasagi yai dao. Augwaligo augwa tigigo tqde ebo dwai dwai kolesaga naga wali pobaso, dagego augwali dali homu dene eyu tau sao. Tialima, dagego augwaligo ebo dwai kolesaga wai selama gagaidali weyu dage dua eyu, wi yao. Augwaligo dwai dwai kolesaga ebogo augwaligo gudubo ugwa dabe meda ilali. Te ugwide me dage boi bidi homu mu eyu yao. Tiali goli te hobedagia bidibo we bidi tau sao.

²⁴Te God agai bomo elalubaso, agai dage bugagia tonaluyu, dage me tulalugobeo. Tama agai dage tau siyu, tama dage dwai sę me isiawai, dwagi yai homu pemene mu eyu, tama agai dage aga moni ula elaluyu gegemani ebo madigi teba sela pabo usu yaibao. ²⁵Tama God agaduba deli naga bidibo dao. Agai da tau siyu ma dobola somainogo, tama agai dago Genuai Bidi Jisas Krais e tqba tagala palali. Tama tibaso, dago Godigo nogi ugwbaba sinao. Awe, tama tiyu, God aga polalubo tuni bidi bidimainao, tama aga genuai bomo mu dali, agai moni ula dali si elalubaso, tama dago aga nogi ugwbaba sinao. Te tigidali sogo polobadu aga tama bidai, te megi me aga tama bidibao, te tigidali sogo nosali God aga tama bidada peyu, bidada paibao. Te po mu po dao. Tama dao.

Kraisgo Geme Dualali Sę Pedelabo Po Jonbolo Ola Mani

Hasia nedebu tau sabo po

Te boi bidi dabe augwaligo te Kraisgo po wali pabo we bidibolo dene dali sęge dali mayu bidali. Magi baso meni, tama aga wali pabo we bidigo te Jisas Krais augwa Genuai Bidiba konealubo homu dąu wai elalubaso. Te Godigo nosali yabo kolesaga augwaligo konemainogo eyu, Godigo te sę te Jisas Kraisbolo ola menama, tama Kraisgo te nosali pedelabo kolesagade yabo sę po te aga wali pali bidi Jonbolo waselali. Te haniani na ebo tiwai yali sogode ola mayu waselai dao. Tama dago te bidi Jongo nade suali nai po nedebaso da, teda dago konemainu ebao, te Godigo bomogo te dwai sę ebo bage te Jisas Krais Genuai Bidigo, te agai nogode te Godigo bomogo te dwai sę ebo bage tigidaligo bomo nosali aiyaba mu elalueibao. Tama agai te Satango bomo me aiyaba elalueibao. Tama te Jisasgo ebo sę tigidali siminagasobo sogode, Godigo te yali sęgede bomonama dolaluali we bidi dabe augwaliba te gamonama bidada peyu, bidada pabo nai mawaibao. Te augwali God dali bidu, te augwalide sęge mu meni yaibao. Magi baso meni, Godigo te tigidali nai gesi nigelama pedalubo sogo tama tieibao. E buku nogi “Revelesen” dao, tama te nogi page te “te geme dualali po waselebo” wabo dao.

**Te bidi Jisas Kraisgo te aga po wali pabo bulu we bidi a
naga me badu si buluba te po ola tolobo po
tagala palali po**

(Daq 1-3)

1 ¹Te eno megis aseña tolobo po, polobadu te po geme dulaluai, tama Godigo te po Jisas Kraisbolo waselama ola mani. Te Kraisgo aga sę ebo bidi dabebolo te nosali gana pedalobo sę hania hanilainogo tama Godigo agabolo te sę ola mani. Tama agai aga ensel mobo bidi me deli te Jon enabolo tagala palama, tama ena agai sę bidi, tama te tagala palali ensel mobo bidigo te waselali po enabolo ola magasai. ²Tama ena Jon, eno te sę tigidali sulama, tama te po me eno koneai, tama eno hanilama

te Godigo po dąu weyu, tama Jisas Kraisgo enabolo pusali po me, te pode eno te po wai dao, "Te mu po naga dao." ³ Eno e po aşəani, te nosali gana pedalobo sę po dao. Tama e aşəani po gasa we bidibolo nedebō bidi, te bidi dwagi yai homu pemene eyu, bugagia bidaibao. Tama aga nedebō po odobo we bidi me, augwaligo te aşəani po odama, tama wali pobaso da, teda augwali me dwagi yai homu pemene eyu, bugagia bidaibao. Magi baso meni. Te sę pedalobo sogo paba yagasai dao.

Jongo a naga olama me badu nogo si Godigo
po wali pabo haniba aseai po

⁴Ena Jon, eno e po dage a naga olama me badu nogo si te Godigo po wali pabo we bidi hani, dagebolo e po aşena tolobao, te dage te genuai to Esia te genuai hanu dabede bidibo we bidi. God aga te megı bidibo, tama polobadu mu aga bidaluai, tama nosali aga ma asiyu, tama eno homugo te God agai da olo mu tau sabo te kolesaga dali, tama te dwagi yai homu nagame ilibo kolesaga dali te si dageba mao. Tama eno homugo te a naga olama me badu nogo si mobo bidi augwali me, te tuni bidi God aga au yali duabo sia sai pəde bidibo bage, augwaligo me te dwagi yai homu eyu olo tau sabo kolesaga dali, te dwagi yai homu nagame ilibo kolesaga me dagebolo mawaibao.^a ⁵Tama Jisas Krais me, agai dagebolo te kolesaga si dagebolo momainao, te eno homugo. Aga te Godide homu kę̄ pai bidi bidiyu, tama agai Godigo po tigidali dolo mu pusali bidi dao. Aga da te isama, tama isali we bidi dabe tomode bidama, tama aga te hasia mu gu pagede ma hodaloali bidi dao. Aga da, te tigidali tőde bidibo tuni bidigo polalubo genuai bidi dao.

Agai da dali dwagi yai homu eyu godolo mu ebo dao, tama aga isaligo dago dwai sę yali sege tigidali sela sawai dao, tama da megi olo bidibo dao.^b Tama tiyu, agai da tau selama, tama dabolo genuai sę menama, tama da te tuni bidi kingo pris hani bidi dabe nigliama, tama megi da te Jisas aga Aya Godibolo me te lotu po weyu, sesemane sogo aga sę ebo pris bidi dabe bidibao. Tama tibaso, eno homugo agai genuai wiegi yai nogi dali, te we bidi tonalubo bomo dali me bidada peyu, bidada pomainao. Te mu tama dao.

⁷Suaο, Krais aga te dagalu pō me tomodu tiāba asaibao, tama tigidali bidi augwa digi gedugo aga te pō tomodu tiāba asobo sueibao. Tama te aga tigide enani bidi dabe augwaligo me sueibao. Tama tigidali tōde we bidi augwaligo aga asobode homu eyu, tama agai augwalibolo dene wei ponaibao homu elama, tama augwali homu sēge eyu gela waibao. Awe, te tama tiaibao. Mu tama dao.^c

⁸ Te Tigidali Bomo Elalubo Genuai Bidi God agai aga bidibo pagede te po wai, “Ena da, ena digi te hasia bididuali bidi dao, ena te nosali sogo

^a 1:4 Sai 3:14 ^b 1:5 Tib 89:27; Ais 55:4 ^c 1:7 Sek 12:10; Jon 19:34, 37

mu bididueibao wabo bidi mu dao,” agai te po wai. Te God aga te meg i bididubao, tama polobadu mu aga bididuai, tama nosali aga ma asaibao.^d

Jongo Krais suali po

⁹Ena Jon, ena dugu ama dao. Ena dage dali hodobo te Jisasde wadolama, tama da deli hani elalubaso, tama gasa bage augwaligo dabolo dene dali, sege dali mayu elama, tama da tigidali hodobo bomo elama dolaluyu, sege bugagia tolobo dao. Tama ena Godigo we bidi tonalubo sę tomode dage dali hodobo bidibao. Tama eno te we bidi dabebole Godigo po dali, te Jisasgo hania hanilali mu po dali, te po si augwalibolo pusubaso augwaligo ena sela sanama, ena te tamu aji tomode elalubo dwasianu tə nagi Patmos teba kalabus mugi pali dao. ¹⁰Tama ena e bulude bidibadi, ena te moni Sarere ulade digi na tiwai ebadi Godigo Mobo Bidi agai enaba dagana sagaselama, tama ena tudi badu bidi me deligo po dage bomonama weyu i wabo odali, te genuai bu wabo nai yadogoli te biugel bu wabo odai. ¹¹Tama te wali pode te po wai, “Nago naga gedugo subo sę po tigidali te bukude aşenama, te Godigo po odobo we bidi bidibo bulu a naga olama me badu nogo si, te buluba nago te sę po aşena tolao. Nago te po Efesus buluba aşena tolobadi, me te Smerna buluba, me te Pergamum bulu, me Taiataira, me Sardis, me Filadelfia buluba tolobadi, me te Laodisia buluba te po aşena tolao,” weyu te po enabolo wai.

¹²Tama enabolo te po wali bidi eno begelama suainogo yai. Tama ena gesabidi begelai, tama eno suali, te kapa nagi gol, te golgo nigali lam sole a naga olama me badu nogo si tama munalubo suali. ¹³Tama eno suali, te sole dabe munalubo tomode bidi me deli te bidi mu tiwai tede dolalubo suai. Tama te bidi aga bobage ugwago saç halua sai bidi, tama te bidigo tigide eno suai, te kapa golgo nigali nai aga hagawia bagulai nai te eno suai.^e ¹⁴Tama te bidigo tobolu nisi dali tedela mu yai, te kibu sipsip nisi tiwai, tama te tedela dagalu pə tiwai yai. Tama te bidigo gedu te sia bogoli ebo tiwai yali. ¹⁵Tama te bidigo saç ula mu yali, te augwaligo te gasagi yai kapa nagi bras te genuai sia dabo digi ulama aji tiwai pedaluyu, tama te gegemani ebo tiwai aga saçade te tama tiwai mu yali, Tama eno odali, agai dogonide po wabo te mone sabo aji u wabo tiwai odai.^f ¹⁶Tama te bidigo dolo nogo sawali daide te hq a naga olama me badu nogo si elalubo suali. Tama te si badu poai yai bainat hwą ge te hwą mu poa pai, te bidigo pedauwalidu te buluba dia soai. Tama aga gesabidi ula mu yai, te sia bomo elama giligade nanobo tiwai yai.

¹⁷Tama eno te bidi sulama, tama ena aga saç pageba kidu pogulai, tama ena te isai bidi pigulali tiwai yai. Tiali goli agai dolo nogo ena

^d 1:8 Ped 22:13 ^e 1:13 Dan 7:13 ^f 1:15 Dan 10:6

tigiba munama, tama agai te po wai, “Nage wi tagalao. Ena da, ena digi te hasia bidaluali bidi dao, ena te nosali sogo mu bidaluibao wabo bidi mu dao.^g ¹⁸Ena bidibo ula dali bidibao. Polobadu ena isai, tiali goli nago ena bidibo subao, te ena sesemane sogo bidada peyu, bidada pabo ula selama, megi bidibo dao. Tama tibaso, eno bomo elalubao, te isibo kolesaga dali, te isai bidi dabe osogo bidabo madi dali, te si tonalubo bomo eno elalubo dao. ¹⁹Tama tibaso, nago te gedugo suali sę po aseąo, te megi pedalobo sę me, te nosali pedalabo sę po me aseąo. ²⁰Tama nago eno dolo nogode te hq a naga olama me badu nogo si elalubo suali. Te lam sole gol a naga badi me si tama te me nago suai. Tama te nai dabe geme dualali page e dao: te hq a naga olama me badu nogo si wali, te Godigo po wali pabo bulu a naga olama me badu si te bulude bidibo we bidi tau sabo ensel mobo bidi dabe dao. Tama me te a naga olama me nogo si te lam sole po wali, te a naga olama me badu nogo si Godigo po wali pabo we bidi hani dabede po begelama weyu,” agai te po wai dao.

Efesus buluba Godigo po odobo we bidibolo aseai po

2 ¹Te bidigo enabolo e po me wai, “Te hasia Efesus hanude Godigo po odoyu bidibo we bidi tonalubo ensel mobo bidibolo e po aseña tolao: eno dolo nogogo te hq a naga olama me badu si eno tolaluyu, tama ena te a naga olama me badu nogo si te lam sole tomode bilibo bidi dao. Tama tiyu, eno e po nage dali obao: ²Te nago ebo kolesaga tigidali eno koneani, te nage sę dene ebo dao. Te me eno koneai, nage bomo elama sęge bugagia tolama dolaluyu, tama nago te dwai sę ebo bidi dabe augwali hagela mu yai. Te bidi dabe augwaligo nagebolo te po wai, ‘Da me te Jisasgo sę ebo bidi dabe dao’ wai. Tiali goli te menio, augwali te Jisasgo sę ebo bidi dabe menio. Tama nago augwaligo wabo po osola suai dao, tama nago augwaligo ebo kolesaga page gegelama koneai, tama augwali te ili po naga wabo bidi dabe dao. Nago tama yali augwali osola suali sę eno koneai. ³Tama te bidi dabe augwaligo nage suali, te nage ena wali bilibo dao, tama augwaligo nage dali dwai sę yali dao. Tiali goli nago bomo elama dolaluyu, te dwai sę nage dali eyu sęge mabo nago bugagia tolalubo dao. Te nago tigi dene ebo hagela ebeo. Nago te sę ebo te eno konebo dao. ⁴Tiali goli, eno po me nage dali elalubao: polobadu nago enaba te konealubo po hasia dą̄ wali sogo, te sogo nago wiegi yai homu ena dali mu yai, tialima megi nago ena dali te hasia dwagi yai homu eyu godolo yali tiwai ebo menio. ⁵Tama polobadu nago dwagi yai kolesaga yai, tialima nago te kolesaga tagaliyu tama nage tulaluai dao. Tama nago te polobadu yali kolesaga ma homugo koneyu, tama nage homu begeleyu, te hasia yali wiegi yai kolesaga ma yao. Nago te sę esiąyu, tama nage

^g 1:17 Ais 44:6; 48:12; Ped 2:8; 22:13

homu beigelesiayu da, te ena nage pageba pedalaibao, tama eno nagote lam sole elalualai ena ma sagasaibao, aga nage dali me elalugobeo.

⁶Tialima te kolesaga me nago eyu tama te dolo dao: nago te bidi Nikolas hanigo ebo dwai dwai kolesaga dali boi bidi homu ebo dao. Eno me, eno augwaligo ebo kolesaga dali boi bidi homu ebo dao.”

7 “Te olo elalubo bidi, agai te Godigo Mobo Bidi agai Godigo po odobo we bidi hani dabebole e wabo po bugagia odao: ‘Niwai bidi agai bomogo te dwai sę ebo kolesagago bomo aiyaba elaluyu da, te bidibolo eno aga usu da weyu, tama agai te bidi bidibo ula mabo ni du sela tumainao waibao. Tama te bidi bidibo ula maiabo ni te God aga gide elalubo dao.’ ”^h

Smerna buluba Godigo po odobo we bidibolo aseai po

11 “Olo elalubo bidi, agai te Godigo Mobo Bidi agai Godigo po odobo we bidi hani dabebole e wabo po bugagia odao: ‘Niwai bidi agai bomogo te dwai sę ebo kolesagago bomo aiyaba elaluyu da, te si sogo isibogo te bidi munu me dologobeo. Mu menio.’ ”

Pergamum buluba Godigo po odobo we bidibolo aseai po

¹² Te bidigo enabolo po me ma wai, "Te megis nago te Pergamum bulude Godigo po odoyu bidibo we bidi tonalubo ensel mobo bidibolo e po asena

^h 2:7 Gag 2:9; Ped 22:2

17 “Olo elalubo bidi, agai te Godigo Mobo Bidi agai Godigo po odobo we bidi hani dabebole e wabo po bugagia odao: ‘Niwai bidi agai bomogo te dwai sę ebo kolesagago bomo aiyaba elalubo bidi, te bidibolo eno megi geme dulalubo tubo nai nogi mana meba mayu, tama eno te tedela yai dwasianu masigi me agabolo mawaibao. Tama te masigide gesi nogi așeai, tama niwai bidi mego te nogi konegobeo. Te masigi sali bidi, aga naga te nogi koneaibao.’ ”^j

Taiataira buluba Godigo po odobo we bidibolo aseai po

¹⁸ Te bidigo enabolo po me ma wai, "Te meg i nago te Taiataira bulude Godigo po odoyu bidibo we bidi tonalubo ensel mobo bidibolo e po asēna tolao: ena Godigo Ogwa dao, tama eno gedu te sia bogoli sesena pai bomonama dabo tiwai, tama eno sāq̄a te kapa meda meni yai eyu te gegemani ebo tiwai ebo. Tama eno e po nagebolo ola tolobao. ¹⁹ Nago ebo kolesaga tigidali eno koneai. Tama eno koneani, nago te bidi dabe augwali dali dwagi yai homu elama tama godolo mu eyu, tama nago homu enade kēa peyu, tama nago tigidali bidi dabe tau sabo sē ebo dao. Eno koneani, tigidali sege nageba pedalobode te nage bomo elama te sege bugagia tolobo dao. Tama eno koneani, te tiwai kolesaga hasia nago yai, te wiegi yai, tama meg i nago te nosali ebo kolesaga te dwagi yai mu me ela pabo

ⁱ 2:14 Nam 22:5, 7; 31:16; Bom 23:4 ^j 2:17 Sai 16:14-15; 16:33-34; Jon 6:48-50

dao.²⁰ Tiali goli, eno te po me nage dali elalubao. Nago te we Jesebel nage dali bidibo we, agai ola mabo po dagego odobo dao. Te wego te po wabo dao, ‘Ena da, te Godigo nosali yabo sę po megı pusubo we dao.’ Tiali goli agai eno sę bidi dabebolo te penani ebo kolesaga wali pomainogo ola mayu, tama augwaligo te tibo god dabebolo ula mani nai tumainogo ebo dao. Te kolesagade te wego augwali ili po ola mabo dao.^k ²¹ Eno homugo aga homu begelemainogo, tama eno aga osogo sula tagaliyu bidimainogo yai. Tiali goli menio. Aga te homu begelebo te homu esiąyu, te penani ebo kolesaga tagalama tudiba muabo te homu menio. ²² Tama tibaso, suao, te eno dene dali, genuai gasi dali te webolo mawaibao. Tama aga dali te penani yali bidi dabe, augwaligo homu begelesiäyu, tama aga dali yali dwai kolesaga tudiba musiąyu da, teda eno augwalibolo me te genuai dene dali sęgę dali mawaibao. ²³ Tama agai wai dabe me, te eno augwali mu ela silaibao. Tama tiyu, te Godigo po odobo we bidi tigidali augwaligo koneaibao, te ena da, te tigidali bidigo homu kolesaga osola subo bidi dao. Tama dage deli delibolo eno dagego yali kolesaga dolo si wei ponaibao.”

²⁴ “Tiali goli megı eno e wabo po dage te gasa Taiataira bulude bidibo we bidi dali obao. Dagego te we Jesebelgo dwai tibo po wali pisawanı. Tama augwaligo agai pode te po wabo dao, ‘Te kolesaga da, te Satango ebo kolesaga page mu dao, te bidi hauwago konesiąbo po dao.’ Tama augwaligo te po dagebolo wai digi, dagego te dwai po wali pabo menio. Awe, te usu dao. Eno dagebolo te po obao, dagebolo eno gasa sęgę mabo sę me mugobeo. ²⁵ E sę naga yao: dagego megı ebo wiegi yai kolesaga bomo elama tolalua peyu, tama ena ma asobo sogo bugagia tonaluao. ²⁶ Tama niwai bidi agai te dwai kolesaga ebo aiyaba elalubo bidi, te bidi agai te eno kolesaga wali peyu, aga te bodolu muani sogo siligibu, tama te bidi agabolo te eno te nogi dali bomo dali si menama, tama aga te we bidi haniani tőde bidibo bage augwali tonalubo toboli bidi bidimainao. ²⁷ Te sę eno agabolo mawaibao, te eno Ayago agai ena te we bidi tonalubo sę mani sę tiwai dao. Tama te bidi agai te ain dono tulama, augwali bomogo tonaluabao. Tama te tőgo nigai sini te bidi mego donogo elebadı te dwasianu pebeda pabo tiwai, te bidigo haniani tőde bidibo we bidi augwali aga bomogo tonaluabao.^l ²⁸ Tama eno agabolo te kigamu mu dagalude pedalobo te genuai hq, te me agabolo mawaibao.”

²⁹ “Olo elalubo bidi, agai te Godigo Mobo Bidi agai Godigo po odobo we bidi hani dabebolo wabo po bugagia odao.”

Sardis buluba Godigo po odobo we bidibolo așeai po

3 ¹ Te bidigo enabolo po me ma wai, “Te megı nago te Sardis bulude Godigo po odoyu bidibo we bidi tonalubo ensel mobo bidibolo e

^k 2:20 1 Kin 16:31; 2 Kin 9:22, 30 ^l 2:27 Tib 2:8-9

po aṣenā tolao: eno te a naga olama me badu nogi si te Godigo mobo
 bido dabe elaluyu, tama eno te a olama me badu nogi si hō te eno
 nogogo tolalubo dao. Tama ena digi eno e po nagebolo ola tolobao. Tama
 nago ebo kolesaga tigidali te eno koneai. Gasa we bido augwaligo te po
 dagede wabo dao, ‘Te Sardis bulude bidibo Godigo po odobo we bido
 hani augwali bomo elama, wiegi yai kolesaga wali peyu bidibo dao,’
 augwaligo dage dali te po wabo dao. Tiali goli menio, eno gedude dage
 isai bido tiwai dao.² Tama tibaso, dage hodaloyu, te pila mubo tagalao.
 Tama hodaloama, tama te dagego dwasianu me elalubo dwagi yai
 kolesaga te bugagia tonaluyu, tama bomo elama te dwagi yai kolesaga
 geninama pedalomainao, te kolesaga dolidali weyu yao. Magi baso
 meni, te dagego ebo kolesaga tigidali te eno Godigo gedude tigidali te
 usu niba kadu wabo menio.³ Tama tibaso, te dagego polobadu Godigo
 po mu sali, te po dagego odali, te pode homugo ma kone palao. Tama te
 pode homugo ma kone paliyu, ge neyu, homu begeleyu bida. Te dage
 pila muani tagaliyu hodalusiąy da, te ena dagego bidibo digi te geme
 nai wi sainu asobo bido tiwai eyu, tama ena dage pageba asobo sogo te
 bodolu dagego konegobeo.^m ⁴Tiali goli, dage Sardis bulude bidibo we bido
 tomode te we bido meba te bulude bidibadi digi te dwai kolesaga medago
 augwali ugwa meda ilibeo. Te we bido dabe augwaligo te tedela yai ugwa
 munama ena dali bilaibao. Te augwali te sēde usu si dao.⁵ Tama niwai
 bido agai te dwai kolesaga ebo aiyaba elalubo bido, te bido agabolo eno
 te tedela yai ugwa tiwai munama, tama agai nogi te isisāma gamonabo
 we bido nogi aṣenā bukude eno agai nogi sela sagobeo. Menio. Te agai
 nogi eno Ayago gesabidide me, te aga mobo bido ensel dabe augwaligo
 gesabidide me te bidigo nogi po eno pusaibao, te aga eno bido dao, te po
 waibao.”ⁿ

⁶“Olo elalubo bido, agai te Godigo Mobo Bidi agai Godigo po odobo we
 bido hani dabebolo wabo po bugagia odao,” te bidigo enabolo te tama po wai.

Filadelfia buluba Godigo po odobo we bidibolo aṣeai po

⁷Te eno suali bidigo enabolo po me wai, “Te megi nago te Filadelfia
 bulude Godigo po odoyu bidibo we bido tonalubo ensel mobo bidibolo e
 po aṣenā tolao: ena da, te Godigo bido naga dao, ena magi sę isawai tedali
 gasagi yai bido dao. Tama ena te mu kolesaga ebo page bido mu dao. Te eno
 te polobadu bidali bido Devit agai tū dalabo ki tolalubao. Eno te tū dayu,
 tama niwai bido mego te tū ma paligobeo. Tama eno te tū paliyu da, te niwai
 bidigo te tū ma dagobeo. Tama eno e po nagebolo ola tolobao.^o ⁸Nago ebo
 kolesaga tigidali te eno koneai. Eno koneani, nago bomo dwasianu elaluali

^m 3:3 Mat 24:43-44; Luk 12:39-40; Ped 16:15 ⁿ 3:5 Mat 10:32; Luk 12:8 ^o 3:7 Ais 22:22;
 Jop 12:14

digi tama nago ola mani po wali peyu, tama nago eno nogi hogwa sabeo, eno nogi geme dualobeo. Suao. Te nago gesabidide te eno tū dala munama elaluai, tama niwai bidigo te tū me paligobeo.⁹ Suao. Nago te Satango bidi hani augwali koneai, tama augwaligo te po wabo, ‘Da te Juda bagego hani dao.’ Tiali goli menio. Augwali te tigide naga te Juda bage da wabo dao, tama augwaligo ebo kolesagade te Juda bage mu menio. Tialima te bidi dabe augwali eno selama, tama augwali te nago saqā pageba kidu sugunagasiyu, eno nage godolo mu ebo homu yali te augwaligo mu koneaibao.¹⁰ Nago eno po wali peyu, tama sege nageba pedalobode te nage bomo elama dolaluai. Tama tibaso, nage eno bugagia tonaluyu, tama te usu sabo sę te tigidali we bidibolo te tigidali tqde pedalainogo eyu, te sę nagebolo pedalidali weyu eno nage paliaibao.¹¹ Ena tamadi nage pageba asaibao. Tama nago te ebo dwagi yai kolesaga tagaligio, te nago bomonama dąq wao. Te gasa bidigo nagebolo ili po olama, tama nage te wiegi yai kolesaga tagaliyu te Godigo mabo nai sisayu bididali weyu, bugagia dąq wao.¹² Niwai bidigo te dwai kolesaga ebo aiyaba elalubo bidi, te bidi aga eno te Godigo Moni Lotu Be tempel te be pos ni bulali dąq olalubo tiwai eyu, tama aga te dwagi yai be tagalama buluba munu me ma soagobeo. Tama te bidi agade eno Godigo nogi aseyu, tama eno Godigo genuai hanu nogi me aseaiabao. Te gesi hanu te Jerusalem dao. Te hanu eno Godigo nogogo asiyu, te dagalu tagalama e tqba dulaibao. Tama eno gesi nogide digi, te me eno agade aseaiabao.”¹³

¹³ “Olo elalubo bidi, agai te Godigo Mobo Bidi agai Godigo po odobo we bidi hani dabebolo wabo po bugagia odao,” te bidigo enabolo wai.

Laodisia buluba Godigo po odobo we bidibolo aseai po

¹⁴ Te eno suali bidigo enabolo te po me ma wai, “Te megı nago te Laodisia bulude Godigo po odoyu bidibo we bidi tonalubo ensel mobo bidibolo e po aseña tolao: ena te mu po wabo page bidi mu, ena te Godide homu kęq pai bidi bidiyu, tama eno te Godigo po tigidali dolo mu te we bidibolo pusubo dao. Sesemane sogo eno mu po naga pusubo dao. Ena te Godigo nigali nai tigidali page mu dao. Eno e po nagebolo ola tolobao.¹⁵ Nago ebo kolesaga tigidali eno konea silai. Eno koneani, nago eno po selama, tama ena wali asobo dao. Tiali goli, nago eno po sali digi, nage bomo elama te po wali pabo menio. Me ma, nago eno po oda mu tagalobeo. Nage te tiwai tomode naga bidibo dao. Te dwali. Eno homugo nage te tiwai iyu bidigio. Deli kolesagade naga nago homu kęq peyu bidao.¹⁶ Tiali goli nage te kolesaga si tomode bidibaso, nage eno pedauwalidu bugulabo homu ebao, te bidi mego te pusu meni yai aq̄ bugulubo tiwai yaibao.¹⁷ Nago te po wabo dao, ‘Eno nai hauwa selama, tama eno walu hauwa elalubao. Tama ena magi nai me sq̄ pabeo,’ nago

^p 3:12 Ais 62:2; 65:15; Ped 21:2

te po wabo dao. Tiali goli nago naga bidibo page bugagia konebeo. Nage da, nage te dwai mu bidibo, nage mu hobedagia bidibao. Tama nage magi nai meni yai mu bidiyu, tama nago gedu halua sai bidiyu, tama nago tigi bolu olo bidibao.¹⁸ Tama tibaso, eno e po mobo mabo po nagebolo mobao. Eno te gasagi yai kapa nogi gol te elalubao, te kapa gol te siaba ulama te dwai nai sela sənāma, tama te wiegi yai yai. Tama eno homugo nago te kapa gol abelao, te nago doado bage hauwa elalumainogo yao. Tama nago te tedela yai ugwa te naga tigi haluabo abelao, te bidi dabe augwaligo te nago tigi bolu olo elalubo sulama, tama nage hale idali weyu te tama kolesaga yao. Tama nago te geduba muabo ili yabo marasin me abelao, te nago gedu ma tonono bilibo usu emainogo yao.¹⁹ Te eno bidi meba wei eyu da, te eno augwali dali wado po weyu, te augwaligo kolesaga eno dodolobo dao. Tama tibaso, nago bomo elama, tama homu hodolama, nago yali dwai kolesagade ge neyu, tama nage homu begelao.²⁰ Odao. Ena te tude dolaluyu, tama eno te tuba begebo wabo odao. Tama niwai bidi me agai eno te be tuba bebegoo wabo po odoyu, te be tū dayu da, te ena te be tomoba pelama aga dali bidaibao. Tama ena aga dali nai tuyu, tama aga ena dali nai tuyu bidaibao.²¹ Niwai bidigo te dwai kolesaga ebo aiyaba elalubo bidi, te aga dali eno usu da weyu, aga te ena pade duawaibao, te ena eno tuni bidigo duayabo madide duabo sogo. Te polobadu ena me te dwai kolesaga ebo aiyaba elaluama, tama ena Aya dali agai duabo sia sai te naide dugulalu bidibo dao. Te tiwai te bidi ena dali bidaibao.”

²² “Olo elalubo bidi, agai te Godigo Mobo Bidi agai Godigo po odobo we bidi hani dabebolo wabo po bugagia odao,” te eno suali bidigo enabolo wai.

Kibu sipsip waigo te dagalude buku dagabaso, te dwai dene mabo nai te tōde we bidi augwaliba pedelaibao

(Dqj 4-11)

Augwaligo Godibolo dagalude lotu po wai

4 ¹ Te bidigo enabolo te po wabo silama, tama eno te gasa na tiwai eyu tama eno suali, dagalude tū me deli dalaluai. Tama te pedauwalidu polobadu eno odali agai po enabolo mayu te genuai yadogoli tiwai naigo te bu wabo tiwai eyu, tama agai te po wali, “Nage edaba holao, tama eno nagebolo te nosali pedalabo sę tigidali ola mawaibao.” ² Tama polo mu, te Godigo Mobo Bidigo ena tigiba dagana sagaselama, tama dagalude eno te tuni bidi duabo nai sia sai elalubo suai, tama bidi me deli te duabo nai

¹⁹ 3:19 Prs 3:12; Hib 12:6

sia saide dulaluai. ³Tama aga gesabidi te ula gegemani yai, te wiegi yai dila pai mama yai masigi nogi jaspa me, te gasa mama yai masigi nogi konilian, te masigi si ula ebo tiwai yai. Te unigi bidi mego te tuni bidi duabo nai sia sai bobegela sai elaluai, tama te unigi bidi eno te wiegi yai masigi nogi emeral te ni yano tigi poai tiwai eno suai.^r ⁴Tama te 24 wabo tuni bidi duabo nai sia saigo te genuai tuni bidi bidibo digi bobegela sai elaluai, tama te 24 polalubo tobolu bidi augwali te duabo nai sia saide dualama bidai. Tama te polalubo tobolu bidi dabe augwaligo te tedela ugwa muai elaluai, tama augwaligo tobolude te kapa golgo nigai wiegi yai madi muai elalubo, te eno suai dao. ⁵Tama te tomode bidibo genuai tuni bidigo duabo digide te be sele eyu, tama be kulu kulu wai, te moni u wabo odai. Tama te tuni bidigo gesabidide te sole a naga olama me badu nogi si te ula elaluai. Te sole ula elalubo te Godigo mobo bidi a naga olama me badu si dao.^s ⁶Tama te genuai tuni bidigo gesabidide te magi nai me deli elalubao, te nai te genuai tamu ąi tiwai dao. Tama te gesabidi subo dula tiwai, te hania mu subo dao.

Tama te bidibo ula elalubo hasa me si me si augwali te tomode bidiyu, tama augwali te tuni bidigo wiegi yai duabo nai sia sai bobegelalu bidiyu, tama augwali dolaluai. Te bidibo ula elalubo hasa me si me si augwaligo gedu te hauwa te gesabidide me elalu, te tudi badu me elalu, te tigi sibi mu simina selama halualubo dao.^t ⁷Tama te bidibo ula elalubo hasa me deli aga te moni hudigi ebo kibu laion hasa tiwai bidibo eno suai. Te hasa me aga te bulmakau omai tiwai suali. Te bidibo ula elalubo hasa sela wali te bidi gesabidi tiwai yai. Tama te tudi badu hasa te ba kemodage ugadu bola bilibo tiwai eno suali.^u ⁸Tama te bidibo ula elalubo hasa me si me si, te augwali deli deligo bogo te a naga olama me badu nogi deli elaluali. Tama gedu hauwago augwali tigi te bulu badu me tomo badu me usu nama mu elaluai. Te bogo dologode me elaluali. Tama ulade dali te hulide dali augwaligo te balia weyu te po wabo,

“Genuai Bidi Godigo tigidali bomo elalubao, te
aga wiegi yai tedali, wiegi yai tedali, wiegi yai
tedali mu dao. Tama polobadu aga bidai, tama
megi me aga bidibo, tama nosali aga asaibao.”^v

Tama augwaligo te po wabo toma me tubo menio.

⁹Tama te bidibo ula elalubo hasa dabe, augwaligo te God aga te sesemane sogo bidada pabo te tuni bidi duala tiālubo nai saide dulalubaso, te augwali homu wiegi yai mu ebo dao. Tama tibaso, augwaligo aga ula yai bomo dali, aga nogi dali te si ugwaba siyu, tama aga dali usu da po weyu balia wedu gebo dao. Tama tibaso da,¹⁰ te bidi

^r 4:3 Ese 1:26-28; 10:1 ^s 4:5 Ese 1:13; Ped 1:4; Sek 4:2 ^t 4:6 Ese 1:22 ^u 4:7 Ese 1:5-10;
10:14 ^v 4:8 Ais 6:2-3; Ese 1:18; 10:12

sese olama me si me si polalubo toboli bidi augwali te tuni bidi duabo naide dulalubo bidigo gesabidiba kidu sugunama basi gulubo dao. Tama augwaligo agabolo lotu po weyu, aga nogi uwabawa sabo dao, aga te sesemanse sogo bida pabo bidi dao. Tama tiyu, augwaligo augwa te kapa golgo nigai wiegi yai madi dabe te tuni bidi duabo nai sai pageba te madi guda mayu, tama augwaligo te po wabo,

¹¹ “Genuai Bidi, nage dago God dao. Tigidali bidigo nage dali wiegi yai homu ebo te usu mu nage dali emainogo, tama tiyu nago nogi uwabawa siyu, tama augwali nage dologoba bidagasomainogo tebo dao. Magi baso meni, nago tigidali nai nigai. Te naga homugo digi nago te nai nigelama pedalai, tama megi te nai tigidali e tqde elalubao,” augwaligo te po agabolo wabo dao.

Jongo te buku me augwaligo dąu wai suai

5 ¹Tama eno suai, te genuai tuni bidi duabo naide dulalubo bidigo dolo nogo ugwdadu daide eno suali, te buku tiwai nai me munalubo. Te bukude așeani po te me tomode elaluyu, me bulu badu elaluyu yai. Tama augwaligo te a naga olama me badu nogo si te dąu wabo naigo te buku dąu walai.^w ²Tama eno suali, Godigo bomai ensel mobo bidi me deli agai po dagą genuai weyu te po wali, “Niwai bidi aga te wiegi yai bidi da obaso, te bidi agai te bukude dąu wali nai dalama, tama te dąu wali buku dagabo usu egowe?” ensel bidigo te po wai. ³Tiali goli mena bidi dagalude bidibo bidigo me, te tqde bidigo me, te tq dologode bidibo isai bidigo me, te dąu wali buku dagalama, te tomoba suainogo ebo usu menio. ⁴Tama eno suali, te buku dąu wali dagalama tomoba suabo bidi gegali te me sube. Tibaso, ena gela hauwa wali. ⁵Tama tibaso, polalubo toboli bidi me deli agai enabolo te po wali, “Nage gela wagio. Suao. Bomo elalubo tuni bidi te Juda hanibolo pedalai, aga bomo te moni hudigi ebo kibu laiongo bomo tiwai dao. Te bidi aga polobadu bidai Juda bidi Devitgo waqo hanide pedalali bidi. Aga te gelali ni pagede kulubi pedalobo tiwai gilama yai. Tama tiyu, agai te dwai kolesaga ebo aiyaba elalubaso, agai te a naga olama me badu nogo si te dąu wali nai togolama, agai te buku dagawaibao,” te toboli bidigo enabolo te po wai.^x

Jongo agai te kibu sipsip wai suai

⁶Tama te sogo eno suali, te kibu sipsip wai dolalubo suai, te augwaligo aga hwago ela muai subo tiwai homu yai. Tama aga te genuai tuni bidi duabo nai dali te bidibo ula elalubo hasa me si me si

^w 5:1 Ese 2:9-10; Ais 29:11 ^x 5:5 Ais 11:1, 10

te pąde aga dolaluyu, tama te polalubo toboli bidi dabe tomode bidai. Tama agai te bulmakaugo tobolude elalubo gąu tiwai te a naga olama me badu si badi, te agai gedu me te a naga olama me badu nogo si elalubo. Tama te gedu dabe augwali te Godigo mobo bidi a naga olama me badu nogo si dao. God agai augwali te tigidali tqba tagala palai dao. ⁷Tama te kibu sipsip wai aga pelama, tama te genuai tuni bidigo duabo nai pageba sabolama, tama tede dulalubo bidigo dolo nogo ugwidu daide elalubo buku agai sai. ⁸Tama agai te buku sai digi, te aga genuai bidi mu bidibaso, te bidibo ula elalubo hasa me si me si badi, te bidi sese olama me badu nogo me si me si te polalubo toboli bidi augwali te kibu sipsip wai pąba pelama, kidu sugunigi pai. Tama te tigidali toboli bidi deli deli augwaligo te elebo nai gita tiwai badi, te wiegi yai kapa golgo nigai pou te tola sobadi yai. Tama me te paua denami ebo nai te tigidali poude elalubo siago deyu, tama te holobo denami yai hano te Godigo we bidi augwaligo Godibolo wabo gedu haluasa po tiwai holobo eno suai. ⁹Tama augwaligo gesi tęabi me tama wai,

“Nago te buku selama, te dąu wali nai togobo usu mu dao. Magi baso meni. Augwaligo nage ela muani, tama nago isibo kanemego te bidi dabe augwali ma abelai, te augwali Godibolo mayu tiai dao. Te nago tigidali we bidi hanide we bidi meba abelali, te tigidali haniani po wabo bulude me, te tigidali haniani tigi yai bidi hanide me, te tigidali genuai tqde bidibo bagede me te nago we bidi meba abelai. ¹⁰Tama abelama, te bage nago augwali te dago Godibolo lotu po weyu sesemanne sogo aga sę ebo pris bidi hani pedalumainogo yali, augwaligo Godigo sę emainogo yai. Tama tiyu augwali tuni bidi te tqde bidaibao,”

augwaligo te tęabi po tama wai.^y

Augwaligo te kibu sipsip wai nogi ugwaba sai

¹¹Tialima, eno tonolo ma bilabadi, tama eno te Godigo dagalude bidibo ensel mobo bidi augwaligo pedauwalide moni po wabo odai. Tama te ensel dabe augwali hauwa mu te handet milion bidibao, tama bidigo augwali nedebu usu me egobeo, te tausen tausen te kisu umabo mu bidai. Tama augwali dolaluyu, tama te genuai tuni bidi duabo nai me, te bidibo ula elalubo hasa me si me si me, te polalubo toboli bidi dabe me, augwali tomode bidiyu, tama te ensel mobo bidi

^y 5:10 Sai 19:6; Ped 1:6

dabe augwaligo te bage bagulama dolaluali.^z ¹²Tama dolaluyu, tama augwaligo i bomonama weyu, e tama balia wai,

“Te kibu sipsip wai polobadu augwaligo ela mubaso, agai te tigidali nai tonalubo bomo mu sabo usu eyu, tama te tigidali wiegi yai nai me, te wiegi yai homu kolesaga me, tama te tigidali genuai bomo agade usu elalubo dao. Tama aga nogi te tigidali bidigo ugwaba sabo te usu da, tama ula yai bomo agabolo mabo me, te usu dao, te agabolo genuai nogi mabo me te usu dao.”

¹³Tama tiyu, te Godigo nigali nai tigidaligo wabo po eno odali, te dagalude bidibo naigo me, te tqde bidibo naigo me, tama te tq aiyaydu dologode bidibo nai me, te tamu qjde bidibo, te nai dabe tigidaligo te po wabo odai. Awe, te tigidali bulude bidibo Godigo nigali naigo po eno odali, augwaligo e po wai,

“God aga te wiegi yai duabo naide tuni bidi dulalubao, tama te kibu sipsip wai me, augwali sigo nogi dago ugwaba sao, augwali sibolo genuai nogi mu mao, te ula yai bomo me mao, te genuai bomo me dago mao, tama sesemane sogo bidada pabo te usu mu yaibao.”

¹⁴Tama te bidibo ula elalubo hasa me si me si augwaligo te pode te po wai, “Mu dao.” Tama te polalubo tobolu bidi dabe augwaligo basi gulama, lotu po God de Krais si dali wai.

Te kibu sipsip waigo te buku dąu wali nai a naga olama me badu nogo deli togwa s̄awai

6 ¹Tama eno suali, te kibu sipsip wai agai te buku, te dąu wali nai a naga olama me badu nogo si elalubo buku, te agai tolalubo eno suai, tama agai te buku dąu wali nai hasia me deli togwai. Tama eno odali, te bidibo ula elalubo hasa me si me si tomode me deligo agai te po wabo, te dogoni te dagalude be kulu wabo tiwai yai. Agai te po wai, “Nage asao,” po wai. ²Tama eno ma tonono bilibadi, tama eno te tedela yai kibu hos asobo suali, tama te kibude duayali bidigo enesigi tolaluai. Tama augwaligo te bidi agabolo te wąbi hwıbo bomo aiyaba elalubo bidibolo mabo te tiwai madi augwaligo agabolo menama, tama aga sęba tagala palai. Tama te bidi aga pelama, te wąbi hwıbo bomo aiyaba elaluabo sę egi peyu, tama tiyu agai te wąbi hwıbo bomo aiyaba elaluabo bomo hauwa elalubao.^a

³Tama te kibu sipsip wai agai te buku dąu wali nai me si wali togwa s̄awai, tama te bidibo ula elalubo hasa me sigo wabo po eno odali, te

^z 5:11 Dan 7:10 ^a 6:2 Sek 1:8; 6:3, 6

hasa sigo te po wali, “Nage asao.” ⁴Tama gasa kibu hos me pedalai, te mama yai. Tama te kibude dualasa asobo bidibolo augwaligo bomo mawai. Tama te bidi agai te tqde we bidi tomode elalubo boi pibo sogo togolama, tama genuai wąbi hwıbo sogo gagalama, tama bidi dabe augwaligo augwa hasi bidi ela mubo sę gagalamainogo te bidibolo te bomo mawai. Tama tiyu, augwaligo te bidi agabolo te genuai poa pai hwą ge te sę emainogo mawai.^b

⁵Tama te kibu sipsip waigo te buku dąu wali nai sela wali togwa s̄awai, tama te bidibo ula elalubo nai selago wabo po eno odali, “Nage asao,” wali. Tama eno ma tonono bilibadi, tama eno te sisi yai kibu hos asobo suai. Tama te kibude duawali bidi agai nogode te walu dabe skel ebo nai tolaluai.^c ⁶Tama eno odali, te bidibo ula elalubo hasa me si me si tomode me deligo pedauwalide wabo po, tama te pedauwalidu te we bidigo tubo nai mude te po wali, “Nago te tubo nai wit ge, te gego dwasianu sini paganama tama te naigo sęgę skel ela suo. Tama te nai abelabo masigi hasegelao, te genuai muao, te masigi sabo sę ebo bidigo deli sogo sabo masigi tiwai si ilao. Tama nago te masigi hauwa meni yai bagego tubo nai nogi bali, tede me tama tiao, te bali gego dwasianu sini me si me deli paganama, tama te naigo sęgę skel ela suo. Tama te nai bali sela abelabo masigi nogi genuai naga nogi yao, te sę ebo bidigo deli sogo sabo masigi tiwai si dao. Tiali goli, nago te tubo wel dali te tubo aji wain si dolamuo,” te po wali.

⁷Tama te kibu sipsip waigo te buku dąu wali nai me si me si wali te togwa s̄awai, tama eno odali, te bidibo ula elalubo hasa tomode me deligo agai te po wali, “Nage asao.” ⁸Te po obaso eno tonono ma bilali, tama eno sewa yai kibu hos me deli asobo suali. Tama bidi te kibu hosde dulaluali, tama te bidi aga nogi isibo kolesaga da wali. Tama isai bidi bidibo madi aga wali asai. Tama augwaligo te we bidi hani tigidali tomode buguluyu, tama hani me si me si nigelili. Tama augwali sibolo augwaligo te hani dabe tonalubo bomo mawai. Tama te bomogo augwali sigo te we bidi me habu badu ela muao wali, te poa pai ge hwągo hwıbogo ela muainogo, tama te nai nasi me eyu, te haniani gasi me eyu, tama te tqde bidibo haniani uni hasago me ela tuyu tama elama augwali sigo te bomo selama, te we bidi me habu badu ela muao wali.^d

⁹Tama te kibu sipsip waigo te buku dąu wali nai a naga wali togwai, tama eno suali, te isai bidigo noma bidi meba augwali te Godibolo maiabo nai ulubo alta sai dologode bidai. Polobadu te bidi dabe augwaligo Godigo po te we bidibolo pusubo sę eyu, tama te pode augwaligo homu kę̄ai pai bidi dabe bidai. Tama tibaso, te boi bidi dabego augwali ela munama isai dao. ¹⁰Tama te noma bidi augwaligo

^b 6:4 Sek 1:8; 6:2 ^c 6:5 Sek 6:2, 6 ^d 6:8 Ese 14:21

i bomonama weyu tama wai, “Tigidali nai tonalubo Genuai Bidi, nage magi sę me esiayu wiegi yai mu bidibo, tama nago kolesaga te mu naga ebo dao. Te tqde we bidi augwaligo dwai sę da dali elama, tama da ela muani. Tede dago homugo nago augwali dali po tu eyu, dago kanemede augwalibolo wei ponao. Nisu naga sogo bidai madigi tama nago augwalibolo wei nisu ponaibawe?” te po wai.¹¹ Tama agai bobobage tedela yai ugwa augwali deli delibolo mena mena pai, tama agai te po augwali dali wai, “Dage toma tuyu, olo dwasianu sogo nagamea pai bidi bida. Tama nosali boi bidi dabe augwaligo dage dali deli sę yali bidi dabe me, duga ama dabe me ela muaibao, te augwaligo dage ela muani tiwai yaibao. Tama nosali augwaligo te ela muani bidi dabe nedebu usu ebaso da, te God agai dagego kanemede augwali wei ponaibao,” te po wai.

¹² Tama eno tonono ma bilabadi agai te buku dą̄ wali nai a naga olama me badu nogo deli wali te togwai, tama eno suali, tqde genuai tq mali pedalai. Tama giliga ge begelama, te sisi yai gagawai. Tama te polua genuai ebadi te mama yai, te kaneme tiwai mu pedalai.^e ¹³ Tama dagalude hq dabe tqba tulaluyu, te ni kaya du te moni bomai wali asiyu sela sayu tulalubo tiwai yai. ¹⁴ Tama te dagalu me aga tomode buguluyu, te somo bebe pelama dą̄ wabo tiwai yai. Tama tigidali bulu du me, te tamu ą̄j tomode elalubo dwasianu tq tigidali me, augwali memenege elama tama bidali bulu taga soai, tama augwali gasa buluba kilasa pai.^f ¹⁵ Tama te tqde tuni bidi dabe dali, te genuai nogi yai bidi augwali me, te ami genuai bidi augwali me, te walu hauwa dali te masigi hauwa munalubo bidi badi, te bomo yai bidi augwali me, tama te tigidali bidi, te masigi sisabo sę ebo bidi dabe me, te bugagia olo bidibo bidi dabe me, tigidali hodobo augwali te tq olua bede duala siyu ela bilai, tama te genuai bulu dude elalubo masigi dologoba teba duala sisa bilai. ¹⁶ Tama augwaligo te bulu du dali masigi dabe sibolo i weyu te po wai, “Dagego da mesega sigulao, te genuai tuni bidi duabo naide dulalubo bidigo da suidali weyu, tama te kibu sipsip waigo sębę elalubo te aga gesabidide da duala saio, agai da suidali.^g ¹⁷ Magi baso menio. Te genuai sogode te augwali sigo sębę elaluali te wei ponoyu dwai dene maiabo sogo dao, te megi pedalali dao. Tama niwai bidi aga doligulama te sę yainogo ebo aiyaba elaluibawe? Te mu menio,” augwaligo te po wai.

Godigo te Israel we bidi hauwa mu te 144,000 sa muani

7 ¹Te sę tigidali ela silai digi, te nosali eno suali, te Godigo ensel mobo bidi me si me si olama te tq sesege me si me si bogo badu

^e 6:12 Ais 13:10; Jol 2:10, 31; 3:15; Mat 24:29; Mak 13:24-25; Luk 21:25 ^f 6:14 Ais 34:4

^g 6:16 Hos 10:8; Luk 23:30

dolalubo suali. Augwaligo te tq me si me si bogo badu te wali yabo te augwaligo dą̄l ola sai elaluali, tama te waligo tq me, tamu aj̄l me, te ni dabe me te waligo me degelebo usu egobeo.^h ²Tama eno suali, gasa ensel mobo bidi te giliiga pedalobo badu ugaba holobo eno suai. Agai te bidibo ula elalubo God agai we bidi sa mubo nai tolalubo eno suali, tama agai te Godigo tq dali tamu aj̄l dali dolomainogo bomo mani te ensel mobo bidi me si me sibolo bomo elama i wali. ³Agai te po wai, “Dagego asesa polo te tq me, te tamu aj̄l me te ni dabe dolamuo,” te po wali. “Dago te dena Godigo sę ebo bidi dabe augwali deli deligo gebode te augwali sa mubo nai hasia muna muna paibao. Tama nosali duga te tigidali nai dabe dolagameo,” wali. ⁴Tama eno odali, te sa muabo we bidi augwali nedali. Augwali te we bidi nedali dą̄l te 144,000 nogi wabo namba te genuai mu dao, teba usu nigi pali. Te Israel we bidi hani deli delide meba sa muani. ⁵Tama tiyu, te bidi sese umabo hauwa mu te 12,000 te bidi Juda aga hanide augwaligo te sa muani nai sali, tama te bidi Ruben aga hani augwaligo me te bidi sese hauwa mu te 12,000 sali, tama te bidi Gat aga hani augwaligo me te tiwai naga te bidi sese hauwa mu 12,000 sali. ⁶Tama te bidi Asergo hani augwali me te bidi sese hauwa mu 12,000 sobadi, te bidi Naptali hani augwali me te bidi sese hauwa mu 12,000 siyu, te bidi Manase hani augwali me te bidi sese hauwa mu te 12,000 sali, ⁷te bidi Simeongo hani me te bidi sese umabo mu te 12,000 sai, me te bidi Livai hani me te bidi sese umabo mu 12,000 sobadi, te bidi Isakar aga hani me te bidi sese hauwa mu te 12,000 sali, ⁸te bidi Sebulun hanigo me te bidi sese umabo mu 12,000 siyu, te bidi Josepgo hani me te bidi sese hauwa mu te 12,000 sali, te bidi Benjamin hanigo me te tama bidi sese naga 12,000 sai dao. Te Israel hani dabe tama te ensel mobo bidigo augwali te Godigo sa muna muna pali.

Genuai we bidi hani augwaligo Godigo nogi uwabawa sai

⁹Tama te we bidi sa mubo sę tigidali ela silai digi, eno tonolo ma bilibadi, tama eno te we bidi hauwa augwali sisinama bidibo suali, tama umabo mu, te bidigo te we bidi augwali nedebu usu me egobeo. Te we bidi augwali te tigidali bidi hani dao, tama te tigidali bulu tqde me, te tigidali haniani tigiwali yai me, tama te tigidali haniani po wabo bulu bidi dabe dao. Augwali te tuni bidi duabo nai te gesabidide dali te kibu sipsip wai gedude augwali dolaluali. Tama augwaligo te bobobage tedela yai ugwa munama, tama augwaligo nogode te kokonas yabe tolaluai. ¹⁰Tama augwaligo bomo elama i weyu tama wai, “Dago God aga te tuni bidi duabo naide dulalubao, tama te kibu sipsip wai me, augwali sigo te da ma dobola sabo sę yabo bomo mu elalubao, tama tialigo megis da bugagia bidibao.” ¹¹Tama tigidali ensel

^h 7:1 Jer 49:36; Dan 7:2; Sek 6:5

mobo bidi augwaligo te genuai tuni bidi duabo nai dali, te polalubo tobolu bidi dabe dali te bidibo ula elalubo hasa me si me si tama bobegelaluyu augwali dolaluali. Tama augwali te tuni bidi dulalubo digi te badu basi gulama, tama gesabi tqba munama, augwaligo te Godibolo aga nogi uwawa sabo lotu po wali.¹² Tama augwaligo te po wai, “Mu tama dao. Dago dena God dali wiegi yai homu mu eyu, tama dago agai genuai ula yai bomo po hania pusao. Agai wiegi yai homu kolesaga tigidali elalubao, tama dago aga dali nage usu da weyu, tama agai nogi uwawa sao. Te bomo tigidali agai naga dao, tama te tigidali nai tonalubo bomo me, tama e nedali wiegi yai kolesaga tigidali augwali agade naga elalubo dao, sesemane sogo te bidada peyu, bidada paibao. Te mu tama dao,” augwaligo te po wai.

Te dene sali bidi hanigo sege silaiba wali po

¹³ Tama polalubo tobolu bidi me deligo te po ena dali wai, “Te bobobage tedela yai uwawa muani we bidi dabe, te augwali de dawe? Tama augwali menadu asaliwe?”

¹⁴ Tama eno agabolo te po wei ponai, “Genuai bidi, naga digi nago koneai.” Tama agai enabolo te po wai, “Te we bidi dabe augwali te boi bidigo nogode genuai sege dali te dene dali sali we bidi dabe dao. Tama augwaligo te sege bugagia tolaluama, tama te sege tolalubo sogo sililio. Tama augwaligo augwa ugwa te kibu sipsip wai kanemego aj telawai, tama augwaligo ugwa te tedela yai dao.ⁱ ¹⁵ Tama tibaso, augwali te Godigo tuni bidi duabo nai te gesabidide dolalubo bage dao. Tama siade me hulide me augwali te Godigo wiegi yai lotu be tempel tede bidiyu, agabolo lotu po wabo dao. Tama aga te genuai tuni bidi dulalubo naide dulalubo bidi aga digi augwali dali bidiyu, tama augwali paliyu, tama augwali bugagia tonaluabao. ¹⁶ Tama tiyu, augwali nasi munu me esiqyu, tama augwali aj nogone munu me ma egobeo. Tama augwali giliga posolo esiqyu, tama magi nai mego augwali tigi posolo me iligobeo.^j ¹⁷ Magi baso meni, te genuai tuni bidi duabo nai gesabide bidibo kibu sipsip wai, te aga digi agai augwali tonalubo bidi bidaibao, te kibu sipsip tonalubo bidi agai aga sipsip dabe tonalubo gilama tiwaibao. Tama agai augwali te aj ulu pedalobo digi odasa pelama, tama augwaligo te bidabo ula yabo aj saibao. Tama Godigo augwaligo gedude gela wali gedu aj hola sabaso, tama augwali gela ma wagobeo,” te polalubo tobolu bidigo enabolo te po wai.^k

Te kibu sipsip waigo te buku däu wali nai me badu nogo si wali me deli togwa sawani

8 ¹ Te kibu sipsip wai agai te buku däu wali nai me badu nogo si te me deli togwa sawai, tama tibo si dagalude kili kili me wasiqyu,

ⁱ 7:14 Dan 12:1; Mat 24:21; Mak 13:19 ^j 7:16 Ais 49:10 ^k 7:17 Tib 23:1, 2; Ais 25:8; 49:10; Ese 34:23

tama me po me wabe, tama hauwa sogo bidibo ąq yali, te sesabini gana bidalio, te hap aua tama dao. ²Tama te dwasianu sagia sai elalu bidali sogo silama, tama nosali eno te God gesabidide dolalubo ensel mobo bidi a naga olama me badu nogo si eno suali, tama augwaligo te ona tiwai nai a naga olama me badu nogo si selama tolaluai.

³Tama gasa ensel mobo bidi me te Godibolo nai ulubo sae yali paba dolagasai. Tama agai te denami ilabo nai te kapa golgo nigai pou tolaluai. Tama augwaligo agabolo te denami ebo nai paua hauwa mani, te agai te nai te Godigo we bidi tigidaligo wali gedu haluasa po dali manama, tama te si te golgo nigai saede te siago ulumainogo tiaibao. Te sae te genuai tuni bidi duabo nai gesabidide elalubo, tama te denami ebo paua dali te gedu haluasa po dali agai te duabo naide dulalubo bidibolo olo mawaibao.¹ ⁴Tama te paua hano ebo denami ebo me, tama te Godigo we bidi augwaligo gedu haluasa po wabo te me, te tigidali te ensel mobo bidigo nogode tolaluai tagaliyu, tama God gesabidiba naga uwawa te denami ebo hano holai. ⁵Tama tilama, te ensel mobo bidi agai te denami yai nai muani pou selama, tama agai te nai ulali saide sia dage te poude paganama, tama agai te sia tqba aiya sawai. Agai te sia sawai digi, tama te dagalude be kulu kulu weyu, genuai po me weyu, tama dagalude be sele eyu, tama tq mali yai.

Ensel mobo bidi me si me si augwaligo te ona tiwai nai elali po

⁶Tama te sogo te ensel mobo bidi a naga olama me badu si augwaligo te ona tiwai nai a naga olama me badu nogo si tolaluai, augwaligo te ona tiwai nai elainogo sisi elaluai. ⁷Tama te hasia wali ensel mobo bidi me deli aga te ona tiwai nai elali, tama te talua ge tulubage me, te sia dali, te si te kaneme dali gelama, tama e tqba tulaluai. Augwaligo te tq me tigidali ni dabe dali te sela tama usu siyu dąj ilali, tama siago te tq me habu badu deyu, te ni me badu habu badu deyu yali. Tama te ni yabe tiwai nosai dabe tigidali, te me te siago dai.

⁸Tama te hasia wali enselgo aga sę silama, tama te si wali ensel mobo bidi aga te ona tiwai nai elali, tama tialima, augwaligo magi nai me deli sayu tama te genuai bulu du me siago dabo tiwai eyu, tama te nai tamu ąjba tulaluai. Tama augwaligo tamu ąj usu siyu dąj mubo te sela nigelali, tama me habu badu begelama te kaneme pedalali. ⁹Tama augwaligo te tamu ąjde bidibo ula elalubo nai tigidali tomode bugulama, tama te nai hani sela me tali muani, tama te nai hani me deli te sia dabo genuai bulu dugo isilali. Tama augwaligo te tamu ąjde elalubo sip, te moni geba dabe, te sip me bugulama tama tiyu, te hani sela tedali muani, tama te sip hani me deli dolai.

¹ 8:3 Amo 9:1

¹⁰Tama te tudi badu te sela wali ensel mobo bidi aga te ona tiwai nai elali, tama te badi, te genuai hq me deli te sole ula ebo tiwai mu yali, te sole ula ebo hq dagalu tagalama e tqba tulaluai. Augwaligo te tigidali pabo aq aga hani sela tedali bugulali, tama hq te aq hani me deliba tulaluali, tama te tigidali aq ulu asobo digi me te sia bogoli tulaluali.
¹¹Tama te tulaluali hq nogi te Ha Ebo Marasin da wai. Tama augwaligo te aqgo hani sela muani, tama te aq hani me delide te ha ebo marasin pedalai. Tama bidi hauwa augwaligo te ha ebo marasin aq tuali, tama te marasingo augwali elama tama augwali isali.^m

¹²Tama te sę silama, tama te me si me si wali ensel mobo bidi aga te ona tiwai nai elali, tama tebadi, tama augwaligo te giliga me, poluade me, te tigidali hqde me augwaligo tomode daj sel a muani. Tama te giliga ge me badu dolali, te polua me tama tiyu, te tigidali hq me te me badu dolali. Tama tibaso, augwaligo ula ebo sogode te ula bugagia ebeo. Ulade te me badu pedaigo te giliga gego ula bugagia ebeo. Tama hulide me te polua dali, hq dabe dali, augwaligo me badu ula ebo pedai te bugagia ula ebeo.ⁿ

¹³Tama eno suali, te ba kemodage tiwai ba me deli dagalu tomodu sigide bola pabo eno suali. Tama eno odali, agai i bomonama weyu te po wali, “Hobede, hobedeo, te tqde bidibo we bidi hobedagia bidaibao. Te gasa ensel mobo bidi me sela augwaligo te ona tiwai nai elebo si, tebode te genuai dwai dwai sege te tqde we bidi augwaliba pedalaibao,” te bago te po wai.

Te nogo a wali ensel mobo bidigo te ona tiwai nai elai

9 ¹Tama te nogo a wali ensel mobo bidigo te aga ona tiwai nai elali, tama tebode eno suali te hq me deligo te dagalu tagalama, e tqba tulalubo suai. Tama augwaligo agabolo te tq dedage aba mu yai te aga page meni yai, te ki mawai. ²Tama agai te tq dedage dabode, tama te dedagedu te genuai sia hano tiwai pedalai. Tama te tq dedagede pedalali moni hano agai te giliga de te dagalu si te haluai, tama augwali si te hulia sai. ³Tama te kuli mano tiwai nai dabe umabo augwali te hano ebo tagaliyu, tama augwali e tqba dulai. Tama augwaligo bomo te nai hwq, te bidi gq kelebo nai hwago bomo tiwai sali. ⁴Tama augwaligo te kuli mano nai dabebolo te po wai, “Dagego te noswai dabe me, te ni me deli me, te tqde pedalobo haniani nai dabe me, te nai dabe tigidali dologio. Dagego te bidi dabe augwaligo gebode te Godigo sa muani nai musiawai bidi augwalibolo naga dene mao.^o ⁵Dagego te tiwai bidi dabe augwalibolo dene mayu, tama polua a naga silibo si te dene mabo tagalao. Tiali goli dene mobadi dagego augwali ela mugio,” te po wai.

^m 8:11 Jer 9:15 ⁿ 8:12 Ais 13:10; Ese 32:7; Jol 2:10, 31; 3:15 ^o 9:4 Ese 9:4

Tama te kuli mano nai dabe augwaligo te bidi dabe augwalibolo dwai dene mabo, te nai nogi hwą agai te bidi gą̄ keleyu dene mabo tiwai ebo dao.⁶ Te tama tebo sogo, polua a naga sogo, te bidi dabe augwali te isabo tų gegebo sę ebadi, tiali goli augwaligo sugobeo. Awe, te augwaligo homugo te isabo homu godolo yai, tiali goli te isibo augwali suyu wi paibao.⁷

⁷Tama eno suali, te kuli mano augwaligo hwı̄ainogo sisi elalubo te hwı̄bo bidigo duabo kibu hosgo ebo tiwai gilama tigi palibо nai elaluai. Augwaligo tobolude te kapa nogi gol tego nigai wiegi yai madi tiwai nai elaluai, te tuni bidigo toboli madi tiwai. Tama augwaligo gesabidi te bidi gesabidi tiwai dao.⁸ Tama augwaligo toboli nisi bobobage, te we dabego toboli nisi tiwai. Tama augwaligo kele te moni hudigi ebo kibu laiongo nai gą̄ kelebo genuai kele tiwai elaluai. ⁹Tama augwaligo hagawiade te kapago nigai holobo ugwa muai elaluai, tama augwaligo bogo te saba saba ebogo u wabo te hwı̄bo bidi duabo nai te kibu hosgo kegasa peyu udabo tiwai eyu te nai kidagalo wabo tiwai ebo dao. ¹⁰Augwaligo danu te nai hwągo danu tiwai elalubo, te danude te bidibolo dwai dene mabo marasin te elalubao. Tama augwaligo danu dabego bomogo te bidi dabe dolobo sę elaluyu, tama te polua a nagade te sę ela bilibo. ¹¹Tama augwa te sę ebo tuni bidi me deli aga te toboli bidi bidai. Te tuni bidi aga te tő dedage aiyanu mu yai digi te tő page meni yai digi tonalubo ensel mobo bidi dao. Tama augwaligo Hibru pogo te ensel mobo bidi nogi Abadon wai. Tama te Grik pogo te bidi nogi augwaligo te Apolyon wai. Te Grik po nogi begelama tama dago pogo te bidi nogi augwaligo te Tigidali Nai Dolobo Bidi da wabo.

¹²Tama te hasia yali genuai sęge da, te silai dao. Odao. Sęge si digi te me elalubao, tama te nosali pedalaibao.

Te nogo me badu deli wali ensel mobo bidigo te ona tiwai nai elali

¹³Tama te a olama me badu nogo deli wali te ensel mobo bidi agai te aga ona tiwai nai elali, tama eno po me wabo odali. Te Godigo gesabidide te kapa golgo nigai sai elalubo, te Godibolo maiabo nai ulubo sai dao. Tama te saide elalubo gą̄ yai nai me si me si tomodu te po me wabo eno odali. ¹⁴Agai te a olama me badu nogo deli wali te ensel mobo bidi dali te po wali, “Te ensel mobo bidi me si me si olama augwali te genuai pabo aji nogi Yufretisde kalabus elalubo da wali, tama nago augwali olo tagala palao,” te po wai. ¹⁵Te po obaso, agai te ensel mobo bidi me si me si augwali tagala palali. Tama te ensel mobo bidi me si me si augwali sisi elama, te we bidi ela mubo sę ebo sogo tonaluali. Te sę ebo bodolu mani kibu be me, te bodolu mani polua me, te bodolu mani sogo me, te we bidi ela

^p 9:6 Jop 3:21; Jer 8:3 ^q 9:7 Jol 2:4

mubo bodolu mani ua me augwali tonaluyu bidaluali. Tama te bodolu mani ua asama, tama agai augwali tagala palama, tama augwaligo te we bidi hani tigidali daj̄ sela muani, tama me hani deli ela muai.¹⁶ Tama te kibu hosde duawali ami bidi dabe hauwa mu, te bidi sese hauwa mu da wali, te 200 milion. Te tama nogi ebo eno odai.¹⁷ Tama eno te na ebo tiwai eyu, tama te kibu hos dabe me te hosde duawali bidi dabe augwali suali, tama augwali e tama bidibo eno suali. Bidi dabe augwaligo te kapago nigai hagawia polibo nai muai, te holobo ugwa tiwai muai, tama te muani nai meba mama yai, te sia bogoli tiwai mama yai, me sisi yai, me sewa yai, te masigi nogi salfa te tiwai sewa yai. Tama te kibu hos dabe augwaligo toboli te moni hudigi ebo kibu laiongo toboli tiwai yai. Tama sia me, hano me, te dwai kugumini ebo masigi salfa te sewa yai masigi te sia deyu augwaligo pedauwalidu te hamena tiwai sia deyu, tama te sia bogoli buluba pedalai.¹⁸ Augwaligo tigidali we bidi hani daj̄ sela ilali, tama augwaligo te we bidi hani me deli te dwai nai selago augwali ela muani. Te sia badi, me hano, me te masigi salfa sia deyu, te tama nai sela te kibu hos dabe pedauwalidu pedalam, te we bidi hani deli ela muani.¹⁹ Magi baso meni. Te hos dabe augwaligo te we bidi ela muabo bono te augwa pedauwalide me te augwa danude me elalubo dao. Tama augwaligo danu te hasamani dabego danu tiwai, tama toboli me elaluai. Tama bidi augwaligo te naigo dolobo dao.

²⁰ Tama tigidali gasa bidi dabe augwali te dwai nai selago ebo sede isisawai bage, augwali homu begelesiama tama augwa nogogo nigali nai tagalama tudiba musiayu me bidaluali. Tama tiyu augwaligo te dwai haubo noma bidi dabebolo lotu po wabo tagalobe. Augwaligo te tibo god dabe te kapa golgo dali silva dali te bras me, te masigi me, te nigo me, tama naigo nigai tibo god dabebolo augwaligo lotu po wabo tagalobeo. Te nogogo nigali tibo god augwaligo gedugo sugobeo, ma ologo odogobeo, ma biligobeo. Tiali goli augwalibolo te bidi dabego lotu po weyu bidaluali.²¹ Te bidi dabe augwaligo bidi meba ela muyu, tama bidi dolobo pobi wabo se eyu, tama augwaligo penani ebo kolesaga wali peyu, tama nai wi sesa bilibo se eyu bidaluali. Tama tiyu, augwali homu begelama, te dwai kolesaga ebo augwaligo tudiba me mubeo.

Ensel mobo bidi agai buku Jonbolo mayu, nago tuao po wai

10

¹ Te eno suali, gasa bono mu yai ensel mobo bidi dagaludu e toba dulubo eno suali. Aga tigi te dagalu pogo halua sai, te gudubo ugwa tiwai. Tama agai tobolude unigi bidi elaluai. Agai gesabidi te giliga ge ula ebo tiwai yai, tama agai saḡa te ni tigide tigidali sia dabo tiwai yai.² Tama agai nogode dwasianu buku tolaluai, tama te buku dagawai elaluai. Tama aga dolo

¹ 9:20 Tib 115:4-7; 135:15-17; Dan 5:23

sąqə te tamu aji daide muai elaluali, tama aga pobase sąqə te to daiba ugwdalu munama elaluai.³ Tama agai i bomonama weyu, te bulude bidibo moni hudigi ebo kibu nogi laiongo gaa moni bage wabo tiwai yai. Agai te i wabode, tama a naga olama me badu nogo si te dagalu po kulu weyu wei ponai.⁴ Tama te a naga olama me badu nogo si be kulu po wai digi, tama te po eno aseainogoo yai. Tiali goli dagaludu po me deli asiyu wali po eno odali, “Te a naga olama me badu nogo si te be kulu weyu wali po, te po naga homude dąu elaluama, tama tede dualali po elalumainao. Nago te po asegio,” te po wai.

⁵ Tama te ensel mobo bidi tamadi eno te tamu aji de to si tede dolalubo suali, agai dolo nogo dagaluba ugwaba muai, agai wabo po dąu omainogoo,⁶ tama agai Godigo nogi weyu, te eno mu po naga obao homu eyu agai po wai. Te God aga sesemane sogo bidada peyu, bidada pabo bidi agai te dagalu dali tede elalubo nai nigali, te to dali tigidali e tode elalubo nai nigai, tama tamu aji me te tigidali tede elalubo nai me nigali bidi dao. Tama te ensel mobo bidigo aga nogo ugwaba munama, tama Godigo nogi weyu tama agai te po wai, “Megi me gesege iligobeo.⁷ Menio. Tama nosali te nogo a naga olama me badu nogo si wali te ensel mobo bidi me deligo agai te ona tiwai nai elebadii, te sogo te Godigo homude polobadu dualali nosali yabo se te hania pedalama, tama agai te se yaibao. Polobadu agai aga se ebo bidi augwalibolo te aga nosali yabo se po pusali, tama augwaligo koneani, te se hania pedalaibao,” te ensel mobo bidigo te po wai.⁸

⁸ Tama te eno polobadu dagaludu po me deli asiyu wali po odali tiwai, agai enabolo te po ma wali, “Te dagawai elaluali buku te tamu qide me te tode dali me te dolalubo ensel mobo bidigo nogode tolalubo buku nage pelama sigi pao,” te po wali.

⁹ Te po obaso, ena te ensel bidi pageba pelama, tama eno agabolo te po wali, “Nago te dwasianu buku ena mao.” Tama agai enabolo te po weyu “Nago te buku selama tuao,” wali. “Te nago haligade ha yaibao. Tiali goli nago pedauwalide te mege aji pusu ebo tiwai yaibao,” te po wali.

¹⁰ Agai te po wai digi, tama eno te dwasianu buku te ensel mobo bidigo nogode selama, tama eno tuai. Tama eno pedauwalide te mege aji pusu tiwai yai. Tama eno tuai digi te eno haligade ha yai.^t ¹¹ Tama agai enabolo te po wai, “Nago te Godigo yabo se po ma pusao. Te po te hauwa bulu tode bidibo hanide me, te haniani tigiwali yai me, te haniani po wabo bulu bidi dabe me, tama te tode tuni bidi hauwade me, augwali tigidalide nago te nosali pedalabo se po pusao,” agai enabolo te po wai.

Godigo po pusubo bidi si

11 ¹ Te ensel mobo bidigo enabolo te usu ni sabo nai mani, te bilibodo no dono tiwai nai, tama agai enabolo te po wali, “Nage hodaloama,

^s 10:7 Sai 20:11; Bom 32:40; Dan 12:7; Amo 3:7 ^t 10:10 Ese 2:8-3:3

te usu sabo nigo te Godigo Moni Lotu Be tempel dali, tomode elalubo te Godibolo maiabo ofa nai ulubo sai dali te si usu sao. Tama nago te lotu be tomode bidiyu agabolo lotu po wabo we bidi augwali nedao. ²Tiali goli te lotu be bulu badu, te we bidi bilibo madi, te nago tagalao, tede nago usu nigo usu sigio. Te madi te Godigo po wali pisawani we bidigo nogoba mawai dao, tama augwaligo te Tedali Wiegi Yai Hanu sagago agayu, tama polua bidi sese si olama me si tama yaibao,” te po wai. ³Tama Godigo enabolo te po wai, “Eno po pusabo te bidi si tagala palaibao. Tama te bidi sigo gudubo ugwa te beg nigali nami ugwa tama gudulama, tama eno po augwali sigo pususu pidubadi te polua bidi sese si olama me badu nogo si te 42 polua bideibao, te tama polua dabede bidada pali sogo nedali usu nama te bidi sese hauwa mu wabo nogi te 1,260 ulade bidibo tiwai si tama bideibao,” te po wai dao.

⁴Te bidi si augwali te oliv ni si tiwai, te sole si tiwai me, te tigidali tq tonalubo Genuai Bidigo gesabidide dolalubo nai si dao.” ⁵Tama bidi mebago augwali si dali dwai dene mabo sę ebo homu eyu da, augwali sigo pedauwalide te sia bogoli pedaliyu, tama te boi ebo bidi te siago dolaibao. Awe, bidigo dwai sę augwali si dali eyu da, te kolesagade naga te aga isaibao. ⁶Tama te bidi sigo te dagalu dą walobo bomo elalubao. Tama te dagalu dą olama, tama augwali sigo Godigo po pusubadi te tulubage tulugobeo. Tama augwali sigo bomogo te tigidali wę begelama kaneme pedalabo bomo elalubo. Tama te haniani dwai naigo te tqde we bidi dolabo bomo me elalubao. Tigidali sogo augwali sigo homugo tama iaianogo eyu da, teda te augwali sigo te sę ebo usu yaibao.

⁷Te bidi sigo te Godigo po pusubo silibo si, tama te dwai hudigi ebo hasa te tq dedage page meni yai digi bidali tagaliyu, tama aga buluba eda holaibao. Tama holama tama agai te bidi si dali hwjaibao. Agai te bidi sigo bomo aiyaba elaluyu, tama te bidi si ela mueibao.^v ⁸Tama ela munama, tama te bidi sigo tigi te genuai hanu tomode te genuai po mibo pesagede olo munalueibao, te hanude polobadu augwali sigo Genuai Bidi te we bidigo ni pedaide dagana selama isali. Te genuai hanu nagi po digi pogo begelama tama nagi Sodom wabo, me nagi Isip wabo dao, te po digi pode.^w ⁹Tama bidi meba tigidali haniani tigi yai me, te tigidali tqde, te haniani po wabo me, te tigidali bidi hani, augwaligo te bidi si tigi te sela sogo bidilama me sogo te giligade deli tama sogo te bidi si tigi te po mibo pesagede munalubo sueibao. Tama bidi meba augwaligo “Te bidi si pubulumainao,” te po waibao. Tiali goli gasa bidi dabego “Menio, tagalao,” waibao. ¹⁰Tama tqde we bidi augwaligo te bidi si isalide augwali wiegi yai homu yaibao, tama augwali tęabi eyu, nai tuyu, tama wiegi yai nai dabe dobu si yaibao. Magi baso meni. Te Godigo po pusali

^u 11:4 Sek 4:3, 11-14 ^v 11:7 Dan 7:21 ^w 11:8 Ais 1:9-10

bidi sigo te tōde bidibo we bidi tigidali dwai dene mawai dao.¹¹ Tama te sel a sogo olama me deli sogo te giligade tama sogo silama, tama Godigo pedauwalidu mobo augwali sigo tigi tomoba ponai. Tama mobo ponama, tama te bidi si hodaloama doligulai. Tama te bidi si suali we bidi tigidali augwali wi mu yai.¹² Tama augwali sigo dagaludu po me wabo odali te po weyu, augwali si bomonama i wali, “Dage si eba eda holao,” wali. Tama te bidi si te pō me tomodu dagaluba holali, tama te boi bidi dabe augwaligo te bidi si pabo suai.¹³ Tama te sogo naga, genuai tō mali eyu, tama te moni hanu me badu dolali, tama a naga olama me si me si habu badu naga elaluai. Tama we bidi hauwa mu te bidi sese umabo te 7,000 bidi dabe te te mali yali digi isai. Tama te isis̄awai we bidi augwali wi mu eyu, tama augwaligo te dagalude bidibo God nogi ugwaba sai.

¹⁴ Te genuai sęge si wali te silali. Odao. Te dwasianu sogo digi te sel a wali sęge pedalaibao.

Te nogo a olama me si wali ensel mobo bidigo te ona tiwai nai elali po

¹⁵ Te nogo a naga olama me badu nogo si wali te ensel bidi me deli agai te ona tiwai nai elali, tama tebadi, dagalude ensel mobo bidi meba augwaligo i bomonama weyu te po wali, “Dago Genuai Bidi God dali, te Godigo sa muani te we bidi tau somainogo tagala palali bidi Krais dali, augwali sigo te tigidali tōde we bidi tonalubo bomo meg i selama tama elalubao. Tama aga sesemane sogo te tuni bidi bidada peyu, bidada paibao,” te po wai.^x ¹⁶ Tama te bidi sese olama nogo me si me si polalubo toboliu bidi augwali te God gedude te duabo naide dulaluyu, tama augwali basi gulama tama gesabidi tōba munama Godibolo lotu po wali.

¹⁷ Tama aga nogi ugwaba siyu tama augwaligo te po wali,

“Genuai Bidi, nage God te Tigidali Bomo Elalubo
bidi dao. Nage meg i bidibo, tama polobadu mu
nage bidai. Nago genuai bomo naga selama, tama
nage te we bidi tonalubo sę ebo gagalai dao. Tama
tibaso, dago homu nagebolo munama, usu da po
obao. ¹⁸ Tama nago po konesiəbo haniani tōde
bidibo bage augwali sębę mu yai. Tiali goli meg i
nago sębę yabo sogo te pedalalio. Tama meg i te
isali we bidi augwali te po tū eboba pedalobo sogo
dao. Tama meg i e sogo naga sę ebo bidi dabe, te
nago nosali yabo sę po pusali bidi, augwalibolo te
wiegi yai nai mabo sogo pedalai dao. Tama nago we
bidi tigidali, te nogi yai bidi me, te nogi meni yai
bidi, tigidali nagede wi eyu nago bomo dologode

^x 11:15 Sai 15:18; Dan 2:44; 7:14, 27

bidibo we bidi, te megi da te nago augwalibolo
me te wiegi yai nai mabo sogo pedalai dao,"^y
augwaligo te po wai.

¹⁹ Augwaligo po ola silama, tama augwaligo te Godigo dagalude elalubo Moni Lotu Be tempel te be tū dawai. Tama polobadu Godigo te Israel we bidi dali po dāq olama, tama augwaligo te aseani po te halobage me deli tomoba muani. Tama te halobage te Lotu Be tomode munalubo eno hania suali. Tama te sogo tama te be sele eyu, tama moni u wabo me, te be kulu wali me, tama tq mali ebadi, te kedau ebo nai talua ge tulubage hauwa te dagaludu tqba tulaluai.

Satan dali aga hani bage dali tigidali dolali po

(Dqi 12-20)

Jongo te we dali genuai hasamani dali si suali po wali

12 ¹Te sogo te dabolo Godigo bomo ola mabo genuai sę me deli te dagalude pedalai, te we bidi noma sabo sę. E tiwai. We me deli bidai, tama agai tigigo te giliga te ugwa tiwai elama sesela sai. Tama polua agai saq̄a dologode elaluali. Tama hō nogo si olama saq̄a badu si te agai madi tiwai tobolude munama elaluai. ²Tama aga wai haliga elaluali, tama te wai ame nabo dene agaba pedalai. Tama te dwai dene mu eyu, tama agai i bomonama weyu te wai ame nainogo yai.

³ Te gasa genuai sę me dagalude pedalali, te we bidi noma sabo sę. Te sę yali e tiwai. Genuai hasamani me deli bidai. Te mama yai tama, aga toboli te a olama me badu nogo si, tama nogo si gaq̄ elaluai. Tama a naga olama me badu nogo si te tuni bidigo madi aga tobolude muani elaluai, te toboli delide elaluai.^z ⁴Tama agai danugo te hōgo hani deli dagaludu te pobele bage tiwai tqba aiya poala sawai. Tama hō hani si digi te dagalude me elaluali. Tama te hasamani te wego gesabidide te wai ame nainogo ebadi dolaluali, tama agai tonaluali te wego te wai ame nabode, te wai agai tuainogo yai.^a ⁵Tama wego wai ogwa ame nai. Te waigo nosali te ain dono tulama tigidali we bidi hani tonalueibao. Tiali goli te wai ame nenama digi, tama polo mu augwaligo te wai te God pageba me, te ugwaba sela holali, te aga tuni bidi bidiyu dulalubo nai sia sai teba sela pai.^b ⁶Tama te we aga te bidi meni yai buluba wi pai. Tede Godigo aga bidabo bulu sisi ilali, tama augwaligo te we aga bugagia tonaluyu, tama nai mayu tede hauwa sogo te 1,260 te sogo usu nama mu bideibao.

⁷Tama te sogo dagalude genuai wabantu hw̄ai. Tama te ensel mobo bidi dabego augwa polalubo bidi te Maikel aga dali, te aga tonalubo ensel bidi

^y 11:18 Tib 115:13 ^z 12:3 Dan 7:7 ^a 12:4 Dan 8:10 ^b 12:5 Ais 66:7

dabe dali, augwaligo te genuai hasamani dali hw̄jai. Tama te hasamani aga dwai ensel mobo bidi dabe dali augwaligo te wąbi wei augwali dali ponainogo yai.^c ⁸Tiali goli te hasamanigo bomo elama te wąbi hw̄jabo bomo usu menio. Tama tibaso, te hasamani dali, aga dwai ensel bidi dabe dali, augwali dagalude ma bidainogo ebo usu egobeo. ⁹Tama Godigo ensel mobo bidi augwaligo te genuai hasamani e tōba s̄awai dao. Te hasamani aga te polobadu digi bidai, tama augwaligo te hasamani aga nogi “Te Bidigo Tigidali Bidi Kisiliyu Po Tū Ela Mabo Dao,” gasa nogi me Satan poai. Agai tigidali tōde we bidi ili po ola mabo bidi dao. Augwaligo aga e tōba tula palai, tama augwaligo aga dwai ensel mobo bidi dabe dali hodobo e tōba tula palai dao.^d

¹⁰Tama dagalude i me deli bomon bomonama ma wabo eno odali, “Megi da, dago God agai we bidi ma dobola sabo kolesaga mu hania pedalai dao. Megi me agai tigidali we bidi tonalubo bomo hania pedalai, tama aga tuni bidi bidibo dao. Tama megi me agai sa muyu asaibao wali bidi Krais agai bomo dali, genuai nogi dali si hania waselai dao. Magi baso meni. Dwai bidi me deli agai dago ama dede augwali dali kisiliyu po tū ilai, agai augwali te dago God aga gedude te po tū siade me hulide yali. Tiali goli megi te dwagi yai ensel mobo bidi augwaligo aga te dagaludu a tōba s̄awai dao. ¹¹Tama te kibu sipsip wai aga isiyu aga kaneme gelebaso, tama dago ama dede augwaligo te dwai bidigo bomo aiyaba elaluai dao. Tama me augwaligo Godigo po gasa we bidibolo pusali, tama augwaligo te kolesaga yaligo me augwaligo te dwai bidigo bomo aiyaba elaluai dao. Tama te kolesaga ebadi augwaligo te homu yali, ‘Te Godigo po odobo hagela ebo bage augwaligo da eleyu da, teda te usu da, da wi egobeo,’ te homu yali. Tama te homu eyu, augwaligo augwali e tōde bugagia bidabo te homu ebeo. ¹²Tama tibaso, dagalu, nage tama dage tigidali dagalude bidibo bage, dage homu wiegi yai yagameo. Tiali goli tō dali, te tamu aq̄ dali, te side bidibo we bidi tigidali, dage hobedagia bidaibao. Genuai sege dageba pedalainogo ebao. Tama Satan dagebolo e tōba dulai dao, tama agai s̄eb̄e genuai mu elalubao. Agai koneani, aga bidabo sogo te p̄ewadage sogo elalubo homu ebo dao,” te po wabo dagaludu asobo eno odali.

¹³Te genuai dwai hasamani agai suali, augwaligo aga e tōba aba aiya s̄awani, tama agai te wai ame nani we pobeari. ¹⁴Tiali goli augwaligo te webolo te genuai ba kemodage bogo si mawai, tama te we aga te bidi meni yai buluba bola pabo usu yali, tama aga te genuai dwai hasamani wi ebaso, aga digibulu bidigi pabo usu dao. Tama augwaligo aga bugagia tonaluyu nai mayu yai, tama tede bidibadi kibu be selo olama, polua nogo a naga olama me badu nogo deli bidaibao.^e ¹⁵Tama te we dolainogo

^c 12:7 Dan 10:13, 21; 12:1; Jut 9 ^d 12:9 Gag 3:1 ^e 12:14 Dan 7:25; 12:7

eyu te hasamanigo pedauwalide aji bugulai. Te bugulali aji te pabo genuai aji tiwai, tama te aji peyu te we wali pobasa pai. Te hasamanigo homugo te aigo te we selama hagamainogo yai.¹⁶ Tiali goli e tōgo te we tau sali. Te tō peda peyu, te bidigo gani tiwai dalama, tama te aji te tō dedageba pai, te hasamanigo pedauwalidu bugulali aji.¹⁷ Tama tibaso, te genuai hasamani agai te we dali sēbē mu yali, tama aga pelama, te wego gasa wai dabe dali wābi hwīainogo pai. Te we bidi augwaligo te Godigo bomo yai po tigidali wali peyu, tama augwaligo Jisasgo po pusuyu tama agade homu kēq̄ pai we bidi mu bidibo dao.¹⁸ Tama te hasamani te tamu aji sesege badu dolalubo dao.

Te dwai hudigi ebo hasa si pedelali po

13 ¹Te genuai dwai hudigi ebo hasa me deli te tamu aqđu pedalobo eno suali. Tama te hasago toboli te a naga me si elaluali, tama agai tobolude te gāq̄ nogo si pedelai elaluali. Te agai gāqđe te tuni bidigo mubo te tiwai wiegi yai madi te nogo si elaluali, tama agai toboli deli delide aşənai dwai nogi elaluai. Tama te nogi deli deli page e tama tiwai: te God dali haniani dwai posobo po wali te tobage nogi po aşəai elaluai. ²Te dwai dwai kolesaga eyu te hudigi ebo hasa megı eno suali, te moni hasa nogi lepat tiwai, tama te hasago sāq̄ te gasa moni hudigi ebo hasa nogi bea, te beago sāq̄ tiwai, tama te hasa agai penani te moni hasa lainogo penani tiwai yai. Tama te genuai dwai hasamanigo aga bomo te dwai hudigi ebo hasabolo mawai. Agai te dwai hasa aga tuni bidi aga tiwai nigilama bidali, tama agai we bidi tonalubo genuai bomo me te dwai hudigi ebo hasabolo mawai.^f ³Tama augwaligo te hudigi ebo hasago toboli me delide elama isali tiwai eno suali aq̄ yai. Tiali goli te tobolude keni pedela selama, tama usu ma yai. Tama tigidali tōde bidibo we bidi augwaligo te sę te dwai hudigi ebo hasade pedalobo sulama, tama augwali noma genuai siyu, tama augwali aga wali pai. ⁴Te genuai dwai hasamanigo agai bomo te dwai hudigi ebo hasabolo mobaso, te we bidi tigidali augwaligo te hasamanibolo aga nogi uwgaba sabo po wai. Tama augwaligo te dwai hudigi ebo hasabolo me aga nogi uwgaba sabo po weyu, augwaligo te po wai, “Niwai bidi aga te dwai hudigi ebo hasa tiwai dawe? Niwai bidigo aga dali hwībo usu egowe? Bidi menio,” augwaligo te po wai.

⁵ Tama Godigo te dwai hudigi ebo hasa sula tagalali, tama agai dwai dwai po ola biliyu, God dali posobo po weyu, “Ena, ena digi ena God dao,” te tobage dwai po weyu bidai. Tama tiyu, agai te dwai kolesaga eyu, te we bidi tonalubo sę yabo bomo te polua bidi sese si olama me si, te 42 polua tama te usu nama elaluai. ⁶Tama agai pedauwalidu dwai

^f 13:2 Dan 7:4-6

dwai po weyu, God dali posobo po wabo gagalali. Agai Godigo nogide posobo po weyu, tama Godigo bulu dali me te po wali, tama te Godigo hani dagalude bidibo hani augwali dali me te dwai posobo po wai. ⁷Tama Godigo aga sula tagaliyu ebaso, tama agai te Godigo we bidi dali wabi hwiyu, tama augwali bomo aiyaba elaluai. Tama tiyu, aga te tigidali bidi hani tuni bidi bidainogo eyu, te tigidali tqde me, te tigidali po wabo me, te tigidali haniani tigi yai bidi dabego tuni bidi aga bidainogo Godigo aga tama osogo sula tagalali. ⁸Tama te we bidigo polobadu ela muani kibu sipsip wai agai te genuai buku elaluyu bidibo dao. Tama te bukude agai te agade konealubo po daq wali we bidi augwaligo nogi agai asəai dao, te polobadu mu, te Godigo te tq nigisiəbadı, tama augwali isisəma gamonaibao. Tiali goli te bukude nogi asəswai we bidi, augwali tigidali augwaligo te moni hasa lepat tiwai yai dwai hudigi ebo hasa aga nogi ugwaba siyu, tama agabolo lotu po waibao.

¹¹ Tama eno te gasa dwai hudigi ebo hasa me te tqdu eda buluba holobo suai. Te genuai hasago gãu si aga tobolude elaluai te kibu sipsipgo gãu tiwai, tama agai po wabo te genuai dwai hasamanigo po wabo tiwai po wai. ¹² Te nosali pedalali genuai dwai hudigi ebo hasa agai te hasia te dwai hudigi ebo hasago sã yabo bomo tigidali sai, tama agai sã te bomogo te hasia hudigi ebo hasago gesabide te sã yai. Agai te mani bomogo te tqde we bidi tigidali augwaligo te hasia hudigi ebo hasabolo aga nogi ugwaba sabo po wabo sã ilali, te hasia hasa polobadu gasa bidigo aga te ela muainogo yali dwai keni te pedala sai. ¹³ Tama te nosali pedalali dwai hudigi ebo hasa agai te haniani genuai sã te bidi noma sabo sã yai. Te we bidi noma sabo sã agai yali e dao, te tqde we bidi augwali gedude agai te dagaludu sia dabo bogoli e tqba dulubo sã idu geai.

¹⁴Tama tiyu, tama Godigo agai te haniani noma sabo sə te hasia hudigi ebo hasago gedude emainogo sula tagalali, tama te hasago te kolesaga ebogo te tqde we bidi ili po ola mawai. Te hasago te we bidi augwalibolo te po wai, “Dagego nigo te hasia dwai hudigi ebo hasa usu selama noma nigliyu, te agai nogi uwguba somainogo yao. Te hasa polobadu augwali go aga te poa pai ge hwago elali, tiali goli aga bidibo ula dali bidai,” agai te po wai. ¹⁵Tama Godigo te nosali pedalali dwai hudigi ebo hasa aga sula

^g 13:10 Jer 15:2; 43:11

tagaliyu, tama te hasa agai te bidibo ula elalubo mobo te we bidigo nigali hudigi ebo hasa noma tomoba ponai, tama te dwai hasa nomago po wabo gagalalili. Tama tiyu, niwai bidi meba augwaligo te hasa noma dali aga nogi ugwbaba sabo po wabo hagela eyu da, agai te bidi dabe augwali ela muani.¹⁶ Tama te nosali pedalali dwai hudigi ebo hasago po bomonama obaso tama “Te tigidali we bidigo dolo nogode, ma gebode, te dąi ilao,” te po wai. Te nogi meni yai bidi dali, te nogi yai bidi augwali me, tama te masigi hauwa munalubo bidi dali, te magi nai meni yai bidi augwali me, te olo bidibo bidi dali, te magi nai sisama olo mu sę ebo bidi dabe dali, augwali tigidali te dąi sali, te dolo nogode ma augwaligo gebode.¹⁷ Tama niwai bidi agai te dwai hudigi ebo hasago nogi dąi te elalusiąyu, ma agai nogi ma agai nogigo namba te elalusiąwani da, teda te bidi agai te bidi dabe augwali dali nai abelegio, tama augwaligo aga dali nai abelamu. Augwalide habu selalio.

¹⁸ Dago homude te po pagede bugagia kone palao. Te nogode me, gebode me aşeani dąi, te bidigo nogi meni, te nedebo namba naga aşeani. Tama te namba da te 666 dao. Tama te namba 666 po digi po begelama tama bidigo nogi pedalaibao, te namba tomode te bidigo nogi gea pelama elalubo. Tama tibaso, dagego tede hania homugo kone palao.

**Te kibu sipsip waigo te we bidi hauwa umabo
mu te 144,000 augwa gesi tęabi po wai**

14 ¹Te eno ma tonono ebadi, te eno te Kibu Sipsip Wai te Saion bulu dude dolaluali, tama we bidi hauwa umabo mu te 144,000, augwali aga dali dolalubo eno suali. Tama te Kibu Sipsip Waigo nogi dali te aga Ayago nogi dali si, te nogi te we bidi gebode aşeai elaluali.^h ²Tama eno odali, te dagalude wiegi yai po weyu, te kulu kulu asobo po eno odali, te wę asiyu genuai kulu kulu wabo tiwai eyu, tama te dagalude be kulu genuai wabo tiwai yai. Eno odali, te habidi po wabo tiwai yai. Te bidi dabe augwaligo te gita tiwai nai eleyu, te kulu kulu wabo tiwai pedalai. ³Tama te genuai hani we bidi augwaligo gesi balia me deli te tuni bidi God dulalubo gesabidide bidibadi te balia weyu, tama te bidibo ula elalubo hasa me si me si gedude me, te polalubo toboli bidi augwali gedude me te balia wai. Te we bidi hauwa umabo mu te 144,000 augwali Godigo te tigidali tőde we bidi bidibo tomode agai augwali dią selama tama ma abelali, te augwaligo te gesi balia wabo koneabo te usu yaibao. Tama niwai gasa bidi agai te balia koneainogo ebo usu munu me egobeo. ⁴Te bidi dabe augwaligo te meda yai penani ebo kolesaga me ebeo. Menio. Augwali te gasagi yai meda meni yai mu bidali dao. Te tigidali bulu te Kibu Sipsip Wai painogo ebo bulu, te bidi dabe augwaligo

^h 14:1 Ese 9:4; Ped 7:3

me te aga wali naga pabo dao. Godigo augwali te tqde bidibo we bidi tomode augwali dia siyu ma abelama, tama augwali te Godigo hasia bidi hani bidali God aga digi ma aga te Kibu Sipsip Wai dali sigo sai dao.⁵ Augwaligo tibo po me deli munu me wabeo. Te augwaligo magi se me delide te dali dwai se me deli ebeo. Menio.ⁱ

Ensel mobo bidi selago po wali

⁶Tama eno suali, gasa ensel mobo bidi te dagalu tomodu sigide mu bola soabo eno suali. Agai te sesemane bidada pabo wiegi yai gesi po elaluai, tama agai te po te tqde bidibo we bidi augwalibolo pusubo se elalubo dao. Agai te wiegi yai gesi po pusubo se te tigidali tqde bidibo we bidi hanibolo te po pusubo se eyu, tama te tigidali haniani tigiwali yai bidi dabe dali, tama tigidali haniani hani bidi augwalibolo te wiegi yai gesi po pusubo se elalubo dao. ⁷Tama agai i bomonama weyu te po wabo, “Godigo te tigidali we bidi dodolama po tu yabo sogo te paña pedalalio. Tama tibaso, dage agade wi eyu tama aga nogi ugwaba sao. Tama dagego Godibolo lotu po wao, te agai dagalu dali tq dali me, te tamu aji me, te pusu aji ulu pedalobo me, te tigidali nai nigali page bidi aga dao,” te dagalude bola soabo ensel mobo bidigo te po wai.

⁸Te gasa ensel mobo bidi aga te polasa soali ensel bidi wali asai. Te nosali asali ensel bidigo te po wali, “Dolalio, dolalio, te genuai hanu Babilon mu dolalio. Te nogi elaluali hanude bidali we bidi augwaligo bomonama te tigidali haniani tqde bidali bidi dabebolo te dwai dwai meda yai kolesaga ola mani dao. Te penani se ebo wego te bidibolo bomai aji menama, tama te bidigo te aji tulama aga homu kolesaga dolama, tama agai te we dali penani se ebogia, te hanu bidigo gasa we bidi te dwai dwai se ebo kolesaga tomoba kekai dao,” te ensel mobo bidigo te po wai.^j

⁹Te gasa sela wali ensel mobo bidi me te polasa soali ensel bidi si wali asai. Agai bomonama i weyu, e tama wali, “Te niwai bidi me deligo te dwai hudigi ebo hasa me, te augwaligo agade augwa nogogo nigali noma dali lotu po weyu te aga nogode ma te gesabidide daj sali bidi,¹⁰ te augwali sibolo lotu po weyu tigide daj sali bidi agabolo Godigo te bomai aji wain tiwai mabo te agabolo dene mawaibao. Te wain te Godigo genuai sebe ebo te dao. Godigo te wain aji te aji mu dali hasia te si talubeo. Menio. Te sebe te bidibolo dolo mawaibao, aga dali homu dene dwasianu egobeo. Agai sebe ebo te dene sabo kapuba gelama mabo aigo wei ponoyu, tama te bidigo tumainogo yaibao. Tama te bidi dwai dene siyu, te posolo mu yai sia dali, te masigi saltfade dabo sia bogoli dali, augwali side te dwagila dwai dene mu siyu, te magi dwai se me isiqbo ensel mobo bidi dabego gedude me, te Kibu Sipsip Waigo gedude te dene saibao.

ⁱ 14:5 Sef 3:13 ^j 14:8 Ais 21:9; Jer 51:8; Ped 18:2

Te bidibolo te dwai posolo yai siago dene mayu, te masigi salfade dabo posolo yai siago me te dene madueibao.¹¹ Tama augwali te dene maiabu sia hano holoyu, tama te hano sesemane bidada pabo sogo holodubadi geaibao. Te dwai hudigi ebo hasa dali, te hasa aga noma dali, te sibolo lotu po wabo bidi dabe augwali te naigo elalubo nogi aseani daj sali bage, augwali te siade me hulide me te toma me tugobeo, sesemane sogo te dwai dene saibao,” te ensel mobo bidigo te po wai.

¹² Tama tibaso, Godigo we bidi augwali bomo elama, tama augwaliba pedalabo sęgę bugagia toloyu bida. Te we bidi augwaligo Godigo bomo yai po wali peyu, tama Jisasde homu mu kęq pai we bidi bidibo dao.

¹³ Tama eno odali, po me deli dagaludu asiyu, te po wai, “Nago e tiwai po aseqo: ‘Megi e tiwai sę gagalobao, te Genuai Bidide wadolali we bidi isibo si, te augwali wiegi yai homu pemene mu yao,’ ” te po wai.

Tama Godigo Tedali Mobo Bidi agai me te po wai, “Awe, mu tama dao. Te augwali tigi dene ebo sę tagaliyu, tama augwali toma tueibao. Augwali olo me pogobeo. Menio. Te augwaligo yali wiegi yai kolesaga, te kolesaga augwali wali paibao,” te po wai.

Te tőde holali tau yali nai sabo sogo pedelali dao po wai

¹⁴ Tialima, eno ma tonono bilabadi, tama eno suali, te tedela yai dagalu po me deli elaluai, tama bidi me deli te pođe dulaluai, te da tőde bidi tiwai, aga te Godigo Bidi Mu tiwai dao. Te agai tobolude te kapa golgo nigai wiegi yai madi elaluali, tama agai poa pai hwą ge mu agai nogode tolaluai, te gi nai togobo hwą ge dao.^k ¹⁵ Tama gasa ensel mobo bidi te Moni Lotu Be tempel bede bidai buluba soali. Agai te dagalu pođe dulalubo bidi dali bomonama i weyu, te po wali, “Nago hwągo te nai togwao. Tigidali tőde elalubo nai te inilama tau ela silali dao. Tama megida, te nai sabo sogo dao,” te po wai. ¹⁶ Tibaso, te pođe dulaluali bidi agai te hwą ge nogogo tolaluyu, tama agai te tőde elalubo inawai nai hwągo togolama sai dao.

¹⁷ Tama gasa ensel mobo bidi te Moni Lotu Be tempel bedu buluba teda soai. Agai me te poa pai gi nai togobo hwą ge nogode tolalubo dao.

¹⁸ Tama gasa ensel mobo bidi me ma te nai ula mabo alta saide bidali tagalama asai. Te ensel bidi agai te sia tonalubo bomo elaluai. Te ensel bidi agai te poa pai hwą ge tolalubo ensel mobo bidibolo i bomonama mu wai. Agai te po wali, “Nago naga te poa pai hwą ge selama, tama nago te tőde te wain bonode walali du tigidali togolama, tama sisinama elaluao. Te tigidali nai polo inilama tau yai dao,” agai te po wai. ¹⁹ Te po obaso, te ensel bidi agai te hwą ge nogogo selama, tama te wain bonode walali du tigidali togwali, tama deliba sisinama elaluai. Tama agai te bono du dabe

^k 14:14 Dan 7:13

te wain agabo te dawai halobage tiwai genuai masigi tomoba s̄awai. Te po digi po begelama, te genuai bono du agabo halobage te Godigo genuai s̄eb̄e dao. ²⁰Tama augwaligo te wain nigibo bono du dabe te genuai halobage tiwai nai tomoba munama, tama te genuai hanu bulu badu elalubadi tama agawai. Tama kaneme te halobage buluba pedaliyu, tama te kaneme te moni pabo āi tiwai pidubadi, te usu selama nedada pali, te bidi sese nogo si olama s̄aq̄a badu a naga, te 300 kilomita te tama tiwai yali, tama te edaba holali te ain te kibu hos augwali pedauwalide elalubo, te ainba te kaneme ugwaba sabolali.¹

Te 7 ensel mobo bidi dabego te 7 te bidi dolabo dwai nai tolaluai

15

¹Te eno suali gasa genuai noma sabo s̄e te dagalude pedalali, tama eno homu hauwa te s̄ede yali. Eno suali, ensel mobo bidi a naga olama me badu nogo si bidali, tama augwaligo te bidi dolabo dwai nai mu a naga olama me badu nogo si tolaluai. Tama nosali te dwai nai augwaligo s̄e ebo silibo si, teda te we bidi dolabo gasa dwai nai ma pedalogobeo. Te nogo a naga olama me badu si te dwai nai, te naide te Godigo s̄eb̄e ebo mu silaibao.

²Tama eno te nai me deli te genuai tamu āi tiwai suai. Te nai augwaligo te dula tiwai te augwaligo sia bogoli dali te si taluama gelai. Te we bidi augwaligo te dwai hudigi ebo hasa dali hw̄inama tama augwaligo aga aiyaba elaluai, te we bidi dabe eno suali. Augwaligo te hasa agai bidibo ula elaluali noma dali, te agai nogigo nedebō namba me te si me aiyaba elaluai. Tama te we bidi augwali te tamu āi tiwai madi sesege badu te dula dolaluyu gegemani ebo tiwai eyu dolaluai. Godigo augwalibolo te gita tiwai nai mena mena pelama, augwaligo te tolalubo eno suali. ³Tama tiyu, augwaligo te Godigo s̄e yali bidi Mosesgo polobadu wali t̄eq̄abi weyu, tama te Kibu Sipsip Waigo t̄eq̄abi me wai. Te t̄eq̄abi po wali e dao:

“Genuai Bidi, nage te God te Tigidali Bomo Elalubo
Bidi dao.

Tigidali s̄e nago ebo, te genuai mu eyu, tama dago
te s̄e ebo suyu, tama da noma siyu homu hauwa
ebo dao.

Nage tigidali hani bidigo tuni bidi, tama nago
kolesaga te dolo eyu tama tigidali mu naga ebo
dao.”^m

⁴Tama Genuai Bidi, nagaduba deli digi naga nage
te magi dwai s̄e me esiayu wiegi yai doloba pai mu
bidibo dao.

¹ 14:20 Ais 63:3; Gel 1:15; Ped 19:15 ^m 15:3 Sai 15:1

Tama tibaso, niwai bidigo nage dali wi egobewe?
 Tama niwai bidigo nage nogi ugwaba sogobewe?
 Te tobage bidi menio.
 Tigidalı bidi hani augwali aselama, nage pagede
 lotu po nage dali wagasaibao. Magi baso menio,
 nago doloba pai kolesaga te hania bulu ulaba
 pedalai dao,”
 augwaligo te təqbi po wabo eno odali.

⁵ Te eno nosali ma tonono bilibadi, tama te dagalude elalubo Moni Lotu Be tempel tū dawai eno hania suali. Tama te be tomode te Mosesgo nami ugwago polobadu sę yai lotu be eno suali, te be elalubogo te we bidibolo te God augwali dali bidali te ola mawai.ⁿ ⁶ Tama te nogo a naga te me badu nogo si ensel mobo bidigo te a naga olama me badu nogo si te bidi dolabo dwai nai mu tolaluai, te augwali te Moni Lotu Be tempel bede bidali tagalama buluba teda asai. Augwaligo magi meda mu meni yai tedela yai te ula mu yai ugwa gudai. Tama augwaligo te kapa golgo nigai kukulu te augwa hagawiade bagulama muai. ⁷Tama te bidibō ula elalubo hasa me si me si te tomode me deligo, agai te golgo nigai pou a naga olama me badu nogo si te nogo a naga olama me badu si te ensel mobo bidi deli delibolo mena mena pai. Tama God aga sesemane sogo bidada pabo bidi agai sębę ebo homu te a naga olama me badu nogo si te poude paganalubao. ⁸Tama te Godigo bomo yai ula dali, agai bomo dali sigo hano ebogo hano te Moni Lotu Be tempel bede paganaluai. Tama niwai bidi me deli aga te be tomoba painogo ebo usu egobeo. Menio. Augwaligo te a naga olama me badu nogo si te ensel mobo bidi augwaligo te bidi dolabo dwai nai nogo a naga te me badu si te naigo sę silibo sogo tonaluali.^o

Godigo moni sębę te a naga olama me badu nogo si te poude elalubao

16 ¹Te eno odali te Moni Lotu Be tempel be tomode te pedauwalidu po me deli pedaliyu te po wai. Agai te nogo a naga olama me badu si ensel mobo bidi i bomonama weyu, te po wai, “Dage deli deli pelama, tama te pou a naga olama me badu nogo si te poude te Godigo homu sębę elalubo te gea şanama, te təba tulalumainao.”

² Te po obaso, te polalubo ensel bidi pelama, aga pou təba geligi pai. Tama gelama, tama polo te haniani bomai dwai keni mu te dwai hudigi ebo hasago dąj elalubo bidi augwali tigide pedalai, tama te nigo nigai noma bidi dali lotu po wali bidi augwali tigide me te dwai dwai keni pedalai.

³ Tama te tudi badu te si wali ensel bidi me agai pou te tamu ąjba gelai. Tama te tamu ąjde begelama, te isai bidigo kaneme tiwai pedalali. Tama

ⁿ 15:5 Sai 38:21 ^o 15:8 Sai 40:34; 1 Kin 8:10-11; 2 Sto 5:13-14; Ais 6:4

tiyu, te tamu ąjde bidibo ula dali bidibo nai dabe tigidali, augwali isila
pai dao.

⁴Tama te tudi badu te sela wali ensel mobo bidi agai pou te genuai
pabo ąj dabeba geleyu, tama te ąj ulu pedalobo digi tigidali me gelai.
Tama te ąj tigidali begelama, kaneme pedalali. ⁵Tama eno odali, te ąj
tonalubo ensel mobo bidigo te agai te po wali, “Genuai Bidi, Tigidali
Bomo Elalubo God, nage megi bidibo, tama polobadu mu nage bidai bidi,
nage te magi dwai șe me esiąyu wiegi yai doloba pai mu bidibo dao. Te
nago te bidi dali po tų ebode, te nago te dwai șe ebo bidi dabe augwali
dolo mu dagalobo dao. ⁶Te dwai șe ebo bidi dabe augwaligo te nago po
odobo we bidi augwali dali, te nago po pusubo bidi dabe dali ela muyu,
tama augwaligo kaneme gea s̄awai dao. Tama nago te dwai bidi dabe
augwalibolo kaneme mayu, tama augwa te kaneme tumainao. Augwaligo
augwa te dwai șe yalide dolo mu te dene sabo dao,” te po te ąj tonalubo
ensel bidigo wai. ⁷Tama eno odali, te Godibolo mabo nai ulubo alta saigo
i wali, “Awe, mu tama, Genuai Bidi, Tigidali Bomo Elalubo God, nago te
bidi dabe augwali po t̄ude dagaliyu, tama mu po naga wali peyu nago po
tų te dolo mu naga tigidali ebo dao,” te po wai.

⁸Te tudi badu te me si me si wali te ensel mobo bidigo pou te giligaba
gelali, tama Godigo te giligago te bidi dabe augwali domainogo sula
tagalalio. ⁹Tama te genuai giliga nanobo siago te posolo mu eyu, tama te
siago te bidi dabe dwai dene mu mawai. Tibaso, augwaligo God nogide
posobo po wai, agai te dwai dene mabo nai tonalubo bomo elalubaso,
tiali goli augwaligo ge neyu homu begelama God agai nogi ugwaba
sabeo.

¹⁰Tama te tudi badu te nogo a naga wali ensel mobo bidigo agai pou
te dwai hudigi ebo hasago tuni bidi duabo naiba gelai. Tama te hudigi
ebo hasa dologode bidali bidi augwali bidibo digi be hulia sabo te dolo
pedalai. Tama augwali dwai dene mu sali, tama tilama augwa hamena
ma halua tuyu bidai. ¹¹Augwaligo homugo te dene me te keni augwali si
dali homu eyu, augwaligo te dagalude bidibo God nogide posobo dwai po
wai. Tiali goli augwaligo homu begelama te augwaligo dwai kolesaga ebo
tagalama tudiba mubeo.

¹²Te șe silama, tama te a naga olama me badu nogo deli wali te ensel
mobo bidi aga pou te genuai ąj nogi Yufretis te ąjba te gelai. Tama te
ąj tigidali wa pela tama te giliga pedalobo badu tuni bidi dabe asabo
tų sisilama tonaluai dao.^p ¹³Tama eno te dwai haubo noma bidi sel a te
gedeli tiwai gagawai suali, te me deli aga te genuai dwai hasamanigo
pedauwali ą elalubo digi pedalali, tama me deli aga te dwai hudigi ebo
hasago pedauwalidu me, me deli te tibo po ola mabo bidigo pedauwali

^p 16:12 Ais 11:15

ą elalubo digi tedu pedalai. Augwali sela te tiwai pedalali eno suali.

¹⁴Tama te dwai haubo noma bidi augwaligo te bidigo isiąwai sę te bidi noma sabo sę haniani mu ebo dao. Tama augwali te tigidali tqba te tigidali tuni bidi bidibo digi pelama, te bidigo isiąwai bomo yai sę augwaligo sulama noma somainogo ebo dao. Augwaligo homugo te tuni bidi dabe augwali deliba sisinama, tama augwaligo te Tigidali Bomo Elalubo God dali hwıabo sogo asobo tonalumainogo yaibao.

15(Genuai Bidigo te po wai, “Te po odao. Te ena dageba asabo sogo te ena te nai wi sainogo asobo bidi tiwai geme polo pedalaibao. Tama niwai bidi aga te godege pisayı da, tama aga ugwa bugagia guduyu, tama aga tigi olo bilisiayı da, te bidi dabego aga suali te hale me isiąwai, teda te bidi aga homu wiegi yai mu yaibao, te ena asabo sogode.”)^q

16 Tama te dwai haubo noma bidi augwaligo te tuni bidi dabe teba sisinai, te Hibru pogo augwaligo te bulu nogi Armagedon wai.^r

17Te a naga olama me badu nogo si wali ensel mobo bidigo aga pou te wali elalubo digi gelai. Tama te Moni Lotu Be tempel be tomode te God dulalubo digi tuni bidi bidibo nai tedu te pedauwali me delidu i bomonama wali, tama te i wali te bulu badu pedalai. Agai te po wai, “Te sę megi tama silai dao,” te po wai. ¹⁸Tama dagalude be sele eyu, tama be kulu kulu weyu, genuai po me weyu, tama moni genuai dwai tq mali yai. Te mali genuai mu yali, tama bidi tqde bidibo sogo tigidali, te polobadu te tiwai tq mali genuai me pedalai menio. Te maligo bomogo te tigidali polobadu yali maligo bomo aiyaba mu elaluali. ¹⁹Te genuai hanu tomode te sela pepeda pali, tama te tigidali tqde hani bidigo hanu te mu dolai. Tama Godigo te genuai hanu Babilon homugo koneani, tama agai te Babilon te wain aji elalubo kapde aji tigidali tumainogo yai. Te aji wain te Godigo agai genuai sębę mu elalubo dao.^s ²⁰Tama te tigidali dwasianu tamu aji tomode elaluali ailan bulu dabe te augwali wi pela silai, tama te haniani tqde elalubo bulu du tigidali augwali tedela pali. ²¹Tama te genuai talua ge tulubage tulai. Tigidali deli deli badu tulali talu ge tulubage te sęgę te moni masigi tiwai yai. Te talua ge tulubage dagalude asiyu, te bidi tigiba ugwdadu tulai. Tama augwali te talua ge tulubagego mu dolai, meba isali. Tama te talua ge tulubagego augwali dolobaso, tama bidi dabego God dali dwai posobo po wali, te talua ge tulubagego augwali dolobo sę te genuai dwai mu ebaso, augwaligo te dwai po Godigo nogide wai.

Genuai penani we aga dwai dene mu sai

17 ¹Te pou elaluali a naga olama me badu nogo si ensel mobo bidi augwali tomode me deli te aga asama, enabolo te po wai, “Nage

^q 16:15 Mat 24:43-44; Luk 12:39-40; Ped 3:3 ^r 16:16 2 Kin 23:29; Sek 12:11

^s 16:19 Ais 51:17

suagasao. Te penani ebo we te genuai aq̄i dabe ugwdalu daide dulaluali, aga te yali dwai sēde dwai dene mu sabo sē, eno nagebolo te sē ebo ola mawaibao.^t ²Te haniani tōde tuni bidi augwaligo penani sē ebo kolesaga hauwa te we dali yali dao. Tama tigidali tōde bidi dabe augwaligo me te we dali te penani ebo kolesaga eyu, tama augwali te kolesaga meni yai bidi tiwai eyu, te bomai aq̄i tuai bidi tiwai yai dao,” te ensel bidigo enabolo te po wai.^u

³Tama agai enabolo te po olama, tama agai eno nom a bidi te bidi meni yai tqba selasa pai. Te tqde eno te we me deli aga te mama yai genuai dwai hudigi ebo hasa daide ugxadu dulalubo suai. Te mama yai dwai hudigi ebo hasa tigide te Godigo nogi posobo po hauwa aseña paganaluai. Tama aga tobolu a naga olama me badu nogo si elaluai, tama te gaq nogo si me te hasago elalubo eno suali. ⁴Te we agai te mama yai bobage ugwa me, te pe yai ugwa me muani, tama te ugwade haniani au yai te kapa golgo nigai nai elaluali, tama te wiegi yai au yai nai augwaligo gasa haniani wiegi yai masigi dali te bis dali sigo nigai. Tama te we agai nogogo te gol kap tolaluai. Tama te dwai damua pai haniani kolesaga me, te haniani dwai meda yai kolesaga te penani wego yali, te dwai kolesaga tigidali te kapde paganaluai. ⁵Tama aga te dwai se yali nogi aga gebode aseai elaluai. Te nogide te geme dualali page elaluai, tama te nogi aga digi te e dao: “Genuai hanu Babilon, te tigidali penani we dabego ida mu, tama te tigidali tqde elalubo dwai dwai meda yai kolesaga augwaligo ida me dao,” te po te penani wego gebode aseani, te eno suali. ⁶Tama te we agai te Godigo po wali pabo we bidi augwali dali te Jisasde homu kęq pai we bidi dali augwali te wego ela munama, tama eno suali te wego augwali kaneme tulama te kolesaga meni yai bidi tiwai aga yai.

Eno te sulama, ena noma mu siyu, tama eno homu hauwa mu yai.
7 Tama te ensel mobo bidigo enabolo te po wai, "Magi baso nago noma siyu tama homu hauwa ebawe? Te eno te wede geme dualali po page nagebolo ola mawaibao. Tama te dwai hudigi ebo hasa tobolu a naga olama me badu nogo si me, te nogo si gą̄t tobolude elaluyu, tama te naigo te we selasa pabo. Agade me te geme dualali po page nagebolo ola mawaibao. 8 Te nago suali dwai hudigi ebo hasa aga polobadu bidai, tiali goli megı̄ aga me bidibeo. Tamadi tama agai te page meni yai tq̄ dedage tagalama, tama aga edaba holama, tama aga pelama, aga mu dolaibao. Polobadu mu te Godigo te tq̄ nigisiqbadi agai te augwali isiąma gamonaibao wali we bidi nogi te bukude aşeai dao. Tama te bukude nogi aşeşiwani te tq̄de bidibo we bidi augwali tigidaligo te hudigi ebo hasa sulama, tama augwali homu hauwa eyu, aga nogi uwguba saibao. Magi

^t 17:1 Jer 51:13 ^u 17:2 Ais 23:17; Jer 51:7

basowe? Polobadu aga bidai, tama megi aga me bidibeo, tama nosali aga ma pedalaibao,” te ensel mobo bidigo te po enabolo wai.

⁹Te po me agai enabolo wai, “Te dwai hudigi ebo hasade te dwagi yai homu kolesaga elalubo bidi agai bugagia kone palao, te hasade po page kuna konemainogo yao. Te a naga me badu nogo si toboli te tiwai te a naga olama me badu nogo si bulu du dao, tama te penani we te bulu du dabe daide ugwidu dulalubo dao. ¹⁰Tama te toboli dabe augwali te tuni bidi a naga me badu nogo si me tiwai dao. Tama te tuni bidi dabe tomode te a naga dolai, tama me deli megi bidibao, tama me deli nosali pedalaibao. Nosali aga pedalobo si, teda aga te dwasianu sogo naga bidaibao. ¹¹Tama te polobadu bidali dwai hudigi ebo hasa, tama megi aga me bidibeo, te aga digi aga te a naga olama me badu nogo sela wali tuni bidi dao. Tiali goli aga te gasa tuni bidi a naga olama me badu nogo si te hanigo deli hani bidali. Tama tiyu, aga pelama tama aga dolama, tama mu hagawaibao.”

¹²“Tama te nago suali te nogo si gą, te gą dabe te tuni bidi nogo si tiwai dao. Megi augwaligo te tuni bidi bomo me sabeo. Tiali goli augwaligo te tuni bidi bomo te dwai hudigi ebo hasa dali selama, tama augwali aga dali te dwasianu sogo naga we bidi tonalubo sę yaibao.”

¹³Tama te tuni bidi nogo si augwaligo homu deli naga elaluyu, tama augwaligo augwa genuai nogi me, te bomo me, te tigidali te hudigi ebo hasabolo mawaibao. ¹⁴Tama menama, augwaligo te Kibu Sipsip Wai dali hwıaibao. Tiali goli, te Sipsip Waigo augwali aiyaba mu elaluibao. Magi baso meni. Aga da te genuai bidi dabe tigidaligo Genuai Bidi dao, tama aga te tigidali tuni bidigo genuai tuni bidi aga dao. Tama aga dali bidibo we bidi te augwali agai i olama, tama augwali agai gasa we bidi tomodu dią selama, tama augwaligo homu agade mu kę peyu bidibo we bidi hani dao.”

¹⁵Tama te ensel mobo bidigo enabolo te po wali, “Nago te genuai aị dabe, te aị daide ugwidu te penani we dulalubo suali. Tama te aịde po digi po begelama wali te po page e dao: te aị wali da, te haniani genuai tode bidibo we bidi me, te tigidali hani we bidi me, tama te tigidali haniani tigi yai me, te tigidali haniani po wabo bidi hani me, augwali te genuai aị dabe elalubo tiwai dao. ¹⁶Tama te nogo si gą nago suali, te dali te dwai hudigi ebo hasa dali augwaligo te penani we dali boi bidi yaibao. Te penani we augwaligo aga mu dolama, tama agai ugwa dabe me tigidali doado bage dolaibao. Tama augwaligo agai tigi mi tuyu, tama aga tigi tigidali siago domainogo ulaibao. ¹⁷Magi baso meni. Godigo augwali homu kolesaga mawai, tama augwaligo te sę emainogo eyu te polobadu agai te po wai. Te augwaligo homu deli naga eyu, tama augwali

tuni bidi bidainogo te bomo sai, augwaligo te bomo tigidali te dwai hudigi ebo hasabolo mawainogo yai. Te augwaligo tama tede pidubadi, te Godigo te penani wede wali poba te usu nainogo tiaibao.”

¹⁸ “Tama nago te suali we, agade te po digi po begelama wali te po page e dao, te we da te genuai hanu, te tigidali tqde bidibo tuni bidi dabe tonalubo toboli hanu dao,” te ensel mobo bidigo te po enabolo wai.

Te moni hanu Babilon dolalio

18 ¹ Te penani wede pedalabo sę eno te tiwai suali. Tama nosali te sogo eno suali gasa ensel mobo bidi te dagalu tagalama e tqba dulubo eno suali. Agai bomo genuai mu elaluai, tama agai bomo yai ulago te tq ula mu ilai. ² Agai i genuai bomo elama mu weyu, te po wai,

“Dolalio, dolalio, te genuai hanu Babilon mu dolalio.

Megi te bulu te dwai haubo noma bidi dabego bulu pedalama bidibao. Te dwai meda yai mobo bidi dabe me augwali tede bidibao. Te meda yai ba dabe me, te dwai bulude bidibo ba dabe me, augwali me tede naga kalabus bidibo dao.”

³ Magi baso meni. Te moni hanu Babilon aga te bomo yai qj wain hauwa tubo penani sę ebo we tiwai dao. Te we agai te bomonama tama te dwai dwai sę ebo dao. Tama agai aga bomo yai qj wain te tigidali tqde bidibo we bidibolo menama, tama augwaligo me te penani ebo kolesaga aga dali me yali dao. Tama te tqde tuni bidi augwaligo me te penani ebo kolesaga aga dali me yali dao. Tama tigidali tqde bidi augwaligo mone sabo bisnis sę eyu, tama tede te masigi hauwa mu umabo sali. Te moni hanu aga te we me deli tiwai bidiyu, tama te wego homugo ‘Eno ena tigi tau sabo nai, te tigide pusubo nai, te ena homu dwagi yai ilibo haniani nai, te tobage wiegi yai nai hauwa eno abelaio,’ te tobage homu eyu, tama te hanugo te bisnis bidi dabego nai umabo abelai dao,”

te ensel mobo bidigo te po wai.^x

⁴ Tama eno odali, gasa pedauwalidu po dagaludu pedalali, tama agai te po wali,

“Eno we bidi hani, dage te bulu tagalama buluba soao.

Dage aga dali te dwai sę ebode te dene sidali weyu, tama dagego agai ebo dwai dwai sę me egimio. Tama

^w 18:2 Ais 13:21; 21:9; Jer 50:39; 51:8; Ped 14:8 ^x 18:3 Ais 23:17; Jer 51:7

tibaso, te bulu tagalao.

⁵ Magi baso meni. Te agai dwai sę ebo sege te pobele bage deliba sisinibo tiwai mu yali, tama te dagaluba mu usu nainogo holai. Tama God agai te bulude ebo dwai dwai kolesaga tigidali agai homugo ma koneai.

⁶ Dagego te penani wego yali kolesaga tiwai koneyu, tama dagego te kolesaga ebo usu nama aga dali wei sao. Te agai dage dali yali dwai kolesaga dali gasa me dali ugwdadu daganama agabolo ma mao.

Te wego dagebolo dene dali sege si mani, te bidigo bomo yai aji si te kap deli tomode taluama tama gasa bidibolo mabo tiwai yai. Tama te kapde po digi po begelama, tama dagego te bomo mu yai aijo te wego kap paganama tama aga tumainao. Tama tiyu, tama agai dagebolo mani dene dali sege dali agabolo ma mao.

⁷ Te aga digi aga nogi ugwaba siyu, tama aga tigi naga tau sabo sę yai dao. Tama dagego agabolo dene dali sege dali si hauwa mayu, te yali dwai sę usu nama yao. Tama dagego aga gela hauwa omainogo yao.

Magi baso meni. Agai aga homude e tama po wabo dao: ‘Ena te tuni we bidibao, tama ena te tuni bidi bidiboo saide dulalubo dao. Ena te bidi isai we bidiboo tiwai olo bidibeo. Tama tibaso, te sege enabolo pedaluyu, te ena gela me wagobeo. Mu menio,’ agai te homu ebo dao.

⁸ Agai te homu eboso, polo te haniani dwai sę mu agabolo te deli sogo naga pedalaibao. Te genuai gasi pedaliyu, tama bidi hauwa augwaligo dwai gela weyu, tama genuai nasi yaibao.

Tama siago te Babilon tigidali daibao. Magi baso meni, te genuai bomo mu elalubo Genuai Bidi God aga digi dagalama tama Babilon hanuba te dwai dene wei ponobo dao,”

te po wabo te dagaludu asobo eno odali.

⁹ Te tqde tuni bidi augwaligo te penani we dali penani eyu bidai dao. Tama te kibu dabe augwali te we gede pebege pibo tiwai, te tuni bidi augwali te wego haniani wiegi yai naide dwagi yai homu eyu bidai dao. Tama augwaligo te penani we siago deyu hano holobo subaso, tama

augwaligo moni gela weyu nogo pagasayu bidaibao. ¹⁰ Te we aga te dwai dene sabo suyu, te augwali aga digibulu dolaluyu te po wabo,

“Aua, hobede yali, hobede mu te bulu Babilon dali yai. Nage te genuai hanu, tama nage bomo yai hanu dao. Tiali goli te deli sogo naga nago dwai sè yali sege nageba mu pedalalio.”

¹¹ Tama tigidali tqde bidi augwaligo te mone sabo bisnis sè ebo bage, augwaligo homugo te bulu Babilon kone paliyu, tama augwaligo agade gela weyu, te homu sege dali bidibao. Magi basowe, te augwaligo doado bage abelabo bidi me menio.^y ¹² Te wiegi yai doado bage e tiwai dao, te kapa gol me silva, te gasa haniani wiegi yai masigi me, te bis gasagi yai nai me, te wiegi yai tedela yai ugwa dabe, tama te haniani mama yai ugwa me, te dila pai ugwa nogi slika elalubao. Tama te gasagi yai denami ebo ni dabe tigidali, tama tigidali dila pai nai augwaligo te kibu elefan kelego nigali nai dabe, tama te genuai masigi elalubo nigo te nai tigidali nigali, te kapa nogi bras me, te ain me te sigo nigali wiegi yai nai tigidali, me te tomode dodobolo pai wiegi yai masigigo nigali nai me, te tobage doado bage. ¹³ Tama te meba doado bage e tiwai elalubo, te denami ebo tubo nai nogi sinamon me, te tubo gag, tama te denami ebo nai pauda me, tama te haniani denami ebo ili yai nai elaluai, tama wiegi yai denami ebo nai sanda, me te bomai aq wain me tubo wel, te wiegi yai tubo plaua me te tubo nai wit ge, te kibu bulmakau me sipsip, te me hos dali te hosgo kegasa pabo wiegi yai nai nogi karis dabe me, tama te augwaligo mu abelai masigi sisabo sè ebo we bidi dabe me, te tigidali nai bidi dabe augwaligo ma abelegobeo. ¹⁴ Te masigi hauwa sabo bisnis sè ebo bidi dabe augwaligo te po waibao, “Te nai nago homu hodaloyu sabo homu yai, te nai tigidaligo nage tagalama pai dao. Tigidali dwagi dwagi yai tubo nai dabe te genuai mone naga elaluali, te nago wiegi wiegi yai tigidali au ebo doado bage dali, te nai tigidaligo nage taga palio. Tama te bidi dabe augwaligo te tobage nai dabe nagede munalubo ma sugobeo,” te bisnis sè ebo bagego te po waibao. ¹⁵ Tama te sède te mone umabo sali bisnis sè ebo bidi dabe augwaligo te masigi hauwa mu te hanude sai, te augwali te hanugo dwai dene mu sobaso tama augwali wi mu yaibao. Tama augwali aga digibulu dolaluyu, tama augwali gela weyu, tama dwai homu sege elama bidaibao. ¹⁶ Tama tiyu, augwaligo te po waibao, “Hobede ebo, te genuai hanu te hobedagia bidibao. Polobadu agai te wiegi yai tedela yai ugwa gudai, tama haniani mama yai ugwa gudama, tama aga tigi te golgo au ilai, tama te wiegi yai dila pai masigi dali bis dali te nai dabego tama au yai. ¹⁷ Te megi deli sogo naga, te masigi me te tigidali au ebo doado bage tigidali dola silai dao,” augwali gela weyu te po waibao.

^y 18:11 Ese 27:31, 36

Tama te moni geba sip guni tolasa bilibo bidi tigidali me, tama te sip abelama gasa buluba painogo ebo bidi dabe me, te sip tomode sę ebo bidi dabe badi, tama te tamu ąjde masigi sabo bisnis sę ebo bidi tigidali me, te bidi dabe tigidali augwali te Babilon bulu digibulu dolaluali.^{z 18} Tama dolalubadi, augwaligo aga te siago dabo hano ebo suyu, tama augwaligo i e tama wai, “Mena hanu te e tiwai genuai hanu elalualiwe? Mu menio,” te po wai.¹⁹ Tama augwaligo te tq pobele bage augwa digi augwa toboluba sęy, tama gela weyu augwali homu sęge dali bidai dao. Tama augwaligo i weyu, “Hobede ebo, te genuai hanu te hobedagia bidibao! Te tigidali moni geba sip aga aya te tamu ąjde masigi sabo bisnis sę ela biliyu, te augwali te sęde masigi sabo bidi mu pedaliyu, te genuai hanude genuai masigi sabo sę yai dao. Hobede mu ebao! Te megı deli sogo naga mu te genuai hanu aga mu dola silai dao!” te po wai.

²⁰ Nage te dagalu, nage dali te Godigo we bidi dali, tama dage te Godigo po pusigi pabo bidi dabe me, te Godigo nosali yabo sę po ola mabo bidi dali, dage tigidaligo te genuai hanude megi pedalobo sęde wiegi yai homu yao! Godigo aga dagalama, tama agabolo te dwai dene sabo wei ponai dao. Tama te kolesagade agai te hanu agai dwai kolesaga dage dali yali wei ponai dao!

²¹ Te po silali, tama moni bomai ensel mobo bidi me deligo te wit ge agaga pelama pęgę sabo moni masigi tiwai sela asai. Tama agai te moni sęge yai masigi uwabala selama, tama tamu ąj abu sawai. Tama agai te po wai, “Te kolesagade naga augwaligo te genuai hanu Babilon selama bomonama aiyaba sęy, tama bidi dabe augwaligo aga ma suainogo ebo usu egobeo.^{a 22} Tama te gita elebo po wabo me, te haniani habidi po wabo tiwai ebo me, te genagi me te bu wabo nai me, te tobage naigo po wabo nage pagede ma te po wagobeo. Tama bidigo tigidali haniani sęde konea sali bidi, te tiwai bidi nage Babilon bulu tomode bidibo augwaligo ma sugobeo. Te nai wit ge agaga pabo masigigo kulu kulu wabo, te tiwai wabo augwaligo nagede ma odogobeo.²³ Te lam sole ula ebo te ula nagebolo ma iligobeo. Tama te we sainogo ebo bidi me, te bidi dali painogo homu ebo we me, augwali si dwagi yai homu eyu po wabo te nage tomode ma wagobeo. Polobadu nago bisnis bidi dabe augwaligo te masigi sabo sę elama, tama augwali te tqde genuai nogi yai bidi dabe bidai. Tama nago tigidali bidi hani dali te nago tibo pode haniani pobi po wabo sę elama, tama augwali dwai tuba kegasapali.”

²⁴ “Tama Godigo suali, te Babilon hanude bidibo we bidi augwaligo agai po ola mabo bidi dabe dali, te agai po wali pabo we bidi dali ela mubo sę yai. Tama tigidali tqde augwaligo we bidi meba dali boi bidi eyu, augwali ela muyu, tama te dwai sę ebo page te bulu Babilonde naga

^z 18:17 Ais 23:14; Ese 27:26-30 ^a 18:21 Jer 51:63-64; Ese 26:21

elalubo dao. Tama tibaso, te hanu dola silai dao,” te moni bomo elalubo ensel mobo bidigo te po wai.

**Babilon bulu dolobaso te dagalude bidibo we
bidi augwali wiegi yai homu yai**

19

¹Tama te sogo nosali eno odali, te genuai dagalude bidibo we bidi hani tiwai moni i wabo odali. Augwaligo te po wai, “Dago God nogi ugwaba sao! Dago God agaduba deligo naga te we bidi ma dobola sabo sę yabo bomo elalubao. Agai genuai nogi dali bomo dali elalubo dao. ²Magi baso meni, te po tų ebode God agai te mu po naga wali peyu, doloba pai kolesaga te po tų ebode ebo dao. Te genuai penani we agai te tőde we bidi agai te penani ebo kolesagago mu dolai dao. Tibaso, Godigo aga dali po tų elama, tama dwai dene wei agabolo ponai dao. Te we agai Godigo sę bidi dabe augwali ela mubaso, tama Godigo agai te dwai sę ebo wei ponoyu, te penani we aga dene mawai dao,” augwaligo te po wai.

³Tama augwaligo i e tama ma wai, “Dago God nogi ugwaba sinao! Te genuai hanu sia dabo hano ebo, te sesemane sogo te hano ugwaba holobo dao!” te po wai. ⁴Tama te bidi sese olama me si me si tama polalubo toboli bidi dali, te bidibo ula elalubo hasa me si me si te augwali kidu sugunama, Godibolo lotu po wali, te aga te tuni bidi duabo wiegi yai nai saide dulalubadi augwaligo agabolo te po wai, “Mu tama dao. Dago God nogi ugwaba sinao!” te po wai.

Kibu Sipsip Wai we siyu, genuai nai tubo si pedalai

⁵Tama Godigo te tuni bidi dulalubo te naidu i ola asiyu te po wali, “Dage Godigo sę bidi dabe, dage God dali wi ebo we bidi dali, te dage olo bidi me, te dage nogi yai bidi me, te dage tigidaligo Godigo nogi ugwaba sao,” te po wai. ⁶Tama eno odali, te genuai we bidi hani sisinama bidibo digi po me deli tiwai pedalai. Ma, te aji hauwa kulu kulu weyu u wabo tiwai yai. Tama te dagalu be kulu wabo tiwai genuai u wabo tiwai yai, te eno odali. Te augwaligo i bomonama wai, “Dago God nogi ugwaba sao! Genuai Bidi, aga e dago God, te Tigidali Bomo Elalubo Bidi, megı aga te tuni bidi mu bidibao. ⁷Te megı dago bugagia homu pemene eyu, tama dago wiegi yai mu ela pidu geyu, tama aga nogi ugwaba sao! Magi baso menio. Te Kibu Sipsip Waigo we sabo bodolu megı pedalalio. Tama aga we sisilama bidibao. ⁸Tama Godigo te webolo te tedela yai bobobage ugwa menama, te wiegi yai ugwa te ula mu yai, tama meda mu meni yai, tama agai te ugwa aga tigide muaibao,” augwaligo te po wai. (Te wiegi yai tedela mu yai ugwa te Godigo we bidigo ebo wiegi yai doloba pai kolesaga dao.)

⁹Tama te ensel mobo bidigo enabolo te po wali, “Nago te po aseqo: te we bidi dabe augwali Godigo te genuai nai tubo digi asomainogo i wai, te

Kibu Sipsip Wai aga we kębode te sogo te i wali we bidi augwali wiegi yai homu pemene eyu bidaibao,” agai te po wai. Tama olama, agai enabolo te po me wai, “E po, eno nagebolo tama wali po, e po te Godigo wali mu po dao,” te ensel bidigo enabolo te po wai.^b

¹⁰ Tialima, ena te ensel mobo bidi sąą pąba kidu sugunama, tama eno gesabidi töba munama, tama eno aga dali lotu po wabo homu yai. Tiali goli agai enabolo te po wai, “Nago tama tigio! Ena nage dali, nago ama dede dali deli sę ebo bidi dao. Dagego konealubo po Jisasde dąu olama, agai nogi haninama pusubo dao. Nago God deli dali naga lotu po wao. Te Jisasde gasa bidibolo po pusubo we bidi, te Godigo Mobo Bidi agai augwali homu hodolama, tama augwaligo te po pusubo dao. Te Mobo Bidigo te tobage sę naga te Godigo nosali yabo sę po pusubo bidi dali me ebo dao,” agai te po wai.

Bidi tedela yai kibu hos ugwapu daide dulaluai

¹¹ Te eno suali, dagalu tų genuai dawali, tama tedela yai kibu hos me deli tede bidibo eno suali. Bidi te kibu hosde dulaluali. Te bidi agai sę te we bidi po tų ebode dagaliyu da, tama agai boi bidi dabe dali wąbi hwıbaso da, teda agai te mu po dali, te wiegi yai doloba pai kolesaga dali si naga wali peyú, agai te sę si bugagia ebo dao. Tama tibaso, agai nogi si elalubao, me nogi “Godide homu kęą pai bidi.”^c ¹² Tama te gasa nogi te “Mu po naga wabo bidi.” Tama agai gedu te sia bogoli ebo tiwai yali, tama agai tobolude te tuni bidigo mubo wiegi yai madi hauwa muai elaluai. Tama agai tigide po me deli aşeai elaluali, te aga nogi dao. Te agaduba deligo naga te nogi page koneani, tama gasa bidi dabe augwaligo te nogi me konebeo. ¹³ Tama agai muani bobage ugwa te kanemego aji telawai dao. Tama augwaligo agai nogi e tama wai: “Godigo po dao.” ¹⁴ Te dagalude bidibo ami bidi dabe augwaligo te augwa tedela yai bidi duabo kibu hos dabede dulaluali, tama augwali te bidi wali pai. Tama augwali tigide te tedela yai meda mu meni yai wiegi yai bobobage ugwa gudali. ¹⁵ Tama te bobage poabi hwą ge me deli te augwa polalubo bidigo pedauwalide munaluai, tama te hwą ge buluba teda soai. Tama te hwą gego agai te tigidali töde we bidi hani elaibao. Tama agai te ain wąbi nogogo tulama, tama te we bidi hani augwali te ain dono wąbigo tonalueibao. Tama agai augwali tonaluyu, tama te Tigidali Bomo Elalubo God agai te we bidi dali moni dwai sębę ebaso, te bidi agai augwalibolo dwai dene mu mawaibao, te bomo yai aji wain nigibo bidigo te wain bono du dabe te masigi halobage tomoba munama, tama agai sąago agalalubo tiwai yaibao.^d ¹⁶ Te aga nogi aşeani aga ug Wade me te sąą teledé me elaluai. Te nogi aşeani e tama tiwai, tigidali tuni bidigo Tuni Bidi, te tigidali genuai bidi kingo Genuai Bidi King dao.

^b 19:9 Mat 22:2-3 ^c 19:11 Tib 96:13; Ais 11:4; Ese 1:1 ^d 19:15 Tib 2:9

¹⁷Tama te sogo eno suali, te ensel mobo bidi me deli te giliga ge pade te dagalude dolaluai. Agai te dagalude ugwdudu bola bilibo tigidali ba dabe dali bomonama i weyu, tama agai te po wai, “Dage te Godigo genuai nai tubo digi sisinagaso. ¹⁸Dagego te tuni bidi king dabego tigi mi tuyu, tama te ami bidi polalubo bidi dabego tigi mi me tuyu, tama te ami bomai bidi dabego tigi mi me tuyu, te hos dabe mi dali, te hosde duawali bidi dabego tigi mi me tuao. Tama dagego te tigidali Godigo po sela sawani bidigo tigi mi tuao, te olo mu bidibo bidi me, te masigi sisabo se ebo bidi me, te nogi meni yai bidi dali te nogi yai bidi, te augwali tigidaligo tigi mi tuagaso,” te ensel mobo bidigo te po te ba dabebolo wai.^e

¹⁹Tama eno suali, te polobadu suali dwai hudigi ebo hasa dali, te haniani tqde tuni bidi dabe dali augwali eno suali, te augwa ami bidi dabe dali, te augwali deliba sisinai elaluai. Augwaligo te kibu hosde dulalubo bidi dali wabi hwainogo yai, te aga ami bidi dabe dali augwaligo hwainogo eyu deliba sisinagaso. ²⁰Tiali goli agai te dwai hudigi ebo hasa dali, te ili po wabo po ola mabo bidi dali, augwali si kalabus ilai. Te tibo po wabo se ebo bidi agai te bidigo isiwai bomo yai se hauwa te hudigi ebo hasago gedude te se yai, tama agai te tebo kolesagade te bidi tibo po ola mayu, augwali te hudigi ebo hasago daq augwa tigide selama, te hudigi ebo hasa nomade lotu po omainogo yai. Te hudigi ebo hasa dali te tibo po ola mabo bidi augwali si te bidibadi, tama augwaligo te bidi si te genuai bagua si dedage pageba aiyaba mu sawai dao. Tama te dedagede te posolo yai sia dabo masigi salfa elalubao. ²¹Tama te kibu hosde dulaluali bidi, agai te pedauwalide elaluali bobage hwä gego te augwali sigo ami bidi dabe ela muai. Tama tigidali ba dabe augwaligo te bidi dabe tigi mi tuali, tama augwali tabi mu pagana pai dao.

Satan kalabuside kibu be hauwa mu 1,000 bideibao

20 ¹Tama eno suali, ensel mobo bidi me deli te dagalu tagalama e tqba dulai. Te agai nogode te page meni yai dedage ki tolaluai. Tama agai te genuai aligabo bono sen me elalubo, te me eno suali. ²Agai te genuai dwai hasamani daq ola sai, te hasamani te polobadu mu bidai, agai nogi Satan dao, tama agai gasa nogi page e dao: “Agai te tigidali we bidide kisiliyu po tu ela mabo bidi dao.” Tama te ensel mobo bidigo aga te sen bonogo daq olama bidibadi te kibu be hauwa mu 1,000 bidai. ³Te ensel bidigo aga te page meni yai dedage aiyaba sawai, tama te ugwdudu paliai, tama bomonama e tu daq walai. Tama tibaso, Satan agai te haniani tqde we bidi augwali ili po ma ola magobeo. Agai te bodolu

^e 19:18 Ese 39:17-20

muani kibu be hauwa 1,000 te bolo silimainogo tonalueibao. Tama nosali augwaligo aga kalabuside bidali tagalama silibo side, tama pewadage sogo aga menaba painogo eboso da, te aga pomainao.

⁴Tama eno suali, te tuni bidi dulalubo nai meba elaluai, tama bidi meba te duabo naide duawai. Godigo augwalibolo te bidi dabe po tude dagalobo kolesaga ebo sę yabo bomo mawai. Tama eno me suali, we bidi hauwa augwaligo konealubo po Jisasde dąu weyu, tama agai nogide po pusubo sę yai, tama tiyu Godigo po bomo elama tola sai. Te augwaligo agai nogide po pusubo sę eboso, te boi bidi dabego augwali elama, mage togolama, augwali isai dao. Tama eno augwaligo noma bidi homu ogwa wai dabe suali. Tama tude bidibadi augwaligo te dwai genuai hudigi ebo hasabolo lotu po wasiąma bidibadi, te agai noma me, te augwaligo gebode me te nogode me te hudigi ebo hasago aşeai dąj me sabeo. Te we bidi dabe augwali te bidibo ula ma selama, tama augwali Jisas dali tuni nigelama bidibadi te kibu be hauwa 1,000 bidai.^{f 5}(Te gasa isali we bidi dabe augwali bidibo ula te sogo sabeo. Augwaligo te bodolu mani kibu be 1,000 te bolo silimainogo tonalueibao.) Tama te sogo te hasia sogo mu te we bidi meba augwali te gę pagede ma hodaluali, te hasia sogo mu dao. ⁶Tama augwali te gę pagede hasia sogo hodalobo we bidi, augwali te wiegi yai homu pemene elama, te magi dwai sę isiąwai bidi tama tiyu, augwali bugagia bideibao. Tama te si wali isibo bomogo te bidi dabe augwali aiyaba me elalugobeo. Menio. Te augwali God de Krais sibolo lotu po weyu, sesemane sogo augwali sigo sę ebo pris bidi dabe bideibao. Tama augwali te Krais dali tuni bidi te hauwa kibu be mu te 1,000 bidaibao.

Satan mu dolai

⁷Te nosali te kibu be 1,000 silibo side, teda te kalabus be tų palialuali te tų dabode, tama Satan aga te kalabus elaluali tagalaibao. ⁸Tama kalabus tagalama, tama aga buluba solama, agai te haniani tigidali digibulu tų pedaide bidibo we bidi hani augwaliba tibo po ola mena mena biligi paibao, te bidi hani me nogi Gok me Magok dao. Te Satango augwali deliba sisinama hwı̄mainogo yaibao. Tama augwaligo namba te nedebō te usu egobeo, te masigi kemi tiwai dao. ⁹Tama augwali te tigidali tų habu badu tedela pelama, tama augwaligo te Godigo we bidi hani dali, te Godigo godolo ebo hanu dali te bidibo digi pelama, augwaligo te we bidi dali te hanu dali bagulai. Tiali goli dagaludu sia tulaluyu, tama te boi bidi hani ami bidi dabe augwali siago mu dela silali. ¹⁰Tama te augwali ili po ola mani bidi Satan aga Godigo te genuai dedage pageba te posolo yai sia ula te masigi salfa teba sawai dao. Tama

^f 20:4 Dan 7:9, 22

te dedage pageba polobadu augwaligo te dwai hudigi ebo hasa dali, te ili po ola mani bidi si aba sawai dao, tama augwali sela te siade me hulide me dene siyu, tama te dene ebo sesemane bidada pabo sogo te dene ela pidubadi bideiba.

Te genuai po tū pedalai

¹¹ Te eno suali, genuai tedela yai te tuni bidi duabo nai elaluali, tama bidi te duabo naide dulaluai. Tama tq dali dagalu si te agade wi pali, tama augwaligo bulu ma elalugobeo. Menio. Augwali si mu silalio.

¹² Tama eno ma suali, te isai we bidi dabe augwali bidaluali, te augwali nogi yai bidi dali, te nogi meni yai bidi dabe dali, augwali te tuni bidi dulalubo nai te gesabidide dodolalubo, te eno suali. Tama te saide dulalubo bidi agai te buku meba dagawai. Tama agai gasa buku me deli dagawali, te augwali isiqma gamonaibao wali we bidi nogi aşənəi buku dao. Tama agai te tigidali isai we bidi dagalai. Agai te augwaligo yali kolesagade po te buku dabelede aşənəi po nedama, tama te aşənəi pode agai augwali dagalali.^g ¹³ Tama te tamu aqde isali bidi tigidali te ma pedalali, tama te isibo kolesaga dali te isai bage osogo bidibo sao dedage page te side bidali bage augwali ma pedalali. Tama te po tū ebo bidi agai te tigidali deli deli bidi po tqde dagalali, te augwaligo yali kolesagade te sogo naga dagalai dao. ¹⁴ Agai te isibo bomo dali, te isai bage osogo bidali madi dali si te genuai sia dabo dedage pageba aiyaba sawai. (Te genuai dedage sia dabo elalubo te si wali isibo bomo dao.) ¹⁵ Tama e po tū odobo bidi agai te gamonaibao wali we bidi nogi aşənəi buku nedeyu, tama niwai bidi agai nogi te bukude me elalusiąbaso da, teda agai te bidi te moni genuai sia dabo dedageba aiyaba te siade dene somainogo sawai.

Godigo tigidali gesi noma nai dabe pedelabo sę ilali

(Dqj 21-22)

Gesi dagalu dali gesi tq side po wai

21 ¹ Te po tū ela silama, tama nosali eno suali, gesi dagalu dali, gesi tq dali elaluai. Te hasia dagalu dali, te hasia tq dali, te tigidili pela silai. Tama te tamu aq me te ma elalugobeo.^h ² Tama eno te wiegi yai magi dwai sę isiqwai hanu suali, te gesi hanu nogi Jerusalem dao. Eno te hanu te God dali bidibo suali, tama te hanu te dagalu tagalama, tama e tqba dulali. Te gesi hanugo au dobage wiegi yai elaluali, te we aga bidi dali painogo aga wiegi yai au dobage sisi elama aga bidi dali painogo ebo tiwai ebo suali. ³ Tama eno odali, po me deli te tuni bidi dulalubo

^g 20:12 Dan 7:9-10 ^h 21:1 Ais 65:17; 66:22; 2 Pi 3:13

digi pedauwalidu pedalama, tama i bomonama e tama wai, “Odao! Megi te God agai bidibo digi te bidi dabe augwali dali elalubao. Tama aga augwali tomode bidiyu, tama augwali agai we bidi bideibao. Awe, God aga digi te augwali dali bideibao.ⁱ ⁴Tama agai augwaligo gedude elalubo gedu aji omainogo deli deli hola sawaibao. Tama te we bidi dabe augwali ma isigobeo, tama augwali homu sege ma isiqma, tama augwali gela weyu dene eyu ma egobeo. Tama te polobadu elaluali kolesaga tigidali pela silai dao,” te po wai.^j

⁵Tama te duabo wiegi yai naide dulalubo bidi, agai te po wai, “Megi eno te tigidali nai gesi noma pedalomainogo nigibao.” Tama agai po ma wali, “Nago e po aseao. Magi baso meni, e po te mu po dao, tama tigidali bidigo e pode homu daq olama, tama teba tiqlubo te usu yaibao,” te po wai. ⁶Agai enabolo te po ma wali, “Te sę tigidali pedela silalio! Ena da, ena digi te hasia bidaluali bidi dao, ena te nosali mu sogo bidalueibao wali bidi mu dao, te ena tigidali nai page bidi, tama eno ebo sę tigidali ela silibo dao. Tama niwai bidi aga te aji nogone eboso da, teda eno te bidibo ula sabo aji te wę ulude selama tama agabolo olo mawaibao.^k ⁷Tama niwai bidi agai bomogo te dwai sę ebo kolesagago bomo aiyaba elalubo bidi, te bidi agai te tama siyu, tama ena agai God bidiyu, tama aga eno ogwa bideibao. ⁸Tiali goli te wi elama tama Godigo po wali pabo tagalabo homu eyu, ma geasa painogo ebo bidi dabe augwali me, te Godigo pode augwaligo homu daq wasiqbo bidi augwali badi, te haniani dwai dwai kolesaga mu ebo bidi badi, tama te bidi ela mubo bidi, tama te penani kolesaga ebo bidi, tama te dwai pobi elalubo bidi dabe, tama tibo god dali lotu po wabo bidi, tama tigidali tibo po wabo bidi, te augwaligo sabo bulu te genuai posolo mu yai sia dabo dedage page masigi salfa teba bidigi paibao. Te isibo te si sogo wali isabo dao,” agai te po wai.

Gesi hanu Jerusalem po

⁹Te ensel mobo bidi me deli enaba asai. Aga te a naga olama me badu nogo si wali te tomode ensel bidi te pou te a naga olama me badu si te bidi dolabo dwai nai elaluali pou dabe nogogo tolaluali, te bidi me deli dao. Te dwai sę ebo nai pedalabo sogo te nosali mu dao. Tama te ensel mobo bidigo enabolo te po wai, “Nage asao. Te eno nagebolo te Kibu Sipsip Waigo sabo we ola mawaibao, te we agai nosali mu saibao,” agai te po wai. ¹⁰Tama te po olama, tama agai eno noma bidi te genuai bobobage bulu du ugwaba mu tolasa holai. Tama agai enabolo te Jerusalem hanu ola mani, te wiegi yai magi dwai sę isiqwai hanu, aga te God dali bidai, tama dagalu tagalama e tqba dulubo te eno suali.^l ¹¹Godigo genuai bomo yai ula te hanude ula yai. Te ula te gasagi yai mu,

ⁱ 21:3 Ese 37:27; Prs 26:11, 12 ^j 21:4 Ais 25:8 ^k 21:6 Ais 55:1 ^l 21:10 Ese 40:2

te masigide genuai mone elalubo tiwai mu dao. Awe, te wiegi yai masigi nogi daimon tiwai, tama gegemani ebo, tama te ula hania mu ula yai.

¹² Te hanude te genuai masigigo nigai obo ugwanu mu yai elaluai dao. Te obode tų te nogo si olama te sąqą badu si elalubo, tama te nogo si olama sąqą badu si tama ensel mobo bidi augwali deli deli te tų deli deli pąde dolaluai. Tama te Israel hani nogo si olama sąqą badu si nogi deli deli te tų deli delide așeai elaluai. ¹³ Tama te hanu obode te giliga pedalobo te badu te obo tų sela elaluai. Tama sesege badu obo tų sela elaluai. Tama me sesege badu tų te sela elaluai. Tama te giliga ge dega sabo badu te obo tų sela elaluai.^m ¹⁴ Te hanu obo page dąq walali moni masigi te nogo si olama sąqą badu si elaluai, tama te nogo si olama sąqą badu si bidi augwali te Kibu Sipsip Waigo po pusigi pabo sę bidi nogi te masigide așeai elaluai.

¹⁵ Tama te ensel mobo bidi agai ena dali po wali bidi, agai te kapa golgo nigai dono te hanu usu sabo nai nogogo tolaluai, tama te usu nigo agai te obo me te obo tų dabe me usu sela sueinogo yai. ¹⁶ Te genuai hanu usu sali te genuai mu yai. Te hanu tigidali badu usu sali, te tiwai si naga ususu si yali. Tama tigidali badu deli deli usu selama, tama te namba te 2,400 kilomita yai. Te hanu ugwaba yali bobage me te tigidali badu me, te tigidali tiwai si naga yali. ¹⁷ Agai te hanu obo ugwaba bobage me usu sai, tama te obo usu sali aga bobobage te namba ugwaba mu holai te namba te 64 mita, te genuai mu. Te usu sabo nai te da bidi dabego usu sabo ni tiwai yai, tama te ensel bidigo te naigo naga te obo usu sai. ¹⁸ Te hanu obo te wiegi yai masigi nogi jaspa te masigigo nigai. Tama te hanu te kapa nogi golgo naga nigidubadi, tama te ula te dula ula ebo tiwai yai. ¹⁹ Te hanu obo page masigi dabe augwaligo te haniani genuai mone elalubo masigigo au ilai. Te hasia page masigi te wiegi yai masigi nogi jaspago au yali. Tama te si wali muani moni masigi te sisi yai wiegi yai masigi nogi sapaia te masigigo au yali. Tama te sela wali obo page masigi te tedela yai masigi nogi aget tego au yali. Tama te me si me si wali te masigi te ni yabe tiwai masigi emeral elaluai. ²⁰ Tama te a wali obo page genuai masigi te wiegi yai sadonikis masigigo au yali, te sadonikis masigi te mama yai dali te tedela yai dali dao. Te a naga olama me badu nogo deli te mama yai masigi konilian. Tama te a olama me badu nogo si te sewa yai masigi krisolait. Tama a olama me badu nogo sela wali te gasagi yai wiegi yai masigi te ni yabe tigi tiwai masigi beril. Te a olama me si me si te sewa yai masigi topas. Te nogo si wali masigi te krisopres, te me ni yabe tiwai me te sewa yai masigi dao. Te nogo si olama sąqą badu deli wali te gasagi yai sisi yai masigi nogi haiasin. Tama te nogo si olama sąqą badu si gasagi yai mama yai masigi nogi ametis masigi dao. Te obo

^m 21:13 Ese 48:30-35

page genuai masigi dabe augwali te tedali tedali wiegi yai masigigo tama tiwai au elama bidibo eno suali.²¹ Te nogo si olama sąqą badu si obo tų te nogo si olama sąqą badu si te tedela yai bis te wiegi yai mu dao. Tų me deli augwaligo te genuai bis mu me deligo naga nigai. Te tigidali hanude pabo tų te wiegi yai kapa golgo naga nigai, tama hanian mu te glas tiwai yai eno suali.ⁿ

²² Eno te moni lotu be tempel me deli te hanude elalubo subeo. Magi baso meni. Genuai Bidi God, aga Tigidali Bomo Elalubo Bidi, aga dali te Kibu Sipsip Wai dali, augwali si digi te hanugo moni lotu be tempel tiwai dao.²³ Tama te hanude te giliga dali polua si te sę esiąyu te ula ilibeo. Menio. Te God aga digi te genuai ulago te ula mabo dao. Tama te Kibu Sipsip Wai te aga te hanugo ula mabo lam sole dao.^o ²⁴ Tama tigidali tqde bidi hani augwali te hanu ula ebode biliyu bidaibao. Tama haniani tqde tuni bidi augwaligo nogi elalubo au dobage tigidali te hanu tomoba naga selasa asaibao.²⁵ Tama siade augwaligo te hanugo obo tų dabe munu me paliagobeo, tama be hulia sabo te hanuba pedalogobeo.²⁶ Tama tigidali tqde bidi hanigo genuai nogi me, te ula yai bomo me, te tigidali te augwaligo te hanu tomoba naga sela paibao.^p ²⁷ Tiali goli, te dwai meda yai kolesaga ebo bidi te hanu tomoba pogobeo. Te haniani dwai kolesaga eyu, te tibo po weyu ebo bidi dabe, te hanu tomoba me pogobeo. Mu menio. Te Kibu Sipsip Wai agai te we bidi dabe meba augwali nogi te isisamax gamonaibao wali we bidi nogi aşeani buku, te bukude augwali nogi aşeani we bidi dabe augwali naga augwa te hanu tomoba pabo usu yaibao.

Bidabo ula mabo aji badi, te bidabo ula mabo ni dali si

22 ¹Tama te ensel mobo bidigo pabo aji me deli ena ola mawai, te bidibo ula mabo wę, tama te wę te dula ula mu gegemani ebo tiwai ula yai. Tama te aji aga gomo, te God dali te Sipsip Wai augwali sigo tuni bidi duabo sai pagede te aji gomo elalubao.^q ²Tama te aji te duabo sai pagedu pedalama, tama te aji te hanu moni pabo tų tomodu mu pabo dao. Te wę sesege u badu me, te wę sesege e badu, tede te bidabo ula mabo ni dabe elalubao. Te ni dabe augwaligo du walobo sogo te kibu be delide te nogo si olama sąqą badu si sogo walobo dao. Te tigidali poluade walobo dao. Tama te ni yabego te tigidali tqde we bidi hani augwali usu ilibo dao.^r ³Tama tigidali nai Godigo agabolo po hwa pabo po obaso, te nai te hanude ma elalugobeo. Te God dali te Sipsip Wai augwali sigo tuni bidi duabo sai te hanu tomode elalueibao, tama Godigo sę bidi augwaligo aga dali lotu po waibao. ⁴Tama augwaligo aga gesabidi sueibao, tama agai

ⁿ 21:21 Ais 54:11-12 ^o 21:23 Ais 60:19-20 ^p 21:26 Ais 60:11 ^q 22:1 Ese 47:1; Sek 14:8

^r 22:2 Gag 2:9

nogi augwali gebode aşenama elalueibao. ⁵Tama be ma hulia sogobeo. Tama te lam sole ulade me te giliga ulade me sę yali te sę ma elalugobeo. Menio. Genuai Bidi Godigo aga digi ula augwalibolo mawaibao. Tama augwali te sogo tuni bidi bidata peyu bidata paibao.^s

Jisas tamadi asaibao po wai

⁶Tama te ensel mobo bidigo enabolo te po wai, “Te nago aşenani po tigidali, e po te mu po dao, tama tigidali bidigo e pode homu dą̄ olama tama teba tią̄lubo te usu yaibao. Tama Genuai Bidi God agai po pusumainogo ebo bidigo homu noma bidi hodolomainogo agai aga Mobo Bidi te bidi dabebole mabo dao. Tama megı̄ agai aga ensel mobo bidi tagala palama, agai sę bidi tigidilibolo te tamadi pedalabo sęde po ola momainogo yai,” te ensel mobo bidigo enabolo te po wai.

⁷“Odao,” te Jisasgo te po wai. “Te ena dage bidibo madi tamadi asaibao. Tama niwai bidi me deligo agai te e bukude elalubo po wali peyu da, teda te bidi aga wiegi yai homu pemene yaibao.”

⁸Ena Jon, eno digi te po tigidali odai, tama te nai dabe tigidali eno suai dao. Eno odolama tama eno suai, tama enabolo te nai ola mani ensel mobo bidi są̄qa pą̄ba eno kidu sugunama, tama agabolo eno lotu po wainogo yai. ⁹Tiali goli agai enabolo te po wali, “Nago tama tigio! Ena nage dali me, e naga ama dede dali, da deli sę naga ebo dao, augwali te Godigo po ola mabo bidi dabe dao. Tama ena e bukude po wali pabo tigidali bidigo deli sę ebo bidi dao. Nago lotu po God deli dali naga wao,” te ensel bidigo te po wai. ¹⁰Tama agai enabolo te po wai, “Te po nago e bukude aşenani po, te nago geme dualama dą̄ wagio. Menio. Te po we bidigo nedemainao. Te bukude wali sę dabe yabo sogo te pą̄ba yagasaki dao. ¹¹Tama te dwai kolesaga ebo bidi agai te dwai kolesaga mę̄ ela pomainao. Bidigo dwai meda yai kolesaga ebo, te bidi agai te meda yai kolesaga mę̄ ela pomainao. Tama te wiegi yai doloba pai kolesaga ebo te bidi, agai te wiegi yai doloba pai kolesaga mę̄ ela pomainao. Tama magi sę me isı̄ma olo mu bidibo bidi, te bidi aga te sę me isı̄ma aga olo mu mę̄ bidimainao,” te ensel mobo bidigo te po wai.^t

¹²Te Jisasgo te po wai, “Odao! Te ena tamadi asaibao. Tama eno te tigidali bidibolo maiabo nai sesaibao. Tama eno te tigidali we bidi deli deli augwalibolo wei ponomainogo, te augwa yali kolesaga te usu nama te tama tiaibao.”^u ¹³Ena da, ena digi te hasia bididuali bidi dao, ena te nosali sogo mu bididueibao wai bidi mu dao. Ena naga te polasa mu peyu, te ena nosali mu eyu ebo bidi dao. Te ena tigidali nai page bidi, tama eno ebo sę tigidali ela silibo dao,” agai te po wai.^v

^s 22:5 Dan 7:18 ^t 22:11 Dan 12:10 ^u 22:12 Tib 28:4; Ais 40:10; Jer 17:10

^v 22:13 Ped 1:8

¹⁴Te we bidi augwaligo augwa ugwa we telabo bage, te we bidi augwaligo wiegi yai homu yao. Augwaligo te bidabo ula sabo nide te du sabo usu yaibao. Tama augwali te hanu tomoba pabo tündu pabo usu yaibao. ¹⁵Tiali goli te dwai dwai kolesaga ebo bage, augwali te yowi dabe tiwai da, augwali me, te pobi po wabo bidi dabe me, te penani kolesaga ebo we bidi me, te bidi ela mubo bidi dabe me, te tibo god dali lotu po wabo bage, tama te ili po wabo kolesaga godolo eyu wali pabo bidi dabe, te dwai kolesaga wali pabo bidi dabe augwali te Godigo hanu bulu badu bidaibao.

¹⁶“Ena Jisas, eno digi eno mobo bidi dageba tagala palai, tama agai te eno po wali pabo we bidi hani dagebolo e po pusumainogo yai. Ena digi ena te polobadu bidai bidi Devit aga hani bidi wāj dao. Tama te kigamu mu pedalobo te genuai hq te ena dao,” agai te po wai.^w

¹⁷Te Godigo Mobo Bidi dali, te Kibu Sipsip Waigo we dali sigo te po obao, “Nage asao.” Tama e po odali we bidi tigidali augwaligo me te po wao, “Nage asao.” Tama te wę nogone ebo bidi, aga asomainao. Wę tuainogo ebo bidi, aga aselama, te bidabo ula mabo wę tuagasao, te Godigo agabolo olo mu mawaibao.^x

¹⁸Te ena te bidi Jon dao, tama te e bukude elalubo po, te nosali pedalabo sę po, te po odobo we bidi tigidali augwalibolo eno e bomo yai po megı obao. Niwai bidi me deli agai aga homu wali peyu, tama te gasa po e bukude wasiąwai po agai te po wadolobaso da, teda e bukude wali dwai bidi dolobo nai te Godigo te bidi dolomainogo te bidiba te dwai nai tagala palaibao. ¹⁹Me ma, bidi me deligo te e bukude elalubo po, te nosali pedalabo sę po, te po meba agai sela savy da, teda Godigo te agabolo maiabo sa muani nai sela sawaibao. Tama tiyu, te bidigo te bidabo ula mabo nide te du sogobeo. Tama aga te dwai sę isiąbo wiegi yai hanude bidabo madi tede bidigobeo. Te nai side po e bukude elalubao.^y

²⁰E tigidali sęde po pusali bidi megı agai te po obao, “Mu tama, te ena polo asaibao!”

Awe, mu tama dao. Genuai Bidi Jisas, nage asao!

²¹Te eno homugo te Genuai Bidi Jisas agai da
olo mu tau siyu te mabo wiegi yai kolesaga te dage
tigidali dali bidao.

^w 22:16 Ped 1:8 ^x 22:17 Ais 55:1 ^y 22:19 Bom 4:2; 12:32